


El Nuevo Testamento en mixe de Coatlán



New Testament in Mixe, Coatlán (MX:mco:Mixe, Coatlán)

El Nuevo Testamento en mixe de Coatlán
New Testament in Mixe, Coatlán (MX:mco:Mixe, Coatlán)

copyright © 1976 Wycliffe Bible Translators, Inc.

Language: Coatlán Mixe (Mixe, Coatlán)

Translation by: Wycliffe Bible Translators, Inc.

Mixe, Coatlán [mco], Mexico

Copyright Information

© 1976, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixe, Coatlán

© 1976, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 4 Mar 2019 from source files dated 22 Dec 2018
4190de74-18ab-52cf-ba4e-5f99ab05892f

Contents

SAN MATEO	1
SAN MARCOS	53
SAN LUCAS	90
SAN JUAN	143
HECHOS	190
ROMANOS	238
1 CORINTIOS	264
2 CORINTIOS	288
GÁLATAS	305
EFESIOS	315
FILIPENSES	324
COLOSENSES	330
1 TESALONICENSES	336
2 TESALONICENSES	341
1 TIMOTEO	344
2 TIMOTEO	350
TITO	354
FILEMÓN	357
HEBREOS	359
SANTIAGO	377
1 PEDRO	383
2 PEDRO	390
1 JUAN	394
2 JUAN	401
3 JUAN	402
JUDAS	403
APOCALIPSIS	405

SAN MATEO

Jaayhu'i'my Jadu'n Nej Jesucristo Ytun Yjajti

Je Jesucristo ymij'ap ymijteedy

¹ Cham ngapxa'ñ nmiydäga'ñich pin Jesucristo y'ap'ajt yteedy'ajt jadu'n nej yhu'i'my jaybety. Jesucristo je' oy ap'adyii teedy'adyii David etz Abraham.

² Abraham oy ung'adyii Isaac. Isaac oy ung'adyii Jacob. Jacob oy ung'adyii Judá etz y'ajchytijc y'uchytijc. ³ Judá etz Tamar oy ung'adyii Fares etz Zara. Fares oy ung'adyii Esrom. Esrom oy ung'adyii Aram. ⁴ Aram oy ung'adyii Aminadab. Aminadab oy ung'adyii Naasón. Naasón oy ung'adyii Salmón. ⁵ Salmón etz Rahab oy ung'adyii Booz. Booz etz Rut oy ung'adyii Obed. Obed oy ung'adyii Isaí. ⁶ Isaí oy ung'adyii rey David. Je rey David je' oy ytöxyijc'adyii huidi anajty Urías ytöxyijc'ajtpy. E je' ajcxy y'ung'ajti Salomón.

⁷ Salomón oy ung'adyii Roboam. Roboam oy ung'adyii Abías. Abías oy ung'adyii Asa. ⁸ Asa oy ung'adyii Josafat. Josafat oy ung'adyii Joram. Joram oy ung'adyii Uzías. ⁹ Uzías oy ung'adyii Jotam. Jotam oy ung'adyii Acáz. Acáz oy ung'adyii Ezequías. ¹⁰ Ezequías oy ung'adyii Manasés. Manasés oy ung'adyii Amón. Amón oy ung'adyii Josías. ¹¹ Josías oy ung'adyii Jeconías miid y'ajchytijc y'uchytijc. Huin'it Babilonia jäy oy mach je israelitas jäy. Chi minicxy jim Babilonia y'it.

¹² Jim ma je Babilonia y'it, jim Jeconías oy ung'adyii Salatiel. Salatiel oy ung'adyii Zorobabel. ¹³ Zorobabel oy ung'adyii Abiud. Abiud oy ung'adyii Eliaquim. Eliaquim oy ung'adyii Azor. ¹⁴ Azor oy ung'adyii Sadoc. Sadoc oy ung'adyii Aquim. Aquim oy ung'adyii Eliud. ¹⁵ Eliud oy ung'adyii Eleazar. Eleazar oy ung'adyii Matán. Matán oy ung'adyii Jacob. ¹⁶ Jacob oy ung'adyii José huidi oy ñäy'adyii María. E je María oy ung'adyii Jesús huidi yxi Cristo.

¹⁷ Jadu'n oy ñicxy majmactz najtzquëxi' Abraham ixti David. Ma je David jamajmactz najtzquëxi' chi je israelitas jäy yajtzimiy yajmajch ma Babilonia y'it, e nañ jamajmactz najtzquëxi' chiini oy ymiñ yja'ty je Cristo.

Jesucristo yma'xung'ajtin

¹⁸ Jadayab capxy ayuc jadu'n nej ymiñ yja'ty je Jesucristo. Jesús ytaj, huidi anajty yxi María, yi' ti anajty ycapxytungixy co ypigaangixy miid José; e ma anajty ca'ni ñaybudigiiyigixy, chi María oy y'ungdzimigy miid yi Dios yjihui'ñ ymic'ajt. ¹⁹ José, yi' ñäy, hue' anajty yi' yajpaty janch tudägy. Ca' anajty xihua'ñ María mayjäyjoty. Hue' janchtiy yhuinma'ñybaty co ixmadza'ñ ayüch ameech ca' pin yajnejhuñhua'ñ. ²⁰ Huin'it ma jadu'n anajty nihuinmayiy, chi Huindzin Dios tüg y'ángel ñayquëxici cumäyjoty ma José, chi ñimaayi:

—José, David y'ap y'oc, ca' mijcajee mdzachhuinmay nej m'octöxyijc'adiiyb María, com yi' y'ung huidibi yajma'xung'adamy hue' miid Dios yjihui'ñ ymic'ajt ycixpi. ²¹ Yi' ypadamy tüg y'ung e mximöhuipy Jesús. Jadu'n yi' xii'adiiyb com jëgix co yi' yajpocyñihuádzam ñaax ycajp.

²² Tüg'óciy jada ytundaayi yajtaayi ycijxy yca'pxy jadu'n nej je Dios anajty ti nimäy je profeta, je jäy huidi Dios y'ayuc najtzcapxiyip ma anajty jadu'n yjaybetyity:

²³ Je töxyjäy huidibi ca' yëydijc miiddzinäy hue' je' ung' tziimicp. Chi ypadamyb tüg je y'ung hue' je' yxi'adaanip Emanuel.

Emanuel hue' yhuimbizimiy Dios miid ich ajt.

²⁴ Co José ymäyhuijy, chi cuyduñ jadu'n nej anajty Dios y'ángel ti nimäy, chi huoy María jadu'n nej jihuiy töxyijc'adyii. ²⁵ Per ni ca' ajcxy jadu'n chinaay jadu'n nej jäy ypicxy chinäy ixti cooni oy María y'ung yajma'xung'aty. Chi yxiimoy Jesús.

2

Madza' ni'ixpigiiyib oy co'ixiiygixy pi'c'ung

¹ Jesús yma'xung'ajty ma tüg cajp huidi yxii Belén, jim ma Judea ñaaxjot, huin'it co anajty Herodes yrey'aty ma yi jimbi naaxjot. Chi huin'it yja'ty ma Jerusalén cajp nijëjity yëydijctijc huidibi anajty ti choñ ma xii ypidzimy, yi huidibi anajty ajcxy xii madza' ti ni'ixpigiiygixy. ² Chi ajcxy yajtiy:

—¿Ma je judíojäy yrey tiibi yma'xung'aty? Ti iich ajcxy n'ijxi yi' ymadza' jim ma xii ypidzimy, e yi' iich ajcxy ya miñ nhuindzigihuaangixy.

³ Co je rey Herodes jadu'n midooy, chi ooy ytigiiy tajpi maybi miid tüg'óciy cajpjäy jim Jerusalén. ⁴ Huin'it je rey huomujctay tüg'óciy teedytjic huindzindijc huidibi anajty yaj'ixpijcp yi Dios yley, chi yajtiy ma anajty yma'xung'ada'ñ yi Cristo. ⁵ Chi ajcxy y'adzooy:

—Jim Belén ma Judea ñaaxjot, com Dios y'ayucnajtzcaxiiybi jadu'n je' cojaay:

⁶ E miich Belén, mabi Judea ñaaxjot, mij'ajtp mgix'ajtp ca'ydi jac huidi naax jac huidi cajp, com ma miich chona'ñ tüg Huindzin huidi ane' mam yi israeljäy.

⁷ Huin'it Herodes oy yajhuoyii ameech huidibi anajty ti ijxcixy yi madza'. Chi tiybijcy yajxon mina anajty oga'n ti ijxcixy je madza'. ⁸ E huin'it ajcxy quejxy jim Belén. Chi jadu'n nimay:

—Níxcix jim e ocnidiu ocyajtiugixy je pi'c'anäg; e co anajty ti mbatcixy, miñ miich ajcxy xyajnimáaygixyich jaydébi iich nicxy nañ jadu'n nhuindzigiiyich.

⁹ Co jadu'n rey najtzcaxiyday, chi ajcxy choñ. E je madza' tiibi anajty ijxcixy ma xii ypidzimy, chi ajcxy ijxy jayjip je' anajty ñicxy ma je' ajcxy, ixti coní oy je madza' yhuácxipy ma anajty je pi'c'anäg yajpaady. ¹⁰ Co je rey ixpicytjic jadu'n ijxy yi madza', chi ajcxy oy janch jotcuic ñayjihuiyii. ¹¹ Co ajcxy ytijctigiiy, chi ajcxy ijxy je pi'c'anäg miid ytaj je María. Chi jada' ajcxy ñaygojxtinaydaaci huindzigiiy ojadajty ajcxy je pi'c'anäg. Chi ajcxy yaj'ahuach yxuomy aguejtucy abijctucy, chi ajcxy yajpidzimy oori, poom, etz tüg tzoy huidi yxii mirra. Chi ajcxy moy je pi'c'anäg. ¹² Chi cumäjyoty ajcxy nimaayi co ca' huaad yhuimbijtcixy ma Herodes, chi ajcxy ñicxni ma ycajp, jüyöyñaxy ajcxy je Herodes, huingbi tü'aa ajcxy ycuynicx.

Co José etz María yqueegyñicxcixy Egipto

¹³ Co je rey ixpicytjic ajcxy yhuimbijttaayñi, chi cumäjoty José ijxy tüg Dios y'ángel, chi ñimaayi:

—Pidíg, nicx jim Egipto ñaaxjot miid yi pi'c'anäg etz miid yi' ytaj, e jim mhui'mipy ixti cooni iich miich nimähuiy. Com yi Herodes y'ixtähuamy yi' yi pi'c'anäg e yaj'öga'ñ yi'.

¹⁴ Chi huin'it José ypidígy miid tzoñ coodz je pi'c'anäg miid ytaj, chi ajcxy ñicxy jim Egipto. ¹⁵ Jim ajcxy y'ijty ixti cooni oy y'ögy je Herodes. Jada je' jadu'n yajcuydun jadu'n nej Dios anajty ti yminañ ma yi' y'ayucnajtzcaxiiybi: “Jim Egipto iich n'ung ti nhuoy.”

Herodes pidacy y'ane'min co huen pi'c'anäg yaj'öctäyii ajcxy

¹⁶ Co Herodes oy huinma'ñ yajyöy co ti anajty ooy yhuin'iiñyii je rey ixpicytjic ajcxy co ca' anajty ti ñihuimbidyii, chi ooy yjot'ambijcy, chi ni'ane'mdiy co huen nicxy jim Belén etz majaty cajp mihuingon Belén, yaj'öctaaygixy tüg'óciy yi pi'c'anäg huidibi mejtz jimijt etz huidibi ca'ni nigooty mejtz jimijt. ¹⁷ E jadu'n jada yajcuyduñ jadu'n nej anajty Dios y'ayucnajtzcaxiiybi, je Jeremías, anajty ti cojaay:

¹⁸ Jim Ramá yajmidoy co anajty chachjiy chachyäxy jäy ajcxy; yi Raquel tzachjiyby tzachyaaxp miid y'ung ajcxy ycixpi, ca' ajcxy anajty yjotcuic'aty miid co anajty y'ung ti y'öctäy.

¹⁹ Co oy y'öcni Herodes huin'it jim Egipto, Dios tüg y'ángel ñayguëxici cumäjoty ma José. Chi ñimayi:

²⁰ —Pidíg, miidnicx yi pi'c'anäg etz yi' ytaj jim ma yi Israel ñaaxjot jadügtecy com ti y'öctaayñi yi huidibi anajty yaj'ögam yi pi'c'anäg.

²¹ Huin'it José ypidígy, miid nicxy yi pi'c'anäg etz yi' ytaj jim ma Israel ñaaxjot. ²² Per co José nejhuüiy co je Arquelao yi' anajty jim ane'mb jadu'n nej anajty je yteedy Herodes, ooy chigüiy nej ñicxip jim. E co jadu'n anajty ti ycumäy co ca' jim ñicxip, chi ajcxy ñicxy jim Galilea ñaaxjot. ²³ Co jim yjäty, chi jim chinaydacpüjcy ma je cajp huidi yxii Nazaret. Jadayaabi je' jadu'n tun jajti jadu'n nej anajty ycojaayity ma Dios y'ayucnajtzcaxiiybi ñecy co Jesús xii'adiiyb Nazareno.

3

Juan el Bautista y'ayuc capxhuäcxy ma tädz naax it

¹ Huin'it tiempo ñañ jadu'n Juan je Bautista (huidibi jäy yajniibejtpi) ymiñ tüg tigüidum ma Judea ñaaxjot capxhuäcx Dios y'ayuc, ² yminañ:

—Jothuimbijtcix ma Dios com yi Dios y'ane'min huingoniñ yi'.

³ Jada Juan yi' je' huidibi je profeta Isaías nigapxy yminañ:
Jim mijtigüidum yajmidoy tüg ayuc mina'ñ: “Ni'ixiiygixy yi mHuindzin ytü'aa, ni'ixiiygixy tüg tü'aa tüybi.”

⁴ Je Juan hue' anajty yhuit'ajtpy iyujc nibijc (huidibi jäy ytijpy camello) e hue' anajty yhuüinip iyujc ac, e yi' anajty yjicxy'ajtpy mu' etz tijaty iyujc päg jim tüg tigüidum. ⁵ Chi chooñ jim Jerusalén jäy etz tüg'óciy huidijaty tzinaayb ma Judea ñaaxjot, ñañ jadu'n huidijaty tzinaayb ma Jordán mijniiba', ñicx ajcxy ma Juan amido'íjtüy yi' y'ayuc. ⁶ Co anajty ajcxy nigapxtaaygixy yi ypocy huidi anajty ti tundigooygixy, huin'it anajty ajcxy Juan yajniibedyii ma Jordán mij niñ.

⁷ Per yi Juan y'ix co may fariseo jäy etz saduceo jäy miñ anajty ajcxy niibejtcixy, chi ajcxy nimay:

—¡Miich ajcxy, m'ajuugy m'amigüg ahua'n iyujc! ¿Pin ti xyajni'ixiiygixy nej jëbi huaad mgögueeccixy yi ayo'n huidibi huingomb? ⁸ Yajxon jäy'ajtcix tiydudägy huen niguëxügy co ti mjothuimbijtcixy. ⁹ Ca' jadu'n mdzachminaangixy co Abraham xy'ap'adyii xy'oc'adyii. Hich miich ajcxy yam ndimnimaayb co Dios ixti jëbi yi' yaj'ap'adyii yaj'oc'adyii Abraham jada tzaajot ca'ydi miich ajcxy. ¹⁰ Yi jach ni'ixi yi' y'ijtni ma quipy y'ijx, tüg'óciy quipy huidi ca' oy ytim'aty yajpujxp yi', e chi jada' yajnögy jijnjoty. ¹¹ Hich, janch yajniibejtpich miid niñ, yi' yi' jadu'n nej tüg ixpejt co ti mjothuimbijtcixy; per jacminamb tzojc huidi ajcxy xyajniibedipy miid Dios yjihui'ñ etz miid jün. Je' ymiid mic'ajtin etz cötujcin, niñi ca'ydi iich, ni xycapaadyich nicxy ycig nyajtecyjendügyich. ¹² Ymiid mic'ajtin pijc-huäcxamy yi jäy jadu'n nej jäy huimbojy moc, abicy pidäga'ñ actz, abicy moc pajc. Yujcpiga'ñ moc pajc ma tze'x ninögühua'ñ yi moc actz moc jaam jijnjoty ma je jün huidibi nicaminaaxii ycapich.

Co Jesús ñiibejty

¹³ Huin'it Jesús chooñ ma Galilea ñaaxjot, chi ñicxy ma Jordán mij niñ ma anajty Juan yjäyyajniibety, niibedam anajty yi' ñañ jadu'n. ¹⁴ Juan ca'jadim'a'ixiiy, chi nimay Jesús:

—Hich miich ixypy xyajniibejtpich, ¿e miich mimb ma iichi?

¹⁵ Chi Jesús y'adzooy:

—Jadachambi oc'a'ixii jadu'n, com ooy yi' ycopityity co nguydundayim tüg'óciy tübi Dios xyaj'ane'mim.

Huin'it Juan a'ixiiy chi yajniibejty Jesús. ¹⁶ Co Jesús ñiibejtay, chi Jesús ijxy Dios yjihui'ñ nigidägyii jadu'n nej tüg pi'cmuuxy. ¹⁷ E huin'it yajmidoy tzajpcixy tüg ayuc ymina'ñ:

—Jada je' iich n'ung'ajtypich huidibi ooy ndzocyich huidibi ooy miid jotcuyc nayjihuiiyijich.

4

Je mujcu' tuñ ijxta'ni Jesús

¹ Chi Dios yjihui'ñ yajnicxy Jesús mǝjtǝgǝduum jaydǝbi je ca'oybi yjot'ixiǝyb yhuinma'ñ'ixiǝyb. ² Jim y'ijty jaygay huixchigui'px xii huixchigui'px tzuum, e huin'itni ooy yiböccodyii. ³ Chi je ca'oybi nimijhuägy Jesús ocjot'ixa'ñ oc-huinma'ñ'ixa'ñ, chi nimay:

⁴ —Pen Dios miich xy'ung'ajtp, nima' jada tzaa huen naygojyii tzajcaagy.

Chi Jesús y'adzooy:

—Jaybety jadu'n ymiñ ma Dios ñecy: “Ca'p jäy tzajcaagyti'ajty nitzinähuiipy, nañ jadu'n nitzinähuiipy tǝg'öciy yi ayuc huidibi Dios ycapxp.”

⁵ Chi je ca'oybi miidnicxy Jesús jim Jerusalén, chi ymiidpejty tzajptǝc cöduum. ⁶ Chi nimay:

—Pen janch co miich Dios xy'ung'adyii, cödiǝpnax jiiby naaxcǝxy, ca' yi' nej mjadǝpy com jaybety jadu'n ymiñ co jadu'n ymiñ'ñ:

Dios yquexyp yi' y'ängeles jigix xycuend'adǝpy xyhuidzǝpy miid yci', ca'ydi ninej mgönepy ma tzaagop.

⁷ Chi Jesús y'adzooy:

—Nañ jadu'n ymiñ jaybety: “Ca' mǝjot'ixiǝpy mhuinma'ñ'ixiǝpy yi mhuindzin Dios.”

⁸ Jadüg'oc je ca'oybi ymiid'ajty Jesús ma tǝg copnicx janch cijxpi, e jim yajni'ixiǝyday tǝg'öciy naax cajp co ooy miidǝty oy'ajtin etz mic'ajt. ⁹ E chi nimay:

—Iich jada miich nmoydähuiipy tǝg'öciy, pen miich cojxtina' xyhuindzigǝyich xy'ojadatyich.

¹⁰ Huin'it Jesús y'adzooy:

—Huinhuäctutcǝch miich mujcu', com jadu'n yjaybetyty: “Tǝgpajc yi mhuindzin Dios yi' mhuindzigǝhuiipy m'ojadadǝpy.”

¹¹ Huin'it je ca'oybi huinhuäctucy Jesús, chi Jesús ñimiini ängeles ycuend'ajti.

Jesús ytung yajtzondacy jim Galilea

¹² Co Jesús nejhuǝy co Juan ti anajty yajpidägy pujxtǝgoty, chi yhuimbijtni jadüg'oc jim Galilea. ¹³ E ni ca' yhui'miǝy jim Nazaret, chi ñicxy jim Capernaum, jim ma Zabalón etz Neftalí y'it. ¹⁴ Jada je' jadu'n tuni jajti jadu'n nej Dios y'ayucnajtzcapxǝybi Isaías anajty ti cojaay:

¹⁵ Zabalón etz Neftalí ñaaxjot. Je tü'aa huidibi mejypa' huidibi a'oy'amy ma Jordán mij niñ. Jim Galileajäy chinäy huidibi ca' yjudiojäyty.

¹⁶ Yi jäy ajcxy huidibi jim tzinaayb agootztuuby ijxpaty ajcxy tǝg tiicxin jajin. Je huidijaty anajty ajcxy tzinaayb ma je jibicpi y'anicǝy, chi ajcxy ycodicxǝy tǝgi tiicxin jajin.

¹⁷ Ixti huin'it Jesús ytiǝy ayuccapxhuäcxp ymiñ:

—Jothuimbijtcǝx, yajmingix yajmejtzcǝx mǝjot mhuinma'ñ ma Dios, com yi Dios y'ane'min huigonip yi'.

Jesús nimay nimidaax je acxmajtzpi: “Pajamgich”

¹⁸ Jesús tǝyöyb anajty ma Galilea mejypa', co ijxpaty metz yǝydǝc ac tǝg quǝxpi, hue' anajty yi' je' je Simón, huidibi nañ jadu'n yxii Pedro, e je jadügpi hue' je' anajty Andrés. Acxmadziñ anajty ajcxy yi' ytung'ajty e jim anajty ajcxy yi' tzachniǝgöhuich y'acxmadzi'ñ. ¹⁹ Chi Jesús nimay ajcxy:

—Pajamgich, iich miich ajcxy nyajni'ixiǝhuiipy nej jäy myaj'ixpigipy je Dios ytiy'ajt.

²⁰ Huin'it je' ajcxy ixmajztay tǝg'öciy yi' y'acxtzaay, chi ajcxy panicxy Jesús.

²¹ Hueeni jac'amijci'm Jesús ijxy janimetz Zebedeo ajcxy ymang, je Jacobo etz Juan. Jim anajty yi' ajcxy ma tǝg barco miid yteedy, yi' anajty ajcxy yi' jim chach'adagǝybi yi huidibi mi'acxmajtzcǝxy. Chi ajcxy Jesús yhuoohui. ²² E huin'it ajcxy ixmajztay je barco etz yi' yteedy, chi ajcxy panicxy Jesús.

Jesús yaj'ixpicy mayjäy

²³ Huidijttay Jesús ma tüg'óciy Galilea ñaaxjot, yaj'ixpicy jäy majaty je naymujctac cajp cajp. Capxhuäcxy yi Dios ytiy'ajt etz nañ jadu'n pa'mjäy yajtzocy huen ytimyhuidipá'mity anajty ajcxy ymiid. ²⁴ Chi Jesús oy yajnejhuiñi ma tüg'óciy yi Siria ñaaxjot, e chi ajcxy miidmiñ ma Jesús tüg'óciy huidijaty anajty ajcxy ca'oybi miid, etz huidijaty anajty ajcxy cixuxy tecyxuxy, chi Jesús yajtzooxy. ²⁵ Huin'it Jesús ypanicxi mayjäy huidijaty anajty ajcxy tzinaayb ma Galilea ñaaxjot etz yi Decapolis jäy, nañ jadu'n Jerusalén jäy etz huidijaty tzinaayb ma Judea ñaaxjot, nañ jadu'n huidijaty anajty ajcxy tzinaayb a'oy'amy ma Jordán mij nii.

5

Je tiy'ajt huidibi Jesús ycapx ma tüg cögop

¹ Co Jesús ijxy tüg'óciy je mayjäy, chi nicxy ma tüg copnïcxy, e chi jim y'ixtacy. E huin'it je' y'ixpijcpidijc ajcxy yjübigiyy. ² Chi Jesús ytiy'ajt yaj'ixpijcp yminañ jadu'n:

Je pinjaty ajcxy jotcújcip

³ —Janch jotcuyc je jäy ajcxy huidibi nejhuiyb co yajmayajtpy Dios y'oy'ajt, yi' ajcxy paatip Dios y'ane'min.

⁴ Janch jotcuyc je jäy ajcxy huidi yajpatp taj may, yi' ajcxy yajmöhuam jotcuyc'ajtin.

⁵ Janch jotcuyc je jäy ajcxy huidibi yung naxpy jäy'ajtp, yi' ajcxy padaamb tüg'óciy je huidi Dios ti yaj'ahuaniyyii.

⁶ Janch jotcuyc je jäy ajcxy huidibi cuydunamb huidibi Dios chojcpy, Dios yi' ajcxy pubediib.

⁷ Janch jotcuyc je jäy ajcxy huidibi pa'ayoob huenyimpinjäyity, Dios nañ jadu'n ajcxy pa'ayohuiib.

⁸ Janch jotcuyc je jäy ajcxy huidibi huädz yjot yhuinma'ñ, yi' ajcxy y'ixipy yi Dios.

⁹ Janch jotcuyc je jäy ajcxy huidibi ca' ti tzip tzojccixy, com yi' ajcxy Dios ung'adiib.

¹⁰ Janch jotcuyc je jäy ajcxy huidibi yajnixiicp yajnigapxp miid je Dios ytiy'ajt ycixpi. Yi' ajcxy idamb ma Dios y'ane'min.

¹¹ Janch jotcuyc miich ajcxy co jäy jibic xytungixy co nigoob xyñihuambejtcixy etz capxcixy huidijaty ca' ytiy'ajtiy miid iich ycixpi. ¹² Xondaaccix jotcuyc'ajtcix co mbadaangixy tüg oy'ajtin jiiyby tzajpjoty. Nañ jadu'n ajcxy ixhuidijty pahuidijty je Dios y'ayucnajtzcaxiyybi jecy'ajty.

Miich ajcxy je tudägyjäy ya naaxhuiñ

¹³ Jadu'n nej caan ca' yajpüch je tzüch jiiçxy tim jadu'n miich ajcxy myajpaady ya naaxhuiñ. Pen je caan ca' miid ti xücx'ajtin, ¿nej jébi nyajtuunim? Ca' y'oc'oyajtunity, chi yajnajtzxidiñi, chi yhuaani tembejt hua'cpejt.

¹⁴ Oc'ix tüg je cajp jim copcix, ca' jébi mhuijtyüdzim mgoyüdzim. ¹⁵ Co tüg jiiñ nyajtoyicim, ca' huaad tu'tz ngöjupim. Hue janchtiy co nyajtiicxim cix, huin'it jébi xycodixtaayim jadu'n nej ajt nyajpaatim ma tijc. ¹⁶ Nañ jadu'n miich ajcxy mdzinaaygixy tudägy ma ajcxy je mayjäy jaydëbi ajcxy ixipy je oybi huidi miich ajcxy mdumyby. Huin'it ajcxy ojadadipy je mDios teedy huidibi jiiyby tzajpjoty.

Jesús yaj'ixpicy nej yi' yi Dios ycötujcin

¹⁷ Ca' mhuinmay co iich ti nmiñich ya co nbigaanich je Dios y'ayuc je' huidibi anajty ti jaay Moisés etz je profetitjc. Ca' iich nyajmijaagixa'ñ je cötujcin, iich ti nmiñich co nguyduna'ñich jadu'n nej ymiñ jaaybety. ¹⁸ Janch tiy'ajt jadu'n nej nimaaygixy, je huidibi mimb jaaybety jadu'n tundähuam jajtähuam. Ni tüg letra oy mabaad ymúdzity nicxy ycayajcuyduñ. ¹⁹ Je jäy huidibi ca' nimidooy je Dios ytiy'ajt oy yjadim mutzjaty etz yaj'ixpicy jäy jadu'n, je' ajcxy padamb je mutzpi tigiydac ma Dios y'ane'min. Paady je jäy huidibi yaj'ixpijcp jadu'n nej tiy'ajt ymina'ñ, e paduñ jadu'n nej yaj'ixpicy, je' ajcxy padamb tüg je mijpi tigiydac ma Dios y'ane'min. ²⁰ Iich miich ajcxy nimaayb, pen ca'

miich ajcxy jac'oy mdúngixy ca'ydi fariseos etz escribas ajcxy, ca' nimina mdig'ihuipy ma Dios y'ane'min.

Jesús yaj'ixpicy co ca'p huaad pin yjotmädy

²¹ Miich ajcxy mnejhuüygixy jadu'n nej yi m'ap mdeedy ajcxy ayuc yajhui'my: “Ca' jäy myaj'ögip; e pin anajty jäy yaj'öcp ypaadip je tzaachypi.” ²² Hich miich ajcxy jadu'n nimaayb pinjaty ymigügtijc mijotma'tp, je' Dios tiydunaanipy; e pin ymigüg xiidijp tzuudijp, yajtiydunipy je' ma Dios tiydundac; e pin ymigüg tzuudijp locidijp ayo'ndumb, je' y'ity co ñicxip ayoodactuuby.

²³ Pen myajnicxpy miich mhuindzigi'ñ ma Dios ytijc, e pen jim jäymetzgodyii co mmigüg ti xyhuin'innaxy ti xyhuincapxynaxy yinjaty hueenjaty, ²⁴ jim myajhui'm je huindzigi'ñ ma je altar yhuinduu, e nicx jayijp nayyaj'oy'ihuüi miid je migüg, huin'it mhuimbedip e chimgüyecy je mhuindzigi'ñ.

²⁵ Tzojc naygapxjotcidägi miid je midzip, pen yam miid tüyöy ni'am tü'am, ca' jecyity co je midzip xycüyegip ma juez, e je juez xycüyegip ma je policia, e je' nicxy xypidägy pujxtigoty. ²⁶ Janch tiy'ajt ich miich nimäy co ca' jiiby mbidzimipy ixti cooni mgüejtahuipy je meen.

Jesús yaj'ixpicy co ca'p ndundigóoyimipy miid huingbi töxyjäy

²⁷ Miich ajcxy mnejhuüyb co jecyip tiy'ajt ymina'ñ: “Ca' mmidundigoyipy huingbi töxyjäy.” ²⁸ Hich miich ajcxy nimaayb, pen ji pin huindicxy tüg töxyjäy, e jot'adiyb nejaty, ti je' anajty ñitundigooyñi ma yjot yhuinma'ñ.

²⁹ Pen yi mhuin a'oy'amybi xyajtundigoyamb tim yajpidzimb; jac'oy co tüg'idu'mbi mhuin ytigoyipy ca'ydi co cixyca'px mnicxipy jijnjoty. ³⁰ E pen yi mgi' a'oy'amybi xyajtundigoyamb tim ixpux etz najtzjibibi' jiguem; jac'oy co tüg mgi' ytigoyipy ca'ydi co mminicxipy metz mgi' jijnjoty.

Jesús yaj'ixpicy co jäy ca'p huaad ytöxyijc ixmach mañ'ajtingixy

³¹ Nañ jadu'n ymiñ jaaybety: “Pin ixmajtzp ytöxyijc, huen möhuipy tüg necy ti ycixpi co ñay'ixmájtzigixy.” ³² Hich miich ajcxy nimaayb, pen ji pin ixmach ytöxyijc, e ca' anajty ti ytundigooy miid huingbi yëydijc, je yëydijc anajty nigüydeyüyb ytöxyijc co anajty ytundigooy miid huingbi yëydijc; pin yëydijc pijcp miid je töxyjäy huidibi anajty ti yaj'ixmach, pocytumy je' anajty.

Jesús yaj'ixpicy nej nguyduunim tiibi n'ahuaniyim ma Dios yhuinduu

³³ Miich ajcxy mnejhuüyb nej jecy'ajty m'aptijc mdeedytjic ajcxy yajnimay: “Ca' nigo ti m'ahuanihuipy, mguydunipy jadu'n nej anajty ti mmina'ñ.” ³⁴⁻³⁶ Per ich miich ajcxy nimaayb: ni mga'iibaadip ni mgacapxpaadip; ni mgamina'nip; “y'ijxpy tzajpjotyipi,” com yi' Dios chinaydac. E ni mgamina'nip, “y'ijxpy naaxhuiñybi,” com Dios yajpatp oy ytimyaaajity. E ni mgamina'nip; “y'ijxpy Jerusalén,” com jim je' Dios chajptijc; ni mga'iibaadip ni mgacapxpaadip mgohuajc, com ca' mjaty myaj'ahuimbity poob o tzixy tüg cöhuay. ³⁷ Hue' janchtiy, tiydudägy minaangixy: “oy” o “ca'.” E pen miich ajcxy anaxy jaccapxp jadu'n mujcu' y'ayuc je' anajty ajcxy mgapxpy.

Jesús yaj'ixpicy co ca'p huaad jibic nyajhuimbijtim

³⁸ Miich ajcxy mnejhuüyb co jecy'ajty yajmina'ñ: “Pen ji jäy mhuiin xyajpidzimi, nañ tim jadu'n yhuin myajpidzimipy; pen ji migüg mdiitz xyajpidzimi, nañ jadu'n myaj'ahuimbidity.” ³⁹ Per ich miich ajcxy nimaayb: Ca' myaj'ahuimbidity jibicpi ma migügtijc; pen ji pin xycoxy ma mhuiñyjijp tüg adu'mbi, jac tim mo' jadüg adu'm'amybi. ⁴⁰ Pen ji pin xyxy e xypigaani yi mnijen, najtz'ixi', huen xyajnicxi nañ jadu'n mjocx huit. ⁴¹ Pen ji pin adzip tziy xyajminicxa'ñ tüg kilómetro jiguemity, yajnicx jac tim jadüg kilómetro. ⁴² Pen tijaty xypijctzoohui, mo'. E pen ji pin xyminuucxa'ñ, yajnuucx.

Co ndzojcm nmidzip

⁴³ Jadu'n ymiñ jaaybety nej jecyip Moisés yjay: “Migüg'adii yi' huidibi xymigüg'ajtp, e midzip'adii yi' huidibi xymidzip'ajtp.” ⁴⁴ Hich miich ajcxy nimaayb: Tzoc yi' huidibi ajcxy xymidzip'ajtp, etz mibijctzoohui ma Dios huen y'oy'ajtin paady yi' huidibi xyñigapx xyni'ojiiyb, e nañ mi'oyjäy'at yi' huidibi xyca'ixamb. ⁴⁵ Huin'it miich ajcxy xy'ung'adiiby yi' Dios tzajpjtopyi'at yi' huidibi yxii yajtiicxp yajjajp ma oyjäydijc etz ma jibicjäydijc, nañ jadu'n yajtüy ma jibicjäydijc etz ma oyjäydijc. ⁴⁶ Pen miich ajcxy mdzojcpy je huidibi xychojcp, ¿ti jäygidaacin yi' m'ocpadamyb? Nañ jadu'n yi' ajcxy yja'idüitcp yi' pocyjäydijc etz yi' yajcogüejtpidijc. ⁴⁷ Pen miich ajcxy mgapxpocxyp yi' mjugymigüg, ¿ti oybi yi'? Nañ jadu'n ajcxy yi' yja'idüitcp yi' huidibi ajcxy ca' Dios nejhuüygixy. ⁴⁸ Jäy'ajtcix tudägy jadu'n nej ajcxy yi' mdeedy tzajpjtopyi'at ytudägy.

6

Jesús yaj'ixpicy co nduunim oy yjäy'ajtin

¹ Ca' mdungixy je oybi ma jäy y'ixy yhuindicxy miid co mdzachyajhuindicxaangixy co mdungixy oybi. Pen jadu'n m'idüitcixy mDios Teedy huidi jiiy tzajpjtoty tzinaayb, ca' ajcxy xymöhua'ñ je oy'ajtin. ² Paady co mbubedipy mmigüg, je ayoobi jäy huidi yajmayajtpy tijaty, ca' huaad mnigapxy mnimiydägy o mnaygömayii co anajty ti mmöy tijaty. Yi' jadu'n idüitcp je jäy huidi mij cix nayjihuiyip huidi anidaacp co huen jäy y'ixyii mijpidägyii co anajty jadu'n y'idich. Janch ich miich ajcxy jadu'n nimaaygix co yi' ti patcixy je oy'ajtin. ³ Co miich mmöhuipy mmigüg tijaty yajmayajtpy, hue' janchtiy mdunipy ca' myajnejhuüipy huidi miid mnaymigüg'adyii. ⁴ E co miich amöñ m'idipy, mDios Teedy huidi ijxp co amöñ tijaty mduñ, je' xymöhuamb tüg oy'ajtin mayjäyduum.

Jesús yaj'ixpicy nej Dios mmibijctzoohuim

⁵ Co miich ajcxy Dios mmibijctzoy, ca' jadu'n m'idüitcixy jadu'n nej je jäy huidi capxtacp ma Dios huin aguy ahuac aguy. Yi' ajcxy capxtacp ma Dios huäctina' jiiy tzajptigoty jaydebi jäy y'ixiyyb etz ymijpidägyyb. Hich jeyi jadu'n nimaayb, co jadu'n oy'ajtin'adiiby. ⁶ E co miich Dios mmibijctzoy, nicx tigoty etz m'agihuipy je mdijc aguu. Huin'it Dios mibijctzou. E je Dios y'ijxpy ymidooyb co jadu'n mmibijctzoy, e je' je m'oy'ajtin xymöhuipy mayjäyduum.

⁷ Com Dios mmibijctzoy, ca' m'agapxiyo'cip je huidi anajty ti m'occapxi, jadu'n nej ajcxy y'idüitcixy huidi ca' nejhuüygixy Dios ytiy'ajt. Yi' ajcxy huinma'ñpidägy co miid ajcxy ymay'ayuc huin'it ajcxy ymidoohuiyb. ⁸ Ca' jadu'n m'idüitcixy jadu'n nej je' ajcxy; mDios ñejhuüyb ti miich ajcxy myajmayajtpy ma anajty ca'ni mbijctzooyi. ⁹ E jadu'n miich ajcxy Dios mibijctzohuipy, jadu'n mina'nip:

Dios Teedy, miich huidibi tzajpjtoty tzinaayb; huindzigy miich mxii y'ity.

¹⁰ Huen miñ ya miich yi' m'ane'min. Huen mdzojcin yajcuyduñ ma je jäy yjot yhuinma'ñ jadu'n nej yajcuyduñ jiiy tzajpjtoty.

¹¹ Mooygich ajcxy ngaayin n'uucin jabom jabom.

¹² Méecxibich ajcxy nbocy ngaydey huidibi ich ajcxy ndundigooyb, jadu'n nej ich ajcxy meecxich huidibi ajcxy xymidundigooybich.

¹³ Ca' m'a'ixiy co ich ajcxy huinma'ñ tigoyipich. Yajnihuaatzcich ajcxy ma yi' jibicpi. Co miich yi' mje' je cötujcin, je mic'ajtin etz je oy'ajtin huinixii huinitempo. Amén.

¹⁴ Pen miich ajcxy mhuinmeecxyp je huidibi xymidundigooygixp, je mDios Teedy huidibi tzajpjtoty je' nañ jadu'n xyhuinmeecxip miich ajcxy mbocy. ¹⁵ E pen miich ajcxy ca' pin jäy mhuinmeecxy nej xymidundigooygixy, nañ jadu'n mDios ca' xyhuinmeecxip ajcxy ma ti mdundigooygixy.

Jesús yaj'ixpicy nej huaad n'ijtim jaygaay

¹⁶ Com ajcxy m'ida'nip jaygaay jay'ügy (mina Dios mmibijctzoogixy), ca' mnaybidáaccigixy tajy may, jadu'n nej ajcxy idüitcixy yi' huidibi ajcxy minamb co Dios mibijccixy e ca' yjanchity. Yi' ajcxy yajtigajchpy yhuiñjijp jigix jäy ajcxy oc'ixiyyb

co jaygaay jay'ügy y'ijtcixy; jëyi jadu'n oy'ajt'adiiyb. ¹⁷ Miich ajcxy co m'idipy jaygaay jay'ügy jotcujc naybidägi, caax mgohuajc etz puj mhuin mjijp, ¹⁸ ca'ydi myajnuëxiggy mayjäyoty co m'ity jaygaay jay'ügy, hue' janchtiy myajnuëxig ma je mDeedy huidibi ca' yaj'ijxy; e je mDeedy huidibi ijxp huidibi miich ajcxy ca' mduñ ijxna' quëxna' yi' xymöhuipy oy'ajtin mayjäyduum.

Je jugy'ajtin tzajpjoty

¹⁹ Ca' nigi m'adzocy huidibi ya naaxhuiñ, je' co ya huindigooyb oy ytimtijity huidibi yi huech yajhuindigooyb, huidibi tougaayip etz ma je meetzpi ajcxy meetzcixy pigëccixy tijaty. ²⁰ Je' miich nijot'ajtcixy je' oy'ajt huidibi miich ajcxy Dios xymöhuamb jiiy tzajpjoty ma ca' huech yajhuindigooy ni ti, e nañ ni ycatougaayii ni ti, etz ma je meetzpi ca' ajcxy meetzcixy pigëccixy tijaty. ²¹ Ma miich ajcxy miidity je oy'ajt nañ jiiy ajcxy mjot mhuinma'ñ pidäg.

Yi mhuin jadu'n yi' nej tüg tiicxin

²² Yi mhuiin yi' yi' jadu'nip nej tüg tiicxin jajin ma mnin'icx, e paady pen ca' miich yi' mhuiin xyajtundigoy, tüg'óciy mjot mhuinma'ñ huädz yi'. ²³ Pen miich mhuiin xyajtundigoyb nañ jadu'n mjot mhuinma'ñ huidi miich miid ca' y'oyity, jadu'n yi' nej coodzpi jac tim nigi ca' y'oyity ca'ydi je coodzpi!

Dios etz je comeñ'ajtin

²⁴ Ni tüg pin ca' huaad miid tuñ metz huindzin com mijotma'ti tüg je', e jadügpi chogipy; o ixtijipy tüg e jadüg ymigüg'adiiyb. Nañ jadu'n ca' huaad miich ajcxy metz m'ojadajtcixy, Dios etz je meeñ.

Dios ycuend'ajtpy yi' yjäy

²⁵ Paady iich miich ajcxy nimaaygixy: Ca' mdzachhuinmaaygixy ti ajcxy mnitzinähuipy, ti ajcxy mgayipy m'ügipy o ti ajcxy mhuit'adiiyb mducky'adiiyb. MDios yi' ti xymooygixy je mjogy'ajtin, e paady ycixpi yi' nejhuiiyb ti ajcxy myajmayjajtpy. ²⁶ Oc'ix miich ajcxy yi' joon huidi queec-huidijtp. Yi' ajcxy ycaniipcixy ycatungixy, nañ ni ca' yi' ajcxy yujcpijccixy ma tze'x. Miich ajcxy mDios Teedy huidi tzajpjoty tzinaayb, je' moydaayb huidi ajcxy yi' yjicxyp. E miich ajcxy mjactzoobatp ca'ydi yi' joon. ²⁷ ¿Pin ji ma miich ajcxy, ooy mij jahuinmay, jëbi tüg nuux yjacyeegy?

²⁸ ¿E na'amy co miich ajcxy mdzachnidajy mdzachnimay miid je mhuit mducky ycixpi? Oc'ix miich ajcxy nej yoñ tüg je pijy huidi yajpatp tun nigap. Ni yi' ycatuñ ni piidy. ²⁹ Per janch tiy'ajt jadu'n nej nimaaygixy, ni je comeñyjay huidi yxi rey Solomón, ni ycaquipxy je' yxoxin miid je pijy. ³⁰ E pen mDios xoxpy jadu'n je aay ujtz cham etz tzojcy ytütztäy ñicxtäy, jac nigi miich ajcxy Dios xymöhua'ñ huidibi myajmayjajtpy, miich ajcxy huidibi hueeni mmibijcin. ³¹ Paady ca' nigoobi mdzachhuinmaaygixy ma ajcxy mbaadip ti mgayipy m'ügipy o ti mhuit'adiiyb mducky'adiiyb. ³² Yi jäy ajcxy huidibi ca' mibicy yi' Dios oy tzach nijot'ajtcixy jadayaabi, per miich mDeedy huidibi tzajpjoty je' ñejhuiiyb ti miich ajcxy myajmayjajtpy. ³³ E pen miich ajcxy mbidacpy Dios jayijp ma mjot mhuinma'ñ etz mguydun ajcxy yi' y'ane'min, huin'it miich ajcxy Dios xymöhuipy tijaty myajmayjajtpy. ³⁴ Paady ca' mhuinmaaygixy cham miid je jabom cixpi, je' co je jabombi ymimiñ je tajin mayin. Tzoc mijotcujc'ajtim je tajin mayin huidi cham mninajx nyajnaxim.

7

Ca' mbocy ixy yi' mmigüg

¹ Ca' m'ix'ijxpy mba'ijxpy ti mmigügtijc ytundigooyb, jigix ca' Dios xytidyunipy chaachytunipy. ² Pen miich m'ix'ijxpy mba'ijxpy mmigügtijc ti ytundigooyb, nañ jadu'n miich Dios xytidyunipy xychaachytunipy, e yi' quipxi'ñ huidibi miich mhuamyb quipxi'ñ, nañ yi' Dios yajtunamyb ma miich. ³ ¿Nej co miich m'ixy huidibi mmigüg ytumyb e hueeni ytundigooyb, e ca' mnay'ixyii huidibi miich jac mij mdundigooybi? ⁴ ¿Nej

jëbi mmigüg m'ocnimäy: “Nbubedamybich miich ca'ydi mjacpocytuñ”, e miich yam m'ocmiidpi jac mij pocy? ⁵ Miich ci'm mnayhuin'iiñyii. Nicx jayijp mbocy mgaydey ocyajhuädz, huin'it jëbi mbubety je mmigüg.

⁶ Ca' mmöy yi jibicjäydijc huidibi Dios yjë'ajty co nicx camij'ijx camijpidaaccixy; ni mgayegipy Dios y'ayuc ytiy'ajt ma yi jäy ajcxy huidibi ca' tzojccixy Dios y'ayuc ytiy'ajt.

Nbijctzoohuim n'amidoohuim Dios

⁷ Mibijctzougix yi Dios e yi' xymöhuipy ajcxy; ixtaaygix, huin'it mbáatcixipy; cogapxiygix e ahüädzip ajcxy mdijc aguu. ⁸ Com pin tijaty pijctzoob ypaatp yi'; e pin tijaty ixtaayb ypaatp yi'; e pin cogapxiyb ma tijc aguu, yaj'ahuaatzip ytiyc aguu.

⁹ ¿Nej ji jada' miich ajcxy nidügti co m'ung pijctzoohuipy tzajcaagy nej mmöhuipy tüg tzaaji? ¹⁰ ¿O pen ypijctzooby tüg acx nej mmöhuipy tüg tza'ñi? ¹¹ Miich ajcxy oy mjibicjäyity e majjtpy ajcxy nej m'ung m'anäg mmöhuipy je oybi. ¡Nigi Dios Teedy tzajpjoty pi möhua'ñ je oybi pinjaty pijctzoob!

¹² Tzinaaygix tiydudägy miid je mmigügtijc, pen miich ajcxy mdzojcpy co je mmigügtijc chinahuipy tudägy miid miich ajcxy; com jadu'n y'ane'my Moisés yley etz yi Dios y'ayuc najtzcapxiyb ajcxy ñecy.

Je xützpi tü'aa

¹³ Tigiiygix ma yi tigiyyidac xützpi: yi tigiyyidac etz yi tü'aa huidibi ja'tp ca'oydactuuby mij huin yi', e may jäy ajcxy oy ji ytiyiyigixy. ¹⁴ E janch je tigiyyidac etz yi tü'aa huidibi ja'tp ma je jugy'ajtin huinixiibi, xüdz je' etz tzip naxiiyñi; janch tim hueeni jäy huidibi ji nicxiyb.

Yi jäy yhuinma'ñ miid ñiguëxgy pen oyyäy o pen ca'

¹⁵ Nayguend'ajtigix miid yi jäy anijjaty pi huidibi ajcxy minamb co Dios ytiy'ajt yaj'ixpijcp, huidibi ajcxy huidijtp janch yung janch naxy ñaybidaaccixy nejihuüy ooy oy huinma'ñ miidity; nigooobi ajcxy jadu'n ñaybidägyii, ymiid ajcxy jibic-huinma'ñ. ¹⁶ Miich ajcxy jëbi m'ijxcapy nejaty ajcxy miidity chinaayin yjugy'ajtin; ca' pin caamuxy cha'm tucy ma apy quipy, e nañ jadu'n ca' pin higo tiim tucy ma jaam'apy quipy. ¹⁷ Je quipy huidibi ooy y'oyity, oy yi' ytiim'aty. Je quipy huidibi ca' y'oyity, ca' yi' oy ytiim'aty. ¹⁸ E je oybi quipy ca' huaad ytiim'aty jibic. E je quipy huidibi ca' y'oyity ca' ytiim'aty oy. ¹⁹ Tüg'óciy je quipy huidi ca' oy ytiim'aty, cixy yajpujxp je'. Chi jada' yajnögy. ²⁰ Nañ jadu'n miich ajcxy jëbi mnejhuüy jadu'n nej jäy yjät'y'aty co m'ixipy nej chinäy.

Ca' nidüg'óciy jäy ajcxy ytiyihuipy ma Dios

²¹ Ca' nminaanim nidüg'óciy jäy ajcxy ytiyihuipy jiiby tzajpjoty huidibi xyñimaaybich: “Huindzin, Huindzin”, jëda'ajty ajcxy tigihuamb huidibi ycapxymidooyb je Dios chojcin y'ane'min. ²² Mayjäy oy mina'na'ñ huin'it xii huin'it tiempo: “Huindzin, Huindzin”, ti iich ajcxy ngapxhuäcxy miich m'ayuc, e miid miich mxii ti iich ajcxy nyajpidzimy je ca'oybi; etz miid miich mxii ti nduñ iich ajcxy mij huinma'ñ. ²³ Huin'it nimahuipy: “Caminaabi miich ajcxy ti nga'ixy'adyii; huinhuäctucich miich jibic tumbidijc ajcxy.”

Je mejtnajxpi je tiy'ajt cop

²⁴ Nidüg'óciy pinjäy huidibi xymibijcpich etz midooyb jadu'n nej iich n'ane'myich yi' ajcxy quipxyjaty miid je jäy huidibi cohuinma'ñ huidibi ytiyc ycojp ma yhuingixity. ²⁵ Co ymicpojtüy etz ycomy je mij nii, ca' ypadyii niigom je tijc, je' co anajty cixy je' ycojyity. ²⁶ Per yi' ajcxy huidibi midoob e ca' cuyduñ huidibi ngapxpich, je' jadu'nip nej tüg jäy huidi janch loci huidi ytiyccej ma pu' jot. ²⁷ Co ymiñ je mic poj tuu, chi ycomy je mij nii. Chi yciday je ytiyc; mij ayo'n oy yjajti.

²⁸ Co Jesús ycapxtay ymiydactay, chi je jäy ooy huinmay jadu'n nej anajty ti yaj'ixpicy. ²⁹ Com je' co Jesús anajty yaj'ixpicy nej tüg huidibi cötujcin miid, ca' yjadu'nity nej je escribas ajcxy.

8

Jesús yajtzögy tüg jibic nibützpa'mmiidpi

¹ Co Jesús oy chooni ma je cögop, chi ypagidaci mayjäy. ² Huin'it ñimiini tüg jäy jibic pützpa'mmiidpi. Chi ycojxtinay'ahuiy ma Jesús yhuinduu. Chi minañ:

—Huindzin, pen m'a'ixiib jëbi xyajtzögyich.

³ Huin'it Jesús nidoon je jäy. Chi nimay:

—Ndzojcpyich, jëbi mdzögy.

Co Jesús jadu'n nimay je pa'mjäy huin'itiy je ypützpa'm oy ytigooy. ⁴ Chi Jesús nimay: —Ca' pin myajnimäy; nicx janchtiy ma je teedy. Minicx tüg huindzigi'ñ huidi Moisés y'ane'my. Huin'it jëbi yi jäy ajcxy ixipy co ti m'agidägy.

Jesús yajtzögy tüg capitán romano ymang

⁵ Co Jesús yja'ty jim Capernaum huin'it tüg capitán ñimiini e ycohuaniiy. ⁶ Chi ñimaayi: —Huindzin, jim ich tüg ndumbi ma ich ndijc huidi tim cöcnaayñip, ca' y'ocyücxni.

⁷ Chi Jesús minañ:

—Ich nicxy nyajtzögy.

⁸ Chi je capitán y'adzooy:

—Huindzin, ca'p ich n'oyjäyity, ca' yhuaadity mdigihuipy ma ich ndijc, jëyi miich nigoo capxy e ti anajty ich ndumbi chögy. ⁹ Ich nañ jadu'n ane'my n'ityich, e nañ nmiidich soldadtijc c'am. Co ich nimäy: “Nicx”, nicxp; e co ich nimäy: “Min”, mimb; e co n'ane'myich je nbödumbich huen tijaty tun, ytumyb.

¹⁰ Co Jesús jadu'n midooy, chi nigoo bi yciyxycuejty. Chi ajcxy nimay huidi pahuidijtip: —Janch tiy'ajt jadu'n nej nimaaygixy, ma Israeljäy ymiñ, ca' jadu'n ti nbaadyich huidi oy mibicy jadu'n nej jadyaabi yëydijc. ¹¹ Ich jadu'n nimaayb co mayjäy oy miinaangixy xiipdzim'y amy xiicidägy'amy, chi ixtäga'ñ quipxyi miid Abraham, Isaac etz Jacob jiiy ma Dios y'ane'min. ¹² Je judío jäy huidibi ixipy ajcxy jëbi yjatzinäy jiiy tzajpjoty, je' ajcxy nicxamb agootztuuby, jiiy ajcxy yjihuipy yäxipy etz y tiitzmúcxipy ytiitzqueedipy.

¹³ Huin'it Jesús nimay je capitán:

—Nicx ma mdijc. Jadu'n nej miich xymibicyich, ti ich yam nguyduñ.

Chi je tumbi oy chögy tim huin'it hora.

Jesús yajtzögy Pedro ymiid töxyjäybi

¹⁴ Chi Jesús ñicxy ma Pedro ytijc. Chi ijxy je Pedro ymiid co jim cijx'am ycöcnäy miid je toyba'm. ¹⁵ Co Jesús cñixajy huin'it je toyba'm ñajxy. Chi pidägy. Chi mic'amy ni'ixiyy je caayin uucin.

Jesús yajtzögy mayba'mjäy

¹⁶ Co oy chu'iiyñi ycoodziyñi huin'it yajmimiñ ma Jesús may je huidi ca'oybi miid. E miid yi' y'ayuc yjedajty ypidzimday je ca'oybi, e huin'it tüg'óciy je pa'mjäy chooctay. ¹⁷ Jadyaabi je' ytuni yjajti jigix yajcuyduñ jadu'n nej je profeta Isaías minañ: “Yi' ci'm ajt nyuu nba'm ti xyajtzocaaayim etz yi pijcin ixin ti yajnicxtäy.”

Je pinjaty anajty panicxam Jesús

¹⁸ Co Jesús ijxy janch mayjäy anajty ti yjübigiyii, chi nimay co huen nájxcixy jim'amy mejy ninaxy. ¹⁹ Huin'it ñimiini tüg escriba. Chi nimay:

—Huindzin, nbanicxamybich miich oy janch tim ma'amy ma anajty mnicxy.

²⁰ Chi Jesús y'adzooy:

—Je huaax ymiid je' ajcxy yjut, e je joon ymiid je' ajcxy ype'ñ. Per ich, je jäy huidibi tzoon jiiy tzajpjoty, ca' nmiididyich ma nmähuibich ma nböcxibich.

²¹ E jadügpí ydiscípulo yminañ:

—Huindzin, nicx jayijp ndeedyich n'ocyajnaaxtigiyich huin'it nbanicxip.

²² Huin'it Jesús y'adzooy:

—Pamiingich, ixmajtcix yi öcpi huen ymi'öcpi yajnaaxtigiyii.

Jesús jįjpcogapxįy je micpoj etz je mejy co anajty ooy ypidįgy

²³ Huin'it Jesús oy ybarcotigįyńi. Chi ypadzooni je ydiscípulos ajcxy. ²⁴ E jim anajty ytųyöy mejyhuingįxy, huin'it mic poj ńaymibidzimi. Janch mic y'ocpidįcni je mejy jįgo jįgo je barco cayajńidįgoy, pero Jesús anajty chachmaab. ²⁵ Huin'it oy ymįgapxyii yajmįybidįgyii je' ydiscípulos ajcxy. Chi ńimaayi:

—įHuindzin, ocyajtzoogich ajcxy! įCheeby ńich ajt n'ocquiniim!

²⁶ Huin'it Jesús y'adzooy:

—įNa'amy co mdzachtzigįygyxni? įMiich ajcxy hueeni miidity mibįjcin!

Huin'it Jesús ypidįgy. Chi mįgapxy je poj etz je mejy. Huin'it je mejy etz je poj yhua'cxįjptay. ²⁷ E je' ydiscípulos ajcxy nįgoobi y'occįx y'occųejtni chachmįnaangįxy:

—įPįn yęydįjc jada jada', co je mejy je poj ti ycapxymįdoyii?

Je Gadara jįy ajcxy huidibi anajty ca'oybi miid

²⁸ Co Jesús yja'ty ma yi ńiiba' ma yi Gadara ńaax ycajp, chi metz yęydįjc, huidi anajty ca'oybi miid oy yjįjpcoyöyįyii anajty ajcxy, ti chooń ma je öcpi jut. Yi jįy ajcxy ooy janch ahua'n, e ca' anajty huaad jim ni pįn ńaxy ma je tü'aa. ²⁹ E co anajty Jesús jim ńaxy huin'it janch ahua'n ymįgapxqueeci:

—įTi miich mdunamyb miid ńich ajcxy, Jesús, miich Dios y'ung? įNej ti mmiń jayįjp co xychaachtųngįxich ma ca'ni xii tiempo paady?

³⁰ Jįguem ma anajty ajcxy je' yajpaady jim anajty may'idzim y'ojccįxy. ³¹ Chi je ca'oybi ymįnań:

—Pen miich xyajpidzim ńich ajcxy, xyaj'adįgygyxxy xyajjottįgygyxxy yi may'idzim.

³² Chi Jesús ńimay yi' ajcxy:

—Nįcxcįx.

Huin'it ńįhuaatzi je yęydįjc je ca'oybi. Chi oy ytįgygyxxy je ca'oybi ma je idzim. Huin'it je idzim oy ńįgöboyįctįy. Jįiby ajcxy yjįcxtįy.

³³ E je jįy ajcxy huidibi anajty idzim ycuend'ajtp, huin'it ajcxy yqueegy miid je tzįgi'ń. Chi co ajcxy yja'ty cajpjoty, huin'it ajcxy ytįgygy mįydaacpi jadu'n nej anajty ti ytuńyii ti yjadyii. ³⁴ E huin'it choday je mayjįy ma je cajp. Chi ajcxy ninįcxy je Jesús. E co ajcxy ijxpaty, huin'it ajcxy cohuanįy co huen pidzimni ma je naax je cajp.

9

Jesús yajtzögy tųg jįy cįmätpi tecymätpi

¹ Chi Jesús ybarcotįgy. Chi ńįcxy jim'amy mejyńaxy. Chi oyjįty ma yci'mgajp. ² E jim yajmįmiń tųg yęydįjc huidibi anajty cįmät tecymät. Yajcįy ymiń ma'ndzaayjoty. E co Jesús ijxy co ymiid je mibįjcin, chi nimay je pa'mjįy:

—Jotcųgi' miich, ti je mbocy nhuinmeecxyich.

³ Huin'it nijęjity je escribas ajcxy, je ley yhuindzin, jot'ajti: “Jadayaabi yęydįjc capxtįgooyb yi' ma Dios co jadu'n ymįna'ń.” ⁴ Com Jesús ńęjhuiįy jadu'n nej anajty ajcxy je jįy tzachjot'įjtįgyxxy, chi ajcxy nimay:

—įNej co ajcxy jįbic mdzachjot'įjtįgyxxy jotjoty huinma'ńyjoty? ⁵ įHuidibi ca' chipity, co nminá'ńibich: “Ti yi mbocy nhuinmeecxich”, o co nminá'ńibich: “Pidįg etz tųyöy”? ⁶ ńich ndzojcpyich co miich ajcxy mhuinjįhuińhuip co ńich ti ndzoońich tzajpjoty e paady nmįidich je cötųjcin ya naaxhuiń e jębi nhuinmęecxibich pocyjįy ajcxy.

Huin'it Jesús nimay je cįmätpi tecymätpi:

—Pidįg, huijtzįgy yi mdögy etz nįcxni ma mdįjc.

⁷ Chi je cįmätpi tecymätpi ypidįgy. Chi ńįcxy ma ytįjc. ⁸ E co je mayjįy jadu'n ijxy, huin'it ajcxy ooy jįhuiįy huinmay. Chi ajcxy ooy ojadyty yi Dios co anajty ti yecy je mic'ajtin ma mayjįy.

Jesús nimay Mateo: “Pajamgich”

⁹ Co Jesús oy chooni jím, huin'it ijxy tüg yëydijc, yxii Mateo, huídibi anajty iñaayb ma yajcogüejttac. Chi nimay:

—Pajamgich.

Huin'it Mateo ytinayïgy. Chi panicxy Jesús.

¹⁰ Jadu'n ytuni yjajti co Jesús jím ycaý ma Mateo ytijc, e may nañ jadu'n ymiñ yajcogüejtpidijc etz pocyjäydijc. Chi ajcxy jím tú'ciy y'ixtactay miid Jesús etz miid yi' ydiscípulos. ¹¹ Co je fariseos jadu'n ijxy ajcxy, chi nimay ajcxy je' ydiscípulos:

—¿Na'amy co yi' mHuindzin ycaýmucy miid je yajcogüejtpidijc je pocyjäydijc?

¹² Co Jesús jadu'n midooy huin'it nimay ajcxy:

—Ca' yajmayjaty tzoýdumbi huídi ca' ajcxy ypïgyii, jëyi huídi ajcxy pijcip. ¹³ Nicx ixpijccixy nej ymiñ jaaybety ma Dios ñecy: “ñich ndzojcpyich co miich ajcxy miid'adïpy je pa'ayo'n, ca'ydi co myajhuindziñgïy tijaty iyujc.” Ca' ñich ti nmiññich ma je jäy ajcxy huídibi ca' pocy miidïty. ñich ti nmiññich miid yi' pocyjäy ycixpi co huen jothuimbijttaaygixy ma Dios.

Amidoogixy Jesús miid je' ycixpi co jaygay y'ijtcixy

¹⁴ Huin'it ajcxy ymiñ Juan ydiscípulos ma Jesús. Chi je ajcxy nimay Jesús:

—¿Na'amy co ñich ajcxy etz fariseo ajcxy ayuu'ijtcixy, e yi' ajcxy huídibi xymiidhuídijtp ca' ajcxy ayuu'ijtcixy?

¹⁵ Huin'it Jesús y'adzooy:

—¿Nej jëbi yaj'ayuu'aty jäy ajcxy huídi yajpaatpi ma je pijcipi yajnixiuduñyi, pen quipxyi yam yajpaady miid je huídibi pijcp? Minamb je xii je tiempo mina je pijcipi yajtzoniïyb, huin'it janchtiy ajcxy jëbi y'ayuu'ajtcixy.

¹⁶ Ni pin tuc huit ca' agiyiïy miid tüg pedas jemyhuit, com niñi je tuc huit ñajtzciidziïy, chi niñi o'ctiy yjajtni. ¹⁷ Ca' pin pidägy vino niñ ma tucpi cochac, yciidzip je', e tüg'óciy anajty ti y'ayoodäy je vino niñ miid ñigochac. Pidägiy ajcxy jemy vino ma jemy cochac, chi jadu'n ca' ayoohuïpy je vino, ni huindigoyïpy je cochac.

Je Jairo ñiix, etz je töxyjäy huídibi Jesús yhuít niñoni

¹⁸ Ma anajty Jesús jím ycapxy ymiydägy huin'it ymiñ tüg mijjäy. Chi ñaygojxtinay'ahuïy ma Jesús yhuinduu. Chi ymiñañ:

—Nniixich ti y'ögy. Nicx ma ñich ndijc etz mgññaxajïpy, jugypigïpy ya.

¹⁹ Huin'it Jesús ypidïgy. Chi ñicxy miid je ydiscípulos ajcxy. ²⁰ Ma anajty ajcxy jím ytüyöy huin'it ymiñ jixci'py'amy tüg töxyjäy huídi yxii ybo' ti mi'ijtiïyñi majmetz jimiit. Chi niñoni Jesús yhuítpa'. Huin'it ñajxy je' ypa'm. ²¹⁻²² Jadu'n anajty ti yjot'adyii: “Oy Jesús jëda'ajty yhuítpa' nnidónibich, ti ñich anajty n'agidäygich.” Huin'it Jesús yhuäc-huimbijty. Chi huindixpejty je töxyjäy. Chi nimay:

—Jotcujc'at miich, ti m'agidägy jigix co xymibicyich.

E tim huin'it hora oychögy je pa'mjäy. ²³ Chi Jesús oy yjäty ma je mijjäy ytijc. Chi ijxy je xuuxpidijc miid je ymiüggtijc ajcxy huídi chachyaaxcixy co anajty ti y'ögy je töxy'anäg.

²⁴ Huin'it Jesús nimay ajcxy:

—Queccix ya, yi' pi'ctöxy'anäg ca' yi' ti y'ögy. Hue' yi' maab.

Huin'it ajcxy niño nixiicy yajxiicy Jesús. ²⁵ Co anajty je jäy ti ixquejxtäy, chi Jesús ytijctigïy ma anajty je töxy'anäg huijtnäy. Chi majch ma yci'. Chi ypidïgy. ²⁶ Chi je jäy oy yajnejhuïydaayñi ma je jimbi naax cajp nej anajty ti ytuñyii ti yjadyii.

Jesús yajtzögy metz jäy huintzpi

²⁷ Ma anajty jím ti choñ huin'it metz jäy huintzpi ypamiini. Chachñimäyii jadu'n:

—¿Pa'ayoogich ajcxy, miich David y'ap y'oc!

²⁸ Chi Jesús yajpajäty ma anajty ti yjättägy. Co ytigïy tigoty, chi Jesús yajtiïy:

—¿Nej mmibijcpy miich ajcxy co jëbi nyajhuindixcïccixy?

Huin'it je' ajcxy y'adzooy:

—Mibijcy ñich ajcxy, Huindzin.

²⁹ Huin'it Jesús nidoñ je jäy ajcxy huintzpi ma yhuin. Chi nimay ajcxy:
—Jadu'n nej miich ajcxy mmibicy, jadu'n ytuniib yjadiib.

³⁰ Chi je' ajcxy y'ijxigy. Huin'it Jesús y'ane'min pidacy:
—Ca' huaad pin myajnejhuüygixy.

³¹ Co je' ajcxy ñicxni, chi ajcxy ooy nigapxy nimiydacy co Jesús anajty ti yaj'ijxicigixy.

Jesús yajtzögy tüg jäy uumbi

³² Co anajty je' jim ti chongixy, huin'it ajcxy mimiñ ma Jesús tüg yëydijc huidibi uum
huidibi anajty ca'oybi miid. ³³ E co Jesús yajpidzimy je ca'oybi, chi je mayjäy ooy ycijxy
ycuejty ajcxy. Chi ajcxy minaangixy:

—Ni camina jadu'n ycajaj'ixy ya ma jada Israel naax cajn.

³⁴ Per je fariseos jadu'n yminaangixy co Jesús je' miid je ca'oybi ymic'ajt yajpidzimy
ca'oybi ma jäy.

Jesús ymiid pa'ayo'n ma mayjäy

³⁵ Jesús jadu'n yhuidijty cajn cajn yaj'ixpijcy majaty tzajptijc. Yajhuingapxïy je jäy
Dios y'ayuc. Etz nañ jadu'n yaj'agidacy huen ytim huidi yuu huen ytim huidi pa'mity.

³⁶ Co Jesús jadu'n ijxy je mayjäy, chi oy pa'ayooni co yï' ajcxy ca' miidity ni pin huidibi
jëbi ñajtzcapxïy Dios y'ane'min. Yï' ajcxy jadu'n yajpatp nej cöbixy huidi ca' miidity
cuend'ajtpi. Ca' nejhuüygixy pin y'ane'mip e pin ypanicxip. ³⁷ Huin'it Jesús nimay yï'
ydiscípulos ajcxy:

—Tiy'ajt yï', janch mij je tung e hueeni je tumbidijc. ³⁸ Paady pijctzou miich ajcxy ma
Dios co huen quexy tumbidijc ma yï' ytung.

10

Jesús huin'ixy je majmetz ydiscípulos

¹ Huin'it Jesús huoy je nimajmetz discípulos. Chi moy ajcxy cötujcin jëbi huaad
yajnihuäch je huidi ca'oybi miid. Etz nañ jadu'n yaj'agidägip huen ytim huidi yuu huen
ytim huidi pa'mity.

² Jada je' je nimajmetzp yxii: Simón, huidi nañ jadu'n yajtijp Pedro, etz ymiguëx
Andrés; Jacobo etz y'uch Juan, Zebedeo ymang; ³ Felipe, Bartolomé, Tomás, Mateo, je
yajcogüejtpi; Jacobo, Alfeo ymang; Lebeo, huidi nañ jadu'n yajtijp Tadeo; ⁴ Simón, je
cananista; e Judas Iscariote, je huidi ycïyejc Jesús agojix.

Jesús quejxy je' ydiscípulos ajcxy ayuccapxhuäcxpi

⁵ Chi Jesús quejxy yï' nimajmetzpi, e jadu'n najtzcapxïy ajcxy:

—Ca' ajcxy mnicxipy ma je naax cajn ma ajcxy je jäy chinäy huidibi ca' ajcxy
Israeljäyity. Ni mgatigihuipy ajcxy ma Samaria naax cajn. ⁶ Nigi jac'oy co ajcxy mnicxipy
ma je Israeljäy huidibi ca' nejhuüy huidibi ca' paduñ Dios ytiy'ájin. ⁷ Nicx miich ajcxy
capxhuäcx Dios y'ayuc co ti yhuingoni Dios y'ane'min. ⁸ Yaj'agidaaccixy yuujäy pa'mjäy
huidijaty pützpa'm ymiid. Myajjugypijccixy tiibi ögy. Myajnihuädzip huidi ca'oybi
ymiid. Ninigoobi miich jada cötujcin ti myajmooygixy, nañ ninigoobi yejccixy.

⁹ Ca' ni ti meeñ mminicxcixy. ¹⁰ Ca' mbijty mminicxcixy tü'amgixpi. Mminicxcixy
jëda'ajty yï' mhuit huidi miid ma mniñicx. Ni mgaminicxip huingbi mgig etz mdajc; com
ycopicity co je cajpjäy xyajcáaygixipy xyaj'úuccixipy miich ajcxy.

¹¹ Co anajty mjäty miich ajcxy ma tüg cajn nidiu yajtiu pinjäy jim tudäcyip. Jim ajcxy
mhuimipy ma je' ytiyc ixti cooni ajcxy mdzoonip. ¹² Co anajty miich ajcxy mdigïy tigoty
huin'it mgapxpóxcixipy je codijc jadu'n nej tzocy. ¹³ E pen je codijc ymihuaad'ajtpy,
yejccixy jim hibocxin capxpocxin. E pen je jäy ca' ytudägyity, ñaadig'adip huidi anajty
ti mgapxcixy. ¹⁴ E pen ca' pin xycöbigaangixy, e ni pin xycamidohuaani ajcxy m'ayuc,
pidzimgix jim ma je tijc o ma je cajn. Chi ajcxy mdecy huinnebipy, je' je' je tiy'ajt co ca'
miich ajcxy ti pocy miidity. ¹⁵ Janch tiy'ajt jadu'n nej nimaaygixy co anajty je xii tiempo

paady ma anajty yajtiyduna'nñ je naaxhuiñyäjy, jac nigı yajtzaachytuna'nñ yi' ajcxy ca'ydi yi jäy ajcxy huidibi tzinaayb ma Sodoma cajp etz ma Gomorra cajp.

*I*xhuidijtın pahuidijtın

¹⁶ ¡Ocmidoogix! İich yam miich ajcxy nguejxyp majaty yi jäy huıdi jıbic-huinma'nñ miid. Jadu'n nipaady nej İich nguexyich cöbixy ma je lobi. Huijy cujc ajcxy mnaypidägiib jadu'n nej tza'nñ, per yung naxy jadu'n nej muuxy. ¹⁷ Mnayguend'adiib ajcxy je' co yi jäy ajcxy xycıyegaangıxy ma ajcxy mijtungmiidpi etz myajhuobaangıxy ma je judıojäy ajcxy ñaymujctac, ¹⁸ ixtı xyajnicxaangıxy ajcxy ma je gobernador etz je reydiıc ajcxy miid İich ycıxpı; e jim İich miich ajcxy xyñıgapxıpy ma je jäy ajcxy yhuınduu, e nañ jadu'n majaty anajty je jäy ajcxy huidibi ca' yjudıojäyıtı. ¹⁹ Co anajty ajcxy xyajcıdigıy je mijtungmiidpi, ca' ajcxy oy mhuinmaayıpy nej m'ocnimähuıpy. Co anajty paady je tiempo, huin'it İich miich ajcxy myajnimähuıpy nej ajcxy mgapxıpy. ²⁰ E je ayuc huidibi miich anajty ajcxy mgapxpy, ca' miich anajty je' ajcxy m'ayuc'ájtıgıxy, je Dios Teedy anajty yjihui'nñ, je Espıritu Santo, xyajcapxp miich ajcxy.

²¹ Huin'it yi jäy ajcxy ñaygiıyegáanıgıxy miñ xyıpy tüg quextıjc co huen yaj'ögyii. E je ungedeedy cıyega'nñ y'ung; je ung'anäg mibidıga'nñ je ytaj yteedy etz yaj'öcıp ajcxy. ²² Tüg'öcıy je jäy ajcxy ca' ajcxy xy'ix'anıpy xychoga' nıpy miid İich nxıı ycıxpı. E pin xymıbijcpıch amumdügjot ixtı mabaad y'ögy, yi' ajcxy y'alma tzögıpy. ²³ E co anajty miich ajcxy jäy xy'ixhuıdity xypahuıdity ma tüg cajp, nicxcıx ma huıngbi cajp. Janch tiy'ajt jadu'n nej nımaaygıxy co ca'ni anajty mgapxhuäcxtäy ayuc tiy'ajt ma tüg'öcıy je Israelcajp co nhuımbidıpyıch, İich, je jäy huidibi tzoon tzajpjoty.

²⁴ Tüg yaj'ıxpıjcpı jac nigı mij'ajtin miidıty ca'ydi je huıdi ıxpıjcp, e tüg huındzin jac nigı mij'ajtin miidıty ca'ydi je' ytumbı. ²⁵ Jëb jotcujc idıpy je discıpulo co jadu'n yajpaadıpy jadu'n nej yhuındzin, e je tumbı jotcujc idıpy nej yhuındzin. Pen jäy minamb co İich nmiidıch ca'oybi, jac nigı ymina'na'nñ co miich ajcxy miidıty.

*P*ın jëbi yajtzıgıy

²⁶ Ca' ajcxy mdzigıy yi jäy ajcxy. Ca' ji ni ti yüch ity nicx ycanıguëxıgy; nañ ni ti ji ycayajtuñ ayüch ameech nicx ycayajnejhuıy. ²⁷ Huıdi İich miich ajcxy ayüch nyajnimaaıyb, capxpıdzımgıx miich yi' mayjäyjoty, e huıdi ajcxy midooyb ameech, capxpıdzımgıx miich yi' mic ma tüg cögop. ²⁸ Ca' ajcxy mdzigıhuıp je jäy huıdib ninıcx yaj'öcp etz ca' huaad yi' ajcxy yaj'ögy je alma. Yi' miich ajcxy mdzigııygyıxy je Dios huıdib pidacp je alma etz je ninıcx mijjiınjoty.

²⁹ ¿Nej ca' jäy ajcxy toogy metz pi'cjoon miid tügpi pi'cmeeñi? Per ca' ni tüg huaad ycäy naaxhuiñ, pen ca' tzocy je mDios Teedy huıdi jiıby tzajpjoty. ³⁰ Miich ajcxy mgöhuay ac michoy yi'. ³¹ Paady miich ajcxy ca' mdzigıhuıpy, jac nigı miich ajcxy mdzoubaady ca'ydi je joon.

*P*ınjaty ca'p midzöydu'nñ Jesucristo mayjäyjoty

³² Yi' jäy ajcxy huıdi xymıbijcpıch etz xyñıdıy'ajtyıch ma jäy yhuınduu, nañ jadu'n İich yi' nıdıy'ajtyıch ma İich nDeedy huıdibi jiıby tzajpjoty. ³³ Per je jäy ajcxy huıdi İich xycoyützpıch ma mayjäy ajcxy yhuınduu, nañ jadu'n yi' ngoyützip ma İich nDeedy yhuınduu huıdibi jiıby tzajpjoty.

*M*iid Jesús ycıxpı yjiıjıty naymidzip'adıı

³⁴ Ca' miich ajcxy mhuinmay co İich ya ti nmiñıch miid co nmöhuaangıxy jotcuje'ajtin ya naaxhuiñ. ³⁵ İich ti nmiñıch co nyajtziptunıpyıch jäy miid yteedy; töxyjäy miid ytaj etz xecy miid yxecy. ³⁶ E jadu'n miich ajcxy mdzip'adııyb mgi'mjuugy mgi'mmigüg.

³⁷ Yi' jäy ajcxy huıdibi tzojcp ytaj yteedy jac nigı ca'ydi İich, ca' yi' ypaadyii co njäy'adııybıch; e pin ymang o ñııx tzojcp nigı ca'ydi İich, ca' ypadyii co njäy'adııybıch; ³⁸ e pin ca' yci'mdzojcın y'ıjxmajtztäy etz ca' ñaybidägyii ycıxjot huınijot ma İich, ca'

mihuaadity nicx njäy'adiiybich. ³⁹ Pin yjugy'ajtin najtztzogiiyb, yajtigoyipy yi'; e pin yjugy'ajtin tigooyb miid iich ycixpi, ypaadipy jugy'ajtin huinixii tzajpjoty.

Premio nganar'ajtim

⁴⁰ Pin miich ajcxy xycöbijcp, iich yi' anajty xycöbijcp; e pin iich anajty xycöbijcp, nañ ycöbijcipy anajty je huidibi iich ti xyquejxyich ya naaxhuiñ. ⁴¹ Je huidibi cöbijcp je jäy huidibi Dios y'ayuc capxhuacxip, je' co yi' ymiñ miid Dios ycixpi, yi' jadu'mbi je oy'ajtin ypaadipy. Nañ jadu'n je huidi cöbijcp je oybi jäy miid co oy yjäyity, yi' jadu'mbi oy'ajtin ypaadipy. ⁴² Je huidi yaj'ucp tüg vaso nii ma huenyimpinjäy miid co xymibicyich, janch iich miich nimaaygixy, ypaadipy oy'ajtin.

11

Juan je Bautista yquexyöybi

¹ E co Jesús anajty ti najtzcaxiydäy je tiyy'ajt ma je nimajmetzpi ydiscípulos ajcxy, chi Jesús ñicxy yaj'ixpijcp etz ayuccapxhuäcxp majaty cajp huinduy agonbi.

² E Juan je Bautista hue' je' anajty yajpaady pujxtigoty. E co nejhuiy tijaty mijhuinma'ñ anajty Jesús ytumyb, chi quejxy metz je' ydiscípulos ajcxy ma Jesús yajpaady. ³ Chi Juan ydiscípulos ajcxy y'amidooy Jesús:

—¿Nej miich je' je Cristo huidibi anajty minamb o jëbi iich ajcxy huingbi n'ahuijxcixy?

⁴ Chi Jesús y'adzooy:

—Ñicxcix miich ajcxy nimaaygix yi Juan, je Bautista, tijaty miich ajcxy m'ixxy mmidooyb co ndumybich. ⁵ Miich ajcxy yajmiidmiydäg je Juan, jadu'n nej je huintzpi nyajhuindicxigyich; je cïmät tecymät nyajtzoocypich; je huidibi jibic nibützpa'm ymiid nyajtzoocpyich; je' ajcxy huidibi cönat nyajmidohuicpyich; je öcpi ajcxy nyajjuygypijcypich; etz je ayoohtijc, je huidibi yung naxy yjothuinma'ñ nyajmiidmiydacypich Dios y'ayuc. ⁶ Jotcujc yi' ajcxy pinjaty xymibijcpich amumdügjot etz ca' ni nej yjotmetzci' miid iich.

⁷ Co Juan je Bautista ydiscípulos ajcxy ñicxni, chi Jesús ytigiiy nimiydaccoty Juan je Bautista ytung ma je mayjäy, chi ymiñañ:

—¿Ti miich ajcxy oy m'ixy jim migtigüduum? ¿Tüg nähuaax huidibi poj xijpi? ⁸ ¿Ti ajcxy oy m'ixy? ¿Ti oy m'ixy, tüg jäy huidibi ooy y'oyxöxyity? ⁹ ¿Ti miich ajcxy oy m'ixy? ¿Nej ti m'ixy tüg Dios y'ayucnajtzcaxiiybi? Janch co ti m'ijxcixy tüg jäy jac mij ca'ydi tüg Dios y'ayucnajtzcaxiiybi. ¹⁰ Je' jada je jäy huidibi Dios nigapxy ma ñecy co Dios jadu'n ymiñañ:

Cham nguexyich iich nguexyöyp jayijp ma miich. Je' yaj'oyihuip je jäy yjot yhuinma'ñ miid iich ycixpi, tim jadu'n nipaady nej jihuiy jäy tü'aa yaj'oyiy co rey ymiina'ñ.

¹¹ Co yi jäy ajcxy huidibi ti chinaaygixy ixti chambaad ni pin ti ca' yajpaady mij jadu'n nej Juan je Bautista; per pinjaty iich xymibijcp, yi' jac mij naxam ma Dios y'ane'my ca'ydi Juan.

¹² Maabi Juan je Bautista ytundigiiy, ixti chamni janch mayjäy amumdügjot ñejhuñhua'ñ Dios y'ayuc, je' co ajcxy ytigihua'ñ ma Dios y'ane'my. ¹³ Tüg'óciy ajcxy je Dios y'ayucnajtzcaxiiybi etz Moisés ycötujcin ñigapxy ajcxy je ané'min ixti cooni Juan oy ymiñ. ¹⁴ Pen miich ajcxy mibijcipy Moisés ycötujcin etz Dios y'ayucnajtzcaxiiybi ajcxy, Juan je Bautista je' je' je Elías huidibi anajty miinamb. ¹⁵ Pinjaty mido'n miid huen mido'mbigipy iich n'ayuc.

¹⁶ Jesús yjacmiñañ:

—¿Pin miid n'ocyajtügihuibyich yi jäy huidi ajcxy cham tzinaayb? Tim jadu'n yi' ajcxy nej pi'ctijc huidibi ajcxy iyiiyb ma mayjäy yjuygixy ytooccixy, miyaaxcixy midinaaygixy ymigügtijc: ¹⁷ “Ti njayaxüxyich flauta e ni ca' ti m'ejtzcixy; ti iich ajcxy öcpi njahuinyäxich, e miich ajcxy ca' ti myäxy.” ¹⁸ Chi Juan, je Bautista, anajty miñ, e je' ca' yacay y'ügy. E miich ajcxy minaangixy co Juan ca'oybi ymiidity. Jada pi'c'anäctijc nipaady nej miich ajcxy. ¹⁹ Chi iich je' je jäy huidibi tzoön tzajpjoty nmiñich, e caaybich

uucpich, e miich ajcxy minangixy: "Ijxcix, cha tüg yëydijc, janch cax janch vino'ucp huidibi migüg'ajtpy yajcuetpidijc etz pocyjäydijc." Je Dios tiy'ajt ji je' ñiguëxigy.

Je cajn huidibi ca' ycapxymidoogixy

²⁰ Chi Jesús ojcoty je maygajpjäy ma anajty may mijhuinma'ñ ti tuñ, com je mayjäy ca' anajty yjothuimbidaangixy ma Dios. Chi Jesús yminañ:

²¹ —¡Ay miich ayoob ajcxy huidibi tzinaayb jim Corazín! ¡Ay miich ayoob ajcxy huidibi tzinaayb jim Betsaida! Co ixypy ñich ti nduñich jecy'ajty je mijhuinma'ñ mijtzög'ajtin ma je Tiro etz Sidón cajn, jadu'n nej ñich ti nduñich ma miich ajcxy, ti ixypy je Tiro jäy etz Sidón jäy nijothuimbijtcixy etz ñaaygixy saco ñijen ñicuyjam ixcuyjam, je' je tiy'ajt co ooy ytajcixy ymaygixy miid ypocy ycixpi. ²² Paady miich ajcxy yam nimaaygixy. Co anajty Dios tiyduna'ñ je naaxhuiñybi jäy, huin'it miich ajcxy Dios xychaachytuna'ñ jac ñigi, ca'ydi je jäy ajcxy huidibi jecy'ajty tzinay jim Tiro etz Sidón.

²³ Miich ajcxy, Capernaum jäy, mnaybidáacigixy jadu'n nej jihuïy mdigihuaangixy jiiby tzajpjoty. Per ca' yjadu'nity. Mdigihuam miich ajcxy ayoodactuuby. Ayo'n tzaachypi mbadaangixy. Co ixypy ñich ti nduñich jecy'ajty je mijhuinma'ñ mijtzög'ajtin ma Sodoma cajn, jadu'n nej ti nduñich ma miich ajcxy mgajp, chambaad ixypy ity yi jadu'mbi cajn, ca' ixypy Dios cayajtigooy. ²⁴ Paady ñich miich yam nimaaygixy. Co anajty Dios tiyduna'ñ je naaxhuiñyjäy, huin'it miich ajcxy myajtzaachytuna'ñ jac ñigi, ca'ydi je jäy huidibi jecy'ajty tzinay ma Sodoma ñaaxjot.

Mingixy ma ñich e mbóocxcixipy

²⁵ Chi Jesús ytiigiyy Dios mibijctzooyb, yminañ:

—Dios Teedy, ñich miich n'ñibaatpich ngapxpaatpich. Miich miid je mij cötujcin jiiby tzajpjoty etz ya naaxhuiñ. Com miich ti mnajtzcapxy yi m'ixpijcin ma je ayoobtjic huidibi tzinaayb jotxeemy, e ti myüch yi m'ixpijcin ma yi xpicytjic cohuinma'ñydijc.

²⁶ Jadu'n, Tat, ti mduñ, com jadu'n miich ti mdzocy ti mjäygidägy.

²⁷ Jesús yjacminañ:

—Ñich nDeedy ti xyajcidiydyäyich tüg'óciy mic'ajt oy'ajt. Ni pin ca' ijxcapy pin je' y'ung, jëyi nDeedyich tügpajc. Ni pin ca' ijxcapy pin je' nDeedy'ájtpyich, jëyi ñich, je Dios y'ung tügpajc, etz jacjadyiñ huidibi ñich, je Dios y'ung, nyajñiguëxigamyich. ²⁸ Min ma ñich nidüg'óciy miich ajcxy huidijaty taj mayb myajpatp ma mjot mhuinma'ñ, ñich miich ajcxy nmöhuamyb jotcujc'ajtin. ²⁹ Cöbic miich ajcxy ñich n'ane'min ñich ngötujcin, jadu'n nej huaj yuub ajcxy cöbicy ycögi'. Ijxpäc ajcxy ñich ndiy'ajt etz cuydun ñich n'ayuc, com ñich nmüdich mecxtujcin etz ca' ñich amij agix nayjñihuïyijich. ³⁰ Ca' ñich n'ane'min ymicity, e ñich ndung ca' nimijaajity.

12

Je discípulos ajcxy moc cojc yajmujcp pocxiiduum

¹ Chi tüg xii Jesús yhuidity miid ymigügtjic ma tüg camjot. E hue' anajty sábado xii, je pöocxin xii. Chi Jesús ydiscípulos ajcxy oy anajty yubögyii. Chi ajcxy ytiigiyy trigo tiiim ñixajtzutp etz yjicxycy ajcxy je ypajc. ² E co je fariseos ajcxy ijxy nej Jesús ydiscípulos ajcxy y'idühtzicixy, chi ajcxy ñimay Jesús:

—Oc'ix nej miich mdiscípulos ajcxy y'idüch. Hue' ajcxy tumybyñ huidibi ca' huaad ma sábado xii yajtuñ.

³ Per Jesús minañ:

—¿Nej ca' miich ajcxy mgapxyñi ma Dios ñecy, jadu'n nej David etz ymigügtjic ajcxy idüch jecy'ajty co yuböccoti? ⁴ Pues yi' ajcxy tigiyy ma Dios ytjic. Chi cay ajcxy je tzajcaagy huidibi anajty jäy ajcxy ti yajhuindzigiy Dios. Je' je tzajcaagy huidibi teedy ajcxy anajty paatip cayipy. ⁵ ¿Nej ca' miich ajcxy ti mgapxyñi Moisés ycötujcin necy co je teedy ajcxy jëbi ytuñ ma Dios ytjic sábado xii, e ca' nan tundigooyb je' ajcxy?

⁶ Hich miich ajcxy nimaaygixyp, jac nigi mij cötújcín nmíididyich, ca'ydi je cötújcín huidibi je teedy ajcxy yajtuñ ma Dios ytjic. ⁷ Pen miich ajcxy ti mhujnjihuüy nej yhuimbizimy jada Dios y'ayuc, co Dios jadu'n yminañ: “Hich ndzojcpy co miich ajcxy miid'idipy pa'ayo'n ca'ydi co ajcxy myegipy huindzigi'ñ.” Pen miich ajcxy ti mhujnjihuüy jada ayuc, ca'ixyipy mbocy'ixy ma hich nmigügtjic huidibi ca' ma ti ytundigooy. ⁸ Hich, je jäy huidibi tzoon tzajpjoty, nmíidich ane'mín, jaydëbi nimäyich je jäy ajcxy ti jëbi tungixy sábado xii.

Je yëydjic huidibi anajty ycítidzip

⁹ Chi Jesús choñ jim, ñicxy ma je judíojäy ñaymujctac. ¹⁰ E jiiby ma je naymujctac anajty tüg yëydjic huidibi ycítitz. Je fariseo ajcxy xihuamyb Jesús, paady ajcxy y'amidooy, yminañ:

—¿Nej jëbi tüg pa'mjäy chögy sábado xiji?

¹¹ Chi Jesús y'adzooy:

—Pen ya ma miich ajcxy ji tüg jäy huidibi cöbixy yjutcögäy sábado xii, ¿nej ca' je' nicxy yajpidzimy mic'amy? ¹² Nigi tzobaatp tüg yëydjic ca'ydi tüg cöbixy, paady Moisés ycötujcín ca' capx'aducy co tüg oy'ajtín nduunim sábado xii, je pooxcín xii.

¹³ Chi Jesús nimay je yëydjic:

—Xajtiy yi mgi'.

¹⁴ Co xajtiy yci', chi choocy, e hui'my quipxyjaty miid je yci' oybi. Chi je fariseos ajcxy yjotmätcoty, yhuinma'ñ ixtaaygixy ajcxy nej huaad Jesús ocyaj'o'ccixy.

Tüg ayucnajtzcaxiyyin miid Jesús ycixpi

¹⁵ E co Jesús nejhuüy nej yi' ajcxy yhuinma'ñ miidity, chi jim choñ. E ooy mayjäy ypanixi Jesús, Jesús yajtzoocy anajty tüg'óciy pinjaty pa'm miid. ¹⁶ Jesús ane'my je pa'mjäy ajcxy co ca' huaad nigapxy nimiydägy co yi' je' je Cristo. ¹⁷ Jadu'n Jesús ane'my je pa'mjäy jigix ycixipy yca'pxipy je ayuc huidibi je profeta Isaías yjaay jecy'ajty, co Dios jadu'n yminañ:

¹⁸ Jada je' hich ndumbi huidi ti nhuin'ixyich. Yi' hich ooy ndzocyich njihuüyich etz ooy njotcujcich miid yi'. Hich yi' nmöhuamybich hich njihui'ñ mic'ajt. Yi' capxhuäcxip hich n'ayuc jadu'n nej ndzaachytuna'ñich naaxhuiñyjäy ajcxy miid ajcxy ypocy ycixpi.

¹⁹ Yi' ni ymigügtjic ca' oja'ñ, ni ycayäxa'ñ, ni ycatinähua'ñ, ni pin ca' midoohuipy ma cajp cujc.

²⁰ Ca' yi' tzaachytuna'ñ ayoobitjic etz huidibi ayo'ndumb ijtp. Etz nañ ni ca' yajtigoya'ñ huidibi ayoobitjic yco'ögy'ungdjic yjijp'ixpy. Jadu'n nej jäy cayajhuindigoy tzajcapy huidi huiidyip etz ni cayajpich je mecha huidibi uuxy uuxy tücxp. Ixti mabaad anajty yajcopicy y'ane'mín tudägypi.

²¹ E yi' mayjäy ooy yjijp'ixa'nyii.

Xigixy Jesús co miidity mujcu' ymic'ajt

²² Chi miid miñ ajcxy ma Jesús tüg jäy huidibi huinzic etz uum. Je' anajty miid ca'oybi. Chi Jesús yajtzoogy, e chi y'ixxigy etz ycapxigy. ²³ Co Jesús jadu'n tuñ, chi je mayjäy ytigiyy huinmay'ahuidijt, chi ajcxy yminañ:

—¿Nej jada je', je David y'ap y'oc huidibi rey'adam?

²⁴ Per co je fariseos ajcxy nejhuüy nej je jäy huinmay, chi ajcxy yminañ:

—Jadaabi yëydjic yajpidzimy ca'oybi miid je mujcu' huindzín ymic'ajt (ca' yi' yjéjity je Cristo).

²⁵ Per Jesús ñejhuüyib anajty ti je fariseos ajcxy yhuinmaayb, chi yminañ:

—Pen tügpicy tungmiidpi ixypy ñaybjic-huäcxigixy, etz ñaymidziptzoonigixy ixypy ac jëyi, pues cixipy yi' ajcxy y'ane'mín. Pen tüg cajp o tügpicy jugymigüg ixypy ñaybjic-huäcxigixy, pues ca' ajcxy y'idaangixy tügmucy. ²⁶ Pen Satanás, je ca'oybi huindzín, yajpidzimy ixypy ca'oybi ma je jäy ajcxy, chi ci'm ixypy je ca'oybi ti ñaybjic-huäcxigixy,

e je Satanás ymic'ajt ca' y'ida'ñ. ²⁷ Miich ajcxy minamb co ñich nyajpidzimyich ca'oybi miid je ca'oybi huindzin, je Beelzebú ymic'ajt. Pen tiy'ajt jadu'n nej miich ajcxy mina'ñ, je jäy ajcxy huidibi xymijnixpejt miich ajcxy, ¿nej yi' ajcxy paady mic'ajt ma je mujcu' co ajcxy yajpidzimy ca'oybi ma je pa'm jäy? Pues ca', paady yi' ajcxy tiy'ajt yejcp co miich ajcxy ti mgapxtigoy co yminaangixy co ñich nyajpidzimyich ca'oybi miid Satanás ymic'ajt. ²⁸ Per ñich nyajpidzimyich ca'oybi ma pa'mjäy miid Dios yjihu'i'ñ ymic'ajt. Paady miich ajcxy nejhuüyb co ti ymiñ yjäty je Dios y'ane'min ma miich ajcxy.

²⁹ (Dios ycötujcin jac mic ca'ydi je ca'oybi ycötujcin, paady jëbi nyajpidzimyich ca'oybi.) ¿Nej jëbi tüg jäy ytigiüy ma tüg micpi jäy ytijc etz pigaani tijaty yi' ymiid, pen ca' jayijp yci' ytecy xojtzity? Pues ca'. Cooni jayijp yci' ytecy xojtzity, huin'it jëb pijcip tijaty ymiid. ³⁰ Pinjaty ca' xymijnixpetyich, xymidzipich yi'. Pinjaty ca' tuñ miid ñich co jäy nyaj'ixpicxyich, hue' je' ajcxy jäy yajhuinma'ñydigooyb.

³¹ Janch ñich miich ajcxy nimäy co Dios jëbi huinmecxip tüg'óciy pocy huidibi jäy ytungixp etz tüg'óciy jibicpi huidibi jäy ycapxcixp. Jëyi janchtiy co pinjaty capxtigooyb miid je Espíritu Santo, je Dios yjihu'i'ñ ymic'ajt, ca' Dios huinmecxip nimina. ³² Pinjaty jibic xyñigapxpich xyñimiydaccpich, je' huinmecxam. Per je huidibi jibic ñigapxpy je Espíritu Santo, je' ca' huinmecxa'ñ ni jadachambi tiempo, etz ni camina xii.

Yi quipy yi' ytiim yi' miid yaj'ixcapy

³³ Pen miich ajcxy mnejhuñhuamy je quipy pen oy quipy, o pen ca', jëbi mnejhuñhuipy co je quipy nicxy ytiim'aty. Pen oy je ytiim, miich mina'nip co oy je quipy. E pen ca' oy ytiim'aty, huin'it miich ajcxy mina'nip co ca' y'oyity je quipy. ³⁴ Jibic jäy miich ajcxy, jadu'n nipaady nej jihuüy ahua'n iyujc xy'ung'ajtp. Pen miich ajcxy jibic jäy'ajtp, ¿nej jëbi miich ajcxy oybi ayuc mgapxipy? Jadu'n nej jäy ajcxy yjot yhuinma'ñ miidity, ac tim jadu'n ajcxy ycapxy. ³⁵ Je jäy huidibi oy ayuc ycapxpy, ymiid oyjot oyhuinma'ñ paady oy ayuc capxy. Je jäy huidibi jibic ayuc capxp, ymiid jibic jot jibic huinma'ñ, paady jibic ayuc capxy. ³⁶ ñich miich ajcxy nimay co anajty paady je xii je tiempo mina Dios tiyduna'ñ je naaxhuiñjyäy, huin'it ajcxy y'adzohuipy miid huen tim huidibi ayuc huidibi anajty ajcxy ti mgapxy. ³⁷ Com nejjaty miich anajty ajcxy ti mgapxy je m'ayuc jadu'n miich ajcxy Dios xytidyunip. Com miid yi' mgi'm ayuc yi' miid m'oybidzimipy mhuätzpidzimipy. E nañ jadu'n miid yi' mgi'm ayuc yi' miid mbocycähuipy.

Jibicjäydijc ajcxy pijctzoogixy tüg ijxpejt mijhuinma'ñybi

³⁸ Chi nijëjity fariseos ajcxy etz escribas ajcxy Jesús nimayi:

—Huindzin, n'ixamy ñich ajcxy miich tüg m'ijxpejt.

³⁹ Chi Jesús y'adzooy:

—Yi jibic jäydijc ajcxy etz ajcxy huidibi ca' mibiga'ñ Dios ypijctzooyb tüg ijxpejt huidibi tzomb tzajpjoty. Per Dios ca' yega'ñ jadüg ijxpejt. Ti Dios yecy tüg ijxpejt ma Jonás. ⁴⁰ Com jadu'n nej Jonás jecy'ajty ijxpejt yejcy co y'ijty tugüüg xii tugüüg tzuum mejyoty ma acx ymoxac, nañ tim jadu'n ñich, je jäy huidibi tzoon tzajpjoty, nyegamy ijxpejt jadachambi tiempo co n'idipyich tugüüg xii etz tugüüg tzuum naaxjoty. ⁴¹ Je mayjäy huidibi anajty tzinaayb ma Nínive cajp, ti jothuimbijtcixy etz ti ixmach ajcxy huidijaty jibicpi ajcxy ytumyib co Jonás capxhuäcxy Dios y'ayuc ma yi' ajcxy. Cha ñich ngapxhuäcxyich Dios y'ayuc ma miich ajcxy, etz jac nigí cötujcin nmüididyich, ca'ydi Jonás; e ca' miich ajcxy mjothuimbity. Paady co anajty Dios tiyduna'ñ je naaxhuiñjyäy, je Nínive jäy miich ajcxy xyajpocycähuam. ⁴² Nañ jadu'n je töxyjäy reina huidibi tzinaayb jadachambi tiempo, etz yajpocycähuüib ajcxy. Je reina tzoon jigüegy nicxy co amido'ida'ñ je rey Salomón ma capxhuäcxi Dios y'ayuc. Ji naaxhuiñ jadachambi tüg Dios ytiy'ajtmüidpi jac nigí ymijity, ca'ydi Salomón anajty, e ca' je jäy ajcxy mijpidäga'ñ.

Je jibic espíritu co jadüg'oc yhuimbity

⁴³⁻⁴⁴ Yi jäy ajcxy huidibi cham tzinaayb, quipxyjaty ajcxy miid je ca'oybi. Co je ca'oybi ypidzimy ma je jäy, chi je' ñicxy jim migtigüduum y'ijxtacy. Co ca' paty y pocxtac, huin'it ymina'ñ: "Huimbidaambich ma je jäy yjot yhuinma'ñ ma iich ti n'octzombi." Co je ca'oybi yjäty ma anajty ti chinäy, chi paty je jäy yjot yhuinma'ñ ooy yhuätzity etz yajxon ypedigity oy oyduñ. ⁴⁵ Chi je ca'oybi ñicxy oy yajtzoñ jahuixtuc ca'oybi jac jibicpi ca'ydi je'. Chi ajcxy ytigüy ma je jäy yjot yhuinma'ñ, e chinay ajcxy jiiby. Huin'it je jäy jac'öctiy oy yjajtni, ca'ydi jadu'n nej anajty jayijp'aty.

Jesús ytaj etz y'uch miguëx ajcxy

⁴⁶ Jesús yaj'ixpijcpy anajty je mayjäy, co oy yja'ty je' ytaj etz y'uch miguëx ajcxy. Hue' ajcxy yhui'my tiba'y. Je' ajcxy anajty ymigaapxamy Jesús. ⁴⁷ Chi jäy yajnimay Jesús:

—Yi mdaj etz m'uch miguëx ajcxy, chiiby ajcxy tiba'y, miich xyjamigaapxamb.

⁴⁸ Jesús y'adzooy, nimay je jäy huidibi ytaj y'ayuc yajnajxi ma yi':

—¿Pin jäy miich ajcxy mdijy co iich ndaj'adyii etz iich n'uch'adyii nmigüg'adyii?

⁴⁹ Huin'it Jesús nitziihuiy je' ydiscipulos ajcxy e yminañ:

—Jada iich ndiscipulos ajcxy jadu'n nipaady nej iich ndaj etz iich n'uch nmiguëx.

⁵⁰ Huen ytimpinity huidibi ytumy b iich nDeedy chojcin, huidibi jiiby tzajpjoty, pues jadu'n yi' ajcxy nipaady nej iich ndaj etz iich n'uch miguëx.

13

Je ayuccapxhuäcxi y'ijxpejt (niipi ijxpejt)

¹ Je huin'it xi Jesús choñ ma je tijc. Chi ñicxy ma je mejypa' jim oy y'iñay'ihuiy. ² E co mayjäy ooy ñaymujci jim ma anajty Jesús iñay, chi Jesús ytigiy barcojoty. Per tüg'óciy je mayjäy yhui'mday ma mejypa'. ³ Jesús ytigüy jäy yaj'ixpijcp miid jihuimbit ayuc, yminañ:

—Tüg jäy choñ trigotim huijp. ⁴ E ma anajty jim ytiimhuijy, huin'it je ytiim oy naagity ycäy ma tü'aa. Chi jada' je joon ajcxy oy ymiin etz ypiihuiy je tiim. ⁵ Nijëjity ytiim ycäy ma tzaan'icx ma anajty hueeni naax. Jada tiim tzojc ymujxy. ⁶ Com hueeni anajty je naax ma je tzaan'icx, chi co oy xi'an ypadyii, chi ytiitztay, com ca' anajty je ytictz yeegity. ⁷ Nijëjity tiim oy ycäy ma ujtz'aayjot ma apyjot, e ujtz'öctay je trigo mang. ⁸ Per je tiim huidibi ca'u ma oy ñaax, je' yon yajxon e tiim'ajt may'amy; tüg ypi'cpajc iipxmajc oy yco'ity, jadüg pi'cpajc tug'px oy yco'ity, jadüg pi'cpajc migo'px oy yco'ity. ⁹ Pinjaty mido'n miid huen mido'mbicy jada ayuc.

Ti ycipi je ijxpejt

¹⁰ Chi je' ydiscipulos ajcxy nimijhua'cy Jesús, chi ajcxy yajtiy:

—¿Na'amy co myajtuñ jihuimbit ayuc co myaj'ixpicy je mayjäy?

¹¹ Chi Jesús y'adzooy, yminañ:

—Miich ajcxy jaydeb mnejhuihuipy huidibi Dios ñigapxyp ñimiydacpy coyuch'amy ma y'ane'min. Jacjadyii jäy ca' ajcxy huinjihuipy. ¹² Pinjaty ymiid yajmöhuiy nigi, pinjaty hueen miid yajpigipy nigi, oy ixipy hueen jadim miidity. ¹³ Paady jihuimbit'amy nyajnimaaayich; jaydeb pinjaty ijxcixy, ñipatpy nejihuüy ca' ti ijxcixy; etz co ajcxy midoogixy, ca' ajcxy huinjihuüy, ñipatpy nejihuüy ca' ti midoogixy. ¹⁴ Jadayaabi ytunyii yjadyii jadu'n nej je profeta Isaias jaaybejty yajhui'my ma jadu'n yminañ:

Miich ajcxy midohuamy, per ca' mhuinjihuühuangixy. Miich ajcxy m'ixamy, nañ ca' mhuinjihuühuangixy huidibi ti m'ijxcixy.

¹⁵ Com jadayaabi jäy ooy ajcxy yjot yhuinma'ñ ti y'ahuimbity juuñ. Nej ajcxy yjamidoy, ca' ajcxy ymidohui'mgixy. Nej ajcxy ja'ixy, ca' y'ijxhui'mgixy. Nej ajcxy yjahuinjihuüygixy, per ca' yhuinjihuüy ma yjot yhuinma'ñ. Yi' ajcxy ca' yjothuimbidaangixy ma iich, jaydeb nyajnidzögibich ajcxy.

¹⁶ Per jotcujc miich ajcxy, co miich ajcxy ijxhui'my miid mhuiin huidibi ndumy bich, e mmido'mbicy ajcxy iich n'ayuc. ¹⁷ Janch tiy'ajt jadu'n nej iich miich nimaaygixy. Janch

tiy'ajt co may profetas ajcxy etz tudägy jäy ajcxy huidibi tzinaayb jecy'ajty, ooy ajcxy ja'ixañ huidibi miich ajcxy m'ijxyp cham, per ca' ajcxy icy. E ooy ajcxy jamidohuañ je ayuc huidibi miich ajcxy midooyb cham, per ca' ajcxy midoy.

Jesús najtzcaxïy je ijxpejt ma je niipi

¹⁸ Amido'it miich ajcxy, jadu'n nej yhuimbizimy jada jihuimbit ayuc maabi je tiim huijpi. ¹⁹ Je jäy ajcxy huidibi amido'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tiim huidibi cäb tügujc, e je joon ajcxy mic'amy ypiimujctay. ²⁰⁻²¹ Je jäy ajcxy huidibi amido'ijtp Dios y'ayuc janch jotcuyc, per co agapxiyb paady, co tzaachypi minaxy yajnaxy miid Dios y'ayuc ycixpi, chi mic'amy ajcxy ixmajtzní Dios y'ayuc, jadu'n ajcxy nej je trigotiim huidibi ti ycäy ma tzaanïcx, huidibi ca' oy ytictz miidity. ²² Je jäy ajcxy huidibi amido'ijtp Dios y'ayuc, e co ñicxni, chi jäydigooyñi Dios y'ayuc miid jotcuyc'ajtin tzinaayin, comeen'ajtin etz adzojcin. Jadu'n ajcxy nipaady nej trigotiim huidibi ti ycäy ujtzjoty, e ca' ytiim'aty miid co oy y'ujtz'ögy. ²³ Je jäy ajcxy huidibi amido'ijtp etz cöbijcp yajxon Dios y'ayuc amumdügot etz Dios y'ayuc ytumyb ma ajcxy yjot yhuinma'ñ, jadu'n ajcxy nipaady nej je tiim huidibi ti ycäy ma oy ñaax etz ti ytiim'aty may'amy. Tüg pi'cpajc iipx majc oy yco'ity, etz jadüg pi'cpajc tugi'px oy yco'ity, etz jadüg pi'cpajc migo'px oy yco'ity.

Je ijxpejt co je jibic ujtz ymuxy ma je trigo cam

²⁴ Chi Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej tüg yëydijc huidibi trigo tiim huijpi ma je' ycam.

²⁵ Per co ajcxy yma'öctay nidüg'óciy je cogam, chi ytigiiy tüg ymidzip ma je ycamjot. Chi je midzip jibic ujtz tiim oy huijy ma je trigo cam. Chi ñicxni. ²⁶ E co je trigo oy yooñ, chi ypijy. Nañ jadu'n je jibic ujtz oy yooñ. ²⁷ Chi je ytumbidijc oy yhuindzin yajnimay: “Huindzin, ¿nej ca' ti mnïpy ac trigotiim? ¿Nej co jim nañ jadu'n jibic ujtz yajpaady?”

²⁸ Chi je cogam yminañ: “Huen jada' nmidzipich jadu'n ti y'idich.” Chi je tumbidijc y'amidoohui: “¿Nej mdzojcpy co ñich ajcxy nhuijxigibich je jibic ujtzi?” ²⁹ Chi je cogam yminañ: “Ca'. Pen miich ajcxy mhuijxïcpi je jibic ujtz, ca' jecyity co m'ahuijxmugipy nañ jadu'n je trigo. ³⁰ Ixmatz, huen je jibic ujtz yeegy tügmucy miid je trigo, ixti cooni anajty ypidïgy je cosecha. Co cosecha paty, huin'it nguexa'ñich je ndumbidijc co huen jayijp pujxïgy je jibic ujtz etz axotzipy etz nögiy. E co yajpidictay je jibic ujtz, chi yajpidigipy je trigo e pidägipy ma je tze'x.”

Je ijxpejt ma je mostazapajc

³¹⁻³² Nañ jadu'n Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej tüg mostazapajc huidibi tüg jäy ñiip ma je' ycam. E je mostaza ytiim je' jac tim mutz ca'ydi ni huidibi ujtz tiim. Per co je mostaza ytiim ymux etz yoñ, chi y'ahuimbijty jac mij ca'ydi jacjadyi ujtz. E hue' nicxy yjaty janch mij, ixti joon ajcxy oy yqueec miin yqueec xijpy jim, pidägy je ype'ñ ma je mostaza y'aacx.

Je ijxpejt ma je levadura huidibi ca' y'oyity

³³ Nañ jadu'n Jesús yaj'ixpijcy jadüg jihuimbit ayuc, yminañ:

—Je Dios y'ane'min jadu'n nipaady nej levadura huidibi tüg töxyjäy ypidacpy miid je harina, jigix je harina oy ypidïgy.

Nej anajty Jesús yajtuñ je ijxpejt

³⁴ Tüg'óciy Jesús yaj'ixpijcy je mayjäy, jihuimbit'amy yaj'ixpijcy, e ni ti ca' jäy yaj'ixpijcy cayajnimäy jihuimbit ayuc. ³⁵ Jadu'n Jesús ytuuñ, jigix yajcuyduñ je ayuc huidibi je profeta Isaías yaayhui'm jecy'ajty, co jadu'n yminañ:

ñich ngapxamyich ac tim jihuimbit ayuc. ñich nigapxamyich tijaty huidibi ca' pin nejhuïy, mabaad Dios oga'n yajcojy je naaxhuiñybi.

Jesús capxticxni nej yhuimbizimy je jibic ujtz ma je trigo cam

³⁶ Chi Jesús capxycijxy miid je mayjäy, chi ñicxy ma tüg tijc. Chi ytigiy tigoty miid je' ydiscípulos ajcxy. Chi Jesús ydiscípulos ajcxy nimijhua'cy Jesús, yminañ ajcxy:

—Tun may'ajt iich ajcxy xyajhuinjihuüiyg je jihuimbit ayuc co ti mnigapxy je jibic ujtz ma je trigo cam.

³⁷ Chi Jesús yajnimay:

—Iich, je jäy huidibi tsoon tzajpjoty, jadu'n iich nipaady nej je jäy huidibi niip je oybi tiiim ma je ycam. ³⁸ Je cam jadu'n nipaady nej tüg'óciy naaxhuiñyjäy. Je oybi tiiim jadu'n nipaady nej je jäy ajcxy huidibi cöbijcp Dios y'ane'min. Je jibic ujtz jadu'n nipaady nej je jäy ajcxy huidibi cöbijcy ajcxy je mujcu' y'ane'min. ³⁹ Je jäy huidibi niipy je jibic ujtz, jadu'n yi' nipaady nej je ca'oybi. Je jibic ujtz cosecha, jadu'n nipaady nej je tiempo co anajty je naaxhuiñ ycixy ytigoy. Je ajcxy huidibi yajpidic je cosecha, nipaady nej je ángeles ajcxy. ⁴⁰ Jadu'n nej je jibic ujtz oy yajpujxigy etz yajpidacy jijnjoty, nañ tim jadu'n nicxy yjaty miid je jäy ajcxy huidibi cöbijcp je mujcu' y'ane'min co anajty je naaxhuiñ cixy ytigoy. ⁴¹ Co anajty je naaxhuiñ ycixy ytigoy, chi iich, je jäy huidibi tsoon tzajpjoty, nguexamyich n'ángeles huen yajmujctäy je jäy huidibi je ymigüg yajtundigooyb, etz yi' huidibi ajcxy jibic-huinma'ñ tumb. ⁴² Co yajmujctähuipy je jibicjäydijc, chi ajcxy yajpidägiipy mijjijnjoty, jiiby ajcxy yäxa'ñ etz ytitzmucxy ytitzqueecy miid je ayo'n ycixpi. ⁴³ Per je jäy ajcxy huidibi cuydumb Dios chojcin, idam ajcxy miid Dios Teedy jiiby tzajpjoty. Ymii'idamy ajcxy tüg oy'ajti, jadu'n nipaadip nej je xii ytixcin yjajin. Pen miich ajcxy mido'n miid, mido'mbijc ajcxy iich n'ayuc.

Je y'ijxpejt je meeñ huidii yüchíp

⁴⁴ Je Dios y'ane'min jadu'n nipaady nej meeñ huidibi yüch ijtp ma tüg cam. Per co tüg jäy paady je meeñ, chi mic'amy jadüg'oc yüdz tigach. Chi ooy yxondägy. Chi ñicxy etz tooctäy tüg'óciy huidibi ymiid etz juy je naax.

Je y'ijxpejt je perla huidibi tzoohuip

⁴⁵ Nañ jadu'n Dios y'ane'min jadu'n nipaady nej tüg ajuuyb adoocpi huidibi ijxtaayb tüg oybi perla huidibi tzoobatp. ⁴⁶ E co anajty paady tüg perla huidibi janch tzou, chi ñicxy tooctigoydäy tüg'óciy huidibi ymiid etz juy je perla.

Je acxmadzi'ñ y'ijxpejt

⁴⁷ E nañ jadu'n Dios y'ané'min jadu'n nipaady nej tüg acxmadzi'ñ huidibi jäy miid ycojibiiby mejyoty. Chi jiiby ytigiy huen ytim huidibi acxity. ⁴⁸ E co anajty je acxmadzi'ñ y'uch miid je acx, chi je jäy ajcxy yajpidzimy ma mejypa'áy. Chi iñay ajcxy jim mejypa'áy etz huin'ijxy ajcxy je oyjatypi acx etz pidaaccixy ma ycach. Je acx huidijaty ca' y'oyity, je' ajcxy y'ixjibijp. ⁴⁹ Tim jadu'n nej ti yjaty miid je acx, nañ jadu'n jada'ñ, co anajty ycixy ytigoy je naaxhuiñ. Huin'it je ángeles ajcxy ñicxa'ñ huindu'my naaxhuiñ huin'ixa'ñ je jibic jäydijc e pidäga'ñ ajcxy abicy, nañ jadu'n huin'ixa'ñ je oy jäydijc, e pidäga'ñ ajcxy nañ jadu'n abicy. ⁵⁰ Chi je ángeles ajcxy pidäga'ñ je jibicjäydijc mij jijnjoty. Jiiby jijnjoty ajcxy yäxa'ñ ytinähua'ñ etz ytitzmucxaangixy ytitzqueedaangixy miid je ayo'n miid je tzaachypi ycixpi.

Je jäy huidibi jajtp nej oybi etz nej jibicpi yajpidzimity

⁵¹ Chi Jesús y'amidooy ajcxy:

—¿Nej mhujnjihuüiyb miich ajcxy tüg'óciy huidibi iich ti ngapxich?

Chi ajcxy y'adzooy:

—Huindzin, ti nhujnjihuüiy iich ajcxy.

⁵² Chi Jesús ajcxy nimay:

—Nidüg nidüg escriba co ti ixpicytäy tüg'óciy Dios ytiy'ajt y'ane'min huidibi tza-pjoty tsoon, hue' jadu'n nipaady nej tüg codijc comeeñybi huidijaty ymiid yjajty nej yajpidzimipy jemybi etz tucpi.

Jesús yajpaady jim Nazaret

⁵³ Co Jesús yaj'ixpijctay jada jihuimbit ayuc, chi chooñ jím. ⁵⁴ Co Jesús chooñ jím, chi ñicxy ma yci'mnaax yci'mgajp. Chi Jesús ytigiiy ma je judio ñaymujctac, e ytigiiy yaj'ixpijcp. Chi je mayjäy jiiby ooy jihuüy huinmay nej yi' yaj'ixpicy, yminañ ajcxy:

—¿Ma jada' jada yëydijc ti paady jada ixpijcin? ¿Ma mic'ajt paady co ooy mijhuinma'ñ tzachtuñ? ⁵⁵ Jadayaabi yëydijc hue' yteedy'ajtpy je tzejtzpi, etz ytaj'ajtpy María. E ñich ajcxy n'ix'ajtpyich je y'uch ajcxy; Jacobo, José, Simón, etz Judas. ⁵⁶ Nañ jadu'n ya chinay ma ñich ajt je' y'uch ajcxy töxyjäy. ¿Ma oy ti paady jada ixpijcin jada mic'ajtin?

⁵⁷ Paady je maycogajpi ajcxy ca' ytunicuend. Paady Jesús ajcxy nimay:

—Huen ma'amayty tüg'óciy je mayjäy ajcxy ooy yajmij'aty yi jäy ajcxy huidibi najtzcapxiyb Dios y'ayuc, ca'ydi huidibi y'ayucnajtzcapxiyb ma yci'mnaax yci'mgajp yci'mjiin yci'mdijc.

⁵⁸ Ma yci'mnaax yci'mgajp Jesús ca' jaty nej mijhuinma'ñ tunip anajty, miid co je jäy ajcxy ca' mijpidägyii.

14

Juan el Bautista co y'ögy

¹ Je huin'it tiempo Herodes huidibi anajty ane'mb jím Galilea tiy'ajt paty nej Jesús ytuñ. ² E yi' nimay je ymidungmiidpidijc:

—Yjiibi jäy huidibi tzachtumb mijhuinma'ñ, yi' je' je Juan, je Bautista. Juan ti jugypicy jadüg'oc ma anajty ti y'ögy, paady mic'ajt miid jaydëb mijhuinma'ñ tuñ.

³ Herodes ti anajty ni'ane'mdiy co Juan huen yajmach, e yajpidägyy pujxtigoty. Jadu'n Herodes tuñ miid Herodías ycixpi. Je Herodías je' anajty miid jayijp'aty ti ypiy Felipe, je Herodes y'ajch, chi ti ixmajch Felipe, chi ypijcy miid Herodes. ⁴ Juan ti anajty nimäy Herodes co ti ytundigooy co ti picy miid Herodías.

⁵ Je rey Herodes ooy anajty jayaj'öga'ñ yi Juan, per tzigiiyb anajty miid je mayjäy. Com je mayjäy ti anajty mibicy ajcxy co Juan hue' anajty tügi Dios tiy'ajt miidpi, tüg profeta.

⁶ Co Herodes yjimijtpejty, chi anajty ñayñixiuduñyii, e chi Herodías ñix ñicxy ejtzp ma Herodes yhuinduu. Je rey ooy jäygidacy nej anajty Herodías ñix y'ejch. Paady Herodes Herodías ñix nimay:

⁷ —Dios ñich yam ngapxpatpy co nmöhuamyb ti mdimypijctzooyb.

⁸ Chi Herodías nimay je' ñix co huen pijctzoohui je Juan, je Bautista, ycohuajc ma tüg texy. Chi Herodías ñix je rey nimay:

—Ndzojycpich co miich xymöhuip Juan, je Bautista, ycohuajc ma tüg texy.

⁹⁻¹⁰ Co jadu'n midooy je rey, chi ytigiiy tajp maybi mij cajee. Per co ti anajty Dios capxpaatni, yminaani mayjäy yhuinduu co ymöhuamyb tijaty ypijctzooyb. Paady ane'my tüg soldado co huen nicxy yajtzoñyii Juan ycohuajc, e möhuipy Herodías ñix.

¹¹ Huin'it je soldado oy je Juan ycohuajc yajminajci jiiby pujxtigoty. Chi moy je töxy'anäg, e je töxy'anäg yejcnaixni ma ytaj.

¹² Huin'it xii je Juan ydiscipulos ajcxy yja'ty. Chi ajcxy oy yajnaaxtigiiy je Juan ñinix. Chi ajcxy oy Jesús yajnimäy.

Jesús yajcay migoox mil jäy

¹³ Co Jesús nejhuüy ti anajty ti ytuñyii ti yjadyii miid Juan, chi ytigiiy ma tüg barco naydüg, e nicxni ma tüg it ma ca' pin chinäy. Co je mayjäy nejhuüy co Jesús ti ñicxy, chi ajcxy chonday canaag agajp, nicxy ajcxy ma Jesús yajpaady, hue' tecygi'm ajcxy nicxy.

¹⁴ Co Jesús ypidzimy barcojoty, chi ijxy mayjäy. Jesús ooy pa'ayoy je mayjäy, e yajtzoocy je pa'mjäy huidibi anajty ajcxy jím ymiid miiñ. ¹⁵ Com ti anajty chuu'ñiñi, paady je' ydiscipulos ajcxy nimijhua'cy Jesús, e nimay ajcxy:

—Ti chuu'ñiñ, e ca' ya pin china'y, paady capxcixy miid jada mayjäy ajcxy, jaydëb ajcxy nicxy ixtäy ycaayin y'uucin ma yi mutz cajp ajcxy huingonbi.

¹⁶ Chi Jesús yminañ:

—Ca' ycopicyty co ajcxy nicxy jicxy ixtäy. Miich ajcxy möhuip caayin uucin.

¹⁷ Chi je' ajcxy ymínañ:

—Per íich ajcxy jëyi yeeby nmiidity migoox tzajcaagy etz metz acx.

¹⁸ Chi Jesús ymínañ:

—Mimiingix yam'amy.

¹⁹ Chi Jesús nímay je mayjäy co huen íñay'íhuydaagyíxy ma pi'cmíy'ung nícx. Huin'it Jesús je migooxpí tzajcaagy conígy etz je metzpi acx. Chi ypa't'ijxy jíiby tzajpcíxy, e yajnaxy Dioscojuyípy. Chi tujc-huácxy je tzajcaagy etz moy je' ydiscípulos ajcxy, co huen yajhuácxcyíxy ma je mayjäy. ²⁰ Nidüg'óciy je mayjäy ajcxy ycay cüxyí. Co je mayjäy ycayday, chi je discípulos ajcxy yajmujcy je cayduc jíctuc, e yaj'ujch ajcxy majmetz cach. ²¹ Migoox mil anajty ajcxy je yëydíctíyc huídibi cay uuc. E ca' ajcxy míchoy je töxyjädyíxc ajcxy etz je y'ung y'anäg ajcxy.

Jesús yöy níhuingíxy

²² Chi Jesús ane'my yí' ydiscípulos ajcxy co huen barco tígyíxy mic'amy, jígy nícxiy ajcxy jim mejy nínaxy. Nami yí' ydiscípulos ajcxy choñ barcojoty, Jesús ycapxycíxy miid je mayjäy huen nícxcíxni. ²³ Co anajty Jesús tí ycapxycíxy miid je mayjäy, chi nícxy naydüg ma tüg cögop Dios míbjctzoobi. Co ycoodziñ Jesús naydüg anajty yajpaady. ²⁴ Co ycoodziñ, mejy cujc anajty je barco cujc nícxy. E je níi ooy anajty ymíjétpety ma je barco, je' co ooy anajty mic yjanchpojy. ²⁵ E co oy ymoñíy, huin'it Jesús ymíjhua'cy ma je' ydiscípulos ajcxy, nícxy adüyöyb mejyhuingíxy. ²⁶ E co je discípulos ajcxy íjxy co Jesús anajty ymíñ mejyhuingíxy, chi ajcxy ooy ñay'adzígíyí. Ooy ajcxy yaaxqueecy ymínañ ajcxy:

—Hue' íich ajt íjxmaníyím.

²⁷ Chi Jesús mic'amy ymígapxy ajcxy etz nímay:

—Huinmic jotmic naybídáacígíxy, íich yí'. Ca' mdzígyíxy.

²⁸ Chi oy Pedro Jesús ymígapxyí, nimaayi:

—Huindzin, pen janch miichity, ane'mgích co huen íich miich níncxíp adüyöyíp mejyhuingíxy.

²⁹ Chi Jesús Pedro nímay:

—Mín.

Huin'it Pedro ymínajcy ma je barco etz nícx ma Jesús adüyöyíp mejyhuingíxy. ³⁰ Per co Pedro jíhui'íybjcy jadu'n nej anajty ooy mic yjanchpojy, chi ooy chígy, chi oy oga'n ytigíyñi quimbí, chi yaaxqueecy, ymínañ:

—¡Huindzin, íich yajtzóocígích!

³¹ Huin'it Jesús oy yci' mímajtzi, chi nímay:

—Míich, janch hueeni mmíbjcín. ¿Nej co ca' yajxon xymíbicyích?

³² Co Pedro etz Jesús ytigíy barcojoty, huin'it je mic poj ñajxy. ³³ Huin'it je' ajcxy jíiby barcojoty ycojxtinay'íhuydaay ma Jesús yhuinduu. Chi ymínañ ajcxy:

—Janch tíy'ajt co miich Dios xy'ung'adyí.

Jesús yajtzoocay je pa'mjäy ajcxy jim Genesaret

³⁴ Co ajcxy ymejyñajxtay, chi ajcxy oy ja'ty ma je Genesaret naaxjot. ³⁵ E co je jäy ajcxy nejhuíy co Jesús tí yjäty ma yí' ajcxy naaxjot, chi ajcxy tíy'ajt quejxy ma tüg'óciy cajp etz rancho huinduy agonbí co Jesús yjímity. Chi je mayjäy miid míñ tüg'óciy je pa'mjäy ma Jesús. ³⁶ Chi ajcxy cohuaníy Jesús, pen jëb je pa'mjäy nídofnyí je yhuít. E tüg'óciy je huídijaty nídofnyí je' yhuít, je' ajcxy choocay y'agídactay.

Huídí jäy yaj'ahuimbijty janch jíbic

¹ Chi ymíñ ma Jesús níjéjty fariseo jäy ajcxy, je huindzindíxc huídibi tzachpadumb judío ycostumbre. Nañ jadu'n míñ níjéjty escribas, je huindzindíxc huídibi ajcxy

nijaydudp anajty Dios ñecy. Je fariseos etz escribas ajcxy ti choongixy anajty jim Jerusalén, chi ajcxy y'amidooy Jesús:

² —¿Na'amy co miich mdiscípulos ajcxy ca' cuydungixy judío ñi'ap costumbre? Yi' ajcxy ycaaygixy y'uuccixy, e ca' jayjip ycibujcixy, ca' ixpujcixy ixjéztzixy ypocy.

³ Chi Jesús y'adzooy, yajtiy:

—¿Na'amy co miich ajcxy mgapxycömidodägy Dios? Mdzachcuydungixy mgi'mgostumbre ma yjapadyii mguydungixy ixypy Dios ycötújcin. ⁴ Com Dios ti y'ane'my ma ycötujcin: “Yajmij'at mdaj mdeedy, e pinjaty jibic nigapxy ni'ojiyb ytaj yteedy, ögipy yi'.” ⁵ Per miich ajcxy minamb co tüg je yéydijc jébi nimäy ytaj yteedy: “Ca' ñich miich ajcxy nbubeda'ñ, com ti n'ahuanñyich ma Dios tüg'óciy tijaty nmíidich.”

⁶ Chi huen ytimpinity jadu'n minamb, ca' ocpubedaanip ytaj yteedy, e jadu'n miich ajcxy myajtigoy Dios y'ane'min com tzachtunaangixy mgi'mgostumbre. ⁷ Miich ajcxy naybidaacip jadu'n nej jihuñy tudägy jäy, e ca' yjanchity. Janch tiy'ajt jadu'n nej jecyip Isaías jaaybejty yajhui'my co Dios jadu'n yminañ:

⁸ Jadayaabi jäy xyajmij'ajtpich ahuac aguy, per ca' ajcxy xyajmij'atyich cixyjot huinijot.

⁹ Naadigi' co ajcxy xyhuin'iiygixyich xyhuinyáaxcixyich. Mnayyaj'ixpijigixy ayuc tiy'ajt huidibi jäy ajcxy ti cojy ti maacxy.

¹⁰ Huin'it Jesús huomujctay je mayjäy, yminañ:

—Amídooy'ijtcixy ñich n'ayuc etz mhuinjihuñyigixip. ¹¹ Ca' ji ni ti jüxcy huídi jäy ypidacpy ma y'ahuac ñicxy yajpocycäy. Yi' janchtiy je jibic ayuc huídi pidzim ma jäy ajcxy y'ahuac, yi' ajcxy yajpocycähuib.

¹² Chi ymiñ ma Jesús je' ydiscípulos ajcxy, chi ajcxy ñimaayi:

—¿Nej miich mnejhuñy co je fariseos ajcxy ñijotma'tpy co ajcxy midoy je ayuc jadu'n nej miich minañ?

¹³ Chi Jesús y'adzooy, yminañ:

—Huen tim huídi ane'min huídi ca' Dios ti pidägy, Dios yajtigoyam, tim jadu'n nej jäy ajcxy huijxgy ujtz huídi ca' y'oy'ujtzity. ¹⁴ Ixmajtzicx yi fariseos etz escribas ajcxy. Ca' ajcxy huinjihuñy Dios ytiy'ajt. Jadu'n ajcxy nipaady nej jäy huintzpi, e co tüg huintzpi huíztzhuidity jadüg huintzpi, chi nimetz ñicxy yjutcögägy.

¹⁵ Huin'it Pedro nimay Jesús:

—Yajhuinjihuñy ñich ajcxy jada jihuimbit ayuc.

¹⁶ Chi Jesús yminañ:

—¿Nej miich ajcxy nañ jadu'n ca' mhuinjihuñy jada jihuimbit ayuc? ¹⁷ ¿Nej ca' miich ajcxy mnejhuñy co tüg'óciy huídi tigiyb ma miich ajcxy m'ahuac, je' ñicxp ma miich ajcxy mjot etz ypidzimy ma ajcxy mninícx? ¹⁸ Per je jäy huídi jibic capxp, capxp je' je jibic ayuc huídi ymiid ma yjot yhuinma'ñ. Jada jibic ayuc yajpocychimícp je jäy. ¹⁹ Yi' jibicpi huídi tzomb ma jäy ajcxy yjot yhuinma'ñ, yi' je' jäyyaj'ögii huinma'ñ, je töxyjäy migapxtigoyii huinma'ñ, meedzii huinma'ñ, je indägii huinma'ñ, je piitz capx huinma'ñ. ²⁰ Yijadu'mbi jibic-huinma'ñ yajpocycäb jäy ajcxy ma Dios. Per co jäy ajcxy ycaay y'ügy, ma ca'ni ajcxy pocy ixpujcixy jayjip, ca' je' ypocycäy ajcxy ma Dios.

Tüg töxyjäy huídi ca' judíojäy mibijc Jesús

²¹ Chi Jesús jim choñ, ñicxy ma je Tiro etz Sidón naaxjot. ²² Jim anajty tüg töxyjäy chinäy. Jada töxyjäy hue' anajty cananeajäy, canan judíojäy. Chi yi' nimiiñ Jesús, chi nimay:

—Huindzin, David y'ap y'oc, pa'ayoogich. ñich nmíidich tüg niix huídi ymiid ca'oybi etz oy tzaachypi paady.

²³ Per ca' ni nej Jesús y'adzoohui. Huin'it je' ydiscípulos ajcxy miiñ ma Jesús, e ycohuanñy, minañ ajcxy:

—Capxycix miiid jada töxyjäy, com niigo xypayaax xypadinaayim.

²⁴ Chi Jesús yminañ:

—Dios ñich ti xyquexyich jëda'ajty ma je israelitasjäy huiðibi y'alma tigoyam.

²⁵ Chi je töxyjäy ymijhua'ci ma Jesús, e ycojxtinay'ihuiy ma je yhuinduu, chi yminañ:

—Huindzin, tun may'ajt pubejtcich.

²⁶ Chi Jesús yminañ:

—Ca' jadu'n y'oyity co n'ixmadzipich je israelitasjäy (Dios yjäy), e nbubedipich miich ajcxy. Co jadu'n ndunipich, jadu'n nipaadip nej jäy ajcxy y'idich co ajcxy pijci je ajcxy y'ung ycaagy, e möy je uc.

²⁷ Huin'it je töxyjäy y'adzooy:

—Janch tiy'ajt jadu'n nej miich mina'ñ, per ixti ycaayb je uc je tzajcaagy y'abu'x huiðibi cáb ma yhuindzin mesa.

²⁸ Chi Jesús je töxyjäy nimay:

—Janch mij mmibijcin. ñich ndunaamybich jadu'n nej miich mdzocy.

Huin'it hori je töxyjäy ñix choocy.

Jesús yajtzögy mayba'mjäy

²⁹ Chi Jesús jim choon. Chi ñajxy ma Galilea mejypa'. Chi ypejty ma tüg cögop, jim ñay'ihuiy. ³⁰ E huin'it oy mayjäy miidmiin pa'mjäy huiðibi huintz, uum, cümucy tecymucy, etz huen tim huiðibi pa'mjäy. Pidacy ajcxy je pa'mjäy ma Jesús yhuinduu, e yi' yajtzooctay. ³¹ E je mayjäy ooy tzachjihuiy tzachhuinmaay ajcxy co anajty je uumbi ti capxigy, je huintzpi ti y'ixigy, je cümucy tecymucy ti yöygy. Chi je mayjäy ytiigy ñbaady capxaady Dios, je Dios huiðibi je Israel jäy ymijpidacpy.

Jesús yajcay midaax mil jäy

³² Chi Jesús mijhuoy je' ydiscipulos ajcxy, nimay:

—Ooy nba'ayooyich jadaaab jäy ajcxy. Com cujc midugig xii jtcixy ya miid ñich etz ca' ajcxy miidity ti ycaaypy. Ca' nguexhuimbida'ñich ajcxy ayuu ma ytijc, ca' yjetyity yajpa'mgojip ajcxy tü'am.

³³ Chi je' ydiscipulos ajcxy minañ:

—¿Per ma n'ocpatim ti jada jäy ajcxy ycaaypy yjicixy ya ma jada abac it ma ca' pin chinäy? Co ooy mayjäyity.

³⁴ Chi Jesús yajtiy:

—¿Naag jiby tzajcaagy miich ajcxy mjacmiidity?

Chi ajcxy y'adzooy:

—Jëyi huixtujc tzajcaagy etz hueen acx.

³⁵ Chi Jesús nimay je mayjäy co huen ñay'ihuiydaaygixy naaxcixy. ³⁶ Chi Jesús conigy je huixtujcpi tzajcaagy etz je hueenip acx, e yajnax Dioscojuyip ma Dios. Chi tujc-hua'cx etz moy je' ydiscipulos ajcxy. E yi' ajcxy yajhua'cx je jicxy picy ma je mayjäy. ³⁷ Chi je mayjäy nidüg'óciy ycaay cüxi. Jesús ydiscipulos ajcxy yajpidigy huixtujc cach cayduc uuctuc tiibi anajty yconaxy. ³⁸ E je huiðibi ajcxy cay hue' anajty naybátigixy nimidaax mil, abicy je töxyjäydijc etz pi'ctijc ajcxy. ³⁹ Chi Jesús ycapxcixy miid je mayjäy huen ajcxy nixcixyñi ma ytijc. Chi Jesús ytiigy barcojoty etz ñicxni ma Magdala naax jot.

16

Je fariseos etz je saduceos ajcxy pijctzoogixy tüg ijppejt mijhuinma'ñybi

¹ Chi je fariseos etz saduceos y'oy ajcxy ixxy Jesús. Yi' ajcxy ijxta'n octunaangixy miid Jesús, paady ajcxy pijctzoy co Jesús huen yaj'ixyii ajcxy tüg ijppejt huiðibi tzomb tzajpjoty. ² Chi Jesús y'adzooy je' ajcxy:

—Co miich ajcxy m'ixy tzuu yi' tzajp tzaptz, chi miich ajcxy mina'ñ com jabom oy tiempo yajpada'ñ. ³ Per co miich ajcxy m'ixy jopy je tzajp tzaptz etz huimbicy, chi ajcxy mina'ñ co ca' y'oyity yi' tiempo. Miich ajcxy ooy mnaybidägyii nejihuiy ooy m'ixpicyity ma Dios ytiy'ajt, e ca' yjanchity. Miich ajcxy jëbi yi' tzajp myajcapxy, per ca' mnejhuiygixy nej yhuimbizimy yi' mijhuinma'ñ ijppejt huiðibi Dios ytumyib ma

jadachambi xii tiempo. ⁴ Yi jäy ajcxy huidibi cham tzinaayb, ooy yjibicjäyity ajcxy, ca' ajcxy capxymidoy Dios. Yi' ajcxy chojcpy co nyaj'ixipyich tüg ijxpejt mijhuinma'ñ huidibi tzomb tzajpjoty. Ca' Dios yaj'ixa'ñ ajcxy jadüg mijhuinma'ñ, com miid miich ajcxy jaybetyity je mijhuinma'ñ ijxpejt huidibi Dios ytuun miid Jonás jecy'ajty.

Chi Jesús ixmajch je fariseos etz saduceos ajcxy, chi ñicxni.

Fariseos jäy ajcxy y'ixpijcin

⁵ Co Jesús etz ydiscípulos ajcxy yja'ty ma jadüg niiba', chi je' ajcxy yjäydigoy je tzajcaagy. ⁶ Chi Jesús yminañ:

—Naygüend'ájtigix miid yi fariseos etz saduceos ajcxy, ca' mijpidaaci yi' ajcxy y'ayuc ytiy'ajt, com jadu'n yi' nipaady nej levadura.

⁷ Chi Jesús ydiscípulos ñayñimáayigixy miñ xyipy:

—Paady jadu'n yminañ, je' co ti ñich ajt je tzajcaagy njäydiigooyim.

⁸ Jesús nejhuüy nej ajcxy nayñimáayigixy miñ xyipy, chi nimay ajcxy:

—¿Na'amy co miich ajcxy minaangixy co ca' ajcxy tzajcaagy miidity? Janch hueeni miich ajcxy mmibijcin. ⁹ ¿Nej ca'ni miich ajcxy mhuinjihuüiyi? ¿Nej ca' mjäymechyii co ñich migoox tzajcaayg nyajhuäcxy etz ni migoox mil je yëydijctijc anajty huidibi ajcxy cay? ¿E ni mga'ajihuüiyi ajcxy naag cach cayduc uuctuc ti myajpidigy? ¹⁰ ¿E ni mga'ajihuüiyi ajcxy co huixtujc tzajcaagy nyajhuäcxyich ma nimidaax mil yëydijc ajcxy huidibi caay etz naag cach cayduc uuctuc myajpidigy ajcxy? ¹¹ ¿Nej co ca' miich ajcxy mhuinjihuüiy, co ca' ñich yam nigapxy yi' tzajcaagy huidibi miich ajcxy ti mjäydigoy, co ti nyajnimaaygixy je levadura huidibi je fariseos etz saduceos ajcxy ymiid?

¹² Huin'it Jesús ydiscípulos ajcxy huinjihuüy co Jesús ca' anajty je' ti yajnimäyii ajcxy co huen naygüend'ájtigixy miid tzajcaagy levadura. Hue' janchtiy Jesús yajnimay ajcxy co huen naygüend'ájtigixy miid je fariseos etz saduceos ajcxy y'ixpijcin.

Pedro nidiy'aty co Jesús yi' je' je Cristo

¹³ Co Jesús yja'ty ma Cesarea Filipino naaxjot, chi Jesús y'amidooy je' ydiscípulos ajcxy:

—¿Nej jäy ajcxy ymina'ñ, pínic ñich?

¹⁴ Chi ajcxy ymina'ñ:

—Nijëjity jäy ymina'ñ co miich je' Juan je Bautista. Nijëjity jäy ymina'ñ co miich je' Elías, e nijëjity ymina'ñ co miich je' Jeremías o jadüg profeta (huidibi tzinay jecy'ajty).

¹⁵ Chi Jesús yminañ:

—¿E miich ajcxy nej minaangixy, pin ñich?

¹⁶ Huin'it Simón Pedro y'adzooy:

—Miich je' je Cristo, je Dios y'ung.

¹⁷ Chi Jesús y'adzooy:

—Jotcujc miich Simón, Jonás y'ung, je' co ni pin xycayajnimäy jada tiy'ajt, tügpajc je Dios Teedy nDeedyich huidibi jiiby tzajpjoty, yi' ti xyajnejhuüiy jada tiy'ajt. ¹⁸ ñich miich nimaayb co miich mxii'adiyb Pedro, e hue' yhuimbidzimy tzaa (hue' je', je tzaa tija'ñ je ayuc huidibi Simón ycapxy co je Cristo hue' je' anajty Dios), e ma jada tzaa ji ngoja'ñich ñich ndzajptijc (hue' yhuimbidzimy, ma ñich n'ane'min chondäga'ñ), e ni ca' oybi ymic'ajt ycamimadägipy. ¹⁹ ñich miich nmöhuamyb je cötujcin jadu'n nipaady nej tüg ahuaast huidibi miid myaj'ahuädzipy Dios y'ayuc ytiy'ajt. Tüg'óciy huidibi miich mgapx'adujcpy ya naaxhuiñ, Dios nañ jadu'n capx'adugipy jiiby tzajpjoty, e huidibi miich ya naaxhuiñ ca' capx'aducy, Dios nañ ca' capx'adugipy jiiby tzajpjoty.

²⁰ Huin'it Jesús nimay je' ydiscípulos ajcxy, co ca' huaad ni pin nimäy co yi' je' je Cristo.

Jesús nigapxy je' y'öcín

²¹ Ixti huin'itni Jesús ytigüiy yajnimay je' ydiscípulos ajcxy co nicxamb jim Jerusalén etz co jim ooy y'ayoohua'ñ. Jim Jerusalén je judío mijjäydijc, je teedytjic huidibi tungmiidpi, etz yi' escribas ajcxy ooy chaachytuna'ñyii etz yaj'öga'ñyii. Per codugüig

xii huin'it yjugypiga'ñ jadüg'oc. ²² Huin'it Pedro miidnicxy Jesús ahuingujc, e oy ogy, yminañ:

—Huindzin, ca' Dios tzocy nicx jadu'n mjaty. Miid miich ca' jëbi jadu'n mjadipy.

²³ Per Jesús yhuac-huimbijty, chi nimay Pedro:

—Huinhuäctuutcich Pedro, je mujcu' miich jadu'n xyajcapxp. Ca' nigoo xy'adzipyich. Ca' miich mhuinma'ñybidägy nej Dios tzocy. Yi' janchtiy miich mhuinma'ñ'ajtpy nej jäy ajcxy tzocy.

²⁴ Huin'it Jesús je' ydiscípulos ajcxy nimay:

—Pen je pinjaty xypamina'ñich, huen yci'mdzojcin ixmajtztäy etz huen yhuinma'ñypidägy co ayoohuipy miid iich ycixpi, ixti mabaad y'ögy. ²⁵ Huen pinjäy huidibi ca' ayoohua'ñ miid iich ycixpi, hue' je' yajtigoyamy yi' yjugy'ajtin. Per pinjaty xypanicxpich oy nej ytimyjadipy, hue' je' ypadamyb yjugy'ajtin huidibi ca' ycixipy ytigoyipy nimina. ²⁶ ¿Ti jäygidaacin yi' co tüg jäy y'ocnayajpadiiyb yi' meen etz mic'ajtin huindu'my ñaaxhuiñybi, e yjugy'ajtin cixipy tigoyipy tücci'y? ¿Jadu'ñyi jëbi jäy y'alma yjugy'ajtin occojuyi? Nigi choohuity jäy ajcxy y'alma yjugy'ajtin, ca'ydi jac ni ti. ²⁷ Ich, je jäy huidibi tsoon tzajpjoty, miinaambich jadüg'oc ya naaxhuiñ miid je ángeles ajcxy etz miid nDeedyich y'oy'ajtin. Huin'it micuejtähua'ñ tüg'óciy je jäy nej anajty ti ytuungixy, pen oy, o ca' y'oyity. ²⁸ Janch tiy'ajt jadu'n nej nimaaygixy co ji ya naagity huidibi ca' y'öga'ñ ixti cooni xy'ixipyich jadüg'oc co iich anajty nmiiñ ane'mbi.

17

Co Jesús ñinix yajtigach

¹ Codudujc xii huin'it Jesús miidnicxy Pedro, Jacobo, etz y'uch Juan ma tüg mijcop, ma tüg cop huidibi ooy ycixity. ² E jim copcixy Jesús ñinix ñaygojtigajtzi ma Pedro, Jacobo etz Juan ajcxy yhuinduu. Jesús yhuinijp ytiigy adicxp nej je xii ytiicxin. E Jesús yhuin y'ahuimbijty janch poob jadu'n nej tüg tiicxin. ³ E timetiini oy ijxcixy Moisés etz Elías ycapxy miydägy anajty miid Jesús. ⁴ Chi Pedro nimay Jesús:

—Huindzin, oy y'oyity co iich ajt ya. Pen miich mdzojcpy jëbi iich ajcxy nyaj'oyiyy tugiiy tijquemy. Tüg miich mje', tüg Moisés yje', etz tüg Elías yje'.

⁵ Pedro capxp anajty, tim huin'ity tüg joc yajnidigoyday je' ajcxy huidibi ooy adicxp anajty. E ma je joc yajmidoy tüg ayuc huidibi yminañ:

—Jadayaabi yëydijc iich je' n'ung'ajtpy huidibi ooy ndzocy njihuüyich etz yi' iich miid njotcujcity. Amidoo'it miich ajcxy yi' y'ayuc.

⁶ Co Pedro, Jacobo, etz Juan jadu'n midooy je ayuc choon jocjoty, chi ajcxy ooy chigiiy etz ñayñitziitcidaaci ajcxy.

⁷ Huin'it ajcxy Jesús ñimiini etz nidoñ ajcxy, e yminañ:

—Pidicix, ca' mdzigiiygixy.

⁸ E co ajcxy y'ijxigy, ca' anajty jim Elías etz Moisés. Naydügpajc Jesús yjac-hui'my miid je' ajcxy. ⁹ E co ajcxy yminajcy ma je cop, chi ajcxy Jesús nimay:

—Ca' ni pin miich ajcxy nyajnimahuipy jadu'n nej ti m'ijxcixy cham, ixti cooni iich anajty ti njugypicyich jadüg'oc ma anajty ti n'ögich.

¹⁰ Huin'it je' ydiscípulos ajcxy yajtiy Jesús:

—¿Nej co yi' escribas, yi' ajcxy huidibi nijaydutr etz yajniñuejp Dios y'ayuc, yminaangixy co Elías yi' miinaam jayijp etz axam je Cristo?

¹¹ Chi Jesús y'adzooy:

—Janch tiy'ajt co Elías ymiina'ñ etz yaj'oyiydähuamy tüg'óciy miid Dios ycixpi. ¹² Per iich miich ajcxy nimaayb co Elías ti y'oy. E je jäy ajcxy ca' nejhuüy pin yi', e ooy jibic tuuñ ajcxy, nej tim tzojccixy. E nañ jadu'n iich, je jäy huidibi tsoon tzajpjoty ayoohuaambich ma yi' ajcxy.

¹³ Huin'it je' ydiscípulos ajcxy huinjihuüy co Jesús hue' anajty ñigapxyp je Juan, el Bautista.

Jesús yajtzögy tüg jäy mo'tpa'mmiidpi

¹⁴ Co Jesús, Pedro, Jacobo etz Juan yjätu jim ma je mayjäy ajcxy, chi ñimiini tüg jäy. Chi je jäy ycoxtinay'ihuiy ma Jesús yhuinduu, chi yminañ:

¹⁵ —Huindzin, iich nmang pa'ayoohuic. Je' co ymiid mo'tpa'm etz oy yaj'iyoooyii. Canaag'oc ti ycäy jijnjoty ñijoty. ¹⁶ Paady iich ti nmiidmiinich ma miich mdiscipulos ajcxy, per ca' ajcxy ymadacy yajtzögipy.

¹⁷ Chi Jesús y'adzooy:

—Miich ajcxy huidibi jugy'ajtp jadachambi xii tiempo, ca' miich ajcxy mmibiga'ñ Dios, ca' miich ajcxy mgapxymidoohua'ñ Dios. ¿Naag xii naag tiempo iich miich ajcxy njacmimexctugipy? Yajmiingix yi yeeg'anäg.

¹⁸ Co je yeeg'anäg yajmiidja'ty ma Jesús, huin'it Jesús ane'my je ca'oybi co huen pidzim ma je yeeg'anäg. E mic'amy je' chögy.

¹⁹ Jac co hueeñi, je' ydiscipulos ajcxy miidmiydac Jesús ahuingujc, chi ajcxy yajtiy ma Jesús:

—¿Nej co iich ajcxy ca' ti nmadägy nicx nyajpidziimgixyich je ca'oybi ma je yeeg'anäg?

²⁰ Chi Jesús yminañ:

—Je' co miich ajcxy hueeni mmibijcin. Janch tiy'ajt jadu'n nej nnimaaygixy, co ixypy miich ajcxy xy'ocmibicyich, ooy ixypy jëda'ajty jadu'n nej je jac mutzpi ujtz tiim, huin'it jëbi ixypy mnimäy jadayaabi cop co huen jihuäcy ya etz huen nicxy huingduum, chi ñicxip je cop. Ni ti ji ycatzipity pen janch miich ajcxy miidity mibijcin. ²¹ Jadayaabi picy ca'oybi pidzimipy co Dios nmibijctzoohuim mictägy etz ayuu'ijt, ca' jac ti huinma'ñ.

Jesús nigapxy jadüg'oc y'öcin

²²⁻²³ Co anajty ajcxy yhuidity tügmucy jim ma Galilea y'it, chi Jesús nimay je' ydiscipulos ajcxy:

—Iich, je jäy huidibi tsoon tzajpjoty, yajcäyegipyich ma jäy. E yi' ajcxy xyaj'ögibich etz codugiig xii njugypigipyich jadüg'oc. Co je' ydiscipulos ajcxy jadu'n midooy, chi ajcxy ooy yjotmaybaty.

Je cogüejtin ma je tzajptijc

²⁴ Co Jesús yja'ty miid je' ydiscipulos ajcxy jim ma je Capernaum cajp, chi huidi anajty ajcxy meeñ yajmujcp miid tzajptijc ycixpi, oy ajcxy ijxcixy je Pedro, chi ajcxy y'amidooy:

—¿Nej miich mhuindzin ycuejcpy meeñ miid tzajptijc ycixpi?

²⁵ Chi Pedro y'adzooy:

—Cuejtpy.

E huin'it hora co anajty Pedro ytiggy tigoty, chi Jesús jayijp ymigapxy, ñimay:

—Simón, ¿nej mmina'ñ? ¿Pin je rey ajcxy yajcuejcpy? ¿Yi' yjäy o huingjäy?

²⁶ Chi Pedro y'adzooy:

—Ma huingjäy huidibi ane'my ijtp.

Chi Jesús y'adzooy:

—Ah, ca'tz yi' yjäy huaad ti cuejtcixy. ²⁷ Per ca' ndzocyich co je cogüejtpi nyajcapx-mayiyim, nicx miich ma yi mij laguun e cohuidzi' jiiyby mxu'ñ, e je acx huidibi anajty jayijp huomb, je' myajpidzimipy, e ma y'ahuac jiiyby mbaadipy tüg meeñ, yajpidzim je meeñ e nicx cuet miid iich ycixpi etz miid miich ycixpi.

18

¿Pin je' jac ñigi mijip?

¹ Je huin'it hora je' ydiscipulos ajcxy ymijhuäctay Jesús etz yajtiy:

—¿Pinjäy je'jac nig ymiid je mij'ajtin ma Dios y'ane'my jiiyby tzajpjoty?

² Chi Jesús mijhuoy tüg je pi'c'anäg. Chi pidacy je pi'c'anäg cujc'amy ma yi' ajcxy. ³ Chi Jesús yminañ:

—Janch tiy'ajt iich miich ajcxy nimäy, pen ca' miich ajcxy jothuimbijtcixy etz naybidaaccixy mhuinma'ñ jadu'n nej jada pi'c'anäg huinma'ñ miid, pues ca' mdigihuiy

ma Dios Teedy y'ane'my jiiby tzajpjoty. ⁴ Paady, pinjaty miid yhuinma'n̄n yung nax jadu'n nej jadyaabi pi'c'anäg miid yhuinma'n̄n yung nax, je' je' je huidiib jac niḡi mij'ajtin ymiid jiiby ma Dios y'ane'my. ⁵ Hueñypinity huidibi miid ñich ycixpi cöbigipy etz tzogipy tüg pi'c'anäg, jadu'n nej jada pi'c'anäg ti ndzocyich ti ngöbicyich, hue' jadu'n nipaady nej jihuiy ti xycöbicyich ti xychocyich.

Je huidibi ooy ycojotmayity co nbocycähuim

⁶ Hueñypinity huidibi jibic-huinma'n̄n ymibidzimy, e yajpocycäy yi jadu'mbi pi'ctijc huidibi ajcxy xymijnicxpejtpich, jac'oy ixypy co yi jadu'mbi jäy ytimyñayyöcxodziyi tüg paandzaa etz ñayñajtzjibibihiipy mejyjoty. ⁷ Ooy ayo'ñity ooy jibicity co ji naaxhuiñybi yajpaady tijaty huidibi yajtundigooby jäy ajcxy. Ni mina xii ca' tigooy y'idipy tijaty huidi yajtundigoy je jäy ajcxy. Per mij ayo'n pada'n̄n miid yi Dios pinjaty cojp tundigooyii. ⁸ Pen miich mgi' o miich mdecy xyajtundigooyb, jac'oy ixypy co mdim'ixpuxy etz ixjibipy jiguem. Nigi oy co mdigihuipy ciduc tecytuc jiiby tzajpjoty etz ca'ydi co mdigihuipy miid metz mgi' etz metz mdecy mijjinjoty huidibi nimina ycapich. ⁹ E pen yi mhuiin tug xyajpocycähuamb, tim yajpidzim etz ixcätz jiguem. Com jac'oy mdigihuipy miid tüg mhuiin ma jugy'ajtin huinixibi, ca'ydi co mdigihuipy miid metz mhuiin ma yi jin̄n huidibi camina xii ycapich.

Je y'ijxpejt, je cöbixy huidibi tigooy

¹⁰ Ca' m'ixtjicxy ni tüg pi'c'anäg huidibi xymibijcpich. Yi' ajcxy je' y'angeles tim ijtüb jiiby tzajpjoty ma Dios Teedy, ñich nDeedy yhuinduu. ¹¹ ñich je jäy huidibi tzoön tzajpjoty, ti nmiiñich ya naaxhuiñ, je' co nyajnitzöga'ñich je jäy ajcxy y'alma huidibi tigooyam. ¹² ¿Nej miich ajcxy mina'n̄n? Pen tüg jäy ymiid migo'px cöbixy, etz pen yöyigooyb nidügti cöbixy, ¿nej ca' jebi ixmach je nimida'px majmocx midaax cöbixy etz nicxy ixtäy je jadügp̄i huidibi yöyigooy? ¹³ E pen ypatpy je tügp̄i huidibi yöyigooyb, chi ooy xondägy miid co anajty ti paady huidibi anajty ti ytigooy, ca' jadu'n yxondägy miid je nimida'px majmocx midaax huidibi ca' anajty ti yöytigooygixy. ¹⁴ Tim jadu'n nipaady miid Dios Teedy jiiby tzajpjoty, ca' tzocy co ni tüg jäy y'alma tigooyipy.

Nej huaad tüg mmigüg nhuinmeecxim

¹⁵ Pen miich mmigüg xytuñ jibic, miidmiydac ahuingujc e yajhuinjihui' ma ti ytundigooy, pen xy'ayuchuinjihuiyb ti anajty mminaymigügpiigyii je mmigüg. ¹⁶ Pen ca' xy'ayuc-huinjihuiy, chi huominipy tüg o metz mmigüg huidibi jebi nidiy'ajt'adipy miich m'ayuc. ¹⁷ E pen nañ ca' je' ajcxy ayuc-huinjihuihua'n̄n, miidnicxip ma mibijcpidijc yöymujctac e jim ajcxy myajnaxipy jadu'n nej tüg huidibi ca' Dios mibicy etz jadu'n nej tüg yajcogüejtpi huidibi ooy pocymiidity. ¹⁸ Janch tiy'ajt ñich miich ajcxy nimäy, tüg'óciy huidibi miich ajcxy mgapx'adujcpy ya naaxhuiñ, Dios nañ jadu'n capx'adugipy jiiby tzajpjoty, e huidibi miich ajcxy ya naaxhuiñ ca' capx'aducy, Dios nañ ca' capx'adugipy jiiby tzajpjoty. ¹⁹ E nañ jadu'n ñich miich ajcxy nimäy, pen ya naaxhuiñ miich ajcxy nimetz mnaygápxigixy co tijaty mmibijctzohuaangixy ma Dios, Dios, ñich nDeedy huidibi jiiby tzajpjoty, xymöhuipy huidibi ajcxy mbijctzooyb. ²⁰ Com ma miich ajcxy nimetz o nidugiig naymújcigixy, jim ñich n'ity cujc'amy ma miich ajcxy.

²¹ Chi Pedro y'amidooy Jesús yminañ:

—Huindzin, ¿naag'oc huaad nhuinmeecxyich yi' ajcxy huidibi xymidundigooybich? ¿Nej nméecxibich ixti cooni huixtujc'oci?

²² Chi Jesús y'adzooy:

—Ca' yhuixtujc'ócity, hue' meecxipy midaax migo'px jamida'px majmocx midaax'oc.

Je tumbi y'ijxpejt huidibi ca'p ymigüg huinmeecxy

²³ Dios y'ane'min jiiby tzajpjoty jadu'n nipaady nej tüg rey huidibi huijtz'oyiib miid je ytumbidijc jajadu'n̄n ajcxy yjacminucxy'adyii. ²⁴ Je rey ytimyhuijtz'oyiichondacyñi anajty cuentas, co oy yjädy tüg ytumbi huidibi anajty minuucxy'ajtip canaag millón.

²⁵ Com je' ytumbi ca' anajty miidity ti miid migüediib je' yhuindzin. Huin'it je huindzin ane'my co huen je' ytumbi yajtoocnax quipxyi miid y'ungdöxyijc etz tüg'óciy tijaty ymiid, jaydëb ñuucxy y'adujctähuipy. ²⁶ Huin'it ytumbi ycoxtinay'ihuiy ma yhuindzin yhuinduu etz nimay: "Huindzin, pa'ayoogich, etz ñich miich nmigüejtähuipy." ²⁷ Chi je tumbi yhuindzin yajtuñ pa'ayo'n, chi huinmeecxip je nuucxy, e yajpidzimy pujxtigoty. ²⁸ E mic'amy co je' ypidzimy pujxtigoty, chi yminaybati tüg ymigüg huidibi anajty miid quipxyi ti ytuñ. Je' anajty minuucx'ajtip tim hueeni, chi je' yöcmimadziy je' ymigüg huidibi miid ytuñ, chi nimay: "Cuet huidibi mnuucx'ajtpy ma ñich." ²⁹ Huin'it ymigüg ycojxtinay'ihuiy ma je' yhuinduu. Chi minuucx'taacy nimay: "Pa'ayoogich. ñich miich nmigüejtähuipy." ³⁰ Chi je jadügpí ca' mecxtujcín yajtuñ. Chi oy ymigüg pidägy pujxtigoty, ixti cooni anajty micuedyí. ³¹ Co je jacjadyí ymidumbidijc oy icy jadu'n nej ti yajtuñ je' ymigüg, chi ooy ajcxy jihuíy. Chi ajcxy nicx ma je yhuindzin etz yajnimayday tüg'óciy nejjaty anajty ti ijxcíy. ³² Huin'it je' ajcxy yhuindzin oy yajhuoyí je huidibi minuucx'ajtip canaag millón. Chi nimay: "Miich ooy mdzachjibicjáyity. Ti ñich miich nhuinmeecxi tüg'óciy je mnuucxy, miid co miich pa'ayoohuin mbijctzooy ma ñich. ³³ E miich nañ jadu'n icyipy ti mba'ayoy je migüg huidibi miid mmiduñ, huidibi xyminuucxy'ajtp, jadu'n nej ñich miich ti nba'ayooy." ³⁴ Chi je huindzin ooy chachjotma'ty, chi pidacy ane'min co huen yajtzaachytuñ je' ytumbi mabaad cuejtäy tüg'óciy huidibi ñuucxy'ajtpy. ³⁵ Chi Jesús ycapxycíjxni, minañ:

—Tim jadu'n nej jada rey ti tuñ miid je ytumbi, nañ tim jadu'n Dios tunipy miid miich ajcxy, pen ca' nidüg nidügti miich ajcxy ca' mhuinmeecxy je mmigügtijc amumdüjot.

19

Jesús yaj'ixpicy miid co jäy ytöxyijc ixmach

¹ E co Jesús capxtay jada ayuc, chi choñ Galilea, chi oy yjädy ma Judea it jim Jordán mij ñiñ nñaxy. ² Chi ooy mayjäy ypanicxi, e jim yajtzoocy huidijaty anajty yuu miid pa'm miid.

³ Huin'it nijëjity je fariseos ajcxy nimiiñ Jesús co yajmachcähuaangixy anajty. Chi ajcxy y'amidooy:

—¿Nej janch co Dios ti xymooyim cötujcín co jëbi tüg yëydijc ixmadzip ytöxyijc miid tim hueeni ti capxy ti ayuc?

⁴ Chi Jesús y'adzooy:

—¿Nej ca'ni miich ajcxy m'ixy mgapxy ma ymiiñ jaybety ma Dios ñecy co je naaxhuiñybi chondacy, co Dios oga'ñ yajcojy tüg'óciy tijaty huidibi ji'ajtp co "Dios yajcojy tüg yëydijc etz tüg töxyjäy"? ⁵ Nañ jadu'n Dios yminañ: "Je yëydijc y'ixmadzip ytaj yteedy etz pudigihuiy je' ytöxyijc. E je yëydijc etz ytöxyijc tú'ciy idaangixy."

⁶ Paady ca' ñimetziy ajcxy, com je yëydijc etz ytöxyijc tügmucy y'idaangixy. Com Dios ti huijtmucy je yëydijc miid je töxyjäy, paady ca' huaadity co jäy ajcxy huijtzhuäcxyp tiibi Dios huijtmucy.

⁷ Huin'it je fariseos ajcxy y'amidooy Jesús:

—¿Na'amy co Moisés cötujcín ti yecy jecy'ajty co tüg yëydijc jëbi huaad ixmach ytöxyijc, e möhuipy ñinecy ñidiy'ajt e jadu'n jëbi ixmach?

⁸ Chi Jesús yminañ:

—Moisés jada cötujcín ti xymooygixy co jëbi m'ixmajtcixy mdöxyijc miid co miich ajcxy mdzachcöjuuñity, ca' mgapxymidohuaangixy Dios. Per co je naaxhuiñybi chondacy ca' anajty jadu'nity. ⁹ Janch tiy'ajt jadu'n nej ñich miich ajcxy nimaaygixy co je yëydijc huidibi yajjayhuäcxp miid je ytöxyjäy, e je ytöxyjäy ca' anajty ti ytundigooyb miid huingbi yëydijc, hue' je' yëydijc ytundigooy co ixmach ytöxyijc etz ypijctigach miid huingbi. Nañ tim jadu'n pen tüg yëydijc ypicy miid tüg töxyjäy huidibi ñäy ti y'ixmachyí, hue' tundigooyb anajty je yëydijc.

¹⁰ Co Jesús ydiscípulos ajcxy midooy jada ayuc, chi ajcxy yminañ:

—Pen jadu'n jëdu'n je tiy'ajt co je yëydijc ca' huaad ixmadzip ytoxyjäy, jac'oy co ca' nbjicim.

¹¹ Chi Jesús yminañ:

—Ca' tüg'óciy je jäy huinjihuüy jadayaabi tiy'ajt. Jëyi ajcxy huinjihuüip pin ajcxy Dios pidaaci co huinjihuüip. ¹² Ji canaagnax je ayuc je huinma'ñ nej ca' yjëbity ypiçipy je yëydijc. Naagity pi'ctijc yma'xung'aty e ca' yca'pxity ñinicxy, paady ca' picy ajcxy. E nijëjity je yëydijc ca' huaad ypiçy, miid jëgixpi co anajty je' ti ymijaapigyii. E nijëjity yëydijc hui'my jaybicy miid jëgixp co ajcxy ytuñ ma Dios ytung, je Dios huidibi ane'myb tzajpjoty. Pinjaty cöbigamy iich n'ayuc huen cöbicy.

Jesús conucxy maybi'ctijc

¹³ Chi naagity je jäy miidnicxy y'ung y'anäg ma Jesús jaydëb yajcñixajipy etz Dios mibijctzoy miid yi' ajcxy ycixpi. Chi Jesús ydiscípulos ajcxy ogy je jäy ajcxy huidibi anajty miid miimb je y'ung y'anäg, nimaaygixy co ca' jadu'n y'oyity. ¹⁴ Per Jesús yminañ:

—Huen miid miiñ ajcxy pi'c'anäg ma iich, ca' mjijpcogapxiygixy. Com pinjaty ymibijcp iich ngapxy n'ayuc, jadu'n nej jadayaabi pi'c'anäg ajcxy ymibicy, je' ajcxy tigihuum ma Dios y'ane'my jiiby tzajpjoty.

¹⁵ Chi Jesús cñixajy je pi'c'anäg ajcxy. Chi ñicxni.

Tüg yeeg'anägnip comeeñybi miidmiydägy Jesús

¹⁶ Chi tüg yëydijc oy ixy Jesús. Chi y'amidooy:

—Huindzin, ¿ti jada' co oy iich ndunipyich jaydëb nbaadibich jugy'ajtin huidibi ca' ycixipy ytigoyipy?

¹⁷ Chi Jesús y'adzooy:

—¿Na'amy co xyñimäyich co oy huindzin iich? Dios tügpaçy oyip, ca' jac pin. Pen miich mdzojcpy co mbada'ñ jugy'ajtin huidibi ca' ycixipy ytigoyipy nimina mguydunipy je Dios ycötujcin huidibi Moisés ycojaay jecy'ajty.

¹⁸ Chi je yeeg'anäg yajtiihuimbijty:

—¿Huidibi cötujcin miich mdijp?

Chi Jesús yminañ:

—Ca' miigüg myaj'ögipy. Ca' miigüg ytöxyjic miigapxtigooyipy. Ca' mmeedzip. Ca' mmigüg mhuin'iniip. ¹⁹ Yajmij'at mdaj mdeedy. Mdzogipy mjihuüip miich mmigügtijc, tim jadu'n nej miich ci'm mnaychogyii.

²⁰ Chi je yeeg'anäg Jesús nimaayi:

—Ti nguydundäyich jadayaabi cötujcin ajcxy maabi iich nbi'c'atyich. ¿Ti jada njacyajtigoy'ijtpyich?

²¹ Chi Jesús jadüg'oc y'adzooy:

—Pen miich m'idam tudägy, nicx tooctigoyda' huidijaty miich miid, etz mo' je meeñ je jäy ajcxy huidijaty ayoob. Co jadu'n mdunipy, chi mbaadipy oy'ajtin jiiby tzajpjoty. Co jadu'n mdooctähuipy tijaty miich miid, chi miiniip jadüg'oc ma iich nyajpaadyich, e pajamgich.

²² Co je yeeg'anäg jadu'n midooy, chi ñicxni taj may com ooy anajty chachcomeeñity.

²³ Huin'it Jesús nimay je' ydiscípulos ajcxy:

—Janch tiy'ajt jadu'n nej nimaaygixy co ooy ymijhuinma'ñity co tüg comeeñyjäy ytigihuiipy ma Dios y'ane'my jiiby tzajpjoty. ²⁴ Jadüg'oc nmína'ñich co ooy chipity co tüg comeeñyjäy tigihuiipy ma Dios y'ane'my, nigí ca' chipity co tüg camello ñaxipy ma tüg xu'ñ'ijx yxutity.

²⁵ Co Jesús ydiscípulos ajcxy jadu'n midoy, chi ajcxy ooy jihuiy huinmay. Chi ajcxy ñay'amidoohui miñ xyipy:

—¿Pin jëbi paady je' y'alma nidoocin?

²⁶ Chi Jesús ajcxy huindixpejty etz nimay:

—Je huidibi jäy ajcxy chipjihuiyb, miid Dios ca' ni ti chipity.

²⁷ Huin'it Pedro ymina'ñ:

—Huindzin, ich ajcxy ti n'ixmajtzäyich tüg'óciy huidijaty anajty ich ajcxy miid etz nbanicx ich ajcxy miich. ¿E ti jada' ich ajcxy nbaadaamybich?

²⁸ Chi Jesús y'adzooy:

—Janch tiy'ajt nmina'ñich co anajty je xi je tiempo paady mina Dios yajtigajztähuiipy je tzajp etz naaxhuiñybi, co anajty ich, je jäy huidibi tzoon tzajpjoty, n'ityich ma ngötujctacich oybi jiiby tzajpjoty, chi miich ajcxy huidi ti xypahuidityich, miich ajcxy mbadamy majmetz cötujctac, e miich ajcxy mdiydunipy je majmetz picypí Israeljäy ajcxy. ²⁹ E tüg'óciy jäy ajcxy huidibi ti ixmajtzäy yjin ytijc, y'uch ymígü, y'ung ytöxyijc, y'ung y'anäg, ytaj yteedy, o ycam ytu' miid ich ycixpi, yi' ajcxy ypadamyb migo'px'oc, ca'ydi huidibi ti ixmach. E ypadamy je jugy'ajtin huidibi ca' ycixipy ytigoyipy ni mina. ³⁰ Mayjäy ajcxy huidibi cham ymiid mij'ajtin cötujcin, tzajpjoty ca' ajcxy miid'ada'ñ mij'ajtin cötujcin. E mayjäy huidibi cham ca' miidity ajcxy mij'ajtin cötujcin, tzajpjoty ymiid'adamy ajcxy mij'ajtin cötujcin.

20

Je naymiduniptijc y'ijxpejt

¹ Jadu'n Jesús ymina'ñ:

—Je Dios y'ane'min jiiby tzajpjoty jadu'n nipaady nej tüg cogambi huidibi ooy mij cam miidity. Chi je cogam jopyñi choñ ma oy nicxy ixtäy tumbidijc ajcxy huidibi yajpidigipy yi uva cosecha. ² Chi ycapxytuñ miid nidüg nidüg ytumbi co mujuya'ñ tüg denario meeñ tüg xiibi. Chi quejxy nidüg nidüg ytumbi ma je uva cam. ³ Chi petyxi je cogam ñicxy jadüg'oc tumbi ixtaayb. Chi paty cajp cujc nijëjity tumbi huidibi ca' ti tung miidity. ⁴ Chi je cogam je tumbi ajcxy nimay: “Ñicx miich ajcxy tuñ ma ich ngosecha. Cham nmujuyipy jadu'n nej ytiy'ajtity.” Chi ñicxy ajcxy midumbi. ⁵ Chi je cogam ñicxy jadüg'oc cujcxii tumbi ijxtaayb. Nañ jadu'n nicxy jadüg'oc minacyxi. ⁶ Nañ tim jadu'n tzuu jadüg'oc je cogam ñicxy tumbi ijxtaayb, chi paty nijëjity cajpcujc huidibi ca' ti tung miidity ajcxy, chi ajcxy nimay: “¿Na'amy co miich ajcxy myaajity? ¿Nej co ca' mnicxy mdungixy?” ⁷ Chi je' ajcxy y'adzooy: “Je' co ca' ich ajcxy pin ti xycapxytuñ.” Chi je cogam ajcxy nimay: “Ñicx miich ajcxy tun ma ich nnaaxjot. Cham iya nmujuyipy jadu'n nej ypaadyii.” ⁸ Co oy ycodziñi, chi je huindzin nimay je huidibi nigop'ajtp je tung: “Ñicx mijhuoodäy je tumbidijc etz mujuyipy. Mujuy jayijp huidibi ti ymiñ axam tumbi etz jim nicxy myajcogixiy ma huidibi anajty ti miñ jayijp tumbi.” ⁹ Chi ajcxy jayijp yajmujuy je tumbi ajcxy huidibi anajty ti ytigiy tumbi axam. Chi yajmujuy ajcxy jadu'n nej anajty jäy ñaymujuyii je tüg xiibi. ¹⁰ Co miñ je tumbi ajcxy je huidibi ajcxy jayijp tigiy tumb. Chi ajcxy jot'ajti co jac'anaxy yajmujuya'ñ. Per quipxyjaty ajcxy paty tüg meeñ nidüg'óciy je tumbidijc. ¹¹ E co ajcxy quipxyjaty yajmujuy, chi ajcxy ytigiy jotma'tpi. ¹² Chi ajcxy nimay je cam huindzin: “¿Na'amy co quipxyjaty ich ajcxy ti xymujuyich miid je huidibi ti miñ axam tumbi? Yi' ajcxy tüg jaxigy ti ytuñ, e ich ajcxy tüg xi je anbi ti ngöbicyich.” ¹³ Chi je cam huindzin y'adzooy, nimay nidügti je' ajcxy: “Miich, ich nmígü, ca' ich jibic ti nduñich miid miich. ¿Nej ca' ich ajt ngapxytuunim co jadu'n nmujuya'ñ tüg denario meeñi? ¹⁴ Con yi mmeeñ, e nicxni. Jadu'n ndzocyich co quipxyjaty nmujuya'ñich miich miid huidibi ti ymiñ axam ma je tung. ¹⁵ ¿Nej ca' huaad ich nduñich miid ich nmeñ nej ndzócyichi? ¿O co xyajca'oy'ixyich, co ich ooy n'oyjäyity?” ¹⁶ E huidibi ajcxy jaccogixiyb, yi' ajcxy jayijp'adam. E huidibi ajcxy jayijp'ajtp cham, yi' ajcxy yjaccogixihuamb. May ooy yjayjhuomiñ e hueeni huidi huin'ixipy.

Jesús capxypidzimy jadüg'oc co y'öga'ñ

¹⁷ E co Jesús anajty ñicxy ma Jerusalén tü'aa, chi miid nicxy ahuingujc je nimajmetzpi ydiscipulos. Chi ajcxy nimay:

¹⁸ —Jadu'n nej miich ajcxy m'ijxy mnejhuïy cham ïich ajt nba'ttigïyïm jim Jerusalén. Jim Jerusalén ïich, je jäy huidibi tzoon tzajpjoty, xyajcïyegaamich je teedy mijtungmiidpi etz escribas ajcxy. Nyajtiyduna'ñich etz pidäga'ñ ajcxy ané'min co n'ögibich. ¹⁹ E yi' ajcxy xycïyega'ñich ma je huidibi ca' yjudiojäyity, jigix xyñixigibich xyajxigibich, xycoxipich, etz xyajcruutzpedipich ajcxy. E co n'ögibich, chi njugypigipyich codugiig xii.

Huidibi Jacobo etz Juan ytaj ypïjctzou

²⁰ Chi je Zebedeo ytöxyijc nimiiñ Jesús miid metz je ymang; Jacobo etz Juan. Huin'it je ungdaj huingojxtinay'ihuiy Jesús, pïjctzoy may'ajt. ²¹ Chi yajtïy Jesús:

—¿Ti mdzojcpy?

Chi je ungdaj y'adzooy:

—Tun may'ajt möhuipy ïich metzpi yi nmang yi jacmïjtung ma miich m'ane'min, jaydëb ïñahuipy ma miich mmïjc, tüg a'oy'amy etz jadüg anajty'amy.

²² Chi Jesús y'adzooy:

—Miich ajcxy ca' mhuinjihuïy ti ajcxy mbïjctzooyb. ¿Nej mminaxa'ñ myajnaxa'ñ miich ajcxy je tzaachypï huidibi ïich nminaxamy nyajnaxamyich? Jadu'n nej jihuiy m'üga'ñ ajcxy je ta'm nïi huidibi ïich n'ügamy e mbaada'ñ je nïibejtïn huidibi ïich nbadamyb.

Chi je' ajcxy y'adzooy:

—Jëbi.

²³ Chi Jesús ymina'ñ:

—Janch tiy'ajt nej miich ajcxy mina'ñ co mmináxcixipy myajnáxcixipy je tzaachypï huidibi nnaxa'ñich. Per ca' ïich cötujcïn nmïdidyich co ïich miich ajcxy nbidägipy mijtungmiid, co myajpaadip tüg ma ïich nmïjc a'oy'amy e jadüg anajty'amy. Hue' janchtiy Dios Teedy ymiid ni'ixi' pïnjaty ti huin'ixy jaydëb yajnicxip je mijtung ma ïich n'ane'mdac.

²⁴ Co je nimajcpi ydiscípulos ajcxy nejhuïy jadu'n nej Jacobo etz Juan pïjctzooy may'ajt ma Jesús, chi ajcxy ooy mijotma'ty Jacobo etz Juan.

²⁵ Huin'it Jesús mijcapxy je' ydiscípulos ajcxy, chi nimay jadu'n:

—Miich ajcxy mnejhuïy co yi jäy ajcxy huidibi mijtungmiidpi ma je maybi naax cajp, mic ajcxy ane'my je naax cajp. Nañ jadu'n yi' ajcxy huidibi mic'ajt miid ma je maybi naax cajp, mic ajcxy ane'my je jäy ajcxy. ²⁶ Per miich ajcxy ca' mjadu'nity nej je mijtungmiidpi ma je maybi naax cajp. Pïnjaty miich ajcxy je mij tung yajnicxip, copicy ñaybidägïyb nej tüg tumbi. ²⁷ Pen ji miich ajcxy nidüg nigohuajc'ada'ñ, copicy ñaybidägïyb nej tüg tumbi. ²⁸ Com ïich nañ jadu'n, je jäy huidibi tzoon tzajpjoty, ti nmiïñich ya naaxhuiñ jaydëbi nbubedipyich yi mayjäy ajcxy. E canan yi' ajcxy xypubedipich. Ngïyegaamyich njugy'ajtïn ma yi o'cïn miid je mayjäy ycixpi, jaydëbi ngohua'nich jäy ajcxy y'alma huidibi tigoyam.

Jesús yajtzoocy metz jay huintzpi

²⁹ E co Jesús etz ydiscípulos ajcxy ycajppidzïmy jim Jericó, chi ypanicxi ajcxy mayjäy.

³⁰ E jim anajty ïñaay nimetz huintzpi tûba'áy. E co ajcxy nejhuïy co jim anajty ñaxy Jesús, chi ajcxy yaaxpi jojcpï:

—Huindzin, David y'ap y'oc, tun may'ajt ïich pa'ayoog.

³¹ Chi je mayjäy ajcxy ojcooty je metzpi jäy huintzpi, nimay ajcxy co huen amoñ. Per je huintzpi nigï minan'idïch:

—Huindzin, David y'ap y'oc, tun may'ajt ïich pa'ayoog.

³² Huin'it Jesús ytïnayxïjp, e yminañ:

—Ocmin miich ajcxy ya.

Huin'it yajtïy:

—¿Ti mdzojcpy ndunipyich miid miich?

³³ Chi ajcxy ñimaayi:

—Huindzin, ndzojcpyich co xyajhuindicxigibich.

³⁴ Huin'it Jesús pa'ayoogoty ajcxy. Chi ajcxy nidoni ma je' yhuin, e mic'amy je huintzpi ajcxy y'ijxigy. Chi Jesús ajcxy panicxy.

21

Jesús ytigiiy jim Jerusalén

¹ E co anajty Jesús etz je mayjäy ajcxy ti mihuingoni Jerusalén, chi yja'ty ma Betfagé cajp mihuingon je Olivos cögop. E jim Jesús quejxy nimetz ydiscípulos ajcxy. ² Chi ajcxy nimay:

—Nixcix ma je cajp huidibi jim'amy. E jim tüg burro ycoxochity miid y'ung. Coguejtüdüp ajcxy je burro e yajmiingix ya ma ich. ³ E pen jim pin nej xyñimäy, nima' co je Huindzin yajtunam, e yajhuimbida'n mic'amy.

⁴ Jadayaabi oy jadu'n ytuñyii yjadyi ycixy yca'pxy jadu'n nej je profeta jecyip jaay, co jadu'n yminañ:

⁵ Yajnima' je jäy ajcxy huidibi tzinaayb jim Sión (Jerusalén), oc'ijxcix, chi miiñ ajcxy je mrey, yung nax yjot yhuinma'n miidity je mrey, etz burrocixy miiñ. Ma tüg burro mang huidibi ytaj tzimy yajyöyp.

⁶ Chi je metz ydiscípulos ajcxy cuyduñ nej anajty Jesús ti y'ane'myii. ⁷ Yajja'ty ajcxy je burro miid ymang. Chi Jesús ydiscípulos ajcxy jibe'n je metzpi burro miid ajcxy yjocxhuit, chi Jesús yaj'iñay je burro mang. ⁸ E je mayjäy ooy yajhuinyëbix ajcxy je tü'aa miid yhuit, chi ajcxy oy ypuxy quipy y'aacx. Chi ajcxy pidacy ma je tü'aa. ⁹ E jim ñajxy je burro, e je mayjäy huidibi nicxp jayjip, e nañ jadu'n huidibi anajty mimb axam, ooy ajcxy ytigiiy huambi jihuuyb, chach minaangixy:

—¡Hosana! ¡Gloria a Dios! ¡Ooy ycomayity Dios! Huen capxpaady idipy jada yëydijc huidibi mimb ma yi nHuindzin Dios yxii etz miid ymic'ajt. ¡Gloria a Dios!

¹⁰ Co Jesús ytigiiy jim Jerusalén, chi tüg'óciy je mayjäy huinmay'ahuidijty, chi ñay'amidóohuigixy miñ xyipy:

—¿Pin yi' yjiibi jäy?

¹¹ Chi mayjäy y'adzooy:

—Yi' je' je profeta Jesús huidibi tsoon ma Nazaret cajp ma Galilea it.

¹² Huin'it Jesús ytigiiy ma Dios ytijc. Chi ixquejxtay tüg'óciy je ajuybi adoocpi huidibi anajty yajpatp jiiby. Chi tijhuimbijttay tüg'óciy je mesa ma anajty jäy jim ymeeñyhuingogongixy, etz nañ jadu'n tijhuimbijttay je muuxytoocpi iñaybejt. ¹³ Chi jadu'n nimay ajcxy:

—Jaaybety jadu'n ymiiñ ma Dios ñecy: “Ich ndijc je' yi' ma jäy ajcxy Dios mibijctzoy”, per miich ajcxy hue' yi' mhua'n meetzpi tijc.

¹⁴ E co anajty jiiby tzajptigoty Jesús, chi jiiby ñimiini huidijaty anajty huintz, huidijaty anajty cïma'ty tecyma'ty, chi Jesús yajtzoocay. ¹⁵ Per je teedy ajcxy huidibi mijtungmiid etz je escribas ajcxy ooy mijotma'ty Jesús co ajcxy ijxy nejhuuy jadu'n nej Jesús anajty tuñ mijhuinma'n. Etz nañ jadu'n ajcxy ijxy co je pi'c'anäg anajty ajcxy yhuaangixy yjihuuygixy jiiby tzajptigoty, yminaangixy: “¡Huen cömay'idipy je rey David y'ap y'oc!”

¹⁶ Chi je teedy etz escribas ajcxy Jesús nimay:

—¿Nej ca' miich mmidooy nej je pi'c'anäg chach minaangixy?

Chi Jesús y'adzooy:

—Nmidooybich. ¿Nej ca' miich ajcxy mgapxyñi Dios ñecy ma ymiiñ jaaybety co jadu'n ymina'ñyi?:

Ti myaj'ixpicy iyy ma je pi'ctijc ma'xungdijc jaydëbi ajcxy iibaadip capxpaadip Dios.

¹⁷ Chi Jesús ycapxycijxy miid je teedy etz escribas ajcxy etz choon jiiby tzajptigoty. Chi ñicxy ma Betania cajp, e jim yajnaxxy je tzumbi.

Jesús capxpojcy je higuera ca'p anajty ytiim'aty

¹⁸ E co yxiimiy ytiicxigü, chi Jesús yhuimbijty Jerusalén. E ma anajty tim ytüyöy, jim yuuböccooti. ¹⁹ E jim ijxy ma tüba' tüg cop je higueri quipy. Chi ninicxy. Chi pä't'ijxy, per ca' anajty ni tüg ytiim, jëda'ajty je' y'aay. Chi Jesús nimay je higueri quipy:

—¿Ni ca minaa xii mdiim'adipy!

E mic m'iciyi je higueri quipy ytiich. ²⁰ E co je' ydiscípulos ajcxy jadu'n ijxy, chi ajcxy ooy huinmay. Chi ajcxy y'amidooy Jesús:

—¿Na'amy co yi higueri quipy mic'amy ti ytiich?

²¹ Chi Jesús y'adzooy:

—Janch tiy'ajt jadu'n nej nnimaaygixy. Pen miich ajcxy miid je mibijcin, etz ca' ajcxy mmibicy aametz jotmetz, jëbi mijhuinma'n mdungixy nej ich ti nduñich. E nañ jadu'n jëbi jac mijpi mijhuinma'n mdunipy ajcxy. Jëbi ajcxy tun cop mnimäy: “Quëg ya, tigü' mejjoty” e xycapxymidohuipy ajcxy je tun je cop. ²² E tüg'óciy tijaty miich ajcxy mbijctzooyb huen ytimytijyity, pen mmibijcp ajcxy, mbaadip ajcxy.

Jesús ycötujcin

²³ Co Jesús yja'ty Jerusalén, chi ytiigüy jadüg'oc ma Dios ytijc. E jiiy anajty yaj'ixpicy je mayjäy, chi ñimiini je teedy mijtungmiidpi etz judío mijjäydijc ajcxy. Chi ajcxy y'amidoohui:

—¿Ma cötujcin ti mbaady co jadu'n mduñ tzajtigoty? ¿Pin jada cötujcin ti xymöy?

²⁴ Chi Jesús y'adzooy:

—Nañ jadu'n ich miich ajcxy nyaj'amidoohuamy tüg ayuc. Pen m'adzooyb ajcxy jada ayuc, huin'it ich miich ajcxy nyajnimähuipy ti cötujcin ich miid nduñ huidijaty. ²⁵ ¿Pin quejxy je Juan, je Bautista, yajniibejtpi, Dios o jäy ajcxy?

Chi ajcxy ñayñimáayigixy miñ xyipy:

—Co ixipy ajt n'adzoohuim co Dios Juan quejx, huin'it xy'adzoohuim: “¿Na'amy co miich ajcxy ca' mmibijcy Juan?” ²⁶ Per nañ jadu'n ca' huaad nmīnaanīm co jäy ajcxy yajniibijcy Juan, com nejhuiyim co yi mayjäy mibijccixy co je' anajty Dios tüg y'ayucnajtzcaxiybi.

²⁷ E paady ajcxy jadu'n adzooy Jesús:

—Ca' ich ajcxy nejhuiygixy.

Huin'it Jesús ymīnañ:

—Nañ jadu'n ich ca' nigapxa'ñich pin je' ycötujcin miid nduñich huidijaty.

Je metzpi ung ijxpejt

²⁸ Chi Jesús ymīnañ:

—¿Nej m'oc'ixy m'ocjaygugi' jada yaabi ixpejt? Tüg je yëydijc ymiid anajty metz je' ymang. Chi nimay je mijpi: “Nícx cham m'octuñ ma ich n'uva cam.” ²⁹ Huin'it je' ymang y'adzoohui: “¿Ca' nñicxa'ñich!” Chi jacobhueñy je' ymang yhuinmaydigajch, chi ñicxy tumbi. ³⁰ Chi je ungedeedy oy ixy je ymang mutzpi. Chi nañ jadu'n nimaay co huen nicxy tuñ. Chi je' ymang mutzpi y'adzooy: “Oy, cham nícxibich.” Per ca' ñicxy. ³¹ ¿Huidi je' nidügti ycuyduñ nej anajty yteedy tzocy?

Chi ajcxy ymīnañ:

—Je' ymang mijpi huidibi jayijp nimay.

Huin'it Jesús nimay ajcxy:

—Janch tiy'ajt jadu'n nej nimaaygixy co je huidibi ajcxy yajcogüejtpi etz je töxyjäy ajcxy huidibi tundigooyb miid yëydijc, je' ajcxy tigühuamb jayijp ma Dios y'ane'my jiiy tzajpjoty, ca'ydi miich ajcxy. ³² Paady ycixpi oy ymiin je Juan huidibi jäy ajcxy yajniibejt, Juan yajni'ixiygixy je mayjäy nej ajcxy jëbi yjothuimbidipy ma Dios. E miich ajcxy ca' mibijcy jadu'n nej Juan ymīnañ. Per je' ajcxy huidibi yajcogüejtp etz je töxyjäydijc huidibi tundigooyb miid yëydijctijc, ymibijc je' ajcxy Juan. Oy miich ajcxy mja'ijxy, per ca' mjothuimbidaangixy etz ca' mibigaangixy.

Je naymiduuniptijc jibicjäybi ajcxy y'ijxpejt

³³ Chi Jesús yminañ:

—Oc'amidoo'ijtcix jada yaabi ijxpejt. Ji anajty tüg je huidibi nihuindzin'ajtp mijpi je tundac. Chi je cogam uvas cojy ma je ytundac etz jügajy. Chi yaj'oyiyy ma anajty jëbi je uvas ñii yajniğidägaani. Nañ jadu'n cojy tüg tzaaboch cixpi, jigix jëbi cuend'aty ycam. Co yaj'oyiyyday, chi je cogam yejcy pijctzoy je ycam ma je jäy ajcxy huidibi naymidunaanip. Chi oy chooni je cogam nicxy viaje tumbi. ³⁴ Je huin'it tiempo co yhuaad'ajtni je cosecha, chi je cogam quejxy nijëjity ytumbi jim ma huidibi anajty ti yajpijctzoy je ñaax co huen möyii je huidibi yi' paadaanip. ³⁵ Per je jäy huidibi anajty ti naax pijctzoy, chi ajcxy majch je tumbi. Chi ajcxy ooy huinhuojpy jiphuojpy tüg. Chi ajcxy huingäch jipcäch jadüg. Chi ajcxy je midugiigpi yaj'o'cy. ³⁶ Chi je conaax cogam huingbi ytumbidjic quejxy. E nañ jadu'n ajcxy oy tungixy jadu'n nej anajty ti tungixy je jayijp'atypi. ³⁷ Chi yci'm'ung oy quejx cogixiñi. Hue' jot'ajti co yajmij'adiyb je' y'ung. ³⁸ Per co ajcxy je tumbidjic ijxpaty je cogam je' y'ung, chi ajcxy ñaygapxi: “Tzoc ajt yaj'o'cim je cogam ymang, com yi' je' mihui'mamb je' yteedy je yjugy'ajtin je ypidägy. E co ajt nyaj'o'cim, chi iich ajt nmihui'mim je cam.” ³⁹ Chi ajcxy majch je cogam ymang. Chi ajcxy huijtzpidzimy ma je tundac. Chi oy yaj'öccixy.

⁴⁰ Huin'it Jesús yminañ:

—Co anajty ti miiñ je conaax je cogam, ¿ti jada' y'octunipy miid je tumbidjic ajcxy?

⁴¹ Chi je teedytjic etz mijjäydjic y'adzooy:

—Je cogam yaj'ögipy yjiibi jibicjäydjic, ca' ajcxy pa'ayoohuipy, etz yegipy je uvas cam pijctzoy ma je huingbi jäy huidibi yegipy je pidägy huidibi cogam paatip.

⁴² Chi Jesús yminañ:

—¿Nej ca'ni miich ajcxy mgapxy ma miiñ jaaybety ma Dios ñecyi? Jadu'n yminañ: Je yëydjic huidibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tüg tzaa oybi huidibi je pojtzpidjic ca' ajcxy yajtuna'ñ, e je' je' oy ti yhui'mni ma anajty yjaccopicyity. Je Huindzin Dios jada tung ti tuñ, e ooy oy n'ijxim yi' ytung.

⁴³ E paady jadu'n iich miich ajcxy nimäy co miich ajcxy myajpiga'ñ yi' m'it mluagar jiiby tzajpjoty ma Dios y'ane'my etz yajmöhua'ñ je huingbi jäy je huidibi amuumdügijot naygiyejicp ma Dios. ⁴⁴ Pinjaty ca' cöbiga'ñ jada mij'ane'mbi, ayo'n ypadaamb, ytimnipatp nej jihuüy jim ycijxciday ma je tzaa nicx, tijhuüdiz yajtähuipy. O pen je mij'ane'mbi midziptzoñ je jäy, chi ytigoydähuipy ajcxy, tim jadu'n nej jihuüy je tzaa ñigidaagoodyii ajcxy, e janch jaam pux nicxy yjaty.

⁴⁵ Co ajcxy midooy, chi je teedytjic etz je fariseostjic huijihuüy co yi' ajcxy yajni-gapxyp, ⁴⁶ chi Jesús ajcxy jamadzaañ. Per tzigüyb anajty ajcxy miid je mayjäy, je' co je mayjäy anajty mibijccixy co Jesús najtzcapxiyb Dios ytiy'ajt.

22

Je ijxpejt ma jäy anajty pijcpidjic nixiüduñ

¹ Chi Jesús jadüg'oc ytigiyy capxp miid ijxpejt, yminañ jadu'n:

² —Je Dios y'ane'min jadu'n nipaady nej je rey ymang ocnixiüduñ co ti ypic. ³ Chi je rey quejxhuäcxtay je ytumbi co huen nicxy huoomujtaaygixy je huidijaty anajty ti yaj'nimaaygixy co miingixipy ma ytuna'ñyii yjada'ñyii je pijcin. Per ca' je' ajcxy ymiina'ñ ma je pijcin nixiüduñ. ⁴ Chi quejxnip huingbi ytumbi, nimay ajcxy: “Nimaaygix je tiibi oy jayijp'aty mnimaaygix jadu'n co huen mmiingixy ma yam je caayin uucin ni'ixi' y'ity. Ti je huaj nicxpi nyaj'ögyich. E ni'ixi' ijtaayñi, huen miiñ ajcxy ma je pijcin ytuna'ñyii yjada'ñyii.” ⁵ E je' ajcxy tiibi anajty yaj'nimaaygixy, ca' ajcxy je' ytimy tuñ cuendi. Nijëjity ajcxy ñicxy ma ytundac. Nijëjity ajcxy ñicxy toocp yejcp; ⁶ e nijëjity ajcxy majch je rey yquejxyöybi ajcxy, chi ajcxy oy chaachytuñ, chi yaj'o'cy. ⁷ Chi je rey ooy chachjotma'ty. Chi je soldados ajcxy quejxy co huen nicxy yaj'öctäyii je jäy yaj'öcp ajcxy etz ytoydhuij je ycajp. ⁸ Chi je rey nimay je ytumbi ajcxy: “Ni'ixi' ijttäy ma jada yaabi je pijcin yajniüdüna'ñ. Per je huidibi ajcxy ti yajnimäy ca' ajcxy mihuaadity

co ymíngixipy. ⁹ Nícx miich ajcxy majaty jáy yjiin ytijc. Nímaaygixy tüg'óciy pinjaty ajcxy mbaty, co huen miingixy ma je pijcpi.” ¹⁰ Chi ñícx je rey ytumbi ajcxy. Chi ajcxy miidmiinday je mayjäy, je oyyäybi etz je jibicjäybi. Chi y'ujztay je rey ytijc miid je mayjäy. ¹¹ Huin'it je rey ytigiyy mayjäyjoty, ixa'n'anajty huidijaty ti yajhuomiñ. E jii by tüg yëydijc ti ijspxty huidibi ca' anajty ti ñayxoxyii, jadu'n nej jäy nayxóxigixy co ajcxy nícx ma tüg pijcin. ¹² Huin'it je rey mínañ: “Mígüg, ¿nej ya ti mdigiy tigoty, e ca' mxojx miidty nej ypaadyii?” E je yëydijc amoñyi je' yhui'my. ¹³ Chi je rey nímay huidibi anajty jim pubejtp: “Cíxotz tecyxotz jada yëydijc etz pidäg agootztuuby. E jii by yjihuipy yäxipy, jii by ytíitz huinqueedip miid jotmay.” ¹⁴ Com may je jäy ajcxy huidibi ti yajhuooy, e hueeni ajcxy huidibi ti yajhuin'ixy.

Je cogüejtin ñimiydägy

¹⁵ Je huin'it tiempo je fariseos ajcxy tuuñ quipxycapxy co anajty xihuaangixy nihuambedaangixy Jesús. ¹⁶ E jadu'n ajcxy quejxy ma Jesús yajpaady naagity huidibi minicxpejt je fariseos ajcxy ytiy'ajt etz naagity huidibi mijnicxpejt je Herodes ytiy'ajt. Chi ajcxy Jesús nímay:

—Huindzin, nejhuiybich iich ajcxy co miich mgapxy je tiy'ajt. Tudägy myaj'ixpicy jäy ajcxy jadu'n nej huaad ajcxy cuychinaaygixy Dios ytiy'ajt. E ca' mgüendituñ nej jäy ajcxy ymínaangixy. Tú'ciy miich mduñ miid comeñyjäy etz miid ayoobtijc, ca' huin'ixpety myaj'ixpicy. ¹⁷ Nejhuihuamy iich ajcxy nej miich mína'n pen tiy'ajt jadu'n: ¿Nej ndundigooyim ma Dios ycötujcin, co ngüejtim ma César, je romano mij'ane'mbi?

¹⁸ Per Jesús ñejhuiyb anajty ajcxy yjibic-huinma'n, e chi ajcxy nímay:

—Ooy miich ajcxy naybidáacigixy nej jihuüy ooy mdudägyty, e ca' yjanchity. ¿Na'amy co ajcxy xychachjot'ixy xychachhuinma'n'ixyich? ¹⁹ Yaj'ijxcich tüg meeñ huidi miid migüéjtigixy César.

Chi ajcxy mímiñ tüg meeñ. ²⁰ Chi co Jesús y'ijxy je meeñ, chi yajtiy:

—¿Pin y'ahuinax e pin yxii cixjaay ma jada meeñ?

²¹ Chi ajcxy y'adzooy:

—Je romano mij'ane'mbi y'ahuinax etz yi' yxii.

Huin'it Jesús je' ajcxy nímay:

—Mo' je César huidibi yi' yjé'ajtpy, etz mo' Dios huidibi Dios yjé'ajtpy.

²² E co ajcxy jadu'n midooy, chi ajcxy ooy jihuüy huinmay. Chi ajcxy ixmajch Jesús, e ñícxni ajcxy.

Yaj'amidooy ajcxy je jugypijcin co pin ti y'ögy

²³ Je huin'it xii je saduceos ajcxy oy ixxy Jesús. Yi' ajcxy ymína'n co ca' yjugypiga'n je öcpi ajcxy. E jadu'n ajcxy huinma'n pidägy, e ymínaangixy:

²⁴ —Huindzin, jadu'n miñ ma Moisés ycötujcin co je yëydijc huidibi ypijychinaayb miid ytöxyijc, e pen öcp je yëydijc, e ca' ni tüg y'ung yajhui'my, copicy co co'öcytöxyjäy ypijctigadzipy miid je yëydijc ymiguëx. ²⁵ Pues jii ma iich ajcxy anajty tüg quëx je yëydijc nihuixtujc. Je ungoob ypijcy, e chi ix'ögy ytöxyijc, e ca' ni tüg y'ung yajhui'my. Chi je miguëx ypijctigajch miid je töxyjäy. ²⁶ Nañ jadu'n je mimetzpi yëydijc ix'o'cy ytöxyijc. Nañ jadu'n je midugigpi yëydijc ix'o'cy ytöxyijc. E jadu'n oytuñyii yjadyii miid je töxyjäy co ti anajty miiddzinay'abidzimdäy je nihuixtujcpi yëydijc tüg quëxpi. E je nihuixtujcpi ajcxy ix'o'cy je töxyjäy, e ca' ni tüg y'ung ajcxy yajhui'my. ²⁷ Chi nañ jadu'n oy y'öcni je töxyjäy. ²⁸ E co anajty xii tiempo paty, co anajty Dios yajjugypicy yi tiibi ajcxy y'ögy, ¿huidibi jada' ajcxy nidügti je yëydijc töxyijc'adaanip je töxyjäy? Com ti ajcxy jadu'n nihuixtujcpi miiddzinay'abidzimgixy.

²⁹ Chi Jesús je' ajcxy y'adzooy:

—Miich ajcxy ca' mhuiñhuüy je tiy'ajt, com ca' mnejhuüygyxxy Dios y'ayuc ytiy'ajt, e com ni ca' mnejhuüygyxxy je mic'ajt huidibi Dios ymiid. ³⁰ Pues co anajty yjugypijccixy je jäy tiibi y'öccixy, chi ca' ajcxy ypiiga'n, e nañ jadu'n ni ca' ajcxy ñaymöhuiyb y'ung

huen pijccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángeles ajcxy chinaaygixy jugy'ajtcixy. ³¹ Per je tiy'ajt co jäy ajcxy tibi y'öccixy yjucypigaangixy jadüg'oc, jébi mbaatcixy jada tiy'ajt ma Dios ñecy. Dios ci'm jadu'n minañ: ³² “Íich je' je Dios huidibi Abraham, Isaac etz Jacob yDios'ajtpy.” Com yi Dios ca' yi' yDios'aty ma yi öcpi ajcxy. Yi Dios Dios'ajtp yi' ma yi juugypi ajcxy.

³³ E co je mayjäy jadu'n midooy, chi ajcxy ooy tzachjihuiy tzachhuinmaay je Jesús y'ixpijin.

Je ane'min huidibi ooy ycopicyity

³⁴ E co je fariseos ajcxy nejhuüy co Jesús anajty ti yaj'amoñyii je saduceos ajcxy, chi ajcxy ñayyöymujctaayi. ³⁵ E jim anajty tüg leyhuindzin huidibi Jesús anajty jot'ijxyp huinma'ñ'ijxyp, chi y'amidooy:

³⁶ —Huindzin, ¿ma yi maybi Dios ycötujcin, huidibi yi' jaccopicyip?

³⁷ Chi Jesús y'adzooy:

—Tzoc jihui' etz yajmij'at nHuindzin'ajtim Dios miid tüg'óciy m'aa mjet, etz miid tüg'óciy m'alma, etz miid tüg'óciy mhuinma'ñ. ³⁸ Jada je' jadu'n je Dios ycötujcin huidibi jaccopicyip, etz huidibi tim jayjip. ³⁹ Je mimetzpi Dios ycötujcin jahueengi tú'ciy ñaybadyii miid je jayjipi, yi' huidibi jadu'n minamb: “Tzojccix jihuiygix yi mmigügtijc, tim jadu'n nej mnaychogyii nayjihuiyii ci'm.” ⁴⁰ Jada Dios metzpi ycötujcin jaccopicy jacmic'ajt miid ca' jac huidibi cötujcin huidibi Moisés etz je profetas ajcxy yejc.

¿Pín je' y'ung je Cristo?

⁴¹ E ma anajty jim tügmucy yjac'ijtcixy je fariseos, huin'it Jesús yajtiy:

⁴² —¿Nej miich ajcxy huinmay miid Cristo? ¿Pín je' y'apmang?

Chi ajcxy y'adzooy:

—Je David je' y'apmang.

⁴³ Chi Jesús ajcxy nimay:

—¿Na'amy co David anajty ti ymina'ñ co Cristo hue' je' yi' yhuindzin? Jadu'n ti capxy David anajty miid je Dios yjihui'ñ ymic'ajt, yminañ:

⁴⁴ Je Huindzin Dios nimay íich nHuindzin: “Íña' ma íich n'a'oy'amy, xiti cooni íich miich nyajmimadägip ma je mmidzip ajcxy.”

⁴⁵ ¿Nej jébi David ymij'ap'adyii je Cristo? Com David ci'm yminañ co Cristo yi' je' yhuindzin.

⁴⁶ E nitüg'aa ajcxy yca'adzohuimbijty. E jadu'n nej je xii tiempo yjacnicx anajty ca' ni pin ocjacyajtiyñi huidijaty ayuc.

23

Jesús xiiy ajcxy je fariseos etz escribas

¹ Chi Jesús nimay je mayjäy etz yi' ydiscípulos ajcxy:

² —Je escribas etz je fariseos ajcxy chachnaygömáayigixy co yi' ajcxy jajtp nej capxti'cxipy je cötujcin huidibi Moisés yjaay jecy'ajty. ³ Oy co ajcxy mguydunipy jadu'n nej yi' ajcxy xyaj'ixpijccixy Dios y'ayuc, capxymidoogix nej xyñimaaygixy per ca' mdungixy huidibi yi' ajcxy ytumb, com yi' ajcxy oy ycapxcixy e ca' ajcxy cuydungixy.

⁴ Yi' ajcxy nigo yajcojicixy canaag costumbre huidi je jäy ajcxy ca' mimadäga'ñ, e ca' ajcxy pa'ayoy je jäy, tim jadu'n nipaady nej jihuiy tüg tziy ti mooygixy jemxypi huidibi ca' je jäy ajcxy mimadäga'ñ, e yi' escribas etz fariseos ajcxy ni ca' ycñhuax yajpaadaangixy je tziy. ⁵ Tüg'óciy huidi yi' ajcxy ytumyb, je' ajcxy ytumyb co huen jäy ajcxy ixyii, jaydëbi yajcömay ajcxy. Yi' ajcxy yajhuimboc-huiniyigixy etz ñayyajcñhuiniyigixy Dios y'ayuc. Nayxojcixy miid huit yooñjatypi co chachcömayaangixy. ⁶ Ooy ajcxy tzocy ñaybejt ma je' ñay je ane'mbi ma jäy ajcxy yxiidun. Ooy ajcxy tzocy yi' cödumbi ñaybejt ma je naymujtac. ⁷ Yi' escribas etz fariseos ajcxy oy tzojccixy co ajcxy yajcapxpocxip huindzigi'ñ'amy mayjäyduum. Etz nañ jadu'n ajcxy tzocy co jäy ajcxy yajmij'adiyb nej

huindzindijc ixpicytjic. ⁸ Miich ajcxy ca' jadu'n m'a'ixihuiipy co ajcxy xytijipy huindzin com nidüg'óciy miich ajcxy mnaymigüg'ájtigixy, etz tügpajc je' huidibi miich ajcxy mhuindzin'ajtpy yi' je' Cristo. ⁹ E nañ jadu'n miich ajcxy ya naaxhuiñ, ca' oy ni pin mdeedy'adiyb co miid miich ajcxy tügpajc je mDeedy, huidibi jiiby tzajpjoty. ¹⁰ E nañ ni mganaydijiiyb ajcxy mij ane'mbi, com yi' Cristo je' tügpajc miich ajcxy mmij'ane'mbi. ¹¹ Je pin jaccapxymidoob ymigügtjic, je' je' mij'ajtin miid ma miich ajcxy. ¹² Pinjaty huidibi ci'm naygömayip, tzöydu'nbaadip je', e pinjaty naybidaacip nicy xeemy, je' je' capxpaady y'idipy.

¹³ ¡Ay miich ayoob ajcxy fariseos etz escribas ajcxy! Miich ajcxy mnaybidáacigixy nej jihuüy ooy mdudägyjäy, e ca' yjanchity. Miich ajcxy mgoyüchpy je Dios ytiy'ajtin nej huaad jäy ajcxy ytigy jiiby tzajpjoty ma Dios y'ane'my. Ni miich ajcxy mgatigiygixy, e nañ ni mga'a'ixiigixy co huingbi ytigihuiip.

¹⁴ ¡Ay miich ayoob ajcxy fariseos etz escribas ajcxy! ¡Miich ajcxy m'aaniidacp! Miich ajcxy myajcixtaayi yi' co'ögy ytöxyjäy ypidägy miid ajcxy m'adzojcin, e mdungixy ooy jecy tzajpcapxycapxi, jigix capxpaady mbidzimipy. Dios nigü chaachytunip miich ajcxy miid mbocy ycixpi, ca'ydi jac pin jäy.

¹⁵ ¡Ay miich ayoob ajcxy fariseos etz escribas, miich ajcxy naybidaacigixy tudägy, e ca' yjanchity! Mhuinyöy'abidzimyb miich ajcxy je naaxhuiñybi, co mgapxhuäcxa'ñ je m'ixpijcin ma je tügpä jäy. E co ajcxy je' myajmibicy, huin'it mejtz jadu'ñyi je pocy anajty miidity je jäy, ca'ydi miich ajcxy.

¹⁶ ¡Ay miich ayoob ajcxy huidibi jadu'n idiitzp nej tügi huintzpi huinhuoy! Miich ajcxy minamb co pen tüg jäy tuñ yhuandaacin, e iibaati capxpaati Dios ytjic, chi ca' cuyduñ je huandaacin. Per pen iibatpy capxpatpy je oori huidibi jiiby ma Dios ytjic, huin'it janchity cuyduñ je huandaacin. ¹⁷ Tzuudijc locidijc huidibi ca' huinjihuüy je tiy'ajt. ¿Huidibi jaccopicyip: je oori o je Dios ytjic ma je oori yoxy ity?

¹⁸ Nañ jadu'n miich ajcxy mina'ñ: “Pen tüg jäy huandaacin tuñ, e capxpaady je altar ma Dios yajhuindzigy, chi ca' cuyduñ je huandaacin. Per pen capxpaady je huindzigi'ñ tzüch ma je altar ma Dios yajhuindzigy, chi cuyduñ yhuandaacin.” ¹⁹ ¡Tzuudijc locidijc huidibi ca' huinjihuüy je tiy'ajt! ¿Huidibi jacmij'ajtin ymiid je huidibi ti yajyoxy o je altar? ²⁰ Pinjaty capxpatp je Dios ytjic ma Dios yajhuindzigy y'agapxmuctaayb anajty huidijaty jiiby yajpaatp ma Dios yajhuindzigy. ²¹ Pinjaty capxpatp je Dios ytjic, ca' anajty jeyi capxpaady Dios ytjic, nañ ycapxpatp anajty Dios huidibi jiiby tzinaayb. ²² Pinjaty capxpatp je tzajp, nañ capxpatp anajty Dios y'ane'mdac quipxyi miid Dios huidi tzinaayb jiiby.

²³ ¡Ay miich ayoob ajcxy fariseos etz escribas ajcxy, huidi naybidaacip tudägy, e ca' yjanchity! Miich ajcxy mooyb Dios je tügpicy je majcpi huidibi je' paatip, ixti yi' tzajnimang, yi' ruda etz je pi'c'ujtz'ay ung. Per ca' ajcxy mduñcuenti je cötujcin huidibi jaccopicyity. Miich ajcxy ca' mdzinäy tiydudägy miid je migügtjic. Miich ajcxy ca' mmiidity pa'ayo'n miid je' ajcxy huidibi ayoob jottigooyb, etz ca' mmibijccixy Dios. Jada ixyipy ajcxy mbaadumyb, e mooygixy Dios je tügpicy je majcpi. ²⁴ ¡Tzuudijc locitjic! Miich ajcxy ti m'anajxyp je uux, e mgojinnaaxcixy je camello, je mijpi iyujc.

²⁵ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jiiby jotjoty huinma'ñyoty miich ajcxy miidity jibicpi. Miich ajcxy miid je ca'oy'ixii etz je adzojcin. Tim jadu'n nipaady nej jihuüy myajhuächpy ajcxy yi' tasi ninicx yi' taxy ninicx, e chi myajhui'my jibicpi ma tasiyot ma taxyjot. ²⁶ ¡Tzuudijc miich ajcxy! Jayijp yajhuädz jiiby jotjoty taxy tasi, huin'it huim' nañ jadu'n huädz nigix'amy.

²⁷ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Jadu'n miich ajcxy nipaady nej öcpi jut. Je öcpi jut nigix janch oy yquëxgy, per jiiby jutjoty ujtz jiiby miid je öcpi pajc etz miid jibicpi. ²⁸ Jadu'n ajcxy mguëxgy mayjäyduum nej jihuüy ooy m'oyjäyity, per jiiby jotjoty miid jibic-huinma'ñ.

²⁹ ¡Ay miich ayoob ajcxy fariseos etz escribas ajcxy, miich ajcxy naybidaacip nej tudägy jäy, e ca' yjanchity! Miich ajcxy mgo'abojtzicixy yajxon je öcpi jut ma profeta ajcxy ñaaxtigiiy, etz mxoxy ajcxy miid je pijy ma ñaaxtigiiy je tudägy jäy ajcxy, ³⁰ e miich ajcxy nayñimaayigixy miñ xyipy: “Co ixipy anajty n'octzinaayim jecy'ajty ca' ngapubejtim co ajt nmij'ap nmijteedy yaj'ögy je profetas ajcxy etz je tudägy jäy ajcxy.” ³¹ Miid jada ycixpi miich ajcxy nejhuñyb co miich ajcxy m'ap'adyii mdeedy'adyii je jibicjäydijc ajcxy huidibi yaj'öc je profetas. ³² ¡Miich ajcxy yajcñjxcixy je jibicpi huidibi ajcxy mmij'ap nmijteedy yajtzondac!

³³ ¡Jadu'n miich ajcxy nipaady nej mayxoox! Ca' miich ajcxy madägipy cöguägipy je tzaachypi jiiby ayoodactuuby. ³⁴ E paady nguexaamybich ma miich ajcxy profetas etz huidibi ixpicyip ma Dios y'ayuc, etz huidibi xyaj'ixpigamb ajcxy yi Dios ñecy. Per miich ajcxy myaj'ögamyb myajcruutzpedamyb nijējity, etz nijējity mgoxamyb mhuobamyb ajcxy jiiby tzajtigoty etz m'ixhuidida'ñ mbahuidida'ñ ajcxy cajp cajp. ³⁵ Je mijpocy xyñigidaccoda'ñ miich ajcxy, jadu'n nej je oyjäy ñi'py temy yojcy jecy'ajty, oga'ñ chondacy miid je oyjäy Abel etz ycogixy miid Zacarías, je Berequías y'ung huidibi miich ajcxy mmij'ap nmijteedy myaj'o'c jiiby tzajtigoty ma altar. ³⁶ Janch tiy'ajt jadu'n nej nimaaygixy co je mijpocy ñigidaccoda'ñ je jäy ajcxy huidibi tzinaayb jadachambi tiempo.

Jesús yäxy miid Jerusalén cajp ycixpi

³⁷ ¡Miich ajcxy Jerusalén jäy! ¡Miich ajcxy Jerusalén jäy! Jerusalén jäy huidibi jecy'ajty yaj'ögy je profetitjic etz ycögächpy ajcxy je Dios ycogapxy. Canaag'oc ti njayajtügmu-jctähua'ñich miich ajcxy, jadu'n nej tzeydaj yajtügmu-jctäy je' y'ung ma yqueec päť, per miich ca' m'a'ixiiygixy. ³⁸ Oc'ix miich ajcxy nej mdijc abac yhui'maangixy. ³⁹ Janch tiy'ajt jadu'n nej nimaaygixy co camina miich ajcxy xy'ixipyich jadüg'oc, ixti cooni paadipy je xii je tiempo co jäy ajcxy ymina'nipy: “Cömay yi huidibi miimb miid nhuindzin Dios yxii etz ymic'ajt.”

24

Jesús ymina'ñ co Dios ytijc yhuindigoyipy

¹ Ma anajty Jesús ti ypidzimni ma Dios ytijc, nicxp anajty, huin'it Jesús ydiscípulos ajcxy ñimijhuäci. Yi' ajcxy anajty yaj'ixiydähuamyb je Dios ytijc, com ooy anajty chachmijtijcity.

² Chi Jesús yminañ:

—Huindicx miich ajcxy jada maybi mijjaty ytijc. Miinipy xii tiempo mina tüg'óciy jada tijc nicxy yhui'my taj xit, ca' ma tzaamacxy. Huindigoydähuipy tüg'óciy.

Je tiy'ajt ma ca'ni naaxhuiñybi ycixa'ñyi ytigoya'ñyi

³ Chi oy ñicxni ajcxy ma Olivos cögop. E co anajty jim, Jesús y'ññäy, chi ñimaayi ameech je' ydiscípulos ajcxy:

—Ich ajcxy nejhuñhuamyb mina jëdu'n ytuna'ñyii yjada'ñyii. ¿Ti je' quëxigamb co anajty miich mhuimbida'ñ ya naaxhuiñ, e co anajty je naaxhuiñybi ytigoya'ñ?

⁴ Chi Jesús nimay ajcxy:

—Mnaygüend'adiib ajcxy, ca'ydi pin xyhuin'ingixy. ⁵ Ooy mayjäy ñaybidägáanigixy miid ich nxii, naybidägáanigixy co je' ajcxy je Cristo, ymina'na'ñ ajcxy: “Ich je' je Cristo.” ⁶ Co miich ajcxy ayuc midohuipy co jäy ajcxy chachtziptungixy ñayñibidigixy xi ya, chi ca' ajcxy mdzigiiygixip, com ooy ycopicyity co jadu'n jayjip ytuniiyb yjadiiyb. Ca' nan hue' je' anajty tim cijxp tim tigooyb je xii je tiempo. ⁷ Nayñibidigiib naax cajp miid huingbi naax huingbi cajp, e gobierno miid huingbi gobierno. E miinip mic'ujx canaag'it etz mij yuu etz mij pa'm xi ya. ⁸ Jada tzaachypi ayo'n oga'ni anajty chondägy huidibi nminaxaanim nyajnaxaanim. ⁹ Huin'it xii huin'it tiempo miich ajcxy myajcñyegipy, jigix xychaachtungixipy e xyaj'ögixipy. E tüg'óciy je maynaaxhuiñyay xyc'a'ixáangixipy, miid ich nxii ycixpi. ¹⁰ Je huin'it tiempo may je jäy ajcxy yajtigoya'ñ

ymibjcin. E nañ jadu'n ñayca'oy'ixáanigixy etz ñayñigapxáanigixy ñi'ojñhuáanigixy miñ xyipy. ¹¹ Ooy may quëxigaangixy aanñdaacpidjic mina'naangixy co Dios y'ayuc ytiy'ajt nimiydaci, e mayjáy oy huin'hinaangixy. ¹² E je' co ajcxy xii jimijt ñajtznicxiyñi jac tím niñi jibicpi tunaangixy, ca' ajcxy y'ocnaychójcinipy miñ xyipy. ¹³ Per pinjaty tiydudägy panixp je mibjcin, je' ajcxy ypaadip y'alma nñdzoocin. ¹⁴ Copicy co jayjip yajcapxhuäcxa'ñ huindu'ñybi naaxhuiñybi Dios y'ayuc ytiy'ajt jemybi, jaydëbi jáy ajcxy nidüg'ociy nejhuñy Dios ytiy'ajt. Huin'it je naaxhuiñybi ycixni ytiyooyñi.

¹⁵⁻¹⁶ Je profeta Daniel jaay jecy'ajty jada ayuc (miich ajcxy pinjaty capx jada necy huinjhuñygy) ma minañ: Miich ajcxy co m'ixy pinjaty jibic-huinma'ñ tumb nej ca' ypadyi ma Dios ytiyc, huidibi ooy ycodziñjity, chi miich ajcxy huidibi tzinaayb jim Judea, co jadu'n m'ijxcixy, chi nicx mgueectzóocixipy mic'amy ma tungop. ¹⁷ Pinjaty huidibi yajpatp ma ytiñcix ca' nicxy tijaty yajpidzimy ma ytiyc. ¹⁸ Yi jáy ajcxy huidibi yajpatp camjoty, ca' ajcxy huimbidity co yajpidzimipy tijaty ma ytiyc. ¹⁹ Huin'it tiempo ayo'n ypadamy je töxyjáy ajcxy huidibi anajty y'ungdzim'ijt, e nañ jadu'n je' ajcxy huidibi miid y'ungma'xung. ²⁰ May'ajt ajcxy mbijctzoohipy yi Dios co jada jadu'mbi ayo'n ca' ytuniyb yjadiyb ma anajty ytiichtiempojity, etz ma anajty pocxinxijoty. ²¹ Huin'it oy ayo'n jotmay ytuna'ñyii yjada'ñyii huidibi nicamina ycatuñyii ycajadyiini mabi naaxhuiñybi chondägy e nicamina jadu'n ycajactuniyb ycajacjadiyb. ²² Pen ca' Dios capx'aduga'ñ yjiibi ayo'n xii ayo'n tiempo, ni pin ca' chögipy. Per Dios ycapx'adugamy yjiibi ayo'n tiempo miid je mibjcpidjic ycixpi huidibi Dios ti huin'ixy. ²³ Co yi jadu'mbi xii tiempo anajty ymiñ, ca' mmibjccixipy, pen ji pinjaty xyñimaaygy: "Ijxcix, cha yajpaady je Cristo", o "Jim'amy yajpaady je Cristo." Ca' mmibjccixipy. ²⁴ Pues miinip jáy ajcxy huidibi huin'hinaangixy ymügütjic. Ci'm ñayajnaaxáanigixy jadu'n nej jihuñy je' yCristity, e ymináangixipy co capxhuäcxy ajcxy Dios y'ayuc, e ca' yjanchity. Ytunip ajcxy mijhuinma'ñ etz mijpi ijxpejt, ixti jëbi jahuin'hingixip je mayjáy huidibi Dios ti yhuin'ixy. Per ca' Dios a'ixhuipy co yhuin'hiniyb yi' yjáy. ²⁵ Ti ñich yi' jayjipni nigapxich. ²⁶ E co pinjaty ajcxy xyñimahuipy: "Chim je' je Cristo mijtigidumb", ca' ajcxy mninixip. O co pinjaty ajcxy xyñimahuipy: "Chiiby je' tigoty yhuingoyüch", ca' ajcxy mmibigipy. ²⁷ ñich je' je jáy huidibi tsoon tzajpjoty, nhuimbidaambich ya naaxhuiñ miid je tiicxin je jájin, jadu'n nej je huizuc huidi tiicxp xiibidzimyb ixti xiigidägy. ²⁸ Ma je öp ninix yajpaady jim ñimujctähua'ñ je luud ajcxy.

Nejjada' je' Dios y'ung ymiinipy

²⁹ Co anajty ti ñaxy je ayo'n xii ayo'n tiempo, huin'it je xii ycoodzygidäga'ñ, je po' ca' ytiicxa'ñ, je madza' ycädähua'ñ etz janch mic je tzajp yücxa'ñ. ³⁰ Co yi jadu'mbi ytuniyb yjadiyb, chi quëxiga'ñ tzajpjoty je ijxpejt co ñich, je jáy huidibi tsoon tzajpjoty, nhuimbida'ñich ya naaxhuiñ. E chi tüg'óciy je mayjáy tájip máyip yjihuñhuipy yäxipy, chi ajcxy ixipy je jáy huidi tsoon tzajpjoty miñ anajty jocjoty miid ymic'ajt y'oy'ajt. ³¹ Chi nguexipyich ángeles ajcxy co huen mic yajxüxy ajcxy ytrompeta, jigix yöymujctähuiipy tüg'óciy pinjaty huin'ijxyp xi ya ma ajcxy yajpaady ya naaxhuiñ; ma xii pidzimyb, ma xii cidägy, ma jünboj pidzimyb, ma tichpoj pidzimyb.

³² Jim miich ajcxy ijxpejt mbigipy ma je higueri quipy jadu'n nej je xii tiempo ymiñ cidägy. Co je higueri quipy jadüg'oc pidägipy je' y'aay'ung, huin'it miich ajcxy nejhuñhuipy co yhuingoni mina ypottigiyñi. ³³ Tim jadu'n nej tiy'ajt mbijccixy ma je higueri quipy co jada ajcxy jadu'n ixipy nejhuñhuipy co yhuingoni anajty je xii je tiempo jün'aguy tijc'aguy. ³⁴ Janch tiy'ajt jadu'n nej nimaaygy co tüg'óciy ytuna'ñyii yjada'ñyii ma ca'ni anajty je jáy y'öctäy huidibi anajty jactzinaayb huin'it tiempo. ³⁵ Je tzajp etz je naaxhuiñybi cixam tigoyam yi', per ñich n'ayuc ca' ycixa'ñ ytiyoya'ñ nimina.

³⁶ Ca' ni pin nejhuñy je xii je hora mina nhuimbida'ñich ya naaxhuiñybi. Ni je ángeles ajcxy canejuñy, ni je Dios y'ung canejuñy. Tügpaic je Dios Teedy nejhuñy.

³⁷ Com jadu'n nej yjajti ya naaxhuiñ jecy'ajty, co je Noé chinay, nañ tim jadu'n yjadipy co anajty nhuimbityich, yi jäy huidibi tsoon tzajpjoty, ya naaxhuiñ. ³⁸ Jecy'ajty co anajty ca'ni je ayo'nduu ymiiñ ya naaxhuiñybi, hue' je' mayjäy ajcxy chinay agujc jotcuyc, ycaaygixy y'uuccixy etz yajpjjccixy je y'ung y'anäg, ixti cooni paty je xii tzuu co ytigiiy Noé barcojoty. ³⁹ Je mayjäy ajcxy ca' ajcxy cuenttuñ co ayo'n miina'ñ anajty, ixti cooni je ayo'nduu miin e öctay ajcxy je jäy nijoty. Jadu'n nej yjajty jecy'ajty miid je mayjäy huidibi tzinaayb anajty quipxy miid Noé, nañ tim jadu'n yjada'ñ miid je jäy ajcxy huidibi tzinahuip jac jiini co iich anajty nhuimbityich ya naaxhuiñ jadüg'oc. ⁴⁰ Je huin'it tiempo co nhuimbidityich jadüg'oc ya naaxhuiñ, chi metz yëydijc yajpaadipy ma ytundac, tüg je' yajminicxa'ñ, e tüg je' yhui'ma'ñ. ⁴¹ E mejtz töxyjäy yajpaadip anajty yjich, tüg je' yajminicxa'ñ, e tüg je' yhui'ma'ñ.

⁴² E paady miich ajcxy ni'ixä ijtciç, xyjjp'ixipyich com ca' mnejhuiygyxy mina miich ajcxy je mHuindzin ymiina'ñ. ⁴³ Mnejhuiygyxy miich jada co ixypy je ungededy nejhuiy ti hora je meetzpi miina'ñ, ca'p je' ymähuipy, e ca'p a'i'xihuipy co je meetzpi ytigihuipy tigoty. ⁴⁴ Nañ tim jadu'n miich ajcxy ni'ixä ijtciç, je' co iich, je jäy huidibi tsoon tzajpjoty, nhuimbida'ñich ma ca' ni pin anajty nejhuiy.

Je tumbi tudägypi etz je huidibi ca'p ytudägyity

⁴⁵ ¿Huidibi tumbi je' ya huidibi tumb miid yhuindzin janch cixyot huinijot huidibi miid ixpijcin, huidibi je' yhuindzin moopyy ane'min ma ytijc, huidibi yajnidagihuipy ma ymigügtijc caayin uucin mina ypadyii? ⁴⁶ Janch jotcuyc je tumbi co yhuimbiditye je' yhuindzin, e je' cuyduñ jadu'n nej je' yhuindzin ti ñimäyii. ⁴⁷ Janch tiy'ajt jadu'n nej nimaaygixy co je huindzin ytumbi yajnidoghuajc'adyii tüg'óciy huidibi ymiid. ⁴⁸ Pen je tumbi jibicjäybi mina'ñ jotjoty huinma'ñyoty: "Huäcxijpni iich je nhuindzin." ⁴⁹ E chi nimajztägip ymigügtijc, e ytigihuip caaybi uucpi miid amügyjäydijc; ⁵⁰ chi je tumbi yhuindzin minipy ma ytijc huidi xii mina je tumbi ca' anajty aa'ixy jip'ixy e ni je hora anajty canehuiy. ⁵¹ Chi huindzin tzaachytunip je' ytumbi, etz ypidägypi miid je jacjadyii jäy ajcxy yajpaady huidibi naybidáacigixp nej tudägyjäyity e ca' yjanchity. Jiiby ayoodactuuby yjihua'ñ yäxa'ñ etz huinmucxa'ñ huingueeda'ñ ytütz miid jotmay.

25

Je ijxpejt ma je majcpi töxy'anäg

¹ Co anajty nhuimbityich jadüg'oc ya naaxhuiñybi jadu'n nipaadip nej je nimajcpi töxy'anäg co ñicxy ajcxy ñayjjpcobadihuáanigixy miid je yëydijc huidi pigamb. Chi minicxy ajcxy aceite lámpara co yajticxaangixy. ²⁻⁴ Nimigoox je töxy'anäg huidi cohuinma'ñity etz ahuing minicxy jadüg quiig ujtz miid aceite. E nimigoox je töxy'anäg ca'pi ajcxy cohuinma'ñity, e ca' ajcxy ahuing minicxy jadüg quiig aceite. ⁵ E je yëydijc huidibi anajty pigamb huäcxijpni ooy, chi je töxy'anäg ajcxy ooy ytigiiyñi mä'uuybi. ⁶ E mijcuctz ajcxy midoy co tüg jäy mic mina'ñ: "Chi miiñ je yëydijc huidibi pigamb, nicx jipcobadiygyxy." ⁷ E huin'it je nimajcpi töxy'anäg ajcxy ypidictay. Chi ajcxy yjün ni'ixiiy nidüg nidüg. ⁸ Chi je nimigooxpi huidibi ca' ycohuinma'ñity nimay je nimigooxpi huidibi cohuinma'ñip: "Iich ajcxy hueeni mooygich yi m'aceite, co pidzaanip iich ajcxy njün." ⁹ Chi y'adzooy je cohuinma'ñybi ajcxy: "Ca' nyega'ñich, je' co ca' iich ajcxy nje' yhuaadihua'ñ. Nicx miich ajcxy juy jim ma ytoogyii." ¹⁰ E ti anajty ajcxy ñicxy aceite juuyb je huidibi ajcxy ca' ycohuinma'ñity, co oy yjäty je yëydijc huidibi pigaanip. Chi je cohuinma'ñybi ajcxy miid tigiy tigoty je yëydijc huidibi pigaanip. Chi tijc yaj'agiiy. ¹¹ E com jecyñi oy yhuimbity ajcxy je huidibi ca' ycohuinma'ñity. Chi ajcxy yminañ: "¡Huindzin, Huindzin, ocyaj'ahuadz mdijc!" ¹² Chi je' y'adzooy: "Ca' iich miich ajcxy n'ixy'adyii."

¹³ Chi Jesús yminañ:

—Nayñi'ixiigix, je' co ca' mnejhuiygixy mina iich nhuimbida'ñich jadüg'oc ya naaxhuiñ.

Je ijxpejt ma je meen

¹⁴ Co iich anajty nhuimbida'ñich jadüg'oc ya naaxhuiñybi, jadu'n nipaadip nej jadyaabi ijxpejt, co anajty tüg comeñyäjy chona'ñ viajetumbi, chi je' ytumbi ajcxy mooy je meen co huen cuend'ajtcixy. ¹⁵ Je ymidügpi tumbi moy migoox mil meen. Je mimetzpi moy mejtz mil. E je ymidugiigpi moy tüg mil. E jadu'n ajcxy moy nije' nije' nej huaad cuend'ajtcixy. Chi choñ je huindzin viajetumbi. ¹⁶ Je tumbi huidibi cidiigiyyi migoox mil meen, ytiigy ajuybi adoocpi. Chi je' ymeen y'ung'ajty jamigoox mil. ¹⁷ Nañ jadu'n huidibi cidiigiyy mejtz mil, ytiigy tumbi miid je meen. Chi je' ymeen y'ung'ajty ja mejtz mil. ¹⁸ Je huidibi cidiigiyy tüg mil hue' oy pidägy je meen tützjoty. Chi tajiy, e yützi je yhuindzin ymeen. ¹⁹ E com jecyñi oy yhuimbity je huindzin. Chi ytiigy cuenta yaj'oyiib miid je ytumbi ajcxy. ²⁰ Chi miin jayijp je huidibi anajty ti cidiigiyyi migoox mil meen. Chi je tumbi yajcidiigiyy je' yhuindzin majc mil meen. Chi yminañ: “Miich ti xymooyich migoox mil meen, e iich ti nyaj'ung'atyich jamigoox mil.”

²¹ Chi je' yhuindzin minaañ: “Janch jotcuic iich cham co jadu'n ti mduñ miid je hueenbi meen. Miich ooy mdudägy etz oy ti mduñ, e paady njacmöhuamyb jacmay. Tigi' ma iich, e xondäg miid iich.” ²² Chi ymiñ je huidibi anajty ti cidiigiyyi mejtz mil meen. Chi nimay je yhuindzin: “Miich xymooyich mejtz mil meen, e ti nyaj'ung'atyich jamejtz mil.” ²³ Huin'it je' yhuindzin ñimaayi: “Janch jotcuic iich cham, co jadu'n oy ti mduñ miid iich nmeen, e paady njacmöhuamyb jacmay. Tigi' xondäg miid iich.”

²⁴ E co oy yja'ty je huidibi cidiigiyyb tüg mil meen, chi nimay je' yhuindzin: “Huindzin, hue' ndiyyich miich myëdyic'aty janch jibic jäy. Miich cosecha myajpidicpy ma ca' ti mnipy etz miich mgosecha myajpidicpy ma ca' ti ti mhuijy. ²⁵ Paady ooy ndzigiyich co je meen ngayaj'ung'adipyich. E co miich mhuibida'ñ, mdzogamy je mmeen, e paady je mgi'mmeen ti nyüchich, je' co ndzigiyich co nicxy nyajtigooyich miich mmeen. Cha je meen huidibi ti xymooyich.”

²⁶ Chi je' yhuindzin ñimaayi: “Jibic tumbi miich, ooy mnuuxity. ¿Nej ti mnejhuiy miich co iich cosecha nyajpidigyich ma ca' ti ti nniyyich, etz cosecha nyajpidigyich ma ca' ti ti nhuijyich? ²⁷ Oy co ixipy miich je iich nmeen ti myejc'anuucxy, e jim ixipy y'ung'at. E cham co ti nhuimbityich cham ixipy je nmeenich xycidiigyich miid nimeen'ung.”

²⁸ Chi je huindzin nimay je jacjadyi tumbidijc: “Pijci ajcxy yi meen huidi ymiid, e mooygix yi huidibi majc mil ymiid. ²⁹ Je huidibi oy tumb jacyajmöhuamb je' anaxy, e ymiid'adamy je' conaxpi. Je' huidibi hueen miid yajpigamb je' huidi ymiid, je' co ca' oy ti ytuñ miid je hueenbi. ³⁰ Yi jibi tumbi huidibi ca' oy ytuñ, pidäg ajcxy agootztuuby ma yjhuipy yäxipy, ma ytütz huinmuucx huingueedip miid jotmay.”

Co anajty naaxhuiñyäjy ajcxy yajtiyduñ

³¹ Co iich, je jäy huidibi tzoon tzajpjoty, nhuimbity iich anajty jadüg'oc ya naaxhuiñybi, huin'it n'ixtäga'ñich ma iich n'ane'mdac etz ane'ma'ñich miid iich nmij'ajtín etz n'oy'ajtín. ³² Chi tüg'óciy je naaxhuiñyäjy yajtügmutähua'ñ ma iich. Nhuäcx-amybich jadüg jadüg jadu'n nej jäy ajcxy huäcxy je cöbixy etz je chiibo ajcxy. ³³ Nbidägaamybich a'oy'amy je jäy ajcxy huidibi oy ti ytungixy miid iich. E yi' ajcxy jadu'n nipaadip nej cöbixy. Nbidägaamybich anajty'amy yi jäy ajcxy huidibi jibic ti ytungixy miid iich. E yi' ajcxy jadu'n nipaadip nej chiibi.

³⁴ Chi nnimähuibich yi jäy ajcxy huidibi a'oy'amy: “Miingix miich ajcxy huidibi Dios Teedy ti xyconuucxy ajcxy. Je'ájtigix ane'mdac huidibi ijtp ni'ixi miid miich ajcxy ycixpi maabi naaxhuiñybi chondägy. ³⁵ Ma anajty iich nyuubögyii miich ajcxy ti xyajcaayich; ma anajty iich ndidziyyi, miich ajcxy ti xyajni'ügyich; ma anajty iich nihuidityich, miich ajcxy jättac ti xymöyich; ³⁶ ma anajty iich je nhuit ti nyajmayjatyich, miich ajcxy ti

xymöyich je huit; ma anajty ñich nbigyijich, miich ajcxy ti xycuend'átyich; etz co anajty ñich pujxtigoty nyajpaady, miich ajcxy ti xycogapxíyich.”

³⁷ Huin'it ymina'na'ñ je jäy ajcxy huidibi oy ti ytungixy miid ñich: “Huindzin, ¿mina ñich miich ajcxy ti n'ixy ayuu, e ti nyajcay? O ¿mina ñich miich ajcxy ti n'ixy co mdidziyíi, e ti nyajñi'ügy? ³⁸ ¿Mina ñich miich ajcxy ti n'ixy co miich mnihuidity, e ti nmöy jättac? O ¿mina mhuit ti myajmayjaty, e ti nmöy je mhuit? ³⁹ ¿Mina ñich miich ajcxy ti n'ixy, co miich mbigyíi, e oy ti ngüend'aty? etz ¿mina ñich miich ajcxy ti n'ixy co pujxtigoty myajpaady, e oy ti ngogapxíy?” ⁴⁰ ñich, je mij'ane'mbi, n'adzohuimbidityich: “Janch tiy'ajt jadu'n nej nnimaaygixy co yi jäy ajcxy huidibi oy ti ytungixy miid pinjaty huidibi xymijnixpejtpich, nañ jadu'n oy ti ytungixy miid ñich. Ca' ñéjity co jäy ajcxy yminañ co ca' ypinity je jäy huidibi xymijnixpejtpich.”

⁴¹ Chi ñich, je mij'ane'mbi, nimähuibich je jäy ajcxy huidibi yajpatp: “Huinhuäctutcich miich ajcxy jibicjäydijc. Nicxy miich ajcxy mijjinjoty, huidibi ijtp ni'ixí miid je mujcu' ycixpi etz miid je' y'ángeles ajcxy ycixpi. ⁴² Ma anajty ñich nyuubögyíi, ca' miich ajcxy xyajcaayich; ma anajty ñich ndidziyíi, ca' miich ajcxy xyajñi'ucyich; ⁴³ ma anajty mnihuidityich, ca' miich ajcxy xyajjättägyich; ma anajty ñich nhuit xytigoy'íjtigich, ca' miich ajcxy huit xymooyich; etz ma anajty ñich nbigyíi e nyajpaadyich pujxtigoty, ca' miich ajcxy xycogapxíyich.” ⁴⁴ E chi je' ajcxy ymina'na'ñ: “Huindzin, ¿mina ñich ajcxy miich ti n'ijxcixy co anajty miich yubögyíi tidziyíi, o co anajty mnihuidity? ¿Mina ti n'ijxcixy co ca' mhuit miidity, o co mbigyíi, o co anajty pujxtigoty myajpaady, e ca' ñich ajcxy miich nbubejty?”

⁴⁵ Chi ñich, je mij'ane'mbi, n'adzohua'ñich: “Janch tiy'ajt jadu'n nej nnimaaygixy. Huen tím pinity huidibi ca' miidity pa'ayo'n miid je' ajcxy huidibi xymijnixypejtpich, oy jäy yamina'ñ co ca' ypinity, ñich miich ajcxy anajty jadu'n ti xytuñich.” ⁴⁶ E jada ajcxy nicxip huinixi ayoodactuuby, e yi tudägypi ajcxy nicxip ma yi jugy'ajtin huinixiibi.

26

Je huinma'ñ nej anajty Jesús madzaangixy

¹ Co Jesús nigapxtay tüg'óciy jada yaabi ayuc, chi nimay yi' ydiscipulos ajcxy:

² —Miich ajcxy mnejhuiyb co huixtic je amayxií, je pascua xií. Pascua xiíjoty ñich, je jäy huidibi tsoon tzajpjoty, nyajciyega'ñich ma nmidzipich etz xyajcruutzpeda'ñich, xyaj'öga'ñich ajcxy.

³ Je huin'it xií je teedy huidibi tungmiid ajcxy, je escribas, etz je mijjäydijc ajcxy ñayyömujectayi ma je' ytiba' je teedy huidi jacmijtungmiid huidi anajty yxií Caifás. ⁴ E jim ma Caifás ytiba' jim ajcxy huinma'ñyixtay nej jébi yajmachycägixy Jesús miid anii etz yaj'ögaangixy. ⁵ Chi ajcxy ñayñimaayi miñ xyipy:

—Ca' y'oyity co xiíjoty nmajtzim Jesús. Ca' jecyity co je mayjäy xymijotma'ttayim etz ytigihuij ajcxy huambi jihuiybi.

Tüg töxyjäy pidacy aceite ma Jesús ycohuajc

⁶ Jesús anajty yajpaady Betania ma Simón ytijc, je Simón huidibi anajty ymiid je jibic nibüdz pa'm. ⁷ E ma anajty Jesús yca, huin'it ymiñ tüg töxyjäy miid tüg quiig ujtz miid perfume huidibi ooy oy yxuugy, jada perfume ooy anajty choohuity. Chi je töxyjäy yaj'ahuäch je quiig, e yajcöyogiy Jesús je perfume huidibi ooy oy yxuugy. ⁸ Co Jesús ydiscipulos ajcxy jadu'n ijxy, chi ajcxy mijotma'ty je töxyjäy. Chi ajcxy ñayñimaayi miñ xyipy:

—¿Ti co jada perfume huidibi ooy oy xuugy ayoy? ⁹ Tzou ixypy ooy jada yajtoocy, jaydébí ixypy miid yajpubet je ayoobitijc.

¹⁰ E co Jesús nejhuiy nej ajcxy yminañ, chi nimay:

—¿Na'amy co m'amayiy jada yaabi töxyjäy? Yi' huidibi ti tuñ, je' yi' tüg oybi. ¹¹ Je ayoobtijc ca' ytigoy'ida'ñ ma miich ajcxy nimina. Huen huidibi xií huen huidibi tiempo jébi miich ajcxy mbubedipy ayoobtijc. ñich ca' n'ida'ñich jecy ya miid miich ajcxy.

¹² Jada töxyjäy ti pidägy ma ñich nninïcx perfume huidibi ooy oy xuugy, jayijp ca'ni nnaaxtigïyich. Jadu'n je' jïjp'ijxpy mina nnaaxtigïhua'ñich. ¹³ E huentimma'amyitye je Dios y'ayuc anajty yajcapxhuäcxy huindu'my naaxhuiñ jim yajnigapxa'ñ jadu'n nej je töxyjäy ti tuñ cham miid ñich, e jadu'n je mayjäy jäymedzïpy jada töxyjäy.

Judas cïyecy yi Jesús ma ymidzip agojïx

¹⁴ Chi nidüg je' ydiscïpulos huidibi yxï Judas Iscariote oy nimäy je teedy mïjtungmïdpi, ¹⁵ nimay ajcxy:

—¿Ti ajcxy xymöhuïbich co ngïyegïpyich Jesús?

Chi ajcxy moy iipxmajc plata meeñ. ¹⁶ Co ajcxy meeñ ymooy, chi mic'amy Judas yhuinma'ñixtay nej jëbi cïyecy Jesús ma ymidzip.

Jesús y'adzuu'ajty pascua xïijoty

¹⁷ Je ymidügpi xïi, je amayxïi, je pascua xïi ma anajty yajcay je tzajcaagy huïdi ca' levadura mïdïty, huin'it je' ydiscïpulos ajcxy nimïñ Jesús. Chi ajcxy yajtiïy:

—¿Ma mdzocy co ñich ajcxy ni'ixïhuïp huïdi mgayamy je pascua xïi cïxpi?

¹⁸ Chi Jesús y'adzooy:

—Ñicx miich ajcxy jim Jerusalén ma tüg jäy ytïjc, e mnimähuïp: “Ñich nHuindzin jadu'n minamb co yhuingoñ je' yxï yhora, e paady ma miich mdïjc yi' tuna'ñ je pascua xïi adzu'ajtin mïid ydiscïpulos ajcxy.”

¹⁹ Huin'it Jesús ydiscïpulos ajcxy cuyduñ jadu'n nej Jesús anajty ti ñimäyïi. Chi ni'ixïy ajcxy je pascua adzuu'ïbi.

²⁰ E co chu'ïy, chi Jesús y'ixtacy ma je mesa mïid je nimajmetzpi ydiscïpulos. ²¹ E ma anajty ycaaygïxy, huin'it nimay je nimajmetzpi:

—Nidügti miich ajcxy huidibi xycïyegaambich ma nmïdzipich.

²² Huin'it ajcxy yajtay taj may. Chi ajcxy yajtiïy:

—Huindzin, ¿nej ñich jada'ji?

²³ Chi Jesús y'adzooy:

—Yï huïdi mïid ndocxmucyich, yi' je' jadu'n xycïyegaambich ma nmïdzipich. ²⁴ Janch tiy'ajt co ñich n'öga'ñich, jadu'n nej je profeta jaay jecy'ajty. ¡Ay ayoob je yëdyjc huïdi xycïyegaambich! Jac'oy co ca' ycama'xung'aty je huïdibi xycïyegaambich.

²⁵ Chi Judas yminañ:

—Huindzin, ¿nej ñich jada'ji?

Chi Jesús y'adzooy:

—Miich jadu'n minamb.

²⁶ E ma anajty ajcxy ycaay, huin'it Jesús tzajcaagy conïgy. Chi yajnaxxy Dioscojuyip. E chi jada' tujchuäcxy je tzajcaagy. Chi moy je nimajmetzpi ajcxy je tzajcaagy, e yminañ:

—Cay miich ajcxy jadayaabi tzajcaagy, yi' je' ñich je nninïcxich.

²⁷ Huin'it Jesús cïyïgy je y'ügy. Chi yajnaxxy Dioscojuyip. E huin'it moy je ügy je nimajmetzpi ajcxy, e yminañ:

—Üc miich ajcxy jadayaabi ügy, ²⁸ yi' je' ñich je nni'pyich. Yï' ñigapxy co Dios ti yaj'aducy je jemybi ayuc. E ñich nni'py ytema'ñ yoga'ñ mïid je mayjäy ycïxpi, jaydëbi ajcxy paadïp je huinmeecxin mïid je ypocy ycïxpi. ²⁹ Janch tiy'ajt jadu'n nej nnïmaaygïxy, co ca' n'oc'ügaanich jadüg'oc je pascua xïi ügy, ixti cooni je xïi tiempo paadïp co ñich ajt n'uucim huinjemybi je pascua xïi ügy ma ñich nDeedy y'ane'min.

Jesús nigapxy co Pedro ycoyütza'ñyïi

³⁰ E co ti y'ïdäy, chi ajcxy choon'ñicxy ma Olivos cögop. ³¹ Chi Jesús je' ydiscïpulos ajcxy nimay:

—Nidüg'óciy miich ajcxy xy'ixmajtzähua'ñich cham coodz. Je' co jaaybejty jadu'n mïiñ ma je Dios ñecy: “Ögïp je cuend'ajtpi, huin'it je cöbixy yöyhuäcxtähua'ñ.” ³² E co anajty ñich njugypicyich jadüg'oc ma anajty ti n'ögyich, chi jayijpni nnicxa'ñich ma Galilea, e jim naybaatim nidüg'óciy.

³³ Chi Pedro ymíñañ:

—Oy yi jacjadyiibi migügtjicich xyjadim'ixmajtztäy, per ni camina xii ñich miich n'ixmadzipy.

³⁴ Chi Jesús Pedro nimay:

—Janch tiy'ajt jadu'n nimäyich, cham coodz ca'ni anajty je tzey yaxígy, miich tugígy'oc mína'níp co ca' xy'ixy'adyiijich.

³⁵ Chi Pedro ymíñañ:

—Oy ñich ndim'ögíp miid miich, ni camina ngaminá'ñibich co ca' miich n'ix'adyii. E nidüg'óciy je' ydiscípulos ac tim jadu'n ymíñañ.

Jesús mibijctzoy Dios jim Getsemaní

³⁶ Chi Jesús ñicxy miid je' ydiscípulos ajcxy, oy yja'tcixy jim Getsemaní. Chi jim Jesús nimay je ydiscípulos ajcxy:

—Ya miich ajcxy oc'iña', miin ñich n'ocnicxyich jim'amy Dios mibijctzoobi.

³⁷ E chi Jesús ñicxy miid Pedro etz nañ jadu'n miid je Zebedeo ymang nimetzpi. E jim Jesús ñayjihuiiyi janch tajy may mij cajee. ³⁸ E chi jim yajnimay je nidugígy'oc discípulos:

—Nayjihuiiybich taj may ma njot nhuinma'ñ, ixti mabaad anajty n'ögich miid tájin máyin. Hui'm miich ajcxy ya miid ñich etz ca' mmaagixy.

³⁹ Huin'it Jesús ñajtzoyiijy mijci'm jahui'. Chi jim ñaygojxtinaydaci naaxcíxy, e ytigígy Dios mibijctzoobi, ymíñañ:

—Dios Teedy, ñich nDios, pen jébi jadu'n, mduñ may'ajt píjcgich jadayaabi tzaachypi ayo'n, per ca' yjadu'nity nej ñich ndzojcin mdunipy, jadu'n mdunipy janchtiy nej miich mdzojcin.

⁴⁰ Huin'it Jesús yhuimbijty jim ma anajty ti yajhui'my je nidugígy'oc. E oy paady ac tim maab anajty ajcxy. Chi nimay je Pedro:

—¿Nej ca' madága'ñ miich ajcxy co m'idipy juugy tüg hora miid ñich ycixpi? ⁴¹ Hui'mi' ya, juugy m'idipy etz mibijctzoo Dios, jaydeb ca' je ca'oybi xymimadägip. Janch tiy'ajt co jotjoty ooy mnijot'ajtcixy com tunaangixy yi oybi. Per yi mninícx ca' ymadága'ñ nicxy tuñ oybi.

⁴² Chi mimetz'oc Jesús ñicxy oy Dios mibijctzoy, ymíñañ:

—Dios Teedy, pen copicy co ñich nbaadibich je ayo'n, huen jadu'n yjadiiyb miid ñich nej miich mdzojcin.

⁴³ Chi jadüg'oc Jesús huimbijty ma je nidugígy'oc discípulos, e oy pátnibi maab ajcxy, je' co ca' anajty ajcxy mimadägy máhuui. ⁴⁴ Chi yajhui'my ajcxy, e midugígy'oc ñicxy Dios mibijctzoobi. E nañ tim jadu'n oy mínaaníp jadu'n nej anajty ti y'ocmínamb. ⁴⁵ Chi jadüg'oc huimbijtni jim ma je nidugígy'oc, chi nimay ajcxy:

—¿Máagixni? Póxcix jadachambi. Ti je tiempo yhuaad'ajtni mína ñich, je jäy huídibi tzoon tzajpjoty, nyajciyega'ñich ma yi jibicjäydijc ajcxy. ⁴⁶ Pidíccix, tzoc jámim, chi ymiiñ je huídibi xyciyeagaambich ma nmidzipich.

Tzomy mach ajcxy Jesús yajnicxy

⁴⁷ Jesús capxni anajty jim co yjäty je Judas. Judas hue' je' nidügti je majmetzpi discípulos huídibi Jesús yhuin'ijx. E je Judas miid ja'ty mayjäy, je huídibi anajty ti quexy je judío teedy mijtungmiidpi etz je mijjäydijc. E je mayjäy hue' anajty ajcxy miid ypujx etz quipy. ⁴⁸ Judas, je huídibi anajty ciyejcp Jesús, ti anajty jayijp yecy tüg ijxpejt huídibi miid jébi ajcxy ijxcapy Jesús. Jadu'n jayijp Judas ycapxtuñ miid je' ajcxy, e ymíñañ:

—Je jäy huídibi anajty ndzücxypich, yi' je' Jesús. Májtzcix.

⁴⁹ Huin'it Judas nimijhuägy Jesús co capxpocxa'ñ, chi ymíñañ:

—¡Huindzin!

Chi tzüxcy.

⁵⁰ Chi Jesús ñimayi:

—Migüg, ¿na'amy co xyñimijhuägyich?

E co jadu'n nimay, chi mic'amy yí' ajcxy majch Jesús. Chi ajcxy yajnicxy tzumy mach.

⁵¹ E huin'it nidüg je Jesús ymigüg, juudy je ypujx. Chi tatzpujxtucy je teedy miltungmiidpi ytumbi. ⁵² Chi Jesús nimay je' ydiscípulo:

—Pidäg yí mbujx ma ytijc. Com pinjaty tziptumb miid pujx, nañ jadu'n y'ögipy miid pujx. ⁵³ ¿Nej ca' mnejhuüy co ñich jëbi nbijctzooyich cham adzu'x may ángeles, je huidibi xyñihuá'nibich ma nmidzipich? ⁵⁴ ¿Per nej ycixipy yca'pxipy nej miñ jaaybety, jadu'n nej cham ytuñyii yjadyii miid ñich ycixpi?

⁵⁵ Chi Jesús nimay je mayjäy:

—Miich ajcxy ti xyñidzonüyich miid je pujx miid je quiipy. ¿Nej mdiy ñich meetzpi o jäy yaj'öcpich? ñich jabom jabom anajty ññayich nyaj'ixpicyich miich ajcxy jiiby ma Dios ytijc. E ca' miich ajcxy xymajchich. ⁵⁶ Huinjihuí' miich ajcxy co tüg'óciy yam ytuñyii yjadyii ca'px tim jadu'n nej je profeta ajcxy cojaay jecy'ajty.

Huin'it nidüg'óciy je' ydiscípulos ajcxy yqueectay. Chi Jesús yhuí'my naydügpajc.

Jesús ma naymujcpi idijc yhuinduu

⁵⁷ Je' ajcxy huidibi anajty ti mach Jesús, yajnicx ajcxy jim ma Caifás ytijc. E jim ma Caifás ytijc ma anajty ti ñayyöymujctáayigixy je escribas etz je mijjäydijc ajcxy. ⁵⁸ E je Pedro anajty axam nicxy jigüegy jihuüy, ixti cooni yajja'ty ma Caifás ytiba'. Chi jim ytigiy. Chi ixtacy miid je cuend'ajtpi ajcxy, je' co oc'ixa'ñ ocnejhuíhua'ñ nej Jesús yjada'ñ.

⁵⁹ Je teedy ajcxy miltungmiidpi etz tüg'óciy je judíojäy miltungmiidpi ajcxy huinma'ñ ixtaaygixy nej jëbi Jesús yajpocycägixy miid ajcxy xihuín, e jadu'n jëbi mooygixy yí o'cin.

⁶⁰ Mayjäy nihuambejty Jesús miid anii, per ni pin anajty ca' miidity tiy'ajt co Jesús anajty ti ytundigooy miid judíojäy ajcxy ycötujcin. Jac com jecy miin metz testigos miid aanií.

⁶¹ Je' ajcxy yminañ:

—Jadayaabi yëydijc minañ co jëbi nyajhuindigooyich Dios ymiltzajptijc, e codugiig xii ti anajty nyaj'oyiyich jadüg'oc.

⁶² Huin'it je teedy miltungmiidpi ytinayigy, e nimay Jesús:

—¿Nej co ca' m'adzooy? ¿Nej janch tiy'ajt nej jadayaabi metzpi testigo ymina'ñ?

⁶³ Per Jesús ca' y'adzooy. E huin'it je teedy miltungmiidpi ñimaayi:

—Nimaayg ñich ajcxy Dios ycixpi, pen janch miich je' je Cristo je Dios y'ung.

⁶⁴ Chi Jesús yminañ:

—Miich jadu'n minamb. Nañ jadu'n ñich miich ajcxy nimäy, co ñich je jäy huidibi tzoon tzajpjoty, miich ajcxy xy'ixipyich tzajpjoty ma Dios ymijc a'oy'amy. Nañ jadu'n miich ajcxy xy'ixipyich jocjoty co anajty nhuimbityich jadüg'oc ya naaxhuiñ.

⁶⁵ Chi je teedy jacmiltungmiidpi oy yhuít huindzeczy huinma'ch, chi yminañ:

—Jadayaabi yëydijc ti capxtigooy Dios. ¿Ti testigo njac-huaanim? Miich ajcxy ci'm ti mmidoogixy co yí ti ycapxytigooy ma Dios, e minañ: ⁶⁶ ¿Nej miich ajcxy minaangixy?

Chi ajcxy yminañ:

—Ti ycapxytigooy, copicy co y'ögipy.

⁶⁷ Chi ajcxy huindzujy jijptzujy etz cojxy ajcxy. Chi jacjadyii huingojxy jijpcojxy. ⁶⁸ E chi ajcxy nimay:

—Pen janch co miich je' je Cristo octiygapx pin ti xycoxy.

Pedro ymina'ñ co ca'p Jesús ix'y'adyii

⁶⁹ Je huin'it moñi Pedro anajty ññay tibägujc. Chi ñimiini tüg töxy'anäg tumbi, chi ñimaayi:

—Miich nañ jadu'n ti mhuidity miid Jesús je Galilea jäy.

⁷⁰ Chi Pedro yminañ mayjäyjoty:

—Ca' nhuinjihuüyich ti mgapxpy.

⁷¹ Pedro hue' anajty pidzimnip co ñimiini huingbi töxy'anäg. Chi je töxy'anäg nimay je' ymigügtijc:

—Jadayaabi yëydijc ti yhuidity nañ jadu'n miid Jesús je Nazaretpi.

⁷² Chi Pedro jadüg'oc coyüch je Jesús cixyjot huinijot yminañ:

—Ca' n'ixy'adyiijich yjiibi yëydjic.

⁷³ Jac co hueeni, je jäy huidibi anajty ajcxy jimip ñimay ajcxy je Pedro:

—Janch co miich nañ jadu'n anajty miid mhuidity yi Jesús, com yi m'ayuc yi' xyajniquëxëcp.

⁷⁴ Chi Pedro tigiiy capxpi janch oy ñinej minañ huinijot:

—Ca' n'ix'adyiijich yi yëydjic.

E tim huin'itiy je tzey yaxigy. ⁷⁵ Chi Pedro jäymejtzcoody jadu'n nej anajty Jesús ti ñimäyii: “Ma ca'ni anajty tzey yaxigy cham coodz, miich tugig'oc xycoyützibich.” Chi Pedro pidzimy tiba', e jiiby oy yäxy mibaad yjotcidägy.

27

Chi Jesús yajcäyeycy ma Pilato

¹ E co oy yximiy yticxiy, chi je teedy mijtungmiidpi etz je mijjäydjic ajcxy quipxycapxy co yaj'ögaangixy Jesús. ² Chi ajcxy yajnicxy cixoch oy ajcxy cäyeycy ma Poncio Pilato je gobernador.

Judas ñayyöctiyyi

³ Co je Judas je huidibi anajty ti cäyeycy Jesús, co ijxy co yaj'ögaanip Jesús, chi oy yjotmaybaatni. Chi conhuimbijty je iipxmajcpi plata meeñ ma je teedy mijtungmiidpi etz mijjäydjic ajcxy. ⁴ Chi Judas nimay je teedy mijtungmiidpi etz je mijjäydjic ajcxy:

—Ich ti ndundigooyich co ti ngäyeyyich yi tudägyjäy ma miich ajcxy.

Chi je' ajcxy y'adzooy:

—Ti ich ajcxy n'occuent. Miich yi' mnigixp tiibi mduñ.

⁵ Huin'it Judas cohuijy je meeñ jiiby tzajtigoty. Chi ñicxy. Chi ñayyöctiyyi.

⁶ Huin'it je teedy mijtungmiidpi yajpidägy je meeñ. Chi ajcxy ñayñimaayi miñ xyipy:

—Jadayaabi meeñ ca' yjëbity co nbidaacim ma ofrenda ñigidägy. Je' co yi' yjëjity je huidi ni'py ti tzoo'adyii.

⁷ Huin'it je teedy ajcxy tuñ je quipxycapxy co juyaangixy miid je meeñ tüg naax huidibi jäy ytijp, tütznaax it, ma ajcxy yajnaxtigihuiipy pinjaty ca' ycogajpity jim Jerusalén. ⁸ Ixti chambaad jadu'n xii'adyii jejimbi it: Ni'py naax. ⁹ E jadu'n ycijx yca'px nej je profeta Jeremías yminañ: “E jadu'n ajcxy je' yajpidägy meeñ iipx majcpi plata meeñ (je' choou nej anajty ajcxy Israeljäy ti yajnigödugiy), ¹⁰ e miid je meeñ ajcxy juy je tütznaax it, jadu'n nej anajty ti xy'ane'myich Dios.”

Pilato y'amidooy Jesús

¹¹ Jesús yajpaady jim anajty ytinäy ma je gobernador Poncio Pilato yhuinduu, chi y'amidoohui:

—¿Nej miich je' judíos jäy xyrey'ajtp?

Chi Jesús y'adzooy:

—Miich jadu'n minamb.

¹² Je judío teedy ajcxy huidibi mijtungmiidpi etz je mijjäydjic tzachxigixy Jesús ma je gobernador. Ni jadu'ñyi Jesús ca' y'adzooy. ¹³ Chi je Pilato ñimay Jesús:

—¿Nej ca' mmidooy nej yi' ajcxy yxäyi?

¹⁴ Per Jesús ni jadu'ñyi ca' y'adzooy. E paady je gobernador oy mij huinmay, ni ca' ocejhuiiñi ti ycapixy.

Jesús ycödujcy y'o'cin

¹⁵ Je gobernador jadu'n anajty ycostumbre miidity co jimijt jimijt najtzmazäy tüg machyjäy pascua xijoty, je huidibi je mayjäy ti ytimychojcpy. ¹⁶ E jim anajty tüg je machjäy huidibi anajty ajcxy ix'yajttaayb, e yxijity Barrabás. ¹⁷ E co anajty jim ti ytügmujctaaygixy, chi Pilato ajcxy y'amidooy:

—¿Pín miich ajcxy mdzojcpy co ñich nnajtzmazdžihuibichi? ¿Najtzmazdžiyich Barrabás o Jesús huidibi jäy ajcxy ytipy je Cristo? ¹⁸ Pilato ñejhuiyb anajty co mañ'ájting'ix anajty ti číejccixy Jesús.

¹⁹ Jimni anajty ñäy Pilato me je ycötujctac co je ytöxyjc tiy'ajt quejxy ma yi', yminañ: “Ca' huaad myajtzaachytuñ yi tudägyjäy. Je' co ñich amygoodz ti ngumäyich janch jibic miid yi' ycixpi.”

²⁰ Per je teedy ajcxy etz je mijjäydijc ti anajty capxyjotcidaaccixy je mayjäy co huen yajnajtzmazdžiy Barrabás etz huen yaj'öccixy Jesús. ²¹ Paady co jadüg'oc je gobernador y'amidooy je mayjäy:

—¿Huidibi machyjäy mdzojcpy co nnajtzmazdžihuibich?

Chi je mayjäy y'adzooy:

—Najtzmazdži' Barrabás.

²² Chi Pilato y'amidooy je mayjäy:

—¿E nej ndunipyich yi Jesús, huidibi jäy ytipy Cristo?

Huin'it ajcxy nidüg'óciy y'adzoday:

—¡Yajcruutzpet yi Jesús!

²³ Chi Pilato yminañ:

—Pues, ¿nej ti ytundigooy?

Per je mayjäy nigoob y'adzoday:

—¡Yajcruutzpet! ¡Yajcruutzpet!

²⁴ Pilato yjapubedaan Jesús, per co ijxy nejhuiy co je mayjäy ca' ni nej niducy. Hue' ajcxy oy ytiğiyy huambi jihuiybi, chach ñayñajztijiygixy miid jot'an. Huin'it Pilato capxyñiguejxy je huadz nii. Chi ytiğiyy čibujp ma je mayjäy yhuinduu, e yminañ:

—Ca' ñich ngo'adzohuipyich jadayaabi tudägyyëydijc y'o'cin. Miich ajcxy yi' mgo'adzoohuipy.

²⁵ Chi je mayjäy y'adzoday:

—Ñich ajcxy ngo'adzohuipyich yi' y'o'cin miid n'ung anäg etz n'ap n'oc.

²⁶ Chi Pilato najtzmazdžiy je Barrabás. Per Pilato ane'my co huen Jesús yajhuojp. E co yajhuojptay, chi číejcy, co huen yajcruutzpedyii. ²⁷ Chi Pilato ysoldados ajcxy yajnicxy Jesús ma agujctijc. E jiiyby tüg'óciy soldadtijc ñayyöymujci ma Jesús. ²⁸ Chi je soldado ajcxy je' yhuit yajnijenducy. Chi ajcxy yajnijeny je tzapx huit huidibi je rey ajcxy yajtuumyb. ²⁹ Chi ajcxy tacy tüg corona miid apy. Chi ajcxy yajcöjeniy ma Jesús. E huin'it ajcxy a'oy'amy yajcigabiyy tüg je paxy. Chi ajcxy huingojxtinay'ahuuiy. Chi ajcxy nixiicy yajxiicy, e yminaangixy:

—¡Ooy ymijity yjanchity, je judíos ajcxy yrey!

³⁰ Chi ajcxy huindzujuj jijptzujy. Chi ajcxy yajcigajptucy je paxy, e yajcöhuojpğıy ajcxy.

³¹ E co ajcxy nixiictay yajxiictay, chi yajnijenducy je rey yhuit etz yajnijeny je yci'm huit. Chi ajcxy yajnicxy ma yajcruutzpedaangixy.

Co Jesús yajcruutzpejtí

³² E jim ma anajty hueeni ti ytüyöy, jim ti paty tüg Cirene yëydijc anajty yxiijity Simón. Chi ajcxy adzip nimay Simón co huen jaccapi Jesús ycruudz.

³³ E co ajcxy yja'ty ma tüg je it yxiijp Gólgota, jadu'n yhuimbizim Öcpi Cohuajc Cögop. ³⁴ E jim ajcxy Jesús jayaj'üga'ñ vino temhuidity miid tzooy, jigix ca' jihuñhuip je tzaachypi. Per co uucmajch, chi jihui'ñybijc co ca' y'oy'uucniy.

³⁵ E co anajty ajcxy yajcruutzpety Jesús, chi je soldadtijc suerte ijxy, pín jëbi ocjë'adyii Jesús yhuit, chi ycijxy yca'pxy jadu'n nej je profeta cojaay jecy'ajty: “Yajhuäcxipy ajcxy ñich nhuit e miid ñich nhuit ycixpi ixipy ajcxy suerte.” ³⁶ E jim anajty ajcxy ññaaygixy cuend'ajtcixy. ³⁷ Je xihuín ayuc huidibi ajcxy yjaay ma Jesús ycöduu jadu'n yminañ: “Jadayaabi je' Jesús, je judíos ajcxy je yrey.”

³⁸ Quipxy miid Jesús ajcxy yajcruutzpejty metz meetzpi. Tüg a'oy'amy, e jadüg anajty'amy. ³⁹ Je mayjäy huidibi ajcxy naxiıyb anajty ma Jesús, ooy anajty oy ycojigiñ, nixıgy yajxıgy ajcxy Jesús, ⁴⁰ ymina'ñ ajcxy:

—Bah, miich huidibi Dios ytıjc jidaanı, e codugiıg xıı huıngbi myajpidıga'ñ. Miich ci'm cham naygohuäni, e minac cruudzcıxy, pen janch miich Dios xy'ung'adyii.

⁴¹ Nañ jadu'n je teedy ajcxy huidibi miitungmiidpi, etz je escribas, etz je fariseos ajcxy etz je mijjäydıjc nixiıcy yajxiıcy ajcxy Jesús, ñayñimáayıgıxy miñ xyıpy:

⁴² —Huıngbi ti cohua'ñ, e ca' jaty nej ci'm ñaygohua'niıyb. Pen janch co yi' jējıty je Cristo je Israel jäy rey, huen minacy jadachambi ma cruudz, huin'it nmıbjıcm. ⁴³ Yı' ti pidägy ymıbjıcm ma Dios; huen jadachambi je Dios yajnidzögyii, pen janch Dios chogyii; yı' ti ymina'ñ co Dios y'ung'adyii.

⁴⁴ Nañ jadu'n je metzpi meetzpi ajcxy huidibi cruudzpejt quipxy miid Jesús nixiıcy yajxiıcy ajcxy ooy Jesús.

Jesús y'ögy cruudzcıxy

⁴⁵ Co ycuıcxııııy, chi ycoodziyday tüg'ócy naaxhuiñybi. E jadu'n je naaxhuiñybi y'ıjty coodz, ixtı minacy yxıı. ⁴⁶ Huin'ıty Jesús ycapxyqueecy janch mic yminañ:

—Elı, Elı, ¿lama sabactani? —yı jadu'mbi ayuc hue' yhuımbıdzımy: Dios Teedy, Dios Teedy, ¿tı co ti xy'ixmachıch?

⁴⁷ Nıjējıty jäy huidibi anajty jım yajpatp huıngon ma Jesús co jadu'n midoogıxy Jesús y'ayuc, chi ajcxy yminañ:

—Jadayaabi yēydıjc cham yaaxtaayb je profeta Elıas.

⁴⁸ Huin'it nidüg jäy ñıcy janch poyıgy etz oy yajtzoñ je pixy. Chi je pixy yajxoogy miid je xun vino. Chi pidacy je pixy ma je paxyıjı. Chi yujctıy ma Jesús y'ahuac co huen ügy. ⁴⁹ Huin'it nıjējıty ajcxy yminañ:

—Ixmatz, tzoc ajt oc'ıxım, pen nimiinı Elıas, pen janch yajnidzögyii.

⁵⁰ Jadüg'oc Jesús yaaxqueegy janch mic. Chi oy y'o'cni. ⁵¹ Co Jesús y'o'cy, tım huin'ıty jım ma Dios ytıjc je mapxy yhuıt ycııtzhua'cxy tinä'amy. E nañ jadu'n je naaxhuiñybi ooy chuyuy miid uıx micpi etz je mijjatycaa oy jııtzhua'cxy. ⁵² May öcpi jut y'ahuach etz yjugypıjcy mayjäy tııbi anajty y'o'ccıxy tııbi anajty mıbjıccıxy Dios. ⁵³ Co Jesús yjugypıjcy, chi je may'öcpi tııbi anajty jugypıjccıxy etz tııbi anajty pidzımgıxy ma öcpi jut, chi ajcxy ytıgıy ma je Dios ycaıp, je Jerusalén. E mayjäy ajcxy ıjxy. ⁵⁴ Co je mic uıx oy ñaxy etz jac tıjaty anajty ti ytuñyii ti yjadyii, chi je capitán etz miid jadyii ymıgügtıjc huidibi anajty cuend'ajtp Jesús ooy ajcxy chıgıy yjıhui, e minangıxy:

—Janch tıy'ajt co yjıııbi yēydıjc Dios yı' anajty y'ung.

⁵⁵ May anajty nañ jadu'n töxyjäydıjc ymıj'ıjxcıxy jıguem huidibi anajty ajcxy Jesús ti miıddzoon jım Galilea. Yı' anajty ajcxy Jesús ypubejtp. ⁵⁶ E ma je' ajcxy jım anajty choonıty, María Magdalena, María huidibi Jacobo etz José ytaj'ajtpy, etz je huidibi Zebedeo y'ung ytaj'ajtpy.

Jesús yajnaaxtıgııy

⁵⁷ Co oy chuu'ııyñı ycoodziıyñı, huin'it choon ma Arimatea tüg comeeñjıy huidibi yxıı José. E je' ymıjncıxpejty anajty Jesús. ⁵⁸ Chi José ninıcy Pilato oy pıjctzou Jesús ñinıcx. Huin'it Pilato pidacy y'ane'mın co huen möyii. ⁵⁹ Chi José ycıdıgııy Jesús ñinıcx. Chi huınmojch miid tüg poob sáana. ⁶⁰ Chi yajnaaxtıgıy ma je yci'm jut jemybi huidibi anajty ti yajtzejtztüty ti yajpädüty ma tüg tzahuıgueetz. Chi adıguejctıjcy je öcpi jut miid tüg tzaa. ⁶¹ Chi José ñıcxni. E jım yhui'my María Magdalena etz je jadügpı María, y'ıñay ajcxy ymıhuıngon öcpi jut.

Je cuend'ajtpı ajcxy ma Jesús ñaaxtıgııy

⁶² E com jabom ma anajty Jesús ıxııybi ti y'ögy, ma anajty ti ni'ıxıydäy miid je sábado xıı ycıxpi, chi je teedy ajcxy huidibi tungmiid etz je fariseos ajcxy ñayyöymıjci ma je Pilato. ⁶³ Chi ajcxy yminañ:

—Huindzin, yi' hich ajcxy njäymejchpyich co je aniidacpi yminañ ma anajty yjuugyity co codugiig xii jugypiga'ñ jadüg'oc co anajty ti y'ögy. ⁶⁴ E paady tunmay'ajt quexipy soldados ajcxy ma Jesús ti ñaaxtigiy huen cuend'ajtcixy ixti cooni tugiig xii bi paadipy. Ca' yjegyity co ñiminiib adzuum agoodz je' ajcxy huidibi mijnicxpejtíp etz tzimguëgipy ajcxy Jesús ñinicx. E chi nicxy jäy ymina'ñ: “Ti yjugypicy je öcpi.” Chi anajty jac'anaxy je anii ti yjajtni ca'ydi je jayjipi.

⁶⁵ Chi Pilato ajcxy nimay:

—Miich ajcxy miid tüg picy soldados huidib cuend'ajtp ma miich ajcxy. Nicxcix miich ajcxy yaj'adujccixy je öcpi jut, jadu'n nej m'a'ixiiygixy.

⁶⁶ Chi ajcxy choni ma je Pilato. Chi ajcxy quejxy je tüg picypí soldados ma je öcpi jut. Chi ajcxy pidacy ijxhui'min ma je tzaa huidibi ajcxy je jut yaj'adiguejctujcy.

28

Co Jesús yjugypijcy

¹ E com jabom co yximiy yticxiy je domingo xii, huin'it ñicxy María Magdalena etz je jadügpi María ma Jesús ñaaxtigiy. ² Chi tüg mij uix ñajxy. Huin'it ycidacy Dios tüg y'ángel huidibi tzomb tzajpjoty. Chi jidigejcy je tzaa ma je öcpi jut aguu. Chi y'ixtacy ma tzaa nicx. ³ Janch adixcp je ángel anajty yhuinjip jadu'n nej huidzuc, e je yhuit janch poob'ögy. ⁴ E co je soldados ajcxy ijxpaty je ángel, chi ajcxy ooy chuyuygooty. Chi ajcxy yhui'my jahuengi ögy. ⁵ Huin'it je ángel y'adzooy je metz töxyjäy:

—Ca' miich ajcxy mdzigiy. Hich nejhuüyich co miich ajcxy m'ixtäy Jesús je huidibi ajcxy yajcruudzpejty. ⁶ Per ca' je' cham ya. Ti je' yjugypicy, jadu'n nej yminañ. Min miich ajcxy oc'ix ma ñaaxtigiy. ⁷ Nicx miich ajcxy jottigooyb ma je' ydiscípulos ajcxy e nima': “Ti Jesús yjugypicy jadüg'oc, e yi' ñicxip jim Galilea e jim ajcxy mmidnaybadiiyb.” Hich miich ajcxy yam nnimaaygixy.

⁸ Huin'it je töxyjäy ajcxy choon janch poyigy ma anajty ti ñaaxtigiy Jesús. Chi ajcxy ñicxy miid tzigi'ñ, per agujc jotcuyc. Poyigy ajcxy oy tiy'ajt yecy ma je discípulos ajcxy. ⁹ E jim anajty je metzpi töxyjäy ytüyöy, timetini Jesús ñayguëxici ma je' ajcxy yhuinduu. Chi Jesús ajcxy capxocxy. Chi je' ajcxy mihuingoñ Jesús etz mineeni je' ytecy. Chi ajcxy huindzigiygixy. ¹⁰ Jesús minañ:

—Ca' mdzigiygixy. Nicx miich ajcxy nima' je nmigügtijcich co huen ajcxy nicxy jim Galilea, e jim naybadiiybich miid yi' ajcxy.

Huidibi ajcxy je soldadotijc ñigapx

¹¹ E tüyöybñi anajty je töxyjäy nimetzpi co nijejity je soldados ajcxy choon ma Jesús ñaaxtigiy ñicxy jim Jerusalén, miidmiydäga'ñ je teedy huidibi tungmiidpi nej anajty ti ytuñyii ti yjadyii ma Jesús ñaaxtigiy. ¹² E huin'it je teedy ajcxy ñayyöymujctayi miid je mijjäydijc, tunaangixy quipxy capxy. Huin'it je teedy ajcxy etz je mijjäydijc moy ajcxy je soldados may meen. ¹³ Chi ajcxy nimay:

—Miich ajcxy mina'nip co maab anajty miich ajcxy mijcoodz co ymiiñ Jesús ydiscípulos ajcxy etz tzimgueeci Jesús ñinicx. ¹⁴ Etz pen ymidooyb anajty yi gobernador, hich ajcxy ngapxjotcidägich, jigix ca' nej xytúngixipy.

¹⁵ E huin'it ajcxy je soldados ycidigiyi je meen. Chi ajcxy ñicxy cuyduñ jadu'n nej anajty ajcxy ti ñimäyii. E ixti chambaad jadu'n judíojäy capx je ayuc.

Huidibi Jesús yajnibijc ydiscípulos ajcxy

¹⁶ E jadu'n ajcxy ñicxy je nimajctügpi Jesús ydiscípulos ajcxy jim Galilea. Chi ajcxy ñicxy ma je cögop jadu'n nej anajty Jesús ti ñimäyigixy. ¹⁷ E co ajcxy ijxpaty Jesús, chi ajcxy oy huindzigiy. Per jim nijejity huidibi ca' mibijcy co anajty yjējity. ¹⁸ Huin'it Jesús ymijhua'cy ma yi' ajcxy, e nimay:

—Hich ti nyajmöyich je cötujcin jiiby tzajpjoty etz ya naaxhuiñ. Hich ti nyajmöyich je mij cötujcin, jaydēbi n'ane'myich jiiby tzajpjoty etz ya naaxhuiñ. ¹⁹ E paady nicx

miich ajcxy huindu'my naaxhuiñ capxhuäxcix je ayuc, jaydëbi jäy ajcxy xymibigipyich. Tüg'óciy jäy ajcxy huidibi xymibijcpich myajñbedipy ajcxy miid Dios yxii, Dios y'ung yxii, etz miid je Espíritu Santo yxii. ²⁰ Miich ajcxy myaj'ixpigipy je mayjäy co copicy cuydunipy ajcxy ñich ngötujcin tüg'óciy jadu'n nej ti n'ane'myich miich ajcxy. E miich ajcxy mnejhuiiyb co nmiid'ityich miich ajcxy huinixii huinitiempo, ixti mabaad naaxhuiñybi anajty ycixpi ytigooy. Jibaad ycixy. Amén.

SAN MARCOS

Jaayhui'my Jadu'n Nej Jesucristo Ytun Yjajti

¹ Jadu'n oga'n chondacy je oybi ayuc tiy'ajt jadu'n nej Jesucristo, je Dios y'ung ytun etz yjajti.

² Je Dios y'ayucnajtzcaxxiybi je Isaías jecy'ajty jayhui'my jadu'n nej Dios nimay je Cristo:

Nguexaamyich iich ngogapxy jayijp ma nidüg nidüg cajp ma miich mnicxa'n jac'axam, jigix jëb je cogapxy nimähuipy je jäy ajcxy co huen nayni'ixiiyigixy ma yjot yhuinma'n miid miich ycixpi, jadu'n nipaady nej jihuiy jäy ajcxy ni'ixiy tü'aa co tüg rey yjada'n.

³ Nañ jadu'n jadüg it Isaías jayhui'my jada ayuc ma jadu'n yminañ:

Jim migtigüduum jäy ajcxy midoy co tüg jäy y'ayuccapxhuäcxy, jadu'n yminañ: "Nayni'ixiiyigix ma mjot mhuinma'n ajcxy jaydeb naybaatim miid ajt nHuindzin Dios. Ixmájtzcixy yi mjibicjot mjibic-huinma'n. Jadu'n nipaady nej jäy ajcxy yajtiy tü'aa huidibi ooy y'adijy y'a'och."

⁴ Jim migtigüduum anajty Juan je Bautista miñ e ytiigiy mayjäy yajniibejtpi. Chi Juan capxhuäcxy Dios y'ayuc ma je mayjäy ajcxy huidibi anajty mimb niibejtp. Juan ayuc capxhuäc co copicy co jäy ajcxy huen jothuimbjtcixy etz ixmájtzcixy ajcxy je yjibichuinma'n, etz niibejtcixy, jigix jëbi Dios yhuinmecxiib ajcxy ypocy. ⁵ Tüg'óciy je mayjäy ajcxy huidibi anajty tzinaayb jim Judea ñaaxjot etz jim Jerusalén mimb anajty ajcxy ma Juan, e y'amidoo'ijty anajty ajcxy je'y'ayuc. Co je jäy ajcxy capxidziimy nej anajty ypocytungixy, chi Juan yajniibejty ajcxy ma je Jordán mijni.

⁶ Juan hue' anajty yhuit'ajtpy camello nibijc, e nañ jeyim anajty miid ñayhuiñiyi, e hue' anajty yjicx'ajtpy mu' etz uxpäg. ⁷ Juan ycapxhuäcxyp anajty Dios y'ayuc ma je mayjäy, e yminañ:

—Hich jayijp ti nmiñich ngapxhuäcxy Dios y'ayuc. Jac'axam minipy tüg jäy huidibi jacniği mic'ajt miidity ca'ydi iich, ca' xypaadyich nicxy nguejyich yi' ycighuin. ⁸ Hich ti nyajniibetyich miich ajcxy miid ni. Per je jäy huidibi yjacmiid Dios ymic'ajt, ca'ydi iich. Yi' xyaj'adigihuiy xyajjotigihuiy Dios yjihui'n ymic'ajt, jadu'n nipaadip nej jihuiy xyajniibedip miid Dios yjihui'n ymic'ajt.

Co Jesús niibejty

⁹ Je huin'it xii huin'it tiempo Jesús choon ma je cajp huidibi yxii Nazaret, jim Galilea ñaaxjot, e ymiñ ma Juan el Bautista anajty yajpaady. Huin'it xii Juan yajniibejty Jesús ma je Jordán mijni. ¹⁰ Pidzimb anajty Jesús ma je mijni, e tim huin'ityi Jesús iix co je tzajp anajty y'ahuäch, e iix je Espíritu Santo choon tzajpjoty, e ycidägy ma yi'. Jadu'n je Espíritu Santo yquëxgy anajty nej tüg muuxy. ¹¹ Chi Jesús midooy capxy ayuc choon tzajpjoty, nimäyit:

—Hich miich n'ung'ajtpy. Ooy iich miich ndzocy njihuüy. Ooy jotcuyc nayjihuiyijich miid miich.

Je mujcu' tuñ ijxta'ni ma Jesús

¹² Huin'it mic'amy je Espíritu Santo yajnicxy Jesús migtigüduum. ¹³ E hue' Jesús yhui'miy jim migtigüduum huixchiguipx xii ahua'n iyujc agujc. Huin'it je mujcu' jot'ijxy yhuinma'n'ijxy je Jesús. Chi je ángeles ajcxy miñ ypubejty ypuđigiyy je Jesús.

Jesús ytung yajtzondägy jim Galilea

¹⁴ Ti anajty Juan yajpidägy pujxtigoty, jac'axam Jesús ñicxy jim Galilea. Jim Galilea Jesús capxhuäcxy Dios y'ayuc etz yi Dios y'ané'min. ¹⁵ Jesús yminañ:

—Ti je xii je tiempo yhuaad'ajtni. Ti nigoody je xii je tiempo mina Dios pidäga'ñ yi' y'ané'min ya naaxhuiñ. Jothuimbijtcix ajcxy, etz ixmajtcix ajcxy mji bicjot mji bic-huinma'ñ. Mibijccix Dios y'ayuc jadu'n nej jëb ajcxy m'alma ñidzögipy.

Jesús huodzoñ midaax jäy huidibi anajty acxmajtzp

¹⁶ Jesús huidijtp anajty ma je mejypa' huidib yxii Galilea mejy, co oy'ijxpaady Simón etz y'uch Andrés. Simón etz Andrés acxmadzii anajty ytung'ajtpy, ytimpidacpy anajty y'acxmadzi'ñ mejyjoty co ajcxy Jesús ixpaty. ¹⁷ Chi Jesús nimay Simón etz Andrés:

—Min miid iich. Hich miich ajcxy huingbi tung nmöhuipy. Jadu'n mdung nipaadip nej jihuiy mjäymájtzcixipy.

¹⁸ Mic'amy Simón etz Andrés ajcxy ixmajch y'acxmadzi'ñ, e ñicxy ajcxy miid Jesús.

¹⁹ Chi Jesús yjacyöy anajty hueen, e ixpaty Jacobo etz y'uch Juan, je Zebedeo ajcxy ymang. Je Jacobo etz Juan tumb anajty barcojoty. Hue' anajty ajcxy yaj'oyiib je' y'acxmadzi'ñ. ²⁰ Chi Jesús mijhuooy ajcxy Jacobo etz Juan, e nimay co huen nicxy miid yi'. Mic'amy je' ajcxy ixmajch yteedy, je Zebedeo, barcojoty miid ytumbi, chi ajcxy ñicxy miid Jesús.

Tüg jäy huidibi anajty jibic espíritu miid

²¹ Huin'it Jesús miid ymigügtijc yja'ty jim Capernaum. Je huin'it sábado, je pooxin xii, Jesús ytigiiy ma je judíojäy ajcxy ñaymujctac jim Capernaum, chi yjäyyaj'ixpijctzondacy.

²² Je mayjäy ooy ajcxy jihuiy huinmay je ayuc huidibi Jesús anajty ajcxy yaj'ixpijcp. Com Jesús hue' anajty yaj'ixpicy jadu'n nej jihuiy yci'm'ané'min miidity. Ca' Jesús anajty yaj'ixpicy jadu'n nej je jäy ajcxy huidibi yaj'ixpijcp anajty Moisés ycötüjcin je jécyip.

²³ E ma je naymujctac tüg yëydijc huidibi miid anajty ca'oybi. Chi je ca'oybi ooy mic ycapxcoody, e yminañ:

²⁴ —¿Ti co xy'amayiy iich ajcxy, Jesús huidibi tzomb jim Nazaret? ¿Nej ti mmiñ co xyajhuindigoyángixyichi? Hich n'ijxcajpy miich, e nejhuuybich co miich je' je Huätzpi Dios.

²⁵ Chi Jesús ix'ojy je ca'oybi, e nimay:

—Amon miich, e pidzimb ma jada yëydijc.

²⁶ Huin'it je ca'oybi yajyajch yajquidy je yëydijc, e mic yaaxqueegy, e ypidzimy ma je yëydijc. ²⁷ Tüg'óciy je mayjäy jii by ma je naymujctac ooy ajcxy ñay'adzigiyyi, e ñayñimaayi ajcxy miñ xyipy:

—¿Ti jada' yi'? Jada yëydijc ymiid jemybi ixpijcin. Yi' miid mic'ajt etz ane'm'ajt, paady ycixpi yi' ane'my yi' ca'oybi, e ycapxmidoohuip.

²⁸ Mic'amy je mayjäy ajcxy huidijaty tzinaayb ma tüg tüg cajp jim Galilea nejhuuy ajcxy nej Jesús ytuñ, e cömaaygixy Jesús.

Jesús yajtzögy Simón Pedro ymiid töxyjäybi

²⁹ Tim huin'ítty Jesús ypidzimy ma je naymujctac, chi ñicxy miid Jacobo etz Juan jim ma Simón etz Andrés ytijc. ³⁰ Simón ymiid töxyjäybi píjcp anajty. Cijx'am anajty y'ity, e mic anajty ooy ytoyii. Tim huin'ítty Jesús ñimaayi co Simón ymiid ooy mic ypigyii. ³¹ Chi Jesús nimijhuägy je pa'mjäy. Chi majtzi yci', e huijtzägy. Tim huin'ítty yi' toyii y'ixmajtzi, e chi yajcay yaj'uucy Jesús etz ymigügtijc.

Jesús yajtzögy may pa'mjäy

³² Co xii oy ycidacni, e chuu'iiyñi, chi je mayjäy miid miñ ajcxy ma Jesús tüg'óciy pa'mjäydijc, etz huidijaty ajcxy ca'oybi ymiid. ³³ Tüg'óciy je mayjäy ajcxy ma je jimbi mij cajp nimujcy je tijc ma Jesús anajty ti yjättägy. ³⁴ Jesús yajtzoctay tüg'óciy je may pa'mjäy huenytimyitiibá'mity, etz yajpidzimy may ca'oybi majaty jäy ajcxy. Per Jesús ca' anajty a'ixiy nicxy je ca'oybi ñigapxyii, com y'ixy'ajttaayb anajty ajcxy Jesús.

Jesús y'ayuc tiy'ajt capxhuäcxy jim Galilea

³⁵ Tm mooñi Jesús ymaybidígy, ca' anajty yxiiñiñi, e ypidzimy ma je cajp. Chi ñicxy ma tüg migtigüduum Dios mibijctzoobi. ³⁶ Huin'it je Simón etz je ymigügtijc ooy ajcxy ja'ijxtäy Jesús. ³⁷ Co ajcxy paty je Jesús, chi ajcxy nimay:

—Tüg'óciy je mayjäy xyjadim'ixtäy.

³⁸ Chi Jesús nimay Simón etz je ymigügtijc ajcxy:

—Tzoc ajt jámim ma yi jacjadyii cajp huinduy agonbi, jaydeb ngapxhuäcxibich Dios y'ayuc nañ jadu'n ma yi jäy ajcxy jim. Paady ycixpi ndzooñich tzajpjoty, jigix jëbi ngapxhuäcxibich Dios y'ayuc.

³⁹ Jesús nicxp anajty ma nidüg nidüg cajp jim Galilea ycapxhuäcx anajty Dios y'ayuc ma nidüg nidüg judíojäy ñaymujctac, e yajpidzimy anajty ca'oybi majaty jäy.

Jesús yajtzögy tüg jäy nibützpa'mmïdpi

⁴⁰ Tüg jäy huidibi ymiid anajty jibic pützpa'm, je micpi, chi nimijhuägy Jesús, e ycojxtinay'ahuiiy ma Jesús yhuinduu, ymiñañ:

—Pen miich jadu'n tzojcpy, jëb xyajtzögich.

⁴¹ Chi Jesús pa'ayoy je pa'mjäy, e pidacy yci' ma je pa'mjäy ñinix, e ymiñañ:

—Ndzojcpyich, cham nyajtzögy.

⁴² Co Jesús jadu'n ymiñañ, chi mic'amy je jäy huidibi anajty miid je jibic püdz chögy.

⁴³⁻⁴⁴ Mic'amy Jesús ycapxcijxy miid je jäy huidibi anajty ti chögy, e nimay:

—Ix pin myajnimäy co ti mdzögy. Nicx jayijp jiiy ma Dios ytijc ma je judío teedy ajcxy, e mo' Dios yhuindzigi'ñ jadu'n nej Moisés ycötújcín ane'my, jigix jëbi huadz mbidzimipy ma Dios ycötújcín. Cuydun miich huidibi Moisés ñajtz'ane'miyy jecy'ajty, jigix jëbi je mayjäy ajcxy nejhuñhuip co ti mdzögy.

⁴⁵ Per je yëdijc ca' capxymidoy Jesús. Co ñicxy, chi ytigiyy capxy yajyöybi jadu'n nej anajty ti yajtzögyii. Com je mayjäy nejhuñhuip huidibi anajty Jesús ti tuñ, paady ycixpi Jesús ca' anajty ocjajtni nej ytigihuiy iyna' jigüe'xna' majaty cajp. Hue' anajty huidity ma ca' pin chinäy. Per miñ anajty y'oy'ixyii huenytmypinjäyity, chooñ ma nidüg'óciy cajp huinduy agonbi.

2

Jesús yajtzögy tüg jäy cïma'tpi tecyma'tpi

¹ Ti anajty xii tiempo ñajtzñinixiiñi co Jesús yhuimbijty jadüg'oc jim Capernaum. Je mayjäy ñejhuñhuip anajty co Jesús yajpaady ma tüg tijc. ² Chi mic'amy mayjäy ñayyöymujci ma anajty Jesús yajpaady, e ca' anajty tigiydac ma je tijc, miid co tzach mayjäy anajty ti miingixy. Y'adujctaayb anajty ajcxy je tijc'aguu. E Jesús ycapxhua'xyp anajty Dios y'ayuc. ³ Huin'it xii, midax yëdijc ciymiñ cijx'am ma Jesús yajpaady tüg pa'mjäy huidibi yci' ytecy ti yxujxtäy anajty. ⁴ E com ca' anajty ni nej y'oyiy nej yajjadip ajcxy ma Jesús je pa'mjäy, je' co anajty chach újtzity je tijc miid je mayjäy, chi ajcxy yajcöhuaach hueeni je tijcnix ma anajty Jesús yajpaady. Chi ajcxy cödiyñajxy je pa'mjäy cijx'am. ⁵ Co Jesús ijxy je jäy ajcxy ymibijcin, chi nimay je pa'mjäy:

—Migügich, yi mbocy ti yajhuinmecxtäy.

⁶ Per nijëjity huindzindijc huidibi ajcxy nijaydutp anajty Dios ñecy co ajcxy midoy nej Jesús ymiñañ, chi ajcxy ymiñañ jotjoty huinma'ñyoty: ⁷ “¿Nej co jada jäy jadu'n ymiñañ co ti yajhuinmecxy jada pa'mjäy ypocy? Capxtigooyb yi' miid Dios. Com ca' nipinjäy jëb ypocyhuinmecxy. Tügpaic Dios yi' huidibi jëb ypocyhuinmecxy.” ⁸ Per Jesús ñejhuñhuip anajty nej je' ajcxy chachmiñañ jotjoty huinma'ñyoty, paady mic'amy ymiñañ:

—¿Na'amy co mdzachhuinmaaygixy? ⁹ ¿Huidibi jada jac'ooy co nnimäyich yi pa'mjäy: “Ti mbocy yajhuinmecxytäyi.” O jac'ooy co nnimähuibich: “Pidig, e yajpidig yi mdögy, e tüyöy?” Tú'ciy yi'.

¹⁰ Chi Jesús yjacmiñañ:

—Jadachambi janchtiy nyajquëxíga'ñich co ñich, je jäy huidib tzoon tzajpjoty, e huidibi cham yajpaady ya naaxhuiñ, nmiidich mic'ajt jaydeb nhuinmecxyich jäy ypocy.

Co Jesús jadu'n yminañ, chi nimay je pa'mjäy huidibi yci' ytecy anajty xuxy:

¹¹ —Ñich miich yam jadu'n nimäy: “Tinayig, yajpidig yi mmabejt e nicx ma mdiç.”

¹² E mic'amy je pa'mjäy ypidigy, e yajpidigy ymabejt, chi ytüyöchoñ jüby ma je mayjäy ajcxy anajty y'ixy yhuindicxy. Paady ycixpi tüg'óciy je mayjäy ooy jihuüy huinmay etz jäymejch ojadajty ajcxy Dios, yminaangixy:

—Niminaabi ajt jadu'n nga'íxim mijhuinma'ñ jadu'n nej cham ti n'íxim.

Jesús nimay je Leví: “Pajamgich”

¹³ Chi jadüg'oc Jesús ycajppidzimy, ñicxy jim ma mejypa'. E co mayjäy ñayömuçy jim ma Jesús anajty yajpaady, chi Jesús yaj'ixpiç je mayjäy. ¹⁴ Co Jesús yjactüyöy anajty, chi ijxpaady Leví je Alfeo ymang. E Leví ññaayb anajty ma je yajcogüejttac jäy yajcogüejtp anajty. Chi Jesús nimay Leví:

—Pajamgich.

Tim huin'ítüy Leví ytínayigy, ixmajch ytung, e panicxy Jesús.

¹⁵ Jadu'n yjajti co tüg xii Jesús caayb anajty me Leví ytijc. Mayjäy huidibi ytung'ajtpy anajty yajcogüedii, etz jacjadyii jäy huidibi anajty tundigooyb miid judío jäy ycostumbre y'ñaaygixy ma je caydac quipxy miid Jesús etz je' ydiscípulos ajcxy. Com may jäy anajty ooy Jesús tzach miid huidíjtçixy. ¹⁶ Jim anajty ma Leví ytijc nijëjity fariseojäy, je huindzindijc huidibi tzach padumb judíoçäy ycostumbre. E co je' ajcxy ijxy co Jesús caayb uucp anajty tügmucy miid tüg'óciy je mayjäy ajcxy huidibi tundigooyb miid judíoçäy ytiy'ajt ycötúçin, etz yajcogüejtpidijc, chi ajcxy miçapxy Jesús ydiscípulos, je' ajcxy huidibi mijnicpejtp anajty Jesús, nimay ajcxy:

—¿Nej co Jesús miich ajcxy mHuindzin ycaymucy y'ucmucy miid yi yajcogüejtpidijc ajcxy, etz jacjadyii jäy ajcxy huidibi tundigooyb miid judíoçäy ycötúçin?

¹⁷ Co Jesús jadu'n midoy nej je fariseo jäy nigapxyii, chi ajcxy nimay:

—Ca' tzocy tzoymumbi yi jäy ajcxy huidibi mic'ajtp oy'ajtp. Yi' janchtiy yi huidibi ajcxy yuuba'm ymiid chojçpy ajcxy tzoymumbi. Nañ tim jadu'n yi jäy ajcxy huidibi ca' ypocymiidity, ca' ajcxy tzocy pocyhuinmeecxin. ñich ti nmiñich co nyajjothuimbidipyich pocyjäydijc. ñich ca' ti nmiñich co nyajjothuimbidipyich oyjäydijc tudägyjäydijc.

Jesús yaj'amidoogixy nej co jäy y'ity jaygay

¹⁸ Jadu'n yjajti tüg tiempo ayuu'ijtp anajty je jäy ajcxy huidibi mijnicpejtp anajty Juan je Bautista. Nañ jadu'n ayuu'ajtp anajty je fariseojäy ajcxy. Chi nijëjity ajcxy ymiñ ma Jesús e amidoy:

—¿Nej co yi jäy ajcxy huidibi mijnicpejtp ajcxy Juan etz nañ jadu'n yi fariseojäy ajcxy ayuu'ajtp ajcxy, e je jäy ajcxy huidib miich xymijnicpejtp, ca' y'ayuu'ájtçixy?

¹⁹ Chi Jesús y'adzooy:

—Co ya nyajpaadyich ya naaxhuiñ, ca' ycopicity co ñich ndiscípulos ajcxy y'ayuu'adip. Jadu'n nipaady nej jäy ajcxy huidibi píçin nixiidumy ca' ajcxy y'ayuu'aty ma yam yi píçin nixiiduñ, e peni ca'ni je píçpi ymigügtijc y'ixmajtztäyü. Nami je píçpi ca'ni choñ, chi ca' pin y'ayuu'ada'ñ huidibi nixiidum je píçin. ²⁰ E paadip je xii je tiempo mina ca' nmiid'ida'ñich ya naaxhuiñ yi' huidibi ajcxy xymijnicpejtpich, e huin'it ajcxy y'ayuu'adaangixy.

²¹ Com jemybi Dios y'ayuc nyaj'ixpicpyich, paady ca' ytüggy miid je jéçyç ayuc huidibi je fariseo jäy ajcxy yaj'ixpiçpy. Jadu'n nej miich ajcxy mnejhuüy co ni pin ca' agiygy tuc huit miid tüg pedas jemy huit, con je' co je jemy huit niimujçp je', e chi niçi najtçiidzihuip je tuc huit. ²² E nañ ni pin ca' jëb huaad pidägy jemy vino ma tuc cochac. Je' co je vino jemybi yciidzamy je tuc cochac, e chi y'ixyoçtähuip je vino etz je cochac ñitigoydähuip. Hue' janchtiy jëb ajcxy pidacy jemy vino ma jemy cochac.

Je discípulos ajcxy yajmújcixy je moc cojc sábadó xii

²³ Tüg sábadó xii Jesús miid ydiscípulos ajcxy ñaxiiy ma tüg trigo cam. E huin'ítiiyi je ydiscípulos ajcxy ytiigiijy je trigo tujcp. ²⁴ Co je fariseo jäy ajcxy ijxy jadu'n nej Jesús ydiscípulos ajcxy anajty tujcmujc trigo tiim, chi ajcxy nimay Jesús:

—Ix miich. ¿Na'amy co miich mdiscípulos túngixy huídibi judío ycötújcín capx'adujcxy sábadó xii?

²⁵ Per Jesús yminañ:

—¿Nej ca'miich ajcxy mguendtuñ Dios y'ayuc co mnecycapxy, jadu'n nej David ytuñ tügtecy jecy'ajty, co David etz ymigügtijc yuu'ögaangixy anajty? ²⁶ Je huin'it tiempo jecy'ajty co je judío teedy Abiatar miitungmiidpi anajty ma Dios ytijc, chi David ytiigiijy ma Dios ytijc, e caay je tzajcaagy huídibi ti anajty yoxy ma Dios yhuinduu. Dios ycötújcín yminañ co je teedy ajcxy ycaagy'ajtpy jada tzajcaagy, ca' jac'ooyñipín. Nañ jadu'n David moy je tzajcaagy je jäy huídib anajty ajcxy ymiid.

²⁷ Nañ jadu'n Jesús yjacminañ:

—Iich, je jäy huídibi tzoón tzajpjoty, nmiidich ané'mín, jaydeb nimäyich je jäy ajcxy ti jëb túngixy sábadó xii. ²⁸ Com Dios ti ixmach je sábadó xii, paady ycixpi, iich je jäy huídibi tzoón tzajpjoty, nmiidich ané'mín jaydeb nimäyich jäy ajcxy co jëb tijaty tuñ sábadó xii.

3

Je yëydijc huídibi anajty yci' tãdzip

¹ Jesús ytiigiijy jadüg'oc ma je judío naymujctac. Jiiby anajty tüg yëydijc huídibi anajty ymiid tüg yci' tãtz. ² Je fariseojäy jiiby ma je naymujctac y'ijx'ijtpy anajty Jesús, co anajty nejhuñhua'ñ pen Jesús yajtzögamy je pa'mjäy sábadó xii, jigix jëbi ajcxy xñhuip Jesús co ti ytundigoy miid judíojäy ycötújcín. ³ Jesús nimay je jäy huídibi miid tüg yci' tãtz:

—Pidig, min ya ma iich.

⁴ Huin'it Jesús y'amidoy je jäy ajcxy e nimay:

—¿Nej miich ajcxy minaangixy: Nej jëbi jada nduñich je oybi o je jibicpi sábadó xiiijoty? ¿Jëbi nyajtzögich jäy o jëbi nyajtigoyich jugy'ájtín?

Per je jäy amoñ ajcxy ijty, ca' ajcxy je' y'adzooy. ⁵ Huin'it Jesús huindixpejty je jäy ajcxy miid chip y'ahua'n, e miid jotmay, je' co ooy ajcxy jotjuuñity, e chi nimay je yëydijc:

—Xajtiú yi mgi'.

Chi je yëydijc xajtiy yci', e chi yci' oy chögy. ⁶ Chi je fariseojäy ypidzimday ma je naymujctac, ooy yjotmädy ajcxy, e ñicxy ajcxy ñaymújcip miid je jadügpiicy judío huindzindijc huídibi ymiijnixpejt je rey Herodes. Huinma'ñ ixtaayb anajty ajcxy nej jëb ocyaj'ögip Jesús.

Mayjäy ma tüg niiba'

⁷ Per Jesús chooñ miid yi' ydiscípulos ajcxy, ñicxy ma mejypa'. E ooy mayjäy huídibi ajcxy tzomb Galilea ñaaxjot etz Judea ñaaxjot panicxy ajcxy Jesús. ⁸ Nañ jadu'n mayjäy panicx ajcxy Jesús huídibi ajcxy tzomb jim Jerusalén, huídibi ajcxy tzomb jim Idumea ñaaxjot, huídibi ajcxy tzomb jim Jordán mijniñ ninaxy ma xii ypidzimyb, huídibi ajcxy tzomb jim Tiro etz Sidón ñaaxjot. Ñicxtäy je mayjäy ma Jesús yajpaady, com ñejhuñyb anajty ajcxy je mijhuinma'ñ huídibi Jesús anajty ytumyb. ⁹ Com tzach mayjäy anajty ymiingixy, paady Jesús ni'ane'mdiy ma yi' ydiscípulos ajcxy tüg barco ma jëb iñäy, ca'ty je mayjäy ooy y'adijyiyii y'agodiyii. ¹⁰ Com Jesús ti anajty yajtzögy may jäy, paady ycixpi tüg'óciy je pa'mjäy nimujcy Jesús, adzip tzachñidonaangixy. ¹¹ Co je jäy ajcxy huídibi ca'oybi ymiid ijxpaty Jesús, chi ajcxy ñayhuíjojtaci ma Jesús yhuinduu, e mic ycapxcooty, yminaangixy:

—Miich je' Dios y'ung.

¹² Per Jesús nimay mictägy je ca'oybi ajcxy co ca' huaad nigapxcixy nimiyaaccixy pin je' anajty.

Jesús huin'ixy majmetzpi discípulos

¹³ Huin'it Jesús ypejty ma tüg cögop, e capxyñiguexy co huen miñ ma yí' je ymígügtijc huidibi yhuin'ixamy co ytunam miid yí'. Chi ajcxy ymiñ ma Jesús. ¹⁴ Chi Jesús yhuin'ijx majmetz ajcxy huidibi ymiid'idamy, e huidibi yquexamy y'ayuccapxhuäcxp. ¹⁵ Jesús moy je majmetzpi discípulos ajcxy huidibi anajty ti yhuin'ixy mic'ajt jaydëb yajtzögip pa'mjäy ajcxy, e ymoy ajcxy ymic'ajt jaydëb ca'oybi yajpidzimy ma jäy ajcxy. ¹⁶⁻¹⁷ Jada je nimajmetzpi discípulos ajcxy yxiñ nidüg nidüg: Simón, je huidibi Jesús yxiimoy Pedro; Jacobo miid y'uch Juan, yí Zebedeo y'ung y'anäg, je huidibi ajcxy Jesús yxiimoy Boanerges (je ayuc Boanerges jadu'n yhuimbizimy: "Enee ymang"). ¹⁸ E jacjadyii huidib Jesús ti anajty huin'ixy: Andrés; Felipe; Bartolomé; Mateo; Tomás; Jacobo je huidibi Alfeo ymang'ajtpy; Tadeo; e je jadügpi Simón, je cananista. ¹⁹ Nañ jadu'n Jesús huin'ijxy Judas Iscariote, je huidibi agojiix cïyejc Jesús ma ymidzip.

Yajni'bijccixy Jesús co miidity mujcu' ymic'ajt

(Co jadu'n huin'ijxtaay je majmetzpi discípulos ajcxy), Jesús ytiigiyy ma tüggtijc miid yí' ajcxy. ²⁰ Huin'ítity tzach mayjäy ñayyöymújcigixy ma je tijc ma Jesús y'ity, ixti Jesús etz ymígügtijc ca' y'oyïy nej jëb ycaaygixy y'uuccixy. ²¹ Co Jesús y'amigügtijc jadu'n nejhuñiy, chi ajcxy nimiiñ Jesús yajnicxaangixy anajty mach, com hue' anajty tíjcixy co Jesús ylociib.

²² Nijëjity escribas ajcxy, je huindzindijc huidibi nijaydutp anajty Dios ñecy, miin ma Jesús co choñ ajcxy Jesusalén, yminaangixy:

—Jada Jesús ymiid Beelzebú, je ca'oybi yhuindzin, ma y'aa yjot. E yí' yajpidzimy je ca'oybi ajcxy ma jäy ajcxy yjothuinma'ñ miid Beelzebú ymic'ajt.

²³ Chi Jesús huoomiñ ma yí' je escribas ajcxy, e yajmiidmiydacy ajcxy tüg jihuimbit ayuc. Chi Jesús yminañ:

—¿Nej tiy'ajt jada nej miich ajcxy mina'ñ co Satanás jëb ci'm ñayyajpidzimyii ma jäy ajcxy y'aa yjot? Ca' tiy'ajt nej miich ajcxy mina'ñ. ²⁴ Pen tügpiicy tungmiidpi ixyipy ñaybijc-huá'cxigixy, etz ñaymidziptzoonigixy ixyipy ac jëyi. Pues cixip yí' ajcxy y'ané'min. ²⁵ Nañ jadu'n pen tügpiicy tüg juugy tüg migüg ixyipy ñaybijc-huá'cxigixy, ca' ajcxy y'idaangixy tüg mucy. ²⁶ Nañ jadu'n pen Satanás ixyipy ti ñaybijc-huäcxyii, e ci'm ixyipy ti nayñibidigyii, ca' ixyipy yí' ymic'ajt ida'ñ. Hue' janchtiy Satanás cixipy tigoyipy. (Paady ca'tiy'ájtity nej miich ajcxy yminañ.) ²⁷ Ca' ni pin jëb huaad ytiigihüip ma tüg micpi jäy ytijc etz meedzipy tijaty ymiid, pen ca' jayijp cïxoch tecyxoch je jäy micpi. Pen ti cïxoch tecyxoch ixyipy je micjäy, huin'it janchtiy mimadägipy, e píjciip tijaty ymiid.

²⁸ Janch iich miich ajcxy nimäy co Dios jëb huinmeecxip tüg'óciy pocy huidibi jäy ytúngixp etz tüg'óciy jibicpi huidibi jäy ycapxp. ²⁹ Jëyi janchtiy co pinjaty capxtigooyb miid je Espiritu Santo, je Dios yjihui'ñ ymic'ajt, ca' Dios huinmecxi nimina. Huinixii y'ida'ñ pocymiid.

³⁰ Miid co jäy ajcxy chach yminaangixy co Jesús anajty miidity ca'oybi, paady Jesús jadu'n yminañ.

Jesús ytaj etz y'uch migüexy ajcxy

³¹ Jesús ytaj etz y'uch ajcxy oy yja'ty ma anajty Jesús yajpaady. Chi Jesús ytaj etz y'uch ajcxy anajty ytinaaygixy tiba'y, e chi ajcxy capxñigüejxy Jesús. ³² Je mayjäy huidibi anajty ajcxy iñaayb jühuiditi ma Jesús, yminañ ajcxy:

—Miich mdaj etz m'uch cheeby ajcxy tiba'y miich ixtaayb.

³³ Chi Jesús yminañ:

—¿Pinjäy miich ajcxy mdijy co iich ndaj'adyii etz iich n'uch'adyii?

³⁴ Huin'it Jesús huindicxpejty je jäy ajcxy huidibi anajty iñaayb ajcxy jühuidity ma je', e yminañ:

—Tüg'óciy jada jäy ya jadu'n ajcxy nipaady nej ñich ndaj etz ñich n'uch.
³⁵ Huenyitimypinity huidibi ajcxy cuydumb yi Dios chójcin, yi' je' jadu'n nipaady nej ñich n'uch, ñich n'ajch, ñich ndzi' etz ñich ndaj.

4

Je niipi y'ijxpejt

¹ Jadüg'oc Jesús ytigiïy yaj'ixpijcpï ma mejypa'. E ooy mayjäy ymujcpejty ma anajty Jesús yajpaady. Miid co ooy anajty chachmayjäyity, paady Jesús ytigiïy ma tüg barco jahuengi mejyjoty. Jesús ññaayb anajty barcojoty, e je mayjäy ññaayb anajty ajcxy ma mejypa'. ² Huin'it Jesús yaj'ixpijcy je mayjäy miid canaag jihuimbit ayuc. Co yaj'ixpijcy, chi yminañ:

³—Amidoo'ijtcix miich ajcxy ñich jada n'ayuc. Tüg jäy chooñ niipi. ⁴ Co je niipi yhuïjpy anajty trigo tiim, chi je trigo tiim nijëjity oy ycäy tim tüguc. Chi je joon ajcxy ymiin jicxy je trigo tiim huidibi tüguc ti ycäy. ⁵⁻⁶ E nijëjity trigo tiim oycäy ma tzaanïc, ma nihueeñ oyñaax yajpaady. E je trigo tiim ca' tzip mujx je', je'co ca'anajty ooy naax mápxity. E co je xii ypidzimy, chi no'cy je trigo mang, com ca' anajty ytictz miidity naaxjoty, chi ytich. ⁷ E nijëjity trigo tiim oycäy ma apyjot. Co jada trigo tiim ymujxy, chi y'ujtz'ögtäy je trigo mang, e ca' ytïim'ajty. ⁸ Per jacjadyii trigo tiim oycäy ma oyñaax, chi ymujxy, e ytïim'ajt may'amy: tüg pi'c pajc iipxmajc oyco'ity, jadüg pi'c pajc tugi'px oyco'ity, jadüg pi'c pajc migo'px oyco'ity.

⁹ Co Jesús je miydägiï yajmay, chi yminañ:

—Pinjaty miid ytätzac, pin midohuamy, huen mido'mbicy jada ayuc.

Ti yi' ñigapxyp yi ijxpejt

¹⁰ Co je mayjäy ñicxni, e Jesús yhui'my naydüg, chi je nimajmetzpi ydiscípulos ajcxy etz jacjadyii huidib mijnicxpejt Jesús ñimijhua'cy, e amidoy nej yhuimbizimy je jihuimbit ayuc. ¹¹ E Jesús yminañ:

—Miich ajcxy jaydeb mnejhuïhuïpy huidibi Dios ñigapxpy ñimiydacpy coyüch'amy ma y'ané'min ycötújcin. Jacjadyii jäy ajcxy jihuimbit'amy nyajmiidmiydaacyich. ¹² Jadu'n jihuimbit'amy nyaj'ixpijcpyich je mayjäy, jaydeb co pinjaty ijxp, ca' ajcxy ixipy; etz pinjaty midoob, ca' ajcxy mido'mbigipy. E jadu'n ca' ajcxy yjothuimbidip, e nañ ni ycayajmeecxipy ajcxy ypocy.

Jesús najtzcapxiïy nej yhuimbizimy je niipi y'ijxpejt

¹³ Chi Jesús yjacminañ:

—¿Nej ca' miich ajcxy mhuinjihuïy jada jihuimbit ayuc? Pen ca' miich ajcxy mhuinjihuïy jada jihuimbit ayuc, ca' miich ajcxy mhuinjihuïp yi jacjadyii jihuimbit ayuc. ¹⁴ Je huidibi capxhuäcxp Dios y'ayuc, jadu'n yi' nipaady nej je huidibi niip trigo tiim. ¹⁵ Je jäy ajcxy huidibi amidoo'ijtp Dios y'ayuc, e mic'amy je ca'oybi yajpidzimy Dios y'ayuc ma ajcxy yjot yhuinma'ñ, jadu'n ajcxy nipaady nej trigo tiim huidibi cäb tüguc, e je joon ajcxy mic'amy piimujctay. ¹⁶⁻¹⁷ Je jäy ajcxy huidibi amidoo'ijtp Dios y'ayuc janch jotcujc, e miijccixy tzojccix, chi ajcxy ixmajtzi Dios y'ayuc co agapxiïyb paady, e co tzaachypi minaxy yajnaxy miid Dios y'ayuc ycipi. Jadu'n ajcxy nipaady nej je trigo tiim huidibi ti ycäy ma tzaanïc. ¹⁸⁻¹⁹ Je jäy ajcxy huidibi amidoo'ijtp Dios y'ayuc, e co ñicxni, chi jäydgooyñi Dios y'ayuc miid jotcujc'ájtin tzinaayin, etz comeeñ'ájtin etz adzójcin. Jadu'n ajcxy nipaady nej trigo tiim huidibi ti ycäy ujtzyoty, e ca' ytïim'aty miid co oy y'ujtz'ögy. ²⁰ Je jäy ajcxy huidibi amidoo'ijtp etz cöbijcp Dios y'ayuc amumdügjot etz Dios y'ayuc tumb ma ajcxy yjot yhuinma'ñ, jadu'n ajcxy nipaady nej je trigo tiim huidibi ti cäb ma oyñaax etz ytïim'aty may'amy: tüg pi'cpajc iipxmajc, etz jadüg pi'cpajc tugi'px, etz jadüg pi'cpajc migo'px.

Je lámpara ñi'ijxpejt

²¹ Chi Jesús yjacminañ:

—Co jäy ajcxy jindicxi'ñ nöctzoy, chi canan ajcxy cöjuypy miid tu'tz, ni ca' ajcxy pidacy cijxpa'tci'py, hue' janchtiy pidaaccixy ma jindicxpejt jaydeb mij ytiicxy. ²² E nañ ni ca' ni pin ni ti jeb ameech tunipy, e nicxy ycajajnejhuüy. E ca' ni pin ni ti ayüch tunipy, e nicxy ycajajnejhuüy. ²³ Pinjaty ytätzac ymiid, pin midoohuamb, huen mido'mb'ijccixy ich n'ayuc.

²⁴ Nañ jadu'n Jesús yminañ:

—Cuendtúngix jada ayuc huidibi miich ajcxy yam mmidooyb. Yi quipxi'ñ huidibi ajcxy myajquipxiyb, nañ jadu'n yi' miid Dios ajcxy xyquipxyhuimbidity, e ixti jacya-jmöhuij ajcxy huidijaty midoob ich n'ayuc. ²⁵ Pinjaty ymiid, yajmöhuij nigí, pinjaty hueen miid, yajpigipy nigí (oy ixipy hueen jadim miidity).

Je tiim huidibi yeecp ñi'ijxpejt

²⁶ Nañ jadu'n Jesús yminañ:

—Yi Dios y'ané'min jadu'n yi' nej co tüg jäy nicxy ñipy ma ycamjot. ²⁷ Chi jada' co ñiipray ñicxni ma ytijc e ymi'o'cni ymäybidigni com jabom, e jadu'n yajnaxy canaag xii tzuu. E je moc pajc mujxp je' etz yomb. Per je cogam ni ca' nejhuüy nej je moc yoñ, ma mic'ajt paady. ²⁸ Je' co yi naax ci'm mic'ajt miidity jaydeb yajyoñ je moc. Jayijp ypidzimy je moc ung, jac'axam ypidzimy yi moc pijy, e chi jada' ytiim'ajtni. ²⁹ Co je moc ymajaaní, chi je jäy ajcxy nicxy moc tzijcp, com ti yhuindiy je moc.

Ijxpejt ma je mostazi pajc

³⁰ Nañ jadu'n Jesús yminañ:

—¿Nej m'oc'a'ixiigixy yi Dios y'ané'min? ¿Ti miid n'ocyajquipyxihuibich? ³¹ Jadu'n Dios y'ané'min nipaady nej mostaza pajc huidibi tüg jäy nicxy niipy ma ycam. Yi mostaza pajc jacnigi ymútzity ca'ydi jacjadyii ujtzpajc huidibi yajpatp ya naaxhuiñ. ³² E co yajniipy je mostaza pajc, chi yoñ, e chi yeegy ooy janch mij, ca'ydi jacjadyii ujtz. E janch mij yeegy tüg'ócíy yci' y'aacx, ixti joon ajcxy pe'mb ma je yci'y'aacx y'anicíy.

Nej anajty Jesús yecy je tiy'ajt miid je ijxpejt ycixpi

³³ Jadu'n anajty Jesús yaj'ixpicy je mayjäy ajcxy Dios ytiy'ajt miid canaag jihuimbit ayuc, ixti mibaad ajcxy jeb huinjihuüy. ³⁴ Ac jihuimbit ayuc Jesús yajnimay je mayjäy. Per miid yi'ydiscípulos Jesús ycapxticxtaayb anajty je jihuimbit ayuc.

Jesús capxticx nej huimbidity je ijxpejt

³⁵ Je huin'it xii co ycoodziy, chi Jesús nimay yi ydiscípulos ajcxy:

—Tzoc ajt jámim jim'amy ahuin ma yi jadügpí mejypa'.

³⁶ Huin'it Jesús ydiscípulos ajcxy ixmajztay je mayjäy, e miid tzoñ Jesús barcojoty. Nañ jadu'n jacjadyii barco ajcxy choñ quipxy miid Jesús ydiscípulos ajcxy ybarco. ³⁷ Je huin'it coodz tüg poj miñ janch mic. E je mejy nigoo anajty y'ocpidigni. Janch tigiyb anajty nii barcojoty, jagoo jagoo yca'ujztay je barco miid nií. ³⁸ Jesús maab anajty ma je barco ijx ma tüg mabejt. Chi yajmäybidigi, e nimay ajcxy:

—Huindzin, ¿nej ca'mduñcuend co ich ajt yam nguinaanim?

³⁹ Huin'it Jesús ymäybidigy, e jijpcogapxiy je poj. Etz nimay je mejy:

—¡Amon! ¡Huäcxip!

Chi mic'amy je poj ymongidactay yhuäcxijptay jadu'ñyi. ⁴⁰ Huin'it Jesús yminañ:

—¿Na'amy co mdzachtzigixy ajcxy? ¿Nej ca' mmibijccixy co nmidich Dios ymic'ajt?

⁴¹ Jesús ydiscípulos ajcxy ooy chigiíy, e ñayñimaayi ajcxy miñ xyipy:

—¿Pin jäy jada' jada Jesús? Ooy chachmijhuinma'ñ co yi poj etz je mejy ycapxymidoyii.

¹ Chi Jesús miid ydiscípulos ajcxy oyja'tcixy ma je mejypa' ma je Gadara jäy ñaaxjot. ² Tim mic'amy co Jesús ybarcobidzimy, chi nimiin tüg jäy huidibi ca'oybi miid anajty. Hue' anajty choon ma öcpi jut. ³ Je yëydijc, ca'oybimiidpi, tzinaayb anajty ma öcpi jut. E ni pin anajty ycamimadägyii. Ni pin camimadacy nicx cixoch tecyoch jada je ca'oybimiidpi, e ni ca' ajcxy mimadacy miid cadena. ⁴ Canaag'oc ajcxy jacixojch jatecyojch miid cadena, e ypojtaayb anajty je cadena. Ni pin camihuinma'ñybaady nej jëb ocimadaaccixy je ca'oybimiidpi. ⁵ Je ca'oybimiidpi xim tzuum anajty yhuidity tüg yuugjot etz ma öcpi it, janch mic anajty yäxytinäy. E chachnayajtzaachiyi anajty miid tzaa.

⁶ Jiguëgy anajty je ca'oybimiidpi ymiin, co ijxpaty Jesús, chi poygy ninicxy Jesús, e ycojxtinay'ahuüy ma Jesús yhuinduu. ⁷ Je ca'oybimiidpi mic migapxcooty Jesús, e nimay:

—Jesús, je mijpi Dios y'ung, ¿na'amy co xymidziptzooñich? May'ajt nbijctzooybich ma Dios co ca' ich jëb huaad xychaachytuñich. ⁸ Je ca'oybi jadu'n yminañ, com Jesús ti anajty nimäy:

—Ca'oybi, pidzimb ma jada yëydijc.

⁹ Jesús y'amidooy je ca'oybi:

—¿Ti mxii?

Chi je ca'oybi y'adzooy:

—Ich nxii hue' je' "ni may", com ni may ich ajcxy huidibi yajpatp ma jada yëydijc.

¹⁰ Huin'it je may ca'oybi may'ajt pijctzoy ma Jesús co ca' ajcxy jëb huaad ixquexyii ma huingbi it lugar. ¹¹ Huingon anajty je cop ma anajty may idzim yjicxcixy. ¹² Chi je ca'oybi ajcxy may'ajt pijctzoy, e nimay ajcxy:

—Najtzquexiyg ma yi may idzim, jigix jëbi n'adigiyich njottigiyich yi may idzim.

¹³ Chi Jesús jadu'n a'ixiy co jëbi adigiyixy jotigiyixy je may idzim. Chi je ca'oybi ypidzimday ma je yëydijc, e yajtigiyday je may idzim ajcxy. Jim anajty yajpaady jahuengi mejtz mil idzim. Chi je idzim ylocjydaay, e ycögänaxtaay ajcxy ma tüg tzajijp, e oy ycädaaygixy niijoty, e chi ajcxy ñii'ögtay.

¹⁴ Je idzim cuend'ajtp ajcxy ooy ajcxy ñay'adzigiyi, e nicxtay ajcxy poygy ma ytijc. E oy nimiyaaccixy cajpjoty etz majaty tundac nej anajty ajcxy y'idzim y'öctaaygixy. Mayjäy ajcxy choñ mic'amy oy íxcixy nej anajty ti ytunyii ti yjadyii. ¹⁵ Co je mayjäy ajcxy yja'ty ma Jesús yajpaady, chi ajcxy ijxy je yëydijc huidibi anajty mayca'oybi ymiid. Ijxy ajcxy co inäy huit miid etz huijycujc, ti anajty y'oyiy. E huin'it ooy ajcxy je mayjäy ñay'adzigiyi. ¹⁶ Je jäy ajcxy huidibi anajty huindixp co anajty je ca'oybimiidpi ti y'oyiy, etz íxcixy nej ti ytunyii ti yjadyii miid je may idzim, chi yajmiydactay je maycajpyäy jadu'n nej anajty ti íxcixy. ¹⁷ Huin'it ajcxy pijctzoy may'ajt ma je Jesús, co huen tzoön ma ajcxy je ñaaxjot.

¹⁸ Co Jesús ytigiy jadug'oc ma je barco, chi je yëydijc huidibi anajty ca'oybi ti ñibidzimyii ti ycöbidzimyii, pijctzoy may'ajt ma Jesús co huen a'ixiy möhuip co huen miid'idyii Jesús. ¹⁹ Per Jesús ca' a'ixiy co ymiid'idyii, chi nimay:

—Huimbit ma mdijc etz mjugymigüg, e yajmiidmiydäg jada mijpi tung mijpi huinma'ñ huidibi je Huindzin Dios ti tuñ miid miich. Miidmiydägiipy jadu'n nej je Huindzin Dios ti xypa'ayoy.

²⁰ Chi je yëydijc yhuimbijtni, e huidijtp anajty cajp cajp jim Decápolis ñaaxjot, e nimiydactay tüg'óciy jadu'n nej Jesús ti yajtzögyii, e tüg'óciy je mayjäy ooy jihuy huinmay.

Je Jairo ñiix etz je töxyjäy huidibi Jesús yhuin nïdoni

²¹ Co Jesús huimbijty barcojoty ma je mejypa' ma anajty ti choon, chi mayjäy ymiin ma Jesús yajpaady, chi Jesús yhuäcxijpy ma je mejypa'. ²² Huin'it Jesús ñija'ti tüg mijtungmiidpi ma yi judíojäy ajcxy ñaymujctac. Je yëydijc hue' anajty xiijty Jairo. Co Jairo ijxpaty Jesús, chi ñayhuijotac ma Jesús yhuinduu. ²³ Jairo may'ajt pijctzoy, yminañ:

—Huindzin, ögaanip iich nniix. Tun may'ajt nicxy ma iich ndijc, e mgñixájip ma iich nniix, jigix jébi myajtzögip, e yjactzinähuiip.

²⁴ E Jesús nicxp anajty miid Jairo, e mayjäy panícxy anajty Jesús. E je mayjäy ooy anajty tzach'adiji'y tzach'agodi'y Jesús. ²⁵ E ma je mayjäy ymiiñ anajty tüg töxyjäy pa'm miid, jécyiñ anajty ymijtacni. Majmetz jimijt yxi ybo' anajty cujc payöy, ca' anajty y'oc-huäcxijpni je ni'py. ²⁶ Jada töxyjäy ti anajty yajtzoyduñ miid may tzoydumbi, ti anajty ymeeñ yajtundäy ma je tzoydumbi ajcxy. E je'ni anajty ypa'm'ity. Ni ti pubéjtin ti capaady, ixti nigí anajty ypa'm mijhua'n.

²⁷ Jada töxyjäy ti anajty ayuc midoy nej Jesús anajty pa'mjäy yajtzögy, paady nimiiñ etz nimijhuägy jixci'py'amy, chi nidooni Jesús yhuitpa'. ²⁸ Jada töxyjäy nayñimaayi jotjoty huinma'ñyoty: “Co nnidónibich Jesús yhuitpa', miid tim yi'yi ndzögibich.” ²⁹ Co je töxyjäy nidoñ Jesús yhuitpa', tim huin'ítiy mic'amy yhuäcxijp je ni'py. Huin'it je töxyjäy jihuiy co anajty ti chögy.

³⁰ E Jesús jihuiy co anajty ti yajtzögy tüg jäy miid ymic'ajt, paady ni'ijxhuimbijty je mayjäy huidibi anajty pamíinip, y'amidooy ajcxy:

—¿Pin iich nhuit ti xyñidoni?

³¹ Huin'it Jesús ñimaayi ajcxy ydiscípulos:

—Miich m'ijxpy co yi mayjäy xychach'adijy xychach'agodi'y, e miich mina'n: “¿Pin ti xyñidónich?”

³² Per Jesús huindicxypejty je mayjäy jühuidity ma yi', oc'ixa'n ocnejhuñhua'n pin anajty ti ñidonyii. ³³ Huin'it je töxyjäy, com ñejhuiyb anajty jadu'n nej Jesús ti yajtzögyii, paady nimijhua'cy Jesús janch tziyuyb miid tzig'iñ ñayhuiojtaci ma yi' yhuinduu.

³⁴ Jesús yminañ:

—Töxyjäy huidibi ooy ndzócyich, ti mdzögy miid co ti xymibícyich. Nicx agujc jotcujc, ti mba'm ñaxy.

³⁵ Capxp miydacp anajty Jesús miid je töxyjäy co nijéjity jäy ñimiini, choñ ma je judío jäy ñaymujctac mijtungmiidpi ytijc, e nimay je töxy'anäg yteedy:

—Yi mniix ti je y'ögy. Ca' huaad mjac'amayy nig yi Huindzin Jesús.

³⁶ Per Jesús ca' tuñcuend jadu'n nej ajcxy yamina'n, chi nimay je naymujctac huindzin:

—Ca' mdzigy, mibic nigoda'ajty.

³⁷ E ni ca' jac'a'ixiy nicxy yjacmiidnicxyii jacpinjaty. Jëda'ajty miidnicxy je Pedro, Jacobo etz Juan, je Jacobo y'uch. ³⁸ E co Jesús ytijctigiiy ma yi naymujctac huindzin ytijc, chi ijxy jadu'n nej jäy jiiby chachne'mgixy chachjiygixy chachyaaxcixy. ³⁹ Co Jesús tijctigiiy, chi nimay je jäy ajcxy:

—¿Nej co nigoo ajcxy mdzachne'mni, e mdzachyáaxcixni? Yi pi'c töxy'anäg ca' yi' ti y'ögy, maab yi'.

⁴⁰ Per nigoob ajcxy Jesús nixiicy co jadu'n ymina'n. Huin'it Jesús yajpidzimday tüg'óciy pinjaty anajty jiiby tigoty, e miid tijc tigiy jëda'ajty je ungedeedy etz ungdaj, e nañ je tugigpi ydiscípulos huidibi anajty ti miid miñ. Chi ajcxy ytigiy jiiby ma anajty je töxy'anäg yajpaady. ⁴¹ Chi Jesús májtzzy yi töxy'anäg yci', e chi nimay:

—Talita, cumni —jadayaab ayuc hue' yi' yhuimbizimy: Töxy'anäg, iich miich yam nimaayb, pidig.

⁴² Huin'ítiy je töxy'anäg, je huidibi anajty majmetz yjimijt, ypidig e ytüyöychoñ. E tüg'óciy yi mayjäy ooy ajcxy jihuiy huinmay. ⁴³ Huin'it Jesús najtzcapxiy co ca' huaad pin yajnimay jadu'n nej je töxy'anäg ti chögy, nañ jadu'n ni'ane'mdiy co huen ajcxy yajcay je pi'c töxy'anäg.

¹ Huin'it Jesús chooñ ma je jimbi it lugar, e yhuimbijty ma yci'mgajp. E miid ñicxy yi' ydiscípulos ajcxy. ² Sábado xiijoty Jesús ytigiy yaj'ixpijcp ma je mayjäy huidibi yöymújccixp ma je judío jäy ñaymujctac. E je mayjäy huidibi amidoo'ijtp anajty ooy jihuiy huinmay ajcxy, e ñayñimaayi ajcxy miñ xyipy:

—¿Ma jada' jadyaab jäy ti ni'ixpigäy jadyaab ixpíjcin? ¿Ma ti paady jada huijy'ajt cujc'ajt huidibi ymiid? ¿Ma jada' ti paady yi mic'ajt huidibi miid mijhuima'ñ tumyb? ³ Je' jada je tzejtzpi, yi María y'ung. Yi' y'uch ymigüg, yi Jacobo, yi José, yi Judas, etz yi Simón. Nañ jadu'n yi' y'uch töxyjäybi cha ajcxy chinäy quipxy miid iich ajt.

E je mayjäy ca'ajcxy anajty ixa'ñ cöbiga'ñ Jesús. ⁴ Huin'it Jesús nimay je mayjäy ajcxy:

—Huenma'ámyity tüg'óciy je mayjäy ooy yajmij'aty je jäy ajcxy huidibi najtzcapxiyb Dios y'ayuc. Jëyi janchtiy, ma yci'm naax ma yci'mgajp ca' je jäy ajcxy yajmij'adyii, etz nañ ytim jadu'n yi' y'amigügtijc etz ymijijn ymidijc.

⁵ Ma yci'm naax yci'm gajp Jesús ca' jaty nej mijhuinma'ñ tunipy miid co ca' ajcxy mijpidägyii. Jëyi yci'pidacy ma nijëjity pa'mjäy etz yajtzoocy. ⁶ Jesús ooy jihuiy huinmay nej je jäy ajcxy ca' ymijpidägyii ma yci'm naax yci'm gajp. Chi Jesús chooñ jim ñicxy ma jacjadyii cajp huinduy agonbi, e yaj'ixpijcy anajty je mayjäy ajcxy.

Jesús quexy ydiscípulos ayuccapxhuäcxp

⁷ Huin'it Jesús mijhuoy je majmetz ydiscípulos ajcxy, e chi quejxhuäcx nimetz nimetz ma canaag cajp. E chi mooy mic'ajt, jigix jëb yajpidzimy ajcxy ca'oybi ma jäy ajcxy. ⁸ Nañ jadu'n y'ane'my Jesús je' ydiscípulos ajcxy co ca' huaad ti miníxcixy tü'amgixpi, jëyi jëb miníxcixy tüg tajc nidüg nidügti. Ca' huaad miníxcixy ymorral, e ca' huaad miníxcixy ycaagy, e ca' huaad miníxcixy ymeeñ. ⁹ Jëyi je ycig etz je yhuit huidibi anajty ajcxy ymiid huen miníxcixy. ¹⁰ Chi Jesús yminañ:

—Co anajty ajcxy mjättaccixy ma tüg tijc, jim ajcxy mhuí'mipy ixti coon mdzoonip ma yijimbi cajp. ¹¹ Pen mdigiygixp ma tüg cajp, e je jäy ajcxy ca' ajcxy xycöbiga'ñ, ca' ajcxy amido'ida'ñ miich m'ayuc, mbidzimgix ma je cajp, chi mhuinhuópcixipy mgig. Jada je' je tiy'ajt co ca' ajcxy mjotcújcity. Janch iich miich ajcxy nimäy co Dios anajty ytiyduñ jada naaxhuiñ jäy, jacniği tzaachypi paada'ñ yi jäy ajcxy huidibi ajcxy anajty ca' xycöbójccixy, ca'ydi je' ajcxy huidibi tzinaay jecy'aty ma Sodoma etz Gomorra cajp.

¹² Chi je nimajmetzpi ajcxy chon Dios y'ayuccapxhuäcx co huen jäy ajcxy jothuim-bíjtcixy, huen ixmajtzaaygixy yi pocytonii. ¹³ Nañ jadu'n ajcxy yajpidzimy ca'oybi majaty jäy, e pidaaccixy aceite majaty pa'mjäy, e yajtzooccixy anajty.

Co Juan je Bautista y'ögy

¹⁴ Huin'it je rey Herodes nejhuiy co Jesús canaag mijhuinma'ñ tzachytuñ anajty, com tüg'óciy je mayjäy anajty nimiyaaccixy Jesús. Herodes yminañ co Juan je Bautista ti yjugypicy jadüg'oc ma anajty ti y'ögy, paady mic'ajt miidity jaydëb mijhuinma'ñ tuñ.

¹⁵ Nijëjity jäy yminaangixy:

—Jesús yi' je' Elías.

E naagity jäy yminángixy:

—Yi' je' tüg Dios tiy'ajtmiidpi huidibi quipxyiiby miid je Dios ytiy'ajtmiidpi huidibi tzinay jecy'ajty.

¹⁶ Co Herodes nejhuiy nej je mayjäy nimiyaaccixy Jesús, chi yminañ:

—Janch jada co Juan ti yjugypicy, je huidibi nni'ane'mdiyich co huen yajminagyii ycohuajc.

¹⁷ Miid Herodías, Herodes ytöxytjic ycixpi, Herodes n'ane'mdiy co Juan yajmach, e pidägyii pujxtigoty. Jada Herodías jayijp ypijcy miid je rey Herodes y'ajch Felipe, per ti anajty ixmach Felipe, e ypijctigajch miid je ycapy Herodes. ¹⁸ Hue' anajty Juan ti nimay Herodes:

—Ca' jadu'n paadyii co yi m'ajch Felipe ytöxytjic miich miiddzinaayi.

¹⁹ Paady ycixpi Herodías mijotma'ty Juan, e ytimy yaj'ögamy anajty. Per ca' mic'amy yhuinma'ñybaty nej ocyaj'ögip; ²⁰ com je rey Herodes ñejhuiyb co tudägy jäy huädz jäy anajty je Juan, e tzigiiyb anajty miid Juan. Paady ycixpi anajty je rey Herodes Juan miidity cuend'aty pujxtigoty. Naag'oc naag'oc anajty Herodes nicxy amido'ity Juan y'ayuc, ooy anajty huinmay nej yhuimbizimy, per jotcuyc anajty amido'ijty.

²¹ Huin'it Herodías ypat huinma'ñ nej jëb yaj'ögy Juan je huin'it xii co je rey Herodes anajty ñayñixiiduñyii. Hue' yajcay yaj'uucy je gobierno ytumbi ajcxy, je soldado huindzin ajcxy, etz tüg'óciy yi mic jäydijc huidibi ajcxy tzinaayb naag naag cajp jim Galilea. ²² Xiiduñyoty anajty co Herodías ñix oy y'ech ma je rey anajty yajpaady miid je may jäy huidibi anajty yajcaayb yaj'uucpy. E jadu'n nej je Herodías ñix y'ejch, ooy je rey jadu'n jäygidacy, etz tüg'óciy je jäy je huidijaty anajty miid ajcxy ycaaygixy y'uuccixy. Chi je rey nimay je töxy'anäg:

—Pijctzóohuigich ti mdimdzojcpy, iich miich nmöhuipy.

²³ Je rey nigí capxcödujcy janch cixyot huinijot co möhua'ñ ti ytimy ypijctzooyb, ixti jëb jamöy cujhuäcxy yi' y'ané'min, mibaad anajty ane'my je naaxjot. ²⁴ Chi je töxy'anäg ñicxy ma ytaj oy amidoy, nimay:

—¿Ti nbijctzohuípich?

Chi je' ytaj y'adzooy:

—Pijctzoohui yi Juan je Bautista ycohuajc.

²⁵ Mic'amy je Herodías ñix nihuimbity je rey e yminañ:

—Ndzojcpich co xymöhuibich mic'amy je Juan je Bautista ycohuajc ma tüg texy.

²⁶ Co jadu'n midoy je rey, chi ytigiiy tajp mayb janch mijcajee. Per ti y'octunipy. Com ti anajty jadu'n capxcöducy, ti anajty mayjäy midoy ti anajty ti yaj'ahuanii je töxy'anäg, ca' y'ayuc yajxiicy. ²⁷ Paady ycixpi je rey mic'amy ane'my tüg soldado, co huen nicxy yajtzoni Juan ycohuajc. ²⁸ Chi je soldado ñicxy ma pujxtijc, e yöcpujxtuuty Juan. Chi je soldado mimiñ Juan ycohuajc ma tüg texy, e yajc'idigiy je töxy'anäg, e je töxy'anäg yajc'idigiy ytaj.

²⁹ Co je jäy ajcxy huidibi anajty mijnicpejtp Juan ñejhuiiy ajcxy co je rey ti yaj'ögy Juan, chi ajcxy y'oy e yajpidíci Juan ñinícx, e yajnaaxtigiiy ajcxy.

Jesús yajcaay migoox mil yëydijc

³⁰ Co je majmetzpi apóstoles ajcxy yhuimbijty huidibi anajty Jesús ti quexy y'ayuccapxhuäcxi ma canaag cajp, chi ajcxy yajmiidmiydacy Jesús tüg'óciy tijaty anajty ti túngixy, etz tüg'óciy ayuc huidijaty ti yaj'ixpijccixy. ³¹ Huin'it Jesús nimay je nimajmetzpi huidibi anajty ti quexy y'ayuccapxhuäcxi:

—Tzoc jámim ma tüg it ma ca' pin, jaydëb nbócxim tüg xii metz xii.

Paady ycixpi Jesús jadu'n yminañ, com tzach mayjäy ja'ttiib tzondiib ma Jesús yajpaady, e ca' ajcxy tiempo anajty miidity mina ycaaygixipy y'uuccixipy miid je mayjäy ycixpi. ³² E Jesús miid ydiscipulos ajcxy ñicxy barcojoty ma ca' pin. Ac jëyi ajcxy nicxy ca' jac pin jäy miid nicxy. ³³ E mayjäy ijxy co Jesús ajcxy choñ, e ñañ ijxajpy pin anajty tzoñ barcojoty. Paady mayjäy choñ ma canaag cajp tegyi'm, ñíxcixy poyigy anajty ma Jesús ñicxa'ñ. Mayjäy oy yja'ty jayijp ca'ydi Jesús ajcxy, e jim ajcxy yömujectay. ³⁴ Co Jesús ybarcopizimy, chi ixy janch mayjäy, e Jesús ooy pa'ayoy je mayjäy, com jadu'n anajty ajcxy nej maycöbixy huidibi ca' miidity ycuend'ajtpi. Chi Jesús ytigiy yaj'ixpijcp, canaag nax ixpijcin anajty yecy. ³⁵⁻³⁶ Co anajty ti chu'iiyñi, chi Jesús ydiscipulos ajcxy ñimaayi:

—Ca' ni pin chinäy ma jadyaabi it lugar, e ti chu'iiyñi. Capxycix miid jada mayjäy ajcxy, jaydëb ñíxcixyñi ma yi cajp huinduy agonbi, huen nicxy júyigixipy ycaayin y'uucin.

³⁷ Huin'it Jesús y'adzooy yi' ydiscipulos ajcxy:

—Miich ajcxy móoygix jada mayjäy caayin úucin.

Chi ajcxy Jesús y'adzooy:

—¿Huaad ñich ajcxy ñicxy njuy mejtz migo'px denario tzajcaagy, jígix ycaiyipy y'ügipy jada mayjäy?

³⁸ Chi Jesús y'amidooy ydiscípulos ajcxy:

—¿Naag tzajcaagy miich ajcxy miidíty ya? Ñicx íjxcix.

Co ajcxy tiy'ajt paty, chi ajcxy Jesús ñimay:

—Ñich ajcxy ñmiid migoox tzajcaagy etz metz acx.

³⁹ Chi Jesús ñi'ane'mdiíy co je mayjäy huen ixtaaccixy naaxcixy tügpicyjaty. ⁴⁰ Chi je mayjäy y'ixtactay canaagpicy. Canaagpicy migo'px jatypi, e canaagpicy huixchiguipx-majcjatypi.

⁴¹ Chi Jesús conígy je migooxpi tzajcaagy etz je metzpi acx, e ypa't'ijxy tzajpcixy, e yajnaxxy Dios cojuyip ma Dios miid je tzajcaagy etz je acx ycixpi. Huin'it Jesús tujc-huäcxy je migooxpi tzajcaagy, e yajcídigiíy je' ydiscípulos ajcxy, jaydéb ajcxy yajhuäcxip ma je mayjäy. Nañ jadu'n Jesús yajcídigiíy je metzpi acx je' ydiscípulos ajcxy, jaydéb yajhuäcxip ma je mayjäy. ⁴² Nidüg'óciy je mayjäy ajcxy ycaiy y'uucy cüxyi. ⁴³ Co je mayjäy ycaiyday, chi je discípulos ajcxy yajmujcy je cayduc tzütztuc, e yaj'ujch ajcxy majmetz cach. ⁴⁴ Migoox mil anajty ajcxy je yéydijctijc huidibi cay uuc.

Jesús yöy ñihuingíxy

⁴⁵ Huin'it Jesús ane'my je' ydiscípulos ajcxy co huen barcotígiiygixy mic'amy. Huen ñicxícixy jayijp jim Betsaida jim mejy ñinaxxy. Co yi discípulos ajcxy ybarcotígíyday, chi Jesús ycapxycíjxy miid je mayjäy. ⁴⁶ Co anajty Jesús ti ycapxycíxy miid je mayjäy, chi ñicxy ma tüg cögop Dios mibijctzoob. ⁴⁷ Co ycoodziíyñi je discípulos ajcxy anajty yajpaady mejyoty ma je barco. Jesús naydüg anajty yajpaady mejypa'. ⁴⁸ Jesús y'ijx co je'ydiscípulos ajcxy anajty ti y'anucxiíygixy miid mejycabií, je' co je barco anajty chachjijpcobojíy. E co oy moñíy, chi Jesús ymijhuägy ma je barco. Jesús yöyp anajty mejyhuingíxy, e hue' anajty jüyöyñaxamy je discípulos ajcxy. ⁴⁹ Co ajcxy ijxpaty Jesús yöyp anajty mejyhuingíxy, chi ajcxy ooy yaxqueegy, com hue' anajty ajcxy tijy co nigo y'ijxmañiiygixy. ⁵⁰ Com tüg'óciy yi discípulos ajcxy anajty ti íjxcixy Jesús, e ooy ajcxy chigíy, paady mic'amy Jesús migapxy je' ydiscípulos ajcxy, e ñimay:

—Jotmic naybidáacigixy, ca' mdzígiiygixy. ñich yi'.

⁵¹ Huin'it Jesús ybarcotígiiy, e mic'amy je poj yxeemy, e je discípulos ajcxy ooy jihuiy huinmay. ⁵² Ooy ajcxy jihuiíygixy huinmaaygixy, com ca' ajcxy huinjihuiíygixy anajty nej Jesús je mayjäy yajcay miid je migooxpi tzajcaagy. Com je'ni anajty ajcxy ooy yjotjuuñity ycöjuuñity.

Jesús yajtzögy pa'mjäy ajcxy jim Genesaret

⁵³ Chi ajcxy ymejch ma je mejypa' ma je Genesaret ñaaxjot. E coxojch ajcxy je barco ma mejypa'. ⁵⁴ Co ajcxy ybarcopidzimy, chi mic'amy je mayjäy ajcxy jim ijxcajpy Jesús. ⁵⁵ Poyígy je jäy ajcxy choon, e yajyöyñajxtay je cajp ajcxy huinduy agonbi, capxhuäcxcixy co Jesús anajty ti yjädy jim. E jäy ajcxy yajmiindzondacy may pa'mjäy cijx'am jim ma anajty Jesús yajpaady. ⁵⁶ E hueñytim ma'amyity anajty Jesús ñicxy majaty mij cajp, mutz cajp, o majaty jäy y'ujtztzinäy, ooy anajty ajcxy pidáccixy pa'mjäy majaty majaty yi mij tüba', e cohuaniiygixy Jesús co huen ñidoñyíi yi yhuitpa', e tüg'óciy huidijaty anajty ajcxy ñidomb, najxp ajcxy anajty je' ypa'm.

7

Huidi jäy yaj'ahuimbijit pocyjayíty

¹ Huin'it ymiíñ ma Jesús nijéjity fariseojäy ajcxy, je huindzindijc huidibi tzachpadumb judío ycostumbre. Nañ jadu'n miid miíñ nijéjity escribas, je huindzindijc huidibi ajcxy nijaydutr anajty Dios ñecy. Hue' je fariseos etz escribas ajcxy anajty ti choongixy Jerusalén. ² Je fariseos etz escribas ajcxy ijxy co Jesús ydiscípulos ajcxy ytigíy caaybi

uucpi jaygibujy, ca' anajty cuydúngxixy judíojoy ycostumbre. ³ (Com yi fariseojäy etz jacjadyii judíojoy ajcxy cuydumby anajty ajcxy ñi'ap costumbre, e ixpocypújcixy jayijp ma ca'ni ytiigiygixy caaybi uucpi. Com yi judíojoy ajcxy co ajcxy ñicxy mayjäyjoty etz yhuimbíjtcixy jadüg'oc ma ytijc, ca' ajcxy ycaay ixti cooni jayijp ajcxy yčibújcixy canaag'oc. ⁴ Yi judíojoy ymiid canaagnax costumbre huidibi cuydúngxixyp jadu'n nej ajcxy yajhuaatzcixy ajcxy ytaasi ytexy ytütz etz ypujxtexy.) ⁵ Chi je fariseos etz escribas ajcxy y'amidooy Jesús, nimaayi:

—¿Na'amy co miich mdiscípulos ajcxy ca' cuydúngxixy judíojoy ñi'ap costumbre? ¿Na'amy co ajcxy ycaaygixy y'úccixy, e ca' jayijp ixpújcixy yi' ypocyi?

⁶ Chi Jesús y'adzooy:

—Janch tiy'ajt jadu'n nej je Dios ytiy'ajtmíidpi Isafas jayhui'my jecy'ajty miid miich ajcxy ycixpi. Miich ajcxy huidibi naybidaacip jadu'n nej jihuiy ajcxy tudägyjäy, e ca' yjanchíty. Com jadu'n Isafas jaybejty co Dios jadu'n yminañ:

Jada jäy jadu'n ajcxy ycapxcixy ymiydaaccixy jadu'n nej jihuiy xyajmij'atyich. Per ca' ajcxy xyajmij'atyich cixyot huinijot.

⁷ Naadigi co ajcxy xyhuin'íigixich xyhuinyáaxcixich. Ñayyaj'ixpújcixy ayuc tiy'ajt huidibi jäy ajcxy ti cojy ti macxy.

⁸ Chi Jesús yminañ:

—Miich ajcxy ti m'ixmájtzcixy Dios ycötújcín, e myajmij'ájtzcixy ayuc huinma'ñ huidibi jäy ci'm ti cojy ti macxy. ⁹ Miich ajcxy ca' mgüendtúngxixy Dios ycötújcín Dios ytiy'ajt jigix jébi cuydúngxixy mgi'm costumbre. ¹⁰ Com Moisés je cötújcín ypidac jecy'ajty: “Yajmij'at mdaj mdeedy”, e “Pinjaty jibic nigapx ni'ojiiyb ytaj yteedy, copicy y'ögip.” ¹¹ E miich ajcxy minañ co tüg jäy nimähuiy ytaj yteedy co ca' pubeda'ñ ajcxy jadu'n nej padyii, miid co tüg'óciy tijaty yi' ymiid huidibi ytaj yteedy jé'adánip, hue' ti ahuaníy nigoo ma Dios. ¹² E pen jadu'n minañ, chi miich ajcxy minaangixy co ca' copícyity mbubéjtccixipy mdaj mdeedy. ¹³ Miich ajcxy midundigooyb Dios ycötújcín miid mgostumbre huidibi myajnaxyp myajtigiiyb, etz jacjadyii jibic-huinma'ñ myaj'ixpújcixy.

¹⁴ Jadüg'oc Jesús mijhuoy yi mayjäy ajcxy, e chi nimay:

—Mido'mbíjccix miich ajcxy iich n'ayuc, e mhuijihuuiy ajcxy. ¹⁵ Ca' yi' yajpocycähuiyb huidibi jäy ajcxy ypidacy ma yhuin y'ahuac. Yi' janchtiy huidibi pidzim ma jäy ajcxy yjot yhuinma'ñ, yi' yi' yajpocycähuiyb. ¹⁶ Miich ajcxy mmiid mdätzac, mido'mbíjccix iich n'ayuc.

¹⁷ Co Jesús ixmajch je mayjäy, e ytiyctigiiy, chi je discípulos ajcxy yaj'amidoohui nej yhuimbízimy jada ayuc. ¹⁸ Chi Jesús ydiscípulos ajcxy nimay:

—¿Nej nañ jadu'n miich ajcxy ca' mhuijihuuiy jada ayuc? ¿Nej ca' mhuijihuuiy gixy co huidibi tigiyy ma yi jäy y'ahuac (yi caayin uucín), ca' yi' yajpocycäy yi jäy? ¹⁹ Yi caayin uucín hue' yi jäy ypidägy ma y'aa ymoox ca' nan ma yjot yhuinma'ñ, e co ñax ma y'aa ymoox, chi ypidzimni.

Co Jesús jadu'n ymina'ñ, chi nejhuiyim co Dios ca' capx'aducy ni ti caayin ni ti uucín.

²⁰ E Jesús yjacminañ:

—Dios yajpocycähuiy jäy ajcxy miid huidibi pidzim ma ajcxy yhuinma'ñ. ²¹⁻²² Ma yi jäy ajcxy yhuinma'ñ jiiby choon jibic-huinma'ñ; jiiby choon migapxtigoyii töxyjäy yhuinma'ñ; jiiby choon je tundigooyii yéydijc miid töxyjäy etz töxyjäy miid yéydijc huinma'ñ; jiiby choon jäyyaj'ögii huinma'ñ; jiiby choon meedzii huinma'ñ; jiiby choon mügii huididii huinma'ñ; jiiby choon jibic-huinma'ñ; jiiby choon je huin'íinii huinma'ñ; jiiby choon nayca'oy'ixii huinma'ñ; jiiby choon je piitzcapxii huinma'ñ; jiiby choon je amij agix huinma'ñ; jiiby choon je tzuu huinma'ñ je loci huinma'ñ. ²³ Yi jadu'mbi jibicpi jiiby choon ma jäy ajcxy yjot yhuinma'ñ, paady jibicpi jäy ajcxy túngxixy, e ypocycäy ajcxy ma Dios.

Tüg töxyjäy huïdi ca' yjudiojäyity mibijc Jesús

²⁴ Chooñ Jesús ma yijimbi it, e ñicxy jim ma Tiro etz Sidón ñaaxjot. Jesús ytigiy ma tüg jäy ytijc, e ca' anajty tzocy co je mayjäy ñejhuïhuïyb ma y'ity. Per ca' jajty nicx yhuingoyüch. ²⁵ Mic'amy tüg töxyjäy nejhuiy ma Jesús anajty yajpaady. Hue' je töxyjäy ypi'cniix ymiid anajty ca'oybi. Je töxyjäy ymiin ma Jesús, e ycojxtinay'ahuïy ma yi' yhuinduu. ²⁶ Je töxyjäy hue' anajty ycocájpity Sirofenicia (e hue' anajty griegojäy). Yi töxyjäy may'ajt pijctzoy ma Jesús co huen yajpidzimy je ca'oybi ma ypi'cniix yjot yhuinma'ñ. ²⁷ Chi Jesús je töxyjäy nimay:

—Ooy ycopicyity co nbubedipyich jayijp Dios yjäy (yi judíojäy). Jadu'n nipaady nej tüg ungdeedy. Tím copicy co je ungdeedy yajcayipy jayijp yci'm ung, e ca' möhuip uc je huïdibi y'ung yajjicxaamy.

²⁸ Chi je töxyjäy y'adzooy:

—Huindzin, tiy'ajt nej miich mmina'ñ, per ñañ jadu'n yi uc ajcxy yjicxyp je caagy abu'x huïdi cáb naaxcixy ma mesipa't ma je jäy y'ung ajcxy ycaay.

²⁹ Chi Jesús je töxyjäy nimay:

—Tiy'ajt jadu'n nej iich miich ti xy'adzooy, paady ycixpi jëb mhuimbidipy ma mdiic jotcujc, je ca'oybi ti ypidzimy ma mniix yjot yhuinma'ñ.

³⁰ Co je töxyjäy huimbijty ma ytijc, chi paty ypi'cniix cijx'am, ti anajty je ca'oybi ñibidzimyii ycobidzimyii.

Jesús yajtzögy tüg jäy huïdibi cönat etz ahui'mb

³¹ Chi Jesús jim tzojci chooni Tiro ñaaxjot. Chi chooñ jim ñicxy anajty Galilea, e nicxy ma je tü'aa huïdibi najxp Sidón etz je cajp huïdibi yajpatp jim Decápolis ñaaxjot, chi yja'ty ma Galilea mij laguunba'. ³² Jim ajcxy miid miin tüg jäy huïdibi cönatip etz aahui'mb. Chi ajcxy may'ajt pijctzoooy ma Jesús huen cniixajy je pa'mjäy. ³³ Chi Jesús miidnicxy je pa'mjäy ahuingujc ma ca' mayjäy, e pidacy ycihua'x ma je pa'mjäy ytätzac. Chi chujy, e huin'it nidoni je ytoodz. ³⁴ Chi Jesús ypa't'ijxy tzajpcix, e ymicxejy, e chi yminañ Aramaico'amy:

—Efata —jada ayuc hue' yhuimbidzimy: Ahuädz.

³⁵ E mic'amy je jäy cönatpi ytätzac y'ahuaach etz ytoodz yungiy etz ycapxni yajxon.

³⁶ Chi Jesús ane'my je pa'mjäy etz ymigügtijc co ca' huaad ni pin yajmiidmiydägipy jadu'n nej anajty ti chögy. Co Jesús jadu'n mictägy ane'my co ca' huaad ni pin yajmiidmiydägipy je mijhuinma'ñ huïdibi ytumyb, chi niigi je pa'mjäy etz ymigügtijc miidmiydaaccixy hueñypinity. ³⁷ Je mayjäy ooy tzachjihuiy huinmay ajcxy, ñayñimaayi ajcxy miñ xyipy:

—Jada Jesús ooy oy chachtuñ. Ymimadactaayb yi'huenyitmytíjity, ixti yajmidohuicpy yi' yi cönatpi etz yajcapxigy yi uumbi.

8

Jesús yajcay midax mil yëydijc

¹ Je huin'it xii je huin'it tiempo mayjäy anajty ti ñaymújcigixy ma Jesús yajpaady, e ca' anajty je mayjäy ajcxy miidity ti ycaaygixipy y'úuccixipy. Jesús capxyñiguejxy je' ydiscípulos ajcxy, co huen miingixy ma yi' yajpaady. Co ajcxy ymiin, chi nimay:

² —Ooy nba'ayooyich yi mayjäy. Yi' co cham midugiiig xii maabi ya miid y'ityich je mayjäy, e ni ca' ajcxy miidity ti ycaipy. ³ Co ixipy nguexhuimbityich ajcxy ma ytijc ayuu, ca' yjécyity yajpa'mgójipy ajcxy tü'am, com nijjëjity ajcxy jigüëgy ti choongixy.

⁴ Chi je discípulos ajcxy Jesús adzooy:

—¿Ma iich ajt nbaatim je caayin uucin huïdibi jëb miid nyajcaayim nyaj'úucim jada mayjäy? Com mijtigüduum ya nyajpaatim ma ca' pin chinäy.

⁵ Chi Jesús y'amidooy je' ydiscípulos ajcxy:

—¿Naag tzajcaagy miich ajcxy miidity?

Chi je' ajcxy y'adzooy:

—Huixtujc tzajcaagy.

⁶ Chi Jesús ane'my je mayjäy, co huen ñay'ahuüygixy naaxcíxy. Huin'it Jesús conïgy je huixtujcp tzajcaagy, e yajnaxy Dioscojuyip ma Dios miid tzajcaagy ycixpi. Chi tujc-huäcxy je tzajcaagy, e moy je' ydiscípulos ajcxy, e je' ydiscípulos ajcxy yajhuäcxy je tzajcaagy ma je mayjäy. ⁷ Je Jesús ydiscípulos ajcxy ymiid anajty nijëjity pi'c acx. Chi Jesús yajnaxy Dioscojuyip ma Dios miid je pi'c acx ycixpi, e moy je' ydiscípulos ajcxy huen yajhuäcxtaygixy ma je mayjäy. ⁸ Chi je mayjäy nidüg'óciy ycaay cüxyi, e co ajcxy ycaayday, chi je Jesús ydiscípulos ajcxy yajpidígy huixtujc cach cayduc jicxtuc tiibi anajty yconaxy. ⁹ Jahueeni anajty ycamidaaxmility je jäy huídibi ajcxy cay uuc cüxyi. Chi Jesús ycapxy ycijxy miid je mayjäy, e nimay ajcxy co huen nicxcixy ma ytijc. ¹⁰ E mic'amy Jesús ybarcotigiy miid ydiscípulos ajcxy, e chi ñicxy ajcxy jim Dalmanuta ñaaxjot.

Yi fariseos ajcxy tüg ijxpejt pijctzooob mijhuinma'ñybi

¹¹ Nijëjity fariseos ajcxy, je huindzindijc huídibi padumb judío ycostumbre, ymiin ajcxy ma Jesús yajpaady, e ytigiy ajcxy ijxquípcixy y'ixpijcin miid Jesús. Pijctzoogixy co Jesús huen yaj'ixyii ajcxy tüg ijxpejt huídibi tzomb tzajpjoty. Ijxta'n octunaangixy miid Jesús. ¹² Chi Jesús tajy may ñayjihuiiyi jotjoty huinma'ñyoty, chi ymicxejy, e yminañ:

—¿Na'amy co jada jäy ajcxy huídibi jugy'ajtp cham, pijctzoogixy ijxpejt huídibi tzomb tzajpjoty? Janch iich miich nimaaygixy co ca' nyaj'ixaangixy ijxpejt huídibi tzomb tzajpjoty.

¹³ E Jesús ytimycapxycíxy miid je fariseos ajcxy, e chi puyöyduuty ajcxy. Chi Jesús ybarcotigiy, e ñicxy miid ydiscípulos ajcxy ma mij laguun ñinaxy.

Fariseojäy ajcxy yaj'ixpijcin

¹⁴ Je' ydiscípulos ajcxy ti anajty jaydigoygixy je jicxy picy co ajcxy ybarcotigiy. Jëyi ajcxy mimiin tüg pi'c tzajcaagy. ¹⁵ Chi Jesús ane'myb je' ydiscípulos ajcxy, e yminañ:

—Ca' mmijpidaaccixy yi fariseojäy ajcxy y'ayuc ytiy'ajt etz ni rey Herodes y'ayuc ytiy'ajt, com jadu'n ajcxy y'ayuc nipaady nej levadura huídibi ca' y'óyity.

¹⁶ E je Jesús ydiscípulos ajcxy nimiydaaccixy Jesús y'ayuc ñayñimaayigixy ajcxy miñ xyipy:

—Je' co ca' iich ajt nmimiinim caayin uucin.

¹⁷ E Jesús ñejhuiyb anajty nej je' ydiscípulos ajcxy ñayñimaayi miñ xyipy, paady yminañ:

—¿Na'amy co mdzachnimiydaaccixy je caayin uucin huídibi ti mjäydigooygixy? ¿Nej ca' mhuiñihuiygixy e ca' mguenditungixy iich n'ayuc? ¿Nej co ajcxy mdzachcöjuuñity?

¹⁸ Miich ajcxy miid mhuiin: ¿Nej co ca' m'ijxcixy huídibi ndumybich? Miich ajcxy miid mdädzac: ¿Nej co ca' mmido'mbíjccixy iich n'ayuc? ¿Nej co ca' mjäyméjtzcixy ti ti nduñich? ¹⁹ Jayhuin co ndujc-huäcxyich je migooxpi tzajcaagy e nyajcaayich migoox mil jäy: ¿Naag cach cayduc jicxtuc ti ajcxy myajpidígy?

Chi ajcxy y'adzooy:

—Hue' iich ajcxy nyajpidígyich majmetz cach cayduc jicxtuc.

²⁰ Chi Jesús yminañ:

—E jayhuin co ndujc-huäcxyich je huixtujcpi tzajcaagy, e nyajcaayich midaax mil jäy: ¿Naag cach cayduc ti ajcxy myajpidígy?

Chi ajcxy y'adzooy:

—Hue' iich ajcxy nyajpidígyich huixtujc cach cayduc jicxtuc.

²¹ Chi Jesús yminañ:

—¿Nej chambaad miich ajcxy ca' mhuiñihuiiy?

Jesús yajtzögy tüg jäy huintzpi jim Betsaida

²² Jesús etz ydiscípulos ajcxy oy yjá'tcixy jim Betsaida. Jim Betsaida nijëjity jäy miid miiñ ma Jesús tüg huintzpi, e pijctzoy ajcxy may'ajt co huen nidoñ jigix je huintzpi y'ijxigipy. ²³ Huin'it Jesús huijtzooñ je huintzpi ma yci', chi miid cajppidzimy. E chi

Jesús yajjaaxy yi chujyñi je huintzpi yhuiin, etz cñixajy, e chi amidoy pen y'ijxpy anajty tigati yinjaty huenjaty. ²⁴ Chi je huintzpi huindixpejty Jesús, e nimay:

—N'ijxypich yëydijctijc, e jadu'n ajcxy yquëxigy nej quipy, per yöyp ajcxy.

²⁵ E jadüg'oc Jesús yci' pidacy ma je huintzpi yhuiin, e chi je huintzpi yhuindixpejtpy anajty, e chi yhuiin y'oyiyy yajxon, huin'it oy huädz y'ijxy. ²⁶ E Jesús ycapxycíjxy miid je', e quejxhuimbijty ma ytijc. Chi yminañ:

—Ca' mdigihuip cajpjoty, e ni pin jada mgayajmiidmiydägipy.

Pedro capxypidzimy co Jesús yi' je' je Cristo

²⁷ Chi Jesús ñicxy miid ydiscípulos ajcxy jim ma nijëjity mutz cajp mihuingon je mij cajp Cesarea Filipino. E tü'am Jesús amidoy ajcxy ydiscípulos, nimay:

—¿Nej jäy yminaangixy pin ich?

²⁸ Chi ajcxy je' ydiscípulos y'adzooy:

—Nijëjity jäy yminaangixy co miich je' je Juan, je Bautista. E nijëjity yminaangixy co miich je' je Elías. E jacjadyii yminaangixy co miich je' tüg Dios y'ayucnajtzcaxiyybi huidibi tügiiyb miid nijëjity Dios ytiy'ajtmidpi huidibi tzinaay jecy'ajty.

²⁹ Jesús y'amidooy je' ydiscípulos ajcxy:

—Miich ajcxy, ¿nej miich mminaangixy pin ich?

Chi Pedro y'adzooy:

—Miich je' je Cristo.

³⁰ Chi Jesús nimay je' ydiscípulos ajcxy co ca' huaad ni pin nimaaygixy, co yi' je' je Cristo.

Jesús capxypidzimy co y'öga'ñ

³¹ Chi Jesús jacyaj'ixpijcy je' ydiscípulos ajcxy, e yminañ:

—Copicy co ich, je jäy huidi tzoon tzajpjoty, nyajnaxipyich mij tzaachpyi etz mij ayo'n. Yi mijjäydijc ajcxy, yi judío teedy mijtungmiidpi, etz yi escribas, je huindzindijc huidibi nijayduutcixyp Dios necy, ca' ajcxy xy'ixa'ñich, e xyaj'öga'ñ ajcxy, e codugiig xi njugypigipyich jadüg'oc co ich anajty ti n'ögy. ³² Co Jesús jadu'n nigapxy nimiydacy huädz huädz nej yjada'ñyii anajty, chi Pedro huobibzimy Jesús ahuingujc, chi ooy ogy.

³³ Chi Jesús ni'ijxhuimbijty ydiscípulos ajcxy, e ogy je Pedro, ñimay:

—Huinhuäctuutcich, miich Satanás. Com miich ca' mhuiñma'ñ mbidägy nej Dios tzocy. Yi' janchtiy miich mhuiñma'ñ'ajtpy nej jäy ajcxy tzocy.

³⁴ Huin'it Jesús huoomiñ yi' ydiscípulos ajcxy etz yi mayjäy, e chi nimay:

—Pen ji pinjaty xypanicxa'ñich, huen jäy digoydäy yci'mdzójcin etz huen xypanicxich jabom jabom. Oy nej ytimyjadipy ytimy'ayoohuipy. Jadu'n nipaady nej jihuüy ajcxy anajty mgruudz mgabiccixy, etz naygyéjicigixy ma yi ó'cin huen ytimyñëjity miid ich ycixpi. ³⁵ Huenpinjäy huidibi ca' yega'ñ yi yjugy'ájtín ma yi ó'cin miid ich ycixpi, hue' je' yajtigoyamy yi'yjugy'ájtín. E huenpinjäy huidibi yegamy yjugy'ájtín ma yi ó'cin miid ich ycixpi etz ich y'ayuc oybi ycixpi, hue' je' ypadamyb yi jugy'ájtín huidibi ca' cixipy tigoyipy ni minaa. ³⁶ ¿Ti oy'ájtín yi' co tüg jäy y'ocnayyajpadiiyb yi meen etz mic'ájtín (huidi yajpaatp ya ñaaxhuiñybi) e y'alma yjugy'ájtín cixipy tigoyipy tügcíy? ³⁷ ¿Jadu'ñyi jëb jäy y'alma yjugy'ájtínoccojuyi? Nigi tzoohuin miidity jäy ajcxy y'alma yjugy'ájtín, ca' jac ti. ³⁸ Huentimpínity yi' huidibi xymidzo'ydúnibich yi n'ayucich ndiy'ájtích ma yi pocyjäydijc yhuinduu huidibi tzinaayb cham ma jada naaxhuiñybi. Pues nañ jadu'n ich, je jäy huidibi tzoon tzajpjoty, nmidzo'ydúnibich yi jadu'mbi jäy co ich anajty nhuimbity ya naaxhuiñybi miid ich nDeedy, je Dios Teedy, ymic'ajt y'oy'ajt etz miid tüg'óciy yi may'ángeles ajcxy tudägypi.

—Janch tiy'ajt jadu'n nej ñich miich ajcxy cham nimäy, co nijëjity miich ajcxy huidibi cham ma ñich nhuinduu, ca' m'ögaangixy, ixti cooni ajcxy jayijp m'ixipy je Dios y'ané'min etz ymic'ajt.

Co Jesús ñinicx yajtigajch

² Co tuctujc xii naxy, chi Jesús miid tzoön Pedro, Santiago etz Juan, e miidpa'ttigiiy ma tüg mijcop ma tüg it ooy ycíxity. E jim copcíxy Jesús ñinicx naygojtigajtzni ma Pedro ajcxy yhuinduu. ³ Chi Jesús yhuít oy y'ahuimbity janch poob, e janch adücxp. E ni pin jadu'n yhuít cayajhuäch janch poob jadu'n nej je' anajty yhuít miidity. ⁴ E chi oy nayguëxigyii ma ajcxy yhuindu Elías etz Moisés. Elías etz Moisés miydacp anajty ajcxy miid Jesús. ⁵ Huin'it Pedro nimay Jesús:

—Huindzin, janch oy jadu'n co ñich nyáajity. N'occojyich ajcxy tugüig tijcquemy: tüg miich mje'; tüg Moisés yje'; etz tüg Elías yje'.

⁶ Com Pedro, Jacobo etz Juan ooy anajty chigiigyixy, paady Pedro ca' anajty nejhuüy ti ycapxyp. ⁷ Tim huin'ítity tüg joc yajnidigoy je' ajcxy, e midooy ajcxy ayuc jocjoty, e je ayuc yminañ:

—Jada je' ñich n'ung, huidibi ooy ndzocyich. Mido'mbic miich ajcxy Jesús y'ayuc.

⁸ E tim huin'ítity Pedro, Jacobo etz Juan ajcxy yujc'ijxy, e yja'ijxhuidijty ajcxy, e ca' ni pin ma ocjac'ijxni, jëda'ajty Jesús naydügpajc.

⁹⁻¹⁰ Ti anajty choongixy copcíxy, e cidacp anajty ajcxy, co Jesús nimay Pedro, Jacobo etz Juan, co ca' huaad yajmiidmiydaaccixy pinjaty huidibi ajcxy anajty ti íjxcixy, ixti cooni ñich, je jäy huidibi tzoön tzajpjoty, n'ögibich etz njugypigipyich jadüg'oc. Pedro, Jacobo, etz Juan ca' yjacmiydägy miid jacpinjaty huidibi anajty ti íjxcixy. Per ooy ajcxy huinmay etz naymiidmiydáacigixy miñ xyipy ti Jesús ytijamy co yminañ: “N'ögibich etz njugypigipyich jadüg'oc.” ¹¹ Huin'it ajcxy Jesús y'amidooy:

—¿Na'amy co yi escribas ymina'ñ co yi Elías huidibi chinay jecy'ajty jayijp miina'ñ ca'ydi je Cristo?

¹² Chi Jesús y'adzooy:

—Tiy'ajt jadu'n co miñ jaybety ma Dios ñecy jecy'ajty co Elías yhuimbidity jacjayijp ca'ydi je Cristo, e yaj'oyiydähuipy huinjemybi tüg'óciy miid Dios ycixpi. E nañ tiy'ajt jadu'n co jaybety ymiiñ ma Dios ñecy co je Cristo, je jäy huidib tzoön tzajpjoty, yajnaxa'ñ ayo'n etz tzaachypi etz mayjäy ca' y'ixa'nüby. ¹³ ñich miich ajcxy nimaayb co je Elías ti je' yhuimbity ya naaxhuiñ, e je mayjäy ti túngixy miid Elías nej anajty tim tzójcixy. E cuyduñ ajcxy nej jaybety miiñ ma Dios ñecy miid Elías ycixpi.

Jesús yajtzögy tüg mutz'anäg huidibi ca'oybi miid

¹⁴ Co Jesús, Pedro, Jacobo etz Juan yhuimbity ma je jacjadyii Jesús ydiscípulos ajcxy anajty ti yhui'müy, chi ajcxy ijxy mayjäy juhuidity ma Jesús ydiscípulos ajcxy. Etz ijxy ajcxy nijëjity escribas huidibi ayuc tzachyajtzihiyb miid Jesús ydiscípulos ajcxy. ¹⁵ E co je mayjäy íjxcixy nejhuüigyixy co Jesús ti yhuimbity anajty, chi mic'amy ajcxy ninicxy Jesús poyigy, e capxpoocxixy, e may je' ajcxy ooy jihuiy huinmay. ¹⁶ Chi Jesús y'amidooy je mayjäy, nimay:

—¿Ti ayuc miich ajcxy mdzachyajyomyb miid ñich ndiscípulos ajcxy?

¹⁷ Chi nidüg je jäy ajcxy y'adzooy:

—Huindzin, ti nmüdmiiñ ñich nmang huidibi ymiid ca'oybi, e je ca'oybi ti yaj'umüyii.

¹⁸ E janam jadojyc je ca'oybi yajyachyii yajquüdyii ñich nmang, e oy cäy naaxcíxy, e ooy y'aa'opy ypidzimy, e nañ jadu'n oy ytüitz queety etz ñinicx janch ögy yhui'my. Ti nbijctzoyich may'ajt miid miich mdiscípulos ajcxy co huen yajpidzimgixy je ca'oybi ma ñich nmang, e ca' ajcxy ymadacy nicxy yajpidzimgixy.

¹⁹ Jesús nimay je mayjäy:

—Miich ajcxy huídibi jugy'ajtp jadachambi xii tiempo huídibi ca' mijpidägy Dios y'ayuc, ¿naag xii naag po' iich njac-hui'mmihuibich miid miich ajcxy? ¿Naag xii naag po' n'ocmimecxtuguipich miich ajcxy? Miidmiin yi mmang ya ma iich nhuinduu.

²⁰ Chi ajcxy miidmiñ je pa'mjäy ma Jesús yhuinduu. E co je ca'oybi ijxpaady Jesús, chi mic'amy yajyajch yajquidy je pa'mjäy, e chi oy ciday naaxcíxy, e ooy yajch yquidy, yajpidzimy ooy y'aa'opy ma y'ahuac. ²¹⁻²² Jesús y'amidooy je pa'mjäy yteedy:

—¿Minaag jimijt cujc yöy maabi mmang ypa'mbety?

Chi je ungedeedy y'adzooy:

—Ma'xung anajty co pa'mbedyii. Canaag'oc je ca'oybi yajyachyii yajquidyii iich nmang, ixti ti oy ycogidahuüy jijnjoty etz niijoty. Je ca'oybi canaag'oc jayaj'ögy iich nmang. Pen miich miid tzöc'ajt mic'ajt jaydëb xypubedipyich, tun may'ajt pa'ayoogich etz pubejtcich.

²³ Chi Jesús y'adzooy nimay je pa'mjäy yteedy:

—Pen miich mibijcpi, ca' ti chípity ma pin mibijcp.

²⁴ Mic'amy je pa'mjäy yteedy mic ycapxy yminañ:

—Nmibijcyich, pubéjtcich nej huaad jacmij nmibicyich.

²⁵ E co Jesús ijxy co nīgi mayjäy chach ymiñ poyigy ma yi', chi ix'ojy je ca'oybi, e yminañ:

—Miich ca'oybi huídib ti yajhui'my jada pi'c'anäg uum etz nat, iich miich yam n'ane'myb: “Pidzim ma yi pa'mjäy, e ca' mjactigihuipy ma yi' yjot yhuinma'ñ jadüg'oc.”

²⁶ Jayjip je ca'oybi yaaxqueecy janch mic, yajyajch yajquidy je pa'mjäy. Co jadu'n tuñ, chi ypidzimy. Je pa'mjäy oy ñinicx yhui'my nej jihuüy ti y'o'cni. Je mayjäy huídibi anajty ajcxy jim huindixp yminaangixy:

—Ti ayoob y'ögy.

²⁷ Chi Jesús majtz je pa'mjäy yci', e yajpidigy e huin'it je pa'mjäy ytinayigy mic oy.

²⁸ Co Jesús ytigüy ma tüg tijc, chi je' ydiscípulos ajcxy y'amidou ameech, minañ ajcxy:

—¿Na'amy co iich ajcxy ca' ti nmadägyich nej nyajpidzimip iich ajcxy yi ca'oybi?

²⁹ Chi Jesús y'adzooy:

—Yijiibi ca'oybi ca' yi' huaad ypidzimy jadu'ñyi. Hue' janchtiy copicy mibijctzou Dios mictägy, e huin'it ypidzimipy je ca'oybi ma je pa'mjäy. Ca' jac ni nej huaad ypidzimy yi jadu'mbi ca'oybi, jëyi co Dios nmibijctzoohuim n'íjtım ayuu.

Jesús capxpidzimnip jadüg'oc co y'öga'ñ

³⁰ Chi Jesús miid yi' ydiscípulos ajcxy choñ ma je jimbi it, e yajyöyñajxtay ajcxy Galilea naaxjot. Jesús ca' anajty tzocy co je mayjäy ñejhuñhuüy ma yi' ñicxy. ³¹ Com Jesús hue' anajty yaj'ixpicy yi' ydiscípulos ajcxy, co ooy ycopícyity co yi jäy huídibi tsoon tzajpjoty, yajciyegipy ma yi ymidzip, etz yaj'ögüyb, e co anajty ti y'ögy codugiig xii jadüg'oc yjugypigipy. ³² Jesús ydiscípulos ajcxy ca' huinjihuüy anajty Jesús y'ayuc, e nañ jadu'n tzigüyb anajty ajcxy co Jesús yaj'ójip, paady ca' ajcxy amidoy nej huimbizimy yijiibi ayuc.

¿Pin je' nīgi jacmijip?

³³ E Jesús miid ydiscípulos ajcxy oyjäty jim Capernaum. Co ajcxy ytijctigüy, chi Jesús yaj'amidoy ydiscípulos ajcxy, nimay:

—¿Ti ayuc miich ajcxy naymiidmiydáacigixy jim ma anajty mdüyöygixy?

³⁴ Per amonday ajcxy, com jëgixpi co anajty ajcxy ooy ti ñaymiidmiydáacigixy tüyöyjoty co pin jada' ajcxy nidügti ocjaccopícyip. ³⁵ Huin'it Jesús y'ixtacy, e chi mijhuoy je nimajmetzpi ydiscípulos ajcxy, chi ajcxy nimay:

—Pin naysajnaaanip mij, huen ity nej jihuüy ca' ytijity e huen capxmidoy ymigügtijc.

³⁶ Chi Jesús tzenigy tüg pi'c'anäg, e chi pidacy cujc'amy ma yi' ydiscípulos ajcxy. Chi tzenigy jadüg'oc, e nimay ajcxy:

³⁷ —Pin cöbije tügpajc pi'c'anäg jadu'n nej jada pi'c'anäg miid iich nxiï ycixpi, iich yi' anajty ti xycöbicyich, e pin iich xycöbijcpich, ca nan iich anajty naydügpajc ti xycöbijcyich, nañ jadu'n anajty ti cöbicy huidi ti xyquejxich.

Pin iich ajt xycamidzip'ájtím, iich ajt je' miid y'ity

³⁸ Juan Jesús nimay:

—Huindzin, ti iich ajcxy n'ijxpaady tüg jäy co ca'oybi yajpidzimy miid miich mxii, e ti ngapx'aducyich miid co ca' yi' iich ajt xypahuidíjtím.

³⁹ Per Jesús yminañ:

—Ca' mgapx'adugípy yi' jadu'mbi jäy, com huenpínity huidibi mijhuinma'ñ tumb miid iich nxiï, ca' yi' jibic xyñigapxich. ⁴⁰ Com yi' huidibi ajt ca' xymidzip'ájtím, yi' yi' miid iich ajt nbidzímim. ⁴¹ Janch janch iich miich ajcxy jadu'n nimäy co huenpinjäy huidibi ixypiy miich ajcxy xyajniï'uucp tüg vaso niï miid co miich ajcxy ti mmijnicxpety je Cristo, yi' jadu'mbi jäy ypadamy yi' y'oy'ájtín ma Dios.

Je huidibi ooy ycojotmáyity co nicxy nbocycáhuim

⁴² Huenpínity huidibi jibic-huinma'ñ mibidzimb, e yajpocycäy yi' jadu'mbi pi'ctijc huidibi ajcxy xymijnicxpejtpich, jac'oy ixypiy co yi' jadu'mbi jäy ytimyñayyayöcxodzíyíi tüg paandzaa etz ñayñajtzjibibiñhuñyib mejyoty. ⁴³ Pen miich mgi' xyajtundigoyamb jac'oy co mdim'ixpuxipy, com jac'oy co mdigíhuipy ma yi' jugy'ájtín huinixiibi cídúc, ca'ydi co Dios xypidägip miid metz mgi' jiiby jijnjoty ca'oydactuuby, ma yi' jijn ni camina ycapích. ⁴⁴ Jiiby ca'oydactuuby yi' ucxyting ca' y'ögy etz ni jijn ycapích nicaminaaxiï. ⁴⁵ E pen miich yi' mdecy xyajpocycáhuamb, ixpux, com jac'oy co mdigíhuip ma yi' jugy'ájtín huinixiibi tecytuc ca'ydi co mdigíhuip miid metz mdecy jiiby ca'oydactuuyb, ma yi' jijn ni camina ycapích. ⁴⁶ Jiiby ca'oydactuuby yi' ucxyting ca' y'ögy etz ni jijn ycapích ni caminaxiï. ⁴⁷ E pen yi' mhuiin tüg xyajpocycáhuamb, tím yajpidzim, jac'oy yi' co mdigíhuip ma yi' Dios y'ane'mdac miid tügpajc mhuiin, ca'ydi co mdigíhuip ca'oydactuuby miid metz mhuiin. ⁴⁸ Ma yi' ucxyting ni caminaxiï yca'ögy etz yi' jijn ni caminaxiï ycapích, ⁴⁹ e ma nidüg'óciy ñi'cägooda'ñ jijn xut jijn ye'n tím jadu'n nej jäy tzüch caan xiducy. ⁵⁰ Yi' caan ooy yi' y'öyity, pen ymiid xücx'ájtín. Co je caan ytigoy yxücx'ájtín, ca' ji ni ti huidibi jëb miid nyajxücxiiyim. Miid'ájtícx iich n'ayuc ma mjot mhuiinma'ñ, jadu'n iich n'ayuc nipaady nej caan, e tzina' miich ajcxy jotcuyc miid mmigügtijc nidüg nidüg.

10

Jesús yaj'ixpicy miid co jäy ytöxyijc ixmach

¹ Chi Jesús chooñ jim Capernaum, nicxy jim Judea ñaaxjot ma je it lugar Jordán mijniï nínaxi xii ypidzimy'amy. E mayjäy ooy ñayyöymujci ma Jesús anajty yajpaady. E Jesús yaj'ixpicy je mayjäy jadu'n nej anajty yaj'ixpicy'adyii. ² Chi nijëjity fariseos ajcxy ñicxy ma Jesús anajty yajpaady. Hue' ajcxy yhuinma'ñ pidaaccixy co anajty Jesús tzu'ixaangixy. Chi ajcxy y'amidooy, pen huaad tüg yëydijc ixmach ytöxyijc. ³ Chi Jesús y'adzooy, yminañ:

—¿Nej Moisés ymina'ñ ma yi' ycötújcín ñecy?

⁴ Chi je fariseos ajcxy Jesús y'adzooy:

—Moisés cötújcín yecy co tüg yëydijc jëb huaad ixmach ytöxyijc, e möhuipy ñinecy ñidiy'ajt co nej ñay'ixmájtzigixy, e jadu'n anajty ti y'oyiï nej jëb yi' ytöxyijc ixmach.

⁵ Chi Jesús yminañ:

—Moisés cojaay jada ycötújcín miid miich ajcxy ycixpi, co ooy miich ajcxy mdzach-capxycömidodaaccixy ca' mgapxymidohuaangixy Dios. ⁶ Per co je naaxhuiñybi chondacy, co Dios oga'n yajcojy tüg'óciy tijaty huidi ji'ajtp, chi Dios yajcojy yëydijc etz töxyjäy. ⁷ E je yëydijc ixmadzipy ytaj yteedy etz pudigíhuipy yi' ytöxyijc. ⁸ E je yëydijc

etz ytöxyijc tú'ciy idaangixy. Paady je yëydijc tügmucy yajpaady miid ytöxyijc. ⁹ Com yi huidibi Dios ti huijtzmucy, ca' ni pin huaad huijtzhuägy.

¹⁰ Co Jesús miid ydiscípulos ajcxy yhuimbijc ma anajty ti yjättáccixy, chi Jesús ydiscípulos ajcxy yajtihuimbijtcixy je ayuc huidibi anajty ti yaj'ixpicy ma je pijcin. ¹¹ Chi Jesús yminañ:

—Je yëydijc huidibi ti ixmach yi ytöxyijc, e picy miid huingbi, hue' yi' anajty ymidundigooyb yi ytöxyijc huidibi miid jayijp ypijcy. ¹² Nañ tim jadu'n co tüg töxyjäy ixmach je yëydijc huidibi miid ti ypicy jayijp, e ypijctigach miid huingbi yëydijc, hue' ymidundigooyb je yëydijc huidibi miid ti ypicy jayijp.

Jesús conucxy pi'ctijc

¹³ Je huin'it tiempo jäy ajcxy miid miñ pi'ctijc ma Jesús, jaydëb cñixajy etz conuucxip. Co Jesús ydiscípulos ajcxy jadu'n ijxy co jäy ajcxy nimijhuägy Jesús miid ajcxy ypi'c'ung, chi je' ydiscípulos ajcxy ix'ojoy je jäy ajcxy. ¹⁴ Co Jesús jadu'n ijxy nejhuñy nej yi' ydiscípulos ajcxy y'idich, chi ojoy ajcxy, yminañ:

—Ooy y'óyity co je pi'ctijc ajcxy xyñimijhuägyich, ca' miich ajcxy mgapx'aducy. Com yi jäy ajcxy huidibi yajpatp ma Dios y'ané'min, jadu'n ajcxy nipaady nej pi'ctijc. ¹⁵ Janch ich miich ajcxy nimäy co pinjaty huidibi ca' cöbiga'ñ Dios y'ané'min, jadu'n nej pi'ctijc cöbjccixy Dios y'ané'min, hue' yi' jadu'mbi jäy ajcxy ca' ytigihua'ñ ma yi Dios y'it lugar.

¹⁶ Chi Jesús aminenmujctay je pi'ctijc ajcxy, e chi cñixajiy etz conuucxcixy.

Tüg mutz'anäg comeñybi ymiydägy miid Jesús

¹⁷ Co Jesús chooñ jadüg'oc, chi ñimiini poyigy tüg yëydijc, ycojxtinay'ahuuiy ma Jesús yhuinduu, e yminañ:

—Miich, oybi Huindzin, ¿ti huaad ndunipyich jigix jëbi nbadipyich jugy'ájtin huidibi ca' ycixipy ytigoyipy?

¹⁸ Chi Jesús yminañ:

—¿Na'amy co xyñimäyich co oy huindzin ich? Dios tügpajc óyip, ca' jac ni pin. ¹⁹ Miich mnejhuñyb Dios ycötújcin huidibi jadu'n minaam: “Ca' mmigapxtigoyip töxyjäydijc; ca' mjäyay'ögipy; ca' mmeedzip; ca' m'ñndaacip; ca' pin mhuin'ñinip; etz myajmij'adip mdaj mdeedy.”

²⁰ Chi je jäy Jesús nimay:

—Huindzin, ti nguundäyich jadaaab cötújcin ajcxy maabi ich nbi'c'atyich.

²¹ Chi Jesús huindixpejty je yëydijc miid tzójcin jihuiyin, e chi nimay:

—Per jactigoy'ijtni jadügnax. Nicx toog tüg'óciy huidijaty miich mmiid, etz mo' yi ayoohtijc. Co jadu'n mdunipy, chi mbaadipy oy'ájtin jilby tzajpjoty. Co jadu'n mdooctähuiipy tijaty miich miid, chi minip jadüg'oc ma nyajpaadyich, e xypanícxibich, e mnaybidägiib cixyot huinjot oy nej mdimyjadipy miid ich ycixpi.

²² Co jadu'n je yëydijc midoy nej anajty Jesús ti ñimäyii, chi yhui'my taj may e co ñicxni, chi ooy ytajy ymay, com hue' je' anajty ooy ycomeeñity.

²³ Co Jesús jadu'n ixxy co je comeeñybi taj may yhuimbijtni, chi huindixpejty je' ydiscípulos ajcxy huidibi tinaayb juhuidity ma yi', e yminañ:

—Ooy chachtzipity co tüg comeeñybi ytigihuiipy ma Dios y'it lugar.

²⁴ Jesús ydiscípulos ajcxy ooy tzachhuinmay'ahuidity miid jada ayuc nej Jesús anajty ti ymina'ñ. Paady Jesús yjacminañ jadüg'oc:

—Miich ajcxy migügtijc huidibi ooy ndzocyich, ooy chachtzipity co ytigihuiip ma Dios y'ane'mdac tüg comeeñyjäy huidibi tzachnijot'ajt ycomeeñ'adii. ²⁵ Nigi chípity co tüg comeeñ jäy ytigihuiip ma Dios y'ane'my, ca'ydi co tüg camello ñaxipy ma tüg xu'ñ'ijx yxútity.

²⁶ Co jadu'n ajcxy midoy nej Jesús yminañ, chi ooy ajcxy yhuinmay'ahuidijty, e nayñimáayigixy miñ xyipy:

—Pen janch tiy'ajt jadu'n, ¿pinjäy jada' huaad jëb y'alma ñidzögipy?

²⁷ Je huidibi jäy ajcxy ca' ni minaxii huaad ca' yaj'oyïy, Dios yi' yaj'oyïhuip, com miid Dios ca' yi' ni ti chípity.

²⁸ Chi Pedro yminañ:

—Huindzin, occuendtun, iich ajcxy ti n'ixmajtztäyich tüg'óciy tijaty anajty nmíidich, e iich ajcxy nbanicxpich miich.

²⁹⁻³⁰ Chi Jesús y'adzooy, minañ:

—Janch tiy'ajt nej iich miich ajcxy nimäy co huenpínity huidibi miid iich ycixpi ti ixmach ytijc, ti ixmach y'uch ymigüg ajcxy etz ytaj yteedy, etz ytöxyijc, etz y'ung ajcxy, etz nañ jadu'n ti ixmach ycam iich ycixpi, etz iich n'ayucich etz miid Dios ytiy'ajt ycixpi, yi' ypadamy nīgi oy'ájtín ya naaxhuiñ, ixti ypadamy migo'px jadu'nyi ytijc ajcxy, y'uch ajcxy, ytaj ajcxy, y'ung ajcxy, etz ypadamy nīgi ymij cam, miid tzaachypi miid ayo'n miid iich n'ayuc ycixpi. Etz nañ jadu'n ma je xii tiempo huidibi mimb cidacpi ypadamy jugy'ájtín huidibi ca' ycixipy ytigoyipy. ³¹ Ji yajpaady ya naaxhuiñ nijējity jäy huidibi cōmay ijtp, e co yjāty ajcxy tzajpjoty, chi ca' ajcxy cōmay ida'ñ. Nañ jadu'n ji yajpaady ya naaxhuiñ nijējity huidibi ca' cōmay y'ity, e co ajcxy yjādipy tzajpjoty, chi jiiby ajcxy cōmay y'idipy.

Jadüg'oc Jesús capxpídzímnip co y'öga'ñ

³² Jesús miid ydiscípulos tüyöyp anajty ajcxy, hue' anajty ypättigiygixy jim Jerusalén. Jesús jayijp anajty ñicxy, e je' ydiscípulos ajcxy etz nañ jadu'n mayjäy panicxy anajty ajcxy Jesús. Je Jesús ydiscípulos ajcxy ooy chachhuinmay'ahuidíjticy, e jacjadyii jäy huidibi anajty ypanicxy Jesús ooy ajcxy chigiygixy. Chi Jesús huodzoñ abicy je majmetzpi ajcxy, e yajmiidmiydactay je' ajcxy jadu'n nej ytuna'ñyii yjada'ñyii jim Jerusalén co anajty ajcxy jim yja'tcixy. ³³ Jesús je nimajmetzpi nimay:

—Miich ajcxy m'ijxpy mnejhuüy co nnícxim cham jim Jerusalén. E jim Jerusalén, iich je jäy huidibi tzoon tzajpjoty, nyajcīyega'ñich mach ma yi Teedy mijtungmíidpi, etz ma yi escribas ajcxy. E chi ajcxy ane'min pidāga'ñ co huen xyaj'ócixich. Nañ jadu'n xycīyegaangixich mach ma yi' ajcxy huidibi ca' yjudiojāyity. ³⁴ Yi' ajcxy xyñixīgipy xyajxīgībyich, xyhuobipyich ajcxy miid coochac, xyhuindzuj xyjijptzújībich ajcxy, e xyaj'ögībich ajcxy. Codugīg xii maabi anajty xyaj'öccixyich, chi njugypigipyich jadüg'oc.

Jacobo etz Juan pijctzóogixy tüg may'ajt

³⁵ Huin'it Jacobo etz Juan, yi Zebedeo ajcxy ymang, nimijhuāgy Jesús, nimay:

—Huindzin, ndzojcpyich ajcxy co mdunipy may'ajt jadu'n nej yam nimaagyixy.

³⁶ E Jesús yminañ:

—¿Ti mdzojcpy co ndunipich miid miich ajcxy ycixpi?

³⁷ Chi ajcxy yminañ:

—Tun may'ajt co anajty mbaady yi m'ané'min etz m'oy'ájtín, xymöhuibich yi mij tung ma m'ané'min jaydēb n'iñāhuibich ma miich mmijc. Nidügti iich ajcxy n'iñāhuipy a'oy'amy ma miich etz jadüg anajty'amy.

³⁸ Chi Jesús nimay Jacobo etz Juan:

—Ca' miich ajcxy mnejhuüy ti ti mbijctzoogixy. ¿Nej myajnaxamyb miich ajcxy je tzaachypi ayo'n huidibi nyajnaxaamybich, jadu'n nej jihuüy m'üga'ñ ajcxy iich n'ügy e mbaada'ñ ajcxy iich nniibéjtín?

³⁹ Jacobo etz Juan y'adzooy:

—Iich ajcxy nmimadägībich minaxipyich nyajnaxipyich ajcxy yi tzaachypi huidibi mminaxamyb myajnaxamyb.

Chi Jesús yminañ:

—Janch tiy'ajt jadu'n nej miich ajcxy minañ co mminaxaangixy myajnaxaangixy yi tzaachypi jadu'n nej iich mminaxaamyich nyajnaxaamyich yi tzaachypi, tim jadu'n nej jihuüy m'ügaangixy iich n'ügy, e mbadaangixy iich nniibéjtín. ⁴⁰ Per ca' iich cötújcín

nmíididyich co ñich miich ajcxy nbidägipy tungmiid, co myajpaadip tüg ma ñich nmijc a'oy'amy, e jadüg anajty'amy. Hue' janchtiy Dios Teedy ymiid ni'ixi' pinjaty ti huin'ixy jaydeb yajnicxip je mjtung ma ñich n'ané'min.

⁴¹ Co je jacjadyii Jesús ydiscípulos ajcxy nejhuiy yadu'n nej Jacobo etz Juan may'ajt pijctzoy ma Jesús, chi ajcxy ooy mijotmäty Jacobo etz Juan. ⁴² Per Jesús huomiñ yi jacjadyii ydiscípulos ajcxy, e yminañ:

—Jadu'n nej miich ajcxy mnejhuiygixy, yi jäy ajcxy huidibi mjtungmiid ma je maybi naax cajt, mic ajcxy ane'my je naax cajt. Nañ jadu'n yi' ajcxy huidibi mic'ajt miid ma je maybi naax cajt, mic ajcxy ane'my je jäy ajcxy. ⁴³ Per miich ajcxy ca' mjadúnity nej mjtungmiidpi ma je maybi naax cajt. Pinjaty ma miich ajcxy mjtung yajnicxaamb, copicy ñaybidägyb nej tüg tumbi. ⁴⁴ Pinjaty miich ajcxy huidibi nigohuajc'ajtp, copicy ñaybidägyb nej tüg tumbi. ⁴⁵ Com ñich nañ jadu'n, je jäy huidibi tzoon tzajpjoty, ti nmiñich ya naaxhuiñ jaydeb nbubedipyich yi mayjäy ajcxy, e ca' nan yi mayjäy ñich xypubedipy. Ti nmiñich jaydeb nyegipyich njugy'ajtín ma yi o'cin. E co jadu'n nyegipyich njugy'ajtín ma yi o'cin, chi ngohua'na'ñich yi jäy ajcxy y'alma.

Jesús yajtzögy Bartimeo huidi anajty huintzip

⁴⁶ Chi oy jäty Jesús miid ydiscípulos ajcxy jim Jericó. E co Jesús tzoon Jericó ytübicy jadüg'oc, chi yi' ydiscípulos ajcxy etz janch mayjäy ñicxcixy anajty miid Jesús. Co ajcxy ycajp pidzimy, chi tüba'ay anajty yajpaady tüg huintzpi huidibi limosna anajty ypijctzooyb jabom jabom. Hue' anajty yxi Bartimeo, e Timeo anajty xiijty yi' yteedy. ⁴⁷ Co Bartimeo nejhuiy co Jesús je Nazaretpi najxp anajty ma je tü'aa, chi mic yaaxqueegy yminañ:

—Jesús, David y'ap y'oc, tun may'ajt ñich pa'ayoog.

⁴⁸ Chi je mayjäy ajcxy ogy je huintzpi, nimay ajcxy co huen amoñ. Per je huintzpi niği yminan'idích:

—Miich, David y'ap y'oc, tun may'ajt ñich pa'ayoog.

⁴⁹ Chi Jesús ytinayxijpy, e yminañ:

—Huomiingix yi huintzpi.

Chi je jäy ajcxy oy yajtzoongixy je huintzpi, nimaaygixy:

—Jotcugi', e pidig, com Jesús xyaaxtzoob.

⁵⁰ Chi mic'amy je huintzpi, najtz'oxiyy je ñibe'ñ, chi ypidigy, e ninicxy Jesús. ⁵¹ Chi Jesús je huintzpi y'amidooy:

—¿Ti mdzojcpy ndunipyich miid miich ycixpi?

Chi je huintzpi yminañ:

—Huindzin, ndzójcpyich co xyajhuindicxigibich.

⁵² Chi Jesús je huintzpi nimay:

—Jëb mnicxy ma mdijc. Com ti xymibicyich, paady ti mhuindicxigy.

Tim huin'ít je huintzpi yhuin'oyiy, e yhuindicxigy, e panicy Jesús co ytübicy jadüg'oc.

11

Jesús ytigy jim Jerusalén

¹ Co Jesús etz je mayjäy oyjá'tcixy huington ma je Jerusalén cajt ma yajpaady mejtz mutz cajt huidi xiijpy Betfagé etz Betania, huington ma je cop huidibi xiijp Olivos, chi Jesús quejxy metz ydiscípulos huen nicxy jayijp. ² Jesús nimay je metzpi ydiscípulos:

—Nix miich ajcxy ma yijmbi cajt huingtonbi. Co jim mjädipy, chi mic'amy mbaadip tüg burro ycoxóchity huidibi ca' pin yaj'iñayñi chambaad. Coguejtuutcx je burro e yajmiingix ya ma ñich. ³ Pen jim pinjaty xy'amidoogixy: “¿Na'amy co mmidzonaangixy yi burro?” Chi miich ajcxy mnimähuipy: “Je Huindzin (Jesús) yajtunamyb tzojc, e yajhuimbidamy mic'amy.”

⁴ Chi je metzpi ydiscípulos ñicxy ma je cajp huingtonbi, e oypaatcixy tüg burro ycoxóchity huington ma tüg tijc'agua. Chi ajcxy coguejtuuty je burro.

⁵ Ycoguetuutyp anajty ajcxy je burro co nijéjty jäy jim huington yminañ:

—¿Ti mdungixyp? ¿Na'amy co mgoguetuutcixy yi burro?

⁶ Chi je metzpi Jesús ydiscípulos je jäy ajcxy yajmiidmiydacy Jesús y'ayuc nej anajty ti ñimäyii. Je jäy ajcxy yminaangixy co jëb yajnicxcixy je burro. ⁷ Mic'amy ajcxy mija'ty je burro ma Jesús yajpaady. Je Jesús ydiscípulos ajcxy jübe'ñ je burro ajcxy miid yjocxhuit, chi Jesús yaj'iñay je burro. ⁸ Mayjäy ajcxy ooy yëby yhuit tügujc ma Jesús anajty ñaxa'ñ, e jacjadyii jäy pujxy ajcxy quipy'aacx, e pidaaccixy tügujc.

⁹ Je mayjäy huidibi anajty ajcxy nicxp jayijp etz axam ma Jesús, chi ajcxy ytigiiy capxp mic, yminaangixy:

—¡Hosana! ¡Gloria a Dios, ooy ycömáyity Dios! Huen capxpaady y'idipy jada yëdyjc huidibi mimb miid yi nHuindzin Dios yxi etz ymic'ajt. ¹⁰ Huen capxpaady y'idipy je ané'min huidibi jada Jesús yajtzondacp cham. Jada je' je ané'min huidibi nmij'ap nmijteedy David anajty ymiid. Hosana, huen je tzajpjoty tzinaayb ajcxy iibaatcixy capxpaatcixy jada mij'ane'mbi.

¹¹ E jadu'ñyi Jesús ycajptigiiy jim Jerusalén, e ytigiiy tigoty ma Dios ytijc. Co huindixtay tüg'óciy tijaty jiiby tzajtigoty, chi chooñ jiiby, e ñicxy jim ma je cajp huidibi yxi Betania. Chi Jesús je majmetz ydiscípulos ajcxy miidnicxy.

Jesús capxpocxy je higueri ca'pi anajty ytiim

¹² Je com jabom co ajcxy chooñ jim Betania, chi Jesús yuböccooti. ¹³ Chi Jesús ijxpaty jiguëgy tüg higueri ooy anajty yco'aayity. Chi Jesús ñicxy ma je higueri yajpaady, ixa'ñ pen ymiid ytiim. Co Jesús ymech ma je higueri, chi ijxy co je higueri ca' anajty ytiim miidity, jëyi miidity anajty y'aay, com ca' anajty ni tiempity mina higo ytiim'aty. ¹⁴ Chi Jesús migapxy je higueri nimay:

—Jadu'n nej tiempo yjacnicxni, ni pin cajacpaadipy higo tiim ma miich.

Chi Jesús ydiscípulos ajcxy midoy nej Jesús nimay je higueri.

Jesús quejxidzimday ajuybi adoocpi ma Dios ytijc

¹⁵ Co ajcxy oy yjädy jim Jerusalén, co Jesús ytigiy jadüg'oc jiiby ma Dios ytijc, chi Jesús yajpidzimday je ajuybi adoocpi ajcxy jiiby tzajptigoty. Chi Jesús tijhuimbijtay je mesa ajcxy me je meeñ yajhuäcxpi ytuñ ajcxy. Nañ jadu'n tijhuimbijty je jäy ajcxy iñaybejt huidibi muuxy toocp. ¹⁶ Jesús ca' anajty tzocy co pinjaty midigihuipy juydoogy ma Dios ytijc. ¹⁷ Jesús yaj'ixpijcpy anajty je mayjäy, e yminañ:

—Ma Dios y'ayuc necy Dios jadu'n yminañ: “ñich ndijc hue' je' tzajpcapxcapxtac ma tüg'óciy jäy ajcxy chooñ ma nidüg'óciy naax cajp ymiingixy Dios ojadajtp”, per miich ajcxy hue' yi' mhua'ñ meetzpitijc.

¹⁸ Co ajcxy je teedy mijtungmiidpi etz je escribas nejhuiiy nej anajty Jesús ti y'idich jiiby ma Dios ytijc, chi ajcxy ooy ijxtaaygixy nej ajcxy jëb yaj'ögipy Jesús. Per ca' ajcxy yhuinma'ñybaady mic'amy nej yaj'ögipy, tzigiiyb ajcxy miid je mayjäy com je mayjäy ooy tzachjihuiy huinmay jadu'n nej Jesús yaj'ixpijcgixy. ¹⁹ Co oycoodziyñi, chi Jesús ycajppidzimy.

Je higueri ytiitzni

²⁰ Je com jabom Jesús miid ydiscípulos ajcxy najxp anajty tim jopyñi ma je higueri anajty ytinäy. E je higueri ti anajty ytiitztay mabaad ytictz. ²¹ Huin'it Pedro jäymejtzcooty nej Jesús nimay je higueri, chi Pedro Jesús nimay:

—Huindzin, ix jada higueri huidibi ixiy mgapxpoj, ti yi' ytich.

²² Chi Jesús Pedro nimay:

—Mibic yi Dios. ²³ Janch ñich miich ajcxy nimäy, co ixypy pin migapxy jada huingtonbi cop, e nimäy ixypy: “Miich cop pidäg, e nicx cidäg mejyjoty”, pen ca' ti mijotmetzciy, e mibicy co jadaanip nej yi' ti ane'my je cop, chi jadu'n ytuniiyb yjadiiyb. ²⁴ Paady

hich miich ajcxy nimäy co tüg'óciy tijaty miich ajcxy mbijctzooyb ma Dios, chi Dios xymöhuipy ajcxy huídibi ti mbijctzoogixy. Pen janch miich ajcxy mibicy co Dios ti xymooygixy ajcxy je huídibi ti mbijctzooyb. ²⁵ Co miich ajcxy mgapxtaaccixy, pen ca' oy m'ity ajcxy miid tüg jäy, huinméxcix yí mmidzip tim jayijp, jigix jébi Dios Teedy huídib jiiby tzajpjoty xyhuinmecxip miich ajcxy ma ti mdundigooygixy. ²⁶ Pen ca' miich ajcxy mhuinmecxy yí mmidzip huídibi ti xymidundigooygixy, ca' miich ajcxy xyhuinmecxa'ñ Dios Teedy huídibi yajpatp tzajpjoty.

Jesús je' ycötújcín

²⁷⁻²⁸ Je huin'it tiempo Jesús miid je' ydiscípulos ajcxy yhuimbijty jim Jerusalén. E co Jesús anajty yhuídity tzajtigoty, chi nijéjity huindzindijc huídibi nigohuajc'ajtp anajty je teedytjic etz escribas ajcxy huídibi nijayduutpi Dios ñecy, nimiiñ ajcxy Jesús, e ymíñañ ajcxy:

—¿Pín cötújcín ti xymöy huídibi ti mduñ ya tzajtigoty? ¿Ma cötújcín ti mbaady co jéb m'ane'my ya tzajtigoty?

²⁹⁻³⁰ Chi Jesús ymíñañ:

—Hich miich ajcxy nañ jadu'n nyaj'amidohuamyb tüg ayuc. E pen mni'adzooyb ajcxy, huin'it ajcxy nyajnimähuipy ma hich ti nbaady yí mic'ajt etz yí cötújcín, co jadu'n nduñich jiiby tigoty ma Dios ytjic. ¿Pín yajñibijc Juan, je Bautista, co huen jäy yajñibety? ¿Dios, o naaxhuiñyäj? Adzoogich ajcxy.

³¹ Chi ajcxy ytigiiy huinmay'ahuídijtpi, ñayñimáayigixy miñ xyipy:

—Pen mínaaním co Dios tzajpjotypi ti yajñibicy Juan, chi Jesús xyñimáayimipy: “¿Nej co ca' miich ajcxy mibijcy Juan y'ayuc?” ³² Nañ ni ca' jébi hich ajt nmínaaním co jäy ajcxy ti quejxy Juan.

Com chigiiyb anajty jäy com ñejhuiyb anajty ajcxy co Juan je Bautista Dios anajty ytiy'ajt ymiid. ³³ Chi ajcxy Jesús nimay:

—Ca' hich ajcxy nejhuüy pín ti yajñibicy Juan.

Chi Jesús ymíñañ:

—Hich nañ jadu'n ca' nnigapxa'ñich pín ti xycötujcmöyich co jéb nduñich huídibi ndumybich.

12

Je naymidúniptijc jibicjäybi ajcxy y'ijxpejt

¹ Je huin'it xii Jesús jacmígapxy je mayjäy miid jihuimbit ayuc, ymíñañ:

—Ji yajpaady tüg yéydijc huídibi camuuxy ti cojy ma ycam, e ti co'aguemy je camuuxy cam, e yaj'oyiiy tügi tang ma huinmicxa'ñ je camuuxy. Nañ jadu'n je yéydijc tüg poch yajpidígy ma ycamuuxy yaj'ixihua'ñ co cuent'aty. Co anajty ti ni'ixidäy ti a'ixidäy, chi ycamuuxy cam yejcy ajuyducy ma nijéjity tumbidijc. Chi chooñ viaje tumbi jigüegy it. ² Je huin'it tiempo co yhuaad'ajtni je cosechi, chi je cogam quejxy tüg ytumbi jim ma je' ycam yajpaady, co hueen je tumbidijc yéjccixy je cosechi, jadu'n nej anajty ti ycapxytuñ miid je' ajcxy. ³ Chi je cam tumbidijc ajcxy majch je cogam yquexyöyp, chi huinhuojpy jijphuojpy ajcxy. Chi ajcxy quejxhuimbijty jadu'ñyi, ni ti ajcxy camoy. ⁴ Chi je cogam quejxy jadüg ytumbi ma je ycam yajpaady. Chi tumbidijc ajcxy tzaagäch je mimetzpi quexyöyp etz yajtzachiy ajcxy ma ycohuajc, chi ajcxy ooy oiy oyñinej. ⁵ Chi je cogam jacquejxy jadüg ytumbi e ajcxy tumbidijc yaj'o'cy je midugigpi quexyöpy. Chi je cogam jac tim quejxy jadyi ytumbi. Chi je tumbidijc ajcxy je cogam ytumbi huinhuojpi jijphuojpi nijéjity, e nijéjity ajcxy yaj'o'cy.

⁶ Je cogam ymiid anajty tügpajc ymang huídibi anajty ooy tzocy jihuiy. Je' oy quejxcogixiy ma je ycam yajpaady. Je cogam huinmay jadu'n co je tumbidijc ajcxy yajmij'adiiyb je' ymang. ⁷ Chi je tumbidijc ajcxy ñayñimaayi miñ xyipy: “Jada yéydijc je cogam jada ymang huídibi jé'adaanip je yteedy ypidägy. Tzoc yaj'ó'cim, e jadu'n je cam

njé'ájtím.”⁸ E jadu'n ajcxy majch je cogam ymang yaj'ögy ajcxy. Chi ajcxy yajpidzimy camjoty, e jibijptacy agajjixci'py.

⁹ Co Jesús jadu'n miydactay je jihuimbit ayuc, chi yminañ:

—¿Ti ytunamyb je cogam miid je tumbidijc ajcxy? Hue' min ci'm ma je' ycam, e yaj'öctähuiipy je tumbidijc ajcxy huídibi tundigoy. E yegipy pijctzoy je' ycam miid huingbi jäy ajcxy.

¹⁰ ¿Nej ca'ni miich ajcxy mgapxy yi Dios ñecy ma jadu'n yminañ?

Je yéydijc huídibi je jäy ajcxy ca' anajty tzocy, Dios ti pidägy mij'ane'mbi. Tim jadu'n nipaady nej tzaa oyjatypi huídibi je pojtzpidijc ca' ajcxy yajtuna'ñ, e je' oy ti yhui'mni ma anajty yjaccopícyty.

¹¹ Jada tung je Huindzin Dios ti tuñ, e ooy oy n'íjxim njäygidaacim.

¹² E huin'it je judíojäy ajcxy ytungmiidpi ooy jamadzaañ anajty Jesús, com ñejhuiyb anajty ajcxy co Jesús ñigapxyii yi' ajcxy. Com tzigiiyb anajty ajcxy miid je mayjäy, chi ajcxy tim huinyöducy, chi ñíxcixni.

Yajnidiiygixy pen jébi coguéjtin yajyecy o pen ca'

¹³ Jac'axam je judíojäy ajcxy ytungmiidpi quejxy ajcxy ma Jesús yajpaady mejtzpicy ixpicytjic. Tügpcy anajty ñaygomájtzigixy miid yi fariseos ajcxy, etz jadügpcy ma je rey Herodes. Hue' anajty ajcxy huinma'ñ ixtaayb nej ajcxy ocxihuiipy Jesús. ¹⁴ Jada mejtzpicypi ixpicytjic ñíxcy ajcxy ma Jesús, e yminañ ajcxy:

—Huindzin, iich ajcxy nejhuiyb co myaj'ixpijcy je tiy'ajt, ca' jäy mdzigäy, com ca' huin'ixpety myaj'ixpicy. Tú'ciy miich mduñ miid mic jäy, miid comeñyjäy, etz miid ayoob jäy. Tudägy jäy ajcxy myaj'ixpicy jadu'n nej huaad ajcxy cuychinaaygixy Dios ytiy'ajt. Nejhuñhuaamybich ajcxy nej miich yaj'ixpijcy je mayjäy. ¿Nej tundigooyim miid yi Dios ycötújcín co nmigüéjtim César, je romano jäy mij'ane'mbi, o ca'ji? ¿Nej jeb nmigüéjtim, o ca'ji?

¹⁵ Per Jesús ñejhuiyb anajty ajcxy yjibic-huinma'ñ, e chi ajcxy nimay:

—¿Na'amy co miich ajcxy xyjot'ixy xyhuinma'ñ'íxyich? Yajmiingix tüg meeñ jigix n'oc'ixipyich.

¹⁶ Chi ajcxy mimiiñ tüg meeñ e co Jesús ijxy je meeñ, chi yminañ:

—¿Pin y'ahuanax etz pin yxií ijtp ma jada meeñ?

Chi ajcxy y'adzooy:

—Hue' yi' César.

¹⁷ Chi Jesús yminañ:

—Mo' je César huídibi yi' yjé'ajtpy, e mo' Dios huídibi Dios yjé'ajtpy.

Chi ajcxy ooy jihuiy huinmay jadu'n nej anajty Jesús ti y'adzooy.

Yajnidiiygixy pen je tiibi öccixy jugypigipy jadüg'oc

¹⁸ Je huin'it tiempo nijéjity saduceos ajcxy ymiñ ma Jesús. Yi saduceos ajcxy yminaangixy co ca' pin yjugypiga'ñ tiibi y'o'ccixy. ¹⁹ Chi je saduceos ajcxy Jesús nimay:

—Huindzin, Moisés jayhui'my je cötújcín co tüg yéydijc y'ögy, e co'ögy yhui'my je ytöxyjic e ca'ni ytöxyjic ung'ixy. Pues copicy je co'ögy ytöxyjäy ypigipy miid ña'y y'uch yéydijcpi jigix jébi je töxyjäy y'ung'ixipy huídibi huimñhuij jadu'n nej codijc cobidägy ma je yteedy y'ajch ypidägy. ²⁰ Pues jim ma tüg cajp anajty chinäy huixtujc yéydijc tüg que'x. Je ungoob ypijcy, e chi ix'o'cy ytöxyjic, e ca' ni tüg y'ung yajhui'my. ²¹ Je mimetzpi yéydijc ypijcy miid je co'ögytöxyjäy, e nañ jadu'n ix'o'cy ytöxyjic e ca' ni tüg ung yajhui'my. E nañ jadu'n je midugiigpi miid ypijcy je töxyjäy, e nañ jadu'n ix'o'cy je ytöxyjic, e ca' ni tüg y'ung yajhui'my. ²² E jadu'n oytuñyii yjadyii miid je töxyjäy co ti anajty miiddzinay'abidzimdäy je nihuixtujcpi yéydijc tüg que'xpi. E je nihuixtujcpi ix'o'cy ajcxy je töxyjäy, e ca' ni tüg y'ung ajcxy yajhui'my. E chi je töxyjäy oy y'öcni. ²³ E co anajty xii tiempo paaty, co anajty Dios yajjugypicy yi tiibi ajcxy y'ögy, ¿huídibi jada'

ajcxy niducti je yëdyjic töxyijc'adaanip je töxyjäy? Com ti ajcxy jadu'n ni huixtucpi miid tzinay'abidzimgixy.

²⁴ Chi Jesús je saduceos ajcxy nimay:

—Miich ajcxy ca' mhuinjihuüy je tiy'ajt, com ca' mhuinjihuüyigixy Dios y'ayuc ytiy'ajt, e com ni ca' mnejhuüyigixy je mic'ajt huidibi Dios ymiid. ²⁵ Pues co anajty yjugypíjccixy je jäy tiibi y'ó'ccixy, chi ca' ajcxy ypiga'ñ, e nañ jadu'n ni ca' ajcxy ñaymöhüiyb y'ung huen píjccixy. Hue' ajcxy yjugy'adaangixy chinähuaangixy jiiby tzajpjoty, tim jadu'n nej je ángel ajcxy chinaaygixy yjugy'ájtixy. ²⁶ Per je tiy'ajt co jäy ajcxy tiibi y'ó'ccixy yjugypigaangixy, ¿nej ca'ni mgapxyni Moisés ytiy'ajt ma anajty Dios ymigapxyii co je aay ujtz anajty chachtoty? Chi yminañ: “Ích je' je Dios huidib Abraham, Isaac etz Jacob yDios'ajtpy.” ²⁷ Com yi Dios ca' yi' yDios'aty ma yi öcpi ajcxy huidibi y'alma ti ycixy ti ytigoy. Yi Dios Dios'ajtp yi' ma yi juugypí ajcxy. Paady miich ajcxy ooy mij mdundigooygixy co ca' mhuinjihuüyigixy Dios ytiy'ajt.

Je ané'min huidibi ooy nigí ycopícyty

²⁸ Nañ jadu'n je huin'it tiempo nimiiñ Jesús tüg escriba. E yi' anajty y'amido'ijtpy co Jesús adzooy je jäy huidibi ca' mibicy co yi öcpi yjugypigipy ajcxy jadüg'oc. Jada escriba ñejhuüy co Jesús ooy oy ti y'adzooy je saduceos ajcxy, paady yi' Jesús amidooyi:

—¿Huidibi je' Dios y'ané'min jacmijpi?

²⁹ Chi Jesús y'adzooy:

—Yi Dios ycötújcín huidibi jaccopícyip, yi' je' huidibi minamb: “Midoogix Israel jäy, je Huindzin Dios huidibi nDios'ájtím, yi' je' ajt nHuindzin Dios tügpajcpi. ³⁰ Tzoc jihu' etz yajmij'at mHuindzin Dios miid tüg'óciy m'aa mjot etz miid tüg'óciy m'alma, etz miid tüg'óciy mhuinma'ñ, etz miid tüg'óciy mmic'ajt.” Jada je' je jaccopícyip ané'min. ³¹ Je mimetzpi Dios ycötújcín jahueengi tú'ciy ñaybadyii miid je jayijpi, yi' huidibi jadu'n minamb: “Tzójccix jihuiygix yi mmigügtijc tim jadu'n nej mnaychogyii mnayjihuiyii ci'm.” Jada metz Dios ycötújcín jaccopicy jacmic'ajt miid ca'ydi jac huidibi cötújcín.

³² Chi je escriba yminañ:

—Ooy oy ti m'adzooy. Janch tiy'ajt jadu'n nej miich mina'ñ, co ji yajpaady tügpajcpi Dios, e ca' ji jadüg Dios mic'ajt miidpi. ³³ E janch tiy'ajt co copicy nmijpidaacim nyajmij'ájtím Dios cixyot huinjot miid tüg'óciy ajt nhuinma'ñ, miid tüg'óciy ajt n'alma, etz miid tüg'óciy ajt nmic'ajt. E copicy ndzójcim njihuüyim nmigügtijc tim jadu'n nej naychójcim nayjihuiyim ci'm. Jactzoobatp jada ca'ydi co tüg'óciy yi huindzigi'ñ huidibi anajty yajno'cpi miid Dios ycixpi.

³⁴ Co Jesús ijxy jadu'n nej je escriba tiydudägy anajty ti y'adzoyii, chi yminañ:

—Jahuenjaty miich mmibíjcín ytigoy'ityñi jaydeb mdigíhuipy ma Dios y'ane'my.

Co Jesús anajty jadu'n ti y'adzooy je escriba, chi ca' jac pin ti ayuc yjacyaj'amidoohui.

¿Pin je' y'ung je Cristo?

³⁵ Jesús yaj'ixpijcpy anajty je mayjäy jiiby ma Dios ytiyc, e yminañ:

—¿Na'amy co yi escribas ajcxy yminaangixy co Cristo hue' je' David y'ap y'oc? ³⁶ Com je Espíritu Santo ymoy David jada ayuc huidibi jaybety ma je Salmo necy ma jadu'n yminañ:

Yi Huindzin Dios nimay ích nHuindzin: “Íña' ya a'oy'amy ma ích nmijc, ixti cooni anajty miich mmidzip ti nmimadactäyich, jadu'n nipaadipy nej jihuiy ti nbidägyich miich mmidzip jadu'n nej tüg tinaybejt.”

³⁷ ¿Per nej co yjadu'nity co jäy ajcxy yminaangixy co je Cristo David je' y'ap y'oc? ¿E David ci'm yminañ co je Cristo yi' yHuindzin'ajtpy?

Jotcujc anajty je mayjäy amidoo'ijti Jesús y'ayuc.

Jesús ca'p jäygidaci leyhuindzin ajcxy yhuinma'ñ

³⁸ Jesús yaj'ixpijcpy anajty je mayjäy, e yminañ:

—Naycuend'ájtigix miid yi escribas ajcxy. Com yi escribas ajcxy ooy jotcuyc co nayxóxigixy miid yhuít oyjatypi yoñjatypi. Ooy ajcxy tzocy co yajcapxpcóxcixipy huindzigi'n'amy mayjáyduum. ³⁹ Yi escribas ooy ajcxy tzójccixy yi cödumbi iñaybejt ma je naymujctac, etz ooy ajcxy tzójccixy iñaybejt ma yi cömaybi jáy iñay ma jáy ajcxy yxiiduñ. ⁴⁰ Yi escribas ajcxy yajcijxtaayipy yi co'ögy ytöxyjáy ypidágy miid ajcxy y'adzójcin. Yi' ajcxy ooy túngixy jecy tzajpcapxycapxií jigix ajcxy capxpaady idipy. Dios nígi tzaachytunipy yi escribas ajcxy miid ypocy ycixpi, ca'ydi jac ni pin.

*Je ayoo*bi töxyjáy y'ofrendi

⁴¹ Tüg xií anajty Jesús iñay jiiby tigoty ma Dios ytijc. Iñayb anajty ma je limosna caja huinduu. Jesús yhuindüicxyp anajty je jáy ajcxy huídibi meeñ pidaaccixp ma je ofrenda caja. E maycomeeñjáy ooy ymeeñ pidaaccixy janch may. ⁴² Tim huin'ítty yja'ty tüg co'ögy töxyjáy janch ayooob pidacy metz pi'c meeñyhuácxy, huídibi ca' ooy choobaady. ⁴³ Chi Jesús huoomujcy je' ydiscípulos, e ñimay ajcxy:

—Janch tiy'ajt jadu'n nimaaygixy co jada co'ögy ytöxyjáy ayooob jac'anaxy jada ti pidágy ofrenda, ca'ydi jac ni pin. ⁴⁴ Tüg'óciy comeeñydijc ajcxy ypidacpy ma y'ofrenda yi meeñ huídibi yajconajxyp. Jadayaabi co'ögytöxyjáy ti pidacy tüg'óciy huídibi anajty ymiid, je meeñ tüg'óciy huídibi anajty ñigayamy yi' ymooyb Dios.

*Jesús y*mina'n co Dios ytijc yhuindigooyipy

13

¹ Co Jesús ypidzimy ma Dios ytijc, chi nidügti ydiscípulos ñimayi:

—Huindzin, ix jada maychaa mijjatypi etz jada maybi tijc ooy y'oy'oydúñity.

² Per Jesús y'adzooy, yminañ:

—Huindicx miich ajcxy jada maybi mijjaty ytijc. Minip tiempo mina tüg'óciy jada tijc nicxy yhui'my taj xit, ca' ma tzaa macxy. Huindigoydáhuip tüg'óciy.

Je tiy'ajt ma ca'ni naaxhuiñybi ycixa'ñi ytigoya'ñi

³ Jesús miid ydiscípulos ajcxy ñicxy ma je cop huídibi xiijip Olivos. Jim ajcxy co'ijxnaxy je Dios ytijc. Iñayb anajty Jesús jim copcixy co Pedro, Jacob, Juan etz Andrés ameech migapxy Jesús, yminaangixy:

⁴ —Tun may'ajt ich ajcxy yajnimaayg mina jada ytuna'ñyí yjada'ñyí co huindigoydáhuip Jerusalén cajp. ¿Ti ijxpejt'adam co anajty jadayaabi jadu'n ytuna'ñyí yjada'ñyí?

⁵ Chi Jesús y'adzooy ajcxy je' ydiscípulos yminañ:

—Ix pinjaty xyhuin'ingixy. ⁶ Ooy jáy may ymiinañ miid ich nxii. Ñaydijáangixy co je' ajcxy je' je Cristo, ymina'na'ñ ajcxy: “Ich je' je Cristo.” E ooy jáy may huin'inaangixy.

⁷ Co miich ajcxy ayuc mmidohuipy co jáy chachchiptúngixy xií ya, ca' mdzigíygixip, com ooy ycopícyty co jada jadu'n jayjip ytuníyb yjadiyb. Ca' nan hue' je' anajty tim cijxp tim tigooyb je xií je tiempo. ⁸ Nayñibidígíib tüg naax cajp miid huingbi naax cajp, e gobierno miid huingbi gobierno. E minipy mic ujx canaag'it etz mij yuu mijpa'm xií ya. E jáy ajcxy ooy yhuänipy yjihuñhuipy ycanaymijotcuyc'ájtigixipy. Jada tzaachypi ayo'n tzonacni yi' anajty.

⁹ Chi Jesús yjacminañ:

—Nayguend'ájtigix miich ajcxy, com yi mmidzip ajcxy xymájtzcixip, e xycíyéjccixip ma tungmiidpidijc, e yxhachytúngixip xyhuójpcixip ma yi judíojáy ñaymujctac ajcxy. Xyajníxcixip mach ma rey etz ma gobernador ajcxy yhuinduu miid ich ycixpi com miich ajcxy xymibicyich. E miich ajcxy tiy'ajt myegipy miid ich ycixpi, ixti ma rey ajcxy etz ma gobernador ajcxy yhuinduu. ¹⁰ Ca' anajty xií tiempo paady mina ycixa'ñ naaxhuiñybi, chi ajcxy capxhuäcxtáhuipy ich n'ayuc huindu'myb ñaaxhuiñ ma tüg'óciy naax cajp. ¹¹ Co jáy ajcxy xyajnícxip mach ma codungdijc co xytiydúngixipy, chi ca' ni nej mjot'adiyb, ni ca' mhuinmayipy nej m'adzógixipy. Mgápxcixipy je ayuc huídibi Dios

xymóoygixipy, com je ayuc huidibi mgápxcixip, ca' nan miich je' anajty ajcxy m'ayuc. Hue' je' je Espíritu Santo xymóoygixipy capxy ayuc. ¹² Yéydijc ajcxy yciyegamyb ma tungmiidpi yci'm y'uch ajcxy co huen yaj'ögyii. E nañ jadu'n je ungdeedy yciyegamy yci'm y'ung ajcxy ma tungmiidpi. Nañ jadu'n yi' y'ung ajcxy ciyegipy yci'mdeedy co huen yaj'ögyii. ¹³ May naaxhuiñjáy ca' xychogipy xyjihuihuipy miich ajcxy miid ich ycipi. Pen miich ajcxy mmictinaayb ma mmibijcin, ypaadip miich ajcxy m'alma nidzoocin.

¹⁴ Chi Jesús yjacminañ:

—Co anajty m'íjxcixy je huidibi Daniel ñimiýdac jecy'ajty, co pinjaty jibic-huinma'ñ tumb ma ca' ypadyii ma Dios ytijc, huidibi ooy ycodzigjity. Miich ajcxy huidibi tzinaayb jim Judea, co jadu'n m'íjxcixipy, chi nicx mgueectzoocix ma tungop. ¹⁵ Yi jáy ajcxy huidibi yajpatp ma ytijcnicxy ca' ñícxity tigoty ma ytijc. E ni ti jiiby cayajpidzimipy. ¹⁶ Yi jáy ajcxy huidibi yajpatp camjoty, ca' ajcxy nihuimbiditye je' yjocxy huit huidibi ymiid. ¹⁷ Huin'it xii huin'it tiempo ayo'n pada'ñ je töxyjáy huidibi anajty ti y'ungtzimigy, e nañ jadu'n yi' ajcxy huidib miid y'ung ma'xung yajtzitzp. ¹⁸ May'ajt ajcxy mbijctzoohuipy ma Dios, co jada jadu'mbi ayo'n ca' ytuniyb yjadiyib ma anajty ytiich tiempity. ¹⁹ Yi jadu'mbi xii tiempo jáy ajcxy ayo'n tzaachypi minaxipy yajnaxipy. Ni caminaaxii jáy jadu'n tzaachypi mijcajee ti minaxy ti yajnaxy maabi Dios cojy naaxhuiñybi oga'n, ixti chambaad. E caminaxii jadüg'oc ycajadiyib jadu'n. ²⁰ Pen ca' Dios capx'aduga'ñ yjiibi ayo'n xii ayo'n tiempo, ca' ni pin chögipy. Per Dios ycapx'adugamyb yjiibi ayo'n tiempo miid je mibijcpidijc ycipi huidibi Dios ti huin'ixy.

²¹ Co yi jadu'mbi xii tiempo anajty ymiin, ca' mmibigipy, pen ji pinjaty xyñimaaygixy: “Íjxcix, cha yajpaady je Cristo”, o “jim'amy yajpaady je Cristo.” Ca' mmibijccixipy jáy y'ayuc. ²² Minip jáy ajcxy huidibi ñayyajnaaxanigixy nej Cristo, e ymináangixipy co capxhuäcxy ajcxy Dios y'ayuc, e ca' yjánchity. Ytunipy ajcxy mij huinma'ñ etz mijpi ijxpejt, ixti jahuin'ina'ñ je mayjáy ajcxy huidibi Dios ti yhuin'ixy. ²³ Nayquend'ájtigix miid yi jadu'mbi jáy ajcxy, com jayijp ich miich ajcxy yi' ti nyajmiidmiydägy.

*Nej jada' je Dios y'ung ymini*py jadüg'oc

²⁴ Chi Jesús yjacminañ:

—Co anajty yi jadu'mbi ayo'n tiempo ti ñaxy, ycoodzihua'ñ etz je po' ca' y'ana'ñ. ²⁵ Maymadza' ycahuip, e nañ yücxiip huidijaty mic'ajt miid tzajpjoty. ²⁶ Je huin'it xii je huin'it tiempo co jadu'n anajty ytunyii yjadyii, huin'it ajcxy m'ixipy, ich je jáy huidibi tsoon tzajpjoty, co ich anajty nmiiñich jocjoty miid tüg'óciy nmic'ajt n'oy'ajtich. ²⁷ Co jadu'n anajty nmiiñich, chi mic'amy nguexipyich ich n'ángeles ajcxy ma xii ypidzimy, ma xii ycidägy, ma jímboj ypidzimy etz ma tichpoj ypidzimy. N'ángeles ajcxy yajmuga'ñ tüg'óciy ich njáy, huidibi ti nhuin'ixyich, xim yam ma ajcxy yajpaady ya naaxhuiñ, etz jiiby tzajpjoty.

²⁸ Chi Jesús yjacminañ:

—Jéb miich ajcxy tiy'ajt mbigipy ma yi higueri jadu'n nej je xii je tiempo mimb cidaacni. Co je higueri jadüg'oc ñihuamiy, chi miich ajcxy mnejhuüy co ti yhuingoni mina ypottigiyyi. ²⁹ Nañ tim jadu'n co m'ixipy tuniyb yjadiyib tüg'óciy ijxpejt nej ti nnimaaygixy, chi mnejhuuip co ti yhuingoni je tiempo mina nhuimbidityich jadüg'oc ya naaxhuiñybi. ³⁰ Janch ich miich ajcxy nimáy co jada huidibi ti nnimiýdacyich tunib jadiib ca'ni anajty y'öctay je jáy ajcxy huidibi jacjogy'ajtp jadachambi xii jadachambi tiempo. ³¹ Je tzajp etz je naaxhuiñybi cixipy tigoyipy. Ich n'ayuc huidibi ngapxyich, ca' ycipipy ytigoyipy ni caminaxii. ³² Ca' ni pin nejhuüy je xii je tiempo mina ytuna'ñyii yjada'ñyii jadu'n nej ti ich miich ajcxy nnimaaygixy. Ni je ángeles ajcxy jiiby tzajpjoty ca' nejhuüyigixy, nañ ni ich, Dios y'ung', ca' nejhuüyich. Jéyi Dios Teedy tügpajc nejhuüy.

³³ Ni'ixi' ahuíjxcix. Mibijctzoogix Dios jabom jabom, com ca' mnejhuüyigixy mina anajty ytuna'ñyii yjada'ñyii yi huidibi ti nyajniimaaygixy. ³⁴ Yi xii yi tiempo huidibi

minip jadu'n nipaady nej tög comeeñyäjy huidibi ñicxa'ñ ma tög it lugar huidibi jigüegy yajpatp. Jayijp ca'ni anajty chooñ, chi yajñibijcy je ytumbi ajcxy nidüg nidüg je' ytung. E nimay je' ytumbi huidibi cuend'ajtp je tijc'aguu co huen ni'ixi' y'idipy ma tijc' aguu. ³⁵ Ni'ixi' m'idipy miich ajcxy. Com ca' mnejhuiygixy mina je codijc yhuimbida'ñ ma ytijc, pen namgodziy, o mij coodz, o moñi, o ma anajty ti yxiimiiyñi. ³⁶ Ca' jécyity co yjadipy timetiini, e xyajyöybéjtcixipy anajty mdzachmaagixy. ³⁷ Yi huidibi ñich miich ajcxy ti nyajñimaaygixy, nañ jadu'n nimäyich tög'óciy jäy co huen ajcxy nidüg'óciy ahuijxcixip ni'ixi' je xii je tiempo mina nhuimbidipich jadüg'oc ya naaxhuiñ.

14

Xicmujccixy capxmujccixy co Jesús madzaangixy

¹ Tögoy'ijtni anajty mejtz xii co judíojäy ajcxy nixiiduna'ñ je pascua xii, mina ajcxy tzajcaagy cay huidibi ca' levadura miidity. Je judío teedy ajcxy huidibi jacmijtungmiid etz je escribas ajcxy huinma'ñ'ixtaaygixy nej jëb ameech májtzcixipy Jesús, e yaj'ögaangixy, ca'ydi je mayjäy nejhuüy. ² Chi ajcxy ñayñimayi miñ xyipy:

—Ca' y'óyity co nmájtzm Jesús xiijoty. Com ca' yjécyity co je mayjäy yjotmätcot-táhuipy, e ytigihuiip huambi jihuiiyb ajcxy.

Tüg töxyjäy pidacy aceite ma Jesús ycohuajc

³ E Jesús jim anajty yajpaady jim Betania. Hue' Jesús anajty yajpaady ma Simón ytijc, je Simón huidibi anajty ymiid ñibüdz pa'm. Jesús iñaayb anajty ma caydac co ymiñ tüg töxyjäy miid tüg tzaadüdz quiig ujtz miid perfume huidibi ooy oy yxuugy. Jada perfume ooy anajty chóohuity. Chi je töxyjäy yaj'ahuäch je quiig, e yajcöyogiy Jesús je perfume huidibi ooy oy yxuugy. ⁴ E nijëjity jäy ajcxy huidibi anajty jim, ca' anajty ajcxy yjotcújcity miid huidibi je töxyjäy ti tuñ, e ñayñimayi ajcxy miñ xyipy:

—¿Nej jada co ocyaj'ayooni yi perfume huidibi ooy oy yxuugy? ⁵ Jac'oy co ixipy yajtoogy yi perfume tugiig migo'px peexy, jigix yajpubedipy ayoohtijc.

E ca' jadu'n ajcxy tim jäygidacy nej je töxyjäy ytuuñ miid Jesús, chi ix'ojy ajcxy je töxyjäy ayooob.

⁶ Chi Jesús yminañ:

—Ixmajtzcix jada töxyjäy. ¿Nej co m'amayiygixy? Yi huidibi ti tuñ miid ñich, ooy yi' y'óyity. ⁷ Je ayoohtijc ca' ytigoy'idipy ma miich ajcxy nimina. Huen huidibi xii huen huidibi tiempo jëb mbubedip ajcxy ayoohtijc. Per ñich ca' n'ida'ñich ya jecy miid miich ajcxy. ⁸ Jada töxyjäy ti tuñ miid ñich jadu'n nej ti ymadägy. Yi' ti pidägy ma ñich nninïcx perfume huidibi ooy oy yxuugy. Yi' jijp'ijxpy mina naaxtigihua'ñich. ⁹ Janch ñich miich ajcxy nimaaygixy co huen yma'ámyity ya naaxhuiñ ma anajty yaj'ñhuäcxy yajcapxhuäcxy jada ayuc jada tiy'ajt huidibi nidzoocin miid, yajnimiydägipy huidi jada töxyjäy ti tuñ, jigix capxpaady y'idipy.

Judas cïyecy yi Jesús ma ymidzip

¹⁰ Huin'it tiempo je Judas Iscariote, nidüg je nimajmetzpi huidibi Jesús anajty ti huin'ixy, oy miid ñaygapxyii je teedy mijtungmiidpi nej jëb cïyeycy Jesús ma yi teedy ajcxy. ¹¹ Co je teedy mijtungmiidpi ajcxy jadu'n midoy, co je Judas cïyega'ñ Jesús ma yi' ajcxy, chi ajcxy ooy yjotcugiiy. Chi ajcxy Judas meeñ yajhuinhuaniiy. Chi Judas yhuinma'ñ'ixtay nej jëb occïyecy Jesús ma yi' ajcxy.

Co Jesús y'adzu'ajty pascua xiijoty

¹² Chi paty je mij xii mina je xii'ajtpidijc tzajcaagy cay huidibi ca'p levadura miidity, e yaj'öccixy je cöbixy huidibi ajcxy yajhuindzigiiyb anajty Dios. Chi ydiscípulos ajcxy y'amidooy Jesús:

—¿Ma'amy mdzocy co ni'ixiiyim je pascua xii adzu'ájtin?

¹³ Chi Jesús quejxy metz ydiscípulos ajcxy cajpjoty, chi nimay:

—Jim miid mnaybadiiyb tög yëydijc huidibi nii tzimnicxp ma tög majt. Miich ajcxy mbanicxiyb je yëydijc. ¹⁴ Mbanicxiy ajcxy je yëydijc, ixti coon mbajädipy ma ytijc. E miich ajcxy mnimähuipy je codijc: “Je Huindzin Jesús ñejhuñhuam ma miich miidty tög cuarto ma je Huindzin Jesús miid ydiscipulos ajcxy jëb caaygixy yi pascua xii adzu'ájtin.”

¹⁵ Je codijc ci'm xyajni'ixiiygixyip tög cuarto mijpi ma je mimetz piso huidibi ti yajni'ixiy. Ma yijimbi cuarto miich ajcxy mni'ixihuipy yi pascua xii adzu'ájtin.

¹⁶ Chi je metz Jesús ydiscipulos ajcxy tüyöychooñ. Co ajcxy yja'ty cajpjoty, chi ajcxy paty je cuarto, tim jadu'n nej Jesús jayijp yminañ. E jim ajcxy ni'ixiy je pascua xii adzu'ibi.

¹⁷ Nam coodziyñi anajty co Jesús yja'ty ma je cuarto miid jacjadyii ydiscipulos ajcxy.

¹⁸ Co anajty jim ycaaygixy ma je caydac, chi Jesús yminañ:

—Janch iich miich ajcxy nimay co nidüg miich ajcxy huidibi cham caayb miid iich, xyciyegaambich ma nmidzipich.

¹⁹ Co je Jesús ydiscipulos jadu'n midooy, chi ooy ytigiiy tajpi maybi ajcxy, e ñay'amidóohuigixy miñ xyipy, e tög yminañ:

—¿Nej iich jada'ji?

E jadüg yminañ:

—¿Nej iich jada'ji?

²⁰ Chi Jesús yminañ:

—Yi' yi' nidügti yi nimajmetzp huidibi tocxmujcp miid iich ma tügpi texy. ²¹ Pues janch iich je', je jäy huidibi tzoön tzajpjoty, nbadaamybich tzaachypí ayo'n jadu'n nej yjaybétyity ma yi Dios ñecy. Per mij ayo'n pada'ñ je jäy huidibi xyciyegaamich ma iich nmidzip. Jac'oy co ca' ycadimma'xung'ajty jada yëydijc.

²² Caayb ajcxy anajty, co Jesús conigy tög tzajcaagy, e jayijp yajnax Dioscojuyip ma Dios, e chi tujc-huäcxy je tzajcaagy, moy je' ydiscipulos ajcxy. E co Jesús jadu'n tuñ, chi yminañ:

—Caaygix jada tzajcaagy. Jada tzajcaagy iich jada nninix.

²³ Chi Jesús conigy je ügy vaso, e co Dioscojuyip yajnaxy, chi moyday ajcxy je ügy, e nidüg'óciy ajcxy uucy je ügy. ²⁴ Chi Jesús yminañ:

—Jada ügy iich nni'py'ajtpy huidibi temamb yogamb. Je' jada jemybi Dios ycötújcín huidibi Dios yejc miid jäy ajcxy ycixpi. ²⁵ Janch tiy'ajt jadu'n nej iich miich ajcxy nimaaygixy, co ca' jadüg'oc n'üga'ñich vino nii, ixti cooni anajty njädyich tzajpjoty ma yi Dios y'ane'my.

Jesús capxpizimiy co Pedro ymina'na'ñ co ca' y'ixy'adyii

²⁶ E co Jesús etz ydiscipulos ajcxy iiy tög himno, chi ñicxy ajcxy ma je cop huidibi xiijip Olivos. ²⁷ Chi Jesús yminañ:

—Cham coodz xycöguëgaambich miich ajcxy, com jaybety jadu'n ma Dios ñecy ma jadu'n yminañ: “Nyaj'ögaamybich je cöbixy cuend'ajtpi, e huin'it je cöbixy queeg-huäcxtähuip.” ²⁸ Per co iich anajty njugypicyich jadüg'oc, co iich anajty ti n'ögyich, nícxiwich jim Galilea jacjayijp, ca'ydi miich ajcxy.

²⁹ Chi Pedro Jesús nimaayi:

—Oy ixipy yi jacjadyii miich mdiscipulos ajcxy xycöguetäy, per iich ca' miich ngöguëga'ñ.

³⁰ Per Jesús nimay Pedro:

—Janch tiy'ajt jadu'n nej yam nimäy, jadachambi coodz ma ca'ni anajty tzeeyaxigy mejtz'oc miich xycoyüdzan'ñich tugiig'oc, mina'na'ñ co miich ca' xy'ixy'adyiijich.

³¹ E Pedro ca' anajty cöbiga'ñ nej Jesús yminañ, chi mictägy minañ:

—Ca' iich miich ngoyüdzan'ñ, oy ixipy ndim'o'cich quipxy miid miich.

E nañ actim jadu'n jacjadyii Jesús ydiscipulos ajcxy yminañ nej Pedro ti yminañ.

Jesús mibijctzoy Dios jim Getsemaní

³² Jesús miid ydiscípulos ajcxy oyja'ty ma tüg it huidibi xíjip Getsemaní, chi Jesús je ydiscípulos ajcxy nimay:

—Íña' miich ajcxy ya, nami n'ocnicxyich jim'amy Dios mibijctzoob.

³³ Chi Jesús miid ñicxy jëda'ajty Pedro, Jacobo etz Juan ma tüg it ahuingujc. Chi Jesús ytigíy tajpi maybi jihuiiy jotmay. ³⁴ Chi Jesús ymíñañ:

—Njihuiybich tüg jotmay nej n'öga'ñich. Huí'mgix miich ajcxy ya etz juugy m'íjtcixipy, ca' mmáagixipy.

³⁵ Chi Jesús ñicxy jac'amijci'm, Dios mibijctzoy, e may'ajt pijctzoy co ixipy ca' minaxy yajnaxy je tzaachypi huidi anajty ypadamy je huin'it hora. ³⁶ E Jesús anajty Dios mibijctzoy ymíñañ:

—Dios, miid miich ca' ni ti chípity. Píjcigich jadayaabi tzaachypi ayo'n, per ca' yjadú'nity nej íich ndzójcin, huen tuñyii jadu'n nej miich mdzójcin.

³⁷ Co Jesús nihuimbijty Pedro, Juan, etz Jacobo, chi oy ajcxy paady ti anajty ymi'ó'ccixy. Chi Jesús Pedro nimay:

—Simón, ¿nej ti mmi'ögy? ¿Nej ca' mmadága'ñ m'idipy juugy tüg hora? ³⁸ Jugy'íjtcix, e mibijctzoogix Dios ca'ydi jibictuuyb mdigíygixy. Janch tiy'ajt co jotjoty ooy mni-jot'ájtciy mdunaangixy yi oybi. Per yi mninícx oy amaayity.

³⁹ Chi Jesús jadüg'oc huinhuäctuuty je' ydiscípulos ajcxy, e jadüg'oc ñicxy Dios mibijctzoob. May'ajt pijctzoy tim jadu'n nej je jayíjp'atypi anajty ti ymíñañ. ⁴⁰ Chi Jesús yhuimbijty ma anajty ajcxy ydiscípulos yajpaady, e jadüg'oc oy pátcixy ti anajty ymi'öccixy, com ca' ajcxy mimadágy máhuí, e ni ca' ajcxy jayty nej adzohuípy Jesús.

⁴¹ Midugi'oc Jesús ñicxy ma je' ydiscípulos ajcxy, e ymíñañ:

—¿Nej ya mjacmáagixp mjacpooxcixp? Maagix pooxcix jadachambi. Ti miid jadu'ñyi. Ti je tiempo huaad'ájtñi mína íich, je jäy huidibi tzoon tzajpjoty, xycíyegipy ajcxy ma yi jibic jäydijc. ⁴² Maybidígicix, tzoc jámim. Chi ymíñ je jäy huidibi xycíyegaambich ma nmidzípich.

Mach ajcxy Jesús yajníxcixy

⁴³ Capxp anajty Jesús, co Judas oyjäty ma Jesús yajpaady. Judas hue' je' nidügti je majmetzpi huidibi Jesús yhuin'íjx. Judas miid miíñ mayjäy huidibi ajcxy miid pujx etz quipy. Je teedy mįjtungmiidpi, je escribas ajcxy, etz je mįjädijc ajcxy ti anajty quexy je mayjäy huidibi anajty madzamb Jesús. ⁴⁴ Judas, je huidibi anajty cíyegamb Jesús, hue' anajty jayíjp ti moy je mayjäy tüg íjxpejt huidibi miid jëb ajcxy íjxcabip Jesús. Jadu'n jayíjp Judas ycapxytuñ miid yi' ajcxy, e ymíñañ:

—Je jäy huidibi anajty ndzücxypích, yi' je' anajty Jesús. Madzípy ajcxy, e myajnícxip miich ajcxy yajxon cuend'aty.

⁴⁵ Mic'amy co Judas oyjädy ma Jesús yajpaady, chi nimíjhua'cy, e nimay:

—Huindzín, Huindzín.

E co jadu'n ymíñañ, chi Judas Jesús tzücxxy. ⁴⁶ Chi mic'amy je mayjäy Jesús mach, e yajnícxxy ajcxy mach.

⁴⁷ Per nidügti Jesús ydiscípulos juudy ypujxy ma ytíj, chi je teedy mįjtungmiidpi tüg ytumbi yajtzaachíyí, quejtzpujxi tüg ytätzac. ⁴⁸ Chi Jesús je mayjäy nimay:

—¿Ti co miich ajcxy xyñimíñich miid pujx etz quipy, jadu'n nej jihuíy íich tüg meetzpi? ⁴⁹ Jabom jabom nyaj'ixpíjcyich jäy jíiby ma Dios ytíj ma miich ajcxy myajpaady, e ni ca' miich ajcxy xymajchich. Paady jadu'n ytunyíi yjadyíi jígix yi' yajcuydumb nej ity jaybety ma Dios ñecy.

⁵⁰ Chi je' ydiscípulos ajcxy yajhui'my Jesús naydügpajc. Chi je' ajcxy yqueegy.

Je jäy mutz'anägnip huidibi quectzög

⁵¹ Per tüg yujcyeeeg anäg huidibi anajty payöy Jesús nímóchity anajty miid tüg sávana. Chi Jesús ymidzip ajcxy majch je yujcyeeepi. ⁵² Chi je yujcyeeepi cíqueegtuty je mayjäy, yajhui'my ysávana, e yquecytzögy nihuädz íxhuädz.

Jesús mij juntijoty

⁵³ Chi ajcxy yajnicxy Jesús mach ma je teedy mijtungmiidpi yajpaady. Chi mic'amy ñaymujci tüg'óciy teedy ajcxy huidibi mijtungmiidpi, e tüg'óciy mijjädijc, etz tüg'óciy escribas ajcxy. ⁵⁴ Chi Pedro jiguëgy anajty panicxy je mayjäy ajcxy ixti oy yja'ty ma je teedy mijtungmiidpi ytiba'. E jim ixtacy quipxy miid policia ajcxy agujc, yxaamgixy anajty ma jünba'.

⁵⁵ Je teedy ajcxy mijtungmiidpi etz tüg'óciy je judíojäy ytungmiidpi ajcxy yhuinma'n'ixtaaygixy nej ajcxy jëb Jesús yajpocyc'a' miid ajcxy yx'huin, e jadu'n jëb mooygixy yi ócin. Per ca' ajcxy paady huinma'n'. ⁵⁶ Mayjäy nihuambejty Jesús miid anñi, e ca' ajcxy y'ayuc ytügiy. ⁵⁷ Nijëjity jäy ytinayigy juntajoty, e nihuambety ajcxy Jesús, yminaangixy:

⁵⁸ —Ich ajcxy amido'ijt Jesús y'ayuc tüg tecy, co jadu'n yminañ: “Njidaamybich jada Dios ytijc huidibi jäy ti cójcixy, e codugiig xii gojtigadzipich huingbi huidibi ca' jäy cojy.”

⁵⁹ Per ni ca' ytügiy ajcxy y'ayuc nej ajcxy Jesús nihuambejty, ac tigachjaty nidüg nidüg yminañ ajcxy.

⁶⁰ Chi je teedy huidibi je jacmijtungmiid ytinayigy juntajoty, chi y'amidooy Jesús e nimay:

—Jesús, ¿ca' nej m'adzohua'ñyi? ¿Ca' mmidooy nej ychachxigixy?

⁶¹ Per Jesús amoñ y'ijty. Ca' ti ayuc adzohuimbijty. Chi je teedy jadüg'oc migapxy Jesús nimay:

—¿Nej miich je' je Cristo, je Dios y'ung?

⁶² Chi Jesús yminañ:

—Janch jadu'n, ich je' je Cristo, je jäy huidibi tzoon tzajpjoty, e miich ajcxy xy'ixipich iñäyich ma je mijpi Dios ymijc a'oy'amy. Nañ jadu'n xy'ixipyich miich ajcxy jocjoty co anajty nhuimbityich jadüg'oc ya naaxhuiñ.

⁶³ Chi je teedy huindzech huinhuocy yci'm yhuit, je' je' tiy'ájtíp co ca' anajty yjotcújcity miid Jesús y'ayuc, chi yminañ:

—¿Ti testigo njac-huaanim? ⁶⁴ Miich ajcxy ci'm ti mmidoogixy yi' y'ayuc, jadu'n nej ycapxtigoy miid Dios. ¿Nej miich ajcxy minaangixy?

Chi nidüg'óciy ajcxy yminañ co janch jadu'n Jesús mij oy ti ycapxtigoy miid Dios ytiy'ajt, paady huaad mooygixy yi o'cin.

⁶⁵ Chi nijëjity jäy yhuindzujigy Jesús. Chi ajcxy huingoxodzay, cójxcixy, e chi ajcxy nimay:

—Octiygapx. ¿Pin ti xycojxy?

E je policiatijc ajcxy cojxy Jesús ma yhuiñyjip.

Pedro ycoyüch Jesús

⁶⁶ Pedro tábäy anajty y'ahuixy. Chi ñimijhuäci tüg tumbi töxyjäybi huidibi anajty tumb ma je teedy ytijc. ⁶⁷ Co je töxyjäy ijxpaty Pedro iñäy anajty jünba'áy, yxaamb anajty. Chi huindixpejty Pedro, e nimay:

—Miich nañ miidhuidijtpy anajty je Jesús yi Nazaretpi.

⁶⁸ Per Pedro ca' cóbijcy je töxyjäy y'ayuc, e yminañ:

—Ca' n'ixy'adyijich jada Jesús. Ni ca' nhuinjihuñyich ti miich nimiydacpy.

E mic'amy Pedro ypidzimy jüby, e tim huin'ítiy tüg tzeyñi'aa oy yaaxigy. ⁶⁹ Chi jadüg'oc je tumbi töxyjäybi huindixpejty Pedro, e nimay je jäy ajcxy huidibi jim yajpatp huingon, e yminañ:

—Jada je' nidügti huidi anajty miid huidity Jesús.

⁷⁰ Chi Pedro jadüg'oc yminañ co ca' ix'adyii. Co hueeñi, je jäy ajcxy jadüg'oc Pedro nimay:

—Janch co miich je' nidügti ma Jesús yjäy miñ, Galileo jäy miich, com nmidooybich miich m'ayuc nej Galileo jäy ycapxcixy.

⁷¹ Co ajcxy jadu'n yminañ, chi Pedro mictägy ñaygogapxi co ca' yi' miidhuidity Jesús, yminañ:

—Dios y'ijxpy ñejhuiyb co tiy'ajt ngapxyich, co ca' n'ixy'adyiijich yi Jesús huidibi miich ajcxy mnigapxyp.

⁷² Co Pedro ycapxymaayi tim huin'itiy tüg tzeyñi'aa yaaxïgy mimejtz'ocpi. Huin'it Pedro jäymetzcoody nej Jesús ñimäyii: “Cham coodz jayijp ca'ni anajty tzeyñi'aa yaaxïgy metz'oc, ti anajty miich mina'ñ tugïg'oc co ca' xy'ix'adyiijich.” Co Pedro jadu'n jäymejtzcoody Jesús y'ayuc, chi tajy may ñayjihuiyi, e ytigïy yaaxpi.

15

Jesús ma Pilato yhuinduu

¹ Co yximïy, chi je teedy ajcxy huidibi mij tung miid, je mijjäydijc, je escribas ajcxy, etz tüg'óciy judíojäy huidibi mij tung miid yöymujctay ajcxy. Chi nidüg'óciy ajcxy yajñíxcixy Jesús cïxoch ma Pilato, je gobernador. ² Pilato Jesús y'amidooy, nimay:

—¿Nej miich rey'ajtp ma yi judíojäy ajcxyi?

Chi Jesús yminañ:

—Miich jadu'n minamb.

³ Je judío teedy ajcxy huidibi mijtungmiidpi mictägy tzachxïgixy Jesús miid canaagnax xïhuin. ⁴ Chi Pilato jadüg'oc Jesús y'amidooy, nimay:

—¿Ca' nej m'adzohua'ñi? Ix nej yi mmidzip ajcxy xychachxïgixy.

⁵ Chi Jesús ca' ni nej y'adzooy. E Pilato ooy chachhuinmay'ahuidijty.

Jesús yajmoy ysentencia co y'ögipy

⁶ Com xiijoty anajty, je gobernador Pilato najtzmazïy tüg machyjäy, je huidibi je mayjäy anajty ypijctzoogixyp. ⁷ Pujxtijc iñaayb anajty jim Jerusalén tüg machyjäy huidibi anajty yxii Barrabás. Barrabás pujxtijc iñaayb anajty quipxy miid jacjadyii jäy huidibi anajty ti midziptzoon je gobierno romano, e ti anajty yjäyyaj'ó'ccixy. ⁸⁻⁹ Co anajty je may yxii'ajtpidijc may'ajt pijctzoogixy ma Pilato co najtzmazïhuip tüg machyjäy, chi Pilato yminañ:

—¿Nej mdzojccixyp co nnajtzmazïhuibich je judíojäy ajcxy yrey?

¹⁰ Pilato ñejhuiyb anajty co mañ'ajtingïxy anajty ajcxy je teedy mijtungmiidpi ti cïyejccixy Jesús. ¹¹ Per co Pilato jadu'n yminañ, chi je teedy ajcxy mijtungmiidpi ooy ajcxy yajhuamgoty yajjihuiygoty je mayjäy co huen je Pilato najtzmazïy je Barrabás.

¹² Chi Pilato y'amidooy je mayjäy jadüg'oc:

—¿Nej miich ajcxy mdzocy ndunipyich miid jada yëydijc huidibi jäy ajcxy ytijpy co yrey'aty ma yi judíojäy ajcxy?

¹³ Chi je mayjäy mic yminangottay:

—Yajcruutzpet.

¹⁴ Chi Pilato yminañ:

—Per ¿ti yi' ti tundigoy?

Huin'it je mayjäy nigï mic yminañ:

—¡Yajcruutzpet!

¹⁵ Co jadu'n je mayjäy ajcxy mictägy yminanday, chi Pilato anajty yajjotcujc'adaangixy je mayjäy, chi najtzmazïy je Barrabás. E co yajcï'ajttay yi Jesús, chi cïyejcnï co huen yajcruutzpedyii.

¹⁶ Chi je soldados ajcxy yajnicxy Jesús ma je agujctijc tiba', e jim ñaymujci tüg'óciy soldados ajcxy huidibi yajpatp anajty jim Jerusalén. ¹⁷ Chi ajcxy yajnijeny je Jesús tüg rey yhuít, color ucypï e yajcojenïy ajcxy apy corona. ¹⁸ Chi je soldados ajcxy yminañ:

—¡Viva jada judío rey!

¹⁹ Chi je soldados ajcxy huoipy Jesús ma ycohuajc miid paxy, e huindzuj jïjptzujcixy ooy, e huingoxtinay'ahuiygixy janch ypaad nej jihuiy ooy huindzigïygixy. ²⁰ Co je soldados ajcxy nixiictay yajxiictay Jesús, chi ajcxy jeeni je yreyhuít color ucypï,

e yajñijeniñy ajcxy yci'm yhuit jadüg'oc. Chi ajcxy Jesús miidcajppidzimy co anajty yajcruutzpedaangixy.

Co Jesús yajcruutzpejti

²¹ Tü'am ajcxy tüg jäy miidnaybati, hue' anajty yxii, Simón, ycocájpity jim Cirene, Alejandro etz Rufo je' anajty yteedy. Hue' anajty choñ camjoty. Chi ajcxy adzip nimay Simón co huen jaccajpi Jesús ycruudz.

²² Chi ajcxy yajnicxy Jesús ma tüg it lugar huidibi yxii Gólgota, je ayuc Gólgota jadu'n yhuimbizimy o'cpi cohuajc. ²³ Chi ajcxy moy Jesús vino huen ügy tem huidity miid mirra tzoy. Per ca' Jesús cöbijcy je vino nii. ²⁴ Chi ajcxy yajcruutzpejty Jesús. E huin'it je soldados ajcxy suerte ijxy, co anajty ajcxy Jesús yhuit yajhuäcxaani, oc'ixaangixy pin anajty ocjè'ájtíp.

²⁵ Petyxii anajty co ajcxy yajcruutzpejty Jesús. ²⁶ Je ayuc huidibi ajcxy yjaay ma Jesús cruudz, jadu'n yminañ:

—Je judíojäy ajcxy yRey. ²⁷ Quipxy miid Jesús ajcxy yajcruutzpejty metz meetzpi. Tüg meetzpi ajcxy yajcruutzpejty a'oy'amy ma Jesús ymijc, e jadüg anajty'amy. ²⁸ Yajcuyduñ nej anajty jaybety miñ ma Dios ñecy, ma jadu'n yminañ: “Yaj'amichoomujc je Cristo miid je pocyjäy ajcxy.”

²⁹⁻³⁰ Je mayjäy huidibi ajcxy naxiiyb anajty ma Jesús yajpaady cruutzcíxy, ooy anajty ajcxy ycojigiñyñ, nixiicy yajxiicy ajcxy Jesús, yminañ ajcxy:

—Bah, miich huidibi Dios ytijc mjidaanip, e codugiig xii huingbi myajpidíga'ñ, miich ci'm cham naygohuaani, e minac cruutzcíxy.

³¹⁻³² Nañ jadu'n je teedy ajcxy mijtungmiidpi etz je escribas ajcxy nixiicy yajxiicy ajcxy Jesús ñayñimayi miñ xyipy:

—Jada Jesús ti cohua'ñ jacjadyii jäy, e ca' jaty nej ci'm ñaygohua'ñiiyb. Pen janch, co jada Jesús yjējity je Cristo huidibi rey'adamb ma yi judíojäy ajcxy, ymiid ixipy mic'ajt jaydeb ci'm yminagipy cruutzcíxy. Co jadu'n ixipy n'íjxim co ci'm ti yminacy cruutzcíxy, huin'it miibjicim co janch jada jējity je Cristo huidibi rey'ajtp ma yi Israel jäy.

Nañ jadu'n je metz meetzpi ajcxy huidibi cruutzpejt quipxy miid Jesús nixiicy yajxiicy ajcxy je Jesús.

Co Jesús y'ögy

³³ Co ycuycxiiñy, chi ycoodziygiday tüg'óciy naaxhuiñ. E jadu'n je naaxhuiñ y'ijty coodz ixti minacyxii. ³⁴ Minacyxii Jesús mic yminañ miid aramaico ayuc:

—Eloi, Eloi, ¿lama sabactani? —yi jadu'mbi ayuc hue' yhuimbizimy: Tat Dios. Tat Dios. ¿Na'amy co ti xy'ix'ixyich?

³⁵ Nijējity jäy huidibi anajty jim yajpatp huingon ma Jesús, co midoo jadu'n ajcxy Jesús y'ayuc, chi ajcxy yminañ:

—Midoogix, Elías yi' yaaxtaayb.

³⁶ Chi nidügti ajcxy ninicxy Jesús poyigy, ti anajty yajxoogy pixy miid vinonii ta'mbi, e yajjijpxodziñy je pixy ma tüg paxy, e jadu'n yajja'ty je vino nii ta'mbi ma Jesús y'ahuac, huen muucip je vino nii ta'mbi. Co jadu'n tuñ, chi yminañ:

—Tzoc oc'ahuíjxim pen mimb Elías, e miñ yajminagyii ma yi cruudz.

³⁷ Chi Jesús mic ycapxqueegy, chi y'o'cy. ³⁸ Co Jesús y'o'cy, chi je mapxhuit yciitzhua'cxy tiná'amy huidibi anajty miid y'adiydútyity je Dios ycuarto ma je teedy mijtungmiidpi ytigy tüg tecypajc jimijt jimijt. ³⁹ Je soldado huindzin huidibi anajty tinaayb ma Jesús yhuinduu, co jadu'n midoy nej Jesús mic yaaxqueegy, e ijxy nej y'ögy, chi yminañ:

—Janch co jadayaabi yēydijc anajty Dios ung'adyii.

⁴⁰ Nañ jim anajty nijējity töxyjäydijc ymij'íjxcixy jiguēgy. Jim anajty yajpaady María Magdalena, etz je jadügpi María, Jacobo je mutz'anägnip ytaj, etz José ytaj. Nañ jim anajty yajpaady Salomé. ⁴¹ Jadayaabi töxyjäy ajcxy miidhuidijt Jesús, e ti anajty

pubéjtcixy taabi anajty Jesús yajpaady jim Galilea ñaaxjot. Nañ jadu'n anajty jim yajpaady jacnaagity töxyjäydijc ajcxy huidibi anajty ti ycoody jim Jerusalén quipxy miid Jesús.

Jesús yajnaaxtigiyii

⁴²⁻⁴³ Paady co chu'iiyñi hue' anajty viernes mina judíojäy ñayyajpocyñihuáatzigixy, jaydeb anajty amay'adaangixy je sábado xii je com jabom. Chi José huidibi anajty cogajp Arimatea yjotmictuñ, chi ytigiiy ma je gobernador Pilato, pijctzooy may'ajt co yajnaaxtigihuaani Jesús ñinícx. E hue' je' José anajty tungmiid ma yi judíojäy ajcxy. José yjiip'ijxpy anajty mina Dios pidäga'ñ yi' y'ané'min ya naaxhuiñ. ⁴⁴ Pilato ooy tzachhuinmay co Jesús tim mic'amy ti y'ögy anajty, paady huoodzoy je soldado huindzin, e tiy'ajt pijctzoy pen janch co Jesús ti anajty y'ögy. ⁴⁵ Co je soldado huindzin tiy'ajt yejcy co Jesús ti anajty y'ögy, chi nimay José co huen yajnaxtigihuiipy Jesús. ⁴⁶ Chi José juy poob huit, e co yajminajcy Jesús ñinícx, chi mo'ñ miid je poob huit, e chi pidacy ma tüg tzaajut huidibi anajty ti yajtzejtztüdy ti yajpadüdy ma tüg tzaahuingueetz. E chi yaj'adujcy je öcpi jut miid tüg mij tzaa. ⁴⁷ E je metzpi töxyjäy María Magdalena etz je jadügpi María huidibi José ytaj'ajtpy huindicxp anajty ajcxy co Jesús ñaaxtigiiy.

16

Jesús yjugypijcy jadüg'oc

¹ Com jabom jopy, domingo, chi je tugiiig töxyjäy ajcxy María Magdalena, María Jacobo ytaj etz Salomé juy ajcxy tzoy huidibi ooy oy xuugy, pidägaangixy anajty ma Jesús ñinícx.

² Je tugiiigpi töxyjäy choon domingo, seaman ixtigi', tim jopyñi. Ti anajty ypidzimni je xii co ajcxy oojädy ma je öcpi jut. ³ Chi je tugiiigpi töxyjäy ajcxy nayñimaayi miñ xyipy:

—¿Pin xy'ocpubéjtim jigihuiipy je mij tzaa huidibi miid agiiyity je öcpi jut?

⁴ Per co ajcxy ijxy je öcpi jut, chi ajcxy ijxy ahuingujc je mij tzaa anajty ytigiejcnäy huidibi je öcpi jut anajty agiiydujcp. ⁵ Chi ajcxy ytigiiy jutjoty. E chi ajcxy ijxy tüg yeeg'anäg iñäy anajty a'oy'amy ma je' ajcxy. E je yeeg'anäg poob huit anajty ymiid. Co ajcxy jadu'n ijxy je yeeg'anäg jiiy jutjoty, chi je töxyjäy ajcxy ooy chigiiy. ⁶ Chi je yeeg'anäg nimay je töxyjäy ajcxy:

—Ca' ooy mdzigiiygixy. Miich ajcxy je' m'ijxtaaygixp je Jesús huidibi cogajp Nazaret, je huidibi jäy ajcxy yajcruutzpejt. Ti je' yjugypicy. Ca' je' ya. Oc'ijxcix ya ma ajcxy pidaacci. ⁷ Níxcix, nimaaygix Pedro etz yi jacjadyii Jesús ydiscípulos ajcxy co Jesús nícxip jayijp jim Galilea, e jim Galilea ñaybadiiyb ajcxy miid Jesús, jadu'n nej ajcxy ñimaayi jayijp'aty.

⁸ Chi je töxyjäy ajcxy jim yqueegy ma je öcpi jut, com ti anajty ooy chigiiygixy. Ooy anajty ajcxy chiyuy miid tzigi'ñ. E ni ca' ajcxy nimay ni pin nej anajty ti ijxcixy, com ooy anajty chigiiygixy.

Jesús ñayguëxici ma María Magdalena

⁹ Je domingo, semana ixtigi', co Jesús yjugypicy, chi ñayguëxici jayijp ma María Magdalena, je' je' je töxyjäy huidibi anajty Jesús ti yajpidzimi huixtujc ca'oybi ma yjot yhuinma'ñ. ¹⁰ Chi María Magdalena ñicxy ma Jesús ydiscípulos ajcxy huidibi miid yhuidijty, e nimaaygixy nej anajty yi' ti ixy Jesús co ti yjugypicy jadüg'oc. E Jesús ydiscípulos ajcxy ooy anajty ytájycixy ymáygixy etz yaaxcixy. ¹¹ E co ajcxy midoohui je María y'ayuc, co anajty ti ixy Jesús juugy, chi ca' ajcxy mijpidaaci y'ayuc.

Jesús nayguëxici ma metz ydiscípulos

¹² Co hueeñi, Jesús ñayguëxici nañ jadu'n ma metz je' ydiscípulos huidibi ñicxp anajty ajcxy camjoty. ¹³ Chi je metzpi discípulos ñicxy ajcxy mic'amy oy nimaaygixy je jacjadyii discípulos ajcxy co ti ijxcixy Jesús. E je jacjadyii discípulos ca' ajcxy mijpidaaci je metzpi discípulos y'ayuc.

Huidi Jesús ydiscípulos yajñibijc

¹⁴ Jac com jecy, Jesús ñayguëxíci ma je majctügpi discípulos ajcxy ma anajty y'iñaaygixy ma caydac. Chi Jesús ogy ajcxy co ca' ajcxy mibíjccixy co ooy ajcxy yjot yjuuñity, ca' ajcxy mijpidägy jacjadyii pin anajty ti y'ijxcixy Jesús. ¹⁵ Jesús je' ydiscípulos ajcxy ñimay:

—Nícxcix miich ajcxy ma tüg'óciy naaxhuiñyjäy, ma tüg'óciy naax cajp, e capx-huäxcix ajcxy je oybi ayuc nej jäy ajcxy jëb y'almanïdzögipy. ¹⁶ Pinjaty mibijc etz ñiibejtcixy, ypaadip ajcxy y'almanïdzoocin. Per, pinjaty ca' mijpidägy tiy'ajt hue' ajcxy y'alma tigoyip miid ypocy ycixpi. ¹⁷ Yi jäy ajcxy huidibi mibijcp, ooy ajcxy ijxpejt túngixipy. Miid iich nxii iich nmic'ajt yajpidzimipy ajcxy ca'oybi ma jäy ajcxy yjot yhuinma'ñ. Nañ jadu'n ycápxgixipy huingbi ayuc. ¹⁸ Ymadzipy ajcxy tza'ñ, e ca' nej yjajtixipy. E co ajcxy veneno ügip, ca' ajcxy ypa'mduniib. E co ajcxy cñixájipy pa'mjäy, tzögip je pa'mjäy.

Jesús ypätigiiyñi tzajpjoty

¹⁹ E co je Huindzin Jesús ycapxy ycijxy miid je' ydiscípulos ajcxy, chi ypätigiiyñi tzajpjoty. Jiiby tzajpjoty Jesús yajpaady ma Dios ymijc a'oy'amy, miid mij'ane'min. ²⁰ Chi Jesús ydiscípulos ajcxy choon ñíxcixy cajp cajp capxhuäcxycy ajcxy Jesús y'ayuc ma nidüg'óciy naax cajp. E je Huindzin Jesús ooy ajcxy ypubejti ypudigiiyi, mic'ajt moy je' ajcxy miid je ijxpejt je mijhuinma'ñ huidibi ajcxy tumyb. Jadu'ñyi jadu'n. Amén.

SAN LUCAS

Jaayhu'i'my Jadu'n Nej Jesucristo Ytun Yjajti

¹ Mayjäy ti cojaay je ayuc je tiy'ajt huidi iich ajt nejhuiyim co janch ytiy'ájtity, tüg'óciy jadu'n nej Jesús chondacy yjugy'ájtin ya naaxhuiñ ixti mabaad ycocixiyy. ² Tüg'óciy je tiy'ajt jadu'n nej ajt xyñimaayim huidi ci'm iix midou nej chondacy ixti mabaad ycocixiyy, je' ajcxy huidibi capxhuácxxy Jesús y'ayuc ytiy'ajt. ³ Hich nañ jadu'n ti nyajcüyöyich ti nyajtecyyöyich yajxon je tiy'ajt nej Jesús chondacy je' chinaayin ya naaxhuiñ ixti mabaad ycocixiyy. Paady ycixpi iich nhuinma'ñ pidägy co iich miich nyajnijayihua'ñ tüg'óciy je tiy'ajt, miich oyjäybi, Teófilo. ⁴ Jigix miich nañ jadu'n mnejhuñhuipy yajxon je tiy'ajt, jadu'n nej miich ti m'ixpicy.

Tüg ángel nigapxy co Juan el Bautista ypi'c'ada'ñ

⁵ Jadu'n ytun yjajti co anajty Herodes yrey'aty ma Judea naax cajp, jim anajty tüg judío teedy hue' anajty yxii Zacarías. Je' anajty semandumb miid Abías y'ajugytijc y'amigügtijc. Je Zacarías ypijcy miid Aarón y'ocniix, hue' je' anajty yxii Elisabet. ⁶ Dios y'ijxyp ñejhuñiyb co je' anajty ajcxy ytudägyjäyity nimetz. Je' ajcxy ycuydumyb tüg'óciy yi Huindzin Dios ycapxy y'ané'min. ⁷ Je' ca'p anajty ajcxy y'ung ni tüg, e jadu'n ajcxy ymijäyññ nimetz.

⁸ Chi tügtecy Zacarías miid y'ajugy y'amigüg yteedy'ájticy anajty ma Dios ytijc. ⁹ Jadu'n nej teedy ajcxy ycostumbre miidity, chi ñigooti tung je Zacarías mina ypoomjogipy jiiby ma yi Huindzin Dios ytijc. ¹⁰ Tüg'óciy je mayjäy ooy anajty Dios mibijctzoogixy tiba'y. Yam Zacarías tzajtigoty ypoomjocy, ¹¹ co ñayquëxici Huindzin Dios y'ángel tüg ytinäy a'oy'amy ma je poomjoctac. ¹² Co Zacarías ijxy je ángel, chi ooy chigiiy. ¹³ Chi je ángel nimaay Zacarías:

—Ca' mdzigiy, ti Dios midooy yi mjuydácin mnucxtácin. Yi mdöxyijc Elisabet ypaadipy tüg ung yëydijcpi, e mximöhuipy Juan. ¹⁴ Mjotcuyc'adip mxondägip miich etz mdöxyijc, nañ may yi jäy yjotcugihuiipy co anajty m'ung ti ypi'c'aty. ¹⁵ Chi yi m'ung ycomay'ida'ñ ma Dios. Ni ca' ügipy vino ni jocniñ. Ma ca'ni anajty yma'xung'aty ymiid'adipy yi Dios yjihui'ñ ymic'ajt. ¹⁶ Yi' yajjothuimbidip may Israel jäy ma yi' ajcxy yHuindzin Dios. ¹⁷ Je' nicxy ycocapxy'aty ma yi jäy ajcxy huinmic jotmic miid Dios yjihui'ñ ymic'ajt, tim jadu'n nej Elías jecy'ajty ycocapxy'ajty huinmic jotmic miid Dios yjihui'ñ ymic'ajt. Je' m'ung yajjothuimbidipy je ungdeedy ajcxy huidibi ca' y'ung ixaangixy, nañ yajjothuimbidipy je jäy ajcxy huidibi ca' capxycöbicy yi Dios, jigix ajcxy paadipy oyjot oyhuinma'ñ. Nañ m'ung ñimähuipy je jäy ajcxy huen nayñi'ixiyyigixy miid yHuindzin Dios ycixpi.

¹⁸ Chi Zacarías nimay je ángel:

—¿Nej jada iich nejhuiñhuipy peni janch huidibi xyajnimaaaybich? Ti nmijjäyññich, cham ndöxyijcch nañ ti ymijjäyññi.

¹⁹ Chi je ángel y'adzooy:

—Hich Gabriel, ma Dios yhuinduu ni'ixi' n'ityich. Dios ti xyquexyich cogapxy'ajtpi ma miich co nyajnimähuipy jada oybi ayuc. ²⁰ Jadachambi miich mhuí'mipy uum, ni ca' m'ocjajtnip nej mgápxipy, miid co ca' mmibicy jada iich n'ayuc huidibi yajcuydunip co anajty tiempo patni.

²¹ Yam je mayjäy ooy ja'ahuíxcixy Zacarías, ooy anajty ajcxy tzachhuinmaaygixy ti co chachhuácxipy jiiby ma Dios ytijc. ²² Co Zacarías ypidzimy, chi ca' anajty y'occapxni. Chi je jäy ajcxy huinjihuiy co ti anajty ixy tijaty jiiby ma Dios ytijc. Hue' je' yjacmiydacy a'ixiy'amy, e oyhui'miy uum.

²³ Co je semandung yajmay, chi Zacarías ñicxni ma ytijc. ²⁴⁻²⁵ Co jadu'n yjajty, chi Elisabet jihuiy co ti anajty y'ung tziimigy ciyñ gy. Chi yüch'ijty migoox po', e

yminañ: “Jadu'n yi Huindzin Dios ti ytuñ miid ñich jadachambi tiempo, ti xyjäy mechich ti yajquëgy ñich ndzöydu'n ma yi mayjäy ajcxy.”

Tüg ángel nigapxy co Jesús ypi'c'ada'ñ

²⁶ Co tudujc po' maabi Elisabet anajty y'ungtzimiggy, chi Dios quejxy je' y'ángel Gabriel jim Galilea naaxjot ma je cajp huidi anajty yxii Nazaret. ²⁷ Chi Dios quejxy Gabriel ma anajty tüg töxy'anäg y'ity huidibi anajty ca'ni midzinäy yëydijc. Je töxy'anäg ti anajty co'adzoy co piga'ñ miid tüg yëydijc huidi yxii José. José hue' anajty David y'ap y'oc. Je töxy'anäg hue' anajty yxii jity María. ²⁸ Co je ángel ytigiyy ma anajty María, chi nimay:

—María, Dios ti xy'ijxtiy, je Huindzin Dios y'oy'ajt miid miich. Miich je' cömay y'idip ma tüg'óciy töxyjäydijc.

²⁹ Chi María co y'ijxy je ángel, chi chigiyy miid je' y'ayuc, chi huinmay ooy miid jada copxócxin nej co yjadú'ñity. ³⁰ Chi je ángel ymíañ:

—María, ca' mdziggy, miich Dios ti xy'ijxtiy. ³¹ Jadachambi, m'ungdzimigip, myajpi'c'adipy tüg mang, huidibi mximöhuipy JESUS. ³² Je Jesús mij y'idipy, hue' je' yajtjipy Dios tzajpjototy y'ung. Chi je Huindzin Dios möhuuyb je ané'min huidi yi' ymij'ap ymijteedy David ymiid anajty. ³³ Je Jesús ané'mip huinixii ma yi Jacob y'ap y'oc. Je' y'ané'min camina ycixipy.

³⁴ Chi María je ángel nimaay:

—¿Nej jada co yjadú'ñity? ñich ca'ni nyëydijc miid tzinäy.

³⁵ Chi je ángel y'adzooy:

—Je Dios yjihui'ñ ymic'ajt minip ma miich, je Dios tzajpjototy ymic'ájtín xyajnidu-jttähui, je ooyjäybi jäy huidi pi'c'adam, hue' yajtjipy Dios y'ung. ³⁶ E cham Elisabet miich m'amigüg nañ jadu'n yajpi'c'adamy tüg mang ma ti ymijjäyñi. Cham midudujc po'bi maabi y'ung tzmiggy je huidibi jäy ytijpy ca' y'ung'ixaani, ³⁷ com miidi Dios ca'ni ti chípity.

³⁸ Chi María ymíañ:

—Jotcujc nguydunipyich yi Huindzin Dios chójcin, huen jadu'n tuñyii jadyii ma ñich jadu'n nej miich m'ayuc xymöyich.

Chi je ángel ñicxni.

María y'oy cogapxy Elisabet

³⁹ Huin'it xii María choñ, ñicxy jottigoy ma yugjot, ma tüg cajp jim Judea naaxjot. ⁴⁰ Chi ytigiyy ma Zacarías ytijc, e capxocxy Elisabet. ⁴¹ Chi jadu'n yjajty co Elisabet midoohui María ycapxócxin, chi jihuiy co y'ung yücxy ma yjot. E chi je Elisabet ooy yjotcugiy miid je Dios yjihui'ñ ymic'ajt. ⁴² Chi ymíañ janch mic:

—Cömay miich ma tüg'óciy töxyjäydijc, e cömay y'ida'ñ m'ung huidibi pi'c'adamb.

⁴³ ¿Nej ñich jada co jadu'n ti n'ahuäggy co nHuindzinich ytaj miñ xycó'ixiyich? ⁴⁴ Co ti nmidooyich yi mgapxócxin, ti ñich n'ung yücxy ma ñich njot co chachjotcújcity.

⁴⁵ Jotcujc'adip pinjaty ti ymibicy, co cuyduñ y'ida'ñ je ayuc miid je Huindzin Dios ycixpi.

⁴⁶ Chi María ymíañ:

Ooy mij n'ojadatyich yi Huindzin Dios.

⁴⁷ Ooy nxondägyich miid Dios ycixpi, ñich nnihuambi nyajtzoocpi,

⁴⁸ co yi' ti xyñi'ijxcidägyich, co ñich ayoobi xytumbi'adyijich. Jadachambi etz jacnicxp xii tiempo, tüg'óciy jäy ajcxy oy mina'nip co jotcujc'ájtich.

⁴⁹ Yi Dios tügpajc m'ijip, tiibi tun miid ñich, ooy yi' yxii ymijjity.

⁵⁰ Dios ypa'ayooyb hueñypñity huidibi huindziggyip jadachambi etz jacnicxni xii tiempo.

⁵¹ Dios ti ooy tuñ mijpi huinma'ñ, ti jhibicy pinjaty amij agix nayjihuiyip ma yjot yhuinma'ñ.

⁵² Dios ti yajpidzimy yi mijpi rey ma y'ane'my, ti mij'ajt möy ayoobidijc.

⁵³ Pinjaty ayuu'ijtp anajty ymooy ti miid yjotcuyc'adip, etz yi comeeñyäjdyjc ajcxy ti ixmach ca' ni ti.

⁵⁴ Dios ti pubety yi Israel jäy, yi' ajcxy ytumbi, miid co anajty ti pa'ayogoty je' ajcxy,

⁵⁵ jadu'n nej jecy'ajty Dios yajnimay je' n'ap ndeedy, je Abraham etz je'y'ap y'oc, co tunamb miid je' ajcxy huinixii.

⁵⁶ Chi María tugüg po' jim y'ijty miid Elisabet, chi yhuimbijtni ma ytijc.

Juan el Bautista co ypi'c'ajty

⁵⁷ Co je Elisabet oy yajhuaad'ajtni xii tiempo, chi yajpi'c'ajty tüg ymang. ⁵⁸ Chi ayuc midooy ajcxy je ymijün ymidijc etz y'ajugy y'amigüg jadu'n nej Dios may'ajt ti tuñ miid Elisabet. Chi ajcxy ooy yjotcugiy miid je' ycixpi. ⁵⁹ Chi jadu'n yajty coDUCTUJC xii je ymijün ymidijc etz y'ajugy y'amigüg miñ ma Zacarías ytijc co anajty tiy'ajttihuaangixy je pi'c'anäg. Chi ajcxy yajxii'ada'ñyii anajty jadu'n nej yteedy yxii Zacarías. ⁶⁰ Chi ytaj yminañ:

—Ca' xii'adiiyb Zacarías, hue' yi' huen xii'adyii Juan.

⁶¹ Chi je' ymigügtijc ajcxy yminañ:

—¿Na'amy? Ni tüg miich m'amigüg jadu'n ca' xijity.

⁶² Chi ajcxy y'amidoohui je' yteedy jadu'n a'ixiy'amy, nej yi' yajxii'ada'ñyii. ⁶³ Chi Zacarías pijctzoy tüg necy, e jaay jadu'n: “Juan huen xii'adyii.” Chi je ymigügtijc ajcxy nidüg'óciy ooy jihuüy huinmaay. ⁶⁴ Chi mic'amy Zacarías y'ahuac ahua'cxy e ytoodz yungüy, chi oy ycapxigy e jäymejch cömay yi' Dios. ⁶⁵ Chi tüg'óciy ymijün ymidijc ooy chigüy. Chi ajcxy nimiydactay nej Zacarías ti yjaty ma tüg'óciy jäy huidibi tzinaayb Judea yuugjoty pi' tzinaaydac. ⁶⁶ Tüg'óciy pinjaty anajty midoob je ayuc, chi jäymejtzhuim ajcxy ma yjot yhuinma'ñ, chi ñayñimáayigixy:

—¿Ti jada' ytunamyb jada pi'c'anäg?

Com je Huindzin Dios je' miid y'ity.

Je Zacarías y'iy

⁶⁷ Chi je ungedeedy Zacarías miid je Dios yjihui'ñ ymic'ajt Dios y'ayuc najtzcapxiyi yminañ:

⁶⁸ Cömay yi' Israel jäy yHuindzin Dios, co ti ni'ijxcidägy, ti cohua'ñ yi' ñaax ycajp,

⁶⁹ Dios ti quexy tüg mij nihuaambi yajtzoocpi, ma yi' ytumbi, David y'ap y'oc ajcxy.

⁷⁰ Com Dios jadu'n yminañ jecy'ajty miid yi' y'ayuc najtzcapxiyb huidibi huätzjäyip;

⁷¹ je' xyñihuánaanim ma ich ajt nmidzip, nañ xypubedaanim xypudigihuaanim ca'ydi xycgähuiyim huidibi ca' xy'ixaanim xychogaanim.

⁷² Jaydëbi pa'ayoohuipy ich ajt nmij'ap nmijteedy, etz jäymedziyb jadu'n nej ayuc ahuaniiy miid je' ajcxy.

⁷³ Jadu'n nej Dios janch huinijot y'ayuc ahuaniiy miid ich ajt nmij'ap nmijteedy Abraham jecy'ajty huidi anajty xymöhuaanim.

⁷⁴ Co nihuätzictuutim ma nmidzip, huin'it jaydëbi miyaaxim n'ojadajtim ca' ma tzig'iñ jihui'ñ,

⁷⁵ miid huätzhuinma'ñ etz tudägy huinma'ñ ma yi' yhuinduu jabom jabom ixti mibaad ndzinaayim.

⁷⁶ Miich ma'xung, jäy hue' myajtijip mijpi Dios y'ayucnajtzcapxiybi. Miich nícxiy cogapxy, nicx yajni'ixi jäy miid Huindzin Dios ycixpi.

⁷⁷ Yajni'ixi' yi' cajpjäy jadu'n nej huaad ajcxy y'alma paadipy nihuaanim yajnidzoocin, etz jadu'n nej huaad ajcxy ypocy huinmecxiyb.

⁷⁸ Jadu'n nej Dios ich ajt ti xypa'ayoohuim co ti xyñi'ijxcidaacim etz xymooyim tiicxin jájin huidibi tzomb tzajpjoty,

⁷⁹ jaydëbi yajmöhuiipy jäy ajcxy Dios ytiy'ajt huidibi ajcxy tzinaayb agootztuum etz o'c jijp'am, jigix ajcxy xytümooyim ma je tudägyp'i tü'aa.

⁸⁰ Je pi'c'anäg yeeg yjodijy huinmic jotmic miid yi Dios yjihuiniñ ymic'ajt. Chi chinaay adügtuum ma ca' pin, ixti cooni xii tiempo paty mina ñícxipy cogapxy ma Israeljäy ajcxy.

2

Jesús yma'xung'ajty

¹ Huin'it xii Augusto César pidacy y'ané'min huen tüg'óciy jäy nicxy necypejttaaygixy. ² Je jayijp'atypi padrón hue' je'yaj'oyiyy Cirenio huidibi anajty gobernador'ajtp jim Siria ñaaxjot. ³ Chi jäy ajcxy nidüg'óciy ñicxtay yajcojayiyybi nidüg nidüg ma yci'mgajp. ⁴ Chi José chooñ jim Galilea naaxjot ma je cajp huidi yxii Nazaret, ñicxy ajcxy jim Judea naaxjot ma je David ycajp, huidi yxii Belén. Yi José ñicxy jim Belén com ymij'ap'ajtpy ymijteedy'ajtpy je David. ⁵ Chi José yajcojayiyy padrónjoty miid María, je töxyjäy huidibi anajty ymiid capxytuñ, huidi anajty ung tzim'ijtp. ⁶ Chi jadu'n yjajty co ajcxy anajty yjimity Belén, chi oyhuaad'aty co María paadipy y'ung. ⁷ Chi yma'xung'ajty je ungoob, e chi niñbe'ñ nimüxy miid ymotz, e chi agögüy ma iyujc pëcxí'ñ, co ca' anajty ti paady jättac.

Je ángeles ajcxy etz je cöbixycuend'ajtpi ajcxy

⁸ Chi mihuington je cajp anajty jäy ycöbixycuend'aty. Hue' anajty ajcxy yhuin'iñaayb huintzuumnajxyp je' ycöbixy ajcxy. ⁹ Chi Huindzin Dios tüg y'ángel ñigidaaci je' ajcxy, e yi Huindzin Dios y'oy'ájtín y'adixcoody jühuidity ma je' anajty ajcxy ymijc, chi ajcxy ooy chigiyy. ¹⁰ Huin'it je ángel yminañ:

—Ca' mdzigiiygixy, cham iich miich nyajnimaaaygixy oybi ayuc huidibi yajjotcugihuiipy tüg'óciy naax cajp. ¹¹ Miid miich ajcxy ycixpi ti ypi'c'aty cham ma je David ycajp tüg jäy huidibi miich ajcxy xyñihuánaam xycuhuánaam ma ajcxy mmidzip. Hue' je' je CRISTO, je Huindzin Dios. ¹² Yi' je' ijxpéjtíp huidi miid m'ijxcabipy. Mbáadipy ajcxy je ung ma'xung ñimóchity miid ymotz, ycöcnäy ma iyujc pëcxí'ñ.

¹³ Chi janch mic'amy ñayguëxíci miid je ángel may yi tzajpjotychinaaybi, chach Dios ojadájticy ymináangixy:

¹⁴ ¡Ooy ycömáyity ooy ymijity yi Dios tzajpjotypi, ji naaxhuiñ jotcuyc'ajt miid jäy ajcxy ycixpi huidibi Dios yjäygidacpy!

¹⁵ Jadu'n yjajty co je ángel ajcxy ñicxtay tzajpjoty, chi je cöbixy cuend'ajtpi ajcxy ñayñimayí:

—Tzoc jánim jim Belén, jaydëbi n'íjxim ti ti ytunyii ti yjadyii huidibi nHuindzin'ájtím Dios ti xyajnimáayim.

¹⁶ Chi ajcxy ñicxy jottigoy, chi oy pátcixy María, José etz je ung ma'xung y'agögüyity ma je iyujc pëcxí'ñ. ¹⁷ Co ajcxy ijxy je María etz je ung ma'xung, huin'it ajcxy nigapxtay nimiydactay jadu'n nej je ángel ajcxy ñimayí miid je pi'c'anäg ycixpi. ¹⁸ Tüg'óciy jäy huidi midou ooy jihuuy huinmay jadu'n nej je cöbixycuend'ajtpi ajcxy yminañ. ¹⁹ Chi María mido'mbijctay, e yajhui'my ma yjot yhuinma'ñ. ²⁰ Chi yhuimbijty je cöbixycuend'ajtpi ajcxy cömay jäymech ajcxy yi Dios, etz ooy alabanza ajcxy iyy miid Dios ycixpi miid tüg'óciy jadu'n nej anajty ti íjxcixy ti midóogixy, etz jadu'n nej anajty ti ñimáayigixy.

Pi'c Jesús yajcapxquëxígy ma Dios ytijc

²¹ Coductujc xii maabi anajty yma'xung'aty, huin'it je' ajcxy tiy'ajttiy je ung ma'xung. Chi ajcxy yxiimoy JESUS, jadu'n nej je ángel anajty jayijp ti ymina'ñ ca'ni anajty chimigüyii yciyigyii.

²² Co je xii oypaatni mina je María anajty yhuätzpidzimaamni, jadu'n nej Moisés ycötújcín je jécyip yminañ. Chi ajcxy miidnicxy je ung ma'xung jim Jerusalén capxquëxígaangixy ma yi Huindzin Dios yhuinduu. ²³ Com jadu'n anajty yjaybétyity ma Huindzin Dios ñecy:

Tüg'óciy unngoob yéydijcpi huidi ma'xung'ajtp, abicy yhuí'mipy miid je Huindzin Dios yciixpi.

²⁴ José etz María oy yéjccixy huindzigi'ñ jadu'n nej Huindzin Dios ñecy ymina'ñ co jébi yecy metzc jam muuxy o pajctza'm muuxy.

²⁵ Jim Jerusalén anajty chinäy tüg jäy huidi anajty yxii Simeón, tudägyjäy je', etz ooy Dios jäytech. Simeón y'ahuijxyp anajty mina Dios miñ yajjotcujc'ada'ñ Israeljäy ajcxy, e miid je' anajty Dios yjihui'ñ ymic'ajt. ²⁶ Dios yjihui'ñ ymic'ajt ti anajty yajnejhuüyii co ca' chojc öga'ñ, jayijpni oc'ixipy je Huindzin Dios yCristo. ²⁷ Je Dios yjihui'ñ ymic'ajt yajmin yajmejtzi Simeón yhuinma'ñ huen nicxy ma Dios ytijc; huin'it Jesús ytaj yteedy ymiidnicxi ma Dios ytijc, cuyduñ ajcxy jadu'n nej Dios ñecy y'ane'my. ²⁸ Chi Simeón tzendzoy etz capxpaady je ung ma'xung, e chi Dios mibijctzoy miid je' yciixpi, chi yminañ: ²⁹ Jadachambi capxcix jotcujc, Huindzin Dios, miid iich miich mdumbi, com ti mguyduñ jadu'n nej ti xyñimäyich co n'ixipyich je Cristo.

³⁰ Cham ti n'ixyich je nihuambi cohuambi,

³¹ huidibi ti mni'ixiy ma tüg'óciy jäy ajcxy yhuinduu.

³² Jada ung ma'xung ytiy'ajt yegip ma yi jäy ajcxy huidi ca' yjudiojäyity. Jadu'n yi' nipaady nej tüg jiin huidi codiicxp je jäy. Cömay y'idipy yi Israel jäy miid yi' yciixpi.

³³ José etz Jesús ytaj ooy jihuiy huinmaay jadu'n nej Simeón ñigapxy je pi'c ma'xung.

³⁴⁻³⁵ Chi Simeón conuucx yi' ajcxy, e nimay María, Jesús ytaj:

—Jadayaabi pi'c'anäg hue' jada aminiy co may Israel jäy yjothuinma'ñ yaj'oyihuipy miid yi Dios etz nañ jadu'n may Israel jäy yjothuinma'ñ ca' yaj'oyihuipy miid yi Dios. Yi' je' tüg iixpejt co ca' jäy y'ixa'niiyb choga'niiyb, e jadu'n tüg'óciy yajnejhuihuipy nej ajcxy nidüg nidüg yjothuinma'ñ miidity. E miich m'idipy jotmaymiid jadu'n nejihuüy tüg espada ti xyajtzaachiy.

³⁶⁻³⁷ Nañ jim Jerusalén anajty tüg töxyjäy huidibi anajty yxii Ana, Dios je' anajty y'ayucnajtzcaxiiybi. Fanuel anajty yteedy'ajtpy, hue' je' Aser y'ap y'oc, mij jäy anajty ooy. Janch mutz'anägni ypijcy e jéyi huixtujc jimijt chinay miid yña'y, mada'px midaax jimijt anajty cujc co'ögy chinäy, e ca' anajty ytigoy'ity ma Dios ytijc. Ana ytumb anajty tzajtigoty xim tzuum jopy ayuu anajty ycapxtägy. ³⁸ Chi Ana nimiñ José etz María jiby ma Dios ytijc, e quipxy miid ajcxy huingapxtacy je Huindzin Dios. Chi je Ana nimiydacy je pi'c Jesús miid tüg'óciy jäy jim Jerusalén huidi anajty ajcxy jip'ixp mina Dios cohua'na'ñ Jerusalén ma ymidzip.

Co ajcxy nicxni jim Nazaret

³⁹ Co oy yajcuydundäy tüg'óciy jadu'n nej je Huindzin Dios ñecy ymina'ñ, chi José etz María ñicxcixni jim Galilea ma ajcxy yci'mgajp Nazaret. ⁴⁰ Je pi'c Jesús anajty yeegy mic ooy miid huijy'ajt cujc'ajt, etz ymiid je' Dios ymay'ájtin y'oy'ájtin.

Je pi'c Jesús yajpaady ma Dios ytijc

⁴¹ Jimijt jimijt yi ungdaj ungedeedy ñicxy anajty ajcxy jim Jerusalén co anajty je Pascua xii paady. ⁴² Co Jesús anajty ymajmetzjimijt'ajty, chi ajcxy ypättigiiy jim Jerusalén jadu'n anajty ajcxy costumbre miidity co xii paady. ⁴³ Co je xii ñaxtäy, chi ajcxy huimbíjtcixni, e Jesús yhuí'miiy je' jim Jerusalén. Ca' José etz ytaj nejhuüy ajcxy co ti anajty yhuí'miy. ⁴⁴ Hue' ajcxy anajty tijy je' ymiñ axaam miid ymígügtijc. Co tüg xii yöyigixni, chi ajcxy ixtay je' y'ung ma y'amígügtijc ajcxy, etz huidi miid ñay'ixy'adyii ñaymígüg'adyii. ⁴⁵ Co ca' ajcxy y'ung paady, chi yhuimbíjtcixni jim Jerusalén ung ixtaaybi.

⁴⁶ Chi jadu'n yjajty codugüg xii oypaatcixy jim ma Dios ytijc, Jesús y'iñäy anajty agujc'amy ma je huindzindijc. Yi' anajty y'amido'ijtyp yi huindzindijc y'ayuc, e nañ yaj'amidooy anajty tijaty. ⁴⁷ Tüg'óciy je huindzindijc huidibi midou Jesús y'ayuc, chi ooy ajcxy huinmay etz jihuiy jadu'n nej je Jesús huinjihuüydy etz jadu'n nej anajty tiydudägy y'adzooy. ⁴⁸ Co Jesús ytaj yteedy y'ijxpati, chi ooy ajcxy tzachjihuiy. Chi ungdaj yminañ:

—Aay ung, ¿nej co miich jadu'n xytúngixyich? Yi mdeedy etz ñich yam tzachjottigooyb nay'adzigyijich n'ixtáaygixich miich.

⁴⁹ Chi Jesús y'adzooy:

—¿Na'amy co miich xy'ixtáaygixyich? ¿Ca' mnejhuiygixy co copity n'ida'ñich ma nDéedyich ytung?

⁵⁰ Chi ajcxy ca' huiñhuiyi Jesús y'ayuc huidibi ycapxy.

⁵¹ Chi Jesús miid nicxy je' ajcxy jim Nazaret. Chi Jesús capxymidoy ytaj yteedy. Chi yi' ytaj yajhui'mday ma yjot yhuinma'ñ tüg'óciy nej ytunyii yjadyii. ⁵² Chi Jesús ixpijc'adiitzp anajty ooy, etz yeegy yjáygojy huijycujc. E yi Dios etz jáy ajcxy ooy anajty jáygidaaccixy.

3

Juan el Bautista y'ayuccapxhuäcxy mijtigüduum

¹ Ma anajty je Tiberio César yjimijjtoty, mimajmox jimijt anajty maabi y'ane'mtigüy, chi je Poncio Pilato anajty gobernador'ajtp jim Judea, je Herodes anajty rey'ajtp jim Galilea, je' y'uch Felipe anajty rey'ajtp jim Iturea etz jim Traconite ñaaxjot. Chi Lisania anajty rey'ajtp jim Abilina. ² Chi je Anás etz Caifás je' ajcxy anajty teedy mijtungmiid ma Dios ytijc. Je huiñ'it tiempo Dios y'ayuc yja'ty ma je Juan, Zacarías ymang, huidibi anajty tzinaayb mijtigüduum. ³ Chi Juan choñ ñicxy ma tüg'óciy cajp mihuingon je Jordán mijñii, capxhuijy je jáy ajcxy, co huen jothuimbijttaaygixy etz huen ñibejtcixy jigix ajcxy ypocy yajhuinmeecxip. ⁴ Jada jadu'n tuni jajtí nej je ayucnajtzcaxhiybi Isafás anajty ti cojaay: Jim mijtigüduum yajmidooy tüg jáy mina'ñ: “Yaj'oyiiygix yi Dios ytü'aa, tim jadu'n nej jáy ajcxy yaj'oyiiygixy yi jibic tü'aa co tüg rey mina'ñ.” Yajtiyyigixy yi tü'aa huidibi ooy y'adijy y'a'och.

⁵ Tüg'óciy añi ahuoc huen joyiidyäy, tüg'óciy tungop huen nañ jadu'n joyiidyäy. Tüg'óciy ñi'aa tü'aa huidibi tijmin tijxjip huen tiidyäy. Yi tü'aa huidibi ca' quipxyjatyty huen quipxyjaty tiidyäy.

⁶ Tüg'óciy yi jáy ajcxy ixipy ñejhuñipy nej Dios yega'ñ je nihuambi cohuambi.

⁷ Chi Juan ojy ajcxy je jáy pinjaty anajty miimb ñibejtpi, yminañ:

—¿Miich ajcxy tza'ñ ajcxy y'ajugy y'amigüg! ¿Pin miich ajcxy ti xynimäy quég ma yi ayo'n huidibi Dios yquexaamy? ⁸ Túngix oybi, jothuimbjtcix, ca' ajcxy minaangixy miñ xyipy: “Abraham ñich ajcxy n'ap'ajtpy ndeedy'ajtpy”. ñich miich ajcxy nimaayb co Dios ixti jébi yi' yaj'ung'adyii yaj'anäg'adyii Abraham jada tzaa ca'ydi miich ajcxy. ⁹ Dios ni'ixi y'ity jaydëbi yajcödigoyipy jáy ajcxy y'alma huidibi jibic-huinma'ñ miid. Tim jadu'n nipaady nej jáy ni'ixi y'ity miid jacha co pujxiga'ñ tüg quipy hui di ca' oy ytiim'aty, etz yajnögtähua'ñ.

¹⁰ Chi je mayjäy ajcxy y'amidooy je Juan:

—¿Ti ñich ajcxy jébi nduñ?

¹¹ Chi je Juan y'adzooy, yminañ:

—Pinjaty yhuít miid metz, jaydëbi möy pin ca' miidity ni tüg. Etz pinjaty caagy miid nañ jadu'n möhuipy pinjaty ca' miidity.

¹² Chi miñ jadyii yajcogüejtpi co anajty ñiibedaangixy, yminañ ajcxy:

—¿Ti huaad ñich ajcxy nduñ (jigix Dios xymijotcujc'adipyich)?

¹³ Chi Juan y'adzooy:

—Ca' ñigi anaxy myajcogüety jadu'n nej je cötújcín y'ane'my.

¹⁴ Chi soldado ajcxy yminañ:

—¿Ti ñich ajcxy ndunipy (jigix Dios xymijotcujc'adipyich)?

Chi Juan y'adzooy:

—Ni pin ajcxy ti mgapíjciy, ni mganihuambedipy ajcxy. Nañ jadu'n mijotcujc'ajtcixy nej myajmujuuygixy.

¹⁵ Je mayjäy yjijp'ijxyp anajty ajcxy ooy, etz ooy jihuüy huinmaay nejhuühuaangixy pen yi Juan je' anajty Cristo. ¹⁶ Chi Juan nimay ajcxy nidüg'óciy:

—Ich janch nyajniibéjtypich jäy miid ni. Miimb je' axaam huidibi jacmij ca'ydi ich, ca' huaad yi' ycighuin ngejich. Je' miich ajcxy xyajniibedipy miidi Dios yjihui'ñ ymic'ajt etz miidi jün. ¹⁷ Je Cristo ni'ixi' y'ity co oybi möhua'ñ je jäy huidibi ajcxy oyhuinma'ñ miid, etz ymöhuaamy tzaachypi je jäy ajcxy huidibi jibic-huinma'ñ miid, tzaachypi huidibi nicamina ycixipy. Tim jadu'n nipaady nej tüg jäy ni'ixi' y'ity co ymochuimboja'n, e chi je oybi mocpajc pidäga'ñ ma che'x, etz je mocjaam ninögihua'ñ, e caminaxii ycapidza'ñ je jün.

¹⁸ Je Juan ooy jäy capxhuijy, etz canaagnax oybi ayuc capxhuäcxy. ¹⁹ Chi yi' ooy je rey Herodes, co y'uch Felipe ytöxyijc Herodías miid tzinaayi, etz jacjaydiiybi jibic-huinma'ñ tiibi Herodes anajty tuñ. ²⁰ Chi je rey Herodes nigü pocytuñ co Juan pidacy pujxtigoty.

Je Jesús ñiibejtin

²¹⁻²² Chi jadu'n yajty co jadu'n tüg'óciy jäy ñiibejttay nañ jadu'n Jesús ñiibejty. Yam anajty Jesús ycapxtägy co je tzajp y'ahuaach, etz je Dios yjihui'ñ ymic'ajt yminajcy ma Jesús ycöduu miid ñinicx jadu'n nej muuxy ñinicx. Nañ jadu'n yajmidoy tüg ayuc choñ tzajpjoty yminañ:

—Miich n'ung'ajtpy, ooy ich miich ndzocy ooy njihuüy, ooy njotcújcidyich miid miich.

Jesús ymij'ap ymijteedy

²³ Jesús hue' anajty yjimijt oy ni iipxmajc co ytungtigüy. Hue' je' anajty jadu'n jäy tijy José ymang, José yteedy hue' je' Elí, ²⁴ Elí yteedy hue' je' Matat, Matat yteedy hue' je' Leví, je Leví yteedy hue' je' Melqui, je Melqui yteedy hue' je' Jana, je Jana yteedy hue' je' José, ²⁵ Je José yteedy hue' je' Matatías, je Matatías yteedy hue' je' Amós, je Amós yteedy hue' je' Nahum, je Nahum yteedy hue' je' Esli, je Esli yteedy hue' je' Nagai, ²⁶ je Nagai yteedy hue' je' Maat, je Maat yteedy hue' je' Matatías, je Matatías yteedy hue' je' Semei, je Semei yteedy hue' je' José, je José yteedy hue' je' Judá, ²⁷ je Judá yteedy hue' je' Joana, je Joana yteedy hue' je' Resa, je Resa yteedy hue' je' Zorobabel, je Zorobabel yteedy hue' je' Salatiel, je Salatiel yteedy hue' je' Neri, ²⁸ je Neri yteedy hue' je' Melqui, je Melqui yteedy hue' je' Adi, je Adi yteedy hue' je' Cosam, je Cosam yteedy hue' je' Elmodam, je Elmodam yteedy hue' je' Er, ²⁹ je Er yteedy hue' je' Josué, je Josué yteedy hue' je' Eliezer, je Eliezer yteedy hue' je' Jorim, je Jorim yteedy hue' je' Matat, ³⁰ je Matat yteedy hue' je' Leví, je Leví yteedy hue' je' Simeón, je Simeón yteedy hue' je' Judá, je Judá yteedy hue' je' José, je José yteedy hue' je' Jonán, je Jonán yteedy hue' je' Eliaquim, ³¹ je Eliaquim yteedy hue' je' Melea, je Melea yteedy hue' je' Mainán, je Mainán yteedy hue' je' Matata, je Matata yteedy hue' je' Natán, ³² je Natán yteedy hue' je' David, je David yteedy hue' je' Isaí, je Isaí yteedy hue' je' Obed, je Obed yteedy hue' je' Booz, je Booz yteedy hue' je' Salmón, je Salmón yteedy hue' je' Naasón, ³³ je Naasón yteedy hue' je' Aminadab, je Aminadab yteedy hue' je' Aram, je Aram yteedy hue' je' Esrom, je Esrom yteedy hue' je' Fares, je Fares yteedy hue' je' Judá, ³⁴ je Judá yteedy hue' je' Jacob, je Jacob yteedy hue' je' Isaac, je Isaac yteedy hue' je' Abraham, je Abraham yteedy hue' je' Taré, je Taré yteedy hue' je' Nacor, ³⁵ je Nacor yteedy hue' je' Serug, je Serug yteedy hue' je' Ragau, je Ragau yteedy hue' je' Peleg, je Peleg yteedy hue' je' Heber, je Heber yteedy hue' je' Sala, ³⁶ je Sala yteedy hue' je' Cainán, je Cainán yteedy hue' je' Arfaxad, je Arfaxad yteedy hue' je' Sem, je Sem yteedy hue' je' Noé, je Noé yteedy hue' je' Lamec, ³⁷ je Lamec yteedy hue' je' Matusalén, je Matusalén yteedy hue' je' Enoc, je Enoc yteedy hue' je' Jared, je Jared yteedy hue' je' Mahalaleel, je Mahalaleel yteedy hue' je' Cainán, ³⁸ je Cainán yteedy hue' je' Enós, je Enós yteedy hue' je' Set, je Set yteedy hue' je' Adán, je Adán yteedy hue' je' Dios.

¹ Jesús ymiid'ajtpy anajty je Dios yjihui'ñ ymic'ajt. Co Jesús jim choñ ma Jordán mij niñ, chi je Dios yjihui'ñ ymic'ajt yajnicxi mijtigüduum. ² Jesús y'ijty huixchigui'px xii jim mijtigüduum. Chi je mujcu' yjot'ijxi huinma'ñ'ijxi. Jaygay jim y'ijty, e co huixchigui'px xii ñajxni, chi oy yuuböccodyii. ³ Chi je mujcu' nimay:

—Peni janch miich Dios xy'ung'adyii, nimay jada tzaa huen ahuimbity tzajcaagy.

⁴ Chi Jesús y'adzooy:

—Jaybety ity ma Dios ñecy co ca'nan miid tzajcaagy ti'ajty jäy ajcxy yjugy'aty, nañ jadu'n tzocy tüg'óciy Dios y'ayuc.

⁵ Chi je mujcu' miidpejty Jesús ma tüg cop janch cixpi, chi tüg jaxigy yajni'ixiiy tüg'óciy je naax cajp huidi jii naaxhuiñbi. ⁶ Chi je mujcu' yminañ:

—Hich miich möhuipy tüg'óciy mic'ájtin ané'min etz oy'ájtin, com hich ngi'am y'ity tüg'óciy, e nmöhuibich hueñytimpñity. ⁷ Pen xyhuingoxtinaaybich xy'ojadajpich miich, ac miich jada mje' tüg'óciy.

⁸ Chi Jesús y'adzooy, yminañ:

—Huinhuägtuutcich miich mujcu', com jadu'n jaybéty y'ity: “Co yi Huindzin miich mDios mhuingoxtinähuiipy m'ojadadipy, etz yi' je' tüg pajc myajmij'adipy.”

⁹ Chi je mujcu' miidnicxy Jesús jim Jerusalén, chi miid pejty ma Dios ytijc coduu, e nimay:

—Pen Dios miich xy'ung'ajtp cödijpnax naaxcixy, ¹⁰ com jaybety jadu'n y'ity ma Dios ñecy co quexipy Dios yi' y'ángeles ajcxy e xycuend'adipy. ¹¹ Cigixy ajcxy xyhuidzipy, ca'ydi mdzaachiy ma tzaajot.

¹² Chi Jesús yminañ:

—Ji Dios y'ayuc huidi jadu'n minam co ca' mjet'ixipy mhuinma'ñ'ixipy yi mHuindzin Dios.

¹³ Co je mujcu' yajcijxy jadu'n nej anajty jot'ixa'ñ huinma'ñ'ixa'ñ Jesús, chi huinhuägtuuty tüg tiempo.

Jesús yajtzondägy je' ytung jim Galilea

¹⁴ Chi Jesús nicxy jim Galilea, e Jesús miid'ajtpy je Dios yjihui'ñ ymic'ajt. Chi Jesús ooy cömay y'ijty ma tüg'óciy cajp huinduy agonbi. ¹⁵ Hue' Jesús anajty yaj'ixpicy majaty je' ajcxy naymujctac. Chi je jäy ajcxy tüg'óciy ooy cömay Jesús.

Jesús yajpaady jim Nazaret

¹⁶ Chi Jesús ymiñ Nazaret ma anajty ti yeegy. Chi Jesús ytiy ma naymujctac, jadu'n nej costumbre anajty miidity pocxiiduum. Chi ytinaay'ahuiy, chi ytiy necycapxi.

¹⁷ Chi ajcxy mooy je necy huidibi je Dios y'ayucnajtzcapxiybi Isaías yjaay. Chi ciyhuäcxy je necy, paty jiiy tüg it ma anajty yjaybétyity jadu'n:

¹⁸ Je Huindzin Dios yjihui'ñ ymic'ajt xymiid'ajtpich, co xyajni'bicyich co nyajnimähuiibich ayoobitijc je oybi ayuc. Ti xyquexyich co nyajjotcugihuibich je jäy ajcxy huidi jotmay ymiid, etz nhuinméecxibich huidibi ajcxy pujxtigótyip, nañ jadu'n ajcxy je huidibi huiintzip nyajhuindicxigibich, e nbidägibich ahuätztuum huidibi yajtzaachytumb.

¹⁹ Ti xyquexyich co ngapxhuäcxibich je tiempo mina Huindzin Dios may'ajt oy'ajt tuna'ñ miid je jäy ajcxy ycixpi.

²⁰ Chi jada' Jesús abidijty je ñecy, yajcädigiy je tungmiidpi, huin'it y'ixtacy. Chi tüg'óciy mayjäy jiiy ma naymujctac ooy ajcxy huindicxy je Jesús. ²¹ Chi Jesús yminandacy:

—Cham yajcuydun je' huidi jaybety ma Dios ñecy jadu'n nej miich ajcxy cham ti mmidooy.

²² Chi nidüg'óciy ajcxy ooy jäygidacy nej Jesús mina'ñ, etz huinmay ajcxy ooy je ayuc huidibi Jesús ycapxy, chi ñayñimáayigixy:

—¿Nej ca'y José jada jada' y'ung?

²³ Chi Jesús yminañ:

—Ca' yjécyity miich ajcxy xyajnimähuibich jada ayuc: “Tzoydumbi naychoyihuii ci'm. Tüg'óciy jadu'n nej ñich ajcxy nmidooyich ti mduñ jim Capernaum, nañ jadu'n miich octun ma mgi'mgajp.”

²⁴ Chi Jesús yjacminañ:

—Janch ñich miich ajcxy nnimäy co ni tüg jäy huidibi Dios y'ayucnajtzcaxxiyb ca' jäy ajcxy cöbicy ma yci'mgajp. ²⁵ Janch ñich miich ajcxy nimäy co ooy anajty may co'ögy ytöxyjäy ya Israel jecy'ajty co Elías chinaay, co je tzajp adujcy tugüig jimijt jatudujc po', co oy yuu miñ ma tüg'óciy naax cajp. ²⁶ E Dios ca' quejxy je Elías ma yi Israeljäy co'ögy töxyjäy ajcxy. Hue' janch quejxy huinduum jim Sarepta ma Sidón naaxjot ma tüg co'ögy töxyjäy huidi jim. ²⁷ Nañ jadu'n anajty ooy mayjäy püdz pa'm miidity ya Israel jecy'ajty co je Dios y'ayucnajtzcaxxiyb Eliseo chinay. Chi ni tüg jäy huin'it catzoocy, jëyi tügpajc choocy pa'mjäy huidibi anajty yxi Naamán huidi tzoon Siria naaxjot.

²⁸ Huin'it tüg'óciy jäy huidi anajty jiiby ma naymujctac ooy yjotma'tcoty co jadayaab ayuc ajcxy midooy. ²⁹ Chi je mayjäy ajcxy nibidigy Jesús etz yajpidzimy ma je cajp. Chi ajcxy yajnicxy jim ma je tzaahuingueetz, co je cajp copcíxy anajty yajpaady, e jim anajty cödiipnaxaangixy. ³⁰ Chi Jesús ñajxy cujc'amy ma je' ajcxy, chi ñicxni.

Tüg yëydijc huidibi anajty miid jibic espíritu

³¹ Chi Jesús y'idacy jim Capernaum, tüg cajp jim Galilea naaxjot, chi Jesús jäy ajcxy yaj'ixpijcy pocxhiiduum. ³² Huinmay ooy ajcxy jadu'n nej je' yaj'ixpicy. Ñayñimáayigixy co je Jesús yaj'ixpicy nejihuüy mijtung mij'ané'min miidity.

³³ Jiiby ma je naymujctac jiiby anajty tüg yëydijc huidibi miid tüg ca'oybi, chi je ca'oybi mic yaaxqueecy yminañ:

³⁴ —Ixmajtzcich ajcxy, ¿ti mdunamy miid ñich ajcxy Jesús je nazaretpi? ¿Nej ti mmiñ co xyajhuindigoyáanigixyich? ñich miich n'ijxcapy co miich je' je Huätzpi Dios.

³⁵ Chi Jesús je ca'oybi ogy, nimay:

—Amon, pidzim ma yi jäy.

Chi je ca'oybi najtztijiy je yëydijc agujc'amy ma je jäy ajcxy, huin'it ypidzimy, e ca' ni nej jactuuñ. ³⁶ Tüg'óciy jäy jim ooy ajcxy ñay'adzigiyyi miñ xyipy yjanayñimáayigixy:

—¿Ti ayuc jada' yi'? Co miid y'ané'min etz mic'ajt ane'my ca'oybi etz yajpidzimy ma jäy.

³⁷ Chi Jesús capxpaady y'ijty ma tüg'óciy cajp huidi huinduy agónip.

Jesús yajtzoocy Pedro ymïd töxyjäybi

³⁸ Chi Jesús ypidigy choñ ma naymujctac, ytigiiy ma Simón ytijc. Jadu'n anajty Simón ymïd töxyjäybi mic ytoyii. Chi ajcxy cohuaniiy Jesús miid je' ycixpi. ³⁹ Chi Jesús yhuindacy ma je' yhuinduu, ix'ooy je toyii, e jadu'ñi ñajxy. Chi je' mic'amy ypidigy, yajcay yaj'uucy ajcxy.

Jesús yajtzoocy mayba'mjäy

⁴⁰ Tzuu tzuu anajty jäy ajcxy yajnicxy tüg'óciy jäy ajcxy pa'mmiidpi ma Jesús. Chi Jesús cñixajy nidüg nidüg, e jadu'n anajty ajcxy chögy. ⁴¹ Chi nañ jadu'n je' ca'oybi yajpidzimy ma mayjäy, mic je ca'oybi anajty yhua'ñ yjihuiy, ymina'ñ:

—Miich je' Dios xy'ung'ajtp.

Chi Jesús nigix'ojy, ca' anajty yajhuäcxipy nicxy yjaccapxy, com ti anajty nejhuuyigixy co yi' je' je Cristo.

Jesús y'ayuccapxhuäcxy jim Galilea

⁴² Co yxiimiiy, chi choñ Jesús, ñicxy mijtigüduum. Ooy jäy yja'ixtäyii, chi ajcxy oy paatcixy, yajhuäcxijpy ajcxy ooy, ca' anajty oc'ixmadzáangixni. ⁴³ Chi Jesús yminañ:

—Ooy jada chachcopícyty co canaag agajp ñich jada ngapxhuäcxibich je oybi ayuc jadu'n nej Dios y'ane'my. Paady Dios ti xyquexyich ya naaxhuñ.

⁴⁴ Jadu'n anajty je' capxhuäcxy majaty jäy ñaymujctac jim Galilea.

5

Je acxmajtzin mijhuinma'ñybi

¹ Tügtecy jadu'n yjajti, jim anajty Jesús ma je Genesaret mejypa', co jäy ñimiini janch ñay'adijiy ñay'agodiigixy, tzach'amidohuaangixy Dios y'ayuc. ² Chi yi' ijxpaty mejtz barco jahueengi mejypa'áy. Je acxmajtzpidijc ti anajty ypidzimgixy ma je barco, jim anajty y'acxxuummy pújccixy. ³ Chi Jesús yajtiigiyyi tüg barco huidi Simón anajty je'ajtpy. Chi may'ajt pijctzoy co huen yajjihuägy hueeni yi barco mejypa'áy. Chi Jesús y'ixtacy barcojoty, e jadu'n yaj'ixpijcy je mayjäy ajcxy. ⁴ Co ycapxymaayi, chi Jesús Simón ñimay:

—Ñicx pidäg m'acxmadzi'ñ mejyjoty, jaydëbi májtzcixipy acx.

⁵ Chi Simón y'adzooy:

—Huindzin, ti ich ajcxy ooy njatuñ tüg tzuum, ni ti ti ngapáatcixyich. Per miid miich m'ayuc ycixpi yi acxmadzi'ñ nbidägibich mejyjoty.

⁶ Co ajcxy pidacy je acxmadzi'ñ mejyjoty, chi yajco'adujcy ooy may acx, jahueeni acxmadzi'ñ ycaciich miid je may acx ycixpi. ⁷ Chi Pedro yemi ymigügtijc huidi anajty jim ma je jadügpí barco, huen miñ ajcxy pubedyi. Chi ajcxy ymiñ pubejtp, yaj'ujch ajcxy metzpi barco miid may acx, jagoo jagoo ycaquiñ je barco miid may acx ycixpi. ⁸ Co Simón Pedro ijxy jadu'n, chi ycojxtinaay'ahuñy ma Jesús yhuinduu, ñimay:

—Huñhuäctúutcich, Huindzin, com ich pocyjäy ich.

⁹ Com Pedro janch tzigüyb anajty, etz nañ tzigüyb tüg'óciy huidi anajty miid ti ytuñ, co anajty ooy may acx tzachyajnibéjtcixy. ¹⁰ Nañ jadu'n tzigüyb anajty je Jacobo etz Juan je Zebedeo ymang ajcxy huídibi Simón anajty ti pubety. Chi Jesús ñimay Simón:

—Ca' mdzigüy, jadachambi etz jacnicxni xi tiempo mdunipy jäymadzi.

¹¹ Co je barco yajmeypidzimy, chi ajcxy y'ixmajch tüg'óciy, chi ajcxy panicxy Jesús.

Jesús yajtzögy tüg jäy nibützpa'mmiidpi

¹² Chi jadu'n yjajti co anajty Jesús yjimity ma tüg cajp, co ñimiini tüg yëdjic ymiid anajty pützpa'm. Co je pa'mjäy ijxy Jesús, chi nihuindacy ma yhuinduu, minucxtacy, ñimay:

—Huindzin, pen mdzojcpy jëbi xyajtzögibich.

¹³ Chi Jesús yci' najtzxajiy nidooñ, ñimay:

—Ndzojcpyich, hui'm huädz.

Chi mic'amy je jäy choocy. ¹⁴ Chi Jesús ane'my, ñimay:

—Ca' ni pin myajnimähuipy, nicx janchtiy nayguëxigüib ma teedy, jaydëbi möhuipy Dios huindzig'ñ, jadu'n nej Moisés ycötújcín je jécyip y'ane'my, miid yi' ycixpi co ti mhüätzpidzimy, jaydëbi jäy ajcxy nejhuihuipy co ti mdzögy.

¹⁵ Je capxy'ayuc nigü y'oc-huäcx'adiitzi, e janch mayjäy y'ocnimújcín, jim pin ayuc midohuaam, e jim huidi tzögaam. ¹⁶ Jesús ycögueecpy anajty je mayjäy, ñicxy anajty mijtigüduum Dios ojadajtpi.

Jesús yajtzögy tüg jäy cixuxypi tecyxuxypi

¹⁷ Tüg tecy yjajti, Jesús anajty yaj'ixpijcp, e jim anajty ajcxy iñäy ma Jesús yhuinduu fariseojäy ajcxy, etz huidi jäy yaj'ixpijcp Dios ñecy huídijaty anajty ti choongixy canaag ajajp ma Galilea naaxjot Judea naaxjot, etz cham huídijaty anajty ti chooñ Jerusalén. E Jesús ymiid anajty Huindzin Dios ymic'ajt co jäy yajtzögipy. ¹⁸ Chi nijëjity jäy yajja'ty cijx'am tüg pa'mjäy yëdjicpi huidi ca' anajty yci' ytecy yücxxy. Chi ajcxy ixtaay ma yajtiictigühuipy pidäga'ñ anajty ajcxy je pa'mjäy ma Jesús yhuinduu. ¹⁹ Com ca' anajty ni ma tigüydac miid co je tijc anajty ooy y'újtzity miid mayjäy. Chi ajcxy miidpejty tijc nigüxy, chi ajcxy tijc yajcöhuach, e chi ajcxy cödiñajxy cijx'am je pa'mjäy ma Jesús yhuinduu. ²⁰ Co Jesús ijxy jadu'n nej je' ajcxy ymibicy, chi ñimay:

—Yëdjic, yajmeecxp mbocy.

²¹ Chi je' ajcxy huïdi yaj'ixpijcp Dios ñecy etz je judío xpicityjc huïdi naydíjigixp fariseojäy huinmaygoty, ñayñimáayigixy: “Jada Jesús ooy ycapxtigoy miid Dios. Ni pin yëydijc huaad ca' ti pocymeecxy. Tügpaic nHuindzin'ájtım Dios huïdi pocyhuinmecxp.”

²² Jesús ñejhuiy je' ajcxy yjot yhuinma'ñ, paady ajcxy nimay:

—¿Ti mdzachuinmaayb ajcxy ma mjot mhuinma'ñ? ²³ ¿Ti jactzip co minaanım co ti mbocy yajmeecxy o minaanım: “Pidíg etz nicxni”? ²⁴ Jaydëbi miich ajcxy mnejhuïhuipy co ñich je' je jäy huïdi tzoon tzajpjoty, nmıidich ané'mın etz mic'ajt ya naaxhuiñ jëbi jäy nbocyhuinmeecxyich, paady cham nnimäyich yi pa'mjäy: “Pidíg etz yajpidíg mmaabejt, nicx ma mdijc.”

²⁵ Chi mic'amy je pa'mjäy ytinayigy ma je jäy ajcxy yhuinduu, etz yajpidigy je' ymaabejt ma anajty ycögnäy. Chi ñicxni ma ytijc, chi ooy cömay jäymejch Dios. ²⁶ Huin'it nidüg'óciy je mayjäy ooy ajcxy jihuıy, e chi ajcxy ooy cömay etz jäymejch Dios. Chi ajcxy ooy chigiıygixy, ymınaangixy:

—Cham janchtiy n'ıjxim mijhuinma'ñ.

Jesús huodzoñ je Levı

²⁷ Co jadu'n ytuni yjajti, chi Jesús jim choñ, chi ijxy tüg yajcogüejtpı huïdi anajty yxiı Levı. Levı jim anajty ñäy ma yajgogüejttac. Chi Jesús nimay je Levı:

—Pajaamgich.

²⁸ Chi je Levı ixmajtztay huïdi anajty ytuumyb etz padzoñ je Jesús.

²⁹ Chi Levı mayjäy yajcay yaj'uucy ma ytijc, cham may yajcogüejtpı ajcxy etz jacjadyıi jäy huïdi ñnaayb ma yi mesa miid Jesús etz yi' ydiscıpusos ajcxy. ³⁰ Chi je' ajcxy huıdibi yaj'ixpijcp Dios ñecy etz je xpicityjc huïdi naydíjigixp fariseojäy tzachni'ameechycápcıxy ni'ojııygixy je Jesús ydiscıpusos ajcxy, ymınaangixy:

—¿Na'amy co mgaaygixy m'uuccıxy miid yajcogüejtpı etz miid pocyjäy ajcxy?

³¹ Chi Jesús ymınañ:

—Ca' yajmayjaty tzoydumbi huıdibi ca' ajcxy ypiıgyıi, jëyi huïdi ajcxy pijcip. ³² Ca' ñich ti nmiñich ma je jäy ajcxy huıdibi ca' pocy miıdıty. ñich ti nmiñich miid yi pocyjäy ycıxpi co huen jothuimbijttaaygixy ma Dios.

Yaj'amıdooy ajcxy Jesús ti co jäy ajcxy y'ayunas'ájtıxy

³³ Chi je mayjäy ajcxy Jesús nimay:

—Nej co yi' (Juan) ydiscıpusos ajcxy janam jadojc jaygay y'ıjtcıxy etz ycapxtáccıxy, nañ jadu'n je fariseojäy ydiscıpusos ajcxy janam jadojc jaygay y'ıjtcıxy. Chi miich mdiscıpusos ajcxy ca' ajcxy jaygay y'ıjtcıxy, caaby uucp ajcxy jabom jabom.

³⁴ Chi Jesús ymınañ:

—¿Nej jëbi yaj'ayuu'aty jäy ajcxy huïdi yajpatpi ma je pijcipı yajnixııduñ, pen quıpxyı yam yajpaady miid je huıdibi pijcp? ³⁵ Minamb je xiı je tiempo mina je pijcipı yajtzonııyb, huin'it janchtiy ajcxy jëbi y'ayuu'ájtıxy.

³⁶ Nañ jadu'n ajcxy yajnimay tüg jihuımbıt ayuc:

—Ni pin ca' huaad agıyıy tuc-huit miid jemyhuit, canaan jëyi ycııdızip yi jemybi, nañ jadu'n je tucpi ca' oy yhui'ma'ñ miid je jemyhuit agıyı'ñ. ³⁷ Ni pin ca' pidägy jemy vino ma je tucpi cochac, pen janch jadu'n octuñ, je vino jemybi ycııdızip je tucpi cochac, chi y'ixyojctähuıpy je vino etz je cochac ñıtıgoydähuıpy. ³⁸ Pidägıpy ajcxy jemy vino ma tüg jemybi cochac, chi jadu'n ca' ytıgoyıpy je vino ni je cochac. ³⁹ Ca' ni pin tzocy vino jemybi, pen ti anajty ügy vino tııbi yjejcni, co jadu'n ymına'ñ co jac oy je tııbi yjejcni.

6

Je discıpusos ajcxy yajmújccıxy trıgo cojc pocxxııduum

¹ Chi jadu'n yjajti tüg pocxxııduum co Jesús oy ñaxy ma tüg trıgo cam, e yi' ydiscıpusos ajcxy oy anajty yajminájccıxy trıgo tım, chi ajcxy nıxajtztıdy, e chi ajcxy jııcxy. ² Chi nidügtı fariseojäy ymınañ:

—¿Ti co ajcxy jadu'n mdundigooy co mdúngixy huidi ca' ñigodúcyity ajcxy mdunipy pocxin xiiduum?

³ Chi Jesús yminañ:

—¿Nej ca'ni miich ajcxy mgapxy Dios ñecy nijadu'ñyi? ¿Nej ca' mnejhuiygyixy ti David ytuun co anajty yuubögyii etz nañ co ymígügtjic anajty yuubögyii? ⁴ David ytigüiy ma Dios ytijc, chi conigy je tzajcaagy huídibi anajty jiiby ma Dios yhuinduu, chi caay, nañ jadu'n moy je ymígügtjic ajcxy. Je' tzajcaagy ca' anajty ypadyii nicxy je' ajcxy cay. Teedy je' anajty ajcxy paatip cáaygixip.

⁵ Chi Jesús yjacminañ:

—Hich je' je jäy huídibi tsoon tzajpjoty, jëbi nnimäyich je jäy ajcxy ti jëbi huaad ytúngixy sábado xii.

Je yëydjic huídibi anajty yci' tãdzip

⁶ Chi jadügtecy yjajtí tüg pocxxiíduum, co Jesús ytigüiy ma tüg naymujctac, chi jäy yaj'ixpijcy. Jiiby anajty tüg yëydjic huídi y'a'oygi' anajty tãdzip. ⁷ Chi huídi ajcxy yaj'ixpijcp Dios ñecy etz fariseojäy ajcxy ix'ijxy pa'íjxcixy Jesús nej pen jäy yajtzögám pocxxiíduum, e je' ajcxy anajty miid ycixpi xihua'ñ. ⁸ Jesús ñejhuiyb je' anajty ajcxy yjot yhuinma'ñ. Chi Jesús nimay je yëydjic huídibi anajty yci' tãdzip:

—Pidíg, tinayíg mayjäy'agujc.

Chi je' ytinaayígy. ⁹ Chi Jesús yminañ:

—Nyaj'amidohuaamybich miich ajcxy tüg ayuc. ¿Nej Dios ñecy ymina'ñ, jëbi oybi nduunim pocxxiíduum o jëbi jibicpi nduunim, nyajtzoocim jäy o nyajtigooyim jäy yjogy'ajt?

¹⁰ Chi Jesús ajcxy huindicxpejttay nidüg'óciy, chi nimay je pa'mjäy:

—Xajtiú mgi'.

Chi je' yci' xajtiíy, huin'it je' yci' choocy. ¹¹ Chi je' ajcxy huídi yaj'ixpijcp Dios ñecy etz je ixpicytjic huídi ajcxy mijpidacp judío ycostumbre ooy ajcxy yjot'ambijcy, ñayñimáayigixy miñ xyipy:

—¿Nej ajt n'octuunim jada Jesús?

Jesús huin'ixy je majmetzpi discípulos ajcxy

¹² Jadu'n yjajtí huin'it xii Jesús ñicxy mijtigííduum Dios ojadajtpi. Tüg tzuum ooy Dios miibijctzooy. ¹³ Co yxiimíy, chi Jesús huoomiñ yi' ydiscípulos ajcxy. Chi huin'ijxy je majmetzpi, etz yxiimoy ajcxy, apóstoles. ¹⁴⁻¹⁶ Chi Jesús yhuin'ijxy je Simón huídi yxiimoy Pedro; je Andrés, Pedro y'uch; Jacobo etz Juan; Felipe etz Bartolomé; Mateo etz Tomás, Jacobo hue' je' Alfeo ymang; etz Simón huídi jäy ytijpy Zelote; Judas, Jacobo y'uch; etz Judas Iscariote huídibi nañ jadu'n Jesús cïyejc ma ymidzip.

Jesús yaj'ixpijcy mayjäy

¹⁷ Chi Jesús miid'idacy je discípulos ajcxy, chi oy yhuäcxipy ma tüg ajoy miid ydiscípulos ajcxy etz mayjäy huídi anajty ti choongixy Judea naaxjot, etz Jerusalén, etz ma mejypa' jim Tiro etz Sidón. Ymiñ ajcxy je mayjäy co amidoo'idáani Jesús y'ayuc etz nañ chögaangixy je pa'm huídi ajcxy ymiid. ¹⁸ Cham je huídi anajty ayo'n tzachpaatp miid ca'oybi, nañ tzoocp je' anajty ajcxy. ¹⁹ Chi tüg'óciy je jäy ajcxy janch ñidonamy anajty ajcxy je Jesús, co ymiid mic'ajt co jäy tüg'óciy yajtzög.

Je jotcujc'ajt etz je cajotcujc'ajt

²⁰ Chi Jesús huindicxpejttay je mayjäy huídi ajcxy ixpigaam yi' y'ayuc, e yminañ:

—Jotcujc miich ajcxy ayoobtjic, com miich ajcxy cham xypaat Dios y'ané'min.

²¹ Jotcujc miich ajcxy huídi cham yuubó'cip, co mgüxiib miich ajcxy. Jotcujc miich ajcxy huídi cham jotmay miid, co ypáadip xii tiempo mina mxondáaccixipy.

²² Jotcujc miich ajcxy mina anajty jäy ca' xy'ixáangixy, co pin xy'ixtjicixipy, e co jäy ajcxy jibic xyñigapxa'ñ xyñixiga'ñ miid ich ycixpi, je jäy huídi tsoon tzajpjoty.

²³ Mxondäg miich ajcxy huin'it xii, etz mjotcugiiygixip, com ooy chachmijjity huidi ajcxy mbadaamy tzajpjoty. Com jadu'n anajty jecy'ajty miich mmij'ap mmijteedy ca' ixaangixy je huidi anajty Dios y'ayucnajtzcaxiiyipy.

²⁴ Miich ayoob ajcxy comeenyjyä, com ca' ti jotcujc'ajtın mjacpadaangixy huin'it xii (co Dios tiydunip je naaxhuiñyjäy).

²⁵ Miich ayoob ajcxy huidi cham oc'agujc'ajtp ocjotcujc'ajtp, ayo'n jotmay ajcxy mbaadip, e myajmayjadipy miich ajcxy tijaty.

²⁶ Miich ayoob ajcxy co ajcxy myajniğapxipy myajnimiydägipy, com jadu'n jecy'ajty miich ajcxy mmij'ap mmijteedy nimay je jäy ajcxy co ooy y'oyjäy huidi ajcxy anajty najtzcaxiiyb ayuc huidibi ca' ytiy yjanchity.

Nej huaad mmigüg ndzójcm

²⁷ Chi Jesús yjacmınañ:

—Miich ajcxy huidi cham amido'ijtp iich n'ayuc, iich miich ajcxy nimaayb: Tzójccix mmidzip, mi'oyjäy'ajtcix huıdıjaty ca' xy'ixaangixy. ²⁸ Migapx je jäy ajcxy miid oyjot oyhuinma'ñ huıdı ajcxy jıbc xyñıgapxp xyñi'ojiiyb. Mıbijctzoogixy yi Dios miid je' ajcxy ycıxpı huıdıbi xyñıgapxp xyñi'ojiiyb. ²⁹ Pen ji pın xycıjxy ma yi mhuınjıjp, mo' jadüg adu'm'amy ahuın hueñ coxy. Pen ji pın xypıgaanı yi mjocxhuit, jactimmo' mnijen huen yajnicx. ³⁰ Pın xypıjctzohuıp tijaty, mo'. Pın xypıjcpı huıdı miich mjë'ajtpy, ca' mbijctzohuıpy jadüg'oc. ³¹ Nej mdzocy tunıpy jäy miid miich ajcxy, nañ jadu'n miich ajcxy mdunıpy miid yi' ajcxy.

³² Pen miich ajcxy jëyi mdzıjccıpy pınjaty xychojccıxp, ¿ti oyjäy'ajtıın jada' miich ajcxy m'ocpaadıpy? Nañ jadu'n je pocyjäy ajcxy chojcpy pınjaty yi' ajcxy tzójcpı. ³³ Pen mdumyb oybi huıdıjaty mmiid ooy mnaymıgüg'adyii. ¿Ti oyjäy'ajtıın jada' miich ajcxy m'ocpáadıp? Nañ jadu'n je pocyjäy ajcxy tuñ oybi miid ymıgügtıjc. ³⁴ Pen myejcpıjctzou miid je jäy huıdıbi miich ajcxy mjıjp'ıjxpy co nañ jadu'n xymöhuıpy tıgatıı, ¿ti oyjäy'ajtıın miich ajcxy mdumyb? Nañ jadu'n yi jıbc jäydıjc jayejcpı tijaty pıjctzoy co nañ jadu'n jıjp'ıjxcıxy co ymöhuıpy tıgatıı. ³⁵ Miich ajcxy, tzójccix mmidzip, mi'oyjäy'ajtcıx mmidzip, yajpıjctzoogıx tijaty, e ca' ni ti mjıjp'ıjxcıxy co ajcxy jac mıj mbaadıp. Jadu'n miich ajcxy mıj mbaadıp oy'ajtıın e mnaydıjııyb ajcxy je mıjpi Dios y'ung. Com Dios pa'ayoodaayb tüg'ócıy yi jäy ajcxy huıdıbi ca' ti jäygidägy, etz huıdı jıbcıjäy. ³⁶ Miich ajcxy pa'ayoo mıgügtıjc ajcxy, jadu'n nej mdıos Teedy tzajpjoty pı ypa'ayooy huentyımpıııty.

Ca' mmigüg ni ti myaj'ix'ixıpy myajpa'ixıpy

³⁷ Ca' mmıgüg ni ti myaj'ix'ixıpy myajpa'ixıpy, huın 'it ca' pın xy'ix'ixıpy xypa'ixıpy. Ca' mmıgüg mbocy'ixıpy, e huın'it ca' pın xypocy'ixıpy. Huınmecx mmıgüg, e huın'it nañ jadu'n Dios myajhuınmeecxıp. ³⁸ Mo' mmıgüg etz huın'it miich ajcxy Dios xymöhuıpy quıpxy ooy tıjtäch etz janch yajxon y'ıjtzıty cödınaayb. Com yi quıpxı'ñ tııbi myajquıpxıy, nañ yi' miid xyquıpxhuımbıdıpy.

³⁹ Chi Jesús yajnimay je mayjäy tüg jıhuımbıt ayuc:

—¿Nej jëbi tüg jäy huıntzpi ymıgüg huıntzpi huıjtzıyöyñi? ¿Nej ca' mdıjy nımetz yjutcögägıxıpy? ⁴⁰ Ca' ji ni tüg xpıjcpı huıdı nıgi xpıcyıp ca'ydı yhuındzın, pen ji pın huädz yjadım'ıxpcıy najtzcadıhuıpy yhuındzın.

⁴¹ ¿Na'amy co mıc'amy mbocy'ıxy mmıgüg co hueeni ytundıgoy, e miich jac mıj ooy mdundıgoy, e ca' mjıhuı'ñybıcy? Tım jadu'n nıpaady nej jıhuıy tı m'ıxy pı'cpıx ma mmıgüg yhuıın, e ma miich mıgı'mhuıın jac jııby mıj quıpy, e ca' m'ıxy je quıpy ma mıgı'mhuıın. ⁴² Ca' huaad mnımähuıpy mmıgüg: “Nayyegıı mıñıch pıx n'ocyajpıdzım maabi mhuıın”, e miich ca' m'ıjxy mıj quıpy ma mıgı'mhuıın. Jıbcıjäy miich. Jayıjp miich myajhuädzıp mjot mhuınma'ñ, huın'it jëbi mmıgüg m'ııhuıjıjp mgapxhuıjıjp, jadu'n nıpaady nej jıhuıy tı myajpıdzımy je quıpy maabi mhuıın, jachuädz m'ıjxıgıpy e chi jëbi yi pı'cpıx myajpıdzımpıy maabi mmıgüg yhuıın.

Je quipy je ytiim, yi' miid ycixpi yaj'ijxcapy

⁴³ Ca' yi' y'oyjäyity huidi jibic tuumb, nañ jadu'n ca' jibicjäy huidi oy tuum, tim jadu'n nipaady nej tüg quipy. Ca' ji yi' oyguipy huidi jibic tiim'ajt, nañ jadu'n ni ca' yjibicquipyity huidi oy tiim'ajtp. ⁴⁴ Com ni je' quipy yaj'ijxcapj miid ytiim ycixpi. Ca' pin higueri tiim tucy ma quipy apymiidpi. Nañ ni pin ca' uvas cha'm piy ma aadz apymiidpi. ⁴⁵ Je jäy oyjäybi ma yjot yhuinma'ñ yajpidzimy oybi. Je jibicjäybi ma yjot yhuinma'ñ yajpidzimy jibicpi. Huidibi yhuinmaayb jotjoty huinma'ñyoty yi' ycapxyp.

Je mejtznajxpi poch y'ijx

⁴⁶ Chi Jesús yjacminañ:

—¿Nej co nigo minangixy: “Huindzin, Huindzin”, ni ca' ajcxy mdungixy huidi nyajnimaaaygixyp? ⁴⁷ Tüg'óciy jäy huidi xyñimibich etz xymidoohui ich n'ayuc etz cuyduñ, ich nyajni'ixihuipy pin je' ymidugnax. ⁴⁸ Quipxyiyb tüg yëydijc huidibi ytijccoyp ma tzaa nicxy, chi nidajy ooy ciicy, chi pidägy poch'ijx tzaa nigixy, co mijni ycomy nimiñ je tijc, miid tüg'óciy ymijaa jayajpidäga'ñ je tijc, e ni ca' jadu'ñyi yajyücy, com tzaagixy anajty ypojtztzooñity. ⁴⁹ Yi jäy huidi midoob ich n'ayuc e ca' cuyduñ, miidquixiy jadu'n yi' nej tüg yëydijc co ti ytijccoyp. Ni ca' poch ciicy ypojtztzooñity, jëyi naaxhuingixy nidajy hueeni. Co je mijni ymiñ miid ymijaa, chi yajpidägy je tijc, chi oy yhuindigoydäy.

7

Jesús yajtzögy tüg mijtungmiidpi Romano ytumbi

¹ Co Jesús ycapxtaay ymiydactaay miid je mayjäy huidi anajty jim amido'ijtp, chi ytigiy jim Capernaum. ² Jim anajty tüg Capitán tüg ytumbi hue' anajty pijcip, janch tim ögaanip anajty, e je soldado huindzin ooy anajty tzocy je ytumbi. ³ Co je capitán ayuc midooy jadu'n nej Jesús ytuñ, chi quejxy judío mijjäydijc, huen nicxy minuucxtaaccixy Jesús co je' yminipy ma ytijc yajtzögiiyb je' ytumbi. ⁴⁻⁵ Chi je mijjäydijc ajcxy ymiiñ ma Jesús, chi ajcxy cohuaniiy ooy, pijctzou may'ajt, nimay:

—Jadayaabi capitán ymihuaad co mbubedipy, com yajmij'ajtpy ich ajcxy ngajp, ti coyp ich ajt naymujctac.

⁶ Chi Jesús nicxy miid je' ajcxy. Co ajcxy mihuingooñ je tijc, chi je capitán quejxy ymigüg huen nicxy jipcobadäy Jesús, nimähuipy:

—Huindzin, ca' nej mnayjihuiy, ca' ich mihuaadity co mdigihuipy ma ich ndijc.

⁷ E paady ca' ich njot ti mictuñ co ich miich ci'm nicx n'ixtäy. Jëda'ajty miich nigoo capx, e ti anajty ndumbich chögy. ⁸ Nañ jadu'n ich nmiidich soldados ajcxy huidi ajcxy xycapxcöbijcpich. Nimäyich tüg: “Nicx”, e nicxp; nimäyich jadüg: “Min”, e mimb; nimäyich ndumbi: “Tun jada”, e ytumyb.

⁹ Co Jesús midoy nej je capitán yminañ, chi jihuiy ooy, chi ni'ijxhuimbijty nimay ajcxy huidi pamiinip:

—Ich miich yim nimaaygixyp co ca' nbaadyich Israel jäy huidibi xymibijcpich jadu'n nej jadayaab agatz jäy.

¹⁰ Co ajcxy je quexyöybi yhuimbijtcixni ma je tijc, chi oy páatcixni je tumbi ti anajty y'agidägy.

Jesús yajjugypijcy tüg co'ögytöxyjäy y'ung tiibi anajty y'ögy

¹¹ Chi jadu'n yajty huin'it xi co Jesús anajty nicxy ma tüg cajp huidi anajty yxi Nañ. Miid anajty nicxy jadyi ydiscipulos ajcxy etz mayjäy. ¹² Co yhuingooñ ma anajty ycapj tigihuaani, chi minaybaati jäy ajcxy, nicxy anajty ajcxy tüg öcpi yajnaaxtigiiygixy, huidi anajty undaj tügpajc y'ung'ajtpy. Hue' je' anajty co'ögy je töxyjäy, e miid anajty nicxy maycajpjäy. ¹³ Co je Huindzin Jesús ijxy, chi pa'ayogoty je töxyjäy, chi nimay:

—Ca' myäxy.

¹⁴ Chi Jesús ymijhua'cy, nidoñ je öcpi cajón. Chi ajcxy ytinayxijpy je huidi anajty ajcxy öcpi cinyñicxp. Chi Jesús yminañ:

—Yëydijc, ñich miich yam nimaayb, pidig.

¹⁵ Chi je yëydijc ññayigy huidi anajty ti y'ögy, e ytigiiy miydaacp. Chi Jesús yajc'idigiñiñi je' ytaj. ¹⁶ Chi ajcxy nidüg'óciy ooy ñay'adzigiygoti, e Dios jäymejch cömay, yminaangixy:

—Tüg mijpi Dios tiy'ajtmiiñpi cham yajpatp ma ñich ajt.

Nañ jadu'n ajcxy yminaangixy:

—Ti Dios ni'ijxcidägy yi yñaax ycajp.

¹⁷ Ooy Jesús yajcömay ma tüg'óciy Judea naaxjot, etz ma tüg'óciy jac huinduy agonbi naax cajp.

Je Juan je Bautista yquexyöybi

¹⁸⁻¹⁹ Chi je jäy ajcxy huidi anajty Juan je Bautista yaj'ixpijcpy nimiydactay jadu'n nej miid ytuni yjajti Jesús. Chi Juan huooy metz yi' ydiscipulos ajcxy, e quejxy ma Jesús yajpaady. Chi Juan nimay co huen nicxy amidoogixy Jesús, pen yi' je' je Cristo huidi anajty miinaam, o pen n'ahuñjxpy ajcxy huingbi. ²⁰ Chi je Juan yquejxyöybi miiñ ma Jesús nimay:

—Yi Juan je Bautista ñich ajcxy ti xyquéxyich ma miich amidohua'ñ pen miich je' je Cristo huidi minaamb, o ¿n'ahuñjxypich ajcxy huingbi?

²¹ Tim huin'ítiiy Jesús ooy mayba'mjäy yajtzoocy. Yajtzoocy nañ jadu'n huidi anajty ajcxy ooy mij yuu mij pa'm yaj'ayoyii, etz nañ yajtzoocy pinjaty anajty ca'oybi miid ma yjot yhuinma'ñ. ²² Chi Jesús je Juan yquejxyöybi nimaayi:

—Nicx nimaaygix je Juan jadu'n nej ti m'íjxcixy ti mmidoogixy, co yi huintzpi ti yhuindicxigy, yi tecyma'tpi ti yöyigy, yi nibützpa'mmiidpi ti chögy, je cönatpi ti ymidohuicxixy, je öcpi ajcxy ti yjugypijcy, e ngapxhuäcxyich oybi ayuc ma ayoobtijc.

²³ Jotcujc yi' ajcxy huidi ca' huinma'ñytigooygixy miid ñich ycixpi.

²⁴ Co je Juan yquexyöybi yhuimbijttay, chi Jesús nimiydaccoty je Juan ma je mayjäy ajcxy, yminañ:

—Co ajcxy ti m'oy mijtig'iduum, ¿ti ti m'íjxcixy? ¿Nej ti m'íjxcixy tüg jäy ametz jotmetz, jadu'n nejhuiy tüg nähuaax huidi pojmiimb pojxijp? ²⁵ Chi jada', ¿ti oy ti m'íjxcixy? ¿Tüg yëydijc huidi miid oy yhuit yxöxyity? Yi jäy ajcxy oy yxoixypí huidi agujc jotcujc tzinaaygixp hue' ajcxy yajpaady ma yi rey ytijc. ²⁶ ¿Ti ajcxy ti m'ixy jim mijtig'iduum? ¿Tüg jäy huidi Dios ytiy'ajt miid? Janch ti m'íjxcixy tüg Dios ytiy'ajtmiiñpi, etz jacnigi ymijity je' ca'ydi Dios y'ayucnajtzcaxixybi huidi jecy'ajty tzinay. ²⁷ Je' jada je jäy huidi Dios ñngapxyp ma ñecy ma Dios jadu'n yminañ:

Cham nguejxyich ñich nguexyöybi jayijp ma miich, je' yaj'oyñhuij je jäy ajcxy yjot yhuinma'ñ miid ñich ycixp, tim jadu'n nipaady nej jihuñy jäy tü'aa yaj'oyñy co rey ymina'ñ yjada'ñ.

²⁸ ñich miich ajcxy yam nimaayb co huidijaty ajcxy töxyjäydijc yajpi'c'ajtpy, ca' ji ni tüg Dios y'ayucnajtzcaxixybi huidibi jacnigi ymí jity ca'ydi Juan, je Bautista. Chi jada' je jac mutzpi huidi jiiby tzajpjoty yajpaatp ma Dios y'ane'my, jacmij je' ca'ydi Juan.

²⁹ Co ajcxy je mayjäy jadu'n midoy nañ jadu'n je yajcogüejtpidijc ajcxy huidi anajty ññibéjtcixy ma Juan, chi ajcxy minañ co Dios ytudägyity. ³⁰ E je fariseos ajcxy etz je escribas ajcxy huidi anajty ca' ññibéjtcixy ma Juan, ca' ajcxy mijpidacy huidi anajty Dios ytunamy miid je' ajcxy ycixpi. ³¹ Chi je Huindzin Jesús yminañ:

—¿Ti miid nyajquixihuibich jadyaabi jäy huidi tzinayb ma jadachambi tiempo? ¿Huidi miid nyajtügñhuibich? ³² Jadu'n nej pi'ctijc huidi ajcxy iyñiyb ma jäy yjuygixy ytooccixy. Mijhuan mijjihuiygixy ymigügtijc: “Ti njayajxüxich flauta e ni ca' ti m'éjtcixy; ti nja'ñhui ajcxy ñy jotmaymiidpi, e ca' ti myaaxcixy.” ³³ Chi Juan je Bautista ymiñ, e je' ca' anajty cay, ni ca' vino ügy, chi miich ajcxy minaangixy co Juan ymiid ca'oybi. ³⁴ Chi ñich, je jäy huidi tzoon tzajpjoty, nmiñich, chi caaybich uucpich, e

miich ajcxy mĩnaangĩxy: “Ijxcix, cha tũg yẽyđĩc janch cax janch vino uucp, huĩdi migũg'ajtpy yajcuẽjtpidĩc etz pocyjãydĩc.” ³⁵ Je tiy'ajt ji je' ñiguẽxĩgy ma je pinjaty nigapxp nimĩydaacp tiy'ajt.

Jesús ma Simón je fariseojã ytiyc

³⁶ Chi tũg fariseojã may'ajt piictzoy, co Jesús anajty mĩid ycaya'ñ. Chi Jesús ytiĩgy ma je fariseojã ytiyc, chi ñay'ahuĩy ma mesa. ³⁷ Chi jim anajty tũg tũxyjã huĩdibi anajty jĩbic tzinaayb jĩbic jugy'ajtp ma je jimbi cajp. Co je' nejhuĩy jiiby Jesús ma fariseojã ytiyc ñay ma mesa, chi mĩmĩñ tũg quiig aceite huĩdibi ooy oy xuugy, chi midĩgiĩy tigoty. ³⁸ Chi ypiĩguetz'ahuĩy ma Jesús ytecy ymĩc, e chi yajxooci Jesús ytecy mĩid huĩnnĩ e yajpõt mĩid ycõhuay, chi yajjaaxy je aceite huĩdi ooy oy xuugy. ³⁹ Co jadu'n ijxy je fariseojã, je' huĩdibi anajty ti huoy Jesús, chi jot'ajti ymĩnañ:

—Co ixypy jada Jesús y'ocjẽjty Dios ytiy'ajtmĩdĩpi, y'ijxcaypy ixypy pin jã nejpy jã yĩ tũxyjã huĩdibi nĩdoonĩp co yĩ' yjĩbictznã yjĩbicjugy'aty.

⁴⁰ Chi Jesús ymĩnañ:

—Simón, cham ñch tũg ayuc nmĩĩdĩdyich huĩdi nyajnimãhuamy.

Chi je' y'adzooy:

—Yajnimaaaygich, Huĩndzin.

⁴¹ Chi Jesús ymĩnañ:

—Tũg comeẽnyjã ymĩid anajty metz jã huĩdi ti ñuucxy. Tũg jã anuucxy migoox migo'px denario meeñ, e je jadũgpi anuucxy huixchĩgui'px majc. ⁴² Com je' ajcxy ca' anajty mĩĩdĩty ti mĩid cuedĩp, chi je comeẽnyjã huĩnmecxy nimetz. Miich ocnĩmaaygich, ¿je metzpi jã huĩdi nuucxy, huĩdibi je' ñĩgi chojpy?

⁴³ Chi Simón y'adzooy:

—Hue' n'a'ixĩyich je tiĩbi huĩnmecxy jac'anaxy.

Chi Jesús ymĩnañ:

—Ti mdĩygapxy.

⁴⁴ Chi Jesús ni'ijxhuĩmbĩjty je tũxyjã, e nimay Simón:

—¿Nej m'ijxyp jadayaabi tũxyjãyi? Co ndĩgiĩyich ma mdĩc, ca' miich ñĩ xymooyich co ndecy nbũjĩbich. Jadayaabi tũxyjã ñch ndecy ti xypũjĩp mĩid yhuĩnnĩ, e ti xymẽexyich ndecy mĩid ycõhuay. ⁴⁵ Ca' ñch miich ti xychũcxy. Jada tũxyjã jadu'n nej ti ytiyc tigĩy, xychũcxtĩyib ñch ndecy. ⁴⁶ ñch miich ca' aceite mbĩdãgy ma ñch ngohuajc. Jada tũxyjã ti xyajjaaxi ndecyich aceite huĩdi ooy oy xuugy. ⁴⁷ Paady ñch miich nyajnimãy co jada tũxyjã huĩnmecxi yĩ' ymaybocy, co tiĩbi oyhuĩnma'ñ yajtuñ cixyjot huĩnijot. Pinjaty hueeni ypocy yajhuĩnmecxi, hueeni yĩ' chójcin yajniquẽxĩgy.

⁴⁸ Chi Jesús je tũxyjã nimay:

—Ti miich mbocy yajhuĩnmecxtãy.

⁴⁹ Pinjaty anajty ñĩaayb ma je mesa ñayñĩmãayĩgĩxy miñ xyipy:

—¿Pin jã jada jada' co nañ yhuĩnmecxiy jã ypocy?

⁵⁰ Chi Jesús nimay je tũxyjã:

—Ti m'alma ñĩdzõgy co ti xymĩbĩcyich. Nĩcx jotcujc.

8

Tũxyjãydĩc huĩdibi anajty Jesús pubejtp

¹ Co jadu'n yjãti, chi Jesús ñĩcxy ma tũg'õciy je mij cajp etz mutz cajp, capxhuãcxy je oybi ayuc maabi Dios y'ané'mĩn. Je nimajmetzpi ydiscĩpulos ajcxy mĩid ñĩcxy. ²⁻³ Etz nañ ymĩĩdnĩcx nijẽjty tũxyjãydĩc huĩdi anajty Jesús ti yajtzõgy huĩdi ca'oybi anajty ymĩid etz jac tijaty pa'm. Hue' je' ajcxy anajty je María je tũxyjã huĩdi anajty xĩjĩp Magdalena, je huĩdibi Jesús yajpidzĩmi huixtũc ca'oybi ma je'; etz Juana, je huĩdibi ñã y anajty xĩjĩp Chuza, e je Chuza hue' je' je rey Herodes ytungmĩĩdĩpi; etz Susana, etz jacjadyii ajcxy huĩdi anajty ajcxy pubejt Jesús mĩid tijaty anajty ajcxy ymĩid.

Je niipi y'ijxpejt

⁴ Co mayjäy ooy ñayyöymujc ma Jesús yhuinduu huidi tzoon ma tüg tüg cajp, chi Jesús nimay je mayjäy ajcxy:

⁵ —Cha tüg ayuc nyajnimähuaangixy. Jadu'n jäy tüg choñ niipi, ñicxy trigo tñim huijpi. Co je trigo tñim huijy, chi nijëjity ypajc oy ycäy mijtügujc, chi je jäy ajcxy yajhuägpejty, e huidi ca' yajhuägpejty, chi joon piihuügy. ⁶ Chi nijëjity trigo pajc oycäy ma tzaa ñicx. Co ymujxy chi je' ytiich, je' co anajty naax ca' yxoogity. ⁷ Chi nijëjity trigo pajc oycäy ma apyot, chi ymujxy quipxy miid apy'ung, chi y'ujtz'o'ctay. ⁸ Chi nijëjity trigo pajc oycäy ma je naax oybi huinnätzcuyc, chi ymujxy, chi yeectzooñ, ytiim'ajty oyjaty, tüg trigo pajc migo'px oyco'ity.

Co Jesús je miydägiï yajmay chi yjactimcapxcoty, yminañ:

—Pin midohuamb jada ayuc, huen midooy.

Nej yhuimbizimy je niipi y'ijxpejt

⁹ Chi je discipulos ajcxy y'amidooy:

—¿Nej jada jadu'mbi jihuimbit ayuc yhuimbizimy?

¹⁰ Chi Jesús yminañ:

—Miich ajcxy jaydëbi mnejhuïhuïpy huidi Dios ñigapxpy ñimiydacpy coyüch'amy ma y'ané'min ycötüjcin. Jacjadyiibi jäy jihuimbit'amy nyajnimayich, jaydëbi pinjaty huidi ijxp ca' ajcxy y'ixipy, etz pinjaty midoob, ca' ajcxy mido'mbigipy.

Jesús capxticxy je niipi y'ijxpejt

¹¹ Jadu'n je jihuimbit ayuc yhuimbizimy: Je trigo pajc Dios je' y'ayuc. ¹² Je trigo pajc tñibi tügujc ycäy, je' je' jadu'n nej jäy huidi midoob Dios y'ayuc, chi mic'amy ñiminyii je ca'oybi, e piibizimdäy je Dios y'ayuc ma yjot yhuinma'ñ, ca'ydi mibic etz ca'ydi y'alma yajniidzögyii. ¹³ Je trigopajc huidi cähui ma tzaajot, je' yi' ajcxy huidi je ayuc midoob, chi cöbicy jotcuyc, chi je' ca' ytictztigiy, tzojccixy y'ocmibicy, co agapxiïyb paaty chi ixmajtzní. ¹⁴ Je trigo pajc huidi ti cähui apy'agujc, je' je' ajcxy huidibi midoob, chi co ñicxni jäy digooyni Dios y'ayuc miid jotcuyc'ájtín tzaaayin etz jugy'ájtín etz comeeñ'ájtín, e chi ca' Dios y'ayuc yhuï'my ma yjot yhuinma'ñ. ¹⁵ Je trigo pajc huidi cähui ma oyñaax huinnätzcuyc, je' ajcxy huidi oy etz tudägy yjot yhuinma'ñ miidity. Chi je Dios y'ayuc midohuï'my, e oñdägy'amy Dios y'ayuc ymayiy ma yjot yhuinma'ñ.

Je lámpara ñi'ijxpejt

¹⁶ Co jäy ajcxy jündicxi'ñ nöctzoy, chi ca' ajcxy cöjupy miid tu'tz, nañ ca' huaad pidägy cijx pätcí'py, hue' janchtiy pidaaccixy ma jündicxpejt, co pin ytiigiy jëbi ixxy je jün. ¹⁷ Ca' ni pin ayüch tunipy e nicxy ycayajnehuïy, ca' ni pin ti tunipy ameech e nicxy ycaniquëxygy. ¹⁸ Paady miich ajcxy midoogix yajxon co pin tijaty miid, jacyajmöhuip yi'. Pin ti camiid, yajpigipy je' huidi anajty yjamiid.

Jesús ytaj etz je jugymigüg

¹⁹ Chi Jesús ytaj etz y'uch ajcxy ñimiini, ca' ajcxy nimejch Jesús yajxon miid mayjäy ycixpi. ²⁰ Chi Jesús yñimaayi:

—Cheeby mdaj etz m'uch ajcxy tñiba'y, miich ajcxy xyjamigapxam.

²¹ Chi Jesús yminañ:

—Yi jäy ajcxy huidibi Dios ayuc midoohuïpy etz cuyduunip, yi' ñich ndaj'ájtípyich etz n'uch'ájtípyich.

Jesús yajxemy je poj etz je ñi co anajty chachpidägy

²² Chi tüg tecy yjajti Jesús ytiigiy ma tüg barco miid ydiscipulos ajcxy, chi Jesús yminañ:

—Tzoc jim'amy ñiinaxy náxim.

Chi ajcxy chooñ. ²³ Chi ñiigujc anajty ñicxcixy co Jesús ymi'ögy. Chi tüg mic poj miñ ma je mejy. Chi je barco ñi yajtiigiyiyi, janch yinjaty jahueenjaty ycaquiñ. ²⁴ Chi ajcxy Jesús nimijhuägy, tijyüxcy ajcxy nimaagyixy:

—¡Huindzin! ¡Huindzin! Cham ajt n'ocquiinim.

Co Jesús oy ymäyhuijy, chi jįpcogapxiy je poj etz je me jy co anajty chachmįjįtżpety ma barco. Chi je poj yhuäcxįjptay, y'amoonday. ²⁵ Chi Jesús yminañ:

—¿Ma miich ajcxy je mmįbįjcin?

Chi ajcxy yjanchchįgygoty janch yhuinmay ajcxy ñayñimáayįgįxy miñ xyįpy:

—Pįn yędyįc jada jada' co je poj etz niį jįguexy, etz yajhuäcxįpy, etz ycapxycöbįgyii.

Je Gadarajäy huįdibi anajty ca'oybi miid

²⁶ Chi ajcxy ymejch ma je gadarenos naaxjot, huįdi huį'm jįm'amy ñįinaxy ma je Galilea mijlaguunba'. ²⁷ Co Jesús ñįbįdzįmy, chi jįpcobadiy tųg yędyįc huįdi anajty ti choñ ma je Gadara cajp. Je' anajty ymiid ca'oybi, ti anajty yjejcni maabi ypadyii. Ca' je' anajty huit yajtuñ, nañ ni ca' anajty chinäy ma ytįc, öcpįjut anajty yajtzinähuiyb. ²⁸ Co je' ixpaty Jesús, chi yaaxqueecy, e ycoxtįnay'ahuiy ma Jesús yhuinduu, yminañ janch mic:

—¿Ti ĩch miich co xyñimįñįch, Jesús, tųgpajc mijpi Dios y'ung? Tun may'ajt ca' nijot xychachchaachtųñįch.

²⁹ Jadu'n minañ com co anajty Jesús ixquexy je ca'oybi ma je jäy, ti anajty yjejcni ma je ca'oybi anajty tzach'ane'my je jäy. Coxoch anajty ymįgųgtįc ymiid'adyii miid cadena. Janch ypojpty cadena, chi ca'oybi anajty yajnįcxyii mįjtįgįduum. ³⁰ Chi Jesús y'amįdooy je locįjįy:

—¿Ti miich mxįį?

Chi je ca'oybi yminañ:

—ĩch nxįį Legión (hue' yhuimbįdzįmy nimay).

Jadu'n minañ com nimay anajty ca'oybi ti ytįgyįgyxy ma je jäy. ³¹ Chi je ca'oybi may'ajt pijctzoy ma Jesús co ca'ydį yquexyii ma ayoodactuuby. ³² Jįm anajty tųg quepy įdzįm chachjįxcįxy ma je ujtzjot. Chi je ca'oybi may'ajt pijctzoy co huen yajtıgyįhuįpy je' įdzįm. Chi Jesús ni'adzooy. ³³ Co je ca'oybi ypįdzįmy ma je jäy, chi ytįgyįy ma je may'įdzįm. Huin'it je may'įdzįm ñayñajtzjįbįbydaayi ajcxy ma tųg ahuoc, chi oy ajcxy ycädäy niįjoty, chi y'ögtay.

³⁴ Chi je įdzįm cuend'ajtpį ajcxy co ixį jadu'n nej ti yjadyii miid ajcxy y'įdzįm, chi ajcxy yqueecy, oy nįmiįdaaccįxy cajpjoty etz majaty tundac. ³⁵ Chi mayjäy ajcxy chooñ oy įjxcįxy jadu'n nej anajty ti ytunyii ti jadyii, oyja'tcįxy ma Jesús. Chi je mayjäy ajcxy paty je yędyįc, tįibi anajty ca'oybi ñįbįdzįmyii ycöbįdzįmyii, iñäy ma Jesús yhuinduu, huit miid etz huįjy quejy, chi ooy je jäy ajcxy chįgyįy. ³⁶ Chi pįnjaty ajcxy įjx miid mįydacy jadu'n nej yį' choocy, je jäy huįdi anajty ca'oybi miid. ³⁷ Huin'it tųg'öcy je mayjäy ma gadarenos naaxjot etz jadyii cajp huınduy agonbi, chi ajcxy may'ajt pijctzoy ma Jesús co huen jįhuägy ma je' ajcxy, co anajty ooy chįgyįgyxy. Chi Jesús ytįgyįñį barcojoty yhuimbįjtni. ³⁸ Chi je jäy tįibi anajty ca'oybi ñįbįdzįmyii ycöbįdzįmyii pijctzoy may'ajt co miid'įdan Jesús. Chi Jesús miid capxycįxy, nimay:

³⁹ —Nįhuimbit mdįc, etz nįmiįdäg jada mijpi tung huįdibi Dios ti tuñ miid miich ycįxpi.

Chi je' ñįcxy capxhuäcxįy je tįy'ajt cajp cajp jadu'n nej anajty mįjhuinma'ñ Jesús ti tuñ miid je' ycįxpi.

Je Jairo ñįix etz je töxyjäy huįdibi Jesús yhuįtpa' nįdoni

⁴⁰ Jadu'n yjajti co Jesús yhuimbįjty co chooñ Galilea, chi je jäy ajcxy cöbįjcy Jesús janch agujc jotcujc, com nidųg'öcy anajty ooy jįjp'įjxcįxy. ⁴¹ Chi tųg yędyįc huįdi anajty yxį Jairo huįdibi anajty mįjtungmiid ma judįojäy ñaymujctac ymiñ ma Jesús, chi minucxtacy Jesús pijctzoy may'ajt co huen nįcxy ma je' ytįc. ⁴² Jairo ymiid anajty tųgpajc ñįix, hue' anajty yjįmįjt majmetz, janch tįm ögaanįp anajty. Co Jesús ñįcxy miid je', chi janch mayjäy anajty chach'adijįyii chach'agodįyii.

⁴³ Chi tųg töxyjäy huįdi anajty yxį ybo', ca' anajty y'oc-huäcxįjpnį, mįmajmetz jįmįjt anajty kujc jadu'n mį'įjtni. Ti anajty ymeeñ yajtundäy ma je tzoydumbį ajcxy, etz ni pįn

anajty ycajaytzögyii. ⁴⁴ Chi je töxyjyä nimijhuägy je Jesús, chi nïdoni yhuitpä. Janch mic mic je yxi ybo' oy yhuäcxipy.

⁴⁵ Chi Jesús yminañ:

—¿Pïn xyñidoñ ich nhuit?

Chi ajcxy y'adzooy co ca' pïn. Chi Pedro etz tüg'óciy miid je' yminañ:

—Huindzin, jäy ti xy'adijy ti xy'abody etz miich mina'n: “¿Pïn ti xyñidoñich?”

⁴⁶ Chi Jesús yminañ:

—Nidügti ti xyñidoñich. Nnejhuüybich co miid nmic'ájtich ti nyajtzögyich pinjaty.

⁴⁷ Co je töxyjyä jihuüy co ca' coyüch yhu'ma'n, chi nimiiñ janch tziyuuyb. Chi yhuindacy ma Jesús yhuinduu, chi capxpizimy mayjäy'agujc ti ycixpi anajty co ti nïdooni Jesús yhuitpa', e co anajty mic'amy ti chögy. ⁴⁸ Chi Jesús nimay je töxyjyä:

—Töxyjyä, ti mdzögy co ti xymibicyich, nicx jotcujc.

⁴⁹ Yam Jesús anajty ycapxy, co ymiiñ tüg jäy huidi anajty ti choon ma Jairo ytijc; je Jairo nihuindzin'ajtp anajty je judiojyä naymujctac, chi nimaayi:

—Ti y'ögy miich mniix, ca' mjac'amayy nigü yi Huindzin Jesús.

⁵⁰ Co Jesús jadu'n midooy, chi yminañ:

—Ca' mdzigy, mibjicich janchtiy, etz tzögip yi mniix.

⁵¹ Co Jesús ytigüy ma je tijc, chi ca' a'ixiix nicxy ytigüy hueñypinity miid je'. Jëyi Pedro, Jacobo, Juan etz je töxy'anäg ytaj yteedy ytigüy miid Jesús. ⁵² Chi tüg'óciy je mayjäy ajcxy janch yaaxp, janch ñé'mgixy miid je töxy'anäg ycixpi. Chi Jesús yminañ:

—Ca' myaaxcixy, ca' yi' ögity, maab yi'.

⁵³ Chi niñoob ajcxy nixiicy com ti anajty nejhuüygixy co ti y'ögni. ⁵⁴ Chi Jesús majch je töxy'anäg ma yci', chi migapxy mic, yminañ:

—Töxy'anäg pidig.

⁵⁵ Chi je' yjugypicy, e mic'amy ypidigy. Chi Jesús yminañ co huen yajcaaygixy yaj'uuccixy. ⁵⁶ Chi ytaj yteedy ajcxy ooy chigüy yjihüüy. Chi Jesús nimay co ca' huaad pinjaty miidmiydägipy jadu'n nej ti ytuñyü yjadyii.

9

Jesús quejxy ayuccapxhuäcxp je nimajmetzpi ydiscípulos ajcxy

¹ Co Jesús yajyömuajctay je ni majmetzpi ydiscípulos ajcxy, chi moy je mic'ajt jaydëbi yajtzögipy pa'mjäy, etz moy ajcxy nañ jadu'n cötújcin co ajcxy ixquexipy je ca'oybi. ² Chi quejxy je' ajcxy ñicxy capxhuäcxixy jadu'n nej Dios y'ane'my, etz yajtzooccixy pa'mjäy.

³ Chi Jesús yminañ:

—Ca' ni ti tü'amgixpi mminíxcixy; ni mgaminíxcip mdajc, ni mmorral, ni mgaagy, ni meeñ, e ni mgaminíxcixipy ajcxy metz mhuit. ⁴ Huen tim huidi tijc ma anajty mdigüygixy, jim ajcxy huí'mgixipy, e jim ajcxy nayyöyhuäcxüyb. ⁵ Hueñyama'amyity ma ca' jäy xycöbjccixy, co ajcxy mbidzimgixipy ma je' cajp mhuinnéjpcixipy mhuinjáaxcixipy je naaxjoc ma mdecy. Jada je' tiy'ájtíp co Dios tzaachytunipy yi jadu'mbi jäy ajcxy.

⁶ Chi ajcxy ñayyöyhuäcxtaayi, ñicxy ajcxy cajp cajp capxhuäcxixy je oybi ayuc, etz yajtzooccixy pa'mjäy hueñytimma'ámyity.

Co Juan el Bautista y'ögy

⁷ Je rey Herodes co nejhuüy jadu'n nej Jesús anajty mijhuinma'n tuñ, chi ooy anajty tzachnejhuühua'n pïn je' anajty. Com nijëjity jäy anajty yminaangixy co ti Juan jugypicy.

⁸ Chi jacnaagity yminaangixy co Elías ti ñayguëxigyii, e jacnaagity yminaangixy co tüg Dios y'ayucnajtzcaxüybi je' ti yjugypicy huidi jecy'ajty octzinaybi. ⁹ Chi Herodes yminañ:

—Ich yi' ni'ane'mdiy co huen ajcxy Juan ycohuajc yajminajci. ¿Pïn jada jada' huidi ich nmidooybich co tzachnimiydaaccixy?

Herodes ooy anajty ja'ixa'ñ Jesús.

Jesús yajcay migoox mil jäy

¹⁰ Co je apóstoles ajcxy yhuimbijty, chi yajmiidmiydactay ajcxy Jesús tüg'óciy tñibi anajty túngixy. Chi ac jëyi ydiscípulos miid'ajty Jesús migtigíduum huington ma tüg cajp huidi yxii Betsaida. ¹¹ Co je mayjäy ajcxy nejhuiy, chi ajcxy panícxy Jesús. Chi Jesús je mayjäy cöbijctay etz yajmiidmiydacy ajcxy Dios y'ayuc ytiy'ajt nej ané'min cötújcin miidty. Jesús nañ yajtzöcpy anajty huídijaty yajtzoyihuaam.

¹² Co oy chu'iiyñi, chi ymijhuägy je nimajmetzpi ydiscípulos ajcxy ma Jesús, chi ajcxy nimay:

—Capxycijxni miid jadyaabi mayjäy ajcxy, jaydëbi ajcxy ñicxipy ma yi cajp huidi huinduy agon yajpaatpi, huen nicxy ixtaaygixy jättac etz jim ajcxy paadipy caayin uucin. Com hue' jada it ma iich ajt yam nyajpaatim migtigíduum.

¹³ Chi Jesús yminañ:

—Mooygix miich yi' ajcxy ycaayin y'uucin.

Chi je' ajcxy y'adzooy:

—Jëyi iich ajcxy nmiididyich migoox tzajcaagy e mejtz acx, nigo co ca' iich ajcxy njuy caayin uucin miid jadyaab mayjäy.

¹⁴ Hue' anajty oy nimigoox mil je jäy. Chi Jesús nimay je discípulos:

—Yaj'ixtaaccix ajcxy yi mayjäy.

¹⁵ Chi ajcxy jadu'n cuyduñ, yaj'ixtactay ajcxy je mayjäy. ¹⁶ Chi Jesús conigy je migooxpi tzajcaagy, etz je metzpi acx, chi ypa't'ijxy tzajpcíxy conuucxy je tzajcaagy etz acx, huin'it tujc-huäcxy moy je' ydiscípulos ajcxy, huen yajhuäcxixy ma tüg'óciy mayjäy. ¹⁷ Chi ajcxy ycaay cüxyi, huin'it ajcxy yajmujcy je tzajcaagy yconaxy etz je acx yconaxy majmetz cach.

Pedro capxypidzimy co Jesús yi' je' je Cristo

¹⁸ Chi jadu'n yjajti co Jesús anajty ycapxtägy ahuingujc miid je' ydiscípulos ajcxy, chi Jesús je' ajcxy y'amidoy:

—¿Pin iich jäy xytijy?

¹⁹ Chi ajcxy y'adzooy:

—Nijëjity jäy xytijy co miich je Juan je Bautista; nijëjity yminaangixy co miich je' Dios y'ayucnajtzcaxiiby huidi jecy'ajty tzinay e ti yjugypicy.

²⁰ Chi Jesús yminañ:

—¿Miich ajcxy, pin iich miich ajcxy xytijcixy?

Chi Pedro y'adzooy:

—Dios yCristo.

Jesús capxypidzimy co y'öga'ñ

²¹ Chi Jesús pidacy ané'min etz cötújcin co ca' ajcxy ni pin yajnimähuip co yi' je' Cristo.

²² Chi Jesús yminañ:

—Ooy ycopícyty co iich, je jäy huidi tsoon tzajpjoty, canaag nax ayo'n nbáadibich, ca' xymijpidägibich je mijjäydijc, je teedy tungmiidpi, etz je' ajcxy huidi yaj'ixpicy Dios ñecy, e co n'ögip njugypigípyich codugiig xii.

²³ Chi Jesús nimay ajcxy nidüg'óciy:

—Pen ji pin xypanicxa'ñich, huen jäydigoydäy yci'm tzójcin etz huen xypanicxyich jabom jabom, oy nej ytimyjadipy ytimy'ayoohuipy, tim nipaady nej jihuiy ti cabigy mgruudz jabom jabom etz pajamgich. ²⁴ Huen pinjäy huídibi ca' yega'ñ yi yjugy'ájtín ma yi o'cin miid iich ycixpi, hue' je' yajtigoyamy yi' yjugy'ájtín. E huen pinjäy huídibi yegamy yjugy'ájtín ma yi o'cin miid iich ycixpi hue' je' ypadamy yi' jugy'ájtín. ²⁵ ¿Ti tüg jäy ypatpy, pen ti paady tüg'óciy cohuit'ájtín comeen'ájtín ya naaxhuiñ e nanyajtigoyii, etz ca' y'alma yajnidzögy? ²⁶ Yi jäy ajcxy pinjaty xymidzöydúnibich n'ayuc, iich je' je jäy huidi tsoon tzajpjoty, nañ nmidzöyduniybich je' ajcxy co anajty nhuimbityich ya

naaxhuiñ, miid ñich n'ané'min etz nmic'ajtich etz nDéedyich y'ane'm'ajt, etz ymic'ajt, etz miid je ángeles ajcxy ymic'ajt huidibi huädz yjot yhuinma'ñ. ²⁷ Janch ñich miich ajcxy nimäy co ji jäy ma miich ajcxy huidibi ixipy Dios y'ané'min jayijp ca'ni anajty y'ögy.

Jesús yajtigach je ñinícx

²⁸ Chi miductujc xiibi maabi anajty jada ayuc jadu'n capxy, Jesús huodzooñ Pedro, Juan etz Jacobo, chi miid'ajtpy jim ma tüg copjijp Dios mibijctzoob. ²⁹ Yam anajty Dios ooy mibijctzoy, co Jesús yhuiñyijp oytigach, e je yhuít yjajty janch poob janch adícxp. ³⁰ Chi metz jäy ñayguëxíci, miidgapxy miidmiydägy Jesús, Moisés je' anajty etz Elías. ³¹ Huidi ajcxy naygëxíci janch jühuidityi anajty ajcxy je tücxin jájin miidity, nigapxcixy nimiydaaccixy je o'cin huidi Jesús ypadamy jim Jerusalén. ³² Pedro, Jacobo etz Juan ooy anajty ajcxy chachmähuaní, chi ajcxy mi'ögtigooy. Co oy ymäyhuijcxixy, ijxy ajcxy Jesús y'adícxin y'ajajin, etz nañ jadu'n ijxy ajcxy je nimetzpi jäy ajcxy huidi anajty Jesús miidmiydäcxy. ³³ Jadu'n yjajty co yi jäy ajcxy puyöyduutni Jesús. Chi Pedro Jesús nimay:

—Huindzin, jotcujc ñich ajt ya. Tzoc tugüg tijc yaj'oyíyim, tüg miich mjëdiiby, jadüg Moisés jëdiiby, etz jadüg yi Elías jëdiiby.

Pedro ca' anajty nejhuiy ti ycapxy. ³⁴ Yam nigí anajty ycapxy co joc ñaaxcidacy huidi yajnidigoy je' ajcxy. Chi ajcxy ooy chigíy co oy joc yajnidigoydáayigixy. ³⁵ Chi tüg ayuc yajmidooy ma je joc ymíñañ:

—Ñich jada n'ung'ajtpy, ooy ndzocyich njihuiyich. Amído'ijti miich ajcxy yi' y'ayuc.

³⁶ Co je ayuc y'amoñ, chi ajcxy ijxy Jesús naydüg yhui'my, chi ajcxy nañ jadu'n amoñ. Huin'it xii ni ca' ajcxy miydacy miid ni pin jadu'n nej anajty ti y'ijxcixy ti ymidoogixy.

Jesús yajtzögy tüg yeegy'anäg huidibi anajty ca'oybi miid

³⁷ Com jabom co Jesús, Pedro, Jacobo etz Juan ajcxy yminajcy ma je copjijp, chi ooy mayjäy chooñ oyjijpcobadiyí. ³⁸ Chi nidügti jäy ycapxy janch mic, ymíñañ:

—Huindzin tun may'ajt ix ñich n'ung, yi' ñich tügpajc n'ung'ajtpy. ³⁹ Huen minájity ca'oybi ymachyí, chi timetiini yaaxquëgy yajyachyí yajquidyí, etz yajpidzimy oy yhuin'opy y'aa'opy e adzaach y'ixmachyí. ⁴⁰ Ti ñich may'ajt nbijctzooyich ma yi mdiscípulos ajcxy, co huen yajpidzimy je ca'oybi, per ca' yi' ajcxy ti mimadägy.

⁴¹ Chi Jesús ymíñañ:

—¡Miich jäy ajcxy huidibi ca' mibijcp ca' ajcxy mmijpidäga'ñ yi tiy'ajt! ¿Naag xii ñich njac'idipy ma miich ajcxy nmimecxtújccixipy? Mimin m'ung ya.

⁴² Co anajty yhuingoñ, chi je ca'oybi yajcidaay je yeeg'anäg, chi ooy yajyatzcooti. Chi Jesús ix'ojy je ca'oybi, e yajtzooxy je yeeg'anäg, chi yteedy yajcídigiíyñi. ⁴³ Chi tüg'óciy je mayjäy ajcxy ooy chigíy miid je mijhuinma'ñ huidi Dios ytuun.

Jesús capxpídzimy jadüg'oc co y'öga'ñ

Jesús ydiscípulos ajcxy ooy jihuiyigixy huinmaaygixy co Jesús jadu'n ymíñañ:

⁴⁴ —Miich ajcxy yajxon mido'mbíjccix jada ayuc. ñich je' je jäy huidi tzoon tzajpjoty, hue' nyajcýyega'ñich ma pocyjäydijc ajcxy yci'am.

⁴⁵ Je' ydiscípulos ajcxy ni ca' anajty huinjihuiyigixy, tzigiíyb anajty ajcxy, paady ca' ajcxy jaty nej yaj'amidóogixipy.

¿Pin je' nigí jacmíjip?

⁴⁶ Chi Jesús ydiscípulos ajcxy ytigíy huinmay'ahuidijtp, nejhuihuaangixy pin je' jacmij'idam. ⁴⁷ Jesús nejhuiy je' ajcxy yjot yhuinma'ñ huidi nayyajmiidmiydáacip ajcxy, chi tüg pi'c'anäg huijtzigy, ypidacy ma ymijc. ⁴⁸ Chi Jesús ymíñañ:

—Pinjaty xycöbicipich jadu'n nej jada pi'c'anäg xycöbicyich miid ñich nxii ycixpi, ñich yi' anajty ti xycöbicyich; je huidibi ñich xycöbicipich, cöbigíyb je huidi ti xyquexyich ya naaxhuiñ. Yi' huidibi jacmútzip ma miich ajcxy, yi' je' jacmijpi.

Pin ñich ajt ca'p xymijotma'tim, je' ajt xymijnicxpejtim

⁴⁹ Chi Juan yminañ:

—Huindzin, ti ñich ajcxy n'ijxcixy co tüg jäy ti yajpidzimy ca'oybi miid miich mxii miich mmic'ajt. Ti ñich ajcxy yi' nyaj'ojyich com ca' yi' ñich ajt xypahuidijtim.

⁵⁰ Chi Jesús yminañ:

—Ca' myaj'ójcixy yi'; pinjaty ca' xymidzip'ajtim, ñich ajt yi' nmiid.

Jesús jijpcogapxiy Jacobo etz Juan

⁵¹ Jadu'n yjajti co tiempo yhuingoni mina Jesús ñíxcip tzajpjoty, chi yhuinma'ñ pidacy co nicxa'ñ jim Jerusalén. ⁵² Chi Jesús quejxy cogapxy jayijp jättac pijctzoobi. Chi je cogapxy'ajtpi ñicxy ytigiy ma je samaritano jäy ajcxy ycajp, jättac pijctzoobi. ⁵³ Chi je' samaritano jäy ajcxy ca' yega'ñ jättac, com ñejhuiygixyp co Jesús etz ymügütjic ñicxy anajty ajcxy jim Jerusalén. ⁵⁴ Co jadu'n Jesús ymügüg ajcxy nejhuiy co je samaritano jäy ca' jättac yega'ñ, chi Jacobo etz Juan nimay Jesús:

—Huindzin, ¿nej m'a'ixiib ñich ajcxy n'ocni'ane'mdiyich huen jin cäy huidibi tzomb tzajpjoty, jigix yi' samaritano jäy ajcxy ycijxtähuipy jadu'n nej je profeta Elías ytuuñ jecy'ajty?

⁵⁵ Chi Jesús y'ijxhuimbijty, ogy Jacobo etz Juan, nimay:

—Miich ajcxy ca' mnejhuiygixy ti jot ti huinma'ñ miich ajcxy miid. ⁵⁶ ñich, je jäy huidi tzoon tzajpjoty, ca' ti nmíñich ya naaxhuiñ co jäy yjugy'ajt miñ nyajtigooyich, hue' jánchtiy ti nmiñich co jäy yjugy'ajt nyajtzóogibich.

Chi ajcxy ñicxni huingbi cajp jättacp.

Je pinjaty anajty Jesús panixcam

⁵⁷ Jadu'n yjajti co anajty ñíxcixy ma tüg tü'aa, chi tüg jäy Jesús nimay:

—Huindzin, ñich miich nbanicxaamy oy tim ma'amy miich mnicxy.

⁵⁸ Chi Jesús y'adzooy:

—Yi huaax ymiid yi' ajcxy yjut, etz yi' joon ajcxy ymiid ajcxy ype'ñ, ñich je jäy huidi tzoon tzajpjoty ca' nmídidyich ma nmähuibich ma nbócxibich.

⁵⁹ Chi Jesús nimay jadüg jäy:

—Pajamgich.

Chi je jäy y'adzooy:

—Huindzin, jayijp ñich ndeedy n'ocyajnaaxtigihuiipy.

⁶⁰ Chi Jesús yminañ:

—Jëbi yajnaaxtigihuiipy huidibi ca' xypanicxa'ñich. Nícx miich capxhuäcxí Dios y'ayuc y'ané'min.

⁶¹ Chi jadüg jäy yminañ:

—Huindzin, nbanicxamy yam. Tun may'ajt ocnajtmadziygich nicxy n'ocmiidcapxycíxyich njuogy nmigügich huidi jim ma ñich ndijc.

⁶² Chi Jesús yminañ:

—Pinjaty yhuinma'ñ ti pidägy co Dios ytung tunaani, ca' huaad ixmach je tung, tim jadu'n nipaady nejhuiy tüg jäy ti ytigiy naaxjidziztpi miid arado, e ca' huaad y'ijxhuimbity com co huinduum arado nicxihuiipy.

10

Jesús quejxhuäcxy je nidugi'pxmajcpí

¹ Huin'it co jada jadu'n ti ñaxy, chi je Huindzin Jesús huin'ijxy jatugi'pxmajc y'ixpijcpidijc, chi quejxig cogapxy metz metz ma tüg tüg cajp majaty ñicxa'ñ. ² Chi Jesús nimay yi' ajcxy:

—Janch je cosecha ooy ti yhuindiy, yi midumbi janchtiy hueeni. Chojcxy co nbijctzóohuim ma nHuindzin Dios co huen quexy ytumbidijc ma yi cosecha. ³ Níxcix, ñich miich ajcxy nguejxpy jadu'n nej cöbixy y'ung yhuidity pa'uc agujc. ⁴ Ca' mminicxixy mbijty, ni mxäcxuumy, ni mgig, e ni pin ca' mgapxpócxixipy tü'am.

⁵ Co ajcxy mdig'ihui'py huenytimtitijcity, jayjip ajcxy min'angixipy: "Ji jotcuje'ájtín ma jada tijc." ⁶ Pen yung naxy je' ajcxy yajpaady, miich ajcxy je mgapxpoocxin jotcuje'ajt myegipy ma je' ajcxy; pen ca' ajcxy yjadú'nity, naadig'adip huidi anajty ti mgápxcixy. ⁷ Nañ hui'mgix ma je tijc, chi ajcxy mgayipy m'ügipy huidi je jäy anajty ajcxy xymooyb, com je tumbi paatip je' je ymuju'ñ. Ca' ajcxy mhuididipy jayjiin jaydijc. ⁸ Huenytimyhuidi cájpity ma anajty mdig'iygixy, pen je jäy ajcxy xycöbijcp, caaygix uuccix huidi anajty jäy ajcxy xymooyb. ⁹ Yajtzóocix yuujäy pa'mjäy huidijaty jim ma je' ajcxy yajpaady, etz yajnimaaaygix: "Je Dios y'ané'min huingóniñ yí' ma miich ajcxy." ¹⁰⁻¹¹ Huenytimyhuidicájpity ma anajty mdig'iygixy, e ca' anajty jäy xycöbigaangixy, co ajcxy mdzonaanip, nimaaygix: "Yí mgajp naaxjoc huidi ti ypety ma iich ndecy nhuinnebáamyich, yí' je' ijxpejt co Dios ajcxy xychaachtunipy. Chi nehuiiygix miich ajcxy jada co je Dios y'ané'min ti ymihuingoni." ¹² Hich miich ajcxy nimayb co huin'it xii co anajty yajhuaad'aty, Dios nig'i tzaachtunaangixy je jäy huidi ajcxy ca' miich ajcxy xycöbiga'ñ, ca'ydi Sodoma cajpjäy.

Je cajp huidijaty ca'p ycapxymidooy

¹³ Chi Jesús yjacminañ:

—¡Miich ayoob ajcxy Corozín jäy! ¡Miich ayoob ajcxy Betsaida jäy! Co jim ma je Tiro cajp etz Sidón cajp caytuni cayjajti je Dios ymijhuinma'ñ huidi ti ytunyii ti yjadyii ma miich ajcxy, jécyip ixypy ajcxy yjothuimbijtni, etz ti yajniquëxëccixy ixypy miid je yhuit iñaaygixy saci nijen nicuyjam ixuyjam (je' je tiy'ajt co ooy ytajcixy ymaygixy miid ypocy ycixpi). ¹⁴ Janch jadu'n yjadipy co anajty Dios yajnigödugiy, nig'i o'ctiy miich ajcxy ayo'n mbaadiyb ca'ydi jadu'n nej Tiro jäy etz Sidón jäy. ¹⁵ E miich ajcxy Capernaum jäy ajcxy, ¿nej mminaaangixy mjätcixipy tzajpjoty? Hue' m'idaaccixyp miich ajcxy ma yí ayoodactuuby.

¹⁶ Je jäy ajcxy huidi miich ajcxy m'ayuc xymidoohuip, nañ xymidoohuib yí' ajcxy iich n'ayuc. Je jäy ajcxy huidibi miich ajcxy ca' xy'ixa'ñ, nañ ca' je' ajcxy xy'ixa'ñich; e pinjaty ca' xy'ixa'ñich, nañ ni ca' yí' ixaangixy je Dios je huidi ti xyquexyich ya naaxhuiñ.

Chi ajcxy je nidugi'pxmajcpi yhuimbijtcixni

¹⁷ Chi je nidugi'pxmajcpi huidi Jesús yquejx ayuccapxhuäcxpi yhuimbijttay ajcxy janch jotcuje, yminaangixy:

—Ixti je ca'oybi ti hich ajcxy xycapxycöbijccixy miid miich mxii.

¹⁸ Chi Jesús yminañ:

—Ti n'ixyich nej je ca'oybi yhuindzin ti ycäy, jadu'n nej jihuüy ti ycäy ti ycödigiyy tza-jpcixy, jadu'n nej tüg huidzuc. ¹⁹ Hich miich ajcxy mic'ájtín ti nmooygixy, jaydëbi ca'oybi ca' xymimadáaccixipy, tim jadu'n nipaady nej jihuüy tza'ñ etz ca'ty myajhuäcpéjtcixy e ca' nej mjátcixy. ²⁰ Nig'i miich ajcxy jotcuje'ájtícix co ajcxy mxii y'ijtcixy cojay jiiby tzajpjoty, ca'ydi co ajcxy ca'oybi xycapxymidoogixy.

Chi ooy Jesús yjotcugiy

²¹ Huin'it Jesús yjotcugiy miid je Dios yjihui'ñ ymic'ajt, yminañ:

—Nyajnajxypich Dioscojuyip ma miich, Dios Teedy, tzajpjotyipi Huindzin etz je naaxhuiñybi Huindzin, co ti myüch jada mijhuinma'ñ ma yí cohuinma'ñ jäydijc, etz ti myajnejhuüy je jäy huidi ca' y'ixpicyity. Dios Teedy, jadu'n miich ti mduñ com jadu'n miich ti mjäygidacy.

²² Ndéedyich ti xyajc'idigiydäyich tüg'óciy tijaty mic'ajt oy'ajt. Ni pin ca' ijxcajp pin je' Dios y'ung'ajtpy, jëyi nDéedyich tügpajci pin xy'ijxcajpich. Ni pin ca' ijxcapy pin je' nDéedy'ájtypich, jëyi je Dios ung tügpajci huidi ijxcajp, etz jacjadyii ma je ung yajniguëxiga'ñ.

²³ Chi Jesús ni'ijxhuimbijty yí' ydiscipulos ajcxy, ahuingujc ajcxy nimay:

—Jotcujc ajcxy je jäy ajcxy huidi ijxcixp jadu'n nej miich ajcxy ti m'ijxcixy. ²⁴ Hich miich ajcxy nimayb co ooy may Dios y'ayucnajtzcaxiib etz rey ajcxy ja'ixa'ñ huidibi miich ajcxy m'ijxpy, e ni ca' ajcxy icy; etz jamidoo'ida'ñ huidi miich ajcxy midooyb, e ni ca' ajcxy midooy.

Ijxpejt ma tüg samaritano oyyäybi

²⁵ Chi tüg jäy huidi yaj'ixpijcp Dios ñecy ytinaay'ahuüy jot'ixy huinma'ñ'ixy Jesús, chi y'amidooy:

—Huindzin, ¿ti huaad ndunipich co ich jugy'ajtin huinixiibi nbáadibich?

²⁶ Chi Jesús y'adzooy:

—¿Ti jaybétyip ma yi Dios ñecy? ¿Nej mhuinjihuüy co mnecycapxy?

²⁷ Chi je ley huindzin y'adzooy:

—Mdzogipy mjihuüipy mHuindzin Dios miid tüg'óciy m'aa mjot, miid tüg'óciy m'alma, miid tüg'óciy mmijaa, etz miid tüg'óciy mjot mhuinma'ñ, e mdzogipy yi mijin midijc jadu'n nej miich ci'm naychogyii.

²⁸ Chi Jesús y'adzooy:

—Ti ooy yaxon m'adzooy. Tun yi', e mdzinähuip huinixii.

²⁹ E je' nañ jadu'n tim tiy ñejhuühua'ñ, nimay Jesús:

—¿Pin ich nmidijc'ajtpy?

³⁰ Chi Jesús y'adzooy:

—Tüg jäy choñ jim Jerusalén ycidägy anajty jim Jericó, chi oy meetzpi minaybadyii. Chi ajcxy tüg'óciy y huit e tijaty yi' anajty ymiid pijtaayi. Chi ajcxy ooy huinhuojpy jiphuojpy huingoxy jipcojxy, chi ajcxy ixmach jahueengi ögy, chi ajcxy ñicxni. ³¹ Tüg judío teedy yminagiiy ma je jimbi tü'aa. Co y'ixy je tzaachijäy, chi jüyöyñajxy. ³² Nañ jadu'n yminagiiy ma je jimbi tü'aa tüg levita jäy huidi tuumb ma Dios ytijc, co jim yjaty mihungon je tzaachijäy, co oy icy, nañ chi jüyöyñajxy (ca' pa'ayooy). ³³ Chi tüg samaritano jäy anajty jim naxii, co mihungoñ je tzaachijäy, co oy icy, huin'it ooy pa'ayogooty je tzaachijäy. ³⁴ Chi je' nimijhuägy, chi puji e xojtzi je chaachi'au, nañ tzoüüy chaachi'au miid aceite etz vino. Chi yaj'iyujcpety, e yajnicxy jim ma yjättac, e jim cuend'ajty. ³⁵ Com jabom co anajty ñicxaani, chi yajpidzimy mejtz denario meeñ, moy je codijc nimay: “Cuend'at jadaaabi tzaachijäy, jadu'n nej anajty mjacmeeñajtuñ, co ich anajty nhuimbityich huin'it nmigüedipy.” ³⁶ ¿Ma je nidugiigpi jäy pin je oybi ti tuñ miid je jäy huidi anajty je meetzpi ti ymeechyii ti yajtzaachiyii?

³⁷ Chi je jäy huidi Dios ñecy yaj'ixpijcp Jesús y'adzooy:

—Je huidi ti yajtuñ je pa'ayo'ñ.

Chi Jesús yminañ:

—Ñicx miich, e tun nañ jadu'n pa'ayo'n.

Jesús yajpaady ma Marta etz María ytijc

³⁸ Chi jadu'n yajty co Jesús anajty ytüyöy, chi ytigiiy ma tüg mutz cajp. Jim anajty tüg töxyjäy huidi anajty yxii Marta, yi' yajjättaci ma ytijc. ³⁹ Je Marta ymiid anajty tüg y'uch töxyjäybi huidi anajty yxii María, chi je' y'ixtacy ma Jesús ymijc, amidoo'ijti je' y'ayuc. ⁴⁰ Chi je Marta ooy anajty jim chachjottigoy tuñ anajty tigatii ma ytijc, chi nimijhua'cy je Jesús nimay:

—Huindzin, ¿ca' nej mnayjihüüyijji co ich naydüg yam tzach nayyajtuñyijjichi? Nima' yi María co huen xypubétyich.

⁴¹ Chi Jesús yminañ:

—Marta, Marta, yi maytung miich mdzachmijottigooyb. ⁴² Tügpajc ji, huidibi ooy ycopícyip. Yi María ti yi' huin'ixy je oybi huidi ni pin ca' ypigiiyb.

¹ Jadu'n yjajti co Jesús anajty Dios mibijctzoy ma tüg it lugar, co yajmay, chi tüg discípulo ñimaayi:

—Huindzin, yajni'ixiigich ajcxy tzajcapxycapxi, jadu'n nej Juan yajni'ixi y' ydiscípulos ajcxy.

² Chi Jesús yminañ:

—Co ajcxy Dios mmibijctzohuipy, jadu'n mináangixipy:

Dios Teedy, miich huidi tzajpjoty tzinaayb, huindzigiy miich mxii y'ity. Huen miñ ya miich yi m'ané'min. Huen mdzójcin yajcuyduñ ma je jäy yjot yhuinma'ñ jadu'n nej yajcuyduñ jiiby tzajpjoty.

³ Mooygich ajcxy ngaayin n'uucin jabom jabom.

⁴ Méecxibich ajcxy nbocy ngaydey huidibi ich ajcxy ndundigooyb, jadu'n nej ich ajcxy nmeecxyich huidibi ajcxy xymidundigooybich. Ca' m'a'ixiy co ich ajcxy huinma'ñ tigoyipich. Yajnihuaatzcich ajcxy ma yi jibicpi.

⁵ Chi Jesús yjacminañ:

—Pinjaty ji ma miich ajcxy huidi tüg ymigüg miid, co ninícxipy mijcoodz e mnimáhuipy: “Migüg, tun may'ajt yajpijctzoogich tugüg mdzajcaagy. ⁶ Tüg ich nmigüg ti xyñimiñich huidi tüyöyp, etz ca' nmídidyich ti nmöhuibich.” ⁷ Chi je jäy y'adzooy jiiby tigoty, yminañ: “Ca' xy'amayiyich. Ti ich ndijc n'agiiyñi, etz n'ungich yam nmíidich cijx'am; ca' njatyich nej nbidigibich etz nmöhuipy huidi mbijctzooyb.” ⁸ Ich miich nimaayb, oy ca' tzojc nipidiga'ñ ymöhuamy huidi pijctzou co migüg'adyii, hue' ymöhuamy jaydebi ca'ydi yjac'amayiyii, chi yegipy tüg'óciy huidi yajmayajpty. ⁹ Ich miich ajcxy nimaayb: Pijctzóogix, e myajmöhuipy ajcxy. Ixtaaygix, e mbaadipy ajcxy; cogapxiygix, ahuádzip ajcxy mdijc'aguu. ¹⁰ Tüg'óciy je' pin pijctzoob tijaty ma Dios, cidigihuiib; pin y'ixtaayb, ypaadipy; pin cogapxiyb, yaj'ahuatziib ytijc'aguu.

¹¹ ¿Pin ungedeedy ji ma miich ajcxy pen y'ung ypijctzoob tzajcaagy, nej mmöhuipy tüg tzaaji? ¿E pin ypijctzooyb acx, nej jébi mmöhuipy tüg tza'ñi? ¹² ¿Pen ypijctzooyb tzeydüty, nej jébi mmöhuipy ca'ty? ¹³ Pen miich jibicjäy ajcxy mnejhuiyb nej oybi m'ung móoygixipy, ¿nej ca' mdijy yjánchity co mDios Teedy tzajpjotypi xymóoygixipy je Espíritu Santo, pen miich ajcxy mmibijctzohuipy?

*Yajni*bijccixy Jesús co miidity mujcu' ymic'ajt

¹⁴ Chi Jesús anajty yajpidzimy tüg ca'oybi ma tüg jäy huidi anajty uumip. Jadu'n yjajty co je ca'oybi ypidzimy, chi je uum ycapxiy. Chi je mayjäy ooy jihuiy huinmay. ¹⁵ Nijējity jäy yminaangixy:

—Jesús mijhuinma'ñ ytumyib miid je Beelzebú ymic'ajt, je ca'oybi yhuindzin, paady ca'oybi yajpidzimdäy.

¹⁶ Jacjaydiibi jäy ajcxy co jot'ixaangixy huinma'ñ'ixaangixy Jesús, pijctzooy ajcxy Dios tüg ymijhuinma'ñ. ¹⁷ Co Jesús nejhuuy nej je' ajcxy jot'adyii huinma'ñ'adyii, chi nimay:

—Co tüg gobierno ñaybajc-huäcxyii, chi ñaychiptúnigixy miñ xyipy; ñayyajcixigixy ñayyajtigóoyigixy; co tüg quëx jäy ñaybajc-huäcxyii, nañ jadu'n je' ñayyajcixigixy ñayyajtigóoyigixy. ¹⁸ Pen je mujcu' ajcxy ñaybajc-huäcxip, ¿nej jada je mujcu' y'ané'min yjac'idipy? Miich ajcxy minamb co ich miid ndúñich je Beelzebú ymic'ajt co ich ca'oybi nyajpidzimy. ¹⁹ Pen jadu'n yi', ¿pin je mic'ajt mooyb huidi miich ajcxy xypahuidijtp co yajpidzimy je ca'oybi? Paady yi' ajcxy ci'm yajniquëxíc co miich ajcxy mdundigooygixy mgapxtigooygixy. ²⁰ Pen ich miid Dios y'ané'min nyajpidzimyich ca'oybi, janch jada co Dios y'ané'min ti yjaty ma miich ajcxy.

²¹ Co tüg micjäybi miidity maydujt, e ñaycuend'adyii yajxon, ca' je' ytigoyipy tijaty ymiid. ²² Co yjaty jadüg jäy jacmicpi ca'ydi je', chi ymímadägyii, e ypijctäyii tüg'óciy ytujt huidi anajty ooy jot'amij'adyii, e yajhuäcxipy tijaty anajty ymiid.

²³ Pinjaty ca' xymijnicxpétyich, nmidzipich yi'. Pinjaty ca' ytuñ miid ich co jäy nyaj'ixpicyich Dios ytiy'ajt, hue' je' ajcxy jäy yajhuinma'ñyidigooyb.

Je ca'oybi co jadüg'oc yhuimbijty

²⁴ Co je ca'oybi ypidzimy ma je jäy, chi je' ñicxy jim títznaax ijxtägy co yocxa'ñ. Co ca' paty yocxtac, huin'it ymina'ñ: “Huimbidaambich ma je jäy yjot yhuinma'ñ ma ñich ti n'octzombi.” ²⁵ Co je ca'oybi yja'ty ma anajty ti chinäy, chi paady je jäy yhuinma'ñ janch yhuädzity janch ooy jadu'n nej tüg tijc huidi janch huädz pedígitý. ²⁶ Chi je ca'oybi ñicxy, e miid miñ jahuixtujc ca'oybi jacjibicpi ca'ydi je'; chi ajcxy ytigiiy ma je jäy yjot yhuinma'ñ, e chinay ajcxy jilby; huin'it je jäy jac'o'ctiy oy yjajtni ca'ydi jadu'n nej anajty jayjip'aty.

Huidi ajcxy janch jotcújcip

²⁷ Co Jesús jadu'n anajty ymina'ñ, chi tüg töxyjäy mayjäy agujc mic yminañ:

—Jotcujc je töxyjäy huidi ti xyajpi'c'aty etz huidi xyajyeegy.

²⁸ Chi Jesús yminañ:

—Je' jacjotcujc pinjaty Dios y'ayuc midoohuip etz cuyduunip.

Jibicjäydijc pijctzoogixy tüg tiy'ajt mijhuinma'ñybi

²⁹ Co je mayjäy ajcxy jübigiiy, chi Jesús yminandacy:

—Jadachambi jäy ooy ajcxy yjibicjäyity, ypijctzooyb ajcxy mijhuinma'ñ ijxpejt. Ni camina Dios ajcxy ycamöhuiyb ijxpejt, jeyi tügpajc Jonás y'ijxpejt yajmöhuip. ³⁰ Com jadu'n nej je Jonás jecy'ajty ijxpejt yejcy ma je Nínive jäy, nañ jadu'n ñich, je jäy huidi tzoon tzajpjoty, nyegaamyich ijxpejt jadachambi tiempo miid jäy ycixpi. ³¹ Je töxyjäy reina huidi tzinay jecy'ajty ma madzäcruudz ypidzimy, yi' je' xidähuam jadachambi tiempo jäy co anajty Dios tiyduna'ñ mayjäy, etz yajpocycähuipy ajcxy. Ixti ma naaxhuiñybi ycocixiy jim je reina choon co anajty amido'idani je rey Salomón ycapxy y'ayuc. Ji naaxhuiñ jadachambi tüg Dios ytiy'ajtmiiidpi jacniigi ymijity ca'ydi Salomón anajty. ³² Co anajty Dios tiyduna'ñ yi may naaxhuiñyjäy, chi je jäy ajcxy huidibi anajty cogajpip jim Nínive pidígaangixy etz yajpocycähuaangixy jadachambi naaxhuiñyjäy. Com je Nínive jäy jothuimbijty je' ajcxy co Jonás Dios y'ayucnajtzcaxxiyi. Ji jadachambi tüg Dios y'ayucnajtzcaxxiybi jacniigi ymijity ca'ydi jadu'n nej anajty je Jonás.

Je tiy'ajt huidibi nipaady nej lámpara ma ajt nninícx

³³ Ni pin ca' yüch je jün huidi ti nögpity, ni ca' pidägy jilby cajón pa'tci'py, jeyi janchtiy pidägy je jün ma jündixpejt, jaydëbi co pinjaty ytigihuipy tigoty, codicxiib je jün. ³⁴ Je jün ma miich ajcxy mninícx je' yi' miich ajcxy mhuiin. Pen oy miich ajcxy mhuiin, nañ jadu'n tüg'óciy miich ajcxy mninícx ymiid yi' tücxin. Pen ca' y'óyity mhuiin, nañ jadu'n ajcxy yi mninícx yajpaty agootztuum. ³⁵ Cuend'ájtciy yi tiy'ajt huidi miich ajcxy miid, ca' mgoyützcixy, com co jadu'n nicxy y'ahuimbity nej cootzpi. ³⁶ Pen miich mdiy'ajt codicxy y'ity miid Dios ytiy'ajt, tüg'óciy quëxigtähua'ñ janch huädz.

Jesús ca'p jäygidaci je fariseos etz je escribas ajcxy yhuinma'ñ

³⁷ Co Jesús ycapxtay, chi tüg fariseojäy may'ajt pijctzoy huen nicxy miid cayii. Co Jesús ytijctigiiy, chi y'ixtacy ma je caybejt. ³⁸ Co je fariseojäy ijxy jadu'n nej Jesús ytuñ, chi ooy huinmay nej co Jesús ca' ñayyajpocyhuächyii miid nii jayjipni ma anajty ca'ni ycaayñi.

³⁹ Chi je Huindzin Jesús yminañ:

—Miich ajcxy fariseojäy, ooy mnaybidaaccixy tudägyjäy ma jäy ajcxy yhuinduu e ca' yjanchity; chi jada' ma mjot mhuiinma'ñ miich ajcxy ooy m'adzocy, etz miid ajcxy jibic-huinma'ñ; tim jadu'n nipaady nej myajhuäch ajcxy yi tasi ninícx, yi texyñinícx e chi ajcxy yajhuí'ngixy jibicpi je tasijoty je texyjoty. ⁴⁰ ¡Miich ajcxy ca' Dios y'ayuc huinjihuñybi! ¿Ca' mnejhuñyigixy co yi pin ti texyñinícx yajcojy nañ ti yajcojy texyjot? ⁴¹ Tun miich ajcxy ooyjäy'ájtin, huin'it janchtiy anajty ajcxy mhuädzity ma mjot mhuiinma'ñ.

⁴² ¡Ay miich ayoobi ajcxy fariseojäy! Com mbidaaccixy abicy tüg picy je majcpi miid yi Dios ycixpi ixti yi tzajnimang, yi ruda, etz tüg'óciy aay ujtz. Chi jada' ca' mduñ je

oyjäy'ájtín etz tiy'ájtín jadu'n nej Dios tzocy. Hue' je' oy mduñ co tijaty abicy mbidägy miid Dios ycixpi, nañ jadu'n copicy oyjäy'ájtín mdunipy etz Dios ytiy'ajt mguydunipy.

⁴³ ¡Ay miich ayoobi fariseojäy ajcxy! Co ooy m'adzójccixy je ñaybejt huidi cöduum ma naymujctac, etz ooy m'adzójccixy co huen jäy ajcxy xycapxpooxcixy oy huindzigy mayjäy agujc.

⁴⁴ ¡Ay miich ayoobi ajcxy huidi yaj'ixpijcp Dios yley etz miich fariseojäy ajcxy! Oy mjanaybidáacigixy oyjäy e ca' yjánchity, ca' mguydungixy Dios ytiy'ajt, jadu'n nipaady miich ajcxy nej öcpi jut huidi ca' yquëxgy, chi jäy yöy nigix, com co ca' ñiguëxgy.

⁴⁵ Chi tüg jäy huídibi yaj'ixpijcp Dios y'ayuc ymíñañ:

—Huindzin, co jadu'n miich míña'ñ, nañ jadu'n ñich ajcxy ooy jibic nayjihuíyigixy.

⁴⁶ Chi Jesús ymíñañ:

—¡Ay ayoob miich ajcxy Dios y'ayuc huindzin! Miich ajcxy mgójcixyp canaag costumbre huidi je jäy ajcxy ca' mimadága'ñ, e ca' ajcxy mba'ayoogixy, tim jadu'n nipaady nej jihuíy tüg tzimy ti mmooygixy jemxypi huidi ca' je jäy ajcxy mimadága'ñ, e miich ajcxy ni ca' mgíhuäx jéda'ajty mgayajpadaangixy je tzimy.

⁴⁷ ¡Ay miich ayoob ajcxy! com myajcojixy je ögpi jut ma je Dios ayucnajtzcaxiixybi naaxtigy, je huidi m'ap mdeedy ajcxy yaj'o'c. ⁴⁸ Jadu'n yajhuinjihuíy nej jihuíy miich ajcxy ooy mjäygidägy jadu'n nej ajcxy m'ap mdeedy ytundigoy. Janch yi' ajcxy yaj'ögy Dios y'ayucnajtzcaxiixybi, e miich ajcxy myajcoj je öcpi jut ma ajcxy je' ñaaxtigy.

⁴⁹ Paady yi' Dios jadu'n huinmay, e míñañ: Nyajniguexipyich miich ajcxy profetas etz y'ayuccapxhuäcxpi, e miich ajcxy myaj'ögip nijéjity, etz jacnaagity mbahuidijttáccixipy.

⁵⁰ Dios yajcomidohuípy jadachambi tiempo jäy ajcxy je ypocy huidi y'ap yteedy ajcxy ytuñ, com maabi naaxhuiñ chondägy, yi' ajcxy yaj'ögy Dios ytiy'ajtmíidpi. ⁵¹ Janch nimaaybich miich ajcxy co Dios yajcomidohuípy jadachambi tiempo jäy ajcxy je y'ap yteedy ypocy co ajcxy yaj'o'cy Dios ytiy'ajtmíidpi chondägy ma Abel, ixti Zacarías huidi jäy yaj'o'c ma Dios ytijc tiba'gujc.

⁵² ¡Ay miich ayoob ajcxy Dios y'ayuc huindzin! Ca' miich ajcxy m'ixpiga'ñ Dios ytiy'ajt, nañ ca' mdzocy co yi' jäy ajcxy ixpigipy; tim jadu'n nipaady nejjihuíy ti mbicy je tijc ahuaast e ca' miich ajcxy mdigíhua'ñ, e ni mgatzojccixy co huingbi nicxy ytigy.

⁵³ Co Jesús anajty jadayaab ayuc yajnimaygixy, chi je Dios y'ayuc huindzin etz yi' fariseojäy ajcxy jotmätcooty chi yaj'amídogoty ajcxy may ayuc. ⁵⁴ Ñayñimáayigixy miñ xyipy co huen amido'ijt Jesús y'ayuc, jigix jéb páatcixipy huidi jéb miid xigixipy.

12

Jesús yaj'ixpicy co ca' huaad pinjaty naybidaaci oyjäy pen ca' yjánchity

¹ Chi je mayjäy ooy nimujcy Jesús, janch jadu'n ñay'adijy ñay'agodíyigixy, chi Jesús nimaydacy je' ydiscípulos jayijp:

—Nigüendi miid yi' fariseojäy ajcxy nej ajcxy yjäyyaj'ixpijccixy. Yajxon yi' ajcxy ycapxy ymiydägy, chi ca' cuydungixy. ² Ca' ji ti huidi ijtp ayüch nicxy ycayajnejhuíy, nañ ni ca' ji ti huidi ijtp ameech nicxy ycaniguëxgy. ³ Huen huidi ayuc miich ajcxy ameech mgapxy, yajnejhuíhuip yi'. Huen huídibi ayuc huidi ti mnayyajnimáayigixy ameech jilby tigoty, mic yajcapxhuäcxip tijc nigíxy.

Pin jébi huaad ndzigiyim

⁴ Chi Jesús yjacmíñañ:

—Miich ajcxy nmigügtijc, ñich miich ajcxy nimaayb co ca' mdzigiygixy yi' jäy ajcxy huídibi ninícx yaj'o'cp, com ca' jac ni ti ajcxy tunipy. ⁵ ñich miich ajcxy nyajni'ixíhuipy pin huaad jébi mdzigiygixy. Yi' janch mdzigiygixy yi' Dios huídibi jugy'ajt pijcp, e huin'it miid je' ymic'ajt jébi quexipy m'alma ma je mij jün. Yi' janch mdzigiygixy yi'.

⁶ ¿Nej ca' jäy ajcxy ytoogyii miigoox joon miid metz pi'cmeen? Dios ni tüg yi' ajcxy ca' jäydiigooyity. ⁷ Ixti mgöhuay ajcxy ac michoy Dios miidity. Ca' mdzigiigyxy, jactzou niigi miich ajcxy ma Dios ca'ydi pi'cjoon ajcxy.

Je pinjaty ca'p midzöyduñyii Jesús mayjäyjoty

⁸ Hich miich ajcxy nimaayb co pinjaty ma miich ajcxy huidi capxpizimp mayjäyjoty co xymibicyich xymijpidägyich, ich, je jäy huidi tzoon tzajpjoty, ngapxpizimipyich co ti ngöbicyich jadu'mbi jäy ma Dios y'angeles ajcxy yhuinduu. ⁹ Pinjaty ca' xycöbicyich mayjäy'agujc, nañ jadu'n ich yi' ca' ngöbigipyich jiiby ma Dios y'angeles ajcxy yhuinduu.

¹⁰ Tüg'öciy jäy huidi jadu'n ich, je jäy huidi tzoon tzajpjoty, xyñigapxp xyñi'ojiiybich Dios huinmecxiib. Chi jada' pinjaty nigapxp ni'ojiiyb je' Dios yjihu'iñ (je Espiritu Santo), yi' janchtiy Dios ca' yhuinmecxiyb.

¹¹ Co mmidzip ajcxy xyajnicxip ma naymujctac, ma codungdijc, etz tungmiidpi yhuinduu, ca' mdajip mmayip nej m'adzogixipy, e ca' mhuinmayipy nej ajcxy m'adzohuipy.

¹² Com je Dios yjihu'iñ huin'itiy ajcxy xyajni'ixihuip nej huaad m'adzoogixy.

Naygüend'ajtigixy ca'p adzojccixy comeen' adii

¹³ Chi nidügti je mayjäy yminañ:

—Huindzin, nima' n'ajchich co huen yajhuäcxy miid ich huidi ndaj ndeedyich nidungiy.

¹⁴ Chi Jesús yminañ:

—Yëydijc, ca' ich ni pin ti xypidägyich ane'mbi ma miich ajcxy etz yajhuäcxpi.

¹⁵ Chi Jesús nimay je jäy ajcxy:

—Ijxcix naygüend'ajtigix, ca' m'adzojccixy comeen'adii, com je m'alma yjugy'ajtín ca' je' nidzoocin'adyii huidijaty miich ajcxy miid.

¹⁶ Chi ajcxy yajnimay tüg ayuc, yminañ:

—Jim anajty tüg comeenyjäy huidibi anajty ooy mij ypidägy yajpidägy. ¹⁷ Je comeenyjäy anajty ooy ci'm huinmay ma yjot yhuinma'ñ, yminañ: “¿Ti n'octunipich com ca' nmíididyich ma nyajnidägibich yi tübi y'ity?” ¹⁸ Chi yminañ jotjoty huinma'nyjoty: “Nyajpidicnibich ndzëx, e ngójibich jacmijpi, chi tüg'öciy jiiby nbidactähuibich tübi y'ity.” ¹⁹ Co jadu'n ndunipyich, chi jëbi jotcuyc ndzinähuibich, com ooy anajty nmíididyich pidägy yujcpiy, jëbi canaag jimijt niboocxyich etz jëbi ngay n'ügyich jotcuyc. ²⁰ Chi Dios nimay je comeenyjäy: “Ooy jibic-huinma'ñ miich miidity. Cham coodz ich miich nibijctzohuñhuaaniy yi m'alma (m'ögip), e co anajty ti m'ögy yi huidibi ti myujcpiy, ¿pin yi' je'adiib?” ²¹ Jadu'n yjajty yi' ajcxy huidibi ymeen'idi'ñ ci'm yujcpijcp, ca' yi' ajcxy jiiby ycomeenyity ma Dios yhuinduu.

Dios ycuend'ajtpy y'ung y'anäg

²² Chi Jesús nimay je y'ixpijcpidijc:

—Paady ajcxy nimaaygixy co ca' huaad mjottigoogixy ma yi mdzináayin yi mjogy'ajtín, huidi mjíxcixipy mgáaygixipy, huidi miid mninícx mxójxcixipy. ²³ Yi jugy'ajt jacnigi tzou yi', ca'ydi yi caayin uucin, etz je mninícx jacnigi choohuity ca'ydi huit. ²⁴ Ijxcix yi joogy ni ca' ñipy, ni ca' chijccixy, ni ca' miidity ytijc ni chëx, e Dios yi' ajcxy mooyipy huidi yjicxixyp, ¿nej cayjacnigi miich ajcxy mdzoohuity ca'ydi joon ajcxy? ²⁵ Ca' ji ni pin ma miich ajcxy pin jadipy nej ñayijptzomihuib jadüg cñuux. ²⁶ Pen ca' m'ajajtcixy nej mdúngixipy huidi hueen huinma'ñ, ¿nej co mdzachmijottigoogixy yi tzinaayin yi comeen'ajtín?

²⁷ Ijxcix yi aaybijy nej xóxyity, ca' ytaaccixy ni ca' yxuuygixy. Hich miich ajcxy nimaayb, co ni je rey Salomón miid tüg'öciy ymeen' ca' ñayxoxi jadu'n nej jada aaybijy ujtzipiy. ²⁸ Pen jadu'n Dios xoxy yi aay yi ujtz huidibi cham jajtíp ma yi tungop, e com jabom ti anajty ñiicxni, Dios xypubedipy xypudigihuipy niigi miich ajcxy huidi hueen mibijcp. ²⁹ Ca' miich ajcxy mhuinmay'ahuidítcixipy ajcxy ti mgáaygixipy m'úuccixipy.

³⁰ Yi naaxhuiñyäjy ajcxy ymijottigoyb anaxy tüg'óciy caayin uucin, huit etz tijaty. Miich ajcxy huidi mijpidacp Dios, Dios Teedy ñejhuiyb co copicy ajcxy miid'adipy caayin uucin etz huit tucxy. ³¹ Jayjip mijottigooygix Dios y'ayuc ytiy'ajt, chi jada' tüg'óciy huidi ajcxy myajmayjaty mbáatcixipy yi'.

Jugy'ájtín mijpi jiiby tzajpjoty

³² Chi Jesús yjacminañ:

—Ca' miich ajcxy mdzigüygixy, miich ajcxy mnihueeñity, per mDios Teedy yega'ñ ane'mdac tzajpjoty miid miich ajcxy ycixpi. ³³ Toocix tijaty miich ajcxy miid, nimooygix ayoobitjic. Yaj'oyüygix meen'idi'ñ huidi ca' y'amijñhuiipy ni camina. Yaj'oyüygix tüg pidägy, janch mij e janch oy, jiiby tzajpjoty huidi ca' ycixipy ytigoyipy, ma ca' meetzpi huaad ytiği, ni ucxyting ca' yajhuindigoyipy. ³⁴ Pen miich ajcxy miid mgomeeñ'ájtín ya naaxhuiñ, yaayi je mjot mhuinma'ñ ajcxy. Pen mdzojcpy ajcxy je oybi huidibi Dios yegamy, nañ miid'ájticy jim jabom jabom mjot mhuinma'ñ ajcxy ma Dios.

Tzoc íjtín ni'ixi'

³⁵ Chi Jesús yjacminañ:

—Ni'ixiügix mjot mhuinma'ñ jadu'n nej jihuüy mhuit myujc'ameetcixy co mdunaangixy, etz jadu'n nej jihuüy lámpara mnögpjccixy co mdumnaxaangixy m'ahuixaangixy je huindzin. ³⁶ Ni'ixi'íjticy jadu'n nej jäy huidi yhuindzin ahuijxp, co anajty yhuimbity co anajty ti y'oy ma jäy ti ypic, chi co anajty minipy ycogapxiy, mic'amy myaj'ahuädzity ytjic. ³⁷ Jotcujc ajcxy je tumbi co je yhuindzin anajty yjädy, e paady chumnajx juugy. Janch nimaaybich miich ajcxy co je tumbi ajcxy yhuindzin anajty yjädy, chi yhuit yujc'ameedipy, chi ajcxy yaj'ixtägipy ma caybejt, yajcayipy yaj'ügipy. ³⁸ Oy miinipy je huindzin mijcoodz o moñyi, e páadip je tumbidijc ajcxy jim chumnáxcixy juugy, jotcujc je' ajcxy je jadu'mbi tumbidijc. ³⁹ Nejhuiygix jada co je codijc ixipy nejhuihuiipy ti hora ymina'ñ je meetzpi, chi juugy ixipy chuumnaxa'ñ, e ca' cüyegipy ytjic nicxy jäy tigoty ymeech. ⁴⁰ Miich ajcxy nañ jadu'n íjticy ni'ixi', mina anajty ca' ti mhuinmaaygixy, huin'it miina'ñich ñich, je jäy huidi tzoon tzajpjoty.

Je tumbi tudägyipi etz je tumbi ca'pi ytudägyity

⁴¹ Chi Pedro Jesús nimay:

—¿Pín jada ti myajnimayb jada ayuc huidi ti mgapxy, ñich ajcxy, o nidüg'óciy jäy?

⁴² Chi je Huindzin Jesús yminañ:

—Huidibi tumbi je' ya huidi tumb miid yhuindzin janch cixyjot huinijot huidi miid yhuijy'ajt yujc'ajt huidi je yhuindzin mooyip ané'min ma ytjic, huidi yajnidägüyb tumbidijc nej ypaadyii. ⁴³ Jotcujc je tumbi co anajty je' yhuindzin yhuimbity e padüyb ti cuyduñ jadu'n nej anajty ti ñimäyüii. ⁴⁴ Janch ñich miich ajcxy nimäy co je tumbi huindzin yajmihui'mdähuiipy jada ytumbi tüg'óciy pidägy huidi ymiid. ⁴⁵ Pen je tumbi yhuinmaayb jotjoty huinma'ñyoty co je yhuindzin yhuäcxipni mina ymiina'ñ, chi midziptzooni jacjadyii tumbidijc ajcxy, huojpni, cojxni, nañ ytiğiñi caayb uucp anaxy etz ymügyii. ⁴⁶ Chi je tumbi yhuindzin miinipy ma je xii hora anajty ca' jijp'ixy e ni canejhuiy anajty, e huin'it ooy tzaachytunipy yi tumbi e chi pidägyipy ma je huidi ajcxy ca' ytudägyity.

⁴⁷ Je tumbi huidi nejhuiyb nej yhuindzin chójcin, e ca' cuyduñ, ni ca' ycapxymidoy, ni ca' ni'ixi' ity co yhuindzin anajty yhuimbity, je' je' niği yajtzaachytunip. ⁴⁸ Je tumbi huidi ca' yajxon huinjñhuiy nejññhuiy yhuindzin chójcin, hueeni je' yajtzaachytunipy. Huenpínity huidi may yajmooyb, may yi' yajmibijctzohuiyb; etz huenpínity huidi ti mihui'my ooy, yajmibijctzohuiib niği.

Jesús ycixpi ñaybijc-huäcxyii jäy

⁴⁹ Chi Jesús yjacminañ:

—Hich ti nmiinich ya naaxhuiñ co jiin nbidägbich. ¡Ooy njadzocyich ji ixypy ñitooyñi!
⁵⁰ Nyajnaixipyich tüg tzaachypi, e ¡ooy ndajy nmayich ixti mabaad yajcuydundäy! ⁵¹ ¿Nej miich ajcxy mdijy co ti nmiinich ya naaxhuiñ co nyajcixipyich je tzipi? Hich miich ajcxy nimaayb co ca'. Hue' janchtiy nyajnaybijc-huäcxáanibich jäy ajcxy. ⁵² Jadachambi etz yjacnicxni xii tiempo ji migoox tüg quëxjäydijc huidibi ajcxy ñaybijc-huäcxiiib, tugiig miid je metzpi, e metzpi miid je tugiigpi. ⁵³ Je ungedeedy tziptunip miid ymang etz je mang miid yteedy. Nañ je ungdaj tziptunip miid yñix etz je ñix miid ytaj. Nañ jadu'n je xecy tziptunip miid yxecy.

Je xii tiempo ytiy'ajt

⁵⁴ Chi Jesús nimay je mayjäy ajcxy:

—Co ajcxy m'ixy je joc ypidägy ma xii ycidägy, chi minaangixy co tühuaam, e janch jadu'n yjadyii. ⁵⁵ Co ymiin je jiiinboj, chi miich ajcxy minaangixy co ambigaamb, chi janch jadu'n yjadyii. ⁵⁶ ¡Miich jibic jäy ajcxy! Ooy mjaicixy nej myajcapxcixy yi xii tiempo huidi ajcxy m'ixpy tzajpcixy etz ya naaxhuiñ: ¿Nej co ca' mjaicixy nej myajcapxcixipy xii tiempo ymiin ycidägy?

Naymi'oyihui miid midzip

⁵⁷ ¿Nej co miich ajcxy ca' ci'm mnaydiyduunigixy nej ytudägyity je tiy'ajt? ⁵⁸ Co mnícxipy ma yi codung miid yi mmidzip jac'oy co mnayyaj'oyihuiipy miid yi mmidzip tü'am, ca'ydi miid mjädip ma yi codung, e chi je codung xyciyegipy ma je xueetz, e je xueetz xypidägyip pujxtigoty. ⁵⁹ Hich miich nimaayb co ca' jiiiby mbidzimipy, ixti cooni mgüejttähuiipy tüg'óciy.

13

Ooy ycopícyity nyajtigajtzim nhuinma'ñ

¹ Huin'it jäy miidmiydacy Jesús jadu'n nej je gobernador Pilato yaj'ögy nijëjity jäy jim Galilea, chi tem huidiiti ajcxy ñi'py miid iyujc ñi'py huidi je' ajcxy miid huindzigi'ñ tuuñ.

² Chi Jesús y'adzooy nimay ajcxy:

—¿Nej mdijy, ñigi anajty ypocymiidity je galileojäy ajcxy huidi jadu'n ayo'n patp, ca'ydi nidüg'óciy galileojäy? ³ Hich miich ajcxy nimaayb co ca'. Pen miich ajcxy ca' mjothuimbijtcixy ma Dios etz nay'adzigihiyigixy ma Dios, nidüg'ociy miich ajcxy mgijxtähuiip mdigoydähuiip. ⁴ E je' ajcxy je majmocxtugigpi huidi je mijtjic jim Siloé nigidaagootti, yaj'óci ajcxy. ¿Nej mdijy ñigi ajcxy ypocymiidity, ca'ydi nidüg'óciy je jäy huidi tzinayb jim Jerusalén? ⁵ Hich miich ajcxy nimaayb co ca'. Pen miich ajcxy ca' mjothuimbijtcixy, nañ mgijxtähuiip mdigoydähuiip miich ajcxy nidüg'óciy, jadu'n nej je' ajcxy.

Ijxpejt ma je higueri ca'pi anajty ytiim'aty

⁶ Chi Jesús yajnimay ajcxy jada ayuc:

—Tüg jäy anajty miidity higueri cojy ma y'aguemy, chi ñicxy jiiiby ma y'aguemy higueri tiim ijxtaaybi, ni ca' paty. ⁷ Chi nimay je' ytumbi: “Cham midugig jimijt miiñich ya higueri tiim ijxtayb ma jada higueri cop, ni tüg ngapaadyich. Huen yajpujxciday jada higueri cop, nej co ñigoobi ñaaxnihua'ñ.” ⁸ Chi je' ytumbi y'adzooy: “Huindzin, oc'ixmatz. Huen jadüg jimijt jëyi ocjactinäy, octajyich jayijp yi naax jühuidityi, etz oc'abonijyich. ⁹ Pen tiim'ajt ca' nyajpuxipy, pen ca' ytiim'aty jëbi nbújxigipy.”

Jesús yajtzögy pocxiiiduum tüg töxyjäy jigojopyi

¹⁰ Chi Jesús anajty yaj'ixpicy ma tüg naymujctac pocxiiiduum. ¹¹ Jim anajty tüg töxyjäy huidi anajty mimajmocxtugig jimijt cujc mi'ijtni yjiiinbojpa'm, agojojo anajty yöy, ni nej anajty yca'oyiy nej ytinaaygugihuiipy. ¹² Co Jesús ijxy, chi yaaxi, e nimay:

—Töxyjäy, ti mdzögy.

¹³ Chi yci' cijxxajy ma je töxyjäy yjix, e chi je' yjix ytiy, huin'it ytigüy Dios ojadajtpi.
¹⁴ Huin'it je naymujctac huindzin ooy yjotmäty miid co anajty Jesús jäy ti tzoüy pocxxiiduum. Chi je naymujctac huindzin nimay ajcxy je mayjäy:

—Jëyi tudujc xii jäy huaad ytuñ, huen miñ semanjoty pin yajtzoyïhuam, ca' ypocxxiiduumity.

¹⁵ Chi je huindzin Jesús yminañ:

—¿Miich ajcxy naybidaacip nej tudägyjäy, e ca' yjanchity! ¿Nej ca'miich ajcxy mmiguejy mhuajyuubi, etz mburro ma ypëcxtac pocxxiiduum, e myajnicxy ajcxy nii'ucpi? ¹⁶ E jada Abraham y'ap y'oc huidi Satanás ca' y'ixmachii majmocxtugig jimijt, ¿nej ca' ypadyii nyajtzögibich pocxxiiduum?

¹⁷ Co Jesús jadu'n y'adzoy, chi yajtzöyduuñ ymidzip. Chi tüg'óciy cajpjäy oy ajcxy yjotcugüygixy miid je oybi huidi Jesús ytuun.

Ijxpejt ma je mostaza pájc

¹⁸ Chi Jesús yminañ:

—¿Nej m'oc'a'ixüygixy yi Dios y'ané'min? ¿Huidi miid n'ocyajquipxïhuibich?
¹⁹ Jadu'n Dios y'ané'min nipaady nej mostaza pájc huidibi tüg jäy ñiip ma y'aguemy, chi ymujxy etz yeegy ooy janch mij, chi je joon ajcxy oy ype'ñ pidaaccixy ma je mostaza quipy aacxy.

Ijxpejt ma je levadura ca'p óyity

²⁰ Chi Jesús jadüg'oc yminañ:

—¿Huidibi miid n'ocyajquipxïhuibich yi Dios y'ané'min? ²¹ Jadu'n Dios y'ané'min ni paady nej levadura huidi tüg töxyjäy ytiyhuidijt miid tugiig quipxi'ñ harina ixti cooni yajxunday je harina.

Je tü'aa xützpi

²² Co Jesús anajty ñicxy jim Jerusalén, chi yaj'ixpicy anajty Dios y'ayuc ytiy'ajt cajp cajp majaty ñaxy. ²³ Chi tüg jäy Jesús amidoy:

—Huindzin, ¿nej hueeni yi jäy ajcxy huidi y'alma nïdzögip?

Chi Jesús y'adzooy:

²⁴ —Mijpidaaccix Dios ytiy'ajt amuumdügjet, jëbi ajcxy m'alma nïdzögipy, jadu'n nipaady nej jäy ajcxy ñaymic'ijxigixy co ytigihuaangixy ma je tijc aguu xützpi. Jadu'n ñich miich nimaayb co mayjäy ooy ja'a'ixiy ytigihuaangixy ma Dios y'ane'my e ca' ajcxy jadipy nej ytigüygixipy. ²⁵ Co je codijc ypidigipy etz agüyñip ytiyc, huin'it miich ajcxy pinjaty tibäy hui'm, chi jiiby tibäy miich ajcxy mminandägipy: “Huindzin, yaj'ahuadz”, e chi je tijc huindzin miich ajcxy xy'adzohuipy: “Ca' ñich miich ajcxy nejhuüyich ma miich ajcxy mdzoongixy.” ²⁶ Chi huin'it miich ajcxy minandägipy: “Miid ñich ajcxy miich ti nmiidgaaygixy ti nmiid'uuccixy, e miich ti myaj'ixpicy ma ñich ajcxy ngajp.” ²⁷ Chi je Huindzin y'adzohuipy ajcxy: “ñich miich ajcxy nimayb co ca' nnejhuüyich ma miich ajcxy mdzoongixy. Jihuäccix ma ñich nhuinduu, miich ajcxy pocy ytumbi.” ²⁸ Chi miich ajcxy jim ooy mdáxcixipy mmáygixipy, myáaxcixipy mdiitzquéetcixipy, co miich ajcxy m'ixipy Abraham, Isaac, Jacob etz tüg'óciy yi Dios y'ayucnajtzcaxiiby jiiby ma Dios y'ane'my, e miich ajcxy tibäy anajty ti mhui'mgixy. ²⁹ Minip yi jäy ajcxy huidibi tzoomb ma xii ypidzimy, ma xii ycidägy, ma jayhuixtujc ypidzimy, etz cham ma madzäcruudz ytinaay'ahuüy, chi y'ixtáaccixipy ma je caydac jiiby ma Dios y'ane'my. ³⁰ Paady ji jäy ajcxy huidi cham axam'ajtp, je' ajcxy jayijp'adip, etz ji jäy ajcxy huidibi cham jayijp'ajtp, etz je' ajcxy axam'adip.

Jesús taj may miid Jerusalén ycixpi

³¹ Chi nijëjity fariseojäy nimay Jesús:

—Quëg ya com yi rey Herodes xyaj'ögaam.

³² Chi Jesús y'adzooy:

—Nícx nimaaygix yíjibi huaax co nyajpídzimybich ca'oybi etz nyajtzoocypich jáy cham etz jabom, codugiig xii ti ndung mayíjich. ³³ Ooy ycopicyity co hích njactüyöyibich cham, jabom etz huixtic. Com ypaadyii co Dios y'ayuccapxhuäcxpi y'ögip ajcxy jim Jerusalén.

Chi Jesús yjacmínaañ:

³⁴ —¡Jerusalén jáy! ¡Jerusalén jáy! huidibi yaj'o'cp Dios y'ayucnajtzcaxhíb ajcxy, etz ycögädz ajcxy je jáy huidibi Dios ti xyajniguéjx ajcxy. Janch canaag'oc hích miich ajcxy njahuijtmuga'ñ jadu'n nej tzeydaj y'ung yajmucy queecpätcipy, chi ni ca' jadu'n ti m'a'ixíygixy. ³⁵ Chi jada' ijxcix cuendítungix, com jadachambi mgajp yhui'my najtz'ixi'. Hích miich ajcxy nimayb co ca' xy'ixipyich jadügtecy, ixti cooni anajty tiempo paaty mína mmináangixipy: “Capxpaaty je' huidi miimb miid Huindzin'ájtín Dios ycixpi.”

14

Jesús yajtzögy tüg yëydijc quixypa'mmiidpi

¹ Chi jadu'n yjajti co tüg pocxxiíduum Jesús ytigiy ycaya'ñ anajty ma tüg fariseojáy ytiyc, hue' anajty judío tungmiidpi. Chi yi judío ixpicytiyc ajcxy tzach'ix'ijtcixy Jesús, amidoo'ijtcixy Jesús y'ayuc. ² Huin'it tüg jáy huidibi ymiid anajty quixypa'm miíñ ma Jesús yhuinduu. ³ Chi Jesús ymigapxi je' ajcxy huidibi yaj'ixpijc Dios ñecy etz yi fariseojáy ajcxy, nimay:

—¿Nej je Dios ytiy'ajt ymínañ? ¿Huaad o ca' huaad chögy jáy pocxxiíduum?

⁴ Chi ajcxy y'amoday. Huin'it Jesús cñixajiiy je pa'm jáy, chi yajtzoooy. ⁵ Chi Jesús nimay je fariseos ajcxy:

—¿Nej miich ajcxy pen niijutcögäp ajcxy mhuajyuubi o mburro pocxxiíduum, nej ca' mic'amy nícx yajpídzimgixy oy y pocxxiíduumi?

⁶ Chi ca' ajcxy jajty nej y'adzohuimbíjtcixipy.

Je pinjaty huodzooñyip ma je pijcpi yajnixiíduñyi

⁷ Co Jesús ijxy jadu'n nej yi' ajcxy jac'oybi iñaybejt huin'ijxcixy jim ma je caybejt, chi ajcxy tüg ayuc yajnimaayi, je tiibi anajty yajhuomiingixy:

⁸ —Co miich myajhuoohuipy ma pijcpi yajnixiíduñ, ca' m'ixtägipy ma je iñaybejt cödumbi, ca' jécyity co yajhuoomiñ huidi je' iñaybejt ymíhuaad. ⁹ Chi jada' xyñimáhuipy je huidibi anajty ti xyhuoomiñ: “Mo' jada migüg jada iñaybejt cödumbi.” Chi miich tzöydu'n miid mnicxpy ma je' iñaybejt axambi. ¹⁰ Co jáy xyhuoohuipy ma je píjcin yajnixiíduñ, jim m'ixtägip ma je axambi iñaybejt, e co yminiipy je huidibi anajty ti xyhuomiñ, chi xyñimáhuipy: “Migüg, nax ma yi iñaybejt cödumbi.” Huin'it capxpaady m'idipy ma je' ajcxy huidibi anajty iñayb ma caybejthuinduu miid miich. ¹¹ Pinjaty ci'm naygómáyip, tzöydu'nbaadip je'. Pinjaty naybidaacip nicy xeemy je' je' capxpaady y'idip.

¹² Chi Jesús nimay pinjaty huidi anajty ti yhuoomiñyii:

—Co miich mxíidunipy ca' mhuoohuipy je jáy ajcxy huidibi ooy miid mnaymigüg'ájtigixy, ni mmiidügquëx, ni m'ajuugy m'amigüg, ni mmiidijc comeeñybi, ca' jécyity co nañ jadu'n xyhuoohuipy, e chi anajty jac mij yejc-huimbijty. ¹³ Co mxíidunipy, chi huoohuipy ayoobitijc, tzaachíjáy ajcxy, tecymätpi ajcxy, etz jáy huiintzpi. ¹⁴ Huin'it miich mjetcuyc'adipy co yi' ajcxy ca' jadipy nej yejc-huimbidipy. Jiini Dios xymigüedipy co anajty yajjugypicy je tudägypi jáy ajcxy.

Je ijxpejt ma tüg adzoo'ájtín mijpi

¹⁵ Tüg jáy huidi anajty iñayb miid Jesús ma caybejt huinduu co midooy nej Jesús ymínañ, chi nimay Jesús:

—Jotcuyc je jáy ajcxy huidi cayip jiiby ma Dios y'ane'my.

¹⁶ Chi Jesús y'adzooy:

—Tüg jáy may anajty jáy yaj'adzu'ada'ñ, chi jayjpní oy mayjáy nimay co anajty yaj'adzuu'ada'ñ. ¹⁷ Co je adzoo'íbi paty, chi quejxy tüg cogapxy huen nícx y huogixy je

tíibi anajty ajcxy yajnimäy, nimay ajcxy: “Jámgiç, ti jim yajni'ixïy je caayin uucin.” ¹⁸ Chi ajcxy nidüg'óciy yminandacy: “Tun may'ajt meexcich, ca' y'oyïy nej nyajnícxibich.” Chi je' jayïjp jäy y'adzoy: “Ti njuyich tüg rancho je' copicy jayïjp nicxy n'ixyich, paady ca' nicxa'ñich; tun may'ajt meexcich.” ¹⁹ Chi jadüg jäy yminañ: “Ti njuyich miçoox par huaj yuubi, nicxy n'oc'ijxmadza'ñich jayïjp, paady ca' y'oyïy nej nícxibyich, tun may'ajt meexcich.” ²⁰ Chi jadüg jäy yminañ: “Tim chamni nbicyich, paady ca' oyïy nej nícxibyich.” ²¹ Co je cogapxy yhuimbijty, chi yajnimay je' yhuindzin jadu'n nej je jäy ajcxy y'adzooy huidi anajty oy ti huoy. Huin'it je huindzin ooy yjotmätcoty, chi nimay je ytumbi: “Nícx tzojcyi cajpjoty ma yi jäy ajcxy yöygixy ñajxcixy etz ma yi mij tü, e chi huomiinipy pin mdimypaatyp ayoobitjic, yi tzaachïjïy etz huiintzpi.” ²² Chi je' ytumbi yminañ: “Huindzin, ti nduñich jadu'n nej ti xyñimäyich, etz jac chiini ñaybejt.” ²³ Chi je huindzin nimay je' ytumbi: “Nícx ma yi mij ñi mij tü yajmin je jäy ajcxy adzip, huen ñich ndijc uch. ²⁴ Chi ñich miich nimäy co ni tüg yi jäy ajcxy huidi jayïjp yajnimay, ca' ajcxy y'adzuu'adipy miid ñich.”

Nej ooy chípity co Cristo nbanicxim

²⁵ Chi may anajty jäy ñicxy miid Jesús, chi Jesús yhuac-huimbijty, nimay ajcxy:

²⁶ —Pen ji pin xypamiñich, e ooy niçi tzocy yi' ytaj yteedy, yi' ytöxyjic, yi' y'ung, y'ajch o chi', etz nañ ooy niçi tzocy yi' yjugy'ájtin, ca' ñich yi' huaad ndiscípulo'adyiijich. ²⁷ Yi jäy ajcxy huidi xypamiimbich huidi ñich ndiscípulo'adaanip, copicy yajmaxipy ajcxy ayo'n, jadu'n nipaady nejjihuïy ycruudz ti cabïccixy e nicxy yajcruudzpeda'ñyii. ²⁸ Co miich ajcxy mmijitjic mgoja'ñ, chi miich ajcxy jayïjp m'ixtaaccixy e m'a'ixiïygixy jadu'ñyi meeñydunaangixy, nej pen miid ajcxy huidi jëbi miid myajmaaygixy je mmijitjic, o peni ca'. ²⁹ Ca' yjécyity co anajty je tijc ti yajpojtziçy, chi anajty ca' m'ocajtni nej myajmayipy, e pinjaty anajty ti xy'ixy, chi ooy xyñixigipy xyajxigipy. ³⁰ Chi jäy ajcxy ymina'nip: “Jadayaabi yëydijc nigoo ti yajtzondägy tijc poch, e ca' ti ocyajmaayñi.” ³¹ O huidi rey ji co chona'ñ tziptumbi miid huingbi rey, ¿ca' jayïjp huinmayipy pen jëbi chiptuñ miid majc mil jäy, pen je ymidzip miimb miid iipx mil jäy? ³² Ca' yjécyity co je tügpï rey jguemni anajty miiñ, chi quexipy tüg huingapxpi pijctzohuipy may'ajt ca'ydi yi tzip yjadyii. ³³ Hueñypíñity ma miich ajcxy pen ca' m'ixmájtzcixy tüg'óciy tijaty miich ajcxy mmiid, ca' ñich yi' huaad ndiscípulo'adyii.

Co je caan ytamtz'ajt ytigooyñi

³⁴ Yi caan ooy yi' y'óyity pen ymiid ytamtz'ájtin. Co je caan ytigoy ytamtz'ájtin ca' ji ni ti xücx'ájtin yegipy. ³⁵ Yi caan huidi ti ytigoy ytamtz'ájtin ni ca' y'oybidágnity ma je naax, ni ma je püx huidi aboon'ajtp. Hue' janchtiy yaj'ixjidejtp tibäy. Pinjaty ñich n'ayuc xymidohuaanip huen mido'mbicy.

15

Ijxpejt ma je cöbixy huidibi tigooy

¹ Chi ajcxy je yajcuetjpidijc etz pocyjäydijc nimijhuägtay ajcxy Jesús tzach'amidoo'idaani ajcxy je' y'ayuc. ² Chi ajcxy huidi ooy tzachmijpidägy judíojäy ytiy'ajt etz huidi ajcxy yaj'ixpijic Dios ñecy ameech nigapxcixy ni'ojiiygixy je Jesús, chi ajcxy yminañ:

—Yi Jesús pocyjäydijc ajcxy ymiüg'ajtpy, e yi' miid ycaaygixy.

³⁻⁴ Chi Jesús jadayaabi ayuc ajcxy yajnimay:

—Huidi jäy ji ma miich ajcxy pen ymiid migo'px cöbixy co ytigoy nidügti, ¿nej ca' yajhuimipy je mada'px majmocx midaaxpi jim ma chinaaydac, chi nicxy ixtäy huidi anajty ti ytigoy ixti cooni paadip? ⁵ Co paadip, chi mic'amy pidägip ma quejycop janch jotcujc. ⁶ Co yajjädip ma ytijc, chi huomucy ymiügütjic etz ymijin ymidijc, nimahuipy ajcxy: “Jotcugiiygix miid ñich, ti ñich ngöbixy nbaady huidi anajty ti ytigooy.” ⁷ ñich

miich ajcxy nimaayb co nañ jadu'n tzajpjoty ooy jotcujc'ájtín nīgi miid co tüg pocyjäy yjothuimbity, ca'ydi miid mada'px majmocx madaax tudägypí jäy huidi ca' ytundigoy.

Ijxpejt ma je meen' huidibi tigooy

⁸ Chi Jesús yjacminañ:

—¿Huidi töxyjäy ji pen ymiid majc ymeen', co ytigooy tüg meen', nej ca' jün nöctzohuipy, e ytigihuipy pedigpi ixtähuipy ymeen' oñydägy ixti cooni paadipy? ⁹ Co paady, chi huomucy ymigügtijc etz ymijün ymidijc, e chi nimähuipy: “Xondaaccix miid ich, ti ich nmeen' nbaty huidibi ich anajty ti nyajtigooy.” ¹⁰ Jadu'n ich miich ajcxy nimäy co nañ jadu'n Dios y'angeles ajcxy ooy yjotcúcity co yjothuimbity tüg pocyjäy.

Ijxpejt ma je ung huidibi ymeen' yajticxtay

¹¹ Nañ jadu'n Jesús yjacminañ:

—Tüg yeydijc ymiid anajty metz ymang. ¹² Chi je jacmutzpi nimay yteedy: “Tat, mooygich yi pidägy huidi xypaatpich.” Chi je' yteedy je pidägy yajhuäcxy. ¹³ Hueeni anajty xii tzuu cujc ñicxy, co je' ymang mutzpi yajmujctay tüg'óciy huidi yi yjé'ajtpy, chi choon' ñicxy huingnaax huinggajp. Chi jim mic'amy yajtunday yajtigoyday tüg'óciy huidi anajty ymiid. ¹⁴ Co anajty ymeen' tüg'óciy yajtundäy, chi miin' tüg mij yuu ma je cajp. Chi ooy je mang mutzpi caayin uucin huit meen' jayajmayajtñi. ¹⁵ Chi je' ninicxy tüg jäy ma je jimbi naaxjot ymiduna'ñ anajty. Chi yquejxi ma yrancho idzim cuend'ajtpi. ¹⁶ Ooy anajty janijot'aty ycüxa'ñyii miid je pëtztim huidi anajty idzim y'ojcpy. Chi ni pin anajty ni ti ycamöyii. ¹⁷ Co yhuinma'ñ yajmejch, chi yminañ ma yjot yhuinma'ñ: “Jim janch maytumbi ma ich ndeedy ytijc, ymiid ajcxy jüicy picy janch may'amy. Ich ya tzach'ayoob miid yuu xii. ¹⁸ Tzonaambich ya, nicxa'ñich ma ich ndeedy, nimähuibich: Tat, ti ndundigóyich miid Dios tzajpjotypi etz miid miich. ¹⁹ Cham ca' ypadyii miich mina'nip co miich xy'ung'adyijich. Yajtungich jadu'n nej mdumbidijc.” ²⁰ Chi je' choñ, ñicxy ma yteedy. Jegügyñi anajty ymiñ co yteedy y'ijxpaati. Chi yteedy ypa'ayogoti, e ñicxy poyigy oy jipcobadiy. Chi yögminennajxy etz tzüicy. ²¹ Chi je ung yminañ: “Tat, ti ndundigooyich miid Dios tzajpjotypi etz miid miich. Cham ca' ypadyii nicxy miich mina'ñ co ich miich xy'ung'adyii.” ²² Chi je ungdeedy nimay je' ytumbi: “Yajpidzim je huit oybi, mic'amy yajnijeniiygix jada n'ungich, chi mooygix yi cijiitz etz ycig. ²³ Nicx yajtzoongix yi huaj mang nicxpi, yaj'öccix, chi ngaayim n'uucim e nxiduunim. ²⁴ Jada n'ungich jadu'n nipaady nejjihuüy anajty ti y'ögy, e chi ti yjugypicy. Tigooy yi' anajty e ti yjädy.” Chi ajcxy ooy yjotcugiiy.

²⁵ Chi je ymang mijpi camjoty je' anajty. Co yja'ty mihungon je ytijc, chi midoy co jäy ooy yxüxy etz y'ech. ²⁶ Chi yaaxi tüg ytumbi y'amidooy: “¿Ti yi' tünip jajtíp?” ²⁷ Chi je tumbi y'adzooy: “Ti yjädy m'uch, ti mdeedy yaj'ögy tüg huaj nicxpi, co ymang ti huimbity juugy.” ²⁸ Chi je ungoob ooy yjotmäty, ca' anajty ytigihua'ñ tigooy. Huin'it je yteedy ñibidzimi, ycohuaniiyi co huen tigiy tigooy. ²⁹ Chi je' y'adzooy, nimay yteedy: “Janch micanaag jimijt ich miich miid nduñ, ni ca' ngapxhuimbityich. Ca' chambaad miich ni xycamooyich tüg pi'ccöbixy jaydeb' ntotcujc'adipyich nxiduunipyich miid nmigügtijcich. ³⁰ Per co yi mmang ti yjädy huidi oy ti yajtundäy yi ymeen' miid jibic-huinma'ñ miid jibic töxyjäydijc ajcxy, chi ti myaj'ögy huaj mang nicxpi miid yi' ycixpi.” ³¹ Chi je ungdeedy nimay je' ymang: “Miich ung huinixii ya miid n'ity. Tüg'óciy huidi nmiidich miich yi' mje'. ³² Ooy ycopicyity co nxiduunim etz ntotcugiiyim, co yi m'uch jadu'n anajty nej ti y'ögni, e jadachambi ti yjugypicy, ti anajty ytigooy, e cham ti yajpaady.”

16

Je ijxpejt ma je mayordomo huidibi ca' yhuindzin miduñ tudägy

¹ Nañ jadu'n Jesús nimay yi' ydiscipulos:

—Jim anajty tügjäy comeeñybi, ymiid tüg ytumbi huidi yi' ypidägy cuend'ajtip. Chi oy nimäyii co tüg je ytumbi nigoo anajty tzachyajuñ je meeñ ma ycapaadyii.
² Chi je huindzin oy yajhuoyii je' ytumbi, chi nimay: “¿Nej jada co ñich jadu'n nimäyijich miid miich ycixpi? Ya yi cuenti cïmoydaaygich nej ti mduñ, etz ca' ñich miich n'ocjactumbi'adaañin.”
³ Chi je pidägy cuend'ajtpi jot'ajti: “¿Ti ndunipich? co yi' nhuindzin xyajpidzima'ñich ma yi ytung. Juttajii ca' njatyich, co limosna nbijctzohuipyich tzöydümbich.
⁴ Nejhuuybich ti ndunipich jaydeb jäy ajcxy xycöbigipyich ma ajcxy ytijc.”
⁵ Chi tüg tüg huoy pin anajty minuucx'ajtp je' yhuindzin; chi y'amidooy je jayijpi: “¿Jadu'ñyi miich minuucxy'adyii ñich nhuindzin?”
⁶ Chi je' y'adzooy: “Migo'px garafón aceite.” Chi nimay: “Matz mnecy, ñña' mic'amy, e cojayi' huixchiguipxmajc.”
⁷ Chi jadüg nimay: “¿Miich jadu'ñi mminuucxy'adyii?” Chi je' y'adzooy: “Migo'px quipxi'ñ trigo.” Chi nimay: “Matz mnecy, cojayi' mida'px.”
⁸ Chi je pidägy huindzin capxpaaty je jibicjäybi huidi cuend'ajtp yi' ypidägy co oy yhuinma'ñybaady mij; co jadachambi naaxhuiñyäj huidi ca' mibicy Dios, nigä ajcxy ypëgyity miid yhuinma'ñ, ca'ydi yi jäy ajcxy huidi huinjihuuyb Dios ytiy'ajt.

⁹ ñich miich ajcxy yam nimaayb migüg'ajtigixy yi jäy ajcxy miid yi meeñ huidibi ca' ytimytiijyity, jigix co je meeñ anajty myajmayajtcixy ji pin miich ajcxy xycöbigip ma jugy'ajttac huinixiibi.

¹⁰ Je' jäy ajcxy huidibi yajxon cuydunam je ané'min huidi hueeni, nañ ycuydunamy je ané'min huidibi mijip. Je jäy ajcxy huidibi ca' cuydunaangixy je ané'min huidi hueeni, nañ ca' cuydunaangixy je mijpi ané'min.
¹¹ Pen ca' mjajtcixy nej mgüend'ajtcixipy yi jugy'ajtin huidibi ya naaxhuiñ yajpatp, ¿pin miich ajcxy m'ocyajmihui'mamy je jugy'ajtin je riqueza oybi janchypi?
¹² Pen ca' mjajtcixy nej mgüend'ajtcixipy tiibi mihui'mgixy huidi huingjäy yje'ajtpy, ¿pin miich ajcxy xymöhuip huidibi ajcxy yje'ajtpy?

¹³ Ni tüg tumbi ca' jëbi ytuñ miid metz yhuindzin; com tüg je' ixtijipy etz jadüg mijnicxpedipy; o tüg huidi ycapxycöbigipy, etz jadüg ca'. Miich ajcxy ca' huaad mijpidägipy Dios etz nañ jadu'n mijpidägipy yi comeeñ'ajtin.

¹⁴ Nañ jadu'n midooy jada ayuc yi fariseojäy ajcxy, com ooy anajty ajcxy meeñ adzójccixy. Chi ajcxy ooy nixiici yajxiici Jesús y'ayuc.
¹⁵ Chi Jesús yminañ:

—Miich ajcxy fariseojäy jadu'n mnaybidáacigixy ma jäy ajcxy yhuinduu nejjihuuy ajcxy ooy m'oyjäyity. Dios ñejhuuydaayb co miich ajcxy miid jibicpi ma mjot mhuinma'ñ. Tijaty huinma'ñ huidi jäy ya naaxhuiñ y'oy'ijxyp, Dios ca' yi' oy'ixy.

Je Dios ycötújcín etz je Dios y'ane'mdac

¹⁶ Chi Jesús yjacminañ:

—Je taabi je Juan anajty yjijity, jii'ajtp anajty Moisés ycötújcín etz je y'ayucnajtzcaxiyybi ajcxy y'ixpijcín. Huin'it tiempo etz ixti jadachambi jadu'n yajnajtzcaxiy je Dios y'ané'min, e mayjäy ooy ñaybidáacigixy co ytigihuaangixy ma Dios y'ane'my.

¹⁷ Ca'chípity co je tzajp etz naaxhuiñybi ñajxtähuipy, pero je Dios ycuydundähuamy tüg'ócicy jadu'n nej ñecy ymina'ñ. Ni tügi letra oy mabaad ymúdzity nicxy ycajcuynuñ.

Jesús capxticxy nej ypöcyity co jäy ytöxyijc ixmach

¹⁸ Chi Jesús yjacminañ:

—Huenpinjäyity co ytöxyijc ixmach etz ypicy miid huingbi töxyjäy, ooy anajty mij pocy tuñ. Nañ huenpinjäyity huidibi pijcp miid je töxyjäy huidi ñäy ti y'ixmachyii, nañ mij anajty ypocytuñ.

Je comeeñyjäy etz je Lázaro

¹⁹ Chi Jesús yjacminañ:

—Ji anajty tüg jäy comeeñybi ñayxoxyii anajty janch ooy miid oyjatypi huit, etz janch oy ycaj y'ügy jabom jabom.
²⁰ Nañ ji anajty tüg ayoobi jäy huidi limosna pijctzoob, hue'

anajty yxii Lázaro. Lázaro jabom jabom anajty ycögnäy ma je comeeñyjäy ytijc'aguu, janch nibuutzp anajty ooy. ²¹ Lázaro ooy anajty jani'ixy caya'n ñ je cayduc tzütztuc huidibi cáb ma je comeeñyjäy ycaýbejt. Oy uc anajty ymiiñ yhueyii je ñíbüd. ²² Chi jadu'n yjajti co oy y'o'cni je jäy huidi limosna pijctzoob, chi je ángeles ajcxy yajnicxy Lázaro ma je Abraham yajpaady. Chi je comeeñybi nañ jadu'n y'o'cni, e oy yajnaaxtigiyyii. ²³ Chi je comeeñybi jiiby ca'oydactuuby tzaachypi anajty jihuüy, chi mij'ijxy jiguëgy je Abraham etz je Lázaro. ²⁴ Chi je comeeñybi ycapxy janch mic, yminañ: "Apteedy Abraham, ñich pa'ayoog. Tun may'ajt quex Lázaro, huen yi' ycñhuax yajxoogy miid nii etz xyajtjitzibich ndootz, co ñich ooy ayo'n nbaadyich ma jada mij jñn." ²⁵ Chi Abraham y'adzooy: "Oc'ungich, ajihuühuü co ti mdzinäy ti mjogy'aty miid mhuit mmeen aguyc jotcuyc, e yi Lázaro ooy ayo'n paty. Jadachambi Lázaro yjotcuyc'aty, etz miich jiiby mbatpy tzaachypi. ²⁶ E jadügnax, ji tüg mij huoc ma ñich ajcxy etz miich ajcxy. Pen ñich jim'amy janaxam ma miich, ca' njadipyich, nañ jadu'n miich ajcxy ni pin ca' jadipy nej ñaxipy ma ñich nyajpaadyich." ²⁷ Chi je comeeñybi jacnimay Abraham: "Apteedy Abraham, tun may'ajt quex yi Lázaro ma ñich ndeedy ytijc. ²⁸ Jim ma ñich ndeedy ytijc jim migoox migüex nmüididyich, huen nicxy yajmiidmiydaaccixy, ca'ydi je' ajcxy nañ jadu'n ya minipy ma jada ayoodac." ²⁹ Chi Abraham y'adzooy: "Yi' ajcxy ymiid necy huidibi Moisés etz Dios y'ayucnajtzcaxiyyi ycojaay, huen cuydungixy." ³⁰ Chi je comeeñybi yminañ: "Janch jadu'n apteedy Abraham. Pen nidüg yi ögpi ñicxy ma je' ajcxy, jothuimbidiy yi ajcxy." ³¹ Chi Abraham yminañ: "Pen ca' je' ajcxy mijpidägy Moisés y'ayuc je jécyip etz huidi ajcxy jecy'ajt Dios y'ayucnajtzcaxiyyi, nañ ni ca' mibijccixipy pen nidüg ögpi yjugypicy."

17

Huidibi ooy ycodzigijity co n'agánáxim ma pocy

¹ Chi Jesús nimay yi' ydiscípulos:

—Janch tiy'ajt jadu'n co yminip jäy ajcxy huidi yajhuinma'ñydigoyip yi mayjäy ajcxy miid aani. ¡Ay yi' ayooob ajcxy! pinjaty jäy ajcxy yajhuinma'ñydigoyaangixy. ² Nigi y'óyity co ixipy yajyo'cxodzïyii tüg tzaa janch mijpi, e chi yajcöjibijpnaxipy mejyoty, ca'ydi co yajhuinma'ñydigoyipy jada jäy ajcxy huidibi ixpijcin hueeni miid ma Dios ytiy'ajt. ³ Naygüend'ájtigix miich ajcxy co ca' mgapxtigóoygixipy.

Co m'uch xymidundigooyipy, e chi mgapxhuüjip, e pen jothuimbijt, chi mbo-cymeecxy. ⁴ Pen m'uch huixtujc'oc xymidundigooy tüg xiibi, nañ huixtujc oc xyñimiñ tüg xiibi, e ymina'nipy: "Ti njothuimbityich", huinmeecxy miich yi', chi jada' miich huixtujc'oc mbocymeecxy.

Je mibíjcin ymic'ajt

⁵ Chi je apóstoles ajcxy nimay je Huindzin Jesús:

—Yajyeeg ñich ajcxy nmibíjcin.

⁶ Chi je Huindzin Jesús y'adzooy:

—Co ixipy miich ajcxy mmibicy Dios jadu'n nej tüg pi'c mostaza pajc, e mnima' ixipy jada paadzim quipy: "Nayyajpidigii, nicx tina' mejyoty, e xycapxymidohuip yi'."

Ti huaad tuñ je pin yajcaayb yaj'uuc

⁷ Pen ji miich ajcxy nidüg pin ymiid tüg ytumbi huidi tumb ñaaxjidzitzii o yhuaj cuend'aty, co yja'ty ma mdijc, ¿nej jébi nimay: "Tigi', ixtäg ma mesa etz adzu'at?"

⁸ Hue' janchtiy mnimähuipy: "Yaj'oyiigich n'adzu'ibi, co'amedí' mhuit, e xymooygich ngaayin n'uucin. E huin'it miich mgayipy m'ügipy." ⁹ ¿Nej yajnaxipy je' Dioscojuyip miid co je' anajty ti tuñ huidibi yaj'ane'my? ñich minamb co ca'. ¹⁰ Nañ jadu'n miich ajcxy co ti mguydungixy tüg'ócy tiibi Dios xyaj'ane'mgixy, chi mmináangixipy: "Je' ñich ajcxy je tumbi huidibi ca'p ycapxpaadyity, jëyi ti ndüngixich huidibi ñich ajcxy huaad ndungixy."

Jesús yajtzögy majc jäy jibic pützpa'mmiidpi

¹¹ Nicxp jim Jerusalén anajty Jesús, chi ñaxiy ma Samaria etz Galilea ñaymidziba'n'ájtigixy. ¹² Co anajty mihuingoñ tüg cajp, chi jipcoyöyiy majc jäy pützpa'mmiidpi. Chi ajcxy yhuäcxijpy jigüegyñi. ¹³ Chi ajcxy mic ycapxcoody yminaangixy:

—Huindzin Jesús, pa'ayoog ich ajcxy.

¹⁴ Co Jesús je' ajcxy ijxy, chi nimay ajcxy:

—Nicx nayguëxigix ma yi teedy ajcxy.

Chi jadu'n yjajti, co ajcxy ñicxy, chi tüyöyjoty oy chooccixy. ¹⁵ Nidügti je' ajcxy co ñay'ijxi co ti anajty chögy, chi nihuimbijty Jesús, ooy Dios jäymech cömay janch cixyjot huinijot. ¹⁶ Chi je' ycojxtinay'ahuñiy ma Jesús ytecymijc, chi pidacpy yhuñijjip naaxcixy yajnaxy Dioscojuipy. Samaritanojyä je' anajty. ¹⁷ Chi Jesús ymíñañ:

—¿Nej ca' nimajc miich ajcxy huidi ti mdzooccixy? ¿Ma ajcxy je' janidaxtucpi? ¹⁸ ¿Nej ca' pin jac yhuimbijty miñ jäy medza'ñ cömaya'ñ Dios, jeyi tügpajc ti yhuimbity jada samaritanojyä?

¹⁹ Chi Jesús nimay je jäy:

—Pidíg, nicxni. Yi mmibíjcín ti xyajtzögy.

Nej je' yminipy Dios y'ané'mín

²⁰ Chi je fariseojäy ajcxy y'amidooy Jesús mina anajty yi Dios ya miñ ya naaxhuiñ y'ane'mañ. Chi Jesús y'adzooy:

—Je Dios y'ané'mín ca' je' yminipy jadu'n nej ti yaj'ixy o yajmidoy. ²¹ Ni mgamináangixipy co cha je' o jim'amy je'. Dios y'ané'mín ya je' cham ma miich ajcxy.

²² Chi Jesús nimay yi' ydiscípulos ajcxy:

—Miim je xii je tiempo ma miich ajcxy anajty ooy xyjamiid'idáangixich tüg xii, e ca' ich miich ajcxy xy'ixipy, ich je jäy huidi tzoon tzajpjoty. ²³ Chi jäy ajcxy yminá'nip: “Chaa'amy je', je Cristo”, o “Chim'amy je'.” Ca' miich ajcxy yi' mniníxcixipy, e ni mgabaníxcixipy. ²⁴ Co anajty nmiñich jadügtecy ya naaxhuiñ, ich, je jäy huidi tzoon tzajpjoty, co ich anajty nmimiñ n'ané'mín, jadu'n je' yjadipy nej huidzuc co y'aa'an ma tüg tzajp'ijx e nañ jadu'n y'aa'an jadüg tzajp'ijx. ²⁵ Nañ ooy ycopícyity co jayijp ocpáadibich ayo'n, e chi jada xyca'ixa'nibich xycatzoga'nibich yi jäy ajcxy huidi tzinaayb jugy'ajtp jadachambi tiempo. ²⁶ Com jadu'n nej yjajti jecy'ajty, co je Noé chinaay, nañ jadu'n yjadipy co anajty ich, je jäy huidi tzoon tzajpjoty, co anajty nxii ndiempo paty mina anajty nmiñich ane'mbi. ²⁷ Janch caayb janch uucp anajty je jäy ajcxy agujc jotcujc co je Noé ytigíy ma ymijcajoon. Chi je ayo'nduu ymiñ huidi cijx yaj'ögtigoydäy je mayjäy. ²⁸ Nañ jadu'n yjajti jecy'ajty co Lot chinaay. Je jäy ajcxy jim Sodoma etz Gomorra ycaaygixy y'uuccixy yjuuygixy ytooccixy, etz ytiijccojcixy. ²⁹ Huin'it xii co Lot chooni jim Sodoma, chi ycäy tzajpjoty jin etz huidi jindzaa miid conhuidity ytoy, chi cajp ytigoyday. ³⁰ Jadu'n nej ayo'n yjajti taabi chinaay Noé etz Lot ya naaxhuiñ, nañ jadu'n yjadiy ayo'n co anajty nmiñich jadüg'oc ya naaxhuiñ, ich je jäy huidi tzoon tzajpjoty.

³¹ Je huin'it xii huin'it tiempo pin anajty iñaayb ma ytiijccop, e ymiid anajty ypidägy jii by tigoty, ca' nimiragipy nicxy ti yajpidzimy, e huidi jäy anajty jim camjoty nañ ni ca' yhuimbidity ma ytiijc. ³² Ajihuiygix jadu'n nej Lot ytöxyijc ayo'n paty. ³³ Tüg'óciy jäy ajcxy pinjaty yjugy'ajt tzögam, tigoyipy yjugy'ajt. Tüg'óciy jäy ajcxy pinjaty yjugy'ajt tigooyb (miid ich ycixpi), hue' je' yjugy'ajt ypaadipy chögipy.

³⁴ Ich miich ajcxy nimaayb co je huin'it coodz nimetz jäy anajty ajcxy ma cijx, tüg yajnicxiyb etz jadüg yajhui'miiyb. ³⁵ Nimetz töxyjäy anajty yjijtzcixy, tüg yajnicxiyb, etz jadüg yajhui'miiyb. ³⁶ Nimetz yëdijc anajty ytungixy camjoty, tüg yajnicxiyb etz jadüg yajhui'miiyb.

³⁷ Chi je jäy ajcxy huidi ixpijcp Jesús y'ayuc ymíñañ ajcxy:

—¿Ma jadu'n yjadiyb nej miich ti míña'ñ, Huindzin?

Chi Jesús ymíñañ:

—Ma anajty je ögpí yajpaady, jim yi luud ajcxy ñimuga'ñ.

18

*Je ijxpejt ma je ayoo*bitöxyjäy etz je juez

¹ Chi Jesús yajnimay ajcxy tüg ayuc huidijaty ixpijcp ma yí' co ooy ycopícyity Dios nmibijctzoohuim jabom jabom, ni ca' nmidzipim. ² Chi Jesús ymíñañ:

—Jí anajty tüg juez ma tüg cajp, ni Dios anajty ca' tzigíy, etz ni jäy ajcxy anajty ca' huindzigíy. ³ Nañ ma je cajp jim anajty tüg co'ögy ytöxyjäy. Je' anajty yminög janam jadzoc ma je juez, nimäy anajty: “Nihuaangich ma je nmidzipich.” ⁴⁻⁵ Chi je codung ca' co'adzoy ca' a'ixiy tzojc. Chi je juez jot'ajti, ymíñañ jotjoty huinma'ñyoty: “Oy Dios ca' ndzigíyich, ni jäy ca' nhuindzigíyich, per com jada co'ögytöxyjäy nigí xychach'amayíyich, miñ n'ocnihua'ñich, ca'ydi jadüg'oc ymiñ e xyajcijxich anajty nmecxtújcín.”

⁶ Chi je Huindzin Jesús ymíñañ:

—Mido'mbic miich ajcxy nej je juez jibicjäybi ti nihuañ je töxyjäy co anajty ti yajtzibiyii. ⁷ ¿Nej ca' Dios ñihuaanip yí huidibi ti huin'ixy, huidibi mibijctzooob xim tzuum? ¿Huäcxibip, nicx ca' tzojc adzooyi? ⁸ Ich miich ajcxy nimaayb co Dios ñihuänamy mic'amy yí' yjäy. Co anajty nhuimbity ya naaxhuiñ, ich, je jäy huidi tzoon tzajpjoty, ¿nej nbáadibich mibíjcín ya naaxhuiñ?

Je ijxpejt ma je fariseo etz ma je yajcogüejtpi

⁹ Jesús ñimiydac je jäy ajcxy huidi ci'm ooy ñaygömayyii co ooy y'oyjäyity, etz pejxy yí jacjadyiibi jäy ajcxy, chi yajnimay ajcxy tüg jihuimbit ayuc:

¹⁰ —Mejtz jäy ajcxy ytigíy ma Dios ytíjc capxtacpi. Tüg hue' je' fariseojäy, e jadüg yajcogüejtpi. ¹¹ Chi je fariseojäy ytinay'ahuíy ycapxtägy, chachmina'ñ jadu'n: “Dios Teedy, Dioscojuyip yajnaxpich com co ca' ich nbocytuñich jadu'n nej jacjadyii jäy ypocytúnngixy, ca' nmeechich, ca' njibicjäyidyich, ca' nmigapxich huingjäy ytöxyjic, ca' nbocytuñich jadu'n nej jada yajcogüejtpi. ¹² Mejtz xii n'ityich jaygay tügpi semaan. Chi huen ytim ti nmíidich ngüejtpyich ma Dios majcjaty.” ¹³ Per je yajcogüejtpi jiguem ytinay'ahuíy, ni ycapät'ixy tzajpcijx, jéyi ycaachtzachcoxy ymíña'ñ: “Dios Teedy, pa'ayoogich, ich pocyjäyich.” ¹⁴ Ich miich ajcxy nimaayb co jada yajcogüejtpi y'idacy ma ytíjc ti anajty yajhuinmecxy ypocy, e je fariseojäy ca' yajpocyhuinmecxy. Huenpínity huidi ci'm naygömayipy, Dios yajtzöydunib; e pinjaty ca' ñaygömayyii ci'm, Dios ycömayib.

Jesús conucxy je pi'ctijc ajcxy

¹⁵ Chi jäy ajcxy míidmiñ pi'c'anäg ma Jesús huen nidoñyii. Co je' ydiscípulos ajcxy ijxy, chi ajcxy ogy undaj. ¹⁶ Chi Jesús yaaxi ymigügtíjc nimay ajcxy:

—Ixmatz, huen yí pi'ctijc xyñimiñich, ca' ajcxy mjijpcogapxiigyixy, com yí jäy ajcxy huídibi yajpatp ma Dios y'ané'mín, jadu'n ajcxy nipaady nej pi'ctijc. ¹⁷ Janch ich miich ajcxy nimäy co hueñypínity huidi ca' cöbijci yí Dios y'ayuc ytiy'ajt jadu'n nej yí pi'ctijc ajcxy cöbijcy Dios y'ayuc ytiy'ajt, ca' yí' ajcxy ytigíhuipy ma Dios y'ané'mín.

Tüg comeñ'anäg ymiydägy miid Jesús

¹⁸ Chi tüg micjäy y'amídooy Jesús, nimay:

—Miich oyjäybi Huindzin, ¿ti huaad nduñich co ich n'alma nídzoocín paadípy?

¹⁹ Chi Jesús y'adzooy:

—¿Nej co xytíjich oyjäy? Ni pin ya yca'oyjäyity, je'yí Dios tügpajc y'oyjäyity. ²⁰ Miich mnejhuíybi yí Dios ycötújcín. Ca' mmigapxtigoyipy huingbi töxyjäy, ca' jáyyaj'ögipy, ca' mmeedzip, ca' mmigüg ñihuambedipy, yajmij'at mdaj mdeedy.

²¹ Chi je' y'adzooy:

—Ti tüg'öciy nguydundäyich jada cötújcín maabi nyeecpidzimyich.

²² Co Jesús jadu'n mídooy, chi nimay:

—Tigoy'ijtni ja tüg huidi ca' mduñi. Toosta' tüg'óciy tijaty miich miid, e mo' je meeñ ayoohtijc, huin'it mgomeeñ'adipy jiiby tzajpjoty; miin, e pajamgich.

²³ Co je comeeñybi jadu'n ayuc midoy, chi ooy yjottigoygoty com ooy anajty ycomeeñity. ²⁴ Co Jesús ijxy co je comeeñybi anajty ti yjotmaybicy, chi minañ:

—Ooy chachchípity ytigihuípy tüg comeeñyjay ma Dios y'ané'min. ²⁵ Jac ca' chípity co ñaxipy tüg camello ma yi xu'ñ yxútity, ca'ydi co tüg comeeñyjay ytigihuípy ma Dios y'ané'min.

²⁶ Chi je jáy ajcxy anajty tiibi ajcxy midoogixy Jesús y'ayuc, yminaangixy:

—¿Pin jada' jébi y'alma paadipy nídzoocin?

²⁷ Chi Jesús y'adzooy:

—Huídibi naaxhuiñyjay ajcxy ca' jaty nej yaj'oyihuípy, Dios jébi yaj'oyíy.

²⁸ Chi Pedro yminañ:

—Ich ajcxy ti nbidägy n'ixmajtzaaygixy, co nbanicxaangixy.

²⁹⁻³⁰ Chi Jesús y'adzooy:

—Janch ich miich ajcxy nnimaaygixy co yíjay ajcxy huidi ytijc ixmajtz etz ytaj yteedy, ymiguéx, etz y'ung y'anäg miid Dios y'ané'min ycixpi, ypaadipy ajcxy ya naaxhuiñ nígi oy'ájtín, etz ypaadipy ajcxy tzajpjoty tzinaayin huidi ca' ycixipy ytigoyipy nimina.

Jesús capxypidzimy jadüg'oc co y'öga'ñ

³¹ Chi Jesús huodzon je nimajmetzpi, nimay ajcxy:

—Jadachambi tzoc jámim jim Jerusalén. Nguydunaamyich tüg'óciy jadu'n nej yi Dios y'ayucnajtzcaxiiby ajcxy jaybejty jecy'ajty miid ich ycixpi, ich, je jáy huidi tzoón tzajpjoty. ³² Chi nyajciyega'ñich ma je romano gobernador, xycamij'ixipy xycamijpidägibich ajcxy. Xy'ójibich xyhuindzújibich xyjijptzújibich ajcxy. ³³ Xyachaachtunipyich ajcxy, xyaj'ögibich ajcxy, e codugüg xii njugypigipyich jadüg'oc.

³⁴ Chi yi majmetzpi ajcxy ni jadu'ñyi ca' huinjihuüy ajcxy nej yhuimbídzimy Jesús y'ayuc. Yüch anajty jada ayuc miid yi' ajcxy ycixpi, paady ca' huinjihuüy nej anajty yajnimaaygixy.

Jesús yajhuindicxígy tüg huintzpi jim Jericó

³⁵ Chi jadu'n yjajti co Jesús mihuingoñ je cajp huidi yxii Jericó, chi tüg huintzpi anajty iñäy tüba'áy pijctzoy anajty limosna. ³⁶ Co midooy mayjay ñaxy, chi je' yajtiy:

—¿Pin yi' ñajxp?

³⁷ Chi ajcxy nimay co Jesús nazareno najxp. ³⁸ Huin'it je huintzpi mic yminañ:

—Jesús, David y'ap y'oc, ich pa'ayoog.

³⁹ Je jáy ajcxy huidi anajty jayíjp nicxp ooy ogy je huintzpi, nimay co huen amoñ. E je' nígi mic yminan'idích:

—David y'ap y'oc, ich pa'ayoog.

⁴⁰ Chi Jesús ytínayxijpy oy yajhuoyii. Co je' jim ymejch, chi amidoy, nimay:

⁴¹ —¿Ti mdzojcpy ndunipyich miid miich?

Chi je' y'adzooy:

—Huindzin, yajhuindicxíccich.

⁴² Chi Jesús minañ:

—Huindicxíg, yi mmibíjcin ti xyajtzögy.

⁴³ Chi je huintzpi mic'amy yhuin y'ixxígy, chi panicxy Jesús, chi ooy jäymejch cömay yi Dios. Cham tüg'óciy je cajp jáy co ajcxy jadu'n ijxy, ñañ ycömay yjäymejtz yi ajcxy Dios.

19

Jesús miid Zaqueo

¹ Co Jesús ytigíy jim Jericó, ñajxy cajpcujc anajty. ² Chi jadu'n yjajty jim anajty tüg jáy hue' anajty yxii Zaqueo. Hue' je' anajty yajcogüejtpi huindzin, e comeeñ anajty. ³ Ooy yi' anajty tzach'ixa'ñ Jesús, nejhuíhua'ñ pin jáy je', chi ca' jajty nej ixipy, je' co anajty

ñaxity, etz co anajty ooy mayjäy jim. ⁴ Chi je' ñicxy poyïgy jayijp, chi ypejty ma tüg sicómoro quipy, yco'ijxnaxa'ñ co anajty Jesús jim ñaxy. ⁵ Co Jesús jim ymejch, chi pät'ijxy je Zaqueo, e ñimay:

—Zaqueo, tzojc minac, com copicy co nicxy njättäga'ñich ma mdijc.

⁶ Chi je' yminajty janch jottigoy, e jotcuyc cöbijcy Jesús. ⁷ Co jadu'n ijxy, chi je mayjäy ajcxy nigapxy ni'ojiiygixy Jesús, ymïnaangixy:

—Ti ñicxy jättacpi ma tüg pocyjäy ytijc.

⁸ Chi Zaqueo ytinayïgy, ñimay Jesús:

—Huindzin Jesús, cha je' je njugy'ajtich huïdi cup nbijc-huäcxaamyich nmöhua'ñich ayoobitijc. Pen ti ñich nyajcujtñaxy, nyajhuimbidityich midax jadu'ñyi.

⁹ Chi Jesús ymïnañ:

—Jadachambi jada jäy ma jadyaabi tijc ti y'alma ñïdzögy, com co yi' nañ jadu'n Abraham y'ap'adyii y'oc'adyii. ¹⁰ Hich, je jäy huïdi tzoon tzajpjoty, ti nmiñich ya naaxhuiñ co n'ixtähuibich etz nyajñïdzögibich tiibi anajty ytigooy.

Je ijxpejt ma je majci meen

¹¹ Co je jäy ajcxy midooy jadu'n, chi Jesús jacyajñimay ajcxy tüg ayuc, com ytimymihuingónip anajty Jerusalén, etz je jäy ajcxy tzachhuinmaaygixy co Jesús mic'amy anajty pidäga'ñ y'ané'min. ¹² Chi Jesús ymïnañ:

—Tüg micjäy, comeeñjyäy anajty, ñicxy ma tüg naaxjot jiguembi, nicxy anajty ytungbicy co yrey'ada'ñ, e chi anajty yhuimbidaani. ¹³ Chi je micjäy mijhuooy nimajc ytumbi, chi moy ajcxy majc meen nidüg nidüg, chi ajcxy ñimay: “Meeñ yaj'ung'ajtcix ji ixti cooni ñich anajty nhuimbityich.” ¹⁴ Chi je ymigogajp ajcxy ca' anajty ixa'ñyii ajcxy je comeeñybi, chi ajcxy yajpaguejxy huingapxpi ma anajty je comeeñybi ñicxy, chi je huingapxpi ymïnañ: “Ca' ñich ajcxy ndzocy co jada comeeñjyäy rey'adipy ma ñich ajcxy.”

¹⁵ Chi jadu'n yjaty co je comeeñjyäy yhuimbijty ti anajty yreytigïy. Chi oy yajhuoyii je ytumbi ajcxy, je huïdi anajty je meen ti yajmihui'mgixy, nejhuïhua'ñ anajty jadu'ñi ti yaj'ung'ajtcixy je meen nidüg nidüg. ¹⁶ Chi tüg jayijp ymiñ ymïnañ: “Huindzin, yi meen majcjadu'ñi ti nyaj'ung'atyich.” ¹⁷ Chi je rey y'adzooy: “Ooy miich oy mduñ. Jadu'n nej ti mgapxcöbicy miid huïdi hueeni, cham m'ané'mipy majc ciudad.” ¹⁸ Chi je mimetzpi ymiñ, ymïnañ: “Huindzin, yi mmeen migoox jadu'ñyi ti nyaj'ung'atyich.” ¹⁹ Chi je rey ñimay je mimetzpi: “Cham m'ane'mipy migoox ciudad.” ²⁰⁻²¹ Chi je midugigpi ymiñ, ymïnañ: “Huindzin, cha je mmeen huïdi ti nmi'ityich, ti nyujpcicyich ma tüg paayi. Ndzigiiybich miich co miich mjäy'aty ahua'ñ, myajpidigtäy huïdi ca' mjé'adyii, nañ mdzicpy huïdi ca' ti mñipy.” ²² Chi je rey ymïnañ: “Miich jibic ti mduñ, cham ndiyduna'ñ miid mgi'm'ayuc ycixpi. Miich mnejhuiyb co nyajpidigyich huïdi ca' njé'adyiijich, e ndzicyich huïdi ca' ti nñibyich. ²³ ¿Nej co ca' ti mbidägy ñich mmeen ma je banco, jigix co ixypy nhuimbityich, may meen ixypy xycidigiyich miid meen'ung?” ²⁴ Chi je rey ñimay huïdi anajty ajcxy jimip: “Pijci ajcxy yi' ymeeñ, etz mooygixy yi' tiibi meen yaj'ung'aty majc jadu'ñyi.” ²⁵ Chi je jäy ajcxy y'adzooy: “Huindzin, ymiid yi' cham majc jadu'ñyi meen.” ²⁶ Chi je rey y'adzooy: “Ñich minam co tüg'óciy pinjaty miid, jacyajmöhuiip; e huïdi ca' ti miidity, oy jamiidity yajpijctähuiip huïdi ymiid. ²⁷ Nañ jadu'n ajcxy je nmizipich huïdi ca' anajty tzojccixy co ñich nrey'adipyich ma yi' ajcxy, yajmiingix ya, yo'cpujxtutaaygix ma ñich nhuinduu.”

Jesús ytigiiy Jerusalén

²⁸ Co Jesús jadu'n yminanday, chi choñ jim, ñicxy Jerusalén. Jesús jayijp anajty ytüyöy ma je mayjäy. ²⁹⁻³⁰ Jadu'n yjaty co jim yja'ty mihuingon Betfagé etz Betania ma je cop huïdi yxii Olivos, chi Jesús quejxy metz ydiscipulos, ñimay ajcxy:

—Ñicxcix ma yijibi cajp huïdi ji huingon. Co ajcxy mgajptugïhuiip mbáatcixipy tüg burro mang ycoxochity, huïdi ca' ni pin yaj'iñaayñi. Mgoguejtúutcixipy, etz

mmimíngixipy. ³¹ Pen jim pin xy'amidoogixy, ¿nej co yi burro mgoguejtüdy? Chi ajcxy jadu'n m'adzohuipy: “Je nhuindzinich jim tzojcp.”

³² Chi je' ajcxy ñicxy huidi Jesús yquejx. Chi ajcxy paty je burro jadu'n nej Jesús anajty ajcxy ti ñimäyí. ³³ Jim anajty ajcxy je burro mang coguejtuttcixy, co ñihuindzin ñimaayi ajcxy:

—¿Nej co yi burro mang mgoguejtuttcixy?

³⁴ Chi je' ajcxy y'adzooy:

—Je nhuindzinich jim tzojcp.

³⁵ Chi ajcxy huijtz miñ je burro ma Jesús. Chi ajcxy jibe'ñ miid yhuit, chi ajcxy Jesús yajburripejty. ³⁶ Co Jesús anajty ytüyöy, chi je mayjäy ajcxy yhuit yé'pcixy tügujx. ³⁷ Co ajcxy mihuingoñ je minac ma je cop huidi yxii Olivos, chi tüg'óciy je mayjäy yjotcugiyday, e ytiñiy ajcxy ooy alabanza ñibi Dios ojadajtpi miid je mij huinma'ñ ycixpi co anajty ti íjxcixy huidi anajty Jesús ti tuñ. ³⁸ Chachmíanaangixy:

—¿Capxpaady je rey huidi miimb miid Huindzin Dios yxii ycixpi! ¿Jotcuyc'ajt jilby tzajpjoty etz cömáyin ma Dios!

³⁹ Huin'it nijéjity fariseojäy huidi anajty ajcxy jilby jäy agujc nimay ajcxy je Jesús:

—Oj yi mjäy ajcxy.

⁴⁰ Chi Jesús y'adzooy:

—Hich miich ajcxy nimaayb pen yi' ajcxy amomb, yi tzaa tigihuiip mic capxp.

⁴¹ Co Jesús yja'ty jim mihuingon Jerusalén cajp, e co ijxy, chi yaaxy miid je cajpjäy ycixpi. ⁴² Chi Jesús ymíñañ:

—¿Pen mhuiñjihuñiyb ixipy miich ajcxy nej mbáatcixipy mjotcuyc'ájtín jadachambi xii tiempo! Yüch jada tiy'ajt cham ity ma miich ajcxy, ca' huaad m'íjxcixy. ⁴³ Minip je xii je tiempo ma miich ajcxy je mmidzip ajcxy xyajjüdügipy mgajp miid tzaamacxy, e tziptunipy ajcxy miid miich, yaxxon xyajco'adugipy ajcxy jühuidity ma je mgajp.

⁴⁴ Xyñigidaagoodip mdzaaboch ni'ung ni'anäg, ni ca' yhuí'mip tzaagop tzaamacxy, jadu'n yjadipy com miich ajcxy ca' mnejhuñy je tiempo mina je Dios xyñigidägy.

Jesús yajpidzimy je jibicjäydijc ma Dios ytijc

⁴⁵ Chi Jesús ytiñiy ma Dios ytijc yajpidzimday tüg'óciy jäy huidi anajty jilby ajuuyb adoocp. ⁴⁶ Chi Jesús nimay je jäy ajcxy:

—Jadu'n mína'ñ ma jaybétyity: “Hich ndijci tzajpcapxycapxtägi'ñ yi'.” E miich ajcxy hue' mhuaangixy jadu'n nej meetzpi y'ang.

⁴⁷ Jesús anajty yaj'ixpijc jabom jabom ma Dios ytijc, chi je teedy tungmiidpi, etz huidi ajcxy yaj'ixpijcp anajty Dios ñecy, etz mijjäydijc ajcxy nihuinmayiygixy co yaj'ögaangixy Jesús. ⁴⁸ Chi ajcxy ca' ni nej mihuinma'nybaty nej yaj'öccixy, com tüg'óciy jäy anajty ooy tzach'amidoo'ijt Jesús y'ayuc.

20

Jesús ycötújcín

¹ Chi jadu'n yjajty tüg xii anajty Jesús yaj'ixpicy je cajpjäy ma Dios ytijc, capxhuäcxy anajty oybi ayuc. Chi ñimiini je teedy tungmiidpi ajcxy etz huidi ajcxy yaj'ixpijc Dios ñecy etz mijjäydijc ajcxy. ² Chi ajcxy migapxy Jesús nimay:

—Yajñimaaygich, ¿ma cötújcín ti mbaady co jäy myaj'ixpicy ya ma Dios ytijc? ¿Pin je' tiñibi xycötujc möy?

³ Chi Jesús y'adzooy:

—Hich nañ jadu'n nyaj'amidohuamy ich miich ajcxy tüg ayuc, e m'adzóogixip. ⁴ Co Juan (je Bautista) jäy yajñibejty, ¿pin je' cötújcín moy, je Dios tzajpjoty o jäy ajcxy?

⁵ Chi ajcxy ytiñiy huinmay'ahuidijtpi ñayñimáayigixy miñ xyipy:

—Pen mínaaním co tzajpjoty choñ je Juan ycötújcín, Jesús xyñimaayimip ya: “¿Nej co ca' miich ajcxy mijpidacy yi' y'ayuc?” ⁶ Pen mínaaním ajt co jäy cötújcín moy je

Juan, chi tüg'óciy cajpjäy tzojc xycögädzim, com ymibijcipy ajcxy co yi Juan, Dios yi' y'ayucnajtzcaxiibi.

⁷ Chi ajcxy y'adzooy co ca' ajcxy nejhuiyigixy pin Juan ti quexyii. ⁸ Chi Jesús nimay je' ajcxy:

—Ich nañ jadu'n ca' nigapxa'ñich pin ti xycötujcmöyich.

Je ijsxpejt ma je tumbidijc ajcxy jibicjäybi

⁹ Chi Jesús yminandacy yajnimay tüg'óciy je jäy ajcxy tüg ayuc, yminañ:

—Tüg jäy pidacy tüg camuuxy ycam, chi yajpijctzoy ytumbidijc, co anajty chona'ñ ñicxa'ñ jiguem jecy jecy. ¹⁰ Co cosecha paty, chi quejxy tüg ytumbi ma je ytumbidijc, huen cämöyii huidibi je' anajty paatip. Chi je ytumbidijc huinhuojpy jijphuojpy je quejxyöybi yajhuimbijty ca' ni ti mooy. ¹¹ Chi huingbi ytumbi quejxy, nañ jadu'n ajcxy je' tuñ, huin'o'y jip'o'y ajcxy, yajhuimbijty ajcxy, ca' ajcxy ni ti mooy. ¹² Chi midugiigpi ytumbi quejxy, nañ jadu'n ajcxy je' yajtzaachiib etz yajhuimbijty ajcxy.

¹³ Huin'it je camuuxycam huindzin yminañ: “¿Ti nduniyich? Ocquejxyich nmang huidibi ooy ndzocyich. Ca' jécyity co ajcxy ixipy nmangich, yajmij'adipy ajcxy.” ¹⁴ Chi je ytumbidijc co ajcxy ixy je' yhuindzin ymang, chi ajcxy huinmaygoty nayñimáayigixy miñ xyipy: “Ti ymiñ je cogam ymang, yi' je' jada cam jëdaanip. Tzoc yaj'o'cim jigix ich ajt jada cam një'ajtim.” ¹⁵ Chi ajcxy je cogam ymang yajpidzimi camjoty, chi ajcxy yaj'o'cy.

Chi Jesús y'amidooy:

—¿Ti jada' ytunipy je cam huindzin? ¹⁶ Minip je', miñ yajtigoydäy je ytumbidijc ajcxy, e chi je' je ycam yegipy miid huingbi tumbi.

Co je jäy ajcxy jadu'n midoy, chi ajcxy yminañ:

—Ni catzogipy Dios, nicxy jadu'n njajtim.

¹⁷ Chi Jesús huindixpejty je mayjäy nimay ajcxy:

—¿Ti tijamy huidi yjaybétyip ma Dios ñecy?

Jadu'n:

Je yëdijc huidi je jäy ajcxy ca' anajty tzocy, ti Dios pidacy mij'ane'mbi. Tim jadu'n nipaady nejhuiy je tzaa oyjatypi huidibi je pojtzpidijc ajcxy ca' yajtuna'ñ, je' oy ti yhui'mni ma anajty yjaccopicyity.

¹⁸ Pinjaty ca' cöbiga'ñ jada mij'ane'mbi, ayo'n ypadamy, tim jadu'n nipaady nej jihuüy jim ycijxciday ma je tzaa ñicx e tijhuütz yajtähuipy; e pen je tzaa nigidagoty, je' ajcxy janch jaam pux nicxy yajtcixy.

Yajnidiiygixy pen jëbi cogüéjtin yajyecy o pen ca'

¹⁹ Je teedy tungmiidpi etz huidi ajcxy yaj'ixpijc Dios ñecy ooy anajty nihuinmayiygixy madzaangixy je Jesús mic'amy, co ajcxy huinjihuüy co Jesús nimiydáacigixy miid je jihuibit ayuc, e chigiyb anajty ajcxy je cajp jäy. ²⁰ Chi ajcxy chachhuinma'ñ'ixtaaygixy nej huaad xigixy Jesús, chi quejxy ajcxy ixl'ijtpi ma Jesús yajpaady huidi naybidaacip janch ypaat tudägyjäy; chi amidoo'ijtcixy Jesús y'ayuc huidi miid xihuaangixy, chi cüyegaangixy ma je gobernador. ²¹ Chi je ixl'ijtpi ajcxy y'amidooy Jesús nimay ajcxy:

—Huindzin, nejhuiyb ich ajcxy co miich m'ayuc ooy y'óyity, etz myaj'ixpicy yajxon, ca' huin'ixpety jäy myaj'ixpicy, etz myaj'ixpicy Dios ytiy'ajt nej jäy jëbi huaad chinaaygixy. ²² ¿Nej copicy ich ajcxy migüedipy je César je romanojäy mij'ane'mbi, o ca'iji?

²³ Chi Jesús huinjihuüy yi' ajcxy yjibic-huinma'ñ, paady ajcxy nimay:

—¿Ti co miich ajcxy xyjot'ixy xyhuinma'ñ'ixyich? ²⁴ Yaj'ijxcich tüg meeñ. ¿Pin y'ahuinax etz pin yxii mimb ma jada meeñ?

Chi ajcxy y'adzooy:

—Yi César.

²⁵ Chi Jesús nimay ajcxy:

—Cuet ma César huidi César paatip, e ma Dios huidi Dios paatip.

²⁶ Ca' mimadacy ajcxy nej tzu'ljxcixy ma mayjäy yhuinduu. Chi ajcxy ooy huinmaay jadu'n nej anajty Jesús ti y'adzóohuigixy, chi ajcxy amoñyi.

Yajnidiiygixy je jugy'ájtín ycixpi

²⁷ Chi ñija'tti Jesús tüg saduceojäy, e yi saduceojäy ajcxy yminañ co jäy ögy ca' y'ocjuyucni. Chi je' yajtiy:

²⁸ —Huindzin, Moisés jaybety ma yi' ñecy, je jécyip, co tüg yéydijc ytöxyjic yajhui'my ix'ögp, e ca' ymang ti paatcixy. Jébi je yéydijc y'uch miidtzinay je töxyjäy jaydëbi yaj'ung'ixip miid y'ajch ycixpi. ²⁹ Jadu'n anajty tügpicy jäy, nihiuxtujc ajcxy ytügquëx'ájtixy, ac yéydijc ajcxy. Je mijpi miidtzinay töxyjäy, chi ix'o'cy, e ca' ymang paty. ³⁰ Chi je mimetzpi ypijcy miid je töxyjäy, e ni ca' ajcxy ung paty. ³¹ Chi je midugügpi ypijcy miid je töxyjäy, e jadu'n je nihiuxtujcpi miidtzinay ajcxy je töxyjäy, ix'o'cy ajcxy, ni ca' ajcxy ung paty. ³² Chi nañ jadu'n je töxyjäy y'ögni. ³³ Co anajty je nihiuxtujcpi jugypijccixy, ¿huidi jada' octöxijc'adiyb je töxyjäy? Com nihiuxtujc ajcxy ti töxyjic'ájtigixy.

³⁴ Chi Jesús y'adzooy:

—Jadachambi jäy píjccixp, ñaymooyigixy y'ung huen píjccixy. ³⁵ Je jäy ajcxy huidibi paatip anajty chinähuiip ma je tiempo huidi mimb co ögpi yjugypíjccixipy, ni ca' ajcxy ypijipy, ni ca' ajcxy ñaymóoyigixipy y'ung huen píjccixy. ³⁶ Co jäy ajcxy yjugypicy, chi ca' huaad y'ögcixy jadüg'oc, quipxyjaty ajcxy miid je ángeles ajcxy, e Dios yi' ajcxy ung'adiib co yjugypíjccixipy miid jemybi jugy'ájtín. ³⁷ Janch co yi' ögpi yjugypíjccixipy, jébi mbaadip je tiy'ajt ma Moisés ñecy ma jadu'n yjaybétyity, je taab anajty aay'ujtz ytoy, co je Huindzin Dios migapxy Moisés, nimay: “Íich Abraham yDios, Isaac yDios, Jacob yDios.” ³⁸ Je ögpi ca' miidty Dios. Je jäy ajcxy huidi juugyip janchtiy ajcxy ymiid Dios, com co miid Dios ycixpi tüg'óciy jäy ajcxy ymiid yjugy'ajt.

³⁹ Chi jäy ajcxy huidi yaj'ixpijcp Dios ñecy nimay Jesús:

—Oy ti m'adzoy, Huindzin.

⁴⁰ Ca' ajcxy ocjajtni nej jac nimáaygixipy.

Pin je' y'ung je Cristo

⁴¹ Chi Jesús je' ajcxy nimay:

—¿Nej co miich ajcxy mina'ñ co Cristo David y'ap y'oc? ⁴² David ci'm mina'ñ ma je Salmo necy:

Yi Huindzin Dios nimay íich nHuindzin: “Íña' ya a'oy'amy ma íich.

⁴³ Ixti cooni anajty miich mmidzip ti nmimadactäyich, jadu'n nej jihuüy ti nbidägyich yi mmidzip ma miich mdecypocxpejt.”

⁴⁴ Co David yxiimoy Cristo íich nHuindzin, ¿nejtz yi' co y'ap'adyii y'oc'adyii?

Jesús xiy je escribas ajcxy

⁴⁵ Chi tüg'óciy cajpjäy jim anajty y'amido'ijtcixy co Jesús nimay je' ydiscípulos ajcxy:

⁴⁶ —Naygüend'ájtigix miid yi' escribas ajcxy ydiscípulos, co ajcxy ooy tzojccixy yhuididaangixy miid yhuít oyjatypi, ooy ajcxy tzojccixy co huen capxocxyii ma jäy y'amugiy, e ooy ajcxy tzojccixy yi cödumbi ñaybejt ma naymujctac, etz ooy ajcxy tzojccixy cödumbi ñaybejt ma jäy ajcxy yxiidungixy. ⁴⁷ Chi ajcxy yajcijxtayí yi co'ögytöxyjäy ypidägy, e tungixy ooy jecy tzajpcapxycapxi ma jäy yhuinduu. Yi jadu'mbi jäy ajcxy nigí ajcxy Dios chaachytuníyb miid ypocy ycixpi ca'ydi jacipin.

21

Je ayoo bitöxyjäy co'ögyi y'ofrenda

¹ Jiiby anajty Jesús ma Dios ytijc co ijxy comeñyjäy may'amy ofrenda pidaaccixy ma meeñygaax. ² E nañ ijxy co tüg co'ögytöxyjäy pidägy anajty metz pi'cmeñ. ³ Chi Jesús yminañ:

—Janch ñich miich ajcxy nimäy co jadyaabi co'ögytöxyjäy ayoob jac anaxy jada, ti pidägy ofrenda ca'ydi jacnipin. ⁴ Tüg'óciy comeeñydiç ajcxy ypidacy ma ofrenda je meeñ huidi conajxp. Jadyaabi co'ögytöxyjäy ti pidägy huidi anajty ñigayamy.

Jesús yminañ co je Dios ytijc yhuindigoya'ñ

⁵ Nijëjity jäy co ytigiiy ma Dios ytijc nimiydacy ajcxy co Dios ytijc ooy chach'oy'oydúñity miid tzaa oyjatpyi, e miid tiibi jilby yojxcixy. Chi Jesús yminañ:

⁶ —Tüg'óciy jada huidi ajcxy m'ijxpy ma Dios ytijc, minip xii tiempo mina jada nicxy yhui'my taj xit jada tzaa, ca' ma pochycop.

Je tiy'ajt ma ca'ni naaxhuiñybi ycixa'ñi ytigoya'ñi

⁷ Chi ajcxy y'amidooy Jesús:

—Huindzin, ¿mina jada jadu'n ytuniiyb yjadiiyb nej miich ti mminañ? ¿Ti tiy'ajt ji yaj'ixip co jada anajty jadu'n ytuna'ñyii yjada'ñyii?

⁸ Chi Jesús y'adzooy:

—Ix mgayajhuin'iiingix. Ooy mayjäy ymina'ñ ñaybidägáanigixy co je' ajcxy je Cristo, ymina'ñ ajcxy: “Ñich je' je Cristo; huingóniñ anajty je xii je tiempo mina je naaxhuiñybi ycixa'ñ ytigoya'ñ.” Ca' ajcxy axam mbanicxipy. ⁹ Co miich ajcxy ayuc midohuipy co jäy chachchiptungixy, e ñayñibidicigixy, ca' mdzigiiygixipy, com ooy ycopícyity co jada jadu'n jayjip ytuniiyb yjadiiyb, ca'nan hue' je' anajty tim cijxp tim tigooyb (je naaxhuiñybi).

¹⁰ Chi Jesús yjacminañ:

—Nayñibidägiib naax cajp miid huingbi naax huingbi cajp. ¹¹ E minip mic'ujx, etz mij yuu mij pa'm xii yaa. E jadiib mij'adzigi'ñ, etz ooy ijxpejt huidi quëxigip tzajpcixy.

¹² Ma ca'ni anajty jadu'n jadyii, xypahuidijtcótcixipy jäy, xymájtzcixipy, xyciyéjcixipy ma judíojäy ñaymujctac. Chi jäy ajcxy xypidägiipy pujxtigoty, xyajnicxcixipy mach ma rey etz ma gobernador ajcxy yhuinduu. Jadu'n jäy ajcxy jibic xytunipy miid miich ajcxy com co anajty ti xymijpidáaccixyich. ¹³ Miich ajcxy tiy'ajt myegipy miid ñich nxii ycixpi. ¹⁴ Co jäy ajcxy yxihuipy ma codungdiç, ca' ni nej ajcxy mjot'adiiyb, ni ca' ajcxy mhuinmayipy nej m'adzóogixipy. ¹⁵ Nyegipyich ayuc etz tiy'ajt nej huaad mmidzip m'adzoogixy. Ca' mmidzip ajcxy jadiipy nej xy'adzóogixipy, e nej xyjacxigixipy. ¹⁶ Miich ajcxy mgi'mdeedy, mgi'm'uch, mgi'm'ajch, etz mgi'm ajuugy amigüg xyciyéjcixipy ma cötujctac. Nijëjity miich ajcxy m'ögipy miid co anajty ti mmijpidaaccixy ñich n'ayuc. ¹⁷ Mayjäy ajcxy ca' xy'ixaanipy xychogaanipy miid co anajty ti mmijpidaaccixy ñich nxii. ¹⁸ Ni tüg miich ajcxy mgöhuay ca' ytigoyipy. ¹⁹ Pen ooy ajcxy mmecxtucy, chi m'alma ñidzögipy huinixii.

²⁰ Co ajcxy m'ixipy Jerusalén anajty ti ñaducy miid ymidzip, huin'it ajcxy mnejhuñhuipy co huingon je'anajty ma yhuindigoyaani. ²¹ Huin'it tiempo je jäy ajcxy huidi jim Judea naaxjot yqueéccixipy ñicxcixipy ajcxy yuugjoty, etz je jäy ajcxy huidi jim Jerusalén queegipy ajcxy, etz je jäy ajcxy huidi camjoty ca' huaad y'ocajptigiiyñi ma je Jerusalén cajp. ²² Je tiempo mina yjadiiyb ayo'n miid co anajty judío jäy ti ytundigooygixy, je' jada yajcuydundaayb jadu'n nej yjaaybétyity ma Dios ñecy. ²³ ¡Ayoob yi töxyjäy ajcxy huidi anajty ung tzm'ijtp huin'it xii, etz huidi anajty miid y'ungma'xung! Ooy jadiib mij ayo'n ya naaxhuin etz tzip éjcin ma jada cajp. ²⁴ Nijëjity ajcxy y'ögipy tzijoty, e nijëjity yajnicxip tzumy mach ma huingbi cajp huingbi naax. E Jerusalén naxmihuägydähuiib yi jäy huidi ca' yjudiojäyity, minipy je tiempo mina anajty Dios yajcixaani yajtigoyaani yi' ajcxy y'ané'min.

*Nejjada' ymini*py je Dios y'ung

²⁵ Huin'it xii huin'it tiempo quëxigip ijxpejt ma xii po' etz ma yi madza', ya naaxhuñ ooy jäy ajcxy jotmay mi'idipy. Je jäy ajcxy ooy chigihuipy yjihuihuipy yhuinmay'ahuiddipy ajcxy ooy, miid je mejy ycixpi co anajty chachpidigü chachnögy

chachmina'n. ²⁶ Yi jäy ajcxy anucxi'nñ yajcidahuib co anajty ajcxy icy nej yjadyii huindu'mybi naaxhuiñ; e huudijaty mic'ajt yajpatp jiiby tzajpjoty yücxtähuipy yi'. ²⁷ Huin'it miich ajcxy xy'ixipyich, iich je jäy huudi tzoon tzajpjoty, nmiiñich jocjoty miid je nmic'ajtich, nmiiñich miid iich ngötújcín etz iich n'oy'ájtín mijpi. ²⁸ Co je ayo'n tiempo jadu'n yjatzondägipy, chi mba't'íjxcixipy com huingtoniñ anajty mina Dios xyñihuángixipy xycohuángixipy.

²⁹ Chi Jesús yajnimay ajcxy tüg ayuc, yminañ:

—Ijxcix yi higueri etz tüg'óciy quipy, ³⁰ co yhuamigy huin'it miich ajcxy nejhuiy co ti yhuingtoni mina ypottigiñi. ³¹ Tim jadu'n nej miich ajcxy ijxpejt mbicy ma higueri quipy co pottitempo ytigiñi, nañ jadu'n co miich ajcxy m'ixipy je ijxpejt tzajpcíxy jadu'n nej yam nyajnimaaigy, mnejhuihuipy ajcxy co huingónip je tiempo mina Dios y'ane'mañ ya naaxhuiñ.

³² Janch nimaaybich miich ajcxy co jadu'n yjadiyb ytuniyb jayijp, ca' anajty o'ctäy je jäy ajcxy huudibi tzinaayb jugy'ájticy jadachambi xii tiempo. ³³ Yi tzajp etz naaxhuiñybi naxip tigoyip yi'. iich n'ayuc ca' ñaxipy ytigoyipy ni camina.

³⁴ Naygüend'ájtigix miich ajcxy ca' mnijot'ájticy yi jocniñ yi mügii, etz yi tzinaayin jugy'ájtín, jigix ca' ajcxy xyniminipy jotcömoñyi je ayo'n xii je ayo'n tiempo. ³⁵ Timetiini minipy je ayo'n tiempo miid jäy ajcxy ycixpi huudi ya tzinaayb ma tüg'óciy naaxhuiñybi. Tim jadu'n nej tüg iyujc ayo'nbaady co timetiini yajtüxuuch. ³⁶ Ni'ixi' ijtcix, mibijctzoogix Dios, ca'ydi ayo'n ajcxy mbaatcixy huudi jadaanip, jigix jiiby myajpaatcixipy tzajpjoty ma iich nhuinduu, iich, je jäy huudi tzoon tzajpjoty.

³⁷ Xiiñ anajty Jesús yaj'ixpicy ma Dios ytijc, e coodz anajty chooñ ñicxy jim ma cögop huudi yxii Olivos. ³⁸ Jabom jabom jopy jopy ñiminyii tüg'óciy cajpjäy jiiby ma Dios ytijc tibäy co y'amidoo'idaani ajcxy Jesús y'ayuc.

22

Xiicyögyixy capxyögyixy nej huaad Jesús májtzcixy

¹ Huington anajty je xii mina jäy tzajcaagy caagyixy huudi ca' ylevadura miidity, huudi jäy ytijpy pascua xii. ² Chi je teedy mijtungmiidpi etz je escribas yhuinma'n'ixtaagyixy nej ajcxy ocyaj'ögipy Jesús. Chigiiyb anajty ajcxy je cajpjäy.

³ Chi je mujcu' ytigiñy ma Judas yjot yhuinma'n. Je Judas hue' anajty ymimetz xii Iscariote, je' nidügti je majmetzpi discípulos. ⁴ Chi Judas ñicxy oy migapxy je teedy mijtungmiidpi etz tzajptijc soldado huindzin, e ycapxytuñ miid je' ajcxy nej jébi cïyecy Jesús. ⁵ Huin'it je Jesús ymidzip ooy ajcxy yxoondaccottay. Chi ajcxy ñaygapxi co meeñ möhuangixy je Judas. ⁶ Chi Judas cöbijcy je meeñ, chi yhuinma'n'ixtay nej jébi cïyegipy Jesús ma ca'p mayjäy y'ixyii yhuindixxyii.

Je huindzin Dios y'adzu'ájtín

⁷ Chi paty je xii mina jäy cay je tzajcaagy huudi ca' ylevadura miidity com huin'it anajty ajcxy yaj'ögy cöbixy ymang pascua xiigixp. ⁸ Chi Jesús quejxy Pedro etz Juan, nimay:

—Ñicx miich ajcxy yaj'oyi' je pascua adzu'ibi, jaydëbi ajt ngaayim.

⁹ Chi ajcxy y'amidooy:

—¿Ma mdzocy co nyaj'oyihuibich ajcxy?

¹⁰ Chi Jesús yminañ:

—Co mdigihuipy ajcxy cajpjoty, mbaadipy tüg yëydijc huudi yajnicxp tüg majt nii. Mbanicxyp ajcxy je yëydijc cooni yjadipy ma ytijc. ¹¹ Co miich ajcxy mjädipy ma je jäy ytijc, chi ajcxy mnimahuipy je codijc: “Nhuindzinich jadu'n minaam: ¿Ma yaj'ahuadz yajpaady ma ngayipyich je pascua adzu'ibi miid iich ndiscípulotijci?” ¹² Je codijc miich ajcxy xyajni'ixihuip tüg cuarto ma mimejtzpi piso. Ni'ixi' jim je adzu'ibi. ¹³ Chi Pedro etz Juan ñicxy, chi paty jadu'n nej anajty ti ñimäyii, e jim ajcxy ni'ixiñy je pascua caayin uucín.

¹⁴ Co je hora paty, chi Jesús y'ixtacy ma je mesa miid je' ydiscípulos ajcxy. ¹⁵ Chi Jesús yminañ:

—Ti ooy nijot'atyich co nmiidgayaangixy jada pascua adzu'ibi ma ca'ni n'ögyñich. ¹⁶ Hich miich ajcxy jadu'n nimaayb co hich ni mina ca' njaccayipyich jadüg'oc je pascua adzu'ibi, ixti cooni yajcuydundähuiipy je pascua xii ytiy'ajt ma Dios y'ané'min.

¹⁷ Chi Jesús conigy je ügy co Dioscojúyip yajnaxy, huin'it yminañ:

—Uccix jada ügy, naymóoyigixy miich ajcxy. ¹⁸ Cham hich miich ajcxy nimäy co jadu'n nej yjacnicxa'ñ xii tiempo ca' vino nii üga'ñich ixti cooni Dios y'ané'min yminipy ya naaxhuiñ.

¹⁹ Nañ yconigy Jesús tüg tzajcaagy co mibijctzooy Dios, huin'it tujc-huácxy moy discípulos ajcxy, e chi ajcxy nimay:

—Jada tzajcaagy hich nnin'icx'ajtpyich huidi ngiyejcpyich ma yi o'cin miid miich ajcxy mbocy ycixpi. Jada ijpajt miich ajcxy miid'idipy oy jäymech miid hich ycixpi.

²⁰ Co anajty ti ycaйдаaygixy, chi Jesús conigy je ügy jadüg'oc, chi yminañ:

—Jada vino je' jada Dios y'ayuc ytiy'ajt jemybi jadu'n yi' nej hich nni'py huidi tamam yogam miid miich ajcxy ycixpi.

²¹ Jadachambi yi jäy huidi xyciyegaambich ma nmidzipich, ya je' cham miid'iñäyich ma jada mesa. ²² Janch jadu'n njada'ñ n'ayoohua'ñich jadu'n nej ti nyajnidogügyiijich. ¡Ayo'n padamy je jäy ayoob huidi xyciyegaamyich ma nmidzipich!

²³ Chi je nimajmetzpi ajcxy ñayñimaayi miñ xyipy:

—¿Pin jada' yi' ma hich ajt huidi jadu'n tundigoyam?

Yajcapxcójcixy pin jada' jacnigi ymijity

²⁴ Chi je nimajmetzpi huidi Jesús anajty ti huin'ixy ca' ajcxy ñay'ayuc-huinjihuiiyi pin jada' jac mijpi oc'idipy. ²⁵ Chi Jesús nimay ajcxy:

—Yi reyes ajcxy y'ane'myb ajcxy naax cajp jadu'n nej tüg huindzin, yi' ajcxy huidibi ane'mb yajtjycixy co ooy oytuungixy. ²⁶ Miid miich ajcxy ca'ydi yjadú'nity. Hue' janchtiy je mijpi ma miich ajcxy huen ñaybidägyii nej jihuiy ymútzity. E je huidi nigohuajc'ajtp huen ñaybidägyii nej jihuiy je' je' je tumbi. ²⁷ ¿Pin je' jacmijip? ¿Huidi iñaybi ma mesa, o huidi ni'ixiyyb a'ixiyyb caayin uucin? Yi' je' jacmijip huidi iñayb ma mesa. Per hich ijtpich miid miich ajcxy jadu'n nej huidi ni'ixiyyb aa'ixiyyb caayin uucin.

²⁸ Miich ajcxy ti m'ijtcixy miid hich ma anajty ayo'n ti nyajnaxyich. ²⁹ Paady hich miich ajcxy tüg ané'min nmooyb, jadu'n nej hich ndeedy ti xymöyich. ³⁰ Jaydëbi miich ajcxy mgáaygixipy m'uuccixipy ma hich nmesa jibby ma hich n'ané'min e m'iñähuiipy ajcxy ma je ane'mdac, e mdiydúngixipy m'ané'mgixipy je nimajmetz picy Israel ñaax ycajp.

Jesús capxpídzimy co Pedro ymina'na'ñ co ca'p Jesús ix'y'adyii

³¹ Nañ jadu'n je huindzin Jesús yminañ:

—Simón, Simón, jadachambi je mujcu' xyjot'ixaangixy xyhuinma'ñ'ixaangixy jadu'n nej jäy trigo huimbojy co yajhuätzaangixy. ³² Per hich Dios nmibijctzooyich miid miich ycixpi, jigix miich ca'ydi mmibijcin ytigoy'ity. Mina anajty miich ti mjothuimbity, jotmic migápxipy yi mmigügtijc ajcxy.

³³ Chi Pedro yminañ:

—Huindzin, jotcujc hich nnicxa'ñich miid miich oy pujxtigotyity, etz oy ndimy'ögibich miid miich.

³⁴ Huin'it Jesús nimay Pedro:

—hich miich nimaayb co ca'ni anajty tzey yaxigy jabom jopy co miich miná'nip tugiig'oc co miich ca' xy'ix'adyiijich.

Huingomb hori ma Jesús y'ocyaj'ijxmadza'ñ

³⁵ Chi Jesús nimay ydiscípulos ajcxy:

—Co ñich miich ajcxy jayhuin nguejxy, ni mmoral, ni ca' mmeenydijc, ni mgig ti mmi'oygixy, ¿nej myajtigoy'ijt ajcxy ti jatyi?

Chi ajcxy y'adzooy:

—Ni ti.

³⁶ Chi Jesús yminañ:

—Jadachambi pin ymeeñydijc etz ymorrall miid, huen minicx; nañ pin ca' miidty y'espada, huen toogy yjocx huit, chi juyipy y'espada. ³⁷ ñich miich ajcxy nimaayb co copicy jada yajcuydunipy huidibi mimb jaybety miid ñich ycixpi ma Dios ñecy ma jadu'n yminañ: “Yaj'amichomujc (je Cristo) miid yi' ajcxy huidi jibicjäyip.” Tüg'óciy mimb jaybéty ma Dios ñecy miid ñich ycixpi, yajcuydunipy yi'.

³⁸ Chi Jesús ydiscípulos ajcxy yminañ:

—Huindzin, cha metz espada.

Chi Jesús y'adzooy:

—Huen miid yi'yi.

Jesús Dios mibijctzoy jim Getsemani

³⁹ Chi Jesús jim choñ ñicxy ma je cop huidi yxii Olivos, com jim anajty nicxy coodz coodz, chi je' ydiscípulos ajcxy ypanicxi. ⁴⁰ Co ajcxy yja'ty ma je cop, chi Jesús yminañ:

—Mibijctzoogix Dios huen xypubedipy xypudigihuiipy ajcxy ca'ydí mdigiiygixy jibic tuum.

⁴¹ Chi Jesús huinhuäctuty je discípulos ajcxy tüg tzaagäch yjiguëgyity, chi ycoxtinay'ahuuiy ytigiiy Dios mibijctzoob. ⁴² Chi Jesús yminañ:

—Dios Teedy, pen miich m'a'ixiiyb píjicigich jada tzaachypi, ca' ñich huaad nyaj-naxyich, per ca' ñich huaad ngi'mdzójcin nguyduñich, miich mdzójcin huen myajcuyduñ.

⁴³ Chi ñayguëxici tüg ángel tzajpjoty choñ, jotmic migapxy je Jesús. ⁴⁴ Yam anajty Jesús ooy ytaj ymay, chi Dios mibijctzooyb jacmictägy. E je yxibitnií ypidzimy janch jadu'n yi' anajty nej ni'py janch mijjaty y'ocnajtza'cxiiyñi.

⁴⁵ Co ypidigy ma anajty Dios mibijctzoy, chi nihuimbijty je' ydiscípulos ajcxy, chi oy paatcixy maab anajty ajcxy miid jotmay. ⁴⁶ Chi Jesús nimay ymigügtijc ajcxy:

—¿Ti co mdzachmaagixy? Pidicicix mibijctzoogix Dios, ca'ydí jibic tuum mdigiiygixy.

Yajnicxcixy mach je Jesús

⁴⁷ Jim Jesús anajty ymigügtijc ajcxy miidcapxy miidmiydägy, co je mayjäy oy yjäty. Jayjip anajty ymiñ je huidi anajty xiiñip Judas, yi' je'anajty nidügti ma je nimajmetzpi Jesús ydiscípulos ajcxy. Chi Judas mihuingoñ Jesús co anajty tzücxan. ⁴⁸ Chi Jesús yminañ:

—Judas, ¿nej miid tüg tzücxin mgiiyecy ma ymidzip, je jäy huidi tsoon tzajpjotyí?

⁴⁹ E je' ajcxy huidi anajty Jesús ymiid, co ajcxy ijxy jadu'n nej ytuñyí yjadyí, chi ajcxy yminañ:

—Huindzin, ¿tzoc ajt mihuimbijtim?

⁵⁰ Chi nidüg je' ajcxy yajtzaachiiyi je teedy mijtungmiidpi tüg ytumbi, quejtzpujxi tüg ytätz'ac a'oy'amybi. ⁵¹ Huin'it Jesús yminañ:

—Ixmajtcix, huen jadu'ñyi.

Chi nidoni je jäy ytätz'ac, e jadu'n yajtzoocy. ⁵² Chi Jesús nimay ajcxy huidi nimiini, yi teedy tungmiidpi ajcxy, yi Dios ytijc policia huindzin etz mijjäydijc:

—¿Nej co xyñimíngixyich miid pujx etz mguipyjijpxu'ñ jadu'n nej jihuüy ñich tüg meetzpi? ⁵³ Jiiby ñich anajty jabom jabom ma Dios ytijc, e ca' miich ajcxy ti ti mduñ miid ñich. Per cham jëdu'n je tiempo mina miich ajcxy xy'ane'myich etz je jibicpi xymimadägyich.

Pedro yminañ co ca' ix'y'adyí Jesús

⁵⁴ Chi ajcxy majch je Jesús, yajnicxy ajcxy, e pidacy ma teedy mijtungmiidpi ytijc. Je Pedro jiguëgyjihui' anajty ypanicxyii. ⁵⁵ Jim ajcxy jin yajmiiy tibatujc chi ajcxy

y'ixtactay nidüg'óciy. Pedro y'ixtacy nañ jadu'n ma je jäy ajcxy. ⁵⁶ Huin'it tüg pödumbi ijxy Pedro iñäy ma jümba', chi huindicxpejty nimay:

—Jada yëydijc nañ ymiid anajty Jesús.

⁵⁷ Chi Pedro ca' cöbijcy, yminañ:

—Töxyjäy, ca' iich yi' n'ixy'adyii.

⁵⁸ Nañ jahueengi huin'it jadüg jäy Pedro yhuindicxpejti, ñimaayi:

—Miich, yi Jesús ajcxy anajty miid m'ity.

Chi Pedro yminañ:

—Ca' n'iichity.

⁵⁹ Ti anajty tüg hori ninaxni co oy huingbi yminandägy:

—Janch co jada yëydijc yi' anajty miid y'ity Jesús. Com nañ galileojäy yi'.

⁶⁰ Chi Pedro yminañ:

—Ca' iich nhuinjihuüy nej miich mmina'ñ.

Capxni anajty je Pedro co tzey oy yaaxigy. ⁶¹ Chi je Huindzin Jesús ni'ijxhuimbijty je Pedro. Huin'it Pedro jäymetzcootti je' ayuc nej anajty yHuindzin Jesús ti ñimäyüi: “Ni ca'ni anajty tzey yaaxigy cham coodz co miich tugiig'oc xycoyüdzibyich.” ⁶² Chi Pedro ypidzimy tibäy, oy jiiby yäxy miid tájin máyin.

Nixiiccixy yajxiiccixy yi Jesús

⁶³ Je jäy ajcxy huidi anajty Jesús cuend'ajtp, ooy ajcxy nixiicy niyaaxy, etz nañ ooy ajcxy huingojxy jipcojxy. ⁶⁴ Chi ajcxy huiingoxodziy, e cojxy ajcxy ma yhuiñyijp, ñimaaygixy:

—Octiygapx, ¿pin ti xycoxy?

⁶⁵ E ooy anajty miid yjibic ayuc cixy cuety ñimaaygixy.

Jesús mijjuntajoty yajpaady

⁶⁶ Co yxiimiüy, chi yöymujcy yi teedy mijtungmiidpi ajcxy, yi mijjäydijc ajcxy, etz yi escribas ajcxy, chi ajcxy y'amidooy:

⁶⁷ —Ñimaaygich ajcxy ¿nej miich je' je Cristo?

Chi Jesús y'adzooy:

—Co ixypy nnigapxich, ca' miich ajcxy mibigipy. ⁶⁸ E pen iich miich ajcxy n'amidooyb, ca' miich ajcxy xy'adzohuipyich, etz canan huin'it xyñajtmadzihuibich miich ajcxy. ⁶⁹ Jadachambi e ñicxa'ñi iich, je jäy huidi tsoon tzajpjoty, n'ixtäga'ñich a'oy'amy ma Dios mic'ajtmidpi.

⁷⁰ Chi nidüg'óciy je' ajcxy y'amidooy:

—¿Nej janch co miich Dios xy'ung'adyii?

Chi Jesús y'adzooy:

—Miich ajcxy jadu'n minamb co iich njëjity.

⁷¹ Chi ajcxy yminañ:

—¿Ti ajt njac-huáanim testigo? Ti ajt yam ci'm nmidoohuim nej mina'ñ.

23

Jesús ma Pilato yhuinduu

¹ Chi tüg'óciy je mayjäy ajcxy ypidigy, chi yajnicxy ajcxy Jesús ma je gobernador Pilato.

² Chi ajcxy ytigüy xibi yminaangixy:

—Jada jäy naax cajp yaj'ixpijcp huidi ca' ytiy'ajtity. Yi' adujctahuam co ca' huaad nmigüéjtím César, e ymina'ñ ci'm co yi' je' je Cristo huidi rey'ajtpi.

³ Chi Pilato y'amidooy Jesús:

—¿Nej miich je' judío jäy xyrey'ajtp?

Chi Jesús y'adzooy:

—Miich jadu'n minamb.

⁴ Chi Pilato nimay je teedy tungmiidpi ajcxy etz je mayjäy:

—Ca' iich ti pocy nbaadyich ma jadayaabi yëydijc.

⁵ Chi Jesús ymidzip nigi anajty ajcxy yminan'adiitzcixy:

—Jada Jesús naax cajp tzachyajqueec-huäcxtaayb je judíojäy miid yi' y'ayuc. Yajtzondacy Galilea, e jadachambi ya Judea jadu'n idich.

Jesús ma Herodes yhuinduu

⁶ Co Pilato midoy Jesús ymidzip ajcxy nigapxy Galilea, chi y'amidooy pen galileojäy je Jesús anajty. ⁷ Chi mic'amy huinjihuüy co yi' jim anajty yajpaady ma Herodes y'ane'my, chi jim quejxy ma Herodes huidi nañ jadu'n anajty yajpatp jim Jerusalén huin'it xii. ⁸ Co Herodes ijxy Jesús, chi oy jotcugiiy com tiüyip anajty ooy ja'ixa'ñ, ti anajty may ayuc midoohui, e ahuixy anajty co mijhuinma'ñ tunipy. ⁹ Janch may ayuc ooy jayaj'amidooy, e Jesús ni tüg'aa ca' y'adzooy. ¹⁰ Jim anajty teedy mijtungmiidpi etz je escribas ajcxy, tzachniigibéjtcixy mictägy. ¹¹ Chi Herodes miid yjäy ooy nixiicy yajxiicy Jesús, ca' mij'ijxy mijpidacy. Chi xojxy miid oyhuit etz quejxhuimbijty jim ma Pilato. ¹² Huin'it xii Herodes etz Pilato ajcxy ñaymigügpjci, com naymijotma'tip anajty ajcxy huin'it tiempo.

Jesús yajmoy ysentencia co y'ögipy

¹³ Chi Pilato huomujcy yi teedy mijtungmiidpi, yi cajptungmiidpi, etz yi naax cajp. ¹⁴ Chi ajcxy nimay:

—Ti miich ajcxy xyajnimíngixyich jadyaabi yëydijc, jadu'n miich ajcxy minamb co ooy jäy yajqueec-huäcxtay. Ti iich yi' jatyduñich ma miich ajcxy mhuindu, ca' iich yi' ni ma ypocy ti nbaati, jadu'n nej miich ajcxy mxigixy. ¹⁵ Nañ ni ca' Herodes ti pocy ti paady ma jada jäy, com ti njayajniquexyich, ni ti pocy jada Jesús ca' ti tuñ huidi huaad nyajco'ögüyich. ¹⁶ Miñ n'octzaachytuñich, jaydëbi nnajtmadzihuibich.

¹⁷ Jadu'n je gobernador anajty costumbre miidity co najtmadziiy tüg machyjäy mijxiijoty. ¹⁸ Chi je mayjäy tügmucy ajcxy yminaandacy:

—¡Yaj'ög jadyaab Jesús! ¡Najtmadzi' yi Barrabás!

¹⁹ Je Barrabás anajty pujxtigoty ti ypidägyii co anajty ti nibidigy je gobierno, nañ ti anajty yjäyyaj'ögy. ²⁰ Chi Pilato nimay ajcxy jadüg'oc co najtmadzihua'ñ Jesús. ²¹ Chi je mayjäy janch mic yminañ:

—¡Yajcruudzpet miich yi'! ¡Yajcruudzpet miich yi'!

²² Chi Pilato yminañ je midugiig'ocpi:

—¿Ti Jesús ti tundigoy? Ca' yi' ma ypocy nbaatich. Miñ n'octzaachytuñich, e najtmadzihuibich.

²³ Je jäy ajcxy nigi anajty yminaan'adiitzcixy janch mic, co huen yajcruudzpejty. Chi ajcxy jadu'n mimadacy Jesús co chachne'mgixy je teedy tungmiidpi, etz je cajpjäy ajcxy. ²⁴ Chi jada' Pilato cuyduñ jadu'n nej je jäy ajcxy anajty pijctzoy. ²⁵ Chi Pilato najtmadziy je Barrabás huidi anajty pujxtigotyip, co anajty chach jäy yajqueec-huäcxy, etz yjäyyaj'ögy, je' huidi yi jäy ajcxy ypijctzou. Chi Pilato cäyejcy Jesús ma yi' ajcxy huen tungixy nej tzojccixy.

Jesús yajcruudzpejti

²⁶ Chi je judíojäy ajcxy yajnicxy Jesús. Jim tü'am ajcxy minaybaati tüg jäy huidi anajty ti choon camjoty, huidi anajty yxii Simón, e ycgájpity anajty Cirene. Chi adzip ajcxy Simón yajquejycabiy Jesús ycruudz, e yajpanicxy ajcxy Jesús.

²⁷ Jac'axam anajty naax cajp panicxcixy, etz nañ may töxyjäydijc ajcxy chachyaaxcixy miid jotmay miid yi' ycixpi. ²⁸ Chi Jesús ni'ijxhuimbijty je töxyjäydijc ajcxy, chi nimay ajcxy:

—Miich Jerusalén töxyjäydijc ajcxy, ca' xyñiyáaxcixich. Nayñiyaaxigix miich ajcxy ci'm etz m'ung ajcxy ycixpi. ²⁹ Chi ypaadipy tiempo co jäy ajcxy ymina'nipy: “Jotcujc je töxyjäy ajcxy huidi ca' y'ung ixy, huidi ca' ti y'ungtzimigy, etz huidi ca' ti y'ung yajtzitzcixy.” ³⁰ Chi je jäy ajcxy nimaydägipy mijtun mijcop: “Nigidagótcich ajcxy”; etz je mutztun mutzcop: “Yajtigooygich ajcxy.” ³¹ Pen jäy ajcxy tzaachypi ayo'n mooyb Dios

y'ung, niŋi ajcxy jaciiini ytundiŋoya'n̄ miid Dios yjāy, tim jadu'n nipaady nej pin puxam tzuxy quipy nañ puxamy quipy titzpi.

³² Nañ jim anajty yajnicxcixy miid Jesús jametz pocyjāy. Tú'ciy miid Jesús anajty yaj'ōgaangixy. ³³ Co ajcxy oyjāty jim ma tūg it huidi jāy ytiŋpy ōgpi cohuajc, chi ajcxy jim Jesús yajcruudzpejty miid metz pocyjāy: tūg pocyjāy a'oy'amy, jadūg anajty'amy.

³⁴ Chi Jesús yminañ:

—Dios Teedy, mecxi ajcxy ypocy, com ca' nejhuiŋyŋixy ti ytungixyp.

Co je soldados anajty ajcxy yajhuäcxaani ac je'y Jesús yhuit, chi ajcxy ijxy suerte pin ocjēdiib. ³⁵ Jim je cajpjāy anajty yhuindicxcixy, yam je tungmiidpi niŋiŋy yajxigy Jesús, yminañ ajcxy:

—Jada Jesús huingjāy ti yajtzōgy, huen cham ci'm nayyajtzōgyii, pen yi' je' je Cristo, je huidi Dios ti huin'ixyi.

³⁶ Nañ jadu'n je soldados ajcxy niŋiicxcixy yajxiicxcixy Jesús, nimijhuägy ajcxy möhuaangixy anajty vino ta'mbi. ³⁷ Chi je soldados ajcxy yminañ:

—Pen miich Rey'ajt ma yi judfojāy ajcxy, nayñihuäni ci'm.

³⁸ Ma Jesús ycōdu jim anajty yjaayity griego'amy, latin'amy, etz hebreo'amy: JADA JE' YI JUDIOJĀY AJCXY YREY.

³⁹ Chi tūg pocyjāy huidi anajty cruudzcixy ooy niŋiicy yajxiicy Jesús yminañ:

—Pen miich je' je Cristo, naygohuäni ci'm, e cohuaangich iich ajcxy nañ jadu'n.

⁴⁰ Chi je jadūgpi pocyjāy oy y'adzooy, ooy ymīgūg, nimay:

—¿Nej ca' miich Dios mdziŋy. Ca' m'ixy co tú'ciy ti nbōcycāhuim? ⁴¹ Iich ajt janch paatip jadu'n, co jadu'n jada ngōbījcim tzaachypī je tiibi ndundigooyim. Jadayaabi Jesús janch ni ti jibicpi jada ti catuñ.

⁴² Chi je pocyjāy nimay Jesús:

—Tun may'ajt xyjāy medzipich co anajty mjāty jibby ma m'ane'mdac.

⁴³ Chi Jesús oy y'adzooy:

—Janch iich miich yam nimāy co cham iich miich miid'ijtnipy ma je oybi it.

Jesús y'o'cni

⁴⁴ Co cujcxibi paty, chi oy ycoodzīy tūg'óciy naaxhuiñ ixti minacyiini. ⁴⁵ Chi xii ca' y'oc'ani. Chi je huit oy yciitzhuačxy huidi anajty adiiydujcp je Dios y'it jibby ma Dios ytiŋc. ⁴⁶ Huin'it Jesús mic ypātcapxy yminañ:

—Dios Teedy, cham nyajcīdigīy iich n'alma.

Co Jesús jadu'n yminañ chi y'ōgy.

⁴⁷ Co je soldado huindzin ijxy jadu'n nej anajty ti ytunyii ti yjadyii, chi ooy jāymejch yi Dios yminañ:

—Janch co jadayaabi yēydijc anajty tudāgy yjāyity.

⁴⁸ Chi je mayjāy tiibi anajty jim yōymūjccixy yhuindicxcixy, co ajcxy ijxy jadu'n nej ytuuni yjajti, chi ajcxy huimbijttaayñi cajpjoty yam ycaach tzachcójxcixy miid jotmay ycixpi. ⁴⁹ Cham tūg'óciy Jesús ymīgūgtiŋc ajcxy huidi anajty miid ñay'ixy'adyii, etz tōxyjāydijc ajcxy huidi anajty Jesús ti ypadzonyii jim Galilea, jiguēgy je' anajty ajcxy yhuindicxcixy.

Yajnaaxtiŋy ajcxy Jesús

⁵⁰ Jim anajty tūg yēydijc huidi anajty yxii José, hue' anajty ycogājpity Arimatea ma Judea naaxjot. Je' anajty judío mījtungmiidpi, e je' ooy anajty chach'oyjāyity etz ytudāgyjāyity. ⁵¹ Je' nañ yjijp'ijxy anajty co yminiŋpy je Dios y'ané'min, e ca' je' anajty jijptiŋyiy miid jacnaagity mījtungmiidpi co ajcxy yaj'ōgy Jesús. ⁵² Chi José ñicxy ma Pilato oy pijctzoohui Jesús ñinīcx. ⁵³ Chi yajminajcy ma cruudz, e mo'ñ miid tūg sámana, chi pidacy ma ōgpi jut, ma tūg tzaahuinguetzmiŋc ma ca'ni anajty ni tūg ōgpi jibby yajpidāgy. ⁵⁴ Je' anajty ajcxy ni'ixiŋyb a'ixiŋyb je pascua xii e je' anajty tim tzondāgan je pócxin xii.

⁵⁵ Chi je töxyjäydjic huidi anajty ti ypadzoñyii Jesús jim Galilea, panicxy ajcxy je José axam. Chi ajcxy nañ jadu'n ijxy je ögpí jut, etz je ninícx jadu'n nej jiiby yajpidacy. ⁵⁶ Chi ajcxy yhuimbijttay cajpjoty. Chi ajcxy yaj'oyíy ujtz xuucpi, tzoy, etz unguento, chi amay'ajty je pocxinxi, jadu'n nej anajty cötújcín y'ane'my.

24

Co Jesús y'ögy chi yjugypijcy

¹ Co je seamaan y'ixtigíy janch tím ticxícp je töxyjäydjic ajcxy ymiiñ ma je o'cpi jut, chi mimiñ ajcxy ujtz xuucpi, etz tzoy huídibi anajty ti yaj'oyíygíxy. Nañ jadu'n miídjadyyi töxyjäydjic miñ. ² Chi ajcxy paty je tzaa ti anajty yjidíguegyi ma je o'cpi jut'aguu. ³ Co ajcxy ytigíy jutjoty, chi ca' ajcxy paty je Huindzin Jesús ñinícx. ⁴ Chi jadu'n yajty, jiiby anajty ajcxy jutjoty huinmaaygíxy, co ñayguëxígi ma ajcxy ymijc metz yëydjic janch adícxp anajty yhuít. ⁵ Chi ajcxy ooy chigíy, chi ajcxy yhuindactay, chi je metzpi yëydjic yminañ:

—¿Na'amy co m'ixtaaygíxy yi jugypí ma yi tiibi y'ögy? ⁶⁻⁷ Ca' je' ya, ti je' yjugypícy. Jáyméjtzcix jadu'n nej mina'ñ jim Galilea, co yminañ:

—Ooy ycopícyty co ích, je jäy huídí tsoon tzajpjoty, nyajcíyegípy pocyjäy c'íam. Yi' ajcxy xyajcruudzpedípyich, chi njugypigípyich codugiig xii.

⁸ Chi ajcxy oy jáymejtzcooty nej anajty Jesús ti ymina'ñ. ⁹ Chi je töxyjäydjic ajcxy yhuimbijttay ma o'cpi jut. Chi ajcxy yajmiídmiydactay jadu'n nej anajty ti íjxcíxy ti midoogíxy miíd Jesús ydiscípulos ajcxy je nimajmetzpi etz jacjadyi jäy huídí yajpaatp ma je' ajcxy. ¹⁰ Je töxyjäy ajcxy huídí ooy ma Jesús ñaaxtigíy, je' je' anajty ajcxy: María Magdalena, Juana, etz María Jacobo ytaj, e cham jacnaagíty ymidöxyjäydjic. ¹¹ Chi Jesús ydiscípulos ca' ajcxy tím mijpidacy je töxyjäydjic ajcxy ayuc, hue' ajcxy tijy nigo y'occapxcíxy y'ocmiydaaccix, paady ca' ajcxy miíbjcy.

¹² Chi Pedro ypidígy ñícx yoyígyi ma anajty Jesús ti ñaaxtigíy. Chi Pedro yco'ixíy ma je o'cpi jut, chi ijxy co ca' jiiby ni ti, jéyi Jesús yhuít abícy y'ooxnäy. Chi Pedro yhuimbijty ma ytíjc jihuíy ooy jadu'n nej ti ytuñyii yjadyii.

Ma Emaús tü'aa

¹³ Huin'it xii metz Jesús ydiscípulos ajcxy ñícx ma tüg cajp mutzpi hue' anajty yxii je cajp Emaús, hue' yjiguemyty miíd Jerusalén tugi'px estadios (majmetz kilómetro). ¹⁴ Chi amiydaacip anajty ajcxy ñícx. Nigapxcíxy nimiydaaccíxy nej Jesús ti yjaty ti y'ayoy. ¹⁵ E jadu'n yjaty ma anajty ycapxcíxy ymiydaaccíxy je nimetzpi, chi Jesús c'i'm nimíjhua'cy je metzpi, chi miíd ñícx ajcxy yquipxyi. ¹⁶ Oy anajty ja'ijxcíxy, ca' ajcxy tuñcuend pin je' anajty. ¹⁷ Chi Jesús y'amídooy je' ajcxy:

—¿Ti miich ajcxy miydacpy ma yam mdüyöygíxy? ¿Nej co mdájcíxy mmáygíxy?

¹⁸ Chi tüg huídí anajty yxii Cleofas y'adzooy:

—Janch tüg'óciy mayjäy nejhuidäy je ayo'n ti ytunyii ti yjadyii. ¿E miich naydüg jim jättac Jerusalén, e jadu'n tijy ca' mnejhuíy?

¹⁹ Chi Jesús je' ajcxy nimay:

—¿Ti ti ytuñyii ti yjadyii?

Chi je' ajcxy yminañ:

—Jesús Nazaretpí, huídí Dios y'ayucnajtzcapxiyíy, yi' anajty mij jáncíp ma yi ayuc etz huinma'ñ ma Dios yhuinduu, etz cham ma tüg'óciy naax cajp. ²⁰ Chi yi' ajcxy je teedy mijtungmiídpi etz ích ajt ndungmiídpi Jesús yajcídígyi je gobernador co huen yaj'ögyi. Chi ajcxy yajcruudzpejty. ²¹ Hue' ích ajcxy anajty ndzach'ahuijxyp co yi' je' huídí Israeljäy ajcxy cohuánaam ma ymidzip. Jadachambi jada' ymidugiigxii ma jadu'n ti ytunyii ti yjadyii. ²² Cham ích ajcxy ndöxyjäydjic ajcxy ooy xy'adzigíygíxyich. Ti y'oygíxy janch ticxícp ma o'cpi jut. ²³ E com ca' ajcxy paaty je ñaaxnicx, chi ajcxy yhuimbijtni yminaangíxy co ti íjxcíxy yi ángeles ajcxy, hue' je ángeles ajcxy yminañ co

Jesús yjuugyity. ²⁴ Huin'it nijëjity nmigügtijcich ooy ma o'cpi jut, paty ajcxy janch jadu'n nej töxyjäydijc anajty yminaangixy. Ca' je' ajcxy ijxy Jesús.

²⁵ Chi Jesús yminañ:

—¡Miich jäy ajcxy ooy ajcxy m'aajuuñity mjetjuuñity, ca' ajcxy ti mdzojcmibijccixy co ajcxy mjamibigá'nip huidibi y'ayuc najtzcapxiybi ajcxy ycapxy! ²⁶ ¿Nej ca' anajty ycopícyity co je Cristo ayo'n paadip, e huin'it ytigihuiip tzajpjoty ma yi' y'it oybi?

²⁷ Chi Jesús yajnímaay ajcxy Dios ytiy'ajt, chondägy ma Moisés ñecy, etz tüg'óciy jacjadyii necy huidi Dios y'ayucnajtzcaxxiybi yjaay, yajxon ajcxy yajni'ixiyday jadu'n nej yjaybétyity miid je Cristo ycixpi.

²⁸ Chi ajcxy mihuingoñ je mutz cajp ma anajty ñíxcixy, je Jesús jadu'n ñaybidaaci jadu'n nej jihuiy jacjguem ñicxy. ²⁹ Huin'it ajcxy nimay adzip:

—Hui'm miich miid iich ajcxy, nígi jada chuu'iiy'adich.

Chi Jesús ytigiiy cajpjoty yhui'my miid je' ajcxy. ³⁰ Chi jadu'n yjajty co anajty ti y'ixtaaccixy caaybi, chi Jesús tüg tzajcaagy conígy, e yajnajxy Dios cojuyip, huin'it tujc-huäcxy moy ajcxy. ³¹ Huin'it ajcxy ijxcajpy Jesús. Chi Jesús mic mícíy yaj'ijxtigoy. ³² Chi ajcxy ñayñimaayi:

—¿Nej ca' yjáncity co iich ajt ooy njihuiyim jotjoty huinma'ñjoty co anajty ajt jim xymiidmiydacim tü'am, etz co ajt xyñajtzcapxiyim je huidi jaybety ma Dios ñecy?

³³ E tim huin'ítíy ajcxy tübíjccixy, chi ajcxy níxcixni jim Jerusalén. Ni'amugi' ajcxy paty je majtügpi Jesús ydiscípulos ajcxy e jacjadyii jäy ajcxy. ³⁴ Chi ajcxy minaangixy:

—Janch yi' co ti yjugypicy je Huindzin Jesús, com ti oy ñayguëxígyii ma Simón.

³⁵ Chi Cleofas nimiydacy jadu'n nej tü'ay anajty ajcxy ti ñaybátigixy miid Jesús, etz jadu'n nej ajcxy Jesús ijxcajpy co tzajcaagy ti tujc-huäcxy.

Jesús ñayguëxíci ma je' ydiscípulos ajcxy

³⁶ Jiiby anajty ajcxy tzachnimiyaaccixy co Jesús oy ñayguëxígyii ma je' ajcxy. Chi ytinay'ahuuiy cujc'amy ma je' ajcxy, chi yminañ:

—Jotcugi' miich ajcxy.

³⁷ Chi je' ajcxy ooy ñay'adzigiyi ooy huinmaaygixy, hue' ajcxy tijy ijxmañiyb. ³⁸ Chi Jesús nimay je' ajcxy:

—¿Na'amy co mjet mhuinma'ñ ti ytigoydaaygixy? ¿Nej co m'aa'ájtigixy mjet'ájtigixy pin iich? ³⁹ Ijxcix miich ajcxy iich ngi' iich ndecy, iich jëni iich. Nídongich etz ijxcich ajcxy. Tüg espíritu ca' miidity chüch ni ypajc, jadu'n nej m'ijxcixy iich nmiidity.

⁴⁰ Co Jesús jadu'n yminañ, chi ajcxy yaj'ijxy yci' ytecy. ⁴¹ Per ca'ni ajcxy mibijcy miid co anajty ajcxy chachjotcújcity, chi Jesús ajcxy nimaayi:

—¿Miid ajcxy ti ii mgayipy?

⁴² Chi ajcxy moy Jesús acxtzäy, etz tüg jiidy serpäg. ⁴³ Chi cöbijcy, chi ycaay y'uucy jim ma je' ajcxy yhuinduu. ⁴⁴ Huin'it Jesús yminañ:

—Huidi m'ijxyp cham je' je' huidi nyajnimay jayhuin, co iich miich ajcxy anajty miid'ijtcixy, co copicy nguydundähuibich jadu'n nej yjaybétyity ma je Moisés ñecy je jëcyip, etz jacjadyii Dios y'ayucnajtzcaxxiybi ñecy, etz yi salmo necy.

⁴⁵ Huin'it je' ajcxy yjot yhuinma'ñ ymiiñ ymejch, jaydëbi huinjihuüygixipy huidi jaybétyip. ⁴⁶ Chi Jesús yjacminañ:

—Jadu'n jaybety y'ity ma Dios ñecy co copicy co je Cristo paadip ayo'n e yjugypigipy codugiig xii, maabi anajty y'ögy. ⁴⁷ Huen ajcxy yajcapxhuäcxy Dios ytiy'ajt huindu'my naaxhuiñ, chondägip Jerusalén, co ooy ycopícyity huen jäy ajcxy jothuimbijtcix jaydëbi ajcxy paadip pocyhuinmeecxin. ⁴⁸ Miich ajcxy nidiy'ajt'adipy tüg'óciy jadu'n nej cham ti m'ijxcixy ti mnejhuüygixy. ⁴⁹ Jadachambi nguexipyich ma miich ajcxy je huidi nDeedyich ti xyaj'ahuanüygixy. Hui'mgix ya Jerusalén ixti cooni ajcxy xyñidigihuiip xycödígihuiip je Dios yjihui'ñ ymic'ajt huidi tzonam tzajpjoty.

Jesús ypa'ttigiiyñ tzajpjoty

⁵⁰ Huin'it xii Jesús mïid tzoñ je' ydiscípulos ajcxy, chi ajcxy ycajppidzimy, ñicxy ajcxy mihuingon je Betania. Chi Jesús xajhuäcxy yci' mibijctzoy Dios mïid je ymigügtijc ajcxy ycixpi. ⁵¹ Chi jadu'n yjajty ma anajty Dios mibijctzoy mïid yi' ajcxy ycixpi, chi abicy yajhui'mni je' ajcxy e je' ypättigiiyñi jiiby tzajpjoty. ⁵² Chi yi' ajcxy jim yjac-huäcxijpy Dios ojadajtcixy. Chi ajcxy yhuimbijttaayñi jim Jerusalén janch jotcuyc. ⁵³ Chi ajcxy jabom jabom anajty ñicxcixy ma Dios ytijc chajpcapxycapxcixy, ojadajtcixy jäymejtzcixy yi' Dios, Janch jadu'n jada. Amén.

SAN JUAN

Jaayhu'i'my Jadu'n Nej Jesucristo Ytun Yjajti

Dios y'ung hu'idibi y'oy ya naaxhuiñ yejci Dios y'ayuc tiy'ajt

¹ Co naaxhuiñybi oga'n chondacy jiiyim anajty Dios y'ung, e yi' yajnejhuiy jay ajcxy Dios y'ayuc ytiy'ajt. Dios y'ung tú'ciy anajty yajpaady ma Dios. ² Je' tim oga'n'aty anajty yajpatp ma Dios. ³ Tüg'óciy hu'idijaty yaj'ijxp yajpatp ya naaxhuiñ, yi' yaj'oyiyday yajcojtay. Tüg'óciy hu'idijaty Dios yajcojy, tú'ciy ytuñ miiid y'ung. ⁴ Dios y'ung yi' jugy'ajtyejtaayb ma tüg'óciy naaxhuiñyjay. Miiid co jugy'ajtyejctay ma tüg'óciy naaxhuiñyjay, je' je' tiy'ajt co Dios y'ung ymiiid Dios ymic'ajt. Jadu'n nipaady nej tüg'óciy hu'idibi jay codiicxp. ⁵ Ya naaxhuiñ yajpaady anii. Yi' anii jadu'n yi' nej coodzpi. Yi' Dios y'ung ti mimiñ ya naaxhuiñ Dios y'ayuc ytiy'ajt. Jadu'n Dios y'ayuc ytiy'ajt ma jay yjot yhuinma'n nej tüg'óciy ytiicxy agoodztuuyb. Yi' anii ca' ñaygodigiyii miiid Dios ytiy'ajt.

⁶ Ma'xung'ajt tüg'yeydijc hu'idibi Dios anajty ti yajni'bicy. Hue' anajty yxii Juan. ⁷ Yi' oga'n tiy'ajt yejci co Dios ymic'ajt etz ytiy'ajt yajpaady ma Dios y'ung, jigix tüg'óciy je jay ajcxy camibijctahuipy je Dios y'ung. Dios y'ung jadu'n nipaady nej tüg'óciy hu'idibi codiicxp ma jay ytüyöy. ⁸ Je Juan ca' je' anajty yjējity je Cristo, je hu'idibi capxhuäc xp Dios y'ayuc ytiy'ajt. Hue' janchtiy je Juan ñidiy'ajt'ajt je Cristo. ⁹ Je Dios y'ung hue' je' ma'xung'ajty ya naaxhuiñ. Je' je' anajty je Dios ymic'ajt etz ytiy'ajt ymiiid, je janchypi, ma jēb tüg'óciy jay ya naaxhuiñ patcixy Dios ytiy'ajt.

¹⁰ Je Dios y'ung ya anajty yhuidity naaxhuiñygyxy. E jada naaxhuiñ yi' yaj'oyiyday. E may je naaxhuiñyjay ca' ajcxy ijxajpy. ¹¹ Je ymigügtijc, je judiojay, je' ajcxy nimiini, e may ajcxy je ymigügtijc ca' ajcxy ycöbiji. ¹² Tüg'óciy je jay ajcxy pinjaty mijpidac yi' yxii yi' ymic'ajt, yi' ajcxy yajmoy Dios ymic'ajt, e jadu'n nipaty nejjihuüy ajcxy Dios y'ung'adyii. ¹³ Canan hue' je' co naydijiyb Dios y'ung co ti yma'xung'aty jadu'n nej jay ajcxy y'ocma'xung'aty. Nañ ni ca' yjadu'nity nej jay tijy, nej jay jijp'ixy, ni canan jay jadu'n ti huinmay. Hue' janchtiy Dios jadu'n ti huinmay.

¹⁴ Je Dios y'ung ya naaxhuiñ je' yma'xung'ajty miiid ñinicx etz chinay miiid naaxhuiñyjay. E iich ajcxy n'ijxich yi' y'oy'ajt etz ymic'ajt, jadu'n nej Dios Teedy y'ung tüg'ajc oy'ajt etz mic'ajt miiidity. ¹⁵ Juan ñidiy'ajt'ajt je Dios y'ung, e chi capxypidzimy, e jadu'n yminañ:

—Jada je' je jay hu'idibi iich jadu'n nimiyaacich ma miich ajcxy. Je hu'idibi miimb jac'axam ma iich, jac mic'ajt miiid yi' ca'ydi iich, com jacjayijp yi' jugy'ajt paty ca'ydi iich.

¹⁶ Je Dios y'ung oy xychojcm xyjihuiyim mijcajee, paady je' tuuñ may'ajt oy'ajt mijcajee miiid iich ajt ycixpi. ¹⁷ Com Dios y'ané'min ycötujcin micpi hue' Dios yajnigüe jx je Moisés. Co Dios quejxy Jesucristo ya naaxhuiñ, chi may'ajt oy'ajt tuñ miiid je jay ajcxy ycixpi, e nañ je' ytiy'ajt yajnigüe jx je Jesucristo. ¹⁸ Je Dios ni caminaabi pin ca'ixyñi, je y'ung tüg'ajci yajpatp ma Dios Teedy ity. Je Dios y'ung ti xyajnejhuiyim nej Dios yajpaady.

Juan el Bautista je' tiy'ajt yejci co Jesús je' anajty Dios y'ung

¹⁹ Jadaabi je' je tiy'ajt hu'idibi Juan yejci, co judío jay ajcxy quejxy nijējity teedytjic etz tzajptjic tungmiiidpi. Jim ajcxy choñ Jerusalén nicxy ma anajty Juan yajpaady, chi ajcxy y'amidooy:

—¿Mbin miich? ¿Nej miich je' je Cristo hu'idibi Dios yquexamy?

²⁰ Je' ñigapx je tiy'ajt, ca' ñaygoyützi, chi yminañ:

—Ca' iich njējity je Cristo.

²¹ Chi ajcxy jac'amidooy:

—¿E pin miich mnaydijyii? Pen ca' mjējity je Cristo. ¿Nej miich je' je Elías?

Chi Juan y'adzooy:

—Ca' je' n'ichity.

Chi ajcxy jac'amidooy:

—¿Nej miich je' je Dios y'ayuccapxhuäcxpi, je huidibi ñigapxy ma Dios ñecy co ymiinañ ya naaxhuiñ?

Chi Juan y'adzooy:

—Ca'.

²² Chi y'amidooy ajcxy jadüg'oc:

—¿Mbin miich? Jigix ich ajcxy tiy'ajt nyajnícxibich ma yi tiibi ich ajcxy xyquexyich. ¿Ti miich nayxiigoyáxyii?

²³ Chi Juan yminañ:

—Ich je' je jäy huidibi Dios y'ayuccapxhuäcxip ma tüg migtigüduum, tim jadu'n nej jibby jaybety ymiin ma Isaías ñecy, nañ tim jadu'n ich nmina'ñich co copicy nayñi'ixiiygix ma yi mjot yi mhuinma'ñ, jëbi naybáatigixy miid mHuindzin Dios. Jadu'n nej jäy ixypy tü'aa yaj'oyiy co tüg huindzin ymiina'ñ.

²⁴ Je teedytjic etz tzajptjic tungmiidpi huidibi oy migapxy Juan, hue' anajty ajcxy fariseojäy ti yquexyii. ²⁵ Chi ajcxy jactim'amidooy Juan:

—¿Ti miich co mjäyyajniibety? Peni ca' miich mjëjity je Cristo, ni mgajëjity je Elías, ni mgajëjity huidibi Dios y'ayuc najtzcaxiiyip.

²⁶⁻²⁷ Chi Juan y'adzooy:

—Ich hue' jäy nyajniibetyich miid ni. Ya naaxhuiñ ji tüg jäy huidibi miich ajcxy ca' m'ixy'adyii. Je' huidibi jac'axam mimb ma ich, je huidibi ca' mihuaadity nicxy yi' xytumbi'adyiijich, nicxyich ycighuin nguejich.

²⁸ Jadu'n ytuni yjajti jim Betábara, jim'amy ahuin ma Jordán mij ni, jim anajty Juan jäy yajniibety. Juan tiy'ajt yejc co Jesús je' anajty yjogy'ajt yegam miid ich ajt nbocy ycixpi.

Jesús nayyajhuindzigihuaanip ma Dios miid jäy ajcxy ypocy ycixpi

²⁹ Chi je com jabom co ijxy Jesús anajty ñimiñyii, chi Juan nimay je jäy ajcxy:

—Cha je' ymiñ je Dios yjäy huidibi Dios nayyajhuindzigihuaanip miid naaxhuiñyjäy ajcxy ypocy ycixpi. Tim jadu'n nej judíojäy ajcxy Dios huindzigiy miid ypocy ycixpi.

³⁰ Jada je' huidibi ich nnigapxypich co jac'axam ymiina'ñ ma ich tüg yëdyjc huidibi nigü Dios ymic'ajt y'oy'ajt miidity ca'ydi ich. Com jiiyim anajty yi' yjogy'aty co oga'n naaxhuiñybi chondacy. ³¹ Oy ich anajty ca' yi' n'ixy'adyiijich huingixy jipcixy, nyajniibejtich jäy, jigix yi judíojäy nejhuihuip ajcxy co ji yajpaady je Cristo je huidibi Dios ymic'ajt miid.

³² Chi Juan nigodiy'ajt'ajty je Cristo co ymina'ñ:

—Ich ti n'ixyich yi Espiritu Santo jibby choñ tzajpjoty, jadu'n yquëxigy nej tüg muuxy, e chi y'ixtacy ma Jesucristo. ³³ Tiydudägy ca' ich anajty n'ixy'adyiijich. Je Dios huidibi xyquejxich jäy yajniibejtpi, je' ich anajty jadu'n ti xyñimäyich co je jäy ma anajty n'ixyich je Espiritu Santo ñigidägyii anajty etz yhui'my ma je'. Je' je' jadu'n anajty huidibi y'adigihuiipy yjottigihuiipy Dios yjihui'ñ ymic'ajt ma je jäy ajcxy. ³⁴ Cham nnigapxpetyich co ich ti n'ixyich je jäy, e nyejcpyich tiy'ajt co je' je' je Dios y'ung.

Jesús yhuin'ijx nijëjity jäy huidibi anajty ydiscípulo'andaanipy

³⁵ Chi je com jabom jopy jim anajty Juan yajpaady miid metz jäy huidibi ixpijcp ma yi'.

³⁶ Chi anajty ajcxy tzachhuindixy Jesús co anajty jim ñaxy, chi Juan nimay je metzpi jäy: —Oc'ijxcix ocnejhuiygix, cha je jäy huidibi Dios nayyajhuindzigihuaanip miid naaxhuiñyjäy ypocy ycixpi.

³⁷ E je metzpi jäy huidibi anajty ajcxy ixpijcp ma Juan, co jadu'n ajcxy midoy nej Juan yminañ, chi ajcxy Jesús padzooñ. ³⁸ Chi Jesús y'ijxhuimbijty, chi ijxy co anajty ajcxy ypanixyii, chi jada' nimay ajcxy:

—¿Ti ajcxy m'ixtaayb?

Chi ajcxy y'adzooy:

—Huindzin, ¿ma tiyi ti mja'ttägy?

³⁹ Chi Jesús y'adzooy:

—Miingix, jigix ajcxy m'ixipy ma ti nja'ttägyich.

Chi jada' ajcxy panicy, e chi ajcxy ijxy ma anajty ti yja'ttägy. Je huin'it xiimbi chi jim je' miid yhui'miy, com mijminacyxi anajty co ajcxy jim ymejch.

⁴⁰ Andrés, je Simón Pedro ymiguëx, je' anajty tüg tzoonip huidibi nimetz ajcxy midou jadu'n nej Juan yminañ, etz je' anajty ajcxy ti padzooñ Jesús. ⁴¹ Chi jada' Andrés oy ixtäy y'uch Simón tim jayjip, chi nimay:

—Ti ich ajcxy nbaady je Mesías —jadu'n je ayuc Mesías yhuimbizima'ñ Cristo.

⁴² Chi Andrés miidnicxy Simón ma Jesús, e chi Jesús huindicxpejty, nimay:

—Miich je' Simón, Jonás miich xy'ung'ajtp. Miich je' mxii'adiyb Cefas —huidibi ayuc'amy huimbizimb tzaa.

Jesús je' yhuin'ijx Felipe etz Natanael

⁴³ Chi com jabom Jesús choon ñicxy jim Galilea, chi minaybaati Felipe, chi jadu'n nimay:

—Pajamgich.

⁴⁴ Felipe jim anajty ycogajpity Betsaida, nañ je' je' je' cajp ma anajty ajcxy ycogajpity Andrés etz Pedro. ⁴⁵ Chi Felipe minaybaati je jäy huidibiyxi Natanael, chi jadu'n nimay:

—Ti ich ajcxy je' nbaadyich je jäy huidibi yajnicapxp yajnimiydacp ma Moisés ñecy, etz yi Dios y'ayucnajtzcaxxiybi ñecy. Yi' je' je' Jesús, José y'ung huidibi cogajpip jim Nazaret.

⁴⁶ Chi Natanael y'adzohuimbijty:

—¿Nej jim Nazaret ti choñ tüg oyjäy? Com ac jadu'n jäy ymina'ñ co ac jibicjäydijc jim tzinaayb.

Chi Felipe yminañ:

—Jam ci'm octim'ix.

⁴⁷ Co Jesús ijxy co Natanael ñimiñyii, chi jadu'n yminañ:

—Cha tüg judíojäy huidibi ca' pin huin'iniipy.

⁴⁸ Chi Natanael yminañ:

—¿Nej miich ti xy'ijxcapyich pin jäy ich?

Chi Jesús nimay Natanael:

—Ca'ni anajty Felipe xyñimaayñi: “Jam íxim je Jesús” co anajty miich jilby'emy ma je higueri quipypa't, huin'it ich miich ti n'ijxcapy.

⁴⁹ Chi Natanael y'adzooy:

—Huindzin, miich je' Dios y'ung. Miich je' Rey'adam ma je judíojäy ajcxy.

⁵⁰ Chi Jesús y'adzooy:

—Miid co ti nnimäy co jilby'emy anajty miich ma je higueri quipypa't co ich miich ti n'ijxcapy. ¿E ti mdimjanimibicy? Jactimmijhuinma'ñ etz jactimmij'oy'ajt m'ixamyb mbadamyb.

⁵¹ Chi Jesús jadu'n yminañ:

—Janch tim tiy ich miich ajcxy yam jadu'n nimäy co m'ixipy ajcxy yi tzajp y'ahuäch etz Dios y'ángeles ajcxy choon tzajpjoty xyñigidägyich, e ypa'ttigiygixy jadüg'oc tzajpjoty. Choongixy yja'tcixy ma ich je jäy huidibi tzoon tzajpjoty.

2

Jesús y'oy ma anajty jäy nixiuduñ tüg pijcin jim Caná

¹ Midugigxiibi anajty maabi ajcxy Jesús minaymigápxigixy, ma je cajp huidibi yxi Caná ma je Galilea naaxjot jim anajty huinxidungixy tüg jäy huidibi anajty ti ypicy. E jim anajty nañ jadu'n Jesús ytaj. ² Chi Jesús miid je' ydiscípulos ajcxy yajhuooy jim ma je xii anajty ytuñyii yjadyii. ³ Ti anajty vino ycijxtaayñi, huin'it Jesús ytaj ñimayñi:

—Ca'p ajcxy miidiñ vino.

⁴ Chi Jesús y'adzooy ytaj nimay:

—Ca' ti jotmay nmiididyich miid miich töxyäy. Hich nhuri ca'ni paady mina jäy ajcxy nyajnejhuihuibich pin iich.

⁵ Chi je ytaj nimay je tumbidijc ajcxy:

—Mdúngxixipy nej anajty ajcxy Jesús xyñimaaygixy.

⁶ Jim anajty tudujc tzaadu'tz ma anajty nii y'ity. Je nii anajty ajcxy yajtumyib co anajty ajcxy ycibujcixy jadu'n nej ypocy ixpujcxixy, jadu'n anajty ajcxy judíojäy costumbre miidity. Tügpi tzaadu'tz ymiid anajty yjot metz majt tugiig majt nii. ⁷ Chi Jesús nimay je tumbidijc ajcxy:

—Yaj'ujtcix yi tzaadu'tz miid nii.

E chi ajcxy yaj'ujztay mabaat y'a'ujznaxy je tzaadu'tz. ⁸ Chi Jesús yminañ:

—Yajpidzimgix cham yi nii, e yajnicxcix jiiby ma huidibi ane'mb ma yi caydac uuctac.

Chi ajcxy yajnicxy je nii. ⁹ Co jada' je ane'mbi jihuiymajch je nii ti anajty yvinocojy, chi mijhuoy je yéydijc huidibi anajty ti ypicxy. Je ane'mbi ca' anajty nejhuüy ma anajty je vino ti choñ. Jéyi anajty je ytumbidijc ñejhuüy co nii anajty ajcxy yajpidzimgixy ma je tzaadu'tz. ¹⁰ Chi je ane'mbi nimay je huidibi anajty ti ypicxy:

—Tüg'óciy jäy ajcxy huidibi xiidumb, hue' ajcxy yajtumyib jayijp je vino oybi. E co jäy ajcxy ooy yxondaacni, chi oyñihuidibi vino nii jacyajtungixy. Miich janchtiy, ti m'amay'aty yi vinonii oybi ixti chamni myajtuñ.

¹¹ Je' je' je oga'nibi mijhuinma'ñ huidibi Jesús ytuun jim Caná ma Galilea ñaaxjot. Chi yajniguëxigy je ymic'ajt etz y'oyjäy'ajt. E je huidibi anajty ajcxy yaj'ixpijcpy, chi ajcxy ooy mibijcy mijpidacy je Jesús.

¹² Co jadu'n tüg'óciy ytuni yjajti, chi Jesús y'idacy jim ma je cajp huidi yxi Capernaum miid ytaj etz y'uch ajcxy, etz huidibi anajty yaj'ixpijcpy. Jim ajcxy yhuäcxijpy tüg xii mejtz xii.

Jesús yajpidzim ajuuybi adoocpi ma Dios ytijc

¹³ Tim huington anajty je pascua xii huidibi judío ajcxy ytumy jim Jerusalén, paady Jesús ñicxy jim. ¹⁴ Jim ma Dios ytijc Jesús paty je' huidibi anajty ajcxy ajuuybi adoocpi, jadu'n nej ma ymiiñ huaj, borregi, etz muuxy (huidibi jäy ajcxy Dios yajhuindzigiiyb). Nañ jim meeñyhuingogombidijc anajty ajcxy y'ñaaygixy ma ymesa. ¹⁵ Chi Jesús yaj'oyiiy tüg cochac huojp. E chi ixhuojppidzimday je ajuuybi adoocpi ajcxy ma Dios ytijc ñihuaj etz ñiborrego. Chi yi meeñyhuingogombidijc ymeeñ cöxijtnajxtayi, e chi ymesa tijhuimbijttaayi. ¹⁶ Chi nimay je muuxytoocpidijc ajcxy:

—Yajpidzimgix jada muuxy ya. Ca' iich nDeedy ytijc yhuaani ajcxy ajuydac adoocac.

¹⁷ Je' ajcxy huidibi anajty Jesús yaj'ixpijcpy chi ajihuiygooti ajcxy je ayuc, jadu'n nej jaybety ymiñ ma Dios ñecy: “Ooy ndzocy njihuiyich Dios ytijc, paady ooy nnijottigoyich Dios ytijc.”

¹⁸ Chi je judío ixpicytjic ajcxy y'amidooy Jesús:

—¿Ti mijhuinma'ñ miich xy'ocyaj'ixambich ajcxy nej tüg iixpejt, pen janch miidity cötujcin co m'ixhuojppidzimday yi ajuuybi adoocpi ajcxy?

¹⁹ Chi Jesús y'adzooy:

—Yajhuindigooygix jada Dios ytijc, e codugiig xii iich yi' jadüg'oc nyajpidigipy.

²⁰ Chi jada' je judío ixpicytjic ajcxy y'adzooy:

—Huixchiguijpx tudujc jimijt yhuäcxijpy co jäy cojy jada Dios ytijc. ¿E miich tijy myajpidigamy codugiigxiiji?

²¹ Per ca' je' anajty nigapxy je Dios ytijc. Hue' je' anajty ci'm ñayñigapxyii co anajty y'öga'ñ, etz co yjugypigipy jadüg'oc codugiig xii. ²² Chi jada' co Jesús yjugypijcy codugiig xii maabi anajty y'ögy, je huidibi anajty ajcxy ti yaj'ixpicxy, ajihuiygooti ajcxy huidibi Jesús anajty ti yajnimäyigixy. Chi jada' ajcxy mibijcy ooy jadu'n nej anajty ycojaayity ma Dios ylibro, etz com nañ jadu'n anajty Jesús ti ymina'ñ.

Jesús ñejhuüy nej jäy ajcxy yjot yhuinma'ñ miidity

²³ Co anajty Jesús yjimity Jerusalén pascua xijoty, mayjäy ooy ymibijci co ajcxy ijxy je mijhuinma'nñ huidibi anajty ytumyb. ²⁴ Jesús ca' anajty yjaty ñaygïyegyii ma je mayjäy ajcxy (hue' anajty ajcxy chachyajrey'adamy). ²⁵ Com Jesús ñejhuiydaayb anajty nej jäy ajcxy nidüg nidüg yjot yhuinma'nñ miidity ca' tzocy pin yajnimähuiyb ti anajty ajcxy ytunamy, com ñejhuiydaayb nej jäy ajcxy yjot yhuinma'nñ miidity.

3

Nicodemo oy ytiy'ajtpicy ma Jesús

¹ Jim anajty tüg yëydijc, fariseojäy y'ixpijcin anajty yajtuunipy. Hue' anajty yxii Nicodemo. Je' anajty ñigohuajc'ajtyp ma je judíojäy ajcxy ymiin. ² Chi jada' Nicodemo ymiin coodz ma Jesús anajty y'ity, chi nimay:

—Huindzin, nejhuiyb ich ajcxy co miich tüg huindzin huidibi tzomb ma Dios. Com ca' ni pin jaty nej tunipy je mijhuinma'nñ huidibi miich mdumyb, pen ca' Dios ymic'ajt miidity.

³ Chi Jesús y'adzooy:

—Janch janch ich miich yam jadu'n nimäy, co ca' ni pin ixipy Dios y'it, pen ca' jadüg'oc yma'xung'ajttigach.

⁴ Chi Nicodemo yajtiy:

—Per, ¿nej tüg jäy tübi ymij'anäcciyiñi y'ocnima'xung'ajttigajtzpity jadüg'oc? ¿Nej jëbi jadüg'oc ytigïy ma ytaj y'aa yjot, e chi yma'xung'adity jadüg'oc?

⁵ Chi Jesús y'adzooy:

—Janch janch ich miich yam jadu'n nimäy pen ca' jäy yjothuimbity etz ñiibety, pen ca' Dios yjihui'nñ ymic'ajt y'adigïyii yjottigïyii, ca' jëbi ytigïy ma Dios chinäy. ⁶ Je jäy huidibi ajcxy ma'xung'ajtp ma töxyjäy, ymiid ajcxy ñinicx yjugy'ajtin. Je jäy ajcxy huidibi Dios yjihui'nñ ymic'ajt adigïyipy jottigïyipy ymiid ajcxy Dios yjugy'ajtin. ⁷ Ca' nej mnayjihuihuiyb co ti nnimäy co copicy mma'xung'adipy hujemy, co Dios yjihui'nñ ymic'ajt xy'adigïhuipy xyjottigïhuipy. ⁸ Com je poj miiniyb hueñytimyma'amyty, e nmidoohuim co y'a'ich, e ca' nnejhuiyim ma choñ e ma ñicxy. Jadu'n nej je poj ypoxy e nganejhuiyim ma choñ, nañ tim jadu'n yjaty miid je Espiritu Santo, ca' nejhuiyim nej yjaty co adigïy jottigïy jäy.

⁹ Chi Nicodemo yajtihuimbijty:

—¿Nej tijy co yjadu'nity? Ca' nhujihuiyich.

¹⁰ Chi Jesús y'adzooy:

—Miich huindzin'ajtp ma yi judíojäy, ¿ti co ca' mhujihuiy jadyaabi tiy'ajt?

¹¹ Janch janch ich miich yam jadu'n nnimäy co ich etz nDeedich ngapxyp yi huidibi nejhuiygixypich, e nyejcpyich ajcxy tiy'ajt yi huidijaty ich ti n'ijxcxyich. Miich ajcxy judío ixpijciy ca' ajcxy mgöbijccixy ich ajcxy ndiy'ajt. ¹² Pen ca' miich ajcxy mibijccixy jada tiy'ajt huidibi njanimiydacypich huidibi yajpatp ya naaxhuiñ, ca' ajcxy mmibigipy co njanimiydagibich yi tiy'ajt huidibi tzajpjoty yajpatp.

¹³ Ca' ni pin ti y'oy tzajpjoty, ich je jäy tügpajc huidibi ti ndzoñich tzajpjoty, ti ngidägyich ya naaxhuiñ. ¹⁴ Jadu'n nej Moisés yaj'oyiy je pujx tza'nñ, e chi yajcruudzpety jim mijtigïduum jigix chögipy je jäy ajcxy ma je ahua'n iyujc chüchyii. Nañ tim jadu'n jäy ajcxy xyajcruudzpeda'nñich. ¹⁵ E tüg'óciy jäy ajcxy pinjaty xymijpidaacpich, ca' yi' jugy'ajtin ycixy ytigooy ni mina.

Dios ooy mijcajee tzocy jihuïy yi naaxhuiñyjäy

¹⁶ Ooy mijcajee Dios tzocy jihuïy yi naaxhuiñyjäy co yecy y'ung tügpajcpi miid jäy ajcxy ypocy ycixpi. Paady pinjaty mibijcp mijpidacp yi' y'ung, ca' yjugy'ajtin ycixipy ytigoyipy tücci'yi. Hue' janchtiy y'alma ypaadipy tüg jugy'ajtin huidibi ca' ni mina ycixipy ytigoyipy. ¹⁷ Dios ca' quejxy y'ung ya naaxhuiñ co tzaachytunipy yi naaxhuiñyjäy ajcxy miid ypocy ycixpi. Paady y'ung quejxy co yajpocyñihuáatzcixipy.

¹⁸ Je jäy ajcxy pinjaty mibijcp mijpidacp Dios y'ung, ca' ajcxy Dios chaachytunipy miid ypocy ycixpi. Je jäy ajcxy pinjaty ca' mibicy ca' mijpidägy Dios y'ung, pocycähuiipy ajcxy ma Dios, co ca' mijpidaci ajcxy Dios y'ung tügpajcpi. ¹⁹ Paady ycixpi Dios tzaachytuna'n mayjäy miid ypocy ycixpi, com co Dios quejxy y'ung miid ytiy'ajt ya naaxhuiñ, e ca' ajcxy mibijcy Dios y'ung, jadu'n je' anajty nej tüg jün huidi codiicxip jäy ajcxy ma chinaayin yjugy'ajtin. Per ca'p ajcxy je naaxhuiñyjäy mijpidacy je jün, jadu'n nej jihuüy ajcxy anajty yjacotcujcity co chinaaygixy agoodztuuyb, com je' co nigü tzachnijot'ajtcixy jibic-huinma'n. ²⁰ Com je jäy ajcxy huidibi jibic-huinma'n tzach nijot'ajtcixp, ca' ajcxy tzojci Dios ytiy'ajt, jadu'n nej jihuüy ca' chinähuaangixy ma jün ytiicxin. Ca' ajcxy y'amidoo'idani Dios y'ayuc, ca'ydi nigüexigy je jibicpi huidibi ajcxy ytumyb. ²¹ Je jäy ajcxy huidibi cuydumb Dios ytiy'ajt, je' ajcxy nimiripy Dios y'ung ytiy'ajt, jadu'n nej jihuüy jün nimiripy ma ytiicxy, huen jatymy nigüexigy co oy ytungixy etz co Dios ytiy'ajt ajcxy miidity ma yjot yhuinma'n.

Juan (el Bautista) tiy'ajt yejc ma jäy ajcxy miid Jesús ycixpi

²² Co jadu'n ytuni yjajti, chi Jesús ñicxy jim Judea naaxjot miid ydiscipulos ajcxy. Chi ajcxy jim yhuäcxippy. Jim ajcxy jäy yajniibejty. ²³ Nañ jadu'n Juan anajty yjääyajniibety jim Enón, com jim anajty ooy comni, e jim anajty jäy ymingixy etz ñiibejtcixy. ²⁴ Hue' jada jadu'n ytuni yjajti ca'ni anajty je Juan pidaaccixy pujxtigoty.

²⁵ Ca' ajcxy ñay'ayuc-huinjihuiyi nijëjity huidibi anajty Juan yaj'ixpijcy etz tüg jäy nej jëbi huaad ypocy ñayyajnihuädziyb ajcxy. ²⁶ Chi jada' ajcxy Juan nidzooñ, oy ajcxy paty, e chi ajcxy nimay:

—Huindzin, je jäy huidibi anajty miich jim miid jim'amy Jordán mijniinaxy, je huidibi miich anajty mnidiy'ajt'ajtpy co je' je' je Cristo, nañ ooy chachjäyyajniibety. E janch mayjäy y'ocnimujcin.

²⁷ Chi Juan y'adzooy:

—Ca' ni pin ni ti mic'ajt miidity, pen ca' Dios ni ti mic'ajt ymöyii. ²⁸ Miich ajcxy mnejhuiyb co nmınaañich co iich ca' njëjity je Cristo. Hue' janchtiy Dios xyquejxich jayijp co nnidiy'ajt'adipyich je Cristo. ²⁹ Co jäy ypicxy je yëydijc je' je' miid'idam je ytöxyjic. E je töxycapxpi huidibi ti yaj'oyiy je pijcin, ca' je' miid'ida'n je töxyjäy, jëyi co yjotcugiy co yöcmidoohui je töxyjäy ñäy co yjädy ma je' ytiyc co ypiğaani. Cristo jadu'n je' nipaady nej tüg töxyjäy ñäy, e je töxyjäy jadu'n je' nipaady nej Dios yjäy. Je Cristo ymiid'idaanipy Dios yjäy. Jadu'n iich nipaady nej tüg töxycapxpi, ti Dios yjäy nyajni'ixiyich jigix mijpidáaccixy je Cristo. Jotcujcich cham co je Cristo ti ymiñ, e ñicxy yi jäy ajcxy ma yi'. ³⁰ Ooy ytimycopicyity co Jesús ymij'ajt paatniy, e iich ndung ycijnipy ymayniipy.

Dios y'ung tzoon jiiby ma Dios

³¹ Chi Juan yjacminañ:

—Je Cristo huidibi jiiby tzoon ma Dios jacmij xpijcin miidity ca'ydi naaxhuiñyjäy ajcxy. Je jäy ajcxy huidibi ya naaxhuiñ ijtp, yminaaxhuiñyjäy ti yaj'ixpijgixy, e je' ajcxy ñidiy'ajt'ajtpy je naaxhuiñyjäy y'ixpijcin. Je Cristo tzoon jiiby tzajpjoty, jacmijcajee yi' ma y'ayuc ytiy'ajt ca'dyi pin. ³² Je Cristo ñigapxyp huidibi ti icy e ti midooy, e yi'y'ayuc ytiy'ajt ca' jäy ajcxy cöbigaangixy. ³³ Je jäy ajcxy huidibi cöbijcp Dios y'ung y'ayuc ytiy'ajt, je' ajcxy nigapxpejty co Dios ytiy'ajt janch yi'. ³⁴ Je Jesús huidibi Dios yquejx, ca'pxy Dios ytiy'ajt nigapxpejti, com Dios ti möy yi' y'ung yi' yjihui'n ymicc'ajt mijcajee. ³⁵ Dios Teedy chojcy yjihuiyb y'ung, e tüg'óciy ymic'ajt ytiy'ajt yi'ti yajmigo'ixiydäy. ³⁶ Je jäy ajcxy pinjaty mibijcp Dios y'ung, ymiid'ajtpy ajcxy y'alma je jugy'ajtin huidibi ca' ycixy ytigooy. Je jäy ajcxy pinjaty ca' capxymidooy Dios y'ung, ca' ajcxy y'alma miid'adipy je jugy'ajtin huidibi ca' ycixy ytigooy. Je'yi ypaadipy ajcxy Dios chip y'ejcin.

4

Jesús ñaybaati miid tüg töxyjäy jim Samaria

¹ Chi je Huindzin Jesús ayuc midoy jadu'n nej anajty je fariseojäy ajcxy ycapxcixy ymiydaaccixy co je Jesús jacmayjäy anajty yaj'ixpicy etz yajniibety ca'ydi Juan. ² Oy Jesús ca' anajty jäy yajniibety ci'm. Hue' janchtiy je' ydiscípulos anajty ajcxy jäy yajniibejtp. ³ E co Jesús jada nehuiiy, chi jim Judea choni, yhuimbijtni jim Galilea.

⁴ Co yhuimbijty, hue' anajty yjatytimyñaxihua'ñ jim Samaria. ⁵ Chi jada' yja'ty huington ma je mij cajp huidi xiijip Samaria, jim ma anajty tüg pi'ccajp huidi xiijip Sicar, mihuington je naax huidibi Jacob anajty ti möy y'ung José. ⁶ Jim anajty Jesús yajpaady ma je Jacob ñiigondac. Com ti anajty Jesús y'anucxiyñi miid je tüyöyii, chi y'ijxtacy jim ma je niigondac anajty. Hue' anajty xii jim cugihuaanip. ⁷ Chi jim yja'ty niigombi tüg töxyjäy. Chi Jesús yminañ:

—Ich yajni'uucc. ⁸ Com je' ydiscípulos ajcxy huidibi anajty Jesús yjaymiid'ajtip, ti anajty ñicxcixy cajpjoty juuyb pijcp.

⁹ Chi je töxyjäy y'adzooy huidibi anajty cogajpip Samaria:

—¿Na'amy co ich nii xypijctzoohuich? com miich hue' miich judíojäy, e samariajäy ich.

(Co yi judíojäy etz samariajäy ca' ajcxy ñaygodigiyigixy.)

¹⁰ Huin'it Jesús y'adzooy:

—Co ixypy m'ocnejhuüy je oybi huidibi Dios yejcyp miid miich ycixpi, e m'ocnejhuüy ixypy nañ jadu'n pin xypijctzoohuipy yi nii, janch co miich ixypy xyñimäyich: “ich yajni'uucc”. E ich miich ixypy nmooyb nii huidibi jugy'ajt yegipy huinixii.

¹¹ Chi je töxyjäy y'adzooy nimay Jesús:

—Huindzin, miich ca' mmiidity ti miid myajpidzimipy yi nii, e yi niijut ciicy yi' ooy. ¿Ma tity m'ocpada'ñ yi nii huidibi yajjugy'ajtp? ¹² ¿Nej jacniigi tity miich mij mnayajnaxyii, ca'ydi ich ajt n'ap ndeedy Jacob? Je'je' huidibi jada niigop yaj'oyii. Jacob etz y'ung y'anäg nii'uuc ma jada niigop, e nañ jadu'n yajni'uucy yhuaj y'iyuc ajcxy ya.

¹³ Chi Jesús y'adzooy nimay je töxyjäy:

—Tüg'óciy pinjaty nii'uucp ma jada niigop tidzi huib ajcxy jadüg'oc. ¹⁴ Yi jäy ajcxy pinjaty nii'uucp huidibi nmooybich, ca' ni mina ytidzihuüy, com hue' yi nii huidibi nyejcypich, ahuimbidity ma je jäy jadu'n nej tüg niigop huidibi yegam jugy'ajtin huidibi ni ca' ycixy ytigoy.

¹⁵ Chi je töxyjäy y'adzooy:

—Huindzin, ich mooyg yi nii, ca'ydi jabom jabom ndidziyijich, e ca'ydi n'ocjacmiinibich ma jada niigop nii yajpidzimbi.

¹⁶ Chi Jesús y'adzooy:

—Nicx yajtzon mñäy, e miid miin.

¹⁷ Chi je töxyjäy y'adzooy:

—Ca' mmiidityich nñäyich.

Chi Jesús y'adzooy:

—Janch tiy'ajt jadu'n nej miich mina'ñ, co ca' mmiidity mñäy. ¹⁸ Com ti miiddzinäy migoox yéydijc, e huidibi cham mmiid, ca' mñäy'adyii. Janch tiy'ajt jadu'n nej ti m'adzooy.

¹⁹ Chi je töxyjäy yminañ:

—Huindzin, cham nhuinjihuiyich co miich je' tüg huidibi Dios yhuij'ajt ycujc'ajt miid. ²⁰ Ich ajcxy n'ap ndeedyich hue' je' yminañ co jébi ya huaad ich ajcxy nDios'ojadajtcixyich ma jada yaabi huigombi copjijp. E miich ajcxy judíojäy yminaangixy co jim Jerusalén je' ma huaad jébi nDios'ojadajtim, ca' jac ma.

²¹ Chi Jesús y'adzooy nimay je töxyjäy:

—Töxyjäy mijpidäg ñich n'ayuc. Co ypadamy je xii je tiempo co ni ya ma miich ajcxy mDios'ojadajttac, e ni jim Jerusalén jäy ca' ojadadipy ajcxy yi Dios Teedy. ²² Miich ajcxy ca' tiy'ajt mnejhuiygixy nej jëbi huaad mDios'ojadajtcixipy. ñich ajcxy judíojäy nejhuiybich ajcxy je tiy'ajt nej jëbi huaad nDios'ojadajtim. Com tüg judíojäy je huidibi yajñidzooctahuam je jäy ajcxy y'alma ma Dios. ²³ Ypadamy je xii je tiempo, e jada jëdu'n je tiempo co je huidibi ajcxy tiydudägy Dios ojadajtp, y'ojadadipy ajcxy Dios miid oyjot oyhuinma'ñ etz miid Dios ytiy'ajt. Com yi Dios Teedy y'ixtaayb yi jadu'mbi jäy huidibi ojadadiib miid oyjot oyhuinma'ñ. ²⁴ Dios ca' ñinicx miidity, jadu'n je' nej poj ca' yaj'ixy. Je jäy ajcxy pinjaty ojadajtp Dios, copicy co huen ojadajtcixy miid tudägyjot tudägyhuinma'ñ, etz miid Dios ytiy'ajt.

²⁵ Chi je töxyjäy yminañ:

—Ñich nejhuiyb co je Mesías ymina'ñ huidibi naydijaanip Cristo, co je' yminipy, huin'it xyajni'ixihuaanim tüg'óciy tiy'ajt.

²⁶ Chi Jesús y'adzooy:

—Ñich jëdu'n je Cristo huidibi miich miidmiydacyp.

²⁷ Chi jada' yja'ty ajcxy Jesús ydiscípulos ajcxy. Chi ajcxy ooy jihuiy ti anajty co Jesús je töxyjäy miidmiydägy, e ni pin ca' yaj'amidooy ti anajty chojcyp ti anajty yñimiydacyp miid yi töxyjäy. ²⁸ Chi je töxyjäy jim ymajt ixmajch, chi ñicxy cajpjoty oy mayjäy nimay:

²⁹ —Mingix, jam tüg yëydijc ixim. Ti ñich yi' xyajnimaydäyich tüg'óciy tijaty ti nduñich. ¿Nej ca' jada' yi' jëjity je Cristo?

³⁰ Chi choñ ooy mayjäy cajpjoty, ninicxy ajcxy Jesús. ³¹ Yam anajty ajcxy Jesús ydiscípulos chachnimäyii adzip:

—Huindzin, occaay.

³² Chi Jesús y'adzooy:

—Ñich nmidich tüg caayin uucin huidibi miich ajcxy ca' mnejhuiygixy.

³³ Paady je' ydiscípulos ajcxy tzachhuinmay, ac jëyi ajcxy, nayñimayigixy miñ xipy:

—¿Nej ti pinjaty yajcayyii yaj'ügyii?

³⁴ Chi Jesús yminañ:

—Jotcujc nayjihuiyijich co ti nguynich Dios chojcin. Com yi' ti xyquexyich ya naaxhuiñ, e nguýdúunibich yi' y'ané'min. ³⁵ Miich ajcxy minaangixp co jactigoy'ijtni jamidaax po' mina cosecha nyajpidicim. Oc-huinmay miich ajcxy, ñich nmina'ñich, jëbi nyajpidicim yi cosecha cham cham. Huindicxcix yi mayjäy huidibi xyñigidaacim choñ cajpjoty. Ni'ixi yi' ajcxy y'ity co amido'idaangixy Dios y'ayuc. Jadu'n ajcxy nipaty nej tügi cosecha huidibi ti ymijaani, jëbi nyajpidicim. ³⁶ E pinjaty cosecha yajpidicp ypaatyp ajcxy ymuju'ñ. Nañ tim jadu'n miich ajcxy huidibi myajmibijcy yi jäy ajcxy co ñich je' je Cristo, mbaadipy ajcxy jotcujc'ajtin, etz huidibi ajcxy xymibijcpich xymijpidaacpich ypadamy ajcxy y'alma jugy'ajtin huidibi ca' ycixy ytiigooy. Tim jadu'n nej je jäy ajcxy huidibi niip etz huidibi cosecha yajpidicp yjotcugiygixy miid co je cosecha ti y'ity, nañ tim jadu'n je jäy ajcxy huidi cojaay jecy'ajty jada Dios y'ayuc etz miich ajcxy jotcugiygixy aguipxy co yi jäy ajcxy xymijpidägyich. ³⁷ Paady tiy'ajt je ayuc huidibi minam: “Tüg jäy niip etz jadüg jäy cosecha yajpidicp.” ³⁸ ñich ti nguexyich miich ajcxy myajmibigipy jäy huidibi ti paady Cristo ytiy'ajt ma Dios ñecy. Yi Dios y'ayuc ycojaaybi ti möy je jäy Dios ytiy'ajt, e miich ajcxy je' mbubedipy co myajmibigipy co ñich je' je Cristo.

³⁹ Mayjäy huidibi cogajpip jim Samaria ymijpidac ajcxy je Jesús co je' je' je Cristo, miid co je töxyjäy anajty ti ymina'ñ: “Ti yi' xyajnimaydäyich tijaty ñich ti nduñich.” ⁴⁰ Co je samariajäy ajcxy yjädy ma Jesús yhuinduu, chi ajcxy cohuaniiy huen hui'my. Chi Jesús jim yhui'miyy mejtz xii. ⁴¹ Janch mayjäy ooy nigí mibijcy mijpidacy Jesús, co je' je' je Cristo co ajcxy ci'm midomiydacy je Jesús. ⁴² Chi ajcxy nimay je töxyjäy:

—Canan jëyi co miich ti xyajnimäy ñich ajcxy, paady ycixpi ñich ajcxy yam nmibicyich. Nañ ti ñich ajcxy yam ci'm n'amido'ityich, paady ñich ajcxy nejhuüy co janch jada yjëjity je Cristo huidibi yajñidzögam yi naaxhuiñyjäy ajcxy y'alma ma Dios.

Jesús yajtzooz tüg gobierno mijtungmiidpi ymang

⁴³ Mímejtz xiibi anajty co Jesús chooñ jím, nicxy jím Galilea. ⁴⁴ Jesús ci'm anajty ti ymina'ñ:

—Co jáy ajcxy huidibi miid Dios yhui'ajt ycuyc'ajt yajpaady ma yci'mgajp, ca' pin yajmij'adyii. ⁴⁵ Co Jesús yja'ty jím Galilea naaxjot, huidi anajty ajcxy jímip agujc jotcuyc ajcxy cöbijcy Jesús, com ti anajty ajcxy ijxcixy tijaty mijhuinma'ñ anajty ti tuñ jím Jerusalén xiijoty, com nañ ti je' anajty ajcxy jím y'oygixy xii'ajtpi.

⁴⁶ Chi yhuimbijty Jesús jadüg'oc jím Caná ma Galilea ñaaxjot, ma je nii yajvinocojy. Jím Capernaum anajty tüg rey mijtungmiidpi huidibi anajty y'ung píjciip. ⁴⁷ Co je' nejhuiy co Jesús anajty ti yhuimbity Galilea co anajty ti y 'oy Judea, chi ninicxy, e chi cohuaniiy co Jesús huen nicxy y'ung tzoyiyii huidibi anajty ögaanip. ⁴⁸ Huin'it Jesús yminañ:

—Pen ca' ixipy ti m'ixy mijhuinma'ñ etz tijaty ixcpejt, ca' ixipy mmibicy.

⁴⁹ Chi y'adzoy je rey ymijtungmiidpi:

—Huindzin, tun may'ajt ninicx ich n'ung ma ca'ni y'o'cyñi.

⁵⁰ Chi Jesús yminañ:

—Huimbit ma mdijc, je m'ung jugy'ajtni je'.

Chi je yëydijc mibijcy Jesús nej anajty ti ñimäyii, chi ñicxy jadüg'oc ma ytijc. ⁵¹ Nicxnip anajty co ytumbi ajcxy oy yijpcobadiyii, e chi ñimaayi co je' y'ung ti anajty y'agidägy.

⁵² Chi yaj'amidooy ajcxy ti hora anajty ti yhuaadjihuüy, chi ajcxy y'adzooy:

—Ixiiy cujc yxii naxy je toyii y'ixmajtzní.

⁵³ Paady je ungedeedy jihui'ñybijcy co huin'it je' jada' je tiempo co anajty Jesús ti ñimäyii: “Je m'ung jugy'ajtni je'.” Chi jada' mibijcy mijpidacy Jesús miid tüg'óciy jáy huidijaty anajty yajpat ma yjiiñ ytijc.

⁵⁴ Je' je' je mímetzpi mijhuinma'ñ mij'oy'ajt huidibi Jesús ytun co chooñ jím Judea ñicxy jím Galilea ñaaxjot.

5

Jesús yajtzooz tüg jáy huidibi anajty yci' ytecy xuuxy

¹ Co jadu'n ytuni yjajti jím Jerusalén anajty ajcxy judíoájy tungixy tüg mijxii. Huin'it Jesús jím ñicxy jím Jerusalén. ² E jím Jerusalén jím anajty nii abojtzig y'ity, mihuingon je poch aguu huidi xiijip puerta de las ovejas. Je it hue' anajty yajtijy hebreo'amy Betesda, e ymiid anajty migoox it yhuinguembetpa't. ³ Ma je huinguembetpa't mayba'mjäy anajty jím chachcöгнаaygixy; je huintzpi, cüducp tecytucpi, cixuxy tecyxuxypi, huidibi anajty ajcxy jím tzach'ahuijxp mina je nii y'ocpu'xhuimbity. ⁴ Com tüg ángel anajty yhuimbety y'adijy ma je nii abojtzig y'ity, chi je nii yajyücx. E je jáy pinjaty anajty jayijp jiiby niijoty tigiiyb co je nii yücx, huin'it anajty ajcxy choocixy, oy ixipy ti pa'm ajcxy tím miidity. ⁵ Jím anajty tüg yëydijc hue' anajty ti ypa'mgögnäy iipx majmoxc tugiiig jímijt. ⁶ Co Jesús ijxy jím ycögnäy, ijxcajpy co anajty je' jecyip chachmijtacni, chi nimay:

—¿Nej mdzögambi?

⁷ Chi je pa'mjäy y'adzooy:

—Huindzin, ca' nmiididyich tüg yëydijc pin ich xypidägipy jiiby niijoty co anajty nii y'ahuidijtcoty. E paady ycixpi co oy ich jím njamechich ma yi nii, ti huingbi ñitigiiyñi.

⁸ Chi Jesús yminañ:

—Pidig, yajpidig yi mmaabejt, etz tüyöychon.

⁹ Chi mic'amy choocy, chi je' ymaabejt yajpidigy ytigiiy yöybi najxpi janch mic oy. Hue' anajty tüg sábado xii co choocy. ¹⁰ Paady je judíoájy ixcicytjic ajcxy nimay je huidibi anajty ti chögy:

—Hue' yam sábado xii, paady ca' jadu'n ñigo'aducyity jadu'n nej m'idich co mmaabejt mdzimhuidity.

¹¹ Chi y'adzooy je':

—Je jäy tiibi iich xyajtzögy, yi' iich jadu'n ti xyñimäy: “Yajpidig yi mmaabejt etz tüyöychoon.”

¹² Chi ajcxy y'amidooy:

—¿Pin miich jadu'n ti xyñimäy: “Yajpidi yi mmaabejt etz tüyöychoon”?

¹³ Per je tiibi anajty chögy, ca' anajty je' nejhuüy pin je' anajty. Com ti anajty Jesús niyöydigooyñi ma je mayjäy huidibi anajty ajcxy jim tzachjajtip ma je it. ¹⁴ Chi jada' jacomjegy minaybaatti Jesús jim ma Dios ytijc, e chi Jesús yminañ:

—Cuentipic nej ti mdzögy, ca' ni ti bocy mjactunipy. Co pocy mjactunipy ca' yjegyity co tim nigü jibic nicxy mjaty.

¹⁵ Chi je yëdyjc ñicxy oy je' yajnimäy je judío ixpicytije co hue' je' anajty Jesús, je huidibi anajty ti yajtzögyii. ¹⁶ Paady ycixpi je judío ixpicytije anajty tzach'ixhuidijtcixy tzachpahuidijtcixy je Jesús, e yaj'ögaangixy miid co anajty jäy ti yajtzögy sábado xii.

¹⁷ Chi Jesús yminañ:

—Iich nDeedy tumb je' cham, ca' ypooxxy, paady ycixp iich nañ jadu'n nduñich cham ma miich ajcxy sábado xii.

¹⁸ Co Jesús jadu'n yminañ, paady ycixpi je judío y'ixpicytije ajcxy nigü yjacjtotma'tcoty, ytimy yaj'ögamy anajty aj y Jesús. Ca' ajcxy jadu'n yjotcujcity co anajty Jesús ca' cuyduñ judíojäy ajcxy ytiy'ajt nej ajcxy sábado xii yajmij'ajtcixy, etz co jadu'n yminañ: “Dios yi' nDeedy'ajtypich.” Paady ycixpi ajcxy judío y'ixpicytije yminañ co Jesús ci'm anajty ytüghua'ñ miid Dios.

Dios ymooy je y'ung ymic'ajt

¹⁹ Chi Jesús yminañ:

—Janch janch iich miich ajcxy yam jadu'n nimaaygixy co iich Dios nDeedy'ajtypich. Ca' huaad ti nduñich miid ngi'mjot ngi'mhuinma'ñich. Jëbi janchtiy nduñich huidibi n'ijxpyich Dios Teedy ytumy. Huidibi Dios Teedy ytumyb, ndumybich com Dios yi' nDeedy'ajtypich. ²⁰ Com yi Dios Teedy ooy yi tzocy jihuü yci'm'ung, paady xya-jni'ixiydaaybich tüg'óciy yi huidibi ytumyb. E nañ xyajni'ixihuaambich jacmijjatypi mijhuinma'ñ, ca'ydi jadaaabi mijhuinma'ñ nej ajcxy ti m'ijxycixy nej jada pa'mjäy ti chögy, paady ycixpi nigü mhuinmayipy ajcxy. ²¹ Jadu'n nej Dios Teedy yajjugypicy yi o'cpi, e chi yajtzinäy jadüg'oc. Nañ jadu'n iich anajty ndimymöhuamyb. ²² Com je Dios Teedy ca' je' ci'm ocyajciyöyaani ocyajtecyyöyaani jäy ajcxy ypocy. Hue' tüg'óciy je ymic'ajt xyajciidigiyaayich co iich ndiydunipyich tüg'óciy naaxhuiñjäy, com Dios nDeedy'ajtypich. ²³ Hue' tüg'óciy je ymic'ajt xyajciidigiyaayich, jigix tüg'óciy jäy xyajmij'adipyich. Je jäy ajcxy huidibi ca' xyajmij'ada'ñich, nañ ca' ajcxy yajmij'ada'ñ Dios Teedy huidibi xyquejxich ya naaxhuiñ.

²⁴ Janch janch iich miich ajcxy yam jadu'n nimaaygixy: Co hueñypinjäyity, pinjaty xy'amido'ijtich n'ayuc, e ymibijcyp ymijpidacyp je tiibi xyquejxyich ya naaxhuiñ, ymiid je'je y'alma jugy'ajtin huidibi ca'ycixipy ytigoyipy, e ca' Dios Teedy chaachytuna'ñyii miid ypocy ycixpi. Hue' janchtiy co y'ögipy, chi janchtiy jadügtecy yjugypigipy.

²⁵ Janch janch iich miich ajcxy jadu'n nimaaygixy co yi xii tiempo paatnipy, e cham jëdu'n ti paady, co yi jäy ajcxy tiibi y'o'ccixy ymidohuipy yi n'ayucich, co anajty ngapxyich, com Dios yi' nDeedy'ajtypich. Pin jäy anajty midoob n'ayucich jugypigip jadüg'oc ajcxy.

²⁶ Com yi Dios Teedy mic'ajt miid jëbi yajjugypicy jäy tiibi y'o'ccixy. Nañ Dios ti xymöyich ymic'ajt jëbi huaad nyajjugypicyich jäy tiibi y'o'ccixy, com Dios iich nDeedy'ajtypich.

²⁷ Ti Dios xymöyich ymic'ajt jëbi ndiyduñich je jäy ajcxy miid ypocy ycixpi, com iich je' je jäy huidibi tzoon tzajpjoty. ²⁸ Ca' ooy jada ayuc tiy'ajt mhuinmaaygixy. Com ypaadipy je xii je tiempo co je huidijaty ajcxy yajpatp ma naaxtigiydac, ymidohuipy ajcxy n'ayucich co iich anajty nmigapxyich ajcxy. ²⁹ Chi ypidzimipy ajcxy ma ñaaxtigiy. Je' ajcxy huidibi anajty oybi ti tungixy, jugy'adip ajcxy y'alma jadüg'oc. Je' ajcxy huidibi anajty jibicpi ti tungixy ypaadipy ajcxy tzaachypi miid ypocy ycixpi.

Dios tiy'ajt yejc co Jesús ymiid anajty mic'ajt

³⁰ Ca' ni ti huaad nduñich miid ngi'mmic'ajtpich ngi'm'ayucich. Je ayuc tiy'ajt huidibi nmidooybich ma Dios Teedy, jada ayuc tiy'ajt miid nyajciyöya'ñich nyajtecyyöya'ñich jäy ajcxy ypocy. Jadu'n tiydudägy nduna'ñich, com ca' iich nduñich ngi'mdzójcínich. Yi' iich ndumyb nej Dios Teedy tzocy, yi' huidibi xyquejxich ya naaxhuiñ. ³¹ Co ixypy iich ci'm nayñigodiy'ajt'adyiijich, ca' ixypy miich ajcxy mmijpidägy n'ayuc ndiy'ajtpich. ³² Com huingsi yi' huidi xyñigodiy'ajt'ajtpich co iich Dios ymic'ajt nmiididyich, e nejhuñiybich co janch yi' huidi xyñigodiy'ajt'ajtpich. ³³ Miich ajcxy ti mguexy je migügtijc ajcxy tiy'ajtpijcpi ma Juan. E je' yejc tiydudägy ayuc tiy'ajt janchypí pin iich. ³⁴ Co jadu'n nmína'ñich co Juan xyajnidiy'ajt'atyich co iich je' je Cristo, ca' jadu'n nmína'ñich co ooy ycopicyty co tüg jäy xyñidiy'ajt'adipyich. Com Dios ci'm xyñidiy'ajt'ajtpich. Jadu'n ajcxy nyajnimäy jada tiy'ajt, jigix ajcxy m'alma nidzoocin paadipy ma Dios. ³⁵ Je Juan mictägy ooy Dios y'ayuc najtzcapxiyi, jadu'n je' anajty nej tüg jin' hidibi tiicxp jajp, e miich ajcxy tüg jaxigy ti mxondaaccixy miid yi' y'ayuc ytiy'ajt. ³⁶ Nigi iich Dios y'ayuc ytiy'ajt nmiididyich ca'ydi Juan. Yi' mijhuinma'ñ hidibi ndumybich miid Dios Teedy ymic'ajt. yi' xyajniyuexigibich co iich ya naaxhuiñ Dios Teedy xyquejxich. ³⁷ Yi' Dios Teedy tiibi xyquexyich, yi' ci'm yejc tiy'ajt co iich je' je Cristo. E ni caminaabi miich ajcxy yi' mgamidoohui ycapxin, nañ ni caminaabi miich ajcxy Dios Teedy yhuñijjip maga'ijxi. ³⁸ Ni ca' miich ajcxy nmiidity yi' y'ayuc ma mjot mhuinma'ñ, miid co miich ajcxy ca' xymijpidägyich co iich je' je jäy hidibi Dios ti quexy ya naaxhuiñ. ³⁹ Ijxtaaygixy jada tiy'ajt ma Dios ylibro, com jiiby mdijy miich ajcxy mbaadipy tiy'ajt nej jébi ajcxy mjogy'adipy co anajty ti m'o'ccixy, e yi' Dios ylibro nañ iich yi' xyñigapxp. ⁴⁰ E ca' miich ajcxy mgöbigaangixy iich n'ayuc iich ndiy'ajt, jigix ajcxy jugy'ajti mbaadipy hidibi ca' ycixy ytigooy.

⁴¹ Dios xycömayipyich, ca' ngöbigipyich co naaxhuiñjy äy ajcxy xycömayipyich. ⁴² Nnejhuñiybich, nej miich ajcxy mjot mhuinma'ñ nmiidity, co ca' ajcxy Dios ytiy'ajt mguyduuni. Ca' ajcxy migüg mdzojccixy mjhuñiygixy jadu'n nej Dios tzocy jihuñy jäy ajcxy. ⁴³ Iich ti nmiñich miid nDeedyich ymic'ajt. Miich ajcxy ni ca' xycöbicyich. Pen ji huingsi jäy ymiñ miid yci'mmic'ajt, ca' miidity Dios ymic'ajt, je' janchtiy miich ajcxy ooy mijpidägaangixy. ⁴⁴ Ca' mjátcixipy nej iich miich ajcxy xymijpidägibich, miid co ajcxy ci'm mdzachnaygömayáangixy ac miich ajcxy jëyi. E co ixypy miich ajcxy xycöbiga'ñich, huin'it ajcxy Dios xycömayipy. ⁴⁵ Ca' ajcxy nmína'nipy co iich miich ajcxy nxihuaamy ma Dios Teedy yhuinduu. Je Moisés miich ajcxy yxihuaam ma Dios, je hidibi miich ajcxy mdzachmijpidaacip ytiy'ajt. ⁴⁶ Pen mmijpidaacyp ixypy ajcxy je Moisés y'ayuc ytiy'ajt, nañ jadu'n ixypy iich miich ajcxy xymijpidägyich. Com Moisés iich yi' xychachñimiydaacich ma yi' ñecy. ⁴⁷ Pen ca' mmijpidaaccixy Moisés ñecy, ca' mjátcixipy nej ajcxy mijpidáaccixy iich n'ayuc.

6

Jesús ymoy jäy jicxy picy migoox mil

¹ Co jadu'n ytuni yjajti, chi Jesús ñicxy jim Galilea mejy ninaxy, hidibi nañ jadu'n xiijip Tiberias mejy. ² Janch mayjäy anajty Jesús ypanicxyii axam co anajty ajcxy ixy je mijhuinma'ñ tijaty anajty Jesús ytumyb ma mayba'mjäy. ³ Chi Jesús ypejty ma tüg cögop, chi jim y'ixtacy miid je' ydiscípulos ajcxy. ⁴ Tim huingsi anajty je pascuaxii hidibi anajty judíojäy ajcxy ytumyb. ⁵ Chi Jesús ijxy co janch mayjäy ti ypamiinyii, chi nimay Felipe:

—¿Ma jada' caayin uucin n'ocjuyim, ti nyajcaayim jada mayjäy hidibi ti xypamiinim?

⁶ Hue' anajty y'oc'ijxmadzamy nej Felipe y'oc'adzooy. Jesús anajty ñejhuñiyb yajxon ti anajty ytunamy. ⁷ Chi Felipe y'adzooy:

—Ni yachuaadihuip mejtz mil peso meeñ, co ixypy ajt n'ocjuyaanim caayin uucin, e nmöhuaanim cijp tüg'aa cijp mejtz'aa jëyi.

⁸ Tüg Jesús ydiscípulo, hue' anajty yxii Andrés, Simón Pedro y'uch, je' jadu'n nimay Jesús:

⁹ —Cha tüg pi'c'anäg huidibi miid migoox cebada tzajcaagy, e mejtz acx ung. E ni ycatiijity yi' yi migooxpi tzajcaagy, etz mejtz acx ung miid jada mayjäy.

¹⁰ Chi Jesús nimay je' ydiscípulos ajcxy:

—Yaj'ixtacta' yi mayjäy.

Miiyjot anajty ooy ma je it.

Chi ajcxy y'ixtactay. Hue' jada' anajty ajcxy ñaybadyii migoox mil ac yëydijctijc, abicy yi töxyjäydijc etz y'ung y'anäg ajcxy. ¹¹ Chi Jesús je tzajcaagy conïgy, chi yajnaxty Dioscojuyip, chi yajnidagiiyday je jäy ajcxy huidijaty anajty jim iñaaayb, mooy jadu'n nej pin tim tzocy je tzajcaagy etz je acx. ¹² Co je mayjäy cayday, chi Jesús nimay je' ydiscípulos ajcxy:

—Yajmujcta' ajcxy yi cayduc, ca'ydi huaad ni ti y'iyoy.

¹³ Chi ajcxy yajmujctay je cayduc, e yaj'ujch ajcxy majmetz mijjaty cach miid je tibi anajty yconaxy je migooxpi tzajcaagy. Je' anajty jadu'n ti yjacconaxy. ¹⁴ Co ajcxy y'ijxy je mijhuinma'ñ huidibi anajty Jesús ti tuñ, chi je jäy ajcxy yminañ:

—Janch jëdim jada je yëydijc huidibi Dios y'oy'ajt ymic'ajt miid, je huidibi anajty miinam ya naaxhuiñ.

¹⁵ Co Jesús nejhuy co ajcxy anajty yajrey'ada'ñyii, chi jada' jadüg'oc huinhuäctuttay je mayjäy. Chi ñicxy naydüg ma tüg yuugjot.

Jesús yöy ñihuingíxy

¹⁶ Co oy chu'iiyñi, chi Jesús ydiscípulos ajcxy y'idaacni ma mejypa'. ¹⁷ Chi ajcxy ybarcotigiiy, ñicxy ajcxy jim Capernaum jadügpi mejypa'. E ti anajty ycoodziyñi, e ca'ni anajty Jesús ajcxy ñihuimbidiini. ¹⁸ Chi tüg mijpoj ymiñ, chi je mejy ytigiiy oy yücxpi. ¹⁹ Ti anajty ajcxy ytüyöy oy migoox tudujc kilómetro co ajcxy ijxy Jesús yhuingoñ ma je barco, hue' anajty ytüyöy mejyhuingíxy. Chi ajcxy ooy ñay'adzigiiyi. ²⁰ Chi Jesús yminañ:

—ñich yi', ca' mdzigiiygixy.

²¹ Chi ajcxy jotcujc Jesús yajbarcotigiiy. Chi tim mic'amy ajcxy ymejch jim ma mejypa' ma anajty ajcxy ñicxcixy.

Mayjäy ixtaay Jesús

²² Je mayjäy huidibi anajty ajcxy ti yhui'miy jim'amy y'ahuin, y'ijx ajcxy co ac jëyi Jesús ydiscípulos ajcxy ytigiiy ma tüg barco, e Jesús ca' anajty ti ytigiy barcojoty miid je' ajcxy. Ac jëyi anajty ajcxy ti choongixy barcojoty. ²³ Je com jabom nijejty barco huidibi anajty jim tzomb Tiberias, ti anajty yjädy mihuingon ma je it, ma anajty Jesús ti yajcaaygixy je mayjäy miid je Huindzin Dios ymic'ajt, huin'it co Dios mibijctzoy. ²⁴ Chi je mayjäy ajcxy ijxy co ca' anajty jim Jesús, ni ca' anajty jim je' ydiscípulos ajcxy. Chi ajcxy ybarcotigiiyday, chi ajcxy oy ixtaaygixy Jesús jim Capernaum.

Jesús ymöhuary jäy ajcxy jugy'ajtin huidibi ca' ycixipy ytigoyipy

²⁵ Co ajcxy minaybaati Jesús mejy ñinaxy, chi ajcxy nimay:

—Huindzin, ¿mina miich ya ti mmiñ?

²⁶ Chi Jesús y'adzooy nimay je mayjäy ajcxy:

—Janch janch co ñich miich ajcxy yam jadu'n nimaaygixy co miich ajcxy xy'ixtaaybich, canan yi' ycixpi co ajcxy ti m'oc'ixy yi mijhuinma'ñ huidibi ti nduñich, paady ycixpi miich ajcxy xy'ixtäyich co ajcxy nyajcay cüxy miid tzajcaagy.

²⁷ Chi Jesús yjacminañ:

—Ca' myajjotmaygojcixy yi jicxy picy huidibi cijxp tigooyb. Yi' janchtiy mijottigooygixy yi jicxy picy huidibi xymöhuiipy yi jugy'ajtin huidibi ca' ycixipy ytigoyipy tücci'yi. ñich miich ajcxy je jugy'ajtin nmöhuiibich huidibi ca' ycixipy ytigoyipy tücci'yi, com ñich je' je jäy huidibi tzoon tzajpjoty, e Dios Teedy xymic'ajtmooyich, jëbi ñich miich ajcxy nmöy jugy'ajtin huidibi ca' ycixipy ytigoyipy tücci'yi.

²⁸ Chi ajcxy nimay Jesús:

—¿Ti ñich ajcxy jëbi huaad nduñ, nej jëbi ñich ajcxy Dios xymijotcujc'aty?

²⁹ Chi Jesús y'adzooy:

—Dios chojcpy co miich ajcxy xymibicyich, com Dios xyquejxich ya naaxhuiñ.

³⁰ Chi ajcxy nimay Jesús:

—¿Ti ijxpejt mdunamy miid ñich ajcxy, jëbi ñich ajcxy n'ixipy Dios ymic'ajt etz ñich ajcxy nmibigipy co miich je' je Cristo? ¿Ti mijhuinma'ñ mdunamy? ³¹ ñich ajt nmij'ap nmijteedy ajcxy jecy'ajty yjicxy pijc ajcxy je maná jim ma títznaax'it. Jadu'n ymiñ jaybety ma jadu'n ymina'ñ: “Dios yejcpy jicxy picy huidibi tzoon tzajpjoty.”

³² Chi Jesús y'adzooy:

—Janch janch ñich miich ajcxy yam jadu'n nimaaygixy co canan je' je' je Moisés huidibi miich ajcxy xymooyb je jicxy picy janchypi huidibi tzomb tzajpjoty. ³³ Je jicxy picy huidibi Dios yejcpy huidibi tzomb tzajpjoty, je' je' huidibi jugy'ajtin moy je naaxhuiñy-jäy huidibi ca' ycixipy ytigoyipy tücci'yi.

³⁴ Chi ajcxy nimay Jesús:

—Huindzin, ñich ajcxy mooyg je jicxy picy janchypi jabom jabom huinixii.

³⁵ Chi Jesús yminañ:

—Ñich jëdu'n je jicxy picy huidibi miich ajcxy xymöhuip jugy'ajtin huidibi ca' ycixipy ytigoyipy tücci'yi. Co jäy ajcxy xyñimiinich, e xymijpidägyich, huin'it ca' yi' ajcxy yuböc-coda'ñyii niminaxii, e co jäy ajcxy xymibicyich, ca' yi' ajcxy ytidzihua'ñyii niminaxii. ³⁶ Com ti ñich miich ajcxy nimäy, oy ñich miich ajcxy ti xyja'ijxcixy, per ca' mibijccixy. ³⁷ Tüg'óciy pinjaty ñich nDeedy yquexyp ma ñich, xyñimimbich yi' ajcxy. E pinjaty xyñimimbich etz xymijpidaacpich, ca' ñich yi' ajcxy n'ixitijy. ³⁸ Canan paady ycixpi ñich ti ndzooñ tzajpjoty ngidägyich ya naaxhuiñ co nduna'ñich ngi'mhuinma'ñ. Hue' janchtiy yi' ndunaamyich nDeedyich y'ayuc ytiy'ajt, com yi' xyquejxich ya naaxhuiñ. ³⁹ Yi' jadu'n tzojcp ñich nDeedy huidibi xyquejxich ya, co ñich ca' ni pin nyajtigoyipyich, yi' huidijaty xymooybich. Hue' janchtiy yi' ajcxy nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁰ Dios Teedy ti xyquexyich ya naaxhuiñ e yi' jadu'n tzojcp co pin jäy ñich anajty xy'ijxpich, e xymijpidaacpich, ymiid'adipy je' ajcxy jugy'ajtin huidibi ca' tücci'y ycixipy ytigoyipy. Hue' janchtiy nyajjugypigipyich ajcxy jadüg'oc co anajty je naaxhuiñybi ti yhuaad'ajtni mina anajty ytigadza'ñ.

⁴¹ Chi je judíojäy ajcxy ooy yajtzibiiy yajcapxiy co anajty Jesús jadu'n ti ymina'ñ: “Ñich je' je jicxy picy huidibi tzoon tzajpjoty.” ⁴² Jadu'n anajty ajcxy chachmina'ñ:

—¿Nej ca' je' yjadaajity je Jesús, je José y'ung, je huidibi ajt ytaj yteedy n'ixy'ajtim? ¿Nej co jadu'n ymina'ñ: “Ñich ti ndzooñich tzajpjoty?”

⁴³ Chi Jesús y'adzooy:

—Ca' myajtzibiiygixy myajcapxiygixy ac miichiy ajcxy. ⁴⁴ Ni pin jäy xycaniminipyich, pen ca' jayjyp Dios Teedy huinma'ñ ymöyii co xymijpidägibich. E co xymijpidägibich, chi nyajjugypigipyich jadüg'oc co anajty naaxhuiñybi ti yhuaad'ajtni mina ytigadzipy. ⁴⁵ Com jadu'n ymiñ jaybety ma Dios ñecy huidibi je jäy ajcxy anajty Dios ytiy'ajt miid huidibi jecy'ajty yjaay co Dios yaj'ixpigamy je jäy ajcxy tüg'óciy. Paady ycixpi tüg'óciy jäy huidibi midoob Dios y'ayuc etz y'ixpijcpy Dios ytiy'ajt xymijpidägibich ajcxy.

⁴⁶ Ca' ni tüg jäy ti ixxy yi' Dios Teedy. Jëyi je jäy tügpajc huidibi ti choñ ma Dios, yi' je' ti ixxy yi' Dios. ⁴⁷ Janch janch ñich miich ajcxy yam jadu'n nimaaygixy co pinjaty xymibijcpich xymijpidaacpich, ymiid yi' ajcxy yjugy'ajtin huidibi ca' ycixipy ytigoyipy tücci'yi. ⁴⁸ ñich jëdu'n je jicxy picy huidibi jugy'ajt mooyb je jäy huidibi ca' ycixipy ytigoyipy tücci'yi. ⁴⁹ Miich ajcxy mmij'ap mmijteedy yjicxy'ajti ycaagy'ajti ajcxy je maná jim títznaaxtuum'it jecy'ajty. E chi ajcxy y'o'ctay. E ni ca' ajcxy jugy'ajtin paty huinixiibi. ⁵⁰ Je jicxy picy huidibi nnigapxypich huidibi tzoon tzajpjoty, co jäy ajcxy jicxipy, ymiid'adipy ajcxy je jugy'ajtin huidibi ca' ycixipy ytigoyipy tücci'yi. ⁵¹ ñich jëdu'n je jicxy picy huidibi ti choñ tzajpjoty, etz ti ycidägy ya naaxhuiñ huidibi

jugy'ajtín yejcp. Co jäy ajcxy jïcxyr je jïcxy pícy, ymíid'adípy ajcxy je jugy'ajtín huídibi ca' ycixípy ytígoyípy tüccí'yi. Je jïcxy pícy huídibi nyegaamyích míid naaxhuiñjáy ajcxy ycixpi, je' je' je nínícxích.

⁵² Chi je judío y'ixpícytíjc ajcxy ooy yaj'ayucyooñ yajcapxyooñ, ac je'yi ajcxy ñayñimáayígíxy:

—¿Nej jada yéydíjc tíjy yí' ñínícx njïcxy'ajtím?

⁵³ Chi Jesús ymíinañ:

—Janch janch co íich miích ajcxy yam jadu'n nimaaygíxy, pen ca' miích ajcxy mdzúdzcíxy íich nínícx, e pen ca' m'uuccíxy íich nni'py, íich je jäy tügpajc huídibi tzoón tzajpjoty, ca' miích ajcxy míid'adípy yí Dios yjugy'ajtín. ⁵⁴ Com pínjaty íich nínícx xychu'tzípc etz íich nni'py xy'uucíbích, ca' je ajcxy yjugy'ajtín ycixípy ytígoyípy tüccí'yi, oy ajcxy yja'o'ccíxy. Nyajjugypígípyích je' ajcxy jadüg'oc co anajty naaxhuiñbyí tí yhuaad'ajtíni mína ytígadzípy. ⁵⁵ Íich nínícx janchypí jïcxy pícy yí', etz íich nni'py janchypí ügy yí'. ⁵⁶ Co yí jäy ajcxy xymíbicyích xymíjpidágyích jadu'n ní paady nej jíhuíy íich nínícx xychúdzi, etz íich nni'py xy'uuci. Chi y'idípy ajcxy huíníxí ma íich, etz íich n'idípyích huíníxí ma je' ajcxy. ⁵⁷ Dios Teedy huídibi xyquejích ya naaxhuiñ ymíid jugy'ajtín huídibi ca' ycixy ytígooy. Íich tí nbaadyích ma Dios Teedy je jugy'ajtín huídibi ca' ycixy ytígooy. Nañ mbadamy miích ajcxy jugy'ajtín huídibi ca' ycixy ytígooy ma íich. Co miích ajcxy xymíjpidágyích, jadu'n anajty nípaady nej jíhuíy mjïcxy'ajtígíxy íich nínícx. ⁵⁸ Je jïcxy huídibi tzoón tzajpjoty, e ycidacy ya naaxhuiñ co jäy ajcxy jïcxy'adyí, yajtzínáhuíib je ajcxy, ca' ajcxy yjugy'ajtín ycixípy ytígoyípy tüccí'yi. Yí mmíj'ap mmíjteedy huídibi jïc'ájtígíxy je maná jecy'ajty, o'ctay ajcxy, ca' ajcxy paty je jugy'ajtín huíníxíbi.

⁵⁹ Jadu'n Jesús ymíydacy jíim ma je judíojäy ajcxy ñaymujctac jíim Capernaum co anajty jíim yaj'ixpícy.

Mayjäy ca' mójotcujc'ajty Jesús y'ayuc

⁶⁰ Co ajcxy Jesús y'ayuc mídodaayí, nígujc-huácxý je huídibi anajty íxpíjcp ma Jesús. Chi ajcxy capxpídzímy, e jadu'n ajcxy ymíinañ:

—Ooy chachchípy je Jesús y'ayuc. Ca' huaad jí píin huínjíhuíyday.

⁶¹ Com Jesús ñejhuíyb nej ajcxy anajty yajtzíbíy yajcapxíy, chí ymíinañ:

—¿Nej ca' miích ajcxy mójotcujc'aty je tzípc ayuc jadu'n nej cham ajcxy tí nyajnímäy?

⁶² ¿Nej xymíjpidágyích ajcxy, pen m'íjxpy íxyípy ajcxy co anajty nba'ttígíyích jadüg'oc jíiby tzajpjoty ma ndzooñích? Com íich je' je jäy huídibi tzoón tzajpjoty. ⁶³ Je jäy ajcxy yjíhuí'ñ, yí' je' ñínícx yajjugy'ajtíp, e je jäy ajcxy nínícx ca' yí' ní ma chobaady, pen ca' míidíty yjíhuí'ñ. Co miích ajcxy mgóbigípy yí ayuc tíibi ngapxyích, huín'ít ajcxy mbaadípy Dios yjíhuí'ñ (je Espíritu Santo), etz mbaadípy ajcxy jugy'ajtín huídibi ca' tüccí'yi ycixy ytígooy, oy mja'o'ccíxy. ⁶⁴ Per nígujc-huácxý ma miích ajcxy pínjaty ca' míbícy íich n'ayuc.

Com Jesús ñejhuíyb anajty jayíjpní pínjaty ca' ymíbígyí y'ayuc, etz pínjaty anajty cíyegaanípc ma ymídzípc. ⁶⁵ Chi Jesús yjacmíinañ:

—Paady ycixpi jayíjpc tí n'ína'ñích, co ca' ní píin jébi íich xymíjpidágy, pen ca' Dios Teedy jayíjpc yhuínma'ñ ymóyí co cóbíga'ñ ymóyí co cóbíga'ñ íich n'ayuc.

⁶⁶ Huín'ít mayjäy ajcxy, je huídibi anajty íxpíjcp ma Jesús, chí ajcxy huínhuáctut íxmajtzní ajcxy Jesús. Ca' ajcxy y'ocjacpanícxní. ⁶⁷ Chí jada' Jesús nímay je nímajmetz díscípulos ajcxy:

—¿Nej nañ xy'íxmadzaambích miích ajcxyí?

⁶⁸ Chí y'adzooy Simón Pedro:

—Huíndzín, ca' jac ní píin íich ajcxy jébi huaad nmíjpidágyích, com miích tügpajc míid je ayuc huídibi xyajní'íxíyích ajcxy nej jébi huaad íich ajcxy nbaadípy jugy'ajtín huídibi ca' ycixípy ytígoyípy tüccí'yi. ⁶⁹ Íich ajcxy nmíbíjcpích e nnejhuíybích co miích je' je jäy huídibi tzoón ma Dios huídibi huádz yhuínma'ñ ymíid.

⁷⁰ Chi Jesús ymínañ:

—Miich ajcxy je' ti nhuin'ixyich nimajmetzpi, e nidügti miich ajcxy mujcu' huinma'ñ mmiidity.

⁷¹ Je Judas Iscariote, Simón ymang, anajty ytijpy. Com je' je' anajty cïyegam Jesús ma ymidzip, oy je' anajty yjajëjity nidüg ma je nimajmetzpi.

7

Jesús y'uch ajcxy nañ ca' anajty jaty mijpidaaci Jesús y'ayuc

¹ Co jadu'n ytundaayi yjajtaayi, jim anajty Jesús yhuidity Galilea naaxjot, ca' anajty ñicxa'ñ jim Judea naaxjot, co anajty yi judíoJay ajcxy huídibi midzip'ajtíp yaj'öga'ñyii.

² Tim huingon anajty je judíoJay yxii, hue' anajty ajcxy yxiigoyäxy Tabernáculo xii. ³ Chi Jesús ñimaayi y'amigüg y'uch yëydijcpi:

—Tzon miich ya, nicx jim Judea naaxjot nayguëxëgii mayjajoty. ⁴ Com huenpinity huídibi nayguëxëgaanip mayjajoty, ca' ajcxy naygoyüchyii. Mdunipy miich mijhuinma'ñ xijoty, jigix je mayjaj yxömayipy.

⁵ Ni Jesús y'amigüg ajcxy ca' anajty yjaty ymijpidägyii y'ayuc. ⁶ Paady Jesús y'adzooy: —ñich nxi ndiempo ca'ni paty mina ndigihua'ñich jim Jerusalén jadu'n nej je Mesías. Janch miich ajcxy oytimyminaajity jëbi mnayguëxëcigixy ma je mayjaj ajcxy. ⁷ Ca' huaad jëbi miich ajcxy, naaxhuiñyay ajcxy, xymidziptzoñ. Janch ñich xymidzip'ajtpich ajcxy yi', je' co ngaxpidzimyich yi yjibic-huinma'ñ huídibi ajcxy ytumy. ⁸ Nicx miich ajcxy jim ma xii yjadyii. ñich ca' nñicxa'ñich cham, com ca'ni ñich ndiempo yhuaad'aty mina ndigihuiyich jim Jerusalén jadu'n nej je Mesías.

⁹ Jadu'nydi jëda'ajty ymínañ, chi yhuí'miiy jim Galilea.

Jesús ñicxy jim Jerusalén xijoty

¹⁰ Co Jesús y'amigügtijc ajcxy jayijp ñicxtay xii'ajtpi jim Jerusalén, chi Jesús nicxy nañ jadu'n ayüch ameech ma anajty xii yjadyii. ¹¹ Xijoty je judíoJay ooy ajcxy ja'ixtay Jesús, e chi ajcxy ymínañ:

—¿Ma jada' je Jesús?

¹² Ma je mayjaj ajcxy may anajty ajcxy tzachnigapxcixy tzachnimiydaaccixy Jesús. Nijëjity anajty ymínaangixy: “Tüg yëydijc oyjäybi yi”; e nañ nijëjity ymínaangixy: “Ca'p yi' y'oyjäyity, nigo jäy tzachhuin'ññ.”

¹³ E ni pin anajty ca' capxpidzimy mayjajoty co y'oyjäyity anajty Jesús, miid co anajty ajcxy je judío ixpicytijc ajcxy tzachtzigiiygixy.

¹⁴ E mijxijoty Jesús ñicxy jim ma Dios ytijc, chi jim ytigiiy yaj'ixpijcpí. ¹⁵ Je judío y'ixpicytijc tzachmaañyhuindicxcixy anajty je Jesús, chachmínaangixy anajty:

—¿Nej jada' tijy jada chach'ixpicyity? e ca' ni ma ti y'escuel'aty.

¹⁶ Chi Jesús y'adzooy:

—Jada ixpijcin ca' ñich jada një'adyii. Yi' jada yje' je huídibi xyquejxich ya naaxhuiñ.

¹⁷ E pen ji pinjaty cuydunaani yi' ytiy'ajt je huídibi xyquejxich, huinjihuñhuipy yi' jada ixpijcin, pen janch Dios yi' ytiy'ajt, o pen ñich yi' ngi'm ayuc huídibi ngaxypich. ¹⁸ Je jäy huídibi yci'm'ayuc yci'mdiy'ajt miid yaj'ixpicy, ci'm je' ñaygömaya'ñyii. Janch pinjaty tzojcp co ycomayiyb je' yhuindzin huídibi ti yquexyii, tiydudägy je', ca' je' y'aniijity.

¹⁹ Janch co Moisés miich ajcxy xymoy Dios ytiy'ajt. E ni tüg miich ajcxy mgacuydungixy je tiy'ajt. ¿Ti ycixpi co miich ajcxy xyaj'öga'ñich?

²⁰ Chi je jäy ajcxy y'adzooy:

—Mujcu' miich miid ma mjot mhuinma'ñ. ¿Pin miich yam xyaj'ögam?

²¹ Chi je' ajcxy nimay:

—Miid tügpajc mijhuinma'ñ tiibi nduñich sábado xii, yi' miich ajcxy mij mdzachjihuiyb mdzachhuinmaayb. ²² Moisés miich ajcxy xyajnajtz'ane'miiy je cötujcin co ajcxy m'ung mdiy'ajttiiygixy (oy je' ca' yajtzondac, miich janchtiy ajcxy mmij'ap mmijteedy Abraham yajtzondac), e paady ycixpi miich ajcxy m'ung

mdiy'ajttiigixy oy yjapocxxiidumity. ²³ E chi jada' ca'ydi miich ajcxy Moisés ytiy'ajt mnixiici myajxiici, paady ajcxy m'ung mdiy'ajttiigixy oy sábado xijoty. ¿Ti miich ajcxy co xymijotma'tcixich co tüg jäy ti nyajtzögyich sábado xijoty? ²⁴ Ca' m'ix'ijxcixy mba'ijxcixy mmigüg miid anii. Yajciyöyi yajtecyyöyi miich ajcxy jäy ypocy miid tiy'ajt.

Ooy ajcxy tzachhuinmay je jäy, peni Jesús je' je' anajty je Cristo

²⁵ Chi ajcxy nijëjity Jerusalénjäy yminañ:

—¿Nej ca' jada jada' yjëjity je huidibi ajcxy yjayaj'ögamyi? ²⁶ Oc'ix ajcxy, ta ycapxy ymiydägy ixnä' que'xna', e ca' ajcxy huam nimäy. ¿Nej ti jada ajcxy ijxcajpcixy yajxon tungmiidpi ajcxy co jada yjëjity je Mesías? ²⁷ Ich ajt nnejhuüiyim ma jada yëydijc chooñ. Per je Cristo co anajty je' ymiñ, ni pin je' canejhuüiipy ma je' anajty choñ ma ycogajpity.

²⁸ Co Jesús jadu'n midooy, co anajty yaj'ixpicy ma Dios ytiyc, huin'it Jesús mic yminañ:

—Mnejhuüyb miich ajcxy pin ich, e ma ndzooñich. Per ca'p ich ti nmiñich ya naaxhuin miid ich ngi'mdzojcin. Yi huidibi ich ti xyquexyich, tiydudägy yi' ytuñ, e ca' miich ajcxy yi' m'ixy'ajtigixy. ²⁹ Ich janchtiy n'ixy'ajtypich je'. Je' co jim ndzooñich ma je', e je' ich xyquejxich.

³⁰ Huin'it ajcxy jamadzaañ, per ca' ni pin cñixajiy, com ca'ni anajty paady je xii je tiempo mina ñaygëyegüyb ma ymidzip ajcxy. ³¹ Per mayjäy ooy mibijcy je Jesús y'ayuc, e yminañ ajcxy:

—Co anajty je Cristo ymiñ, ca' jada' nigü mijhuinma'ñ tuna'ñ ca'ydi jada yaabi yëydijc.

Je teedy mijtungmiidpi yquejx ajcxy soldatotijc huen majtzcixy Jesús

³² Co je fariseojäy ajcxy ayuc midooy co jäy chachminaangixy jadu'n co je Jesús je' je' je Cristo, chi ajcxy quejxy tungmiidpi huen Jesús yajmach. ³³ Paady Jesús yminañ:

—Ich jac-huäcxijpich hueeni ma miich ajcxy, chi nñicxa'ñich jadüg'oc jiiby tzajpjoy ma huidibi xyquejxich. ³⁴ Xy'ixtähuibich miich ajcxy, e ca' ich miich ajcxy xypaadipy. Ma anajty ich nñicxyich, miich ajcxy ca' jaydëbi jiiby mñicxcixy.

³⁵ Huin'it je judíojäy ixpicytjic acjëyi ajcxy ñay'amidoohui:

—¿Ma jada jada' y'ocñicxa'ñ, e nicy ich ajt ngapaatim? ¿Nej nñicxiib jada' ma je judíojäy ajcxy huidibi yajpaatcixy yxii yaa ma yi griegojäy ajcxy, e yaj'ixpigaangixy yi griegos ajcxy? ³⁶ ¿Nej jada' yajhuimbizimy? co yminañ: “Xy'ixtähuibich miich ajcxy, e ca' xypaadibich, e ma anajty ich nyajpaady, ca' miich ajcxy jaydëbi jiiby mñicxcixy.”

Je nii huidibi jugy'ajt yejcp huidibi ca' ycixy ytigoy

³⁷ Co je mijxi ycodiicxni, chi Jesús ytinay'ahuiy, chi mic yminañ:

—Pen ji pinjaty tiy'ajt nejhuühua'ñ jadu'n nej ixypy jäy ytidziyii tzocy yi nii, huen xyñimiiñich, etz nmöhuibich tiy'ajt. ³⁸ Je jäy ajcxy pinjaty xymibijpich xymijpidaacpich, ytunipy ajcxy jadu'n nej Dios ñecy yminañ ma jadu'n yjaybetyity: “Ycapxypidzimipy je' ajcxy Dios ytiy'ajt, etz mayjäy jotcujc'ajtin etz jugy'ajtin padañ huinixii, ytimyñipaaty jadu'n nej nii ypidzimy janch com ma tüg niigop.”

³⁹ Je' anajty jadu'n Jesús ytiyyp pinjaty je' anajty mibijcip, je' anajty ajcxy adigühuaanip jottigühuaanip je Espíritu Santo. Ca' ni anajty je Espíritu ymini ma je discípulos ajcxy com ca'ni anajty Jesús yhuimbityñi tzajpjoy.

Jäy ajcxy ca' ñay'ayuc-huinjihuüiyi miid Jesús ycixpi

⁴⁰ Je mayjäy ajcxy huidibi anajty ti midooy nej Jesús anajty ti yminañ, nidüg nimetz yminañ:

—Jadaabi je' je' tiydudägypi jäy huidibi Dios y'ayuc najtzcaxiiyip.

⁴¹ Jacjadyii yminañ ajcxy:

—Je' yi' je Mesías.

Per nijëjity ajcxy huidibi ca' ymibijccixy chachminaangixy:

—Ca' jim Galilea naaxjot chona'ñ je Mesías. ⁴² Com jadu'n yjaybetyity ma Dios ñecy co je Mesías jim chona'ñ ma David y'ap y'oc, jim ma je cajp huidi xijip Belén ma David ycogajpity.

⁴³ Je mayjäy ca' anajty ajcxy ñay'ayuc-huinjñhuiygixy miid Jesús ycixpi. ⁴⁴ Nijëjity anajty ajcxy ytimymadzamy Jesús, per ca' ni pin ymajtzi.

Judío ixpicytjic ca' ajcxy mijpidacy Jesús

⁴⁵ Chi ajcxy policías huidibi tumb ma tzajptjic nihuimbijty ajcxy je teedy mijtungmiidpi etz je fariseojäy ajcxy, chi ajcxy ñimaayi:

—¿Nej ajcxy co ca' ti mmajtzcixy je Jesús?

⁴⁶ Chi ajcxy je' y'adzooy:

—Nicaminaaxii tüg yëydjic jadu'n ti ymiydägy jadu'n nej yijiibi yëydjic.

⁴⁷ Chi je fariseojäy ajcxy yminañ:

—¿Nej nañ ti miich ajcxy myajhuin'ñinigixy? ⁴⁸ Ca' nmīnaanīm ti ajcxy teedy mijtungmiidpi o fariseojäy ajcxy miibjccixy Jesús. ⁴⁹ Je mayjäy huidibi mijpidaaci Jesús y'ayuc, ca' ajcxy y'ixpicyty ma Dios ycötujcin. Dios yi' ajcxy tzaachytunib.

⁵⁰ Nidügti ajcxy je' anajty je Nicodemo huidibi oga'n'aty ni'oy Jesús coodz, je' ymigügtjic jadu'n nimay:

⁵¹ —Jadu'n iich ajt ngötujcin xy'ane'mim co ca' huaad ndzaachytuunim pinjäy, pen ca'p jayjip n'ixyöyim nbayöyim ti anajty ti tuñ.

⁵² Chi ajcxy ymigügtjic y'adzohuimbijty oyñinej:

—¿Nej miich nañ jadu'n galileojäyi? Ixta' yajxon ma Dios ñecy, com jilby mne-jhuñhuipy co jim Galilea ca' jim chona'ñ pinjäy huidibi Dios y'ayucnajtzcaxhiyip.

⁵³ Chi ajcxy ñicxtay nidüg nidüg ma yjin ydjic.

8

¹ Chi Jesús ypa'ttigiiy ma je cögop huidibi xijip Olivos. ² Com jabom jopyñi Jesús yquidacy jadüg'oc ma Dios ytjic. Chi mayjäy ñimiini. Chi y'ixtacy, e chi ytigiiy yaj'ixpijcp. ³ Je jäy ajcxy huidibi Dios ycötujcin yaj'ixpijcp etz je fariseojäy ajcxy miidmiñ tüg töxyjäy ma Jesús huidibi anajty ti ytundigooy miid huingbi yëydjic. Chi ajcxy pidacy cujc'amy ma je mayjäy. ⁴ Chi ajcxy nimay Jesús:

—Huindzin, jadayaabi töxyjäy huingbi yëydjic miid ti ytundigoy. ⁵ Moisés ytiy'ajt iich ajcxy xyñajtz'ane'miy jecy'ajty co yajtzaagögädziy jada jadu'mbi töxyjäy. ¿Nej miich m'ocminambi?

⁶ Jadu'n ajcxy nimay co anajty ajcxy oc-huinma'ñ'ixa'ñ. Hue' anajty ajcxy ixtaayb nej jëbi huaad yajpocycäy Jesús. Chi Jesús yhuindacy, chi jada' ytigiiy jaaybi miid ycihuax naaxcíxy. ⁷ Com je' anajty ajcxy chachyaj'amidooyb, chi Jesús ytinayigy. Chi ajcxy nimay:

—Pin jäy ji ma miich ajcxy ca' ti pocy miidity, huen yi' jayjip tzaagäch jada töxyjäy.

⁸ Chi Jesús yhuindacy jadüg'oc. Chi ytigiiy jaaybi jadüg'oc naaxcíxy. ⁹ Co ajcxy jadu'n ayuc yajhuinjhuiydaayi, chi ajcxy ooy chöyduñ, com yjihuuy ajcxy ypocy. Chi ajcxy yjihuactay. Chi je mijjäydjic ajcxy ñaybattzundayi. Jesús yhu'i'miyy nimetz miid je töxyjäy huidibi jim anajty tinaayb huingon. ¹⁰ Chi Jesús yhuäccugiy jadüg'oc nimay je töxyjäy jada':

—¿Ma ajcxy je jäy? ¿Ca' ni pin ti xychaachytuñ miid mbocy ycixpi?

¹¹ Chi je töxyjäy y'adzooy:

—Huindzin, ca' ni pin.

Chi Jesús yminañ:

—Ni iich miich ngatzaachytunipy miid mbocy ycixpi. Nicx, e ca' m'ocjacpocytuunip.

Jesús jadu'n nipaady nej tüg jñin huidibi tiicxpi

¹² Chi jadüg'oc Jesús yjactigy miydacp yminañ:

—Ich je tiy'ajt nmiid ya ma naaxhuiñyjäy, jadu'n iich nipaady nej tüg jñin huidibi tiicxp ma jäy ajcxy. Pinjäy xymijpidaacpich ymiid tiy'ajt nej jëbi huaad tudägy chinähuipy, jadu'n nipaady nej jihuuy ytüyöy ma jñin ytiicxin.

¹³ Chi je fariseojäy ajcxy nimay Jesús:

—Miich ci'm nayñidiy'ajtip co miich je' je Cristo, e ca' mdiy'ajt chobaady.

¹⁴ Chi Jesús y'adzooy:

—Janch co ñich ci'm nayñidiy'ajt'adyiijich co ñich je' je Cristo. E ñich ndiy'ajt janch yi'. Com nnejhuñybich ma ti ndzooñich, e ma nñicxa'ñich. E miich ajcxy ca' mnejhuñygixy ma ndzooñich, e ma nñicxa'ñich. ¹⁵ Miich ajcxy mmigüg mbocy'ijxyp miid mgi'mhuinma'ñ. Ca' ni pin nbocy'ixyich miid ngi'mhuinma'ñich. ¹⁶ Pen ñich anajty nyajcüyöybich nyajtecyöybich jäy ypocy, tiydudägy anajty jadu'n nduñich. Com ñich ca' nyajpaadyich naydüg. Je' xymiid'ijtpich je Dios Teedy huidibi ti xyquexyich. ¹⁷ Com cojaay jadu'n y'ity ma miich ajcxy mgötujcin ñecy: “Pen nimetz jäy nigodiy'ajt'aty huentiijity, tzoobatp ajcxy y'ayuc.” ¹⁸ ñich ci'm ñayñidiy'ajt'adyiijich co ndzooñich tzajpjoty, etz nDeedyich nañ jadu'n xyñidiy'ajt'ajtpich, co je' ya ti xyquexyich.

¹⁹ Chi ajcxy y'amidooy:

—¿Ma miich mdeedy yajpaady?

Chi Jesús y'adzooy:

—Com co ca' ñich miich ajcxy xy'ijxcapy co ñich je' je Cristo, nañ ca' ajcxy m'ixy'adyii ñich nDeedy. Co ixypy ajcxy xy'ijxcapyich, nañ jaydëbi ixypy ajcxy nejhuñy pin ñich nDeedy'ajtyp.

²⁰ Jim jadu'n Jesús ycapxy ymiydacy ma je meeñ'ijttac, co anajty yjäy yaj'ixpicy ma Dios ytijc. E ca' ni pin ymajtzi. Com ca'ni anajty yxi yhora anajty paadyñi mina ñaygiyegiiyb ma ymidzip.

Jesús ñimay ymigügtijc co ca' huaad ñicxy ma je' anajty ñicxy

²¹ Chi Jesús yjacnimaayi ajcxy:

—Ñich nñicxaanip ñich, miich ajcxy xy'ixtähuibich. Miid ajcxy mbocy ycixpi m'ögaangixy, com ma nñicxa'ñich ca' huaad miich ajcxy jëbi mñicxcixy miid mbocy ycixpi.

²² Huin'it je judíojäy ajcxy ac jëyi ñayñimaayi:

—¿Nej ñicxy jada' ci'm ñayyaj'öga'nyijji? Com jadu'n ymina'ñ co ma yi' ñicxy, ca' huaad ñich ajt jëbi nñicxim.

²³ E Jesús nigü nimay'idich anajty:

—Miich ajcxy ya naaxhuiñ mmiidity mdiy'ajtcop. ñich tzajpjoty nmiiidiyich ndiy'ajtcopich. Miich ajcxy naaxhuiñyjäy ajcxy ytiy'ajt mmijpidaacipy. ñich ca' mmijpidägyich naaxhuiñyjäy ytiy'ajt. ²⁴ ñich miich ajcxy jadu'n nñimaayb co m'ögam miich ajcxy, e ca' ajcxy Dios mbocy xyhuinmeecxip. Copicy ajcxy m'ögipy, e ca' Dios mbocy ajcxy xyhuinmeecxip, pen ca' xymibigáangixyich co ñich je' je huidibi jëbi mbocy ajcxy xyhuinmeecxip.

²⁵ Chi ajcxy nimay Jesús:

—¿E miich, pin miich?

Chi Jesús y'adzooy:

—Ti ajcxy nyajnimaaagyixy pin ñich, co oga'n ndigiiyich jäy yaj'ixpijcp. Cham jadüg'oc nyajnimaaagyixy. ²⁶ May ooy tijaty ayuc nyajnimähuaangixy nej ti mdundigooygixy ma Dios ytiy'ajt. Cham ca' ajcxy nyajnimaydähuipy. Je huidibi ti xyquexyich ya naaxhuiñ je' tüg'óciy tiy'ajt miid. E ngapxpidzimyich je ayuc je tiy'ajt jëyi huidibi ti nmidooyich ma je'.

²⁷ Je jäy ca' ajcxy huinjihuñy co Dios Teedy anajty Jesús ñigapxyp. ²⁸ Paady Jesús nimay ajcxy:

—Co anajty miich ajcxy ti xyajcruudzpetyich, ñich je jäy huidibi tsoon tzajpjoty, huin'it miich ajcxy mnejhuñhuip co ñich je' je Cristo. E co ñich ca' ngi'mhuinma'ñ nduñich. Yi' ñich ya nmiydacypich huidibi Dios Teedy ti xyaj'ane'myich. ²⁹ Je Dios Teedy huidibi ti xyquexyich, yi' ñich miid n'ityich. Ca' ñich yi' xy'ixmachich. Com co ñich njatytimyumbich jabom jabom huidibi yi' chojcyp.

³⁰ Co Jesús jadu'n yminañ, chi mayjäy ooy ymibijcy.

Jäy huidibi mibijcp Jesús ycuychinaayipy yi' ytiy'ajt

³¹ Chi Jesús nimay je judío jāy ajcxy huídijaty anajty ti ymibicy:

—Pen mmibijc ajcxy cixyot huinijot tüg'óciy ñich n'ayuc, e ca' m'ijxmadzipy ajcxy ñich n'ayuc, huin'it ñich miich ajcxy jēbi njāy'adyii. ³² Huin'it jēbi ajcxy mnejhuñhuipy Dios ytiy'ajt. E. Dios ytiy'ajt xyñihuáangixip ma je mjibic-huinma'ñ ooy xy'ane'mgixy.

³³ Chi ajcxy y'adzooy:

—Abraham ñich ajcxy nmij'ap nmijteedy'ajtpy. Ca' ñich ajcxy huaad ni pinjāy xyjac'ane'my. ¿Nej co miich jadu'n minañ: “Dios ajcxy xyñihua'nip ma yi mjibic-huinma'ñ xy'ane'mgixy”?

³⁴ Chi Jesús y'adzooy:

—Janch janch ñich miich ajcxy jadu'n nimaaygixy co tüg'óciy pinjaty pocy ytundiib, jibicp yi' ane'mip. Tim jadu'n nipaady nej tüg tumbi huídi codoogŷ y ijtp, yi' yhuindzin jatytim'yane'mip. ³⁵ Yi tumbi huídibi codoogŷ ijtp, ca' yhui'mañ ma je jāy ytijc huinixii. Yi jāy y'ung janchtiy hui'mam huinixii ma yteedy ytijc. ³⁶ Pen Dios y'ung miich ajcxy xyajpidzimgixp ma je jibicpi xy'ane'mgixy, janch huinixii m'idaangixy, ca' ma ti jibicpi xy'oc'ane'mgixnipy. Tim jadu'n nej Dios y'ung y'ity, ca' ti jibicpi y'ane'myii. ³⁷ Nejhuñyibich co miich ajcxy Abraham mmij'ap'adyii mmijteedy'adyii. Per miich ajcxy chachyaj'ōgaambich. Je' co ca' mijpidaaccixy ñich n'ayuc huídibi njayajnimaygixyp. ³⁸ ñich miich ajcxy nyajmíidmiydaacyp tiibi n'ixyich huídibi ndeedyich ytumyb. E miich ajcxy yi' mdumyb nej m'ap mdeedy ti xyajnimaygixy.

³⁹ Chi ajcxy y'adzooy:

—Hue' ñich ajcxy nmij'ap'ajtyp nmijteedy'ajtyp je Abraham.

Chi Jesús y'adzooy:

—Pen janch ajcxy Abraham mmij'ap'adyii mmijteedy'adyii, yi' ixypy ajcxy mdungixyp jadu'n nej Abraham tuuñ. ⁴⁰ Janch ñich miich ajcxy xychachyaj'ōgáangixyich, e ti ajcxy njayajnimāy je huídibi ñich ti nmidooyich ma Dios. Ca' Abraham yaj'ōgy je jāy ajcxy huídijaty anajty Dios ytiy'ajt mñid, jadu'n nej miich ajcxy m'idítzaangixy. ⁴¹ Miich ajcxy jibic-huinma'ñ mdungixyp, tim jadu'n nej m'ap mdeedy jibic huinma'ñ ajcxy tuñ jecy'ajty.

Chi ajcxy Jesús adzooy:

—Ca'ñich ajcxy ndigoy'ungity. Je' tūgpajc ñich ajcxy ndeedy'ajtyp Dios Teedy.

⁴² Chi Jesús ymíañ:

—Peni Dios ixypy ajcxy mdeedy'ajtyp, xychojcpich xymijpidaacpich ixypy ajcxy. Com Dios ti xyquexyich ya naaxhuiñ, e jiiby ndzooñich ma Dios. Ca'ñich ngi'mdzojcin ycixpi nmiñich ya naaxhuiñ. Yi' je' jadu'n tzojcp pin ti xyquexyich. ⁴³ ¿Ti co ca' miich ajcxy mhuinjihuñy ñich n'ayuc? Je' co ca' ajcxy midohuaangixy ñich n'ayuc. ⁴⁴ Je' miich ajcxy mdeedy'ajtyp je mujcu'. Mñid mgi'mdzojcin mguydungixy je mujcu' chójcin. Je mujcu'yaj'ōctiyyb yi' jāy maabi naaxhuiñybi chondägy. Je mujcu' ca' je' ixaani Dios ytiy'ajt. Ca' ni ti tiy'ajt yajpaady ma je', com je mujcu' indaacp je', chi c'm ooy nijot y'idich. Je' ooy indacy, e je' oga'n anñi yajtzondac. ⁴⁵ Com miich ajcxy mujcu' yhuinma'ñ mñid, paady miich ajcxy ca' xymibijci xymijpidaaci n'ayucich co ñich tiy'ajt njamiydägy. ⁴⁶ Ni pin miich ajcxy xycayajpocycāhuipy. Peni tiy'ajt ñich miich ajcxy nyajnimayb, ¿ti co ca' mmijpidaaccixy ñich n'ayuc? ⁴⁷ Je jāy ajcxy huídibi yajpatp ma Dios, y'amido'ijtyp ajcxy Dios y'ayuc. Paady miich ajcxy ca' m'amido'ijtcixy Dios y'ayuc, com ca' ajcxy Dios mDeedy'ájtigixy.

Jesús jiiyim anajty yjugy'aty ca'ydi Abraham

⁴⁸ Chi je judío ixpicytjic ajcxy y'adzooy:

—Ti ñich ajcxy yajxon nmíañ co miich mgogajpity jim Samaria, e mujcu' miich mñid ma mjot mhuinma'ñ.

⁴⁹ Chi Jesús y'adzooy:

—Ca' ñich mujcu' nmíidity ma njot nhuinma'ñ, com nyajmij'ajtypich nDeedy, e miich ajcxy xy'ixtipich. ⁵⁰ ñich ca' c'm naygōmayiijich. Dios Teedy ñich xycōmayb, com yi'

je' huidibi ixyöyp payöyp jäy ajcxy ypocy. ⁵¹ Janch janch ñich miich ajcxy nimaaygixy co ji nijëjity jäy huidibi ñich n'ayuc cuydumb, e ca' yi' ajcxy yjugy'ajtïn ycixipy ytigoyipy tücci'yi co y'ó'ccixipy.

⁵² Chi je judío ixpicytjic ajcxy y'adzooy:

—Cham ñich ajcxy janchtiy ti nnejhuiyich tiydudägy co miich mujcu' miidity ma mjot mhuinma'ñ. Abraham o'c je', nañ jadu'n o'c ajcxy je huidibi anajty Dios ytiy'ajt capxhuäcxip, e miich mmina'ñ co pen ji pinjaty miich m'ayuc xymibijcip xymijpidaacip, ca' je' y'ögipy. ⁵³ ¿Nej mjacmiid miich mic'ajt, ca'ydi Abraham, ñich ajt nmij'ap nmijteedy huidibi o'ci? ¿Nej mjacmiid miich mic'ajt, ca'ydi ajcxy huidibi Dios y'ayucnajtzcaxiy, huidibi ajcxy o'ci? ¿Pin miich mdimnaydijiyi?

⁵⁴ Chi Jesús y'adzooy:

—Pen ñich nnyagömayibich ci'm, ca' n'ayucich chobaadipy. ñich nDeedy yi' xycömayipich, je huidibi miich ajcxy mdijpy co ajcxy mDios'adyii. ⁵⁵ Per miich ajcxy ca' Dios m'ixy'adyii. ñich janchtiy n'ixy'ajtypich Dios. E co ixipy nmina'ñich co ca' ñich Dios n'ixy'adyii, indaacpich ixipy, jadu'n nej miich ajcxy m'indaaccixy. Janch ñich n'ixyich Dios, e nguydumyibich yi' y'ayuc. ⁵⁶ Je Abraham, miich ajcxy mmij'ap mmijteedy, jotcujc ooy ñayjihuiyi co anajty ixa'ñ ñich nxii ndiempo ya naaxhuiñ. E co ijxy co ñich nmiñich, chi ooy yjotcugiiy.

⁵⁷ Chi je judío ixpicytjic ajcxy nimay Jesús:

—Ni mgamiidity huixchigui'px majc jimijt, e ¿mmina'ñ co m'ijxy Abraham? (Ca' m'ixy'ajti je Abraham, naxy tüg mil jimijt maabi je' y'o'cni.)

⁵⁸ Chi Jesús y'adzooy:

—Janch janch ñich miich ajcxy jadu'n nimäy co ji anajty ñich co ca'ni anajty Abraham yma'xung'aty.

⁵⁹ Chi ajcxy tzaa conigy tzaagädza'ñ anajty ajcxy. Chi Jesús yhuingoyüch, e ypidzimy ma Dios ytjic.

9

Jesús yajtzoc tüg huintzpi

¹ Hue' anajty Jesús huidijtp co ijxy tüg huintz, jadu'n anajty huintz ti yma'xung'aty.

² Chi ydiscípulos ajcxy y'amidoohui:

—Huindzin, ¿pin pocy ytuun, jada huintzpi o ytaj yteedy, co huintz yma'xung'aty?

³ Chi Jesús y'adzooy:

—Ca' yi' ypocytuuñ, ni ytaj yteedy, hue' janchtiy paady ycixp jadu'n yjajty, jigix Dios ymic'ajt ñiguëxigity ma yi'. ⁴ Copicy njactúunibich yi' ytung huidibi ti xyquexyich ya naaxhuiñ. Miinip je xii tiempo ma ca' pin Dios y'ayuc tunaani. Jadu'n nej jihuüy ixipy je xiimbi ti ñaxy etz je coodzpi ti ymiñ. ⁵ Jadu'n nej n'ityich ya naaxhuiñ nmiidich Dios ytiy'ajt, jadu'n ñich nipaady nej tüg jün huidibi codiicxp yi' naaxhuiñyjäy.

⁶ Co Jesús jadu'n yminanday, chi nidzujiiy naax, chi mo'ntz yaj'oyiiy miid chujni, chi jada' yajjaaxi je jäy yhuiin miid je mo'ntz. ⁷ Chi nimay jada':

—Nicx quejtzpuj yi' mo'ntz jim ma yi' Siloé ni y'abojtzigity —je ayuc Siloé jadu'n yhuimbizimy: quexyöybi.

Chi je jäy huintzpi ñicxy jim, chi oy quejtz puji je mo'ntz, chi oy huimbity ti anajty yhuindicxigy. ⁸ Je ymijün ymidijc ajcxy etz tüg'óciy huidijaty anajty ajcxy ti ixxy co huintzpi co jabom jabom ñäy limosna yajmucy, chi ajcxy ñay'amidoohui miñ xyipy:

—¿Nej ca' jada yjéjity je huintzpi huidibi anajty jabom jabom limosna yajmucpi?

⁹ Nijëjity ajcxy yminañ:

—Je' yi'.

E jacjadyii ajcxy yminañ:

—Huingbi yi', nigoob jadu'n yquëxigy nej je'.

E je' yminañ ci'm:

—Hich jëdu'n huidibi anajty huintz.

¹⁰ Jadu'n anajty ajcxy tzach'amidooy:

—¿Nej yi mhuiin ti ñay'ahuäcxyii?

¹¹ E je' anajty y'adzooy:

—Yi yëydijc huidibi ajcxy ytijyp Jesús, yi' mo'ntz yaj'oyiiy xyajjaaxich nhuiin, e chi xyñimaayich: “Ñicx quejtzpuj ma yi Siloé nii.” Chi nnicxyich, e oy nguejtzpujyich, e chi nhuindicxi'cyich.

¹² Chi ajcxy je' nimay:

—¿Ma je' je yëydijc?

Chi je huintzpi y'adzooy:

—Ca' nnejhuüyich.

Fariseojäy tiy'ajt pijcy nej je huintzpi anajty ti chögy

¹³ Chi ajcxy yajnicxy ma fariseojäy ajcxy yhuinduu, je huidibi anajty huintz yajpatp.

¹⁴ Hue' anajty tüg sábadó xii (judíojäy ajcxy amayxii) co Jesús mo'ntz yaj'oyiiy, e yajhuindicxigy je huintzpi. ¹⁵ Chi je fariseojäy ajcxy jadüg'oc yajtiy nej anajty je jäy ti yhuindicxigy. Chi je jäy y'adzooy:

—Mo'ntz ti pidägy ma hich nhuiin, chi hich ti nguejtzpujy, e cham n'ijxnibich.

¹⁶ Nijëjity fariseojäy ajcxy yminañ:

—Yi yëydijc huidibi jada jadu'n ti tuñ, ca' yi' Dios ytiy'ajt miidity, com ca' yi' amay'aty sábadó xii.

Chi ajcxy jacjadyii y'adzooy:

—¿Nej tity jada mijhuinma'ñ octuñ, pen hue' yi' pocyjäy?

Ca' ajcxy nay'ayuc-huinjhuüyigixy. ¹⁷ Chi ajcxy jadüg'oc nimay je jäy huidibi anajty ti y'ijxigy:

—E miich, ¿nej m'ocminambi? ¿Pin jäy yi tibi xyajhuindicxigy?

Chi je jäy y'adzooy:

—Tüg jäy huidibi Dios y'ayuc etz ymic'ajt miid.

¹⁸ Chi je judío ixpicytjic ajcxy ca' anajty tim mibigaangixy co je yëydijc anajty huintz yajpaady, e co anajty ti yhuindicxigy, ixti cooni ajcxy ytaj yteedy mijhuoohui. ¹⁹ Chi ajcxy amidoohui ytaj yteedy:

—¿Nej je' jada miich ajcxy m'ung huidibi huintz ma'xung'ajti? ¿Nej jada ti yhuindicxigy?

²⁰ Chi je' ytaj yteedy ajcxy y'adzooy:

—Hich ajcxy nnejhuüyib co hich ajcxy yi' n'ung, e co yma'xung'ajty huiintz. ²¹ Per jadu'n nej cham ti yhuindicxigy, e pin yi' yhuiin ti yajhuäcxyii, ca' hich ajcxy yi' nnejhuüyigixy. Amidoo miich ajcxy yi' ci'm. Mij'anäciñ yi', ñigapxipy yi' ci'm.

²² Jadu'n ajcxy ytaj yteedy y'adzooy, miid co ajcxy tzachtzigiygixy je judío ixpicytjic ajcxy. Com je judío ixpicytjic ajcxy ti anajty ñaygäpxigixy co anajty yajpidzimaangixy ma ajcxy ñaymujctac je jäy ajcxy pinjaty anajty mibijcp co Jesús anajty yjëjity je Cristo.

²³ Paady ajcxy ytaj yteedy yminañ:

—Mij'anäciñ yi', amidoogix miich ajcxy yi' ci'm.

²⁴ Chi ajcxy y'amidooy mimejtz'oc je yëydijc huidibi anajty ti y'ijxigy, e chi ajcxy nimay:

—Cömay capxpat yi' Dios co ti mdzögy. Ca' mgömay mgapxpaady je Jesús. Com hich ajcxy nejhuüyib co yi' Jesús, tüg yi' pocytumbi. Ca' yi' Dios y'ayuc ytiy'ajt miidity.

²⁵ Chi je jäy y'adzooy:

—Pen tüg pocytumbi yi' Jesús, ca' nejhuüyich. Huidibi janchtiy nnejhuüyibich, co anajty hich nhuintzity etz co cham huindicxnibich.

²⁶ Chi ajcxy y'amidooy jadüg'oc:

—¿Nej ti xytuñ? ¿Ti ti tuñ co ti xyaj'ijxici yi' mhuiin?

²⁷ Chi je' y'adzooy:

—Ti ajcxy nyajnimaaŷgixy, e ca' ajcxy ti m'amido'idaangixy. ¿Nej nañ ixpigaangixy miich ajcxy ma yí'ji?

²⁸ Chi ajcxy je' oŷy, nimay ajcxy jadu'n:

—Miich ixpijc ma yí', iich ajcxy n'ixpijcpich ma Moisés ytiy'ajt. ²⁹ Iich ajcxy nejhuuiyb co Dios Moisés migapxy. Janch yí Jesús ca' iich ajcxy nnejhuuiygixy ma yí' chooñ (ma mic'ajt ti paady).

³⁰ Chi je jäy y'adzooy:

—Ooy yí' y'oychigiñity y'oyhuinmañity co miich ajcxy ca' mnejhuuiygixy ma yí' chooñ (ma mic'ajt ti paady), e ti iich yí' xyajhuindicxigich. ³¹ Yajxon yajnejhuuy co Dios ca' yí' midoohui pocyjäydijc y'ayuc. Pen oy jäy iich ajt, e nguyduunim Dios ytiy'ajt, huin'it ajt Dios n'ayuc xymidoohuim. ³² Ni caminaaxi ycajajmidoy, co pinjäy tüg huintzpi ti yaj'ixigxy huidibi jadu'n ti yma'xung'aty huintz. ³³ Co ixypy je Jesús ca' jibby chooñ ma Dios, ca' ixypy jaty nej ti tunipy.

³⁴ Huin'it ajcxy y'adzooy:

—Miich jadu'n ti mma'xung'aty pocymiid. Ca' miich huaad ti xyaj'ixpijccixyich. E chi ajcxy yajpidzimy tibäy'tücci'yí (ma ajcxy ñaymujctac etz ma Dios ytiyc).

Je jäy ajcxy huidibi ca' cöbijccixy Dios ytiy'ajt jadu'n nipaady ajcxy nej jihuuy huintzity

³⁵ Chi Jesús nejhuuy jadu'n co anajty ti yajpidzimy tiba'y tücci'yí ma Dios ytiyc. Co minaaŷbaati chi nimay:

—¿Nej mmibijcyp mijpidaacy miich je jäy huidibi tzoön tzajpjoty?

³⁶ Chi je' y'adzooy:

—Huindzin, nimaaygich pin je', jigix nmibicyich.

³⁷ Chi Jesús je' y'adzooy:

—M'ijxyp yí'du'n yam. Yí je' je' huidibi xymiidmiydacp.

³⁸ Chi jada' huingoxtinay'ahuuy ma Jesús yhuinduu, je huintzpi huidibi Jesús ti yajtzögy nimay:

—Nmibijcypich, huindzin.

³⁹ Chi jada' Jesús yminañ:

—Iich ti nmiñ ya naaxhuñ co n'ixyöyaanich nbayöyaanich jäy ypocy, jigix nyajpocy-cähuibich pin ca' ypocymiidity, etz nyajpocyñihuadzibich pin ypocy miid. Jadu'n nej jihuuy nyajhuindziyich je jäy huidibi iixp, etz jadu'n nej jihuuy nyajhuindicxigich yí huintzpi.

⁴⁰ Chi nijjity fariseojäy huidibi anajty jim ma Jesús ymijc jadu'n midoy nej Jesús yminañ, chi ajcxy nimay Jesús:

—¿Nej nañ jadu'n miich mdijy iich ajcxy ca' Dios ytiy'ajt nejhuuiyich, jadu'n nej jihuuy iich ajcxy nhuintzity?

⁴¹ Chi Jesús y'adzooy:

—Co ixypy miich ajcxy janch janch ca' mnejhuuiygixy Dios ytiy'ajt, ca' ixypy ti pocy ajcxy mmiidity. Per miich ajcxy minam co Dios ytiy'ajt mguyduuniy, e ca' yjanchity. Paady ajcxy mbocymiidity. Nipaaty jadu'n nej jihuuy miich ajcxy mhuintzity, e mminaangixy co m'ijxcixy.

10

Jesús yaj'ixpijc jihuimbit ayuc

¹ Chi Jesús jacnimay je judío y'ixpicytjic, je fariseojäy ajcxy:

—Janch janch iich miich ajcxy yam jadu'n nimaaygixy co je jäy ajcxy huidibi ca' ytigihuaangixy ma borregi agaj aguu (ma je cuend'ajtpi ycuend'aty), huidibi huingduum ameech tzach tigihuaam ma yborregi agaj, je' je' je' meetzpi huidibi meedzam je borregi ajcxy ameech. ² Je jäy huidibi tigihuaam ma yborregi agaj aguu, je' je' je' borregi cuend'ajtpi. ³ Co je borregi cuend'ajtpi ymiñ ma agaj aguu, chi je agaj aguu cuend'ajtpi

yaj'ahuäch je agaj aguu. Chi yborregi ajcxy yöcmidoyii, chi je' migapxy xibety xibety, chi yajpidzimy ajcxy. ⁴ Co ajcxy yajpidzimdäy, ac je' yje', chi jayijp ñicxy, e axam ajcxy ypanicxyii, com je' co yöcmidoyii. ⁵ Ca' je borregi ajcxy jëbi panicxy tüg huingjäy. Nigi ajcxy cöguëgy, com yöcmidooyb ajcxy co yhuingjäyity.

⁶ Jadu'n Jesús mayjäy yaj'ixpijcy jihuibit'amy, jaygue' ajcxy ca' huaad huinjihuïy nej anajty Jesús yjaminäna'ñ.

Jesús je oybi cuend'ajtpi

⁷ Chi ajcxy Jesús jadüg'oc ñimaayi:

—Janch janch ñich miich ajcxy yam jadu'n nimaaygixy, co je Dios nDeedy'ajtypich. Jëbi jäy ajcxy paady Dios ytiy'ajt ma ñich, e huin'it ytiigiygixipy ma Dios y'it. Jadu'n nipaady nej jihuiy ñich je agaj aguu ma borregi ajcxy ytiigiygixy. ⁸ Tüg'óciy je huindzindijc huidibi ajcxy miin jayijp ca'ni ñich anajty nmiñich, e yminaangixy anajty co ajcxy miid'ajti Dios ytiy'ajt, jadu'n je' anajty ajcxy nej meetzpi huidibi meedzaanip Dios yjäy. Per je Dios yjäy ca'p je' ajcxy tuuñ cuendi, jadu'n nej je borregi ca' yöcmidoogixy je meetzpi. ⁹ Jadu'n nej je borregi ajcxy ytiigiygixy ma agaj aguu, nañ tim jadu'n jäy ajcxy paady Dios ytiy'ajt ma ñich. Je jäy ajcxy huidibi ypaatyp Dios ytiy'ajt ma ñich, nañ ypadaamy jugy'ajtin huidibi ca' ycixipy ytiigoyipy tücci'yi. E huidibi je' ajcxy yajmayajtyp ma yi chinaayin, nmöhuibych. Tim jadu'n nej borregi ajcxy jabom jabom ypidzimgixy ma agaj aguu nicxcixy miy'ojcpi, etz yhuimbijtcixy tzuu tzuu.

¹⁰ Yi meetzpi ajcxy mimb co ymeedzaangixy yaj'ögaangixy yajhuindigoyaangixy. ñich ti nmiñich, jigix miich ajcxy mbáatcixipy jugy'ajtin mijcajee huidibi ca' tücci'yi ycixipy ytiigoyipy.

¹¹ Chi Jesús yjacminañ:

—Ñich jadu'n nipaady nej tüg borregi cuend'ajtpi oybi. Je oybi borregi cuend'ajtpi ycïeyjcy y'ijy'ajt ma yi o'cin miid yborregi ycixpi. ¹² Je borregi cuend'ajtpi huidibi mujuy tumb, huidibi ca' yci'mborregi cuend'aty, ni ycajējity je borregi yhuindzin, co icy caa ymiñ, chi cöguëgy je borregi, e yajqueec-huäcxtäy. ¹³ Com je' co mujuy ytuñ, paady cöguëgy je borregi ajcxy, ca' tzocy jihuiy borregi.

¹⁴ Tim jadu'n nej je oybi borregi cuend'ajtpi ijxcajptäy je' yborregi, nañ tim jadu'n ñich n'ijxcajptäy je njäyich (huidibi xymijpidaacpich), etz je' ajcxy xy'ixy'ajtpich. ¹⁵ Tim jadu'n nej Dios Teedy xy'ixy'adyiijich, nañ tim jadu'n n'ixy'adyiijich Dios Teedy. Tim jadu'n je' nej je oybi borregi cuend'ajtpi ycïyegamy yjugy'ajtin miid yborregi ycixpi. Nañ tim jadu'n ñich ngïyegamyich njugy'ajtin miid ñich njäy ajcxy ycixpi. ¹⁶ Nmïidich jadügpicy jäy, ca' ajcxy yjudiojäyity, je' ajcxy nañ jadu'n nmïid'idaamyich tügmucy (miid je judío jäy ajcxy huidibi xymijpidaacpich). Tim jadu'n nej je cuend'ajtpi ymiid'ajtyp je' yborregi ajcxy tügmucy. E je' ajcxy y'amidoo'idaamy ñich n'ayuc, tim jadu'n nej borregi ajcxy yöcmidoogixy yhuindzin. Ji y'idipy tügmucy jäy (huidibi xymijpidägibich), etz tüg cuend'ajtpi (ñich jëdu'n).

¹⁷ Chi Jesús yjacminañ:

—Paady ycixp Dios Teedy ooy ychocyich xyjihuiyich, co ngïyegaamyich njugy'ajtin ma yi ó'cin (miid jäy ajcxy ypocy ycixpi), etz njugypigipyich jadüg'oc. ¹⁸ Ca' ni pin xypijcibich yi njugy'ajtin, ñich yi' ci'm ngïyegamy. Nmïidich mic'ajt nej ngïyegipyich njugy'ajtin, etz nañ nmïidich mic'ajt nej njugypigipyich jadüg'oc. Jadu'n nDeedyich ti xy'ane'myich co jadu'n ndunipyich, n'ögibich, njugypigipyich jadüg'oc.

¹⁹ Chi jadüg'oc ajcxy ca' nay'ayuc-huinjihuiyi je judíojäy ajcxy miid Jesús y'ayuc ycixpi. ²⁰ Mayjäy yminañ:

—Ca'oybi yi' ymiid, locjiyb yi', ¿nej co ajt n'amido'ijtim y'ayuc?

²¹ E jacjadyi ajcxy yminaangixy:

—Jadayaabi tiy'ajt etz mic'ajt ca' yajpaady ma tüg jäy huidibi mujcu' ymiid. Ca' jëbi tüg mujcu' jäy huintzpi yaj'ixgy.

May judíojäy ajcxy ca' cöbijcy Jesús

²² Jim Jerusalén anajty xii yjadyii, je' anajty ajcxy ñixiidumyby jimijt Dios ytijc. ²³ E hue' anajty tiich tiempo. Chi jim anajty Jesús yhuidity ma Dios ytijc, ma je Salomón ytijc-huinduu. ²⁴ Chi ajcxy je judío y'ixpicytjic nimujcy ooy Jesús, nimay ajcxy:

—¿Ixti minaaní miich iich ajcxy tiydudägy xyajhuinjihuñhuáangixyich pen miich je' je Cristo? Yajhuinjihuñyigich ajcxy tiydudägy.

²⁵ Chi Jesús y'adzooy:

—Ti ajcxy nyajnimaaagixy, e ca' miich ajcxy ti nmibjccixy. Je mijhuinma'ñ huídibi ndumybych nmiidich nDeedy ymic'ajt, yi' je' nidiy'ajt'ajtp co iich je' je Cristo. ²⁶ Paady ycixp miich ajcxy ca' mmibjccixy, com ca' miich ajcxy njäy'adyiijich. ²⁷ Hich njäy ajcxy ymijpidaacyr iich n'ayuc, e n'ijxcajpich ajcxy je', e je' ajcxy xypanicxpich. Tim jadu'n nej je borregi ajcxy yöcmidoy je yhuindzin, jadu'n nej je huindzin ijxcapy je' yborregi, e jadu'n nej yi yborregi ypanicxyii. ²⁸ Hich njäy ajcxy nmooybich yi jugy'ajtin huídibi ca' tücci'yi ycixa'ñ ytigoya'ñ. Ca' je' ajcxy yjugy'ajtin ytigoyipy ni camina, e ni pin ca' huaad je' ajcxy xypijcich. Je' ajcxy ci'am nmiididyich. ²⁹ Yi Dios Teedy huídibi iich njäy ti xymöy, tügpajc yi' ymijity, e ni pin huaad ni ti capijciy huídibi Dios Teedy ymiid ci'am.

³⁰ Dios Teedy etz iich tú'ciy iich ajcxy.

³¹ Chi je judíojäy ajcxy jadüg'oc tzaa conig cädzaangixy anajty ajcxy. ³² Chi Jesús je' ajcxy nimay:

—Ti iich ooy mij oybi nduñich ma miich mhuinduu miid je nDeedyich ymic'ajt ycixpi. ¿Huídi ycixpi miich ajcxy xychaagädzáangixyich?

³³ Chi je judío ixpicytjic ajcxy y'adzooy:

—Ca' nminaanim paady iich ajcxy miich ndzaagädzaangixy miid je oybi tiibi mduñ, hue' janchtiy ycixpi ndzaagädzaangixy miid co ooy Dios myajjotmädy. Com miich nañ jäy, e mnayajnaxyii Dios.

³⁴ Huin'it Jesús je' ajcxy nimay:

—Jadu'n ycojaayity ma yi judíojäy ajcxy ytiy'ajtnecy, ma Dios jadu'n ymina'ñ: “Jadu'n nej dios miich ajcxy.” ³⁵ Paady ca' ngapxtigooyich, com Dios ci'm jadu'n minamb ma ñecy, co jadu'n nej Dios je' ajcxy huídibi Dios y'ayuc cöbijcip (e ca' huaad pinjäy ymina'ñ co Dios ñecy ca' yjanchity). ³⁶ Dios ti xyajniibicyich jada tung, e xyquejxyich ya naaxhuiñ. ¿Nej co mminaangixy co iich ngapxtigooyich co nmina'ñich co Dios xy'ung'adyiijich? ³⁷ Pen ca' nduñich nDeedyich ytung, ca' iich ajcxy huaad n'ayuc xymibjccich. ³⁸ E pen ndumybych nDeedyich ytung, oy ixypy miich ajcxy ca' xymijpidaacich n'ayuc, jëbi ixypy mijpidägy ajcxy je mijhuinma'ñ huídibi ndumybych. E chi mnejhuñhuipy miich ajcxy, etz mmijpidägipy miich ajcxy co je Dios Teedy yajpaady ma iich, e iich nyajpaadyich ma Dios Teedy.

³⁹ Ooy ajcxy jamadzaañ Jesús, e chi Jesús oy choni, ca' ajcxy majch.

⁴⁰ Chi Jesús ñicxy jadüg'oc jim Jordán mij nii ninaxy ma Juan yjäy yajniibejty oga'n'aty, chi jim yhui'miyy. ⁴¹ Mayjäy Jesús ooy ñimujci, e yminañ ajcxy:

—Je Juan el Bautista ca' jadu'n ooy mijhuinma'ñ tuuñ, per tüg'óciy yi tiy'ajt jadu'n nej nimiydactay jada Jesús, janch tiy'ajt je'.

⁴² E janch mayjäy ooy mibjcy Jesús jim ma je jimbi it.

11

Co Lázaro y'o'cy

¹ Jim Betania anajty tüg pa'mjäy, hue' anajty yxii Lázaro. Hue' je' anajty chinäy ma María etz Marta ycocajpity. ² María je' anajty huídibi je Huindzin Jesús anajty ti yajjaxy je ujtzpjiyñii huídibi ooy oy yxuugy, etz po'ti Jesús ytecy miid ycöhuay. Hue' je' anajty María etz Marta ymidügquëx Lázaro huídibi anajty pijcip. ³ Chi Lázaro ymidügquëx ajcxy ycapxyquejxy ma je Huindzin Jesús anajty yajpaady, e chi oy yajnimäyii:

—Je mmigüg huídibi ooy mdzocy, pijcip je'.

⁴ Co Jesús jadu'n midooy, chi yminañ:

—Je' ypa'm ca' yaj'öga'ñyii tücc'i'yi. Je' ypa'm hue' yajniguëxigamy Dios ymic'ajt, jaydëb Dios ycömaybidzimipy, e nañ ñich nyajcömayipyich, ñich je jäy huidibi tzoon tzajpjoty.

⁵ Jesús ooy anajty tzocy jihuïy je Marta, María etz je Lázaro. ⁶ Oy jadu'n Jesús nejhuiïy co anajty Lázaro ypigyii, jamejtz xii jim yjacxiinajxy ma anajty yajpaady. ⁷ Huin'it Jesús nimay ydiscípulos ajcxy:

—Tzoc jamim jim Judea naaxjot.

⁸ Chi je' ydiscípulos ajcxy y'adzooy:

—Huindzin, namni jäy ajcxy jim Judea ti xy'ocjaccögädzambi, e ¿mnicxaanip jim jadüg'oci?

⁹ Chi Jesús y'adzooy:

—Majmetz hora tüg xiimbi miidity. Pinjäy miid Dios ytiy'ajt, ca' ayo'n pada'ñ, tim jadu'n nej jihuïy yhuidity xiim, e ca' ycönepy, com co xii codiicxy jada naaxhuiñybi.

¹⁰ Pinjäy ca' miidity Dios ytiy'ajt, ca' je' nejhuiïy ti anajty jadaanip, chi ayo'n pada'ñ, tim jadu'n nej jäy ycoodzhuidity, e chi ycönepy miid co ca' anajty ixy ma ñicxy.

¹¹ Huin'it Jesús je' ajcxy nimay:

—Ñich ajt nmigüg Lázaro maab je', nicxy nyajpidäga'ñich.

¹² Chi je' ydiscípulos ajcxy y'adzooy:

—Huindzin, pen maab, huaadjihuïjihuip yi', ci'm yi' ymäyhuijipy.

¹³ Je' Jesús anajty ñimiyaacyp je o'cin, e je' ajcxy tijy Jesús ñimiyaacyp je mähuui.

¹⁴ Chi Jesús yajmiidmiydacy ajcxy tiydudägy, yminañ:

—Lázaro ti je' y'o'cy. ¹⁵ E ooy njotcújcidyich miid miich ajcxy ycixpi co anajty ñich ca' njimity, jigix ajcxy mmibigipy co Dios ymic'ajt nmiiidyich. Tzoc ajt jamim jim Betania.

¹⁶ Tomás huidibi anajty ajcxy yxiigoyaaxyp Dídimio, huidi ayuc-huimbizim: cuate, nimay jacjadyii Jesús ydiscípulos ajcxy:

—Tzoc ajt nañ jadu'n jamim, huen jäy jim xyaj'o'cim quipxy miid Jesús.

Jesús yajjugypigipy je jäy ajcxy etz möhuipy ajcxy jugy'ajtin

¹⁷ Co ajcxy jim yja'ty, chi ajcxy paty tiy'ajt co mimidaaxxiibi anajty maabi Lázaro ñaaxtigäy. ¹⁸ Betania ca' anajty ooy yjiguëgyity miid Jerusalén, jëyi jada' anajty miidity tugig kilómetro. ¹⁹ May judíojäy ajcxy anajty ti ymiiñgixy ma Marta etz María, yajjotcugihua'ñ ajcxy miid je' ymiguëx ycixpi co anajty ti y'ögy. ²⁰ Co nejhuiïy Marta co Jesús anajty jim ymiñ, chi nidzoñ oy jipcobadiy. E María jim yhui'miyy ma ytiyc, tigoty anajty iñäy. ²¹ Chi Marta Jesús nimay:

—Huindzin, co ixyipy miich ya anajty myajpaady, ca' ixyipy ti y'ögy nmiguëxich.

²² Per nejhuiïybich co miich cham jëbi Dios mmibijctzoy, e xymöhuip ti mdimdzoycyp.

²³ Chi Jesús y'adzooy:

—Je mmiguëx jugypigip jadüg'oc.

²⁴ Chi Marta y'adzooy:

—Nnejhuiïybich co yjugypigipy jadüg'oc co anajty naaxhuiñybi ti yhuaad'ajtni co Dios anajty yajtigadza'ñ.

²⁵ Per huin'it Jesús y'adzooy:

—Ñich je' nyajjugypigipyich je jäy ajcxy, e nmöhuibyich ajcxy jugy'ajtin. Pinjäy ajcxy xymibijcpich xymijpidaacpich, oy anajty yja'ögy ajcxy, jugy'ajtcixip ajcxy jadüg'oc. ²⁶ E tüg'óciy pinjaty ajcxy xymibijcp xymijpidaacpich juugyñi, ca' y'ögipy ajcxy tücc'i'yi. ¿Nej mibijcyp miich jadaaji?

²⁷ Chi Marta y'adzooy:

—Nmibijcypich, Huindzin. Nmibijcypich co miich je' je Cristo, Dios y'ung, huidibi anajty miinam ya naaxhuiñ.

Jesús taj may ooy miid Lázaro ycixpi

²⁸ Co Marta jadu'n yminañ, chi jada' oy huoy y'uch María, e yajnimay ameech:

—Je Huindzin chiiby je', e miich jiiby xymiidmiydägamb.

²⁹ Co María jadu'n midooy, chi ypidígy mic'amy, e chi ñicxy ma Jesús. ³⁰ Ca'ni anajty Jesús yja'ty cajpjoty. Jimni anajty yhuäcxijp ma anajty Marta ti yjijpcobaadiyii. ³¹ Co ajcxy ijxy co María ypidígy, e ypidziimy janch mic'amy, je judíojäy huidibi anajty ajcxy jim ma je tijc miid je', hue' ajcxy tijy María ñicxy yaaxpi ma anajty ti ñaaxtigíy je Lázaro. Chi ajcxy panícxy.

³² Co yjädý María ma je it ma anajty Jesús, co ijxpaty, chi ycojxtinaay'ahuiiy ma Jesús yhuinduu, chi nimay:

—Huindzin, co ixipy miich anajty m'ocyaajity, ich n'ay ca' je' ixipy y'ögy.

³³ Co Jesús ijxy yäxy je María etz je judíojäy ajcxy huidibi anajty yjaymiid'ajtip, chi ooy jihuiiy etz ytaj ymaay. ³⁴ Chi jada' Jesús yajtiy:

—¿Ma ajcxy Lázaro ti myajnaaxtigí?

Chi ajcxy nimay:

—Huindzin, jam ijxim.

³⁵ Chi Jesús yaaxy. ³⁶ Chi judíojäy ajcxy ñayñimaayi miñ xyipy:

—Ooydim anajty tzocy je Lázaro.

³⁷ Per nijëjity ajcxy ymíañ:

—Jadayaabi jäy huidibi huintzjäy yajhuindicxígy, ¿nej ca' jada' ixipy mic'ajt miidity jëbi ixipy ti yajtzögy je Lázaro, e ca'ydi ixipy ti y'ögy?

Jesús yajjugypijc Lázaro

³⁸ Chi Jesús jadüg'oc yjotmaybaty, chi ymijhuägy ma je o'cpi jut. Hue' je' anajty tüg ang miid tüg mij tzaa y'agiyducitye je jut aguu. ³⁹ Chi Jesús ymíañ:

—Jiigi' ajcxy jada tzaa.

E chi Marta je o'cpi y'uch y'adzooy:

—Huindzin, xuucnip yi', com cham yi' mimidaaxxiibiñ maabi ñaaxtigíy.

⁴⁰ Chi Jesús ymíañ:

—¿Nej cay ti jadu'n nnimäyi? Pen xymibíjcbich yi' n'ayuc, m'ixipy Dios ymic'ajt y'oy'ajt.

⁴¹ Chi ajcxy je tzaa jiiigíy, chi Jesús cix ypa't'ijxy, ymíañ:

—Dios Teedy, jäygidaacin nyajnajxypich ma miich, co miich xymidoohui n'ayucich

⁴² Yajxon nnejhuiyich co miich xy'amido'ijtpich jabom jabom, paady ycixp miich jadu'n ti nnimäy miid jadayaabi jäy ajcxy ycixpi ma ich nhuinduu, huen ajcxy mibicy co miich xquejxich ya naaxhuiñ.

⁴³ Co Jesús jadu'n ymíañ, chi jada' mic ycapxy:

—Lázaro, pidzim tibäy.

⁴⁴ Hue' je o'cpi mic'amy ypidziimy ymo'nity yajxon tüg'óciy ñinicx etz huingoyebíyity miid huit, chi Jesús ymíañ:

—Huimbidiittuutcixy, e najtzmaziiygix, huen yöychooñ.

Judío ixpicytíjy ymadzamy anajty Jesús

⁴⁵ May je judíojäy ajcxy ymibíjcy huidibi anajty María yjaymiid'ajtyp, co ajcxy ijxy je huidibi anajty Jesús ti tuñ. ⁴⁶ Per jadyii judíojäy ajcxy oy ixtäy je fariseojäy ajcxy, chi ajcxy yajmiidmiydacy huidibi anajty Jesús ti tuñ. ⁴⁷ Je teedy tungmiidpi ajcxy, etz je fariseojäy ajcxy, chi ajcxy ñayhuoomujtayi je tungmiidpi ajcxy nidüg'óciy, chi ajcxy ymíañ:

—¿Nej ajt Jesús n'octuunim? Yijiibi yëdjic ooy yi' mijhuinma'ñ tzachtuuni. ⁴⁸ Pen najtz'ixiiyim jadu'ñyi, tüg'óciy jäy mibijctähua'ñ yi'. Chi ajcxy ymiinipy je Romano tungmiidpi huidibi ajt xy'ané'mim, e chi yajhuindigoyipy ich ajt nDios y'it, e ña yajhuindigoyipy ich ajt ndzinaayin njugy'ajtin.

⁴⁹ Nidügti ajcxy je jäy, hue' anajty yxií Caifás, hue' anajty mijtungmiid, je' anajty teedy huindzin, je' jadu'n jäy nimayday:

—Miich ajcxy ca' ti mhujnhuuygixy. ⁵⁰ Ca' ajcxy mnejhuuy co jac'oy nyaj'o'cim je Jesús tügpajc, huen yi' codinaydahuip naax cajp, jigix ca'ydi ich ajt nnaax ngajp yhuindiooyim.

⁵¹ Canan yci'mhuinma'nñ jadu'n ycixpi yminañ je'. Hue' janchtiy com je' anajty ymijtungmiidity je huin'it jimijt ma teedy ajcxy ymiñ, paady Dios huinma'nñ jadu'n yejcy, co jadu'n najtzcapxiy co Jesús anajty y'öga'nñ miid tüg'óciy ajcxy naax cajp ycixpi. ⁵² E ca' nminaanim miid jéda'ajty miid je judío ajcxy ñaax ycajp ycixpi, nañ jégix co huoomujctähua'nñ tüg'óciy Dios y'ung huidijaty anajty ajcxy yajpatp xii ya. ⁵³ Huin'it oga'n ajcxy je tungmiidpi yajnidogugixy co yaj'ögaangixy Jesús.

⁵⁴ Jesús ca' anajty ma y'ocyaj'ijxni mayjäyjoty ma je judíojäy ajcxy. Chi jada' ñicxy jiguem mihuingon ma je tätznaax'it, ma anajty tüg cajp xijity Efraín. Chi jim yhui'miy miid ydiscipulos ajcxy.

⁵⁵ Huingoonip anajty je pascua xii huidibi anajty judíojäy ytumyib. Ti anajty may judíojäy ajcxy ñinicxni jim Jerusalén xii'ajtp huidibi anajty jigügyjaty tzomb. Jayijpni ajcxy ñicxy ca' anajty xii paady, co anajty ajcxy ñayajpocyñihuádza'ñyii. ⁵⁶ Ooy anajty jäy ajcxy ijxtäy Jesús huin'it. Paady anajty chachnayñimáayigixy nidüg nidüg miñ xyipy, co ajcxy ytinay'ahuuy ma Dios ytijc, jadu'n ajcxy yminañ:

—¿Nej m'ocminaangixy? ¿Minipy jada' Jesús xii'ijxpi, o ca'ji?

⁵⁷ Je teedy ajcxy je' yhuindzin etz fariseojäy ajcxy ti anajty yejccixy cötujcin co huentimpinity huidibi anajty nejhuiyb ma je Jesús, huen nigapxy jigix ajcxy madzipy.

12

María yajjaax aceite Jesús ytecy

¹ Jatudujcxini anajty pascuaxii ca' paady, co Jesús ñicxy jim Betania, jim ma anajty Lázaro yajpaady, je huidi anajty ti yajjugypicy jadüg'oc. ² Chi ajcxy jim yaj'oyiiy tüg adzu'ibi. Marta anajty jim yajcaayb yaj'uucp je jäy ajcxy. Lázaro anajty miid Jesús inäy ma je mesi. ³ Chi María conigy tüg libra ujtzipijyñii huidibi anajty ooy oy yxuugy. Tzou je' anajty ooy, je' miid Jesús ytecy yajjaaxtaayi. Chi jada' miid ycöhuay po'ttiich. Chi ac ujtzipijyñii yxuugitay tigoty. ⁴ Huin'it je Judas Iscariote je Simón ymang huidibi anajty yhuindzin cüyegam ma ymidzip, je' jadu'n ymina'nñ:

⁵ —Jac'oy co ixypy ti ndoocim jada ujtzipijyñii oy migo'pxpeexyti jadiib ixypy ajt ayoobtijc nbubejtim.

⁶ Canan paady Judas jadu'n yminañ co ayoobitijc tzachpa'ayoy. Paady jadu'n yminañ co ajcxy chachmeedza'nñ. Com je' anajty meeñbijty cuend'ajtp, e chachpuugomyb huidijaty anajty jiby ajcxy yjapidaacyp. ⁷ Chi Jesús nimay je Judas:

—Ixmatz miich yi', hue' yi' yi' María ti yujcpicy jada ujtzipijyñii co yajtuna'nñ co anajty naaxtigiyich. ⁸ Com yi' ayoobitijc ajcxy huinixii yi' miich ajcxy miid'idipy. Janch ich ca' ich miich ajcxy miid n'idipy huinixii (ya naaxhuiñ).

Judío ixpicytijc yaj'ögamy anajty Lázaro

⁹ Co ajcxy nejhuiyb may judíojäy ajcxy co anajty Jesús yjimity Betania, chi ajcxy nimiñ. E canan miid Jesús ycixpi jéda'ajty, je' anajty ajcxy nañ jadu'n chach'ixaamy je Lázaro huidibi anajty ti jugypicy jadüg'oc. ¹⁰ Chi je teedy ajcxy yhuindzindijc ñaygapxi, co yaj'ögaangixy Jesús etz nañ jadu'n je Lázaro, ¹¹ com may judíojäy ajcxy anajty ñayjibijcin, etz tzachmibijccixni Jesús.

Jesús tigiy Jerusalén jadu'n nej tüg rey

¹² Je com jabom je mayjäy huidibi anajty ajcxy ti ymiingixy xii'ajtpi ñejhuiyb ajcxy co Jesús anajty ymina'nñ jim Jerusalén. ¹³ Chi ajcxy cabigy may ytixy y'aacx, chi ajcxy nidzoon Jesús, chachminaangixy:

—¡Dios ajt xyñihuaanim yajtzocim! Mimb tüg jäy huidibi Dios ti yconucxyii. Ymiid yi' Dios ymic'ajt, je' je' je' judíojäy yrey.

¹⁴ Co Jesús paty tüg burro mang huidibi ca' ni pin yaj'iñaayñi, chi yajpejty, chi cuyduuñ jadu'n nej anajty jaybety y'ity ma Dios ñecy co jadu'n yminañ:

¹⁵ —Ca' mdzigiy miich ajcxy huidibi tzinaayb ma Sión cajn (Jerusalén). Cha je mrey ymiñ y'iñay ma tüg burro mang.

¹⁶ Je huidibi anajty ajcxy Jesús discípulo'ajtyp, ca' anajty ajcxy huinjihuigixy ixti cooni Jesús paty jadüg'oc yi' y'oy'ajtin ymij'ajtin jiiby tzajpjoty. Huin'it ajcxy ajihuigooti co jadu'n anajty ycojaayty miid Jesús ycixpi, e nañ co je' anajty Jesús ti yajtunyii ti yajjadyii jadu'n nej jaybety ymiñ.

¹⁷ Je jäy ajcxy huidibi anajty ajcxy ymiid Jesús, huin'it co Lázaro ypidzimy ma yajnaaxtigiiyi, e yajjugypijci jadüg'oc, chachyejcyp anajty ajcxy tiy'ajt nañ jadu'n huidibi anajty ajcxy ti ijxcixy. ¹⁸ Nañ paady ycixpi je mayjäy oy nañ jadu'n yjijpcobadiiyii, co ajcxy nejhuiy je mijhuinma'ñ huidibi anajty Jesús ytumyb. ¹⁹ Paady je fariseojäy ajcxy ñayñimaayi miñ xyipy:

—Ix ajcxy, ca' jada' ninej nmimadaacim Jesús, com tüg'óciy yi mayjäy axam ajcxy je' panicxcixy.

Nijjity anajty griegojäy miidmiydägaangixy Jesús

²⁰ Nijjity griegojäy nañ ti anajty ñicxcixy jim Jerusalén Dios ojadajtpi xijoty. ²¹ Chi jada' je griegojäy ajcxy nimijhuägy Felipe, huidibi anajty Betsaida cogajp jim Galilea naaxjot, e chi ajcxy minucxtaacy nimay:

—Migüg, tun may'ajt pubejtcich, Jesús ñich ajcxy nja'ixamy.

²² Chi Felipe oy yajnimay Andrés, chi ajcxy Felipe etz Andrés oy Jesús yajnimay. ²³ Chi Jesús yminañ:

—Ti je tiempo paady co ñich je jäy huidibi tsoon tzajpjoty nyajcömayipyich. ²⁴ Janch janch ñich miich ajcxy jadu'n nimaaygixy co jäy ni'by tüg mocpajc, e co je mocpajc ymuxy, huin'it yhuindigoy, e chi ytiim'ajtni may'amy. Pen ca' ni pin ni'by jada mocpajc, ca' ytiim'ada'ñ. Jadu'n ñich nipaady nej je mocpajc. Copicy n'ögibyich, huin'it mayjäy jugy'ajtin paadaangixy huidibi ca' ycixipy ytigoyipy ni mina. ²⁵ Je jäy huidibi ooy nigí nixondägy yi chinaayin ya naaxhuiñ, yajtigoyamy je' yjugy'ajtin tücci'yi. Per je pin ca'p ooy nijot'aty je chinaayin ya naaxhuiñ, e nixondaaci ooy nigí Dios y'ayuc, je' y'alma nidoocin paadip ma Dios. ²⁶ Pen ji jäy huidibi naybidaacip ma ñich, copicy ajcxy xypanícxibich. Ma ñich nyajpaady, nañ jim yi' yajpaadipy nañ jadu'n. Yi jäy pinjaty naybidaacip ma ñich, Dios Teedy yi' cömayib.

Jesús capxidzimy co y'öga'ñ

²⁷ Chi Jesús yjacminañ:

—Tájñibich mayñibich cham jotjoty huinma'ñjoty. ¿Nej nmimähuiibich nDeedyich? ¿Nihuaangich ma jada ayo'n tzaachypi huidibi ti yhuaad'ajtni? Ca' yjadu'nity. Com paady ycixp ti nmiiñich ma jada xii tiempo, jébi ayo'n nyajnajxich miid jäy ajcxy ypocy ycixpi. ²⁸ Dios Teedy tun huidibi copicy, jébi jäy ajcxy ijxcixy miich mmic'ajt etz miich m'oy'ajt.

Huin'it je jäy ajcxy huidi anajty jim ma Jesús yajpaady midooy tüg ayuc choñ tzajpjoty yminañ:

—Ti nduñich mijhuinma'ñ, e ti jäy ixu ñich mmic'ajt n'oy'ajt. E nañ jadüg'oc ndunipyich mijhuinma'ñ, jigix jäy ajcxy ijxcixipy jadüg'oc ñich mmic'ajt ñich n'oy'ajt (jadu'n Dios y'adzooy y'ung Jesús).

²⁹ Je mayjäy huidibi anajty ajcxy jim, je tiibi anajty ajcxy midoogixy je ayuc huidibi tsoon tzajpjoty, yminañ ajcxy:

—Enee yi' ti yjidity.

Jacjadyii ajcxy yminañ:

—Tüg ángel ti ymigapxyii.

³⁰ Chi Jesús nimay je mayjäy ajcxy:

—Ca' nminaanim miid ñich ycixpi jadu'n ti yajmidoy jadyaabi ayuc huidibi ti chooñ tzajpjoty. ³¹ Jadachambi jada' Dios yajpocycähua'ñ naaxhuiñjyä, e nañ ypigaanipy je mujcu' ymic'ajt huidibi ane'mb naaxhuiñjyä ajcxy. ³² Co ñich anajty jäy ti xyajcru-udzpetyich, e co ñich anajty ti njugypicyich jadügtecy, e co ñich anajty ti nhuimbityich tzajpjoty, huin'it tüg'óciy jäy ajcxy huidibi xymibijcpich, nyajpa'ttigihuibich jiiby tzajpjoty ma nyajpaadyich.

³³ Paady jadu'n Jesús yminañ, jëbi huaad tüg'óciy jäy ajcxy huinjihuñhuip ti o'cin anajty ypadamy. ³⁴ Chi je mayjäy ajcxy yminañ:

—Ma Dios ñecy jiiby jadu'n ymiñ jaybety co je Cristo huinixiñ je' y'ida'ñ. E ¿nej miich co cham jadu'n mina'ñ co copicy co yi jäy huidibi tsoon tzajpjoty, huimbidam jadügtecy tzajpjoty? ¿Pin jëdu'n mdijyp huidibi tzomb tzajpjoty?

³⁵ Chi Jesús nimay je jäy ajcxy:

—Jahueeni xi tiempo njac'ida'ñich miid miich ajcxy. Jadu'n ñich ndiy'ajt nej tüg jün huidibi codiicxp jäy co ytüyöy. Cuychinäy ñich ndiy'ajt, co tzojc nhuimbida'ñich tzajpjoty, e miich ajcxy mhui'ma'ñ jadu'n nej jäy huidibi ca' jün miidity. Je jäy ajcxy huidibi ca' cuychinaaygixy ñich ndiy'ajt, ca' ajcxy nejhuñyigixy ma ñicxcixy. Jadu'n ajcxy nej jihuñy yöygixy coodz, e ca' ijxcixy ma ñicxcixy. ³⁶ Com occhaani ñich ma miich ajcxy, nyaj'ixpijcp ñich miich ajcxy Dios ytiy'ajt. Pen xymibijccixpich, m'ljtcixip ixpicy ma Dios ytiy'ajtin.

Co Jesús jadu'n je jäy ajcxy nimayday, huin'it Jesús je' ajcxy puhua'ctuutni, chi ñicxni, e ca' ma y'ocjac'ixin.

Je judíojäy ca' mibiga'ñ Jesús

³⁷ Ooy anajty canaag mijhuinma'ñ Jesús ti jatuuñ ma jäy ajcxy yhuinduu, e ca' anajty ajcxy ni ti tim mibijccixy. ³⁸ Huidibi Jesús ytun ycapx, jiiby anajty jadu'n ycojayity ma je Dios y'ayuc necy, je Isaías ñecy, co Isaías jadu'n yminañ:

Huindzin, ca' ni pin ajt n'ayuc ndiy'ajt ti xymibijcim. Ca' ni pin huidibi huinjihuñyib je Huindzin Dios ymic'ajt.

³⁹ Ca' anajty ajcxy huaad ymibijccixy, com nañ ti anajty jadu'n Isaías jay ma jadu'n yminañ:

⁴⁰ Jadu'n yi' ajcxy nej jihuñy Dios ti yajhuindziygixy, e ti yajjotjuniygixy, jigix ca' y'ijxcixipy miid yhuin, e miid yjot yhuinma'ñ ca' huinjihuñyigixyipy, ni yca-jothuimbijtcixipy nej jëbi Cristo yajtzóocigixy.

⁴¹ Paady jadu'n Isaías yminañ je' co anajty ti ijxi Cristo y'oy'ajt, e chi cojay nej anajty ti icy.

⁴² Ca' nidüg'óciy judío ixpicytjic mijotmädy anajty Jesús. Jim anajty nijëjity huindzindijc huidibi mibijcp Jesús. Per miid je fariseojäy ycixpi co chachjotma'tcixy, paady anajty ajcxy ca' capxpídzimgixy co mijpidaaccixy Jesús. Je' co chigiiygixy co jim yajpidzimiiyb ajcxy tücci'yi ma Dios ytiyc, etz ma yi judío ñaymujctac. ⁴³ Jacnigi anajty tzojccixy co huen jäy cömaayigixy, ca'ydi co ajcxy Dios ycömayiyb.

Dios yajpocycähuiip je mayjäy miid Jesús y'ayuc

⁴⁴ Chi jada' Jesús yminañ mic:

—Je jäy ajcxy huidibi xymibijcpich xymijpidaacpich, caminaanim ñich naydüg xymibijcpich xymijpidaacpich, nañ ymibijcyp ymijpidacyp ajcxy je tibi ñich ya naaxhuiñ xyquexyich. ⁴⁵ E je jäy huidibi xy'ijxpich, tim jadu'n nipaady nej jihuñy ti icy je huidibi ti xyquexyich. ⁴⁶ ñich ti nmimiñich ya naaxhuiñ Dios ytiy'ajt, jadu'n ñich nipaady nej jihuñy tüg jün huidibi codiicx je jäy ajcxy. Je jäy ajcxy huidibi xymibijcpich ca' ajcxy yhui'mipy jibictuuby, jadu'n nej jihuñy ca' ajcxy chinaaygixy agootztuuby. ⁴⁷ Je jäy ajcxy huidibi midoob ñich n'ayuc, e ca' cuydungixy, ca'p je' ñich je' ypocy ajcxy n'ixyöyaani nbayöyaani cham. Ca'p ñich ti nmiiñich ya naaxhuiñ miid co jäy ajcxy ndzaachtunipyich miid ypocy ycixpi. Paady ñich ti nmiiñich ya naaxhuiñ co nyajpocyniñhuadza'ñich yi jäy

ajcxy. ⁴⁸ Je jäy ajcxy huidibi xycapxhuimbjítibich n'ayuc, e ca' xycöbiga'ñich, ymiid ajcxy huidibi yajpocycähuiib. Yi ayuc huidibi ti ngapxyich, yi' yajpocycähuiib ajcxy co anajty naaxhuiñybi ti yhuaad'ajtni co Dios anajty yajtigatzaani. ⁴⁹ Com iich ca' ngi'm'ayuc ngapxhuäcxyich. Je' je' Dios Teedy y'ayuc, je huidibi ti xyquexyich, yi' ngapxhuäcxibich y'ayuc. Je huidibi ti xyquexyich ya naaxhuiñ ti xyñajtzcapxiyich yi' y'ayuc, jada ayuc ngapxhuäcxyipich nyajniimaaygixyp. ⁵⁰ E nejhuiiybich co Dios y'ayuc ytiy'ajt ymimimyb yi' tzinaayin jugy'ajtin huidibi ca' tücci'yi ycixy ytigoy. Paady ycix je ayuc huidibi ajcxy nyajmiidmiydacyp, jadu'n nyajmiidmiydaaccixy nej Dios Teedy ti xyajnajtz'ane'miych.

13

Jesús ypuji ydiscípulos ajcxy ytecy

¹ Ca'ni anajty xi paady, pascuaxi anajty ajcxy tijy. Chi Jesús ñejhuiyb co anajty yxi ytiempo yhuaad'ajtni mina chonaani ya naaxhuiñ yhuimbidaani ma Dios Teedy. E Jesús ooy anajty tzocy jihuïy ymigügtijc ajcxy huidibi ya naaxhuiñ anajty ajcxy hui'ma'ñ. Jadu'n tzocy jihuïy huinixi.

² Chi jada' Jesús etz ymigügtijc ytigiiy ajcxy adzuu'ajtp (je pascuaxi adzu'ajtin). Ti anajty je mujcu' huinma'ñymöy Judas Iscariote, Simón ymang, co anajty Jesús cïyega'ñ ma ymidzip ajcxy. ³ Ñejhuiyb anajty Jesús co je Dios Teedy ti yajcidiğiyyi tüg'óciy ymic'ajt, e Jesús nañ ñejhuiyb anajty co je' ti choon ma Dios y'it, e nañ jiiy anajty jadüg'oc yhuimbida'ñ. ⁴ Chi ypidigy ma mesi, chi je yoñybi yhuit ñayyajnijenduutti. Chi huijtzigy tüg huit huidibi miid ñaymextiitzi nayböttiitzi, ñayyajmijxojtzpejti yhuindiiy. ⁵ Co jadu'n ñayñ'iixiyyi, chi pidacy ni ma tüg cibujiniyoc. Chi nihuägiyyi ydiscípulos ajcxy ytecy. Chi yajtzondacy tecypujii tüg tüg, e mextiich pöttiich miid je huit huidibi anajty ti ñayyajhuindiyiyyi.

⁶ Co nihuägiyyi Simón Pedro ytecy, chi Pedro yminañ:

—Huindzin, ca' huaad miich ndecy xypujich.

⁷ Chi Jesús y'adzooy:

—Huidibi iich ndumyb ca' yi' miich ajcxy mhuiñjihuïygyxy jadachambi, jacomjey miich ajcxy mhuiñjihuïhuipy.

⁸ Chi Pedro y'adzooy:

—Miich ca' huaad iich ndecy xypujich ni caminaabi.

Chi Jesús y'adzohuimbijty:

—Pen ca' mdecy nbuji, ca' iich miich jëbi njäy'adyii.

⁹ E huin'it Pedro nimay Jesús:

—Huindzin, ca' iich jëda'ajty ndecy xypujibich, hue' janchtiy tüg'óciy ngjich etz ngohajcich.

¹⁰ Chi Jesús nimay Pedro:

—Com tiibi mjot mhuiñma'ñ yajhuäch, ca' yi' ocjactzojcní yajhuädziy mjot mhuiñma'ñ jadügtecy. Tim jadu'n nej jihuïy naamni chiyy, e cham ca' tzojcní yajtz-iñhuibyich jadügtecy. Jëda'ajty mdecy nbujich cham. Miich ajcxy huädz mjot mhuiñma'ñ ajcxy mmiidiñ, oy ca' miich ajcxy nidüg'óciy.

¹¹ Com Jesús ñejhuiyb anajty pinjäy cïyegaanip ma ymidzip, e paady jadu'n yminañ:

—Ca' ni tüg'óciy miich ajcxy mjot mhuiñma'ñ yhuädziy.

¹² Chi jada' co yajtecpujtay, chi jada' yoñyhuit yajtigiiy jadüg'oc. Y'ixtacy ma mesi, e chi jada' nimay ajcxy:

—¿Nej mhuiñjihuïyb ajcxy ti iich ti nduñich miid miich ajcxy? ¹³ Miich ajcxy jadu'n minamb co iich miich ajcxy myaj'ixpijcy, etz iich miich xyhuindzin'ajtpich. E tiydudägy miich ajcxy mina'ñ com iich jëdu'n miich ajcxy mHuindzin. ¹⁴ Pen iich miich ajcxy nyaj'ixpijcy etz xyhuindzin'ajtpich, e ti iich miich ajcxy nyajtecpujy, nañ jadu'n miich ajcxy myajtecpujiiyb miñ xyipy. ¹⁵ Iich miich ajcxy ti nmöy tüg iixpejt, jigix ajcxy jadu'n mduniy jadu'n nej ti nduñich, e huin'it ca' amij agix nayjihuïhuïyb ajcxy. ¹⁶ Janch

janch ñich miich ajcxy yam jadu'n nnimäy co je huindzin jac mij je' ca'ydi yi' ytumbi. E nañ je' huidibi yajquejxyöyb jac mij je' ca'ydi huidibi quejxyöyb. ¹⁷ Co ajcxy tiy'ajt mnejhuñhuipy, chi jotcuyc ajcxy m'idipy, pen mbadumyb ajcxy jadu'n nej nduñich.

¹⁸ Ca' nmina'ñich co nidüg'óciy miich ajcxy mbocymiidity. Ti ñich yi' nnejhuñy pín ti nhuin'ixyich. Ti nhuin'ixyich tüg huidibi pocymiid, jigix cuyduunip nej anajty yjaybetyity ma Dios ñecy ma je Cristo jadu'n ymina'ñ: “Yi' huidibi caymujcp miid ñich, ti ñich yi' xymibidigy.” ¹⁹ Ti ñich yam miich ajcxy jayijp nyajnamaaygixy, jigix co anajty jadu'n ytunyii yjadyii, mmibigipy ajcxy co ñich jëdu'n je Cristo. ²⁰ Janch janch yam ajcxy jadu'n nnimaaygixy co je jäy ajcxy huidibi cöbijcp je huidibi anajty nguejxypich, tim jadu'n nipaady jadu'n nej ñich anajty xycöbijcyich. E je jäy ajcxy huidibi xycöbijcpich, je' ajcxy anajty ycöbijcyp je' huidibi xquejxich ya naaxhuñ.

Jesús ñimay ymigügtijc co je Judas anajty cäyegaanip ma ymidzip

²¹ Co jadu'n Jesús yminañ, chi tajnip mayñip anajty ooy jotjoty huinma'ñyoty, chi capxypidzimy:

—Janch janch ñich miich ajcxy yam jadu'n nimäy co nidügti miich ajcxy xycäyega'ñich ma nmidzipich.

²² Chi Jesús ydiscipulos ajcxy ñayhuindicxpejttaayi nidüg nidüg. Ca' anajty ajcxy nejhuñy pín anajty jëdu'n Jesús ytijyp. ²³ Nidügti je' ajcxy huidibi anajty Jesús ooy miid ñaychogyii ñäy anajty ma mesi tim huington ma Jesús yhuinduu. ²⁴ Chi Simón Pedro yci' yaj'ijxy yajhuinjihuüy co huen yaj'amidooy Jesús pín anajty jadu'n ytijyp. ²⁵ Chi je discipulos ajcxy huidibi anajty ñaayb ma Jesús yhuinduu nimay yhuindzin:

—¿Pín jadu'n mdijyp?

²⁶ Chi Jesús y'adzooy:

—Yi' je' pín anajty ñich nmooybich yi' tzajcaagy huidibi anajty nyajxoocpyich ma je ügy.

Chi yajxoogy tüg pedasi tzajcaagy, chi moy je Judas, je Simón Iscariote ymang. ²⁷ Tim huin'ítity co Judas je tzajcaagy cöbijcy, chi je mujcu' ytigüy ma je' y'ay yjot. Chi Jesús nimay Judas:

—Yi' huidibi mdunamyb, tungo jadu'n mic'amy.

²⁸ Huidijaty anajty ajcxy jim caayb, ni pín cahuinjihuüy je ayuc huidibi Jesús yajnimay Judas, nej je ayuc yhuimbidzimy. ²⁹ Com je Judas anajty miid je meeñybijty, paady ajcxy nijëjity huinjihuüy co anajty tijy ñimäyii:

—Ñicx juy yi' huidibi ajt nyajmayjajtim yi' xügixpi.

Jacjadyii ajcxy anajty tijy ñimäyii:

—Mo' tigatii ayoobitijc. ³⁰ Tim huin'ítity co je tzajcaagy cayday, chi ypidzimy Judas tiba'y, e ti anajty ycoodziyñi.

Jesús ñajtz'ane'miy jemybi cötujcin

³¹ Co Judas ypidzimy, chi Jesús yminañ:

—Cham je jäy ajcxy ixa'ñ ñich nmic'ajt ñich n'oy'ajt, ñich je jäy huidibi tzoon tzajpjoty. Etz nañ ma ñich je jäy ajcxy ixa'ñ Dios ymic'ajt Dios y'oy'ajt. ³² Jadu'n nej je jäy ajcxy ti ijxcixy Dios ymic'ajt ma ñich, nañ tim jadu'n Dios yajniguëxigipy yi' nmic'ajtich n'oy'ajtich tim mic'amy. ³³ Migügtijc huidibi ooy ndzocy njihuüyich, ca' n'ochuäcxibaanich jecy miid miich ajcxy. Xy'ixtähuibich miich ajcxy. Jadu'n nej ti nnimáaygixyich yi' jacjadyii judíojäy ajcxy, nañ jadu'n ñich miich ajcxy yam njacnimaaygixy co ma nñicxa'ñich, ca' huaad miich ajcxy jiiby mñicxcixy. ³⁴ Cham ajcxy nmöhua'ñ tüg ané'min huinjemybi. Cham miich ajcxy nyajnajtz'ane'mihuaangixy jadüg'oc jadayaabi tiy'ajt: Naychójcigix nayjihuíyigix ajcxy nidüg nidüg, tim jadu'n nej ñich miich ajcxy ti ndzocy ti njihuüy. Naychójcigix nayjihuíyigix aguipxyi. ³⁵ Miid jada ycixpi ñejhuñhuipy tüg'óciy jäy co ñich miich ajcxy ti nyaj'ixpijccixy co ajcxy nidüg nidüg mnaychogüyb mnayjihuíhuüy.

Jesús ñimay ymígügtijc co je Pedro anajty coyüdzaanip

³⁶ Chi Pedro ñimay:

—Huindzin, ¿ma miich nnicxa'ñ?

Huin'it Jesús y'adzooy:

—Ma ñich nnicxa'ñich miich ca' huaad xypanicxyich. Jac'axam xypanicxyibych.

³⁷ Chi Pedro yminañ:

—E ¿nej co ca' huaad jëbi ñich miich nbanicxy? com ñich ngïyegamyich njugy'ajtin ma yi o'cin miid miich ycixpi.

³⁸ Chi jada' Jesús y'adzooy:

—¿Nej janch co mgïyega'ñ yi mjugy'ajtin ma yi o'cin miid ñich ycixpi? Janch janch ñich miich ajcxy yam jadu'n ñimäy, co ni ca'ni anajty jabom tugüg'oc tzey yaaxïgy, co ñich miich anajty tugüg'oc ti xycoyüchich.

14

Pinjaty mibijcp Jesús nicxip ma Dios Teedy yajpaady

¹ Chi Jesús yjacminañ:

—Ca' ajcxy jotmay mjihuïy ma m'aa mjot miid jada ayuc. Mibic ajcxy Dios etz ñich nañ jadu'n mibijccich. ² Jiiby ma ñich nDeedy chinäy, jiiby mïjtigiydac. Co ixypy ca' yjadu'nity, ca' ixypy ti nnimaaygixy co nnicxyich ma nDeedyich n'ocni'ixiy tzinaaydac miid miich ajcxy ycixpi. ³ E co ñich anajty ti nba'ttigiyich, e ti ni'ixiyyich tzinaaydac jayijp miid miich ajcxy ycixpi, huin'it ajcxy nihuimbidiy, jëbi ñich ajt naydügmujcim, jigix ma anajty n'ityich, nañ jiiby miich ajcxy m'idipy. ⁴ Miich ajcxy mnejhuïyb nej jëbi ajcxy mjädip ma nnicxyich oyduuby.

⁵ Chi Tomás yminañ:

—Huindzin, ca' ñich ajcxy nejhuïygixy ma miich nnicxa'ñ, e ca' ñich ajcxy mnejhuïygixy nej jëbi njá'tcixibych jiiby.

⁶ Chi Jesús y'adzooy:

—Jadu'n nej ti ndzinäyich jada je' je ijxpejt nej Dios tzocy co miich ajcxy mdzinähuipy. Nyejcpyich je tiy'ajt huidibi jëbi huaad mguychinaaygixy. Co jadu'n mguydundáygixipy ñich ndiy'ajt, chi mjá'tcixipy ma Dios. Nyejcpyich je jugy'ajtin huidibi ca' tücc'iyi ycixy ytigoy. Ca' ni pinjäy yjädipy ma Dios Teedy, peni ca' cuydundäy ñich ndiy'ajt. ⁷ Jadachambi etz nej xii tiempo yjacnicxa'ñ miich ajcxy m'ixy'ajty Dios Teedy. Pen xy'ixy'ajtpich miich ajcxy, nañ m'ixy'ajtyp miich ajcxy Dios Teedy.

⁸ Chi Felipe y'adzoy:

—Huindzin, ñich ajcxy yi Dios Teedy yaj'ijxcich cham cham, e miid tim yi'yi jotcujc'adipyich ajcxy.

⁹ Paady Jesús ñimay je Felipe:

—Cham xii jimijt ñicxni maabi ñich nja'ityich miid miich ajcxy, e ¿ca'ni miich xytimy'ijxhui'myich Felipe? Yi jäy ajcxy tiibi xy'ijxcixyich, nañ y'ijxyp ajcxy yi' Dios Teedy. E chi jada', ¿nej miich co jadu'n xyñimäyich: “Yaj'ijxcich je Dios Teedy?” ¹⁰ ¿Nej ca' mmibicy co ñich n'ity ma Dios Teedy, e Dios Teedy ijtp ma ñich? Yi ayuc huidibi ngapxhuäcxypich, ca' yi' ngi'm'ayuc'adyiijich ngi'mdiy'ajt'adyiijich. Yi mijhuinma'ñ huidibi ajcxy m'ijxyp ndumyich, yi Dios Teedy huidibi ijt ma ñich, yi' jadu'n tumb.

¹¹ Mibijccich ajcxy co ñich n'ityich ma Dios Teedy, e Dios Teedy ijtp ma ñich. Peni ca' mdimmibigaangixy, mibic ajcxy miid je mijhuinma'ñ ycixpi huidibi ti nduñich.

¹² Janch janch ñich miich ajcxy jadu'n nimaaygixy co je jäy ajcxy huidibi xymibijcpich, nañ ytunipy ajcxy nañ jadu'n yi mijhuinma'ñ huidibi ti nduñich. Jac tim nigi tunipy mijhuinma'ñ, com ñich nnicxaambich ma Dios Teedy y'ity. ¹³ E tüg'óciy ti miich ajcxy mibijctzooyb ma Dios Teedy miid ñich nxii, ndunipyich yi'. Dios Teedy huidibi nDeedy'ajtypich, je' cömay y'idip miid huidibi miich anajty ajcxy mdumyib miid ñich

nmic'ajt. ¹⁴ Co myajmibijctzohuipy tijaty, xycapxpáatibich nxii, huin'it nguydunipyich huídibi anajty ti mbijctzoogixy.

Jesús yquexamy Dios yjihui'ñ ymic'ajt

¹⁵ Peni xychojcpich miich ajcxy, cuydúnigich ajcxy tüg'óciy n'ayuc ndiy'ajt, jadu'n nej anajty ti nnajtz'ane'miych. ¹⁶ E co ndzoonibyich, chi nbijctzóohuibyich yi Dios Teedy jadüg yjaymiid huídibi ajcxy xyjaymiid'adiib. Dios ajcxy xymóhuipy jadüg jaymiid huídibi ajcxy xycapxhuijip, je huídibi ajcxy mjot'amij'adiiyb, e je' xymiid'idipy ajcxy huinixii. ¹⁷ Je huídibi xycapxhuijip, je' jada'ajty Dios yjihui'ñ ymic'ajt, je Espíritu Santo. Je' Dios ytiy'ajt ymiid. Dios yjihui'ñ ymic'ajt ca' adigihua'ñ yi naaxhuiñyäjy huídibi ca' xymibicyich. Com ca' ajcxy ixy, e nañ ca' ajcxy ixy'adyii je Espíritu Santo. Miich ajcxy m'ixy'ajtyp je Espíritu Santo, com je' tzinaayb ma miich ajcxy, e nañ xy'adigihuiipy xyjottigihuiipy ajcxy. ¹⁸ Ca' miich ajcxy nyajhui'maangixy naydüg jadu'n nej co'ögy'ung. Nnihuibidipyich miich ajcxy jadügtecy. ¹⁹ Tim huingónip yi xii tiempo mina yi jacjadyii naaxhuiñyäjy ajcxy ca' xy'ocjac'íjxnibich. Com jadu'n nej iich njactzinähua'ñ, ca' iich njugy'ajtin ycixipy ytigoyipy tüccí'yi. Nañ jadu'n miich ajcxy mjactzinähua'ñ, ca' mjugy'ajtin ajcxy ycixipy ytigoyipy tüccí'yi. ²⁰ Co anajty Dios yjihui'ñ ymic'ajt ajcxy xy'adigiy xyjottigiy, huin'it ajcxy mnejhuíhuipy co nyajpaadyich ma nDeedyich, yi Dios Teedy, e miich ajcxy myajpaady ma iich, e iich nañ jadu'n yajpatpich ma miich ajcxy. ²¹ Je jäy ajcxy huídibi iich n'ayuc ndiy'ajtich xycöbijcip, e cuydungixy, je' je' jadu'n xychojcpich, e tzogiiib je' iich nDeedy. E iich nañ jadu'n ndzogipy njihuíhuibyich je' ajcxy, e nnyajjaguëxigiiybich ma je' ajcxy.

²² Je jadügpi Judas, ca' nminaanim Judas Iscariote, nimay Jesús:

—Huindzin, ¿nej co nnyajjaguëxiga'ñyii ma iich ajcxy, e ca' nnyajjaguëxiga'ñyii ma je jäy ajcxy huídibi ca' xymijpidägy?

²³ Chi Jesús je' y'adzooy:

—Yi jäy ajcxy huídibi xychojcpich xyajmij'ajtpich, xycuyduunibich yi' ajcxy iich n'ayuc ndiy'ajt. E huin'it yi' ajcxy chogiiyb iich nDeedy. Je nDeedyich etz iich miinip iich ajcxy ma je jäy ajcxy huídibi xycuyduunip iich ndiy'ajt, e tzinaydacpigipyich ma yi' ajcxy yjot yhuinma'ñ. ²⁴ Je jäy ajcxy pinjaty ca' xychocyich, nañ ca' ajcxy iich n'ayuc xycuyduunich. Paady ca' nnyajjaguëxiga'ñyiiich ma je' ajcxy. Com yi ayuc huídibich miich ajcxy nyaj'amido'ijtyp, ca' yi' iich ngi'm'ayuc'adyii. Yi' je' Dios Teedy y'ayuc ytiy'ajt, com yi' iich ya naaxhuiñ xyquejxich.

²⁵ Jadayaabi ayuc ajcxy cham jadu'n njacyajnimaaayb, jadu'n nej njacyaanigyich ya naaxhuiñ miid miich ajcxy, ma ca'ni ndzoonich. ²⁶ Per je Espíritu Santo huídi miinam, je' ajcxy xycapxhuijip. Dios Teedy yquexamy je Espíritu Santo miid iich nxii. Je Espíritu Santo xyajnejhuíydáhuipy miich ajcxy tüg'óciy tiy'ajt, e nañ xyaj'ajihuíhuíib tüg'óciy jadu'n nej iich miich ajcxy nnimaaygixy.

²⁷ Iich miich ajcxy nyajmihui'my jotcuyc'ajtin. Jadu'n nej iich njotcuyc'atyich, nañ nyajjotcuyc'adipyich miich ajcxy. Yi jotcuyc'ajtin huídibi nyajmihuímaamyich miich ajcxy, ca' yi' yjadu'nity nej je jotcuyc'ajtin huídibi yajpaatp ya naaxhuiñ. Ca' mdajcixy maygixy, nañ ca' mdzigiigixy. ²⁸ Ti iich miich ajcxy nnimaaygixy jayijp'aty co ndzona'ñich ma miich ajcxy, e nhuimbida'ñich jadüg'oc ma miich ajcxy. Peni xychojcpich miich ajcxy, mxondägipy ajcxy co nnicxa'ñich ma Dios Teedy, com yi Dios Teedy jac mij yi' ca'ydi iich. ²⁹ Ti iich jada tiy'ajt jayijp nimiydägyich ma ca'ni ndzoonich, jigix co anajty je tiempo paady mina jadayaabi ytuniiyb yjadiiyb, huin'it ajcxy mmibigipy iich n'ayuc.

³⁰ E ca' iich miich ajcxy mijcajee ooy njacmiidmiydägaangixy yam. Com tim huingónip mina je mujcu' huídibi ane'mb ya naaxhuiñ xyñimina'ñich. Ca' iich yi' huaad jébi xymimadägyich. ³¹ Per copicy yi' nguydunipyich Dios Teedy y'ayuc nej xyajnajtz'ane'miych, jigix je naaxhuiñyäjy nejhuíhuipy co nyajmij'atyich yi Dios Teedy. Pidiccix, tzoc'ajt huingduum jamim.

15

Je camuuxy'aadz etz y'aacx

¹ Chi Jesús jacnimay ydiscípulos ajcxy:

—Jadu'n ñich nipaady nej camuux'aadz ma tüg muuxy'aadz cam. ñich nDeedy, yi Dios Teedy, jadu'n yi' nipaady nej je muuxy'aadz cam cuend'ajtpi. ² Tüg'óciy jäy jadu'n ajcxy nipaady nej muuxy'aadz y'aacx. Je jäy ajcxy huidibi ca' cuychinäy ñich ndiy'ajt, yi Dios Teedy yajcödígoyiib, jadu'n nej je muuxy'aadz cam cuend'ajtpi quejtzpuxy je muuxy'aadz y'aacx huidibi ca' ytiim'aty. Je jäy ajcxy huidibi cuydundaayb ñich ndiy'ajt, Dios yaj'oyiib je' ajcxy yjot yhuinma'ñ, jëbi oybi tuñ, jadu'n nej je muuxy'aadz cam cuend'ajtpi huijtz'oyiy je muuxy'aadz y'aacx, jigix jëbi ñigi ytiim'aty. ³ Yi ayuc huidibi ti nyajñimaaygixy, yi' ti yajhuäch yi jibicpi ma miich ajcxy mjot mhuinma'ñ. ⁴ Mibijccich ajcxy, paníxcigich ajcxy ndiy'ajt huinixii. Co ajcxy jadu'n mdunipy, ñich miich ajcxy miid'idipy huinixii. Jadu'n nej ixipy camuuxy'aadz y'aacx co ca' ytiim'aty co ahuinggujc y'ity, e ca' mic'ajt paady ma ycop. Nañ tim jadu'n miich ajcxy pen ca' mmic'ajt mbaadipy ma ñich, ca' mmimadáaccixipy mguychináaygixipy ñich ndiy'ajt.

⁵ Jadu'n ñich nipaady nej camuuxy'aadz cop, e miich ajcxy jadu'n nipaady nej camuuxy'aadz y'aacx. Je jäy ajcxy huidibi yajpatp ma ñich, e ñich nyajpaady ma je' ajcxy, je' ajcxy oyhuinma'ñ tunam mij cajee, tim jadu'n nej camuuxy'aadz huidibi tiim'ajtp may'amy. Co ixipy ñich ca' nyajpaady ma miich ajcxy, ca' miich ajcxy huaad ti mdungixy. ⁶ Co jäy ajcxy ndiy'ajt xy'ixmájtzbich, Dios ajcxy yajcödígoyiib, tim jadu'n nej jäy yajcödígoy miid jñn yi muuxy'aadz y'aacx huidibi ymibuxiib co ca' ytiim'ajtni. Co je y'aacx ytidzity, chi ajcxy yajmucy, e pidaaccixy jñnjoty, e jadu'n jiiby ñidooyiy jñnjoty.

⁷ Co miich ajcxy m'ijtcixy ma ñich, e co ñich n'ayuc nañ jadu'n ijtp ma miich ajcxy mjot mhuinma'ñ, jëbi mbijctzoogixy ti ajcxy mdzojcyp ma Dios, e nguydunipyich miid miich ajcxy ycixpi. ⁸ Chi je jäy ajcxy cōmayipy Dios co miich ajcxy mguydunipy ñich ndiy'ajt tiydudägy, tim jadu'n nej camuuxy'aadz y'aacx ytiim'aty may'amy. Co je jäy ajcxy ixipy nej tudägy mguydungixy ñich ndiy'ajt, chi je jäy ajcxy tiydudägy nejhuñhuipy co ti nyaj'ixpicyich miich ajcxy. ⁹ Jadu'n nej Dios Teedy xychocyich xyjihuñyich, nañ tim jadu'n ñich miich ajcxy ti ndzocy ti njihuñyich. Ndzogipy njihuñhuibyich miich ajcxy huinixii co ca' ajcxy xy'ixmájtzybyich ndiy'ajtich. ¹⁰ Co mguydundähuipy ajcxy jadu'n nej nyajnajtz'ane'miiygixy, ndzogipyich njihuñhuibyich miich ajcxy huinixii. Tim jadu'n nej nguyduñich yi huidibi Dios Teedy xyajnajtz'ane'miiybich, e yi' xychojcpiich xyjihuñyibich huinixii.

¹¹ Cham jadyaabi ayuc nyajnajtz'ane'miiygixy, jigix jotcuyc m'ijtcixipy. Jadu'n nej jotcuyc ti n'ityich, e nañ jadu'n miich ajcxy mjotcuyc'adipy anaxy. ¹² Jadaabi ayuc ñich miich ajcxy nyajnajtz'ane'miiybich co naychójcigix nayjihuñyigix nidüg nidüg, tim jadu'n nej ñich miich ajcxy ndzocy njihuñy. ¹³ Je tiy'ajt jac'oybi co migügtijc ajcxy naychogiiyb nayjihuñhuiiyb, co tüg jäy ciyegipy yjugy'ajtin miid ymigügtijc ycixpi. ¹⁴ ñich miich ajcxy migüg'ajtyp, pen mguydumyb nej ajcxy nyajnajtz'ane'miiygixy. ¹⁵ Jadu'n nej xii tiempo yjacñicxa'ñ, ca' miich ajcxy n'ocnaydijnip ñich ndumbi. Com je tumbi ca' huinjihuñy huidibi yhuindzin ytumyb. Hue' miich ajcxy nyajnaxyich nmigügtijcich, com tüg'óciy tiy'ajt tiibi nmidooyich ma ñich nDeedy, yi Dios Teedy, ti ñich miich ajcxy nñimaaygixy. ¹⁶ Ca' nmīnaanīm ñich miich ajcxy ti xyhuin'ixy. ñich miich janchtiy ajcxy ti nhuin'ixy. E ti ñich miich ajcxy nyajñibicy co ñicxy mgapxhuäcxixy ñich n'ayuc. E nañ mayjäy mijpidägipy je ayuc huidibi miich ajcxy mgapxhuäcxipy. E nañ ñich n'ayuc, huidibi miich ajcxy mgapxhuäcxipy, y'idipy ma je jäy ajcxy yjot yhuinma'ñ huinixii. Paady ycix tüg'óciy tijaty miich ajcxy mbijctzooyb ma Dios Teedy miid ñich nxi, yi' ajcxy xymöhuipy. ¹⁷ Jada ayuc ajcxy yam nyajnajtz'ane'miiyb co ajcxy mnaychogiiyb mnayjihuñhuiiyb miñ xyipy.

Je maybi naaxhuiñyjäy ca' ajcxy ixaangixy Jesús etz cham je' yjäy

¹⁸ Co je may naaxhuiñjyäy ca' xy'ixaangixy miich ajcxy, ca' ajcxy ooy mhuintmayipy, com mnejhuiñyb ajcxy co ñich nañ jadu'n jac jayijp ca' yi' ajcxy ti xy'ixaangixyich. ¹⁹ Co ixyipy ytügyi miich ajcxy m'ayuc mdiy'ajt miid je jacjadyii naaxhuiñjyäy y'ayuc ytiy'ajt, huin'it ixyipy ajcxy xychojccixy xyjihuiñygixy, com tú'ciy miich ajcxy mhuintma'ñ ixyipy miid yi' ajcxy yhuinma'ñ. Janch com co ca' ytügyi miich ajcxy m'ayuc mdiy'ajt miid je jacjadyii naaxhuiñjyäy y'ayuc ytiy'ajt, paady je jacjadyii naaxhuiñjyäy ca' ajcxy xy'ixa'nip. Com ñich miich ajcxy ti nyajijpjhuitztüdy, jadu'n nej yi' jacjadyii naaxhuiñjyäy ajcxy chinaaygixy yjugy'ajtcixy. ²⁰ M'ajihuiñyb ajcxy jadu'n nej ti nnimaaygixy co ñich miich ajcxy xyhuindzin'ajtpich, paady jac mij ñich ca'ydí miich ajcxy. Jadu'n nej naaxhuiñjyäy ajcxy ti xy'ixhuidityich ti xypahuidityich, nañ jadu'n miich ajcxy yi' xy'ixhuidida'ñ xypahuidida'ñ. Nañ may je jäy huidibi ca' ti xycapxymidooyich, nañ jadu'n may je jäy huidibi miich ajcxy ca' xycapxymidohuaangixy. ²¹ Nijot ajcxy y'iditzaangixy miid miich ajcxy ycixpi, com ca' ajcxy ixy'adyii Dios Teedy huidibi xyquejxyich ya naaxhuiñ.

²² Co ixyipy ca' ti nmiñich ya naaxhuiñ nyajnimäyich je jäy ajcxy Dios ytiy'ajt, ca' ixyipy ajcxy pocy miidity. Per com ti nmiñich ya naaxhuiñ, paady cham ypocy ajcxy miidity co ca' ajcxy xy'ixa'ñich. ²³ Je jäy ajcxy huidibi ca' xy'ixa'ñich, jadu'n nipaady nej ñich nDeedy ca' ajcxy ixaangixy. ²⁴ Co ixyipy ñich ca' ti nduñich ma yi' ajcxy yhuinduu mijhuinma'ñ, huidibi ca' ni pin jäy tuñi, ca' ixyipy ajcxy pocy miidity. E janch ti ajcxy ooy ja'ijxcixy je mijhuinma'ñ, e ca' ñich yi' ajcxy xy'ixa'ñ, e nañ ca' ixaangixy ñich nDeedy. ²⁵ Paady jada jadu'n ytuñyii yjadyii, jigix yajcuydunipy jadu'n nej ycojaayity ma yi' judíojäy ajcxy ley ñecy, ma jadu'n ymina'ñ: "Ni ti tiy'ajt ycaca'ty, co ñich yi' ajcxy ca' xy'ixa'ñich."

²⁶ E co anajty xyñigidaaccixy yi' Espíritu Santo, yi' huidibi xycapxhuijip ajcxy, je huidibi miich ajcxy nyajnigüexam, chon ma Dios Teedy, je huidibi Dios ytiy'ajt miid. Yi' xyñidiy'ajt'adaambich co Dios ytiy'ajt nmiidityich. ²⁷ E miich ajcxy nañ jadu'n xyñidiy'ajt'adipich co Dios ytiy'ajt nmiidityich. Com ñich miich ajcxy jayijp nyaj'ixpijctzondac Dios y'ayuc ytiy'ajt.

16

¹ Ti ajcxy yam tiy'ajt njacyajnimaaaygixy, jigix ca' ajcxy m'ixtigihuaägyipy. ² Com judíojäy ajcxy xy'ixhuidzipy ajcxy ma ajcxy yi' ñaymujctac. Ypadaamy yi' xii tiempo co miich ajcxy jäy xyaj'ögipy, hue' ajcxy tijipy co Dios anajty ooy jadu'n jäygidägy tiibi anajty ajcxy tuñ. ³ Paady ajcxy jadu'n xytunipy jibic, je' co ajcxy ca' ixy'adyii yi' Dios Teedy, etz nañ jadu'n ca' xy'ixy'adyiijich. ⁴ Paady ñich miich ajcxy jadachambi jadu'n nnimaaygixy, jigix co anajty je xii tiempo paady, chi m'ajihuiñyb ajcxy co ti anajty jayijp nnimaaygixy co ayo'n tzaachypi mminaxa'ñ myajnaxa'ñ ajcxy.

Dios yjihui'ñ ymic'ajt tunam ma jäy yjot yhuinma'ñ

Ca' anajty ajcxy jada ti nyajnimäy miid jégix nmiid'ity ajcxy. ⁵ E cham janchtiy nnicxáanibich ma yi' huidibi ti xyquexyich ya naaxhuiñ. E ni tüg miich ajcxy xyca'amidooyich: "¿Ma mnicxa'ñ?" ⁶ Paady miich ajcxy mdajy mmay ma m'aa mjot, co ajcxy cham jadu'n jada ayuc ti nyajhuinjihuiñygixy. ⁷ Oy ixyipy miich ajcxy cham mjatajy mjamay, tiy'ajt nej nmina'ñich co jac'oy miid miich ajcxy ycixpi co nhuimbidityich ma Dios Teedy. Co ixyipy ca' jiiby nnicxa'ñich tzajpjoty, ca' ixyipy xyñiminaangixy Dios yjihui'ñ ymic'ajt, je Espíritu Santo, je huidibi ajcxy xycapxhuijip. Per co ñich anajty tzajpjoty ti nhuimbity, huin'it ñich yi' miich ajcxy nyajnigüexipy. ⁸ E co anajty je Espíritu Santo miñ ya naaxhuiñ, huin'it yi' yajjihui'ñybigipy jäy ajcxy ypocy. E nañ yajni'ixihuiipy je jäy ajcxy co Dios tiydunib miid ypocy ycixpi. ⁹ Yi' Espíritu Santo yajjihui'ñybigipy jäy ajcxy ypocy, co ñich ca' ajcxy ti xymibicy ca' ajcxy ti xymijpidägyich. ¹⁰ Je Espíritu Santo yajnejhuñhuipy jäy ajcxy nej huaad cuychinaaygixy Dios y'ayuc ytiy'ajt. Com co ñich nba'ttigihua'ñich ma Dios Teedy, e miich ajcxy ca'

xy'ocjac'íjxnibich. ¹¹ Je Espíritu Santo yajhuinjihuĩhuip je jäy ajcxy co Dios tiyduniib ajcxy miid ypocy ycixpi huidibi ajcxy ca' tiydudägy chinaaygixy. Com yi Dios ti yi' mujcu' tiyduñ miid ypocy ycixpi.

¹² Ooy may ayuc iich nmiidity huidibi njayajnimähuaamyich ajcxy per ca' miich ajcxy mhujnjihuĩhuipy cham. ¹³ Jacjiini mhujnjihuĩhuipy ajcxy je ayuc huidibi njayajnimähuaamy ajcxy, co Dios quexipy je Espíritu Santo ya naaxhuiñ huidibi tiy'ajt miid. Yi' je' miich ajcxy xyajhuinjihuĩdähuipy tüg'óciy Dios ytiy'ajt. Com yi' ca' yci'mhuinma'ñ tunipy. Yi' janchtiy ñigapxtähuipy tüg'óciy ayuc tiy'ajt huidijaty anajty ymidooyb ma Dios Teedy, e nañ yajniguëxictähuipy tüg'óciy tiy'ajt huidibi mimb cidaacp. ¹⁴ Je Espíritu Santo iich yi' capxpaady xyaj'idipyich, com yi' iich ndiy'ajt miich ajcxy xyajhuinjihuĩhuaam. ¹⁵ Tüg'óciy huidibi Dios Teedy ymiid, nañ njé'ajtypich yi', paady jadu'n ti nmina'ñich co je Espíritu Santo xyajhuinjihuĩdäyagixipy ajcxy iich yi' n'ayuc yi' ndiy'ajtich.

Jesús ñimay ymigügtijc co ajcxy yjotmay ahuimbidipy jotcuyc'ajtin

¹⁶ Tim huaad'ajtp xii tiempo, co iich miich ajcxy ca' xy'ocjac'íjxip. Chi co xii tiempo yjacnajtzninicxihuip, huin'it iich miich ajcxy xyjac'ixipy jadüg'oc.

¹⁷ E huin'it ajcxy nijëjity Jesús ydiscípulos ajcxy ñayñimaayi miñ xyipy ac jëyi:

—¿Ti jadu'n ytiyyp? Co jadu'n ymina'ñ, co tim huaad'ajtnip xii tiempo mina iich miich ajcxy ca' xy'ocjac'íjxnibyich, e co yjacnajtzninicxihuip xii tiempo, huin'it miich ajcxy xyjac'ixipyich jadüg'oc, com nnicxaamich ma Dios Teedy. ¹⁸ Chi ajcxy jadu'n ñayñimaayi miñ xyipy:

—¿Ti jadu'n ytiyamy? Co jadu'n ymina'ñ co tim huaad'ajtnip xii tiempo. Ca' iich ajt nhujnjihuĩyim ti jadu'n ytiyamy.

¹⁹ Com Jesús ñejhuĩyib anajty nej ajcxy yja'amidoohua'ñyii, chi nimay ajcxy:

—Yi' miich ajcxy ooy mjayajtihua'ñ. ¿Nej co jadu'n ti nmina'ñich? Tim huaad'ajtnip xii tiempo co iich miich ajcxy ca' xy'ocjac'íjxnipy. E chi yjacnajtzninicxihuip xii tiempo, e chi miich ajcxy xyjac'ixipyich jadüg'oc. ²⁰ Janch janch iich miich yam nnimaaygixy co mjotmaybaadip ajcxy, e nañ myäxip ajcxy miid jotmay. Chi je naaxhuiñyjäy ajcxy huidibi ca' xymijpidägyich, xondägam ajcxy, e miich ajcxy nañ mjotmaybaadip. Per yi' mjotmay ajcxy ahuimbidipy tüg xondaacin. ²¹ Jadu'n ajcxy mjada'ñ jadu'n nej tüg töxyjäy tzaachypí jihuüy co y'ung yma'xung'ada'ñ. E co ti yma'xung'aty ypi'c'ung, chi jäydägyooy yi' tzaachypí miid xondaacin co tüg jäy ti ymiin ya naaxhuiñ. ²² Tim jadu'n nej yjaty miid je töxyjäy, nañ jadu'n yjada'ñ miid miich ajcxy. Cham ajcxy jotmay mjihuüy ma m'aa mjot, e chi co xy'ixipyich jadüg'oc miich ajcxy, huin'it ajcxy m'aa mjot yxondäga'ñ. E ni pin huaad mxondaacin ajcxy xycapjicipy.

²³ Je huin'it xämbi (co anajty je Espíritu Santo ti ymiin ya naaxhuiñ) ca' iich miich ajcxy ni ti xyjacyajmbijctzohuipyich, com janch iich miich ajcxy yam jadu'n nimaaygixy co tüg'óciy huidijaty myajmayajtcixyp, chi ajcxy mbijctzohuipy ma Dios Teedy miid iich nxii, e xymöhuipy ajcxy yi'. ²⁴ Chambaadni ca'ni ni ti ajcxy mbijctzoy ma Dios miid iich nxii. Pijctzoogix, e xymöhuipy ajcxy yi', jigix mjotcugihuip ajcxy anaxy.

Jesucristo ymimadac je jibic-huinma'ñ ya naaxhuiñ

²⁵ Tüg'óciy jada ayuc tiy'ajt ac jihuimbit miich ajcxy ti nyajnimäy. Huingomb xii tiempo mina tiydudägy ajcxy nyajmiidmiydactähuipy yi' Dios Teedy y'ayuc ytiy'ajt yajxon, e ca' y'ocjihuimbitiñ. ²⁶ Je huin'it xii co anajty iich ti nhuimbityich ma Dios Teedy, jëbi miich ajcxy mbijctzoogixy ma Dios Teedy tijaty ajcxy myajmayajtyp. Co ti mbijctzóogixipy miid iich nxii, xymóoygixipy yi' Dios Teedy. Ca' ycopicyity co iich yi' nmibijctzohuipy miid miich ajcxy ycixpi. ²⁷ Com yi' Dios Teedy nañ xychojcp xyjihuiyib yi' miich ajcxy. Com miich ajcxy jayjip ti xychoyich ti xyjihuiyich, e ti mmibicy ajcxy co ti ndzooñich ma Dios Teedy, paady Dios miich ajcxy xymöhuipy tijaty anajty

myajmibijctzooyb. ²⁸ Jiiby iich ndzooñ ma Dios Teedy yajpaady, co nmiiñich ya naaxhuiñ, per jadachambi n'ixmájtznibyich jada naaxhuiñybi, e nhuimbijtnich ma Dios Teedy.

²⁹ Huin'it je' ydiscípulos ajcxy yminañ:

—Cham janchtiy tudägy miydägy, ca' m'ocyajtuuni jihuimbit ayuc. ³⁰ Cham iich ajcxy nejhuüy co miich mnejhuüyday tüg'óciy tiy'ajt. E ti xyajnimaydäyich co anajty ca' ti tiy'ajt iich ajcxy nmibicy co miich mdzooñ ma Dios.

³¹ Chi Jesús y'adzooy:

—¿Nej mmibijcyp cham jada ayuc jadu'n nej ti nmimáaygixyi? ³² Jihuiñybijccix co huingonip je xii tiempo, e ti tim paady mina miich ajcxy mgueec-huäcxtáaygixipy nidüg nidüg ma pin timdzocy, e xyajhui'mgixich naydüg. Per ca'p iich nneydügity, com yi Dios Teedy yi' ijtp miid iich. ³³ Miich ajcxy yam jada ayuc nyajnimaaayb, jigix ajcxy jotcuyc'ajtin mbaadip ma iich. Ya naaxhuiñ mbadamy ajcxy ayo'n etz tzaachypi. Jotcugiygix, ca' mdajcxy maygixy, com ti nmimadägyich yi jibicpi ya naaxhuiñ.

17

Jesús ymibijctzou Dios miid ydiscípulos ajcxy ycixpi

¹ Co Jesús jadu'n yminañ jayijp, chi ypa't'ijxy tzajpcíxy, chi Dios Teedy pa'tcapxy nimay:

—Dios Teedy, ti hora paady mina ayo'n nyajnaxa'ñich jadu'n nej miich jayijp'aty myajnihuinmayiy. Yajniguëxig iich nmic'ajt iich n'oy'ajt, com iich miich nDeedy'ajtypich, jigix iich nañ jadu'n nyajniguëxigibyich miich nmic'ajt miich m'oy'ajt ma yi jäy ajcxy.

² Com miich ti xymöyich mic'ajt ma tüg'óciy jäy, jëbi nmöyich ajcxy jugy'ajtin huidibi ca' ycixipy ytigoyipy. Nmöhuiyich jada jugy'ajtin tüg'óciy jäy ajcxy huidibi miich ti xymöyich. ³ Je jäy ajcxy huidibi ix'y'ajtp je Dios janchypi, je Dios tügpajcpi etz y'ixy'ajtyp nañ jadu'n Jesucristo huidibi ti mguexy ya naaxhuiñ, ymiid ajcxy jugy'ajtin huidibi ca'ycixipy ytigoyipy niminaa.

⁴ Ti iich nyajniguëxigyich miich ajcxy yi nmic'ajt ya naaxhuiñ, co iich ti nduñ yi mdung huidibi miich xyajniijcich. ⁵ Jadachambi Dios Teedy yajmijtigiygich miich, miid je mic'ajtin huidibi anajty nmiiidich ma miich mhuinduu co anajty ca'ni naaxhuiñybi chondacyñi.

⁶ Ti iich miich ya naaxhuiñ nyajniguëxici yi nmic'ajt ma yi jäy ajcxy huidibi miich xymooyich, huidibi miich mhuin'ijx ma naaxhuiñyjäy ajcxy. Miich yi' ajcxy mjäy, e miich ti xymöyich, e ti ajcxy miich m'ayuc cuydungixy. ⁷ Jadachambi nejhuüñyñip yi' ajcxy, co tüg'óciy tijaty tiy'ajt iich miich yi' xymooyb, jiiby yi' chooñ tzajpjoty ma miich. ⁸ Com yi ayuc huidibi miich ti xymöyich, ti iich yi' ajcxy nyajnimaydäy, e ti yi' ajcxy cöbijccixy. E nañ ti ajcxy huiñhuüygyxy tiydudägy co iich jiiby ndzooñich ma miich, e nañ ti ajcxy mibijccixy co miich ya naaxhuiñ xyquejyich.

⁹ Miid yi' ycixpi ajcxy miich Dios Teedy nmibijctzooy, ca' nminaanim miid jacjadyii naaxhuiñyjäy ajcxy ycixpi nmibijctzoy. Miid yida'ajty ycixpi ajcxy huidibi miich ti xymöyich, com nañ mjë'ajtyp miich yi' ajcxy. ¹⁰ Tüg'óciy tijaty iich një'ajtyp, nañ mjë'ajtyp miich yi', e tijaty miich mjë'ajtyp nañ një'ajtyp iich yi'; e iich nmic'ajt niguëxi'cp yi' ma yi' ajcxy chinaayin yjugy'ajtin.

¹¹ E ca' n'ocjacyajpadaanich ya naaxhuiñ. Iich njäy ajcxy jacyajpadam ya naaxhuiñ. Nñicxnibich jiiby tzajpjoty ma miich. Dios Teedy, cuend'at iich ndiscípulos ajcxy miid miich nmic'ajt huidibi miich ti xymöyich, jigix yi' ajcxy tú'ciy yjot yhuinmañ yajpaadipy ma miich, tim jadu'n nej iich ajt tú'ciy njot nhuinmañ nyajpaatim. ¹² Co anajty iich njac'yaajity naaxhuiñ miid iich njäy ajcxy, ti ngüend'atyich anajty ajcxy miid je mic'ajt huidibi miich xymooyich. E ni tüg ajcxy ca' yhuinmañydygooy. Abicy iich n'octimpidägy je huidibi nayyajhuinmañydygooyi (je Judas Iscariote), co yi' anajty jadu'n yajcuydunam jadu'n nej jaybety ymiiñ miid yi' ycixpi etz miid iich ycixpi.

¹³ Cham ñich miich niba'ttigühuaani jada'. Miich m'ayuc mdiy'ajt nyajnimaybich jada naaxhuiñyäjy ajcxy huidibi nyaj'ixpijycpich, jigix agujc jotcuyc yhui'mip ajcxy. ¹⁴ Ti ñich ajcxy yi' nyajnimaydäyich miich m'ayuc mdiy'ajt. E ca' ajcxy y'ixa'ñyii yi naaxhuiñyäjy ajcxy huidibi ca' xymijpidägyich. Com je' co ajcxy yjot yhuinma'ñ ti yajtigach, ca' ytügiy miid yi jacjadyii naaxhuiñyäjy yjot yhuinma'ñ. Jadu'n nej ñich ca' ytügiy njot nhuinma'ñ miid naaxhuiñyäjy ajcxy yjot yhuinma'ñ. ¹⁵ Ca' ñich cham miich nmibijctzoy co myajpidzimipy ñich ndiscípulos ajcxy ma jada naaxhuiñyibi. Hue' janchtiy tun may'ajt cuend'at ajcxy ma yi ca'oybi ymiin. ¹⁶ Yi' ajcxy yjot yhuinma'ñ ca' ytügiy miid yi jacjadyii naaxhuiñyäjy ajcxy yjot yhuinma'ñ. Tim jadu'n nej ñich ca' ytügiy njot nhuinma'ñ miid yi jacjadyii naaxhuiñyäjy ajcxy yjot yhuinma'ñ. ¹⁷ Yajhuaatzi ajcxy yjot yhuinma'ñ miid miich m'ayuc, com yi m'ayuc yi' je' tiy'ajt miid. ¹⁸ Jadu'n nej miich xyquejxyich ya naaxhuiñ, nañ jadu'n ñich yi' ajcxy nguejxhuäcxyich ya naaxhuiñ. ¹⁹ Miid yi' ajcxy ycixpi ti nnyagiyegyiijich amuumdügijot ma miich, jigix yi' ajcxy nañ jadu'n ñaygiyegiyb amuumdügijot ma miich, co ajcxy cuydunipy miich m'ayuc mdiy'ajt.

²⁰ E ca' ñich jada'ajty ajcxy nibijctzohuiyich. Hue' ñich janchtiy nibijctzohuiydaaybich tüg'óciy jäy ajcxy huidibi xymibijcibich xymijpidägibich miid yi ayuc huidibi ñich ndiscípulos ajcxy ycapxhuäcxyipy. ²¹ Huen ajcxy nidüg'óciy yjot yhuinma'ñ yajtügiy, jadu'n nej miich Dios Teedy mjot nhuinma'ñ yajpaady ma ñich, e ñich njot nhuinma'ñ yajpaady ma miich. Co yi' ajcxy yjot yhuinma'ñ yajtügihuipy miid ñich ajt njot nhuinma'ñ, huin'it jacjadyii naaxhuiñyäjy ajcxy mibigipy co miich xyquejxyich ya naaxhuiñ. ²² Ti ñich ajcxy nmöyich je tiy'ajt etz je oy'ajt huidibi ñich miich ti xymöy, jigix ajcxy yjot yhuinma'ñ jatyimy yajtügihuipy ajcxy, jadu'n nej ñich ajt njot nhuinma'ñ yajpaatim tú'ciy. ²³ ñich yajpatpich ma ñich njäy, e miich nañ myajpatp ma ñich, jigix tiydudägy ajcxy tügmucy y'idipy, e nañ jigix naaxhuiñyäjy ajcxy jatyimy nejhuihuipy co miich xyquejxyich ya naaxhuiñ, e nañ co yi' ajcxy ti mdzocy ti mjihuüy jadu'n nej ñich miich xychocy xyjihuiyich.

²⁴ Dios Teedy ndzojcpyich co yi jäy ajcxy huidibi miich ti xymöyich y'idipy ajcxy nañ jadu'n ma anajty n'ityich jilby tzajpjoty, jaydëbi ajcxy ixipy ñich nmic'ajt ñich n'oy'ajt huidibi miich ti xymöyich. Com miich ti xychocy ti xyjihuiyich jacjayip ca'ni anajty naaxhuiñyibi myajcojyñi. ²⁵ Dios Teedy, miich ooy mmijity mjanchity, e yi jacjadyii naaxhuiñyäjy ca' ajcxy yi' xy'ixy'ajtyp. ñich miich n'ixy'ajtyp. ñich njäy ajcxy ti mibicy ti mijpidägy co miich xyquejxyich ya naaxhuiñ. ²⁶ Ti nyajnimaybich yi' ajcxy pin miich, co miich je' Diosip. E njacyajnimähuaamyich yi' ajcxy tiydudägy, jigix yi' ajcxy nañ jadu'n ñaychogiyb ñayjihuihuüyb nidüg nidüg, jadu'n nej miich xychocyich xyjihuiyich, e nañ jadu'n jigix ñich ndiy'ajt yajpaadipy ma yi' ajcxy yjot yhuinma'ñ.

18

Ymajtz ajcxy Jesús

¹ Co jadu'n Jesús ycapxymiydacy jayip, chi jada' ñicxy miid je jäy ajcxy huidibi anajty ajcxy yaj'ixpijycp. Ñicxy ajcxy jim'amy huoc ninaxy, je huoc hue' anajty xijity Cedron. Ñicxy ajcxy jim ma anajty tüg aguemy. Chi Jesús ytigiy ma je aguemy miid ydiscípulos ajcxy. ² Judas huidibi anajty ciyegam Jesús, ñejhuüyb anajty ma je it ma anajty miid'oy canaag'oc je' ydiscípulos ajcxy. ³ Chi jada' Judas miiddzooñ soldados ajcxy etz jacjadyii tungmiidpi huidibi je teedy yhuindzin ajcxy etz fariseojäy ajcxy yquejx. Chi ajcxy yja'ty ma je it ma anajty Jesús yajpaady, ymiid ajcxy linterna, ymiid ajcxy chinjin etz canagnax tijaty huidibi anajty ajcxy miid chiptuñ. ⁴ E Jesús com ñejhuüydaayb anajty tüg'óciy nej anajty yjada'ñ y'ayohua'ñ, chi jipcohuägy je ymaymidzip ajcxy, e nimay:

—¿Pin ajcxy m'ijxtaayb?

⁵ Chi je' ymidzip ajcxy y'adzooy:

—Yi' ñich ajcxy n'ixtaayb je Jesús, je Nazaret jäy.

Chi Jesús yminañ:

—Ich jëdu'n.

Je Judas huidibi anajty cïyejcp Jesús, jim anajty ytinäy miid Jesús ymidzip. ⁶ Co Jesús jadu'n yminañ: “Ich jëdu'n.” Chi ajcxy yëphuimbijtay jadu'ñyi. ⁷ Chi Jesús jadüg'oc y'amidooy ajcxy:

—¿Pin ajcxy m'ijxtaayb?

Chi ajcxy jadüg'oc y'adzooy:

—Yi Jesús, je Nazaret jäy. ⁸ Chi Jesús yminañ:

—Ti ajcxy njanimäy co ich jëdu'n. Pen janch ich miich ajcxy xy'ijxtaayb, najtzmaziydäy jadayaab ich nmigügtijc ajcxy, huen nicxcixy.

⁹ E jadu'n yajcuyduñ je ayuc co anajty Jesús ci'm ti ymina'ñ: “Tüg'óciy jäy huidibi nDeedy ti xymöyich, ca' ni tüg jëbi huaad ytigooy.” ¹⁰ Chi jada' je Simón Pedro huidibi anajty miid tüg espada, juudy je y'espada ma ñidijc, e chi yajtzaachiyi je Teedy mijtungmiidpi ytumbi, tüg yta'tz'ac aa'oy'amybi yajminájciy. Je tumbi hue' anajty xiijity Malco. ¹¹ Chi Jesús nimay Pedro:

—Pidäg m'espada ma ñidijc. Ca' mnejhuÿy co copicy nyajnaxipyich je tzaachypi je ayo'n huidibi Dios Teedy ti xyajnigo'adugÿyich. Min n'ocminaxy n'ocyajnaxyich jada tzaachypi jadu'n nej ixypy tüg tasi ta'm'ujtznii ngo'uucnaxyich.

Jesús ma je Teedy mijtungmiidpi yhuinduu

¹² Chi je soldados ajcxy, je soldado yhuindzin etz judíojäy ajcxy ytungmiidpi huingo-huägiy ajcxy Jesús. Chi ajcxy majch, e chi ajcxy cïxojch. ¹³ Chi ajcxy jayijp yajnicxy Jesús ma Anás yajpaady, je' anajty Caifás ymid'ajtyp, je huidibi anajty mijtungmiid ma teedytjic ajcxy ymiñ je huin'it jimijt. ¹⁴ Je Caifás je' anajty ti yecy je capxhuijin ma yi judíojäy ajcxy co tügtecy yminañ: jac'oy co tüg jäy y'ögipy miid tüg'óciy naax cajp ycixpi.

Pedro yminañ co ca' ix'y'adyii Jesús

¹⁵ Simón Pedro miid jadügpí ydiscípulo ypanicx ajcxy Jesús (co je ymidzip yajnicxi mach). E je jadügpí ydiscípulo ix'y'ajtíp anajty yajxon je teedy mijtungmiidpi, paady ytigÿy axam huin'it co Jesús ymidzip yajtigÿy ma je teedy mijtungmiidpi ytjic. ¹⁶ E je Pedro jiiby je' yhuimiy ma tijc aguu. E je jadügpí ydiscípulo co anajty ajcxy ñay'ix'y'adyii miid je teedy mijtungmiidpi, chi ypidzimy migapxy je tijc aguu adinaayb, chi Pedro ajcxy yajtigÿy jiiby tigoty. ¹⁷ Chi jada' je töxy'anäg huidibi anajty tijc'aguu adinaayb, nimay je Pedro:

—¿Nej ca' miich nañ jadu'n Jesús xydiscípulo'adyii?

Chi Pedro y'adzooy:

—Ca'.

¹⁸ Je tumbidijc ajcxy etz je soldadtjic ajcxy ti anajty ajcxy oy jin yajmijiygixy co anajty chachtichity, e Pedro nañ jim anajty nañ jadu'n miid xamy ajcxy.

Je teedy mijtungmiidpi yajcomidou Jesús ypocy

¹⁹ Chi je teedy mijtungmiidpi y'amidooy Jesús pinjaty anajty ti yaj'ixpicy etz tijaty anajty ti yaj'ixpicy. ²⁰ Chi Jesús y'adzooy:

—Ti ich oy njacapxy njamiydägy mayjäyjoty. E ti ich njatyimy nyaj'ixpicyich ma miich ajcxy mnaymujctacin etz ma Dios ytjic, ma yi judíojäy ajcxy nidüg'óciy ñaymugyii. Ca' ni ti ameech ti nnigapxyich. ²¹ ¿Na'amy co xyjactim'amidooyich ti anajty ti nyaj'ixpicyich? Yi' ajcxy amidou pinjaty ti xy'amido'ijtich n'ayucich, yi' ajcxy nejhuÿyib ti ich jadu'n ti nyaj'ixpicyich. Yi' ajcxy tüg'óciy ñejhuiydaayb nejaty ich ti nmina'ñich.

²² Co jadu'n y'adzooy Jesús, huin'it tüg judío tungmiidpi huidibi anajty jim huigon tinaayb ma Jesús, chi tüg ci' acojxigy Jesús, chi minañ:

—¿Nej co jadu'n jibic m'adzooy yi teedy mijtungmiidpi?

²³ Chi Jesús y'adzooy:

—Pen jibic ich ti n'adzooy yec tiy'ajt nej co yjibicity. Pen oy ich ti n'adzooy, ¿nej co xycoxyich?

²⁴ Chi Anás nimay soldadtijc co huen Jesús yajnicxy cixoch jim ma yi Caifás ytijc, je teedy mijtungmiidpi.

Chi Pedro jadüg'oc yminañ co ca' icy'adyii Jesús

²⁵ Simón Pedro jimni anajty ytinäy ma jimba' yxamy anajty, chi ajcxy amidooy jadüg'oc:

—¿Nej cay yi' miich xyaj'ixpijcp nañ jadu'n?

Chi Pedro jadüg'oc coyüch Jesús yminañ:

—Ca' je' n'ichity.

²⁶ Nidügti ajcxy je teedy mijtungmiidpi ytumbi, je' anajty y'amigüg yi Malco, huidibi Pedro yta'tz'ac quejtzpujxi, chi jadu'n yminañ:

—¿Nej ca' mdiy n'ixxyi jim ma je aguemy miid Jesús?

²⁷ Chi Pedro midugüg'oc oy coyüch yhuindzin, e tim huin'itiy tzey oy yaaxigy.

Jesús ma je gobernador yhuinduu

²⁸ Chi ajcxy jim yajzooñ Jesús ma Caifás ytijc yajnicxy ajcxy ma agujctijc, tim jopyñi anajty. Chi je judiojyä ca' ajcxy ytigüy ma agujctijc, com ca' anajty ytundigoyaangixy miid judiojyä ycostumbre. Ca' ajcxy ytigühua'ñ anajty ma je romanojyä gobernador ytijc amayxiijoty, e ca' anajty ajcxy ñayyajjibiccihua'ñyii. Com co jadu'n ycanayyajjibicciyi ajcxy, e huin'it ca' ajcxy ycacaay ma je pascua xii adzuu'ajtin. ²⁹ Co ca' ajcxy ytigühua'ñ anajty ma je agujctijc, chi je gobernador Pilato nibidzimy ajcxy tiba'y ma anajty ajcxy miidity Jesús cuend'aty. Chi Pilato yminañ:

—¿Ti xihuín ajcxy mmiid, miid jadyaabi yëydijc?

³⁰ Chi ajcxy y'adzooy:

—Co ixypy ca' ti jibicpi tuñ, ca' ixypy ich ajcxy ya yi' nyajmiñ ma miich.

³¹ Chi Pilato yminañ:

—Yajnicxcix miich ajcxy. Nicx tiydungix jadu'n nej miich ajcxy mley y'ane'my.

Chi je judiojyä ajcxy y'adzooy:

—Ich ajcxy ca' ni ti mic'ajt nmiidity nicxy ich ajcxy njäyayj'ögy.

³² Co jadu'n ajcxy yminañ, chi jadu'n ajcxy cuyduñ je Jesús yci'm'ayuc jadu'n nej anajty ti yminañ ti o'cin anajty ypadamy. ³³ Chi Pilato jadüg'oc ytigüy jiby agujctigoty, chi coyaaxiyy Jesús, chi nimay:

—¿Nej miich je' rey'ajtp ma yi judiojyä ajcxy?

³⁴ Chi Jesús y'adzooy:

—¿Nej mgi'mhuinma'ñ miid xy'amidooyich pen ich nrey'ajtpich, o huingjäy ti xyajnimäy co nrey'atyich?

³⁵ Chi jada' Pilato y'adzooy:

—¿Nej nañ judiojyä jada' ichi? Mgi'mnaax mgi'mgajp etz je teedy mijtungmiidpi ti xcyeyecy ma ich. ¿Ti ti mdundigooy?

³⁶ Chi Jesús y'adzooy:

—Ich ca' n'ane'myich ya naaxhuiñ. Huingduum ich n'ane'min nmiididyich. Co ixypy ya naaxhuiñ n'oc'ane'myich, tüg'óciy ich nmigügtijc ajcxy ti ixypy ajcxy tziptungixy, ti ixypy ajcxy xyñihua'ñich. E ca' ixypy ti naygyeygyiijich ma yi judiojyä tungmiidpi ajcxy. Per janch ich ca' ich ya naaxhuiñ n'ane'myich.

³⁷ Chi Pilato y'adzooy:

—¿Nej mrey miichi?

Chi Jesús yminañ:

—Miich jadu'n xytijypich co nrey'atyich. Paady ti nmiñich ya naaxhuiñ, e ti nma'xung'atyich, jigix nyecyich tiy'ajt tiydudägy. Tüg'óciy yi jäy pinjaty tiy'ajt cuydumb xy'amido'jtibich yi' n'ayucich.

Pilato y'ane'my huen Jesús yaj'ögyii

³⁸ Chi Pilato y'adzooy:

—¿Ti jadu'n mdiy tiy'ajt tiydudägyi?

Jadu'ñyi je' jada'ajty yjacmíañ, chi pidzimy jadüg'oc tība'y ma anajty je judíojäy ajcxy. Chi ajcxy nimay:

—Ca' ñich ni ti bocy nbaadyich ma jada jäy ma yi romanojäy yley. ³⁹ E com miich ajcxy miid tüg costumbre co tüg nnajtmadziyim machyjäy miid jada pascua xii ycixpi, ¿nej mdzojcy ajcxy co nnajtmadzihuibyich jada judíojäy reyí?

⁴⁰ Chi ajcxy nidüg'óciy minanday:

—Jadayaabi jäy ca' mnajtmadzihuipy, yi' janchtiy mnajtmadzi' yi Barrabás.

Barrabás hue' je' anajty tüg meetzpi.

19

¹ Chi jada' Pilato ané'min pidacy co huen ajcxy Jesús huinhuopy jipphuopy. ² Chi jada' je soldados ajcxy yaj'oyiiy tüg corona mij'apy pa'apy, chi ajcxy yajcojeniy Jesús. Chi ajcxy yajnijeniiy tüg rey yhuit ucypí ycolor. ³ Chi soldados ajcxy huingohuägiiy jadüg'oc capxpoocxixy yajxígy'amy, nimaaygixy:

—¡Viva miich judíojäy rey!

Chi ajcxy ooy huingojxy jipcojxy.

⁴ Chi Pilato jadüg'oc ypidzimy tība'y. Chi nimay je mayjäy:

—Cham ajcxy nyajpidzimy tība'y jada Jesús, jigix ajcxy mnejhuñhuip co ca' ni ti pocy ti nbaadyich ma yi'.

⁵ Co Jesús ypidzimy tība'y miid je apy corona ma ycohuajc etz je rey yhuit ucypí ycolor. Huin'it Pilato ymíañ:

—Ijxcix, cha je yëdyjc.

⁶ Co je teedy tungmiidpi etz je judíojäy ajcxy ijxy, chi ajcxy yminanday nidüg'óciy aguipxyjaty:

—Yajcruudzpet, yajcruudzpet.

Chi Pilato ymíañ:

—Yajcruudzpejtcix miich ajcxy, janch ñich ca' ni ti tiy'ajt nbaadyich nej ñich yi' nyajcruudzpedípy.

⁷ Chi je judíojäy ajcxy y'adzooy:

—Ñich ajcxy miid tüg cötujcín, jëbi y'ögy miid ñich ajcxy ngötujcín ycixpi, com ti ycapxtigooy co ymíañ co yi Dios yteedy'ajtyp.

⁸ Co jada ayuc midooy Pilato, chi nigí chigíygoty. ⁹ Chi ytigiiy jadüg'oc ma je cötujctac miid Jesús, chi nimay:

—¿Ma miich tiyi mgogajpity?

E Jesús ca' y'adzooy.

¹⁰ Paady Pilato ymíañ:

—¿Ñich miich ca' xy'adzohua'ñ? ¿Ca' mnejhuñ co nmíididyich mic'ajt jëbi nnajtmadziy etz ñañ jëbi nyajcruudzpety?

¹¹ Chi Jesús y'adzooy:

—Ni ti mic'ajt ixipy mgamiidity ma ñich, pen ca' ixipy mic'ajt ti xymöyich yi huídibi ane'mb jiby tzajpjoty. E paady ycixpi yi tibi ñich xycíyecyich nigí yi' pocy miidity ca' ydi miich.

¹² E huin'it Pilato ooy yjahuinma'ñ ixtay nej huaad ca' jëbi ocnajtmadziy Jesús. E je judíojäy, je Jesús ymidzip, nigí anajty ajcxy chachxi'idich:

—Pen miich mnajtmadziyb jada Jesús, huin'it ca' m'ocjacnaymigüg'ájtinipy miid yi mhuindzin je César huídibi ané'min ti xymöy. Com tüg'óciy pinjaty naydijip rey, ca' yi' miid nay'ixa'ñyii je César.

¹³ Co Pilato jadu'n ayuc midooy, chi yajpidzimy Jesús tība'y. Chi Pilato y'ixtacy jim ma je' y'ane'mdac ycötujctac, jim ma je it huídibi anajty xiijip Empedrado, hebreo'amy

xiijity Gabata. ¹⁴ Hue' tim cujcxii anajty, e chi com jabom anajty je pascuaxii ycodiicxni, co Pilato jadu'n nimay judíoáy ajcxy:

—Cha ajcxy jada mrey.

¹⁵ E je' ajcxy y'adzooy:

—Huen ögy, huen ögy. Yajcruudzpet.

Chi Pilato yminañ:

—Miich ajcxy mrey, ¿miñ n'ocyajcruudzpétyichi?

Chi je teedy tungmiidpi ajcxy y'adzooy:

—Hich ajcxy ca' iich ajcxy huingbi rey nmiidity, jëyi César iich ajt nrey'ajtim.

¹⁶ Chi Pilato cïeyjcy Jesús ma je judíoáy ajcxy, huen ajcxy ci'm yajcruudzpety. Huin'it ajcxy Jesús niuägiiy. Chi ajcxy yajtzooh.

Yajcruudzpejty ajcxy Jesús

¹⁷ Chi ajcxy je cruudz Jesús ci'm yajquejycabiïy. Miid nicx ajcxy ma je it xiijity o'cpi cohuajc, hebreo'amy xiijity Gólgota. ¹⁸ Jim ajcxy yajcruudzpejty quipxyi miid jametz jäy, tüg anajty'amy, jadüg a'oy'amy etz Jesús cujc'amy. ¹⁹ Chi Pilato ane'my huen cijxjay ayuc ma je cruudz, e jadu'n je ayuc ajcxy jay: “Jesús, Nazaret jäy, je judíoáy ajcxy yrey.”

²⁰ May ajcxy ooy je judíoáy capxy je ayuc huidibi anajty cijxjay ma je cruudz. Com je it ma anajty ajcxy Jesús ti yajcruudzpejtcixy mihuingon anajty Jerusalén. Hue' anajty yjayity: hebreo'amy, latin'amy etz griego'amy. ²¹ Chi je teedy mijtungmiidpi ajcxy nimay je Pilato:

—Ca' ixyipy jadu'n ti mjay: “Judíoáy yrey”. Hue' ixyipy ti mjay: “Yi' jadu'n naydijip iich judíoáy xyrey'ajtpich.”

²² Chi Pilato y'adzooy:

—Yi' tiibi njaayich, ti iich yi' njaay, ca' nyajtigadza'ñich.

²³ Co soldados ajcxy yajcruudzpejtay je Jesús, huin'it je' yhuit ajcxy huijtzi'ci. Chi ajcxy je huit yajhuäcxy midaaxpicy. Chi soldados ajcxy cijptüg cïchypijcy. Yi' yjocxhuit jadu'n nej anajty ytügijpxuyiyity. ²⁴ Chi ajcxy ñayñimayi ac jëyi soldadtijc:

—Ca' huaad ajt n'agiidziïyim jada jocxhuit. Tzoc ajt suerte n'oc'ijxim, jigix ajt nnejhuiïyim pin anajty suerte'ajtip.

E jadu'n ajcxy cuyduñ nej anajty ycojaayity ma Dios ñecy, ma Cristo jadu'n yminañ: “Yajhuäcx ajcxy iich nhuit, e ma iich njocxnijen jim ajcxy suerte ijxy.” Je' je' huidibi soldadtijc ajcxy ycuyduun.

²⁵ Jim ma Jesús ycruudzmijc, jim anajty ajcxy ytinäy: Jesús ytaj, je ytaj chi', je María (Cleofas ytöxyijc), etz María Magdalena. ²⁶ Co Jesús ijxpaty ytaj etz je ydiscípulo huidibi anajty ooy nigí tzocy ma ytaj ymijc, chi nimay ytaj:

—Nan, iich nmigüg huidibi tinaayb ma miich mmijc, yi' xycuend'adip jadu'n nej jihuïy miich yi' xytaj'adyii.

²⁷ Chi Jesús nimay je' ydiscípulo:

—Hich ndaj miich mgüend'adipy, jadu'n nej ixyipy mgi'mdaj'adyii.

Jadu'n nej xii tiempo jac nicxni Jesús ytaj tzinaydacpicy ma jada discípulo ytijc.

O'c Jesús

²⁸ Co jadu'n ytundaayi yajtaayi, chi Jesús nejhuiïy co ti anajty tüg'óciy ytundäyii yjajtäyii jadu'n nej Dios tzocy. Huin'it jadu'n yminañ:

—Tidziïyinibich.

Co jadu'n yminañ, je' anajty ycuydundaayb nej anajty ycojayity ma Dios ñecy miid yi' ycixpi.

²⁹ Jim anajty tüg pi'c uugi'ñ ymiid anajty vinoxunni. Chi ajcxy je' yajxoogy tüg esponja (jadu'n yi' nej po't) miid vinoxunni, e chi yajjijp'eedziïy tüg paxyijp, je' miid yajjädy je vinoxunni ma Jesús y'ahuac. ³⁰ Co jada' Jesús co'uucnajxy je vinoxunni, huin'it jadu'n yminañ:

—Ti tüg'óciy nguydundäyich.

Chi ñaax'ijxy, e chi y'o'cni.

Tüg soldado cumy Jesús ma ycaachyjijp

³¹ Com jabom anajty je pascua mijxii (amayxii ooy), e nañ sábado xii anajty. Paady copicy anajty co ajcxy yajminájcipy ajcxy je jáy ninícx je tiibi anajty yajcruudzpejtcixy. Miid je' ycixpi je judíojáy ajcxy ñicxy ma Pilato pijctzoy may'ajt co huen ane'my yi soldados ajcxy, co huen nicxy yajtijy je jáy ytecy ajcxy huidibi ti yajcruudzpety. ³² E chi ajcxy je soldados yja'ty ma je it ma ajcxy yajcruudzpejty Jesús. E je metzpi jáy ajcxy ytecy tiji huidibi ajcxy yajcruudzpejt tú'ciy miid Jesús. ³³ Co je soldados ajcxy ymijhuágy ma Jesús, huin'it ajcxy ijxy co ti anajty y'o'cni, paady ca' ajcxy tiji ytecy.

³⁴ Chi tüg soldado cumy Jesús ma ycaachyjijp miid quipy jijpxu'ñybi. E huin'it tim mic'amy ni'py etz nii ypidzimy. ³⁵ Tüg jáy jim anajty ixy nej ytuni yjajti, e nañ yejc tiy'ajt. E je' ytiy'ajt janch je', e je' nejhuüiyb co yjanchity. Miid je tiy'ajt ycixpi jébi miich ajcxy nañ jadu'n mmibijctáhuip. ³⁶ Paady je' jadu'n ytuni yjajti, co jadu'n anajty yajcuyduna'ñ jadu'n nej yjaybetyity ma Dios ñecy, co jadu'n yminañ: “Ca' huaad ni tüg ypajc yajtijy.” ³⁷ E jadüg'it anajty ycojaayity ma Dios ñecy, ma jadu'n yminañ: “Y'ixipy ajcxy je jáy huidibi ajcxy ycuum.”

Yajnaaxtigiiy Jesús

³⁸ Jim anajty José huidibi anajty cogájpip Arimatea. Yi' je' huidibi anajty mijpidacp Jesús, oy anajty ca' capxpídzimy, miid co anajty chigiiy miid je judiojáy ajcxy huidibi anajty midzip'ajtp Jesús. Co Jesús y'o'cy huin'it José oy pijctzoy may'ajt ma Pilato, co jébi nicxy yajtzooni Jesús ñaaxnicx ma anajty ti yajcruudzpedyiii. Co Pilato a'ixiy, chi José ñicxy jim oy yajminajci je Jesús ñaaxnicx, e chi yajnicxy. ³⁹ Nañ miid ñicxy José je Nicodemo, je huidibi anajty jayijp ti ni'oy Jesús coodz. Nicodemo yminicx oy nimigo'px libra mirra etz áloes tzooy huidibi ooy oy yxuugy. ⁴⁰ Chi ajcxy yajpidíci Jesús ñaaxnicx, chi ajcxy mo'ñ miid poob huit, chi tzoyiy ajcxy miid mirra etz áloes tzooy, jadu'n nej je judíojáy ajcxy ycostumbre miidity co o'cpi yajnaaxtigiiygixy. ⁴¹ Huingon ma je it ma ajcxy yajcruudzpejty Jesús, jim anajty tüg aguemy, e jim ma je aguemy jim anajty tüg o'cpi jut jemybi ma anajty ca'ni pin ñaaxtigiiy. ⁴² Jim ajcxy Jesús ñaaxnicx yajnaaxtigiiyi, co anajty jim yjac-huingonity, e janch jottigooy ajcxy yajnaaxtigiiy, miid co anajty ti chu'iiyñi, e je judíojáy ajcxy tzachni'ixiiyñi tzach'a'ixiiyñi co je amayxii anajty chondägaani com jabom.

20

Jesús jugypijc jadüg'oc co anajty ti y'oc'o'cni

¹ Tim seman ixtigii', moñiy anajty, ca' anajty oy xiimiiyñi. Huin'it María Magdalena ñicxy ma Jesús anajty ti ñaaxtigiiy. E chi jim ijxy co je tzaa ti anajty jim yajjüidiguecy ma je jut aguu. ² Co ajcxy ijxy je jut ahuädz, chi jada' mic'amy poyigyi ninicxy Simón Pedro, etz je jadügpi ydiscípulo huidibi anajty Jesús miid ooy naychogyii, chi nimay:

—Ti yajtzoongixy iich ajt nHuindzin ñaaxnicx ma ajcxy yajnaaxtigiiy, e ca' nejhuüiyim ma ajcxy ti pidaaccixy.

³ Huin'it ajcxy nimetz choon poyigyi Pedro etz je jadügpi discípulo, ñicxy ajcxy ma je o'cpi anajty ñaaxtigiiy. ⁴ Poyigyi ajcxy ñicxy nimetz, per je jadügpi discípulo jayijp ñajxy, e jayijp jim oyja'ty ma je naaxtigiydac. ⁵ Chi yco'ixiiy jutjoty, huin'it jim oy ixy je mo'nhuít jii by jutjoty y'ooxnäy, per ca' yi' jii by ytigiiy jutjoty. ⁶ Simón Pedro co ymiñ jac'axam, tim janitigiiy jutjoty, chi ijxy je mo'nhuít y'ooxnäy jii by jutjoty. ⁷ E chi ijxy je cöxotz, je huidibi anajty miid ycohuajc yxochity, abicy je' anajty, ca' anajty tú'ciy y'ooxnäy miid ymo'nhuít. Y'ijx ajcxy je cöxotz yajxon y'anegyity abicy. ⁸ Huin'it ytigiiy jutjoty je jadügpi discípulo huidibi jacjayijp ja't. Chi ijxy, e huin'it mibijcy co Jesús ñaaxnicx ca' anajty jii by. ⁹ Ca'ni anajty ajcxy yajxon huinjihuüiy co anajty

jadu'n ycojaayity ma Dios ñecy, co anajty je Cristo yjugypiga'ñ. ¹⁰ Chi je metzpi ajcxy ydiscípulos yhuimbijty ma ytijc.

Jesús nayguëxici ma María Magdalena

¹¹ E je María jim yhui'miy ma je o'cpi jut ayaaxip. Chi ayaaxip yco'ixiy ma je jut. ¹² E chi ijxy metz ángel, poob huit ajcxy ymiid, y'ñaaygixy jiiby ma je Jesús ñaaxnicx anajty yhuijtnäy, y'ñaaygixy tüg cöduy, jadüg tecy ixaay. ¹³ Chi je ángel ajcxy nimay je María:

—¿Miich töxyjäy na'amy co myäxy?

Chi je María y'adzooy:

—Ti ajcxy nHuindzin ñaaxnicx yajnicxi, e ca' nnejhuiyich ma ajcxy ti pidägy.

¹⁴ Jadu'n anajty ymina'ñ, co ñayji'ijxi, chi ijxy Jesús ytinäy ma yjix, e ca' ijxcaypy pen Jesús je' anajty. ¹⁵ Chi Jesús yminañ:

—Töxyjäy, ¿ti co myäxy? ¿Pin m'ixtaayb?

María hue' anajty tijy je aguemy cuend'ajtpi migapxip, paady jadu'n yminañ:

—Huindzin, pen ti myajnicxy Jesús ñaaxnicx, nigapx ma ti mbidägy, e ich nicxy nyajtzoñich.

¹⁶ Chi Jesús yminañ:

—María.

Chi jada' María yhuäg-huimbijty, chi yajxon huindicxpejty, chi nimay:

—¡Raboni! —jada hebreo ayuc yhuimbizimy Huindzin.

¹⁷ Chi Jesús nimay María Magdalena:

—Ca' xyñidooñich, com ca'ni ich nba'ttigiy ma Dios Teedy yajpaady. Nicx miich ixta' nmigügtijcich, e nima' co nnicxaamich ma Dios Teedy, ich nDeedy etz miich ajcxy mDeedy, ich nDios, etz miich ajcxy mDios nañ jadu'n.

¹⁸ Chi María Magdalena oy yajnimäy je discípulos ajcxy, chi jadu'n nimay:

—Ti n'ixyich je Huindzin Jesús, e jadu'n yi' ti xycapxymöyich co nyajnimähuiyich miich ajcxy.

Jesús nayguëxici ma ydiscípulos ajcxy

¹⁹ Co je huin'it xiimbi chuu'iyy seman ixtigi', aducy anajty tijc'aguu y'ity ma anajty je discípulos ajcxy yajpatcixy, miid co anajty ajcxy tzigiy je judíojäy ajcxy huidibi anajty midzip'ajtp Jesús. Chi Jesús ytigiy cujc'amy ma je' ajcxy, e chi jada' capxpocxy ajcxy, nimay:

—Jotcugi' miich ajcxy.

²⁰ Yam jadu'n anajty ymina'ñ, chi ajcxy yaj'ijxy je' yci' ma je clavo ytigiiy, etz ycaachyjijp ma anajty jäy ti ycumyii. Chi yjotcugiiy ajcxy co ajcxy ijxy je yHuindzin.

²¹ Chi jada' Jesús jadüg'oc capxpocx, nimay ajcxy:

—Jotcugi' miich ajcxy. Jadu'n nej ich nDeedy xyquejxyich ya naaxhuiñ, nañ jadu'n ich miich ajcxy yam nguejxhuäcxy miid ich n'ayuc.

²² Co Jesús jadu'n yminañ, chi jada' ajcxy nibuxujy cöbuxujy nimay:

—Huen Dios yjihui'ñ ymic'ajt xy'adigiy xyjottigiy ajcxy. ²³ Huenpinjäyity huidibi miich ajcxy mbocyhuinmecxyp, nañ ypocyhuinmecxipy Dios Teedy. Huenpinjäyity huidibi miich ajcxy ca' ypocy mhuinmecxaxani, nañ jadu'n Dios Teedy ca' yi' ypocy-huinmecxaxani.

Tomás ymibijc co yHuindzin yjugypijcy

²⁴ Tomás je' huidibi anajty miid majmetz yca'pxy Jesús ydiscípulos ajcxy, je huidibi anajty yajtijp Dídimó, ca' je' anajty jim choonity co Jesús ymiñ oga'n. ²⁵ Chi je jacjadyii ajcxy ymígüg ñimaayi:

—Ti ich ajcxy n'ixy je Huindzin Jesús.

E chi je' y'adzooy:

—Pen ca' n'ixyich ma yi' yci' je clavo'au, e pen ca' ngñhuäxich ngodijyich ma clavo'au, e ngi' nbidägyich ma ycaachyjijp ma anajty ycumyity, ca' nmibigipyich co yjanchity.

²⁶ Chi jacoductujc xii ajcxy jadüg'oc anajty yajpaady tigoty nidüg'óciy je discípuos ajcxy. Tzooñ anajty Tomás nañ jadu'n. Chi Jesús ymiñ. Agíy anajty tíjc co Jesús ytinay'ahuiiy cujc'amy ma je' ajcxy. Huin'it ycapxocxy, chi nimay:

—Jotcugi' miich ajcxy.

²⁷ Chi jada' nimay je Tomás:

—Pidäg ya ngíhuax ma clavo'au ma ngíjich. Najtzxaji' mgi' etz pidäg ma íich ngaach ma jäy xycumyich, e mibic yajxon tiydudägy.

²⁸ Chi Tomás y'adzooy:

—Íich miich nHuindzin'ajtyp etz íich miich nDios'ajtyp.

²⁹ Chi Jesús Tomás nimay:

—Míid co miich ti xy'ixyich, paady miich ti mmibicy. Jotcujc yi' ajcxy huidibi ca' xy'ixyich, e ti ymibicy co ti njugypicyich co n'o'gyich.

Jada ayuc ngojaaybich ma jada necy, jigix miich ajcxy mmibigipy co Jesús je' yi' je Cristo, je Dios y'ung

³⁰ Ti anajty Jesús ooy tuñ mijhuinma'ñ ma ydiscípulos ajcxy yhuinduu huidibi ca' ycojaayity ma jada yaabi necy. ³¹ Paady ycix jada ngojaayich jigix ajcxy mmibigipy co Jesús je' yi' je Cristo je Dios y'ung. E co miich ajcxy mmibigipy, huin'it mbaadip jugy'ajtin huidibi ca' tücci'yi ycixipy ytigoyipy míid Jesucristo yxii ycixpi.

21

Jesús ñayguëxígyii ma ydiscípulos ajcxy nihuixtucpi

¹ Co jadu'n jayjip ytuni yjajti, huin'it jadüg'oc Jesús ñayguëxíci ma je' ydiscípulos ajcxy jim ma mejypa', je huidibi anajty xiiip Tiberias mejy. E jadu'n ñayguëxíci: ² Jim anajty ajcxy Simón Pedro míid Tomás huidibi jäy ytijyp Dídimó. Nañ jim Natanael huidibi anajty cogajp jim Caná Galilea naaxjot. E nañ jim anajty je Zebedeo ymang ajcxy etz jametz discípulos ajcxy. ³ Chi Simón Pedro yminañ:

—Níxcy n'oc'acxmachich.

Chi ymigügtijc ajcxy yminañ:

—Tzoc ajt jámim.

Chi ajcxy ytigíy ma tüg barco. E je huin'it tzuu ca' ni ti ajcxy majch. ⁴ Co yjobíy jim Jesús anajty ytinäy ma mejypa'. Je' ydiscípulos ajcxy ca' anajty ajcxy nejhuíy co Jesús je' anajty.

⁵ Chi Jesús yminañ:

—Mígügtijc, ¿nej ca' ajcxy mbaadyñi acxi?

Chi ajcxy y'adzooy:

—Ca' ni ti.

⁶ Chi Jesús yminañ:

—Pidaaccix ajcxy je huidibi míid m'acxmajtzcixy aa'oy'amy ma yi barco, e huin'it ajcxy mbaadipy acx.

Chi ajcxy pidacy je acxmadzi'ñ aa'oy'amy, e huin'it janch adzaach ajcxy yajpidzimy, co janch may acx anajty ti ytigíy. ⁷ Je ymigüg huidibi míid Jesús ooy anajty ñaychogyii, chi nimay Pedro:

—Je' yi', íich ajt nHuindzin.

Co jadu'n mídooy Simón Pedro co anajty yjéjity je Huindzin Jesús, huin'it yhuít yajtigíy. Com ti anajty yhuít jeñ, com jadu'n anajty jac'oy ytuñ. Chi ytigíy mejyjoty huitmíid. ⁸ Jacjadyii ajcxy ymigügtijc yjädy ma mejypa' míid je barco, pahuich pajugucy ajcxy je y'acxmadzi'ñ janch ujtz míid acx. Hue' anajty ca' ooy yjiguemyity ma mejypa', jéyi anajty migo'px metro yjiguemyity. ⁹ E co ajcxy ymejch ma mejypa', chi ajcxy ijxy co jim anajty jimmbajc y'ity ni'ixi', e jim anajty acx jimmbajc nigix huidibi yajtzaayb, e nañ jim anajty tzajcaagy. ¹⁰ Chi Jesús nimay je' ydiscípulos ajcxy:

—Yajmiingix yi' acx tíibi ajcxy mmajtzcixy.

¹¹ Chi Simón Pedro ypejty barcojoty, chi yajpidzimy huindiitztuum y'acxmadzi'ñ ujtz miid may'acx. Chi ajcxy michoy migo'px jahuixchigi'px majctugüg acx mijatypi, e jadu'n ca' je acxmadzi'ñ yciich miid tzachmay'acx. ¹² Chi Jesús nimay ajcxy:

—Min ajop'ajtcix.

E ni tüg ydiscípulos ajcxy ca' y'amidoohui:

—¿Pin miich?

Com ñejhuiyb anajty ajcxy co je' anajty Huindzin Jesús. ¹³ Chi Jesús ymijhuägy ma je acx ci' etz tzajcaagy anajty y'ity, e chi yajhuäcxy, chi moyday ymigügtijc ajcxy.

¹⁴ E je' je' anajty je midugüg'ocpi co Jesús ñayguëxici ma je' ydiscípulos ajcxy, huin'it co yjugypijcy co y'o'cy.

Jesús yajni'ixiiy Simón Pedro ti ytunipy

¹⁵ Co ajcxy y'ajop'ajttay, chi Jesús nimay je Simón Pedro:

—Simón, Jonás y'ung, ¿nej xyjactzojcpich miich, ca'ydi jada jacjadyii ndiscípulo'ichi? Chi y'adzooy Pedro:

—Huindzin mnejhuiyb miich co ndzojcpich njihuiybich miich.

Chi Jesús nimay:

—Cuend'at iich njäy, jadu'n nej jihuiy borregi cuend'ajtpi yaj'ocy yi' yborregi.

¹⁶ Chi Jesús mimejtz'oc yminañ:

—Simón, Jonás y'ung, ¿nej xychojcpich xyjihuiybich miich?

Chi Simón y'adzooy:

—Huindzin, mnejhuiyb miich co ndzojcpich njihuiybich miich.

Chi Jesús nimay:

—Cuend'ajtigich njäy, jadu'n nej yi' borregi cuend'ajtpi cuend'aty yborregi.

¹⁷ Co midugüg'ocpi oy y'amidooy:

—Simón, Jonás y'ung, ¿nej xychojcpich xyjihuiybich?

Chi Pedro yjotmaybijní co midugüg'ocpi y'amidoohui: “¿Nej xychojcpich xyjihuiybich?”

Chi Simón yjac'adzooy:

—Huindzin, miich mnejhuiydaayb tüg'óciy, e nañ mnejhuiyb co iich ndzojcpich njihuiybich miich.

Chi Jesús jacnimay:

—Cuend'ajtigich njäy, jadu'n nej borregi cuend'ajtpi cuend'aty yborregi. ¹⁸ Janch janch iich miich yam jadu'n nimäy: “Co anajty miich mjac'anägnity, ci'm anajty mhuit nayyajniñeniyii, e mnicxp anajty ma mdimdzocy. E co mjacmijjäyihuiy, huin'it mgi' mnajtzxajihuiy, e huingbi mhuit xyajniñenihuiy, e xyajnicxyipy ma anajty ca' mdzocy.”

¹⁹ Co Jesús jadu'n yminañ, chi Pedro yajhuinjihuiy jadu'n nej anajty jäy ajcxy yaj'öga'nyii miid Jesús y'ayuc ytiy'ajt ycixpi, e nañ ma yi' y'o'cin tiy'ajt yegipy co ymiid Dios ytiy'ajt.

Je discípulo huídibi anajty Jesús ooy tzocy jihuiy

²⁰ Chi Pedro ñayji'ijxi, chi ijxy co anajty tú'ciy anajty ymiingixy je' ydiscípulo huídibi anajty Jesús ooy tzocy jihuiy je huídibi anajty iñaayb huingon ma Jesús ma je mesa co anajty y'adzuu'ajtcixy. Je huídibi nimay je' yHuindzin:

—Huindzin, ¿pin miich yi' xyciyegam ma yi' mmidzip? ²¹ Co Pedro ijxy je jadügpi discípulo axam Jesús ypanicxyii, chi yminañ:

—Huindzin, e jadyaabi migüg, ¿ti yi' jadaanip?

²² Chi Jesús y'adzooy:

—Co ixipy ndzocyich co yi' huen jugy'aty ixti mabaad nhuimbityich, ca' miich xypaady mnejhuihuipy ti yi' jadam. Panicxich miich.

²³ Paady ycixp huinjihuiy je ymigügtijc ajcxy co je ymigüg huidibi Jesús ooy tzocy jihuiy ca' anajty y'öga'ñ. Per Jesús canan je' anajty jadu'n ytijyp co ca' y'öga'ñ. Hue' anajty ti ymina'ñ janchtiy:

—Pen ndzojcyrich ixyipy co jada migüg yhui'mipy ixti mabaad nhuimbityich, ca' miich xypaady mnejhuihuipy ti yi' ytunamy.

²⁴ Je' je' je Jesús ydiscípulo huidibi tiy'ajt yejcp jadu'n nej Jesús ytuñ y'ayoy etz yjajty y'ayoy, e nañ yi' je' huidibi cojay nej Jesús ytuñ y'ayoy, yjajty y'ayoy. E ñich ajt nejhuüyim co janch yi' je tiy'ajt huidibi ti yecy.

²⁵ May ooy tijaty mij huinma'ñ Jesús jactuñ. Co ixyipy yajcojaydäy tüg'óciy, ca' yi' naaxhuiñybi ixyipy yhuaadiy miid maylibro tzachpidägipy. Jadu'n n'aa'ixiyich.

LOS HECHOS

Jadu'n Nej Jesús Y'ayuccapxhuäcxpi Ytuun Yjajti

¹⁻² Ma je jayijp'atypi necy, migüg Teófilo, ti nyajnijayiy tüg'óciy jadu'n nej Jesús ytuuñ etz jadu'n nej yaj'ixpijctzondacy oga'n'aty, ixti cooni ypättigiyy tzajpjoty. Ca'ni Jesús anajty ypättigiyy tzajpjoty co huin'ijxy je' yjáy huidibi yi' y'ayuc ytiy'ajt capxhuäcxñib, e chi miid je Espíritu Santo najtztuniyy najtz'ane'miyy nej huaad ajcxy ytunipy. ³ Co anajty Jesús y'ögy, chi ñayguëxíci canaag'oc ma je' ydiscípulos ajcxy, e huixchiguïpx xii ñayquëxígo'ci ma je' ajcxy, yajniquëxígy huädz co anajty yjuugyity, etz nañ yajmiidmiydacy je' yjáy je Dios y'ayuc etz Dios y'ané'min.

⁴ Co anajty jim ijtcixy tügmucy miid Jesús, chi Jesús je' ydiscípulos ajcxy ane'my co ca' huaad jim choongixy jim Jerusalén. Chi ajcxy nimay:

—Ahuijxcix tiibi Dios nDeedy ahuanñy ma miich ajcxy, je huidibi miich ajcxy nyajmiidmiydägy. ⁵ Janch Juan je Bautista jäy yajniibejt miid nii, tzojc miich ajcxy xy'adigihuipy xyjottigihuipy yi Espíritu Santo.

Jesús ypättigiyyñi tzajpjoty

⁶ Ni'amugí anajty ajcxy jim miid Jesús, chi ajcxy yajtiyy:

—¿Huindzin, nej myajcödigoyamy je Israeljäy ymidzip jadachambi?

⁷ Chi Jesús y'adzooy:

—Ca' xypaatcixy mnejhuiygixy je xii je tiempo mina anajty ti yhuaad'ajtni, mina Dios Teedy tuna'ñ tijaty, je' tügpajc miid cötújcín tijaty ytunamy. ⁸ Co anajty je Espíritu Santo chinaydacpicy ma ajcxy mjot mhuinma'ñ mbaatcixp mic'ajt. E chi mdzoongixp ayuc capxhuäcxpi miid iich ycixpi ya Jerusalén, etz tüg'óciy Judea ñaaxjot, etz jim Samaria, etz huindu'my ñaaxhuiñybi.

⁹ Ti jada ajcxy jadu'n yajnimäy, jim anajty ajcxy yhuindicxcixy, chi Jesús chajppejtni. Chi miñ joc yeeg huidi Jesús yajnidigoyday, chi ajcxy ca' ocjac'ijxni. ¹⁰ Jadu'n anajty ajcxy chachpät'ijxcixy tzajpcíxy, co Jesús ypättigiyy. Huin'it mejtz yëydijc ñayguëxíci ma je' ajcxy ymiic, poob huit miid, ¹¹ chi ajcxy ñimaayi:

—Galilea jäy ajcxy, ¿nej co mdzachpät'ijxcixy tzajpcíxy? Yi Jesús huidibi ti chajppety, ti choon ma miich ajcxy, minaamb jadüg'oc jadu'n nej ti m'ijxcixy co ti ypättigiyy.

Matías yajhuin'ijxy co Judas yitung jijptuniipy

¹² Huin'it Jesús ydiscípulos ajcxy chooni ma je cögop huidi xiiyip Olivos, yhuimbíjtcixni jim Jerusalén, ca' ooy yjiguëgyity, jébi yajyöy sábado xii, jadu'n nej Moisés ycötújcín y'ane'my. ¹³ Co ajcxy yja'ty ma je cajp, chi ajcxy ypejty ma je cuarto mimetz nihuijtzpetypi ma ajcxy anajty miidity yjättac. Jim yi' anajty ajcxy: Pedro, Jacobo, Juan, Andrés, Felipe, Tomás, Bartolomé, Mateo, Alfeo ymang Jacobo, Simón je Zelote etz Judas Jacobo ymiguëx. ¹⁴ Tüg'óciy anajty ajcxy y'ijtcixy tügmucy Dios mibijctzoogixy chajpcapxycapxcixy. Ymiid ajcxy anajty Jesús y'uch etz María Jesús ytaj, etz jacjadyii töxyjäydijc.

¹⁵ Huin'it xii Pedro ytinaygy agujc'amy ma je ymigügtijc ajcxy huidibi yajmij'ajtp Jesús, huidi anajty ajcxy naybaatip migo'px ja'ipxti jäy, chi nimay ajcxy:

¹⁶ —Migügtijc, copicy co jada yajcuydünipy nej Dios yminañ ma ñecy huidi jaybety ijtp, ma David jaay Dios y'ayuc, ma Dios nigapxy Judas. Je'huidi coduu'ajt taabi je judfojäy ajcxy majch Jesús. ¹⁷ Je Judas yaj'amichomujcp je' anajty miid iich ajt, paatip anajty Dios ytung tú'ciy miid iich ajt. ¹⁸ Chi Judas ñicxy juy tüg naax miid je muju'ñ huidibi anajty ti paady miid yjibic-huinma'ñ. Chi jim mic'amy ycäy tzuxcödeen, chi ytopxy ymooxac, e chi ytiinch ypidzimday. ¹⁹ Je jäy ajcxy huidibi anajty tzinaayb jim Jerusalén, co nejhuiy,

chi ajcxy yxii moy je naax Acéldama, hue' je' yhuimbídzimy ma je' ajcxy ayuc, ni'py ñaaxjot. ²⁰ Jada je' je ayuc huídibi David yjaay ma je Salmo necy:

Hui'míp najtz'ixiy yi' chinaaydac. E ca' pin yajtunipy.

Nañ jadu'n ymína'ñ:

Huingbi huen yajnicxyii je' ytung.

²¹⁻²² Copicy co tüg yéydíjc huídibi miid ti yhuídity nHuindzin Jesús quipxyi miid iich ajt, huen tunipy je tung huídibi Judas anajty ytumyb, maab Juan yajniibety ixti taabi xypuyóduutim co páttigiy tzajpjot, tüg jébi testig'aty miid iich ajt co Jesús yjugypijcy.

²³ Chi Jesús ydiscípulos ajcxy huin'ijxy mejtz jäy: tüg jäy huídibi anajty yxii José, huídibi yxii anajty yajtijy Barsabás etz nañ jadu'n anajty yajtijy Justo. E huin'ijxy ajcxy nañ jadu'n Matías. ²⁴⁻²⁵ Chi Jesús ydiscípulos ajcxy Dios mibíjctzoy, ymínañ ajcxy:

—Huindzin Dios, m'ijxyp mnejhuiiyb tüg'óciy jäy yjot yhuinma'ñ, yajni'ixiiygich jada metzpi jäy huídibi miich nidügti ti nhuin'ixy, je huídibi jébi jijptigiyiy miich mdung tú'ciy miid iich ajcxy, etz huídibi apóstol'adip. Huen jada jäy jijptigiyiy je tung huídibi Judas ti yajtigooy, co ytundigooy e ñicxy ma ypaadyii.

²⁶ Chi ajcxy suerte ijxy, e je suerte ñibídzimni je Matías. E huin'ítij je Matías oy ymicho'ndigiy ma je nimajtügpi ajcxy huídibi ycapxhuácxy Jesús y'ayuc.

2

Co je Espíritu Santo ycidacy choñ tzajpjoty

¹ Co oy je Pentecostés xii paady, jim anajty Jesús ydiscípulos ajcxy ni'amugi' tú'ciy ijticy. ² Huin'it janch timitiini yajmidoy tüg ne'mín, choñ tzajpjoty, jadu'n nej poj micpi. Chi yaj'ujtzaay je tigot ma anajty iñaaygixy. ³ Chi nigídaaci nidüg nidügti toodz jadu'n nej jiiñye'n. ⁴ Chi je Espíritu Santo nidüg nidügti ajcxy y'adigiyiyi yjottigiyiyi. Chi ytigiyiyixni capxy miydaacp nije' nije' ayuc jadu'n nej je Espíritu ajcxy yajcapxyii.

⁵ Jim Jerusalén anajty je huin'it xii may judíojäy ajcxy huídibi tzoomb canaag agajp. Hue' ajcxy chachcuydumb judíojäy ycostumbre. ⁶ Co je cajpjäy ajcxy midooy je ne'mín, chi ajcxy ooy yömujcy. Chi je mayjäy ooy yhuinmay'ahuidijty, co ajcxy midooy chachcapxcixy chachmiydaaccixy ma yci'm'ayuc. ⁷ Je mayjäy ajcxy ooy chigiyiy jihuüy, chi ajcxy ñayñimaayi miñ xyipy:

—Ix ¿nej cay Galilea jäy jada ajcxy nidüg'óciy huídibi jadu'n tzachcapxcixy tzachmiydaaccixy iich ajt ngi'm'ayuc? ⁸ ¿Nej iich ajt co nmido'mbíjcm co tzachmiydaaccixy iich ajt n'ayuc huídibi ti nmibi'c'ájtím? ⁹ Ya anajty ajcxy Partia jäy, Media jäy, Elam jäy, Mesopotamia jäy, Judea jäy, Capadocia jäy, Ponto jäy, etz cham huídibi tzinaayb ajcxy jim Asia ñaaxjot, ¹⁰ etz huídibi ajcxy tzomb jim Frigia, etz Panfilia, huídibi tzomb jim Egipto, etz huídibi tzomb jim ma yi Africa ñaaxjot Cirene nínaxy. Nañ jadu'n jim romanojäy huídibi ya adzinaayb. May ajcxy jim huídibi judíojäy etz nijéjity huídibi ca' yjudíojäyity huídibi judíojäy ycostumbre ajcxy ti yjijptigiyiyiyi. ¹¹ Ya nañ jadu'n Creta jäy etz Arabia jäy; e iich ajt tüg'óciy nmidoohuim jada jäy ajcxy nigapxcixy nimiydaaccixy huídibi Dios ti tuñ mijcajee ma iich ajt ngi'm'ayuc.

¹² Nidüg'óciy ajcxy ooy jihuüy, e chi ajcxy ooy yhuinmay'ahuidijty, miñ xyipy ñay'amidóohuigixy:

—¿Nej jada yhuimbídzima'ñ?

¹³ E nijéjity jäy jéyi nixigy yajxigy, ymínaangixy:

—Muucip jada yi' ajcxy.

Pedro yaj'ixpijcy je mayjäy

¹⁴ Huin'it Pedro ytinayigy miid je nimajtügpi apóstoles, e ytigiyiy capxpi mic ymínañ: —Yéydíjctijc ajcxy huídibi tzinaayb Judea etz tüg'óciy huídibi tzinaayb ya Jerusalén, nejhuühuipy miich ajcxy jada e midou ajcxy yajxon huídibi ajcxy nyajnimáhuamyb.

¹⁵ Jada jäy ajcxy ca' ajcxy ymügyii jadu'n nej miich ajcxy minaangixy. Tim petyxiini jada cham. ¹⁶ Jada je' huidibi ñigapxy je Joel, Dios y'ayuc najtzcapxiybi, co jadu'n mina'n:

¹⁷ Je huin'it xii mina anajty je naaxhuiñybi cixa'n, jadu'n Dios minañ, nyajhuäcx-tähuibich je nEspíritu ma tüg'óciy naaxhuiñyjäy. Miich mniix etz mmang ajcxy capxhuäcxip iich n'ayuc ndiy'ajt, e je yujcyecpidijc ajcxy yhuin'ixipy ooy mijhuinma'n, e je mijjäydijc cumähuipy ajcxy.

¹⁸ Nyajhuäcxtähuip iich je nEspíritu huin'it xii ma iich ndumbi yëydijcpi töxyjäybi, e y' ajcxy capxhuäcxip iich n'ayuc ndiy'ajt.

¹⁹ Nyajquëxigibich tzajpcixy huidijaty oy chigiiñi, e ya naaxhuiñ nyegipyich tiy'ajt: ni'py, jiiñ etz jiiñjoc.

²⁰ Yi xii ahuimbidiipy coodz, etz je po' ahuimbidiipy nej ni'py, ma anajty ca' miñ je xii je tiempo mina anajty mina'n je Huindzin Dios. Mij ayo'n ji tunaanip jadaanip ijxna' quëxna'.

²¹ E tüg'óciy jäy huidi miyaaxp ojadajtp je Huindzin Dios, Dios ajcxy yajnidzögib y'alma.

²² Chi Pedro yjacminañ:

—Amido'ijtcix, miich judíojäy ajcxy, jadu'n nej cham nmina'na'nich. Je Jesús huidibi tzoon jim Nazaret ti xyaj'ijxcixy Dios ymic'ajt, mijhuinma'n, etz ijxpejt, jadu'n nej miich ajcxy ti m'ijxcixy ti mnejhuüygixy. ²³ Jada yajcyejc ma miich ajcxy, jadu'n nej anajty Dios ti yajnigödugiy, e ti huinmay. Ajcxy mmajch je Jesús e myaj'ögy ajcxy, chi ajcxy myajcruudzpejty miid jibic jäydijc y'ané'min. ²⁴ Chi Dios yajjugypijcy yajnihuädzictuty ma yi ó'cin, ca' huaad yhui'my ögy huinixii. ²⁵ Je David ñimiydac Jesús chi yminañ: Nejhuüybich co je nHuindzin Dios y'ity ma iich nhuinduu. Yi' ijt ma iich n'a'oy, jigix ca'ydi pin xy'adzigiych xyajhuinma'nydigooyich.

²⁶ Paady ti njotcugiyich, e ti ngapxypidzimyich co ooy njotcujcich. Paady co oy n'ögibich etz ninicx ñaaxtigihuiipy, ca' ndajy mayich.

²⁷ Co miich Dios ca' myajhui'ma'n iich n'alma ma ñaaxtigiydac. Ni mga'aa'ixihuiipy, co miich mdumbi huidibi ooy mdzocy, co nicxy ñinicx ñaaxhuindigoydäy.

²⁸ Miich Dios, ti xyajni'ixiyich yi tzinaayin huidibi ymiid jugy'ajtin huinixiibi. Xyajjotcugihuibich miid co xymiid'idipyich.

²⁹ Chi Pedro yjacminañ:

—Migügtijc ajcxy, huädz miich mnejhuüygixy co iich ajt nmij'ap David y'o'cy etz yajnaaxtigiiyi. E ma ñaaxtigiiy nmiidni jë'ajt chambaad. ³⁰ Je David hue' je' anajty Dios y'ayuc ñajtzcapxiybi, e ñejhuüyb anajty co ti Dios yajnimäyii huidibi ca' y'aniijty. David ñejhuüyb anajty co ma y'ap y'oc ma'xung'adipy Cristo, jaydëbi ané'mipy ma David y'ane'mdac. ³¹ Jadu'n co David jecy'ajty huinjihuüy e nejhuüy etz nigapxy jadu'n nej yjugypiga'n je Cristo co anajty ti y'ögy. E yminañ co ca' yi' y'alma yhui'mipy jutjoty etz ñinicx ca' ypüdzipy. ³² Dios yajjugypijcy je Jesús co y'o'cy. Jada tiy'ajt iich ajcxy nidüg'óciy nidiy'ajt'ajtpy. ³³ Jadu'n Dios Jesús mooy mij'ajt jiiby tzajpjoty, chi yajcidiigiyyi je Espiritu Santo huidibi Dios Teedy y'ahuaniy e tüg'óciy huidibi miich ajcxy ti m'ijxcixy ti mmidoogixy jiiby yi' choon ma yi'. ³⁴ Com David ca' je' chajpejty, je David ci'm yminañ:

Je Huindzin Dios nimay iich nHuindzin: “ñña' ma iich a'oy'amy,

³⁵ ixti cooni nmimadactähuibich yi mmidzip, jadu'n anajty nipaady nej jihuüy mdecypocpejt'adyii.”

³⁶ Chi Pedro yjacminañ:

—Ñejhuühuipy nidüg'óciy yi Israel jäy ajcxy co janch janch co je Jesús huidibi miich ajcxy myajcruudzpejt, Dios yajni'bijc co yhuindzin'adipy ma miich ajcxy, etz Cristo huidibi xyñihua'nipy xyajtzögipy ajcxy.

³⁷ Co je mayjäy ajcxy jadu'n midoy, chi ajcxy yjotyungiiy, e amidoy ajcxy je Pedro etz jacjadyii jäy huidi Jesús y'ayuc capxhuäcxii anajty, chi ajcxy yminañ:

—Migügtijc, ¿ti iich ajcxy jëbi huaad nduñ?

³⁸ Huin'it Pedro y'adzooy:

—Jothuimbijtcix e ñibejtcix nidüg nidüg miid Jesucristo yxii, jigix Dios miich ajcxy mbocy xyhuinmeecxipy. E jadu'n Dios xymöhuipy je Espíritu Santo. ³⁹ Huidibi Dios y'ahuaniiy miich yi' ajcxy mje' etz m'ung ajcxy, etz m'ap m'oc ajcxy, etz nañ jadu'n je jäy ajcxy huidi jigüémip, etz jacjadyii jäy ajcxy huidi Dios huin'ixamy.

⁴⁰ Miid jadayaab ayuc etz jacjadyii ayuc Pedro yajnimay capxhuijy je mayjäy ymíñañ:

—Ca' mmijpidaaccix je jäy ajcxy y'ayuc huidibi ca' capxymidoy Dios.

⁴¹ Jadu'n yjajti, je jäy ajcxy huidijaty mibijc Pedro y'ayuc, chi ajcxy ñibejttay huin'it xii. Ñimayiy ajcxy huidibi mijpidac Jesús y'ayuc oy nidugüg mildi jäy. ⁴² Tüg'óciy ajcxy anajty panicxcixy yi' ixpíjcin jadu'n nej yi' Jesús y'apóstoles ajcxy yaj'ixpijcy. Chinaaygixy yquipxyjot yquipxyhuinma'ñ. Etz Dios mibijctzoogixy e ñayyöymújigixy co anajty ajcxy chajcaagy tujc-huäcxaangixy.

Jadu'n nej je mibijpidijc chinaaygixy jugy'ajtcixy

⁴³ Nidüg'óciy ajcxy anajty ooy mijcajee jihuuiy. E Jesús y'apóstoles ajcxy ijxpejt etz mijhuinma'ñ ooy anajty tungixy. ⁴⁴ Nidüg'óciy je jäy ajcxy huidibi anajty ti ymibijccixy ijtp anajty ajcxy tüg mucy, e yajhuäcxcixy tijaty ajcxy anajty ymiid, mooygixy ymigügtijc. ⁴⁵ Ytoocpy anajty ajcxy yi' ypidägy huidibi anajty ymiid, e chi anajty yajhuäcxcixy yi' meen nije' nije' nej pin ti yajmayjaty. ⁴⁶ Jabom jabom anajty ajcxy ñayyöymugyii ma Dios ytijc, etz nañ ñayyöymugyii ajcxy ma ytijc tzajcaagy tujc-huäcxcixy etz ycaaygixy y'uuccixy ni'amugi' jotcujc miid ajcxy y'oyjot y'oyhuinma'ñ. ⁴⁷ Ñi'ügixy niyaaxcixy yi' Dios, e tüg'óciy jäy nayyajmij'ájtíp anajty ajcxy. Chi je Huindzin Dios yajmayiy jabom jabom yi' mibijcpidijc, yi' huidibi anajty patp nidzoocin.

3

Tüg tecyma'tpi chögy

¹ Tüg xii Pedro etz Juan ypättigiy ajcxy tú'ciy ma Dios ytijc, mijminacy xii anajty, je' je' anajty je hori mina ajcxy Dios mibijctzoogixy. ² Jabom jabom anajty jäy yajnicxcixy ma je Dios ytijc'aguu tüg tecyma'tpi, jadu'n je' anajty ti yma'xung'aty. Chi ajcxy pidägy je tecyma'tpi ma je Dios ytijc'aguu huidi anajty yxii la Hermosa, jigix jim pijctzohuipy meen ma je jäy ajcxy huidibi tigüyb ma Dios ytijc. ³ Co je jäy tecyma'tpi ijxy Pedro etz Juan ytigíhuaangixy anajty ma Dios ytijc, chi pijctzoy meen. ⁴ Co Pedro etz Juan ijxy je tecyma'tpi, chi Pedro ymíñañ:

—Huindixpejtcich.

⁵ Chi je jäy huindixpejty, yjijp'ijxpy anajty ti möhuanip. ⁶ Chi Pedro je tecyma'tpi nimay:

—Ca' nmíididyich plata, oori, huidibi janchtiy nmíidich je' nmöhuip. Miid Jesucristo je Nazaretpi ymic'ajt iich miich nimaayb: Tinaayig etz yöy.

⁷ Huin'it Pedro majch je tecyma'tpi ma a'oygi', e yajtinaygugiy. Huin'ítiy y'oyiy ymicpijcy je ytecy etz ytecyöög. ⁸ Chi je tecyma'tpi ytinaygugiy etz chi ñajtztibiy. Chi jada' yöychoñ e ytigüy ma Dios ytijc miid Pedro etz Juan yöyñip ñidijcni yujctijcni, yam Dios ooy jäyech. ⁹ Tüg'óciy je mayjäy ijxy co anajty yöyñip etz jäyech yi' Dios. ¹⁰ Je jäy ajcxy y'ijxy'ajtpy anajty ajcxy je tecyma'tpi e ñejhuuygixyp co je' anajty je' huidibi pijctzohuo'cp pi'c meen ma Dios ytijc'aguu huidi anajty yxii la Hermosa. Paady je jäy ajcxy ooy chigüy jihuuiy, co ajcxy ijxy nej anajty yam ti ytunyii ti yjadyii.

Pedro nimiydacy nej anajty je tecyma't ti chögy

¹¹ Je tecyma'tpi huidibi anajty ti chögy ca' anajty ixmach Pedro etz Juan, e tüg'óciy yi' jäy anajty ooy jihuuygixy huinmaaygixy. Chi mic'amy mayjäy nimujcy Pedro etz Juan jim ma yi' Dios ytijc huinduu huidibi jäy ytijpy Salomón. ¹² Pedro co jadu'n ijxy je mayjay, chi ymíñañ:

—Judío yéydijctijc, ¿nej co mdzachhuinmaaygixy mijcajee? ¿Nej co ñich miich ajcxy xychachhuindñicxcixy jadu'n nej jihuñy ñich ajcxy jada jäy ti nyajtzögyich ti nyajyöychoonich miid ngïmmic'ajtich, o miid co ñich ajcxy ooy nDios'ojadaty? ¹³ Ñich'ajt nDios, je Dios huidi nmij'ap nmijteedy, je Abraham, je Isaac, etz je Jacob y'ojadajt, yi' ti yajtzögy jada tecyma'tpi, jigix yajcömayipy yi' y'ung Jesús huidibi miich ajcxy mgïyejc ma je tungmiidpi. E co je gobernador Pilato je' najtzmazdñhua'ñ, miich ajcxy ca' m'aa'axiyy. ¹⁴ Ma yjapadyii ajcxy mgapijctzoy co huen yajnajtzmazdñy, je huidi anajty yajpaatp huädz etz tudägy, chi miich ajcxy mbijctzoy co huen yajnajtzmazdñy tüg jäy huidibi anajty ti yjäyyaj'o'cy. ¹⁵ Jadu'n je jäy ajcxy yaj'o'cy je' huidibi anajty jugy'ajt yejcp. Je huidibi Dios yajjugypijcy ma anajty ti y'ögy e jada tiy'ajt ñich ajcxy nidiy'ajt'ajtpyich. ¹⁶ Miid co ti mibicy Jesús yxii, je mihuinma'ñ huidibi Jesús ymic'ajt ti tuñ miid jada pa'mjäy huidibi miich ajcxy m'ijxyp mnejhuñyib. Com ti mibicy Jesús paady ti chögy janch yajxondicni, jadu'n nej miich ajcxy nidüg'óciy ti m'ijxcixy.

¹⁷ Chi Pedro yjacmíñañ:

—Nmigügtijcich, nejhuiñyibich co miich ajcxy etz mhuindzindijc yaj'o'cy Jesús, miid co anajty mganejhuiñyigixy ti anajty ajcxy mduungixy. ¹⁸ Jadu'n cham Dios ti cuyduñ jadu'n nej Dios y'ayucnajtzcaxiyybi ymíña'ñ co copicy co yi Cristo yajnaxipy ayo'n. ¹⁹ Paady játyim jothuimbijctix miich ajcxy ma Dios, jigix ajcxy mbocy yajjötztähuipy. Huin'it je Huindzin Dios xyajniguexipy ajcxy jotcujc'ájtin huinixii, ²⁰ e yi' quexamb je Jesús, je Cristo, je huidibi Dios jayijp'aty yhuin'ijx co quexa'ñ ma miich ajcxy. ²¹ Oy jadachambi Jesucristo y'oc-huí'mipy jiiyby tzajpjoty ixti cooni Dios anajty yaj'oyiydäy tijaty, co jadu'n yjaay yi' y'ayucnajtzcaxiyybi huidibi miid huädz yjot yhuinma'ñ huidibi ajcxy jecy'ajty tzinay. ²² Jadu'n Moisés nimay ñich ajt nmij'ap nmijteedy jecy'ajty: “Je Huindzin Dios xyajniguexaan miich ajcxy tüg yi' y'ayucnajtzcaxiyybi, huidibi pidzimamyb ma miich ajcxy mjuugy mmigüg jadu'n nej ñich yi' xyguejxy. M'amido'idipy miich ajcxy yi' y'ayuc. ²³ Jadu'n yjadipy co tüg'óciy jäy huidibi anajty ca' capxymidooy je Dios y'ayucnajtzcaxiyybi, huädz ajcxy ytigoydähuipy, e tüg jiiibicy ajcxy idipy ma judíojäy ajcxy yajpaady.”

²⁴ Chi Pedro yjacmíñañ:

—Jadu'n jada tüg'óciy Dios y'ayucnajtzcaxiyybi, chondacy ma Samuel ixti ma jacjadyiini ajcxy, ñigapxtay ajcxy jadu'n nej cham ytuñyii yjadyii. ²⁵ Yi' Dios y'ayucnajtzcaxiyybi ajcxy, miich je' anajty ajcxy nmij'ap nmijteedy. E je ayuc huidibi Dios yajnimay Abraham ycuydunaamyb miid miich ajcxy co jadu'n ymíñañ: “Ngonúucxibich tüg'óciy naaxhuiñyjäy miid tüg miich m'ap m'oc.” ²⁶ Co Dios y'ung y'o'cy, chi Dios yajjugypijcy jadüg'oc, e quejxy jayijp ma miich ajcxy, jigix xy-conúucxcixipy, etz jigix nidüg'óciy miich ajcxy m'ixmadzipy yi' mjibichuinma'ñ.

4

Pedro etz Juan ma tungmiidpi yhuinduu

¹ Pedro etz Juan jimni anajty tzachmiidmiydaaccixy je mayjäy ajcxy, co oy miingixy je judío teedy ajcxy, miid je soldado huindzin, je tzajptijc cuend'ajtpi etz miid saduceojäy. ² Ooy ajcxy anajty yjotmätcixy co Pedro etz Juan yaj'ixpijccixy anajty je mayjäy etz nimaaygixy co yi' öcpi jugypigipy yi' ajcxy, com co Jesús yjugypicy co y'o'cy. ³ Chi je tungmiidpi ajcxy majch Pedro etz Juan, e chi ajcxy pidacy pujxtigoty ixti com jabomni, com ti anajty chu'iiñ. ⁴ Mayjäy ajcxy huidibi anajty ti amido'ijtcixy je Pedro y'ayuc ymibijc ajcxy. E hue' je mibijcpidijc, ac yéydijctijcpi, yajmichomujcy jahueen ycamigoox mlity.

⁵ Je com jabom ajcxy ñaymújcci jim Jerusalén judíojäy tungmiidpi, je mijjäydijc etz yi' escribas. ⁶ Nañ jadu'n jim anajty Anás huidibi anajty ane'mb je teedy ajcxy, etz je Caifás, je Juan, je Alejandro, etz tüg'óciy teedy mijtungmiidpi yjugymigüg. ⁷ Chi ajcxy pidacy Pedro etz Juan cujc'amy ma anajty ajcxy ñaymugyii, chi ajcxy y'amidooy:

—¿Pin miich ajcxy ti xymöy cötujcin co jada jadu'n ti mdungixy?

⁸ Huin'it Pedro ymiid anajty Espíritu Santo ma yjot yhuinma'ñ, chi yminañ:

—Miich ajcxy tungmiidpi etz judíoJay mijjädijc, ⁹ yí' ñich miich ajcxy cham xyaj'amidoob yí oybi tüibi yajtuñ ma tüg pa'mjäy e nejhuihuaangixy nej ti chögy. ¹⁰ Cham nimiydactäyich ma miich ajcxy mhuinduu, jaydëbi ajcxy nejhuidähuiipy tüg'óciy judíoJay, co jadaYaabi jäy huidibi anajty tecyma'tpi, cham yajpaady ya ma miich ajcxy mhuinduu mic oy, miid je mic'ajt huidibi Jesucristo je Nazaretpi yejcpy, je jäy huidibi miich ajcxy myajcruudzpejt, huidibi Dios yajjugypijc co y'o'cy. ¹¹ Yí Jesús jadu'n nipaady nej tüg tzaa oybi, huidibi ajcxy potzpidijc, ca' yajtúngixy co ytijccoicixy. Jesús cham ti paady mijtung ma Dios, jadu'n yí' ni paady nej tüg mij tzaa huidibi ytungbaatp ma poch ytaatz. ¹² Ca' jac ni pin huidibi jëbi xyajnidzoocim ajt n'alma. Jesucristo yí' je' tügpajc huidibi Dios yejc ma jäy ya naaxhuiñ huidibi jëbi xyajnidzoocim ajt n'alma.

¹³ Co je mijtungmiidpi ajcxy ijxy midoy jadu'n nej Pedro etz Juan ajcxy huinmic jotmic ycapxcixy, etz nejhuiy co ca' ajcxy y'ixpicjyáiyty, chi ajcxy ooy jhuy huinmay. Nañ yí' ijcajp ajcxy co je' anajty huidibi ajcxy ti miid huidity Jesús. ¹⁴ Cha co yjactimjímity anajty je jäy huidibi anajty ti chögy ytinäy miid Pedro etz Juan, paady ajcxy ca'jajty nej midziptzoonipy. ¹⁵ Chi je tungmiidpi ni'ane'mdiy huen yajpidzimyí Pedro etz Juan ma je mayjäy anajty ñaymugyí, jigix ac jëyi tungmiidpidijc ñyöyaangixy capxyöyaangixy Pedro etz Juan ypocy. ¹⁶ Chi ajcxy yminañ:

—¿Ti cham nduunim miid yjiibi jäy ajcxy? Com tüg'óciy jäy huidibi tzinaayb ya Jerusalén ñejhuiyb ajcxy co ti túngixy mijhuinma'ñ, e ca' huaad ñich ajt nminañim co ca' yjanchity. ¹⁷ Tzoc capx'adujcim co ca' huaad ajcxy jacnimiydägipy Jesús jadachambi etz jacnicxpí xii tiempo.

¹⁸ Chi ajcxy mijhuoy Pedro etz Juan, chi ajcxy nimay co ca' huaad ajcxy ni nej onimiydaacnip, ni ca' jacyaj'ixpigipy miid Jesús yxii. ¹⁹ Huin'it Pedro etz Juan y'adzooy:

—Huinmaaygix miich ajcxy ci'm pen tiy'ajt jada ma Dios co ñich miich ajcxy ngapxy-cöbigipy jayijp, ca'ydi yí Dios. ²⁰ Com ñich ajcxy ca' nni'amonaangixy jadu'n nej ñich ajcxy ti n'ixy ti nmidoy.

²¹ Huin'it je tungmiidpi ajcxy adzigi'ñ migapxy Pedro etz Juan, e najtzmazdiy ajcxy. Ca' ajcxy mihuinma'ñybaty nej tzaachytunipy Pedro etz Juan. Com tüg'óciy jäy yjäymejchpy ycömaayb anajty yí Dios jadu'n nej anajty ti ytuñyí ti yjadyí. ²² Je jäy tecyma'tpi huidibi tzooc co Dios mijhuinma'ñ ytuñ, ymiid anajty yjimijt huixchiguipx naxy.

Je mibijcpidijc ajcxy pijctzoogixy ma Dios jotmic'ajt

²³ Chi Pedro etz Juan co yajnajtzmazdiy, chi ajcxy ñicxy ma ymigügtijc anajty, yajmiidmiydactay tüg'óciy jadu'n nej teedy huindzin etz mijjädijc anajty ti ñimáayigixy. ²⁴ Co jada ayuc ajcxy midoy nidüg'óciy ajcxy tú'ciy yjot yhuinma'ñ pidacy, chi ajcxy Dios mibijctzoy yminañ ajcxy:

—Huindzin Dios, miich je' ti m'oyduñ je tzajp, je naaxhuiñybi, je meyy etz tüg'óciy tijaty. ²⁵ Miich miid mEspíritu je David myajcapxy, e yí' jadu'n yminañ:

¿Nej co jada naaxhuiñybi jäy chachhuaangixy chachjhuiyigixy, e yí jäy ajcxy huinmaaygixy huidibi ca' ytimytiijty?

²⁶ Yí reydiy ya naaxhuiñybi midziptzoon ajcxy yí Dios. Etz je tungmiidpi cajp cajp ñaymujci ajcxy, midziptzoñ ajcxy Huindzin Dios, etz midziptzoñ ajcxy Cristo.

²⁷ Com janch co je rey Herodes etz yí gobernador Poncio Pilato ñaymujci ya ma jada cajp miid huidibi ca' yjudíoJayiyty ajcxy etz miid judíoJay ajcxy, midziptzoñ ajcxy yí m'ung Jesús huidi anajty ti mhuin'ixy. ²⁸ Yí' ajcxy ti cuydungixy tüg'óciy jadu'n nej miich, Huindzin Dios, ti myajnigödugiy jadu'n nej ytuniyb yjadiyb. ²⁹ Jadachambi Huindzin Dios, ix jadu'n nej yí tungmiitpi xychachmijotmá'tcixyich. Mo' yí mdumbi ajcxy jotmic'ájtín, jigix m'ayuc ajcxy capxhuäcxipy amic jotmic, ³⁰ e miid miich mmic'ájtín

chögipy pa'mjäydijc, tunipy ajcxy tijaty ijxpejt etz mijhuinma'ñ miid yi m'ung Jesús yxii, huidibi miid huadz yjot yhuinma'ñ.

³¹ Co ajcxy mibijctzoday, chi je naax chuyuuy ma anajty ajcxy tügmucy yajpaatcixy, etz nidüg'óciy yi' ajcxy ymic'ajt mooyi je Espíritu Santo, e yi Dios y'ayuc capxhuäcxcixy anajty amic jotmic.

Je mibijcpidijc tú'ciy anajty ajcxy yjot yhuinma'ñ

³² Je mayjäy huidibi anajty ti mibicy, tú'ciy ajcxy yjot yhuinma'ñ. Ni pin anajty ycamina'ñ co naydüg jé'adyii. Hue' anajty yminaangixy co tú'ciy jé'ájtigixy. ³³ Je majmetzpi Jesús y'ayuccapxhuäcxpi amic jotmic capxhuäcxcixy je tiy'ajt jadu'n nej je Huindzin Jesús yjugypijcy co y'o'cy. E mij ajcxy Dios ypubejti. ³⁴ Ma je' ajcxy ca' ni ti yajmayajtcixy, com tüg'óciy tijaty anajty ajcxy ymiid ñaax o ytijc ytoocpy anajty ajcxy, e yejccixy anajty meen. ³⁵ Chi je meen yajcídigiigixy je apóstoles ajcxy e yi' ajcxy moy nidüg nidüg pinjaty yajmayajtp. ³⁶ Jim anajty miid je' ajcxy tüg levita jäy huidi anajty yxii José, huidibi ma'xung'ajt ma yi ñaaxjot meyy agujc huidibi yxii Chipre, je huidibi je majmetzpi Jesús y'ayuccapxhuäcxpi, yxii moy Bernabé, huidibi huimbidzim je yajjotcujc'ajtpi. ³⁷ Je Bernabé tocy ytundac huidibi anajty ymiid, e chi mimiin je meen, e yajcídigiigixy je apóstoles ajcxy.

5

Je Ananías etz Safira ajcxy Dios midundigoy

¹ Chi jadüg yéydijc, huidi anajty yxii Ananías, miid ytöxyijc, Safira, toogy ajcxy tüg it ytundac. ² Ananías ñayyajnihui'mi jac'anaxy je meen, e yajninicxy Jesús y'apóstoles ajcxy je jac-hueenip, jadu'n nej jihuiy yejctay tüg'óciy, etz yi' ytöxyijc ñejhuuiyb anajty. ³ Chi Pedro nimay Ananías:

—Ananías, ¿nej co myajtuñ je mujcu' yhuinma'ñ, e mhuin'iina'ñ je Espíritu Santo, e ti mbugoñ jac'anaxypi meen nej ti tzoo'adyii yi pidägy tiibi mdoogy? ⁴ ¿Nej ca' anajty yi' miich mdundac'adyii? E co ti mdoogy, ¿nej ca' anajty je' miich mmeeñ'adyii? ¿Nej co jadu'n ti mdundigooy? Dios ti mhuin'iin, canan jäy.

⁵ Co jadu'n midoy, jímiyi Ananías yciday, e chi y'o'cy. E tüg'óciy jäy ajcxy huidijaty nejhuuiy, ooy ajcxy chigiiy. ⁶ Huin'it ymiin jadyii yujcyecpidijc, chi ajcxy mo'ñ Ananías ñinix, e oy ajcxy yajnaaxtigiiy.

⁷ Codugiig hori naxy, oy ytigiiy je Ananías ytöxyijc, e ni ca' nejhuuiy anajty ti ti ytuñyii ti yjadyii je ñäy. ⁸ Pedro y'amidoohui:

—Yajnimaaygich, ¿nej janch jadu'n ti mdoocixy yi mdundac jadu'n nej ti mgapxcixy? Chi je töxyjäy y'adzooy:

—Janch jadu'n ti ndoogyich.

⁹ Chi Pedro ymiin:

—¿Nej co ti mnaygápxigixy mhuin'iina'ñ yi Espíritu Santo? Cha ma tijc'aguu je jäy ajcxy ytinäy huidi oy ti yajnaaxtigiiy mñäy, e jadachambi miich ajcxy xyajnicxaam nañ jadu'n.

¹⁰ Tim huin'itiy Ananías ytöxijc yciday, e chi y'o'cy. E chi oy ycidägy ma Pedro ytecymijc. Co je yujcyecpidijc ytigiiy, chi ajcxy je' paaty ögy. Chi ajcxy yajpidzimy etz oy yajnaaxtigiiy ma ñäy ymijc. ¹¹ Chi tüg'óciy je jäy ajcxy huidibi Jesús mibijcp etz tüg'óciy huidibi midou jada nej ti yjadyii ti ytunyii, chi ajcxy ooy chigiiy.

Canaag mij'ijxpejt etz tiy'ajt

¹² Je majmetzpi Jesús y'ayuccapxhuäcxpi ooy anajty ajcxy Dios ymic'ajt yajniguëxici etz ijxpejt yejccixy ma yi jäy ajcxy. E tüg'óciy jäy ajcxy huidibi Jesús mibijc jabom jabom anajty ñayyömyújcigixy ma Dios ytijc huinduu huidibi yxii Salomón. ¹³ Ca' jac ni pin anajty mijnicxpeda'ñ mijyöpeda'ñ je' ajcxy. E je jäy ajcxy yjacyajmij'ajtpy huidi Jesús anajty ooy mibijccixyp. ¹⁴ Mayjäy oy mibijcni Jesús y'ayuc, yéydijctijc etz töxyjäydijc.

¹⁵ Etz ixti pa'mjäydijc anajty ajcxy yajnicxy mijtügüjuc cijx'aam pidaaccixy, jigix co Pedro ñaxipy jim ycadimjeyity co nicxy y'aa'ap yjaty ma je pa'mjäy. ¹⁶ Nañ jadu'n mayjäy choon anajty huidijaty huigon ycajp, ymiingixy Jerusalén, miidmiingixy pa'mjäy, etz huidibi ca'oybi miid ma yjot yhuinma'n, e tüg'óciy yajtzoocaaayb anajty ajcxy.

Pedro etz Juan yaj'ixhuidijtcixy yajpahuidijtcixy

¹⁷ Huin'it je teedy miltungmiidpi etz huidibi saduceo ixpíjcin ymijpidacp ooy ajcxy yajca'oy'ijxy, ¹⁸ e co ajcxy majch je apóstoles ajcxy, chi ajcxy pidacy ma je mijpujxtijc. ¹⁹ Chi Huindzin Dios tüg y'ángel je huin'it coodz yaj'ahuaach je pujxtijc aguu, yajpidzimy ajcxy, chi ajcxy nimay:

²⁰ —Níxcix, tinay'ahuiiygix tzajtigoty, yajmiidmiydaaccix yi mayjäy ajcxy Jesucristo ytiy'ajt nej jébi jäy ajcxy paadipy jugy'ájtín jemybi.

²¹ Co jadu'n midoy, chi com jabom ytigiiy ajcxy jopyñi tzajtigoty. Jiiby je' ajcxy anajty ñiyaj'ixpijcco'ni.

Chi je teedy miltungmiidpi etz jacpinjaty miid, chi ajcxy capxyñiguejxy yi judíojäy ymijjäydijc etz ixpicytjic co huen junta jadyii. Chi ajcxy capxyñiguejxy huen nicxy yajpidzimyii jiiby pujxtigoty yi apóstoles ajcxy. ²² Co je policías ajcxy ymejch ma je pujxtijc, ca' ajcxy paady je apóstoles ajcxy. Chi ajcxy huimbijtni miid tiy'ajt, ²³ chi ajcxy nimay:

—Hue' iich ajcxy ti nbaadcixy yi pujxtijc aducy, etz je soldadtijc jim tijc aguu yjaccuend'ajtcixy. Chi co iich ajcxy nyaj'ahuäch je pujxtijc, ca' iich ajcxy ni pin ti nbaatyich jiiby pujxtigoty.

²⁴ Co jadu'n ajcxy midoy, je teedy miltungmiidpi etz je soldado huindzin, etz jacjadyii teedy huindzin ajcxy, chi ajcxy ooy huinmay nej jada y'occogixihui. ²⁵ Huin'it tüg jäy miiñ huidibi nimaayi ajcxy:

—Je jäy huidibi miich ajcxy mbidac pujxtigoty, chim je' ajcxy tzajtigoty yaj'ixpijccixy yi mayjäy.

²⁶ Chi je soldado huindzin miid soldadtijc ñicxy ma yi apóstoles ajcxy jäy yaj'ixpijccixy, chi ajcxy yajnicxy oy'amy, com tzigiiyb anajty ajcxy co je mayjäy chaagädziyib.

²⁷ Co ajcxy yajmiiñ, chi ajcxy pidacy ma je maytungmiidpi yhuinduu. Chi je teedy miltungmiidpi je apóstoles ajcxy nimay:

²⁸ —Iich ajcxy ti ngapx'aducy co ca' huaad m'ocjacyaj'ixpijccixni ma Jesús yxi. E ¿ti ti mdungixy? Ti myajhuäcxtaaygixy yi m'ixpijcin ma Jerusaléngajp, e iich ajcxy miich pocy xyjátyim yajmihui'mam co Jesús y'o'cy.

²⁹ Chi Pedro etz jacjadyii apóstoles ajcxy y'adzooy:

—Copicy iich ajcxy ngapxycöbigipyich yi Dios jayijp ca'ydi jäy. ³⁰ Je Dios huidibi iich ajt nmij'ap nmijteedy y'ojadaj, yi' yajjugypijc je Jesús huidibi miich ajcxy myaj'óc cruudzcíxy. ³¹ Je Dios Teedy jadachambi hue' Jesús miidity aa'oy'amy jiiby tzajpjoty, e ti pidägy ane'mbi etz yajnidoocpi jigix yi judío jäy ajcxy yjothuimbidity e yajhuin-meecxipy ajcxy ypocy. ³² Iich ajcxy tiy'ajt nyejcpy miid jada ycixpi, etz nañ jadu'n je Espíritu Santo huidibi Dios ymooyb pinjaty capxymidoohui.

³³ Co je jäy ajcxy jadu'n midoy, chi ajcxy ooy yjotmätcoty, chi ajcxy jayaj'öga'n.

³⁴ Huin'it ytinayigy ma je naymujctac tüg fariseojäy, hue' anajty yxi Gamaliel, hue' je' anajty Moisés yley ñihuindzin'ájtíp. E jäy ajcxy ooy anajty yajmij'ajtcixy je Gamaliel. Chi je' ni'ane'mdiy co huen yajpidzimyii tzojcyi jiiby tiba'y je apóstoles ajcxy. ³⁵ Chi Gamaliel nimay yi tungmiidpi ajcxy:

—Judío yëydijctijc ajcxy, íxcim ti mdungixy miid jada jäy ajcxy. ³⁶ Jäymetz miich ajcxy co jecy'ajty je Teudas ypidigy yminañ co je' ymijity yjanchity, e chi ypanicxi oy nimidaax migo'pxti yëydijc. Chi ajcxy yaj'o'ci, chi tüg'óciy huidibi anajty ti ypanicxyii yöyhuäcxtay, e jadu'ñyi je' ajcxy ñitigoyday. ³⁷ Jacnamni je huin'it xii mina cajpjäy anajty ñecypejtcixy, ypidigy Judas huidibi tzon Galilea. Mayjäy ypanicxi; nañ jadu'n ajcxy yaj'o'cy, e tüg'óciy jäy huidibi panicxy jadu'ñyi ajcxy yöyhuäcxtay. ³⁸ Paady iich

miich ajcxy jadu'n nimaaygixy, ixmajtcix yi apóstoles ajcxy, e ca' mmijyöybejtcixy. Peni jäy yi y'ayuc ytiy'ajt huidibi ajcxy ymiid, cixip tigoyip yi'. ³⁹ Pen Dios y'ayuc ytiy'ajt yi' ajcxy ymiid, ca' ajcxy mjadipy nej myajcödigóoygixyipy. Jaty nayguend'ájtigixy, ca' jecyity co Dios anajty miid mdziptungixy.

⁴⁰ Nidüg'óciy ajcxy jäygidacy Gamaliel ycapxhuíjin. Huin'it ajcxy mijhuoy yi apóstoles ajcxy. Chi ajcxy tzaachytuñ, chi ajcxy c'í'ajty, etz capx'adujcy co ca' huaad Jesús y'ayuc jaccapxhuäcxip. Huin'it ajcxy najtzmazdiy. ⁴¹ Je apóstoles ajcxy ypidzimy ajcxy ma tungmiidpi ajcxy yhuinduu ooy yjotcujcity co Dios jadu'n ti aa'ixiy co huen tzaachytuñyii miid Jesús yxii ycixpi. ⁴² E ooy ajcxy yaj'ixpijccixy etz nimiyaaccixy Jesucristo jabom jabom jadu'n tzajtigoty nañ jadu'n majaty tijc.

6

Chi ajcxy yajni'bejty huixtujc mutztungmiidpi

¹ Je huin'it xii ajcxy huidibi ixpijcp Jesús y'ayuc nigí anajty ñimayiy'adiitzcixy. E huidibi anajty capxp griego ayuc ytigiiy nayñigápxip miid huidibi judío y'ayuc capxp. Yminaangixy co yi griegojäy co'ögy töxyjädjic, ca' anajty ajcxy paady quipxyjaty miid je judíojäy co'ögy töxyjädjic caayin uucin jabom jabom. ² Huin'it yi majmetzpi apóstoles ajcxy yajnaymujtaayi je jäy huidibi Jesús mibijcp, chi ajcxy yminañ:

—Ca' huaad iich ajcxy Dios y'ayuccapxhuäcxin n'ijxmajch, e nicxyich caayin uucin yajhuäxcixy. ³ Paady miich ajcxy migügtijc nayhuin'íjxigix huixtujc yëydijctijc huidibi oy yajmij'ajtni Dios, huidibi huädz oy yhuinma'ñ ymiid, huidibi je Dios yjihui'ñ ymic'ajt miid, e huen ajcxy tung'adiib jada tung. ⁴ Iich ajcxy njacmibijctzohuamy Dios, etz iich ajcxy njacyaj'ixpigamy Dios y'ayuc.

⁵ Tüg'óciy ajcxy jäygidacy je' ayuc. Chi je mayjäy huin'ijxy Esteban huidibi ymiid ooy ymibíjin, etz ymiid Espíritu Santo. Nañ huin'ijxy ajcxy Felipe, Prócoro, Nicanor, Timón, Parmenas, etz Nicolás. Nicolás ca' je' anajty yjudíojäyity. Hue' je' anajty chooñ jim Antioquía, jécyip anajty jipitigiyiñi judíojäy ytiy'ajt. ⁶ Chi ajcxy yajnicxy je jäy ma je apóstoles ajcxy. Chi ajcxy je apóstoles Dios mibijctzoy e cñixajy ajcxy.

⁷ Je Huindzin Jesús y'ayuc nigí anajty jäy tzachnejhuñi. E je mibijcpidijc nigí anajty ajcxy chachnimayiiñi jim Jerusalén, ixti may judío teedy ajcxy ymibijcy.

Majch ajcxy Esteban

⁸ Je Esteban ymiid anajty Dios ymic'ajt etz y'oy'ajt e oy mijhuinma'ñ tuuñ, etz yejcy ijxpejt ma jäy ajcxy. ⁹ Huin'it xii nijéjty ixpijctijc ooy ñay'ijxquípxigixy y'ixpijcin miid Esteban jim ma judíojäy ajcxy ñaymujctac huidi anajty yxii Libertados. E jim anajty Cirene jäy, Alejandría jäy, Cilicia jäy, etz huidibi tzomb jim Asia ñaaxjot. ¹⁰ Ca' ajcxy mimadacy Esteban com hue' je' anajty ycapxy miid yhuijy'ajt ycuje'ajt huidibi je Espíritu Santo anajty mooyip. ¹¹ Chi Esteban ymidzip ajcxy mujuy jäy huidibi jëbi nihuambety Esteban, co ti anajty ooy ycapxtigooy etz ni'ojy Moisés etz Dios. ¹² Jadu'n ajcxy yajyuumigay yaj'oxgy yi jäy mijjäydijc, etz huidibi ajcxy yaj'ixpijcp Moisés yley. Chi ajcxy mimadacy majch ajcxy Esteban, yajnicxy ajcxy ma je judíojäy ymijtungmiidpi etz ixpijctijc ñaymújcigixy. ¹³ Chi ajcxy ixtaayi jäy huidibi nihuambediib, chi ajcxy yminañ:

—Jada Esteban jibic nigapxy yi Dios ytiyc etz Moisés ytiy'ajt. ¹⁴ Ti iich ajcxy midoy co ymina'ñ co Jesús je Nazaretpi yjidamy je Dios ytiyc, e yajtigadza'ñ Dios ytiy'ajt jadu'n nej Moisés ajt xymooyim.

¹⁵ Huin'it je judíojäy tungmiidpi e tüg'óciy jäy nej anajty ajcxy jim iñaaygixy huindixpejty ajcxy Esteban. E chi ajcxy ijxi yhuiñyijp jadu'n anajty quëxigay nej y'angel yhuiñyijp.

7

Esteban ñaygohuaani ma tungmiidpi yhuinduu

¹ Huin'it je teedy mijtungmiidpi yaj'amidooy Esteban:

—¿Nej janch jadajj?

² Chi Esteban y'adzooy:

—Migügtijc ajcxy etz mijjädijc ocmidoogix. Hich ajt nDios mijpi janchypi nayquëxici ma ich ajt nmij'ap nmijteedy Abraham jecy'ajty co anajty jim ity Mesopotamia ñaaxjot, ca'ni anajty chinaydaccicy jim Harán. ³ Chi Abraham Dios ñimaayi: “Ixmatz mnaax mgajp etz tüg'óciy m'amigügtijc, e nicx ma yi naaxjot huidibi myajnixihuamyb.” ⁴ Chi Abraham choon ma yi Caldea ñaaxjot, e nicxy tzinaydaccijcpi jim Harán. Co yteedy oy y'o'cni, chi Dios Abraham yajmiiñ ma jada naaxjot ma miich ajcxy cham mdzinäy. ⁵ E ca' Dios moy Abraham jada naaxjot ya, ni ca' ma yhuäcxtägipy. Hue' je' janchtiy yaj'ahuaniy co möhuaaniy y'ap y'oc, e co anajty je' ajcxy jëdiib. Oyñi anajty Abraham ca' y'ung miidity co Dios ymigapxi. ⁶ Nimaayi Dios co y'ap y'oc y'adzinähuipy ajcxy ma huingjäy ñaaxjot, etz chi ajcxy ytumbi'adiyb etz chaachytunüyb midaax migo'px jimijt. ⁷ Nañ jadu'n Dios nimay Abraham: “Ndzaachytunüpyich je naax cajp ma yi m'ap m'oc anajty ytumbi'adyii. Chi choonip ajcxy jim, e chi xymidunüpyich ma jadyaabi it.” ⁸ Dios ytuun tüg capxytuunin miid Abraham, co huen ajcxy yajtiy'ajttihuip. Paady co Abraham y'ung Isaac yma'xung'ajty coductujc xii ajcxy oy tiy'ajttiy. Nañ jadu'n Isaac ymang Jacob, e Jacob yi ymang nimajmetzpi ajcxy, huidibi ajcxy ñi'ap'ajty yi nimajmetzpicypí Israel ycajp.

⁹ Chi Esteban yjacminañ:

—Je' ajcxy Jacob ymang, ich ajt nmij'ap nmijteedy, ymi'ijxtinaayb anajty ajcxy y'uch José. Chi ajcxy José toocy, chi je' yajnicxi jim Egipto, per Dios miid anajty y'ity José, ¹⁰ etz nihuaañ yajtzoocy ma ayo'n jotmay. Chi Dios moy ixpijcin jigix cömay ypidzimipy ma Faraón, je Egipto jäy yrey. Chi je rey José tung moy huen ane'my je Egipto naaxjot etz ane'mipy je rey ytijc.

¹¹ Huin'it xii ymiiñ mijyuu mij'ayo'n jim Egipto etz jim Canaán ñaaxjot. Je huin'it xii ich ajt nmij'ap nmijteedy ca' anajty ajcxy paady ti ycaipy. ¹² Co Jacob oy nejhuüy co jim Egipto yajpaady jim trigo, chi jim quejxy ymang ajcxy trigo juuybi. Je' ajcxy huidibi ich ajt nmij'ap'ajtim nmijteedy'ajtim. Chi ajcxy y'oy tügtecy trigo juuyb. ¹³ Je mimejtz'ocpi co ajcxy oy trigo juy, huin'it José ñayñigapxi ma y'ajch ajcxy. E chi je rey nejhuüy pinjäy je' anajty je José. ¹⁴ Chi José capxyñiguejxy huen cidaaccixy jim Egipto yi' yteedy Jacob miid tüg'óciy yjuugy ymigüg. Hue' anajty ajcxy ñaybaattáayigixy nidugi'px majmocx jäy. ¹⁵ E jadu'n yajty co Jacobo oy chinaydaccicy jim Egipto. Jim oy comjecy y'o'cni. Nañ jadu'n jim ajcxy y'o'cy may ich ajt nmij'ap nmijteedy. ¹⁶ E chi Jacob yjuugy ymigüg com jecy yajpidzimy Jacob ypajc ma ñaaxtigiy, e chi ajcxy yajnicxy jim Siquem, oy pidaaccixy ma je o'cpi jut huidibi Abraham anajty ti juy meeñyigixy ma Hamor ymang jim Siquem.

¹⁷ Chi Esteban yjacminañ:

—Ytimypadaanipy anajty tiempo nej anajty Dios ti yaj'ahuaniy Abraham. Ti anajty yi judíojäy ooy ymayiñi jim Egipto. ¹⁸ Chi oy jadüg rey ytigüy ane'mbi huidibi ca' icy'adyii José. ¹⁹ Je rey yhuin'iiñ ich ajt nmij'ap nmijteedy, e oy ajcxy chaachytuun. E chi ane'my co huen y'ung ajcxy ñigüecytaaigixy huidibi anajty ajcxy ma'xung'ajtp, jigix y'ó'ccixipy. ²⁰ Huin'it tiempo oy yma'xung'ajty Moisés, je huidibi ooy Dios jäygidacy. Chi Moisés ytaj yteedy tugüig po' yajyeeci ma ytijc. ²¹ Co ajcxy yajñigüeeeci, chi je rey ñiix je' agondigüy, e yajyeegy jadu'n nej yci'm'ung. ²² Paady Moisés ixpijcy tüg'óciy jadu'n nej Egipto jäy anajty ajcxy y'ixpicity, e ooy ymadacy miid y'ayuc etz miid ytung.

²³ Co Moisés anajty miidity huixchigüipx jimijt, chi pidacy yhuinma'ñ co nicxy ixa'ñ je' y'amigügtijc je Israel y'ap y'oc. ²⁴ Chi Moisés ijxy co tüg egipciojäy chaachytuñiyi tüg je' y'amigüg. Chi Moisés yaj'o'cy je egipciojäy, yaj'ahuimbijty nej anajty y'amigüg yajtzaachytuñ. ²⁵ Hue' Moisés tijy co je' y'amigügtijc ajcxy huen nejhuüy huinjihuüy co Dios nihua'naanip ma ymidzip miid Moisés ycixpi. Chi ajcxy ca' huinjihuüy co Moisés nihua'naanip. ²⁶ Com jabom Moisés paty mejtz Israel jäy chachtziptungixy. Chi Moisés jayaxemaañ je tzip, chi nimay: “Miich ajcxy nay'amigüg'ajtp, ¿nej co

mdziptungixy miich ajcxy miñ xyipy?” ²⁷ Je huidibi anajty ymīgüg tzaachytuumb huin'it najtztijiy Moisés, nimay: “¿Pin ti xypidägy huindzin etz tiydumbi ma iich ajcxy? ²⁸ ¿Nej xyaj'ögaamich jadu'n nej axiy myaj'o'cy yi egipciojy?” ²⁹ Co Moisés jadu'n midoy, chi yqueegy, ñicxy jim ma Madián naaxjot. Moisés jecy y'adzinaay jim Madián naaxjot, e jim oy ypicy. Chi ytöxyijc paty metz ymang.

³⁰ Huixchigüipx jimijt naxy, huin'it jim adügtuum ma je cop huidibi yxii Sinaí, ñayguëxici tüg ángel jinjoty ma tüg quipymang huidibi anajty tzachtooyb. ³¹ Chi Moisés ooy jihuiiy huinmaay miid je' ycixpi huidibi anajty y'ijxyp. Co oy mihuingoñ, chi midoy co je Huindzin Dios ñimäyii: ³² “iich Dios huidibi mmij'ap mmijteedy ajcxy Abraham, Isaac etz Jacobo Dios'ajtpy.” Chi Moisés chiyuygoty, ca' anajty ocjac-huindixpedaani. ³³ E je Huindzin Dios nimaayi: “Jen mgig, com je it ma miich mdinäy, Dios yi' y'it. ³⁴ iich ti n'ixyich njäyich nej tzaachypi paatcixy jim Egipto. Ti nmidooyich co yi'ajcxy yäxy ytinäy miid je tzaachypi ycixpi. Ti ngidägyich co ajcxy ngohuaanip. iich miich nguexamyb jim Egipto ma yi Israel jäy ajcxy.”

³⁵ Chi Esteban yjacminañ:

—Co Moisés oga'n ñicxy ma iich ajt nmij'ap nmijteedy ca' ajcxy cöbijcy huen y'ane'miyyb, chi ajcxy yminañ: “¿Pin ti xyñimäy co iich miich ajcxy nhuindzin'adiiyb?” Co mimetz'ocpi Moisés ñicxy ma yi Israel jäy, je taabi anajty je ángel ti ymīgapxyii jinye'ñ agujc, chi ajcxy cöbijcy. ³⁶ Je Moisés je' yajpidzim iich ajt nmij'ap nmijteedy jecy'ajty jim Egipto. Moisés ytuun oy mijhuinma'ñ etz ijxpejt huixchigüipx jimijt jim Egipto, jim ma tzaptz mejy, etz jim ma mijtigiduum. ³⁷ Je Moisés huidibi jecy'ajty nimay je Israel jäy: “Dios y'ijxtihuipy tüg jäy ma miich ajcxy m'ap m'oc huidibi najtzcaxihuipy yi' y'ayuc, jadu'n nej ti xy'ijxtiyich ma miich ajcxy. M'amido'ijtip ajcxy yi' y'ayuc.” ³⁸ Je Moisés jim je' anajty mijtigiduum miid je mayjäy. Chi jim je Dios y'ángel miid miydacy ma je cop huidi yxii Sinaí, etz Moisés yajnax Dios y'ayuc ma iich ajt nmij'ap nmijteedy. Moisés ycöbijc Dios y'ayuc huidibi jugy'ájtín huinixiibi miid, etz jayhui'my miid iich ajt ycixpi.

³⁹ Chi iich ajt nmij'ap nmijteedy ajcxy jecy'ajtpy ca' anajty ajcxy capxcöbigaangixy Moisés, ca' anajty cöbijccixy je' y'ané'min, chachhuimbidaangixy jim Egipto. ⁴⁰ Chi ajcxy Aarón nimay: “Ndzojcpich ajcxy co miich oydun tüg Dios huidibi iich ajcxy xyhuinhuoohuip, com ca' nnejhuiiyim ti jada' ti yjadyii je Moisés huidibi ajt xyajtsoonim Egipto ñaaxjot.” ⁴¹ Chi oyduñ ajcxy tüg huajmang. Chi huindzigiiy ajcxy je huajmang huidibi anajty ti yajcojixy, e ooy ajcxy mijotcuyc'ajty huidibi ci'm anajty ti yajcojy. ⁴² Huin'it xii ajcxy Dios y'ixmajtzi, huen ajcxy ojadaty yi xii, yi po' etz madza'. Com jadu'n Dios y'ayuc cojaaybi cojaay co Dios jadu'n yminañ:

Israel jäy ajcxy canan iich je' huidibi ti mhuindzigiiygixy jim mijtigiduum huixchigüipx jimijt.

⁴³ Ti mgiyníxcixy Moloc ytijc etz yi Renfán ymadza', tzadzech, quipychech etz oori oyduñ huidibi miich ajcxy ci'm myajcoj huidibi anajty ajcxy m'ojadadamy. Paady iich miich ajcxy nyajpidzimaangixy ma yi mnaaxjot, e nguexaangixy jiguem jim Babilonia nínaxy.

⁴⁴ Chi Esteban yjacminañ:

—Jim mijtigiduum iich ajt nmij'ap nmijteedy ymiid anajty cochactijc ma anajty ajcxy Dios huindzigiiy. Jiiby anajty ajcxy yujcciy je tzaa ma Dios ytiy'ajt ycojaayity. Je cochactijc ajcxy ycoj jadu'n nej anajty ti yaj'ane'myii Moisés, e nej anajty yajni'ixiyii nej tunipy. ⁴⁵ iich ajt nmij'ap nmijteedy mihui'm je cochactijc, e iich ajt nmij'ap nmijteedy huidibi miiñ ma jada naaxjot miid Josué, chi mimiñ ajcxy je cochactijc je taab ajcxy mimadacy je ymidzip canaag'agajp. Dios yajpidzim je' ajcxy ymidzip ma je naaxjot, jigix yajcidigihuip iich ajt nmij'ap nmijteedy. Yajtuuñ ajcxy je cochactijc, ixti cooni David ytigiiy ane'mbi. ⁴⁶ Dios yjäygidaac je rey David, e David yjacoja'ñ anajty tüg tijc oyduñ ma jébi yaj'ojadaty yajhuindzigiiy Dios, je Dios huidi Jacob mijpidac jecy'ajty. ⁴⁷ Per Salomón je' oy cojy

Dios ytiyc. ⁴⁸ Oy yi Dios tzajpjotyipi ca' chinäy ma yi tiyc tiibi jäy cojy. Jadu'n nej je Dios y'ayucnajtzcaxiibi jecy'ajty jaybety co Dios jadu'n yminañ:

⁴⁹ Je tzajp hue' je' iich n'ane'mdac, jada naaxhuiñybi iich ndecypocxtac. ¿Ti tiyc iich miich ajcxy xycojaanip? ¿Ma je it huidibi it ma iich jēbi nbocxy?

⁵⁰ ¿Nej cay iich ti n'oydundäy tüg'óciy?

⁵¹ Miich ajcxy ooy mjetjuuñity, ca' mgapxymidoy Dios. Jadu'n Esteban yjacminañ:

—Jadu'n miich ajcxy mjet mhuinma'n miidity jadu'n nej jäy ajcxy huidibi ca' Dios ytiy'ajt nejhuiyi. Miich ajcxy játyim midzip'ajtpy je Espíritu Santo. Mdügiiyb ajcxy miid mmij'ap mmijteedy. ⁵² Miich ajcxy mmij'ap mmijteedy chaachytuun tüg'óciy Dios y'ayucnajtzcaxiibi. Yi' ajcxy yaj'o'c Dios y'ayucnajtzcaxiibi huidibi jayijp'aty najtzcaxiib co yminañ tüg jäy huidibi tudägyip. E co je tudägy jäy ymiñ, chi miich ajcxy agojiix myaj'o'cy. ⁵³ Je Dios y'ángel miich ajcxy xymooy je Dios ytiy'ajt, e ca' ajcxy mgöbijcy.

Yajtzaagögätcixy Esteban

⁵⁴ Co je mayjäy midoy jadu'n nej Esteban yminañ, chi ajcxy mijotmätcoty Esteban, chi ytiigiyy ajcxy tiitzmucxpi tiitzqueetpi. ⁵⁵ E chi je Esteban jihuiy je Espíritu Santo ma yjot yhuinma'n, chi chajp'ijxy, e ijxy yi Dios y'oy'ájtin etz ijxy Jesús ytinäy a'oy'amy ma Dios Teedy. ⁵⁶ Chi Esteban nimay je mayjäy:

—Ijxcix! N'ijxypich yi tzajp ahuädz, e n'ijxypich je jäy huidibi tzoon tzajpjoty ytinäy a'oy'amy ma Dios Teedy.

⁵⁷ E chi je mayjäy ajcxy ytätz'ac amo'cxy, chi ajcxy ytiigiyy huambi jihuiybi, e chi ajcxy nimujcy yajmujcy Esteban. ⁵⁸ Chi ajcxy yajpidzimy Esteban cajppa', je' oy cögätcixy. Je tiy'ajt yejcpí huidibi jadu'n idiitz, chi yjocxhuit ajcxy yajmihui'my tüg yeeg'anäg huidibi anajty yxi Saulo. ⁵⁹ Jim anajty ajcxy Esteban tzachcätzcixy. Chi Esteban Dios mibijctzoy, yminañ:

—Huindzin Jesús, cöbjiçigich n'alma.

⁶⁰ Huin'it ycoxtinay'ahuiy, e chi yaaxqueegy mic yminañ:

—Huindzin, ca' mbocoy ixipy nej ajcxy xytuñich.

Co jadu'n Esteban yminanday, chi oy y'ögy.

8

Saulo pahuidijttägy ooy mibijcpidijc

¹ Saulo ytuun quipxycapxy miid huidibi ajcxy yaj'o'c Esteban.

Huin'it xii yaj'ixhuidijt yajpahuidijt pinjaty anajty Jesús mibijcp jim Jerusalén. Tüg'óciy je jäy ajcxy huidibi Jesús mibijcp anajty yqueec-huäcxtay, ñicxy ajcxy jim Judea ñaaxjot etz Samaria ñaaxjot. Jēyi je majmetzpi apóstoles ajcxy jac-hui'miyy. ² Nijējity yēydijc huidibi Dios huindziigiyyb oy yajnaxtiigiyy Esteban. E ooy ajcxy jotmay jihuiy, yaaxy ajcxy miid je' ycixpi. ³ Chi Saulo ooy ixhuidijtcoty pahuidijtcoty huidijaty Jesús mibijcip etz tiyc tiyc anajty yajpidzimy pahuich pajuguty yēydijctijc etz töxyjäydijc, e pidaaccixy anajty pujxtigoty.

Jim Samaria ajcxy capxhuäcxy Dios y'ayuc

⁴ Je huidi ajcxy queec-huäcxtay ycapxhuäcxyp anajty ajcxy Jesús y'ayuc huen tim ma'amy huidijtcixy. ⁵ Nidügti huidibi anajty yxi Felipe ñicxy jim Samaria, ytiigiyy y'ayuccapxhuäcxpi, yajnimay ajcxy Cristo ytiy'ajt. ⁶ E je jäy ajcxy ñayyöymujci nidüg'óciy ajcxy y'amido'ijtcixy janch amoñyi jadu'n nej Felipe anajty ymiydägy e ijxyp anajty ajcxy je mijhuinma'n huidibi Felipe anajty ytumy. ⁷ Com may anajty jäy jim huidibi miid ca'oybi ma yjot yhuinma'n, e tzoocp anajty ajcxy. E co je ca'oybi anajty ypidzimy ma je jäy, chi je jäy ooy yjacyaaxqueecy. Etz ñañ mayjäy anajty chögy huidibi ca' yci' ytecy yücxy etz tecyma'tpi. ⁸ E jadu'n je mayjäy ajcxy anajty jim ooy yjotcujcity.

⁹ Jim anajty tüg yëydijc huídibi anajty yxii Simón huídibi anajty ti ni'ixpigíy huijyjäy huinma'ñ, e ooy anajty may Samaria jäy huin'ññ, ymina'ñ co je' anajty ymijity yjanchity. ¹⁰ Tüg'óciy jäy anajty oy amido'ijtcixy Simón y'ayuc, pi'ctijc etz mij'anäctijc, e yminaangixy:

—Jadayaabi yëydijc ymiid jada Dios ymic'ajt.

¹¹ Ooy anajty je jäy ajcxy Simón mijnicxpejtcixy, com miid je mañ'ajt anajty jecy ti chachhuin'ñigixy. ¹² Co je Samaria jäy mibijcy je ayuc jadu'n nej Felipe ñimiydacy Dios y'ané'min etz Jesucristo, chi ajcxy ñiibejty yëydijctijc etz töxyjäydijc. ¹³ Etz je Simón, je huijyjäy, nañ jadu'n mibijcy e ñiibejty. Chi Simón puyöyiy Felipe, ooy jihuiy huinmaay jadu'n nej je mijhuinma'ñ huídibi anajty Felipe ytumyb etz jadu'n nej anajty Dios ymic'ajt ijxi.

¹⁴ Co ajcxy je majmetzpi apóstoles ajcxy, huídi anajty jim Jerusalén, nejhuíy co je Samaria jäy anajty ti cöbijccixy Dios y'ayuc, chi ajcxy quejxy jim je Pedro etz Juan. ¹⁵ Co Pedro etz Juan yja'ty jim Samaria, chi ajcxy Dios mibijctzoy miid je mibijcpidijc ycixpi, jigix ajcxy ymöhuiyib je Espiritu Santo. ¹⁶ Com ca'ni anajty je' ajcxy ñicidägyii, jëyi anajty ti ñiibejtcixy ma Huindzin Jesús yxii. ¹⁷ Huin'it Pedro etz Juan cñixajy ajcxy, e chi je Espiritu Santo y'adigíy yjottigíy ajcxy.

¹⁸⁻¹⁹ Co Simón ijxy co je Espiritu Santo y'adigíy yjottigíy co yi apóstoles ajcxy ycñixajy, chi Simón yaj'ahuaníy je' ajcxy meeñ, yminañ:

—Mooygich nañ jadu'n yi mic'ajt jigix co ngñixájibich hueñypinity nañ jadu'n jëbi ajcxy je Espiritu Santo y'adigíy yjottigíy.

²⁰ Chi Pedro nimay Simón:

—Mi'ögíhuipy miich mmeñ, miid co mhuinma'ñ ti mbidägy co meeñyáx mbada'ñ je huídibi Dios ñiyejcp. ²¹ Com miich ca' xypaady jadayaabi tung, com miich mjot mhuinma'ñ ca' ytuädgity ma Dios. ²² Jothuimbit e ixmatz yi mjibic-huinma'ñ, e mibijctzou Dios, ca' jécyity xyhuinmeecxipy jadu'n nej jibic mjot mhuinma'ñ mmíidity. ²³ Com janch ta'm miich mjot mhuinma'ñ, e yi jibicpi hue' xymíidity mach.

²⁴ Chi Simón y'adzooy:

—Mibijctzou je Huindzin Dios miid íich ycixpi, jigix ca' ti xyjadipyich jadu'n nej miich ti xyñimäyich.

²⁵ Co Pedro etz Juan tiy'ajt yecy etz capxhuäcxy Dios y'ayuc jim Samaria, chi ajcxy yhuimbijty jim Jerusalén. Chi ajcxy canaag agajp ñaxíy jim Samaria ñaaxjot, e capxhuäcxy Dios y'ayuc nej ajcxy y'alma nidzoocin paadipy.

Felipe miid je Etiopía jäy

²⁶ Huin'it xii Huindzin Dios y'ángel migapxy je Felipe, nimay:

—Tzoon ya, nicx ma madzäcruudz ypidzimy, ma je tü'aa huídi tzomb jim Jerusalén huídibi nicxp jim Gaza.

Je' je' je tü'aa huídibi adügtuum najxp. ²⁷ Felipe tim janitzon e ñicxy, e tü'am naybaatti miid tüg Etiopía jäy. Hue' je' anajty eunuco, migtungmiid jim Etiopía. Yi' je' tesorero'ajt anajty ma je töxyjäy huídibi anajty yxii Candace huídibi anajty ane'mb jim. Je eunuco jim anajty ti y'oy Jerusalén Dios ojadajtp. ²⁸ E chi yhuimbijtni anajty ma ycajp, ññaayb anajty carretijoty yam chachnecycapxy. Hue' anajty chachcapxyp je Dios y'ayuc huídibi Isaías ycojaay. ²⁹ Chi je Espiritu ñimay Felipe co huen nicxy najtzpadíy je carreti ma je eunuco anajty y'íñäy.

³⁰ Co Felipe mihuingoñ je carreti, chi midoy co je jäy anajty capxy je necy huídi Isaías yjaay, chi y'amidooy:

—¿Nej mhujihuiyib huídibi mgapxyp?

³¹ Chi je jäy y'adzooy:

—¿Nej íich nhujihuiyib pen ca' pin xyajnimäyich?

Chi je eunuco nimay je Felipe co huen miid íñäy carretijoty.

³² Je huídibi anajty je eunuco chachcapxyp jadu'n je' anajty ymina'ñ:

Jadu'n ajcxy nicxy yaj'ögy nej jäy borregi nicxy yaj'ögy. Je' amoñ'ijty jadu'n nej borregi amoñ'ity co jäy nime'pxy. Ni tüg'aa huam ycaminañ.

³³ Ti jäy yajtzöyduñyii, ca' ajcxy a'ixiyy co yjanayñigapxtüdaani. Ni y'ap y'oc ycaca'ty pin ocnigapxtüdiib. Co yaj'öci, chi chooni ya naaxhuiñ.

³⁴ Chi je eunuco y'amidooy Felipe:

—Tunmay'ajt yajnamaaygich pin jada ayucnajtzcapxiybi ñimiydacpy, ¿ci'm ñayñimidyägyii o ji jada huingbi pin nimiydacpy?

³⁵ Chi Felipe yajtzondacy je ayuc capxtiicxin ma jadayaabi Dios y'ayucjojaaybi ñecy. Chi yajmiidmiydaaci nej Jesús y'ajty y'ayoy. ³⁶ Co ajcxy ñajx ma tüg nii, chi je eunuco yminañ:

—Cha nii, ¿nej ca' ich jëbi huaad nniibetyi?

³⁷ Chi Felipe y'adzooy:

—Pen mmibijcpy Jesús miid tüg'öciy yi mjot mhuinma'ñ jëbi mniibety.

Chi je jäy y'adzooy:

—Nmibijcpiych co Jesucristo Dios yi' y'ung.

³⁸ Chi je eunuco nimay je carreti huindzin co huen yajtinayxipy je' carreti. Chi nimetz ajcxy ñicxy ma nii, e chi Felipe yajniibejty je eunuco. ³⁹ Co ajcxy ñiibidzimy, chi je eunuco ijxtigoy je Felipe. Jadu'ñyi je Huindzin Dios y'Espíritu yajnicxi. E chi je eunuco ytü yajyöyñi jotcuyc. ⁴⁰ Felipe yajpaty jim Azoto, chi ñajxy cajp cajp capxhuäcxi Jesucristo y'ayuc ixti yja'ty jim Cesarea.

9

Saulo yjothuimbijty

¹ Ooy Saulo tzach'ixhuidijty pahuidijty Jesús yjäy, y'ahuändacy ooy, e yaj'öga'ñ anajty ajcxy. Paady oy icy je teedy miltungmiidpi, ² pijctzoy cötújcín, co anajty ñicxa'ñ jim Damasco ma yi judíojäy ajcxy ñaymujctac, madza'ñ pinjaty Jesús y'ayuc mibijcip. Saulo yajmiina'ñ anajty ajcxy mach jim Jerusalén huen yëydijctijcity huen töxyjäydijcity. ³ Jim anajty Saulo ñicxy mihuingoñ je Damasco cajp. Huin'it jotcömoñyi je tiicxin huidi tzomb tzajpjoty, ñigidaaci jühuidity je Saulo. ⁴ Huin'it Saulo yciday, e midoy co ñimäyii:

—Saulo, Saulo, ¿na'amy co xychachpahuidijttägyich?

⁵ Chi Saulo yajtiy:

—¿Mbin miich, Huindzin?

Chi midoy co y'adzoyii:

—Ich je' Jesús, je huidibi miich mdzachpahuidijttacpy, ci'm naysajtzaachytunyii jadu'n nej huajyuub co jipconebe'y huidi miid ñuumygyumyii.

⁶ Chi Saulo chiyuygoty chachchigiyy, e yminañ:

—Huindzin, ¿ti mdzojcpy ndunipyich?

Chi je Huindzin Jesús ñimaayi:

—Pidig etz nicx cajpjoty, e jim nyajnimähuipy ti jëbi mduñ.

⁷ Je yëydijctijc huidibi anajty Saulo ymiid ooy ajcxy ñay'adzigiiyi, co midoy je' ajcxy ayuc e ca' ajcxy ni pin ma y'ijxy. ⁸ Chi Saulo ypidigy, e co huindicxñi ca' pin ma oc'ijxni. Chi ajcxy majch Saulo ma yci', e chi ajcxy huijtznicxy jim Damasco. ⁹ Tugig xii Pablo jim y'ijty huintz, ca' ycaay y'uucy.

¹⁰ Jim Damasco anajty tüg yëydijc chinäy huidibi Jesús y'ayuc mibijcip, huidi anajty yxiñ Ananías, cumäyjoty Dios ñimaayi:

—¡Ananías!

E chi je' y'adzooy:

—Cha ich, Huindzin Dios.

¹¹⁻¹² Chi je Huindzin Dios ñimaayi:

—Pidíg, nicx ma je tü huidibi yxii Derecha, e jim ma Judas ytijc yajtiü tüg Tarso jäy, huidi yxii Saulo. Dios mibijctzoob je' jim cham, cumäyoty ti huin'ijxy tüg yëydijc huidi yxii Ananías, co oy ñimiñyii, e ycñixajiiy jigix y'ijxigip jadüg'oc.

¹³ Chi Ananías y'adzooy:

—Huindzin Jesús, mayjäy ti xyajmiidmiydägyich ajcxy jadu'n nej yi Saulo jibic y'idich jim Jerusalén miid miich mjäy ajcxy. ¹⁴ Jadachambi ti mimiñ ya je necy, ma teedy mijtungmiidpi ti ycötujcmöyii, co huen majztäy je jäy, e yajnicxtähuipy jim Jerusalén, tüg'óciy pinjaty ojadajtp miich mxii.

¹⁵ Chi je Huindzin Jesús nimay Ananías:

—Nicx, com ti ich nhuin'ixy yjiibi yëydijc, jigix ich nxii etz n'ayucich capxhuäcxipy ma tüg'óciy naax cajp huidi ca' yjudíojäyity, etz ma yi reydiy, etz nañ jadu'n ma yi judíojäy ajcxy. ¹⁶ Ich yi' nyajnimähuipy tüg'óciy, nej ayo'n yajnaxipy miid ich nxii ycixpi.

¹⁷ Chi Ananías ñicxy ma Saulo anajty ti yjättägy, co ytiñiy tigoty, chi cñixajy Saulo, e chi nimay:

—Migüg Saulo, je Huindzin Jesús huidibi nayguëxici jim tü'am ma miich anajty miiñ, yi' ti xyquexyich jigix m'ijxigipy jadüg'oc, etz je Espíritu Santo xyñidigihuip xycödighuip.

¹⁸ Mic'amy ycäy ma Saulo yhuiin jadu'n nej acx ñimeeñ, chi y'ijxigy. Huin'it Saulo ypidigy e chi yajniibejtí. ¹⁹ Chi Saulo ycaay y'uucy, e chi ymic'pijcy jadüg'oc. Chi jim miid'ijty jecy huidibi ajcxy ixpijci Jesús y'ayuc jim Damasco.

Saulo capxhuäcxy Dios y'ayuc jim Damasco

²⁰ Chi janch mic'amy Saulo ytiñiy Dios y'ayuccapxhuäcxp ma je judíojäy ajcxy ñaymujctac jim Damasco, ymiñ co je Jesús hue' je' Dios y'ung. ²¹ Tüg'óciy pinjaty anajty midoohuip Saulo y'ayuc, ooy ajcxy jihuiy huinmaay, etz ñayñimáayigixy:

—¿Nej ca' jada' yjējity je huidibi tzachyajcödigoym yi jäy ajcxy huidi Jesús yxii miyaax ojadajtip jim Jerusalén? ¿Nej ca' jada yjējity huidi anajty ti ymiñ ya jäy ymajtzpi, e nicxy ceyega'ñ ma teedy mijtungmiidpi?

²² Je Saulo capxhuäcxip anajty Jesús y'ayuc huinmic jotmic, e nigapxtäy co Jesús hue' je' je Cristo, chi yi judíojäy ajcxy huidi anajty jim tzinaayb Damasco cijx ajcxy yhuinma'ñ tigoydäy.

Saulo yqueecy ma judíojäy ajcxy

²³ Ti anajty hueeni xii tiempo ñajtzniicxiñii, chi je judíojäy ajcxy ñaygapxi co yaj'ögaangixy je Saulo. ²⁴ Saulo ñehuiy co anajty yaj'öga'ñyii. Chi jim anajty ajcxy y'ahuixyii xiiim tzuum ma je poch aguu cajppäbi, jim anajty yaj'öga'ñyii. ²⁵ E je jäy ajcxy huidi anajty ymijpidacpy Jesús, chi je' ajcxy codiñajxy je Saulo mijcachjoty ma je pochycop huidi je cajp miid jübojtz'ahuidityity, e jadu'n je' choocy.

Saulo yajpaady jim Jerusalén

²⁶ Co Saulo yja'ty jim Jerusalén, oy japuyöyihuaañ je mibijcpidijc ajcxy. Nidüg'óciy anajty ajcxy ooy tzigiygixy anajty com ca' anajty mibijccixy co je Saulo ti anajty yjothuimbity. ²⁷ Chi Bernabé yajnicxy Saulo ma je nimajmetzp apóstoles ajcxy yajpaady, e chi yajmiidmiydactay nej Saulo anajty ti ixxy je Huindzin Jesús tü'am, e nej anajty Saulo Jesús y'ayuc ti capxhuäcxí huinmic jotmic jim Damasco. ²⁸ Huin'it Saulo yhui'my jim Jerusalén, e miid huidity anajty ajcxy. ²⁹ Aamic jotmic capxhuäcxy je Huindzin Jesús y'ayuc, etz miid miydaaccixy e ñaymicmigápxigixy miid je judíojäy huidi griego ayuc caxp. E je' ajcxy nihuinmayiib co yaj'ögaangixy. ³⁰ Co je mibijcpidijc nejhuiy, chi ajcxy yajnicxy je Saulo jim Cesarea, e chi ajcxy quejxnajxy huen nicxy jim Tarso.

³¹ Huin'it tiempo je' ajcxy huidijaty mijpidacp Jesús, jotcuyc anajty chinaaygixy, e niñi anajty ixpijci Dios y'ayuc ytiy'ajt, jadu'n nej yi huidi ajcxy tzinaayb ma yi Judea

ñaaxjot, Galilea ñaaxjot, etz Samaria ñaaxjot. Chi ajcxy ooy yajmij'ajtcixy je Huindzin Jesús, e miid je Espíritu Santo ypubéjtin, niigi anajty yjacmayhiygixy.

Pedro yajtzoocy Eneas

³² Co anajty Pedro yhuidijty cogapxiy cajp cajp je mibijcpidijc ajcxy, y'oy nañ jadu'n ma je mibijcpidijc ajcxy huidibi tzinaayb jim Lida. ³³ Jim minaybaatti tüg yéydijc huidibi anajty yxi Eneas, huidibi anajty ti ypa'm'ijtni tuctujc jimijt, hue' je' anajty ycixuxy ytecyxuxy. ³⁴ Chi Pedro nimay:

—Eneas, Jesucristo xyajtzoocp, pidig, etz yajpidig yi mmaabejt.

Chi Eneas mic'amy ypidigy. ³⁵ Chi ijxy tüg'óciy jäy huidibi tzinaayb jim Lida etz Sarón. Chi ajcxy yjothuimbijttay nidüg'óciy, ixmajtztay tüg'óciy yi ñi'ap huinma'ñ e jijptigiyyi yi Huindzin Jesús y'ixpijin.

Co Dorcas y'o'cy, chi yjugypijcy jadüg'oc

³⁶ Je huin'it tiempo jim Jope, jim anajty tüg töxyjäy chinäy huidibi mibijcp Jesús, hue' anajty yxi Tabita, je' huidi griegojäy ytijyp Dorcas. E je Dorcas oy xii tiempo anajty yajnaxy mi'oyjäy'aty yi jäy ajcxy. ³⁷ Jadu'n yjajti huin'it tiempo Dorcas ypa'mbejty, e chi ytimy'o'cy. Co ajcxy yajtziiday, chi ajcxy je öcpi yajnicxy ma je tijc mimejtznihuijtzpetypi. ³⁸ Je Jope cajp naymihuingon'ájtíp anajty miid Lida cajp ma anajty Pedro yajpaady, co mibijcpidijc ajcxy anajty nejhuiy co je' anajty yjímity, chi ajcxy mejtz yéydijc quejxy co huen nimäyii:

—Min tzojc ya Jope.

³⁹ Huin'it Pedro ñicxy miid je' ajcxy. Co jim yja'ty, chi ajcxy yajnicxy ma je tijc mimejtznihuijtzpetypi, e jim anajty ajcxy je co'ögy töxyjäydijc ajcxy ytinayjuhidityi ma je öcpi, chachyaaxcixy. Chi ajcxy Pedro yaj'ijxy je huit nijen huidibi Dorcas anajty ti yaj'oyiy co anajty yjugy'atyñi. ⁴⁰ Mic'amy je Pedro quejxpizimday je jäy ajcxy. Chi ycoxtinay'ahuuiy, e Dios mibijctzoy. Chi huindicxpejty je öcpi, nimay:

—Tabita, pidig.

Huin'it Tabita yhuindicxigy, e ijxy je Pedro, chi ñnaygugiiy. ⁴¹ Chi Pedro majtzi yci', e chi huijtzigy. Chi yaaxi ymigügtijc etz co'ögytöxyjäydijc ajcxy, chi ajcxy yajc'idigiiy juugy. ⁴² Tüg'óciy jäy ajcxy jim Jope nejhuiyday co Pedro yajjugypijcy je Dorcas. E mayjäy mibijcy je Huindzin Jesús. ⁴³ Jadu'n yjajty co Pedro y'ijty jim Jope canaag xii ma je coodzpi ytijc huidi anajty yxi Simón.

10

Pedro etz Cornelio

¹ Jim Cesarea anajty tüg tungmiidpi huidi anajty yxi Cornelio, hue' je' anajty capitán'ajtp ma tüg batallón soldado ajcxy yxiijip, la Italiana. ² Je Cornelio ooy anajty ytudägyity, etz je' miid tüg'óciy y'ung ytöxyijc ooy anajty yajmij'ajtcixy Dios. Je Cornelio nañ jadu'n ypubety miid meeñ je judíojäy ayoobtjic, e je' Dios ojadajt anajty jabom jabom. ³ Tüg xii, minacyxii anajty, Cornelio huin'ijxy janch huadz Dios tüg y'ánel ñigidaaci, e ñimaayi:

—¡Cornelio!

⁴ Chi Cornelio huindicxpejty je ánel janch tzigiiyb anajty, e chi yajtiy:

—¿Ti Huindzin?

Huin'it je ánel y'adzooy:

—Jadu'n nej mDios'ojadaty etz jadu'n nej mbubety ayoobtjic ti Dios jäygidägy. ⁵ Quex mjäy jim Jope, huen nicxy yajtzoñ Simón, huidibi nañ jadu'n yajtijp Pedro. ⁶ Jim je' yja'ttacy ma jadügpi Simón, je cootzpi huidi ytijc mihuingon mejypa'. Je Pedro xyajnimähuipy ti mdunipy.

⁷ Co je ángel ñicxni huidi anajty ti ymigapxyii, chi Cornelio yaaxi mejtz ytumbi, etz tüg soldado huidi Dios capxymidoob, etz huidibi je Cornelio ooy ymijnicxpedyii. ⁸ Chi yajmiidmiydactay nej je ángel ñimaayi, chi ajcxy quejxy jim Jope.

⁹ Com jabom jim anajty je quejxyöybi ajcxy ñicxy mihuingon Jope, cujc yxi anajty, e chi Pedro ypejty ma tijcnicx Dios ojadajtp. ¹⁰⁻¹¹ Ooy Pedro anajty yuubögyii, e ooy jacaya'ñ, jimni anajty yjicxxy yaj'oyyii. Chi Pedro huin'ixy je tzajp ahuädz, e huin'it ijxy quidägy jadu'n nej poob huit mijpi yxóchity majaty ytaat. ¹² Jiiby ma je poob huit, jiiby anajty canaagnax iyujc huidijaty midaax yci' ytecy etz tza'ñ etz joon. ¹³ Huin'it Pedro midoy co anajty ñimäyii:

—Pedro, pidig nicxy yaj'ög yi iyujc etz tzüd.

¹⁴ Chi Pedro y'adzooy:

—Ca', Huindzin, caminaabi ich ti njicxy huidibi jibicp etz huidibi ca' ñigödúcyity nicxy judíojäy jicxcixy.

¹⁵ Huin'it jadüg'oc ayuc midoy ñimäyii:

—Huidibi Dios yajhuäch ca' huaad mdijy co yi' yjibicity.

¹⁶ Tugüg'oc jadu'n yjajti, chi je poob huit ypättigiñi tzajpjoty. ¹⁷ Jim anajty Pedro tzachhuinmay nej anajty yhuimbizimy je tiibi ixy co yja'ty ma tijc aguu je Cornelio yquexyöybi huidi ajcxy anajty nidihuip yajtihuip je Simón ytijc. ¹⁸ Chi ajcxy mic ycogapxiy yajtiy pen jim anajty yjättägy Simón huidibi anajty nañ jadu'n yajtijp Pedro. ¹⁹ E je Pedro je' anajty chachhuinmaayb tiibi ixy, chi je Espíritu Santo Pedro ñimaayi:

—Tugüg yéydijc ji xy'ixtäy. ²⁰ Pidig e minac, nicx miid je' ajcxy, e ca' ti mhuinmay, com ich jadu'n ti nnimäy co huen xy'ixtäy.

²¹ Huin'it Pedro yminajcy ma je' ajcxy, je Cornelio quexyöybi, nimay ajcxy:

—Ich je' huidibi miich ajcxy m'ixtaayb, ¿ti ycixpi co ti mmiingixy?

²² Chi ajcxy y'adzooy:

—Yi' ich ajcxy ti xyquexyich yi Cornelio huidibi capitán'ajtpi, je' tudägy jäy huidibi Dios yajmij'ajtp, je huidibi tüg'ócxy judíojäy ooy tzójccixy, etz cōmaaygixy. Huindzin Dios tüg y'ángel ñimay Cornelio co miich miiñ nyajhuoy, jigix mñicxip ma yi' ytijc, e y'amido'ida'ñ ajcxy nej miich myaj'ixpiga'ñ.

²³ Chi Pedro yajtictigiñy je' ajcxy. Chi ajcxy jim ymaahui'my. Com jabom Pedro ñicxy miid je' ajcxy, e chi nijéjity ypanicxi huidibi mijpidacp Jesús huidi anajty ajcxy tzinaayb jim Jope.

²⁴ Com jabom ajcxy yja'ty jim Cesarea ma Cornelio anajty y'ahuixy tügmucy miid yjugymigüg, etz nijéjity pin ooy miid ñaymigüg'adyii, huidijaty anajty ajcxy jayijp ti nimäy. ²⁵ Co Pedro oyjäty ma je tijc, chi Cornelio ytijcpidzimy oy yjijpcobadñy je Pedro, e chi ycoxtinay'ahuñy yajmij'ada'ñ anajty je Pedro. ²⁶ Chi Pedro huijztinayigy je Cornelio, e nimay:

—Tinayig, ca' xyajmij'ida'ñich, nañ jadu'n ich njäyity nej miich.

²⁷ Miid anajty ycapxy ymiydägy co ytijctigy, jiiby anajty mayjäy ni'amugñ'ahuixcixy.

²⁸ Chi Pedro nimay ajcxy:

—Miich ajcxy mnejhuñy co yi judíojäy ycostumbre capx'aducy ca' huaad judíojäy yöymucy miid huidibi ca' yjudíojäyity, ca' huaad ytigñyixy ma ajcxy ytijc. Per Dios ti xyajni'ixyich co ca' huaad mñina'ñich ca' oyjäyity huädzjäyity pinjaty. ²⁹ Paady co oy ti xyajhuoyijich ti nmiñich, ni ca' huam ti mñina'ñich. Nnejhuñhuaamyich na'amy co oy ti xyajhuoyijich.

³⁰ Chi Cornelio y'adzooy:

—Cham ymimidaaxxiijy, jadu'n nej jadachambi hora, ya ich anajty ma ndijcich, jaygay jay'ügy nDios'ojadatyich. Com hue' anajty mijminacy xii mina judíojäy ajcxy ycapxtaccixy, co tüg ñayguëxici jadu'n nej jäy miid ypoob huit janch adicxp. ³¹ E je ángel xyñimaayich: “Cornelio, Dios ti xymidoohui m'oración e ti jadu'n jäygidägy jadu'n nej mbubety yi ayoohtijc ajcxy. ³² Quex mdumbi jim Jope, huen nicxy yajtzoñ

Simón huidi nañ jadu'n yajtijp Pedro. Jim Pedro yja'ttägy ma je cotzpi ytijc huídibi yxii Simón, huídibi tzinaayb mihuingon mejypa'. Co je' ymiinipy, chi xymiidmiydägy." ³³ Paady nguejyich janch mic'amy huen nicxy xy'ijxtäy. E ti may'ajt mduñ co ti mmiiñ. Jadachambi cha iich ajcxy nidüg'óciy ma Dios yhuinduu. E n'amido'idángixyich tüg'óciy je y'ayuc huídibi je Huindzin Dios ti xyaj'ane'my jébi xyajniimaaygixy.

Pedro Dios ytiy'ajt nigapxy nimiydacy ma Cornelio ytiyc

³⁴ Huin'it Pedro ytiñiy y'ayuccapxhuäcxpi, nimay ajcxy:

—Jadachambi huinjihuiybich, co yi Dios ca' ni tüg'ixy'ixy jäy, y'actzojctayb hueñypínity. ³⁵ Dios ycöbajcxy hueñypinjäyity huídibi tzinaayb huen huídibi naax huen huídibi cajpity, pen chigñiyb ajcxy Dios, pen tumyb oybi. ³⁶ Dios ti quexy yi' ytiy'ajt ma yi Israel jäy ajcxy, yajnimay co ji cham jotcujc'ájtín miid Jesucristo iich ajt nHuindzin. ³⁷ Miich ajcxy mnejhuñiyb yajxon nej ti ytunyii ti yjadyii ma judíojäy ajcxy ñaax ycajp chondacy jim Galilea, Juan el Bautista ti anajty capxhuäcxí Dios y'ayuc ytiy'ajt etz yjääyajniibety. ³⁸ E mnejhuñiyb miich ajcxy co Dios yejc je Jesús je Nazaretpi je Espíritu Santo, e nej Jesús yhuídijty e tuuñ oy'ájtín, etz mijhuinma'ñ, jadu'n nej yajtzocy je jäy ajcxy huídibi anajty ane'm'ijtp ma yi mujcu'. Com Dios anajty miid y'itye Jesús. ³⁹ iich ajcxy je tiy'ajt nmiidich tüg'óciy jadu'n nej Jesús yajty y'ayoy jim Judea naaxjot etz jim Jerusalén. Huin'it ajcxy Jesús yaj'o'cy cruudzcíxy. ⁴⁰ E Dios yajjugypijcy codugñig xii, e chi yajnayguëxíci ma iich ajcxy. ⁴¹ Ca' ti yajnayguëxígyii ma tüg'óciy jäy, jéyi ma iich ajcxy huídibi jayijp Dios yhuin'ijx jigix tiy'ajt nyegipyich. iich ajcxy caaymujc uucmujc huin'it co yjugypijcy ma y'o'cy. ⁴² Ti xyquexy iich ajcxy ayuc ngapxhuäcxpi ma mayjäy ajcxy etz nidiy'ajt'adipyich ajcxy co Dios Jesús ti pidägy mij'ane'mbi ma yi juugypí etz ma yi ögypi. ⁴³ Nañ jadu'n jecy'ajty tüg'óciy Dios y'ayucnajtzcaxñiybi ñimiydac ajcxy Jesús, e ymíñañ ajcxy co tüg'óciy je jäy ajcxy pinjaty mibijc je Cristo, Dios huinmecxñib ajcxy ypocy.

Je Espíritu Santo ycidacy ma je ca'pi ajcxy yjudíojäyity

⁴⁴ Yam anajty Pedro ycapxyñi co je Espíritu Santo ñidigñiyi ycödigñiyi ajcxy nidüg'óciy huídijaty y'amido'ijt Pedro y'ayuc. ⁴⁵ E je judío mibijcpidijc ajcxy tiibi anajty miñ miid Pedro, ooy ajcxy jihuiy huinmay co Dios quejx Espíritu Santo ma je jäy ajcxy huídibi ca' yjudíojäyity, ⁴⁶ co midoy ycapxcíxy miid huingbi ayuc, etz cömaygixy jäymejtzcíxy Dios. ⁴⁷ Chi Pedro ymíñañ:

—¿Nej ca' jada' y'óyity co ñiibedipy ajcxy huídibi Dios ti ymóoyigixy je yEspíritu Santo jadu'n nej iich ajt xymooyim?

⁴⁸ Chi Pedro ni'ane'mdiyy huen niibejtcíxy ma Huindzin Jesucristo yxii. Huin'it ajcxy Pedro cohuanñiy huen huí'my tüg'ixi mejtz xii miid je' ajcxy.

11

Pedro yajmiidmiydacy jim Jerusalén nej anajty ti ytuñiyii ti yjadyii

¹ Je apóstoles ajcxy etz je mibijcpidijc ajcxy huídibi anajty ajcxy jim Judea, midoy ajcxy ayuc co nijējity jäy huídibi ca' yjudíojäyity ti anajty ajcxy cöbajcxy Dios y'ayuc. ² E co Pedro yhuimbijty Jerusalén, chi nijējity judíojäy ajcxy ooy Pedro, je' ajcxy huídibi tzachmijpidaaccixp judíojäy ycostumbre jadu'n nej ajcxy tiy'ajttñiygixy ymang. ³ Je' ajcxy nimay Pedro:

—¿Na'amy co oy ti mgo'ixiyy jäy ajcxy huídibi ca' yjudíojäyity, etz ti mgay m'ügy miid je' ajcxy?

⁴ Chi Pedro nimiydactay tüg'óciy jadu'n nej anajty ti yjaty, chi ymíñañ:

⁵ —Jim iich anajty Jope nDios'ojadatyich. Chi nhuin'ijxyich jadu'n nej tüg'ixi mij poob huit choñ tzajpjoty, cidägy ma iich nhuinduu, xóchity anajty ma midaax ytaatz. ⁶ Co nnimijhuägyich n'ixa'ñich ti jiiby, chi n'ijxyich may iyujc, jiiby iyujc midaaxpi yci' ytecy, jiiby ahua'nbi iyujc, jiiby tza'ñ, etz joon. ⁷ Chi nmidooyich tüg'ixi ayuc huídibi

xyñimaaybich: “Pedro, pidig, yaj'ög yi iyujc etz tzüdz.” ⁸ Chi n'adzooyich: “Ca' Huindzin, com caminaabi ndzüchich iyujc huidibi ca' ñigo'adúcyity judíojäy ajcxy tzüdzipy.”

⁹ Chi mimetz'ocpi tüg ayuc tzajpcíxy xyñimäyich: “Huidi Dios ti yajhuäch, ca' huaad mdijy co ca' y'oychú'tznity.” ¹⁰ Tugüig'oc jadu'n yjajti, chi je poob huit ypättigüiyñi tzajpjoty. ¹¹ Huin'it xyñimiiñich je quexyöybi nidugüig, choon ajcxy jim Cesarea. ¹² Chi je Espiritu xyñimaayich, co min n'ocnicxich miid je' ajcxy, ca' ma ni ti nhuinmayipyich. Miid nicxyich nidugüig nmigügtijcich. Chi ich ajcxy ndigüiy ma je jäy ytijc. ¹³ Je codijc xyajmiidmiydaacich co je' anajty ti huin'ixy tüg ángel ma ytijc, ñimäyii: “Quex mdumbi ajcxy jim Jope huen nicxy yajtzoongixy Simón huidibi jäy ytijpy Pedro, ¹⁴ e je' xyajnimähuij nej jébi Dios m'alma xyajnidzoocip, miich etz tüg'óciy mjñin mdijc mjuugy-migüig.” ¹⁵ Co Jesús y'ayuc ngapxhuäcxtzondaacich, chi je Espiritu Santo ñidigüiyi ycödügüiyi je' ajcxy. Tim jadu'n nej xyñidigüiyim xycödügüiyim je jayijp'atypi. ¹⁶ Huin'it njäymejtcoodyich nej je Huindzin Jesús yminañ: “Janch Juan, je Bautista, jäy yajñibejt miid ni, e Dios jäy ajcxy y'adigühuiyb yjottigühuiyb je Espiritu Santo.” ¹⁷ Pen Dios ti ymöyii je jäy ajcxy huidibi ca' yjudíojäyity tú'ciy miid huidibi ich ajt ti xymooyim co nmibijcim Jesucristo. ¿Ocjactim pin ich co Dios nmidzip'adiybich?

¹⁸ Je mibijcpidijc ajcxy jim Jerusalén, co ajcxy midoy Pedro y'ayuc, chi ajcxy y'amoday. Chi ajcxy Dios jäymejch cömay, chi ajcxy yminaangixy: “Dios jadu'n ti ymina'ñ co je' ajcxy huidibi ca' yjudíojäyity jébi yjothuimbijtcixy, jigix Dios ymöhuüyb jugy'ájtin huinixibi.”

Antioquía jäy ymidoo ajcxy Dios y'ayuc

¹⁹ Taabi jäy yaj'o'cy Esteban, chi jäy ajcxy ooy ixhuidijtcoty pahuidijtcoty Jesús yjäy jim Jerusalén. Chi nijéjity ajcxy yqueecy, nicxy ajcxy jim Fenicia ñaaxjot, etz jim Chipre, etz jim Antioquía. E capxhuäcxy ajcxy je oybi ayuc ma jadyii judíojäy, ca' ajcxy jac ni pin yajnimay. ²⁰ E nijéjity mibijcpidijc huidibi jim anajty ajcxy yconaaxip ycocajpíp Chipre etz Cirene, chi ajcxy ñicxy jim Antioquía. Chi yajmiidmiydacy ajcxy je Huindzin Jesús y'ayuc miid griegojäy ajcxy. ²¹ E je Huindzin Dios ooy ypubejti je' ajcxy, e ooy mayjäy ixmajch je jibic-huinma'ñ etz mijpidaaccixy yi Huindzin Jesús ytiy'ajt.

²² Co je mibijcpidijc ajcxy jim Jerusalén midoogixy jada ayuc, chi ajcxy quejxy Bernabé jim Antioquía. ²³ Co Bernabé jim yja'ty, chi ijxy jadu'n nej Dios anajty oy'ájtin ti tuñ, chi oy yjotcugüiy je Bernabé. Chi capxhuijy tüg'óciy co huen ajcxy janch cixyot huinijot cuyduuni yi Huindzin Jesús y'ayuc ytiy'ajt. ²⁴ Com Bernabé oyjäy je' anajty, e ooy mijpidägy Dios y'ayuc etz ooy miidity je Espiritu Santo jotjoty huinma'ñyoty. Ymiid je' ycapxhuijin ooy mayjäy mijpidacy Jesús y'ayuc ytiy'ajt.

²⁵ Co jadu'n yjajti, chi Bernabé oy ixtay Saulo jim Tarso, e co paty, chi miidmiñ Antioquía. ²⁶ Jadu'n yjajty jim ajcxy y'ijty tüg jimijt, yaj'ixpijccixy je mayjäy huidibi ajcxy jajtigüiyi je Jesús y'ixpijcin. Jim Antioquía oga'n yximoy cristiano, je jäy ajcxy huidibi mijpidacp Jesús.

²⁷ Huin'it tiempo nijéjity tiy'ajtnajtcapxiiybi choon Jerusalén ñicxy ajcxy jim Antioquía. ²⁸ Tüg huidi anajty yxii Agabo ytinay'ahuiy mayjäyoty, e chi je Espiritu Santo yajcapxi, e yminañ co mijyuu anajty ñaxcidäga'ñ huindu'ñybi naaxhuiñ. E janch jadu'n yjajti taab anajty Claudio y'ane'my. ²⁹ Huin'it je mibijcpidijc ajcxy jim Antioquía pidacy ajcxy yhuinma'ñ co quexaangixy pubéjtin ma ymigügtijc ajcxy huidi tzinaayb jim Judea, jadu'n nej pubéjtin pin tim yega'ñ. ³⁰ E jadu'n ajcxy tuuñ. E je meeñ tiibi anajty ymucy yajmigüejxy ajcxy je Bernabé etz Saulo ma je mibijcpidijc tungmiidpi jim Judea.

12

Co Jacobo y'o'cy etz co Pedro yajpujxtijctigüiyi

¹ Huin'it tiempo je rey Herodes yajmajtzi nijéjity Jesús yjäy, e chi yajtzaachytuuni. ² Chi ni'ane'mdiy huen yaj'ögyii miid espada je Jacobo, je Juan y'uch. ³ Co je rey nejhuiy co je judíojäy ajcxy jadu'n ooy jäygidaaccixy, chi ymajtzi Pedro nañ jadu'n. Hue' jadu'n

yajti xiijoty, je xii mina tzajcaagy caaygixy huïdi ca'pi ylevadura miidity. ⁴ Co Pedro yajmajch, chi yajpidacy pujxtigoty. E chi je rey ane'my co huen midaaxpicy soldado ajcxy cuend'adyii, tügpicyjaty midaax soldado ajcxy. Hue' anajty je rey ti huinmay xiinaxy anajty tiyduna'n Pedro mayjäy agujc. ⁵ Pedro jiiby anajty pujxtigoty janch oy cuend'aty. E je mibijcpidijc janch Dios mibijctzodiib anajty ajcxy miid Pedro ycixpi.

Dios y'ángel yajpidzimy Pedro pujxtigoty

⁶ Huin'it coodz ma ca'ni anajty yxiimiy, ma je Herodes anajty tiyduna'n Pedro mayjäyjoty com jabom, Pedro maab anajty, e soldado agujc ajcxy cixoch tecyxoch anajty miid cadena, e jadügpicy soldado ajcxy pujxtijc'aguy anajty ajcxy ycuend'aty. ⁷ Chi janch timetiini yHuindzin Dios tüg y'ángel ñayguëxici ytinäy ma Pedro yhuinduu, e je pujxtijc yaj'anidyday. E chi je ángel tijyüxcy Pedro ma ycaach, chi yajmäyhuijy, e nimay:

—Pidig mic'amy.

Chi je cadena ycaday ma Pedro yci'. ⁸ Chi je ángel nimay Pedro:

—Ñayhuini, yajtigi' mgig.

Co Pedro yajtiyday ycig, chi je ángel ñimaayi:

—Yajtigi' mjocxhuit, e pajamgich.

⁹ Chi Pedro pujxtijc pidzimy axam ma je ángel, ni ca' nejhuiy pen janch anajty huïdibi je ángel tumyib, hue' jihuiy jadu'n nej ycumäy. ¹⁰ Chi ñajxy ajcxy ma tügpicy cuend'ajtpi, mic'amy ajcxy mimetzpi ñinajxy. Co ajcxy yjaty ma mijpujxtijc aguu, ma mijtuba', chi je' ci'm'ahuaach. Chi ajcxy ypidzimy. Ti anajty mijyöygixni co je ángel ixmajtzn Pedro. ¹¹ Huin'it Pedro yhuinma'ñymejch, chi yminañ:

—Jadachambi njihuiybich co janch jada' co je Huindzin Dios ti quexy y'ángel, e yi' ti xyñihua'ñich ma Herodes, etz jadu'n nej tüg'óciy judíojäy ajcxy anajty xytuna'ñich.

¹² Co Pedro yjot yhuinma'ñ ymejch, chi ñicxy ma María ytijc, je Juan ytaj, je Juan huïdi jäy ytijpy Marcos, ma anajty ajcxy jim mayjäy tügmucy y'ijtcixy Dios mibijctzoogixy.

¹³ Co Pedro tijc'aguu cojxnojcy, je tiba'y'amybi, chi tüg töxy'anäg ypidzimy huïdi anajty yxii Rode, ixa'n pin je' tijc'aguu cojxnojcy. ¹⁴ Co oy yögmidooy co Pedro je' anajty, chi ca' ytijc'aguu yaj'ahuaach. Jëyi co poyigy ñicxy tigoty co anajty tzachjotcújcicy, nigapxy co Pedro je' anajty ma tijc'aguu.

¹⁵ Chi je jäy ajcxy nimay Roda:

—Mloocjiyb jada' miich.

Chi je töxy'anäg y'adzooy co janch je' anajty. E je jäy ajcxy yminaangixy co ca' yi' yjëjity, hue' jada' Pedro y'ángel.

¹⁶ Yam Pedro anajty tijc'aguu tzachcojxnocy co ajcxy yaj'ahuaach, chi ajcxy ijxy, chi ajcxy ooy chigiiy yjihuiy. ¹⁷ Pedro cmiid ytiy'ajtyejcy co huen amon ajcxy. Chi yajmiidmiydacy nej je Huindzin Dios anajty ti yajpidzimyii pujxtigoty. E nimay ajcxy co huen nicxy yajmiidmiydägy jada je Jacobo etz jacjadyii mibijcpidijc.

Chi Pedro ñicxy huingbi cajp.

¹⁸ Co yxiimiy, huin'it soldadtijc ajcxy ooy ytiigiiy huambi jihuiybi huinmay'ahuidijty, com ca' nejhuiygixy nej je' anajty ti ytunyii ti yjadyii miid Pedro ycixpi. ¹⁹ Chi Herodes ni'ane'mdiy huen nicxy yaj'ixtäy Pedro. E co ca' yajpaty, chi pijctzoy tiy'ajt ma soldado ajcxy huïdi anajty Pedro ti ycuend'adyii. Chi ni'ane'mdiy huen ajcxy nicxy yaj'ögyii. Chi Herodes choon jim Judea, chi oy chinaydacpicy jim Cesarea.

Herodes y'ögy

²⁰ Herodes janch ymijotmätpy anajty je jäy huïdibi tzinaayb jim Tiro etz Sidón. Chi je Tiro etz Sidón jäy ajcxy ñaygapxi nej jëbi huingohuägihuaangixy je rey. E ymimadac ajcxy co migapxy je Blasto je mijtungmiidpi maabi rey Herodes ytijc. E chi ajcxy pijctzoy co huen tzip cixy naxy, com co ajcxy xijc mooc jim anajty yajtzoongixy ma rey ñaaxjot.

²¹ Chi Herodes agapxtujcy tüg xii, chi je rey huit yajtiigiiy, chi ñaydac paty ma ycötujctac,

chi migapxy ajcxy je jäy. ²² Chi je mayjäy ajcxy ytigiiy mic capxp miydaacp, chi ajcxy yminaangixy:

—¡Jada jäy huidibi capxp, ca' jada yjäyity, jadu'n yi' nej tüg dios!

²³ E huin'ítiiy Huindzin Dios y'ángel yajpa'mbejty Herodes, com ca' anajty huindzigiiy cömay je Dios. Chi y'o'cy, ting je' tzütztaayi.

²⁴ Je Huindzin Dios y'ayuc mibijc'idíchpy anajty jäy, e yajcapxhuäcxp anajty hueñytimma'ámyity.

²⁵ Co Bernabé etz Saulo ajcxy ytungmay jim Jerusalén, huin'it chooni ajcxy jim miidnicxy huidibi anajty yxii Marcos.

13

Bernabé etz Saulo yajtzondaaccixy ytung huidibi ajcxy pátip

¹ Ma je' ajcxy huidi mijpidacp Jesús jim Antioquía, jim anajty jadyii huidi Dios y'ayuc yaj'ixpijcp anajty, etz nañ huidibi tiy'ajt najtzcapxiyb. Jim anajty Bernabé etz Simón, huidi anajty ajcxy ytijpy el Negro, etz Lucio huidi tsoon Cirene ñaaxjot, etz Manaén huidi tüg yeectac miid Herodes, huidibi ane'm jim Galilea, etz Saulo. ² Tüg xii ajcxy ñayyöymújcigixy jaygay jay'ügy Dios ojadajtcixy. E chi je Espíritu Santo ñimaayi:

—Huen pidáacigich ajcxy Bernabé etz Saulo ahuing jigix ajcxy ytunipy ma je tung tüibi nyajnihuohuüyich.

³ Chi ajcxy yjacDios'ojadajty etz yjac'ayuu'ajty, e chi je jäy ajcxy cñixajy Bernabé etz Saulo, e chi ycapxycijxy miid je' ajcxy.

Je apóstoles ajcxy capxhuäcxixy Dios y'ayuc jim Chipre

⁴ Chi jada' je Espíritu Santo yquejxi Bernabé etz Saulo huen nicxy Seleucia, e jim ajcxy ybarcotigiiy nicxy ajcxy jim Chipre mejy agujcpi. ⁵ Co jim ajcxy yja'ty ma barco yjättac huidi yxii Salamina, chi ytigiiy Jesús y'ayuccapxhuäcxp ma je judíojäy ajcxy naymujctac. Tzooñ je Juan anajty nañ jadu'n je' anajty Bernabé etz Saulo pubéjtíp. ⁶ Huidijttay ajcxy ma je naax mejy'agujcpi, e yja'ty ajcxy ma je cajp huidi yxii Pafos. Jim ajcxy paty tüg judíojäy huidi anajty yxii Barjesús, hue' je' anajty huijyjäy, e ñaydiyii anajty co Dios ytiy'ajt najtzcapxiyi, e ca' anajty yjanchity. ⁷ Je huijyjäy ooy miid ñaymigüg'adyii anajty je huidibi ane'm jim, hue' anajty yxii Sergio Paulo. Je Sergio Paulo ooy anajty ycohuinma'ñity, ooy y'ixpicyity. Chi ni'ane'mdiy co huen nicxy yajtzonyii Bernabé etz Saulo. Com je Sergio Paulo anajty midoohuaani je Dios y'ayuc. ⁸ Je huijyjäy, huidi nañ jadu'n yajtijp Elimas, midziptzoñ Pablo etz Bernabé, e tücci'y capx'aduga'ñ ca'ydí je gobernador ymibicy. ⁹⁻¹⁰ Chi Saulo, huidibi nañ jadu'n yajtijpy Pablo, miid je Espíritu Santo huindicxpejty je huijy jäy, e nimay:

—¡Ooy mjibicjäyity miich, ooy m'aniijity, mujcu' miich xy'ung'ajtp, ooy mmidzip'aty pinjaty oyjot oyhuinma'ñ miid! ¿Mina m'ixmadza'ñ nej mdzachyajtigoya'ñ je Huindzin Dios ytiy'ajt? ¹¹ Jadachambi je Huindzin Jesús xychachytunaamb, e mhuí'mip huiintz, etz ni ca' je xiimbi tzojc m'ixipy.

Chi je huijyjäy mic'amy yhui'my huiintz coodz, chi ixtay pin oc-huijznicxiib com ca' anajty y'oc'ijxni. ¹² Co je gobernador jadu'n ijxy, chi mijpidacy Jesús y'ayuc, e chi ooy jihuüy huinmaay nej Pablo nimiydägy je Huindzin Jesús y'ayuc ytiy'ajt.

Pablo etz Bernabé yajpátcixy jim Antioquía etz Pisidia

¹³ Chi Pablo etz ymigügtijc ajcxy miid ybarcotigiiy, chi ajcxy ñicxy Perge ma Panfilia ñaaxjot. Chi Juan puyöyduutni Pablo etz Bernabé, e chi ñicxni Jerusalén. ¹⁴ Pablo etz Bernabé ñajxy jim Perge oyja'tcixy jim Antioquía ma Pisidia naaxjot. Sábado xii ajcxy ytigiiy ma je judíojäy ajcxy ñaymujctac, chi ajcxy ixtactay. ¹⁵ Co ñecycapxtay ma Moisés ñecy etz Dios y'ayucnajtzcapxiybi ñecy, chi je naymujctac huindzin quejxy ayuc ma Pablo ajcxy, ñimaayi:

—Migügtijc, pen mmiid ayuc tiy'ajt miid jäy ycixpi jébi cham myajnimäy ajcxy.

¹⁶ Chi Pablo ytinayĩgy, yci' miid ytiy'ajt yecy co huen amoongixy, e nimay ajcxy:

—Midoogix, miich Israel jäy ajcxy, etz huidibi Dios yajmij'ajtp. ¹⁷ Je Israel jäy Dios huin'ijxy iich'ajt nmij'ap nmijteedy jecy'ajty etz yajyujcpejt ajcxy micho'n co anajty ajcxy jim yjactzinäy Egipto ñaaxjot. Chi ajcxy yajpidziimni miid Dios ymic'ajt. ¹⁸ Dios je' ajcxy mihuindinay huixchiguĩpx jimijt jim mijtigĩduum. ¹⁹ Je Dios huixtujc it naax cajp yajtigoy huidi anajty jim tzinaayb Canaán ñaaxjot, etz yajmoy je naax iich'ajt nmij'ap nmijteedy jecy'ajty jigix ajcxy jim chinahuipy. ²⁰ Midaax migo'px jahuixchigĩpx majc jimijt Dios mic'ajt mooy juez ajcxy huen ane'myii Israel jäy ixti mabaad Samuel je Dios y'ayucnajtzcaxiĩyb ytungbijcy. ²¹ Huin'it ajcxy tũg rey pijctzoy huidi ane'miib ajcxy. Chi Dios yajreytigĩy Saul huidi tuun huixchigĩpx jimijt. Je Saul yteedy hue' je' anajty yxii Cis, hue' je' anajty Benjamín y'ap y'oc. ²² Chi Dios tungbijcy Saul e yajreytigĩy David, chi Dios yminañ: “Ti nbaadyich David, Isaí ymang, tũg yeydiyc huidibi cuydundahuipy nej ndimdzocyich.” ²³ Ma David y'ap y'oc Dios yajniĩbijcy Jesús, jigix nihuaniĩpy yajniĩdzögĩpy je Israel jäy ajcxy, jadu'n nej anajty jecyĩp Dios yaj'ahuaniiy ajcxy. ²⁴ Ca'ni anajty Jesús miiñ co Juan, je Bautista, capxhuäcxy Dios y'ayuc ma je Israel jäy ajcxy, nimaaygixy co copicy huen jothuimbijtcixy ma Dios, e huin'it jebi ñiĩbéjtcixipy. ²⁵ Co anajty Juan y'o'cin huington, chi yminañ: “Ca' iich'nejjity je Cristo, jadu'n nej mminaangixy. Jayijp ti nmiĩnich, jac'axam miina'ñ je Cristo; jacmic'ajt miid je' ca'ydi iich. Ca' xypaadyich nicxy yi' ycĩghuin nguejich.”

²⁶ Chi Pablo yjacminañ:

—Migũgtijc, Abraham y'ijx y'oc etz pinjaty yajmij'ajtp Dios, Dios ti xyajniguexy jada ayuc nej ajcxy jebi m'alma niĩdzoocin paady. ²⁷ Je jäy ajcxy huidi anajty ajcxy tzinaayb jim Jerusalén etz tungmiidpi ajcxy, ca' ajcxy nejhuiy pin je' anajty je Jesús, ni ca' anajty huinjihuĩyigixy y'ayucnajtzcaxiĩybi ajcxy y'ayuc huidibi anajty yajcapxp ma ajcxy ñaymujctac huindũg sábadó. E je' ajcxy ci'm yajpocycäy Jesús, e cuyduñ nej anajty ajcxy yjaybetyity ma Dios ñecy. ²⁸ Oy ajcxy ca' paty pocy nej yaj'öccixipy Jesús, chi ajcxy nibijctzohuiĩy ma Pilato co huen nicxy yaj'ögyii. ²⁹ Co je jäy ajcxy cuydunday jadu'n nej anajty yjaybétyity ma Dios y'ayuc miid je' ycixpi, chi ajcxy yajminajcy cruudzcixy, etz oy yajnaaxtigĩyigixy. ³⁰ E Dios je Jesús yajjugypijc co anajty ti y'ögy. ³¹ Chi canaag'oc ñayguẽxĩgo'ci ma ymigũgtijc huidi anajty ti ymiidhuididyii co chooñ Galilea ñicxy Jerusalén. Jadachambi yi' je' ajcxy huidi tiy'ajt yejcpy ma je jäy ajcxy.

³² Je oybi ayuc iich' miich ajcxy nyajmiidmiydacpy cham, huidi Dios yajnimay iich'ajt nmij'ap nmijteedy jecy'ajty. ³³ Je oybi ayuc ti Dios cuyduñ cham ma iich'ajt co yajjugypijcy Jesús co y'o'cy. Jadu'n yi' Dios y'ayucjojaaybi jaay jecy'ajty ma je Salmo necy mimetzpi ma Dios jadu'n yminañ: “N'ungich cham ti nyajjuugypicyich.” ³⁴ Miid jadaaabi ycixpi co Dios ti yajjugypicy Jesús co y'o'cy, jigix ñinĩcx ca yhuindĩgooyipy jadu'n anajty jaybétyity ma Dios ñecy ma Dios jadu'n yminañ: “Nmöhuaamyich miich ajcxy je conúcxin huidibi nyajnimaayich je David.” ³⁵ Paady nañ jadu'n Dios y'ayucjojaaybi jaay jadũg'it, ma yminañ: “Ca' Dios a'ixiy nicxy y'ung ñinĩcx yhuindĩgooy, je y'ung huidibi miid huadz jot huinma'ñ.” ³⁶ Com janch co je David Dios huin'ijxy, jigix ane'miĩpy yi' yjuugy ymigũg ajcxy. E co ytung yajmay, chi y'o'cy, e je' y'alma ñaybaatti miid je y'ap yteedy y'alma, e je' ñinĩcx huindĩgooy je'. ³⁷ Je Jesús huidibi Dios yajjugypijc ca' je' ñinĩcx yhuindĩgooy. ³⁸ Migũgtijc, jebi mnejhuĩyigixy, co je pocyhuinmeecxin yaj'ihuäcxy yajcapxhuäcxy miid Jesús ycixpi. ³⁹ Miid je' ycixpi pinjaty mibijcp ti ypocyyajhuinmeecxicy huidibi Moisés yley anajty ca'p pocyhuinmeecxin yecy. ⁴⁰ Nayguend'ajtigix, ix xyajcidacpejtcix je mij ayo'n jadu'n nej Dios y'ayucjojaaybi jaay jecy'ajty co Dios jadu'n yminañ:

⁴¹ Midoogix iich' n'ayuc, miich ajcxy nixiicpi yajxiicpi, nay'adzigĩyigixy, ix m'alma myajtĩgooyigixy. Com iich' Dios ndumyibich tũg mijhuinma'ñ ma miich ajcxy mxii mdiempo. May miich ajcxy ca' mmibigipy, oy pin xyjayajmiidmiydáaccixipy.

⁴² Co Pablo ajcxy ypidzimy ma yi judíoꝝäy ñaymujctac, chi je jäy huidibi ca' yjudíoꝝäyity nimay je Pablo co huen nañ jadu'n yajmüdmüydägiyb ma je jadüꝑi sábado. ⁴³ Co ajcxy yöyhuäcxni ma nayoöymujctac may judíoꝝäy etz mayjäy huidi ca' yjudíoꝝäyity huidibi jüptigüüy je judíoꝝäy y'ixpüjcin, panücxxy ajcxy je Pablo etz Bernabé. Pablo etz Bernabé capxhuijy ajcxy co huen panücxxy je tüy'ajt jadu'n nej Dios tübi tuñ may'ajt müd jäy ycüꝑi, e ca' ajcxy ixmadzüꝑy.

⁴⁴ Co sábado yxii paty, chi jäy ñayoöymujci jahuenjaty cajp jäy ycanicxtay co anajty tzachmidoohuaangüxy Dios y'ayuc. ⁴⁵ Ca' anajty ajcxy yjotcüjcity co je judíoꝝäy ajcxy ijxy je mayjäy. Chi ajcxy ooy yjot'ambijccoty ni'ojüüꝑüxy etz nimaayꝑüxy oy ni nej Pablo.

⁴⁶ Chi Pablo etz Bernabé ytiꝑüy miccapxüpi yminañ ajcxy:

—Copücy anajty co üch müch nyajnimähuüꝑy Dios y'ayuc jayüꝑ. Com ca' mgöbigaangüxy Dios y'ayuc, e co ca' mnaybüdáacüꝑüxy tudäꝑy ma jugy'äjtin müd huinüübi, nücxxyich n'ocyajnimäy ajcxy Dios y'ayuc huidibi ca' yjudíoꝝäyity. ⁴⁷ Com jadu'n xy'ane'myüch ajcxy yi Huindzin Jesús, e xyñimaayüch ajcxy:

Ti üch müch nbüdüꝑy jadu'n nej tüꝑ tücxin jajin ma tüꝑ'öcüy naaxhuiñybi jäy jigüx myajnejhuühuüꝑy ajcxy je nüdzocin jüguembaad huindu'my naaxhuiñ.

⁴⁸ Co ajcxy jadu'n müdoy huidibi ca' yjudíoꝝäyity, chi ajcxy ooy nüꝑi yjotcüꝑüüy, e chi ajcxy yminandacy co je Huindzin Jesús y'ayuc ooy anajty y'öyüty. E may ajcxy mübüjcy huidibi anajty Dios ti yajnüꝑödüꝑü co paatüꝑ jugy'äjtin huinüübi. ⁴⁹ E jadu'n jim yajcapxhuäcxxy Jesús y'ayuc ma je jimbi naax cajp. ⁵⁰ E je judíoꝝäy ajcxy minayꝑaxi nüjüjity töxyjäydüj ajcxy tudäꝑüpi huidibi Dios yajmüj'ajtp, etz je müjüjüydüj, e je' ajcxy müd mübüdüꝑy Pablo etz Bernabé co pahuoꝑꝑüꝑügaangüxy ma jejimbi naaxjot. ⁵¹ Chi Pablo etz Bernabé ycüꝑ huinhuoꝑy, je' je' tüy'ajtüꝑ co ca' jäyꝑüdücy ajcxy nej jäy anajty ytungüxy. Chi ajcxy nücxni jim Iconio. ⁵² E je' ajcxy huidibi müjüꝑüdüꝑ Jesús ooy anajty ajcxy yjotcüjcity. E ymüd anajty ajcxy je Espüritu Santo ma yjot yhuinma'ñ.

14

Pablo müd Bernabé jim Iconio

¹ Jim Iconio Pablo etz Bernabé ytiꝑüy ajcxy yꝑüꝑüxyi ma je judíoꝝäy ñaymujctac, e oy yajxon ajcxy capxhuäcxxy Jesús y'ayuc. E may judío etz griegoꝝäy ajcxy ymübüjcy. ² Je judíoꝝäy ajcxy huidibi anajty ca' ymübüjccüxy nüꝑaxcüty ni'ojüꝑügoty ajcxy huidibi ca' yjudíoꝝäyity huen je cajp jäy ajcxy müjotmädüꝑy je mübüjꝑüdüj. ³ Müd jada ycüꝑi Pablo etz Bernabé yhuü'my je' ajcxy jecy etz capxhuäcxxy ajcxy Dios y'ayuc huinmüc jotmüc etz je Huindzin müjotcüꝑ'ajtcüxy ooy, e mooyi ajcxy je müc'ajt jübi ajcxy pa'mjäy yajtzöꝑüꝑy etz müjhuinma'ñ tungüxy huidibi iꝑxpejt'ajtp ma Dios ymüc'ajt. ⁴ E je cajpjäy mejtꝑücy je' anajty ajcxy, nüjüjity ymüjüꝑüdüꝑy ajcxy yi judíoꝝäy, etz nüjüjity ymüjüꝑüdüꝑy ajcxy je Dios y'ayuccapxhuäcxpi. ⁵ Chi nüjüjity judíoꝝäy etz huidibi ca' yjudíoꝝäyity ñayꝑaxi müd tungmüdüꝑi co müjotmätcodaangüxy etz tim tzaagöꝑüdüꝑü Pablo etz Bernabé. ⁶ Co Pablo etz Bernabé nejhuüüy, chi ajcxy yꝑüꝑücy nücxxy ajcxy jim Listra etz Derbe jim Licaonia, e majaty naax cajp huidi huinduü'agonbi. ⁷ Jim ajcxy capxhuäcxxy Jesucristo ytüy'ajt nej jübi ajcxy huaad y'alma nüdzocin paatcüxy majaty cajp huingtonbi.

Tzaagätzcüxy Pablo jim Listra

⁸ Jim Listra anajty tüꝑ yüdüjic inäy tecyma'tꝑi, caminaabi anajty yöy, com jadu'n anajty yma'xung'aty. ⁹ Je tecyma'tꝑi amüdü'ijtpy anajty Pablo y'ayuc, e Pablo iꝑxy anajty co ymüd mübüjcin nej jübi chöꝑy. ¹⁰ Chi Pablo müc nimay:

—Tinaayüꝑ.

Chi je tecyma'tꝑi tüꝑ tüꝑy ytinaꝑꝑüꝑüy, e chi ytiꝑüüy yöy. ¹¹ Co je mayjäy ajcxy ijxy nej Pablo anajty pa'mjäy ti yajtzöꝑy, huin'it ajcxy ytiꝑüüy huambi jühuüüybi müd Licaonia ayuc chachminaangüxy:

—¡Dios ajcxy jadu'n nej jäy ti ycüdüacüxy ma üch ajt!

¹² Ymīnaangixy co Bernabé je' anajty Júpiter, e je Pablo je' anajty Mercurio, com je' anajty capxp. ¹³ E je Júpiter teedy huídibi anajty tumb jim ma je Júpiter chajptijc cajppābi, mīmīñ toro ajcxy etz pijy. E je teedy miid je jāy ajcxy yhuindzigihuaangixy etz ojadadaangixy anajty Pablo etz Bernabé, yaj'ōgaangixy je toro ajcxy. ¹⁴ Co Pablo etz Bernabé nejhuīy, ca' ajcxy jāygidacy nej jāy anajty ajcxy y'ididzaangixy, chi ajcxy cī'm yhuīt agiīdziy, e ytigiīy ajcxy mayjāy'agujc yam chachmīnaangixy:

¹⁵ —¡Yēydijctijc ajcxy! ¿Nej co jada jadu'n m'idiitzcixy? Nañ jadu'n iich ajcxy jāyity, jadu'n nej miich ajcxy. Paady iich ajcxy ti nmingixy ma miich ajcxy mgajp jigix ajcxy m'ixmadzipy jada jadu'mbi huinma'ñ huídibi ca' choobaady ma Dios. E mijpidaaccip je Dios juugypī huīdi oyduñ tzajp etz naaxhuiñybi, je meyy etz tūg'óciy tijaty ya n'ijxim. ¹⁶ Jecy'ajty Dios ixmajch je jāy ajcxy huen tūngixy nej tzojccixy. ¹⁷ Oy Dios anajty jayecy tiy'ajt co je' Diosity, jatuñ jadu'n yi oybi miid miich ajcxy ycixpi. Dios yi' yajtuub etz yecy oybi cosecha e xymooyim mijcajee huīdi ngaayim n'uucim e xyajjotcugiyim.

¹⁸ Oy anajty Pablo jadu'n jadim tzachnīmaaygixy, ca'p ajcxy mīmadacy co yi jāy ajcxy ca'p yaj'ó'ccixipy je toro co anajty yhuindzigihuaangixy.

¹⁹ Huin'it xī nijējity judío jāy yja'ty, choñ jim Antioquía etz Iconio. Chi ajcxy yajnimay je mayjāy co huen midziptzoongixy Pablo etz Bernabé. Chi mic'amy je mayjāy midziptzooñ Pablo etz cōgāch ajcxy. Hue' ajcxy tijy ti anajty yaj'ōccixy. Chi ajcxy oy ixjugucy cajppa'. ²⁰ Chi je apóstoles ajcxy jūbigiīy je Pablo, chi je' ypidigīy, e ñicxy jadūg'oc cajpjoty. Com jabom Pablo etz Bernabé choñ, ñicxy ajcxy jim Derbe.

²¹ Co Pablo etz Bernabé jadu'n capxhuācxy je Jesucristo y'ayuc oybi jim Derbe, chi mayjāy ajcxy mijpidacy Jesús. Chi Pablo etz Bernabé ajcxy yhuimbijty Listra, Iconio, etz Antioquía. ²² Jim ajcxy jotmicmigapxy je mībijcpidijc ajcxy, e capxhuiy huen tūgjijp mībijccixy Dios y'ayuc, nīmaaygixy:

—Co ndigihuaanim ma Dios y'ane'my copicy co nyajnáxim may ayo'n. ²³ Cajp cajp majaty mībijcpidijc yajpaady jim Pablo etz Bernabé yajñibijcy nijējity yēydijctijc huen nigohuajc'ajtcixy je jāy ajcxy huídibi mijpidacp Jesús. Co anajty ti yajñibicy je' ajcxy huídibi nigohuajc'adipy, chi jaygay ajcxy y'ijty etz Dios mībijctzoy miid je' ajcxy ycixpi.

Pablo miid Bernabé yhuimbijtcixy Antioquía jim Siria naaxjot

²⁴ Pablo etz Bernabé ñajxy ajcxy Pisidia oy ajcxy yja'ty jim Panfilia. ²⁵ Chi Pablo etz Bernabé Jesús y'ayuc capxhuācxi jim Perge, chi ajcxy ñicxy jim Atalia. ²⁶ Chi ajcxy jim ybarcotigiīy ñicxcixy jadūgtacy jim Antioquía ma anajty ajcxy ti yajñibigyī Dios chójcīn miid je tung huídibi anajty ti yajcījxcixy. ²⁷ Co ajcxy yja'ty jim Antioquía, chi ajcxy huoomujcy je jāy ajcxy huídibi anajty mijpidaacp Jesús, e yajmīdmīydactay tūg'óciy nej anajty Dios ti ytuñ miid je' ajcxy ycixpi, nej anajty Dios ti yaj'ahuāch je tū'aa nej huaad mībicy ajcxy je huídibi ca' yjudío jāyity. ²⁸ Pablo etz Bernabé ijt ajcxy ooy jim jecy miid je mībijcpidijc ajcxy.

15

Mībijcpidijc ñayyōymujcī ajcxy jim Jerusalén

¹ Je huin'it tiempo nijējity jāy huīdi tzoon Judea yja'ty ajcxy jim Antioquía, e ytigiīy yaj'ixpijcp ma ajcxy je huídibi mijpidaacp Jesús, ymīnaangixy: “Pen myajñidzōgamy ajcxy yi m'alma, copicy co ajcxy myajtiy'ajttīhuīpy jadu'n nej Moisés y'ane'my.” ² Chi Pablo etz Bernabé ñaymidziptzongooti ajcxy miid huīdi anajty ajcxy tzomb jim Judea, e ca' ajcxy ñay'ayuc-huinjihuiyi. Chi jada' yajñibejtī Pablo etz Bernabé etz jacjadyī mībijcpidijc huen ñicxy ajcxy Jerusalén yajtydigīy ma je apóstoles ajcxy etz huídibi ajcxy nigohuajc'ajt je mībijcpidijc jim Jerusalén.

³ Je mībijcpidijc huídibi anajty ajcxy jim Antioquía oy ajcxy tūjijphuohūy Pablo etz je' ajcxy huīdi ñicx miid Pablo. Chi Pablo etz miid yjaymīdtijc ajcxy ñicxy, e ñajxy ajcxy Fenicia ñaaxjot etz Samaria ñaaxjot. Yajmīdmīydaaccixy je mībijcpidijc cajp cajp jadu'n

nej jäy ajcxy huidibi ca' yjudíojäyity ti yjothuimbijtcixy etz yajmij'adaangixy Dios. E tüg'óciy mibijcpidijc ooy ajcxy jäygidacy je Pablo y'ayuc.

⁴ Co Pablo etz Bernabé ajcxy yja'ty jim Jerusalén, chi je mibijcpidijc ajcxy cöbijci je apóstoles ajcxy, etz je' ajcxy huیدی nigohuajc'ajtp anajty je mibijcpidijc. Chi Pablo yajmídmíydactay nej anajty Dios ti ytuñ miid je' ajcxy. ⁵ Chi nijējity fariseojäy, tiibi anajty mibijccixy Jesús, ytinayigy ajcxy juntijoty, e yminañ ajcxy:

—Copicy co huen yajty'ajttiy je jäy huidibi mibijcp Jesús huیدی ca' yjudíojäyity, e copicy nyaj'ané'mim co huen ajcxy Moisés ycötújcín cuyduuni.

⁶ Chi ñayyöymujci je apóstoles ajcxy etz huیدی ajcxy nigohuajc'ajtp je mibijcpidijc, co capxyöyaangixy je fariseojäy y'ayuc nej yhuí'mip. ⁷ Ca' ajcxy tzojc ñay'ayuc-huinjihuiiyi, chi Pedro ytinayigy yminañ:

—Migügtijc, mnejhuiyb ajcxy co jayhuin Dios ti xyhuin'ixyich ma miich ajcxy, jigix nyajnimähuibich jäy ajcxy huیدی ca' yjudíojäyity je Jesús ytiy'ajt oybi nej ajcxy y'alma nídzoocín paadipy. ⁸ E Dios huیدی nejhuiyb jäy yjot yhuinma'ñ xyaj'ijxich je tiy'ajt co yejcy Espíritu Santo ma yi' ajcxy ñañ tim jadu'n nej ytuuñ ma iich ajt. ⁹ Dios tú'ciy ytuñ miid iich ajt etz miid yi' ajcxy, miid co yi' ajcxy mibicy Jesús paady Dios yajhuaatzi ajcxy yjot yhuinma'ñ. ¹⁰ Jadachambi, ¿nej co ca' mhujnihuihuaangixy mibigaangixy nej Dios ytuñ miid huیدی ca' yjudíojäyity? ¿Nej co adzip myajnihuidzaangixy je costumbre huیدی ni iich ajt ni n'ap ndeedy ca' ti mimadägy nicxy cuydundaangixy? ¹¹ Janch iich ajt nmibijcim co miid je may'ajt huیدی Jesús ti tuñ miid iich ajt ycixpi ti nbaatim n'alma nídzoocín. Ñañ tim jadu'n je' ajcxy huیدی mibijc Jesús huیدی ca' yjudíojäyity ypaat y'alma nídzoocín miid je may'ajt huیدی Jesús ti tuñ.

¹² Huin'it je jäy ajcxy y'amonday, y'amido'ijtcixy nej Bernabé etz Pablo nimiyaaccixy nej anajty Dios ti tuñ miid yi' ajcxy, jadu'n nej ajcxy ti yajtzögy pa'mjäy miid Dios ymic'ajt, etz jac tijaty mijhuinma'ñ huیدی ti tuñ ma yi' jäy ajcxy huیدی ca' yjudíojäyity.

¹³ Co Pablo etz Bernabé ajcxy miydactay, chi Jacobo yminañ:

—Migügtijc mido'mbijcigich ajcxy iich n'ayuc. ¹⁴ Simón Pedro ti xyajmídmíydaacim nej Dios may'ajt ti tuñ oga'n ma huیدی ca' yjudíojäyity, co huin'ijxy huیدی yi' yjäy'adaanip ma yi' ajcxy. ¹⁵ Quipxy jada ñaybadyii miid huیدی je Dios y'ayucnajtzcaxiyybi jecy'ajty ycojaj, ¹⁶ co jadu'n yminañ:

Co anajty jadu'n ti y'ocjadyii, chi nhuimbidipyich ya naaxhuiñ. Nyaj'oyihuibich jadüg'oc je naax cajp huیدی David anajty y'ane'myb huیدی anajty ti y'octigooybi jadu'n nej tüg'ijc huیدی ti yciday. Ma David y'ap y'oc nyaj'a'oyihuibich jadüg'oc naax cajp, jadu'n nej jäy ytiyc cojy huinjemybi.

¹⁷ Jigix jacjadyii jäy y'ojadadipy ajcxy yi' Dios. Ñañ jadu'n je' ajcxy huیدی ca' yjudíojäyity, huیدی iich njäy'adaanip.

¹⁸ Jadu'n je Huindzin Dios jécyip jada tiy'ajt jadu'n yejcy.

¹⁹ Chi Jacobo yjacminañ:

—Paady iich jadu'n nmina'ñich co ca' huaad n'amayiyim ajcxy huیدی ca' yjudíojäyity huیدی ajcxy ti mijpidägy Dios. ²⁰ Hue' janchtiy tzoc nijayiyim co ajcxy ca' tzüdzipy huیدی jäy yajhuindzigiyb ídolos, etz ni ca' huaad migapxcixy huingbi töxyjäy, etz ni ca' huaad tzützcixy iyujc huídijaty jäy yöc-huídypí, etz ni ca' huaad jüxcixy tijaty iyujc ni'py. ²¹ Jecy'ajty ixti chamni tüg'oc cajp, ji pin ihua'cxp capxhua'cxp Moisés yley majaty nayyöymujctac naag naag pocxinxi.

²² Chi je apóstoles ajcxy etz je huیدی nigohuajc'ajtp yi' mibijcpidijc, miid tüg'óciy Jesús yjäy pidacy ajcxy yhuinma'ñ co huin'ixaangixy nijējity jäy ma je' ajcxy etz quexaangixy jim Antioquía quipxyi miid Pablo etz Bernabé. Chi ajcxy yajni'bejty Judas, huیدی ñañ jadu'n yajtijpy Barsabás, etz miid Silas, yēdyjctijc huیدی ajcxy capxpaadip. ²³ E je' ajcxy yajmiguejxy necy nej anajty ti jaay: “iich ajcxy apóstoldijc, etz huیدی nigohuajc'ajtp yi' mibijcpidijc, etz nidüg'óciy mibijcpidijc, cham iich ajcxy nguexy capxpocxin ma ajcxy mibijcpidijc huیدی ca' yjudíojäyity huیدی ajcxy tzinaayb jim Antioquía, etz huیدی

ajcxy tzinaayb Siria etz Cilicia ñaaxjot. ²⁴ Ti ñich ajcxy nejhuñyich co nijëjity jäy ti xyñinixcixy, choñ ma ñich ajcxy, ca' ñich ajcxy ngötujcín mooy, e xy'amayñyigixy jim miid y'ayuc, e xyajhuinma'ñytigoya'ñ ajcxy, co ajcxy xyñimaaygixy co copicy co myajtiy'ajttihuip ajcxy m'ung, etz mbayöyipy ajcxy je Moisés ycötújcín. ²⁵ Paady ñich ajcxy ti nnyagápxigixy nidüg'óciy co nyajñibedipyich nijëjity jäy huidi yajpaatp ma ñich ajcxy co huen nicxy xy'íjxcixy niguipxyi miid nmigügtijcích huidi ooy ndzocyich, je Bernabé etz je Pablo. ²⁶ Je huidi ajcxy yjugy'ajt ti yoxy ti toogy miid ajt nHuindzin Jesucristo ycixpi. ²⁷ E jadu'n yam nguexyich ajcxy Judas etz Silas, e yi' ajcxy ci'm xyajmiidmiydägyipy tüg'óciy ñich ajcxy n'ayuc. ²⁸ Ti je Espíritu Santo huinma'ñ pidägy ma ñich ajcxy nhuinma'ñ etz ñich ajcxy ti nhuinma'ñ nbidägyich, co ca' nyajñibigipy ajcxy tijaty ayuc tzaachypi, jëyi janchtiy je huidi copícyip. ²⁹ Copicy co ca' ajcxy mdzüdzipy huidi jäy yajhuindzigüyb ídolos, ca' ajcxy ni'py mjñcxcixipy, ni ca' ajcxy mdzüdzipy iyujc huidi yöc-huiity ti y'ögy, e ca' ajcxy mmigapxtigooygixipy huingbi töxyjäy. Pen mguydundaayb ajcxy jada ané'mín, oy anajty mdungixy. E Dios ajcxy xypubedipy xypudigíhuipy.”

³⁰ Jadu'n je' ajcxy huidi ti yajquexy nicxy ajcxy jim Antioquía. Jim ajcxy huoomujcy je mibijcpidijc, e yajcidigiiy ajcxy je necy. ³¹ Co je mibijcpidijc je necy capxy, chi ajcxy ooy yjotcugiiy miid je oybi ayuc tiibi anajty ajcxy yajniguexyii. ³² Com Judas etz Silas hue' je' anajty Dios y'ayucnajtzcaxiiybi, paady ajcxy yajjotcugiiy jot'amij moy je mibijcpidijc miid je ayuc. ³³ Jecy ajcxy jim yhuäcxijpy, chi je mibijcpidijc miid ajcxy ycapxycijxy, yajmihuaniiy ajcxy Dios, chi ajcxy yhuimbijtni ma anajty ti choongixy. ³⁴ Chi Silas yhuinma'ñypidacy co anajty yhui'ma'ñ. ³⁵ Nañ jadu'n Pablo etz Bernabé ijt ajcxy jim Antioquía, etz miid jac nijëjity ymigügtijc yaj'ixpijc'idiitzcixy etz capxhuäcx'idiitzcixy je Huindzin Jesús y'ayuc ytiy'ajt.

Pablo mimetz viaje

³⁶ Ti xii tiempo anajty ñajtzninixiiyñi co Pablo nimay Bernabé:

—Jam'ajt nmigügtijc co'ixiiyim cajp cajp majaty ti ngapxhuäcxim Huindzin Jesús y'ayuc. Ooy njanejhuihua'ñich nej ajcxy yajpaady. ³⁷ Bernabé ymiid nicxaamy anajty je Juan huidi yajtijp Marcos. ³⁸ E je Pablo ca' a'ixiy co miid nicxip Juan, com ti anajty y'ocpuyöydúutibi jim Panfilia, e ca' anajty ti yjacmiiydyajtüyöyii je tung. ³⁹ E ca' ajcxy ñay'ayuc-huinjhuiiyi miñ xyipy. Chi Bernabé miidnicxy Marcos e ybarcotigiiy ajcxy, chi ajcxy ñicxy jim Chipre. ⁴⁰ E je Pablo abicy huin'ijxy Silas huidi anajty miid ñicxa'ñ. Chi je mibijcpidijc miid ycapxycijxy, chi chooni ti anajty je mibijcpidijc yajmihuaniiy Dios, ⁴¹ chi ñajxy jim Siria ñaaxjot etz Cilicia ñaaxjot jot'amijmooy je mibijcpidijc.

16

Timoteo mijhuäcpejty je Pablo etz Silas

¹ Chi Pablo etz Silas yja'ty ajcxy jim Derbe etz Listra. Jim ajcxy paty tüg jäy huidi anajty yxii Timoteo huidi anajty mijpidaacp Jesús. Judíojäy anajty ytaj'ajtpy, e griegojäy anajty yteedy'ajtpy. Je' ytaj nañ ymibijcpy anajty Jesús. ² Je jäy ajcxy huidi yajmij'ajtp Jesús jim Listra etz jim Iconio ooy anajty oy nimiyaaccixy Timoteo. ³ Pablo ooy jatzojcy co Timoteo ycajäymiid'ajti. Chi Pablo yajtiy'ajttiiyi Timoteo, jigix ca' ymijotmädiyyb je judíojäy huidi anajty ajcxy jim tzinaayb, com tüg'óciy ajcxy nejhuñy co griegojäy teedy'adyii. ⁴ Cajp cajp ma anajty ajcxy ñaxy yajmiidmiydaaccixy ajcxy je mibijcpidijc je cötujcín huidi je apóstoles ajcxy, etz huidi nigohuajc'ajt je mibijcpidijc jim Jerusalén. ⁵ Je' ajcxy huidi yajmij'ajtp Jesús cajp cajp nigí anajty yjotmicpijccixy, etz mijpidaaccixy Dios y'ayuc, etz ñimayiy'idiitzcixy jabom jabom.

Pablo yhuin'ijx tüg Macedonia jäy

⁶ Je Espíritu Santo ca' a'ixiy nicx capxhuäcxixy Dios y'ayuc jim Asia ñaaxjot. Paady ajcxy huingduum ñicxy yajyöyñajxy ajcxy Frigia ñaaxjot etz Galacia ñaaxjot. ⁷ Chi ajcxy

jim yja'ty ma Misia ñaaxtziba'n. Chi huinmay co ñicxa'ñ ajcxy Bitinia ñaaxjot. E je Espíritu yajnejhuñy ajcxy co ca' yi' tzocy co jim nícxcixipy. ⁸ Chi ajcxy jüyöyñajxy Misia ñaaxjot, chi ajcxy y'idacy jim Troas. ⁹ Chi Pablo cumäyjoty huin'ijxy tüg yëydjic, huídibi yconaaxity anajty Macedonia, ytínay'ahuñy ma Pablo yhuinduu, e ycohuanñy, ñimäyii: “Tun may'ajt nicx jim Macedonia, e jim xypubedipy ñich ajcxy.” ¹⁰ Co Pablo jadu'n huin'ijxy cumäyjoty, chi ñich ajcxy n'ixtay barco huídi nicxamb jim Macedonia. Nhuinjihuñy ñich ajcxy co jim Dios xyquéjxcixyich jigix jim ngapxhuäcxibich Jesucristo ytiy'ajt je oybi nej jëbi ajcxy alma nídzoocin paadipy.

Pablo etz Silas jim Filipos

¹¹ Chi ñich ajcxy nbarcotigñy jim Troas nicxy ñich ajcxy tüyi ma naax mejy'agujcpi huídibi anajty yxñ Samotracia. Chi com jabom ajcxy nja'tyich jim Neápolis. ¹² Co ñich ajcxy jim ndzooñ, chi ñich ajcxy nicxy jim Filipos. Filipos hue' je' romanojäy ycajp. Je' je cajp jac mijpi ma je Macedonia ñaaxpa'. Jim ñich ajcxy nhuäcxijpy jecy. ¹³ Tüg sábado nicxy ñich ajcxy cajppa', mihuingon tüg mijñi, ma anajty judíojäy ajcxy miídity Dios ojadajttac. Chi ñich ajcxy n'ixtacy jim, e ngapxhuäcxich ajcxy Jesús y'ayuc ma je töxyjäydjic ajcxy huídi jim anajty ajcxy ti yömujccixy. ¹⁴ Je Lidia anajty y'amído'ijtp. Hue' je' anajty Lidia ycogajpity jim Tiatira, e ytocpy anajty ucy huit oy jatypi. Lidia yajmij'ajtpy anajty Dios, e je Huindzin Dios yajyungñy yjot yhuinma'ñ, jigix amído'idipy nej Pablo Dios y'ayuc capxhuäcxí. ¹⁵ Je Lidia ñibejt miíd tüg'óciy yjuugy ymígüg, chi ñich ajcxy ycohuanñy, e xyñimáaygixich:

—Pen minamb ajcxy co nmibicyich je Huindzin Jesús, miin jättaaccix ma ñich ndijc.

Chi ooy ycohuanñy ñich ajcxy, ixti cooni jim xyajhui'myich ajcxy.

¹⁶ Jadu'n yjajti tüg tecy co ñich ajcxy anajty ñicxy ma Dios ojadajttac, chi ñich ajcxy nbaty tüg tumbi töxy'anäg mañ'ajt miídpi huídi ooy ytiygapxy. Ymiíd anajty yhuindzin ma ytuñ, e je' yhuindzin ooy anajty ymeeñybaaty co je töxy'anäg ytiygapxy. ¹⁷ Je töxy'anäg ypanicxy chach yam Pablo etz ñich ajcxy yminañ:

—Jada yëydjic Dios tzajpjotypi ajcxy ymidumyb. Capxhuäcxí ajcxy Dios y'ayuc jadu'n nej jëbi ñich ajt n'alma nídzoocin paady.

¹⁸ Canaag xñ jadu'n ñich ajcxy xychach'amayñy. Co Pablo chijpin, chi yhuäc-huimbijty nimay je mañ'ajtmídpi:

—Miíd Jesucristo yxñ n'ane'myich, pidzim ma jada töxy'anäg.

Tim huin'ítty je ca'oybi yajyöyduuty je töxy'anäg.

¹⁹ Co je töxy'anäg yhuindzin jadu'n ijxy co ca' y'ocmeeñybadaani, chi miíd je' ycixpi ajcxy majch Pablo etz Silas, e yajnicxy ajcxy ma je tungmiídpi ma je' ajcxy y'agujctjic.

²⁰ Co ajcxy jiiby miídja'ty ma je tungmiídpi, chi yminañ:

—Jada yëydjic ajcxy judíojäy jada, nigoo ajcxy ñaax yajmäty ycajp yajmäty, ²¹ etz yaj'ixpicy ajcxy costumbre huídi ca' huaad ñich ajt ngöbñicim, e nihuaad ngatuunim, com hue' ñich ajt romanojäy.

²² Chi je mayjäy ajcxy miiddziptzoon Pablo etz Silas, e je tungmiídpi ni'ane'mdiy co huen ajcxy yajnñeñ yaj'ixjeñ huen yajhuojpcixy miíd matz. ²³ Co ajcxy huojptay, chi pidacy ajcxy pujxtigoty, e ane'my ajcxy pujxtijc huindzin co huen cuend'ajtcixy yajxon.

²⁴ Co je pujxtijc huindzin ypaati je cötujcin, chi pidacy Pablo etz Silas jac jiiby öc'am, e chi ajcxy ixmajch co'adzity ytecy ma je quipy huídi yxñ cepo.

²⁵ Chi jadu'n yjajty mijcuctz anajty, co Pablo etz Silas chach Dios ojadajtcixy chach huin'ñgixy yi Dios, e jacjadyii machyjäy chach amídoo'ijtcixy. ²⁶ Chi timitiini uyx huinxijty pujxtijc poch. Chi y'ahuaatztay je pujxtijc agi', e y'adzittuttay je cadena ma tüg'óciy machyjäy.

²⁷ Chi oy ymähuijy je pujxtijc huindzin. Co jadu'n ijxy ac'ahuädz pujxtijc aguu, chi yajpidziimy y'espada ñayyaj'öga'ñyii anajty. Com hue' anajty tijy ti je machyjäy yqueectäy. ²⁸ Huin'it Pablo mic'amy migapxy je pujxtijc huindzin nimay:

—Ix nej mnayduuni, cheeby ajcxy nidüg'óciy.

²⁹ Chi je pujxtijc huindzin pijctzoy jün, e ytiġiy poyġy pujxtigoty, janch tziyuuyb miid tzig'iñ. Chi ycoxtinay'ahuiy ma Pablo etz Silas ajcxy yhuinduu. ³⁰ Chi yajpidzimy Pablo etz Silas, e yaj'amidooy:

—Huindzin, ¿ti iich jēbi nduñ jigix nidoocin nbáadibich?

³¹ Chi je' ajcxy minañ:

—Mibic Huindzin Jesús etz mbaadipy nidoocin, miich etz m'ungdöxyijc.

³² Chi ajcxy yajnimay je Huindzin Jesús y'ayuc tüg'óciy pinjaty anajty jim ma je pujxtijc huindzin ytijc. ³³ Mijcutz je pujxtijc huindzin puji je Pablo ajcxy chaach'i'au, e chi je pujxtijc huindzin ñibejttay ajcxy miid y'ung ytoxyijc. ³⁴ Chi je pujxtijc huindzin yajnicxy Pablo etz Silas ma ytijc, yajcaay yaj'uucy ajcxy. Ooy anajty ajcxy yjotcujcity nidüg'óciy, com ti anajty mibijccixy Dios.

³⁵ Com jabom je mijtungmiidpi quejxy mutztungmiidpi jim ma pujxtijc huindzin miid cötujcin huen najtzmazzygixy Pablo etz Silas. ³⁶ Chi je pujxtijc huindzin nimay Pablo:

—Ti je tungmiidpi quexy cötujcin co jēbi nnajtzmazzyich miich ajcxy. Nicxcix jotcujc.

³⁷ Chi Pablo migapxy je mutztungmiidpi, e chi nimay:

—Romanojäy iich ajcxy. Yi cajtungmiidpi ti xyhuopyich miid matz mayjäy agujc, ni ca' jayijp ti xytyduñich, e ti xypidägyich pujxtigoty. ¿Nej co jadachambi xyñajtzmazzyhua'ñich ameechi? Ca' jadu'n y'óyity. Huen mijtungmiidpi ci'm miin xyajpidzimgixich iich ajcxy.

³⁸ Chi je mutztungmiidpi cijx nimiydactäy ma mijtungmiidpi tüg'óciy Pablo y'ayuc. Chi ajcxy ñay'adzigiyi co nejhuiy co Pablo etz Silas hue' je' anajty ajcxy romanojäy.

³⁹ Chi je mijtungmiidpi ñicxy ci'm oy capxjotcidägy je Pablo etz Silas. Chi yajpidzimy pujxtigoty, e pijctzoy may'ajt huen huingduum nicxcixni. ⁴⁰ Co Pablo etz Silas ypujxtijcpidzimy, chi ajcxy ñicxy ma Lidia ytijc. Jim ajcxy jadu'n ijxy mibijcpidijc, e jot'amijmoy ajcxy. Chi ñicxcixni.

17

Jim Tesalónica yjajti ooy capxy ayuc, ca' nay'ayuc-huinjihuiñ

¹ Pablo etz Silas ajcxy ñajxy Anfípolis, etz Apolonia, chi ajcxy yja'ty Tesalónica. Jim anajty judíojäy ajcxy tüg ñaymujctac. ² Com jadu'n anajty costumbre miidity, Pablo nicxp anajty ma judíojäy ajcxy ñaymujctac sábado xii. E tugiig sábado xii jim capxy miydacy miid je' jim Tesalónica. ³ Hue' anajty miid miydaaccixy jadu'n nej jaybecyity ma Dios ñecy co Cristo copicy ayo'n yajnaxtahuip, e chi y'ögipy, huin'it yjugypigipy. Chi Pablo yminañ:

—Je Jesús huidibi y'ayuc ngapxhuäcxibich, je' je' je Cristo.

⁴ Nijējity judíojäy ymibijc ajcxy e mijyöybejty ajcxy Pablo etz Silas. Nañ jadu'n may griegojäy huidi anajty Dios yajmij'ajtp, etz maytöxyjäydijc huidijaty oy ymijpidacni ymijnicxpejt etz mibijc ajcxy Pablo etz Silas y'ayuc. ⁵ Je judíojäy huidi anajty ca' ymibicy, yjotmätcoty ajcxy. Huomujcy ajcxy amügy jäydijc etz jibic jäydijc, etz naax cajp yajmättay, anejptuuti agojxtuuti ajcxy Jasón ytijc'aguu tzach'ixtaaygixy Pablo etz Silas. ⁶ E co ca' ajcxy paty Pablo etz Silas, chi ajcxy majch Jasón etz jacjadyii mibijcpidijc. Adzip ajcxy yajnicxy pahuijch pajugujcy ajcxy jim ma cajp tungmiidpi. Yam chachminaangixy mic:

—Jada jäy ajcxy je' huidi tzachyajhuinma'ñyidigooyb tüg'óciy naax cajp, nañ iyabaad ajcxy ti ymiingixy. ⁷ Jada Jasón ti Pablo etz Silas jim yajjättägy ma ytijc, tüg'óciy ajcxy miiddzip'adyii je César huidi ane'mb, yminaangixy co ji jadüg rey, je' je' je Jesús.

⁸ Co jadu'n midoy, chi ajcxy ooy yajyumigy yaj'oxigy cajpjäy etz je tungmiidpi ajcxy.

⁹ Chi Jasón etz ymigtigtijc yajmeeñeyjcy, chi najtzmazzyy ajcxy.

Pablo etz Silas jim Berea

¹⁰ Co oy ycodzy mic'amy yi mibijcpidijc yajpidzimy ajcxy cajpjoty Pablo etz Silas, e quejxy ajcxy jim Berea. Co ajcxy jim yja'ty, chi ajcxy ñicxy ma judíojäy ñaymujctac. ¹¹ Jim

Berea judíoꝝäy ajcxy yjacmiid oyjot oyhuinma'ñ, ca'ydi judíoꝝäy ajcxy jim Tesalónica. Je Berea jäy ajcxy ycöbije ajcxy Jesús y'ayuc ymiid oyjot oyhuinma'ñ. Jabom jabom ixtaaygixy ma yjaybetyity ma Dios y'ayuc pen janch jadu'n ymina'ñ nej Pablo yaj'ixpicy. ¹² May judíoꝝäy ymibijcy etz may griegoꝝäy huidibi ooy ymijpidaacni nañ jadu'n ymibijcy, töxyjäydijc etz yëydijctijc. ¹³ Co yi judíoꝝäy jim Tesalónica nejhuüy co Pablo nañ jadu'n Dios y'ayuc capxhuäcxi jim Berea, chi ajcxy jim ñicxy, etz yajyumigy yaj'oxigy je cajp jäy ajcxy. ¹⁴ Mic'amy ajcxy, je mijpidaacpi Jesús, yquejx Pablo mic'amy, huen nicxy jim ma mejypa'. Chi Timoteo etz Silas yjac-hui'my ajcxy jim Berea. ¹⁵ Je huidibi ajcxy Pablo jaymiid'ajt ymiidnicxy, miid ñicxy ajcxy ixti cooni yja'ty jim Atenas. Huin'it ajcxy yhuimbijty miid tüg ayuc co huen Timoteo etz Silas nicxy minaybadyii Pablo jim Atenas janch mic'amy.

Pablo jim Atenas ahuijxy Silas etz Timoteo

¹⁶ Co anajty Pablo ahuijxy je Silas etz Timoteo jim Atenas, ooy anajty ytajy ymay co ijxy nejhuüy co je cajp miid ooy may quipychech, tzaadzech, etz oori oyduñ huidi ajcxy dios'ajtpy. ¹⁷ Paady Pablo nimiydacy Jesús ma yi judíoꝝäy ñaymujctac miid je judíoꝝäy etz jacjadyii jäy huidi Dios miyaaxp ojadajtp. E jabom jabom miid miydaaccixy pinjaty y'oymujcp cajp cujc. ¹⁸ Nijëjity ixpicytijc ñay'ijxquixigixy y'ixpicin miid Pablo. Jim huidibi ni'ixpigiyb epicúreo ixpicin, etz cham huidi ni'ixpigiyb estoico ixpicin. Chi ajcxy nijëjity yminaangixy:

—¿Ti jada jada' ajt xyajniimaayim jada yëydijc capxymaaybi?

Chi jadyii yminaangixy:

—Hue' jada ycapxhuäcxyp huingbi dios y'ayuc.

Jadu'n ajcxy yminañ co Pablo nimiydacy Jesús etz jadu'n nej jäy yjugypicy huidijaty ti y'öccixyp. ¹⁹ Chi ajcxy miidnicxy Pablo ma je it ma je ixpicytijc ñaymugyii huidi anajty yxi Areópago, chi ajcxy Pablo nimay:

—¿Nej jëbi njäjtciich jada jemybi ixpicin huidi miich mmimimb? ²⁰ Com ti ñich miich xyajniimaaygich ayuc ca'pi yhuinjihuüyñity, e nejhuíhuaamyich ajcxy nej yhuimbizim tüg'óciy jada ayuc.

²¹ Tüg'óciy Atenas jäy etz nañ jadu'n huidi ajcxy jim adzinaayb, ca' anajty ni ti tungixy, jëyi nigoobi amido'ijtcixy etz miydaaccixy jemybi ayuc tiy'ajt.

²² Huin'it Pablo ytinayigy mayjäy agujc jim Areópago, e yminañ:

—Atenas jäy, n'ijxypich co miich ajcxy ooy myajmij'ajtcixy canaagnax huidibi miich ajcxy mdios'ajtpy. ²³ Com ti xii ya n'ixyich canaagnax huidi ajcxy m'ojadajtpy, chi ti nbaatyich tüg altar ma jadu'n yjaayity: “Je Dios huidi ca' pin ix'y'adyii.” Je Dios huidi miich ajcxy m'ojadajtpy, e ca' ajcxy m'ixy'adyii, jada je' huidi nyajniimaayb ajcxy.

²⁴ Je Dios huidi oyduñ naaxhuiñybi etz tzajp etz jac tijaty, yi' je' nihuindzin'ajttayb tüg'óciy. Je Dios ca' chinäy ma tzajptijc huidi jäy ajcxy cojpy. ²⁵ Dios ca' ni ti yajtigoy'ity huidi naaxhuiñyjäy jamöhuaanip. Dios yi' yejcp jugy'ajtin etz huidibi nxejim, etz tüg'óciy tijaty.

²⁶ E tügpi ni'py tügpi jot ti yaj'oyy tüg'óciy yi jäy, jigix huen tzinaaygixy huindu'my naaxhuiñ. Dios tiy'ajt yejcp nej xii tiempo yöyipy, e ma jäy jëbi huaad chinaaygixy, ²⁷ jigix ixtaaygixipy Dios, jadu'n nej jihuüy ixtaaygixy tondäy xajtäy, com ca' je' jiguemity ma ñich ajt nidüg nidüg. ²⁸ Dios ycixpi ñich ajt ndzinaayim nyücxim etz nji'ajtim, com jadu'n minañ miich ajcxy mboeta, huidibi ñy yajcojp: “Dios ñich ajt xy'ung'ajtim xy'anäg'ajtim.” ²⁹ Pen Dios ñich ajt xy'ap'ajt xy'oc'ajtim ca' huaad nhuinma'ñ nbidaacim co Dios yjadu'ñity nej oori oyduñ, plata oyduñ, etz tzaadzech quipychech huidi jäy ti yaj'oyy miid yci'mhuinma'ñ. ³⁰ Dios ca' miidity jotcöduuyb je jäy chuuhuinma'ñ tiibi ñajxni. Jadachambi ane'mb Dios hueñytimma'amyity huen jäy ajcxy jothuimbijtcixy. ³¹ Com ti Dios yajnihuinmayy tüg xii mina tiyduna'ñ yi naaxhuiñybi jäy miid je yëydijc huidibi ti huin'ixy, jada tiy'ajt Dios ti yaj'ixy yajnejhuüy tüg'óciy jäy co ti yajjugypicy Jesús co y'o'cy.

³² Co ajcxy jadu'n midoy co yi öcpi yjugypigipy, chi nijëjity ytigiy nixiicpi yajxiicpi. Chi jacjadyii yminaangixy:

—Huaad ñich ajcxy n'amido'idipyich miich m'ayuc mina anajty jadüg'oc.

³³ Chi Pablo jim chooni ma je' anajty ajcxy. ³⁴ Chi nijëjity jäy ypadzooni huidi anajty ti mibicy Pablo y'ayuc. Ma je' ajcxy jim anajty tüg jäy huidibi anajty yxi Dionisio, yi' je' anajty tungmiid jim Areópago. Nañ jadu'n tüg töxyjäy huidi anajty yxi Dámaris ypadzooni, etz jacjadyii jäy.

18

Chi Pablo ñicxy jim Corinto

¹ Co jada jadu'n ytuni yjati, chi Pablo chooni jim Atenas, ñicxi jim Corinto. ² Jim minaybaati tüg judíojäy huidi anajty yxi Aquila, Ponto anajty ycogajpity, namja'tni anajty miid ytöxyjic Priscila. Jim anajty ti chongixy Italia ñaaxjot, jëgixpi co je mij'ane'mbi, Claudio, pidacy cötujcin co huen tüg'óciy judíojäy pidzimdaaygixy jim Roma. Chi Pablo oy cogapxiy Aquila. ³ Aquila etz Priscila ytung'ajtpy anajty cochactijcxuyii, com nañ cochactijcxuuyb anajty Pablo, paady Pablo jim yhui'my miid je' ajcxy. Chi ajcxy tú'ciy ytuuñ. ⁴ Tüg tüg sábado xii Pablo ñicxy ma je judíojäy ajcxy ñaymujctac yajmiidmiydaaccixy Jesús y'ayuc ytiy'ajt etz capxjotcidaaccixy judíojäy etz nañ huidi ca' yjudíojäyity.

⁵ Co ajcxy Silas etz Timoteo yja'ty jim Corinto, choon ajcxy Macedonia, chi Pablo adügijp ytiigiy ayuccapxhuäcxpi ma judíojäy ajcxy co Jesús je' je' je Cristo huidi je' ajcxy chach'ahuijxyp. ⁶ E je judíojäy ajcxy ytiigiy jotma'tpi, tzipcapxpi ahua'ngapxpi. Chi Pablo yhuit huinxijty, je' je' je tiy'ajt co puyöydüdaani ajcxy, e chi Pablo yminañ:

—Miich ajcxy miid mgi'mbocy ajcxy myajtigoya'ñ yi m'alma. ñich ca' ti pocy nmíididyich ma miich ajcxy. Cham nicxy Dios y'ayuc ngapxhuäcxich ma huidi ca' yjudíojäyity ajcxy.

⁷ Chi Pablo yöybojtni ma judíojäy naymujctac, chi ñicxy ma Justo ytijc. Justo ooy anajty Dios miyäxy ojadaty, e ymiid anajty ytijc mihuingon je judíojäy ñaymujctac. ⁸ E Crispo, je judíojäy ñaymujctac huindzin, ymibijc je' je Huindzin Jesús y'ayuc ytiy'ajt, miid tüg'óciy y'ung y'anäg, yjuugy ymígüg. Nañ jadu'n nijëjity Corinto jäy co midoy Jesús y'ayuc, chi mibijcy e ñiibejty ajcxy. ⁹ Chi je Huindzin Dios nimay Pablo cumäyjoty:

—Ca' mdzigí, capxhuäcx'aditz n'ayucich, e ca' mni'amoñ. ¹⁰ Com ñich miich nbubedipy, ca' pin jot miid'adipy nicxy nejaty xytuñy. ñich may ñich ya nmíidity jäy ma jada cajp.

¹¹ Chi Pablo yhui'my jim Corinto tüg jimijt jacup, yaj'ixpijcy jäy je Huindzin Dios y'ayuc ytiy'ajt.

¹² Huin'it tiempo co Galión ygobernador'ajty jim Acaya ñaaxjot, chi judíojäy ajcxy midziptzoñ je Pablo, yajnicxy ajcxy ma cötujctac. ¹³ Chi ajcxy nimay je gobernador:

—Jada yöydijc tzach jäy yaj'ixpijcp co ca' ycopicyity yajcuydunipy Moisés ycötujcin huidi jaybety ijtp.

¹⁴ Pablo capxamb anajty co oy yi Galión nimay ajcxy je judíojäy:

—Pen yi Pablo ti ytundigooy o mijpocy ti tuñ, huin'it nmijpidägibich miich ajcxy m'ayuc, miich ajcxy judíojäy. ¹⁵ Pen je Cristo y'ayuc etz miich ajcxy mgötujcin myajtzibiiyb myajcapxyiiyb, ca' ñich huaad nyajtigiyiyich yjiibi huinma'ñ.

¹⁶ Chi je gobernador y'ané'min pidacy co huen judíojäy ajcxy yajpidzimdäyii ma je cötujctac. ¹⁷ Huin'it tüg'óciy griegojäy ma je cötujctac huijtzpidziimyb je Sóstenes, yi judíojäy naymujctac huindzin, e chi ajcxy cujy jibijpy huingojxy jijpcojxy ma gobernador yhuinduu, e Galión ca' tuñcuenti.

Pablo yhuimbijtni Antioquía, e yajtzondacy midugiigpi viaje

¹⁸ Jac-huäcxijp Pablo jecy jim Corinto. Chi yhuinma'ñypidacy co chonaani. Chi ycapxycijxni miid je mibijcpidijc, e chi ybarcotigiiyiñi ñicxni jim Siria ñaaxjot. Ñicxni

quipxyi miid Priscila etz Aquila. Jim Cencrea, ca'ni anajty ybarcotigiyyi, Pablo yajcöme'px cödza'm co anajty cuyduñ yhuandaacin. ¹⁹ Co ajcxy yja'ty jim Efeso, chi Pablo ñay'ixmajtz ajcxy miid Priscila etz Aquila, e ñicxy ma je judíojäy ajcxy ñaymujctac. Chi miidmiydacy je judíojäy ajcxy huidi jim anajty ti ñayyöymújciigixy. ²⁰ Chi je judíojäy ajcxy jim Efeso cohuaniiy co huen jac-hui'my, e Pablo ca' a'ixiiy co yhui'mipy. ²¹ Chi Pablo ycapxycijxni miid je Efeso jäy, chi yminañ:

—Copicy co jim xii nyajnaxa'ñyich Jerusalén, e nhuimbidipyich jadüg'oc ma miich ajcxy, pen Dios jadu'n tzojcp.

Chi Pablo ybarcotigiyyi chooni jim Efeso. ²² Co anajty ti ypättigiy jim Cesarea, Pablo nicxy Jerusalén co anajty capxpoxaangixy je mibijcpidijc, chi mic'amy idacni jim Antioquía. ²³ Jim hueeni yhuäcxijpy, chi choñ jadüg'oc ñicxy cajp cajp ma Galacia ñaaxjot etz Frigia ñaaxjot jotmicmigapxcixy tüg'óciy yi mibijcpidijc.

Apolos Dios y'ayuc capxhuäcxí jim Efeso

²⁴ Huin'it tiempo yja'ty jim Efeso tüg jäy huidi anajty yxii Apolos, hue' anajty ycocájpity Alejandría. Ooy anajty oy ayuc capxhuäcxí. E yajxon nejhuüydäy Dios y'ayuc huidi jaybety ijtp. ²⁵ Apolos ooy anajty ixpicyity ma Huindzin Jesús y'ayuc e ooy yjotmiccapxy, oy anajty yaj'ixpicy nej je Huindzin Jesús yjajty y'ayoy. Oy jëda'ajty anajty janehuüy nej Juan, je Bautista, jäy ajcxy yajniibejty. ²⁶ Chi Apolos ytigiiy capxpi miydaacpi ma je judíojäy ajcxy ñaymujctac janch ni ca' chigiy chöyduñ. Chi co Priscila etz Aquila ajcxy midooy Apolos y'ayuc, chi ajcxy yajnicxy ahuingujc, chi ajcxy oy yajmiidmiydägy jac-huädz Dios y'ayuc ytiy'ajt. ²⁷ Chi co Apolos anajty ñicxa'ñ jim Acaya ñaaxjot, chi je mibijcpidijc jotmicmigapxy, e pubejty ajcxy. Chi ajcxy nijayiiy je mibijcpidijc huidi ajcxy jim Acaya, huen ajcxy cöbigipy yajxon je Apolos. Co Apolos yja'ty jim Acaya ñaaxjot, chi ypubejti ooy pin anajty mibijcp Jesús y'ayuc, com Dios anajty may'ajt ti tuñ ma je' ajcxy. ²⁸ Chi je Apolos oy capxpizimiy mayjäy agujc co ca' yjanchity nej anajty ajcxy judíojäy yhuinma'ñ miidity, co Jesús ca' je' yjējity je Cristo. Je Apolos jim je' mic'ajt tzachpaady ma Dios y'ayuc ycojaayity co Jesús je' je' anajty je Cristo huidi anajty ajcxy y'ahuijxyp.

19

Pablo may mibijcpidijc minaybaati jim Efeso

¹ Jim Corinto anajty Apolos, co Pablo tegyi'm yajyöyñajxy mijyuugjot, chi oy yja'ty jim Efeso. Chi jim paty may mibijcpidijc. ² Chi Pablo y'amidooy je mibijcpidijc:

—¿Nej ti xy'adigiyy xyjottigiyy je Espíritu Santo taab ajcxy mmibijcy Jesús?

Chi ajcxy y'adzohuimbijty:

—Ni ngamidooyñi iich ajcxy pen ji Espíritu Santo.

³ Chi Pablo y'amidooy ajcxy:

—¿Ti niibejtin miich ajcxy mbaad?

Chi je' ajcxy y'adzooy:

—Je Juan, je Bautista, niibejtin.

⁴ Chi Pablo yminañ:

—Juan jäy yajniibejt je', je' je' je tiy'ajt co huen jothuimbijtcixy. E nimaaygixy anajty co huen ajcxy mibigipy je Cristo huidi jacmiinamni. Je' je' je Jesús, je Cristo.

⁵ Co jada ajcxy jadu'n midoy, chi ajcxy oy niibety miid je Huindzin Jesús yxii. ⁶ E co Pablo cñixajy ajcxy, huin'it je Espíritu Santo y'adigiy yjottigiy ajcxy. Chi ajcxy ytigiiy capxpi miydaacpi tigachyaty ayuc, e capxhuäcxí anajty ajcxy Dios y'ayuc. ⁷ Jëyi anajty nimajmetz yëydijctijc huidibi ajcxy niibejt.

⁸ Tugiig po' Pablo jim yhuäcxijpy, e yöydib anajty ma judíojäy ajcxy ñaymujctac capxhuäcxí Dios ytiy'ajt janch huinmic jotmic. Chi capxjotcidägy mayjäy miid Dios ytiy'ajt. ⁹ Nijējity jotjuuñydijc ca' ajcxy ymibijcy, jëyi ajcxy jibic tzachnigapxy Jesús ytiy'ajt ma jäy ajcxy yhuinduu. Chi Pablo puyöydúutcixni. Chi abicy yajnicxy je

mibijcpidijc ma tüg escueltijc. Hue' je' je escuela huindzin anajty yxii Tirano, e jim Pablo Dios y'ayuc anajty capxhuäcxi jabom jabom. ¹⁰ Mejtz jimijt jadu'n jim chachyaj'ixpijcy, e tüg'óciy jäy ma je Asia ñaaxjot ymidoday ajcxy je Huindzin Jesús y'ayuc, je judíojäy etz huidi ca' yjudíojäyity. ¹¹ E Pablo mayba'mjäy yajtzoocy miid Dios ymic'ajt etz ooy mijhuinma'ñ ytuñ. ¹² Ixti yajnicxy anajty ajcxy yhuít etz ypaayi huidi Pablo ñini'cx anajty ti ypadyii, e yajpaatcixy anajty pa'mjäy, e je' anajty miid chooccixy, e nañ je' anajty miid ca'oybi ypidzimy ma jäy ajcxy y'ay yjot.

¹³ Chi nijjëjty judíojäy huidi anajty huidijtp tzozydumbi, huidibi anajty yajpidzimgixyp ajcxy ca'oybi, jayajtzögañ tüg pa'mjäy miid je Huindzin Jesús yxii co huen yajyödüdyii je ca'oybi. Chi ajcxy nimaygixy je ca'oybi:

—ñich miich yam nimaayb miid Jesús yxii, je huidi Pablo ycapxhuäcxp, yajyöydüt jada jäy.

¹⁴ Jadu'n anajty y'idüitcixy je Esceva ymang ajcxy, je nihiuxtujcpi ajcxy. Je Esceva hue' je' anajty judíojäy etz nihiuindzin'aty teedy'adii. ¹⁵ Co je Esceva ymang ajcxy migapx je ca'oybi, chi je ca'oybi y'adzooy:

—N'ix'atypich je Jesús, e nnejhuiybich pin je' Pablo, e miich ajcxy, ¿mbin miich ajcxy?

¹⁶ Chi je yëydijc huidi ca'oybi anajty miid, ytiijcpigüy tüg ma je' ajcxy, ymimadactay je nihiuxtujcpi, e yqueectay ajcxy ma je tijc nihuädz ixhuädz etz tzaachí. ¹⁷ Tüg'óciy jäy ajcxy huidi anajty tzinaayb jim Efeso, judíojäy etz huidi ca' yjudíojäyity nejhuiyday ajcxy, chi ooy ajcxy chigiy e nimiyaaccixy e cömaaygixy je Huindzin Jesús yxii.

¹⁸ E mayjäy huidi mibijc Jesús y'ayuc ooy ajcxy ypocy nigapxtay, jadu'n nej anajty yi jibic mañ'ajt ajcxy ti mi'ijtcixy. ¹⁹ E mayjäy tiibi anajty capxy je mañ'ajt necy yajminday tüg'óciy e no'ctay je necy ma jäy ajcxy yhuinduu. E co ajcxy maymujcy je libro tzou, chi naybaati jada' huixchiguipx majc mil plata meñ (moneda mexicana naybaati jacnaxy jahueenjaty ycatüg migo'px jamajcmocx tüg mil). ²⁰ E je Huindzin Jesús y'ayuc nigü anajty yhuäcx'idich, nigü ymijtigiy'idich.

²¹ Co anajty jadu'n ti ytuñyii ti yjadyii, chi Pablo yhuinma'ñypidacy co nicxy cogapxihua'ñ je mibijcpidijc jim Macedonia etz Acaya. Chi anajty yjacnicxa'ñ Jerusalén e jadu'n yminañ co jim chondäga'ñ jadügtecy e ñicxa'ñ jim Roma. ²² Chi quejxy jim Macedonia mejtz je ypubejtpi, Timoteo etz Erasto. Chi Pablo je' yjac-hui'my jecy jim Asia.

Canay'ayuc-huinjihuñhuñ jim Efeso miid Dios y'ayuc ycixpi

²³ Huin'it tiempo tzip oy pidicni jäy y'ocyumigni y'oc'oxigni miid Huindzin Jesús y'ayuc ycixpi. ²⁴ Co je', je plateri huidi anajty yxii Demetrio, yaj'oyiy anajty ac plata Diana chajptijc'ung, e jadu'n anajty Demetrio etz jacjadyii jäy oy ymeeñybaatcixy miid je ytung. ²⁵ Chi Demetrio huomujcy ymigügtijc je huidi jadu'mbi tung tumb, nimay ajcxy:

—Migügtijc, mnejhuiyb ajcxy co miid jadayaabi tung huidi ñich ajt nduunim, jada miid jotcujc ndzinaayim njugy'ajtim. ²⁶ E miich ajcxy m'ijxpy mnejhuiyb co je Pablo chach yaj'ixpijcy co ca' yi' diosity huidi jäy ajcxy yajcojpy. E Pablo ti ooy mayjäy capxjotcidägy, canan yaayi Efeso, nañ jadu'n ma tüg'óciy Asia naaxjot. ²⁷ Mij jada xyajtigoyaanim ma ñich ajt n'adogii e nañ jadu'n je mijpi dios, je Diana, ytigoyipy, ca' ni pin occapxpaatnipy, je huidi cham mayjäy y'ojadajtpy tüg'óciy ya Asia ñaaxjot etz huindu'my naaxhuiñybi.

²⁸ Co jadu'n ajcxy midoy, chi ajcxy ooy yjotmätcooty, chi ytiigiy ajcxy huambi jihuiyb, chachminaangixy:

—¿Cömay jada Diana, yi efesiojäy ydiosal!

²⁹ Chi ajcxy yajhuinmañydgoyday je cajp jäy e majch ajcxy je Gayo etz Aristarco, huidi tzoon Macedonia, metz yëydijc, huidi Pablo anajty ajcxy ymiid huidijtpy. Chi je cajpjäy ooy pahuijch pajugujcy ajcxy je Gayo etz Aristarco, yajnicxy ajcxy ma agujctijc huinduu ma jäy ñaymugyii. ³⁰ Chi Pablo yjatigihuaañ jäy agujc, miidcapxa'ñ miidmiydäga'ñ anajty je mayjäy. E je mibijcpidijc ca' ajcxy a'ixiiy nicxy jiiby ytiigiy. ³¹ Nañ jadu'n

nijëjity Asia mijtungmiidpi huïdi anajty Pablo miid ñaymigüg'adyii, yajniguejxy ayuc, co ca' huaad ñicxy ma jäy ñaymújcigixy. ³² Je mayjäy tügmucy anajty íjtcixy, ooy anajty yhuaangixy yjihuiygixy, ca' anajty ajcxy ñay'ayuc-huinjihuiygixy. E je jacmaaybi ni ca' anajty nejhuiygixy ti co chachnaymújcigixy. ³³ Nijëjity jäy huïdibi anajty ajcxy mayjäy agujc, je ajcxy yajmiidmiydactay je Alejandro ti anajty tuunip jajtíp. Chi je judío jäy ajcxy tijpidzimy je Alejandro ma mayjäy agujc. Chi Alejandro címíid tiy'ajt yejcy co huen amongixy. Je' anajty ñigapxtúdamy judíojäy ajcxy. ³⁴ Co je mayjäy nejhuiy co je' je' yjudíojäyity, chi ajcxy ytigiïy huaambi jihuiybi jahuenjaty ycamejtzhority, ymínaangixy:

—¡Cömay ooy yi Diana, yi Efeso jäy ydiosal!

³⁵ Chi je cajp jaaybi co anajty je jäy ti yaj'amoongixy hueeni, chi ajcxy nimay:

—Efeso jäy, tüg'óciy yi naaxhuiñyjäy nejhuiy co jada Efeso cajp yi' cuend'ajtp yi Diana chajptijc, je' Diana huïdi ooy ti yajcömay, etz yi Diana ñinicx huïdi cá'u tzajpcíxy. ³⁶ Ca' huaad ni pin ymína'ñ co ca' yjáncity. Amongix, ca' ti mdúngxixipy pen ca' jayjip yajxon mhuinmaaygixy. ³⁷ Com jada yéydijc ajcxy tiibi myajmiingixy, ca' ma ytundigooygixy, ca' yi' ma ajcxy jibic capxcixy ma miich ajcxy mdiosa Diana. ³⁸ Pen Demetrio etz huïdijaty miid ytuñ pen ymiid xihuïn miid pinjaty, paady tungmiidpi etz tiydundac jiiity. Jëbi nigapxy ma tungmiidpi, jëbi miñ xyipy ñayñigapxtúutigixy. ³⁹ E pen huingbi ayuc huïdi miich ajcxy mbijctzooyb, copity jada y'oyíhuipy ma jäy naymugyii. ⁴⁰ Ymiid jada ayo'n co nicxy nayyajxíhuim co jäy cham ñaymíhuïdidyii miid jada ycixpi nej yam ytunyii yjadyii e ni ti tiy'ajt íich ajt nganejhuiyim nej nmínaaním pen ji anajty xyaj'amídoohuim miid co jäy cham chachhuaangixy chachjihuiygixy.

⁴¹ Co jadu'n miydactay, chi ycapxycijxy miid je naymujcpidijc.

20

Pablo ñicxy jim Macedonia etz Grecia

¹ Co je cajp jäy ycapxy'ayuc xeemy, chi Pablo huoomujcy je mibijcpidijc, e jaccapxhuijy ajcxy chi ycapxycijxni, chi chooni Efeso ñicxy jim Macedonia ñaaxjot. ² Cajp cajp Pablo oy co'ixiy je mibijcpidijc jaccapxhuijy ajcxy. Chi Pablo yja'ty jim Grecia ñaaxjot. ³ Chi Pablo yhuäcxijpy jim tugiig po'. Jim Grecia Pablo anajty ybarcotigíhua'ñ ñicxa'ñ Siria. Co Pablo oy nejhuiy co judíojäy ajcxy ti yajnihuinmayiyii yaj'öga'ñyii barcojoty, chi yhuinma'ñybaty co huimbida'ñ tegy'm, ñaxa'ñ jadüg'oc Macedonia. ⁴ Pablo mayjäy miid ñicxy, miidnicxy je Sópater huïdi anajty cogajp Berea, etz Aristarco, etz Segundo huïdi anajty cogajp Tesalónica, etz Gayo huïdi anajty cogajp Derbe, etz Timoteo, etz nañ jadu'n Tíquico, etz Trófimo huïdi tsoon jim Asia ñaaxjot. ⁵ Co jada mibijcpidijc ajcxy ñicxy jayjip, chi ajcxy xy'ahuijxyich jim ma je cajp huïdi xii Troas. ⁶ Co xii ñajxtay mína yajcaay je tzajcaagy je huïdi ca' miidity levadura, chi íich ajcxy ndzooni jim Filipos barcojoty. Co migoox xíini, oy íich ajcxy naybáatigixy jim Troas. Jim íich ajcxy yhuäcxijpy huixtujc xii.

Pablo co'ixiy je mibijcpidijc jim Troas

⁷ Domingo xii ajcxy ñayyöymujci je mibijcpidijc chajcaagy ytujc-huäcxaangixy, e Pablo anajty ymigügtijc yjacyaj'ixpijcpy. Je' co anajty com jabom chonaani, paady oy ayuc jacyajyón ixti ycuyc-hua'cxchumiïy. ⁸ Jiiby anajty canaag lámpara ytíicxy ma ajcxy anajty ti yöymujccixy ma tüg cuarto huïdi anajty oy ycixity. ⁹ E tüg yeeg'anäg huïdi anajty yxii Eutico, ma ventana aguu anajty y'íñäy. Com Pablo jecy oy yaj'ixpijcy, chi je yeeg'anäg ymäymajtzi, e tugiig níhuïjtzpety anajty ycixity je tijc ma ycäy. Chi ajcxy yajpidígy ögy. ¹⁰ Co Pablo ymínajcy, chi ñaygíxnajaji amíneenmujcy je yeeg'anäg huïdi anajty ti ycäy. Chi Pablo nimay ymigügtijc:

—Ca' mdzigíygixy, juugy jada.

¹¹ Chi Pablo jadüg'oc ypejty ma je cuarto cixpi, chi chajcaagy tujc-huäcxy e yajcaay ajcxy, e jadu'n Pablo yjacmiydacy co oy xiiimiïñ. Chi ycapxycijxni miid je' ajcxy, chi

ñicxni. ¹² E je yeeg'anäg huïdi anajty ti ycäy, chi ajcxy yajnicxy juugy, e ooy ajcxy yjotcugiy nidüg'óciy.

Choñ ajcxy Troas ñicxcixy Mileto

¹³ Chi ñich ajcxy jayijp nicxïgy barcojoty jim Asón co anajty jim nyajtzonáangixich Pablo, com ti anajty jadu'n miidnayñimáayigixich co je' tegyi'm anajty ñicxa'ñ. ¹⁴ Co ñich ajcxy naybaatti jim Asón, chi Pablo ybarcotigïy miid ñich ajcxy. Chi ñich ajcxy ñicxy jim Mitilene. ¹⁵ Chi ñich ajcxy jim ndzoñ, chi com jabom ñich ajcxy najxy mihuingon Quío, comaax ñich ajcxy nja'ty jim ma barco jättac huïdi anajty yxii Samos. Jim Trogilio ñich ajcxy nbocxy, com jabom ñich ajcxy nja'ty jim Mileto. ¹⁶ Chi Pablo ca' ñicxa'ñ jim Efeso co ca' yhuäcxiba'ñ jim Asia ñaaxjot, com tzojc anajty yjáda'ñ Jerusalén, com jim anajty yajnaxa'ñ Pentecostés xii.

Pablo yajmïidmiydacy je huïdibi ajcxy ane'mb je mïbijcpidïjc

¹⁷ Jim Mileto anajty Pablo, chi capxyñiguejxy huïdi ajcxy nigohuajc'ajtp je mïbijcpidïjc huïdi ajcxy jim Efeso. ¹⁸ E co ajcxy miiñ, chi Pablo ymïnañ:

—Miich ajcxy mnejhuiyb jadu'n nej ñich ti njä'yatyich ma miich ajcxy tüg'óciy je xii je tiempo nej oga'n nja'tyich ya Asia. ¹⁹ Jecy ñich ooy ti n'ityich miid miich ajcxy, nduñich ma nHuindzin Jesús ytung miid yung naxy njot nhuinma'ñich, etz miid huinni jotmay, etz ti may ayo'n nyajnaxyich ma yi judíojäy ajcxy. ²⁰ Ca' ti n'ixmachich je ngapx'ayuc huïdi oyip miid miich ajcxy ycixpi. Ti nyaj'ixpicyich mayjäy'agujc etz tijc tijc. ²¹ Ti ndiy'ajt yecyich ma judíojäy etz cham ma huïdi ca' yjudíojäyity. Nnimaydaayich co huen jothuimbijtcixy ma Dios, etz huen mïbijccixy ñich ajt nHuindzin Jesucristo. ²² Jadachambi nicxpich jim Jerusalén; adzip je Espíritu Santo xyquexyich e ni nganejhuiyich ti ñich jim xyjadamy. ²³ Co ñich cajp cajp ma nnicxyich, je Espíritu Santo xyajnejhuiybich co jim Jerusalén jäy ajcxy xypidäga'ñich pujxtigoty etz jim ajcxy xychaachytuna'ñich. ²⁴ Yi jadu'mbi ayuc ca' ñich nduñich cuendi, jada njugy'ajtich ca' ti tzoohuity. Jëyi janchtiy co nyajcixipyich jada tung jotcujc, e nguydunipyich je Huindzin Jesús y'ayuc, je tiibi xyajñibicyich jada tung. Ngapxhuäcxibich yi oybi Jesucristo y'ayuc ytiy'ajt jadu'n nej Dios may'ajt ti tuñ miid jäy ajcxy ycixpi.

²⁵ E jadachambi nnejhuiybich co miich ajcxy ma ti ngapxhuäcxych Dios y'ayuc, ca' miich ajcxy xy'ocjac'ïjxcixni jadügtecy. ²⁶ Paady cham nnimäyich miich ajcxy, ca' ni ti ngo'adzohuipyich miid miich ajcxy ycixpi. ²⁷ Com ti ngapxhuäcxych ma miich ajcxy tüg'óciy je Dios y'ayuc je Dios yhuinma'ñ. Ni ti ayuc ni ti ytiy'ajt ti ngacoyüchich ma miich ajcxy. ²⁸ Naycuend'ájtigixy ci'm etz cuend'ajtcixy tüg'óciy jäy ajcxy huïdi yajmij'ajtp je Huindzin Jesús, jadu'n ajcxy nipaady nej tügpicy cöbixy, etz miich ajcxy huïdi nigohuajc'ajtp je mïbijcpidïjc jadu'n miich ajcxy nipaady nej cöbixy cuend'ajtpi. Je Espíritu Santo ti xyajñibjccixy co mgüend'adipy ajcxy yi Jesús yjäy, huïdi ti cojuuy ajcxy ypocy miid yci'mni'py co y'o'cy.

²⁹ Chi Pablo yjacmïnañ:

—Nejhuiybich co ya ndzóonibich miinip huingbi jäy huïdi yajhuinma'nydigoyam mïbijcpidïjc, jadu'n nej ahua'n iyujc huïdi cöbixy tzüdzip. ³⁰ Ji ma miich ajcxy ji jäy yaj'ixpigam anii ma yjapadyii yaj'ixpigipy tiy'ajt oybi jigix yi mïbijcpidïjc ypanicxiyb. ³¹ Naygüend'ájtigix, mjäymedziyb ajcxy jadu'n nej ñich tugig jimijt ti nyaj'ixpicyich xïm tzuum jabom jabom, miid huinni jotmay ti nyaj'ixpiccixy miich ajcxy nidüg nidüg.

³² Jadachambi ñich, nmigügtjicich ajcxy, Dios miich ajcxy nyajpuhuanïyb, nyajmihui'maamyich miich ajcxy Dios y'ayuc jadu'n nej Dios ajt xychojcim xyjihuiyim. Ma Dios y'ayuc miich ajcxy mbaadipy mic'ajtp ma yi mïbjcïn, e mbaadipy ajcxy it lugar ma Dios quipxyi miid ajcxy nidüg'óciy tiibi yajhuäch yjot yhuinma'ñ. ³³ Ni ti ñich ti nga'adzocy, ni pin yhuit ymeeñ huïdibi n'ocjediybich. ³⁴ Miich ajcxy mnejhuiyb co ti nduñich, miid ngi'mgijich ci'm ti nnaymöyijich huïdi nyajmayajtpyich etz nañ jadu'n ti nbubetyich nmigügtjicich huïdi ñich anajty nmiid. ³⁵ ñich miich ajcxy ti nyajni'ixiygixy nej jëbi mdungixy, nej jëbi mbubéjtcixy migügtjic huïdi pa'm'ijtp, etz huïdi tijaty

yajmayajtp. Jäymedziñ ajcxy je Huindzin Dios y'ayuc co ymíñañ: “Jacjotcujc je' huídi yejcp, ca'ydi huídibi yajmooyb.”

³⁶ Co jadu'n ycapxtay, chi Pablo ycoxtinay'ahuiy miiid je' ajcxy, e mibijctzoy ajcxy Dios. ³⁷ Ytigiñy ajcxy yaaxpi nidüg'óciy, e mineeñ ajcxy Pablo etz tzücx. ³⁸ Ooy ajcxy jihuñy nej anajty ti ñimáayigixy ajcxy co ca' yjac'ixiñy ajcxy jadügtecy. Chi ajcxy oy najtzhuohuiy jim ma barco.

21

Pablo ñicxy jim Jerusalén

¹ Co ñich ajcxy ngapxycijxy miiid je mibijcpidijc, chi ñich ajcxy nbarcotigñy, tiñy nicxy ñich ajcxy jim Cos. Com jabom ndzooñich Cos nicxy ñich ajcxy jim Rodas. Chi ñich ajcxy ndzooñ Rodas nicx ñich ajcxy jim Pátara. ² Jim Pátara ñich ajcxy nbaaty tüg barco huídi anajty najxp Fenicia ñaaxjot. Jim ñich ajcxy nbarcotigñy jadüg'oc, chi ñich ajcxy nñicxni. ³ Chi ñich ajcxy mmij'ijxy Chipre je naax mejy'agujcpi, anajty'amy je' yhui'my. Jacnicxy ñich ajcxy Siria ñaaxjot, chi je barco ytigiñy ma yjättac jim Tiro co jim anajty chimydajc yajhuñma'ñ. ⁴ Jim ñich ajcxy nbaty jäy huídi anajty yajmij'ajtp Jesús, chi nmiiidhuäcxijpich ajcxy huixtujc xii. Je' ajcxy je Espíritu Santo yajnejhuiy co Pablo ayo'n pada'ñ Jerusalén, paady ajcxy nimay Pablo co ca' huaad jim ñicxy. ⁵ Co huixtujc xiñbi yca'pxy, chi ñich ajcxy ndzooni. E tüg'óciy mibijcpidijc miiid y'ung ytöxyijc oy xytüñijphuohuiyigixyich cajppa'. Jim ma mejypa' ngoxtinay'ahuiy ñich ajcxy, chi ñich ajcxy nmibijctzoy Dios. ⁶ Huin'it ñich ajcxy ngapxycijxni, chi nbarcotigñyñi ñich ajcxy e je mibijcpidijc yhuimbijtni ajcxy ma ytijc.

⁷ Co ñich ajcxy ndzooñ Tiro, chi nicxy ñich ajcxy Tolemaida. Jim ñich ajcxy ngapx-pocxich je huídi anajty ajcxy mijpidaacp Jesús, e nmiiidhui'my ñich ajcxy jim tüg xii. ⁸ Com jabom ñich ajcxy ndzooñ Tolemaida miiid Pablo etz pinjaty ñich ajcxy anajty nmiiid. Chi ñich ajcxy nja'ty jim Cesarea. E chi ñich ajcxy nicx ma Felipe ytijc, je huídibi anajty capxhuäcxxy Jesucristo ytij'ajt je oybi. Je' je' huídi tuun je nihuixtujcpi taabi ajcxy caayin uucin yajhuäcxxy jim Jerusalén oga'n. Chi ñich ajcxy nhui'my miiid je'. ⁹ Felipe midaax anajty ñiix miiidty, ca'ni anajty ajcxy ypijccixy. E je' ñiix ajcxy anajty Dios y'ayucnajtzcapxiñy. ¹⁰ Ti anajty ñich ajcxy jim nhuäcxipy canaag xii co oy yjaty tüg ayucnajtzcapxiñybi huídi anajty yxii Agabo, jim anajty ti chooñ Judea. ¹¹ Chi Agabo y'oy xycogapxiñyigixy ma ñich ajcxy njättac. Chi Agabo Pablo yhuin huijtzicci, e je' miiid ñaygixojtz ñaydecyxojtzi, chi ymíñañ:

—Je Espíritu Santo jadu'n minamb co jim Jerusalén jadu'n judíoñy ajcxy cixodza'ñ tecyxodza'ñ jada huin yhuindzin, e nañ cñyega'ñ ajcxy ma huídi ca' yjudíoñyity.

¹² Co jadu'n yajmidoy, ñich ajcxy etz je Cesarea jäy ngohuanñy ñich ajcxy Pablo co ca' huaad ñicxy jim Jerusalén. ¹³ Huin'it Pablo y'adzooy:

—¿Nej co myaaxcixy miiid ñich ycixpi? ¿Nej ñich miich ajcxy co njot nhuinma'ñ xyaj'amutzciñy? ñich nayyécibich miiid naygixodziñ naydecyxodziñ, nañ jébi n'ögibich jim Jerusalén miiid je Huindzin Jesús ycixpi.

¹⁴ Co ca' ñich ajcxy mimadacy nicxy nyajhuí'mgixyich Pablo, chi ñich ajcxy n'amooni, chi ñich ajcxy ñayñimaayi:

—Huen cuyduñ je Huindzin Jesús chojcin.

¹⁵ Co jadu'n yjajti, chi ñich ajcxy ndzonñ ni'ixiñy e chi ñich ajcxy nicxy jim Jerusalén. ¹⁶ Miiid nicxy ñich ajcxy nijjity mibijcpidijc huídi tsoon Cesarea, e nañ tsoon anajty tüg Chipre jäy huídi anajty yxii Mnasón, jecyñ anajty jijptigixyñi jada mibijcñ e je' ñich ajcxy nicxy xyajjättágaangixy.

Pablo oy cogapxiñy Jacobo

¹⁷ Co ñich ajcxy nja'ty jim Jerusalén, chi je mibijcpidijc ñich ajcxy xycöbijcxy janch jotcujc. ¹⁸ Com jabom ñich ajcxy nicxy miiid Pablo, y'oy ñich ajcxy ngogapxiñy Jacobo, e jim anajty tüg'óciy huídi nigohuajc'ajtp je mibijcpidijc. ¹⁹ Chi Pablo ymígügtijc capxpcxy,

e yajmüdmüydacy ti anajty Dios ti tuñ müd yi' ma yi jäy ajcxy huüdi ca' yjudíojäyity. ²⁰ Co ajcxy jadu'n midooy, chi ajcxy huin'üy jäymejch yi Dios, chi ajcxy Pablo nimay:

—Migüg Pablo, miich mnejhuiyb co ya canaag mil jäy ti mübicy Jesús, e yjactimmina'ñ ajcxy co copicy nguyduunim Moisés ycötüjcin je jecyip. ²¹ Ti ajcxy yajmüdmüydägyii co miich mdzachjäyyaj'ixpicy ma tüg'óciy judíojäy huüdi ajcxy jiguëgy adzinaayb co ca' huaad tuñycuenti Moisés ycötüjcin je jecyip, etz ca' ycopicyity co tiy'ajttüygixipy y'ung, etz ni ca' ycopicyity payöyipy iich ajt ngostumbre. ²² ¿Ti huaad nduunim? Jotmädam ajcxy co nejhuühuipy co ya miich ti mjäty. ²³ Hue' janchtiy jadu'n miich mdunipy: cha midaax yëydjic huüdi cuydunamy tüg huandaacin. ²⁴ Müdnicy je' ajcxy, nicx nayyajpocyñihuaatzi müd yi' ajcxy, e miich mgojuydayipy nej anajty ajcxy ypadyii je meeñydunüi. E chi ajcxy myajcöme'pxipy cödza'm, e jadu'n je jäy ajcxy huinjühüydähuipy co ca' yjanchity jadu'n nej xyñimüydaaccixy, jëyi co miich nañ jadu'n mguydun je Moisés ycötüjcin je jecyip. ²⁵ Huüdibi janchtiy jadu'n nej yi huüdibi ajcxy ca' yjudíojäyity, e ti mijpidaaccixy Jesús, ti iich yi' ajcxy nijayüygixich co ca' túngixipy cuenti jada jadu'mbi judíojäy ycostumbre. Je' janchtiy co ca' huaad tzützcixipy je tübi jäy yajhuindzigüy ídolos, ni ca' huaad jüxcixipy ni'py, etz ni ca' ajcxy tzüdzipy huüdi yo'c-huüdy ti y'ögy, etz ca' ajcxy huingbi töxyjäy migapxtigóoygixipy.

Chi ajcxy majch je Pablo ma Dios ytijc

²⁶ Chi Pablo müd nicxy je nimidaaxpi yëydjic, com jabom ajcxy nayyajpocyñihuaatzi ajcxy, chi ajcxy ytigüy ma Dios ytijc, e chi ajcxy ytiy'ajt yejcy ma judío teedy ti xii ycixa'ñ je nayyajpocyñihuaadzi, etz ti xii huindzigi'ñ iyujc cüyegaangixy nidüg nidüg.

²⁷ Ma anajty yca'pxaani je mihuixtujcxüibi nijëjity judíojäy, choon jim Asia, chi ajcxy ijxy Pablo ma Dios ytijc. Huin'it ajcxy je mayjäy majch Pablo, yajhuangoty yajjühüygoty, ²⁸ chi ajcxy yam chachminaangixy:

—¡Israel jäy ajcxy, pubejtcich iich ajcxy! Jada je' je yëydjic huüdi xi ya tzach nigapxp ni'oñiyb judíojäy ycostumbre, Moisés ycötüjcin, etz nDios ytijc. E jadüg nax ti yajtigüygixy griegojäy ma Dios ytijc, yajjibicüygixy jada it lugar huätzpi. (Com ca' ñigödúcyity nicxy griegojäy ytigüy ma Dios ytijc.)

²⁹ Paady anajty jadu'n yminaangixy je huüdi ajcxy majtz je Pablo, com co ijxy ajcxy Pablo müdhüidity cajpjoty je Trófimo, huüdi anajty cogajp Efeso. Hue' anajty tijcixy co Pablo ti müdtigüy Trófimo tzajtigoty.

³⁰ Tüg'óciy je cajpjäy yjotmätcottay, müñ ajcxy poyügy majch ajcxy je Pablo yajpidzimy tzajtigoty pahuijch pajugujcy. Chi ajcxy mic'amy agüy Dios ytijc. ³¹ Yaj'ögamyb anajty ajcxy Pablo. Chi je soldado huindzin ayuc midoy co tüg'óciy je cajp jäy ajcxy ti chachhuaangixy chachjuhüygixy. ³² Je soldado huindzin huodzonday ysoldado ajcxy, e chi ajcxy ñicxy poyügy ma je mayjäy yhuaangixy yjuhüygixy. Co je mayjäy ajcxy ijxy müñ soldado ajcxy müd yhuindzin, chi ajcxy ixmajch Pablo ca' ocjaccóxcixni. ³³ Co je soldado huindzin jim ja'ty, chi yajmajtz je Pablo, ni'anëmdiy co huen cüchochyii müd mejtz cadena. Chi yajtiy pin je' anajty, e ti ti tuñ. ³⁴ Chi je mayjäy ajcxy ytigüy huaambi juhüybi, e jadu'n je soldado huindzin ca' ni nej huinjühüy müd je ne'mbi. Chi ni'ane'mdiy co huen Pablo yajnicxyii ma cuartel. ³⁵ Co jim yja'ty ma cuartel pediydac, chi je soldado ajcxy cügy Pablo, co anajty je mayjäy chachjottigoyñáxcixy tzachyaj'ögaangixy anajty Pablo. ³⁶ Tüg'óciy je mayjäy pamiingixy axam je soldado ajcxy, yam chachminaangixy:

—¡Huen ögy!

Pablo ñaygohuaani ma je mayjäy

³⁷ Co anajty yajtigühua'nyii cuartel tigoty, chi Pablo migapxy je soldado huindzin müd griego ayuc, yminañ:

—¿Nej jëbi ii nmüdmüydägy tüg'aa metz'aaji?

Chi je soldado huindzin y'adzooy:

—¿Nej mjaity miich griego y'ayuc? ³⁸ ¿Nej ca' jada' miich jëjity je egipcio jäy huidi namni tzip yajpidicp, e huobidzimy midaax mil jäy yaj'öcpí, miid nicxy ajcxy jim migtigüduum?

³⁹ Chi Pablo nimay je soldado huindzin:

—Ich judíojäy ich, jim ngogápidyich Tarso, tüg mijcayp huidi yajpatpi jim Cilicia ñaaxjot. Tun may'ajt miñ mayjäy n'ocmigapxich.

⁴⁰ Co je soldado huindzin a'ixiyy, chi Pablo ytinay'ahuiyy ma je cuartel pedydac, e cimiid ytiy'ajt yecy co huen amoongixy. Co je mayjäy ajcxy y'amonday, chi migapxcoty miid hebreo ayuc ymiñañ:

22

¹ —Migügtijc etz mij'anäctijc, midoogixy jadu'n nej ich yam nnayñigapxtüdyii.

² Co je mayjäy ajcxy midoy co ymigápxigixy miid hebreo y'ayuc, chi ajcxy y'amonday, chi Pablo ymiñañ:

³ —Judíojäy ich. Jim Tarso nma'xung'ajtyich, Cilicia ñaaxjot. E ya Jerusalén ti nyeegyich. Ixpjicich ya ma Gamaliel, etz yajxon Gamaliel ti xyaj'ixpjicyich ajt nmij'ap nmijteedy ytiy'ajt etz ycötújcín. Njatyim nyajmij'ajtyich Dios jadu'n nej miich ajcxy Dios myajmij'ajtcixy cham. ⁴ Jecy ti n'ixhuidity ti nbahuidityich je jäy ajcxy huidi anajty mijpidaacp Jesús y'ayuc, nyaj'öctähuaamyich anajty, e nyajnicxyich anajty mach yëdyictijc etz töxyjädyic, nbidägyich anajty ajcxy pujxtigoty. ⁵ Je teedy migtungmiidpi etz tüg'óciy mij'anäctijc ymiid tiy'ajt, co ich ajcxy xymooyich cötujcín, e nnicxyich anajty jim Damasco ma nmigügtijcich yi judío jäy ajcxy. N'ixtäyich anajty je jäy ajcxy huidi Jesús y'ayuc mijpidaacp, madza'ñich anajty ajcxy, e nyajmiina'ñich anajty ajcxy ya Jerusalén huen yajtzaachytunggixy.

Pablo nimiydacy nej yjothuimbijty

⁶ Co ich anajty ndüyöyich mihuingon Damasco, cujc yxii anajty, chi janch timitiini ytiicxgy jühuidity jadu'n nej jiin ma ich, hue' anajty choon tzajpjoty. ⁷ Chi jim ngidaayich, huin'it nmidooyich tüg ayuc xyñimäyich: “Saulo, Saulo, ¿ti co xy-pahuidijttägyich?” ⁸ Huin'it n'amidooyich: “¿Mbin miich, Huindzin?” Chi xy'adzooyich: “Ich je' je Jesús je huidi cogajp jim Nazaret, je huidi miich mdzachpahuidijttacpy.” ⁹ Pijnaty ich anajty nmid y'ijx je' ajcxy je tiicxin, chi ajcxy ooy chigiiy, e ca' ajcxy huiñihuiyy je ayuc huidi anajty nmigapxyiijich. ¹⁰ Huin'it nnimaayich: “¿Ti jëbi nduñich, Huindzin?” Chi je Huindzin Jesús xy'adzooyich: “Pidig e yajyöy mdu', nicxy jim Damasco, jim myajnimähuiyyb tüg'óciy ti jëbi mduñ.” ¹¹ Je tiicxin hue' je' xy'ixmajchich huiintz. E chi je nmigügtijcich xyhujtzoonich ajcxy cígixy, xyajja'tyich ajcxy jim Damasco.

¹² Jim Damasco anajty chinäy tüg yëdyic huidi anajty yxii Ananías, je huidi anajty ooy cuyduñ Moisés ycötújcín je jécyip. E judíojäy ajcxy huidi jim tzinaayb ooy cömaaygixy co ooy y'oyjäyity. ¹³ Chi Ananías ymiñ ma njättaacich, e ytinay'ihuiyy ma ich nmijc, chi xyñimaayich: “Migüg Saulo, ijxigich jadüg'oc huinjemy.” Tim huin'ity n'ijxgyich. ¹⁴ Chi Ananías xyñimaayich: “Je Dios huidi ajt nmij'ap nmijteedy ojadajt, je' ti xyhuin'ixy jigix mnejhuñhuipy Dios yhuinma'ñ, etz m'ixipy je tudäcypí jäy, e mmidohuipy yci'm ayuc huidi ycapxy. ¹⁵ Dios ti xyhuin'ixy jigix nicxy mdiy'ajt yecy ma tüg'óciy naaxhuiñyjäy, etz mnimiydägyipy nej ti m'ixy ti mmidooy. ¹⁶ Jadachambi, ¿nej co mhüäcxipy? Pidig etz niibet. Mibijctzou Dios jigix mbocy ñihuädzipy.”

Pablo nimiydacy nej oy yajquexy ma je huidibi anajty ajcxy ca'p yjudíojäyity

¹⁷ Co nicxnich jadüg'oc Jerusalén, chi nnicxich ma Dios ytijc, oy Dios nmibijctzooyich. Chi ich jiiby tzajtigoty n'ixmañyiyich. ¹⁸ N'ijxyich je Huindzin Jesús e xyñimaayich: “Pidzim ya Jerusalén mic'amy, ca' je Jerusalén jäy ajcxy cöbigipy miich m'ayuc jadu'n nej xyñigapxa'ñich.” ¹⁹ Huin'it n'adzooyich: “Huindzin Jesús, yi jäy ajcxy ñejhuñyib co ich anajty nnicxich huen huidi judíojäy naymujctac n'ixtäyich yi jäy ajcxy huidi

miich m'ayuc xymibijcip, ti nbidägyich anajty ajcxy pujxtigoty, ooy iich ajcxy yi' ti ndzaachytuñ ti nga'oyduuñich. ²⁰ Co ajcxy yaj'ögy je Esteban, miich mdumbi, huidi miich m'ayuc xycapxhuäcxip, jim iich anajty nañ jadu'n yajpaady. E ooy njäygidacyich co ajcxy yaj'o'cy, ixti ngüend'ajtich je' ajcxy yjocxhuit huidi Esteban yaj'o'c." ²¹ Chi iich nHuindzin Jesús xyñimay: "Cham iich miich nguexy jiguëgy it ma yi jäy ajcxy huidi ca' yjudíojäyity."

Pablo, ma je comandante yci'am

²² E yabaad je mayjäy y'amido'ijty Pablo y'ayuc, chi ytiigiy ajcxy huambi jihuiybi chachminaangixy:

—¡Huen öc yjiibi yëydijc! ¡Ca' huaad yjactzinäy!

²³ Yam yhuaangixy yjihuiygixy, yam yjocxhuit tzachjengixy, etz naaxhuaay tzachyujc-huicixy. ²⁴ Chi je soldado huindzin ni'ane'mdiy co huen Pablo yajnicxyii cuartel tigoty, e ni'ane'mdiy co huen ci'adyii jigix nigapxip ti ti tuñ co je jäy ti ymibidigyii. ²⁵ Ti anajty ajcxy c'ixojtcixy, e chi anajty ajcxy tzaachytunaangixy co Pablo nimay je capitán huidi anajty huindy:

—¿Ti cötújcín miich ajcxy miid co mdzaachytuna'ñ tüg romanojäy, ni ca' ajcxy jayijp mdiyduñ?

²⁶ Co jadu'n midooy je capitán, chi ñicxy oy yajnimäy je comandante:

—Ixcim nej mduñ yi jäy, com hue' yi' romanojäy.

²⁷ Huin'it je comandante ymijhuägy ma je Pablo, chi y'amidooy:

—¿Nej janch co miich mromanojäyity?

Chi Pablo y'adzooy:

—Janch.

²⁸ Huin'it je comandante nimay Pablo:

—Meeñygyxy iich jada nbaaty co naydijyijich romanojäy.

E chi Pablo y'adzooy:

—Iich ti nmiibi'c'ajtich yi'.

²⁹ Miid jëyi, je huidibi anajty ajcxy ci'adam je Pablo, chi puyöydútcixni. Nañ jadu'n je comandante ooy ñay'adzigiyi, miid co c'ixojch Pablo miid cadena.

Pablo ma je judíojäy ajcxy yjuntitungixy

³⁰ Com jabom je comandante co anajty nejhuñhua'ñ ti ycixpi co ti yxiiyi je Pablo yi' judíojäy, huen yajminagyii cadena ma Pablo yci'. Chi ane'my co yajhuomujci je teedy tungmiidpi etz je judío mij'anäctijc. Huin'it je comandante yajnicxy Pablo ma je huindzindijc etz ixpicytijc anajty ti ñaymújcigixy.

23

¹ Huin'it Pablo yaj'ijxpejty je mayjäy huidi anajty ti nyyöymújcigixy, e chi ajcxy nimay:

—Migügtijc, Dios y'ijxpy ñejhuiyb nej iich ti nduñ maabi nyeecpidzimyich, tudägy n'ityich ixti chambaadni.

² Huin'it je Ananías, je teedy mijtungmiidpi, ni'ane'mdiy Pablo co huen yaj'accojxgy.

³ Chi Pablo ymíañ:

—¡Dios xychaachtunipy miich huidibi mnaybidaacip nej jihuiy ooy mdudägyjäyity, e ca' yjanchity! Paady miich m'ñäy ma cötujctac jigix nyajtiydunipyich nej je ley y'ane'my. Chi mmidundigooy je ley co ti xyajcojxyijich.

⁴ Je jäy ajcxy huidi anajty jim míañ:

—¿Jadu'n miich mmigapxtigoy yi Dios ymijtungmiidpi?

⁵ Chi Pablo ymíañ:

—Migügtijc, iich ca' anajty nejhuñyich, pen yi' je' Dios ymijtungmiidpi. Com jaybety jadu'n ma Dios ñecy: "Ca' huaad jibic mnigapxipy huidi tungmiid ijtp ma miich mjäy."

⁶ Huin'it Pablo ijxy nejhuiy co jim juntí'joty mejtzcicy ixpicytjic anajty jim, jim huidi saduceo y'ixpijcin ymijpidacp etz nañ jadu'n jim huidi fariseo y'ixpijcin ymijpidacp, chi Pablo yminañ mic:

—Migügtjicich, fariseojäy iich, nañ jadu'n ndeedyich fariseojäy je'. Cham nyajtiyduñich miid jëgixpi co nmibicyich co Dios yajjugypigipy jäy tiibi y'öccixy.

⁷ Co Pablo jadu'n yminanday, chi fariseojäy etz saduceojäy miñ xyipy ajcxy ca' ñay'ayuc-huinjihuiyi. Chi je naymujcpidijc ajcxy ñaybijc-huäcxi. ⁸ Je' co je saduceojäy yminaangixy co o'cpi ca' yjugypigipy, ni ca' ji ángel ajcxy, nañ ca' jäy y'alma, nañ ca' ji je Espíritu Santo, etz ni ca' ji mujcu' ajcxy. Je fariseojäy ymibijcpi je' ajcxy co yjiiijity ángel ajcxy, co öcpi jugypigaangixy, co je Espíritu Santo yjiiijity, co jäy ajcxy miidity y'alma, etz co mujcu' ajcxy yjiiijity. ⁹ Tüg'óciy jäy ajcxy ma je naymujctac ytigiiy huambi jihuiybi. Chi nijëjity fariseojäy huidi nihuindzin'ajtpy je Moisés ycötújcín nigapxtuty Pablo yminañ:

—Jadayaabi jäy ca' ti pocy ti tuñ. Ca' yjeyity ti jada' ymigapxyii tüg espíritu o tüg ángel.

¹⁰ Chi je mayjäy anajty ooy mic ti ñayyajot'ambijcigixy. Je soldado huindzin tzigiiyb anajty co Pablo y'ahuoonñhuiyb y'agidzihuiyb, paady ni'ane'mdiy huen yi soldado ajcxy yajpidzimigixy juntijoty e yajnicxcixipy yi Pablo jadüg'oc ma cuartel.

¹¹ Huin'it coodz ñayguëxici je Huindzin Jesús ma Pablo ymijc, nimaayi:

—Jotmicpic Pablo, com jadu'n nej ya Jerusalén ti xyñigodiy'ajt'átyich, nañ jadu'n xyñigodiy'ajt'adipyich jim Roma.

Ixtaaygixy huinma'ñ nej huaad Pablo yaj'öccixy

¹² Com jabom nijëjity judíojäy ñaygapxi co yaj'ögaangixy Pablo. E chi ajcxy capxycödujcy ñay'hibojci ñaygapxpojci co ca' ycayaangixy y'ügaangixy ixti cooni ajcxy yaj'öccixipy Pablo. ¹³ Nihuixchiguïpx naxy anajty yëydijctjic huidi ajcxy jadu'n naygapxi. ¹⁴ Chi ajcxy ninicxy je teedy ajcxy huidibi mijtungmiid etz judío mij'anäctjic, nimay ajcxy:

—Hich ajcxy ti ngapxycödujccixy co ca' ngayáangixyich n'ügáangixyich ixti cooni iich ajcxy nyaj'öcip Pablo. ¹⁵ Jadachambi miich ajcxy, etz jacjadyii ixpicytjic mij'anäctjic nidungiiygixy ma je soldado huindzin, co huen jabom yajminyii Pablo jadügtecy ma miich ajcxy. E aaniidaaccixy co jacyajxon yajtiyduna'ñ, e ni'ixi iich ajcxy anajty n'ijtcixy co Pablo nyaj'ögibich ca'ni anajty yjaty ma naymujctac.

¹⁶ Pablo chi' ymang nejhuiy nej je' anajty ti ñaygápxigixy, chi ñicxy ma cuartel oy Pablo yajnimäy. ¹⁷ Huin'it Pablo yaaxi tüg soldado huindzin, e chi nimay:

—Yajnicx jada yeeg'anäg ma je comandante, ymiid yi' ayuc ti nigapxaamy.

¹⁸ Chi je soldado huindzin yajnicxy je yeeg'anäg ma je comandante, e chi nimay:

—Pablo, je machyjäy, ti xyaaxyich, ti xyñimäyich co nmiiadminipyich jada yeeg'anäg, ymiid yi' ayuc huidi ñigapxaamy ma miich.

¹⁹ Chi je comandante majch je yeeg'anäg ma yci', e yajnicxy abicy, chi yaj'amidooy:

—¿Ti xyajnimähuaamyich?

²⁰ Chi je yeeg'anäg yminañ:

—Yi judíojäy ajcxy ti ñaygápxigixy co xyñimähuaangixy co jabom Pablo myajnicxipy jim ma ñayyöymugáangixy, y'aaniidägaangixy co jacyajxon tiydunaangixy. ²¹ Ca' miich yi' mmibigipy; com nihuixchiguïpx naxy yëydijctjic jim yi' ajcxy ahuixy yüch. Ti capxycödujccixy co ca' ajcxy ycaya'ñ y'üga'ñ ixti cooni ajcxy yaj'ögipy je Pablo. Jadachambi ni'ixi jim y'ijtcixy, jëyi miich m'ayuc ajcxy xyjamidohuaani, pen mni'adzooyb.

²² Chi je comandante ycapxycijxy miid je yeeg'anäg. Chi nimay co ca' huaad ymiydägy miid jacpinjaty jadu'n nej anajty ti ymiydaaccixy.

Yajnicxy ajcxy Pablo ma je gobernador Félix

²³ Chi je comandante yaaxi metz capitán moy cötújcín huen nayñi'ixíyigixy nimejtzmigo'px soldado huیدی nicxip tegyi'm, etz tugi'pxmajc huیدی nícxip cohuaaygíxy, etz mejtz migo'px quipyjijpxu'ñmiidpi, huen nicxcixy jim Cesarea mijcoodz. ²⁴ Nañ ni'ane'mdiy co huen cohuaay ni'ixí pidägyii huیدی Pablo yaj'iñähuiipy, e moy cötújcín co huen oy yajxon ajcxy Pablo yajjädiipy ma je gobernador Félix. ²⁵ Chi yajmiguejxy tüg necy yjaayity jadu'n:

²⁶ “İch comandante, Claudio Lisias, cham nguejxyich jada necy ma miich, mijpi gobernador Félix, e nguejxyich capxpoocxin. ²⁷ Je judíojäy ajcxy ti anajty majtcixy jada yaabi yeydiyc, yaj'ögamy anajty ajcxy co İch oy nejhuıy co je' yromanojäyity, chi nninicxich miid soldadtıyc etz nnihuaañich. ²⁸ Co İch ooy anajty nejhuıhua'ñich ti anajty co ti xıgıxy, chi nyajnicxich ma anajty ajcxy tungmiidpi etz mij'anäctıyc ti ñayyömyüjcıgıxy. ²⁹ Hue' anajty yi' ycıxpi ti yajxıy co anajty ti ytundıgooy ma yi' ajcxy ycötújcín. Ca' anajty ytiy'ajtıty co yaj'öccıxıpy, e ni ca' huaad ymach'İñäy. ³⁰ Co İch oy nejhuıy co yi' judíojäy anajty ti nihuınmayıygıxy co yaj'ögaangıxy, cham İch miich yi' nyajnıguexy. E ti İch nañ jadu'n nımay huیدی ti yxıyii huen nicxcixy ma miich, e jėbi ajcxy jim nigapxy ti ycıxpi co midzip'ajtcıxy. Ji naybaatım.”

³¹ Je soldadtıyc nej anajty ti ycötújcín möyii tim huın'İtiy miid tzoon je Pablo mijcoodz ixti yajja'ty ajcxy Antıpatris. ³² Je soldadtıyc huیدی ajcxy tegyi'm nicxp, com jabom huımbıjtcıxni, chi yjá'tcıxni ma cuartel. E je soldadtıyc cohuaaygıxpi jacnicxy je' ajcxy miid Pablo. ³³ Co je' ajcxy yja'ty jim Cesarea, chi ajcxy je gobernador necy yajcıdıgııy, chi ajcxy nañ jadu'n yajquëxıgy je Pablo ma je' yhuınduu. ³⁴ Co İceny capxtay, chi je gobernador y'amıdooy Pablo ma anajty yconaaxıty. Co nejhuıy co yCılicıajäyity, ³⁵ chi nımay:

—Jiini nejhuıhuıııch je tiy'ajt co anajty miingıxy huیدی ti yxıgıxy.
Huın'it ni'ane'mdiy co huen cuend'adyii ma je Herodes ymıjtıyc.

24

Pablo ñaygohua'ñyii ma je gobernador Félix yhuınduu

¹ Co mıgoox xıi Ananías je teedy ajcxy ymıjtungmiidpi yja'ty jim Cesarea miid judío mij'anäctıyc ajcxy etz miid tüg huıngapxpi huیدی anajty yxıi Tértulo, chi ajcxy ñayguëxıci ma gobernador co xıhuaangıxy Pablo. ² Co ajcxy Pablo yajmiñ, chi Tértulo ytıgıy xııı, nımay Félix:

—Miid miich ycıxpi jotcujc je naaxcajp y'ıjty, ca' ma tzip, je' co yajxon m'ane'mdıy miid oyhuınma'ñ. ³ Tüg'öcıy İch ajcxy njäygidacpyich hueñyima'ámyıty, miich mıjtungmiidpi Félix. ⁴ Ca'ydı mdiempo nyajtıgooyi mij, tun may'ajt amıdo'İjtıgıch n'ayuc tüg jaxıgyı. ⁵ Com ti nnejhuııygıxıch co jada Pablo, ooy ayo'n yecy hueñytımma'ámyıty. Xi ya judíojäy tzach pijc-huäcxı miid y'ayuc huیدی ymiid. Yi' je' nigohuıajc'ajtp tüg pıcy jäy huیدی jäy ytıjpy Nazaret jäy. ⁶ Com tundıgoy ma İch ajcxy nDios ytıyc nej ca' ypadıyı, chi İch ajcxy nmajch, e chi İch ajcxy njatıydunaañıch jadu'n nej İch ajcxy ngötújcín y'ane'my. ⁷ Per je comandante Lisias je' yajtıgıyıy mıctägy, chi İch ajcxy xpyıjci jada Pablo. ⁸ E Lisias ymınañ co pınjaty anajty ti yxıyii huen miıñ ma miich. Miich cı'm jėbi myajtıy, e mnejhuıhuııp tüg'öcıy je tiy'ajt jadu'n nej İch ajcxy yi' ti nxıy.

⁹ E je judíojäy ajcxy huیدی anajty jim gobernador yhuınduu, ac jadu'n ajcxy ymınaangıxy co yjanchıty jadu'n nej Tértulo ymına'ñ. ¹⁰ Huın'it je gobernador tiy'ajt moy Pablo cımiid co huen capxy, chi Pablo ymınañ:

—Janch jotcujc jėbi nayñıgapxtüdyııjıch ma miich Félix, com nejhuııybıch co miich mıjtungmiid ma jada naax cajp cham xıi jimıjt ñıcxni. ¹¹ Miich cı'm jėb mnejhuıy je tiy'ajt, jėyı anajty ñımajcmetzxııjıy maabi anajty nbättıgıyıch jim Jerusalén Dios ojajajtpı. ¹² Ca' İch yi' ajcxy xypaty ndzipcapxy n'ahua'ngapxyıch miid pınjaty. E ni İch ngajäy'axııgıy ngajäy'agapxıy ma Dios ytıyc, etz ni ma naymıjctac etz ni ma Jerusalén

cajp. ¹³ Jada jäy ajcxy ca' ajcxy miidity pinjaty tiy'ajt yegipy nej ich yi' ajcxy yxïy. ¹⁴ Huidi janch ngapxypidziimybich ma miich jadu'n nej je tzinaayin, je jemybi ixpijcin huidibi yi' ajcxy ytijpy ca' y'óyity, je' je' je ixpijcin huidi ich miid n'ojadajtpich Dios, je Dios huidi ich ajcxy nmij'ap nmijteedy y'ojadajt. Nmibijcpiych tüg'óciy jadu'n nej yjaybetyity ma Moisés ñecy, etz je Dios y'ayucnajtzcaxiiby ñecy. ¹⁵ Nañ nmibijcpich co Dios yajjugypigipy pinjaty ti y'ögy, tiibi oybi tuñ etz tiibi jibicpi tuñ. ¹⁶ Paady ycixpi naymijottigoyiijich co njothuima'ñich huadz ooy miid'idipyich ma Dios etz ma jäy.

¹⁷ Canaag jimijt ich anajty ti nhuidityich huingduum, chi nhuimbijtyich ma ich ngajp limosna cuejtp etz nhuindzigihua'ñich anajty Dios. ¹⁸ Jadu'n ich anajty nduñ co nijëjity judíojäy xypatyich ma Dios ytijc huidi anajty tzoomb Asia ñaaxjot. Ti anajty naybocyñihuächyijich, ti anajty nguyduñich costumbre, ca' anajty mayjäy pin yhua'ñ yjihuiy. ¹⁹ Je jäy ajcxy huidi xy'ijxyich ma Dios ytijc, je' ajcxy ixipy ti ymiingixy ya tiy'ajt yejcp. ²⁰ Co ca' ajcxy ti miin, huen jada jäy ajcxy huidi ya nigapxcixy pen ypaat ajcxy nbocyich je taabi ajcxy xtytyduñich ma judío jäy tungmiidpi etz huinmij'anäctijc ajcxy ñaymujci. ²¹ Jëyi co ich mic ngapxyich juntijoty, chi mminañich: "Xtytydumbich miich ajcxy cham miid co nmibicyich co Dios yajjugypigipy pinjaty ti y'o'cy."

²² Co Félix jadu'n midodaay, com ñehhuiydaayb anajty nej tüyöy je mibijcpidijc y'ayuc yhuinma'ñ, chi capxhui'my je ayuc, nimay ajcxy:

—Co anajty miin je comandante Lisias, huin'it njacnejhuiydähuibich nyajtydigihuibich miich ajcxy m'ayuc.

²³ Huin'it Félix ane'mdiy je capitán co huen yajcuend'aty yi Pablo, e huen a'ixihuij co pidzim tibiñ tibäy e pen ji ymigügtijc miin co'ixihuañyii, huen möyii huidi yajmayjajtpy.

²⁴ Ti anajty xi ñajtzninixiyni co Félix jadüg'oc miin miid ytöxyijc Drusila. Je Drusila judíojäy je' anajty. Chi Félix capxyñiguejxy Pablo huen miin miidmiydägyii nej jäy mibicy Jesucristo. ²⁵ E co Pablo yajnimay je tiy'ajt nej Dios tzocy co huen jäy tudägy tzinäy, etz yajnimay jadu'n nej Dios jiini jäy tyiduna'ñ tüg'óciy, chi Félix ñay'adzigiyi, yminañ:

—Nix miich jadachambi, co ich anajty xyñibadiiyigixy huin'it nicxy nyajhuooyii.

²⁶ Nañ jadu'n Félix y'ahuijpxy anajty mina Pablo y'ocmeeñymöyii, e huin'it anajty najtzmazihua'ñ. Paady anajty janam jadojz nicxy yajhuooyii, e miid miydägy anajty.

²⁷ Mejtz jimijt jadu'n yjajty, huin'it Félix ygovernadorbidzimy. Chi Porcio Festo ygovernadortigiy ma Félix anajty ytuñ. Co Félix anajty nayyajhui'mañyii ooy miid je judíojäy ajcxy, paady ixmajch Pablo mach.

25

Pablo ma Festo yhuinduu

¹ Jadu'n yjajty co Festo anajty ti ygovernador tigiy, chi codugig xi choñ Cesarea, ypättigiy Jerusalén. ² E jim Jerusalén je teedy mijtungmiidpi etz nijëjity huinmij'anäctijc jactimxiy Pablo ma Festo. ³ Chi ajcxy may'ajt pijctzoy ma je gobernador Festo co huen quexy Pablo jim Jerusalén. Hue' anajty ti huinmaaygixy co yaj'ögaangixy tü'am. ⁴ Chi Festo y'adzooy co Pablo cuend'aty anajty y'ity Cesarea, e je' anajty nicxa'ñ janch tim tzojz jim. ⁵ Chi ajcxy nimay:

—Jëbi nijëjity miich ajcxy mdungmiidpidijc etz huinmij'anäctijc quipxy nixibich miid ich. Pen ti je Pablo ytundigooy jëbi miich ajcxy mxiy jim Cesarea.

⁶ Festo jëyi jim y'ijty tuctujc xi taxtujc xi Jerusalén, chi yhuimbijtni Cesarea. Com jabom ñicxy ma tydondac, huin'it capxyñiguejxy Pablo co huen yajminyii. ⁷ Co Pablo ytigiy ma tydondac, chi mic'amy je judíojäy ajcxy yjübigiydäy huidi anajty ti choongixy jim Jerusalén. Chi ajcxy oxiy Pablo co mij anajty ti ytundigoy. E ca' ni ti tiy'ajt ajcxy miguëxigy. ⁸ Chi Pablo ñaygogapxi yminañ:

—Ich ca' ni ti ndundigooyich, ni ngamidundigooyich yi judío jäy ycötujcin, etz ni ngamidundigooyich Dios ytijc, etz ni ngamidundigooyich je mij'ane'mbi jim Roma.

⁹ Co Festo anajty jatytimyjajcömaya'ñ ma judíoñäy ajcxy, chi y'amidooy Pablo:

—¿Nej mnicxam jim Jerusalén, jigix jim ndiydunípiy?

¹⁰ Chi Pablo y'adzooy:

—Cha ñich cham ma je cötujctac huidi je romano codung y'ane'myb e ma jëbi yajtiyduñich. Yajxon miich mnejhuïy co ca' ti ti ndundigooyich ma yi judíoñäy ajcxy.

¹¹ Pen ti ndundigooyich huidi jëbi co'ögïyich, ca' nminá'ñibich co ñich ca' n'öga'ñ. Pen ca' ji ni ti tiy'ajt jadu'n nej yi' ajcxy ti xyxïyich, ni pin cötújcín camiidity nicxy xycïyecyich ma yi' ajcxy. ñich nbijctzoy co nyajtiyduñich ma César, je emperador, jim Roma.

¹² Co Festo capxyöyday miid ymidungmiidpi, chi nimay Pablo:

—Pen miich jadu'n minamb co jim nicxy myajtiyduna'ñ ma je César ycötujctac, nguexipyich miich jim. Miich ti mbijctzoy co je emperador xtytiyduna'ñ. Pis jim mnicxipy miich.

Pablo ma je rey Agripa yhuinduu

¹³ Chi yi xii tiempo ñajtzñinicxiïyñi co je rey Agripa etz Berenice ycidacy Cesarea, cogapxihua'ñ anajty Festo. ¹⁴ Co ajcxy jim yhuäcxijpy canaag xii, chi Festo yajmiidmiydacy je rey Agripa je Pablo ayo'n, e nimay:

—Ji tüg yëydijc huidi Félix y'ixmajtz mach. ¹⁵ Co n'oyich jim Jerusalén, chi je teedy mijtungmiidpi etz judío mij'anäctijc xymixïyich, nibijctzohuïy co Pablo nyaj'ögïbich.

¹⁶ Chi n'adzooyich co romanoñäy ca' cötújcín jadu'n miidity nicxy yaj'ögy yi machyjäy ma ca'ni ñayhuindinaayigixy miid je huidi miid ñayxïyii, jigix ñaygogapxiïyb nej anajty ti yxïyii. ¹⁷ Paady co je judíoñäy ajcxy y'oy ya ca' nigoob tiempo nyajtigooyich com jabom nnicxich ma ngötujctaacich, e nni'ane'mdiïyich co huen yajmiñyii je Pablo. ¹⁸ Co ajcxy ñayguëxi'ci, je huidi anajty ti xïy, ca' jac ni ti ayuc anajty ajcxy miidity jadu'n nej ñich anajty ti ndijyich. ¹⁹ Jëyi janchtiy co jadu'n anajty yminaangixy co Pablo ti ytundigooy ma yi' ajcxy ycostumbre huinma'ñ, etz Pablo capxhuäcxy co je Jesús huidi o'c, juugyñi je'. ²⁰ Com ñich ca' nnejhuïy nej ndunipich miid jada jadu'mbi huinma'ñ, chi n'amidooyich Pablo, pen nicxam anajty Jerusalén, jigix jim ngatiyduñich miid jadyaabi ycixpi. ²¹ Pablo ci'm minañ co ñigi oy yajtiydunipy jim ma je emperador huidi ane'm jim Roma. Chi nni'ane'mdiïyich co huen jacmach'ñäy, ixti cooni nguexipyich jim Roma ma César.

²² Chi je rey Agripa yminañ:

—Nañ ooy ñich nja'amido'idaani Pablo y'ayuc.

Chi Festo y'adzooy:

—Jabom jëbi ayuc midohuipy.

²³ Com jabom miiñ Agripa etz Berenice miid mayjäy etz xuuxpidijc, chi ytiñiy ajcxy ma tiydundac miid je soldado huindzin ajcxy, etz huinmij'anäctijc. Chi Festo capxyñiguejy co huen Pablo nicxy yajtzonyii. ²⁴ Chi Festo yminañ:

—Rey Agripa, etz tüg'óciy mij'anäctijc huindzindijc huidi ya ti mnayyöymújcigixy miid ñich ajcxy, cha je' je yëydijc huidi oy yi judíoñäy ti yxïyii ma ñich. Xymixïyich jim Jerusalén, e nañ ya Cesarea, e jatyimyminaangixy co jëbi y'ögy. ²⁵ Ca' ti ti tundigooy, paady ca' huaad nyaj'ögyich. Com ti ci'm ñayñbijctzohuïyii co jim yajtiyduna'ñ ma je emperador jim Roma, paady ti n'a'ixïyich co nguexañich. ²⁶ E com ca' ni ti tiy'ajt nej nijayñhuibich nhuindzinich, je emperador César, miid yi' ycixpi, paady nyajmiiñich ma miich ajcxy, etz tim jayijp ma miich mhuinduu, rey Agripa, jigix jëbi m'amidohuipy e nmiiid'idipyich ti ii njáayibich. ²⁷ Ca' jadu'n y'óyity nicxy nguexyich tüg machyjäy jim ma je mij'ane'mbi e ca' ni ti tiy'ajt miidity nej ti yxïyii.

Pablo nimiydägy nej anajty yjatyin ma je rey Agripa

¹ Chi je rey Agripa nimay Pablo:

—Jëbi ci'm mnayñimiydägyii.

Chi Pablo yujcxajy yci' e ytigiiy nayñigapxtuutip, yminañ:

²—Jotcujc nayjihuiyijich, co jëbi nmiydägyich ma miich, rey Agripa, jigix nayñigapxtüdiybich tüg'óciy jadu'n nej judío jäy ti xyxíyich. ³ Com miich mnejhuiyb yajxon nej judíojäy ajcxy yhuinma'n miiidity, etz tijaty tzip yí' ajcxy ymiid, etz jadu'n nej yí' ajcxy y'ixpíjcin oy ñay'ijxquípxigixy.

Pablo nigapxy nej anajty chinäy ma anajty ca'ni yjothuimbity

⁴ Tüg'óciy judíojäy ñejhuiyb nej ti ndzinäyich ma yí' ajcxy jim ma nnaaxjotich etz jim Jerusalén maabi nyeecpidzimyich. ⁵ E yí' ajcxy ñejhuiyb nañ jadu'n, e jëbi nigapxcixy jadu'n nej ti nyujcyecpi'atyich. Hue' naydijyijich anajty fariseojäy, je tügpícpyi jäy huidi mictägy je judío jäy ycostumbre etz ycötújcin payöyip. ⁶ E jadachambi xytíyduñich miiid co njijp'ixyich co Dios yajjugypiga'n yi jäy ajcxy tiibi y'o'ccixy, jadu'n nej Dios yajnimay nmij'ap nmijteedy jecy'ajty. ⁷ Je majmetzpicypí Israel ymang y'ap y'oc y'ahuijxpy mina Dios cuyduna'n nej anajty ti yajnimäyii je' ajcxy ymij'ap ymijteedy. Paady ajcxy Dios ojadaty huindzigíy xiim tzuum. Miich, rey Agripa, nmibicyich co Dios yajjugypigipy je jäy tiibi y'öccixy, paady ycixpi yi judíojäy yxíyich. ⁸ ¿Na'amy co ca' miich ajcxy mibiga'n co jëbi Dios yajjugypicy je tiibi ajcxy y'ögy?

Nej anajty Pablo jayijp'aty mibijcpidijc ixhuidity pahuidity

⁹ Jecyip iich hue' ndijyich oy nduñich co anajty ndzachmidzip'adyijich je Jesús je Nazaretpi. ¹⁰ E jadu'n nduñich jim Jerusalén. Miiid je teedy mijtungmiiidpi ycötújcin nbidaacich Jesús yjäy may pujxtigoty. E co ajcxy yaj'o'cy, nañ nigapxpejt iich co huen yaj'öccixy. ¹¹ E nnicxyich anajty majaty judío ñaymujctac jim ndzaachytuñich huidi ajcxy mijpidacp anajty Jesús, jigix ajcxy y'ixmadzipy je' ymibíjcin co Jesús je' je' je Cristo. Nigi anajty nmijotmätcootyich ixti nbahuidijttacyich huingnaax huinggajp.

Pablo nimiydägy jadüg'oc nej yjothuimbijty

¹² Miiid yi jadu'mbi huinma'n nnicxyich anajty jim Damasco. Je teedy mijtungmiiidpi anajty xyquejxich, e xymöyich anajty cötújcin. ¹³ E tü'am, señor rey, iich anajty nicy, cujc xii anajty co n'ijxyich tügi tiicxin jacmic ca'ydi xii ytiicxin chooñ tzajpjoty, xyñigidacyich etz nañ jadu'n huidi anajty ajcxy xymiidnicxich. ¹⁴ Huin'it nidüg'óciy iich ajcxy ngidaday, e nmidooyich tüg ayuc xymigapxich miiid hebreo y'ayuc, xyñimäyich: “Saulo, Saulo, ¿nej co chach xypahuidijttägyich? Ci'm nayyajtzaachíyii jadu'n nej huaj yuub co jijpconebíy huidi miiid ñumygumyii.” ¹⁵ Huin'it n'adzooyich, nnimaayich: “¿Mbin miich Huindzin?” E je Huindzin xyñimaayich: “iich je' Jesús je huidi miich mdzachpahuidijttacpy. ¹⁶ Pidíg e tinaaygugi', com ti nnyaguëxígyijich ma miich jigix xymidunipyich etz mgodiy'ajt'adipy jadu'n nej cham ti nyajnimäy ti nyajnejhuiy, etz jadu'n nej jiini njacyaj'ixa'n njacyajnejhuihua'n. ¹⁷ iich miich nnihuänip nyajtzögip ma yi judíojäy, etz nañ ma huidi ca' yjudíojäyity. iich miich jim nguejxpy ma huidi ca' yjudíojäyity. ¹⁸ Nicx jim myajhuinjihuiyigixy iich ndiy'ajt, huen ixmach ajcxy yi jibic-huinma'n e jadu'n ypidzimipy ajcxy ma je mujcu' y'ané'migixy, etz mijnicxpedipy ajcxy Dios ytiy'ajt. Co ajcxy mibigipy mijpidägipy iich ndiy'ajt huin'it nmöhuibich tigiydac tzajpjoty ma yi oyjäydic ity tiibi Dios yajpocyníhuächyii.”

Pablo cuyduñ nej anajty ti y'ijxmañíyín

¹⁹ Rey Agripa, jadu'n ti ngapxymidooyich huidi n'ijxich nmidoohuich tzoön tzajpjoty. ²⁰ Jayijp ngapxhuäcxich Dios y'ayuc jim Damasco, chi ngapxhuäcxich jim Jerusalén etz tüg'óciy Judea ñaaxjot, etz cham ngapxhuäcxich Dios y'ayuc ma huidi ca' yjudíojäyity. Nyajnimäyigixyich huen jothuimbijtcixy, huen mibijccixy Dios y'ayuc ytiy'ajt, etz huen yajtungixy oyjot oyhuinma'n jigix ñiguëxigipy co ti yjothuimbijtcixy. ²¹ Miiid jada ycixpi xymajchich ajcxy je judíojäy ajcxy ma Dios ytiyc, e xyaj'ögängixyich anajty. ²² Miiid co Dios ti xypubety ti xypudigíyich cha nyajpaadyich juugy. Ngapxhuäcxich Dios

y'ayuc ytiy'ajt ma tüg'óciy ayoobtijc etz ixpicytijc. Tüg'óciy huidi ngapxpyich je Dios y'ayucnajtzcaxiibi jaay jecy'ajty, etz je Moisés nañ jadu'n jaay jecy'ajty co jadu'n ytuna'nyii yjada'nyii. ²³ Hue' yajmina'ñ co je Cristo copicy ayo'n tzaachypí yajnaxipy, e y'ögipy e huin'it jugypigipy, e je' je' je jayijp jäy huidi jugypigip co anajty ti y'ögy. E yajcapxhuäcxip je ayuc ytiy'ajt ma iich ajcxy judíojäy, etz ma huidi ca' yjudíojäyity.

Pablo jahueeni cayajjothuimbijty Agripa

²⁴ Co Pablo jadu'n yminañ ma anajty ñayñigapxtüdyii, chi Festo mic minañ:

—¡Mlocjiyb miich Pablo! Miid je ixpíjcin nigi m'ahuimbity loci.

²⁵ Chi Pablo y'adzooy:

—Ca' iich nlocijiy, miich mijtungmiidpi Festo. Yi huidi iich ngapxpyich je' je' tiy'ajtip etz janchip. ²⁶ Yi rey Agripa ñejhuیداayb yi' tüg'óciy jada, paady nmiydägich aamic jotmic ma yi' yhuinduu; com nnejhuیداayb co yi' ñejhuیداayb jada tüg'óciy, com canan hue' jada yajtuuñ yajmiydacy ayüchytuum. ²⁷ ¿Nej mmibijcipy, miich rey Agripa, jadu'n nej ajcxy yminañ yi Dios y'ayucchojaaybi? Nnejhuیداayb co miich mmibicy.

²⁸ Chi je rey Agripa y'adzooy, yminañ:

—Janch tim jayinjaty jahuenjaty miich xycayajmibicyich Jesucristo.

²⁹ Chi Pablo yminañ:

—Oy yjajinjaty yjahuenjatyity ooy mijcayee mgamibicy, chojcpy Dios co miich mmibigipy Jesucristo etz nañ jadu'n tüg'óciy jäy huidi cham xy'amidoo'jtijp iich n'ayuc. Dios chojcpy co mmibigipy Jesucristo jadu'n nej iich nmibicyich, jäyi janchtiy co ca' mmach'idipy jadu'n nej iich nmach'ityich.

³⁰ Co je Pablo ymiydactay, chi je rey etz gobernador ytinayigy quipxyi miid Berenice etz jacjadyii huidi anajty ajcxy jim. ³¹ Chi ajcxy ahuingujc oy capxyöygyxy Pablo ypocy, ñayñimáayigyxy miñ xyipy:

—Jada yëydijc ca' jada ti tundigoy, ca' ypadyii nicxy y'ögy, ni ca' ypadyii nicxy ymach'iñäy pujxtigoty.

³² Chi Agripa nimay Festo:

—Jëbi ixypy nnajtmadziyim Pablo co ca' ci'm ycanayñibijctzohuiiyi co huen tiydunyii je emperador César jim Roma.

27

Pablo yajnicxi jim Roma

¹ Co ajcxy yajnihuinmayiy co xyquexángixyich jim Italia, chi Pablo yajcäyeyc miid jacjadyii machyjäy ma tüg capitán huidi anajty yxii Julio, je' huidi nihuindzin'ajtp tügpicy soldadtijc huidi anajty yxii batallón Augusto. ² Chi iich ajcxy ndigiy ma tüg barco huidi yhuindzin cogajpíp jim Adramitio. Je barco hue' anajty ñicxa'ñ ma nijëjity barco jättac jim Asia ñaaxjot. Chi iich ajcxy ndzooni. Miid iich anajty ajcxy Aristarco huidi anajty cogajpíp Tesalónica jim Macedonia. ³ Com jabom iich ajcxy nja'ty ma barco jättac jim Sidón. Jim je Julio pa'ayoy Pablo, e ahuaatzi ytu' co huen nicxy co'ixiy ymigügtijc, etz huen je' ajcxy yajcayyiy yaj'ügyii. ⁴ Co iich ajcxy ndzooñ jim Sidón, chi je naax mejy'agujcpi yhui'mni anajty'amy huidi yxii Chipre, miid co je poj anajty jijpcobojiy je barco. ⁵ Chi je barco huinyöyñajxy je Cilicia ñaaxjot etz Panfilia ñaaxjot, oy njädyich ajcxy jim Mira, tüg cajp jim Licia ñaaxjot.

⁶ Jim je capitán paty tüg Alejandría ybarco hue' anajty ñicxy jim Italia. Chi je capitán iich ajcxy xyajbarcotigiy. ⁷ Canaag xii iich nyöy janch oñdägy, adzaach iich ajcxy nja'ty mihuingon je Gnido co anajty je poj tzach jijpcobojiy je barco. Najx iich ajcxy mihuingon Salmón, etz njüyöy'ahuidijtyich ajcxy Creta je mejy'agujcpi naax. ⁸ Adzaach iich ajcxy nja'ty ma barco jättac huidi anajty yxii Buenos Puertos, mihuingon Lasea.

⁹ Ti iich ajcxy ooy anajty nxiidigoy, e ooy anajty ycodzigijity je barco yajyöyii. Ti anajty je ayuuxii ñajxni, e ti mihuingon anajty je poj tuu tiempo huidi jäy ytijpy invierno. Paady Pablo je soldado huindzin jaccapxhuijy, ¹⁰ chi Pablo yminañ:

—Huindzindijc, jadu'n nej yam codzigi' jada ooy co njacnicxim barcojoty, ca' yjeczyty co nicxy ndigooyim miid barco etz miid ñidzimy etz n'o'ctaayim.

¹¹ E je soldado huindzin yjacmijpidac oy je barco yajyöybi y'ayuc etz je barco capitán y'ayuc, ca'ydi Pablo y'ayuc. ¹² Com je' co je barco yjättac ca' anajty y'óyity, nicxy jim yajnaxcixy je poj tuu tiempo, chi je jacmaybi ajcxy yhuinma'ñypidacy, co jëbi barco yjacyöy, oc'ixaangixy pen yjätcixy jim Fenice ma Creta ñaaxjot. Jim ma tüg barco yjättac huidi y'aguu najtz'ixiib ma xii pidzimy, e jim anajty je poj tuu tiempo yajnaxaangixy.

Je mijpoj mijtigoy ma je mejy

¹³ Jadu'n yjajty co je jünboj hueeni ypidziimy, huin'it huinmay ajcxy co jëbi yjactüyöy je barco. Chi ajcxy yajpidigy je mij pujx huidi barco yajtinayxijp, e yajyöychoon je barco. Chi ñicxy je barco mejypa' mejypa' ma Creta ñaaxjot. ¹⁴ Huin'it hueeni tiempo ñajx, chi je micpoj miin ma tiichpoj pidzimy, huidi jäy ytijpy Euroclidón, jadu'n yhuimbizim, Noreste. ¹⁵ Chi je mic poj yajtütigajch je barco, e com ca' anajty ndimdüyöygiñni miid je poj ycixpi, chi je mic poj iich ajcxy xyajnicxy adzip ma anajty tzocy. ¹⁶ Najx iich ajcxy mihuingon tüg naax mutzpi mejy agujcpi huidi yxii Clauda, e adzaach iich ajcxy nyujcjugujcy je mutz barco huidi anajty miimb ixhodziy ma je mijpi. ¹⁷ Co ajcxy jugujcpidzimy je mutz barco, chi ajcxy yajtuuñ maychaay e xojtzmujcy je barco aguu. Chi ajcxy yajminajcy je huit huidi anajty poj mic tzach ymajchyp. Je' co chigiigixy co chimnicxiyb je barco jim ma mejy huidi ca' y'agomity, ma püjot huidi yxii Sirte. Chi ajcxy ñayyejci huen poj yajnicxiigixy. ¹⁸ Com jabom, com ooy mic anajty je poj, chi ajcxy je chimy mejy cöjibijptaayi. ¹⁹ Je midugiig xiibi, chi iich ajcxy nmejycöjibijptay je tungbejt huidi yajtumyb ma je barco. ²⁰ Ti anajty canaagxi ñajxni e iich ajcxy ca' ma xii madza' n'oc'ijxcixni, miid je mij poj ycixpi huidi anajty iich ajcxy xychachyajtüyöyp. Hue' iich ajcxy ndijcixy co ti ndigóoygiyich, ca' ndijy iich ajcxy ndzögiy.

²¹ Ti anajty xii tiempo iich ajcxy nyajnaxcixy jaygay, chi Pablo ytinayigy, nimay je jäy ajcxy:

—Yëydijctijc, co iich miich ajcxy xycacapxymidooy ca' ngatsoonim jim Creta ñaaxjot, e ca' icyipy jada ayo'n yam jadu'n nbaatim. ²² Jadachambi ca' mdajcixy mmaygixy, ca' ni pin ytigoya'ñ, oy je barco yjatigoy. ²³ Amygoodz je nHuindzin Dios tüg y'ánel ti ñayguëxiigyii ma iich, je Dios huidi iich ngapxymidooybich, yi' ti quexy. ²⁴ Je ánel ti xyñimäyich: “Ca' mdzigiy, Pablo, copicy co mjatyjädipy ma je mij'ane'mbi, je César yhuinduu. Miid miich ycixpi, Dios ñihuänamy yajtzögamy tüg'óciy huidi ji barcojoty, ca' ni tüg y'ögiy.” ²⁵ Paady nayjot'amijmóoyigix, yëydijctijc, nmibijcpiyich Dios co jadu'n yjada'ñ jadu'n nej yi' y'ánel ti xyñimäyich. ²⁶ Ooy ycopicyity nicxy nmijpojpejtim ma tüg naax mejy agujcpi.

²⁷ Majmactz xii je mic poj anajty yajyöyii je barco oyñinej jim ma je mejy huidi yxii Adria, chi mijcutz je barco yajyöybi jihui'ñybicy co anajty ti mihuingoñ naax. ²⁸ Chi ajcxy quipxy je ñii jadu'ñi anajty ycicyity, e hue' ajcxy quipxy iipx xap ycicyity. Jahuengi huin'it jadüg'oc ajcxy quipxy je ñii, e hue' oy quipxcixy majmocx xap ycicyity. ²⁹ E co anajty chigiigixy co tijy je barco jipcobonihuipy ma tzaagop, chi ajcxy pidacy niijoty midaax pujx ma barco y'ijx, je huidi yxiiip anclas, janch tzigiyb anajty ajcxy y'ahuijxcixy cooni ximihuipy. ³⁰ Chi je' ajcxy huidi anajty barco yajyöyp yhuinma'ñybaty co yquëga'ñ ameech. Chi ajcxy pidacy niihuingixy je mutz barco. Chi ajcxy ñaybidaaci jadu'n nej jihuiy je ancla jac yajminagaangixy jim ma barco yhuinduu. ³¹ Huin'it Pablo nimay je soldado huindzin etz je soldadtijc:

—Pen ca' jada hui'mgixy ma barco, ca' miich ajcxy mejy ypidzimipy.

³² Huin'it ajcxy tzujctujcy je tzaay huidi je mutz barco anajty miid ycoxochity, chi ajcxy yajcäy je mutz barco niijoty, e chi je mejy yajnicxiy.

³³ Moñyi Pablo migapxy je jäy ajcxy, chi ajcxy nimay co huen huingayñajcixy, chi Pablo yminañ:

—Cham majmactz xii ma miich ajcxy ca' mmaagixy, e ni ca' mgaaygixy m'uuccixy. ³⁴ Tun may'ajt caaygixy oy jadu'ñyi, copicy jada co njatyñidzooctähuaanim, ni tüg ngöhuay ca' ytigoyaanim.

³⁵ Co Pablo jadu'n yminanday, chi tüg tzajcaagy conigy, chi jayijp Dioscojuyip yajnaxxy mayjäy agujc, chi tujc-huäcxy etz ytiigiy ajcxy caaybi. ³⁶ Mic'amy je jäy ajcxy yjotmigiyyday nidüg'óciy, e chi ajcxy ytiigiy caaybi. ³⁷ Hue' anajty ñaybáatigixy barcojoty mejtz migo'px jatugi'px majmocxtüg jäy. ³⁸ Co ajcxy ycayday, chi jacniigöjibijpy je trigo, jigix huen cöminacy je barco chimy.

Chi barco tüg yquiñ

³⁹ Co yxiimiyy, chi je barco yajyöybi ca' ijxcapy je naax, e y'ijxpaty tüg it ma mejy huen ycoguegüy, e jim anajty püjot. Chi ajcxy yhuinma'ñybaty co'ixaangixy pen jébi jim yjäty je barco. ⁴⁰ Chi ajcxy tzujctujcy je tzaay huidi anajty miid yxochity je anclas, e chi anclas yhui'mni niijoty, huin'it ajcxy miguejiyy je niigaap huidi tumb co tümöy je barco. Chi huit jadüg'oc ajcxy pidacy huidibi pojmajtzp. Chi je barco ytiigiy yöyb, tiyy ajcxy yajnicxy ma püjot. ⁴¹ E chi oy minaybadyii ma anajty je mejy mejtz it oy mic ycujiin, chi oy yjépxy püjoty. Je barco jipp oy ytiigiy tätzpicy ca' huaad y'ocyücxni, e je barco ijx oy ytiigiyñ aguejthuäcxpi ymiid je mejy püjoty ymijaa. ⁴² Chi je soldado yjayaj'ögaañ je machyjäy ca'ydi yqueeccixy ayaahuip. ⁴³ Je soldado huindzin ca' a'ixiyy nicxy yaj'ögyii Pablo, chi nimay soldado ajcxy co huen ixmajtzcixy yi machyjäy. Chi je soldado huindzin nimay je jäy ajcxy co huen niidigiygixy pinjaty jajt p yau. ⁴⁴ E huidi ca' jajtciyy yau jaydëbi niidigiygixy miid pu'y etz miid barco pedasi. Jadu'n ajcxy nidüg'óciy ymejj ypidzimday.

28

Pablo yjädy ma tüg naax mejy'agujcpi huidibi yxi Malta

¹ Co iich ajcxy niibidzimday, chi iich ajcxy nejhuüy co je naax mejy agujcpi hue' anajty yxi Malta. ² Je conaax ajcxy ooy oyjäy'ajtin tuuñ miid iich ajcxy, chi ajcxy yajmijiiyy jiiñ mij, miid co anajty ooy ytiichity, etz co anajty ooy ytuubojy. Chi xyñimay iich ajcxy co miiñ n'ocxáamgixyich. ³ Chi Pablo ytiigiy jäxycajpmujcpi, e chi pidacy jiiñjoty. Chi tüg ahua'n iyujc pidzimy, yquëgy anajty miid je anbi, chi Pablo ymajtzi ma yci'. ⁴ Co je cogajp ajcxy ijxy je ahua'n iyujc ytiyyñäy ma Pablo yci', chi ajcxy ñayñimaayi miñ xyipy:

—Jadayaabi yëydijc, jäy yaj'öcpi jada. Oy ca' ti y'ögy mejyjoty, je tiydumbi tzajpjtoty pi ca' a'ixiyy nicxy yjactzinäy.

⁵ Chi Pablo yci' huinxidicxy, e jiiñjoty oy ycäy je ahua'n iyujc, e ca' Pablo ni nej yjajty. ⁶ E tüg'óciy je jäy tzach'ahuijxcixy mina anajty y'ocquixigy, o mina anajty y'oc'ögy. Ti anajty ooy y'ahuijxcixy jecy; co ajcxy ijxy ca' ni nej yjaty, chi ajcxy yhuinma'ñ yajtigajch. Yminañ ajcxy co Pablo hue' jada' yi' tüg dios.

⁷ E mihuingon anajty je Publio ytiyc, je huidi nigohuajc'ajty je jimbi naax mejy'agujcpi. Je Publio xyajjättacich ajcxy, e xyajcaay xyaj'uucich iich ajcxy yajxon tugiig xii. ⁸ Jadu'n yjajti co je Publio anajty yteedy ypiyyii miid tooy gohuajc etz miidity anajty ni'pypa'm. Chi Pablo oy ixy je pa'mjäy. Chi Pablo Dios miibijctzoy, e chi cñixajy, e yajtzoocy. ⁹ Miid jadaay miñ ajcxy nijëjity pa'mjäy huidi anajty ajcxy tzinaayb ma je naax mejy'agujcpi e chi ajcxy choocäy. ¹⁰ Miid jada ycixpi nyajcömay iich ajcxy, e nyajmooyich iich ajcxy tijaty huidi iich ajcxy nidüyöyipy barcojoty.

Chi Pablo oy yjädy jim Roma

¹¹ Tugiig po' iich ajcxy anajty ti n'ijtni jim. Chi iich ajcxy nbarcotigiiy ma tüg barco huidi anajty je tuuboj tiempo ti yajnaxy jim Malta. E je barco capitán jim anajty ycogajpity Alejandría. E je barco ymiid anajty ahuinax huidi anajty yxi Cástor etz Pólux huidi ajcxy dios'ajtpy. ¹² Chi iich ajcxy oy njäty ma je barco jättac huidi anajty yxi Siracusa. E jim iich ajcxy nhui'miiy tugiig xii. ¹³ Ndzoñich ajcxy Siracusa barcojoty, nicxy iich ajcxy mejypa' mejypa', ixti nja'tyich ajcxy jim Regio. Com jabom oy ypidzimy

jünboj, chi co maax oy nja'ty ñich ajcxy Puteoli. ¹⁴ E jim ñich ajcxy nbaaty nijëjity jäy huïdi anajty mijpidaacp Jesús. Je' ajcxy xycohuaniiyich co ñich ajcxy jim hui'mipy tüg semaan. Chi ñich ajcxy jadüg'oc ndzooñ, nnicxyich ajcxy jim Roma. ¹⁵ Je mibijcpidijc ajcxy huïdi anajty jim Roma ymidou ajcxy ayuc co ñich anajty ajcxy jim nicxy, chi ajcxy chooñ nijëjity oy xyjijpcobadiiygixyich ma je cajp mercado miid huïdi anajty yxii Foro de Apio. Jacjadyii mibijcpidijc oy xyjijpcobadiiyich ma tüg jättac huïdi anajty yxii, Tres Tabernas. Co Pablo jijpc'o'ixiiy je mibijcpidijc ajcxy, chi Dioscojuyip yajnaxy etz ñayjihuiiyi janch jotcujc. ¹⁶ Co ñich ajcxy nja'ty jim Roma, chi je soldado huindzin cïeyecy je machyjäy ma je comandante, per a'ixiiyb co Pablo tzinäy ahuingujc ma tüg pijctzoydijc, jëyi anajty tüg soldado ycuend'adyii.

Chi Pablo Dios y'ayuc capxhuäcxi jim Roma

¹⁷ Tugiig xii maabi Pablo anajty yjäty jim Roma co capxyñiguejxy je judío huinmij'anäctijc huïdi anajty ajcxy tzinaayb jim Roma. E co ajcxy ñaymujci, chi Pablo yminañ:

—Migügtijc ajcxy, oy ñich ca' ti ndundigooyich miidi judío jäy ajcxy etz miid ajt nmij'ap nmijteedy ycötújcín, chi je judíojäy ajcxy xymajchich etz xycïeyecich ma romano tungmiidpi jim Jerusalén. ¹⁸ Co je romano tungmiidpi ajcxy xy'amidooyich, huin'it ajcxy xyjanajtzmazihuaañich, ca' ti ajcxy paaty ma ñich huïdi ajcxy xyajco'ögïhuibich. ¹⁹ Co je judíojäy yjotmätcoty ajcxy, ca' ajcxy a'ixiiy co nyajnajtzmazihuibich, chi nayñibijctzohuiiyich co nyajtiydunipyich ma je mij'ane'mbi ya Roma, oy ñich ca' ti xïhuin nmïdity miid ñich nmigonaax nmigogajpich. ²⁰ Paady ti ngapxyñiguejxcixy co nyajmiidmiydäga'ñ ajcxy tigix co nmach'ityich. Miid co ñich ajt n'ahuixim co Dios nihuäna'ñ yajnidzöga'ñ yi Israel jäy etz yajjugypiga'ñ je jäy tiibi y'öccixy. Paady jadachambi nyajpaadyich mach.

²¹ Chi ajcxy y'adzooy:

—Ca'ni ñich ajcxy ni ti necy xyñijäty huïdi tzoomb jim Judea miid miich ycixpi. E ni tüg ajt nmigügtijc ca' jibic xyñimiydägy. ²² Nja'amido'idaamyich jadu'n nej miich mmiydägy, com nnejhuiybich co huen yma'ámyity jäy ymidzip'ajty je jemybi y'ijxpijcín.

²³ Chi tüg xii ajcxy agapxtujcy. Co oy paady mina anajty ti agapxtujccixy, chi mayjäy ñayyöymujci ma je Pablo anajty jättac miidity. Jopy ajcxy yajtzondacy capxii miydägi ixti ycootztzuu'iiy, jadu'n Pablo tzachyajnimaaygixy je Dios y'ayuc nej Dios yhuinma'ñ miidity. E yajjothuimbidaangixy anajty ma je Jesús miid co capxticxy je Moisés ycötújcín nej anajty yjaybetyity, etz jacjadyii ayuc cojaaybi ñecy. ²⁴ Nijëjity cöbijc ajcxy nej Pablo anajty ymina'ñ, etz nijëjity ca' ajcxy mibijcy. ²⁵ Co ca' anajty ajcxy miñ xyipy yajtügiiy yhuinma'ñ, chi ajcxy ixycy ca'ixy yöychóngixni. Chi Pablo yminañ:

—Tiytudägy je Espíritu Santo nimay je nmij'ap nmijteedy ajt co yajcapxy je profeta Isaías co yminañ:

²⁶ Nicx nima' je jäy ajcxy: Miich ajcxy oy mjamidohuiipy n'ayucich, per ca' ajcxy mhuinjihuihuip; oy mjahuindicxcixipy, e ca' ajcxy mhuinjihuihuipy.

²⁷ Com jada jäy ajcxy hue' yjot'ahuimbijtcixy janch juuñ, e ymidoogixy oyñinej, jadu'n nej jihuiy yhuimbïdz'ijtcixy, e ni ca' y'oc'ijxcixy miid yhuin e ni ca' ocmidoogixy miid yta'tz'ac, ni ca' huinjihuiiygixy miid yjot yhuinma'ñ, ni ca' minipy ajcxy ma ñich jigix myajtzögibich.

²⁸ Nejhuiiygixy miich ajcxy co jadachambi etz jacnicxpi xii tiempo Dios y'ahuaniiyb y'ayuc ytiy'ajt nej jëbi jäy y'alma ajcxy yajnidzögipy ma je jäy ajcxy huïdi ca' yjudíojäyity, e je' ajcxy y'amido'idipy.

²⁹ Co Pablo jadu'n nimay ajcxy, chi ajcxy ñicxtáaygixni chach ñayhuin'ibéjtigixy ñayhuingapxéjtigixy miñ xyipy.

³⁰ Pablo mejtz jimijt jim chinay ma je pijctzoydijc jim Roma, e yajxon xiic'adzoy capx'adzoy pin miñ ycogapxiyii. ³¹ Janch agujc jotcuyc anajty capxhuäcxy je Dios y'ané'min, e yaj'ixpicy je Huindzin Jesús ytiy'ajt, e ni pin ma ycapx'adugyii.

ROMANOS

Yi Necy Huidi San Pablo Yajniejx Je Mibijcpidijc Jim Roma

¹ Hich Pablo tumbich ma Jesucristo ytung. Jesucristo ti xyajñibicyich co nduna'ñich ma yi' ytung quipxy miid yi' y'apóstol ajcxy. Ti xypidägyich ma jada tung tügjijp co ngapxhuäcxibich Dios y'ayuc ytiy'ajt oybi.

² Dios jecy'ajty y'ayuc yajhui'my cojay ma yi' y'ayucnajtzcaxiyybi ñecy co quexa'ñ anajty je Cristo ya naaxhuiñ. ³ Ngapxhuäcxych jada ayuc jadu'n nej ajt nHuindzin Jesucristo, je Dios y'ung, yma'xung'ajty ya naaxhuiñ. Hue' yi' ñinix paty ma ytaj. E yi' ytaj je rey David je' ymij'ap'ajti ymijteedy'ajti. ⁴ Per Jesucristo ti paady ma Dios yi' yjihui'ñ ymic'ajt. Co Dios yajjugypijcy y'ung ma anajty ti y'ögy miid yjihui'ñ ymic'ajt, chi ti yajnejhuiy anajty je naaxhuiñyäj co Jesucristo hue' je' Dios y'ung, huidibi miid huädz yjot huädz yhuinma'ñ, etz nañ ymiid Dios yjihui'ñ ymic'ajt. ⁵ Co Dios yajjugypijcy Jesucristo ma anajty ti y'ögy, chi mijmay'ajt tuñ miid hich ajt ycixpi. E nañ miid Jesucristo ycixpi Dios ti xyajñibicyich co ngapxhuäcxibich yi' y'ayuc ytiy'ajt ma yi' mayjäy ajcxy ma tüg'óciy naax cajp, jigix jébi mayjäy mibijccixy e nañ capxymidoogixy Jesucristo. ⁶ E miich ajcxy huidibi tzinaayb jim ma yi' cajp huidibi xiijp Roma, nañ jadu'n Dios miich ajcxy ti xyhuin'ijxcixy jébi ajcxy Jesucristo xyjäy'adyii.

⁷ Jada necy nguejxypich ma miich ajcxy nidüg'óciy huidibi jim yajpatcixp ma yi' cajp huidibi xiijp Roma. Dios miich xychojccixp xyjihuiyigixp, e nañ Dios ti xyhuin'ijxcixy jaydēbi yi' xyjäy'adyii, etz nañ jaydēbi mdzinaaygixy miid huädz mjot huädz mhuinma'ñ. Huen hich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz nañ xyajjotcugihuiip ajcxy.

Pablo nicxy mibijcpidijc cogapxihua'ñ jim Roma

⁸ Tim jayijp nyajnajxpich jäygiidaacin ma Dios, miid Jesucristo yxii, co miich ajcxy ti mmibijccixy Jesucristo. Mayjäy ma nidüg'óciy naax cajp ti nejhuiyigixy jadu'n nej miich ajcxy ti mmijpidaaccixy Jesucristo. ⁹ Hich tumbich cixyjot huinijot ma Dios ytung, co ngapxhuäcxych Dios y'ayuc ytiy'ajt miid Jesucristo ycixpi. Dios yi' tiy'ajt yegip jadu'n nej jabom jabom Dios nmibijctzooyich miid miich ajcxy ycixpi. ¹⁰ Dios nmibijctzooyibich pen yi' jadu'n tzojcp co jébi nnicxyich cham tiempo jim ma miich ajcxy myajpaady. Canaag'oc hich miich ajcxy nicxy nja'ixaangixy, e ca' y'oyiy nej nixibich. ¹¹ Ooy njanijot'atyich co hich miich ajcxy nicxy n'ixaangixy, jaydēbi ngapxhuäcxibich Dios y'ayuc ma miich ajcxy miid Dios yjihui'ñ ymic'ajt, e nañ ngapxhuäcxibich Dios y'ayuc ma miich ajcxy jaydēbi tiydudägy mmibigipy ajcxy Jesucristo. ¹² Pen oyiyb nej nixibich ma miich ajcxy myajpaady, chi jébi njotcugihuiyich co anajty n'ixyich nej miich ajcxy mibijccixy Jesucristo, e nañ jaydēbi mjotcugihuiipy miich ajcxy co anajty m'ijxcixy nej hich nmibicyich Jesucristo, e jadu'n naysajjotcugiiyim miñ xyipy.

¹³ Ndzojcpich co miich ajcxy mnejhuihuipy co canaag'oc ti njapidägyich nhuinma'ñich co anajty nnicxa'ñich ma miich ajcxy myajpaady, e ca' y'oyiy nej nixibyich. Njijp'ijxypich co oyihuiip jadachambi tiempo jadu'n nej jébi nnixibyich jim ma miich ajcxy. Com njacyaj'ixpigaamybich miich ajcxy, e nañ njacyajmibigaamybich ajcxy Dios y'ayuc. Tim jadu'n nej nduñich canaag agajp ma chinaaygixy yi' jacjadyii jäy huidibi ajcxy ca' yjudíojäyity. ¹⁴ Dios jadu'n xyajñibijcich jada tung, paady copicy co ngapxhuäcxibich yi' y'ayuc ma tüg'óciy jäy, etz majaty naax cajp. Ngapxhuäcxamybich Dios y'ayuc ma yi' jäy ajcxy huidibi griego ayuc cápccixp, etz ñan ma yi' jäy ajcxy huidibi ca' griego y'ayuc capccixy. Ngapxhuäcxamybich Dios y'ayuc ma yi' ixpicy jäy ajcxy, etz nañ ma yi' jäy ajcxy huidibi ca' y'ixpicyity. ¹⁵ Paady ycixpi ooy ndzachcapxhuäcxa'ñich Dios y'ayuc ma miich ajcxy huidibi yajpatp jim Roma nañ jadu'n.

Je ayuc tiy'ajt oybi

¹⁶ Ca' nmidzo ydunyijich Cristo y'ayuc ytiy'ajt. Com je' jada je oybi ayuc huidibi tzoon ma Dios, ymiid yi' Dios ymic'ajt jigix jēbi tūg'óciy jāy ajcxy paadipy pocy huinmeecxin, pinjaty cōbigaamb Cristo y'ayuc. Tim jayijp ti ngapxhuācxy Jesucristo y'ayuc ytiy'ajt ma yi judío jāy ajcxy, e jac'axam ma yi huidibi ajcxy ca' yjudío jāyity. ¹⁷ Jesucristo ytiy'ajt xyajnejhuiyim co nmibijcim co Cristo ti jōch ajt nbocy etz nxihuin, chi Dios xycōbigaanim jadu'n nejjuhuiy tudāgyjāy. Ca' ji jadūg huinma'ñ nej Dios jēbi xycōbījcm jadu'n nej juhuiy tudāgyjāy. Com jadu'n jaybety y'ity ma Dios ñecy ma jadu'n ymīnañ: “Pinjaty tudāgy'ajtin ti paady miid co ti mijpidāgy Dios y'ayuc, hue' je' tzināhuip, ca' yjugy'ajtin ycixipy ytigoyipy.”

Je naaxhuiñyjāy ajcxy ypocy

¹⁸ Copicy nbaatim tudāgy'ajtin ma Dios, com je Dios huidibi tzinaayb tzajpjoty ti xyajnejhuiyim co yi' tzaachytuna'ñ mictāgy tūg'óciy jāy ajcxy huidibi midundigooyb yi' ytiy'ajt, tūg'óciy huidijaty jibic huinma'ñ ymiid, tūg'óciy yi' ajcxy huidibi yajtigooyb Dios ytiy'ajt miid je jibicpi huidibi ajcxy ytumyb. ¹⁹ Com yi jāy ajcxy huidibi jibicjot jibic-huinma'ñ miid, y'ijxpy ñejhuiyb ajcxy Dios ytiy'ajt, com Dios ti pidāgy yi' ytiy'ajt ma yi' ajcxy yjot yhuinma'ñ. ²⁰ Ñejhuiyb jāy ajcxy Dios ytiy'ajt, com mabaad oga'n Dios yajcojy naaxhuiñybi ixti chambaad, quēxīcp ya naaxhuiñ Dios ymic'ajt y'ijxpejt, oy ca' pin Dios ixy, huidibi Dios ti cojy ti macxy yejcpy ijxpejt co Dios yjijity, etz Dios ymic'ajt huinixi huinitiempo ijtp yi', ca' ycixipy ytigoyipy nimina. Co anajty Dios tzaachytuna'ñ yi pocyjāy ajcxy, ca' ajcxy ni ti ayuc miid huaad adzohuimbidip Dios miid ajcxy ypocy ycixpi. ²¹ Com ñejhuiyb ajcxy co ji Dios yajpaady, e ca' ajcxy ojadajtcixy ca' ajcxy huindzigīygixy Dios. E nañ ni ca' ajcxy yajnaxy Dioscojuyip ma Dios. E nañ jadu'n ajcxy ñaybidāacīgixy amij agix, yhuinma'ñ ixtaaygixy huidibi ca' ytiy'ajity. Yajtigooyi ajcxy Dios ytiy'ajt ma ajcxy yjot yhuinma'ñ, e nañ miid'ajtcixy tzuuhuinma'ñ. ²² Yi jadu'mbi jāy ajcxy hue' yhuinma'ñ pidaaccixy co ajcxy ooy ycohuinma'ñity, co ajcxy ooy y'ixpicyity, e ca' yjanchity, tzuu huinma'ñ ajcxy ymiid. ²³ Ma yjapadyii ojadajtcixipy huindzigīygixipy Dios huidibi ymic'ajtin y'oy'ajtin ca' ycixipy ytigoyipy nimina. Chi ajcxy yajtigach yjot yhuinma'ñ, e huindzigīygixy jāy y'ahuinax e jāy ajcxy yjugy'ajtin etz y'oy'ajtin cixaamb tigoyaamb. Ixti mijpidaaccixy nañ jadu'n joon y'ahuinax, iyujc y'ahuinax etz tza'ñ y'ahuinax.

²⁴ Co jāy ajcxy jadu'n ytundigoy, paady Dios ñajtz'ixīyīn ajcxy, huen tundigooygixy nej anajty ci'm jibichuinma'ñ nijot'ajtcixy. Ñaymidundigóoyīgixy ñinīcx miñ xyipy huidibi janch oy midzo'yduuni. ²⁵ Ma yjapadyii ixyipy mijpidaaccixy je tiy'ajt tiydudāgyipi nej Dios ti yecy, huin'it ajcxy mijpidaaccixy anñ huidijaty jāy ti cojy ti macxy. Ma yjapadyii ixyipy huindzigīygixy Dios, huidibi ci'm ti yajcojtāy tūg'óciy tijaty ji yajpaatp, huin'it ajcxy huindzigīygixy jāy y'ahuinax joon y'ahuinax, etz iyujc y'ahuinax huidijaty ca' ti mic'ajt miidity. Copicy n'ojadajtim ngōmaayim Dios huinixi huinitiempo. Amén.

²⁶ Miid co jāy ajcxy tzachhuindzigīygixy jāy y'ahuinax etz jactijaty ahuinax, paady ycixpi Dios ajcxy ñajtz'ixīyīi, chi ajcxy tungixy yi' jibic-huinma'ñ huidibi ci'm ñijot'ajtcixyp huidibi oy ymidzo'yduuni. Tōxyjāy ajcxy ma yjapadyii chināaygixipy tudāgy miid ñāy, chi ajcxy ñaymiidtzināayīgixy e ñaymiidundigóoyīgixy actōxyjāydijc. ²⁷ Yēydijctijc ajcxy nañ jadu'n ñaymiidundigóoyīgixy miñ xyipy. Ñaymiiddzināayīgixy ma yjapadyii ixyipy chinaaygixy miid tōxyjāy ajcxy, huin'it ytundigooygixy ma Dios ytiy'ajt. Ci'm nijot'ajtcixy jibic-huinma'ñ huidibi oymidzo'yduuni, ypātcixipy ma ajcxy ñinīcx je tzaachypī huidibi Dios ypidacpy miid yi' ajcxy ypocy ycixpi.

²⁸ Co yi jāy ajcxy jadu'n ci'm yhuinma'ñ ti pidaaccixy co ca' yajmij'ada'ñ Dios, paady ycixpi Dios ñajtz'ixīyīi ajcxy. Huen tim tungixy huidibi ajcxy ci'm ñijot'ajtpy, huidibi Dios ca' jāygidāgy. ²⁹ Jāy ajcxy ooy mij jibic-huinma'ñ canaagnax nijot'ajtcixy; yēydijctijc ooy ajcxy jibic-huinma'ñ tungixy; ooy ajcxy migapxtigoy tōxyjāy ajcxy; ooy ajcxy adzojccixy

comeen'ajtin; ooy mi'ijxtinaaygixy ymigügtijc; ca' ajcxy ymigüg ixaangixy; ooy ajcxy yjääyaj'öccixy; ooy ajcxy chiptunaangixy; ca' ajcxy ycapxymidohuaangixy; ooy ajcxy ymigüg huin'ingixy; ooy ajcxy ypiitzcapxcixy; ca' p ajcxy ymigüg ixaangixy. ³⁰ Jäy ajcxy ooy nigapxy ni'ojiy ymigügtijc; ca' ajcxy ixaangixy Dios; ca' ti jäygidaaccixy; ooy ajcxy amij agix ñayjihuiygixy; ooy ajcxy ci'm ñaygömáayigixy; ooy ajcxy cojy macxy jibic-huinma'ñ, ca' ajcxy capxymidoogixy ytaj yteedy. ³¹ Jäy ajcxy ca' y'ayuc-huinjihuiygixy; ca' ajcxy cuydungixy yci'm'ayuc; ca' ajcxy ni pin tzojccixy jihuiygixy; ca' ajcxy ni pin pa'ayoogixy. ³² Jadayaabi jäy ajcxy ñejhuiyb co Dios ti cojy ti macxy ycötujcin co pinjaty tundigooyb jadu'n miid Dios ytiy'ajt, tigooyip ajcxy yjugy'ajtin. Oy ixyipy yi jäy ajcxy janejhuiygixy co padaangixy y'o'cin, huin'it ajcxy jactimtungixy jibic-huinma'ñ, e nañ jadu'n jotcujc ajcxy co jac pinjaty jibic-huinma'ñ tungixy.

2

Dios tiydumb jadu'n nej yi' tzocy

¹ Paady co miich migüg m'ix'ixy mba'ixy ti ytumyby, ti migüg ycapxyp ti anajty pocy mnaymöyii, oy ixyipy ypinjäy ñejpyjäyity. Miich ooy ti pocy m'ixy ma huing jäy, e nañ jadu'n miich ooy mij mdundigoy, tim jadu'n nej yi' ajcxy ytundigooygixy. ² Nejhuiyim co Dios tudägy ytuñ co tzaachytuñ tüg'óciy pinjaty tundigooyb. ³ E miich co migüg m'ix'ixy mba'ixy ti ytumyby ti migüg ycapxyp, nañ jadu'n miich Dios xychaachtuna'ñ. ¿Nej mdijy mdzögip co anajty Dios xytiyduna'ñ? ⁴ ¿Nej ca' mjäygidägy nej Dios mij ooy may'ajt oy'ajt ti tuñ miid miich, nej ooy mij ti xypa'ayoy, mij ti xymimecxtucy? ¿Nej ca' mnejhuiy co Dios mij ooy xypa'ayoy xymimecxtucy, jigix mjothuimbidity nej mdundigoy ma Dios ytiy'ajt? ⁵ Miid co ooy mjotjuuñity mgöjuuñity, ca' ajcxy mjothuimbida'ñ, ca' ajcxy m'ixmadza'ñ nej ajcxy mdundigooygixy. Paady ycixpi Dios huidibi tudägy tumb nigü miich yi' ooy mij xychaachtuna'ñ co anajty xii tiempo ycixy ytigoy, e Dios chaachtunamyb jäy ajcxy miid ypocy ycixpi. ⁶ Co anajty Dios tiyduñ yi naaxhuiñ jäy, chi yajnidagihua'ñ nidüg nidüg nej anajty ti chinäy. ⁷ Nijëjity jäy ajcxy oyjot oyhuinma'ñ tungixy jabom jabom, yjiip'ixpy ajcxy co Dios oybi ymöhuaanigixy, nañ yjiip'ixpy ajcxy co Dios ycömayiib, yjiip'ixyp ajcxy yjugy'ajtin huidibi ca' ycixipy ytigoyipy nimina. Yi jadu'mbi jäy Dios ymöhuamyb jugy'ajtin huidibi ca' ycixipy ytigoyipy nimina. ⁸ Per Dios chaachtunamyb mijcajee yi jäy ajcxy huidibi ca' ycapxymidohuaangixy, huidibi ca' cuydungixy Dios ytiy'ajt, huidibi ajcxy tumb jibic-huinma'ñ. ⁹ Ayo'n tzaachypi ypadamyb tüg'óciy jäy ajcxy huidibi jibic-huinma'ñ ti tuñ. Nañ jadu'n miich judíojäy ajcxy tim jayijp mbadaangixy tzaachypi, pen mdundigooygixp, e chiini yi jacjadyii jäy padaangixy tzaachypi, pen tundigooygixp. ¹⁰ Tüg'óciy pinjaty oyjot oyhuinma'ñ tungixp, Dios ymöhuamyb yi' ajcxy oy'ajtin, nañ cömayaanip yi' ajcxy Dios, etz nañ yajjotcugihuiib ajcxy. Tim jayijp yi judíojäy pada'ñ ajcxy oybi, etz jac'axam yi jacjadyii jäy ajcxy.

¹¹ Dios ca' tiyduna'ñ jäy ajcxy huin'ixpety, quipxyjaty tiyduna'ñ nidüg'óciy jäy ajcxy.

¹² Nidüg'óciy jäy ajcxy huidibi tundigooygixp, Dios yajtigoyaanip ajcxy yjugy'ajtin. Yi jäy ajcxy huidibi ca' miidity Dios ycötujcin huidibi cojaayip, Dios yajpocycähuaanip ajcxy, com ymiid ajcxy Dios ytiy'ajt ma yjot yhuinma'ñ. Yi jäy ajcxy huidibi miid Dios ycötujcin cojay, Dios yajpocycähuaanip ajcxy miid yi' ycötujcin huidibi cojaayip. ¹³ Yi jäy ajcxy huidibi nigoob amido'ijtp co yajcapxy Dios ycötujcin, e ca' ycapxymidoogixy, ca' ycöbiga'nyii Dios jadu'n nej jihuiy ytudägyjäyity. Yi jäy ajcxy huidibi capxymidoob Dios ycötujcin, Dios cöbigaanip co ajcxy ytudägyjäyity. ¹⁴ Yi jäy ajcxy huidibi ca' miidity Dios ycötujcin huidibi cojayip, co ajcxy nijot'ajtcixy oyjot oyhuinma'ñ jadu'n nej Dios tzocy, jadu'n nipaady nej jihuiy ajcxy miidity Dios ycötujcin. ¹⁵ Co je jäy ajcxy oyjot oyhuinma'ñ tungixy, huin'it yajnigüëxiccixy co ajcxy ymiid Dios ycötujcin ma ajcxy yjot yhuinma'ñ. E co paatcixy jibic jot jibic-huinma'ñ, huin'it jibic ñayjihuiygixy. E co patcixy oyjot oyhuinma'ñ, huin'it ooy oy ñayjihuiygixy. ¹⁶ Jada je'du'n je jemybi oybi ayuc huidibi

ngapxhuäcxypich co miinip je xii je tiempo co Jesucristo, miid Dios ycötujcin, tiydunip tüg'óciy jäy ajcxy nej anajty yjot yhuinma'ñ ajcxy miidity, tüg'óciy pinjaty ti tuñ ayüch ameech tijaty.

Je Dios ycötujcin huidibi Moisés yjay jecy'ajty

¹⁷ Miich ajcxy huidibi minamb co mjudiojyäyity, miich ajcxy mmijpidaaccixyp Dios ycötujcin, je jecyip huidibi jaybetyip. Miich ajcxy mnaygömäayigixy co miich ajcxy Dios xyjäy'adyii. ¹⁸ Miich ajcxy mnejhuüyb nej Dios tzocy nej huaad mjäy'ajtcixy. E nañ ti m'ixpicy Dios ycötujcin huidibi ti xyajnejhuüygixy huidibi tiy'ajt jac'oyip. ¹⁹ Miich ajcxy minamb co janch janch co miich ajcxy Dios ytiy'ajt myejci ma yi jäy ajcxy huidibi ca' Dios ytiy'ajt miidity, jadu'n nipaady nej jihuüy tüg huintzpi mhuijtzoyö, e nañ jadu'n nipaady nej jihuüy mgodicxy je jäy ajcxy huidibi agootztuum tzinaayb. ²⁰ Miich ajcxy judíojäy myaj'ixpijcpy yi jäy ajcxy huidibi ayoob, huidibi ca' ti tiy'ajt nejhuüygixy, e mgapxhuijy yi jäy ajcxy huidibi ca' yhuinma'ñymejtcixy. Miich ajcxy minamb co m'ayuc etz mdiy'ajt mbaatcixy ma Dios ycötujcin huidibi jaybetyip. ²¹ Miich ajcxy myaj'ixpijcpy jacjadyii jäy ajcxy Dios ytiy'ajt. ¿Nej co ca' ci'm mguydungixy nej ti myaj'ixpijccixy? Myaj'ixpijcpy ajcxy jacjadyii jäy co ca' huaad ymeetzcixy, e miich ci'm ajcxy meetzp. ²² Miich ajcxy myaj'ixpijcpy jacjadyii jäy co ca' huaad migapxtigoy töxyjäy ajcxy, e ¿miich ajcxy nej co mmigapxtigooygixy töxyjäy ajcxy? Miich ajcxy ci'm minamb co ca' huaad yajhuindzigüy tzaaboch quipychech, e miich ajcxy ci'm mdzachmeech je meen ma je tzajptijc ma je quipychech y'ity. ²³ Miich ajcxy mdzachnaygömäayigixy co mguydungixy Dios ycötujcin. Miich ajcxy m'ixtijy Dios miid co ca' ajcxy mguyduni yi' ytiy'ajt. ²⁴ Paady jadu'n jaybety miiñ ma Dios ñecy, ma jadu'n ymina'ñ: “Com co miich ajcxy mdundigooygixy, paady ycixpi yi jacjadyii jäy ajcxy nigapxy ni'ojüy Dios yxii.”

²⁵ Co ajcxy mguyduunip Dios ycötujcin, huin'it Dios xytunipcuendi co miich ajcxy miidity je tiy'ajt ma mninix co Dios xyjäy'adyii. Co ca' ajcxy mguyduunip Dios ycötujcin, huin'it Dios ca' xytunipcuendi co miich miidity je tiy'ajt ma mninix co Dios xyjäy'adyii. Jadu'n nipaady nej jihuüy ca' mdiy'ajttüyity. ²⁶ Co yi jacjadyii jäy ajcxy huidibi ca' miidity tiy'ajt ma ñinix, e cuyduni ajcxy Dios ytiy'ajt, jadu'n nej ajcxy ytiy'ajttüyity. ²⁷ Yi jacjadyii jäy co ajcxy cuyduñ Dios ytiy'ajt, yi' ajcxy capxpaady'idipy ma Dios. E miich ajcxy judíojäy mbocycähuiip miich ajcxy, oy miich ajcxy mjamiidity ixypy Dios ycötujcin huidi cojaayip, pen ca' mguydungixy. ²⁸ Je ijxpejt janchypi co pinjaty Dios yjäy'ajtyp, canan je' je ijxpejt huidibi ymiid ma ninix. E nañ jadu'n canan je' je tiy'ajttühuüi cötujcin huidibi jäy cuydun jecy'ajty. ²⁹ Je ijxpejt janchypi co pinjaty Dios yjäy'ajtyp, je' je' je ijxpejt huidibi ymiid ma yjot yhuinma'ñ, je oyjot oyhuinma'ñ huidibi ymiid, je ijxpejt co je Espíritu Santo ti yajhuächyüi yjot yhuinma'ñ, canan je' je tiy'ajt co ti cuyduñ je jecyip cötujcin huidibi cojay ijtp. Yi jadu'mbi jäy ajcxy cömay'idipy ma Dios, e ca' ycömay'ida'ñ ma jäy ajcxy.

3

¹ Pen tiy'ajt jadu'n nej nmına'ñich, ¿ti jäygidaacin yi judíojäy ajcxy ymiid ma Dios huidibi yi jacjadyii jäy ajcxy ca' miidity? ¿Ti jäygidaacin ajcxy ypatpy co ajcxy miidity tiy'ajt ma ñinix co Dios yjäy'adyii? ² Yi judíojäy ooy canagnax oy'ajtin jamiidity. Tim jayijp Dios yajni'bijci ajcxy yi' ycötujcin yi' y'ayuc huidibi cojaayip. ³ ¿Nej mdiy co Dios ca' cuyduna'ñ yi' y'ayuc miid yi judíojäy ajcxy miid co nijëjty judíojäy ca' cuyduñ yi' ycötujcin? ⁴ Dios ca' jadu'n huinma'ñ miidity nej jäy ajcxy huinma'ñ miidity. Oy ixypy nidüg'óciy jäy y'aniidaaccixy, Dios ca' y'aniidäga'ñ nimina. Paady jadu'n jaybety miiñ ma Dios y'ayuc co David jadu'n yminañ:

Ñejhuühuipy jäy ajcxy co miich, Huindzin Dios, tudägy mguyduñ yi m'ayuc. Ca' huaad pinjaty ymina'nip co ca' miich mguyduñ yi m'ayuc.

⁵ Pen Dios cömaybidzimipy miid ajt nbocy ycixpi, ¿nej tiy'ajt jadu'n nej jäy yminaangixy co Dios ca' oy ytuñ, co xychaachytuunim miid ajt nbocy ycixpi? ⁶ Ca'

yjadu'nity. Co ixypy yjadu'nity, Dios ca' yi' tiydunipy naaxhuiñjyá miid ajcxy ypocy ycixpi.

⁷ Co ixypy ytiy'ajtiy jadu'n nej jáy ymínaangixy co Dios ooy yjotcujcity co ca' xychaachtunipyich miid nbocych ycixpi, jac'oy co ixypy ndundigooyich, jigix Dios janch ycomaybidzimipy. ⁸ Jac'oy ixypy nmínaaním: “Tzoc tundigooyim jigix jébi Dios comay ypidzimipy.” Ixti nijéjity jáy ti xyñíhuambetyich co íich jadu'n ti nmína'ñich. Ca' jadu'n nmína'ñich co Dios jáy tzaachtunipy ninigoob. Dios chaachtunipy pocyjáy ajcxy, com paatip ajcxy jadu'n yi' tzaachypi.

Nidüg'óciy íich ajt nbocymíidity

⁹ ¿Nej janch jadu'n co íich ajcxy huídibi judíojáy, jac'oyjáy íich ajcxy ca'ydi yi' jacjadyii jáy ajcxy? Ca' yjadu'nity, ca' íich ajcxy njac'oyjáyity. Com ti jayjip nyaj'ixpicyich co tüg'óciy jáy ajcxy yajpaady pocymíid, yi' judíojáy, etz nañ jadu'n jacjadyii jáy ajcxy.

¹⁰ Com jadu'n jaybety miín ma Dios ñecy ma jadu'n ymína'ñ: Ca' ji ni tüg jáy tudácp, ni tüg.

¹¹ Ca' ji ni pin huídibi huinjíhuíyb Dios ytiy'ajt. Ni pin huídibi ixtaayb Dios ytiy'ajt.

¹² Nidüg'óciy jáy ti ixmajtzcixy Dios ytiy'ajt. Quipxy ycapxy ajcxy ytumyb co ytundigooygixy. Ca' ji ni pin, pin huádz oy yjot oy yhuinma'ñ tumb, ca' ji ni tüg.

¹³ Yi jáy ajcxy ooy ycapxtigooygixy, oy ajcxy yhuin'ííñ miid y'ayuc. Jadu'n ajcxy yöcpajc nipaady nej tüg ócpi jut huídibi ahuádz. Ooy ajcxy yajtzachíy miid y'ayuc jadu'n nej jíhuíy tza'ñ chüch.

¹⁴ Ooy ajcxy ycapxtigooygixy. Ooy ajcxy jíbic ayuc capxcixy.

¹⁵ Miid yinjaty huenjatypi ayuc, mic'amy ymigüg yaj'o'ccixy.

¹⁶ Ma ajcxy yhuídity ooy midundigooygixy ymigüg, e nañ yecy ajcxy tajin mayin.

¹⁷ Ca' ajcxy nejhuíygixy nej huaad chinaaygixy jotcujc, ca' ma ti tzíp ti capxy.

¹⁸ Ni cahuinmaaygixy nej Dios tzigíygixipy.

¹⁹ Tüg'óciy ayuc ycojaayity ma Dios ycötujcin necy, mic'ajt miidpi miid yi' jáy ajcxy huídibi yajmij'ajtp je cötujcin. Dios ti pidágy yi' ycötujcin, jaydēbi pinjaty tundigooyb, huaad ca' ti aníi tuñ ma Dios. Dios tytydunipy tüg'óciy jáy ajcxy miid yi' ycötujcin. ²⁰ Dios ca' capxpada'ñ co ytudágyity, miid co ti cuydunyii ycötujcin. Dios ti pidágy ycötujcin jaydēbi nejhuíyím co ajt nbocymíidity.

Yi alma nídzoocin, hue' yajpaady miid mibijcin

²¹ Jadachambi Dios xyajnejhuíyím jemybi tiy'ajt jadu'n nej tudágy'ajtin jēb nbaatim ma yi', e jada jemybi tudágy'ajtin tiy'ajt, ca' yi' yjadu'nity nej yi' tiy'ajt huídibi yajpatp ma Dios ycötujcin jecy'ajtpyi. Per yi' Dios y'ayucnajtzcaxíybi ñecy etz Dios ycötujcin necy yecy tiy'ajt jecy'ajty co Dios xymóhuaaním tudágy'ajtin. ²² Jadu'n Dios yaj'ahuimbidaangixy tudágy tüg'óciy jáy huídibi mibijcp Jesucristo, ca' ñejity pinjáy ajcxy, pen judíojáy o pen ca' judíojáy ajcxy. ²³ Com nidüg'óciy naaxhuiñjyá ti ytundigooygixy. Ni tüg jáy yhuádz'ajtin ycanaybadyii miid Dios yhuádz'ajtin y'oy'ajtin.

²⁴ (Miid co nidüg'óciy jáy ytundigooygixy), paady ycixpi Dios mijmay'ajt mij'oy'ajt tuñ ninigoob miid tüg'óciy jáy ajcxy, e Jesucristo ti cojuydáy tüg'óciy ajcxy ypocy, e jadu'n yaj'ahuimbity tudágy nidüg'óciy jáy ajcxy huídijaty mibijccixp Jesucristo. ²⁵ Dios yquejx y'ung ya naaxhuiñ, jaydēbi huinmeecxip jáy ajcxy ypocy, miid co Jesucristo ti y'ögy miid ajcxy ypocy ycixpi. Dios yhuinmeecxip jáy ajcxy ypocy co ajcxy mibigipy Jesucristo. Jayjip ca'ni anajty Jesucristo miín ya naaxhuiñ, Dios ooy mímecxtujcy jáy ajcxy, ca' anajty miidity jotcöduuyb jáy ajcxy ypocy. ²⁶ Jadachambi xii tiempo Dios ti yaj'oyíy jadu'n nej jēb huinmeecxipy jáy ajcxy ypocy, e jadu'n yaj'ahuimbity ajcxy tudágy ma yi' yhuinduu. Jadu'n Dios tuñ jigix ñiguéxigipy co Dios tudágy yi', e tudágy'adaamni yi', co cōbicy jáy, yi' pinjaty mibijcp Jesucristo.

²⁷ ¿Ti huaad jáy ajcxy tungixy huídibi jēbi miid ñaygōmayíyb ma Dios? Ca' ni ti. ¿Na'amy co yjadu'nity? ¿Nej jēbi ajcxy ñaygōmayíyb miid co yajmij'ajtcixy Dios ycötujcin? Ca' yjadu'nity. Ca' huaad ñaygōmáygixy c'i'm, com Dios ti yaj'ahuimbity

jäy ajcxy tudägy huidibi mijpidacp Jesús. ²⁸ Paady nmına'ñich co jäy ajcxy y'ahuimbity tudägy co ajcxy mibicy Jesucristo, e canan co janch ypaad jacuydungixy canaag cötujcin.

²⁹ ¿Nej miich ajcxy mdijcixy Dios ytuñ miid ac yi'yi judíojäy ajcxy, e ca' jacmiid pinjaty? Ca' yjadu'nity. Dios tuumb miid janch nidüg'óciy jäy ajcxy. ³⁰ Ji tügpajc Dios, e yi' tú'ciy ytuñ miid judíojäy, etz nañ jadu'n jacjadyii jäy ajcxy. Dios yaj'ahuimbijtaayb tudägy nidüg'óciy jäy ajcxy co ajcxy mibijccixy Jesucristo. ³¹ Co jadu'n nbaatim ndudägy'ajtin miid co nmibijcin Jesucristo, ca' nmınaanim Dios anajty yi' ycötujcin je jecyip nyajcödigooyim. Hue' janchtiy nigí anajty nmic'ajtmooyim Dios ycötujcin.

4

Je ijxpejt huidi Abraham yejc

¹ ¿Nej n'ocmınaanim? ¿Ti oybi ti paady ma Dios je Abraham iich ajt nmij'ap nmijteedy? ² Co ixypy Dios Abraham tudägy ti ixpy, miid co oybi ti tuñ, jëbi Abraham ixypy ñaygömayii. Per ca' huaad ci'm ñaygömayii ma Dios. ³ Jadu'n jaybety ymiin ma Dios ñecy ma jadu'n ymina'n: “Abraham ymijpidaaci Dios, e paady Dios jadu'n cöbijcy Abraham jadu'n nej tüg tudägyjäy.” ⁴ Je jäy huidibi ymuju'n patp miid ytung ycixpi, jada meeñ huidibi ymuju'n'ajtpy ca' nigoo ñimöyii, hue' tim paatip jadu'n miid ytung ycixpi. ⁵ Yi jäy huidibi ca' jipp'ixy co tudägy'ajtin pada'n ma Dios miid oy'ajtin ycixpi huidibi ytumyb, jëyi ymibijcypy ymijpidacpy co Dios yaj'ahuimbida'nyii tudägy. Yi jadu'mbi jäy tudägy'ajtin ypadamy miid ymibijcin ycixpi. ⁶ Jaybety ymiin ma Dios ñecy co je David jecy'ajty nimiycy tüg jäy huidibi ooy anajty jotcujc ñayjihuiyii miid co Dios ti y'ixyii jadu'n nej jihuiy ytudägyjayity miid ymibijcin ycixpi, e ca' nmınaanim miid ooyjäy'ajtin ycixpi huidibi ytumyb. ⁷ David jadu'n ymina'n:

Jotcujc je jäy ajcxy huidibi ypocy ti yhuinmecxyii, huidibi ypocy ti yajtigoyii.

⁸ Jotcujc je jäy huidibi Dios cöbijcip jadu'n nej jihuiy ca' ypocy ymiidity.

⁹ ¿Nej janch tiy'ajt jadu'n co jada jotcujc'ajtin huidibi David ñimiycy jecy'ajty, co ac yi judíojäy yi' ajcxy padaamb huidijaty miid tiy'ajt ma ñinix co Dios yjäy'adyii? Ca' yjadu'nity, yi jacjadyii jäy nañ jadu'n yi' ajcxy pada'n jotcujc'ajtin. Ti nmınaangixyich co Abraham ymibijci Dios, e Dios ycöbijci jadu'n nej jihuiy ytudägyity. ¹⁰ ¿Nej mdijy Dios ycöbijci Abraham jayijp ca' anajty yajtiy'ajttiyñi? o ¿ti anajty yajtiy'ajttiy? Dios ycöbijc Abraham jadu'n nej jihuiy ytudägyjäyity ca'ni anajty pidacy tiy'ajt ma ñinix co Dios yjäy'adyii. ¹¹ Jayijp anajty Abraham ti mibicy Dios, e ti anajty Dios ycöbigyii. Jac'axam Dios Abraham je cötujcin mooy co huen tiy'ajttihuiy y'ung etz y'ap y'oc. Je' je' ijxpejt'ajtp co Dios anajty jayijp ti ycöbigyii jadu'n nej jihuiy ytudägyjäyity, ca'ni anajty ymöyii cötujcin. Co Dios jadu'n ytuñ miid Abraham jadu'n nipaady nej jihuiy Abraham nmijteedy'ajtim iich ajt nidüg'óciy huidibi cham mibijcp Jesús. ¹² Abraham nañ jadu'n ñimijteedy'ajtyp yi judíojäy huidibi mibijcp mijpidacp Dios tim jadu'n nej yi' mibicy anajty Dios, jayijp ca'ni anajty miidity tiy'ajt ma ñinix co Dios yjäy'adyii. Jadu'n nipaady nej jihuiy Abraham ca' nmijteedy'aty yi judíojäy huidibi ca' mibicy Dios.

Je huidibi Dios ti xyaj'ahuaniyim ti ycixy yca'px miid je mibijcin

¹³ Miid co Abraham etz y'ap y'oc ymibijcypy ymijpidacpy anajty ajcxy Dios, e paady anajty Dios yaj'ahuimbidaánigixy tudägy, e paady Dios nimay Abraham co yi naaxhuiñybi yi' ajcxy je' adaanip. Canan jadu'n ajcxy Dios ñimayi co ymöhuáanigixy je naaxhuiñybi miid co anajty nidüg'óciy ajcxy ti cuydungixy Dios ycötujcin. ¹⁴ Co Abraham etz y'ap y'oc padaangixy je naaxhuiñybi huidibi yaj'ahuaniyi, miid co ajcxy ti cuydundaayi Dios ycötujcin, paady naadig'ajtp ixypy co nmibijcin co Dios xyaj'ahuimbidaanim tudägy. E nañ naadig'ajtp ixypy co Dios je Abraham nimay: “Je naaxhuiñybi miich je' mje'adaanip, com ti xymibicyich.” ¹⁵ Je pinjaty mijpidaacp Dios ycötujcin je jecyip, Dios yi' tzaachytunaanip, com ca' cuydundaaygixy. Pinjaty ca' miidity Dios ycötujcin huidibi jaybetyip, ca' yi' midundigooygixy jadayaabi cötujcin.

¹⁶ Miid co Abraham anajty Dios ti mibicy, paady ycixpi Dios ñimaayi co je naaxhuiñybi yi' je'adaanip. Jadu'n Dios may'ajt tuñ miid Abraham, jaydebi tüg'óciy pinjaty mibijcp Dios, tim jadu'n nej Abraham mibijcy Dios, jébi ajcxy paatcixy yi' oy'ajtin huidibi Dios yajnimay Abraham co möhua'ñ je oy'ajtin huidibi yegamyb ninigoobi. Dios ycuydunamyb yi' y'ayuc miid tüg'óciy jäy huidibi mibijcp Dios, tim jadu'n nej Abraham anajty mibicy Dios, canan yí'yi judíojäy ajcxy padam oy'ajtin, com Abraham ijxpejt yejc ma tüg'óciy jäy ajcxy. ¹⁷ Ma Dios yhuinduu jadu'n nipaady nej jihuüy Abraham ich ajt nmij'ap'ajtim nmijteedy'ajtim nidüg'óciy huidibi mibijcp Dios, com Abraham nañ jadu'n ymibijcyp anajty Dios. Com jadu'n jaybety ymiiñ ma Dios ñecy co Dios jecy'ajty jadu'n nimay Abraham: “Ich miich nyajñibijcyp co miich mnimij'ap'adamyb mnimijteedy'adamyb tüg'óciy je mayjäy huindu'mybi naax huindu'mybi cajp.” E Dios ycuydunipy yi' y'ayuc com mic'ajt miid, ixti jaydebi yajjugypigipy jadüg'oc jäy tibi y'óccixy. E nañ mic'ajt miid jaydebi ane'min pidägy co huen yji'adipy huidijaty ca' ca'tni.

¹⁸ Miid co Dios anajty ti ñimäyii co ymiid'adamyb may y'ap y'oc, paady ycixpi Abraham ti jijp'ixy anajty co Sara anajty y'ung'ixa'ñ. Canaag jimijt anajty jajijp'ixy co huen y'ung paadip. Ti anajty tiempo ñajxni mina y'ung'ixipy. Hue' Abraham ymibijc huidibi anajty Dios ti yajnimäyii co yi' miid'idamyb may'amy y'ap y'oc. Paady ti ni'ap'aty ti nideedy'aty may'amy y'ap y'oc. ¹⁹ Abraham ti anajty ymic'ajt ycixni com ti anajty ymijäyiyiñi. Ymiid anajty migo'px jimijt, e nañ yi' ytöxyijc Sara ni tüg anajty ti yca'ung'ixy, per Abraham yjacmibijcyp anajty co Dios cuyduna'ñ y'ayuc miid yi'. ²⁰ Abraham ca' anajty ixmach yi' ymibijcin jadu'n nej anajty Dios ymiidity ymic'ajt jaydebi cuydunip yi'y'ayuc. Chi Abraham ibaty capxpaty Dios. ²¹ Com Abraham ti anajty huinma'ñ ypidägy ma Dios co yi' ymiid ymic'ajt jaydebi ycuyduniyb yi' y'ayuc huidibi yaj'ahuaniiy. ²² Com Abraham ymijpidaacip anajty Dios y'ayuc, paady Dios anajty ti cöbicy Abraham, e jadu'n anajty ti yajnaxy nej jihuüy ytudägyjäyity.

²³ Dios ymoy Abraham jada y'ayuc huidibi jaybety, canan jëda'ajty Abraham yajmoy, nañ yajmoyday mayjäy. ²⁴ Nañ jadu'n jaybety miñ jada ayuc miid ich ajt ycixpi. Dios nañ xycöbiganim jadu'n nej jihuüy ajt ndudägyjäyity miid co nmibijcim Dios huidibi ti yajjugypijcy anajty jadüg'oc ajt nHuindzin Jesucristo. ²⁵ Dios yciyejc Jesús huen yaj'ögyii miid ajt nbocy ycixpi. E nañ Dios yajjugypijc Jesús jadüg'oc jaydebi xyaj'ahuimbijtim tudägy ma Dios.

Je nej yhuimbizimni co Dios xycöbijcim tudägyjäy

5

¹ Miid co nmibijcim nmijpidaacim ajt nHuindzin Jesucristo, paady Dios ti xyaj'ahuimbijtim tudägy. E miid co Dios ti xyaj'ahuimbijtim tudägy, paady jotcujc n'ijtim miid Dios. ² Co nmibijcim nmijpidaacim Cristo, chi nbaatim je may'ajt je oy'ajt huidibi Dios ytumyb miid ich ajt, e jadu'n oy n'ijtim miid Dios, ca' ma ti tzip. Nañ ooy njotcugiyim, miid co njijp'ijxim co nbadaanim Dios y'oy'ajtin. ³ Canan jëda'ajty nmijotcujc'ajtim co nbadaanim Dios y'oy'ajtin, nañ jadu'n tzoc mijotcujc'ajtim ayo'n tzaachypi. Com nejhuüyim co nminajxim nyajnajxim tzaachypi, huin'it jébi nyajtunim mecxtujcin. ⁴ E co nyajtunim mecxtujcin, cömay najxim ma Dios, e co anajty cömay ti nnajxim, chi njijp'ijxim co nbadaanim oy'ajtin ma Dios. ⁵ Com njijp'ijxim co nbadaanim Dios y'oy'ajtin, chi ca' ndajim nmayim com Dios ti yi' yEspiritu Santo xy'adigiyim xyjottigiyim huidibi xyajnejhuüyim jadu'n nej Dios xychojxim xyjihuyim.

⁶ Jecy'ajty co anajty ca'ni Jesucristo ymiñ, je naaxhuiñyjäy ca' anajty mic'ajt miidity nej ci'm y'ahuimbijtcixipy tudägy. Co yhuaad'ajtni je xii je tiempo huidibi Dios ti yaj'ixtägy, huin'it Cristo y'o'cy miid ich ajt nbocy ycixpi miid co ndigooyim miid Dios ytiy'ajt. ⁷ Co ixipy n'ijxtaayim pinjaty codinähuiip tüg jäy tudägyi ma yi' o'cin, ca' ni pin nbaatim. Co ixipy n'ijxtaayim pinjaty codinähuaamyb tüg jäy huidibi ooy ycomayity

ma yi o'cin, ca' yjeczyty co nbaatim tög metz. ⁸ Per Dios yajniquëxëcyp jadu'n nej xychojcm xyjihuiiyim mijcajee co quejxy Cristo huen o'cy miid ajt nbocy ycixpi, oy anajty ich ajt ooy njacpocytuunim. ⁹ Cristo ti xyaj'ahuimbijtim tudägy co ñi'py ti temy ti yocy miid ajt nbocy ycixpi, e nañ Cristo niigi may'ajt tuna'ñ miid ich ajt ycixpi co anajty xyajnidzögaanim ajt n'alma, jadu'n nej Dios tzaachytuna'ñ naaxhuiñjyä miid ajcxy ypocy ycixpi. ¹⁰ Co anajty ca' Cristo ymiiñi ya naaxhuiñ, huin'it anajty nmidzip'ajtim Dios. Je tzip capxy ti Dios yaj'oyiy co quejxy y'ung ya naaxhuiñ, e y'o'cy miid ajt nbocy ycixpi. Miid co Cristo xycodinaayim ma yi o'cin, paady niigi xypubejtim xypudigiiyim cham co yajpaady juugy. ¹¹ Canan jada'ajty co Jesucristo xyajnidzögaanim ajt n'alma, nañ jadu'n tzoc xondaacim miid co n'ijtim miid Dios, miid je may'ajt huidibi ajt nHuindzin Jesucristo ti tuñ miid ich ajt ycixpi co yaj'oyiy je tzip nej anajty Dios nmidzip'ajtim, jëbi jotcuyc n'ijtim miid Dios.

Adán etz Cristo

¹² Miid jada ycixpi co yi pocytunii chondacy jecy'ajty ya naaxhuiñ miid tögpi jäy. E co jäy ytundigoy oga'n miid Dios, paady ycixpi je o'cin ytigiiy ya naaxhuiñ. Miid co tög'óciy jäy midundigooygixy Dios, paady tög'óciy jäy patcixy yi o'cin. ¹³ Janch tiy'ajt jadu'n co jäy ajcxy ytundigooy jecy'ajty jayijp ca'ni anajty Dios yecy yi' ycötujcin cojaaybi, e co ca' jäy anajty ajcxy cötujcin miidity jecy'ajty, paady ca'pin tiyduñ ajcxy nej ajcxy ytundigooy. ¹⁴ Ca' ñejity, oy ajcxy anajty ca' miidity Dios ycötujcin, nañ jadu'n y'o'ctay ajcxy, chondacy miid Adán, ixti yja'ty ma Moisés yxi ytiempo. Nañ o'ctay jäy ajcxy huidibi tigachjaty tundigooy, ca' yjadu'nity nej Adán oga'n ytundigooy. Ich ajt nninix ymiid je jibicpi huidibi nbaatim ma Adán. Per ajt njemyjot njemyhuinma'ñ nbaatim ma Cristo.

¹⁵ Je pocytunii huidibi Adán yajtzondac, ca' naybadyii miid je tudägy'ajtin huidibi Dios ti xyñimooyim. Miid je pocytunii ycixpi huidibi tög jäy ti yajtzondägy, tög'óciy jäy öcin ti paady. Dios miid tög yëydjc, je Jesucristo, mijmay'ajt tuñ miid jäy ajcxy ycixpi co yaj'ahuimbijtcixy tudägy, chi mayjäy tudägy'ajtin ti paady. ¹⁶ Per je tudägy'ajtin huidibi Dios xyñimooyim, ca' jadu'n naybadyii miid huidibi Adán ytuun. Miid co Adán ytundigoy tögtecy miid Dios, paady ycixpi mayjäy o'cin ti paady miid tög pocy ycixpi. Miid co Dios ti xyñimooyim tudägy'ajtin miid Jesucristo, paady mayjäy tudägy'ajtin y'oy'ajtin ti patcixy huidibi mibijcp Cristo. ¹⁷ Miid co tög jäy capxycömidodacy Dios, paady tög'óciy jäy ti patcixy yi o'cin. Miid co tög jäy, je Jesucristo, may'ajt oy'ajt tuñ co xyaj'ahuimbijtim tudägy, paady tög'óciy jäy ajcxy huidibi mibijcp Jesucristo ypadaangixyp jotcuyc'ajtin etz nañ chinähuaangixy jiiby tzajpjoty ma Jesús y'ane'my.

¹⁸ Miid co tög jäy ytundigoy oga'n, paady nidög'óciy je mayjäy ypocycäy ajcxy, e patcixy yi o'cin. Nañ tim jadu'n miid tög jäy huidibi ti chinäy tudägy, Dios mayjäy yaj'ahuimbijty ajcxy tudägy, e ti patcixy yjugy'ajtin huidibi ca' ycixipy ytigoyipy nimina xi. ¹⁹ Miid co tög jäy capxycömidodacy Dios, paady tög'óciy jäy ti patcixy je pocy. Nañ miid co tögpi jäy capxymidoy Dios, paady je mayjäy tudägy'ajtin ti patcixy huidibi mibijcpi Jesucristo.

²⁰ Co Dios moy jäy ajcxy yi' ycötujcin huidibi cojaayip, chi niigi jäy ajcxy nejhuiygixy co ypocytungixy. Je may'ajt oy'ajt huidibi Dios ytumyb, niigi yi' y'oyity, ca'ydi je mijpocy huidibi jäy ajcxy ytungixyp. ²¹ Tim jadu'n nej co jäy ypocytungixy, huin'it ajcxy pocymiid chinaaygixy, ixti mabaad anajty y'öccixy miid ypocy ycixpi. Nañ tim jadu'n co Dios may'ajt tuñ co yaj'ahuimbity jäy ajcxy tudägy, huin'it Dios ane'my yi' ajcxy chinaayin miid tudägy huinma'ñ, etz nañ xymöhuaanim jugy'ajtin huidibi ca' ycixipy ytigoyipy nimina, co nmijpidaacim ajt nHuindzin Jesucristo huidibi yjugy'ajtin yejc miid ajt nbocy ycixpi.

O'cy miid yi pocy ycixpi, jugy'aty miid Cristo ycixpi

6

¹ ¿Nej n'ocmīnaanīm? ¿Tzoc ooy nīgi tundigooyīm jīgix Dios nīgi may'ajt tunipy mīid ĩch ajt? ² Ca' jadu'n ytiy'ajtıty, ca' huaad njacpocytuunīm. Co nmībıjcm Jesucristo, chi jadu'n nipaady nejıhuıy ti n'o'cim, e cham ca' n'ıjtım pocymııd. ³ ¿Nej ca' mnejhuııygıxy jada tiy'ajt? Co nniıbejtım mııd Jesucristo yxıı, chi n'ıjtım mııd Jesucristo. Jadu'n nipaady nej jıhuıy ti n'o'cim quıpxy mııd Cristo co yi' y'o'cy mııd ajt nbocy ycıxpı. ⁴ Co ĩch ajt nniıbejtım jadu'n nipaady nej jıhuıy ti n'o'cim, e ti nnaaxtıgııyım quıpxy mııd Jesucristo. Dios Teedy mııd ymic'ajtıın oybı yajjugypıjcy Cristo co anajty ti y'ögy, chi Cristo paty jemybı jugy'ajtıın, nañ jadu'n ĩch ajt ti nbaatım jemybı jugy'ajtıın quıpxy mııd yi', paady copıcy ndzınaayım mııd jemybı jot jemybı huınma'ñ.

⁵ Co nmībıjcm Jesucristo, chi n'ıjtım mııd yi', co yi' ti y'ögy, jadu'n nipaady nej jıhuıy ti n'o'cim quıpxy mııd yi'. Co Jesucristo yjugypıjcy mııd jemybı yjugy'ajtıın, nañ jadu'n ĩch ajt nbaatım jemybı jugy'ajtıın quıpxy mııd yi'. ⁶ Nejhuııyım ĩch ajt nej anajty jıbic-jot jıbic-huınma'ñ nmiıd'ajtıım jayıjp'aty ca'ni anajty nmībıjcm. Jadu'n nipaady nej jıhuıy ajt njıbicjot njıbic-huınma'ñ ti y'ögy quıpxy mııd Cristo co yi' y'o'cy cruudzcıxy. Cristo ti y'ögy mııd ajt nbocy ycıxpı, jıgıx jėbi n'ıjxmajtıım pocytunıı huınma'ñ, etz jıgıx jėbi je pocytunıı ca' xyjac'ane'mım ajt njot nhuınma'ñ. ⁷ Com pınjaty ti y'ögy, yi' ypocytunıı ca' ti mic'ajtı jacmııdıty ma yjot yhuınma'ñ. ⁸ Pen jadu'n nipaady nej jıhuıy ti n'o'cim quıpxy mııd Cristo, paady ndzınähuaanım njugy'adaanım quıpxy mııd yi'. ⁹ Nejhuııyım co Cristo ti yjugypıjcy co y'o'cy, e ca' yi' y'öga'ñ jadüg'oc. Yi' o'cin ca' ti mic'ajtı jacmııdıty ma Jesucristo. ¹⁰ Co Cristo ti y'o'cy mııd jäy ypocytunıı, chi y'ögy tüg tecypajc mııd nidüg'öcy jäy ajcxy ycıxpı. Co Jesucristo yjugypıjcy, chi tüg'öcy huıdıbı yi' ytumyb ma yi' chinaydac yjugy'ajttac, yi' ytumyb mııd Dios ycıxpı. ¹¹ Nañ jadu'n miıch ajcxy mhuınma'ñypıdaaccıx jadu'n nej jıhuıy ti m'öccıxy, e yi' ypocytunıı ca' ti mic'ajtı jacmııdıty ma miıch ajcxy mdzınaayın. E jadachambı xıı tıempo tzınaaygıx mııd Dios ycıxpı quıpxy mııd Jesucristo ĩch ajt nHuındzın.

¹² Paady ycıxpı ca' huaad xy'ane'mgıxy je jıbic-huınma'ñ huıdıbı ajcxy mnııncx yjanıjot'ajtpy. ¹³ Ca' huaad mgıyejccıxy yi' mnııncx ma pocytunıı. Naygıyéjcgıx ma Dios, ıxmajtızcıx yi' pocytunıı. Jadu'n nipaady nej jıhuıy ti m'öccıxy, e ti mjugypıjccıxy jadüg'oc. Hue' janchtıy cıyejccıx yi' mnııncx ma Dios, jaydėbi mdzınaaygıxıpy mııd ajcxy tudägy mjot mhuınma'ñ, e cuydungıx Dios chojcin. ¹⁴ Jadachambı xıı tıempo ca' miıch ajcxy mdzınaaygıxy pocymııd, jadu'n nej jecy'ajty ajcxy mdzınaaygıxy co anajty ajcxy mguydungıxy Dios ycötujcin je jecyıp. Hue' janchtıy tzınaaygıx mııd Dios ycıxpı, com Dios mıj may'ajt ti tuñ mııd miıch ajcxy.

Tüg ıjxpejt huıdıbı yajpatp ma n'ıjtım yajtuñ

¹⁵ ¿Tı huaad nduunım? ¿Nej jėbi huaad njacpocytuunım? Com Dios mıjmay'ajt ti tuñ co ti jöch ajt nbocy etz nxıhuın, e Dios ycötujcin, je jecyıp, ca' xyjacyajpocycähuım. Ca' huaad njacpocytuunım. ¹⁶ ¿Mnejhuııyb miıch ajcxy jada tiy'ajt? Co ıxyıpy pınjaty ñaygıyegıı co ytuna'ñ mııd tüg huındzın huıdıbı mic'ajtımb, copıcy co je tumbı capxymıdohuıpy je yhuındzın. Nañ tım jadu'n nipaady mııd pocytunıı. Pen mnaygıyejcp mııd pocytunıı, huın'ıt anajty pocy xy'ane'my ma mdzınaayın, ıxtı mabaad anajty m'ögy mııd mbocy ycıxpı. Co mnaygıyéjcgıxıpy ma Dios, huın'ıt ajcxy mgapxymıdohuıpy Dios, e mdzınähııp ajcxy tudägy. ¹⁷ Jecy'ajty miıch ajcxy anajty pocy xy'ane'mgıxy, co jıbic-huınma'ñ mdungıxy. Nyajnaxpyıch jäygıdaacın ma Dios co jadachambı tıempo ti mgöbıjccıxy cıxyjot huınıjot Dios ytiy'ajt huıdıbı xyaj'ıxpıjccıxp, e mgapxymıdoogıxy Dios. ¹⁸ Cristo ti xyaj'a'oyııyı ajcxy mjot mhuınma'ñ, ca'ydı mjactzınaaygıxy pocymııd. Tı mhuınma'ñ mbıdaaccıxy co mgapxymıdohuaangıxy Dios e mdzınähuaangıxy tudägy. ¹⁹ (Ngapxhuııpyıch miıch ajcxy cham mııd naaxhuııyjäy y'ayuc ytiy'ajt, com ca' yajxon mhuınjıhuııygıxy Dios y'ayuc ytiy'ajt.) Jadu'n nej jecy'ajty co ca' anajty nmībıjccıxy Cristo, ooy anajty mnaygıyéjcgıxı xıı ya ma jıbic-huınma'ñ,

e mdundigooygixy xii ya miid mninix. Ooy miich anajty ajcxy miidty jibicpi ma mjet mhuinma'n, ooy anajty mdundigooygixy. Jadachambi xii tiempo naygyéjcgix ma Jesucristo, jigix jébi huaad mdungixy miid tudägy jot tudägy huinma'n, etz jigix jébi huaad mdzinaaygixy miid huädz jot huädz huinma'n.

²⁰ Co anajty yi jibic jot jibic-huinma'n xy'ane'mgixy, chi ca' je oyjot oyhuinma'n anajty xy'oc'ane'mgixni. ²¹ ¿Ti jotcujc'ajtin miich ajcxy ti mbaatcixy co jibic jot jibic-huinma'n mdungixy huidibi jadachambi tiempo mdzöydu'n'ajtip ajcxy? Yi jibic jot jibic-huinma'n xyyajnicxp ajcxy ma yi o'cin. ²² Jadachambi xii tiempo Dios ti yaj'oyiy nej jébi m'ixmajtcixipy yi pocytunii, ca' huaad mjactzinaaygixy pocymiid. Ti m'ahuimbijtcixy Dios ytumbi, jadyaabi tzinaayin xymöhuip ajcxy mjotcujc'ajtin. Tiydudägy cham tzinaaygix miid Dios ycixpi, e mbaadip ajcxy jugy'ajtin huidibi ca' ycixipy ytigoyipy nimina. ²³ Yi pocytunii ycoju'n yi' je' yi o'cin. Per je huidibi Dios xyñimooyim, hue' je' je jugy'ajtin huidibi ni caminaxii ycixipy ytigoyipy co n'ijtim miid ajt nHuindzin Jesucristo.

7

Tüg ijxpejt huidibi yajpatp ma picychinaayin

¹ Miich ajcxy migügtijc huidibi ti m'ixpicy Dios ycötujcin huidibi Moisés yjaay, mnejhuüyb miich ajcxy co yi naaxhuiñyäj ycötujcin ymiid mic'ajt ma ajt ndzinaayin, ixti mabaad anajty n'o'cim. ² Paady co tüg töxyjäy ycivilbicy miid tüg yëydijc, ca' huaad ixmach ñäy mabaad china'y yjugy'aty. Co janchtiy anajty je töxyjäy ñiyëydijc ti y'öcni, huin'it anajty ca' ocmiidiñ ñäy y'ane'min. ³ Ooy anajty mij ytundigoy je töxyjäy co ypigipy miid huingbi yëydijc pen jugy'ajtni je ñäy. Cooni janchtiy anajty ñiyëydijc ti y'ögy, huin'itni janchtiy jébi ypicy miid huingbi yëydijc, e ca'p je' anajty ytundigoy.

⁴ Miich ajcxy nmigügtijcich, judíojäy huidibi mibijcp Cristo, jayijp co anajty ca'ni mmibijccixy Cristo, je Dios ycötujcin huidibi Moisés yjaay xy'ane'mgixp anajty ma mdzinaayin. Jadachambi xii tiempo yi jadu'mbi cötujcin ca' yi' xyjac'ane'mgixni. Jadachambi Cristo ytiy'ajt xy'ane'mgixp, je Cristo huidibi Dios yajjugypijc jadüg'oc co y'o'cy. Jadu'n miich ajcxy nipaady nej je töxyjäy huidibi ñiyëydijc ti y'ögy, e ti ypijctigach. Cristo miich ajcxy xyñigohuajc'ajtp, jigix jébi mdzinaaygixy miid Dios ycixpi. ⁵ Jayijp ca'ni anajty nmibijcim Jesucristo ooy anajty nguyduunim huidibi ajt nninix ñijot'ajt. Je huin'it tiempo anajty je jibic-huinma'n xy'ane'mim ma ajt ndzinaayin. Je' je' je jibic-huinma'n huidibi Dios xycapx'adujcim miid ycötujcin. Miid co jibic-huinma'n xy'ane'mim anajty ajt ma ndzinaayin etz xyajnicxaanim anajty ma yi o'cin. ⁶ Jadachambi xii tiempo Dios ycötujcin huidibi Moisés xymooyim, ca' ti mic'ajt miidty ma ich ajt, ti n'ixmajtzim. Jadu'n nipaady nejhuüy ti n'o'cim, e njugypijcim jadüg'oc. Paady nguyduunim je jemybi tiy'ajt huidibi je Espíritu Santo xyajnejhuüyim. Canan je' anajty nguyduunim je jecy'ajtpy cötujcin.

Je pocy huidibi ijtp ma ich

⁷ ¿Nej n'ocminaanim? ¿Nej janch co je cötujcin huidibi Moisés xymooyim xyajpocytuunim anajty? Ca' yjadu'nity. Co ixipy ca' anajty nmididyich Moisés ycötujcin, ca' ixipy ich ti nnejhuüyich co ti ndundigooyich ma Dios ytiy'ajt. Co ixipy anajty ca' n'ocnejhuüyich Moisés ycötujcin ma jadu'n yminañ: "Ca' mmigüg ni ti m'adzojcopy." Ti ixipy ndundigooyich, e ca' ixipy nejhuüyich ma ti ndundigooyich. ⁸ Miid co ich jecy'ajty ooy anajty nnijot'atyich pocytunii, paady ycixpi ich anajty ooy ndundigooyich. E jadu'n anajty nigü ooy n'adzocyich, e jaminam anajty Dios ycötujcin co ca' migüg ni ti m'adzojcopy. Co ixipy Dios ca' jadu'n cötujcin ti pidägy, ni ca' ixipy njihui'nybicyich co ndundigooyich. ⁹ Jayijp co ca'ni anajty nhuinjihuyich Dios ycötujcin, huin'it tiempo ca' anajty njihui'nybicyich nbocy. E co nbatyich Dios ycötujcin, chi njihui'nybijcyich nbocy, e nañ ti nejhuüyich co tigoyaamich njugy'ajtin. ¹⁰ Dios ypidac ycötujcin jaydebi nbaadibich jugy'ajtin huidibi ca' ycixipy ytigoyipy. Per ca' jadu'n ti oyiy miid ich. Yi cötujcin ti xyajpocycäyich anajty, e jadu'n tigoyaambich anajty njugy'ajtin. ¹¹ Jadu'n

anajty huinma'ñ nmiididyich co nguydundähuaamybich Dios ycötujcin huidibi Moisés yjayhui'm. Pero com ca' njatyich nej nguydundähuiyich, chi nbocycäyich ma Dios. Je pocytonii ti xyhuin'ñich, e miid je' ycixpi nbadaamybich anajty yi o'cin.

¹² Tüg'óciy Dios yley etz Dios ycötujcin huidibi cojay ijtp, huädz yi', tudägy yi', ooy yi'.

¹³ ¿Nej tigoyaambich anajty njugy'ajtin miid co anajty nmi'ityich Dios oybi cötujcin? Ca' yjadu'nity. ¿Nej je Dios ycötujcin je oybi ti huimbizimy jibic miid ich co xyajtigoyaanic anajty njugy'ajtin? Ca' yjadu'nity. Nicxpich anajty ma yi o'cin miid nbocycich ycixpi. Je Dios ycötujcin xyajnejhuiyich co o'cin nbadaamybich miid nbocycich ycixpi. Jadu'n Dios pidacy ycötujcin ya naaxhuiñ, jigix jébi jäy ajcxy nejhuihuipy co mij ajcxy ooy ytundigooy miid Dios.

¹⁴ Nejhuiyim co yi Dios ycötujcin huidibi Moisés xymooyim, jiiby yi' choon ma Dios, paady yi' ooy y'oyity. Ich nninix yi' je' huidibi nijot'ajtp yi pocytonii, paady ndzinäyich pocymiid. ¹⁵ Ca' nhuinjihuiyich huidibi ndumyich. Yi oybi huidibi njatunaamybich, ca' njatyich nej ndunipyich. Yi jibicpi huidibi ca' y'oychojcnity, yi' ndumyich. ¹⁶ Co nduñich huidibi ca' ndzocyich, jadu'n niqexigy co Dios ycötujcin ooy oy yi', tudägy yi'. ¹⁷ Canan jotcujc ich jadu'n co nbocytuñich. Yi pocy'adzojcin huidibi nmiidich ma njot nhuinma'ñ, yi' yi' xyajtundigooybich. ¹⁸ Nejhuiyich co ca' ti oybi yajpaady ma ich nninix. Ooy njatzocyich co oybi njatuna'ñich, per ca' njatyich nej oybi ndunipyich. ¹⁹ Je oybi huidibi njatunaamybich, ca' njaty nej ndunipyich. Je jibicpi huidibi ca' ndzocyich, je' ndumyich. ²⁰ Co yi' nduñich huidibi ca' ndzocyich, yi' je' je pocytonii huidijaty njot'ajtibich nhuinma'ñ'ajtibich, yi' xyajtundigooybich.

²¹ Nbaatypich tüg tiy'ajt, co njatunaamybich oyhuinma'ñ, jiipy jibicpi nbaadyich ma njot nhuinma'ñich. ²² Jotjoty huinma'ñyoty ooy nmixondägyich Dios ycötujcin. ²³ E nañ miidich jotjoty huinma'ñyoty yi' jibicpi huidibi mi'ijxtinaayb je oybi. Yi tundigoyii yajpatp ma ich nninix. Yi nninixich yajpatp pocymiid.

²⁴ Paady ca' njotcujcgyich. ¿Pin jébi xyñihua'ñich xyajnidzögibich ma jadyaab nninixich huidibi xyajnicxpich ma yi o'cin? ²⁵ Dioscojuyip nyajnajxypich ma Dios co Dios, miid ajt nHuindzin Jesucristo, xyñihuaanim ma jada jibicpi huidibi ajt nninix xyñi'jot'ajtim. Paady miid n'oyjot n'oyhuinma'ñ nguyduñich Dios ycötujcin. Miid nninixich nijot'atyich pocytonii.

8

Je jugy'ajt miid je Dios yjihui'ñ ymic'ajt ycixpi

¹ Jadachambi tiempo janchtiy Dios ca' tzaachytuna'ñ yi jäy ajcxy huidijaty tú'ciy ijtp miid Cristo Jesús, huidibi ajcxy cuydumb Espíritu Santo chojcin, e ca' ajcxy tungixy nej je ninix nijot'ajtcixy. ² Je Espíritu Santo ti xyyajpidzimim ma yi pocytonii etz ma yi o'cin huidibi yi jecy'ajty cötujcin ti xymooyim. Je Espíritu Santo xyajtzinaayim huinixii, ich ajt huidibi ijtp tú'ciy miid Jesucristo. ³ Miid co ich ajt ooy ninix ñijot'aty jibicpi, paady Dios xymooyim ycötujcin jecy'ajty jaybety. Per je naaxhuiñyäjy yajtigoy ajcxy je cötujcin ymajaa, e ca' ymadacy nicxy xyajtzinaayim miid tudägy jot huinma'ñ. Paady Dios yquejxy yci'm'ung huidi ti chinäy ya naaxhuiñ miid ñinix jadu'n nej ich ajt nmiidity nninix, jigix jébi ndzinaayim miid huädz jot huinma'ñ. Jadu'n Dios y'ung chinay miid ñinix, per ca' ni ti bocy anajty miidity. E yi' ti y'ögy miid ajt nbocy ycixpi, e jadu'n yajtigoy je pocy huidibi ajt nigix'ajtim. ⁴ Jadu'n Dios ytuuñ jigix jébi xyajtzinaayim miid tudägyjot tudägyhuinma'ñ jadu'n nej yi' ycötujcin y'ane'my. Miid co nmiid'ajtim Dios yjihui'ñ ymic'ajt ma ajt njot nhuinma'ñ, paady jébi huaad ndzinaayim miid tudägy-jot tudägy-huinma'ñ.

⁵ Yi jäy ajcxy huidibi ca' miidity Dios yjihui'ñ ymic'ajt ma yjot yhuinma'ñ, hue' ajcxy ycapxymidooyb je jibicpi huidibi ajcxy ñinix ñijot'ajtpy. Yi jäy ajcxy huidibi tzinaayb miid Dios yjihui'n ymic'ajt ma yjot yhuinma'ñ, hue' ajcxy ycapxymidooyb je Espíritu Santo. ⁶ Yi jäy ajcxy huidibi capxymidoob je jibicpi huidibi ajcxy ninix ñijot'ajtpy,

hue' ajcxy ypadaangixyp o'cin. Yi jäy ajcxy huidibi capxymidoob je Espíritu Santo, hue' ajcxy ypadaangixyp jugy'ajtin huidibi ca' ycixipy ytigoyipy, etz nañ ypadaangixyp jotcujc'ajtin. ⁷Yi jäy ajcxy huidibi capxymidoob je jibicpi huidibi ajcxy ñinix ñijot'ajtpy, hue' ajcxy Dios ymidzip'ajtpy, ca' capxymidohuaangixy Dios ycötujcin. Ni ca' jajtciy nej ajcxy capxymidóogixipy Dios ycötujcin. ⁸Ca' Dios jäygidägy yi' ajcxy chinaayin huidibi ajcxy capxymidoob je jibicpi huidibi ajcxy ñinix ñijot'ajtpy.

⁹Per miich ajcxy ca' mgapxymidoogixy je jibicpi huidibi mninix ñijot'ajtpy. Com miich ajcxy mmiid Dios yjihui'ñ ymic'ajt ma mjot mhuinma'ñ, e mguydungixpy je Espíritu Santo chojcin. Huenpinity huidibi ca' miidity Cristo yjihui'ñ ymic'ajt ma yjot yhuinma'ñ, ca' yi' y'ity miid Cristo. ¹⁰Pen miich ajcxy ijtp miid Cristo, yi' mjogy'ajtin ajcxy ca' ycixipy ytigoyipy nimina, miid co Cristo ti xyaj'ahuimbijtcixy tudägy ma Dios yhuinduu. Yi mnaaxnix cixamb tigoyamb yi'. ¹¹Pen ijtp ma miich ajcxy mjot mhuinma'ñ je' yjihui'ñ ymic'ajt je huidibi yajjugypijc jadüg'oc je Cristo co y'o'cy. Nañ jadu'n miich ajcxy Dios xyajjugypigaangixy jadüg'oc, co anajty ti m'öccixy, miid yi' yjihui'ñ ymic'ajt huidi yajpaatp ma miich ajcxy mjot mhuinma'ñ.

¹²Miid co nmiid'ajtim Dios yjihui'ñ ymic'ajt paady ycixpi, miich ajcxy migügtijc, copicy ngapxymidoohuim je Espíritu Santo, e ca' huaad ngapxymidoohuim je jibicpi huidibi ajt nninix ñijot'ajtpy. ¹³Pen ooy ajcxy xytimy'ane'mgixy je jibicpi huidibi ajcxy mninix ñijot'ajtpy, co m'öccixipy, yi' mjogy'ajtin cixip tigoyip yi'. Per pen miid Dios yjihui'ñ ymic'ajt miich ajcxy myajtigoy je jibicpi huidibi mninix ñijot'ajtpy, co m'öccixipy, yi' mjogy'ajtin ajcxy ca' yi' ycixipy ytigoyipy.

¹⁴Tüg'óciy pinjaty ajcxy capxymidoob je Espíritu Santo, Dios yi' ung'ajtip ajcxy. ¹⁵Je Espíritu Santo huidibi miich ajcxy xy'adigiigixp xyjottigiigixp, ca' xychaachtungixy e nañ ni ca' mdzinähuaangixy miid tzig'iñ jihui'ñ. Ca' miich ajcxy jadu'n paady nej tumbidijc huidibi ooy tzig'iigixy yhuindzin. Co je Espíritu Santo yajpaady ma ajcxy mjot mhuinma'ñ, jadu'n nipaady nejhuüy miich ajcxy Dios xy'ung'adyii. E com nmiid'ajtim Dios yjihui'ñ ymic'ajt, je' jadu'n xyajminaanim: “¡Dios Teedy!” ¹⁶Je Espíritu Santo tiy'ajt yejcp ma ajt njot nhuinma'ñ, je' jadu'n xyajminaanim co Dios xy'ung'ajtim. ¹⁷Pen iich ajt Dios xy'ung'ajtim, chi nbadaanim it lugar quipxyi miid Cristo jiiby tzajpjoty ma Dios yajpaady. Pen nminajxim nyajnaxim tzaachypi jadu'n nej Cristo minajxy yajnaxy tzaachypi, chi nbadaanim Dios y'oy'ajtin quipxyi miid Cristo.

¹⁸N'a'ixiibich co yi' tzaachypi yi' ayo'n huidibi nminajxim nyajnaxim ya naaxhuiñ, ca' yi' ytim ytiijity, ca' ninej yquipxyjatytyi je oy'ajtin etz mijjotcujc'ajtin huidibi Dios xyaj'ixaanim je huin'it xii co Cristo anajty ymiñ jadüg'oc. ¹⁹Tüg'óciy tijaty ya naaxhuiñ huidibi Dios ti yajcojy yaj'oyiy, y'aa'ijxpy yjijp'ijxpy ajcxy mina Dios ymöhuaánigixy y'oy'ajtin ymi'ajtin yi' jäy ajcxy huidibi ajcxy Dios ung'ajtip. ²⁰Tüg'óciy tijaty Dios ti yajcojy yaj'oyiy ya naaxhuiñ, hue' je' yjugy'ajtin cixamb tigoyamb, ögam tädzam. E canan ci'm jadu'n tzocy, hue' je' Dios jadu'n ti yajnidögüiy. Per ca' yjugy'ajtin ycixipy ytigoyipy tu'ciyi hue' ajcxy y'aa'ijxpy yjijp'ijxpy co padaangixy oy'ajtin jadüg'oc. ²¹Co anajty Dios yaj'oyiy nej jëbi ajcxy chinaaygixy, e ca' y'öccixipy, ca' ytiitzcixipy, etz ca' ypügixipy, chi ajcxy padaangixy oy'ajtin etz jotcujc'ajtin quipxyi miid je jäy ajcxy huidibi Dios ung'ajtip. ²²Com nejhuüyim co ixti chambaad tüg'óciy huidijaty Dios yajcojy yaj'oyiy ya naaxhuiñ yjihuiyb tzaachypi, e ca' yjotcujc'ajtcixy. Tim jadu'n nipaady nej tüg töxyjäy paady tzaachypi co yhuaad'ajtni mina y'ung yajma'xung'ada'ñ. ²³Canan yi' naaxhuiñybi huidi Dios yaj'oyiy yi'yi' tzaachypi jihuiyb, nañ jadu'n iich ajt huidijaty miid'ajtp Dios yjihui'ñ ymic'ajt, huidibi Dios xymooyim jayjip'aty ca'ni anajty nyajtigajtzim nninix. Nañ iich ajt tajim mayim njiiyim nyaaxim ixti cooni anajty Dios xyajtigadzaanim ajt nninix etz xycöbigaanim ma yi' y'it jiiby tzajpjoty, e xymiid'idaanım ajt jadu'n nej yci'm'ung. ²⁴Miid co n'aa'ijxim njijp'ijxim co Dios xyajnidzögaanım ajt n'alma, paady ti nbaatim jugy'ajtin huidibi ca' ycixipy ytigoyipy. Co ixypy ti nbaatim huidibi anajty njijp'ijxim, ca' ixypy njacjip'ijxim co nbadáanimni.

Com ca' pín jacjijp'ijxni co padaanip je huidibi ti ocpatpi. ²⁵ Per co njijp'ijxim co nbadaanim huidibi ca' nmíid'ajtm, huin'it n'ahuixim míid mecxtujcin cooni nbaatim.

²⁶ Tim jadu'n nej jotcuje'ajtm nbadaanim co njijp'ijxim huidibi Dios xymöhuaanim, nañ tim jadu'n je Espíritu Santo xypubejtm xypudigíiyim co njotmetzcíiyim, com ca' njajtm nej jébi huaad Dios nmíbijctzohuim nej ypadyii. Paady je Espíritu Santo xycodinaayim ma Dios, ymíbijctzooyb je Dios mictägy míid íich ajt ycixpi míid jiiyin yaaxin, huidi ca' huaad yajcapxpídzimy míid miydacin. ²⁷ Dios ñejhuíiyb ti jot ti huinma'ñ jäy ajcxy ymíid. E Dios nañ huinjihuíiyb tüg'óciy ayuc huídibi je Espíritu Santo yajnaxyp ma yí'. Je Espíritu Santo ypijctzooyb may'ajt jabom jabom ma Dios míid tüg'óciy je mibijcpídiyc ycixpi. Nañ jadu'n pijctzoy jadu'n nej Dios tzocy jäygidägy.

Mij madaacin ma mibijcin

²⁸ Yí jäy ajcxy huídibi mijpídacp Dios, huídibi ajcxy Dios ti huin'ixy, jébi chinaaygíxy jadu'n nej Dios jäygidägy ajcxy chinaayin. Nejhuiiyim co huentimtiijty huídibi yí' ajcxy yminajxpy yajnaxpy, pen jibicpi o pen oybi, Dios jadu'n ti a'ixíy co huen minajxcíxy yajnaxcxy míid yí' ajcxy y'oy'ajtm ycixpi. ²⁹ Je' yí' ajcxy huídibi Dios ti yhuin'ixyíi, je' yí' ajcxy huídibi Dios ñejhuíiy jayijpni co ymíbiga'ñyíi y'ayuc. Dios jadu'n tumb ma yí' ajcxy yjot yhuinma'ñ jaydébí yquipxyjatytyíy ajcxy yjot yhuinma'ñ míid Dios y'ung, jadu'n nej yí' yjot yhuinma'ñ mídity. ³⁰ Yí mayjäy huídibi Dios yajnigödugíiy ca'ni anajty naaxhuiñybi chondacy co ytuna'ñ míid yí', yí' ajcxy Dios huin'ijxi. Yí mayjäy huídibi Dios ti yhuin'íxigíxy, nañ Dios yí' ajcxy yaj'ahuimbijtip tudägy. E yí mayjäy huídibi Dios ti yaj'ahuimbity tudägy, nañ Dios yí' yajquipxyjatythuaanip ajcxy y'oy'ajtm míid yí' y'ung y'oy'ajtm.

³¹ ¿Ti jada' njacjijp'ijxim ti jada' njactzojcm? Ca' ni ti. Pen Dios íich ajt xypubejtm xypudigíiyim, ¿pín íich ajt jébi xymímadaacim? Janch ni ca pín. ³² Dios íxti yci'm'ung ti yecy míid íich ajt ycixpi, co oy y'o'cy míid íich ajt ycixpi, co oy y'o'cy ma yí cruudz míid nidüg'óciy ajt nbocy ycixpi. Paady janch janch co Dios xymöhuaanim tüg'óciy oybi quipxyjaty míid yí' y'ung, Jesucristo. ³³ ¿Pín jada' jébi ocxíy je jäy ajcxy huídibi Dios ti huin'ixy? Ca' ni pín. Com Dios cí'm yí' ti yaj'ahuimbijttäy tudägy. ³⁴ ¿Pín yí' ajcxy jébi ocyajpocycäy? Ca' ni pín. Com Cristo o'c je' míid ajt nbocy ycixpi, etz yjugypijcy jadüg'oc, e jadachambi xii tiempo yajpaady a'oy'amy ma Dios ymíjc, e yí' ane'mdaayb tüg'óciy. E Cristo íich ajt xyñibijctzohuiiyim, ypijctzooyb may'ajt ma Dios míid íich ajt ycixpi. ³⁵ Com Cristo ooy xychojcm xyjihuiiyim, paady ni nej ca' xy'ixmadzaanim. Huen ti ndimpaatim ca' xy'ixmadzaanim. Oy ixypy tzaachypí ayo'n nminajxim nyajnaxim, oy ixypy tajin mayin nbaatim; oy ixypy jäy xy'ixhuídijtm xypahuídijtm; oy ixypy yuu ayo'n nbaatim; oy ixypy huit tucxy nyajmayajtm; oy ixypy tzigi'ñ nyajnaxim; oy ixypy jäy xytimyyaj'o'cim. Oy ti ayo'n ndimbaatim, Cristo ca' xy'ixmadzaanim. ³⁶ Com jadu'n ymiñ jaybety ma Dios ñecy ma jadu'n ymiñ:

Míid miich, Huindzin Dios ycixpi, je nmízipích xyjatytimyyaj'ögaambich xim tzuum.

Jadu'n íich ajcxy nej cöbixy huídibi yajnicxip ma yaj'öctac co yaj'öga'ñyíi.

³⁷ Ca' ti ayo'n nbadaanim. Nmímadactähuaanim tüg'óciy ayo'n, míid co Cristo xychojcm xyjihuiiyim. ³⁸⁻³⁹ Janch nejhuiiybich tíydudägy co Dios xychojcm xyjihuiiyim. Ca' ji ni pín jébi huaad xypíjc-huäcxim ma Dios chójcin, oy ixypy nja'o'cim; oy ixypy njajugy'ajtm; oy ixypy xymízip'ajtm ángel ajcxy etz jacjadyíi huídibi mic'ajt míid jíiby tzajpjoty. Ca' ajcxy jébi huaad xypíjc-huäcxim ma Dios, ni ti huídibi ji íjtp cham, ni je huídibi mimb cidacp, ni yí' jébi xycapíjc-huäcxim ma Dios chojcin. Ajt nHuindzin Jesucristo ti xyajnejhuíiyim jadu'n nej Dios xchojcm xyjihuiiyim co y'o'cy ma yí cruudz míid ajt nbocy ycixpi.

¹⁻² Nmüidich je Cristo ytiy'ajt, nyajnijayiybich miich ajcxy yi' ytiy'ajt, ca' n'indägyich, co ooy ndajy nmayich müid n'amigügtjicich ycixpi je Israel jäy co ajcxy ca' cöbiga'ñ je Cristo. Nañ Dios yjihui'ñ, je Espiritu Santo, tiy'ajt yejcp ma ñich njot nhuinma'ñ co jadu'n tajin mayin njihuüyich müid yi' ajcxy ycixpi. ³ Com tajy may najjihuiüyijich müid ñich n'amigügtjic, ñich nmigogajp, ixti njaccodinähuaamybich ajcxy ma Dios müid ypocy ycixpi, ixti jëbi ixypy Cristo nja'ixmachich müid yi' ajcxy ycixpi, ixti jëbi ixypy Dios xychaachytuñich müid yi' ajcxy ypocy ycixpi, co ixypy jëbi Dios pocyhuinmecxy ajcxy. ⁴ Com hue' je' ajcxy Israel y'ap'ajtip y'oc'ajtip, Israel jäy ajcxy. Hue' anajty ajcxy Dios ti ycöbigyii jadu'n nej jihuiy yci'm'ung, Dios anajty ajcxy ti ñi'ijxcidägyii, y'ijx ajcxy Dios y'oy'ajtin. Dios nimay ajcxy co ycuend'adip. Dios ajcxy jadu'n yajni'ixiiyi nidüg'óciy tiy'ajt nej ajcxy jëbi huaad Dios huindzigüy, e Dios yajhuinhuaniiy Israel jäy ajcxy je Cristo. ⁵ Nañ hue' ajcxy ymij'ap'ajtip ymijteedy'ajtip ñich ajt nmij'ap nmijteedy; je Abraham, Jacob, etz David, e ma je' ymiñ ajcxy, ji ymiñ je Cristo, e je' je' Dios ajtp, yi' tüg'óciy ane'mdaayb jiiyby tzajpjoty etz ya naaxhuiñ. Je Cristo capxpaady y'idipy huinixii.

⁶ Co jadu'n mina'ñich co may ajcxy Israel jäy ca' ajcxy Dios yjäy'adyii tiydudägyi, ca' jadu'n mina'na'ñich co Dios ca' cuyduñ yi' y'ayuc huidibi yajhuinhuaniiy Abraham etz Moisés. ⁷ Canan nidüg'óciy Abraham y'ap y'oc pada'ñ je oy'ajt huidibi yajhuinhuaniiy Abraham, com jadu'n yjaybetyity ma Dios ñecy. Dios jadu'n nimay Abraham: “Yi mmang, Isaac, ti nhuin'ixyich jëbi y'ap y'oc paady je oy'ajt huidibi ti nyajhuinhuaniiy.” ⁸ Co Dios jadu'n nimay Abraham, paady ycixpi nejhuiiyim co ca' nidüg'óciy Abraham y'ap y'oc jëbi naydijyii Dios y'ung. Jëyi Isaac y'ap y'oc jëbi ñaydijyii Dios y'ung com Dios yajhuinhuaniiy co may'ajt tuna'ñ müid yi' ajcxy. ⁹ Com jadu'n yjaybetyity ma Dios ñecy co Dios nimay Abraham: “Nihuimbidaamybich ma je tiempo huidibi ti n'agapxtucyich, e huin'it mdöxyjc Sara y'ungbaadip.”

¹⁰ Ji jadüg tiy'ajt. ñich ajt nmij'ap Isaac ytöxyjc Rebeca metz ymang paty. ¹¹ Dios yhuin'ijx je jacmutzpi ca'ni anajty yma'xung'aty, e ca'ni anajty ñiguëxügy ti huinma'ñ ymiid, oyhuinma'ñ o jibic-huinma'ñ. Dios ninigoob anajty jayijpni ti huin'ixy je jacmutzpi. ¹² Com Dios ñimay je Rebeca co je jacmutzpi y'ane'mamyb y'ajch ma ca'ni anajty Jacob yma'xung'atyñi. ¹³ Tim jadu'n nej jaybety ymiñ ma Dios ñecy, Dios jadu'n minañ: “Jac nigü ti ndzocyich Jacob, ca'ydi Esaú.”

¹⁴ ¿Nej n'ocmīnaanīm? ¿Dios ca' tiiybi tuñyi? Ca' yjadu'nity. Dios tiydudägy ytuñ. ¹⁵ Com jadu'n Dios nimay Moisés: “Nba'ayohuipyich ninigoobi pinjaty ndzojcpyich.” ¹⁶ Co Dios jadu'n nimay Moisés paady nejhuiiyim co canan paady ycixpi Dios pa'ayohua'ñ jay müid co ajcxy chachñaymija'ijxigixy co tunaangixy oyhuinma'ñ. Hue' je' Dios pa'ayo'n tuñ müid jäy ajcxy ninigoob co jadu'n tzocy. ¹⁷ Com jadu'n jaybety ymiñ ma Dios ñecy co Dios jadu'n nimay je Egipto rey:

ñich miich ti nmöy m'ane'min, jigix jëbi jäy ajcxy ixipy je mij ayo'n huidibi ndunaamybich ma miich mnaax mgajp, huin'it jäy ajcxy capxpaady xyaj'idipy huindu'ñybi ñaaxhuiñ.

¹⁸ Dios ypa'ayooyb je' pinjaty chojcpy, e nañ jadu'n yjot yajjuuni pin jadu'n yajmidzojcpy.

¹⁹ Huin'it miich ajcxy xyñimähuiibich: “Peni janch yjadu'nity, ¿ti co Dios jadu'n jadüg'oc pocy'ixy jäy? ¿Pin jada' occapxhuimbidip nej yi' tzocyi?” ²⁰ Miich jäy, ¿mbin miich co ti myajcapxycoja'ñ myaj'ayuccoja'ñ müid Dios? ¿Nej jëbi pochtüdztz nimäy je pin anajty ti yajcojyii? “¿Nej co jadu'n ti xyajcojyich?” ²¹ Tüdzyajcojpi yi' yaj'oyiiyb je mo'ntz nej tim tzocy. Pen yajcojamyb tüzdy oybi tzojatyipi, yajcojpy je'. Peni yajcojamyb tüzdy huidibi ca' ovyatyity, yajcojpy je'.

²²⁻²⁴ Tim jadu'n nej je tüzzyajcojpi yaj'oyiiy mo'ntz nej tzocy, nañ jadu'n Dios tuñ müid jäy nej tzocy. Dios ti yajcojy jäy, e müid ymic'ajt jëb tzaachytuñ müid ypocy ycixpi. E co jadu'n tzaachtunipy, chi ñiguëxügipy yi' ymic'ajt. Dios ooy jecy ti jamimecxtucy ajcxy huidibi paatip co Dios chaachtuniiyb ajcxy. Com Dios ti yajcojy jäy paady jëb nañ jadu'n

pa'ayoohuipy etz may'ajt tunipy miid yi' ajcxy, jëbi ajcxy paadip yi' y'oy'ajtin. Dios iich ajt ti xyhuin'ijxim nijëjity judíojäy, etz nijëjity huidibi ca' yjudíojäyity, jëbi ajt n'alma nïdzoocin paady. ²⁵ Com jadu'n jaybety ymiñ ma Oseas ñecy ma Dios jadu'n yminañ:

Yi jäy ajcxy huidibi iich ca' anajty njäy'adyii, njäy'adäänibich cham. Yi jäy huidibi ca' anajty ndzocyich, ndzogäänibich cham.

²⁶ E nañ jadu'n jadüg'it Oseas cojay: “E je jäy ajcxy huidibi anajty tzinaayb ma canaag naax cajp huidibi anajty ca' Dios yjäy'adyii, jëb ñaydiyii Dios yjäy, je Dios huidibi huinixii tzinaayb.”

²⁷ Nañ jotmay miid co Isaías jada tiy'ajt ycojay ma ñecy ma jadu'n yminañ: “Oy ixypy ajcxy ti yjamayy jadu'n nej tzaa'ung yajpaady ma mejy ypa', nihueñ ajcxy y'alma nïdzoocin padañ. ²⁸ Com Dios mic ooy cötujcin miidity, e ca' mimecxtugipy jäy ajcxy ypocytunii huinixii. E mic'amy tzaachypi möhua'ñ naaxhuinyjäy miid ypocy ycixpi co anajty xii tiempo paatni mabaad agapxtujcy.” ²⁹ Isaías ñajtzcapxiiy jadu'n jecy'ajty:

Pen ca' ixypy je Huindzin Dios huidibi ane'mdaayb jiiby tzajpjoty etz ya naaxhuiñ, capubejty yi Israel jäy, co ca' ycajacyajtzooci nijëjity ajcxy, ycacödigoofday yi' ajcxy, tim jadu'n nej je jäy ajcxy yjajty jim ma Sodomo cajp etz Gomorra cajp, cödigoofday ajcxy.

Yi judíojäy ajcxy etz Jesucristo y'ayuc ytiy'ajt

³⁰ Jadu'n jëbi mhujnhuüygixy huidibi ti nyajnijayüygixy jadu'n nej Dios ytun miid jäy ajcxy. Yi jäy ajcxy huidibi ca' yjudíojäyity, huidibi ca' cuyduñ Dios ycötujcin je jecyip, co ajcxy mijpidägy je Cristo, chi ajcxy paady tudägy'ajtin ma Dios. ³¹ Per yi judíojäy ajcxy huidibi jïp'ixp co tudägy'ajtin padaangixy miid co tzachcuydungixy Dios ycötujcin je jecyip, ni ca' ajcxy mimadägy cuydundähuipy, e ca' ajcxy tudägy'ajtin paady ma Dios. ³² ¿Na'amy co ca' ajcxy mimadägy cuydundäy Dios cötujcin? Je' co ajcxy ca' mijpidägy huidibi Dios ti tuñ miid yi' ajcxy ycixpi. Hue' ajcxy tijy co tudägy'ajtin padaangixy ma Dios miid co tzachcuydungixy Dios ycötujcin je jecyip. Hue' ajcxy ayo'n ypadamyb co ca' Cristo cöbijccixy, tim jadu'n nej jäy ayo'n paady co ycönepy ma tüg tzaa. ³³ Com jadu'n jaybety ymiñ ma Dios ñecy, ma Dios jadu'n yminañ:

Nguexaamybich jim Jerusalén tüg jäy. Mayjäy ca' mijpidägañ je jäy, e ayo'n ajcxy ypadamyb ma iich. Tim jadu'n nej ixypy ti nbidägyich tüg tzaa ma jäy ajcxy huaad ycönejpcixy, e chi yciday ajcxy. Tüg'óciy jäy pinjaty mijpidaacp je jäy huidibi nbidägaamybich jim Jerusalén, hue' ajcxy yi' ca' ayo'n padañ ma iich, nbocyhuinmecxaamybich yi' ajcxy.

10

¹ Miich ajcxy nmigügtijcich, ooy ndzocyich cixyjot huinjot co yi Israel jäy nidüg'óciy padañ y'alma nïdzoocin. Ooy iich nigi Dios nmibijctzoy miid yi' ajcxy ycixpi. ² Jëbi ndiy'ajt yecyich co yi Israel jäy ooy ajcxy Dios jayajmij'ajtcixy. Hue' janchtiy ca' ajcxy huinjihuüy Dios ytiy'ajt. ³ Com nejhuüyb ajcxy co Dios yajpocyñihuädzamyb jäy ajcxy, hue' ajcxy ca' huinjihuüy nej Dios yhuinma'ñ miidity. Ci'm anajty chachhuinma'ñ ixtaaygixy nej ajcxy jëbi ñayyajpocyñihuädzigixipy. Ca' anajty ajcxy cöbicy Dios ytiy'ajt nej jëbi huaad ñayyajpocyñihuädziyb.

⁴⁻⁵ Yi judíojäy ajcxy ca' huinjihuüygixy co je Cristo y'oy ya naaxhuiñ, e chi yajtigooyi Dios ycötujcin ymic'ajt huidibi Moisés yjay, jigix jëbi tüg'óciy jäy pinjaty mijpidaacp Cristo ytiy'ajt, huin'it ajcxy paadip tudägy'ajtin. Moisés yjayhui'm ma jadu'n yminañ: “Je pinjaty cuydumb je Dios ytiy'ajt, jim mic'ajt paadipy miid chinaayin ycixpi.” ⁶⁻⁷ Per yi jäy ajcxy huidibi mijpidaacp Cristo etz cuyduni yi' ytiy'ajt, yi' ajcxy yminañ: “Ca' huaad judíojäy ajcxy yminaangixy jotjoty huinma'ñyoty: ¿Pin ocpättigihuij tzajpjoty nicx je Cristo yajtzoön? o ¿Pin nicxamb ca'oydactuuby ma ajcxy öcpidijc y'ity e yajjugypigaanip je Cristo?” ⁸ ¿Nej Dios y'ayuc yminañ? Jadu'n Dios y'ayuc yminañ: “Ti mmidooy miich ajcxy Dios y'ayuc ytiy'ajt ma mgi'm'ayuc, ti jäy ajcxy capxhuäcxy ma miich, ti

mmido'mbijccixy." Pues jada je' je y'ayuc tiy'ajt nej jëb mijpidaaccixy Cristo, huidibi tiy'ajt ìch ajcxy ngapxhuäcxp. ⁹ Pen miich mgapxypidzimyb mayjäy agujc co miich ajcxy Jesús mHuindzin'adyii, etz mmibijcpy ajcxy ma mjot mhuinma'n co Dios ti yajjugypijcy Jesús co y'o'cy, huin'it m'alma paadip ñidzoocin ma Dios. ¹⁰ Co mmijpidägipy Jesús cixyjot huinijot huin'it Dios xyajpocyñihuädziy. Co mgapxypidzimipy mayjäy agujc co miich mijpidägy Cristo Jesús, huin'it yi m'alma ñidzoocin pada'n.

¹¹ Com jaybety jadu'n miiñ ma Dios ñecy, ma jadu'n yminañ: "Nidüg'ociy jäy huidijaty mijpidacp je Cristo, ca' ajcxy ayo'n pada'n ma Dios." ¹² Jëbi nidüg'ociy jäy mijpidägy je Cristo Jesús com Dios tú'ciy yajhuinhuanñy pocyñihuaatzin ma yi judíojäy etz ma huidi ca' yjudíojäyity. Ji tüg Huindzin je Jesucristo huidibi niHuindzin'ajttaayb. Jesucristo may'ajt oy'ajt tunam mijcajee miid huentimpinjäyity pinjaty pijczoob pubejtin ma Dios miid yi' yxii. ¹³ Com jadu'n jaybety ymiiñ ma Dios ñecy, ma jadu'n ymina'n: "Nidüg'ociy jäy pinjaty Dios mibijctzoob miid Huindzin Jesucristo yxii, yi' ajcxy y'alma paadip ñidzoocin." ¹⁴ ¿Nej jëbi jäy ajcxy occohuanñy Jesucristo co huen y'alma nidzögy, pen ca' anajty ti mibijci je ytiy'ajt? Pues ca' yjadu'nity. ¿Nej jëbi jäy mibicy Jesucristo peni ca'ni ajcxy amido'ijti y'ayuc? Pues ca' yjadu'nity. ¿Nej jëbi jäy ajcxy midoogixy Jesucristo y'ayuc, pen ca' pin capxhuäcxxy ma yi' ajcxy? ¹⁵ ¿Nej jëbi jäy ajcxy capxhuäcxxy Jesucristo y'ayuc ytiy'ajt, pen ca' pin yquexyii ayuccapxhuäcxpi? Com jaybety jadu'n ymiiñ ma Dios ñecy, ma jadu'n yminañ: "Ooy oy jäy ñayjihuiyii co pinjaty mimimb mija'tp oybi tiy'ajt, pinjaty capxhuäcxp oybi tiy'ajt ma yi' ajcxy."

¹⁶ Per ca' nidüg'ociy jäy mibicy je oybi tiy'ajt, com Isaías jadu'n cojay ma ñecy ma jadu'n yminañ: "Huindzin Dios, ¿pin ti mijpidägy ìch ajcxy n'ayuc?" ¹⁷ Cooni jäy ajcxy capxhuäcxxy Jesucristo ytiy'ajt ma jäy chinaaygixy, huin'it ajcxy ymibijccixy com ti amido'ijtcixy je tiy'ajt.

¹⁸ Per n'amidooybich miich ajcxy: ¿Nej ca' jada' yi judíojäy ajcxy midoy Dios ytiy'ajt? Janch jadu'n ti ajcxy jamidoy, com jaybety jadu'n ymiñ ma Dios ñecy ma jadu'n yminañ: Ti capxhuäcxxy ajcxy Dios y'ayuc ytiy'ajt huindu'mybi naaxhuiñ. Ti ajcxy Dios y'ayuc midodaayi huindu'mybi naaxhuiñ.

¹⁹ Jadüg'oc n'amidoogixy: ¿Nej ca' Israel jäy jada' ajcxy nejhuñy Dios ytiy'ajt? Ñejhuñyib ajcxy. Com jecy'ajty Moisés ycojay ma ñecy ma Dios jadu'n yminañ: Nyajpocyñihuaatztähuiyich yi jäy ajcxy huidibi ca' ìch njäy'adyii, e huin'it miich ajcxy cohuindoyii mjihuñhuipy miid yi' ajcxy ycixpi. Ndunipyich may'ajt miid yi' ajcxy, e huin'it miich yi' ajcxy mmijotmädiip.

²⁰ Jadu'n jadüg'it Isaías cojay ma yi' ñecy, ma Dios jadu'n yminañ: Yi jäy ajcxy huidibi ca' xy'ixtäyich, ti xypaadyich ajcxy. Ti nyajniguëxigiyich ndiy'ajt ma yi jäy huidibi ca' xyñidiy xyajtñiyich.

²¹ Com jadu'n jaybety ymiñ ma Dios ñecy, ma Dios jadu'n nigapxy yi Israel jäy co jadu'n yminañ: Jabom jabom ti njamimecxtucyich yi Israel jäy ajcxy. Ti njayajnimäyich ìch ndiy'ajt, e ca' ajcxy mijpidägy. Hue' ajcxy ca' xycapxymidooyich, xymijotmij'öcpich ajcxy.

11

Yi Israel jäy ajcxy huidibi ti ypcynihuaatzcixy

¹ Paady n'amidoogixy: ¿Nej ti jada' Dios ix'ixjni ixtijni yi Israel jäy ajcxy? Pues ca' yjadu'nity, Dios ca' yi' ixmachñi Israel jäy ajcxy. Com nañ Israel jäy ìch. Abraham nmij'ap'ajtibich nmijteedy'ajtibich e nañ jim ngogájpidyich ma anajty Benjamín yco-gajpity. ²⁻³ Dios ca' ixmach yi' yjäy huidibi yhuin'ijx jecy'ajty co jäy'ada'ñyii jigix jëbi may'ajt oy'ajt tunipy miid yi' ajcxy. ¿Nej ca' ajcxy mnejhuñy nej jaybety ymiiñ ma Dios ñecy jadu'n nej Elías nigapxy yi Israel jäy ma Dios? Jadu'n yminañ:

Huindzin Dios, ti yi Israel jäy ajcxy yaj'öctäy huidibi anajty miich m'ayuc xycapxhuäcxpi. Ti ajcxy yajhuindigoydäy je tzaa macxy ma anajty jäy xyhuindzigiy. Naydügpajc

ich ti njachui'myich njaccapxhuäcxyich miich m'ayuc, e nañ xyaj'ögaamich jäy ajcxy.

⁴ E chi Dios y'adzooy nimay Elías:

Ca' mim naydügity, ji ich ahuing nmíididyich yujcpicy jahuixtujc mil yëydijc huidi xy'ojadajtpich xyhuindzigiiybich chambaad, huidibi ca'ni huingoxtinäy yi Baal, yi dios falso, ca'pi ti mic'ajt miidity ni ti tzöc'ajt ca miidity.

⁵ Tim jadu'n nej Dios miidity anajty huixtujc mil yëydijctijc jecy'ajty co anajty Elías yjugy'aty, nañ tim jadu'n cham ma ich ajt nxii ndiempo Dios ymiid nijëjity judíojäy huidibi ti pa'ayoy, e paady ycixpi ti yhuin'ixyii jëbi yi' jäy'adyii. ⁶ Com co ixypy ajcxy yajxon cuyduni Dios ycötujcin, ca'p ni ti pa'ayo'n Dios jactunaani miid yi' ajcxy, com co ti anajty jim Dios y'ayuc ycuycundäyii.

⁷ ¿Ti ti ytunyii ti yjadyii miid yi Israel jäy ajcxy? May ajcxy ca' may'ajtin oy'ajtin paady ma Dios jadu'n nej ajcxy jijp'ijxcixy. Jëyi ajcxy huidi Dios huin'ijxi ti ajcxy paatcixy oy'ajt ma Dios. Yi jacjadyii Israel jäy ajcxy Dios nig ooy yajjotmij'öccixy. ⁸ Com jadu'n jaybety ymiin ma Dios ñecy jadu'n nej Dios yajjotmij'ögy yi Israel jäy, ma jadu'n yminañ:

Tim jadu'n ajcxy nipaady nej jäy ajcxy huidibi ti ymi'öctigooyii, jadu'n nipaady nej jäy huidibi huiintzip, jadu'n nipaady nej huidibi cönatip.

⁹ David nañ jadu'n ycojay jecy'ajty ma ñecy, ma jadu'n yminañ:

Huindzin Dios, cham je jäy tzachnixondägy yi tzinaayin yi jugy'ajtin, ca' ajcxy xyjäymech. Timitiini ajcxy ayo'n möhuipy; tim jadu'n nej iyujc ayo'n paady co yajtüxuuch o co yjut cögäy.

¹⁰ Yajma'ti ajcxy yjot yhuinma'n, huen ahuimbijtcixy jadu'n nej jäy huintzpi. Mö ajcxy tzaachypi huinixii huinitiempo, tim jadu'n nej jäy ajcxy tzaachypi jihuiy huidibi jemxypi tzimiccixp.

Yi ypocyhuinmeecxin huidibi ajcxy ca'p yjudiojäyity

¹¹ Co jadu'n yi maybi Israel jäy ca' cöbijccixy Dios ytiy'ajt, ¿nej mdijy, ti Dios y'ixmachyii ajcxy tücci'yi, e yajtigoya'n ajcxy? Pues ca' yjadu'nity, ca' Dios ixmach yi Israel jäy ajcxy tücci'yi. Co yi Israel jäy ca' cöbijccixy Dios ytiy'ajt nej Cristo y'o'cy miid yi' ajcxy ypocy ycixpi, paady cöbicy yi huidibi ca' yjudiojäyity, jëbi ajcxy y'alma nidoocin paady. Jadu'n Dios ytuñ jigix jëbi yi judíojäy ajcxy cohuindoyii jihuihuipy, e chi nañ jadu'n mijpidägipy ajcxy Jesucristo. ¹² Pen yi mayjäy ajcxy huidijaty ca' y'israeljäyity mij'oy'ajtin mijjotcujc'ajtin ti paady, miid co yi jacmaybi Israel jäy ca' cöbijccixy Jesucristo, chi nig oy'ajtin jotcujc'ajtin pada'n yi naaxhuiñyjäy ajcxy co anajty nidüg'öciy Israel jäy yjothuimbijttaaygixy etz cöbijctaaygixy je Cristo.

¹³ Cham nijayiiygixy miich ajcxy huidi ca' yjudiojäyity, com Dios ti xyquexyich ngapxhuäcxich yi' y'ayuc ma yi jäy ajcxy huidibi ca' yjudiojäyity. Ooy nyajcopicyich jada ndungich, jigix jëbi judíojäy oy'ajtin paady nañ jadu'n. ¹⁴ Ca' jecyity co ich n'amigügtijc, yi judíojäy ajcxy, cohuindoyii ajcxy jihuihuipy, co anajty mayjäy huidi ca' yjudiojäyity mijpidägy ich n'ayuc. Co jadu'n ajcxy cohuindoyii jihuihuipy, chi ajcxy nañ jadu'n mijpidägipy Jesucristo. ¹⁵ Com pen je naaxhuiñyjäy huidibi ca' yjudiojäyity, huidibi Dios jecy'ajty ca' jäygidaci ajcxy chinaayin, pen ti ajcxy cöbijci Dios ytiy'ajt, pen ti ajcxy oy'ajtin paady ma Dios, miid co Dios ti ixmach yi Israel jäy huidibi ca' cöbicy yi' ytiy'ajt, chi yi Israel jäy co ajcxy jadüg'oc yjothuimbidity etz cöbigipy Dios ytiy'ajt, nañ jadu'n ooy yjotcugihuipy ajcxy, jadu'n nejjihuüy ti ajcxy y'ögy etz nej jihuiy ajcxy ti yjugypicy jadüg'oc. ¹⁶ Com co Abraham, Isaac etz Israel Dios anajty jäy'ajtip, paady nañ jadu'n tüg'öciy Israel jäy Dios jäy'adyii, miid co Israel y'ap'ajtip y'oc'ajtip ajcxy. Tim jadu'n nejjihuüy judíojäy ajcxy tzajcaagy puuducy möy Dios, nañ jadu'n je ytujctuc huidibi jac-hui'm nañ Dios je' yje', e nañ tim jadu'n nej co jäy ajcxy möy Dios quipy ytictz, tüg'öciy je' Dios je'ajtäyii quipy y'aacxy.

¹⁷ Hue' je' nijëjity Israel jäy ca' mijpidägy Dios ytiy'ajt, paady ñajtz'ixiiyi, e may'ajt oy'ajt tuñ miid huingbi jäy huidi ca' israeljäyity. Tim jadu'n nej jihuiy tüg oyguipy huidi

tim'ajtp yajpubuxy y'aacx, e je ma ti yajjijppujxtüty, je' yjijp yajpidägy ma huingbi quipy y'aacx. Miich ajcxy huidi ca' yjudíojäyity huídibi ti mibicy je Cristo, ti mbaady Dios y'oy'ajt tim jadu'n nej judíojäy ajcxy jecy'ajty miidity Dios y'oy'ajt. ¹⁸ Ca' huaad amij agix mnayjihuiiygixy, e ni ca' huaad m'ixtijcixy yi judíojäy huídibi ca' mijpidaaccixy je Cristo. Miich ajcxy yi m'oy'ajt ti mbaady ma Dios, tim jadu'n nej je quipy y'aacx mic'ajt paady ma yi quipy ytictz.

¹⁹ Ca' yjecyity co miich ajcxy mina'naangixy co Dios najtz'ixiyy yi judíojäy huídibi ca' mibicy Cristo, jaydëbi miich ajcxy mnaydijyii co Dios xyjäy'adyii. ²⁰ Tiy'ajt jadu'n nej miich mina'ñ. Dios ñajtz'ixiyy yi maybi judíojäy miid co ajcxy ca' mibicy Jesucristo. E Dios miich ti xycöbicy miid co ti mmibicy Jesucristo. Per ca' huaad miich amij agix mnayjihuiiyii miid co Dios ti xycöbicy. Naygüend'adii yajxon ma Dios ytiy'ajt, tzigí' Dios. ²¹ Com Dios ñajtz'ixiy yi judíojäy ajcxy miid co ca' ymijpidägyii yi' ytiy'ajt. Nañ jadu'n miich ajcxy yi' xyñajtz'ixihua'ñ, pen ca' mmijpidaaccixy yajxon yi' ytiy'ajt. ²² Cuentipic jadu'n nej Dios may'ajt oy'ajt tuñ miid nijëjity jäy, etz mic tzaachytuñ nijëjity jäy. Dios mic tzaachytuñ je judíojäy huídibi ca' ycapxymidoy, etz may'ajt oy'ajt tuñ miid miich ajcxy huidi capxymidoob. Jaccuydun yajxon Dios ytiy'ajt, e ñigi Dios may'ajt oy'ajt xytuunipy, pen ca' mguyduni yi' ytiy'ajt, huin'it Dios xyñajtz'ixihuiipy. ²³ E nañ jadu'n yi judíojäy ajcxy huidi ca' mibijccixy Jesús, co ajcxy yhuinma'ñ yajtigadzipy, e mijpidägyipy Jesús, huin'it Dios ycöbigiyyb jadüg'oc, etz Dios miid ymic'ajt jëbi may'ajt oy'ajt tunipy miid yi' ajcxy. ²⁴ Com pen miich ajcxy huidi ca' yjudíojäyity huídibi jecy'ajty anajty ca' Dios jäy'adyii, pen miich ajcxy Dios mic'amy ti xycöbicy, nañ jadu'n jactzojc cöbiga'ñ huídibi ajcxy judíojäyip, pen ycöbijcy ajcxy.

Jadu'n nej Dios yajniidzoocogixihua'ñ Israel jäy ajcxy

²⁵ Miich ajcxy nmigügtijcich, nyajnijayiiyb ajcxy jadu'n nej Dios tuna'ñ miid yi Israel jäy, jaydëbi ca' miich ajcxy amij agix mnayjihuiihuiiyb, etz jaydëbi mnejhuihuipy jada tiy'ajt huídibi ca' pin nejhuüy, co yi Israel jäy ajcxy ooy ajcxy y'aamijity yjotmijity, ca' ajcxy capxymidoy Dios. E jadu'n ajcxy y'ida'ñ mabaad anajty yca'pxy je mayjäy, ca'pi y'israeljäyity je huídibi mijpidägam Jesucristo ytiy'ajt. ²⁶ Nejhuiiyim co Dios may'ajt oy'ajt tunamb jadüg'oc miid tüg'óciy Israel jäy ajcxy, com jadu'n jaybety ymiñ ma Dios ñecy ma Dios jadu'n ymina'ñ:

Jacjini tüg Israel jäy ymina'ñ huídibi yajniidzögamb ajcxy ma yi' ypocy. Yi' yajtigoyaanip Israel jäy ypocy.

²⁷ Jadüg'it jaybety ymiñ ma Dios jadu'n ymina'ñ: Jadu'n nyajhuinhuaniiyich yi Israel jäy co yi' ajcxy ypocy nyajtigooybich.

²⁸ Co yi Israel jäy ca' mijpidaaccixy Jesucristo ytiy'ajt, chi Dios ajcxy ñajtz'ixiyyi. E co ñajtz'ixiyyi ajcxy, paady ycixpi miich ajcxy Dios ti xycöbicy, co ti mmijpidaaccixy Jesucristo. Per chambaad Dios jactzojctay yi Israel jäy miid co Dios huin'ixy yi Abraham, Isaac etz Jacob jecy'ajty jëbi yi' yjäy'adyii. ²⁹ Dios ti huin'ixy yi Israel jäy ajcxy jëbi yi' yjäy'adyii, etz tüg'óciy huidi yajhuinhuaniiy co möhua'ñ, co may'ajt tuna'ñ miid yi' ajcxy ycixpi. Ymöhuipy yi', ytunipy yi'. Dios ca' y'ayuc yajxigy. ³⁰ Miich ajcxy huidi ca' yjudíojäyity jecy'ajty ca' anajty mmijpidaaccixy Dios. Jadachambi xii tiempo Dios miich ajcxy ti xypa'ayoy, miid co yi Israel jäy ca' mijpidägy Cristo ytiy'ajt. ³¹ Yi judíojäy jadachambi xii tiempo ca' mijpidaaccixy Dios ytiy'ajt, tim jadu'n nej jecy'ajty miich ajcxy ca' anajty mmijpidaaccixy Dios ytiy'ajt. Jacjini Dios pa'ayoohuin tuna'ñ jadüg'oc miid yi judíojäy ajcxy tim jadu'n nej ytuñ miid miich ajcxy jadachambi xii tiempo. ³² Com Dios anajty ti yajpocycädäy tüg'óciy jäy co ajcxy ycapxycömidodacy, yi judíojäy etz nañ huidi ca' yjudíojäyity, paady ycixpi Dios pa'ayo'n tuñ miid nidüg'óciy jäy, judíojäy etz nañ huidi ca' yjudíojäyity, tüg'óciy pin mijpidacp yi' ytiy'ajt.

³³ ¡Ooy ycodzigijity Dios! Dios ooy mijcajee may'ajt oy'ajt tuñ miid jäy ajcxy ycixpi. Dios ooy mijcajee mijhuinma'ñ ti tuñ miid jäy ajcxy ycixpi. Dios ooy mijcajee ycohuinma'ñity. Ca' ni pin jëbi huinjihuiydäy je ayuc huinma'ñ huidi Dios ymiid. Etz

nañ ca' ni pin jëbi huinjihuiydäy huidibi Dios ytumyb. ³⁴ Com jaybety jadu'n miiñ ma Dios ñecy ma jadu'n ymina'ñ:

Ca' ni pin jëbi huinjihuiydäy nej Dios yhuinma'ñ miidity. Ca' ji ni pinjäy huidi ti capxhuijy Dios.

³⁵ Ca' ji ni pinjäy huidi tijaty ti ocmooybi Dios. Dios ca' ni ti nuucxy miidity miid ni pinjäy.

³⁶ Tüg'óciy huidijaty iich ajt ya nbaatim, ac jiiby choondäy ma Dios. Yi' tüg'óciy ti yaj'oyiydäy, e yi' je'ajttaayip tüg'óciy. ¡Tzoc Dios capxpaatim ojadajtim huinixii huiniitempo! Jadu'n jadu'n. Amén.

12

Je jugy'ajtin cixyjot ma Dios

¹ E jadu'n nmigügtijcich, cham iich miich ajcxy nimaaygixy mictägy, com co Dios ti xypa'ayoogixy, paady ycixpi nay'ayéjciy naygiyéjciy amuumdügjot ma Dios. Cuychinayi yi ytiy'ajt yajxon jabom jabom. Tzinaaygix miid huadz mjot mhuinma'ñ, jadu'n nej Dios jëbi jäygidäy yi mdzinaayin. Jada je tiy'ajt nej jëbi Dios m'ojadajtcixy tiydudäy. ² Ca' ajcxy mguydungixy mguychinaaygixy yi naaxhuiñyäjy ajcxy yjibicjot yjibic-huinma'ñ huidibi tzinaaygixp jadachambi xii jadachambi tiempo. Com Dios ti xymooygixy jemybi mjot jemybi mhuinma'ñ, paady mguydunipy ajcxy yi' ytiy'ajt. Ixpjccix Dios ytiy'ajt, jigix ajcxy mnejhuñhuipy huidibi tiy'ajt Dios chojcy mguydunipy, etz jigix mhuinjihuiñhuipy je oyhuinma'ñ, je tudägyipi huinma'ñ huidibi Dios yjäygidacpy, je huinma'ñ huidi huadzip ca'pxyip.

³ Com Dios may'ajt oy'ajt ti tuñ miid iich etz ti xymöyich jada tung co ngapx-huäcxich yi' y'ayuc, paady iich miich ajcxy nimäy nidüg'óciy co ca' huaad amij agix mnayjihuiñyigixy, ca' huaad nigü anaxy mnaygöamáayigixy ci'm. Nidüg nidüg ci'm huinmaaygixy yajxon huidi tung jëbi myajnicxcixy, jadu'n nej Dios huijy'ajt cujc'ajt ti xymooygixy. ⁴ Jadu'n nej iich ajt nnin'cx ymiid yhuin y'ahuac etz yci' ytecy, je nin'cx abicy ytung miidity, je huin abicy ytung miidity, je y'ahuac abicy ytung miidity, etz je ci' tecy abicy ytung miidity. ⁵ Nañ tim jadu'n iich ajt huidi mijpidacp Cristo, e ni may iich ajt, e tügpicy jäy iich ajt com tú'ciy nmibijcim. E nije' nije' Dios huijy'ajt cujc'ajt ti xymooyim abicyjaty, nej jëbi nije' nije' Dios ytung nyajnicxim.

⁶ Com abicyjaty Dios ti xymooyim huijy'ajt cujc'ajt, paady copicy nyajtuunim nije' nije' je huijy'ajt cujc'ajt huidi Dios ti xymooyim. Pen Dios ti xymooyim huijy'ajt cujc'ajt jëbi ngapxhuäcxim yi' y'ayuc, copicy ngapxhuäcxim mibaad ixpjcim nmid'ajtim. ⁷ Pen Dios huijy'ajt cujc'ajt ti xymooyim co jëbi nbubejtim nmigügtijc, copicy nmigügtijc nbubejtim. Pen Dios huijy'ajt cujc'ajt ti xymooyim jëbi nyaj'ixpjcim nmigügtijc, copicy ndung'ajtim yaj'ixpigii. ⁸ Pen Dios huijy'ajt cujc'ajt ti xymooyim co jëbi ngapx-huijim nmigügtijc, co jëbi ntot'amijmooyim nmigügtijc, copicy ngapxhuijim nmigügtijc, etz ntot'amijmooyim nmigügtijc agujc jotcujc. Pen nyejtim tijaty ma nmigügtijc, copicy agujc jotcujc nyejtim. Je huidi ajcxy nigohuajc'ajtp mibijcpidijc copicy yajxon y'ané'mgixipy. Pen Dios huijy'ajt cujc'ajt ti xymooyim co jëbi nbubejtim jäy ajcxy huidibi ayo'n miid jotmay miid, copicy agujc jotcujc nbubejtim pinjaty ayo'n miid jotmay miid.

Nej mibijcpidijc huaad jugy'ajtcixy chinaygixy

⁹ Naychójcigixy nayjihuiñyigixy miñ xyipy amuumdügjot, ca' y'ametz yjotmetzity. Ca' mnijot'ajtcixy jibic jot jibic-huinma'ñ. Nijot'ajtcix nigü oyjot oyhuinma'ñ.

¹⁰ Naychójcigix nayjihuiñyigix amuumdügjot, jadu'n nej ypadyii mnaymigüg'ajtigixipy ma Jesucristo. Nayajmij'ajtigix nigü nidüg nidüg miich ajcxy.

¹¹ Naymic'ixigix cixyjot huinijot, ca' mnuux'ajtcix. Tungix amuumdügjot miid mHuindzin Jesucristo ycixpi.

¹² Tzinaaygix agujc jotcujc, com mnejhuñyib ajcxy co mbada'ñ oy'ajtin ma Dios. Mecxtujccix yi tzaachypi ayo'n huidibi mminajxyp myajnajxyp. Mibijctzoogix Dios jabom jabom.

¹³ Naybubéjtigix miñ xyipy, pen yajmayjajtpy migüg tijaty. Nayyajjättácigix miñ xyipy oy yajxon.

¹⁴ Nibijctzohui' ma Dios huidibi ajcxy xy'ixhuidijtp xypahuidijtp. Nibijctzohui' mmidzip huen Dios may'ajt oy'ajt tuñ miid yi' ycixpi. E ca' mnibijctzohuiy co huen ayo'n paadipy.

¹⁵ Tzoc jotcuyc nayjihuiyim co ajt nmigügtijc jotcuyc ñayjihuiyii. Tzoc miidtajim miidmayim nmigügtijc pen tajp mayb.

¹⁶ Ooy yajxon nayyaj'jtigix naygodigíyigix. Ca' amij agix mnayjihuiyigixy. Migüg'adiyb yi mmigüg huidi ayoob. Yung naxy miid'at mjot mhuinma'ñ, ca' mnaygöamáayigixy.

¹⁷ Co jäy xymidundigóoygixipy, ca' huaad jibic myaj'ahuimbijtcixy. Hue' janchtiy oybi ajcxy mdunipy jadu'n nej jäy jébi jäygidägy. ¹⁸ Oy nayyaj'jtigix miid nidüg'óciy jäy mabaad mmadägy. ¹⁹ Miich ajcxy migügtijc, co jäy jibic xymidundigóoygixipy, ca' nañ jadu'n ajcxy myaj'ahuimbidity, mimecxtugipy ajcxy, com Dios yi' tzaachytunip yi jäy ajcxy huidi anajty xymidundigóoygixp. Com jaybety jadu'n ymiñ ma Dios ñecy jadu'n yminañ: "ñich nyaj'ahuimbiditych nej anajty jäy xymidundigóoygixy." ²⁰ Co jäy xymidundigóoygixipy myaj'ahuimbidity ajcxy oybi, com jaybety jadu'n ymiñ ma Dios ñecy, ma jadu'n ymina'ñ:

Pen yi mmidzip yubo'cip, myajcayipy myaj'ügipy, pen yi mmidzip tidziyip, myajni'ügipy. Co jadu'n mdunipy miid mmidzip huin'it tzöydu'n jihuihuipy.

²¹ Pen myaj'ahuimbijtpy jibic co jäy xymidundigoy, ti anajty jibic-huinma'ñ xymimadägy. Hue' janchtiy yajtun mecxtujcin etz oyhuinma'ñ, e jadu'n jibicpi mimadägy miid oybi.

13

¹ Copicy co nidüg'óciy jäy capxymidóogixipy yi cajp tungmiidpi etz yi gobierno tungmiidpi. Ca' ji ni tüg tungmiidpi huidibi jébi y'ane'my pen Dios ca' a'ixiy. Com Dios jadu'n cötujcin ti yajhui'my co huen jii'aty tungmiidpidijc, paady ycixpi tungmiidpidijc nidüg'óciy jim mic'ajt paady ma Dios. ² Paady jäy ajcxy pinjaty ca' ycapxymidoy ma tungmiidpidijc, hue' tundigooyb ma Dios e tzaachypí ajcxy ypadaamyb. ³ Yi mijtungmiidpi ca' yi' ajcxy adzigiy yi jäy huidijaty oyhuinma'ñ miid. Hue' janchtiy yi' ajcxy chaachytunipy yi jäy huidi jibic-huinma'ñ miid. Pen mdzojcy co ca' tzaachypí mbaadipy ma yi tungmiidpi, hue' janchtiy oybi mdunipy, e huin'it m'idipy jotcuyc. ⁴ Com Dios ti pidägy jada tungmiidpi miid miich ajcxy ycixpi, jigix jébi jotcuyc ajcxy mdzinaaygixy. Pen mdundigooyb huin'it je tungmiidpi mdzigihuipy, com yi' ymiid mic'ajt jébi tzaachytuñ jäy ajcxy huidibi tundigooyb. Com Dios ytung ytuunipy etz ycuuduunipy Dios ycötujcin jadu'n nej Dios xyñajtz'ane'miim, copicy co tzaachytuñ je jäy ajcxy huidibi tundigooyb. ⁵ Paady ycixp copicy mgapxymidohuipy tungmiidpidijc, jigix ca' miich ajcxy Dios xychaachytunipy e nañ jotcuyc mnayjihuihuib co ca' anajty ti ti mdundigoy. ⁶ Yi tungmiidpidijc Dios ycixpi ajcxy ytuñ, e ymiid ajcxy ycötujcin, paady ycixpi copicy mmigüedipy ajcxy.

⁷ Mgüedipy ma yi tungmiidpidijc huidibi xypaatp. Co ajcxy cajp meeñ yajmucy, migüedipy. Co je gobierno tungmiidpi pidägy impuestos, migüedipy. Jäy ajcxy huidijaty tungmiid myajmij'adipy, etz huidi mijtungmiid mgömayipy. ⁸ Ca' pin minuucxy'adiyb. Tzoc jihui' mmigügtijc, e mgüedipy oy'amy huidibi mnuucxyp. Co yi mmigügtijc mdzogipy mjihuihuipy ti anajty mguydundäy Dios ycötujcin. ⁹ Jadu'n Dios ycötujcin jaybety ymiñ, ma jadu'n ymina'ñ: "Ca' mmigapxtigoyipy huingbi töxyjäy. Ca' mmigüg mmeedzipy. Ca' mjäyyaj'ögipy. Ca' mmigüg m'adzojcopy ti ymiid." Pen mdzojcopy mjihuiyb migüg nej miich ci'm mnaychogyii ti anajty mguydundaayi Dios y'ane'min ycötujcin. ¹⁰ Je naychojcin je nayjihuiyin ca'p je' ti jibicpi ti tzaachypí tuñ ma je migüg, co jadu'n jada mguydundaahuipy ti anajty Dios ycötujcin mguydundaayi.

¹¹ Com miich ajcxy mnejhuiyb co huington je xii je tiempo mina Jesucristo mina'n jadüg'oc ya naaxhuiñ, paady ycixpi jïjp'ijxcix ajt nHuindzin Jesucristo co tzojc yminipy. E jadachambi ti yjac-huingtoni mina miina'n ñich ajt nHuindzin Jesucristo, ca'ydi co oga'n nmibijcim. ¹² Canaag jimijt jäy ajcxy ahuijxy jïjp'ijxpy co Dios yajnidzöga'nyii ajcxy y'alma, jadachambi ti yhuingtoni je xii je tiempo mina n'alma ajt nidzoocin padaanim. Paady ycixp tzoc ixmajtzim yi jibic-huinma'n yi huidibi jäy ycuudumyb huidibi ca' Dios ytiy'ajt nejhuiyi. Tzoc cuychinaayim cuyjygy'ajtim Dios ytiy'ajt. ¹³ Tzoc tzinaayim juygy'ajtim tudägy. Tzoc cuyduunim Dios ytiy'ajt. Ca' huaad jadu'n ndzinaayim amügyjäy. Ca' huaad n'agootzhuidijtim xiicyaax xiictinaayim. Ca' huaad ndundigooyim miid huingbi töxyjäy. Ni ca' huaad ndziptuunim ahua'nduunim. Ni ca' huaad nmigüg nmi'ijxtinaayim. ¹⁴ Tzoc cuychinaayim cuyjygy'ajtim Jesucristo ytiy'ajt. Tzoc tzinaayim tiydudägy jadu'n nej Jesucristo tiydudägy ti chinäy ya naaxhuiñ. Ca' nguyduunim ti jibicpi ajt n'aa njot yja'adzojcpy.

14

Ca' migüg mbocy'ixy

¹ Miich ajcxy nmigügtijcich, copicy mgöbigipy agujc jotcujc ma miich mnayyöymüjicigixy ajcxy yi migügtijc huidibi mibijcp je Cristo, per ca' tiydudägy huinjihuüy je Cristo ytiy'ajt. Mgöbigipy per ca' mhuingapxpedipy, ca' ti myaj'ayucyoonipy miid yi' ajcxy. ² Ti migügtijc huidibi minamb co Dios ca' ti jicxy capx'aducy, etz jëbi ajcxy jicxy huenytim ti jicxyity. Etz nañ ji migügtijc huidibi minam co Dios ti capx'aducy tzüch, paady ajcxy jicxy'adyii je'jada'ajty aay ujtz. ³ Yi migüg huidibi tzüch tzützp ca' huaad ixtijy je ymigüg huidibi yjicxpy je'jada'ajty aay ujtz. E nañ ni yi migüg huidibi jicxp aay ujtz ca' huaad ixtijy yi migüg huidibi tzüch tzu'tzp, com Dios ycöbijctaayb je jäy ajcxy huidibi ti mibicy Jesucristo. ⁴ Ca' huaad miich ajcxy mnimähuipy yi mmigüg co ca' oytuñ, tim jadu'n nipaady nej co tüg jäy nimähuipy huingbi jäy ytumbi co ca' oy ytuñ. Dios ci'm nimähuip huiidi ajcxy mibijcp Jesucristo, pen oytuñ o ca' oytuñ. Dios ypubejtyp pinjaty mibijcp, paady madaacp ajcxy ma chinaayin.

⁵ Nijëjity ajt nmigügtijc ymina'n co ooy ycopicyity n'amay'ajtim nijëjity xii, jacjadyii jäy ymina'n co ca' ycopicyity n'amay'ajtim jada xii. Huen nidüg nidüg yci'mhuinma'n yajtuñ pen y'amay'adamyb, o pen ca' amay'ada'n nije' nije' xii. ⁶ Hich ajt nmigügtijc huiidi amay'ajtp nijëjity xii, hue' ajcxy tijy co Dios jadu'n tzojcp. E nañ ñich ajt nmigügtijc huiidi tzüch tzu'tzp, hue' ajcxy tijy co Dios jadu'n tzojcp, etz nañ yajnajxyp Dioscojuyip ma Dios miid yjicxy ypicy ycixpi. Nañ tim jadu'n ajt nmigügtijc huiidi ca' tzüch tzüdza'n, hue' tijy co Dios jadu'n tzojcp, etz nañ yajnajxyp Dioscojuyip miid yjicxy ypicy ycixpi.

⁷ Ca' ñich ajt nayyajtzinaayim amidzooci'm, nañ jadu'n ca' ñich ajt ci'm ndzojcin co n'o'cim. ⁸ Pen njactzinaayim hue' anajty nguyduunim ajt nHuindzin Jesucristo chojcin. Pen n'o'cim yi' anajty jadu'n ti yajcöducy. Pen njactzinaayim, o pen n'o'cim, tú'ciy nipaady, com Jesucristo nHuindzin'ajtim ma yi tzinaayin etz ma yi o'cin. ⁹ Paady ycixp Cristo y'o'cy etz yjugypijcy jadüg'oc jigix jëb nihuindzin'ajttäy yi' yjäy huidibi jactzinaayb jacjygy'ajtp, etz jigix jëb nihuindzin'aty yi tiibi y'ögy.

¹⁰ ¿Na'amy co mmigüg mdzachpocy'ixy? o ¿Nej co mmigüg mdzach'ixtijy? Ca' jadu'n y'oyity co ajcxy jadu'n m'idich. Com nidüg'óciy ajt njadaanim ma Dios ytiydundac.

¹¹ Com jadu'n jaybety ymiñ ma Dios ñecy, ma jadu'n ymina'n:

Janch janch co ñich, je tügpajcpi Dios, jadu'n nmina'nich co tüg'óciy naaxhuiñyjäy xyhuingoxtinähuibich xyhuindzigihuibich, etz nañ tüg'óciy naaxhuiñyjay xy-capxpaadibich co ñich je' tügpajcpi je Dios.

¹² Com Dios nhuindzin'ajtim, paady ycixp nidüg'óciy ñich ajt nayguëxictähuaanim ma Dios yhuinduu, chi Dios xy'amidohuaanim nej ti ndzinaayim ti njygy'ajtim nidüg nidüg.

Ca' migüg myajhuinma'nydigooygixy

¹³ Paady ycixpi ca' huaad naynixiic naynigapxim miñ xyipy. Hue' janchtiy miich pidaaccix mhuinma'ñ co ca' ti mdúngxixipy huidi mmigügtijc ca' jäygidägy, huidi mmigüg yajpocycähuiib. ¹⁴ Nnejhuhüybich tiydudägy co ajt nHuindzin Jesucristo ytiy'ajt xyajnejhuhüyim co jëbi njicxim huen tim huidi jicxy tim huidi picy. Je jicxy je picy ca' ma ycobocy. Per pen tüg migüg yhuinma'ñ pidacp co Dios ca' jäygidägy co yi' yjicxpy nijëjity jicxy picy, pues ca' yhuaadity co yi' jadu'mbi jäy jicxy huidi yi' ytiy' co ca' huaad njicxim. ¹⁵ Pen ca' m'oy'ity miid tüg migüg co ti mjicxy je jicx picy huidibi yi' ytiy' co Dios ca' jadu'n yaj'cöducy, chi ca' anajty mdzocy mjihuüy yi' mmigüg nej ypadyii. Com nañ Cristo ti y'ögy miid yi' mmigüg ypocy ycixpi, paady ca' huaad myajtigoy yi' mmigüg, miid co mjicxy huidi yi' ca' jäygidägy. ¹⁶ Ca' ajcxy m'a'ixüygixipy co jibic yajnigapx yajnimiydägipy huidibi miich ajcxy myajnajxp co y'oyity. Oy miich mjahuinjihuüy Dios ytiy'ajt, per ca' huaad mdunipy huidi yi' mmigüg ca' jäygidägy, e huin'it xyñigapxipy jibic. ¹⁷ Canan Dios jadu'n ytiy'ajt xyñajtz'ane'müyim huidijaty huaad njicxim n'uucim, o huidi ca' huaad njicxim n'uucim. Hue' janchtiy ti xyñajtz'ane'müyim nej jëbi tiydudägyi ndzinaayim njugy'ajtim. Nej jëbi jotcuyc n'ijtim miid ajt mmigügtijc. Nej jëbi jotcuyc nayjihuhüyim miid Dios ymic'ajt ma njot nhuinma'ñ. ¹⁸ Co jadu'n nguyduunim nej Cristo ytiy'ajt ti xyñajtz'ane'müyim, huin'it jäygidägipy Dios etz nañ jadu'n jäygidägipy jäy ajcxy nej anajty nduunim.

¹⁹ Tzoc panixim je huinma'ñ jadu'n nej jëbi ndzinaayim agujc jotcuyc miid ajt mmigügtijc, ca' ma ti tzip ti capxy nmüid'ajtim. Tzoc yajtuunim je huinma'ñ jadu'n nej jëbi huaad naybubejtim nidüg nidüg nej jëbi huaad nguychinaayim Dios ytiy'ajt. ²⁰ Ca' huaad nyajtigooyim Dios ytung miid tzip capxy jadu'n nej huidi jëbi huaad ndzüdzm, etz huidibi ca' huaad ndzüdzm. Janch tiy'ajt co Dios ca' ti jicxy ti picy capx'aducy, per pen njicxim huidijaty nijëjity ajt mmigügtijc yajcoboypcy, e jadu'n nyajhuinma'nydigoooyim ajt mmigüg, chi nmidundigooyim Dios ytiy'ajt. ²¹ Tiy'ajt jadu'n co ca' huaad tzüch ndzüdzm etz ca' huaad vino n'uucim, o jactijaty huidibi ajt mmigüg yajcoboypcy. Com co jadu'n ajt n'idiidzm, hue' anajty ajt mmigüg nyajhuinma'nydigoyaanim ma ymibijcin. ²² Miich ajcxy huidibi huinjihuüy Dios ytiy'ajt co Dios ca' capx'aducy ti jicxin ti pijcin, ca' mmimiydacconaxipy miid jäy ajcxy. Dios ñejhuhüyb co miich mhuinjihuüy yi' ytiy'ajt. Jëbi jotcuyc mdzinähuipy pen mguychinaayb je huinma'ñ huidibi miich mnejhuhüygixyp co ytudägyity, e huin'it ca' jibic mnayjihuhüyb ajcxy. ²³ Tundigooyb yi' migügtijc huidibi jotmetz jicxp nijëjity jicxy picy, miid co tzigüyb yi' co Dios ymijotmädiyb co ti jicxy huidi ytiy' co ycobocy. Tundigooyb jadu'n com ca' ti cuyduni Dios ytiy'ajt nej ci'm ti yajniguejy. Pen ca' nguyduunim jadu'n nej nhuinjihuüyim Dios ytiy'ajt, tundigooyim anajty.

15

Tzojcix migügtijc, ca' ñaydüg mnaychogyi

¹ Ich ajt huidibi tiydudägy nmibijcin etz nhuinjihuüyim Dios ytiy'ajt, copicy nmimecxtujcim ajt mmigügtijc huidibi ca'ni huinjihuüy yajxon Dios ytiy'ajt. Ca' huaad ti nduunim miid ngi'm jäygidacín ycixpi. ² Copicy nyajtuunim oyhuinma'ñ miid ajt mmigügtijc, jadu'n nej jëbi ajt mmigüg jäygidägy, etz jadu'n nej jëbi nbubejtim ajt mmigüg miid ymibijcin. ³ Com nañ Cristo ca' ti ytuñ miid yci'm jäygidacín ycixpi, com jaybety jadu'n miñ ma Dios ñecy, ma je Cristo nimay Dios Teedy: “Miich mmidzip ajcxy huidibi xyñigapxp xyñi'ojüyb, xyñigapxpich xyñi'ojüybich ajcxy nañ jadu'n.” ⁴ Com tüg'óciy Dios y'ayuc huidibi ycojay jecy'ajty, hue' cojay miid ich ajt ycixpi, jigix jëbi Dios ytiy'ajt nbaatim. Dios ytiy'ajt xyajnejhuhüyim co Dios jadu'n tzocy co nmimecxtujcim ajt mmigügtijc. Nañ Dios y'ayuc xyjot'amijmooyim, e nañ xyajnejhuhüyim jadu'n jëbi njijp'ixim pubejtin ma Dios. ⁵ Com Dios, yi' je' huidi xypubejtim miid mecxtujcin, e nañ xyjot'amijmooyim, paady huen Dios may'ajt tunipy ma miich ajcxy mjot mhuinma'ñ, jigix jëbi mmiid'idipy tú'ciy mjot mhuinma'ñ nej Jesucristo yjot yhuinma'ñ miidity, e

jadu'n jëbi mnayyaj'oy'íjtigixy jotcuyc ca' ma tzip capxy. ⁶ Dios miich ajcxy xypubedipy xypudigíhuipy, jigix jëbi myajtügíygixy mjet mhuinma'ñ, etz tú'ciy m'ojadajtcixipy mhuindzigíygixipy Dios Teedy etz ìich ajt nHuindzin Jesucristo.

Jesucristo y'ayuc yajcapxhuäcxy ma huidibi ca' yjudíojäyity

⁷ Naygöbícigix nidüg nidüg agujc jotcuyc, tim jadu'n nej Cristo xycöbijccixy agujc jotcuyc. Co mnaygöbícigixipy nidüg nidüg agujc jotcuyc, huin'it Dios capxpaady y'idipy. ⁸ Janch tiy'ajt co Cristo y'oy ya naaxhuiñ, oy pubety judíojäy ajcxy, e jadu'n cuyduñ Dios ytiy'ajt huidi yajhuinhuaníy Abraham, Isaac etz Jacob jecy'ajty co jadu'n tuna'ñ miid yi' ajcxy ycixpi. ⁹ Nañ jadu'n Cristo ooy pubejty yi' huidibi ca' yjudíojäyity, jaydëbi ajcxy capxpaadipy Dios, miid co ti ypa'ayoyii ajcxy. Com jaybety jadu'n ymiñ ma Dios ñecy, ma jadu'n David yminañ:

Com miich Huindzin Dios ti xycohua'ñich paady miich ngapxpaady ma yi jäy ajcxy huidibi ca' yjudíojäyity. ìich miich nhuin'íhuipy miid himnos.

¹⁰ E nañ jaybety jadu'n ymiñ ma Dios yñecy:

Jotcuyc'ajtcixy quipxy miid Dios yjäy miich ajcxy huidi ca' yjudíojäyity.

¹¹ E nañ jaybety jadu'n ymiñ ma Dios ñecy, ma jadu'n ymina'ñ:

Capxpaatcix yi Huindzin Dios miich ajcxy huidi ca' yjudíojäyity. Capxpaatcix yi Huindzin Dios miich ajcxy nidüg'óciy naaxhuiñyjäy.

¹² E Isafas ycojay nañ jadu'n ma yi' ñecy, ma jadu'n ymina'ñ:

Ma'xung'adamb tüg Isai y'ap y'oc, e yi' ane'mamb yi jäy huidibi ca' yjudíojäyity. Co yi jäy ajcxy huidibi ca' yjudíojäyity mijpidägipy je mij'ane'mbi, hue' ajcxy yjijp'ixpy co möhuanip oy'ajt.

¹³ Nmibijctzooybich Dios miid miich ajcxy ycixpi huidijaty mibijcp Jesucristo, com njijp'ixim co Dios xymöhuaanim oy'ajtin. Nmibijctzooybich Dios miid miich ajcxy ycixpi co huen xyajjotcugíhuip ajcxy, e nañ co huen xyajpoocxipy mjet mhuinma'ñ. Nmibijctzooybich Dios co huen xypubejtcixy xypudigíygixy miid yi' yjihui'ñ ymic'ajt, jaydëbi mijjp'ixipy ajcxy co mbaadip oy'ajtin mijcajee ma Dios.

¹⁴ Miich ajcxy migügtijc, jotcuyc nayjihui'yijich miid miich ajcxy ycixpi, com ne-jhuiybich co miich ajcxy miidity oyot oyhuinma'ñ, e nañ mhuinjihuiyb ajcxy tüg'óciy Dios ytiy'ajt, paady jëbi mnayyaj'ixpícgixy nidüg nidüg. ¹⁵⁻¹⁶ Jotmic'amy ti nya-jjáyemejtzcoodyich miich ajcxy nijëjity Dios ytiy'ajt ma jada necy huidi nyajnijayíyb ajcxy cham, com Dios may'ajt oy'ajt ti tuñ miid ìich, e ti xyhuin'ixyich jaydëbi nduñich Jesucristo ytung ma yi jäy ajcxy huidi ca' yjudíojäyity. Jadu'n nduñich miid Dios ycixpi, co ngapxhuäcxyich je oybi tiy'ajt jadu'n nej Jesucristo y'o'cy miid jäy ajcxy ypocy ycixpi. Jadu'n Jesucristo ytuñ jigix jëbi Dios cöbigipy yi mayjäy ca'pi yjudíojäyity huidi ti mibicy Jesucristo etz huidibi yi Espíritu Santo ti yajhuäch je jibicp ma ajcxy yjot yhuinma'ñ.

¹⁷ Com Jesucristo ytiy'ajt yajpaatp ma ìich njot nhuinma'ñ, paady ycixp ooy jotcuyc nayjihui'yijich co nduñich miid Dios ycixpi. ¹⁸ Jada janchtiy ìich nyajmiidmiydacy miich ajcxy je may'ajt huidi Cristo ti tuñ co ngapxhuäcxich yi' y'ayuc. Ca' nyajmiidmiydaaccixy huidi Cristo ytumyb miid jacpínjaty. Miid co ngapxhuäcxich Cristo y'ayuc, e nañ mijhuinma'ñ ndumybich miid Cristo ymic'ajt, paady mayjäy ycapxymidooyb Dios huidi ca'p ajcxy yjudíojäyity. ¹⁹ Ti ngapxhuäcxyich tüg'óciy Cristo ytiy'ajt nej jëbi ajcxy y'alma ñidzoocin paadip. Jim nyajtzondacyich Jerusalén, e ti nhuidijttäyich canaag agajp mabaad nja'tyich jim Ilirico ñaaxjot. E Dios yjihui'ñ ymic'ajt xypubejtich xypudigíyich co ìich mijhuinma'ñ nduñich, etz Dios ytiy'ajt nyéjicbich. ²⁰ Ooy nijot'atyich co ngapxhuäcxibyich Jesucristo ytiy'ajt ma anajty ca' pín jayijp capxhuäcxyñi. ìich oga'n Jesucristo y'ayuc jim nmínicxi ma yi jäy ajcxy huidi ca' anajty midoy Jesucristo ytiy'ajt. Jadu'n nduñich, jigix ca'ydi njijptigíyiyich ma huingbi anajty jayijp ti capxhuäcxi Jesucristo ytiy'ajt. ²¹ Com jaybety jadu'n ymiñ ma Dios ñecy, ma Dios jadu'n ymina'ñ:

Yi jäy ajcxy ymidohuaanip Cristo y'ayuc huidibi ca'ni anajty midoogixy. Yi jäy ajcxy yhuinjihuïhuaamyb je Cristo ytiy'ajt huidibi ca'ni anajty nejhuiygixy co yjiijity je Cristo.

Pablo huinmay co ñicxa'ñ jim Roma

²² Com ooy ndzachcapxhuäcxich Cristo ytiy'ajt canaag agajp, paady ca' nyajniabadïyich nïcxiyich ma miich ajcxy. ²³ Canaag jimijt ndzachnijot'atyich anajty nicxa'ñich ma miich ajcxy. Ixti chamni ti nhuidijttäyich majaty anajty nhuidida'ñich. ²⁴ Paady njijp'ijxypich co jëbi nnaxïhuibich ma miich ajcxy co anajty nicxyich jim España ñaaxjot. Huäcxibaambich jim ma miich ajcxy jëbi hueeni ajcxy ngapxim nmiydaacim. Nañ hue' njijp'ijxypich co xypubedaambich miich ajcxy miid ndu'amgixpich. ²⁵ Jayijp nnicxa'ñich jim Jerusalén, chiini nnicxa'ñich ma miich ajcxy. Nminicxaamybich jim Jerusalén hueeni meeñ huidibi nyegaamybich ma yi mibijcpidijc jim Jerusalén miid ayoobtjic ycixpi. ²⁶ Com yi mibijcpidijc ya Macedonia etz Acaya ñaaxjot ti ajcxy yhuinma'ñ pidaaccixy co ajcxy pubeda'ñ yi ayoobtjic jim Jerusalén huidibi mijpidacp Jesucristo. ²⁷ Ooy ajcxy jotcuic ñayjihuiyï co ymigügtjic pubeda'ñ jim Jerusalén. Paatip co pubedipy ajcxy, com ma yi judíojäy ajcxy, jim ajcxy ti paady Dios ytiy'ajt, paady paatip ajcxy huidi ca' yjudíojäyity co pubedipy yi judíojäy ajcxy. ²⁸ Co anajty ti nyajcïdigiydaaygixy je meeñ huidibi yi migügtjic ya Macedonia etz Acaya ti yajmujccixy miid je mibijcpidijc ycixpi huidibi yajpatp jim Jerusalén, huin'it nnicxa'ñich jim España ñaaxjot. Nnaxïhuaambich ma miich ajcxy co anajty jim nnicxich. ²⁹ Nejhuiybich co anajty jim naxïyich ma miich ajcxy, je Cristo xypubedipich je ymic'ajt, e nyegipich Cristo ymic'ajt ijxpejt etz nyaj'ixpigipyich miich ajcxy je Cristo ytiy'ajt.

³⁰ Miich ajcxy nmigügtjicich, com miich ajcxy mijpidaaccixyp ïich ajt nHuindzin Jesucristo, e com miich ajcxy miid Dios yjihui'ñ ymic'ajt ma m'aa mjot, e nañ xychojcpich xyjihuiybich, paady ycixp nbijctzooyich may'ajt, yajtügiygixy m'ayuc mhuinma'ñ miid ïich, jëbi tú'ciy Dios nmibijctzoohuim mictägy miid ïich ycixpi. ³¹ Mibijctzoogix Dios co huen xyñihua'ñich xcohua'ñich ma yi judíojäy ajcxy jim Judea naaxjot, huidibi xyca'ixaambich co ajcxy ca' mijpidägy Jesús. Nañ mibijctzoogix Dios co yi mibijcpidijc jim Jerusalén cöbigipy ajcxy oy yajxon je pubejtin huidibi ïich jim ngïyegaamy. ³² Mibijctzoogix Dios co huen xypubedipy xypudigïhuibich, jëbi nïcxiyich ma miich ajcxy agujc jotcuic, ca' ti jotmay, pen Dios jadu'n tzojcp, etz nañ jëbi nhuäcxibipich jim ma miich ajcxy agujc jotcuic, e jim ïich nhuinma'ñ nyajpocxip. ³³ Mibijctzooybich Dios miid miich ajcxy ycixpi, je Dios huidibi jotcuic'ajtin yejcp, co huen miich ajcxy xypubedipy xypudigïhuipy. Jadu'n jadu'n. Amén.

16

Capxpooxïn nidüg nidüg ma pinjaty y'ixy'ajtyp

¹ Cham ïich miich ajcxy nyajnibijccixy, cöbijccixy je ajt nmigüg töxyjäy je Febe co anajty nïcxy ma miich ajcxy. Yi' je' nidügti huidibi pubejtin tumb ma je mibijcpidijc jim Cencrea. ² Mdunipy may'ajt mgöbigipy Febe miid ajt nHuindzin Jesús ycixpi. Com jadu'n ycopicyity co jäy huidibi mibijcp Jesucristo huen naymigüg'ajtigixy. Mbubedip mbudigïhuip jadu'n nej yi' jotmay miidity. Yi Febe ti ooy mayjäy pubety, e nañ ti xypubetyich.

³ Nguejxypyich capxpooxïn ma jada necy miid yi Priscila etz Aquila huidibi ïich anajty miid ooy oy nduñ co ngapxhuäcxich Cristo ytiy'ajt. ⁴ Yi Priscila etz Aquila yojx ytooc ajcxy yjugy'ajtin miid ïich ycixpi, ca'ydi n'ögyich. Nyajnajxypich jäygidaacïn ma Dios miid yi' ajcxy ycixpi, co ti xypubetyich ajcxy. E nañ jadu'n tüg'óciy jäy ajcxy huidibi ca'pi yjudíojäyity yajnajxcixy jäygidaacïn ma Dios miid yi' ajcxy ycixpi. ⁵ Nguejxypich capxpooxïn nañ jadu'n ma jada necy miid yi mibijcpidijc ajcxy huidijaty naymujccip ma Priscila etz Aquila ajcxy ytijc. Etz nañ nguejxypyich capxpooxïn ma yi Epeneto huidibi

ooy ndzocyich. Yi' je' tim jayijp huidibi mijpidaac Cristo jim Acaya ñaaxjot. ⁶ Etz nañ nguejxypich capxpooocxin ma María, yi' ooy ti ytuñ miid miich ajcxy miid Cristo ycixpi. ⁷ Etz nañ nguejxypich capxpooocxin ma yi Andrónico etz Junias. Hich n'amigüg ajcxy huidibi ti ypujxtijc iñäy quipxy miid iich. Capxpaady ajcxy y'ity miid yi apóstoltijc. Jacjayijp ajcxy mijpidacy Jesucristo ca'ydi iich.

⁸ Etz nañ nguejxypich capxpooocxin ma yi Amplias, huidibi ooy yajxon mijpidägy ajt nHuindzin Jesucristo. ⁹ Nañ nguejxypich capxpooocxin ma yi Urbano huidibi xymiidtuñich co iich anajty ngapxhuäcxich Jesucristo ytiy'ajt. Nañ jadu'n nguejxypich capxpooocxin ma yi Estaquis huidibi oy ndzocy njihuüyich. ¹⁰ Nañ nguejxypich capxpooocxin ma yi Apeles, huidibi ooy tiy'ajt ti yecy co yi' ymibijcipy Cristo tiydudägy. Nañ nguejxypich capxpooocxin ma yi Aristóbulo etz jac pinjaty huidibi yajpatp ma yi' ytijc. ¹¹ Nañ nguejxypich capxpooocxin ma iich n'amigüg yi Herodión. Etz nañ nguejxypich capxpooocxin ma yi Narciso yjuugy ymigüg huidibi mijpidacp iich ajt nHuindzin Jesucristo. ¹² Nañ nguejxypich capxpooocxin ma yi Trifena etz Trifosa huidijaty tumb ma ajt nHuindzin Jesús ytung. Nañ nguejxypich capxpooocxin ma Pérsida, je migüg huidi oy ndzocyich, etz nañ huidi ooy ytuñ ma ajt nHuindzin Jesucristo ytung. ¹³ Nañ nguejxypich capxpooocxin ma yi Rufo, je huidibi yi mibijcpidijc ycömaayb. Nañ nguejxypich capxpooocxin ma yi' ytaj, com jadu'n njihuüyich jadu'n nej jihuüy yi' ndaj'adyiijich. ¹⁴ Nañ nguejxypich capxpooocxin ma yi Asíncrito, yi Flegonte, yi Hermas, yi Patrobas, yi Hermes etz ñan tüg'óciy yi mibijcpidijc huidi jim yajpatp ma yi' ajcxy. ¹⁵ Nañ nguejxypich capxpooocxin ma yi Filólogo, yi Julia, yi Nereo etz yi' y'uch töxyjäyb, yi Olimpas, etz nañ tüg'óciy yi mibijcpidijc huidibi yajpaatp jim ma yi' ajcxy.

¹⁶ Naygapxpóocxigix xic xon nidüg nidüg. Naygimájtzigix miñ xipy agujc jotcuyc. Tüg'óciy huidibi mibijcp Jesucristo ma yi jacjaydyii cajp, yquejxyp ajcxy capxpooocxin ma miich ajcxy.

¹⁷ Miich ajcxy migügtijc, may'ajt nbijctzooybich naygüend'adi' ajcxy ma yi jäy ajcxy huidibi mimiimb ayuc ca'pi ytiy'ajtity, huidibi nigoob jyäyyajtziptuna'ñ jyäybijc-huäcxa'ñ, huidibi ca' ixa'ñ yi Dios ytiy'ajt huidibi ti m'ixpijccixy. Puuhuäctüd miich yi' ajcxy. ¹⁸ Com yi jäy ajcxy huidibi ymigügtijc yajhuinma'ñyidigooyb, ca' ajcxy tuñ Jesucristo ytung. Hue' ajcxy yaj'ixpijcp huidi yci'mhuinma'ñ yci'mdzojcin. Je' ajcxy huin'íinixp je jäy ajcxy huidibi ca' mijcajee y'ixpicyity. Yi ayuc huidibi ymihuidijtyp, jadu'n yajmidoy nej jihuüy oy ytiyity yjanchity, per ca' yi' yjanchity. ¹⁹ Com mayjäy ti xyajmidooyich jadu'n nej miich ajcxy mgapxymidoy Jesucristo, paady jotcuyc nayjihuyijich miid miich ajcxy ycixpi. Ndozjocypich co miich ajcxy mnejhuíhuipy huidibi oyhuinma'ñ jaydëbi mdúngixipy ajcxy etz ca' jibic-huinma'ñ mdúngixipy. ²⁰ Dios oyhuinma'ñ etz mic'ajt ti xymooyim jëbi ndzinaayim miid ajt nmigügtijc agujc jotcuyc, ca' ma tzip capxy. Tim huigon je xii je tiempo mina Dios yajcödígoya'ñ yi mujcu' ymic'ajt, e yi' xypubedip xypudigíhuip jëbi mmimadägipy yi ca'oybi. Nmibijctzooybich Dios miid miich ajcxy ycixpi co iich ajt nHuindzin Jesucristo huen may'ajt oy'ajt tuñ miid miich ajcxy jabom jabom.

²¹ Je Timoteo huidibi tumb miid iich co ngapxhuäcxich Jesucristo ytiy'ajt xyajniguejxp ajcxy capxpooocxin. Nañ jadu'n Lucio, Jasón etz Sosípater iich n'amigüg ajcxy, xyajniguejxp capxpooocxin.

²² Hich Tercio huidibi cojaayb Pablo y'ayuc ma jada necy, nañ nguejxypich capxpooocxin ma miich ajcxy, com iich nañ jadu'n nyajpaadyich ma ajt nHuindzin Jesucristo.

²³ Nañ jadu'n Gayo xyajniguejxp capxpooocxin, yi' xyajjättacich. E nañ je jäy ajcxy huidibi mijpidacp Jesucristo huidibi ajcxy nayyöymujcip ma Gayo ytijc yquejxyp ajcxy capxpooocxin ma miich ajcxy. Erasto je cajp ytesorero etz ajt nmigüg huidibi yxii Cuarto, nañ xyajniguejxp ajcxy capxpooocxin.

²⁴ Nmibijctzooybich Dios miid miich ajcxy ycixpi jabom jabom co iich ajt nHuindzin Jesucristo huen may'ajt oy'ajt tuñ ma miich ajcxy. Amén.

Je capxpooxin ma yaj'ii baady yajcapxpaady Dios

²⁵ Tzoc cömayim Dios, tzoc ojadajtim, tzoc huin'iihuim miid himnos. Dios miid ymic'ajt jëbi xpubedipy xypudigihuiipy ajcxy, jaydëbi ajcxy tiydudägy mmibigipy Jesucristo, ca'ydi mjetmetzciiygixy. Tim jadu'n nej je oybi tiy'ajt huidibi ngapxhuäcxpich tim jadu'n nej je Jesucristo ytiy'ajt huidibi jacjadyii jäy ycapxhuäcxixyp. Jada je tiy'ajt huidibi jecy'ajty ca' pin huinjihuiy huidibi Dios ti xyajnejhuiiyim. ²⁶ Dios ti xyajhuinjihuiiyim nej yhuimbizimy je ayuc huidibi je profetas ajcxy ycojay jecy'ajty. Dios huidibi tzinaayb huinixii huinitiempo, ane'mb co huen yajcapxhuäcxy jada tiy'ajt oybi ma tüg'óciy naaxhuiñyjäy, jigix jëbi mayjäy mijpidägip etz capxymidoohuiipy Dios.

²⁷ Miid co Jesucristo ooy mijhuinma'n tuñ miid iich ajt ycixpi, paady tzoc cömayim, tzoc ojadajtim etz tzoc huin'iihuim miid himnos huinixii huinitiempo yi tügpajcpi Dios huidibi ñejhuiydaayb tüg'óciy. Jadu'n ngapxcixyich. Amén.

1 CORINTIOS

Yi Midügpi Necy Huidibi San Pablo Yajniejx Je Mibijcpidijc Jim Corinto

¹⁻² Hich Pablo, Dios jadu'n tzojcp co Jesucristo xyajniejx co ngapxhuäcxibyich yi' y'ayuc. Hich etz ajt nmigüg Sóstenes nijayiybich miich ajcxy tüg'óciy huidibi jim Corinto huidibi mijpidacp Dios etz ñayyöymújciçixy jim miid Dios ycixpi. Nijayiybich miich ajcxy huidibi Dios ti yaj'ahuimbijttäy tudägy miid Jesucristo co y'o'cy miid ajcxy mbocy ycixpi. Nijayiybich miich ajcxy huidibi Dios ti huin'ixy, jaydëbi mmiid'idipy huädz jot huädz huinma'ñ. Nañ jadu'n nijayiybich tüg'óciy je jäy huenyma'amyity huidibi Dios mibijctzoob ojadajtp miid hich ajt nHuindzin Jesucristo yxii. ³ Ndzojcpich co hich ajt nDios Teedy etz ajt nHuindzin Jesucristo oy'ajt may'ajt tunipy miid miich ajcxy, etz xyajjotcugihuipy ajcxy.

Oy'ajt miid Cristo ycixpi

⁴ Nyajnajxypich Dioscojuyip ma Dios jabom jabom miid miich ajcxy ycixpi, miid co Dios may'ajt oy'ajt ti tuñ miid miich ajcxy ycixpi ma Jesucristo. ⁵ Co ti mmijpidaaccixy Jesucristo, oybi ti mbaatcixy ma tüg'óciy mdzinaayin mjygy'ajtin. May'amy capxy ayuc oybi ti mbaatcixy, etz may'amy huinma'ñ oybi ti mbaatcixy. ⁶ Ma miich ajcxy mdzinaayin mjygy'ajtin etz mgapxy m'ayuc ñiguëxigipy Cristo ytiy'ajt etz ymic'ajt. ⁷ Dios miich ajcxy ti xymöy tüg'óciy ymic'ajt. Ca' ti myajtigoy'ijtcixy ma mdzinaayin mjygy'ajtin huidibi Dios ñiyejcpy, ma je' m'ahuijxcixy co Dios yajnieguëxiga'ñ jadüg'oc ya naaxhuiñ ajt nHuindzin Jesucristo. ⁸ Jesucristo miich ajcxy xyhuijtz'ijtp tudägy, ixti cooni ycixipy tigoyipy je naaxhuiñybi, e co anajty yi' tiyduñ naaxhuiñyjäy ajcxy miid ypocy ycixpi, ca' miich ajcxy mbocycähuipy. ⁹ Dios yjatytimycuydunipy yi' y'ayuc miid miich ajcxy, ca' xy'ixmadzaangixy ni mina xii, com yi' ti xyhuin'ijxcixy co miid mnaymigüg'ajtigixy yi' y'ung, hich ajt nHuindzin Jesucristo.

Naybije-huäcxii ma je mibijcpidijc

¹⁰ Migügtijc, hich miich ajcxy nminucxtacyp miid Jesucristo yxii co tungixy may'ajt nay'ayuc-huinjihuüiyigix, e ca' mnaybije-huäcxigixy. Tzinaaygix xic xon miid tú'ciy mjot mhuinma'ñ. ¹¹ Miich ajcxy migügtijc, ti je Cloé y'amigügtijc xyajnimäyich co ooy miich ajcxy mnaychip'ijxigixy, e ca' mnay'ayuc-huinjihuüiyigixy. ¹² Miid jada ycixpi nmına'ñich co nijëjity miich ajcxy jadu'n minaangixy: "Hich Pablo nmijnicpejtpyich." E nijëjity yminaangixy: "Hich Apolos nmijnicpejtpyich." E nijëjity yminaangixy: "Hich Pedro nmijnicpejtpyich." E nijëjity yminaangixy: "Hich Cristo nmijnicpejtpyich." ¹³ ¿Nej Cristo ti ñaybije-huäcxii? Ca'. ¿Nej Pablo yajcruudzpejti miid miich ajcxy ycixpi? Ca'. ¿Nej ti miich ajcxy mniibejtcixy miid Pablo yxii? Ca' yjadu'nity. ¹⁴ Nyajnajxypich Dioscojuyip ma Dios co ca' jac ni pin hich ti ngayajniebety. Jëda'ajty ti nyajniebetyich Crispo etz Gayo. ¹⁵ Jadu'n ti nduñich je'gixpi co ca' huaad jäy ajcxy yminaangixy co ti ajcxy ñiebety miid Pablo yxii. ¹⁶ Nañ jadu'n ti nyajniebetyich yi' Estéfano miid yi' yjuugy ymigüg ajcxy. Jac ni je' ca' njäytechich pen ti nyajniebetyich. ¹⁷ Com Cristo ca' xyquejxyich jäy yajniebejtpi. Hue' janchtiy ti xyquexyich co ngapxhuäcxibich yi' y'ayuc ytiy'ajt oybi. Ca' nyajtuñich ixpicytjic y'ayuc yhuinma'ñ. Co ixypy nyajtuñich ixpicytjic y'ayuc yhuinma'ñ, naadig'ajt ixypy co Cristo y'o'cy ma yi' cruudz miid ajt nbocy ycixpi.

Cristo ymiid Dios ymic'ajt etz yi' y'ixpijin etz ytiy'ajt

¹⁸ Yi jäy ajcxy huidibi y'alma tigoyam, loci huinma'ñ yi' tijcixy co Cristo y'o'cy ma yi' cruudz miid ajcxy ypocy ycixpi. Per hich ajt pinjaty y'alma nidzögam, hue' minaanim co jada ayuc tiy'ajt miid Cristo ycixpi, ymiid yi' Dios ymic'ajt. ¹⁹ Com jaybety jadu'n ma Dios ñecy, ma Dios jadu'n ymina'ñ: Nyajtigoyaamybich yi' ixpicytjic y'ayuc yhuinma'ñ.

Njibijcibich yi cohuinma'ñyjäydijc ajcxy yhuinma'ñ.

²⁰ ¿Ti mic'ajt ymiid yi cohuinma'ñyjäydijc ajcxy? ¿Ti mic'ajt ymiid yi ixpicytjic? ¿Ti mic'ajt ymiid yi huidibi ajcxy nay'ixquixip miid ixpijcin? Ca' ti mic'ajt miidity yi' ajcxy, com Dios ti yaj'ahuimbity yi naaxhuiñ y'ixpijcin tzuu huinma'ñ loci huinma'ñ. ²¹ Com Dios jadu'n ti tzocy co jäy ajcxy ca' padaangixy Dios ytiy'ajt ma yi naaxhuiñjäy ajcxy y'ixpijcin. Dios yjäygidacpy co jëbi jäy ajcxy y'alma ñidzögipy co ajcxy mibigipy je Dios y'ayuc huidibi ngapxhuäcxypich. Je Dios y'ayuc ytiy'ajt huidibi iich ajcxy ngapxhuäcxyp, yi' yi naaxhuiñjäy ajcxy huinjhuüygixyp nej tzuu huinma'ñ loci huinma'ñ.

²² Yi judíojäy ajcxy ooy tzachtzojccixy co Dios tunipy ixpejt mijhuinma'ñybi. Yi griego jäy y'ixtaangixyp ayuc huinma'ñ etz huenhuidiibity ixpijcin. ²³ Iich ajcxy ngapxhuäcxich co Cristo y'o'cy ma yi cruudz miid jäy ajcxy ypocy ycixpi. Yi maybi judíojäy ajcxy ca' mijpidägaangixy ca' cöbigaangixy iich ajcxy n'ayuc. Etz yi maybi jäy ajcxy huidibi ca'p yjudíojäyity, hue' tijcixy co tzuu huinma'ñ loci huinma'ñ iich ajcxy n'ayuc. ²⁴ Per yi jäy ajcxy huidibi Dios ti yhuin'ixigixy, huen yjudíojäyity, o huen ycajudíojäyity, hue' ajcxy tijcixy co je Cristo ymiid anajty Dios ymic'ajt etz ymiid anajty Dios y'ayuc ytiy'ajt. ²⁵ Co ixpicytjic tijcixy co Dios ytung, tzuu huinma'ñ loci huinma'ñ je', ñigi jac'oyhuinma'ñ yi' huidibi Dios tumyb, ca'ydi huidibi jäy ajcxy ytumyb. Co ixpicytjic ymınaangixy co Dios ca' ymic'ajt miidity, ñigi jacmic'ajt miid yi', ca'ydi huidi jäy ajcxy ymiid.

²⁶ Migügtjic ajcxy, huinmay miich ajcxy jadu'n nej Dios ti xyhuin'ixcixy. Ni may miich ajcxy huidibi ca' y'ixpicyity, tim nihueeni huidibi ixpicyip ma miich ajcxy. Ni may miich ajcxy huidibi ca' ti mic'ajt, ca' ti ane'min miidity. Ni hueeni miich ajcxy huidibi mic'ajt miid etz ane'min miid. Ni may miich ajcxy huidibi oyñipinjäyity. Ni hueeni miich ajcxy huidibi y'ap yteedy rey'ajtp. ²⁷ Per Dios ti huin'ixy yi jäy ajcxy huidibi ca' y'ixpicyity co jadu'n yajtzo'yduna'ñ yi ixpicyjäy yi cohuinma'ñjäy. Dios ti huin'ixy yi jäy ajcxy huidibi ca' ti mic'ajt miidity, miid co jadu'n yajtzo'yduna'ñ yi jäy ajcxy huidibi mic'ajt miid, ane'min miid. ²⁸ Dios ti huin'ixy huidibi jäy ajcxy ca' mij'ijx mijpidaaccixy, huidibi jäy ajcxy ytiypy co ca' y'oyity. Dios jadu'n tuuñ co yajcödigoaya'ñ yi huidibi jäy ajcxy mij'ijxp mijpidacp, je huidibi jäy ajcxy ytiypy co y'oyity. ²⁹ Jadu'n Dios ytuñ co ca' tzocy co ni pinjäy ca' ñaygömayiyb ci'm ma yi' yhuinduu. ³⁰ Per Dios ci'm yaj'oyiyy nej jëbi miich ajcxy myajpatcixy miid Cristo Jesús. Dios ci'm yaj'oyiyy nej jëbi ajt nbaatim ixpijcin ma Cristo. Nañ jadu'n yaj'oyiyy nej jëbi Cristo xyaj'ahuimbijtım tudägy, jaydëbi Dios xycöbjiçim nej tudägy jäy. Nañ jadu'n Dios yaj'oyiyy nej jëbi huaad nbaatim ajt nhuádzjot nhuádzhuinma'ñ ma Cristo. Nañ jadu'n Dios yaj'oyiyy nej jëbi Cristo xyñihuaanim ajt n'alma etz njugy'ajtin. ³¹ Paady ycixpi jaybety ymiñ ma Dios ñecy, ma jadu'n ymına'ñ: "Pinjaty naygömayaanip ci'm, huen naygömayii miid co mibicy ajt nHuindzin Dios."

2

Je y'ayuc ytiy'ajt, je Cristo huidibi cruudzpejt

¹ Per co n'oyich ma miich ajcxy jayhuin, ngapxhuäcxych anajty Dios y'ayuc ytiy'ajt, oy'amy nyaj'ixpijcyich, ca' nyajtuñich ixpicyjäy ajcxy y'ayuc, etz nañ jadu'n ca' nyajtuñich tzipjatypi ayuc. ² Co jim n'ijtyich ma miich ajcxy jayhuin, chi huinma'ñybidacyich co ca' jac ti ayuc ti huinma'ñ nyajmiidmiydägaangixy, jë'yi janchtiy nyajmiidmiydägaangixy Jesucristo etz jadu'n nej je' yajcruudzpejti miid jäy ajcxy ypocy ycixpi. ³ Co jim iich anajty nyajpaadyich ma miich ajcxy, chi ooy yung naxy naybidaacich, ooy ndzigiyy njihuüyich. ⁴ E co nmıidmiydaacyich miich ajcxy, co ngapxhuäcxych Dios ytiy'ajt ma miich ajcxy, ca'pi iich miich ajcxy nyajmibicy miid ixpicytjic y'ayuc miid tzipjatypi ayuc. Je Espıritu Santo xypubejtpich anajty co ajcxy nyaj'ijxy Dios ymic'ajt, e paady ycixpi ti ajcxy mmıibijccixy Dios y'ayuc. ⁵ Jadu'n je Espıritu Santo xypubetyich anajty, jigix miich ajcxy mijpidägipy Dios, ca' nmiinaanım miid co ti mmıidoogixy oyjatypi ayuc huidibi jäy ajcxy ti cojy ti macxy. Ti mmıipidaaccixy Dios com ti m'ijxcixy ti mjihuüygixy Dios ymic'ajt.

Dios xyajnejhuuïyim yi' ytiy'ajt miid y'Espíritu Santo

⁶ Oy co ti nyajmibicyich miich ajcxy miid ayuc huidibi ca' chipjatyity, per nañ jadu'n nyaj'ixpicyich oyjatypí ayuc tzipjatypí ayuc yi mibijcpidijc ajcxy tiibi yhuinma'ñ ymiinni ymejchni. Tigachjaty iich n'ayuc ndiy'ajt e ca' ñaybadyii miid naaxhuiñyäjy ajcxy y'ayuc ytiy'ajt huidibi ca' mibijccixy huidibi tzinaayb jugy'ajtp jadachambi xii jadachambi tiempo. Hich n'ayuc ndiy'ajt ca' ñaybadyii miid je jäy ajcxy y'ayuc ytiy'ajt huidibi ane'mb ya naaxhuiñ, yi jadu'mbi jäy yi' ajcxy yjugy'ajtin cixamb tigoyamb tüccí'yi. ⁷ Hich ajcxy nyaj'ixpijcpy Dios y'ayuc ytiy'ajt huidibi ca' ni pin jecy'ajty nejhuïy huinjihuïy, je ayuc tiy'ajt huidibi Dios ymiid coyüch, je ayuc tiy'ajt huidibi Dios ti cojy ti macxy jecy'ajty ca'ni anajty naaxhuiñybi chondacy. Dios ycoj ymacx jada ayuc, jaydebi ajt n'alma ñidzoocim huinixii huinitiempo. ⁸ Ni tüg mij'ane'mbi huidibi tzinaayb jadachambi xii jadachambi tiempo, ca' huinjihuïy jada ayuc. Co ixypy ajcxy huinjihuïy, ca' ajcxy cayajcruudzpejty je Huindzin Dios y'ung, je huidibi miid Dios y'oy'ajtin ymij'ajtin. ⁹ Com ca' ajcxy huinjihuïy Dios y'ayuc, paady ycixpi jaybety ymiñ ma Dios ñecy, ma jadu'n ymina'ñ:

Ni tüg jäy ca' ixy, ni tüg jäy ca' midoy, ni tüg jäy ca' yhuinma'ñybaady jadu'n nej Dios ni'ixiy miidity miid je jäy ajcxy ycixpi huidibi yi' mijpidaacip yajmij'ajtip.

¹⁰ Miid co nmijpidaacim Dios, paady ycixpi Dios yaj'oyiïy nej jëbi je Espíritu Santo xyajnejhuuïyim yi' ytiy'ajt. E je Espíritu Santo yhuinjihuïydaayb ñejjihuiydaayb tüg'óciy, ixti yhuinjihuïydaayb nej Dios yhuinma'ñ ti pidägy co tuna'ñ, je huidibi ca' pin nejhuïy.

¹¹ Ca' pinjäy jëbi huinjihuïy nej jadügpi jäy yjot yhuinma'ñ miidity. Je jäy yci'mhuinma'ñ jëbi huinjihuïy nej je' yci'mjot yci'mhuinma'ñ miidity, ca' jac pin. Nañ jadu'n ca' jac pin jëbi huinjihuïy nej Dios yjot yhuinma'ñ miidity. Dios yci'mjihui'ñ huinjihuïyb nej Dios yjot yhuinma'ñ miidity. ¹² Dios ca' xyaj'adigiïyim xyajjottigiïyim huingjäy yjihui'ñ ymic'ajt. Hue' Dios xyaj'adigiïyim xyajjottigiïyim yi' yci'mjihui'ñ yci'mmic'ajt, paady ycixp jëbi nhuinjihuiïyim tüg'óciy huidibi ti xymooyim. ¹³ Hich ajcxy nyajmiidmiydacpy miich ajcxy je ayuc tiy'ajt huidibi je Espíritu Santo xyaj'ixpíjccixyich. E ca' nyajmiidmiydaaccixy je tiy'ajt huidibi ti n'ixpicyich ya naaxhuiñ huidibi jäy ajcxy ti cojy ti macxy. Nyaj'ixpijccixy Dios y'ayuc ytiy'ajt huidibi je Espíritu Santo xyajnejhuuïyich. Hich ti nyaj'ixpicyich yi' ajcxy huidibi miid Dios yjihui'ñ ymic'ajt ma y'aa yjot.

¹⁴ Pinjaty ca' miidity Dios yjihui'ñ ymic'ajt, ca' yi' cöbïga'ñ je tiy'ajt huidibi je Espíritu Santo xyajnejhuuïyim. Com yi' ajcxy ytijp co jada tiy'ajt tzuu huinma'ñ loci huinma'ñ yi'. Nañ ni ca' ajcxy Dios ytiy'ajt huinjihuïyi, com ca' ajcxy miidity Dios yjihui'ñ ymic'ajt huidibi yajnejhuuïyb Dios ytiy'ajt. ¹⁵ Je jäy huidibi ymiid'ajtipy Dios yjihui'ñ ymic'ajt, yi' jëbi yajcïyöy yajtecyyöy tüg'óciy pinjaty yjot yhuinma'ñ. Per ca' yi' huaad pinjaty yajcïyöy yajtecyyöy yjot yhuinma'ñ. ¹⁶ Com jadu'n Dios ymina'ñ ma ñecy: “¿Pin jäy huinjihuïyb nej Dios yhuinma'ñymiidity? Ca' ni pin. ¿Pin jäy huaad Dios yaj'ixpicy? Ca' ni pin.” Oy ca' pin huinjihuïy jecy'ajty nej Dios yhuinma'ñymiidity, jadachambi iich ajt nhuinjihuiïyim nej Cristo yhuinma'ñymiidity.

3

Je huidibi ajcxy mibijcp ytungixy ma Dios

¹ Migügtijc ajcxy, co ti n'oyich ma miich ajcxy, chi nmiidmiydaaccixy jadu'n nej jihuiïy miich ajcxy mhuinma'ñymiidity nej naaxhuiñyäjy ajcxy yhuinma'ñymiidity huidibi ca' ymibijccixy. E ca' anajty miich ajcxy miidity je mhuinma'ñ huidibi je Espíritu Santo yejcpy. Miich ajcxy mmibijcin ma Cristo jadu'n yi' nipaady nej ma'xungdijc ymibijcin. ² Ti nyaj'ixpijccixy Dios y'ayuc huidibi ca' jëbi tzip mhuinjihuïygixy. Jadu'n nipaady nej jäy ajcxy yaj'ügü leche yi' ma'xungdijc, miid co cacöbïga'ñ caayin uucin huidibi jemxy cidacp ma yjot. Ca' miich ajcxy anajty ti mnayñi'ixiïygixy ma mjot mhuinma'ñ

nej jëbi mhuinjihuüygixy Dios y'ayuc yi tzipjatypi. Chambaadni ca' mnayni'ixiüiini ajcxy ma mjot mhuinma'në nej jëbi mhuinjihuüygixy yi tzipjatypi ayuc. ³ Chambaadni miich ajcxy myajtuñ mjot mhuinma'në jadu'n nej naaxhuiñjäy ajcxy miidity huinma'në ca'pi ymibijccixy, chambaad mmi'ijxtinaaygix yi migügtijc, chambaad mnaychip'ijxigix naybijc-huäcxigix. Jadu'n m'idiitzcixy nej jacjadyii jäy ajcxy y'idiitzcixy huidibi ca' ymibijccixy. ⁴ Com nijëjity miich ajcxy minaangixy: "Hich naygomajtzip ma Pablo." Etz nijëjity minaangixy: "Hich naygomajtzip ma Apolos." Jada je tiy'ajt co ca' mnay'ayuc-huinjihuüygixy tim jadu'n nej jäy ajcxy ca' nay'ayuc-huinjihuüygixy huidibi ca' miidity Dios yjihui'në ymic'ajt.

⁵ ¿Pin je' je Apolos? ¿Pin je' je Pablo? Hich Pablo etz Apolos nimetz ajcxy nduñ ma Dios ytung, e ich miich ajcxy nyajmibijccixy Cristo. Hich ajcxy nduñ nidüg nidüg je tung huidibi Dios xymooyich. ⁶ Hich jayjip'aty miich ajcxy ti nyaj'ixpicyich, e Apolos jac'axam. Jadu'n miich ajcxy nipaady nej tüg moc cam huidibi ich ti nniipy, e Apolos jac'axam ti pidägy ni. Per Dios ti yajyeegy je moc. ⁷ Ca' ytimyñejity pin ti yñipy, e pin ti pidägy je ni. Dios yi' tügpajc copicyip. Com yi' yajyeecp je moc. ⁸ Yi' huidibi niip etz yi' huidibi ni pidacp, quipxyjaty ajcxy. Dios yegamb je oy'ajt ma nidüg nidüg jadu'n nej anajty ti ytungixy. ⁹ Com ich etz Apolos naymigüg'ajtibich ajcxy ma Dios ytung. Jadu'n miich ajcxy nipaady nej Dios ycam huidibi Apolos ti tuñ etz huidibi ich ti nduñ.

Nañ jadu'n miich ajcxy nipaady nej tüg tijc huidibi Dios ycojpy. ¹⁰ Dios ti xya-jnibicyich yi' ytung ndunipyich. Ti nyaj'ixpicyich miich ajcxy Dios y'ayuc ytiy'ajt. Jadu'n ich nipaady nej tüg pojtzpi oybi huidibi ti yajtzondägy je tzaadjc poch. Chi huingjäy xyjacyaj'ixpijccixy. Jadu'n yi' nipaady nej huingbi pojtzpi huidibi je tzaadjc poch jacjijppodziiyb. Copicy co nidüg nidüg huidibi yaj'ixpijcp Dios ytiy'ajt yajxon yaj'ixpijccixipy. ¹¹ Dios ti pidägy Jesucristo tügpajc huidibi huaad nmibijcim, e ca' huaad pidacy huingbi. Jadu'n Jesucristo nipaady nej tüg tijcpoch chondägy. ¹² Co pinjaty yaj'ixpicy Dios y'ayuc ytiy'ajt tiydudägy, chi jadu'n nipaady nej jihuiy pinjaty tijcpojtzp miid ori, miid plata etz miid tzaa oyjatypi. Pinjaty ca' yaj'ixpicy yajxon Dios ytiy'ajt, jadu'n nipaady nej jihuiy pinjaty tijcpojtzp miid quipy, miid miy, etz miid moc'aay. ¹³ Jiini co anajty xi tiempo paady mina Cristo tiyduna'në yi' yjäy huin'it ñiguëxigipy nej Dios ytumbi ajcxy ti ytungixy co ti yaj'ixpijccixy. Niguëxigip pen oy ti yaj'ixpijccixy Dios ytiy'ajt, o pen ca' oy ti yaj'ixpijccixy. Jadu'n nipaady nej Dios jiin pidägy ma je tijc, e je quipy, je miy, etz je moc'aay tigojdähuipy ma je jiin. Etz je ori, plata etz tzaa oyjatypi ca' ytigoydähuipy miid je jiin. ¹⁴ Peni oy yajxon pinjaty ti yaj'ixpicy Dios ytiy'ajt, chi Cristo premio möhua'në jada jäy co ooy yajxon ti yaj'ixpicy. E jadu'n yi' ytung nipaadip nej je ori, plata, etz tzaa oyjatypi huidibi ca' ytigooy ma je jiin. ¹⁵ Pen je Dios ytumbi ca' oy yajxon ti yaj'ixpicy Dios y'ayuc ytiy'ajt, chi ca' premio pada'në. Jadu'n yi' ytung nipaadip nej je quipy, je miy, etz je moc'aay huidibi ti ytigoy ma je jiin. Jadu'n nipaadip miid jada jäy nej jihuiy ti ñaxy jiinjoty, e ti ytigoydäy ma je jiin tijaty ymiid, je'yi yjugy'ajtin ti yajtzögy.

¹⁶ ¿Nej ca' mnejhuüygixy? Pen Dios yjihui'në ymic'ajt yajpat ma miich ajcxy, jadu'n nipaady nej jihuiy Dios ci'm ti chinaydacpicy ma miich ajcxy, nej jihuiy miich ajcxy Dios xytijc'adyii. ¹⁷ Pen ji pinjaty huidibi yajhuindigoy Dios chinaydac, huin'it Dios yajtigoya'në jada jäy. Yi Dios chinaydac huadz'it amay'it yi', com Dios ti chinaydacpicy ma miich ajcxy huidibi mibijccixp.

¹⁸ Ix mnayhuin'iniigix ci'm. Pen nidügti miich ajcxy mnaydijyii co oy ixpicyity ma naaxhuiñjäy y'ixpijcin, copicy jäydgoyipy yi' y'ixpijcin, jigix ixpigipy Dios ytiy'ajt. ¹⁹ Yi naaxhuiñjäy y'ixpijcin jadu'n nipaady miid Dios nej tzuu huinma'në loci huinma'në. Paady jadu'n yjaybetyity ma Dios ñecy ma jadu'n ymina'në: "Dios yajpocycähuip yi' ixpicytjic miid yci'm'ayuc miid co chachnaygömayii." ²⁰ E jadu'n yjaybetyity jadüg'it ma Dios ñecy ma jadu'n ymina'në: "Je Huindzin Dios ñejhuüyb co yi' ixpicytjic y'ayuc yhuinma'në ca' choobaady." ²¹ Ni pin ca' huaad amij agix ñayjihuiy, miid co mijnicxpety oyñipin y'ayuc. Miich ajcxy miid'ajttaayb tüg'óciy tijaty. ²² Miich ajcxy miid'ajtpy Pablo,

Apolos etz Pedro. Nañ jadu'n miich ajcxy miid'ajtpy je naaxhuiñybi, je tzajp, je jugy'ajtin, je o'cin, je xii je tiempo huidibi ji yajpatp, etz huidibi mim cidaacp. ²³ Je Cristo miid'ajtpy miich je' ajcxy cñ'am etz Dios ymiid'ajtpy Cristo cñ'am.

4

Je apóstoles ajcxy ytung

¹ Jëbi jadu'n co ñich etz Apolos, ñich miich ajcxy xytijcixy Cristo ytumbi huidibi Dios ti xyajniñijccixyich, nyaj'ixpijccixyich etz nguend'ájtixyich yi' y'ayuc ytiy'ajt huidibi jecy'ajty ca' pin nejhuüy huiñjhuüy. ² Pinjaty cuend'ajtp huingjäy yje', copicy tiydudägy ytunipy, jaydëbi yi' yhuindzin yjäygidägyib yi' ytung. ³ Per ca' ooy nduñich cuendi co miich ajcxy xyajcüyöy xyajtecyöyöyi ñich nbocy. Nañ jadu'n ca' ooy nduñich cuendi co ixypy tüg juez yajcüyöy yajtecyöyöyi ñich nbocy. Nañ jadu'n ca' nyajcüyöyich nyajtecyöyich ngi'mbocyich. ⁴ Ca' nayjihuiñyijich co nmidundigooyich miich ajcxy. Ca' jadu'n nmina'ñich co ca' ma ndundigooyich. Hue' ajt nHuindzin Jesucristo yi' je' xyajcüyöyip xyajtecyöyöyip ñich nbocy, ca' jac pinjaty. ⁵ Paady ycixpi ixmajtzcix jadu'n nej miich ajcxy xypocy'ijxcixy jayijpni ma ca'ni Jesucristo ymiñ jadüg'oc ya naaxhuiñ. Ahuijxcix co Jesucristo yajniñguëxigaani je jäy ajcxy ypocy huidibi cham ca' ñiguëxigy, huidibi jadu'n nipaady nej jihuiñ yüch y'ity agootztuuby. Jesucristo co anajty ymiñ jadüg'oc, chi yajniñguëxigipy nej jäy ajcxy yjot yhuinma'ñ miidity. E Dios nidüg nidüg jäy cömaya'ñ pen oy ti ytuñ, e ca' cömaya'ñ pen ca' oy ti ytuñ.

⁶ Migügtijc ajcxy, cñ'm ti naybidägyiijich miid Apolos jadu'n nej tüg ijxpejt ma jada tiy'ajt huidibi cham ti nyajnijayiygixp. Jadu'n ti nduñich miid miich ajcxy m'oy'ajtin ycixpi, jigix jëbi miich ajcxy m'ixpijccixy jadu'n nej jëbi mguydundaygixy Dios ytiy'ajt, e ca' mjactungixy huidibi Dios ycapxcödujc ma ñecy. Nañ jadu'n ñich ti nduñich miid Apolos nej tüg ijxpejt, jigix miich ajcxy ca' mnaygömayiyb cñ'm, e ca' mminaangixy co mnaygomájtzigixy ma tüg Dios ytumbi, e jadüg m'ixtijcixy. ⁷ ¿Pin ti xyajnajxcixy jadu'n nej jihuiñ ajcxy ooy mgömayity? Ca' ni pin. ¿Ti miich ajcxy miidity, huidibi Dios ca' ti xymoogixy? Ca' ni ti. E pen Dios ti xymoogixy tijaty ajcxy mmiidity, ¿na'amy co mnaygömáygixy cñ'm, jadu'n nej jihuiñ cñ'm ti mganar'ajtcixy tijaty ajcxy mmiidity?

⁸ Jadu'n miich ajcxy mnaybidáacigixy nej jihuiñ ti mgüxigixy, nej jihuiñ ti mgomeeñygojcixy, nej jihuiñ mrey'ajtcixy, e ca' mdzojccixy co nyaj'ixpigipyich. ⁹ Miich xytijcixyich nej jihuiñ ñich ajcxy apóstoltijc Dios ti xypidaaccixich nej huidibi ca' ytimcapxpaadyity, nej huidibi ypocy co'öggyb, co ángeles ajcxy etz jäy ajcxy xyñixiiccixyich xyñiyáaxcixyich. ¹⁰ Miich ajcxy xytijcixyich co ñich ajcxy apóstoltijc jadu'n nej jäy tzuu locip co ndúngxixyich miid Cristo ycixpi. E miich mnaybidáacigixy co'ayuc cohuinma'ñ co ti mmibijccixy Cristo. Miich ajcxy xytijcixyich co ca' ti mic'ajt ajcxy miidityich, e miich ajcxy mnaybidaacip nej jihuiñ ooy ti mmicpijccixy, nej jihuiñ ooy mgömayity, e ñich ajcxy ca' nyaj'ixaangixyich. ¹¹ Chambaad ñich ajcxy nyuubögyiijich etz ndidziyijich. Minaajity n'íjtixyich ca' ñich ajcxy nhuit. Jäy ajcxy xyñi'ojgyigixich etz xyhuingojxy xyjijpcójxcixich, ni ndijc ñich ajcxy ycaca'tcixy. ¹² Ndúngxixyich xuuyii miid ngi'm ngijich. Co pinjaty xyñi'ojgyigixyich, chi n'adzógixyich miid oy ayuc. Co ñich ajcxy xy'ixhuidityich xypahuidityich, ooy nmecxtújccixyich yi' tzaachypi. ¹³ Co pinjaty jibic xyñigápxcixyich, chi huiñma'ñ ixtáaygixyich oy'amy miid mecxtujcin n'ñihuiñcixyich ngapxhuiñcixyich nej jëbi y'ayuc-huiñjhuüyigixy. Ca' naaxhuiñyäjy ajcxy xychójccixyich. Ixti chambaad jadu'n ajcxy xy'íjxcixyich nej püx, jadu'n ñich ajcxy nipaady nej jibicpi huidibi ca' jäy ajcxy tzocy.

¹⁴ Ca' ñich miich ajcxy nyajnijayiy jada ayuc co nyajtzöydunaangixy. Hue' janchtiy jada ayuc nyajnijayiyb ajcxy co ngapxhuiñjáangixy. Jadu'n ndzojccixy njihuiñyigixy nej ndzocyich njihuiñyich ngi'm'ung. ¹⁵ Oy ixypy yjanchity co miich ajcxy miid majc mil huindzindijc huidibi xyaj'ixpijccixy Cristo ytiy'ajt. Per tügpajcpi je mhuindzin huidibi

oga'n xyajmibijcy ajcxy Cristo, ca' nan canaag. Hich jadu'n oga'n ti nyaj'ixpicyich miich ajcxy Jesucristo ytiy'ajt nej jëbi ajcxy m'alma ñidzögipy. Paady ycixpi jadu'n hich nipaady nej miich ajcxy mdeedy ma mmibijcin. ¹⁶ Hich miich ajcxy nimaayb mictägy, com ti nyajmibijccixy Cristo oga'n, paady cuydungix ajcxy Dios ytiy'ajt, jadu'n nej hich nguyduñich.

¹⁷ Paady ycixp nguexyich Timoteo ma miich ajcxy. Yi Timoteo ooy ndzocyich ooy njihuiyich. Ti hich Timoteo nyajmibicyich Cristo, e ooy xycapxymidooyich yajxon, jadu'n yi' nipaady nej ngi'm'ungich. Yi Timoteo xyajjäymedzip miich ajcxy je ayuc je tiy'ajt jadu'n nej nyaj'ixpicyich ma tüg'óciy cajp ma yi jäy ñaymújcigixy huídibi mijpidaaccixp Jesucristo. ¹⁸ Cham nije' nije' miich ajcxy amij agix mnayjihuiyii co jadu'n mīnaangixy co ca' nicxy n'ixa'ñich miich ajcxy jadüg'oc. ¹⁹ Per ca' jadu'n mīnaangixy co ca' nnicxa'ñich ma miich ajcxy. Tzoc n'icxibich ma miich ajcxy, pen Dios jadu'n tzojcp. Co anajty jim nmechich, huin'it ca' n'amidoo'ida'ñich yi' ajcxy y'ayuc huídibi amij agix nayjihuiyip. Hue' janchtiy nejhuñhua'ñich pen ymiid yi' ajcxy Dios ymic'ajt chög'ajt. ²⁰ Pinjaty miid Dios ymic'ajt Dios chög'ajt, je' yajniguëxíc Dios y'ane'min. Pinjaty miid oyñiti ayuc, ca' je' yajniguëxigip Dios y'ane'min. ²¹ Co nn'icxibich jim ma miich ajcxy, ¿ti ajcxy mdzojccixyp ndunipyich? ¿Nej oy nmin'icxibich ma miich ajcxy tüg matz jigix ajcxy nhuópcixipy? o ¿Mdzojccixyp co nn'icxibyich ma miich ajcxy miid yungnaxy njot nhuinma'ñich, etz oy'amy ajcxy nmigapxipy, jadu'n nej jihuiy ooy ndzojccixy njihuiyigixy?

5

Moy ajcxy castigo tüg jäy huídibi anajty ti ytundigooy

¹ Mayjäy nejhuñy co ma miich ajcxy jim tüg yëydijc huídibi tundigooyb miid tüg töxyjäy. Nigi yi' ytundigooy ca'ydí huídí ajcxy ca' Dios y'ayuc mijpidaci. Ti nnejhuñyich co jim tüg yëydijc huídibi miiddzinaayb ycoo'uu. ² Jim miich ajcxy miidity je mijpocytumbi, e miich ajcxy amij agixy mnayjihuiyigixy co ajcxy mdzax'ixpicyity ma Dios ytiy'ajt. Jac'oy co ixipy mdajcixy mmaygixy. Yajpidzimgix ma miich ajcxy yi jäy huídibi jadu'n tundigooyb. ³ Ca' ytimyñejity co ca' nyajpaadyich jim ma miich ajcxy. Jadu'n nipaady nej jihuiy hich njimity, miid co ooy njihuiyich nej miich ajcxy mjahtcixy m'ayoogixy. Paady ycixpi ti nyajpocycäyich miid Jesucristo y'ane'min yi jäy huídibi jim ooy mij ytundigooy, tim jadu'n nej ixipy jim nyajpaadyich ma miich ajcxy. ⁴ Huomujtaaygix yi mibijcpidijc, e jadu'n nipaadipy nej jihuiy hich njimity quipxyi miid miich ajcxy. Huin'it miich ajcxy miid'ajtcixipy ajcxy ajt nHuindzin Jesucristo y'ane'min ymic'ajt. ⁵ Miid je ane'min mic'ajt huídibi Jesucristo ti xymöyich, myajpidzimipy je pocytumbi ma miich ajcxy. Jadu'n mijhuin nipaadipy nej jihuiy myajc'idigiiygixy je mujcu', jaydëbi yi' ñin'icx ytigoyipy, per je' y'alma ñidzögip mina anajty hich ajt nHuindzin Jesús yhuimbity ya naaxhuiñ jaydëbi tiydunipy jäy ajcxy miid ypocy ycixpi.

⁶ Ca' mnaygömáayigixy ci'm miid huídibi mdungixyp. ¿Nej ca' mnejhuiyigixy nej jäy mīna'ñ co levadura huídibi ca' y'oyity yajhuindigooyb tüg'óciy yi harina jich? ⁷ Jadu'n je pocytunii nipaady nej levadura huídibi ca' y'óyity, paady ycixpi yajtigooygix je pocytunii nej anajty mdundigóoygixy taabi anajty ajcxy ca'ni mmibijccixy. Jadu'n mdungixipy, jigix jëbi m'ijtcixyp huädz ca' ma pocy. Co jadu'n mdungixipy, jadu'n nipaadip miich ajcxy nej tzajcaagy oyjatypi. Nejhuñybich co miich ajcxy ti mbocyn'ihuaatzcixy, com Cristo nayyejci huen yaj'ögyii miid ajt nbocy ycixpi. Jesucristo jadu'n nipaady nej ajt ngöbixy mang huídibi miid nhuindzigiiyim Dios miid ajt nbocy ycixpi. ⁸ Tzoc tzinaayim miid huädz njot huädz nhuinma'ñ, jadu'n nipaady nej judíojäy co ajcxy amay'ajtcixy yi pascua xii. Tzoc yajtigooyim ma ajt ndzinaayin njugy'ajtin yi jibic jot jibic huinma'ñ. Tzoc cuydunim Dios ytiy'ajt.

⁹ Ti nnijayiiygixy jayhuin co ca' huaad migüg'ájtigixy pinjaty huidibi tundigooyb miid töxyjäy ajcxy. ¹⁰ Ca' nan jadu'n nmina'ñich co tücci'yi mbuhuäctútcixipy yi naaxhuiñjäy ajcxy huidibi ca' ymibijccixy, huidibi tundigooygixp miid töxyjäydijc, huidibi ooy y'adzojccixy, huidibi ajcxy meetzp, huidibi ajcxy tzaadzech quipychech ojadajtcixp. Co ixipy tücci'yi mbuhuäctútcixipy yi naaxhuiñjäy ajcxy, copicy co ixipy miich ajcxy mbidzimgix ya naaxhuiñ. ¹¹ Jayhuin ti nijayiiygixy co ca' huaad mnaymigüg'ájtigixy miid yi jäy ajcxy huidibi naydijcigixp co ymibijccixy, je huidibi tundigooygixp miid töxyjäydijc, huidibi ajcxy ooy adzojccixy, huidibi ajcxy ojadajtp tzaadzech quipychech, huidibi ooy ycapxtigooygixy, huidibi ajcxy amügy jäy, etz huidibi ajcxy meetzp. Nañ ni ca' huaad mgaymujccixy m'uucmujccixy miid yi' ajcxy. ¹²⁻¹³ Com ca' yhuaadity co ñich nyajcüyöyipy nyajtecyöyipy yi jäy ajcxy ypocy huidibi ca' mijpidaaccixy Jesucristo. Dios ci'm yajcüyöyam yajtecyöyam yi' ajcxy ypocy. Hue' janchtiy copicy co miich ajcxy myajcüyöyip myajtecyöyip yi mibijcpidijc ajcxy ypocy. Yajpidzimgixp yi pocytumbi ma miich ajcxy.

6

Tzip capxy ma je juez ajcxy huidibi ca' ymibijccixy

¹ Pen xymidundigooyb tüg mibijcpi, ¿nej oy mnayjihuiyüii co nicxy mxäy yi mmigüg ma yi tungmiidpi huidibi ca' mibijccixy Dios y'ayuc? ¿Cay jac'oy co myaj'abigipy je mibijcpidijc ajcxy, e jim y'oyñhuipy je ayuc nej anajty ti xymidundigoy? ² ¿Nej ca' mnejhuiygixy co yi jäy ajcxy huidibi Dios ti ypocyhuinméecxigixy, yi' ajcxy yajcüyöyamyb yajtecyöyamyb yi naaxhuiñjäy ajcxy ypocy huidibi ca' mijpidaaccixy Dios? Pen miich ajcxy myajcüyöyip myajtecyöyip yi naaxhuiñjäy ajcxy ymijpocy, ¿nej co ca' mjadtcixy nej ajcxy myajcüyöyipy myajtecyöyipy yi mibijcpidijc ajcxy ypocy huidibi ca' ytimymij ytimycajejity? ³ ¿Nej ca' mnejhuiygixy co miich ajcxy myajcüyöyamyb myajtecyöyamyb ixti yi ángeles ajcxy ypocy? Pen miich ajcxy myajcüyöyamyb myajtecyöyamyb yi ángeles ajcxy ypocy, ñigi ca' chipity co ajcxy myajcüyöyipy myajtecyöyipy yi mibijcpidijc ajcxy ypocy huidibi tzinaayb jugy'ajtp ma jadachambi xii tiempo. ⁴ Pen miich ajcxy mnaymidundigóoyigixp, ¿nej co nicxy mbidaaccixy yi mxñhuin ma yi jäy ajcxy huidibi ca' yajpaady ma miich ajcxy myöymujccixy? ⁵ Jadu'n nnimáaygixyich miich ajcxy, jaydebi mdzöydu'njihuiygixy miid jada ycixpi. ¿Nej ca' yajpaady ma miich ajcxy ni tüg yëydijc huijy ycuipi huidibi jëbi yaj'oyiy je capxy je ayuc ma je mibijcpidijc ajcxy? ⁶ ¿Nej ooy jada ytimycopicyity co yi mibijcpidijc ajcxy ñayxñhuigixipy ma je tungmiidpi huidibi ca' mijpidaaccixy Dios?

⁷ Co miich ajcxy mnayxñhuigixy ma cajp tungmiidpi, je' je tiy'ajt co ca' ajcxy mguydúngxixy Cristo y'ayuc ytiy'ajt. ¿Nej cay jac'oy co mnaymímecxtújcigixipy, ca'ydi co mnayxñhuigixy? ¿Nej cay jac'oy co xytigóoyigixipy tijaty, ca'ydi co mnayxñhuigixy? ⁸ Ma yjapadyii ixipy mnaymímecxtújcigixy, chi miich ajcxy ac mibijcpidijc naymidundigóoyigixp, e nañ jadu'n mjanayméetzigixy ti ajcxy ymiid.

⁹ ¿Nej ca' mnejhuiygixy co yi jäy ajcxy huidibi tundigooyb, ca' ajcxy it lugar pada'ñ ma Dios y'ane'my? Ca' mnayhuin'ñingixy, ca' ajcxy it lugar pada'ñ ma Dios y'ane'my yi jäy ajcxy huidibi migapxtigooyb töxyjäydijc, huidibi ajcxy ojadajtp tzaadzech quipychech, huidibi ajcxy migapxtigooyb ymigüg ytöxyijc, huidibi ajcxy adöxyñi'aa. ¹⁰ Ca' ajcxy it lugar pada'ñ ma Dios y'ane'my huidibi ajcxy meetzp, huidibi ajcxy tijaty adzojcp, huidibi ajcxy amügyjäy'ajtp, huidibi ajcxy capxtigooyb, etz huidibi ajcxy ayucmihuidijt capxmihuidijtp. Nidüg'ócy yi jäy ajcxy huidibi jadu'n tundigooyb, ca' ajcxy it lugar pada'ñ ma Dios y'ane'my. ¹¹ Jadu'n anajty nijëjity miich ajcxy mdundigooygixy jecy'ajty, per co ti mmibijccixy Cristo, chi Dios ti xyhuinmecxy ajcxy mbocy, e ti yajhuäch je jibicpi ma ajcxy mjot mhuinma'ñ, etz mnayyéjigixy amumdügjot ma Dios. Co miich ajcxy

mmijpidaaccixy je nHuindzin Jesús yxii e xy'adigiiygixy xyjottigiiygixy Dios yjihui'ñ ymic'ajt, paady ajcxy ti m' ahuimbijtcixy tudägy ma Dios yhuinduu.

Je tudägy'ajtin huidibi ijtp ma ajt ndzinaayin

¹² Janch tiy'ajt nej jäy yminaangixy co jëbi huaad tungixy hueñytiijity huidibi ñijot'ajtcixyp. Per ca' tüg'óciy huidibi jäy ajcxy tuñ y'oyjäygidaacnity. Janch jadu'n jëbi pinjaty tunipy hueñytiijity, per ca' huaad ymimadägyii je huidibi ajcxy ytumyb. ¹³ Janch tiy'ajt nej jäy yminaangixy co je jicxy picy ytungbaady ma je jäy y'aa ymöx, e je aa möx ytungbaady miid je jicxy picy ycixpi. Per Dios yajcödigoyamyb je jicxy picy, e nañ jadu'n yajcödigoya'ñ je jäy y'aa ymöx. Per nañ tiy'ajt co Dios ca' ti yaj'oyiy je yëydijc ñin'icx, co midundigooyipy töxyjäydijc. ¹⁴ Dios ti yajjugypicy jadüg'oc ich ajt nHuindzin Jesucristo co y'o'cy. Nañ jadu'n Dios miid ymic'ajt co xyajjugypigaanim jadüg'oc co anajty ti n'o'cim.

¹⁵ ¿Nej ca' mnejhuüy miich ajcxy co yi mnin'icx ajcxy Cristo yi' yje'? ¿Nej cay Cristo anajty midundigooybich co nnicxy miidmäyich yi töxyjäy huidibi jibic-huinma'ñ miid? ¿Ca' jadu'n y'óyity nimina! ¹⁶ ¿Nej ca' mnejhuüiygixy co tüg yëydijc puhuägüy tüg töxyjäy huidibi jibic-huinma'ñ tumb, tügity ajcxy y'ijtcixy? Com jadu'n yjaybetyity ma Dios ñecy, ma Dios jadu'n ymina'ñ: “Nimetz y'idaangixy jadu'n nej tügpi nin'icx.” ¹⁷ Co tüg jäy miid y'ity yi Huindzin Jesucristo, huin'it je jäy yjihui'ñ ymic'ajt etz Dios yjihui'ñ ymic'ajt y'ijtcixy tú'ciy.

¹⁸ Ixmajtcix je jibic-huinma'ñydunii, ca' mdundigooygixy miid töxyjäy ajcxy jibic-huinma'ñydumbi. Yi jacjadyii pocy huidi jäy ajcxy ytumyb, ca' yi' ajcxy midundigoy nin'icx. Per co ytundigooygixy miid töxyjäy ajcxy, huin'it janchtiy yci'mnin'icx anajty ymidundigooygixyp. ¹⁹ ¿Nej ca' mnejhuüiygixy co je Espiritu Santo huidibi Dios xymooyim, ti chinaydacpicy ma miich ajcxy mjot mhuinma'ñ? Paady ycixpi miich ajcxy ca' ci'm nay'ané'migixy. ²⁰ Tzohui Cristo ti cojuy miich ajcxy mbocy, paady ycixpi ooy ycopicyity co oybi mdúngixip miid mnin'icx, jigix Dios cömay y'idipy miid co oy anajty ti mdungixy.

7

Capxhuijin ma je pijcin

¹ Cham n'adzohua'ñich je huidibi miich ajcxy ti xyaj'amidoobich ma je necy huidibi ti xyajniguéjxcixyich. Oy jadu'n co tüg yëydijc ca' ypigipy. ² Per com may yëydijc huidibi ooy ytundigoya'ñ miid töxyjäydijc, paady ycixp jac'oy co nidüg nidüg yëydijc pigipy e miid'idipy yci'mdöxyijc. E nañ jadu'n jac'oy co nidüg nidüg töxyjäy ypigipy, e miid idipy yci'm ñäy. ³ Copicy je yëydijc chinähuiipy miid ytöxyijc nej ypadyii, nan tim jadu'n je töxyjäy chinähuiipy miid ñäy nej ypadyii. ⁴ Com je töxyjäy ca' ane'my yci'mnin'icx, hue' ñay'ané'migixy miñ xyipy. Nañ jadu'n je yëydijc ca' ane'my yci'mnin'icx, hue' ñay'ané'migixy ymiñ xyipy. ⁵ Ca' huaad je yëydijc nimay je töxyjäy co ca' miid mähua'ñ miid pocxa'ñ. Nañ jadu'n je töxyjäy ca' huaad nimay je ñäy co ca' miid mähua'ñ miid pocxa'ñ. Jëbi janchtiy minajity ñay'ayuc-huinjihuiiygixy co amay'adaangixy co Dios mibijctzohuaangixy ycapxtägaangixy. Co Dios mibijctzohuin myajmáygixipy, huin'it jëbi máagixni póxcixni agujc jotcujc, ca'ydi je mujcu' mimadägyii ajcxy.

⁶ Jada je' tiy'ajt nej jëbi yëydijc miiddzinäy ytöxyijc, hue' jada capxhuijin, ca' jada y'ané'minity. ⁷ Jadu'n njadzocyich co miich ajcxy ixipy m'ijtcixy adüg jadu'n nej n'ityich adüg. Per Dios ti xymooyim nidüg nidüg ngi'mhuinma'ñ ngi'mmic'ajt. Paady ji canagnax jäy yhuinma'ñ, e nidüg nidüg miid yci'mhuinma'ñ nej ytunaangixy, pen pigaangixp o ca' ypigaangixy.

⁸ Jada ayuc nyajnimaybich yi adügtijc etz yi co'ögytjic ajcxy. Jac'oy co ajcxy huen tzinaaygixy adüg, jadu'n nej ich ndzinäyich. ⁹ Pen ca' ajcxy mimadäga'ñ yi chinaayin adüg, etz nijot'ajtcixy co ypigaangixy, jac'oy co ypijcxipy. Com jac'oy co ypijcxipy ca'ydi co cuydúngixipy nin'icx chojcin.

¹⁰ Jada ayuc nyajnimaaaybich huidibi ajcxy ti ypijccixy. Ca' y'oyity co töxyjäy tög ixmach yi' ñäy. Nañ jadu'n ajt nHuindzin Jesús xymooyim jada ane'min. ¹¹ Co tög töxyjäy ixmach ñäy, copicy co huen tzinäy adüg, e ca' huaad ypicoy müd huingbi yëydijc. Jëbi janchtiy jadüg'oc pudigiy ñäy. Nañ jadu'n ni ca' y'oyity co tög yëydijc ixmadzip ytöxyijc.

¹² Hich jada ngi'm'ayuc jada huidibi nyajnimaaaybich je jacjadyii mibijcpidijc. Yi Huindzin Jesús ca' ti ane'min yecy müd jadaayaabi ycixpi. Pen tög yëydijc mibijcp tzinay müd tög töxyjäy huidibi ca' mijpidägy Cristo, jac'oy co ca' ñay'ixmájtzigixipy, pen je töxyjäy jadu'n jotcuyc jacmiiddzinähua'ñ je yëydijc. ¹³ Nañ tim jadu'n co tög töxyjäy huidibi mibijcp tzinay müd tög yëydijc huidibi ca' mijpidägy Cristo, jac'oy co ca' ñay'ixmájtzigixipy pen je yëydijc jotcuyc jacmiiddzinähua'ñ je töxyjäy. ¹⁴ Je töxyjäy ñäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch müd co ytöxyijc ti mijpidägy Cristo. Nañ jadu'n je töxyjäy huidibi ca' mijpidägy Cristo, jadu'n yi' nipaady nej jäy huidibi ypocy ti yajnihuäch müd co ñäy ti mijpidägy Cristo. Pen ca' ixypy yjadu'nity, yi' ajcxy y'ung y'anäg, hue' ixypy nipaady nej jäy ajcxy y'ung huidibi ca' mibicy. Per com ti je yëydijc etz je töxyjäy yajpocyñihuächyii, nañ jadu'n je y'ung ajcxy ti yajpocyñihuächyii. ¹⁵ Per pen je yëydijc huidibi ca' mibicy Cristo ca' miiddzinähua'ñ ni jadu'ñyi yi' ytöxyijc huidibi ti mibicy Cristo, huin'it jëbi ñay'ixmájtzigixy. Nañ jadu'n co je töxyjäy huidibi ca' mibicy Cristo, e ca' miiddzinähua'ñ ni jadu'ñyi yi' ñäy huidibi ti mibicy Cristo, huin'it jëbi ñay'ixmájtzigixy. Com Dios jadu'n tzocy co jotcuyc ñaymiiddzináayigixipy. ¹⁶ Jëbi ñay'ixmájtzigixy com je töxyjäy ca' tiydudägy ñejhuüy pen mimadacy yñäy yajmibigipy Cristo. Nañ jadu'n je yëydijc ca' tiydudägy ñejhuüy pen jëbi ytöxyijc yajmibigipy Cristo.

¹⁷ Oy ixypy ñejity jada tiy'ajt cuydungixy. Copicy co nidüg nidüg miich ajcxy mdzinähuiipy mjogy'adipy jadu'n nej Dios ti xyajni'ixiigixy mdzinaayin mjogy'ajtin, e jadu'n nej anajty myajpatcixy co Dios xyhuin'ixy jëbi mmibigipy Cristo. Yi jadu'mbi ane'min nyaj'ixpijcpyich yi mibijcpidijc ma tög tög cajp. ¹⁸ Yi jäy huidibi ti yajtiy'ajttiy jayijp, e Dios yhuin'ixyii jac'axam, huen jadu'nity, ca' huaad yajtigoy je ijxpejt nej ti yajtiy'ajttiy. E yi jäy huidibi ca'ni yajtiy'ajttiy e ti yhuin'ixyii Dios, huen jadu'n y'ity, ca' ycopicyity yajtiy'ajttihuipy. ¹⁹ Ca' ytimyñejity pen miich ajcxy ti myajtiy'ajttiy, o pen ca'ni myajtiy'ajttiyigixy. Huidibi copicyip, mguyduunip ajcxy Dios y'ane'min ycotujcin. ²⁰ Nidüg nidüg mibijcpi huen ijtcixy nej anajty yajpatcixy co Dios ajcxy yhuin'ijxyi. ²¹ Pen miich anajty codoogiy tumb ma tög jäy co Dios ti xyhuin'ixy, ca' mdajy may müd yi' ycixpi, hui'm müd mhuindzin. E pen mhuindzin a'ixiib co mbidzima'ñ ahuätztuum, jëbi mbidzimy ma codoogiy anajty m'ity. ²² Pinjaty codoogiy ijtp ma yhuindzin co mibicy ajt nHuindzin Jesucristo, chi Jesús yi' yajnihuädzictüdyii ma yi pocy y'ane'myii. Pinjaty tungixp yci'ndung, co mibicy hich ajt nHuindzin Jesucristo, chi jadu'n nipaady nej jihuüy codoogiy y'ity ma Cristo. ²³ Tzohui ooy Jesucristo xycjuuyi miich ajcxy mbocy, paady ycixpi cuydungix ajt nHuindzin Jesucristo y'ayuc ytiy'ajt. E ca' mguydungixy naaxhuiñyay ajcxy y'ayuc ytiy'ajt huidibi ajcxy xypidägip ma pocy xy'ane'mgixy. ²⁴ Migügtijc ajcxy, nidüg nidüg mibijcpi, huen ijtcixy nej anajty yajpatcixy co Dios yhuin'ijxi ajcxy.

²⁵ Jada ayuc nyajnimaaaybich yi mibijcpidijc huidibi ajcxy adüg yajpatcixp. Je Huindzin Jesús ca' ti tiy'ajt ahuing ti xymöyich müd miich ajcxy ycixpi. Hue' ajcxy nyajnimaaayb ahuing je huinma'ñ huidibi nmiidich. Com Dios ti xypa'ayooyich, paady ycixpi jëbi mgöbigipy ajcxy hich n'ayuc hich ngapxhuijin. ²⁶ Jadu'n huinma'ñ nmiidiyich co jac'oy co nidüg nidüg mij'anäg huen jac'ijtcixy nej yajpatcixy. Müd co tzaachypi ayo'n nminajxim nyajnajxim jadachambi xii tiempo, paady ycixpi ngapxhuijyich jadu'n. ²⁷ Pen mibijcyp tög töxyjäy, miiddzina'. Pen ca' ti picy tög töxyjäy, jac'oy co ca' mbigipy. ²⁸ Pen ti mhuinma'ñ mbidägy co mbiga'ñ, jëbi mbicy, ca' anajty mdundigoy co mbigipy. Nañ jadu'n tög töxyjay mutz'anägnip ca' anajty ytundigoy co ypigipy. Janch tiy'ajt jada co yi'

ajcxy huídibi pijccixp ypadamyb ajcxy jotmay ma chinaayin. Paady ycixp ti nnimaaygixy co jac'oy co ca' mbíjccixipy, e ca'ydi ti jotmay mbáatcixipy.

²⁹ Migügtijc ajcxy, jada njacyajnímaaygixpy. Hueeni xii tiempo njactzinähuaanim ya naaxhuiñ. Jadu'n nej je xii je tiempo yjacnicxni miich ajcxy pinjaty ti ypic, tzinaaygix jadu'n nej ixypy ca' mdöxijc ajcxy miidity. ³⁰ Miich ajcxy huídibi yaaxp etz ayo'n jihuiyb, tzinaaygix jadu'n nej ixypy ca' ti ayo'n miidity. Miich ajcxy huídibi xondacp, tzinaaygix jadu'n nej ixypy ca' mxondaaccixy. Miich ajcxy huídibi ajuuyb adoocp tzinaaygix jadu'n nej ixypy ca' ti ajcxy miidity. ³¹ Miich ajcxy huídibi mic'ajt comeñ'ajtp, tzinaaygix jadu'n nej ixypy ajcxy ca' ti mgomeeñity.

³² Hue' ndzocyich co ca' ti jotmay miich ajcxy mmiid'adipy ma yi mdzinaayin mjogy'ajtin. Yi jäy ajcxy adügpi ymijottigooyb ajcxy je Huindzin Dios ytung, yajjäygidäga'ñ ajcxy je Huindzin Dios. ³³ Je tiibi ajcxy ypijccixy, chi ymijottigooyb ajcxy yi' ytung ya naaxhuiñ, jadu'n nej jébi yajjotcuyc'ajtcixy ytöxyijc. ³⁴ Nañ tim jadu'n tigachjaty yhuinma'ñ miidity je töxy'anäg huídibi ti ypic. Je töxy'anäg adügpi ymijottigooyb Dios ytung, etz yecy ñin'icx etz yjihui'ñ ymic'ajt cixyot huinijot ma ajt nHuindzin Jesucristo. Per je töxy'anäg huídibi ti ypic, hue' je' ymijottigooyb ti ga ti ya naaxhuiñ, jadu'n nej huaad jäygidägyii ñäy.

³⁵ Jada jadu'n ti nyajnímaaygixy miid miich ajcxy m'oy'ajtin ycixpi. Ca' nan tzipjaty ane'min ti nmooygixy. Jadu'n ti ngapxhuijcixy jaydēbi jotcuyc mdzinaaygixy mjogy'ajtcixy, etz jaydēbi ajcxy amumdügjot mdungixy ma ajt nHuindzin Jesucristo ytung, e ca' mdungixy ametz jotmetz.

³⁶ Pen ji pin jotmay miidity miid ñix ycixpi, miid co yxii yjimijt ti yujc-huäcni, jada je' ooy ytimycapxpaadyity, jébi tuñ huídibi y'a'ixiiyb jac'oyip, jébi ypic, ca' yi' ypocyity.

³⁷ Pen ji pinjaty ñix yhui'ma'ñ jaybicy, e ca' pin ycohuaníyii, nañ ni pin yca'adugyii co tuñ nej tzocyin, e ñijot'ajtyp tudägy'ajt janch cixyot huinijot co yñix yhui'ma'ñ jaybicy, oybi anajty ytumy. ³⁸ Je jäy huídibi yñix yajpijcp, oybi anajty ytumy, e pinjäy yñix cayajpijcp, nigí anajty oybi tuñ ca'ydi co ypigipy.

³⁹ Copicy co je töxyjäy miiddzinähuiipy yi' ñäy mabaad yñäy yjugy'aty. Co janch anajty yñäy y'ögy, huin'it jébi ypigipy miid huingbi, pen jadu'n anajty najtztzogiy. Hue' janchtiy copicy co pigipy je pin mibijcp je Huindzin Jesucristo. ⁴⁰ Ooy nigí je töxyjäy co'ögypí agujc jotcuyc chinähuiipy yjugy'adipy pen ca' ypijctigach, jadu'n nmiididyich nhuinma'ñ, e nmínaambich co naybaatip ich nhuinma'ñ miid je tiy'ajt huídibi je Espíritu Santo yejcp.

8

Je tzüch huídibi ajcxy yajhuindzigiiyb quipychech

¹ Jadüg nax, jada ayuc ajcxy nyajnijayiiyb ma yi tzüch ymiñ huídibi jäy ajcxy yajhuindzigiiyb tzaadzech quipychech. Janch tiy'ajt co nidüg'óciy ich ajt nmiid'ajtim xpijcin. Per pen ooy mij nayjihuiiyim ajt n'ixpicyity, chi amij agix nayjihuiiyim. Per pen naychojcin nayjihuiiyim nidüg nidüg, huin'it nyajeecim nmibijcin. ² Pen ji nidüg ma miich ajcxy ñaydiyii co y'ixpicyity, ca'ni yi' jajtäy xpijcin huídibi jaccopicy yjadipy. ³ Co tüg jäy yajmij'aty Dios, Dios ñejhuiiyb nej jada jäy yjot yhuinma'ñ miidity.

⁴ Jadu'n jada je tiy'ajt maabi je tzüch huídibi jäy ajcxy ti yajhuindzigiiygixy tzaadzech quipychech ajcxy. Nejhuiiyim co yi tzaadzech yi quipychech ca' ti jugy'ajtin miidity. Ji tügpajc Dios huídibi tzinaayb jugy'ajtp. ⁵ Janch tiy'ajt co yi naaxhuiñjäy ajcxy Dios'ajtigixy canagnax huídibi yajpatp tzajpcix etz ya naaxhuiñ huídibi ca' Diosity. Etz nañ tiy'ajt co may yhuindzin'ajtcixy huídibi ca' yhuindzinity. ⁶ Per ich ajt n'ojadajtim tügpajcpi Dios, je Dios Teedy. Je Dios Teedy coj macx tüg'óciy huídibi ji'ajtp. Miid yi' ycixpi ich ajt ndzinaayim njogy'ajtim. Nañ tim jadu'n nmiid'ajtim tügpajcpi ajt nHuindzin Jesucristo, e yi' huijtz'ijtaayb tüg'óciy tijaty huídibi ji'ajtp, e nañ yi' ajt xhuijtz'ijtim.

⁷Janch tiy'ajt co yi tzaadzech quipychech ca' ti mic'ajt miidity, per nije'jity mibijcpidijc ca' huinjihuüy jada tiy'ajt. Nijëjity ajcxy jecy'ajty ooy huindzigüygixy tzaadzech, ixti chambaadni tijcixy co yi tzüch huidibi jäy miid huindzigüy tzaadzech, tzaadzech yi' yje'. Co ajcxy tzüdcixy yi jadu'mbi tzüch, jibic nayjihuiüyigixy, nayjihuiüyigixy nejjihuiüy ti ytundigooygixy. Ca' tiydudägy y'ijtcixy ma ymibijcin. ⁸Ca' Dios xycöbigaanim miid je' ycixpi co ti njiicxim ti ndzüdzm tijaty tzüch, o miid co ca' ti njiicxim ca' ti ndzüdzm tijaty tzüch. Nañ tim jadu'n Dios ca' oybi xymöhuaanim miid je' ycixpi co ti njiicxim ti ndzüdzm ti tzüch, o miid co ca' ti njiicxim ca' ti ndzüdzm tijaty tzüch. ⁹Oy Dios a'ixiy co jëbi ndzüdzm huenhuidibi tzüchity. Per miid je migügtijc ycixpi huidibi ca' tiydudägy miidity ymibijcin, tzoc naygüend'ajtim ca'ydi je' jibic yñayjihuiüyii miid huidibi ñich ajt ndunim. ¹⁰⁻¹¹Tzoc ocpidaacim co miich ajcxy mnejhuüy je tiy'ajt, e xy'ixipy tüg migüg co mgay m'uucy ma tüg mesa jiiby tigoty me je tzaadzech y'ity. Ca' jecyity co jada jäy huidibi ca' tiydudägy miidity ymibijcin, etz co xy'ixpaadipy jiiby, huin'it je' cöbiga'ñ je tzüch huidibi huindzigi'ñ'ajtp. E jadu'n yhuimbizimy co miich jibic ijxpejt ti myecy miid yi m'ixpijcin ycixpi, com yi mmigüg ti ytundigoy miid huidibi miich ti mduñ. E Cristo ti y'ögy miid yi' ypocy ycixpi nañ jadu'n. ¹²Co tüg mibijcpi jibic nayjihuiüyii miid co ti xy'ixy ma je caydac mdzüch je tzüch huidibi jäy ajcxy yajhuindzigüyb tzaadzech, miich anajty tundigooyb miid Cristo ytiy'ajt, miid co yi mibijcpi jibic ñayjihuiüyii. ¹³Paady ycixp ca' ndzüdza'ñich ni mina tzüch huidibi tzaadzech yhuindzigi'ñ'ajtip. Pen jadu'n nduñich, jibic ijxpejt anajty nyejcpyich ma nijëjity migügtijc, e chi yi' ajcxy yhuinma'ñytigoya'ñ.

9

Je tung huidibi Pablo paatip

¹Janch janch co jëbi nduñich huentijity huidibi ndzojcpich. Nañ jadu'n janch co Jesucristo ti xyajniñbicyich jada apóstol tung. Etz janch co ti n'ixyich ajt nHuindzin Jesucristo. Nañ jadu'n janch co miich ajcxy ijxpejt'ajtp ma ñich ndung, com ti ajcxy mmijpidaaccixy je nHuindzin'ajtim Jesús y'ayuc huidibi ti ngapxhuäcxyich ma miich ajcxy. ²Ca' jécyity co jacjadyii jäy ajcxy ca' xycöbiga'ñich jadu'n nej Jesús xy'apóstol'adyijich. Per com miich ajcxy ti mmijpidaaccixy ajt nHuindzin Jesucristo, etz miich ajcxy mmibijcin nidiy'ajtp co Jesús ti xyyajniñbicyich jada tung, paady ycixpi copicy co ñich miich ajcxy xycöbigipyich jadu'n nej Jesús y'apóstol.

³Jadu'n n'adzohuimbityich yi' ajcxy huidibi jibic xyñigapxip ñich ndung. ⁴Com Jesucristo xyajniñbicyich jada tung co ngapxhuäcxyich yi' y'ayuc ytiy'ajt, paady ycixpi xypatpich jadu'n co je mibijcpidijc xymöhuibich ngaayin n'uucin. ⁵Nañ jadu'n xypaatpich co nmiid'adipyich tüg ndöxyjicich huidibi mibijcp, etz huidibi nmiidhuididipyich tim jadu'n nej yi jacjadyii apóstol ajcxy miidity, etz je Huindzin Jesús y'uch ajcxy miidity, etz Pedro. ⁶¿Nej miich ajcxy mminaangixy co ñich etz Bernabé nimejtzpajc ca' ñich ajcxy huaad ixmajtcixy yi ndungich co ngapxhuäcxyich Cristo y'ayuc ytiy'ajt? ⁷¿Huidibi soldado yi' ma je ejercito ci'm ygasto cojuy? ¿Pin ji cam nidungüyb, e ca' jicixipy je huidibi ti yaj'ity? Pin ychibo cuend'ajtp, ¿e ca' ügipy je chibo yleche? ⁸Ca' miich ajcxy mina'nipy co jäy y'ayuc jada. Nañ jadu'n jaybety y'ity ma Dios ñecy tim jadu'n nej mmina'ñich. ⁹Com jaybety jadu'n ymiñ ma Moisés ñecy, ma Moisés jadu'n ymina'ñ: “Ca' huaad huajyuub y'ajen mbidaaci ma yam ten moody yi trigo co yajpajc'aty.” ¿Nej jëyi miid huajyuub ycixpi Dios jadu'n ymina'ñ? ¹⁰Canan jëyi miid huaj yuub ycixpi Dios jadu'n ymina'ñ. Nañ jadu'n Moisés jaybejty jada tiy'ajt miid ñich ajt ycixpi. Com yi jäy ajcxy huidibi naaxjidziztp, etz yi' ajcxy huidibi trigo yajpajc'ajtp, hue' ajcxy yjijp'ijxyp co padaangixy je moc tiim huidibi ajcxy ti nidungiy. ¹¹Nañ jadu'n ñich ajcxy huidibi Jesús ytung tuunip, ti ngapxhuäcxyich Dios y'ayuc ma miich ajcxy, e miich ajcxy oybi ti mbaatcixy ma Dios. ¿Nej ca' jadu'n y'oyity co nbaadyich meeñ etz jicxy picy miid ndungich ycixpi? ¹²Pen jacjadyii Dios y'ayuucapxhuäcxpi ti paatcixy meeñ etz jicxy picy ma miich ajcxy miid ytung ycixpi, ¿nej ca' jëbi niñi ñich nbaadyich meeñ etz jicxy picy

miidich ndung ycixpi? Oy njamíididyich je mic'ajt nej nja'ane'mgixy co xymöhuibiyich ajcxy meñ etz jicxy picy miid ich ndung ycixpi, per ca' jadu'n ti n'ane'mgixy. Jadu'n ich tzaachypi nyajnajxich jim ma miich ajcxy, jaydëbi jäy ajcxy cöbijccixy Cristo agujc jotcujc ca' ti adzijpin. ¹³ Mnejhuiiyb miich ajcxy co yi' huidibi ajcxy tumb ma Dios ytijc, paatcixy ninigoobi caayin uucin. Nañ jadu'n yi' pin ajcxy huidibi iyujc yajhuindzigiiyb Dios, paatip ajcxy je huindzigi'ñ tzüch. ¹⁴ Nañ jadu'n je Huindzin Jesucristo ane'my co huen yajcaaygixy yaj'uuccixy etz mooygixy yhuit ytucx yi' ajcxy huidibi capxhuäcxixp yi' y'ayuc ytiy'ajt. ¹⁵ Ich ca' ti nyajtuñich jada mic'ajt jada ane'min huidi miidich. Nañ jadu'n ca' jada ayuc nyajnijayiiygixy, miid co ndzocy co pada'ñich tijaty ma miich ajcxy. Jacjotcujc co n'ögibich miid yuu, ca'ydi co n'ané'mibich caayin uucin ma miich ajcxy, e jadu'n tzöydu'n nbáadibiyich jadu'n nej cham naygömayiijich, miid co ci'm nnyayjacyiijich miid ndungich.

¹⁶ Com ca' huaad naygömayiijich co ngapxhuäcxxyich Cristo y'ayuc. Miid co Cristo xyyajniibijcich jada tung, paady ycixpi copicy ngapxhuäcxxyich Cristo y'ayuc. Ayo'n nbadaamybich, pen ca' ngapxhuäcxich Cristo y'ayuc. ¹⁷ Pen ngi'mdzójcínich ycixpi ngapxhuäcxich Cristo y'ayuc, njijp'ijxypich ixypy co jäy ajcxy xymijuyipyich. Per ca' yjadu'nity. Hue' janchtiy je Huindzin Jesucristo xyajniibijcich jada tung, e paady nduñich yi' ytung. ¹⁸ ¿Ti muju'ñ nbáadibich miid ndungich ycixpi? Nbáadibich jotcujc'ajtin co ngapxhuäcxibich Cristo y'ayuc jadu'ñyi, ca' ymeënygixyity. Ca' nyajtuñich je ane'min huidibi Cristo xymóyich miid caayin uucin ycixpi.

¹⁹ Ca' ji ni pin jäy mic'ajt miidity jaydëbi xy'ane'myijich. Oy ixypy ytimyñejity ti nnyabidägyiijich miid ich njot nhuinma'ñ jadu'n nej jihuiy tüg'óciy jäy ajcxy xy'ane'myich. Jadu'n nduñich jaydëbi jac mayjäy ajcxy nyajmibigipyich Cristo. ²⁰ Co ngapxhuäcxxyich Cristo y'ayuc ma yi' judíojäy, hue' naybidägyiijich judíojäy, jaydëbi nyajmibicyich ajcxy Cristo. Co ngapxhuäcxxyich Cristo ma yi' judíojäy ajcxy huidibi cuydumybi yi' ajcxy ycötujcin etz ycostumbre, nañ jadu'n ich nguyduñich yi' ajcxy ycötujcin, jaydëbi nyajmibicyich ajcxy Cristo. Ooy yjanchity co ca' yi' judío ycötujcin etz ycostumbre xy'ane'myich. ²¹ Co ngapxhuäcxxyich Cristo y'ayuc ma yi' ajcxy huidibi ca' yjudíojäyity, chi naybidägyiijich jadu'n nej yi' ajcxy. Ca' nan nmínaambich co ca' nguyduñich Dios ytiy'ajt. Hue' njatytimycuydumybiich Cristo ycötujcin, jaydëbi nyajmibicyich ajcxy Cristo. ²² Co ngapxhuäcxxyich Cristo y'ayuc ma yi' ajcxy huidibi ca' tiydudägy ymibijccixy, chi naybidägyiijich jadu'n nej yi' ajcxy, jaydëbi nyajmibicyich ajcxy Cristo. Ma nidüg'óciy jäy ajcxy ma ngapxhuäcxxyich Cristo y'ayuc, chi nbidägyich njot nhuinma'ñ nej yi' ajcxy yjot yhuinma'ñ miidity, jaydëbi nijējity ajcxy nyajmibicyich Cristo y'ayuc ytiy'ajt. ²³ Jadu'n nduñich tüg'óciy miid Cristo y'ayuc ycixpi, je ayuc nej jëbi jäy ajcxy y'alma ñidzoocixy. Jadu'n nduñich, jaydëbi nbaadyich je jotcujc'ajtin etz oy'ajtin huidibi nbaatim nidüg'óciy co nmijpidaacim Cristo.

²⁴ Mnejhuiiygixy co jäy ajcxy ñayboyicquípaxigixy co premio padaangixy, huin'it nidüg'óciy ajcxy ñaymic'ijxigixy, per tüg'pajc huidi je premio patp. Nañ jadu'n miich ajcxy mijottigooygix cuydungix Dios y'ayuc ytiy'ajt, jaydëbi Dios xymóoygixipy ajcxy tüg' premio. ²⁵ Tüg'óciy pinjaty nayñ'ixiiyip co ñay'ixquipxáanigixy ma iyihuijin, ooy ñayguend'ájtigixy mic, jigix jëbi ymadaaccixy co ganar'adaangixy premio huidibi ca' huinixii ajcxy mi'ijtcixy. Pero ich ajcxy Dios y'ayuc capxhuäcxxy, yi' ich ajcxy mijottigooygixy nganar'adaangixyich huidibi ca' nimina ycixipy ytigoyipy. ²⁶ E jadu'n ich ndung mijottigooyich, ca' yhuimbizity agoodzity, jadu'n nejihuiy ngoxich e nipin ca' ypegyii. ²⁷ Nnaychaachtumybiich ngi'mninicxich, jaydëbi ngi'mninicx xy-capxymidooyich. Jadu'n nduñich co ti ngapxhuäcxxyich Cristo ma je mayjäy ajcxy, ca'ydi nyajtigoyipyich nbremio huidibi Dios xymöhuambich.

¹ Com ndzojycpich co miich ajcxy migügtijc mnejhuüygixipy co ajt nmij'ap nmijteedy miid yhuuidjty Moisés co Dios nidüg'óciy ajcxy cuend'ajttay, huinhuoy jecy'ajty miid tüg joc. E nañ jadu'n Dios yajnihuanñ yajtzoocy nidüg'óciy ajcxy ma ymidzip co ajcxy yajnajxy je tzaptz mejy cujc'amy. ² Co nidüg'óciy ajcxy panicy je joc, e co ñidzoocytay ajcxy nidüg'óciy ma je mejy, hue' nidüg'óciy ajcxy cöbijcy Moisés y'ane'min, e jadu'n nipaady nej jihuüy ni'amugí ajcxy yñiibejty miid Moisés yxii. ³ Nañ jadu'n nidüg'óciy ajcxy caay jicxy je maná huídibi Dios anajty yejcpy, choñ je' anajty tzajpjoty. ⁴ Etz nañ jadu'n y'uuc ajcxy nidüg'óciy je ñi huídibi Dios anajty yejcpy, com y'uuc ajcxy je ñi huídibi yajpidzim ma je tzaa. E je tzaa hue' je' anajty Cristo, e paady Cristo ymiid'ijtpy etz ypubejtpy ajcxy anajty nidüg'óciy. ⁵ Oy ajcxy Dios ooy yjapubejti, e ni may ajcxy ooy Dios yajjotma'ty, etz jahueen ajcxy yca'óctay jim mijtigíduum jecy'ajty, com ca' Dios jäygidacy je' ajcxy yhuinma'ñ.

⁶ Jadu'n nej je ayo'n yjajti miid ajt nmij'ap nmijteedy jecy'ajty, je' ijpexptip ma iich ajt, ca'ydi n'adzojcim tijaty jibicpi, jadu'n nej je' anajty ajcxy adzojccix jibicpi. ⁷ Nañ jadu'n ca' yhuaadity ca' y'oyity co miich ajcxy m'ojadajtcixy tzaadzech quipychech jadu'n nej nijéjity ajt nmij'ap nmijteedy tuñ jecy'ajty. Com jadu'n yjaybetyity ma Dios ñecy ma jadu'n ymina'ñ: "Ixtactay je jäy ajcxy caaybi uucpi, e huin'it ajcxy ypidigy etz ytigüygixy iyiybi ejtzpi." ⁸ Nañ jadu'n ca' y'oyity co ndundigooyim miid töxyjäy ajcxy jadu'n nej nijéjity nmij'ap nmijteedy tuñ jecy'ajty, e iipx tugiig mil ajcxy y'o'cy tüg xiibi. ⁹ Nañ ni ca' y'oyity co njot'ijxim nhuinma'ñ'ijxim iich ajt nHuindzin Jesucristo, jadu'n nej ajt nmij'ap nmijteedy ajcxy idiich jecy'ajty, e may ajcxy tza'ñchüdzi, e ytigooy ajcxy yjugy'ajtin. ¹⁰ Nañ ni ca' y'oyity co nnigapxim ni'ojiyim Dios, jadu'n nej nijéjity ajcxy idiich jecy'ajty, e miid je' ycixpi Dios y'ángel yaj'o'cy mayjäy ma yi' ajcxy.

¹¹ Tüg'óciy yi jadu'mbi ayo'n yjajti miid ajt nmij'ap nmijteedy, e jaybety yhui'my ma Dios ñecy, jigix n'ijxpejt'ajtim, e jadu'n tiy'ajt nbaatim, ca'ydi ndundigooyim miid Dios, iich ajt pinjaty tzinaayb ma jadachambi xii jadachambi tiempo huídibi janch tim huingónip ma Dios yajcixa'ñ yajtigoya'ñ jada naaxhuiñybi. ¹² Com nmid'ajtim je tiy'ajt nej nmij'ap nmijteedy ajcxy ytundigooy, paady ycixp pinjaty yci'mhuinma'ñ pidacp co ooy mic'ajt miidity ma ymibjcin, huen naygüend'adyii, ca'ydi ytundigoy etz ypocycáhuipy ma Dios. ¹³ Tüg'óciy tzaachypi ayo'n, jot'ijxin huinma'ñ'ijxin huídibi miich ajcxy mminajxyp myajnajxyp, nañ jadu'n jacjadyii mibjcpidijc ajcxy minajxcixy yajnajxcixy. Per yajmij'ajtcix jot'amij'ajtcix Dios, com Dios ca' a'ixihuip co mjacminájxcixipy mjacyajnajxcixipy tzaachypi ayo'n anaxy huídibi ca' ajcxy mmimadäga'ñ. Co anajty tzaachypi ayo'n mminajxcixy myajnajxcixy mictägy, huin'it Dios xymöhuipy ajcxy huinma'ñ jadu'n nej jébi mminaxtagixy myajnextagixy yi tzaachypi ayo'n.

¹⁴ Paady miich ajcxy migügtijc, huídibi ooy ndzocy njihuüyich, ixmajtzcixy ca' m'ojadajtcixy tzaadzech quipychech. ¹⁵ Nyajmiidcapxy nyajmiidmiydacpy ajcxy jadyaabi ayuc, com nejhuüybich co miich ajcxy ooy oy huinma'ñ mmiidity. E jébi ci'm mhuinmaaygixy pen tiy'ajt jada iich n'ayuc, o pen ca'. ¹⁶ Ma je "Santa Cena" co nyajnajxim Dioscojuyip ma Dios miid je ügy, e n'uucim. Je' je' ñidiy'ajt'ajtpy co Cristo ti xyajtügmujcim ajt njot nhuinma'ñ co yajcruudzpejti etz ñi'py yteemy vojcy miid ajt nbocy ycixpi. Nañ jadu'n ma je "Santa Cena" co ndujchuäcxim, e ngaayim je tzajcaagy, je' je' ñidiy'ajt'ajtpy co Cristo xyajtügmujcim ajt njot nhuinma'ñ miid ñinix co ñaygiyejci ma ymidzip huen yajcruudzpedyii. ¹⁷ Oy ajt ooy njanimaayity, per nidüg'óciy iich ajt ngaayim je tügpi "Santa Cena" tzajcaagy. Jada tzajcaagy tüg yi', paady ycixpi tügpiy jäy iich ajt, e jadu'n iich ajt nipaady nej tügpi ninicx.

¹⁸ Oc-huinmaaygixy miich ajcxy yi Israel jäy ajcxy, co ajcxy tzützcixy je huídibi ajcxy yajhuindzigüyb Dios, chi ajcxy naydücmüjcgixy miid Dios ycixpi ma je Dios ojadajttac. ¹⁹ Iich nmina'ñich co yi tzaadzech ca' ti mic'ajt miidity, e nañ jadu'n yi tzüch huídibi yajhuindzigüyb tzaadzech ca' jac nigí oy'ajtin miidity, ca'ydi jac huídibi tzüch. ²⁰ Jadu'n nmina'ñich, co yi jäy ajcxy huídibi ca' mijpidaaccixy Dios, co ajcxy yejccixy yhuindzigi'ñ,

hue' ajcxy yajhuindzigiiyb ca'oybi, e ca' Dios ajcxy yajhuindzigiiy. E ca' ndzocyich co miich ajcxy migügpigipy je ca'oybi. ²¹ Co miich ajcxy m'uuccixy je ügy ma je “Santa Cena”, ca' huaad m'uuccixy je ügy huidibi ca'oybi ajcxy yhuindzigi'n'ajtipy. Etz co mgaaygixy je tzajcaagy ma je “Santa Cena”, ca' huaad mgaaygixy je tzajcaagy huidibi ca'oybi yhuindzigi'n'ajtip. ²² ¿Nej tzoc yajjotma'tim yi Jesucristo? ¿Nej jacmic'ajt miid jada' iich ajt, ca'ydi yi'?

Je tzojcin huidibi tüg mibijcpi huaad tuñ miid ymigüg

²³ Janch tiy'ajt nej jay yminaangixy co jëbi huaad nduñich huentiijity huidibi nijot'ajtpyich, per ca' tüg'óciy nmigügtijcich jäygidaccixy huidi ndumybich. Janch jadu'n jëbi huaad nduñich huentiijity huidibi nijot'ajtpyich, per huidibi ndumybich ca' tüg'óciy xpubetyich ma iich nmibijcin. ²⁴ Ca' y'oyity nnijot'ajtim ngi'm'oy'ajtin. Oy co nbubejtim nbudigiiyim nmigügtijc.

²⁵ Jëbi ajcxy mdzüch huen ti tzüch huidibi yajtoocp ma je mercado. Ca' ajcxy myajtiihuipy ma je tzüch chooñ, ca'ydi jibic mnayjihuiiyigixy. ²⁶ Com Dios y'ayuc jadu'n ymina'n: “Je Huindzin Dios yi' nihuindzin'ajtp je naaxhuiñybi, etz ñihuindzin'ajttaayb tüg'óciy huidibi ji yajpatp.”

²⁷ Pen jim pinjaty huidibi ca' ymibicy, xyajnihuohüy tüg caayin uucin ma yi' ytijc, e pen ti mhuinma'n mbidägy co nicxy mgaya'n ma yi' ytijc, oy co mgaayipy mdzüdzip huentiijity huidibi ajcxy xymooyb. E ca' mnidihuipy myajtiihuipy ma je tzüch chooñ, ca'ydi jac pinjaty jibic ñayjihuiiyi miid huidibi ti mduñ. ²⁸ Per pen je jäy xyñimaayb: “Jada tzüch ti jäy yajhuindzigiiy tzaadzech.” Pues ca' mdzüdzip je tzüch, jigix ca' jibic ñayjihuiiyi je migüg huidibi ti xyñimäy co je tzüch ti yajhuindzigiiy tzaadzech. ²⁹ Hue' nimiydacypich je mmigüg huidibi jibic nayjihuiiyi pen miich mdzu'chpyi tzüch huidibi tzaadzech yhuindzigi'n'ajtp. Ca' nnimiydägyich nej miich ci'm mnayjihuiiyi. Ca' yjeyity co nijëjity jäy xyñimähuibich: “¿Na'amy co xycapx'adujcich tijaty nigoob miid co huingbi jäy jibic ñayjihuiiyi miid jëgixpi? ³⁰ Pen nyajnajxypich Dioscojuyip miid tijaty ycixpi huidibi ngaaybich n'uucypich, ¿na'amy co xyñigapxa'nich xyñi'ojñhua'nich co ti ngay ti n'ügyich tijaty?” ³¹ Paady ycixp huentiijity huidibi mdungixyp, pen mgaaygixyp m'uuccixyp, o jac ti ga ti mdungixy, tungix tüg'óciy miid Dios y'oy'ajtin ymij'ajtin ycixpi. ³² Ca' mdúngixipy tijaty huidibi yi judíojäy ajcxy miid huing ñayjihuiiyi. Ca' mdúngixipy tijaty huidibi yi griegojäy ajcxy miid huing nayjihuiiyi. Etz ca' mdúngixipy tijaty huidibi yi mibijcpidijc ajcxy miid huing ñayjihuiiyi. ³³ Tüg'óciy huidibi ndúmybich, hue' nduñich jigix tüg'óciy jäy jäygidägipy huidibi ndumybich. Ca' ni ti nduñich nej jëbi iich ci'm nayjäygidägyiijich. Hue' nduñich miid jacjadyi jäy ajcxy y'oy'ajtin ycixpi, jaydëbi ajcxy y'alma ñidzögipy.

11

¹ Jadu'n ndzocyich co miich ajcxy mdunipy jadu'n nej nduñich. E iich tumbich jadu'n nej Cristo ytuuñ.

Nej huaad töxyjäydijc ajcxy yjäy'ajtcixy co migügtijc naymújcigixy

² Miich ajcxy migügtijc, ngapxpatypich miich ajcxy, com miich ajcxy xyjatytimyjäymejtzpich, etz nañ mguydungixyp je ayuc je tiy'ajt huidibi iich miich ajcxy ti nyaj'ixpijccixy. ³ Per ndzojcpich co mhuinjihuuyigixipy je tiy'ajt co Cristo nigohuajc'ajtpy nidüg nidüg yi mibijcpi yëydijcpi. E nañ nidüg nidüg yëydijc nigohuajc'ajty ajcxy ytöxyijc. E Dios nañ nigohuajc'ajtpy je Cristo. ⁴ Co tüg yëydijc cöjuuxy cöbe'n ihuäcxy capxhuäcxy je tiy'ajt huidibi Dios ti ymöyii, tüg je' tzo'ydu'n anajty naymöyii. ⁵ E co tüg töxyjäy cöjuxtüdy cöbe'ndüdy ihuäcxy capxhuäcxy je tiy'ajt huidibi Dios ti ymöyii, tüg je' anajty tzo'ydu'n ñaymöyii. Jadu'n je' nipaady nej jihuiy je' ycöme'pxity cödza'm. ⁶ Pen tüg töxyjäy ca' ñaygöbe'na'ñyii, jac'oy co huen yajcöme'pxy cödza'm. Per pen je töxyjäy cho'ydu'n jihuihuamyb co ycöhuay yme'pxity,

o co ycöme'pxity cödza'm, jac nigi oy co ñaygöbe'niiyb. ⁷ Je yëydijctijc ca' y'oyity co ajcxy ycohuajc cöjuuxy cöbe'ñ mi'idipy ma ajcxy Dios mibijctzoogixy o yaj'ixpijccixy Dios y'ayuc. Com je yëydijc jadu'n yi' nipaady nej Dios, e Dios yajcoj je yëydijc miid yi' y'oy'ajtin ycixpi. Per Dios yajcoj je töxyjäy miid je yëydijc y'oy'ajtin ycixpi. ⁸ Co Dios yajcoj je jayijpi yëydijc, ca' yajtuuñ je töxyjäy ycaachypajc. Hue' janchtiy co Dios yajcoj je jayijpi töxyjäy, je' yajtuuni je ñiyëydijc tüg ycaachypajc. ⁹ Dios yajcoj je töxyjäy miid je yëydijc ycixpi. E ca' nan yajcoj je yëydijc miid je töxyjäy ycixpi. ¹⁰ Paady ycixp copicy co je töxyjäy ajcxy y'ijtcixy cöbe'ñ co Dios mibijctzoogixy o najtzcaxiigixy Dios ytiy'ajt. Je' je' je' tiy'ajt co yajpaady ajcxy ane'my, nañ jadu'n yi' ángeles ajcxy yajpaatcixy ane'my. ¹¹ Per ca' ñejity, iich ajt huídibi nmibijcim Cristo, ma ajt ndzinaayin je yëydijc ca' je' yajpaady naydüg, etz ni ca' je töxyjäy yajpaady naydüg, hue' ajcxy naymiiddzinaayigixyp. ¹² Com tiy'ajt jadu'n co Dios yajcoj je jayijpi töxyjäy miid je ñiyëydijc ycaachypajc. Etz tiy'ajt jadu'n co je töxyjäy ajcxy yajma'xung'ajtcixy je yëydijc ajcxy. Per Dios ti yaj'oyiydäy, e tüg'óciy jiiy chondäy ma Dios.

¹³ Miich ajcxy ci'm ocminaangix oc-huinmaaygix, pen oy jadu'n o pen ca' y'oyity jadu'n co tüg töxyjäy Dios mibijctzoy jaygöbe'ñ. ¹⁴ Jëbi tiy'ajt nbaatim huenma'ámyity ya naaxhuiñ co je yëydijc huídibi ymiid ycöhuay yoñ ooy cho'ydu'n yecy. ¹⁵ E je töxyjäydic ajcxy ooy ycömaypidzimigixy co ajcxy miidity ycöhuay yoñ. Com yi' je' huídi ycöbe'n'ajtip. ¹⁶ Pen jim pinjaty ca' mijotcujc'aty iich n'ayuc, copicy nejhuíhuipy co iich ajcxy etz nañ jadu'n tüg'óciy jäy huídibi ajcxy mijpidaaccixyp Dios ma tüg'óciy cajp, cuydungixy nej ti nyaj'ixpicyich miich ajcxy, ca' pin jac huingbi costumbre miidity.

Pin tundigooyb “Santa Cenajoty”

¹⁷ Jada ayuc nyajnimähuaangixyp jadu'n nej mdungixy ma mnayyöymújcgixy co Dios m'ojadajtcixy. Ca' ngapxpaadyich miich ajcxy, com jibic yhuimbídzimy jadu'n nej mdungixy. ¹⁸ Jayijp nimähuaangixy co nijëjity migügtijc ti xyñimäyich co miich ajcxy mnaybijc-huäcxigixy co mnayyöymújcgixy ma je nayyöymujctac. E iich nmibijcipyich ma ga ma co yjanchity nej je migügtijc ajcxy ymina'ñ. ¹⁹ Ca' yjegyity paady miich ajcxy mnaybijc-huäcxí miid ajcxy mjibic-huinma'ñ ycixpi, jaydëbi ñiguëxigy pin je' janch tiydudägy cuydumb Dios ytiy'ajt. ²⁰ Co miich ajcxy mnayyöymújcgixy ma je nayyöymujctac, jadu'n yhuimbídzimy co ca' mguydungixy nej ypadyii iich ajt nHuindzin Jesucristo ytiy'ajt co mjatungixy je “Huindzin je' ySanta Cena”. ²¹ Com co je hora paady ma yam mdungixy je “Huindzin je' ySanta Cena” nidüg nidüg miich ajcxy mgaaygixy abicyjaty, e ca' mdungix cuendi yi' jacjadyii migügtijc, paady nijëjity migügtijc ayuu y'ijtcixy, e nijëjity anaxy ycaaygixy y'uuccixy, ixti ymuucigixy nijëjity. ²² ¿Nej ca' miich ajcxy miidity mjiin mdijc ma jëbi mgaaygixy m'uuccixy? Jadu'n nej miich ajcxy mdungixy ca' mmij'ijxcixy ca' mijpidaaccixy je jäy ajcxy nidüg'óciy huídibi mijpidacp Dios. E nañ jadu'n myajtzo'ydungixy yi' ayoobi jäy huídibi ajcxy ca' ti miidity. ¿Huam iich miich ajcxy nimähuiipy? ¿Nej jëbi ngömaaygixy miich ajcxy jadu'n nej mdungixy? Ca' huaad ngömaaygixy miich ajcxy co jadu'n m'iditczixy.

Jadu'n nej njäymejtzim ajt nHuindzin Jesús ma yi' “Santa Cena”

²³⁻²⁴ Com iich ajt nHuindzin Jesucristo ci'm xyaj'ixpijcyich je tiy'ajt huídibi ti nyaj'ixpicyich miich ajcxy, co je huin'it coodz co agojix ajcxy çíeyjcy je nHuindzin Jesús, huin'it je' conigy je tzajcaagy, e co jayijp yajnajxy Dioscojuyip ma Dios, chi tujc-huäcxy je tzajcaagy, e moy nidüg nidüg ydiscípulos ajcxy. E co ajcxy moyday, chi nimay ajcxy: “Caaygix jada tzajcaagy. Jadu'n iich jada nnin'cx huídibi ngiyegaamybich ma yi' o'cin miid miich ajcxy ycixpi. Jadu'n iich ti nduñich, jadu'n jada miich ajcxy mdunipy jäymejtziig miid iich ycixpi.” ²⁵ Co ajcxy ycayday, chi Jesús nañ jadu'n conigy je ügy copi'am, e yminañ: “Jada ügy je' jada je Dios y'ayuc jemybi huídibi Dios yajhui'my miid jäy ajcxy ycixpi, je huídibi iich nni'py ñidiy'ajt'ajtpy. Naag'oc naag'oc m'uuccixy jada ügy tungixy jäymejtziig miid iich ycixpi.” ²⁶ Paady naag'oc naag'oc miich ajcxy mgaaygixy

jada tzajcaagy, etz m'uuccixy jada ügy, myegipy ajcxy tiy'ajt jadu'n nej Cristo y'o'cy miid ajt nbocy ycixpi, ixti cooni anajty Jesucristo yhuimbity ya naaxhuiñ.

Nej huaad ngaayim je “Santa Cena”

²⁷ Paady ycixp pinjaty miid ca'oyjot ca'oyhuinma'n caaygixy je tzajcaagy etz uuccixy je vino'ügy, huidibi ajt nHuindzin Jesús ñin'cx'ajtpy etz ñi'py'ajtpy, hue' ajcxy ymidundigooygixy ajt nHuindzin Jesús ñaaxn'cx etz yi' yñi'py. ²⁸ Paady ycixpi copicy nidüg nidüg mibijcpidijc jayijp yaj'oyihuipy yci'mjot yci'mhuinma'n, e huin'it jëbi cayipy je tzajcaagy etz ügipy je vino ma je “Santa Cena”. ²⁹ Com pinjaty caayb je tzajcaagy etz ügy je vino ma je “Santa Cena”, e ca' tuñ cuendi co je' je' ich ajt nHuindzin Jesús ñin'cx etz ñi'py, hue' je' ci'm ñaymidundigoyii, e Dios tzaachytunib miid ypocy ycixpi. ³⁰ Paady ycixp may miich ajcxy myuumiidity mba'mmiidity, pumäy mnayjihuiyigixy. May miich ajcxy yuu ba'm xyaj'ayoogixy etz may ma miich ajcxy ti m'öccixy. ³¹ Co tiydudägy njot nhuinma'n nyaj'oyiyim ci'm, ca' ajt nHuindzin Jesucristo xychaachytuunim. ³² Co ajt nHuindzin Jesucristo xychaachytuunim miid yuu ba'm, paady ycixpi jadu'n xychaachytuunim, jigix ca'ydi nidigooyim ajt n'alma yjugy'ajtin quipxyi miid je naaxhuiñyäjy ajcxy huidibi ca' ajcxy Dios tzigiyigixy.

³³ Paady ycixpi miich ajcxy migügtijc co ajcxy mgaya'nip m'üga'nip je “Santa Cena” nay'ahuixigixy miñ xyipy, e jadu'n mgáaygixipy amugi'. ³⁴ Pen jim pinjaty ma miich ajcxy ooy yuubögyii, jac'oy co ycaayipy y'ügipy ma yci'mdijc jacjayijp ma ca'ni ymiñ ma je nayoymujctac. Jadu'n mdúngixipy, ca'ydi Dios xychaachytuungixy miid co ca' oy mduungixy je “Santa Cena”. Yi jacjadyii ayuc huinma'n jim nyaj'oyihuibich co anajty nicxy ci'm n'ijxcixyich miich ajcxy.

12

Je mic'ajt huidibi Espíritu Santo yejcy ma nidüg nidüg mibijcpidijc

¹ Migügtijc ajcxy, ndzojcpich co miich ajcxy mnejhuihuipy jadu'n nej je Espíritu Santo xymooyim mic'ajt. ² Miich ajcxy mnejhuib co jayijp'ajty co ca'ni anajty mmibijccixy Cristo, ooy anajty je ca'oybi xyajniidigooygixy xyajtüdigoooygixy, co m'ojadajtcixy tzaadzech quipychech huidibi ca' ymidoy ca' ycapxy. ³ Paady ycixpi ndzojcpich co miich ajcxy mnejhuihuipy co pinjaty ymina'nipy: “¡Ca' oy jäy yi Jesús!” je jäy huidibi jadu'n minamb, ca' je' anajty yajcapxyii je Dios y'Espíritu. E pinjaty minamb: “¡Jesús ich ajt nHuindzin!” je' anajty yajcapxip je Espíritu Santo.

⁴ Dios yjihui'n ymic'ajt yejcpy ymic'ajt canaag nax, per tügpajc jëyi je Dios yjihui'n huidibi mic'ajt yejcp. ⁵ Ji yajpaady canagnax Dios ytung, per tügpajc ajt nHuindzin Jesús huidibi xyajniibijcim nije' nije' tung. ⁶ Ji yajpaady canagnax huinma'n nej jëbi ndunim Dios ytung. Per tügpajc Dios huidibi xymooyim nidüg nidüg je nhuinma'n nej huaad ndunim Dios ytung. ⁷ Dios yajnigüexigyp ma nidüg nidüg mibijcpidijc je tiy'ajt co ajcxy miidity yi' yjihui'n ymic'ajt ma ajcxy yjot yhuinma'n. Jadu'n Dios ytuñ miid tüg'óciy ymibijcpidijc y'oy'ajtin ycixpi. ⁸ Dios miid yjihui'n ymic'ajt ymooyb nijëjity mibijcpidijc ayuc huinma'n nej jëbi ajcxy yaj'ixpicy Dios y'ayuc. E nañ jadu'n Dios miid yjihui'n ymic'ajt möy nijëjity mibijcpidijc ixpijcin ma yi' ytiy'ajt, per tügpajc je Espíritu Santo huidibi mic'ajt yejcp. ⁹ E nañ jadu'n Dios miid yjihui'n ymic'ajt möy nijëjity jäy mibijcin, per tügpajc je Espíritu Santo huidibi mic'ajt yejcpy. E nañ jadu'n jacnaagity möy mic'ajt jaydëbi yajtzögy pa'mjäy. ¹⁰ E nañ jadu'n Dios miid yjihui'n ymic'ajt ymooyb nijëjity mibijcpidijc mic'ajt, jaydëbi mijhuinma'nytúngixy milagro tungixy. E jac nijëjity ymooyb mic'ajt, jaydëbi najtzcapxiygixy Dios ytiy'ajt. E jac nijëjity Dios ymooyb ixpijcin etz huijy'ajtin, jaydëbi ijxcajpcixy je espíritu huidibi ca' tiy'ajt miidity, etz nañ jadu'n ijxcajpcixy je espíritu huidibi tiy'ajt miidip. E jac nijëjity Dios ymooyb je mic'ajt, jaydëbi capxcixy huingbi ayuc, etz nañ jadu'n jac nijëjity ymooyb je ixpijcin jaydëbi yajnigüejcixy je huingbi ayuc. ¹¹ Per tügpajc je Espíritu Santo huidibi ymooyb nije' nije' mibijcpidijc mic'ajt etz huinma'n. Ymooyb nidüg nidüg nej yi' tzocy.

Nidüg'óciy ajt nyajpaatim ma Cristo

¹² Cristo jadu'n yi' nej tüg ninicx, je ninicx ymiid canaag nax huidibi yu'cxp. Oy canaag jamiidity huidibi yu'cxp, per tügpajc ñinicx'aty. ¹³ Co nidüg nidüg iich ajt nniibejtım, chi iich ajt nyajpaatim nej tügpıcy jäy. Com Dios yjihui'ñ ymic'ajt tügpajc yajpaady ma nidüg'óciyi iich ajt njot nhuinma'ñ, ca' ñejity pen judıojäy ajt, o pen ca' ajt njudıojäyity; pen jäy xytumbi'ajtim o pen ndunim ngi'ndung; hue' n'ijtim nej tügpıcy jäy. Dios xy'adigiıyım xyjottigiıyım yi' yjihui'ñ ymic'ajt nidüg'óciy iich ajt, paady ycıxpi tú'ciy nyajpaatim, com tú'ciy nmi'ijtim Dios yjihui'ñ ymic'ajt.

¹⁴ Tügpı jäy ñinicx miid canaagnax huidibi yu'cxp, huidibi midoob, huidibi ijxp. ¹⁵ Co ixıyipy je tıcy jadu'n ymına'ñ: “Ca'p iich ngıjıty, paady ca' nyajpaadyıch ma je ninicx.” ¿Nej paady ycıxpi ca' yajpaady ma ninicxin? ¹⁶ O co ixıyipy je tädzac ymına'ñ: “Ca'p nhuiinity, paady ca' nyajpaadyıch ma je ninicx.” ¿Nej paady ycıxpi ca' yajpaady ma ninicxin? ¹⁷ Co ixıyipy tüg'óciy je jäy ñinicx y'oc-huin'aty, ¿ma ixıyipy miidity huıdi midooyb? O co ixıyipy tüg'óciy je jäy ñinicx ytädzac'aty, ¿ma ixıyipy miidity huıdibi jëbi miid tijaty xuugyii? ¹⁸ Dios ti pidacı jäy ytecy yhuin y'ahuac etz jac tijaty ma tügpı ninicx jadu'n nej yi' tzojcy. ¹⁹ Pen huıindi'ajty ixıyipy ninicx'ajtp, ¿ti ninicx ixıyipy jada? ²⁰ Dios ti möy nidüg nidüg jäy yci' ytecy, yhuin y'ahuac, yjijpput etz ytädzac, per tügpajc ñinicx'aty.

²¹ Ca' huaad je huin ixıyipy nimäy je ci': “Ca' iich miich nyajmayjaty.” Nañ jadu'n ca' huaad ixıyipy je cohıajc nimay je tıcy: “Ca' iich miich nyajmayjaty.” ²² Tügpı ninicx copıcy ca'pxy tijaty miid. Huıdijaty je ninicx ymiid oy yjaquëxıgy nej jihuıy ca' y'oy'ojadajtnıty, per copıcy yi'. ²³ Jadu'n iich ajt njäy'ajtim. Muım ma ajt nninicx ca' oy n'ijxim, paady nayxoıxim, jigıx jac'oy quëxıgıp. Nañ jadu'n muım ma ajt nninicx huıdi y'oymıdzo'yduıı, paady nyüdzim miid huit, jaydëbi oy quëxıgıty. ²⁴ Muım ma ajt nninicx oy n'ijxim paady ca' nyüdzim miid huit. Jadu'n Dios yaj'oyıy ajt nninicx, jigıx ma ca' oy y'ijxıty, nxoıxim miid huit, jigıx jëbi oy quëxıgy. ²⁵ Jadu'n Dios yajcojy yaj'oyıy ajt nninicx tú'ciy, jigıx ca'ydi ñaychiptúnıgıxy nıje' nıje' huıdibi yücx ma ajt nninicx. Tüg'óciy huıdibi nmiid'ajtim ma ajt nninicx naybubëjtıgıxp miñ xyıpy. ²⁶ Pen pıjcp muım ma je ninicx, tüg'óciy je ninicx jıhuıy je pıjcin. Pen muım ma ajt nninicx ooy capxpaady y'ity, chi tüg'óciy je ninicx jotcuıjc ñayjıhuıyii.

²⁷ Miıch ajcxy nidüg'óciy Cristo xyñinicx'ajtcıxyp, e nidüg nidüg miıch ajcxy myajpatcıxy ma Cristo ñinicx. Jadu'n nidüg nidüg iich ajt nıpaady nej huıdi yücxp ma tüg ninicx. ²⁸ Dios yajñıbicjpy nıje' nıje' mıbijcpıdıjc, jigıx ajcxy yajñıcxıp nidüg nidüg yi' ytung. Tım jayıjp yajñıbijcy je apóstol ajcxy huıdibi je mıjtung yajñıcxıp. E mımetz Dios yajñıbijcy nıjëjıty mıbijcpıdıjc huıdibi najtzcapxııygıxy yi' y'ayuc, je midugıgıpi Dios yajñıbijcy nıje' nıje' je mıbijcpıdıjc huıdibi yaj'ıxpıjcp yi' ytiy'ajt. Dios yajñıbijcy mıbijcpıdıjc nıjëjıty huıdibi mıj huinma'ñ tumb. E Dios yajñıbijcy mıbijcpıdıjc nıjëjıty huıdibi yajtzoocp pa'mjäy. E Dios yhuin'ıjx huıdibi pubejtp ymıgügtıjc. E Dios yhuin'ıjx je mıbijcpıdıjc huıdibi ane'mıp je ymıgügtıjc. E Dios yhuin'ıjx je mıbijcpıdıjc huıdibi jadıp nej capxıp huıngbi ayuc. ²⁹ Ca' nan nidüg'óciy mıbijcpıdıjc huıdibi Dios huin'ıjxyp y'apóstol'ajtcıxy. Nañ ni ca' nan nidüg'óciy ajcxy najtzcapxııygıxy Dios y'ayuc. E nañ ni ca' nidüg'óciy yi' ajcxy mıjhuinma'ñytungıxy. ³⁰ Ca' nan nidüg'óciy mıbijcpıdıjc huıdibi Dios huin'ıjxıp ymiid ajcxy mıc'ajt cötıujc yajtzögıpy pa'mjäy. Nañ jadu'n ni ca' ajcxy nidüg'óciy jajtcıxy nej yajñıguéjıcxıpy huıngbi ayuc. ³¹ Pıjctzoogıx cıxyjot huınijot ma Dios je mıc'ajt etz je huinma'ñ oybi. Iich miıch ajcxy nyajñıxıhuıpy tüg niı'aa tü'aa jac'oybi.

13

Je tzojcin je oyjäy'ajtin

¹ Co ixıyipy ngapxyıch tüg'óciy jäy ajcxy y'ayuc, etz nañ jadu'n ngapxıch ángeles ajcxy y'ayuc, e ca' ndzocyıch ca' njıhuıyıch nmıgügtıjcıch, jadu'n yhuımbıdzımy iich n'ayuc

jadu'n nej tüg tambor o tüg platillo huidibi nigoob ooy ñe'my. ² E co ixypy najtzcapxíyich Dios y'ayuc, etz co ixypy njatyich tüg'óciy ixpíjcin huidibi pinjaty nejhuíy etz huidibi pinjaty ca' nejhuíy, etz co ixypy nmíjpidágyich Dios ymic'ajt, ixti jébi nyajpidígyich tüg cop, pen ca' ndzocyich njihuíyich nmígügtíjich, ca' íich ti ndzoohuíy. ³ E co ixypy nmoydayich ayooobitíjic tüg'óciy tijaty nmíidich, e nañ co ixypy ngíyecyich nninícx ma jäy ajcxy co huen nöctígyodäy, e ca' ndzocyich njihuíyich nmígügtíjich, ni ti oybi ca' nbada'ñich.

⁴ Yi jäy ajcxy huidibi ooy tzocy ooy jihuíy ymígügtíjic, hue' ajcxy ooy mecxtujcin miídity, nañ ooy ajcxy yung naxy yjot yhuinma'ñ. Nañ ca' ajcxy ymígüg ti yajcohuindoyii, e nañ ca' ajcxy ñaygömayii c'i'm. ⁵ Yi mibíjcpídíjic huidibi ajcxy tzojcp jihuíy ymígügtíjic, ca' ajcxy oyñinej ycapxcixy, ca' ajcxy yci'm tzojcin adzip tungixy, nañ ni ca' ajcxy yhuindzipity, nañ ni ca' ajcxy ymígüg mijotma'tcixy. ⁶ Yi mibíjcpídíjic huidibi ajcxy tzojcp jihuíy ymígügtíjic ca' ajcxy yjotcujcity co pinjaty ytundígooy. Jotcujc ajcxy co pinjaty tudägy yjäy'ájtíxip. ⁷ Co naychojcin nayjihuíyim, huin'it yajtunim mecxtujcin, huin'it nmibíjctayim huidíjaty tíy'ajtíp, huin'it nmibíjctaayim co tüg'óciy tijaty oy yhuimbízimípy, huin'it nmecxtujctayim tüg'óciy tzaachypí ayo'n.

⁸ Yi naychojcin nayjihuíyim ca' yi' ycixipy ytígyopy ni mina. Minip je xii tiempo ma ca' y'ocyaj'íjxnípy y'ocyajmídoonípy Dios ycapxy y'ayuc huídi jäy ajcxy ñajtzcapxíyigixyp, nañ ni y'ocyajmídoohuípy pin huingbi ayuc capxp, ni y'ocyajtzocy anajty ti díy'ajt. ⁹ Com ca' yca'pxity je ixpíjcin huidibi íich ajt nmíid'ajtím. Nañ jadu'n ca' yca'pxity je Dios y'ayuc huídi íich ajt nnajtzcapxíyim.

¹⁰⁻¹¹ Per co anajty nmíid'ajtím ca'pxy Dios y'ayuc ytíy'ajt, chi ycixipy ytígyopy je ayuc huídi nmíid'ajtím cham huídi ca' yca'pxity. Co nmutz'ajtyich nbi'c'anäg'ajtyich, jadu'n anajty ngapxyich nmíydágyich n'íyíyich nejtyin pi'c'anäcin. Per co oy nmíj'anäcíyñich, chi n'ixmajtznich je pi'c'anäg'atypí huinma'ñ. ¹² Nañ tím jadu'n nyajnaxim jadachambi xii tiempo ca' n'íjxpíjctaayim, ca' nhuinjihuíydaayim Dios y'ayuc ytíy'ajt. Jadu'n nipaady nej jihuíy nay'a'íjxnaxim ma tüg íjx, huídi ti chíjxni ti yjibicíyñi. Co anajty Jesús yhuimbity jadüg'oc, huin'it huädz nhuinjihuíydaayim Dios y'ayuc ytíy'ajt, com naybadaanim miíd Jesús ahuin ajjip. Jadachambi magama nhuinjihuíyich. Per co nnaybadiybich miíd Jesús, huin'it nhuinjihuíydáhuibich nej Dios y'íxpíjcin miídity, tím jadu'n nej Dios nejhuíydäy nej íich n'íxpíjcin nmíidity. ¹³ Nmibígaanim Cristo huinixii huinítiempo, ca' n'ixmadzaanim nmibíjcin ni mina. Nañ njíjp'íjxim co oybi nbadaanim ma Dios huinixii huinítiempo. Nañ jadu'n ndzojcin njihuíyim mígügtíjic huinixii huinítiempo. Hue' jac nígi copícyip co naychojcin nayjihuíyim ca'ydi jac ti.

14

Co huingbi ayuc yajcapxy

¹ Naychójcigixy nayjihuíyigixy miñ xyipy. Míjottígooygixy nej mbaatcixy Dios yjihuí'ñ ymic'ajt canaagnax. Yi Dios yjihuí'ñ ymic'ajt huídi jac'oybi, yi' je' yejcpy mic'ajt jaydēbi mnajtzcapxíyigixy Dios y'ayuc ytíy'ajt. ² Yi jäy ajcxy huídi Dios ymic'ajt miíd jaydēbi capxy huing ayuc, hue' ajcxy ymígapxyp Dios, e ca' nan jäy, com yi jäy ajcxy ca' nhuinjihuíyigixy je' ajcxy y'ayuc huídi capxp. Je Espíritu Santo yejcp je ayuc ma je huídi capxp. Jadu'n nipaady nej jihuíy ameech je' ycapxy. ³ Pinjaty najtzcapxíyib Dios ytíy'ajt, yi' ycapxhuäcxyp Dios y'ayuc ma yi jäy ajcxy, jaydēbi yujcpedípy ajcxy y'íxpíjcin ma Dios y'ayuc, nañ jadu'n jaydēbi ajcxy yjotmicpígyip etz yjotcugíyigixipy. ⁴ Pinjaty capxp huing ayuc, hue' c'i'm naybubedyii. Pinjaty najtzcapxíyib Dios y'ayuc ma yci'm ayuc, hue' ypubejtyp tüg'óciy yi mibíjcpídíjic.

⁵ Huaad co ixypy nidüg'óciy miich ajcxy mgapxcixy huingbi ayuc. Per jac nígi oy co miich ajcxy mnajtzcapxíyigixy Dios ytíy'ajt, ca'ydi co mgapxcixy huingbi ayuc. Pinjaty huídi najtzcapxíyib Dios y'ayuc, jac nígi oy tuñ, ca'ydi jac pinjaty huídi capxy huingbi

ayuc, pen ca' pinjaty capxticxipy je huingbi y'ayuc, jigix je mibijcpidijc jotcuje'ajtin patcixip. ⁶ Migügtijc ajcxy, co ixypy nnicxyich ma miich ajcxy, e ngapxyich ixypy huingbi ayuc, ¿ti oybi miich ajcxy mbadamyb ma iich? Pen ca' anajty ti pubejtin nduñich ma miich ajcxy, pen ca' nyajnejhuiygixy Dios ytiy'ajt jemybi, pen ca' nyaj'ixpijccixy Dios ytiy'ajt o pen ca' najtzcaxiyich Dios y'ayuc, o pen ca' nyecyich ixpijcin.

⁷ Tzoc ocpidaacim tüg iixpejt ma je xüxy, jadu'n nej je flauti o je arpa. Pen ca' nmido'mbijcim je nota je tono nidüg nidüg, ca' nmido'mbijcim ti pieza ti xüxy yajxuxp o yajcoob. ⁸ Nañ jadu'n co soldados ajcxy chiptunaangixy, pen je trompeta ca' huadz yxüxy, ca' ni tüg soldado ñayñi'ixihua'ñyii ma je tzip ytuna'ñyii yjada'ñyii. ⁹ Nañ tim jadu'n miid miich ajcxy, pen mgapxcixyp huingbi ayuc huidibi ca' pin huinjihuüy, ¿nej yajnejhuüyipy ti miich anajty mgapxyp? Jadu'n je' anajty yhuimbizimni nej nigoob mdim'ixmiydaaccixy. ¹⁰ Janch co ji yajpaady canaagnax ayuc ya naaxhuiñ ac tigachjaty. Etz janch co nidüg nidüg jäy ayuc miidity e ci'm je' ajcxy huinjihuüyigixy. ¹¹ Per pen ca' huinjihuüyich je ayuc huidibi jäy xyajmigapxpich jadu'n iich yi' nyajnaxyich nej agatz. O pen ca', yi' xyajnajxpich nej agatz. ¹² Paady miich ajcxy co ooy mnijot'ajtcixy Dios yjihui'ñ ymic'ajt canaagnax, yajtungix je mic'ajt huidibi pubedam yi mibijcpidijc, jigix yujcpedipy ajcxy ymibijcin etz y'ixpijcin ma Dios y'ayuc.

¹³ Paady pinjaty jajtp nej capxip huingbi ayuc, copicy co Dios mibijctzohuipy co mic'ajt ymöhuiib, jaydebi yajñigüeje je ayuc huidibi ycapxamyb. ¹⁴ Pen nmibijctzooybich Dios miid huingbi ayuc, nmibijctzooybich miid iich n'espíritu, per iich nhuinma'ñ ca' ti jäygidaacin paady. ¹⁵ ¿Ti huaad ndunipyich? Pues copicy nmibijctzooyich n'ojadatyich Dios miid iich njihui'ñich, e nañ jadu'n nmibijctzooyich miid iich nhuinma'ñich. N'ibadaamyich ngapxpadaamyich Dios miid iich njihui'ñich etz miid iich nhuinma'ñich. ¹⁶ Com pen miich mhuin'igixyp mhuingapxtaaccixyp Dios miid yi mjihui'ñ, je migüg huidibi amidoo'ijtp ca' je' huinjihuüy je huing ayuc huidibi mgapxyp, e ca' jebi ymina'nip "jadu'n jada, Amén." Com ca' yi' huinjihuüy ti yi' mgapxyp. ¹⁷ Ca' yjecyity co oyjaty ayuc ti myajtuñ co ti myajnaxy Dioscojuyip ma Dios, per yi mmigüg huidibi ca' huinjihuüy miich m'ayuc ca' yi' ti jäygidaacin paady. ¹⁸ Nyajnajxypich Dioscojuyip ma Dios co nigü njatyich nej ngápxibyich huingbi ayuc, ca'ydi miich ajcxy nidüg'óciy. ¹⁹ Per co nyajpaadyich ma je mibijcpidijc ti ñayyöymújcigixy, jac'oy co ngapxyich migoox ayuc huidibi mibijcpidijc yhuinjihuüyigixyp, ca'ydi co ngápxibich majc mil huingbi ayuc huidibi ca' pin huinjihuüy.

²⁰ Migügtijc ajcxy, ca' ajcxy mmiid'adipy mhuinma'ñ, jadu'n nej pi'ctijc yhuinma'ñ miidity. Ma yi jibicpi huinma'ñ ymiñ naybidägi jadu'n nej ma'xungdijc huidibi ca' ti jibic huinma'ñ huinjihuüyigixy. Miid'adip miich ajcxy oyjot oyhuinma'ñ jadu'n nej mij'anactijc huidibi yhuinma'ñ ti ymejtzni ti yca'pxni. ²¹ Jaybety y'ity ma Dios ycötujcin necy ma Dios jadu'n ymina'ñ: "Nmigapxaamybich je may Israel jäy miid huingbi ayuc, e huingbi jäy najtzcaxihuamb iich n'ayuc ma yi' ajcxy, per ni jadu'n ajcxy xycatuna'ñich cuendi." Jadu'n je Huindzin Dios ymina'ñ. ²² Paady je' je Dios ymic'ajt huidibi yajcapxp huingbi ayuc, yejcp Dios ymic'ajt iixpejt ma yi jäy ajcxy huidibi ca' mibijccixy Dios. Per je Dios ymic'ajt huidibi jäy ymiid co najtzcaxiy Dios ytiy'ajt, yejcp iixpejt ma yi mibijcpidijc, ca' yecy iixpejt ma yi' ajcxy huidibi ca' ymibijccixy. ²³ Ca' yjecyity jadu'n yjadip, co anajty ti ñayyöymújcigixy je mibijcpidijc, e nidüg'óciy anajty ajcxy ytigüygixy capxpi miid huingbi ayuc huidibi ca' pin huinjihuüy, chi ytigühuip ma ajcxy ñayyöymugyii nijejty huidibi ca' ymibijccixy. ¿Ca' yi' ajcxy yminángixyipy co je mibijcpidijc anajty ajcxy ti y'ahuimbijtcixy loci? ²⁴ Pen nidüg'óciy je mibijcpidijc ma je nayyöymujctac najtzcaxiyigixy Dios ytiy'ajt miid yci'm ayuc, e co ytigühuipy pinjaty huidibi ca' ymibicy, e co yi' midohuipy Dios y'ayuc yjihuihuamyb ypocy. E ci'm huinmayip nej anajty ti ytundigooy miid Dios co midohuipy co nidüg'óciy mibijcpidijc anajty najtzcaxiyigixy Dios y'ayuc. ²⁵ E Dios y'ayuc yajnejhuühuib nej anajty ameech ti

ytundigooy jotjoty huinma'ñyjoty. E chi jada' ycojxtinay'ihuñhuipy, e ojadadipy Dios, e nañ jadu'n ymina'nip co janch Dios miich ajcxy xymiid'ijtp.

Tungixy tüg'óciy miid tudägy'ajt etz yajxon

²⁶ Migügtijc ajcxy, ¿ti huaad mdúngixipy? Co mnayyöymújcigixipy, nijéjty miich ajcxy mhuin'ixipy tüg salmo, tüg ayuc huídibi yaj'ixpigamyb, tüg tiy'ajt huídibi Dios ti xyajnejhuñygixy, etz capxip huingbi ayuc, etz capxticxipy nej yhuimbídzimyb je huingbi ayuc. Tüg'óciy jadu'n tungix, jaydēbi ajcxy jäygidägyipy etz yujcpedipy ajcxy ymibijcin huídibi ti ñayyöymújcigixy. ²⁷ Pinjaty capxamb ma je naymujctac miid huingbi ayuc, huen capxy metz o tugiig jäy je'yi, e huindüg padüg huen capxcixy, ca' y'animayity. E pinjaty capxticxamb je' je' yajñiguejip nej yhuimbídzimyb je ayuc tiibi capxcixy. ²⁸ Pen ca' yajpaady ma je nayyöymujctac tüg jäy huídibi capxticxip je huingbi ayuc, jac'oy co ca' ni ti yajcapxipy miid huingbi ayuc, jac'oy co migapxip Dios jotjoty huinma'ñyjoty, e ca' capxip mayjäyjoty. ²⁹ Nañ jadu'n mayjäyjoty jēbi metz o tugiig jäy najtzcaxihuip Dios ytiy'ajt, e yi jacjadyi mibijcpidijc huídibi amido'ijtp, jēbi ajcxy huinmay pen janch Dios je' ytiy'ajt huídibi ajcxy ti najtzcaxiy, o pen ca' je' Dios tiy'ajt'adyii. ³⁰ Pen jim mayjäyjoty jadüg jäy Dios yajnejhuñyii nej ycapxip, nej tiy'ajt najtzcaxihuipy, huen je jäy y'amonipy huídibi anajty jayijp ti ytigiy najtzcaxiyyi Dios y'ayuc ytiy'ajt. ³¹ Jēbi miich ajcxy nidüg'óciy mnajtzcaxiyyigixy Dios ytiy'ajt huindüg padüg, jaydēbi tüg'óciy je mibijcpidijc ixpijccixy Dios ytiy'ajt, e nañ jadu'n jēbi nidüg'óciy yjotmicpíjccixipy. ³² Copicy co yi' ajcxy huídibi najtzcaxiyyb Dios ytiy'ajt, huen ajcxy nay'ané'migix ci'm, e huen capxcixy mina y'ahuaatzcüy. ³³ Dios ca' xyajmidzojcin nicx nhuinma'ñydigooyim, Dios chojcpy co servicio ndunim agujc jotcujc.

³⁴ Jadu'n nidüg'óciy mibijcpidijc ma canaag cajp yminaangixy co ca' huaad töxyjäydijc ycapxcixy serviciojoty, com Dios ti capx'aducy co ajcxy ca' ycapxipy serviciojoty. Copicy co je yēydijc ajcxy ane'mip je servicio, e ca' töxyjäydijc ajcxy huaad ane'mgixy je servicio, com jadu'n Dios ycötujcin ymina'ñ. ³⁵ Pen ñejhuñhuamyb ajcxy töxyjäydijc ti ayuc ti tiy'ajt, jēbi ajcxy ñiyēydijc amidoogixy co anajty ajcxy yhuimbijtcixni ma ytjic, com tzo'ydu'n yejcp töxyjäydijc ajcxy co ycapxcixy serviciojoty.

³⁶ Miich ajcxy hue' mdzachnaybidáacigixy nej jihuñy miich ajcxy jayijp tim nejhuñygixy Dios y'ayuc, ca'ydi jac pin. Miich ajcxy mnaybidáacigixy jadu'n nej jihuñy jimyi jadu'n yajcapxhuäcxy Dios y'ayuc, ca' yjacmaajity. ³⁷ Pen jim pinjaty ma miich ajcxy huídibi naybidaacip nejjuñhuñy Dios ti ymōyii mic'ajt nej jēbi najtzcaxihuipy Dios ytiy'ajt, o ti yhuinma'ñymōyii je Espiritu Santo tijaty tiy'ajt, hue' copicy nañ jadu'n yñejhuñhuipy co je ayuc huídibi iich miich ajcxy nyajnijayiyb, Dios jada y'ane'min ycötujcin. ³⁸ Pinjaty jim ma miich ajcxy huídibi ca' mijpidäga'ñ etz ni ca' cōbiga'ñ je ayuc tiy'ajt huídibi Dios ti xyaj'ane'myich, Dios ca' cōbiga'ñ yjadu'mbi jäy.

³⁹ Com iich jada ayuc nyaj'ixpijcpich, paady cham nimaaybich nmigügtijcich, co huen najtzoigiygixy nej mnajtzcaxiyyigixy Dios ytiy'ajt, e nañ jadu'n ca' mgapx'adújccixipy yi' ajcxy huídibi capxamb huingbi ayuc. ⁴⁰ Hue' janchtiy tüg'óciy tungixy yajxon, etz miid tudägy'ajt, ca' oyñinej mdúngixipy.

15

Co Cristo yjugypijcy jadüg'oc co y'o'cy

¹ Jadügnax, migügtijc ajcxy, ndzojcpich co miich ajcxy mjäyméjtcixipy je Jesucristo y'ayuc ytiy'ajt huídibi ti ngapxhuäcxyich ma miich ajcxy. Je' je' je ayuc tiy'ajt huídibi miich ajcxy ti mgōbijccixy etz huídí ajcxy tudägy mibijccixyp. ² Jēbi ajcxy m'alma ñidzögipy, pen mguydumyb ajcxy iich n'ayuc huídibi ngapxhuäcxyich, e pen ca' anajty ti mmibijccixy.

³ Ti ngapxnaxyich ma miich ajcxy je ayuc huídibi Dios jayijp ti xymōyich, etz ti nyajnimaaygixy huídibi jaccopicyip co Cristo y'o'cy miid ajt nbocy ycixpi, jadu'n nej

Dios y'ayuc ymina'n̄n huidibi jaybety ijtp ma yí' ñecy. ⁴ Chi ajcxy yajnaxtigiiy Jesús, e codugiig xii yí' yjugypijcy jadüg'oc jadu'n nej Dios y'ayuc ymina'n̄n huidibi jaybety ijtp. ⁵ E co je Cristo yjugypijcy, chi ñayguëxici jayijp ma Pedro, e jac'axam ñayguëxici ma yí' jacjadyii ni majmetzpi apóstol ajcxy. ⁶ Jahueeni xii tiempo yjacnicxy co je Cristo oy ñayguëxigyii nañ jadu'n ma migox nimigo'pxnaxy mibijcpidijc tügpi tiempo. E may yijadu'mbi mibijcpidijc jacjagy'ajtni chambaad, etz naagity ajcxy ti y'ó'ccixni. ⁷ Jahueeni xii tiempo yjacnicxy co Cristo ñayguëxici ma Jacobo, etz nañ jadu'n ma nidüg'óciy yí' y'apóstol ajcxy.

⁸ Jac tim axam ñayguëxici je Cristo nañ jadu'n ma iich. Jacjayijp Jesús huin'ijxy yí' jacjadyii apóstol ajcxy, etz jac'axam iich xyhuin'ijxyich. Jadu'n iich nipaady nej tüg jäy huidibi ooy ti ninajxni je tiempo co ti yma'xung'aty. ⁹ Jaccapxpaady yí' jacjadyii Jesús y'apóstol ajcxy ca'ydi iich. Nañ jadu'n ni ca' iich xypaady co jäy ajcxy xytijibich Jesús y'apóstol, miid co ooy ti n'ixhuidityich ti nbahuidityich Dios yjäy ajcxy. ¹⁰ iich nje'ajtpich nej nje'atyich miid co Dios may'ajt miid iich tuñ. Je mijmay'ajt je mij'oy'ajt huidibi Dios ti tuñ miid iich, ca' ñaadig'aty, ti y'oybidzimyb. Nigi mictägy ti nduñich ma Dios ytung, ca'ydi jacpinjaty. Ca' nan co iich ndzachmadägyich ma Dios ytung. Hue' Dios oy xymiid'ityich, etz ooy may'ajt tuñ miid iich. ¹¹ Paady pen ti miich ajcxy mbaady Dios ytiy'ajt ma iich, o ma yí' jacjadyii apóstol ajcxy, ca' ñejity. Je' je' je Cristo y'ayuc huidibi iich ajcxy ngapxhuäcxpich, e nañ Cristo yí' y'ayuc tiibi mmibijccixy.

Co öcypí ajcxy yjugypigipy ajcxy jadüg'oc

¹² Per pen iich ajcxy ayuc ngapxhuäcxpich co je Cristo yjugypijcy jadüg'oc co y'o'cy, ¿na'amy co nijëjity miich ajcxy minaangixy co yí' jäy ajcxy tiibi y'o'ccixy ca' ajcxy yjugypigaangixy jadüg'oc? ¹³ Pues pen janch ca' yjugypigaangixy tiibi y'o'cy, nañ jadu'n ni Cristo ca' ycajyugypijcy jadüg'oc. ¹⁴ Co ixypy yjanchity co Cristo ca' yjugypijcy, nañ tim jadu'n je ayuc huidibi ngapxhuäcxpich ca' ti mic'ajt ixypy miidity. E nañ jadu'n miich ajcxy mmibijcin ca' ixypy chobaady. ¹⁵ Pen tiy'ajt ixypy co je öcpi ca' yjugypigaangixy, huin'it je Dios y'ayuc huidibi ngapxhuäcxpich ixypy yhuimbizimyb anii. Com ngapxhuäcxpich co Dios yajjugypijcy Cristo co y'o'cy, paady pen tiy'ajt ixypy co pinjaty tiibi y'o'ccixy ca' yjugypijcy. Nañ jadu'n ixypy ca' ytiy'ajity co Dios yjugypijcy Cristo. ¹⁶ Pen je öcpidijc ajcxy ca' jugypijccixy etz ca' ajcxy yjugypigaangixy jadüg'oc, nañ jadu'n ni je Cristo ca' ycajyugypijcy jadüg'oc co y'o'cy. ¹⁷ Co je Cristo ca' ycajyugypijcy jadüg'oc co y'o'cy, chi miich ajcxy mmibijcin ixypy ca' choobaady. E ca' miich ixypy ajcxy Dios mbocy xyhuinmecxi. ¹⁸ E pen janch tiy'ajt ixypy co je Cristo ca' ycajyugypijcy, huin'it je mibijcpidijc tiibi y'o'ccixy tigoyaangixy y'alma. ¹⁹ Pen janch tiy'ajt ixypy co nmibijcin Cristo jëyi ma jadachambi tzinaayin ya naaxhuiñ, ca' jac ni ti ixypy njijp'ixim co n'o'cim. Jadu'n iich ajt nipaady nej locijäy, e jäy ajcxy nigi xyñixiicim xyajxiicim, ca'ydi jac ni pin.

²⁰ Per janch co Cristo yjugypijcy jadüg'oc co y'o'cy, je Cristo yí' je' je jayijp jäy huidibi jugypijc jadüg'oc. Co je Cristo yjugypijcy, chi ñicxy jadüg'oc ma Dios yajpaady, e nañ jadu'n miid yí' ycixpi mayjäy yjugypiga'n̄n ajcxy co anajty ti y'öccixy, e yñicxaangixy ma Dios yajpaady. ²¹ Com miid tüg jäy, je Adán, chondacy yí' o'cin ya naaxhuiñ. Nañ tim jadu'n miid tüg jäy, je Cristo, chondacy je jugypijcin co jäy y'o'ccixy. ²² Miid jada ycixpi co Adán ytundigooy oga'n, paady nidüg'óciy jäy patcixy yí' o'cin. Miid jada ycixpi co Cristo yjugypijcy jadüg'oc co y'o'cy, paady nidüg'óciy jäy ajcxy yjugypigaangixy jadüg'oc co anajty ti y'öccixy. ²³ Nidüg nidüg jäy yjugypiga'n̄n jadüg'oc jadu'n nej anajty ñigueegiyii. Cristo ti yjayijp'aty co yjugypijcy. Tüg'óciy yí' jacjadyii jäy ajcxy huidibi mijnicxpejtcixp Cristo, yí' ajcxy jugypigamb jadüg'oc co anajty Cristo yhuimbity ya naaxhuiñ. ²⁴ Co anajty je Cristo yhuimbity ya naaxhuiñ, chi ycixipy ytigoyipy je naaxhuiñybi. Cristo yajtigoyamyb tüg'óciy naaxhuiñyjäy y'ane'min, tüg'óciy naaxhuiñyjäy ycötujcin, etz tüg'óciy naaxhuiñyjäy ymic'ajt. Jesucristo ypijctähuaanip tüg'óciy naaxhuiñyjäy ajcxy y'ane'min, e pidactähuiipy ma Dios y'ane'min, e Dios Teedy je' je'ajttähuiib. ²⁵ E tim

copicy co je Cristo y'ane'mdähuamyb tüg'óciy, ixti cooni Dios anajty ti mimadactäy tüg'óciy Cristo ymidzip, e ti pidactäy anajty ma Cristo y'ane'min. ²⁶ Jesús yajcixamyb yajtigoyamyb jac'axam je o'cin, ca' ni pin yjac'öcniipy. ²⁷ Com Dios ymimadactähuip tüg'óciy je Cristo ymidzip, e pidactähuip ma je Cristo y'ane'min. Per co Dios y'ayuc huidibi jaybety ijtp ymina'n co je Cristo ti mimadactäy tüg'óciy, ca' nan hue' je' yajhuinjihuüy co Cristo ti mimadägy Dios. Com Dios yi' je' huidibi ti mimadactäy, e ti pidactäy ma Cristo y'ane'min. ²⁸ Co anajty Dios mimadactay tüg'óciy pinjaty etz tijaty huidibi mic'ajt miid, e co anajty pidactay ma je Cristo y'ane'min, chi je Dios y'ung ypidactähuipy yi' y'ane'min ma Dios Teedy, etz ane'my yhui'ma'n ma Dios Teedy, je huidibi anajty ti mimadactay. Jadu'n Jesucristo tuna'n, jigix jëbi Dios miid'ajttäy tüg'óciy mic'ajt etz ane'm'ajt.

²⁹ Pen ca' yjadu'nity, ¿na'amy co mdzachniibejtcixy co öcpi tzachcodinaaygixy? Co ixypy ca' pin yjugypiga'n jadüg'oc co anajty ti y'o'cy, ¿na'amy co jäy ñibejtcixy miid öcpi ycixpi?

³⁰ ¿E ti ycixpi co ñich ajcxy nyajpatcixy ayo'nduum jabom jabom? ³¹ Migügtijc ajcxy, janch janch ñich miich ajcxy nimaaygixy co ooy njäygidägyich miich ajcxy. Miid co mmibijccixy je nHuindzin Jesucristo, paady ycixpi ñich miich ajcxy nimaaygixy co jabom jabom nyajpaadyich öcjijp'am. ³² Minaambich jadu'n co ooy nhuindinäy njijptinäyich nmidzip ya Efeso. Tim jadu'n nipaady nej jibic iyujc ahua'n iyujc nhuindinäy njijptinäyich. Pen ca' yjanchity co yi' öcpi ajcxy yjugypigipy jadüg'oc, naadig'i'ajtp ixypy co ñich ayo'n jabom jabom nhuindinäy njijptinäyich. Nig oy co ixypy nyajtüyöyim jadu'n nej ayuc y'ityin: "Tzoc caayim uucim, agujc'ajtim jotcujc'ajtim, com jabom huixtic njugy'ajtin ycixaanim miid yi' o'cin."

³³ Ca' mnayyéjcgixy co pinjaty xyhuin'ingixipy. Jadu'n yjadipy nej y'ayuc y'ityin: "Yi migügtijc ajcxy huidibi jibicjot jibic-huinma'n miid, yajtigooyb ajcxy je oyjot oy-huinma'n." ³⁴ Ixmajtcix jibicjot jibic-huinma'n etz tzinaaygix tudägy ca' mbocytungixy. Nijëjity miich ajcxy ca' mnejhuüiygixy Dios ytiy'ajt. Jadu'n nmına'nñich, jigix ajcxy mdzo'ydu'n mjihuüiygixipy.

Nej ajcxy yi' ögyipi yjugypigipy ajcxy jadüg'oc

³⁵ Ycadimjecyity co nijëjity miich ajcxy xy'amidohuipyich: "¿Ma mic'ajt pátcixipy je o'cpi ajcxy co jëbi yjugypijccixy jadüg'oc? ¿Huidibi ninicx ajcxy ymi'idamyb?" ³⁶ Ca' miich ajcxy ti mhuinjihuüiygixy. Ca' mnejhuüiygixy co je moc tim hidibi mniipcixyp ca' ymuxa'n ixti cooni anajty jayijp ti ypüch. ³⁷ Ca' miich ajcxy mniipcixy je mocquipy. Hue' miich ajcxy mniipcixyp je timmoc o jacjadyii huingbi tim. ³⁸ E co je tim ymuxy, chi Dios möy je ñinicx, tim jadu'n nej Dios jayijp ti huinmay ti tzocy. E Dios nije' nije' je tim möy je ñinicx tigachjaty. ³⁹ Canaagnax ninicx yajpaady ya naaxhuiñ, ca' ajcxy ytügnaxity. Tigach yi' jäy ajcxy miidity ñinicx, tigachjaty iyujc ajcxy miidity ñinicx, nañ tigachjaty joon ajcxy miidity ñinicx, e nañ jadu'n tigachjaty acx ajcxy miidity ñinicx. ⁴⁰ Yi tzajpjoty tzinaayb ajcxy tigachjaty miidity ñinicx, nañ jadu'n hidibi ajcxy tzinaayb naaxhuiñ tigachjaty miidity ñinicx. Yi tzajpjoty tzinaayb ajcxy ñinicx miid tigachjaty y'oy'ajtin, ca'ydi jadu'n nej yi' naaxhuiñ tzinaayb ajcxy y'oy'ajtin. ⁴¹ Yi xii ytiicxin yjajin ca' ñaybadyii miid po' ytiicxin yjajin, nañ tim jadu'n je po' ytiicxin yjajin ca' ñaybadyii miid madza' ytiicxin yjajin. Etz nije' nije' madza' miidity ytiicxin ca' ñaybadyii miid jacjadyii madza' ytiicxin yjajin. ⁴² Nañ tim jadu'n yjada'n miid yi' jäy ajcxy tibi y'o'ccixy co ajcxy yjugypijccixy jadüg'oc. Jäy ajcxy yajnaxtigiy je öcpi naaxnicx hidibi yhuindigoopyy, e yjugypigipy jadüg'oc miid tüg' ñinicx jemybi hidibi ca' yhuindigoya'n nimina. ⁴³ Je öcpi ñaaxnicx co ñaaxtigiy, ca' ti oy'ajtin miidity, e co yjugypijcni jadüg'oc ymiid y'oy'ajtin. Je öcpi ñaaxnicx co ñaxtigiy, ca' ti mic'ajt miidity e chi yjugypijcni mic'ajt miid. ⁴⁴ Co je öcpi ñaaxtigiy, hue' yjugypijcni, miid jemybi ninicx ca'p yaj'ixy. Pen ji yajpaady ninicx hidibi Dios ti yajcojy miid naax, nañ tim jadu'n ji yajpaady ninicx hidibi Dios yajcojpy miid yjihui'n ymic'ajt ca'p yaj'ixy.

⁴⁵ Jadu'n jaybety y'ity ma Dios ñecy ma jadu'n ymína'n: "Je jayijp Adán ymiid anajty jugy'ajtin." Je axambi Adán (je' je' je Cristo) je' tüg espíritu huidibi jugy'ajt yejcp. ⁴⁶ Je huidibi Dios yjihui'n ymic'ajt miid ca' je' yjayijp'ajty, je' jayijp'ajt huidi Dios yajcoj miid naax; jac'axam je' huidibi Dios yjihui'n ymic'ajt miid, je' je' je Cristo. ⁴⁷ Je jayijpi jäy huidibi Dios yaj'oyiy, hue' je' yaj'oyiy miid naax (e yajpaady ya naaxhuiñ). Je mimetzpi jäy huidibi Dios yaj'oyiy, ich ajt nHuindzin Jesucristo, hue' je' chooñ tzajpjoty. ⁴⁸ Je jäy ajcxy huidibi tzinaayb ya naaxhuiñ, yi' ajcxy ñinicx tú'ciy ñaybadyii miid Adán ñinicx huidibi Dios yaj'oyiy miid naax. Yi jäy ajcxy huidibi tzinahuamb tzajpjoty, hue' ajcxy ñinicx tú'ciy ñaybada'nyii miid je Cristo ñinicx huidibi tzinaayb tzajpjoty. ⁴⁹ Jadu'n nej ich ajt, tügnax nguëxícim miid Adán huidibi Dios yaj'oyiy miid naax. Nañ tim jadu'n tügnax nguëxígaanim miid je Cristo huidibi tzinaayb tzajpjoty.

⁵⁰ Migügtijc ajcxy, hue' nnimähuaangixy co je ninicx huidibi miid yxixy etz yñi'py ca' yi' y'ida'n ma Dios y'ane'my. Je ninicx huidibi cixamb tigoymb ca' pada'n it lugar ma yi' ñinicx ajcxy ity huidibi ca' ycixa'n ytigoya'n. ⁵¹ Tungix cuendi jada ayuc, nyaj'ixpigaamybich miich ajcxy tüg tiy'ajt huidibi ca' pin huinjhuüy. Ca' nan nidüg'óciy ich ajt n'ögaanim, per nidüg'óciy ich ajt Dios nninicx xyajtigadzaanim. ⁵² Co anajty Dios yajxüxy yi' ytrompeta, je huidibi anajty cogixiyñip, chi cixipy je naaxhuiñbi. Chi Dios xyajtigadzaanim ajt nninicx tim tzojcyi, tim tüg jaxigy tüg huinmipy. Dios yajxüxamyb yi' ytrompeta, e je jäy tiibi ajcxy y'öccixy jugypigip ajcxy jadüg'oc, e ni ca' mina ajcxy y'öccixniipy. E ich ajt huidibi jacjugy'ajtni Dios ich ajt xyajtigadzaanim nninicx. ⁵³ Com ich ajt nninicx huidibi ögam, huidibi huen tigoymb, copicy ytigadzip, e nmiid'adaanim ninicx huidibi ca' öga'n ca' yhuindigoya'n. ⁵⁴ Co anajty ytigajtzim ajt nninicx huidibi cixamb huindigoyamb, nmiid'ajtim anajty jemybi ninicx huidibi ca' ycixa'n yhuindigoya'n nimina. Co anajty ytigajtzim ajt nninicx huidibi ögam, e nmiid'ajtim jemybi ninicx huidibi ca' y'öga'n, huin'it cuydunipy Dios y'ayuc huidibi jaybety ijtp huidibi jadu'n yminamb: "Co anajty ajt nHuindzin Dios mimadägy yi' o'cin, huin'it cödigooyñip je o'cin (ca' jacpin y'oc'o'cniip). ⁵⁵ ¿Ma yi' o'cin ocjacpada'n mic'ajt co tijy xy'ocjactzaachytunaanim? ¿Ma yi' o'cin ocjacpada'n mic'ajt co tijy xy'ocmimadägaanim?" ⁵⁶ Miid co ti ndundigooyim, paady ycixp o'cin nbaatim. Miid co ca' ti nguydundaayim Dios ycötujcin, paady ycixp o'cin nbaatim. ⁵⁷ Per nyajnajxim Dioscojuyip ma Dios co mijmay'ajt ti tuuñ miid ich ajt ycixpi, e ti nmimadaacim yi' o'cin co ajt nHuindzin Jesucristo y'o'cy miid ajt nbocy ycixpi.

⁵⁸ Paady ycixp, miich ajcxy migügtijc huidibi ooy ndzocy njihuüyich tiydudägy mmibijccix, ca' m'ixtigihuäccixy ma mmibijcin, ca' m'ixmajtzicxy yi' mmibijcin, ca' ajcxy mjetmetzcixygyxy. Tungix jabom jabom ma Dios ytung agujc jotcujc, com mnejhuüygyxyp co ca' ñaadig'i'aty ajcxy mdung ma ajt nHuindzin Jesucristo ytung.

16

Je cuejtin miid je hermano ajcxy ycixpi

¹ Jadu'n nej ymiñ yi' meeñ huidibi miich ajcxy myajmujccixyp miid je mibijcpidijc ycixpi huidibi jim Jerusalén. Cuydungix je tiy'ajt huidibi ti nyaj'ané'mgixyich yi' mibijcpidijc huidibi canaagpicy yajpatp jim Galacia. ² Naag naag domingo, je jayijpi xii ma je semana y'ixtigiy nidüg nidüg miich ajcxy mbidägip abicy hueeni pi'cmeñ, jadu'n nej anajty ii ti mbaatcixy. Je pi'cmeñ huidibi anajty ti myajmujccixy mgüend'ajtcixipy ooy, jigix co ich jim njädip ma miich ajcxy, ca' ycopicyity meeñ myajmújicixipy. ³ E co anajty jim nmechich ma miich ajcxy, miich ajcxy myajniibigipy nijéjity migügtijc huidibi nicxip jim Jerusalén. E ich nguexipyich jada migügtijc jim Jerusalén miid tüg necy etz miid je meeñ huidibi anajty miich ajcxy ti myajmujccixy, jaydëbi yajc'idigihuip je mibijcpidijc jim Jerusalén. ⁴ E pen ooy ytimycopicyity co ich nañ jadu'n nnicxibich jim Jerusalén, jëbi ajcxy ñicxy miid ich.

Pablo huinmay co nicxa'ñ Macedonia

⁵ Co anajty ndübicyich nnicxaambich ma miich ajcxy, jayijp naxihua'ñich Macedonia naaxjot, com copicy jim Macedonia naxihua'ñich. ⁶ Ca' jecyity co nicxy nhui'myich ma miich ajcxy jecy jecy. Ca' yjecyity co nyajnaxipyich tüg'óciy je tichypoje tiempo miid miich ajcxy. Co anajty ndzooñich jadüg'oc ma miich ajcxy, nnícxyich anajty muumjaty, miich ajcxy xytüijjphuohuñhuibich ma ñich anajty nnicxa'ñich. ⁷ Ca' nan tzojccixy n'ida'ñich miid miich ajcxy, hue' jatytimy huäcxibaambich ma miich ajcxy jecy jecy, pen ñich ajt nHuindzin Jesús jadu'n tzojcp. ⁸ Per njac-huäcxibaambich ya Efeso ixti cooni Pentecostés xii anajty ti ñajxtäy. ⁹ Com nmiidich it lugar ya ma jëbi ngapxhuäcxyich Cristo y'ayuc, e mayjäy huidibi mijpidacp ñich n'ayuc, nañ jadu'n mayjäy ya ooy midzip'aty Jesucristo y'ayuc ytiy'ajt.

¹⁰ Co Timoteo anajty yjädy ma miich ajcxy, tungixy may'ajt mgöbñccixipy agujc jotcujc ca' ti mhuinmaaygixy, com Timoteo tumb ma ajt nHuindzin Jesucristo ytung tim jadu'n nej ñich nduñich. ¹¹ Paady ycixp ca' huaad miich ajcxy Timoteo mga'oy'ixipy etz mdüijjphuohuñhuipy, jaydëbi ca' ti jotmay miid'adipy etz yjactüyöyip agujc jotcujc, e ymedzipy ya Efeso ma nyajpaadyich. Com njijp'ijxypich co Timoteo xyñijädibich quipxyi miid jacjadyii mibijcpidijc.

¹² Jadu'n nej yjajti miid ajt nmigüg Apolos. May'ajt nbijctzoohuich ma Apolos co yi' miidnicxip nijëjity jacjadyii migügtijc huidibi nicxamb ma miich ajcxy. Per ca' yi' yjotcujcity co ñicxip jadachambi tiempo. Hue' janchtiy jacjiini yñicxipy, pen yaj'ahuätzciyb anajty.

Capxpocxin huidibi cijxnip je necy

¹³ Ni'ixi m'idipy ajcxy ma mmibijcin. Naygüend'ájtigix ma mmibijcin. Tiydudägy ajcxy mmibigipy, ca' m'ixtigihuäccixy ma mmibijcin. Naybidáacigix huinmic jotmic ma mhuinma'ñ. Mic m'idipy ajcxy ma mmibijcin. ¹⁴ Tüg'óciy tijaty ajcxy mdungixy, tungixp miid tzojcin jihuiyin etz oyjäy'ajtin.

¹⁵ Migügtijc ajcxy, mnejhuñiyb jadu'n nej Estéfanos miid yjugymigüg ti mibijccixy Jesucristo y'ayuc. Yi' je' jayijp ajcxy mibijcp jim Acaya, e ti yhuinma'ñypidaaccixy co ypubedamyb ajcxy yi' mibijcpidijc. ¹⁶ May'ajt nbijctzooybich ma miich ajcxy co myajmij'ájtccixipy Estéfanos, etz jac pinjaty huidibi pubejtp je mibijcpidijc etz huidibi ajcxy tumb Dios ytung. ¹⁷ Ooy njotcújcidyich co Estéfanos, Fortunato, etz Acaico ti ymiñ ma ñich ajcxy ya Efeso. Yi' ajcxy xymiid'ijtpich, com ca' anajty y'oyñ nej nmiid'idipyich miich ajcxy. ¹⁸ E yi' ajcxy ti ooy xyajjotcugiyich, e nañ jadu'n miich ajcxy ti mjotcugiygixy co yi' ajcxy ymiñ ma ñich. Paady ycixp copicy co miich ajcxy myajmij'adip yi' ajcxy etz jacjadyii tim jadu'n nej yi' ajcxy.

¹⁹ Yi' mibijcpidijc huidibi canaagpicy ya Asia naaxjot yquejxyp ajcxy capxpocxin ma miich ajcxy. Aquila etz Priscila etz yi' mibijcpidijc huidibi ajcxy yöymujcip ma Aquila ytijc yquejxp ajcxy capxpocxin ma miich ajcxy ma ajt nHuindzin Jesucristo yxi. ²⁰ Tüg'óciy je mibijcpidijc huidibi ya Efeso yquejxp ajcxy capxpocxin ma miich ajcxy. Naygapxpócxigixy miich ajcxy xic xon.

²¹ ñich, Pablo, njaaybich miid ngi'mgi' ngi'mletra jada capxpocxin huidibi nguejxypich ma miich ajcxy. ²² Pen jim pinjaty ca' mijpidägy ñich ajt nHuindzin Jesucristo, huen Dios yajtigooyip ajcxy y'alma. ¡Maranata! Huen tzojc yminiipy ajt nHuindzin Jesucristo.

²³ Huen ajt nHuindzin Jesucristo oy'ajt may'ajt tunipy miid miich ajcxy etz xyconuucxip ajcxy. ²⁴ Ndzocypich njihuñiybich miich ajcxy nidüg'óciy huidibi yajpaady ma Jesucristo. Jadu'n jada. Amén.

2 CORINTIOS

Yi Mimetz Neczy Huidibi San Pablo Yajniejx Je Mibijcpidijc Jim Corinto

¹ Hich Pablo, Dios jadu'n ti tzocy, paady ycixpi Jesucristo ti xyajñibicyich co ngapx-huäcxibich yi' y'ayuc. Hich miid ajt nmigüg Timoteo nguejxypich jada necy ma je mibijcpidijc jim Corinto. Nañ jadu'n nguejxypich jada necy ma tüg'óciy je mibijcpidijc majaty je cajp huidibi yajpatp jim Acaya ñaaxjot. ² Huen Dios Teedy etz ich ajt nHuindzin Jesucristo may'ajt oy'ajt tunipy miid miich ajcxy etz xyajjotcugüygixip.

Nej Pablo yajty y'ayoy

³ Tzoc yajnajxim Dioscojuyp ma Dios, je nHuindzin Jesucristo yTeedy, je Dios Teedy huidibi ajt xypa'ayoohuim, je Dios huidibi yejcp jotcujc'ajtin. ⁴ Dios xyajjotcugüyim co nminajxim nyajnajxim tzaachypi ayo'n jigix jébi nyajjotcugüyim jacpinjaty huidibi minajxp yajnajxp tzaachypi ayo'n. Tim jadu'n nej ich ajcxy ti nbaady jotcujc'ajtin ma Dios, nañ tim jadu'n yi' ajcxy padañ jotcujc'ajtin ma Dios huidibi minajxp yajnajxp tzaachypi ayo'n. ⁵ Com tim jadu'n nej ich ajt nminajxim nyajnajxim tzaachypi ayo'n miid Cristo ycixpi, nañ tim jadu'n miid Cristo ycixpi nbaatim jotcujc'ajtin. ⁶ Paady ycixpi ich ajcxy nminajxcixy nyajnajxcixy tzaachypi ayo'n, jaydëbi miich ajcxy mbaadip jotcujc'ajtin etz nañ jadu'n ypaadip ajcxy m'alma ñidzoocin. Dios yejcpy jotcujc'ajtin ma miich ajcxy, jaydëbi miich ajcxy mbaadip jotcujc'ajtin etz nañ jadu'n ñidzögip ajcxy yi' m'alma. E co ajcxy mbaadip jotcujc'ajtin etz ajcxy m'alma ñidzoocin, chi jébi miich ajcxy mmimadägip etz mmecxtugip tzaachypi ayo'n, tim jadu'n nej ich ajcxy nmimadägy etz mmecxtüjccixich tzaachypi ayo'n. ⁷ Jotcujc nayjihuiyijich miid miich ajcxy ycixpi, com njjip'ixpich co mmadägipy ajcxy ma mmibijcin. Com nejhuiybich co miich ajcxy nminajxyp myajnajxyp tzaachypi, tim jadu'n nej ich ajcxy nminajxcixy nyajnajxcixy tzaachypi. E nañ jadu'n Dios yejcpy jotcujc'ajtin ma miich ajcxy, tim jadu'n nej yecy jotcujc'ajtin ma ich ajcxy.

⁸ Migügtijc ajcxy, ich ajcxy ndzojcpich co miich ajcxy mnejhuihuip jadu'n nej canaagnax tzaachypi ayo'n ti nminaxyich ti nyajnaxyich jim Asia naaxjot. Jayin jahueeni ti ngamimadäga'ñich. Ca' anajty njjip'ixyich co nbidzimipyich juugy ma je jimbi it lugar. ⁹ Jadu'n ich ajcxy nnayjihuiyii nej jäy ajcxy huidibi yajpatcixp o'cjijp'am. Jadu'n ti njatyich, jigix jébi n'ixpicyich nej ich huaad ñigi Dios nyajmij'atyich, je Dios huidibi yajjugypigip yi' jäy ajcxy tiibi y'öccixy. E ca' nan ngi'm mic'ajt nmijpidaacpyich. ¹⁰⁻¹¹ Ti ich ajcxy Dios xyñihua'ñ xycohua'ñ, e xyjacnihua'naamb xyjaccohua'naambich ajcxy ma yi' jäy ajcxy huidibi xyaj'ögaambich ajcxy. E co miich ajcxy xypubejtyich, copicy co jacmibijctzoogix Dios miid ich ycixpi. Njjip'ixypich co Dios yi' xyjatyimy xyñihua'naambich xycohua'naambich. E pen mayjäy Dios mibijctzoogixy miid ich ycixpi, nañ jadu'n yajnájxcixyipy ajcxy jäygidaacin ma Dios miid je may'ajt oy'ajt ycixpi huidibi Dios ytumyb miid ich ajcxy.

Ti Pablo co yhuäcxijpy, ca' chojc nicxy jim Corinto

¹² Jotcujc nayjihuiyijich miid jada ycixpi com nejhuiybich co ti ndzinäyich miid tudägy'ajtin etz miid oyjot oyhuinma'ñ miid yi' mayjäy ajcxy canaag agajp etz jacniği ma miich ajcxy. Dios miid may'ajtin oy'ajtin ti xypubetyich co tudägy ti ndzinäyich, e ca' nguyduñich ngi'mjot ngi'mhuinma'ñich ma ndzinäyinch. ¹³ Hich miich ajcxy nyajnijayiyb je ayuc tiy'ajt huidibi miich ajcxy jébi mgapxcixy etz mhuinjihuiyigixy. E nañ jadu'n njjip'ixypich co miich ajcxy mhuinjihuihuipy ich n'ayuc tüg'óciy. ¹⁴ Jadu'n nej miich ajcxy cham cujc-huäcxu mhuinjihuiyigixy ich n'ayuc ndiy'ajt. Jacjiini co anajty je xii je tiempo ymiñ co ajt nHuindzin Jesús y'ane'ma'ñ ya naaxhuiñ, chi miich ajcxy jotcujc mnayjihuihuiyb miid ich ycixpi. E nañ tim jadu'n nej ich ajcxy jotcujc nayjihuihuiyb miid miich ajcxy ycixpi.

¹⁵ Com nejhuiybich co miich ajcxy xychojcpich xyjihuiybich, paady ycixpi nhuinma'n nbidägyich co nicxy n'ixaangixy miich ajcxy jadüg'oc, e jadu'n nya-jjotcugihuaangixich miich ajcxy mejtz'oc. ¹⁶ Jadu'n nhuinma'n ti nbidägyich co nnicxa'nich Macedonia. Per jayijp nnaxa'nich ma miich ajcxy mgajp. E co anajty ndzooñich Macedonia, jadüg'oc nnicxa'nich ma miich ajcxy. E jadu'n jëbi miich ajcxy xytüjijphuohuïhuibich co anajty nnicxyich jim Judea. ¹⁷ ¿Nej mdiy, co ñich aametz jotmetz nduñich co ca' ti nnicxyich ma miich ajcxy nej anajty ti nmına'nich? ¿Nej mdiy, nhuinma'n miididyich jadu'n nej naaxhuñyjay huïdibi minamb co ñicxa'n, e chi ca' ñicxni? ¹⁸ Per Dios jëbi tiy'ajt yegipy co je ayuc tiibi nyajnimaaaygixy, nguydunipyich yi'. ñich n'ayuc janch yi'. ¹⁹ ñich miid Silvano etz Timoteo ngapxhuäcxixyich Cristo Jesús y'ayuc, je Dios y'ung. E Cristo Jesús y'ayuc janch yi', ycuydumyb je' y'ayuc, tudägy je' ycapxy. ²⁰ Tüg'óciy je ayuc huïdibi Dios yejc jecy'ajty miid ñich ajt ycixpi, hue' Cristo Jesús cuydundaayb. Paady co ngapxpaatim n'ojadajtim Dios, chi nmınaanim. "Amén, jadu'n jada," com Cristo Jesús ti cuydundäy Dios y'ayuc. ²¹ Com je' je' Dios huïdibi xyajmibijcim Cristo, e Dios huïdibi xyajmiid'ijtim Cristo. Jadu'n Dios ytuñ miid ñich ajcxy etz nañ jadu'n miid miich ajcxy. Je' je' Dios huïdibi xyajmibijcim etz xypidaacim tügjijp ma yi' ytung. ²² Dios ti pidägy ma ajt njot nhuinma'n je tiy'ajt co nyajpaatim ma Cristo Jesús. Co Dios xy'adigiyim xyjottigiyim yi' yjihui'n ymic'ajt, chi tiy'ajt yecy co nyajpaatim ma Cristo Jesús.

²³ Dios jëbi tiy'ajt yegipy co miid tudägy njot nhuinma'n nmiydacyich co ca' jadüg'oc nnicxyñich ma miich ajcxy mic'amy, jadu'n nej anajty nhuinma'n ti nbidägyich, miid co ca' ndzocyich nicxy n'ojcixy huin jijp. ²⁴ Ca' nnicxa'nich mic'amy ma miich ajcxy, com ca' adzip nyajmibigaangixy miich ajcxy huïdibi copicy ajcxy mmibigipy. Miich ajcxy tiydudägy ti mmibijccixy. Jëyi co nbubedaangixy jaydëbi ajcxy nigí jotcujc'ajt mmid'adipy ma ajcxy mdzinaayin mjugy'ajtin.

2

¹ Paady ycixpi jadu'n nhuinma'n ti nbidägyich co ca' nnicxa'nich mic'amy jadüg'oc ma miich ajcxy, miid co miich ajcxy nyajtajipy nyajmayipy co ngapxhuijyich miid ajcxy mbocy ycixpi. ² Com pen ñich miich anajty ajcxy nyajtajpy nyajmaayb, ¿pin jada' ñich xyajjotcugihuibich? Pues miich ajcxy huïdibi tajp mayb, miich ajcxy xyajjotcugihuibich. ³ Paady ycixpi ti nnijayiygixy jadu'n co ca' nnicxa'nich mic'amy ma miich ajcxy, com ca' jadu'n ndzocyich co ñich miich ajcxy nyajtajipy nyajmayipy. Jac'oy co ñich miich ajcxy nyajjotcugihuiipy. Com nejhuiybich co ñich jotcujc nayjihuiyijich miid miich ajcxy ycixpi. Nañ jadu'n miich ajcxy jotcujc mnayjihuihuïyb co mnejhuïhuipy co ti njotcugihuibich miid miich ajcxy ycixpi. ⁴ Co ti njayich je necy huïdibi ti nguexyich ma miich ajcxy, ooy mij jotmay ti njihuiyich, ixti nyaaxich. Per ca' nan paady ycixpi ti njaayich je necy co nyajtajaangixy nyajmayaangixy. Hue' janchtiy ti njaayich je necy jaydëbi mnejhuiygixy co mijcajee ndzojccixy njihuiygixy.

Meecxin ma je pin anajty jibicpi ti tuñ

⁵ Per pen jim ma miich ajcxy pinjaty ti yecy tajin mayim co ti ytundigooy, pues ca' nan ñich tügpajc tajin mayim jihuiybich. Nañ jadu'n miich ajcxy nidüg'óciy mjihuiygixyp tajin mayin. Jadu'n nmına'nich co huenjaty tajin mayin miich ajcxy mjihuiygixy, jigix ca' anaxy ajcxy nyajtajip nyajmayip. ⁶ Yajhuäcxijp je tzaachypi huïdibi miich ajcxy mooyb je migüg huïdibi ti ytundigooy. Ti miid jadu'ni. ⁷ Jadu'n tzocy cham co miich ajcxy meecx je migüg jadu'n nej ti ytundigooy, etz nañ jadu'n ajcxy myajjotcugihuiipy. Ca' yjecyity co je migüg anaxy oy jihuihuip tajin mayin. ⁸ Paady ycixp may'ajt nbijctzooyich ma miich ajcxy co myajniguëxigipy ajcxy co mdzocy mjihuiy ajcxy je migüg huïdibi ti ytundigooy. ⁹ ñich miich ajcxy ti nijayiy jayhuin miid je migüg ycixpi huïdibi ti ytundigooy, jigix jëbi nnejhuiyich, pen mguydumyb miich ajcxy ñich n'ayuc, o pen ca' mguydungixy. ¹⁰ Jadachambi co pinjaty ti ytundigooy ma miich ajcxy, e miich ajcxy

mhuinmecxi yi' ypocy, nañ jadu'n nhuinmeecxip iich yi' nej ytundigooy. Com iich co nhuinmeecxyich tüg nmigügich nej ti ytundigooy, jadu'n nduñich miid miich ajcxy ycixpi, com Cristo y'ijxyp ñejhuüyb tüg'óciy tijaty nduunim. ¹¹ Jadu'n nhuinmeecxim nmigüg ypocy, jigix Satanás, je mujcu', ca' xymimadaacim. Nejhüüym yajxon nej Satanás mañ'ajt miidity.

Pablo ca'p anajty yjotcuyc'aty jim Troas

¹² Co nja'tyich ma je cajp huidibi xiijip Troas, chi ngapxhuäcxa'ñich anajty Cristo y'ayuc ytiy'ajt, etz mij ooy tigiydac nbatyich, nej jëbi nduñich ma ajt nHuindzin Jesucristo ytung. ¹³ Per ca' anajty jotcuyc nayjihüüiyijich. Com ca' nminaybatich je iich ajt nmigüg Tito jim Troas. Paady ycixp ngapxycijxyich miid je miijcpidijc ajcxy jim Troas, e nnicxyich jim Macedonia ñaaxjot.

Madaacim ma Cristo

¹⁴ Nyajnajxypich jäygidaacin ma Dios co miid Jesucristo ymic'ajt jatytimy nmimadacypich jabom jabom tüg'óciy huidibi xymidzip'ajtpich ma tüg'óciy naax cajp. Nañ jadu'n Jesucristo ti xymöyich yi' y'ayuc huidibi ngapxhuäcxypich ma tüg'óciy naax cajp. Je mayjäy ma canaag cajp ooy jäygidaaccixy Cristo y'ayuc. Co ngapxhuäcxich Jesucristo y'ayuc xi ya, jadu'n nipaady nej tüg xuucin huidibi ooy oy xuugy, e y'abojjy xi ya. ¹⁵ Co ngapxhuäcxych Cristo y'ayuc ma yi mayjäy huidibi padamb ajcxy y'alma ñidzoocin ooy Dios jäygidägy. E ñañ jadu'n Dios ooy jäygidägy co ngapxhuäcxych Cristo y'ayuc ma yi jäy ajcxy huidibi ajcxy y'alma tigoyaamb. Jadu'n iich ajcxy ndung nipaady nej jihüüy nboomjójcixich jabom jabom ma Dios yhuinduu miid Cristo ycixpi. ¹⁶ Pinjaty mijpidacp Cristo y'ayuc huidibi ngapxhuäcxypich, hue' je' y'alma nidzögamb. E pinjaty ca' mijpidägy Cristo y'ayuc, hue' je' y'alma tigoyaamb. Ooy chachchipity chachmijhuinma'ñity iich ajcxy ndung. ¹⁷ Ca' iich ajcxy nduñ jadu'n nej jacnaagity ajcxy huidibi Dios y'ayuc mihuidijtip meeñgixy. Cixyjot huinjot iich jäy nyaj'ixpijccixy Dios y'ayuc ytiy'ajt. Com Dios ti xyajniñicyich co yi' y'ayuc ngapxhuäcxich. Miid co nyajpaatim ma Cristo, paady ycixp nduunim jadu'n nej jihüüy nyajpaatim jabom jabom ma Dios yhuinduu.

3

Je jemybi ayuc tiy'ajt huidibi Dios xymooyim

¹ Co jadu'n nmina'ñich ¿nej m'ijxcixy nej jihüüy huinjemy nyajtzondäga'ñich ayuc co ndzachnaymayáanigixyich ci'm? ¿Nej mdzojccix co ajcxy nyaj'ixipy tüg tiy'ajt necy co nduñich ma Dios ytung? o ¿Nbijctzohuipich tüg tiy'ajt necy ma miich ajcxy, jadu'n nej nijjity jäy ytungixy? ² Ca' iich ajcxy ndiy'ajt necy ycopicyity. Com jëbi yi mayjäy ajcxy tiy'ajt pigipy ma miich ajcxy mdzinaayin mjogy'ajtin co tudägy ti nyaj'ixpicyich miich ajcxy Dios ytiy'ajt. Jadu'n miich ajcxy nipaady nej iich ajcxy ndiy'ajt necy yjaayity ma iich ajcxy njot nhuinma'ñ. E jadu'n jäy ajcxy ijxcabipy etz huinjihüühuipy. ³ Cristo ci'm ti pidägy yi' ytiy'ajt ma miich ajcxy mjot mhuinma'ñ miid je ayuc huidibi ti ngapxhuäcxych ma miich ajcxy. Jadu'n miich ajcxy nipaady nej tüg tiy'ajt necy huidibi Cristo ti jaay. E huidibi iich miich ajcxy ti nyaj'ijxcixy ti nyajniimaaygixy. Miich ajcxy ca' jadu'n ocpaatni nej tüg tiy'ajt necy huidibi jäy ti jay miid tinta. Nañ jadu'n ni ca' yjējity je tiy'ajt huidibi cojayip ma tüg tzaadzech. Hue' miich ajcxy janch nipaady nej tiy'ajt necy huidibi je Dios jugypí yjihui'ñ ymic'ajt ti jaay ma jäy ajcxy yjot yhuinma'ñ.

⁴ Nejhüüybich tiydudägy co janch tiy'ajt nej nmina'ñich co Cristo ti xyajniñicyich jada tung miid Dios ycixpi. ⁵ Ca'p iich ajcxy jëbi ci'm madägy ma Dios ytung. Tüg'óciy mic'ajt etz tiy'ajt jilby nbáatcixyich ma Dios, huidibi miid jëbi ndúungixich yi' ytung. ⁶ Dios ti xymóoygixyich mic'ajt co ndunipyich ajcxy ma yi' ytung. Dios ti pidägy ma iich ajt jemybi ayuc tiy'ajt, huidibi miid xy'ane'mim. Jada jemybi ayuc tiy'ajt je Espíritu Santo pidaacp ma ajt njot nhuinma'ñ. E ca' je' yjadu'nity nej je ayuc tiy'ajt huidibi Moisés

yjayhui'm jecy'ajty. Miid je Moisés y'ayuc huidibi jaybety ijtp, Dios xymooyim je o'cin. Miid je jemybi ayuc tiy'ajt huidibi je Espíritu Santo yejcpy, Dios xymooyim jugy'ajtin huidibi ca' ycixipy ytigoyipy ni mina.

⁷⁻⁸ Je Dios ycötujcin huidibi Moisés yjayhui'm hue' jaybejty oga'n ma tüg tzaa. E je huin'it tiempo ooy Moisés anajty yhuiñyjip mic y'adicxy miid Dios y'oy'ajtin. E je Israel jäy ajcxy ni ca'p je' anajty huaad y'ijxcixy Moisés yhuiñyjip, co anajty ooy mic chach'adiicxy. E jada Dios y'oy'ajtin huidibi Moisés ymiid, ca' jecy y'ijty. Hue' je' tigooyñip anajty oñydägy'amy. Per pen Dios yaj'ijxip anajty yi' y'oy'ajtin co Moisés moy je jäy ajcxy je Dios ycötujcin huidibi ane'm yi' o'cin, niigi mi'idipy Dios y'oy'ajtin je jemybi ayuc tiy'ajt huidibi je Espíritu Santo xymooyim. ⁹ Pen mij anajty oy'ajtin miidity je cötujcin huidibi tuuñ co y'ane'my ma iich ajt nbocy n'o'cin. Niigi mij'oy'ajtin miidity Dios y'ayuc ytiy'ajt je jemybi huidibi minaamb co Dios jëbi xyaj'ahuimbijtim tudägy. ¹⁰ Jëbi nmínaaním co je jécyip cötujcin y'oy'ajtin ca' yi' ytimytiijity co nyajquipxyihuaaním miid je jac'oybi oy'ajtin huidibi Dios y'ayuc ytiy'ajt jemybi ymiid. ¹¹ Com pen ymiid oy'ajtin je cötujcin huidibi ymic'ajt ca' y'ida'ñ huinixii huinitiempe, niigi oy'ajtin miidity Dios y'ayuc ytiy'ajt jemybi huidibi ca' ycixipy ytigoyipy nimina.

¹² Miid co njijp'ijxim je oy'ajtin huidibi Dios xymöhuaaním miid je jemybi y'ayuc, paady ycixp ngapxhuäcxim Dios y'ayuc huinmic jotmic. ¹³ Ca' jadu'n nduuním nej Moisés idiich jecy'ajty co anajty miidity yhuiñyjip huingobe'nüy, jigix ca'ydi Israel jäy ajcxy ixu nej je' anajty ytigoy je Dios y'oy'ajtin huidibi anajty quëxícip ma je' yhuiñyjipin. ¹⁴ Per yi' Israel jäy jecy'ajty ca' ajcxy yajxon huinjihuüy ti anajty Dios ytumyb miid Moisés, ixti chambaadni yi' Israel jäy ajcxy ca' yajxon huinjihuüygixy co ajcxy capxcixy je ayuc huidibi Moisés yjayhui'm. Jadu'n nipaady nejjihuüy Moisés chambaadni y'ityñi huingobe'nüy. Co ajcxy mibigipy je Cristo, huin'it ajcxy huinjihuüipy, e jadu'n je' paadipy nej jihuüy Moisés ti ñayhuingobe'ndüdyii. Co yi' Israel jäy ajcxy mibjccixipy Cristo, e ijxip ajcxy Dios y'oy'ajtin, huin'itni ajcxy huinjihuüipy Dios y'ayuc ytiy'ajt je jécyip. ¹⁵ Ixti chambaadni co yi' Israel jäy ajcxy capxcixy je migooxpi libro huidibi Moisés yjayhui'm, ca' ajcxy huinjihuüiyi yajxon Dios y'ayuc, jadu'n nipaady nej ajcxy yhuinma'ñ ymädity. ¹⁶ Pinjaty jothuimbijtp, e mibicy iich ajt nHuindzin Jesucristo, oyñyñip yi' yhuinma'ñ, e yhuinjihuüipy Dios ytiy'ajt. ¹⁷ Je Huindzin Jesucristo, yi' je' Dios yjihui'ñ ymic'ajt ymiid. E ma Dios yjihui'ñ ymic'ajt yajpaady, Dios yi' yi' jadu'mbi jäy ajcxy yajnihuätzictutp ma yi' Dios ycötujcin je jécyip. ¹⁸ Paady ycixp tüg'ócüy iich ajt jadu'n nipaady nej tüg'ijx ma nni'ijxim ajt nHuindzin Jesucristo y'oy'ajtin. Com ca' jadu'n patni nej jihuüy n'ijtim huingobe'nüy. E nañ jadu'n iich ajt njacyujcpejtim n'oy'ajtin, jaydëbi nguipxyjatytiiyim miid Cristo. Com jabom jabom iich ajt niigi nbaatim n'oy'ajtin ma Cristo. Jada je' huidibi je Dios yjihui'ñ ymic'ajt ytumyb ma ajt njot nhuinma'ñ. E iich ajt nHuindzin Jesucristo ti pidägy Dios yjihui'ñ ymic'ajt ma ajt njot nhuinma'ñ.

4

¹ Com Dios ti xypa'ayooyich, e ti xyajni'bicyich co ngapxhuäcxibich yi' y'ayuc ytiy'ajt jemybi, paady ycixp ca' njotmetzcüyich. ² Per ooy ti njijpcodijñygixyich ti njijpcogapxiigixyich yi' jäy ajcxy y'ayuc huidibi ajcxy ytungixyp etz ycapxcixpy ayüch ameech, etz huidibi oymidzöyduuni. Ca' iich ajcxy ti nduñich miid jibic-huinma'ñ. Nañ jadu'n ni ca' nyajtigájtzcixich Dios y'ayuc. Hue' janchtiy ngapxpich ajcxy huidibi janchip. Jadu'n nyaj'ixpíjccixyich yi' jäy ajcxy, jaydëbi ajcxy jotcujc ñayjihüüygixy ma Dios yhuinduu. ³ Yi' jäy ajcxy huidibi nicxy y'alma ytigoyaangixy ca'oydactuuby, ca' ajcxy huinjihuüy Dios y'ayuc oybi nej jëbi ajcxy y'alma nidzögipy. Jada je' je ayuc huidibi ngapxhuäcxipich. Pinjaty ajcxy y'alma nidzögip yhuinjihuüyb ajcxy jada ayuc. ⁴ Yi' ajcxy huidibi y'alma tigoyaaniip ca' mibjccixy Dios y'ayuc, com Satanás huidibi ane'mb ya naaxhuiñ ti yajmädyii ajcxy yhuinma'ñ. Ca' je' ajcxy huinjihuüy Cristo y'ayuc oybi. Cristo tú'cüy yaj'ixy, tú'cüy mic'ajt miidity, nej Dios yaj'ixy nej Dios mic'ajt miidity. E

Cristo y'ayuc jadu'n nipaady nej tüg mjiitcxin huidibi Satanás ti ahuijztucy ca'ydi yticxy ma je' ajcxy. ⁵ Co iich ajcxy ayuc ngapxhuäcxyich, ca' iich ajcxy ngapxhuäcxy ngi'm'ayuc ngi'mdiy'ajt. Hue' iich ajcxy ngapxhuäcxy Jesucristo y'ayuc ytiy'ajt. Ngapxhuäcxyich ajcxy co Jesucristo ñihuindzin'ajttaayb tüg'óciy. E nañ jadu'n ngapxhuäcxyich ajcxy je tiy'ajt co iich ajcxy jadu'n naydijiiygixyich nej jihuüy miich ajcxy xytumbi'adyii miid Cristo ycixpi. ⁶ Je Dios huidibi jecy'ajty ane'm co huen tiicxin ji'aty huidibi codiicxip ma ycoodzity, yi' ti xymooyim y'ayuc ytiy'ajt. Yi' y'ayuc tim jadu'n nipaady nej tüg tiicxin nmiid'ajtim ma ajt njot nhuinma'ñ, jigix jëbi n'ijxim je Dios y'oy'ajtin huidibi quëxícip ma Jesucristo yhuifijjip.

Je jugy'ajtin co nmibijcim

⁷ Je Dios y'oy'ajtin oybi nmiid'ajtim ma ajt njot nhuinma'ñ, iich ajt ca' ni ti mic'ajt nmiid'ajtim ma ajt ngi'mjot ngi'mhuinma'ñ. Jadu'n Dios pidägyñi yi' y'oy'ajtin ma iich ajt, tim jadu'n nej jäy ajcxy pidaaccixy pi'cmeëñ ma pi'c'idzimboch. ⁸ Oy iich ajcxy nminaxyich nyajnaxyich may ayo'n, per ca' ndajy nmayich ajcxy anaxy. Ooy nhuinmay'ahuidijtcixyich miid je tzaachypi ayo'n ycixpi, per ca' nhuinma'ñyidigóoygixyich. ⁹ Oy iich ooy nmidzip xy'ixhuidityich xypahuidityich, per Dios ca' xy'ixmachich. Canaag'oc iich nmidzip ti xycujy ti xyjibipyich. Per ca' iich njugy'ajtin ti ytigooy. ¹⁰ Hueñyama'amyity nhuidityich ajcxy nmiidich je tzaachi'au ma nnin'cxich, ma jäy ajcxy ti xychaachtúungixich. Je' je' je' ijxpejt co nhuidityich o'cin jijp'am, tim jadu'n nej Jesús anajty huidity o'cin jijp'am. Ngöbijcypich jada tzaachypi, jigix tüg'óciy jäy ajcxy nejhuifuij co Jesús xypubejtpich xypudigiiybich. ¹¹ Nami jacjugy'ajtnich ajcxy, o'cjijp'am iich ajcxy nhuidijtcixy jabom jabom miid Jesús ycixpi, jigix jëbi tüg'óciy jäy ajcxy nejhuifuij co Jesús xypubejtcixyp xypudigiiygixyp. ¹² Jadu'n ndzinäyich o'cjijp'am, jigix miich ajcxy miid'adip jugy'ajtin huidibi ca' ycixipy ytigoyipy.

¹³ Jaybety ymiñ ma Dios ñecy ma jadu'n ymina'ñ: "Ti nmibicyich, e paady ycixpi ti ngapxidzimybich nej ti nmibicyich." Tim jadu'n nej Dios ñecy ymina'ñ, nañ tim jadu'n iich ajcxy yminaangixy co nmibijccixyich Dios, e paady ngapxidzimgixyich nej nmibijccixyich. ¹⁴ Com nejhuifuyim jadu'n nej Dios yajjugypijcy Jesús co y'o'cy. Nañ tim jadu'n Jesús xyajjugypigaanim jadüg'oc miid Dios ymic'ajt co anajty n'o'cim. E quipxyi miid miich ajcxy xyajni'cximip ma Dios yhuinduu. ¹⁵ Tüg'óciy tzaachypi huidibi nminajxypich nyajnajxypich, hue' nminaxyich nyajnaxyich miid miich ajcxy m'oy'ajtin ycixpi. E co anajty Dios jactuñ may'ajtin miid jacjadyii mayjäy ajcxy, nañ jadu'n mayjäy yajnajxcixipy jäygidaacin ma Dios, jigix jëbi mayjäy iibáatcixipy capxpáatcixipy Dios.

¹⁶ Paady ycixpi ni mina xii, iich ajcxy ngajotmetzcñhuaangixy. Oy iich ajcxy nnin'cx yjaccöminajc'idich jabom jabom, per iich ajcxy njot nhuinma'ñ niigi mic'ajt paady jabom jabom. ¹⁷ Je tzaachypi je ayo'n huidibi nminajxim nyajnajxim ya naaxhuiñ, ca' yi' ytimytiijity. Cixip naxip yi'. E miid co nminajxim nyajnajxim tzaachypi ayo'n, huin'it nbaatim oy'ajtin niigi ymijity y'oyity huidibi ca' ycixipy ñaxipy ni mina. ¹⁸ Ca' huaad iich ajt nhuinma'ñ nbidaacim ma huidijaty cixamb tigoyamb. Tüg'óciy tijaty yaj'ijxp yajhuindicxp ya naaxhuiñ, cixip tigoyip yi'. Per huidijaty ca' yaj'ixy yajhuindicxy, idip yi', ca' ycixipy ytigoyipy nimina.

5

¹ Com nnejhuifuyim co n'o'cim, naaxni'cx ajt huidibi nmiid'ajtim ya naaxhuiñ cixamb tigoyamb yi'. Dios ymiid ni'ixi' jiiy tzajpjoty huingbi nin'cx huidibi yi' ti cojy huidibi xymöhuaanim. Je nin'cx huidibi xymöhuaanim jadu'n nipaady ma ajt n'alma nej tüg tijc huidibi tinaayb huinixii huinitiempo. Tüg tijc huidibi Dios ti cojy, ca' nan huidibi jäy ajcxy ti cojicy. ² Janch tiy'ajt co ca' ooy jotcujc ndzinaayim ya naaxhuiñ miid ajt nnin'cx. Ooy njijp'ijxim mina nbadaanim ajt je nnin'cx huidibi nmiid'adaanim jiiy tzajpjoty. ³ Je' nnin'cx xyüdzim tim jadu'n nej co tüg jemyhuit nyajtigiim,

ca'ydi n'ijtim nihuädz. ⁴ Nami njactzinaayim ya naaxhuiñ miid ajt nninïcx, ca' ooy jotcujc nayjihuiiyim. Ooy xyajtajim xyajmayim je tzaachypi ayo'n huidibi nminajxim nyajnajxim. Ca' nan co ca' ndzojcm ajt nninïcx, o co nyajtigoyaanim ajt nninïcx. Hue' ndzojcm co nmiid'ajtim jemybi jugy'ajtin jemybi ninïcx jigix co ajt njugy'ajtin huidibi cixamb tigoyamb, ahuimbidip yi' jemybi jugy'ajtin huidibi ca' ycixipy ytigoyipy. ⁵ Dios yi' ti yaj'oyiy je jugy'ajtin huidibi nmiid'ajtim cham, jigix jëbi nmiid'ajtim huingbi jugy'ajtin huidibi ca' ycixipy ytigoyipy ni mina. Dios ti xymoyim je Espiritu Santo je' je' tiy'ajt ma ñich ajtin co nbadaanim jemybi jugy'ajt jembyi ninïcx.

⁶ Jabom jabom ñich ajt jotcujc naybidaacim. Nejhuiiyim co nami n'jactzinaayim miid ajt nninïcx, ca' nmiid'ajtim jemybi ninïcx, ca' nyajpaatim ma ajt nHuindzin Jesús chinäy. ⁷ Je' nninïcx xyüdzim tim jadu'n nej co tug jemyhuit nyajtigiiyim, ca'ydi n'ijtim nihuädz. ⁸ Jotcujc etz jotmic nayjihuiiyim. Niigi jotcujc ixipy nayjihuiiyim, e ooy njatzojcm co mic'amy ixipy n'ijxmajtzim jada ninïcx, jigix nicxy ndzinaydacpijcm ma ajt nHuindzin Jesús chinäy. ⁹ Paady ycixp jadu'n njacjugy'ajtim njactzinaayim jigix jëbi ajt nHuindzin Jesús jäygidägiy ajt ndzinaayin. Ca' ñejity pen njactzinaayim ixipy miid ajt nninïcx, o pen tzojc n'ijxmajtzim ajt nninïcx ixipy, e nicxim ma Jesús yajpaady. ¹⁰ Nidüg'óciy ñich ajt nayguëxigaanim ma Cristo ytiydundac, e jilby nidüg nidüg paadip huidi anajty nipidziimip jadu'n nej anajty ti chinäy, pen oy, o ca' y'oyity.

Je ayuc tiy'ajt huidibi nicy'ajt cidägy'ajt miid

¹¹ Com nejhuiiyim co copicy nhuindzigiyyim ajt nHuindzin Jesucristo, paady ycixpi mictägy nyajmibicyich yi mayjäy ajcxy Cristo ytiy'ajt. Dios ñejhuiiyb co tudägy ñich njot nhuinma'ñich. E nañ jadu'n ndzocyich co miich ajcxy mnejhuiiygixipy co tudägy ñich njot nhuinma'ñich. ¹² Ca'p ñich ajcxy yam naygapxpáatigixy jadüg'oc co ñich ajcxy ooy n'oyjäyity, o co ñich ajcxy ooy oy ndúngixyich. Hue' janchtiy lugar nyejcpyich, jaydëbi miich ajcxy xycapxpadipyich etz jotcujc mnayjihuiiyigixipy miid ñich ajcxy ycixpi. Jigix jëbi miich ajcxy m'adzohuip yi jäy ajcxy huidibi capxpatp pinjaty yhuiñyijp ooy oy yquëxigy, e ca' ajcxy tuñ cuendi pen je' miid oyjot oyhuinma'ñ, o pen ca'. ¹³ Pen minamb jäy ajcxy co ñich nlocity, huen xyajnájxcixyich loci miid Dios ycixpi. Pen jäy minaangixp co oy huinma'ñ nmiididyich, jëbi jadu'n ajcxy xyajnájxcixyich jadu'n nej oy huinma'ñ nmiididyich miid miich ajcxy m'oy'ajtin ycixpi. ¹⁴ Com Cristo ooy xychojcm xyjihuiiyim, paady ycixp njatytimycapxymidoohuim Cristo. Com nejhuiiyim ajt nidüg'óciy tiydudägy co Cristo y'o'cy miid ajt nbocy ycixpi, e paady ycixpi jadu'n nipaady nej jihuiy nidüg'óciy ñich ajt ti n'o'cim quipxyi miid Cristo. ¹⁵ Cristo o'c miid tüg'óciy jäy ajcxy ycixpi, jigix co tüg'óciy jäy ajcxy huidibi jactzinaayb jacjugy'ajtp, ca' ajcxy yajtúngixipy yci'mjot yci'mhuinma'ñ ma ajcxy chinaayin. Huen ajcxy tzinaaygixy miid Cristo ycixpi huidibi o'c miid yi' ajcxy ypocy ycixpi, etz yjugypijcy jadüg'oc miid yi' ajcxy ycixpi. ¹⁶ Miid co ndzinaayim miid Cristo ycixpi, paady ycixp ca' ndunim cuendi naaxhuiñyjäy ajcxy nej ñayñigápxigixy nayñimiydáacigixy. Jayijp ca'ni anajty nmibijcm, ooy anajty ndunim cuendi nej jäy ajcxy ñayñigápxigixy nayñimiydáacigixy. Jadachambi etz yjacnicxni xi tiempo, ca' ndunim cuendi nej naaxhuiñyjäy ajcxy capxcixy miydaaccixy. ¹⁷ Com tigachjaty cham nhuinjihuüyich Cristo, paady ycixp pinjaty yajpatp ma Cristo, jemyjot jemyhuinma'ñ je' ymiid'ajtnip, jadu'n nipaady nej jihuiy ti ma'xung'aty huinjemy. Je jot je huinma'ñ huidibi anajty ymiid co anajty ca'ni mibicy Cristo, ti je' ñajxtäy, jadachambi ac jemyjot ac jemyhuinma'ñ ti y'ahuimbijttäy.

¹⁸ Tüg'óciy tijaty huidibi ya yajpatp, jilby chooñ ma Dios, Dios yaj'oyiyday. Miid huidijaty Cristo ytuun miid ñich ajt ycixpi, jotcujc n'ijtim miid Dios. E Dios xyajni'bijcch co ngapxhuäcxyich Dios y'ayuc jadu'n nej jäy ajcxy jëbi ajcxy jotcujc y'ijtcixy miid Dios. ¹⁹ Jadu'n nminaanim co Dios ymiid'ijtpy Cristo. E Dios tuun quipxyi miid Cristo co yi' yaj'oyiy je tzip nej naaxhuiñyjäy ajcxy midzip'aty Dios. Dios ca' yajcomidohua'ñ jäy ajcxy ypocy huidibi mibijccixp Cristo, miid co Cristo ti yajpocyñihuächy. E Dios ti

xyajñibicyich co ngapxhuäcxyich yí' y'ayuc nej jäy ajcxy jëbi paadip pocyhuinmeecxin, etz nañ jadu'n paadip jotcujc'ajtin ma Dios. ²⁰ Paady nhuidityich miid Cristo ycixpi ngapxhuäcxyich Cristo y'ayuc. Jadu'n huimbidezimyb nej jihuüy miich ajcxy Dios xyminucxtaaccixy miid iich n'ayuc jigix mmibíjccixipy Cristo y'ayuc. Paady ngodinäyich Cristo co nminucxtacypich miich ajcxy. Jothuimbijtcix nej mdundigooygixy miid Dios ycötujcin e Dios xyhuinmeecxip ajcxy mbocy, jigix jotcujc m'idipy ajcxy ma Dios. ²¹ Cristo ca' ma ytundigooy, per miid ajt nbocy ycixpi Dios yajnajx je Cristo jadu'n nej tüg pocyjäy. Jadu'n Dios ytuñ miid je Cristo, jigix co iich ajt n'ijtim ma Cristo, nbaatim je tudägy'ajtin huidibi Dios chojcpy nmiid'ajtim.

6

¹ Ich ajcxy etz miich ajcxy quipxyi nduunim ma Dios ytung. Nminucxtacpyich miich ajcxy co mgöbigipy ajcxy je may'ajt je oy'ajt huidibi Dios ti tuñ miid miich ajcxy ycixpi, ca'ydi ñaadigí'aty Dios ytung. ² Com jadu'n jaybety y'ity ma Dios ñecy ma Dios jadu'n ymina'ñ:

Co je xii tiempo ti patni, ti iich miich m'ayuc midoohui. Ti nbubety nbudigíyich je huin'it xii je huin'it tiempo co ti yhuaad'aty mina jäy ajcxy y'alma ñidzögipy. Jadachambi xii tiempo ti yhuaad'ajtni mina jëbi Dios xyñidzoocim ajt n'alma.

³ Ca' pin n'adzipyich co nduñich ma Dios ytung, jigix ca'ydi pinjaty ymina'ñ co ca' oy nduñich. ⁴ Nañ jadu'n ca' n'adziba'ñich miich ajcxy. Nigi ndzocyich co ñiguëxigip tüg'ociy iich ndung co nduñich miid Dios ycixpi. Ooy nyajtuñich mecxtujcin. Ooy nmecxtucyich ayo'n etz tzaachypi. Ooy nyajmayjatyich nhuit nducxy ngaayin n'uucin. Ooy iich ndzinaayin chipity. ⁵ Ti ajcxy xycí'atyich, ti ajcxy xypidáacixyich pujxtigoty. Ti jäy ajcxy xymibidígyich, e ooy ajcxy yhuaangixy yjihuiygixy. Ti tzaachypi nminaxy nyajnaxyich ma ndungich. Minaajity canaag xii ca' nmäyich, e minaajity ayuu n'ityich. ⁶ Nyajniguëxícpy iich ajcxy co iich ndungixyich miid Dios ycixpi, miid co huadz jot huinma'ñ nmiididyich ajcxy. Ca' ma jibicpi nmiididyich ajcxy, miid co n'ixpíjccixyich ma Dios ytiy'ajt. Ooy mecxtujcin nmiididyich ajcxy. Ooy iich ajcxy nba'ayooyich nmigügtjicich. Dios yjihui'ñ ymic'ajt yajpatp ma iich ajcxy njot nhuinma'ñ. Ooy iich miich ajcxy ndzojccixy njihuiygixy cixyot huinjot. ⁷ Nyajniguëxígy iich ajcxy co ndungixyich miid Dios ycixpi, miid co ngapxhuäcxcixyich Cristo y'ayuc ytiy'ajt tudägypí, e nañ miid co nmiididyich ajcxy Dios yjihui'ñ ymic'ajt, etz miid co nmiididyich ajcxy ca'pxy Dios ytiy'ajt tudägypí. Miid yi' ytiy'ajt tudägyp nyajmibicyich jäy ajcxy, etz miid yi' ytiy'ajt naygohua'ñyijich ma nmizipich. ⁸ Minaajity jay xycapxpáadygixyich; minaajity jäy ajcxy xyñigapxy xyñi'ojíygixyich; minaajity jäy yminaangixy co oy nduñich; minaajity jäy yminaangixy co jibic nduñich; mina ngamina jäy xytíjicixyich co n'indáaccixyich; e minaajity jäy yminaangixy co tiy'ajt ngapxpich. ⁹ Minaajity jäy yminaangixy co ajcxy ca' xy'ixy'ájtigixyich; e minaajity jäy yminaangixy co ooy oy xy'ixy'ájtigixyich; e minaajity ayo'n jíp'am o'cin jíp'am nhuidíjtcixyich. Per jactzinaaybich ajcxy jadu'n. Ti je tungmiidpi xychaachtungixyich, per ca' iich ajcxy xyaj'o'cyi. ¹⁰ Ooy iich ajcxy njatajicixy njamaaygixy, per jabom jabom jotcujc nayjihuiygixyich. Ayoobi iich ajcxy ca' ti meen etz ca' ti pidägy nmiid'ájticyich. Per nañ jadu'n mayjäy oy'ajtin pada'ñ ma Dios miid iich ajcxy ndung ycixpi, jadu'n jada oy'ajtin nipaady nej meen etz nej pidägy. Oy ca' meen etz ca' pidägy nmiididyich ajcxy, per nmiidich ajcxy tüg'ociy huidibi nimina ca' ycixy ytigooy.

¹¹ Migügtjic ajcxy, huidibi yajpatp jim Corinto, ti nmiidcapxcixy ti nmiidmiydaaccixy ma jada necy miid tüg'ociy tudägy'ajt. Ti ngapxyich nmiydägyich nej njot nhuinma'ñ nmiididyich. ¹² Ca' iich n'ixmach nej iich miich ajcxy ndzojccixy njihuiygixy cixyot huinjot. ¹³ May'ajt nbijctzooybich ma miich ajcxy co xyajnimähuibich nej miich ajcxy mjot mhuinma'ñ miidity tim jadu'n nej ti nduñich miid miich ajcxy. Jadu'n may'ajt

nbijctzooyich ma miich ajcxy nej ungedeedytjic ajcxy oy'amy y'ung ajcxy ihuicixy capxhuicixy.

Ich ajt je' ma Dios jugypi chinaayin

¹⁴ Miich ajcxy, ca' mdungmujccixy m'ayoomujccixy miid jäy ajcxy huidibi ca' mibijccixy Cristo. Com ca' huaad tudägyjäy ajcxy miiddzinaaygixy jäy ajcxy huidibi ca' tudägy huinma'n miidity. ¿Nej jëbi je huidibi tiy'ajtip ytügiy miid huidibi ca' ytiy'ajtity? ¿Nej jëbi pinjaty tiy'ajt miid miid'idipy pinjaty huidibi ca' tiy'ajt miidity? Je huidibi tiy'ajt miid jadu'n nipaady nej chinäy ma jün ytücxin. E je huidibi ca' tiy'ajt miidity ñipatp nej jihuüy chinäy agootztuuby. ¹⁵ ¿Nej jëbi Cristo etz Satanás ñay'ayuc-huinjihuüyigixy? ¿Nej jëbi tüg mibijcpi yajtügiy yhuinma'n miid tüg huidibi ca' ymibicy? ¹⁶ Ca' ni nej jëbi tzaadzech quipychech y'idipy ma Dios ytijc. Com yi' ajcxy huidibi tzaadzech ojadajtp ca' ajcxy yhuinma'n ytügiy miid Dios ytiy'ajt. Je Dios juugypi ymiid chinaydac ma ich ajt njot nhuinma'n, paady ycixp jadu'n ich ajt nipaady nej Dios ytijc. Com jaybety y'ity ma Dios jadu'n ymina'n:

Ndzinaydac nbidägaamybich ma yi' ajcxy. Huididaamybich ma yi' ajcxy yajpaady. Yi' ajcxy ich xyDios'adaanip. E ich ajcxy yi' njäy'adaanip.

¹⁷ Paady nañ jadu'n ajt nHuindzin Dios ymina'n:

Copicy co miich ajcxy m'ixmadzipy yi' jacjadyi jäy ajcxy, e tzinaaygix abicy. Ca' ajcxy mnijot'adipy je jibicpi, huin'it ich miich ajcxy ngöbigipyich.

¹⁸ Ich miich ajcxy xymiid'adipyich jadu'n nej jihuüy ich miich ajcxy xyTeedy'adyi. E jadu'n miich ajcxy m'idipy nej ich nmang n'anäg.

Jadu'n je mijpi Dios ymina'n.

7

¹ Miich ajcxy huidibi ooy ndzocy njihuüyich, com Dios jadu'n ymina'n co tzinaydac pidäga'n ma ajt njot nhuinma'n, paady ycixp tzoc yajhuaatzim ajt njot nhuinma'n, etz ma ajt n'espíritu, e jadu'n Dios nhuindzigüym etz nyajmij'ajtim cixyjot huinjot.

Co ajcxy jothuimbijt ma Dios huidibi ajcxy jim Corinto

² Tungix may'ajt xycöbigipich miich ajcxy cixyjot huinjot. Ca' ich ajcxy ni pin ti nmidundigöogygixyich, nañ jadu'n ca' ni pin ich ajcxy ti nyaj'ixpjjccixyich jibic-huinma'n. Nañ jadu'n ni ca' ich ajcxy pin ti nhuin'ihnich. ³ Ca' jadu'n nmina'nich miid co nyajpocycähua'nich miich ajcxy. Com jadu'n jacjayjip ti mina'nich co ooy ndzocy njihuüyich miich ajcxy, tú'ciy ajcxy ndzinaayim, e tú'ciy ajcxy n'ó'cimipy. ⁴ Ooy ich miich ajcxy njot'amij'adyijich. Ooy ich miich ajcxy ngömaaygixy. Ooy jotcujc nayjihuüyijich miid miich ajcxy ycixpi. Oy njayajpaadyich tzip agujc ayo'n agujc, per co njäymeich miich ajcxy, jotcujc nayjihuüyijich.

⁵ Nej ich ajcxy nja'ty ya Macedonia, ca' njotcujc'ajtcixyich. Hue' nyajpaadyich ajcxy tzip agujc capxy agujc huen ma'ámyity. Jäy ajcxy xymidzip'ajtpich, etz nañ jadu'n tzigüybich jotjoty huinma'nyjoty. ⁶ Per Dios je huidibi yajjotcugüyb yajjotmicpijcp pinjaty tajp mayb, yi' ti xyajjotcugüyich co Tito yja'ty ya ma ich nyajpaady co jim choñ ma miich ajcxy. ⁷ Ca' nan ti njotcugüyich miid tim jëyi co Tito ti xyñijädyich. Hue' ti njotcugüyich co yi' ti xyñimäyich jadu'n nej yi' jotcujc'ajtin ti paady ma miich ajcxy. Yi' ti xyajmiidmiydägyich jadu'n nej miich ajcxy tajin mayin mjihuüyigixy miid mbocy ycixpi. E nañ jadu'n nej mhuinmaaygixy nej nyajpaadyich. E miid jada ayuc nigü ti njotcugüyich.

⁸ Ich ca' ndajy nmayich miid co ich miich ajcxy ti nyajtajcixy ti nyajmaygixy miid je necy huidibi ajcxy nyajniguejx. Oy anajty ti njajihuüyich jotmay co nnejhuüyich co miich ajcxy ooy mdajy may tüg xii mejtz xii miid ich nnecy ycixpi. ⁹ Jadachambi ooy jotcujc nayjihuüyijich. Ca' nminanim miid je tajin je mayin ycixpi huidibi miich ajcxy anajty miid jotcujc'ajtpich, com co je tajin je mayin ajcxy ti xyajjothuimbijtcixy, Dios ti jäygidägy jadu'n nej miich ajcxy ti mmimadaaccixy je tajin mayin. E ca' ich

ti ndundigooyich ma miich ajcxy co ajcxy njotmaymoy. ¹⁰ Com Dios yjäygidacpyi co jäy njothuimbijtcixy, miid co taj may ñayjihuiiyigixy miid ypocy ycixpi. E co ajcxy yjothuimbijtcixy, huin'it ajcxy je y'alma nïdzocin paadipy. E ca' je' huaad nidajim nimaayim co ajcxy y'alma nïdzögy. Co jäy ajcxy nidajcixy nimaaygixy huidi yajpat ya naaxhuiñ, e ca' yjothuimbijtcixy, jadu'ñi nicxy je o'cin nipatcixy. ¹¹ Miid je tügpi jäy ypocy ycixpi ti mbaatcixy je tajin mayin. Miich ajcxy jadu'n ti mmecxtujccixy je tajin mayin jadu'n nej Dios jäygidägy. Tungix cuendi jada' cham nej ti yhuimbizimy. Tiydudägy janch cham ti mdiyungixy miid je pocy ycixpi. Ti xyajjotma'tcixy, e ti xy'adzigiigixy, e ni'ixiy miich anajty m'ijtcixy co mdzaachytunaangixy je huidi ti ytundigooy. E miid jada ycixpi ti miich ajcxy myajniguëxïccixy, co ca' miich ajcxy ti pocy mmïidity ma jadaaabi huinma'ñ. ¹² Co iich miich ajcxy jayhuin nijayiy, ca' nmïnaanïm miid je' ycixpi huidibi anajty ti ytundigooy. Nañ ca' nmïnaanïm miid je huidibi anajty ti yajmidundigooy. Nijayiyich miich ajcxy, jigix jëbi mnejhuiiyigixy je tiy'ajt nej Dios tzocy co nduunich miid miich ajcxy m'oy'ajtïn ycixpi. ¹³ Com miich ajcxy ti mmijottigooyb Dios ytiy'ajt, paady ycixpi miich ajcxy ti mbaatcixy jotcujc'ajt, e nañ jadu'n iich ajcxy ti nbaatcixyich jotcujc'ajt miid miich ajcxy ycixpi. Nañ jadu'n ooy ti njotcugiyich ajcxy miid co Tito ooy chachjotcujcity. Oy'amy miich ajcxy ti mgöbijccixy Tito, paady yi' ooy ti yjotcugiy miid miich ajcxy ycixpi.

¹⁴ Co ti nmïmäyich Tito co njot'amij'adyiijich miich ajcxy, ca' ti tzo'ydu'n ti nbaadyich, co yi' oy ti xyc'o'ixiigixy. Nigi oy ti yhuimbizimy miid co tüg'ociy ayuc huidibi iich miich ajcxy ti nyajnimäy ti yhuimbizimy co yjanchity. Nañ jadu'n ti yhuimbizimy co yjanchity jadu'n nej ti nmïmydacyich miich ajcxy miid Tito co njot'amij'adyiijich miich ajcxy. ¹⁵ Jadu'n nej co Tito oy miich ajcxy xycogapxiy, yi' ooy nigi xychojccixy xyjihuiiyigixy co yi' nejhuiy jadu'n nej miich ajcxy mmijottigooygixy iich n'ayuc, jadu'n nej mgapxymïdoohuaangixy. E nañ jadu'n co yi' ijxy nej miich ajcxy yi' mgöbijcxy miid tzigi'ñ jihui'ñ. ¹⁶ Ooy jotcujc nayjihuiiyiijich, ooy njot'amij'adyiijich miich ajcxy.

8

Ycüejtcixy miid oyjot oyhuinma'ñ

¹ Jadügnax, miich ajcxy migügtijc, nyajnejhuihuaamybich nyajmïdmiydägaamybich miich ajcxy, jadu'n nej Dios may'ajt oy'ajt tuñ miid je mibijcpidijc ajcxy huidibi xii ya yajpatp Macedonia. ² Je mibijcpidijc huidibi ya yajpatp ti ooy ajcxy minaxy yajnaxy tzaachypi etz ayo'n. Per ca' ñejity, ooy ajcxy jotcujc yajpatcixy. Nañ ayoobi ajcxy, per ti ajcxy may meen yajmujccixy, jadu'n nej jihuiy ajcxy ycomeenity. ³ Iich testigo co je migügtijc miid yci'm tzojcin meen yejccixy, nej jëbi ajcxy ymadaaccixy miid meen, ixti anaxy ajcxy yejccixy. ⁴ Ooy xyminucxtägyich ajcxy co n'a'ixihuibich ajcxy co jëbi ajcxy meen yajmujccixy huidibi miid pubedaangixy jacjadyii je mibijcpidijc. ⁵ Nigi anaxy ajcxy ooy meen yajmujcxy ca'ydi jadu'n nej anajty njijp'ixyich. Jayijp ajcxy ñayyejci ma ajt nHuindzin Jesucristo, e huin'it ajcxy ñayyéjigixy ma iich ajcxy jadu'n nej Dios tzocy. ⁶ E chi jada' iich ajcxy ooy nminucxtacy Tito co huen nicxy jadüg'oc ma miich ajcxy. Huen nicxy yajcixy yajmay huidibi ti yajtzondägy ma miich ajcxy. Co huen je meen yajmujctäy huidibi cixyjot huinijot miid mbubedaangixy je mibijcpidijc ajcxy huidibi yajpatp jim Jerusalén. ⁷ Miich ajcxy nigi ooy mmadaaccixy, ca'ydi jacpinjaty ma tüg'ociy Dios ytung. Ooy mij mibijcin miich ajcxy miidity. Ooy myaj'ixpijccixy Dios ytiy'ajt. Ooy mmijottigooygixy mguydunaangixy iich n'ayuc. E nañ jadu'n ooy miich ajcxy xychojccixy xyjihuiiyigixyich. Nañ ooy ndzocyich co miich ajcxy nigi pubejtïn myegipy ma je mibijcpidijc huidibi jim Jerusalén.

⁸ Ca' jadu'n n'ane'myich co mbubéjtcixipy je migügtijc huidi jim Jerusalén. Hue' ndzocyich co miich ajcxy mnejhuihuipy jadu'n nej yi jacjadyii mibijcpidijc yhuinma'ñ bidaaccixyp ci'm co pubedaangixy je ymigügtijc jim Jerusalén. Jadu'n mdunipy ajcxy jigix jëbi mnejhuihuibich pen janch tiy'ajt jadu'n co mdzojccixy mjihuiiyigixy yi jacjadyii

mibijcpidijc. ⁹ Com miich ajcxy mnejhuüygixyp jadu'n nej ajt nHuindzin Jesucristo mijmay'ajt mij'oy'ajt tuñ miid iich ajt ycixpi, jadu'n Jesús nipaady nej tüg mijcomeeñybi jiiby tzajpjoty, miid co yi' xychojccim xyjihuiyim mijcajee, chi yi' ixmajtztay yi' y'oy'ajtin jiiby tzajpjoty co ycidacy ya naaxhuiñ etz y'ayooy ya. Miich ajcxy ca' anajty ti miidity jiiby tzajpjoty, per jadachambi mbadaangixyp mij'oy'ajtin jiiby tzajpjoty.

¹⁰ Miid miich ajcxy m'oy'ajtin ycixpi, ma jada necy nmooybich miich ajcxy ngapx-huijin jadu'n nej jëbi huaad mdungixy oyjây'ajtin. Jac'oy co miich ajcxy myajcixipy je huidibi ajcxy myajtzondac jadöjimijt. Miich ajcxy jacjayijp ca'ydî jac ni pinjaty ti myajtzondaaccixy meeñ yajmugii huidi miid mbubedaangixy je mibijcpidijc huidibi yajpatp jim Jerusalén. Nañ jadu'n miich ajcxy jacjayijp ca'ydî jacpinjaty mijottigooygixy co mbubedaangixy jacjadyii mibijcpidijc. ¹¹ Jadachambi tiempo jactungix pubejtin, meeñ yajmujccix cixyot huinijot jadu'n nej ti myajtzondaaccixy ixti mabaad myajmaygixy je meeñ yajmugii. Nidüg nidüg yejccix nej ajcxy ii miidity. ¹² Pinjaty y'ofrenda yejcp janch cixyot huinijot Dios ycöbijcip yi' je' y'ofrenda, jadu'n nej ii miidity. Dios ca' yi' pijctzoy huidibi ajt ca' nmiidity.

¹³ Ca' nmina'ñich co oy jadu'n co mbubéjtcixip jacjadyii mibijcpidijc ixti mabaad mnayyajhuí'migixy ayo'ndumb. ¹⁴ Hue' yajmina'ñ co quipxyjaty mdzinaaygixy, ni pin cayajconaxipy e ni pin cayajmayjadípy. Jadachambi tiempo miich ajcxy nmiidity ca'pxy je huidibi mnidzinaaygixip, ixti miich ajcxy conajxpi, paady ycixp jëbi mbubéjtcixipy migügtijc huidibi yajmayjajtp. Jadüg tiempo miich ajcxy myajmayjadípy, e jacjadyii migügtijc jëbi xypubéjtcixipy, e jadu'n yhuimbizimipy co mnaybubéjtgixy quipxyjaty miñ xyipy. ¹⁵ Com jadu'n jaybety y'ity ma Dios ñecy ma jadu'n ymina'ñ: "Pinjaty anajty may'amy miid, ca' yajconajxy. E pinjaty anajty hueeni miid, ca' yajmayjaty."

Tito miid ymigügtijc ajcxy

¹⁶ Per nyajnajxypich jäygidaacin ma Dios, com Dios ti pidägy ma Tito yjot yhuinma'ñ co mijottigooy miich ajcxy m'oy'ajtin, tim jadu'n nej iich nmijottigooyich miich ajcxy m'oy'ajtin. ¹⁷ Co may'ajt nbijctzooyich ma Tito co nicxipy jadüg'oc ma miich ajcxy, agujc jotcujc cöbicy, com ti anajty jayijp yhuinma'ñ pidägy ci'm co ñicxa'ñ jadüg'oc ma miich ajcxy. Jadachambi Tito nicxip ma miich ajcxy miid ci'mdzojcin.

¹⁸ Quipxyi miid Tito nguexy iich ajcxy yam tüg nmigüg huidibi ooy chachcapxpaadyity majaty mibijcpidijc, co ooy oy ytuñ capxhuäcxî Jesús y'ayuc ytiy'ajt nej huaad jäy ajcxy y'alma nidzoocin paady. ¹⁹ Ca' nan jëyi co je mibijcpidijc yi' ycapxpadyii. Nañ jadu'n ti yhuin'ixyii mibijcpidijc ajcxy co jëbi yhuidity miid iich ajcxy, e tunipy pubejtin miid je may'ajtin oy'ajtin huidibi iich ajcxy ndumybich miid je migügtijc ycixpi jim Jerusalén. Jadu'n nduüñich jaydëbi jäy ajcxy capxpaadip ajt nHuindzin Jesucristo. Etz nañ jadu'n jaydëbi ñiguëxigy co iich ajcxy nbubeda'ñich ajt nmigügtijc cixyot huinijot. ²⁰ Ooy ngüend'atyich je meeñ huidibi je mibijcpidijc ti yajmujccixy, jigix ca'ydî pin huaad xyñigapxy xyñi'ojjyich, jadu'n nej iich ajcxy meeñ nyajmújccixyich. ²¹ Jadu'n iich ajcxy nhuinma'ñ nbidägy co tudägy ndunángixyich ca' nan jëyi ma ajt nHuindzin Jesús yhuinduu, nañ jadu'n ma je mayjây ajcxy yhuinduu.

²² Nañ jadu'n nguejxypich miid yi' ajcxy jadüg ajt nmigüg, je huidibi oy ti ytuüñ ma Dios ytung quipxyi miid iich ajcxy e nejhuüybich co tudägy ytuñ cixyot huinijot. E yi' miich ajcxy ooy xyjot'amij'adyii, e oy ytuna'ñ miid miich ajcxy ma Dios ytung. ²³ Pen jim pinjaty nidiy yajtiy je Tito, nimaaygix co iich yi' nmigüg, e yi' miid nduüñich ma Dios ytung ma miich ajcxy. E nañ jadu'n pen jim pinjaty nejhuühua'ñ pinjây ajcxy yi', yi' jacjadyiibi huidibi ajcxy nicxp miid Tito. Nimaaygix co je mibijcpidijc ajcxy ya Macedonia ti quexy ajcxy, ytungixy miid Cristo ymij'ajtin ycixpi. ²⁴ Paady ycixp miich ajcxy yi' mdzójccixipy mjihuiygixyipy je migügtijc ajcxy huidibi mimb miid Tito, jigix jëbi je mibijcpidijc ma nidüg nidüg cajp ya Macedonia nejhuühuipy co miich ajcxy

yi' mdzojccixy mjihuiygixy je mibijcpidijc tiydudägy. E paady ycixp jëbi ìch jotcuje nayjihuüijich miid miich ajcxy ycixpi.

9

Je cüejtin miid je mibijcpidijc ajcxy ycixpi

¹ Nañ ca' yjaty ycopicyity co ìch miich ajcxy njacnijayüygixipy co je mibijcpidijc huidibi xii ya pubejtin tunaangixyp ma Dios yjäy huidibi ajcxy jim Judea. ² Com nejhuiybich co miich ajcxy nañ jadu'n mbubedaangixy cixyjot huinjot Dios yjäy huidibi ajcxy jim Judea. Paady ycixp jotcuje ìch jadu'n nnimäyich je mibijcpidijc ya Macedonia jadu'n nej miich ajcxy jim Acaya mhuinma'nñ pidacy jidöjimijt co mbubedaangixy je mibijcpidijc huidibi jim Judea. E miid co miich ajcxy jayijp mhuinma'nñ ti mbidaaccixy co mbubedaangixy je mibijcpidijc huidibi ajcxy jim Judea, paady ycixp may mibijcpidijc ya Macedonia yhuinma'nñ pidaaccixy co ypubedaangixy nañ jadu'n. ³ Paady nguejxypich Tito miid jacjadyii migügtijc ma miich ajcxy, jaydëbi xypubéjtcixipy ma je meeñ yajmugii, jadu'n nej ti mbidaaccixy huinma'nñ. E ìch ca' ti tzo'ydu'n nbáadibich miid miich ajcxy ycixpi ma jada pubejtin huidibi ajcxy mguexamyb jim Judea. Com ìch ti nnimäyich mayjäy co miich ajcxy ni'ixi' m'ljtcixy miid mbubejtin. ⁴ Ca' yjegyity co nijëjity mibijcpidijc huidibi tzinaayb ya Macedonia ñicxa'nip ajcxy miid ìch co anajty nnicxyich jim ma miich ajcxy. E co anajty ìch ajcxy jim nmejtzcixy, e chi ajcxy nbáatcixipy ca' anajty ajcxy mni'ixijity. Pues chi ooy tzo'ydu'n njihuïhuibich, com ti anajty ooy njot'amij'ájtigixy. Nañ jadu'n miich ajcxy tzo'ydu'n mjihuïhuip. ⁵ Paady ycixp huinma'nñ nbidägyich co oy jadu'n co nijëjity migügtijc nicxy jayijp xycogapxiygixy, e huen xypubejtcixy ma yi meeñ yajmugii jadu'n nej jidöjimijt ti mgapxytungixy. E co anajty nmechich jim ma miich ajcxy, chi ni'ixi' anajty ajcxy miidity yi m'ofrenda, e jëbi jäy ajcxy nejhuihuip co yi m'ofrenda ti myejccixy cixyjot huinjot, ca'ydì jäy yminaangixy co ìch miich adzip ajcxy ti n'ane'ngixy co m'ofrenda nyajmújccixipy.

⁶ Jäymetz miich ajcxy jadu'n nej ayuc y'oc'ity: Pinjaty hueni niip, nañ jadu'n hueeni y cosecha yajpidigy. E pinjaty mij niip, nañ jadu'n mij y cosecha yajpidigy. ⁷ Nidüg nidüg mibijcpi yegipy y'ofrenda jadu'n nej anajty ci'm yhuinma'nñ ti pidägy co yega'n. E ca' yegipy ametz jotmetz. E nañ jadu'n ni yca'adzip yca'a'écity. Com Dios chojcpy yjihuïyb pinjaty cixyjot huinjot y'ofrenda yejcp. ⁸ Dios jëbi may'ajt oy'ajt tunipy miid miich ajcxy mijcajee, e miich ajcxy mbáatcixipy tüg'óciy tijaty conuucxin, e ixti mmiid'adipy tüg'óciy huidibi myajmayjajtcixy, e nañ jadu'n conaxpi naadigibi nej huaad jacjadyii mibijcpidijc mbubejtcixy, e mdúngixipy canaagnax oyjäy'ajtin. ⁹ Jadu'n jaybety ymiñ ma Dios ñecy, ma jadu'n ymina'nñ:

Yi oyjäydijc ajcxy, yi' ajcxy nimooyb ayoobitijc huidibi ajcxy yajmayjajtpy. Yi oyjäydijc ajcxy co oyjäy'ajtin tungixy, yejccixyp ijxpejt oybi huidibi y'idipy huinixii.

¹⁰ Dios yejcpy je tiiim huidibi jäy ajcxy ñiipy, nañ jadu'n Dios yejcpy je jicxy picy huidibi nidzinaayim nijugy'ajtim. E jadu'n co miich ajcxy oyjäy'ajtin mdungix mijcajee, je m'oyjäy'ajtin ajcxy ñipaadip nej jihuiy mgosecha myajpidiccixy may'amy. ¹¹ E jadu'n miich ajcxy miid'adipy tüg'óciy jugy'ajtin comeñ'ajtin, jaydëbi m'ofrenda myejccixy mij'amy. E mayjäy ajcxy Dioscojuyip yajnaxipy ma Dios miid je m'ofrenda ycixpi, co anajty nyecyich miich ajcxy m'ofrenda ma yi' ajcxy huidibi yajmayjajtp. ¹² Co ìch ajt pubejtin nyecim ma jacjadyii migügtijc, canan jëyi co nbubejtim miid tijaty yajmayjajtcixyp. Nañ jadu'n yi' ajcxy jëbi yajnaxcixy Dioscojuyip canaag'oc. ¹³ Yi' ajcxy capxpadamb Dios miid co je m'ofrenda huidibi ajcxy ti myejccixy, yi' je' tiy'ajtip co miich ajcxy mgapxymidoogixy Cristo y'ayuc ytiy'ajt. Paady ycixp may mibijcpidijc ajcxy Dios ojadájtixipy e nañ jadu'n Dios ñbáatcixipy capxpaatcixipy miid je pubejtin huidibi miich ajcxy anajty myejcpy miid yi' ajcxy ycixpi, etz nañ jadu'n miid jacjadyii mibijcpidijc ycixpi. ¹⁴ E ci'm yi' ajcxy Dios ojadadipy mibijctzohuipy miid miich ajcxy ycixpi, etz xychójjcixip xyjihuiygixip ooy miid co Dios je mijpi conuucxin ti yecy ma

miich ajcxy. ¹⁵ Dioscojuyip yi Huindzin'ajtm Dios miid yi ymijconuucxin huidibi ti yecy ma ich ajtin, ni pin canejhuüy nej jëbi yajnajtzcaxiý.

10

Pablo miidity cõtujcin co y'apóstol'adyii

¹ Ich Pablo nmigapxypich miich ajcxy miid yungnaxy njot nhuinma'n, jadu'n nej jihuüy Cristo miich ajcxy xymiidmiydaaccixy. Com Cristo yungnaxy jot huinma'n miidity. Nijëjity miich ajcxy yminaangix co ooy yungnaxy naybidägyiijich co n'ityich miid miich ajcxy, e jadachambi co jigüëgy nyajpaadyich, hue' n'ahuimbityich ahua'n, ndunaamybich ti ndunaamybich. ² May'ajt nbijctzooybich co anajty ich miich ajcxy nicxy n'ijxcixy, ca' jadu'n ndzocyich co copicy n'ahua'ndägibich miid nijëjity miich ajcxy huidibi xyñihuambejtpich, co nduñich etz ngapxyich ngi'mtzojcin tim jadu'n nej huenpin naaxhuiñjây ytungixy etz ycapxcixy miid yci'mtzojcin. Janch ni'ixi' n'ityich, co anajty jim nmechich, chi miid nnayhuindinähuiybich yi' ajcxy huidibi jadu'n xyñihuambejtpich. ³ Janch tiy'ajt co ndzinaayich jadu'n nej naaxhuiñjây chinaaygixy. Per ca' ndziptuñich nej jây ajcxy chiptungixy. ⁴ Ca' ich ajt nyajtunim naaxhuiñjây ymic'ajt co nnaygohuaanim ma je jibicpi huidibi xymidzip'ajtm. Hue' nyajtunim Dios ymic'ajt, huidibi jëbi miid nmimadaacim tüg'óciy huidibi ca'oybi miid. ⁵ Jadu'n ich ajcxy ca' nyajtzobadäängixyich je ayuc tiy'ajt huidibi ca' yjanchity, etz je' ayuc pin amij agix naybidaacip co Dios y'ayuc ytiy'ajt adujci. Tüg'óciy naaxhuiñjây y'ayuc ytiy'ajt nbidääccixyich ma Cristo, jigix tüg'óciy jây ajcxy capxymidohuip Cristo. ⁶ Co anajty miich ajcxy mhuinma'nybidaaccixy co huadz mgapxymidohuaangixy tüg'óciy Cristo y'ayuc ytiy'ajt, pinjaty cacapxymidoy, hue' ni'ixi' n'ijtcixich co yajmöhua'n castigo pinjaty cacapxymidoo.

⁷ Miich ajcxy yi' mdzachcuenditungixy jây ajcxy nej yjây'ajtcixy. Pen jim pinjaty ñayjihuiyii janch agujc jotujc co Cristo yhuin'ixyii miid ytung ycixpi, huen huinjihuüygy jotjoty co Cristo ti xyhuin'ijxcixyich nañ jadu'n miid yi' ytung ycixpi. ⁸ Ich ca' ti tzo'ydu'n jihuüyich miid co ci'm nnaygömayiijich hueeni miid co Jesucristo xymoogygixyich ane'min cõtujcin. Com ich ajt nHuindzin Jesucristo ti xymóogygixyich jada cõtujcin, jigix ich miich ajcxy nyajeecip mmibijcin, canan nyajtigoyip ajcxy mmibijcin. ⁹ Ca' jadu'n ndzocyich co yquëxigipy jadu'n nej jihuüy n'adzigihuaangixy miid je necy huidibi nyajnigüeypich miich ajcxy. ¹⁰ Yminaangixy co ich nnecy ooy tzaachyaty chach chaach. E yminaangixy co ma jây ajcxy yhuinduu yung naxy njây'aty, e ngapxin nmiydääcinich ca' pin jäygidägy. ¹¹ Per yi jây ajcxy huidibi jadu'n minaangixp, copicy ajcxy nejhuñhuipy co jadu'n nej ich ngapxin necyjoty co nijayiygixy, co nyajpaadyich jiguem, nañ tim jadu'n ngapxa'ñich co anajty n'ityich ma miich ajcxy.

¹² Ca' huaad n'ocnay'ijxquixim o nyajtügiyim miid yi' ajcxy ytung huidibi tzach naygömayaanip ci'm. Tzuu huinma'n locihuinma'n ajcxy ytungixyp, co pin jadu'n nay'ixquixip naymidoguiixp miid yci'm'ayuc yci'mhuinma'n huidi ii yjajtpy ñe-jhuüyb. ¹³ Ca' ich ci'm naygömayiyb ma ycapadyii, huidibi ich ajcxy ca' xypátcixyich. Dios ich ajcxy xyajnejhuüybich nije' nije' it lugar ma yi' tzocy ndungixibich. E Dios jadu'n tzojc co nicxy ndungixy jim Corinto ma miich ajcxy myajpatcixy. ¹⁴ Paady ycixpi ndungixyich jëyi ma Dios xyquexyich, ca' jac ma. Nej ixypy y'octunyii y'ocjadyii, pen ca' ixypy ich jayijp ti n'ityich ma miich ajcxy. Pues ich tim jayijp ngapxhuäcx Dios y'ayuc ma miich ajcxy, e ca' jac ni pin. ¹⁵ Pen huingbi jây je Dios ytung yajtzondaacip ma tüg cajp, pues ca' ich huaad jim nduñich, jadu'n nej jihuüy ich ti nyajtzondägyich je tung. Ca' jadu'n nduñich, hue' njijp'ijxypich co miich ajcxy myajyeegip mmibijcin, huin'it jëbi njactunipich ma miich ajcxy, jadu'n nej Dios tzocy co ndunipyich. ¹⁶ Co anajty jadu'n ti njactuñich ma miich ajcxy, huin'it xii ya n'ihuäcxa'ñich ngapxhuäcxa'ñich Cristo

y'ayuc ytiy'ajt ma je it lugar jactim jiguemjatypí ma miich ajcxy. Per ca' nduna'ñich ma huingbi ti yajtzondägy je tung.

¹⁷ Ooy ycopyity ngömayim nyajmij'ajtim ajt nHuindzin Jesucristo, e ca' y'oyity co naygömayim ci'm. ¹⁸ Com Dios ca' jäygidägy pinjaty ci'm naygömayip. Hue' Dios yjäygidacypí pinjaty ajt nHuindzin Jesucristo capxpatp.

11

Pablo etz je' ajcxy huidibi y'ayuccapxhuäcxp miid anii

¹ Huaad co miich ajcxy ixypy xy'ocmimexxtujcích hueeni iich nloci huinma'ñ huidibi ngapxaamybich. Oy ixypy ñejity mímecxtuccích. ² Ooy ndzocy ooy njihuüyich miich ajcxy. Dios ti xymöyich je tzojcin jihuüyin huidibi nmíidich miid miich ajcxy ycixpi. Ndzocypich co cixyot huinjot miich ajcxy mmijpidaaccixy Cristo. Co miich ajcxy yajmij'adip Cristo cixyot huinjot, huin'it jadu'n miich ajcxy nipaadipy nej tüg töxy'anäg pi'cnip huidibi pijcp miid tüg yëydijc. ³ Ndzigüybich co huingbi jäy xyajhuinma'ñydigoyaangixy miid ixpicytjic y'ayuc huidibi ca' ytiy'ajtity. E miich ajcxy m'ixmadzaangixy jadu'n nej cixyot huinjot ti mmijpidaaccixy Cristo. Tim jadu'n nipaada'ñ miich ajcxy mjadaangixy nej yajaty jecy'ajty je Eva co tza'ñ yhuin'iini. ⁴ Com miich ajcxy mgöbijccixy huingbi jäy huidibi tigachjaty yaj'ixpijcp Jesús ytiy'ajt, ca' yjadu'nity nej iich ajcxy nyaj'ixpicyich. Etz nañ jadu'n miich ajcxy jotcuyc mgöbijccixy huingbi espíritu, ca' yjējity je Espíritu Santo huidibi ti mgöbijccixy jayijp'aty. Etz nañ jadu'n mgöbijccixy tigachjaty ayuc tiy'ajt, e ca' y'ocjējiñ huidibi ajcxy m'alma xyajnidzoocip. Ca' y'ocjējiñ huidibi ti mmidoogixy ma iich ajcxy. Mic'amy mdzachmijpidaaccixy huingjäy y'ayuc. ⁵ Ca' jadu'n ytiy'ajtity co yi huindzindijc ajcxy huidibi naydjigixp Jesús y'apóstol huidi jim ma miich ajcxy, co jac mic'ajt miid ajcxy etz yjacmiid ajcxy ixpicin ma Dios ytiy'ajt, ca'ydi iich. ⁶ Oy iich jada' ca' njatyich nej yajxon ngápñibich, ca' ooy ngo'ayúciğich. Per ca' ñejity com yajxon njatyich nnejhuüyich Dios ytiy'ajt. E ti nyaj'ijxcixy nyajnejhuüyigixy co n'ixpicyciğich ma Dios ytiy'ajt miid je ayuc huidibi ngapxhuäcxich ma miich ajcxy etz je mijhuinma'ñ huidi nduunich co jim n'ijtyich ma miich ajcxy.

⁷ ¿Nej tundigoyich jada' co ngapxhuäcxych Jesucristo y'ayuc ma miich ajcxy e ca' nbijctzooyich meeñ miid ndungich ycixpi? Jadu'n nnayyajnajxich anajty nej tüg midumbi jigix miich ajcxy jac'oy jacjotcuyc mdzinähuip. ⁸ Ti ngöbicyich meeñ huidibi jacjadyii mibijcpidijc ti xymöyich huidibi tzinaayb ma huingbi cajp. Yi' ajcxy ymeeñ nyajtuunich co nyaj'ixpijcyich miich ajcxy. ⁹ Co n'ijtyich miid miich ajcxy jadöjimijt jadöhuix'am ca' nbijctzooyich ma miich ajcxy huidibi nyajmayajtpyich anajty. Ca' n'adzijpyich ni pin. Yi migügtjic huidibi ajcxy tzoon Macedonia, yi' ajcxy xymooyich huidibi anajty nyajmayajtypich, paady ycixp ca' anajty meeñ nbijctzooyich ma miich ajcxy, ca' n'adzijpich miich ajcxy. E jadu'n njactuna'ñich jadu'n nej nduunich miid miich ajcxy co n'ijtyich jim jadöjimijt. ¹⁰ Nejhuiybich co yjanchity co nmíididyich Cristo ytiy'ajt, nañ tim jadu'n nnejhuüyich co ci'm nbaadyich huidibi miidnay'ixyijich. E ca' pin ma tüg'óciy je Acaya naaxjot xycapíjcbich jada jotcuyc'ajtin. ¹¹ ¿Na'amy co jadu'n nmína'ñich? ¿Je' co iich miich ajcxy ca' ndzojccixy? Ca' yjadu'nity. Dios ñejhuüyb co ndzocy njihuüyich miich ajcxy.

¹² Per njacyajtüyöyaamybich je ndungich huidibi ndumyich, e ca' meeñ nbijctzohua'ñich miid iich ndung ycixpi jigix co yi jacjadyii huindzindijc huidibi yaj'ixpijccixp ma miich ajcxy, ca' jēbi y'iindaaccixy co yi' ajcxy tú'ciy ytungixy jadu'n nej iich nduunich. ¹³ Yi' ajcxy yminaangixy co Cristo ti yajniñijcigixy co ajcxy yi' y'apóstol'adyii, e ca' yjanchity, nigoob ajcxy huin'iingixy yi mibijcpidijc. Ñayyajnáxigixy ci'm nej jihuüy Cristo y'apóstol'ajtigixy, e ca' yjanchity. ¹⁴ Nañ ni ca' oy nhuinmaayich co jadu'n idütcixy, com nañ jadu'n je Satanás ñayyajtigachyii ñayyajnaxyii nej Dios y'ángel huidibi tiy'ajt miid, e ca' yjanchity. ¹⁵ Paady ycixp

nmibijcpich co yi jäy ajcxy huidibi tumb miid je mujcu' nañ jadu'n naysajnaxyii jadu'n nej jäy tudägypí, e ca' yjanchity. Per Dios chaachytunamyb ajcxy jadu'n nej ypanyii miid je jibicpi ycixpi huidibi ajcxy ytumyb.

Je tzaachypí je ayo'n huidibi Pablo yjajtyp co y'ayuccapxhuäcxy

¹⁶ Jadüg'oc iich miich ajcxy nnimaagyixy: Ni pin ycamina'nipy co iich locijity. Per pen nijëjity jadu'n yminaangixy, ca' ñejity. Miich ajcxy amidoo'ijtcix iich n'ayuc, jigix jëbi naygömayiijich ci'm. ¹⁷ Ca' iich ajt nHuindzin Jesucristo xycötujcmöyich, co jadu'n jëbi ngapxyich jadu'n nej cham ngapxa'ñich. Hue' ngapxa'ñich jadu'n nej tüg loci jäy co naygömaya'ñyijich ci'm. ¹⁸ Mayjäy ajcxy ooy ci'm chachnaygömayáanigixyp miid huidibi ti tungixy miid yci'm mic'ajt ya naaxhuiñ. Nañ jadu'n iich nmaygömaya'ñyijich ci'm. ¹⁹ Miich ajcxy mdzachcöbijccixyp loci jäy ajcxy y'ayuc, je' co mdzachnayaj-naxáanigixy jadu'n nej jihuiy ajcxy ooy mdzachcohuinma'ñity. ²⁰ Mgöbijcyp miich ajcxy co jäy ajcxy xytumbi'adiyb nej tim tzojccixy, huidibi ajcxy xyhuinjicxp xyhuimbijcp xyhuimmeetzp, e huidibi ajcxy xy'ane'mgixp, xycamij'ijxcixy xycamijpidaaccixy, ixti mgöbijccixyp co xycojxcixy ma ajcxy mhuiñyijp. ²¹ Oy njatzo'ydu'njihuiyich co nmína'ñich co ca' jadu'n nmídidyich je jotmic'ajtin, jigix jëbi iich miich ajcxy nduuñich jibic, jadu'n nej yi jadu'mbi huindzindijc ti xytungixy.

Per jadu'n nej yi' ajcxy ñaygapxpadyii ci'm, nañ jadu'n naygapxpada'ñyijich ci'm. Ca' ñejity pen capxpich jadu'n nej tüg loci jäy. ²² Pen hebreojäy yi' ajcxy, hebreojäy iich nañ jadu'n. ¿Conaax cogajp ajcxy Israel? Iich nañ jadu'n. ¿Abraham ajcxy ymij'ap'ajtpy ymijteedy'ajtpy? Iich nañ jadu'n. ²³ ¿Nej tumb ajcxy miid Cristo? Nigi nduñyich miid Cristo, ca'ydi yi' ajcxy. Ca' ñejity oy ngapxyich jadu'n nej tüg loci jäy. Jac mic ti nduuñich miid Cristo ca'ydi yi' ajcxy. Canaag'oc codungdijc xychaachytuuñich. Ti nyajc'atyich miid matz etz miid coochac janch canaag ci' janch ycamacho'nity. Canaag'oc codungdijc xypidaacyich pujxtigoty, e yi' ajcxy ca'. Canaag'oc o'cin jipp'am ti nyajpaadyich, e yi' ajcxy ca'. ²⁴ Migoox'oc judíojäy ajcxy ytungmiidpi xyci'ajtyich miid cochac iipx majmocx midaax ci'. ²⁵ Tugiig'oc xychaachytuuñich miid matz. Tügtecy ajcxy xychaagächich. Tugiig'oc je barco yquiñ mejy'agujc je huidibi iich anajty nyajnicxiyb. Co je barco yquiñ tügtecy, chi tüg tzuum etz tüg xi' n'ijtyich ma je mejy anajty ooy ypidigy. ²⁶ Ooy viaje nduuñich canaag'oc, e o'cjipp'am n'ijtyich ma mijniigom yjadyii, e nañ jadu'n ooy anajty may meetzpi yajpaady ma anajty nhuidityich. Nmigogajpich, yi' judíojäy, xyjayaj'ögaanich ajcxy. Ti ayo'n nbaadyich ciudadjoty etz ma yuugjot etz mejyjoty. E nañ ti ayo'n nbaadyich miid jäy ajcxy huidibi naybidaacip ajcxy nej iich ajt nmigüg, e ca' anajty yjanchity. ²⁷ Minaajity ooy mic njihuiyich ndung n'ayo'nich. Canaag'oc ti ndzumnaxyich ca' nmäyich. Canaag'oc nxinaxyich miid yuu tidzibi. Janam jatzojc n'ayu'atyich. Minaajity ooy njihuiyich je tiichypí, etz nyajmayjatyich nhuit nducxyich.

²⁸ Miid jada ycixpi etz miid jac-huidijaty, nañ jadu'n jabom jabom ooy mic njihuiyich jadu'n nej yajpaady je mibijcpidijc nidüg'óciy canaag picy xi ya. ²⁹ Pen nijëjity mibijcpidijc yajpaady amutz ma ajcxy ymibijcin, nañ jadu'n iich nayjihuiyijich amutz. Pen nijëjity mibijcpidijc ypocytungixy, iich ndzo'ydu'n njihuiybich etz jibic nayjihuiyijich miid yi' ajcxy ypocy ycixpi. ³⁰ Pen naygömayaanibich ci'm, naygömayaanibich co amutz njihuiyijich. ³¹ Je Dios iich ajt nHuindzin Jesucristo yTeedy, je huidibi huaad n'ojadajtim n'ibaatim ngapxpaatim huinixii huinitiempo, yi' ñejhuiyb co tiy'ajt jadu'n nej ngapxyich. ³² Jecy'ajty co n'ijtyich jim Damasco, je gobernador huidibi anajty tumb miid je rey huidibi yxi Aretas, ypidac soldados ajcxy ma jadyii mijtu' yca-jptigy, jigix jëbi xyajnicxyich mach. ³³ Per je mibijcpidijc ajcxy xycodiyñajxich naaxcixy mijcachjoty ma tüg ventana aguu ma je mijpoch huidibi je cajp miid yjübojtz'ahuidityity. E jadu'n ndzoocyich ma je gobernador yci'am.

12

Huidibi Pablo yhuin'ijx etz nejhuiy

¹ Ni ti ycayajpaady ycayajganar'aty co ci'm ndzachnaygömaayim ndzachnayñigapxim ndzachnayñimiyaacim. Per ca' y'ocnejity nimiydägaamybich ti nhuin'ijxypich cumäyjoty, je huidibi je Huindzin Jesucristo xyajhuin'ijxpich xyajni'ixiibich.

² N'ixy'ajtypich tüg yëydijc huidibi mibijcp Cristo. Cham majmactz jimijt ma Dios yajpättigiyi tzajpjoty ma je midugiipci tzajp. E ca' nejhuiyich pen hue' yajpättigiyi miid ñinix o pen ca'. Dios tügpajc nejhuiyb. ³⁻⁴ Jadüg'oc nmına'ñich co Dios ti yajpättigiy je yëydijc ma je oybi it. E ca' nnejhuiyich pen janch ti ypättigiy miid ñinix o pen ca'. Dios tügpajc nejhuiyb. E jiiby ma je oybi it midoy capxy ayuc huidibi ca' huaad ni pin jäy capxy miydägy nimina. ⁵ Ooy ich amij agix nayjihuihua'ñyijich miid je jadu'mbi yëydijc jadu'n nej jëjin huidibi Dios yajpättigiy tzajpjoty. Per ca' ich ci'm nayñimiydäga'ñyijich naygömaya'ñyijich. Hue' janchtiy nayñimiydägaanibich ci'm nej nduñ n'ayooyich ma ich ndzinaayin. ⁶ Oy ixipy ich ci'm njanayñimiydäga'ñyijich janch oy nej nduñ n'ayooyich, ca'p je' anajty ngapxtigooyich, com je' anajty ngapxpich je janchypi. Per ca' jadu'n naygömaya'ñyijich, com ca' ndzocyich co jäy ajcxy nicxy xycömaayich nigı anaxy. Huaad jadu'n co ajcxy miid miydacy je migügtijc huidibi ajcxy ijxcixp huidibi ndumybich o huidibi ayuc ajcxy ymidoogixp huidibi ngapxpich.

⁷ Je capxy ayuc huidibi Dios xyajnejhuiyich jiiby tzajpjoty, ooy anajty chach y'oyity. Paady ycixpi Dios pidacy jadu'n nej jihuiy tüg apy ma ich nninix, jigix ca' ydi amij agix nayjihuiyijich. E je apy jadu'n nipaady nej mujcu' xyajtzaachiyich. ⁸ Tugiig'oc Dios ti nmibjctzooyich co huen xyajpidzimich je huidibi xyajtzaachiyibich. ⁹ Per je Huindzin Jesús xyñimaayich: “Jëbi jadu'n co may'ajt ndunipich miid miich ycixpi. Co pinjaty pumäy ñayjihuiyii, huin'it nigı ñiguëxıgy ich nmic'ajt.” Paady ycixpi njotcugiyich co pumäy nayjihuiyijich, jigix ñiguëxıgıpy Cristo ymic'ajt ma ich ndzinaayin. ¹⁰ Paady ycixpi ooy njotcújidyich co pumäy nayjihuiyijich, co jäy xyñigapxy xyñi'ojiyich, co ti nyajmayjatyich, co jäy xy'ixhuidityich xpahuidityich, co tzaachypi nyajnaxyich miid Cristo ycixpi. Co nayjihuiyijich pumäy, chi nigı mic nayjihuiyijich miid Cristo ymic'ajt ycixpi.

Pablo ca' yjotcujc'aty nej je mibijcpidijc ajcxy jim Corinto ytungixy

¹¹ Co ich jadu'n ci'm naygapxpadyyijich, tim jadu'n nipaady nej jihuiy ich tüg loci jäy. Adzip miich ajcxy jadu'n xytuuñich co copicy naygapxpadyyijich ci'm. Hue' yjapaadyii miich ixipy ajcxy xycömaaybich xycapxpatpich. Ich ca'p ich ti ndzoohuity. Oy ixipy ich ca' ti mic'ajt nmıdidyich, per jatytimy nigı mic'ajt nmıdidyich, ca'ydi yi huindzindijc huidibi ma miich ajcxy, huidibi ajcxy naydijp apóstol, e ca' yjanchity.

¹² Ma je tung huidibi nduñich miid mecxtujcin ma miich ajcxy, ti ooy ñiguëxıgy miid canaag ijxpejt, mijhuinma'ñ etz milagros, co ich janch Cristo xy'apóstol'adyijich. ¹³ Ca' jadu'n ytiy'ajty co mminaangixy co nigı oy ti nduñich ma yi jacjadyii mibijcpidijc ma jacjadyii cajp, ca'ydi jadu'n nej ti nduñich ma miich ajcxy. Pen ti ndundigooyich co ca' ti nbijctzooyich meeñ miid ich ndung ycixpi ma miich ajcxy, jadu'n nej jacjadyii ajcxy ytungixy, pues tungix may'ajt meecxich ajcxy.

¹⁴ Jadachambi ni'ixi' n'ityich co nnicxa'ñich midugiig'ocpi jim ma miich ajcxy. Ca' ti pubejtin nbijctzohua'ñich ma miich ajcxy miid ndungich ycixpi. Ca' ndzocyich miich ajcxy mmeen. Hue' ndzocyich co miich ajcxy xymijnicxpedipyich. Jac'oy co ich miich ajcxy nbubedipy, ca'ydi co miich ajcxy xypubedipyich. Jadu'n ich nipaady miid miich ajcxy nej tüg ungedeedy. Je ungedeedy ypubejtpy y'ung, e ca' nan je ung pubejtyp yteedy. ¹⁵ Ich jotcujc nyajtundähuibich ma miich ajcxy tüg'óciy tijaty nmıdich, ixti ngı'mmic'ajtich tüg'óciy nyajtunaamybich miid miich ajcxy ycixpi, jigix jëbi nbubedipyich miich ajcxy. Oy janiguëxıgy co ich miich ajcxy njadzocxıy njajihuiyigıy, e miich ajcxy ca' xychójccıyich xyjihuiyigıyich.

¹⁶ Nijëjity miich ajcxy mmînaangixy co janch tiy'ajt co ca' ti pubejtin ti nbijctzooyich ma miich ajcxy, nijëjity ymînaangixy co janch nihuinma'n ti nyajcägixyich ma tüg trampi miid anî. ¹⁷ ¿Nej ti ïch miich ajcxy nhuin'ïngix miid je migügtjic huidibi ajcxy nyajnigüeïx? ¹⁸ Nbijctzoohuich may'ajt ma Tito co huen nicxy xycogapxiïygixy jadüg'oc. E nyajpuguexiïyich jadüg ajt nmigüg huidibi miid ñicxy quipxyi. ¿Nej ti miich ajcxy Tito xyhuin'ïngixy? ¿Nej ca' yjanchity co ïch etz Tito quipxyjaty ïch ajcxy nhuinma'n nmîidity, e tú'ciy ndúngixyich?

¹⁹ Ca' yjeyity co miich ajcxy mhuinma'ñybidáaccixy co ïch ajcxy ndzachnayñigapxtúutigixy ma miich ajcxy. Ca' yjadu'nity. Ngápxcïxpich nmiydáaccïxpich ma Dios yhuinduu je ayuc tiy'ajt huidibi Cristo xymóoygixich. E tüg'óciy huidibi ndúngixpich, hue' ndúngixich jigix yeegip miich ajcxy mmibijcin. ²⁰ Com tzigïybich co anajty nicxy n'ïjxcixyich miich ajcxy, ca' jeyity co nbadaamybich je tiy'ajt co miich ajcxy ca' mhuinma'ñmîidity jadu'n nej jëbi njäygidägyich yi mhuinma'n ajcxy. E miich ajcxy nañ jadu'n ca' mjäygidáaccixipy nej ïch nhuinma'n mîidityich. Tzigïybich co miich jada' ajcxy mnaychiptúnigixy, ca' mnay'ixáanigixy nidüg nidüg, mnaymijotmá'tigixy; mnayñi'ojïyigixy, e mbiitzcapxcixy; co ooy amij agix mnayjihuiïygixy, e ca' mnay'ayuc-huinjihuiïygixy, ca' oy m'ijtcixy. ²¹ Tzigïybich co jadüg'oc nicxy n'ixyich miich ajcxy, chi ajt nDios xyajjihuiïybich tzo'ydu'n miid miich ajcxy ycïxpi, etz njihuiïybich tajin mayin miid miich ajcxy mbocy ycïxpi, e com ca'ni mjothuimbijtcixy mjäydigooygixy je mjïbic-huinma'n jadu'n nej mmigapxtigooygixy e mmidundigooygixy huingbi töxyjäydijc, etz jadu'n nej mmidundigooygixy migüg ytöxyjic, etz jadu'n nej jïbic-huinma'n miich ajcxy mîidity.

13

Ane'min capxhuijin etz capxpoocxin huidibi cijxnip je necy

¹ Jada je' ymidugüg'oc co ïch miich ajcxy nicxy ngo'ixïhuaangixyp. Pen miich ajcxy mxïhuaangixyp tüg migüg ma ïch co ti ytundigooy miid Dios ytiy'ajt, hue' tzocy miid metz o tugüg testigos. ² Co je mîimejtz'ocpi ïch miich ajcxy oy ngo'ixïy, chi nnîmaayich yi' ajcxy huidibi ti ytundigooygixy anajty, e nañ jadu'n nnîmaayich je huidibi jacpocytungixp co ïch anajty jadüg'oc nicxy miich ajcxy n'ïjxcixy, ca' nyajtuna'ñich mecxtujcin ma yi huidibi ajcxy pocytungixp. E cham co nyajpaadyich jiguëgy ma miich ajcxy, nnïgapxpejtpyich ma jada necy co jadüg'oc nicxy n'ixa'ñich miich ajcxy, ca' nmîmecxtuga'ñich yi' ajcxy huidibi pocytungixp. ³ E jadu'n miich ajcxy mmîd'adipy tiy'ajt co ngapxnajxich Cristo y'ayuc. E Cristo ca' je' yjadu'nity nej tüg jäy huidibi ca' mic'ajt mîidity. Hue' je' yajnigüëxïgyp ymic'ajt ma miich ajcxy. ⁴ Janch tiy'ajt co jadu'n ajcxy yajcruudzpejty Jesucristo nej jihuiïy ca' anajty mic'ajt mîidity. Per jadachambi Jesucristo jugy'ajtp miid Dios ymic'ajt. Nañ tim jadu'n co n'ijtim miid Jesús, jadu'n yquëxïgy nej jihuiïy ca' mic'ajt nmîd'ajtim. Per co n'ida'ñich miid miich ajcxy, nmîd'adaanibich Dios ymic'ajt miid co nyajpaadyich ma Cristo.

⁵ Ci'm naydiy'ajtpïjcigix nidüg nidüg, pen janch tiydudägy mmibijccixy Cristo. Ci'm huinmaaygix ma ajcxy mgi'mdzinaayin, pen janch mmibijccixy. ¿Nej ca' mdimjihui'mybijccixy, pen miid ajcxy Cristo ma mjot mhuinma'n? Pen ca' yjadu'nity hue' anajty Cristo mmibijccixy nigixy cohujc. ⁶ Per njïp'ijxypich co miich ajcxy mnejhuiïuipy co yjanchity co Cristo ti xyajniïbicyich yi' ytung, e ca' n'ïndägyich. ⁷ Dios nmibijctzooybich miid miich ajcxy ycïxpi, jigix ca' ti jïbic-huinma'n mdúngixipy. Canan co ïch ajcxy ndzachcömaybidzimmáangixyich, o co ïch ajcxy nigî nmîidity Dios ytiy'ajt ca'ydi jac ni pinjaty. Jadu'n ndúngixyich, jigix miich ajcxy mdunipy oybi. Ca' ñejity oy jadu'n yquëxïgipy nej jihuiïy ïch ajcxy ca' oy mij n'ixpïcycigich. ⁸ Com ca' huaad ni ti nej ndunim huïdibi ca' yjanchity huidibi ca' ytiy'ajtity. Hue' tzocy co tüg'óciy huidibi ndunim, naybadiïb miid Dios ytiy'ajt. ⁹ Paady jotcujc ïch ajcxy co nyajpáatcixyich

nej jihuïy ca' ñch ajcxy mic'ajt nmiidity, jigix miich ajcxy mic'ajt mmiid'adipy ma mmibijcin. Nmibijctzoohuaamybich ajcxy Dios miid miich ajcxy ycixpi, jigix ajcxy mmibijcin mi'ijtcixipy ca'pxy. ¹⁰ Jada necy ñch jayjip nguexamyb ma miich ajcxy, ma yam ca'ni nicxy n'ijxcixyich miich ajcxy jadüg'oc, jigix ca'ydi adzip ahua'n anajty nyajtuuñ ñch n'ane'min ma miich ajcxy. ñch ajt nHuindzin Jesucristo ti xymöyich mic'ajt, jigix jëbi ñch miich ajcxy nyajyeegipy ma mmibijcin. Ca' nyajtigoyaanich miich ajcxy yi mmibijcin.

¹¹ Migügtijc ajcxy, capxcijxpich miid miich ajcxy, huen Dios xypubéjtcixipy xypudigüiygixipy. Mijottigooygix cuydunaangix tüg'óciy Dios ytiy'ajt ma mdzinaayin. Jotcujc'ajtcix. Chinaaygix miid tú'ciy mjot mhuinma'ñ. Naymiid'ijtigixy agujc jotcujc. Huen ajcxy Dios xymiid'ijtcixy. Je Dios huidibi jotcujc'ajtin yejcp, e nañ jadu'n Dios xychojctáaygixipy xyjihuiydáaygixipy. ¹² Naygapxpóocxigix xíc xon. ¹³ Tüg'óciy Dios yjyä huidibi ya, yquejxyp ajcxy capxpóocxin ma miich ajcxy.

¹⁴ Huen ajt nHuindzin Jesucristo may'ajt oy'ajt tunipy miid miich ajcxy ycixpi. Huen Dios xychojccixy xyjihuiygixy. Huen Dios yjihui'ñ ymic'ajt ity ma nidüg'óciy miich ajcxy mjot mhuinma'ñ. Jadu'n ngapxycíxyich. Amén.

GÁLATAS

Yi Necy Huidibi Pablo Yajniejx Je Mibijcpidijc Jim Gálatas

¹ Hich Pablo, Jesucristo xyquejxich co ngapxhuäcxibyich yi' y'ayuc. Ca' nminaanim jäy ajcxy xyajnbijcich jada tung. Jesucristo etz Dios Teedy ajcxy ti xyajnbicyich jada tung. Je' je' je Dios huidibi yajjugypijc Jesucristo co y'o'cy. ² Hich etz tüg'óciy migügtijc ajcxy huidibi ya yajpatp ma ich nyajniejxpich jada necy ma nidüg'óciy pinjaty mijpidacp Jesucristo, huidijaty naymujcip ma nidüg nidüg cajp jim Gálatas naaxjot. ³ Nmibijctzooybich Dios Teedy etz ich ajt nHuindzin Jesucristo co huen oy'ajt etz may'ajt tuñ ma miich ajcxy etz nañ jadu'n xyajjotcugihuip ajcxy. ⁴ Hich ajt nHuindzin Jesucristo ti nayyoxyii ti naydogyii ci'm anajty ma yi o'cin miid ich ajt nbocy ycixpi. E jadu'n ti xyñihuaanim ma je jäy ajcxy huidibi jibic huinma'ñ ymiid huidibi tzinaayb ajcxy ma jadachambi xi tiempo. Jadu'n Jesucristo tuñ miid ich ajt ycixpi, com ich ajt nDios Teedy jadu'n tzojcp. ⁵ Ooy y'oyity co Dios Teedy huen mij etz cömay y'idipy huinixii huinitiempo! Jadu'n jada. Amén.

Ca'p ji huingbi tiy'ajt huidibi jäy y'alma yajnidzocp

⁶ Ooy ndzachhuinmaayich jadu'n nej tim tzojcy ti mijpyöyducixy je Huindzin Dios ytiy'ajt. Dios xyhuin'ijxcixy jigix jëbi mmibijccixy je oy'ajt je may'ajt huidibi Jesucristo ytuun miid miich ajcxy ycixpi. E miich ajcxy ti mhuinma'ñ myajtigajtcixy, e ti mmibijccixy huingbi jäy ajcxy y'ayuc, jadu'n nej ca' jëbi m'alma nidzoocin padaangixy. ⁷ Ca' nminaanim co ji jadügnax Dios ytiy'ajt. Hue' je'nijëjity jäy ajcxy ti xya-jhuinma'nyidigooygixy, ooy ajcxy yajtigadzaangixy je Dios y'ayuc ytiy'ajt nej Jesucristo xyajnidzögaani ajcxy m'alma. ⁸ Co ixypy ich, o co ixypy nidüg ich ndiscípulo, o co ixypy tüg ángel huidibi tzajpjoty tzomb capxhuäcx ixypy ma miich ajcxy ayuc tiy'ajt tigachjaty huidibi ca' ñaybadyii miid je tiy'ajt huidibi nyaj'ixpijc ajcxy oga'n'aty, ca' mgöbijccixipy yjadu'mbi ayuc huidibi ajcxy xyajnidigoyaangixy xyajtüdigoyaangixy, Dios tzaachytunib yi' ajcxy y'alma. ⁹ Ti jayijp nyajnimay, e cham jadüg'oc nigapxpetyich, pen ji pinjaty capxhuäcx ma miich ajcxy tiy'ajt tigachyjatypi, huidibi ca' ñaybadyii miid je tiy'ajt je tiibi miich ajcxy m'ixpijccixy, copicy Dios chaachytunipy jada jäy miid ypocy ycixpi huidibi xychachyajnidigooygixp xychachyajtüdigooygixp.

¹⁰ Co jadu'n nmína'ñich, ¿nej mdijy co ndzocyich co jäy ajcxy xyjäygidägipy o co Dios xyjäygidägipy? ¿Nej ndzachyajjot'adaanich jäy ajcxy? Ca' huaad nduunich huidibi jäy ajcxy chojcpy, yi' janchtiy ndumybich huidibi Dios chojcpy. Co ixypy nduunich huidibi jäy ajcxy yjäygidacpy, ca' ixypy nguyduunich Cristo ytiy'ajt.

Nej Pablo oy paady je apóstol'at

¹¹ Paady ndzocyich migügtijc co mnejhuñhuip ajcxy jada co je Dios y'ayuc ytiy'ajt huidibi ngapxyhuäcxpich anajty ma miich ajcxy jadu'n nej jëbi ajcxy m'alma ñidzögipy, ca' yi' ayuc'adyii tiy'ajt'adyii huidibi jäy ci'm ti cojcixy ti maacxcixy. ¹² Com je Dios y'ayuc ytiy'ajt huidibi nmíidich, ca' ti nbaadyich ma jäy ajcxy, nañ ca' nminaanim jäy ajcxy ti xyaj'ixpicyich. Jesucristo ci'm ti xyajhuinjhuñyich jada tiy'ajt.

¹³ Com miich ajcxy mnejhuñyigixp jadu'n nej jecy'ajty ich ti ndzinäyich, co ich anajty nmijpidägyich yi' judfojäy ajcxy ycostumbre. E mnejhuñyigixp jadu'n nej jecy'ajty n'ixhuidijtyich nbahuidijtyich mictägy je jäy ajcxy nidüg'óciy huidijaty anajty mijpidaaccixp Dios ytiy'ajt. ¹⁴ Nigi ich anajty n'ixpicyidyich ma yi judfojäy ajcxy y'ixpijcín ca'ydi jac pinjaty judfojäy, ca'ydi jac pinjaty nmigügtijcich huidibi tügnax yjimijt miid ich. Com ooy anajty nigi ndzachmijpidägyich n'ap ndeedyich y'ayuc. ¹⁵ E Dios xyhuin'ijxich jayijpni ca'ni anajty ma'xung'atyñich co ndúnibich yi' ytung. Miid co Dios ooy ti xchocyich ti xyjihuyich, paady xyhuooyich miid ytung ycixpi. ¹⁶ Dios xyajnejhuñyich yi' y'ung y'ayuc ytiy'ajt, jigix ngapxhuäcxibich yi' y'ayuc ma yi jäy ajcxy

ca'pi yjudíoáyity ajcxy. Ca' pinjaty n'ixtaayich huidibi jébi xyaj'ixpicyich Dios ytiy'ajt, hue' Dios ci'm xyaj'ixpijcyich yi' ytiy'ajt. ¹⁷ Nañ jadu'n ni ca' nbättigiyyich jim Jerusalén ma yajpaady y'apóstoles ajcxy huidibi anajty ajcxy Dios ti yhuin'ixyii. Chi tiyi nnicxyich jim Arabia ñaaxjot. Co ñich jim hueeni n'ijtyich, chi nhuimbijtyich jim Damasco.

¹⁸ Cooni tugiig jimijt nhuäcxijpyich huin'itni nbättigiyyich jim Jerusalén. Chi n'oyich ma Pedro anajty yajpaady, e chi jim nmüid'ijtyich jëyi majmocx xii. ¹⁹ E ca' nmünaybaattich yi jacjadyii apóstoles. Jëyi ñich müid naybaati je Jacobo, je Huindzin Jesús y'uch. ²⁰ Je huidibi cham ñich miich ajcxy niyajjayiigixyp, tiy'ajt yi'. Y'ijxyp ñejhuüiy Dios co ca' n'üindägyich.

²¹ Co ndzooñich Jerusalén, chi nnicxyich Siria naaxjot etz jim Cilicia naaxjot. ²² Je huin'it tiempo yi Cristo yjáy ajcxy huidibi nayyöymujcip cajp cajp jim Judea naaxjot, ca' ajcxy anajty xy'ix'adyiijich huingíxy jijpcíxy. ²³ Jëyi ajcxy nejhuüiy anajty co jáy chachmínaangíxy: “Yi jáy huidibi anajty xychach'ixhuidijtim xychachpahuidijtim, cham yi' tzachcapxhuäcxy je Cristo ytiy'ajt, je tiy'ajt huidibi anajty ytimyyajcödígoyamyb.” ²⁴ Co je mibijcpidijc oy jadu'n tiy'ajt nejhuüiygíxy, chi ajcxy yajnajxy Dioscojuyip ma Dios müid ñich ycxipi.

2

Jacjadyii Jesús y'apóstoles ajcxy cöbijccixy yi Pablo

¹ Co majmactz jimijt, chi jadüg'oc nnicxyich jim Jerusalén quipxyi müid Bernabé. Nañ jadu'n Tito xypanícxxyich. ² Dios jadu'n ti xyajnejhuüiyich co copícy nícxibich jadüg'oc jim Jerusalén. Chi jim nyajmüidmiydacyich nijëjity jáy huidibi Jesús ti yhuin'ixyii ajcxy, je huidibi ajcxy nigohuajc'ajtp anajty je mibijcpidijc. (Ahuingujc ñich ajcxy nxiicmujcy ngapxmujcy, ca'ydi ymayjáy'agujcity.) Nyajmüidmiydactaayich je Dios y'ayuc ytiy'ajt huidibi ngapxhuäcxypích ma yi jáy ajcxy ca'p yjudíoáyity. Jadu'n ngapxtícxxyich n'ayucich ndiy'ajtich, jigix ca'ydi ajcxy xycapx'aducyich, e ti anajty jadu'ñyi ñaadigí'aty ñich ndung huidibi jayijp ti nduüñich etz huidibi njactunaamybich anajty. ³ Je jáy ajcxy huidibi nigohuajc'ajtp anajty je mibijcpidijc jim Jerusalén yjägídac ajcxy ñich n'ayuc jadu'n nej ngapxtícxxyich, e nañ ni ca' ajcxy ymínañ adzip co copícy yajtiy'ajttíhuipy je Tito huidibi xypa'oyich jim, com griegojáy je' anajty, paady ca' yajtiy'ajttíy anajty. ⁴ Ca' ixypy pin huaam ycamínañ jim Jerusalén co Tito ca' yajtiy'ajttíy, co ca' nijëjity mibijcpidijc ycatigíy ayüch ameech huidibi ca' ymibijccixy cixyot huinijot Cristo ytiy'ajt. Hue' ajcxy amido'ijtcixy n'ayucich nej huaad xyjijpcogapxiigixyich. Ca' ajcxy yjotcujcity co ngapxhuäcxyich co nmibijcím Jesucristo, e ca' copícy nguudunim judíoáy ycostumbre. Yi' ajcxy adzip xyajni'uidzaambich yi judíoáy ycostumbre, jadu'n nej jáy codoogíy ajcxy adzip ytuungíxy ma yhuindzin ytung. ⁵ Ni catügjaxígy ajcxy xycamímadacyich, e ni xycayaj'amoñ ñich ajcxy, com hue' ndzocyich co huen Dios y'ayuc ytiy'ajt oybi ity huädz ma miich ajcxy ca' ma añi.

⁶ Yi apóstoles ajcxy huidibi Jesús ti yhuin'íxigíxy huidibi ajcxy nigohuajc'ajtp yi mibijcpidijc, ca' ajcxy ni ti tiy'ajt xyjacmöyich jemybi huidibi ca' jayijp nnejhuüiyich. (Peni capxpaady ajcxy o peni ca' ycapxpaadyity, ca' nduüñich cuendi. Com Dios ca' huin'ixpety jáy ajcxy tiyduñ.) ⁷ Co oy ajcxy nejhuüiy co Dios ti xyquexyich ngapxhuäcxyich yi' y'ayuc ytiy'ajt ma yi jáy ajcxy huidijaty ca' yjudíoáyity, tim jadu'n nej ti quexy Pedro co capxhuäcxi yi' y'ayuc ma yi judíoáy ajcxy, ca' ñich yi' ajcxy anajty n'ayucich xyjijpcogapxiyich, ooy ajcxy jägídac y' n'ayucich ndiy'ajtich. ⁸ Yi Dios huidibi Pedro quejx huen yi' y'ayuc capxhuäcxy ma yi judíoáy ajcxy, nañ jadu'n ñich xyquejxich co yi' y'ayuc ngapxhuäcxiyich ma yi jáy ajcxy ca'p yjudíoáyity.

⁹ Je Jacobo, je Pedro etz Juan ajcxy, je huidi nigohuajc'ajtcixp yi mibijcpidijc, co ajcxy nejhuüiy jadu'n nej anajty Dios may'ajt oy'ajt ti tuüñ müid ñich, chi ajcxy xycöbijcyich agujc jotcujc Bernabé etz ñich. E chi ñich ajcxy müid nay'ayuc-huinijhuüiyi co jébi ñich etz Bernabé nícxibich ma yi ca'p yjudíoáyity ajcxy, etz jébi yi Jacobo, Pedro etz Juan ajcxy

ñicxcixy ma yi judíoŷäy ajcxy. ¹⁰Jëyi ajcxy may'ajt piŷtzoy ma ñich etz Bernabé co jadu'n pa'ayo'n nduniŷyich ma yi judíoŷäy ayoobitjic. E chi ñich ngo'adzoy co ndunamybich jadu'n agujc jotcujc.

Pablo oŷy yi Pedro jim Antioquía

¹¹E jadu'n anajty miid ti n'ocnay'ayuc-huinŷihuŷiyibich ixti coon Pedro ycidacy jim Antioquía. Chi jim nnimaayich huinŷijp co ti anajty jim Dios ytiy'ajt midundigooyi co puhuäctuatni je huidibi ca' yjudíoŷäyity, ca' y'ocmiidcaymujcni. ¹²Com co ca'ni anajty ymiñ jim Antioquía je judíoŷäy ajcxy huidibi anajty tzomb ma Jacobo jim Jerusalén, chi Pedro miidcaymujcni je jäy ajcxy ca'p judíoŷäyity. Co ajcxy ymiñ choon Jerusalén, chi Pedro oy puhuäctuatni je huidibi ca'p yjudíoŷäyity, ca' y'ocmiidcaymugaani anajty. Com Pedro tziŷiyb anajty co ñi'oŷihuŷiyb je judíoŷäy huidibi minamb co ooy ycopicyity yajtiy'ajttihuŷipy tüg'óciy jäy ajcxy huidibi miŷijccixp Jesucristo. ¹³Co Pedro jadu'n oy y'idíich, chi je jacjadyi judíoŷäy ajcxy huidi anajty jimip nañ tim jadu'n oy y'idíitzcixy. Oy ajcxy janehuŷy tiy'ajt, e huädz cuydungixy. Ixti Bernabé nañ jadu'n y'idíich nej Pedro, com ca' anajty yjotmicity. ¹⁴E co ñich jadu'n oy n'ixyich co ca' ajcxy cuydungixy yajxon Jesucristo ytiy'ajt, chi ñich nnimaayich Pedro mayjäy'agujc: “Peni miich judíoŷäy, e ti m'ixmajtzní judíoŷäy ycostumbre co ti miŷicy Jesucristo, e ti m'occuydumyŷ je huinma'ñ huidibi judíoŷäy ca' cuydungixy, ¿nej tijy cham co adzip mdzachminaandägy co yi' ajcxy huidibi ca'p yjudíoŷäyity, copicy cuydungixipy judíoŷäy ycostumbre, huidijaty miich ti m'ixmajtzní?”

Yi judíoŷäy ajcxy quipxyjaty miid jacpinjaty

¹⁵Jadu'n njacnimaayich Pedro: “Ñich etz miich judíoŷäy ñich ajt, huidibi ndaj'ajtim ndeedy'ajtim nañ judíoŷäy. E ca' ñich ajt njadu'nity nej jäy ajcxy ca'pi yjudíoŷäyity, huidibi ca' cuydungixy Dios ycötujcin je jecyip huidibi Moisés yjayhui'm. ¹⁶Miich Pedro ñich ajt nnejhuŷiyim co jäy ajcxy ca' jëbi Dios yajpocyñihuächyii miid tim jëyi co ajcxy cuydungixy Dios ycötujcin je jecyip huidibi Moisés yjayhui'm. Co yi jäy ajcxy miŷijccixy Jesucristo, huin'it janchtiy Dios yajpocyñihuätziy ajcxy. Nañ tim jadu'n ñich ajt, ti nmibijcim je Cristo jigix jëbi Dios xyajpocyñihuaatzim. E ca' jëbi huaad Dios xyajpocyñihuaatzim ajt miid tim jëyi co ti nguyduunim Dios ycötujcin je jecyip. Ca' ni tüg jäy huidijaty jëbi Dios yajpocyñihuächyii, miid tim jëyi co cuyduuni Dios ycötujcin je jecyip.”

¹⁷Co ajt nhuinma'ñ nbidaacim co nmibijcim Cristo jigix Dios jëbi xyajpocyñihuaatzim, huin'it je judíoŷäy yminaangixy co jibic-huinma'ñ nyajtuunim co ca' njaccuyduunim yi' ajcxy ycostumbre. ¿Nej mdijy je Cristo xyajtundigooyim jadu'n nej judíoŷäy yminaangixy? Ca' yjadu'nity. Ca' jëbi huaad je Cristo xyajtundigooyim. ¹⁸Co ixypy nmijpidaacim jadüg'oc Dios ycötujcin je jecyip, je huidibi ti n'ixmajtznim, jada ixypy ijxpejt'ajtp co ndundigooyim ma Cristo ytiy'ajt. ¹⁹Jecy'ajty co nguyduunich anajty Dios ycötujcin je jecyip, huin'it ca' anajty nbaadyich tiy'ajt nej jëbi huaad Dios xyajpocyñihuaachich, e jadu'n nipaady nej jihuŷy ti n'ögyich. Paady ycixpi ti n'ixmachich je jecyip cötujcin, e ti nmijpidägyich Jesucristo ytiy'ajt jigix jëbi njactzinäyich miid Dios ycixpi. ²⁰Jadu'n nayŷihuŷiyijich jadu'n nej jihuŷy ti n'oc'o'cpich, jadu'n nej jihuŷy ti ngrudzpetyich quipxyi miid Cristo. Jadachambi ca' n'octzinaayñich miid ngi'm jugy'ajtin ycixpi. Hue' je' je Cristo ymic'ajt etz ytiy'ajt ti chinaydacpicy ma ñich njugy'ajtin. E jadu'n nej cham njactzinäyich miid ñich nninix, jactzinaaybich miid Dios y'ung ycixpi, nmijpidacypich Dios y'ung. Dios y'ung ti xychocyich ti xyjihuŷyich, e ti nayoxyii naydogyii ma yi o'cin miid ñich nbocy ycixpi. ²¹Ca' nniyajtigoya'ñich je may'ajtin je oy'ajtin huidibi Dios ti tuuñ miid ñich ycixpi. Co ixypy jëbi Dios xyajpocyñihuaatzim miid co ajt nguyduunim Dios ycötujcin jëyi, huin'it ixypy ti ñaadig'i'aty je Cristo co y'o'cy miid ajt nbocy ycixpi.

3

Je ycötucin huidibi Moisés yejc o je mibijcin

¹ Janch loci miich ajcxy migügtijc huidibi tzinaayb jim Gálatas naaxjot. Ti jäy ajcxy xyajhuinma'ñydiogooygixy miid jibic-huinma'ñ. Paady ycixp mdzach'ixmadzaangixy je Dios ytiy'ajt. Hich oy njacapxhuäcxyich ma miich ajcxy mhuinduu je tiy'ajt jadu'n nej Cristo yajcruudzpejti miid ich ajt nbocy ycixpi. ² Yi' nyaj'amidooyb: ¿Nej ti mbaatcixy Dios yjihui'ñ ymic'ajt miid co mdzachcuyduuni Dios ycötujcin je jecyip? o ¿Nej ti mbaatcixy Dios yjihui'ñ ymic'ajt miid co ti mmidoogixy Jesucristo y'ayuc e ti mmibijccixy? Hue' janchtiy ti mbatcixy Dios yjihui'ñ ymic'ajt co ti mmibijccixy Jesucristo, ca' nminaanim co ti mguydungixy Dios ycötujcin je jecyip. ³ Co Dios oga'n yjihui'ñ xy'adigiigixy xyjottigiigixy, chi mguychinaaygixy Jesucristo ytiy'ajt nej Dios yjihui'ñ xyhuinma'ñmooygixy. ¿Nej co cham miich ajcxy mloci huinma'ñ mdzachtungixy? Jadachambi jadüg'oc mdzachtunaangixy mgi'mhuinma'ñ. ⁴ ¿Nej naadigiigixpi miich ajcxy tzaachypi ti mminajxcixy ti myajnajxcixy miid Cristo ytiy'ajt ycixpi? Janch naadigi' jadu'n tzaachypi ti mminajxcixy ti myajnajxcixy, pen janch tücciyi ti m'ixmájtzcixni Cristo ytiy'ajt. ⁵ Jada nyaj'amidoogixyp: ¿Nej ti Dios yjihui'ñ ymic'ajt xy'adigiigixy xyjottigiigixy etz tuñ mijhuinma'ñ ma miich ajcxy miid co ti mguydungixy Dios ycötujcin je jecyip? Ca' yjadu'nity. Hue' Dios xy'adigiigixy xyjottigiigixy etz tuñ mijhuinma'ñ miid miich ajcxy miid co ti mmidoogixy Jesucristo ytiy'ajt etz ti mmibijccixy.

⁶ Jadu'n ymiñ cojay ma Dios ñecy co Abraham mibijcy Dios, e co yi' mijpidacy Dios y'ayuc jadu'n nipaady nej jihuiy Dios yhuinmecxi ypocy, jigix jëbi y'ity tudägy ma Dios yhuinduu. ⁷ Jadu'n yjajty miid Abraham. Je' ymibijc Dios, e yajpocyñihuaatzi Dios, jëbi ñaydiyii tudägy jäy ma Dios yhuinduu. ⁸ Dios jecy'ajty yajnihuinmayiyy co yajpocyñihuaadza'ñ je jäy ajcxy huidibi ca' yjudíojäyity, jëbi ajcxy ñaydiyii tudägy jäy ma Dios yhuinduu, miid co ajcxy mijpidägipy je may'ajt huidibi Dios ytunamyb miid yi' ajcxy ycixpi. Paady ycixpi jaaybety ymiñ ma Dios ñecy co jadu'n Dios miidmiydac Abraham jecy'ajty co yi' huidibi ca' yjudíojäyity ypaadipy ajcxy y'alma nidoocin, com jadu'n Dios yminañ: “Miid miich tüg m'ap m'oc may'ajt oy'ajt nduna'ñich miid naaxhuiñyjäy ajcxy ycixpi.” ⁹ Paady ycixpi jadu'n nej jäy ajcxy tüg'óciy pinjaty mibijcp Dios, Dios may'ajt tunamb miid yi' ajcxy ycixpi co mibijccixy, tim jadu'n nej may'ajt tuun miid Abraham.

¹⁰ Dios chaachytunamy jäy ajcxy miid ypocy ycixpi, pinjaty huinma'ñ tzachpidacp co y'alma nidoocin padaangixy miid co cuydungixy Dios ycötujcin je jecyip. Com jadu'n jaybety ymiñ ma Dios ñecy: “Dios chaachytunamyb jäy ajcxy miid ypocy ycixpi, pinjaty ca' mijpidägy tüg'óciy Dios ycötujcin, etz nañ jadu'n pinjaty ca' cuydundäy jada cötujcin.” ¹¹ Jadachambi miid je ayuc huidibi ti nyajnijayigixy ma jada necy, jëbi miich ajcxy mnejhuñhuip co ca' ni pin jäy jëbi Dios yajpocyñihuaächyii miid huidijaty ti tungixy co cuydungixy Dios ycötujcin je jecyip. Com jadu'n ymiñ jaybety ma Dios ñecy ma Dios jadu'n yminañ: “Yi' jäy ajcxy pinjaty mibigip ich n'ayuc, yi' ajcxy nyajpocyñihuaadzaamybich jëbi ajcxy y'alma paadip nidoocin.” ¹² Dios ca' jadu'n yminañ ma yi' ycötujcin huidibi Moisés yjayhui'm co jëbi nmijpidaacim, e huin'it Dios xyajpocyñihuaatzim. Hue' je' yminañ ma ycötujcin co jëbi xychaachytuunim miid ajt nbocy ycixpi. Com jadu'n ymiñ jaybety ma Dios ñecy: “Yi' jäy ajcxy pinjaty cuydumb Dios ycötujcin huidibi Moisés ycojay, copicy cuydundähuip, ni ma ycatundigoyipy.”

¹³ Cristo xyñihuaanim xyyajtzoocim ma anajty Dios xychaachytunaanim miid co ca' nguydundaayim Dios ycötujcin je jecyip. Cristo ci'm ti yajnicxy je tzaachypi huidibi Dios ajt xymöhuaanim anajty. Com jadu'n jaybety ymiñ ma Dios ñecy: “Pinjaty anajty yajmijxotzpejtp ma tüg cruudz, hue' anajty je' yco'ayooyb ypocy tiibi tuñ.” ¹⁴ Cristo o'c je' miid ich ajt nbocy ycixpi, jigix Dios jëbi cuyduñ yi' y'ayuc jadu'n nej yaj'ahuaniiy Abraham jecy'ajty, co may'ajt tuna'ñ miid yi' jäy ajcxy ycixpi huidibi ca'p yjudíojäyity, etz

nañ jadu'n may'ajt tuna'n miid iich ajt ycixpi, jigix jébi iich ajt nbaatim je Dios yjihui'n co nmibijcim je Cristo.

Je cötujcin huidibi Moisés yejc etz huidibi Dios y'ahuaniiy

¹⁵ Migügtijc ajcxy, ngapxticxaamybich jadu'n nej Dios ti tuñ miid tüg iixpejt nej jäy ajcxy ytuñ. Co ixypy tüg jäy necy yajcojy ma nigapxy jadu'n nej ypidägy yajhui'ma'n, e co yajcojtäy je necy, e chi firmijiy, e nañ jadu'n je testigo ajcxy yfirmijiy, huin'it ca' huaad pinjaty nixigy yajxigy jada tiy'ajt, e nañ jadu'n ni ca' huaad yaj'ungiy. ¹⁶ Cuenditungixy Dios y'ayuc ytiy'ajt, Dios ma yi' y'ayuc yaj'ahuaniiy Abraham etz tüg yi' y'ap y'oc co may'ajt tuna'n miid yi' ajcxy jëyi. Ca' nminaanim Dios y'ayuc ymina'n co Dios yaj'ahuaniiy Abraham co may'ajt tuna'n miid tüg'óciy yi' y'ap y'oc. Hue' je'Dios y'ayuc ymina'n co may'ajt tuna'n miid tügpajc yi' y'ap y'oc, je' je' je Cristo. ¹⁷ Dios ca' yi' nixigy yajxigy ytiy'ajt huidibi jayijp ymoy Abraham co yajnigüeexy ycötujcin yi Moisés. Co Abraham y'o'cy, ti anajty ñajtzniicxiyñi midaax migo'px ja'iipxmajc jimijt, chiini oy Dios möy Moisés yi' ycötujcin. Tim jadu'n nej ca' huaad yajtigach je jäy ñecy ma nigapxy jadu'n nej ypidägy yajhui'ma'n, nañ tim jadu'n ca' huaad Dios yajtigach y'ayuc huidi yajnimay Abraham jadu'n nej may'ajt tuna'n miid naaxhuiñjyäy ajcxy ycixpi. ¹⁸ Dios y'ahuaniiy yi' ytiy'ajt ma Abraham jecy'ajty co may'ajt tuna'n miid yi' y'ap y'oc ycixpi etz miid tüg'óciy naaxhuiñjyäy ajcxy ycixpi. Co ixypy jébi jäy padaangixy y'alma ñidzoocin miid huidibi ajcxy ytumyb co ajcxy cuyduuni Dios ycötujcin je jecyip, ca' ixypy may'ajt ti tuñ co ti quexy je Cristo ya naaxhuiñ co jäy yajnihuädzip.

¹⁹ ¿Ti ycixpi Dios co moy Moisés je cötujcin huidibi ycojaj? Hue' je' Dios moy jada cötujcin jigix jébi niguëxigy co jäy ajcxy ca' ycapxymidoogixy. Tunamb anajty Dios ycötujcin huidibi Moisés ycojaj mabaad ti quexy ya naaxhuiñ yi' y'ung, je' je' je Cristo, je Abraham y'ap y'oc huidibi yajpocyñihuätzp jäy ajcxy. Dios ycötujcin hue je' yajnigüeex Moisés miid ángeles ajcxy. E chi Moisés capxnajxy ma ymigügtijc ajcxy. ²⁰ Co Dios ti quexy yi' oybi y'ayuc ya naaxhuiñ miid y'ung, paady ycixpi Dios ca' tzocy co huingbi capxnaxipy yi' y'ayuc. Dios etz Dios y'ung tú'ciy yi'.

Tigixpi Dios je Moisés cötujcin yejc

²¹ ¿Nej mdijy ca' ñaybadyii yi Dios ycötujcin huidibi Moisés ycojaj, miid je ayuc huidibi Dios yajnimay Abraham? Naybaatip ajcxy y'ayuc. Co ixypy cayejcy Dios cötujcin ma jébi jäy ajcxy y'alma ñidzoocin padaangixy, huin'it ixypy jébi nbocyñihuaatzim co ixypy nguyduunim yajxon jada cötujcin. ²² Ca' yjanchity co jébi Dios xyajpocyñihuaatzim miid co tijaty nduunim. Com ma Dios y'ayuc ymiñ cojaj co nidüg'óciy jäy ajcxy ti ytundigooy, ac pocy ymiid ajcxy. Jadu'n Dios y'ayuc ymina'n, jigix jébi Dios yajpocyñihuäch tüg'óciy pinjaty mijpidacp Jesucristo, jadu'n nej yajnimay Abraham jecy'ajty co jadu'n tuna'n.

²³ Ca'ni anajty Cristo ymiñ ya naaxhuiñ, huin'it anajty Dios ycötujcin ytuñ, yajpocycäy jäy ajcxy, e ca' Dios yajcomidooy jäy ajcxy ypocy. Jadu'n nej jihuiñ jäy ixypy ypujxtijc'iñaaygixy e ahuijxcixy mina je juez ytiydunáanigixy. Jadu'n anajty n'ijtim jadu'n nej jihuiñ nbujxtijc'iñaayim, ixti cooni Jesucristo ymiñ ya naaxhuiñ yajpocyñihuaatzp.

²⁴ Jadu'n anajty Dios cuend'aty yi judíojäy anajty miid ycötujcin huidibi Moisés ycojaj. Tim jadu'n nej jäy cuend'aty huingjäy y'ung. Jadu'n anajty Dios cuend'aty judío jäy ajcxy ixti cooni Jesucristo ymiñ ya naaxhuiñ jébi yajpocyñihuäch jäy ajcxy. ²⁵ Jadachambi co Jesucristo ti y'oy ya naaxhuiñ, e ti nmibijcim (tzojcingix) yi' ytiy'ajt, paady ycixpi cham ca' n'oc'ijtim cuend'aty miid Dios ycötujcin huidibi Moisés ycojaj.

²⁶ Com miich ajcxy ti mmijpidaaccixy Jesucristo ytiy'ajt, paady ycixp jébi nidüg'óciy miich ajcxy naydjigixy Dios y'ung. ²⁷ Tüg'óciy miich ajcxy huidijaty ti mniibejtciy, ti mniibejtciy jigix jébi mdügmuajccixy miid Cristo, jadachambi niducy m'ijtcixy miid Cristo. ²⁸ Nidüg'óciy miich ajcxy ti mgöbijccixy Jesucristo jadu'n nej ajcxy mHuindzin. Jadu'n miich ajcxy judíojäy etz nañ jadu'n ca'pi yjudíojäyity, nañ jadu'n miich ajcxy midumbidijc etz miich ajcxy huidibi ci'm nay'ane'mip, miich ajcxy yëydijctijc etz

miich ajcxy töxyjäydjic; tú'ciy miich ajcxy myajpattaaygixy ma mHuindzin Jesucristo. ²⁹ Huenpinity miich ajcxy co mmijpidaaccixy Jesucristo, huin'it jëbi ajcxy mnaydijiyb Abraham y'ap y'oc, e huin'it jëbi mbáatcixipy tzinaydac jiiby tzajpjoty, je huidibi Dios yaj'ahuaniy Abraham, Abraham y'ung y'anäg etz Abraham y'ap y'oc.

4

¹⁻² Cha jadüg ijxpejt nyajnimäyich miich ajcxy huidibi capxticxp Dios ytiy'ajt. Tüg comeñyäj ymang hue' anajty mutzni pi'cni je' anajty jëdaanip yteedy ypidägy. E chi yteedy tüg jäy yajni bicy huidibi jëbi cuend'aty je pidägy etz je pi'c'anäg mabaad paady je tiempo mina ycidi gihuiigy je pidägy. Je comeñyäj y'ung com co anajty ca'ni yeegy, ane'my anajty y'ity, tim jadu'n nej ane'my y'ity je jäy huidibi midumb. ³ Tim jadu'n nej je comeñyäj y'ung anajty y'ity ane'my, nañ tim jadu'n iich yi judíojäy ajcxy ane'my anajty n'ijtcixyich co anajty ca' tiydudägy naydijiygixyich Dios y'ung. ⁴⁻⁵ Co oy Dios yajhuaad'ajtni, chi oy quejxni y'ung ya naaxhuiñ. Yi' y'ung ma'xung'ajt judíojäy, jigix jëbi codinäy jäy ajcxy ma Dios ycötujctac. Nañ jadu'n yi' ma'xung'ajt judíojäy jigix jëbi yajpocyñihuäch yi jäy ajcxy huidibi ti yajpocycähuigixy Dios ycötujcin huidibi Moisés ycojay. Dios ti quexy y'ung jigix jëbi xycodinaayim miid ajt nbocy ycixpi, e jadu'n Dios jëbi xycöbiji jadu'n nej jihuiy xyci'm'ung'ajtim.

⁶ Jadachambi miid co naydijim Dios y'ung, paady ycixp Dios ti xy'adigiym ti xyjottigiym yi' yjihuiñ ymic'ajt, paady ycixp ajt minaanim co Dios ajt nDeedy'ajtim etz nminaanim: “¡Padre Nuestro!” ⁷ Miid co miich ajcxy ti mmibijccixy Jesucristo, jadachambi ca' ane'my m'oc'ijtcixyñi ma Dios ycötujcin je jecyip, jadu'n nej je jäy ytumbidijc miidity ane'my. Paady ycixp jëbi Dios xymóoygixipy jugy'ajtin huidibi ca' ycixipy ytigoyipy, jadu'n nej Dios miidity jugy'ajtin. Jadachambi miich ajcxy Dios xy'ung'ajt, etz jëbi mbáatcixipy pidägy ma Dios.

Pablo yjotmaybaady miid je mibijcpidijc ycixpi

⁸ Jecy'ajty ca' anajty mnejhuiygixy Dios ytiy'ajt tiydudägy, ooy anajty m'ojadajtcixy oyñiti huidibi ca' ymic'ajt miidity. E ca' anajty m'ojadajtcixy je Dios tzajpjoty hidibi mic'ajt miidity. ⁹ Jadachambi ti mnejhuiygixy Dios ytiy'ajt etz Dios ti xycöbijccixy. ¿Nej co jadüg'oc mdzachnihuimbidaangixy yi judíojäy ycötujcin, ca'p ti mic'ajt miidity, huidibi ti m'ijxmajtcixy? E jadüg'oc xy'ane'mygixy je judíojäy ycötujcin. ¹⁰ Jadachambi mdzachcuydunaangixy judíojäy ycostumbre, jadu'n nej ajcxy myajmij'ajtcixy xiibo' xiijimijt. ¹¹ Huinmaaybich ooy miid miich ajcxy ycixpi co naadigä ti nyaj'ixpicyich miich ajcxy. Ninigoob ayoohua'ñ iich ndung ma miich ajcxy.

¹² Migügtijc ajcxy, cham may'ajt nbijctzooyich ma miich ajcxy. Yajtüggygix yi mhuinma'ñ jadu'n nej iich nhuinma'ñ. Hich ti nyajtüggyich nhuinma'ñ miid miich ajcxy mhuinma'ñ co ti n'ixmachich yi judíojäy ycostumbre. Je taab anajty n'ityich miid miich ajcxy, ca' miich anajty ajcxy iich n'ayuc xyijpcogapxiyi. ¹³ Miich ajcxy mnejhuiyb co anajty n'ityich ma miich ajcxy, pumäy iich anajty nyajpaady miid yuu pa'm ycixpi, paady ycixp iich jim jecy nhuäcxijpyich, ngapxhuäcxyich Jesucristo ytiy'ajt je jayijp'aty. ¹⁴ Miid iich nba'm ycixpi ooy n'adzijpy miich ajcxy ma mjin mdijc, e miich ajcxy ca' ti xy'ixtijy e ni ca' miich ajcxy xymidzijpich. Jadu'n iich miich ajcxy xycöbijcy agujc jotcujc, tim jadu'n nej ixipy ti mgöbijccixy Jesucristo ci'm. ¹⁵ Jadachambi ¿ti ti ytunyii ti yjadyii co ca' mmijotcujc'ajtcixy iich n'ayuc? Com nyejcich tiy'ajt co je taabi anajty oga'n jim n'ityich ma miich ajcxy co janch xypubedaambich miich ajcxy. Ixti mgi'm huiin anajty ajcxy mjayajpdzimaangixyp etz xymöhuaangixyich anajty co iich ngaa'a'ixiy. ¹⁶ ¿Nej iich ti n'ahuimbityich miich ajcxy mmidzip miid co ti nyajnimaaygixy huidibi janchip?

¹⁷ Yi huindzindijc jim ma miich ajcxy huidibi xychachyaj'ixpijccixp huidibi ca' ytiy'ajtity, ca' ajcxy oyhuinma'ñ miidity. Hue' ajcxy tzachtzocy co miich ajcxy m'ixmajtcixip iich n'ayuc ndiy'ajt. Hue' ajcxy tzachtzocy co miich ajcxy yi' mgömayipy. ¹⁸ Hich njajotcujcich jadu'n co huingbi huindzin ajcxy jëbi xyaj'ixpijccixy.

Nigoobi co ixypy jëbi ajcxy m'oy'ajtin mbaatcixy. Ca' oy copicity co ñich ci'm miich ajcxy nmïid'ijttihuiipy. ¹⁹ Migügtijc huidibi ooy ndzocy njihuiyich jadu'n nej jihuïy ngi'm'ung'ájtigixy, ooy tzaachypi ndzachjihuiyich miid miich ajcxy ycixpi jadüg'oc. Jadu'n tzaachypi njihuiyich jadu'n nej ungday tzaachypi jihuïy co y'ung yajma'xung'ada'ñ. Njihuihuaamybich tzaachypi xti cooni miich ajcxy anajty Cristo mhuinma'ñ xyaj'oyi. ²⁰ Ooy ñich njanay'ijxpada'nyii ma miich ajcxy cham cham. Njamiidcapxaangixy njamiidmiydägaangixy, chi ixypy tiy'ajt njacyajniimaaygixy jac huädz. Ooy ñich ndajy nmayich miid miich ajcxy ycixpi, nej n'ocjacniimaaygixyipy.

Je Agar etz Sara y'ijxpejt

²¹ Miich ajcxy huidibi mdzachcuydunamyb Dios ycötujcin je jecyip. Nmimaaygixy ajcxy, ¿nej ca'ni ajcxy midoogixy huidibi Dios ycötujcin nigapxyipi? ²² Com Dios y'ayuc huidibi jaybetyip jadu'n ymina'ñ co Abraham ymiid anajty metz ymang. Tüg je'anajty ytaj'ajtip huidibi ypödumb'ajtpy. Je jadügpi ymang anajty ytaj'ajtip huidibi ytimytöxijc'ajtpy. ²³ Je huidibi je pödumbi y'ung'ajti, hue' je' ypi'c'ajty jadu'n nej pi'ctijc jadyii yma'xung'ajtcixy. Je huidibi Abraham ytöxyijc y'ung'ajti Dios je' miid ymic'ajt ypi'c'ajty, Dios ycuyduun y'ayuc huidibi yajhuinhuaniiy Abraham. ²⁴ Jada jihuibit ayuc jadu'n yhuimbizimyb: jada Abraham ytöxyjäy ajcxy metz ijxpejt'ajtp jadu'n nej Dios ti ytuñ miid yi' yjäy. Je ypödumbi huidi anajty yxi Agar, yi' miid yquipxiy yi Dios ycötujcin huidibi Dios ymoy Moisés ma je cop huidi yxi Sinaí. E tüg'óciy jäy ajcxy huidibi cuyduungixp Dios ycötujcin huidibi Moisés ycojay, ane'my ajcxy je' yaj'idyii, tim jadu'n nej tüg comeenyjäy ane'my yaj'ity yi' ytumbi ajcxy. ²⁵ Agar yi' nigix'ajtp je cop Sinaí jim Arabia ñaxjot ma Dios moy Moisés je cötujcin. Agar je töxyjäy huidibi anajty pödumb, je' miid yquipxiy yi judíojäy huidibi tzachcuyduungixp Moisés ycötujcin, etz nañ yquipxiy miid Dios y'it ya naaxhuiñ jim Jerusalén. Yi judíojäy etz y'ung y'anäg ajcxy huidibi tzach cuyduungixy Moisés ycötujcin je jecyip, ane'my ajcxy y'ity ma jada cötujcin, tim jadu'n nej jäy ajcxy huidibi tumb ma comeenyjäy, e y'ane'my ajcxy y'ijtcixy. ²⁶ Je Sara huidibi Abraham ytöxyijc'ajtpy, yi' miid yquipxiy ñich ajt huidibi cuydumb je Cristo ytiy'ajt, e je Cristo yi' yajpatp tzajpjoty. ²⁷ Com jaybetyity ymiñ ma Dios ñecy co mayjäy paada'ñ oybi ma Dios, com Dios jadu'n ymina'ñ:

Jotcugi' jadüg'oc miich Sara huidibi ca' y'ungbaady. Xic yax miich miid jotcujc'ajtin, miich huidibi ca' ungmoy. Nigi ymayihua'ñ miich m'ap m'oc ca'ydi Hagar y'ap y'oc.

²⁸ Hich ajt huidibi nmijpidaacim Jesucristo tügiyim miid Abraham ymang Isaac. Com jadu'n nej Dios cuyduun y'ayuc huidibi yajhuinhuaniiy Abraham co Isaac yma'xung'ajty, nañ tim jadu'n Dios cuyduun yi' y'ayuc miid ñich ajt co je Cristo y'oy ya naaxhuiñ. ²⁹ Tim jadu'n nej Abraham ymang Ismael jecy'ajty midzip'ajty Abraham ymang huidibi Dios yajhuinhuaniiy Abraham; nañ tim jadu'n yi jäy ajcxy huidibi tzachcuyduungixp Dios ycötujcin je jecyip, ooy ajcxy tzach midzip'adyii yi jäy ajcxy huidibi mibijcp Jesucristo. ³⁰ Oc-huinmay miich ajcxy nej jaybetyity ymiñ ma Dios ñecy co jadu'n Dios nimay Abraham:

Yajpidzim ma mdijc je mbödumbi miid ymang. Com ca' jadu'n ytiy'ajty co je pödumbi ymang paadipy miich mbidägy. Yi' je' padamb je mbidägy huidibi miich mdöxyijc ymang'ajtpy.

³¹ Migügtijc ajcxy, ca' ñich ajt n'ocjadu'niñ nej je pödumbi y'ung y'anäg ajcxy huidi ane'my ijtp. Jadu'n ñich ajt nipaady nej Abraham ytöxyijc y'ung y'anäg huidibi ca' y'ane'my y'ity.

5

Cristo ti xyajnihuaatzim ma je cötujcin huidibi Moisés yejc

¹ Je Cristo ti xyajpidzimim ma Dios ycötujcin je jecyip ma anajty n'ijtim y'ane'my, jigix jëbi tzojcingix nguyduunim yi' ytiy'ajt. Mibijccixy tiydudägy Cristo ytiy'ajt, ca'

m'ixmajtzcixy. Ca' mni'ahuimbjtcixipy jadüg'oc Dios ycötujcin je jecyip ma anajty m'ijtcixy tim jadu'n nej comeenyjy ytumbi ajcxy y'ijtcixy ane'my.

²⁻³ Amídooyjtcixy ich n'ayuc. Jadachambi ich Pablo minaambich pen miich ajcxy mgöbigamyb jada ayuc co copicy myajtiy'ajtihuipy, huin'it ñaadigí'ada'ñ co mmibijccixy Jesucristo ytiy'ajt. Ca' Jesucristo may'ajt tuna'ñ miid miich ajcxy pen jadu'n m'ididza'ñ. Jadüg'oc mñina'ñich co pinjaty jadu'n ycuydunamyb tüg Dios ycötujcin, copicy ycuydündähuipy tüg'óciy. ⁴ Pen mjijp'ijxyp ajcxy co Dios xyajpocyñihuátzaangixy miid co mguyduungixy tüg Dios ycötujcin, jadu'n nipaady nej jihuiy ti m'ixmajtzcixni Cristo y'ayuc ytiy'ajt. Pen ca' mmijpidaaccixy je may'ajt oy'ajt huídibi Cristo ti tuñ ninigoob miid miich ajcxy ycixpi, huin'it ca' Dios xyajpocyñihuátzcixipy. ⁵ Njijp'ijxim co Dios xyajpocyñihuátzaanim jigix jébi naydijim tudägy ma Dios yhuinduu miid co nmibijcim Cristo etz miid co je Espíritu Santo xypubejtim. ⁶ Co nmibijcim ajt Jesucristo, Jesucristo ca' cuendituñ pen ti nyajtiy'ajttiym o pen ca'. Jéyi yi' tzocy co naychojcm nayjihuiym nidüg nidüg, e jada je' je ijxpejt co nmibijcim yi' ytiy'ajt.

⁷ Jayijp'aty oy yajxon anajty m'ocuydungixp Jesucristo ytiy'ajt. ¿Pin ti xy'agapxiygixy co ca' mgapxymidohuaangixy tiy'ajt? ⁸ Yi jäy ajcxy huídibi ti xy'agapxiygixy ca' ajcxy tiy'ajt patcixy ma je Dios huídibi ti xyhuin'ijxim jigix jébi nmibijcim Cristo. ⁹ Miich ajcxy mnejhuiyb co jäy pidaaccixy levadura ma harina jich je levadura yajtiyiydaayb je jich. Nañ tim jadu'n jada anii huídibi jäy ajcxy ti pidaaccixy ma miich ajcxy yajtiyidähuamyb miich ajcxy mjot mhuinma'ñ. ¹⁰ Com ich nmibijcpich co ajt je nHuindzin Jesucristo oyhuinma'ñ xymöhuipy ajcxy, paady ycixp njijp'ijxypich co miich ajcxy mmibigaamyb ich ngapxy ich n'ayuc. Dios chaachytunipy je jäy ajcxy huídibi ti xyajhuinma'ñyidigooygixy. Oy ooy yjamij yjajanchity ajcxy, ca' ytimyñéjity, Dios yi' ajcxy tzaachytunib.

¹¹ Migügtijc ajcxy, co ixipy yjanchity co ich ngapxhuäcxyich co copicy nidüg'óciy jäy yajtiy'ajttihuipy, ¿nej co je'ni chambaad judíojäy xychach'ixhuidityich xychachpahuidityich? Pen ca' ixipy xy'ixhuidityich xypahuidityich jadu'n nipaady nej jihuiy nyaj'ixpicyich co je Cristo ca' y'o'cy miid ich ajt nbocy ycixpi. ¹² Yi' huídi ajcxy xyajhuinma'ñyidigooygixyp, ooy ixipy y'oyity co ixipy ajcxy xypuhuäcttuutni tücciyi.

¹³ Dios miich ajcxy ti xymijhuoogixy ma yi' ytiy'ajt jemybi jigix jébi m'ixmajtzcixni je Dios ycötujcin je jécyip, etz tzojcingix mijpidägipy Cristo ytiy'ajt. Dios ti ajcxy mdü'aa xy'ahuaatzi, per ca' huaad mduungixy je jibicpi huídibi mjot mhuinma'ñ chachñijot'ajtcixyp. Hue' a'oy naymi'oyjäy'ajtigix nidüg nidüg, naybubéjtigix miñ xyipy.

¹⁴ Dios y'ayuc ymína'ñ: “Mí'oyjäy'adipy mmijjin mmidijc, tim jadu'n nej miich ajcxy mdzocy co mmijjin mmidijc xymi'oyjäy'adipy.” Co jadu'n ajcxy mnaymi'oyjäy'adiyb miñ yxipy, ytimyñipatyp jadu'n nej jihuiy ti mguydundäy tüg'óciy je Dios ycötujcin.

¹⁵ Pen miich ajcxy mnaymidundigooyip etz mnaymijotma'tip miñ xyipy, ca' yjetyity co ci'm anajty jadu'n mdzachnayajhuinma'ñyidigooyigixy miñ xyipy.

Je jugy'ajt huídibi yi' Espíritu Santo yejcpy

¹⁶ Jada capxhuijin ich miich ajcxy nyajnijayiyb. Cuychinaaygix je Dios ytiy'ajt jadu'n nej je Espíritu Santo xyhuinma'ñymooygixy ajcxy. Ca' mguyduungixy je jibic-huinma'ñ huídibi mdzachnijot'ajtcixyp ci'm. ¹⁷ Je jibic-huinma'ñ huídibi mdzachnijot'ajtcixyp, hue'ymidzip'ajtpy je oby huinma'ñ huídibi je Espíritu Santo xymooygixp. Dios y'ayuc oby ca' ñaygodigiyii miid miich ajcxy mjibic-huinma'ñ. Paady ycixp miich ajcxy ooy mjacuydunaangixy Dios y'ayuc, e ca' ajcxy mmimadäga'ñ ñicxy mguydundaaygixy.

¹⁸ Pen tzojcingix mguyduungixy je Cristo ytiy'ajt huídibi Dios yjihui'ñ xymooyb ajcxy, huin'it ca' copicy mguyduungixy Dios ycötujcin je jecyip.

¹⁹ Com nnejhuiydaayim jadu'n nej jäy ajcxy yjot yhuinma'ñ tzachnijot'ajtcixy jibicpi. Jadu'n nej yéydijctijc tzachmigapxtigoyaangixy töxyjäydijc; e nañ jadu'n nej töxyjäydijc ajcxy ooy yéydijctijc tzachmiid'ügangixy etz miid'edzaangixy etz ma

yjiibi ji ajcxy yhuinma'ñydiigooygixy. ²⁰ E nañ nnejhuiyim jadu'n nej jäy ajcxy tzach'ojadajtcixy tzachhuingox Tinaaygixy je huidibi jäy ajcxy ci'm ti yajcojy, etz nej jäy ajcxy tzach'ojadajtcixy tzachyajtunaangixy caxpojcpidijc, nej jäy ajcxy ymigüg tzachmijotma'tcixy; nej jäy ajcxy ca' tzip yjot'ambijccixy miid yinjaty huenjaty ayuc; nej jäy ajcxy tzachmidzip'ajtcixy ymigügtijc; nej jäy ajcxy tzachyajca'oy'ijxcixy ymigüg co tijaty miidity; nej jäy ajcxy chachnaybijc-huäcxäänigixy, huidibi abicy tzachmiid'adamb yjäy. ²¹ E nañ nnejhuiyim jadu'n nej jäy ajcxy abijctigihuaangixy tijaty ymigüg ymiid; nej jäy ajcxy ymigüg yaj'o'ccixy; nej jäy ajcxy nijot'ajtcixy ügi etz adzuuhuididiä agoodzhuididiä, etz yi jäy ajcxy huidibi tzachnijot'ajtcixp yi jadu'mbi huinma'ñ. Hich miich ajcxy cham njacyajniimaaygixy jadu'n nej hich jayijp'aty ti n'ocnigapxpich, co yi jäy ajcxy huidibi yi jadu'mbi jibic-huinma'ñ chachnijot'ajtcixp jadu'n nej cham ti nijayiygixy, ca' ajcxy tzinaydac paadaangixy ma Dios y'ane'my.

²² Hue' ajt jadachambi nejhuiydaayim je oybi huinma'ñ huidibi Espiritu Santo yejcyp. Co yi jäy ajcxy huidibi ymiid Dios yjihui'ñ ymic'ajt ma yjot yhuinma'ñ, hue' ytungixyp ajcxy yi oyjäy'ajtin miid ymigügtijc; miid ajcxy xondaacin etz miid ajcxy jotcuyc'ajtin; etz ymimexxtujcixyp ymigügtijc; etz chojccixyp yjihuiygixyp ymigügtijc; etz ytungixp oybi; etz tudägy yjäy'ajtcixyp, ²³ nicy xeemy yjäy'ajtcixy ma ymigügtijc; etz ci'm yajxon ñay'ané'migixy ma yi oybi. Ca' ji huingbi cötujcin huidibi jada oybi huinma'ñ jipjocogapxihuipy. ²⁴ Tüg'óciy jäy ajcxy pinjaty Jesucristo Huindzin'ajtp, mimadacyp ajcxy yi jibic-huinma'ñ huidibi ci'm nijot'ajtcixyp miid Cristo ymic'ajt. ²⁵ Miid co nmiid'ajtim je Espiritu Santo ymic'ajt ma ajt ndzinaayin njugy'ajtin, paady ycixp tzoc tzinaayim jadu'n nej xy'ane'mim xyhuinma'ñymooyim je Espiritu Santo.

²⁶ Ca' huaad amij agix ndzachnayjihuiyim, etz nañ jadu'n ca' huaad nmigügtijc nyajjotma'tim; etz ca' huaad ni ti nyajca'oy'ijxim.

6

Naybubéjtigixy miñ xyipy

¹ Migügtijc ajcxy, pen mbatpy tüg migüg huidibi jibic-huinma'ñ ti ymimadägyii, miich ajcxy huidibi mimadacyp yi jibic-huinma'ñ miid Dios ymic'ajt mbubéjtcixipy jada migüg, e co mbubéjtcixipy jada migüg, niigi jotmic mmigapx miid oy gapxy oy ayuc. Naygüend'adii ajcxy ci'm, ca'ydi jibic-huinma'ñ xymimadaaccixy. ² Naybubéjtigix nidüg nidüg pinjaty ayo'n jotmay miid. Co jadu'n mdúngixipy, hue' anajty ajcxy mguydungixyp Cristo ycötujcin huidibi ti xymooyim ajt.

³ Pen ji pin ñayjihuiyii amij agix etz chach naygömaya'nyii ci'm co chach y'oyjäyity, ca' je' choobaady ma Dios yhuinduu. ⁴ Jébi nidüg nidüg jäy ñayjihui'nybigyii nej chinäy yjugy'aty, pen oy o peni ca'y'oyity. Peni ycuychinaayb yajxon Dios ytiy'ajt oybi, jotcuyc ñayjihuihuüyib je' ci'm e ca' huaad yajquipxix chinaayin miid huingbi. ⁵ Nidüg nidüg jäy ci'm chinaayin jébi yajnicxy nej Dios jäygidägy. Ca' huaad ni'ijxtüdy nej ymigüg jibic-huinma'ñ miidity.

⁶ Yi jäy ajcxy pinjaty ti ixpicy Dios y'ayuc ytiy'ajt, copicy co möhuipy tijaty yajmayjajtpy je huindzin tüibi yaj'ixpigyii.

⁷ Ix ajcxy ci'm mnayhuin'ingix com Dios ca' yi' ni pin huaad nixigy yajxigy. Com pen miich ajcxy jibic-huinma'ñ mdumyb, Dios xychaachtunip ajcxy. Pinjaty oybi tuumb, nañ ypaadipy oybi, e pinjaty jibicpi tumb, nañ jibicpi ypaadipy. ⁸ Pinjaty jibic huinma'ñ tum jadu'n nej jibicpi tzachnijot'aty, co y'ögipy yi' y'alma ñicxip ayoodactuuby. Pinjaty cuydumb Dios ytiy'ajt jadu'n nej je Espiritu Santo huinma'ñ ymöyii, co y'ögipy yi' y'alma huingbi jugy'ajtin ypaadamyb huidibi nimina ycaacixy ycaatigooy huidibi je Espiritu Santo möhuib. ⁹ Peni nduunim jabom jabom oy huinma'ñ ca' huaad ndzijpim, jébi nmecxtujcim ixti cooni anajty nbaatim oybi ma Dios. E ca' huaad njotmetzciiyim. ¹⁰ Tzoc oyjäy'ajtin tuunim ma nidüg'óciy jäy ajcxy, jadu'n nej Dios xyhuinma'ñymooyim. Niigi tzoc pubejtim nmigügtijc huidibi mibijcp mijpidacp Cristo.

Ane'min, capxhuijin etz capxpoocxin huidibi cijxnip je necy

¹¹ Ijxcix huindicxcix jada letra mijjatypi huidibi ich ci'm njaayb, com ndzojcpyich co mnejhuigixipy nej yam nijayigixy. ¹² Yi jäy ajcxy huidibi mibijcp co Cristo o'cy ma yi cruudz miid ajt nbocy ycixpi etz nañ jadu'n mijpidacp yi tiy'ajttihuii, hue' ajcxy tzach ñaygömayaanigixy ma yi judiojäy ajcxy, jigix ca' pin y'ixhuididiyb ypahuididiyb. ¹³ Yi huidi ajcxy tzach mijpidacp tiy'ajttihuii, nañ ni ca' ajcxy cuydudäy tüg'óciy jada Dios ycötujcin je jecyip. Hue' yi' ajcxy tzojccixy co miich ajcxy myajtiy'ajttihuiip jigix ajcxy jëbi ñaygömayigixy miid co miich ajcxy ti myajtiy'ajttiygixy. ¹⁴ Yi jäy ajcxy huidibi jim yaj'ixpijcp anii, ci'm ajcxy chach ñaygömayáanigixy. Per ich ca' jadu'n naygömaya'nyijich miid huidibi ndumybich huidibi nyaj'ixpijcpyich. Hue' janchtiy ngapxpadaamybich ich ajt nHuindzin Jesucristo ytiy'ajt, jadu'n nej yajcruudzpejti miid ajt nbocy ycixpi. Co ti nmibicyich Cristo Jesús, huin'it ti n'ixmachich je naaxhuiñyäj yjibic-huinma'ñ. E paady cham ni nga'ocnijot'ajtnich yi jibic-huinma'ñ. ¹⁵ Co nmibijcim Jesucristo, oy ixypy ti nyajtiy'ajttiyim o oy ixypy ca' ti nyajtiy'ajttiyim, ca' ma choobaady. Huidibi tzoubatp yi' je' co nmibijcim Jesucristo, etz co miid'ajtim jemybi jot huinma'ñ. ¹⁶ Huen Dios xyajjotcugihuipy etz xypa'ayoohuipy, etz nañ jadu'n yajjotcugihuipy etz pa'ayoohuipy nidüg'óciy jäy huidijaty cuydumb Cristo ytiy'ajt, tüg'óciy Dios yjäy janchypi tiydudägypi.

¹⁷ Jadu'n nej jadachambi, etz jadu'n nej xii tiempo jacmiimb jaccidaacp, ca' ich pin huaad xyjac'amayiyich, com miidich je tiy'ajt ma nninixich jadu'n nej jäy ajcxy ti xyhueenduuñich ti xychaachytuñich miid co ti nduuñich miid Jesucristo ycixpi.

¹⁸ Migügtijc ajcxy, huen ich ajt nHuindzin Jesucristo tunipy nigí may'ajt oy'ajt ma miich ajcxy. Jadu'n jada ngapxycixyich. Amén.

EFESIOS

Yi Necy Huidibi San Pablo Yajniejx Je Mibijcpidijc Jim Efeso

¹ Hich Pablo, Dios jadu'n tzojcp co Jesucristo ti xyajniebicyich co n'apóstol'adipyich. Jada necy cham nguejxypich jim Efeso ma yi jäy ajcxy huidibi Dios yjäy'ajtíp, yi' ajcxy huidibi mibijcp tudägy Cristo Jesús etz huidibi ajcxy yajpatp ma yi'. ² Huen ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugihuip ajcxy.

Nej je Espiritu Santo conucxy Cristo yjäy

³ Tzoc iibaatim capxpaatim Dios ich ajt nHuindzin Jesucristo yTeedy. Miid co nya-jpaatim ma Cristo, paady Dios ti xyconuucxim miid tüg'óciy huidijaty tzomb tzajpjoty. ⁴ Dios ajt xyhuin'ijxim jecy'ajty, ca'ni anajty cojy macxy je naaxhuiñybi. Je' xyhuin'ijxim jigix jébi nyajpaatim ma Cristo, etz jigix jébi nyajpaatim ma Dios yhuinduu huadz oy njot nhuinma'ñ, ca' ti bocy nmíid'ajtim. ⁵ Miid co Dios ooy xychojcm xyjihuiyim, paady ycixp yi' capxcödujcy jecy'ajty, ca'ni anajty naaxhuiñybi yajcojy yaj'oyiy, co xycöbigaanim nejjihuiy yci'm y'ung. Co Dios jadu'n quejxy je Cristo ya naaxhuingíxy, chi yi' yaj'oyiy nej jébi xycöbjcm nej yci'm y'ung, e jadu'n xymiid'adaanim tzajpjoty. Dios jadu'n ytuñ jadu'n nej yi' anajty tzocyin. ⁶ Tzoc iibaatim capxpaatim Dios ooy miid co mijmay'ajt mij'oy'ajt tuuñ miid ich ajt ycixpi, co quejxy y'ung ya naaxhuiñ miid ich ajt nbocy ycixpi, jigix jébi nyajpaatim ma yi' y'ung, je' y'ung huidibi ooy tzocy jihuiy. ⁷ Miid co Dios ooy xychojcm xyjihuiyim paady ycixpi yi' y'ung ñi'py teemy vojcy co y'o'cy miid ajt nbocy ycixpi, ti ajt n'alma xyajnidzocim etz nbocy ajt ti xyhuinmeecxim. Co jadu'n ytuñ, chi Dios mijmay'ajt mij'oy'ajt tuuñ miid ich ajt ycixpi. ⁸ Co Dios jadu'n mijmay'ajt mij'oy'ajt tuñ miid ich ajt ycixpi, ti xyajhuinjihuiyim ti xyajnejhuiyim yi ytiy'ajt yi yhuinma'ñ. ⁹ Dios yjäygidacpy jadu'n co ti xyajnejhuiyim nej anajty miidity capxcöducy huidibi ca' pin jecy'ajty huinjihuiy. Nañ jadu'n Dios ti xyajnejhuiyim nej ti yhuinma'ñpidacy jecy'ajty nej ytuna'ñ anajty miid Cristo. ¹⁰ Je huidibi Dios jecy'ajty ti yajnihuinmayiy co tuna'ñ anajty, ytunamyb yi' mina anajty je tiempo ti yhuaad'ajtni. Dios ti yajnihuinmayiy anajty co pidäga'ñ tüg'óciy huidi yajpatp tzajpjoty etz tüg'óciy huidibi yajpatp ya naaxhuiñ ma tüg'ane'min, e je Cristo je' ane'mamb nigohuajc'adamb tüg'óciy.

¹¹ Tüg'óciy tijaty tuni yjajti jilby tzajpjoty etz ya naaxhuiñ Dios jayijp capxcödujc. Hich ajt huidibi nyajpaatim ma Cristo, Dios ti xyhuin'ijxim jecy'ajty co oga'n je naaxhuiñybi chondacy jigix jébi nbaatim tüg'óciy huidibi Dios xymöhuaanim. E tüg'óciy jada nicxy yjaty tim jadu'n nej Dios jayijp capxcödujcy, e Dios ytumyb jadu'n nej yi' tzocy etz nej jäygidägy. ¹² Jadu'n Dios cuydumyb miid ich ajt ycixpi, huidibi jayijp ti nmibijcm ti nmijpidaacim Cristo, jigix jébi nguydunim ma ajt ndzinaayin Dios ytiy'ajt, e jadu'n mayjäy capxpaadip etz ojadadip Dios miid yi' ymij'ajtin etz yi' y'oy'ajtin ycixpi. ¹³ Nañ jadu'n miich ajcxy co mmidooy je ayuc tiy'ajt nej jébi m'alma ñdzögipy ajcxy, e ti mmibijccixy Cristo, huin'it ajcxy myajpaatcixy ma yi', e je Dios yjihui'ñ ymic'ajt huidibi miich ajcxy miid ma mjot mhuinma'ñ, je' nidiy'ajt'ajtp co myajpaatcixy ma Dios. Jada je' je Espiritu Santo huidibi Dios y'ahuaniy jecy'ajty co xymöhuaanim. ¹⁴ Jada Dios yjihui'ñ ymic'ajt jada je' nidiy'ajt'ajtp co nbadaanim it lugar ma Dios y'it. Dios xymöhuaanim it lugar ma yi' y'it co anajty xii tiempo yhuaad'ajtni huin'it Dios nihua'na'ñ yajnidzöga'ñ pinjaty yjäy'ajtíp ajcxy. Jadu'n Dios tuna'ñ, jigix jébi ich ajt n'iibaatim ngapxpaatim Dios miid y'oy'ajtin ycixpi.

Pablo mibijctzoy Dios co huen ajcxy yajmoy huijy'ajt cujc'ajt

¹⁵⁻¹⁶ Com ti nnejhuiyich jadu'n nej tiydudägy miich ajcxy ti mmibijccixy ich ajt nHuindzin Jesús, e nañ jadu'n ti nnejhuiyich jadu'n nej mdzojccixy mjihuiyigixy tüg'óciy

huidibi mibijccixp Jesucristo. Paady ycixp jabom jabom co Dios nmibijctzooyich, nyajna-jxpich jäygidaacin ma Dios miid miich ajcxy ycixpi. ¹⁷ Mibijctzooybich Dios, nHuindzin Jesucristo yTeedy, je mijpi Dios Teedy, co yi' xymöhuip ajcxy je huinma'n je xpijcin huidibi je Espiritu Santo yejcpy, etz nañ jadu'n xyajnejhuihuipy xyajhuinjihuipy ajcxy jac'oy yi' y'ayuc, e tüg'óciy nej yi' ti ytuuñ. ¹⁸ Dios nmibijctzooybich miid miich ajcxy ycixpi, co xyaj'aniiyip ajcxy mjot mhuinma'n miid yi' ytiy'ajt, jigix jëbi mnejhuüyigixipy tijaty huidibi ajcxy m'ahuijxyp ma Dios, nidüg'óciy miich ajcxy huidibi Dios ti huin'ixy. Nañ jadu'n jigix jëbi mnejhuüyigixy nej ymijity yjanchity je pidägy huidibi Dios yegamyb miid tüg'óciy ajcxy huidibi Dios yjäy'ajtíp. ¹⁹⁻²⁰ Dios nmibijctzooybich jigix jëbi ajcxy mnejhuihuipy jadu'n nej Dios ymic'ajt miidity. Je' ymic'ajt ca' ycixipy ytigoyipy, e ni pin ca quipxipy. Etz yi' ymic'ajt tumb ma ich ajt njot nhuinma'n nidüg nidüg co ajt nmibijcim. Dios ti xyajnejhuüyim yi' ymic'ajt huidibi ymiid may'amy co yajjugypijcy jadüg'oc Cristo co y'o'cy, etz nañ jadu'n ti pidägy Jesucristo mij'ane'mbi jiiby tzajpjoty. Yi' iñaayb a'oy'amy ma Dios ymijc, etz ane'mdäy tüg'óciy naaxhuiñ etz tzajp quipxyi miid Dios. ²¹ Cristo jac mij'ane'min ymiid, jac mic'ajt miid, ca'ydi jacpinjaty huidibi jayajpatp tzajpjoty, etz huidibi jayajpatp ya naaxhuiñ, huidibi cham tzinaayb etz huidibi jacjiini tzinähuaamni. Jesucristo cömay y'ity nigí, ca'ydi jac pin huidibi cham tzinaayb, etz huidibi jacjiini tzinähuaamni. ²² Dios ti pidägy tüg'óciy ane'min ma Cristo jëbi ane'mdäy. Jadu'n nipaady nej jihuüy Cristo nihuäcpejtäy tüg'óciy ane'min. E nañ jadu'n Dios ti pidägy Cristo jigix jëbi nigohuajc'adipy tüg'óciy mibijcpidijc. ²³ Je mibijcpidijc jadu'n nipaady nej Cristo ñinix, paady ycixpi yi' ajcxy yajcixy yajca'pxy je Cristo y'oy'ajtin ymij'ajtin. E je Cristo yajcijxtaayb yajca'pxtaayb tüg'óciy tijaty ji ajtp.

2

Dios chojcpy yjihuüyib jäy ajcxy, paady ñidzoocixy y'alma

¹ Ca'ni miich anajty ajcxy mmibijccixy Cristo, ooy anajty mdundigoogixy miid Dios ytiy'ajt, ooy anajty ajcxy mbocymiidity, e jadu'n nipaady nej jihuüy ti m'o'ccixy miid mbocy ajcxy ycixpi etz Dios xyajjugypijccixy huinjemy miid jemybi jugy'ajtin. ² Co ca'ni anajty miich ajcxy mgöbijccixy mmijpidaaccixy Cristo, ooy anajty mguydungixy naaxhuiñjyä ajcxy ytiy'ajt, etz nañ mgapxymidoogixy anajty ajcxy je ca'oybi huidibi ane'mb je poj naaxhuiñ, je ca'oybi huidibi tumb ma yi' jäy ajcxy yjot yhuinma'n huidibi ca' capxymidoogixy Dios. ³ Ma je tiempo tiibi ñaxy, nañ jadu'n anajty ndzinaayim jadu'n nej yi' jacjadyi naaxhuiñjyä ajcxy huidibi capxymidoob yi' ca'oybi. Ngapxymidoohuim anajty nninix chojcin. Ndundigooyim anajty miid ngi'mjot ngi'mhuinma'n. Nguipxyiyim anajty miid yi' jacjadyi naaxhuiñjyä ajcxy huidibi Dios tzaachytunaanip miid ypocy ycixpi, etz nañ jadu'n nmihuaad'ajtim co Dios xychaachytuunim miid ajt nbocy ycixpi. ⁴⁻⁵ Oy ixipy ich ajt mihuaadity tzaachypi miid ajt nbocy ycixpi, per Dios mij ooy ti xypa'ayoohuim, e mij ooy ti xychojcin ti xyjihuiyim, paady ycixp tuuñ may 'ajt miid ich ajt ycixpi co yajjugypijcy je Cristo. E jadu'n quipxyi miid Jesucristo ich ajt nbaatim jemybi jugy'ajtin huidibi ca' ycixipy ytigoyipy ni mina. Jadu'n Dios may'ajt tuuñ miid ich ajt ycixpi co anajty nbadaanim o'cin miid ajt nbocy ycixpi. Miid co Dios may'ajt oy'ajt tuuñ miid miich ajcxy ycixpi, paady miich ajcxy ti mbatcixy jemybi jugy'ajtin huidibi ca' ycixipy ytigoyipy ni mina. ⁶ Com jadu'n nipaady nej Dios xyajjugypijcim quipxy miid Jesucristo, paady ycixp Dios xymöhuaanim it lugar jiiby tzajpjoty quipxy miid Jesucristo. ⁷ Jadu'n nej xii tiempo mimb cidacp Dios jadu'n oy tuñ jigix jëbi tiy'ajt nmiid'ajtim jadu'n nej Dios xychojcin xyjihuiyim etz xypa'ayoohuim mijcajee, etz mijmay'ajt mij'oy'ajt tuun miid ich ajt ycixpi co nyajpaatim ma Cristo. ⁸ Miid co Dios miich ajcxy ti xychojccixy ti xyjihuiygixy, paady ycixp yi' m'alma ajcxy ti patcixy nidzoocin co ti mmibijccixy Jesucristo. Ca' nminaanim co tijaty ti mdungixy, paady ycixp yi' m'alma ajcxy ti patcixy nidzoocin. Hue' janchtiy Dios ti xymooygixy ninigoob ajcxy m'alma ñidzoocin. ⁹ Ca' nminaanim huin'it jäy ajcxy y'alma nidzoocin paadip co oybi

tungixy. Hue'janchtiy Dios jadu'n ci'm ti yaj'oyïy ninigoob nej jäy ajcxy jëbi patcixy y'alma ñidzoocin, jigix ca' pin jëbi huaad amij agix ñayjihuiïy. ¹⁰ Com Dios ci'm ti oyduñ iich ajt njemybi tzinaayin jugy'ajtin miid je may'ajt huidibi Cristo ytuun co y'o'cy miid ajt nbocy ycixpi. Jadu'n Dios tuuñ miid iich ajt ycixpi, jigix jëbi nduunim oyjäy'ajtin ma ajt ndzinaayin. Dios, jecy'ajty ca'ni naaxhuiñybi anajty chondacy, cojy macxy je tiy'ajt jadu'n nej yi' tzocy co nduunim oyjäy'ajtin.

Jotcujc cham n'ijtim miid Dios, com Cristo xyajpocyhuaatzim

¹¹ Jadu'n miich ajcxy ocjäymejtzcodii nej miich ajcxy anajty myajpatcixy co anajty ca'ni mmibijccixy Jesucristo. Ca' miich anajty ajcxy mjudíojäyity, e ni ca' miich anajty ajcxy myajtiy'ajttiïygixy nej huaad mnaydíjigixy Dios yjäy. Paady ycixp yi judíojäy ajcxy ymïna'ñ co Dios je' yjäy ajcxy, e miich ajcxy ca', miid yi'da'ajty co miich ajcxy ca' myajtiy'ajttiïygixy. ¹² Co ca'ni anajty mmibijccixy Cristo, je huin'it tiempo, ca' anajty ajcxy myajpatcixy ma Cristo, etz ni ca' anajty judíojäy xycöbïjccixy, etz ni ca' anajty mbadaangixy huidibi Dios y'ahuanïy ma yi judíojäy ajcxy, etz ni ca' anajty ti mjïjp'ijxcixy ma Dios, etz ni ca' miich anajty ajcxy myajpatcixy ma Dios. ¹³ Jadachambi, miich ajcxy huidibi jecy'ajty anajty ca' myajpatcixy ma Dios, jadachambi ajcxy myajpaady ma Jesucristo miid co yi' ñi'py teemy vojcy miid miich ajcxy mbocy ycixpi. ¹⁴ Jesucristo ci'm yaj'oyïy je tzip je capxy nej anajty iich ajcxy judíojäy etz miich ajcxy huidibi ca' yjudíojäyity naymidzip'ajtim, e cham jotcujc n'ijtim. Jesucristo ci'm yajtigoy je judíojäy ycötujcin huidibi anajty tzipcojp capxycojp ma iich ajcxy etz ma miich ajcxy. Jesucristo yajtügmuyc judíojäy, etz huidi ca' yjudíojäyity. ¹⁵ Jesús miid yci'm ninïcx yajtigoy je jecy'ajty cötujcin co oy yaj'ögyii cruudzcixy. Co Jesús y'o'cy, huin'it yajtügmuyc judíojäy etz huidibi ca' yjudíojäyity. Huin'it oy yaj'ahuimbity tügpicy jäy jemybi huidibi Dios yjäy'ajtip. E jadu'n ajcxy yajcijxy yajmay je tzip capxy. ¹⁶ Co Cristo oy yaj'ögyii cruudzcixy, huin'it yajcijxy yajnaxxy je tzip capxy jadu'n nej yi judíojäy anajty midzip'adyii yi' ajcxy huidibi ca' yjudíojäyity. Etz nañ huin'it Cristo yajtügmuyc yi judíojäy miid huidibi ca' yjudíojäyity. Paady ycixp Dios ycöbiga'ñyii judíojäy ajcxy etz huidibi ajcxy ca' yjudíojäyity agujc jotcujc.

¹⁷ Je Cristo miin anajty ya naaxhuiñ etz capxhuäcxy oybi tiy'ajt jadu'n nej jëbi ajt nbaatim jotcujc'ajtin ma Dios. Ycapxhuäcxyp anajty ma miich ajcxy huidibi ca' yjudíojäyity, huidibi ca' anajty miidity Dios ytiy'ajt. Etz nañ jadu'n ycapxhuäcxp Dios ytiy'ajt anajty ma iich ajcxy judíojäy huidibi jamïid anajty Dios ytiy'ajt. ¹⁸ Miid co Cristo may'ajt ti tuuñ co xy'adigïyïm xyjottigïyïm Dios yjihui'ñ ymic'ajt, paady ycixp nidüg'óciy iich ajt nyajpaatim ma Dios jadu'n nej tügpicy jäy, tanto judíojäy etz nañ jadu'n huidibi ca' yjudíojäyity. ¹⁹ Paady ycixp miich ajcxy jadachambi myajpaady ma Dios. Jadu'n miich ajcxy myajpaady ma Dios tim jadu'n nej je jäy ajcxy huidibi tzinaayb ma yci'mgajp, ca' yjadu'nity nej adzinaaybi ajcxy. Paady ycixp tú'ciy miich ajcxy mnaygomájtzigixy ma Dios miid judíojäy ajcxy. Jadu'n miich ajcxy etz judíojäy ajcxy nipaady cham nej jihuiïy ajcxy mdügjuugy mdügmigüg. ²⁰ Miich ajcxy ti mmïjpidaaccixy je tiy'ajt huidibi Jesús y'apóstol ajcxy ti capxhuäcxy etz je tiy'ajt huidibi Dios y'ayucnajtzcaxïybi ti capxhuäcxcixy. E yi' ajcxy ytiy'ajt jadu'n nipaady nej poch'ijx ma chondägy. E Jesucristo yi' jëdu'n yajpatp nej tüg tzaa huidibi jaccopicyip ma je poch'ijx chondägy. ²¹ Dios jadachambi tiempo ycojyp ymacxyp jadügpiçy jäy huidibi yjäy'adaanip huidibi tügjïjp mïjpidaaccixy Cristo, huidibi tú'ciy ijtcixyp miid Cristo. Jadu'n jadyaabi tügpicy jäy nipatcixy nej tüg tijc ma jäy ajcxy Dios ojadajtcixy. ²² Miich ajcxy myajpatp ma Cristo quipxyi miid nidüg'óciy yi mayjay ajcxy huidibi mïjpidacp Dios etz huidijaty mi'ijtp je Espíritu Santo ma ajcxy yjot yhuinma'ñ, jadu'n miich ajcxy mjogy'ajtin nipaady nej Dios chinaydac.

3

Pablo yi' je' miid cötujcin co capxhuäcxy Dios y'ayuc ma pin ca' yjudíojäyity

¹ Ìch Pablo, nyajpatpich pujxtigoty miid co nduñich ma Jesucristo ytung ma miich ajcxy huidibi ca' yjudíoáyity. Paady ycixp nmibijctzooybich Dios miid miich ajcxy m'oy'ajtin ycixpi. ² Mnejhuiyb ajcxy com Dios mijmay'ajt ti tuuñ miid miich ajcxy ycixpi, paady yi' ti xyajñibicyich ngapxhuäcxibich ma miich ajcxy yi' y'ayuc ytiy'ajt. ³ Dios ti xyajnejhuiyich yi' ytiy'ajt huidibi jecy'ajty yüch y'ijt. Jada tiy'ajt yinjaty hueeñjaty ìch miich ajcxy ti nnijayñygixy jayijp'aty. ⁴ Co miich je necy mgapxip, huin'it ajcxy mnejhuihuipy co ìch nnejhuiyich je Cristo ytiy'ajt huidibi ijtp yüch. ⁵ Jada tiy'ajt maabi Jesucristo, Dios ca' ni pin yajnejhuiy jecy'ajty. Jadachambi xii tiempo Dios miid je Espíritu Santo yajnejhuiy Jesucristo ytiy'ajt je Jesús y'apóstoles ajcxy etz je Dios y'ayuc najtzcaxñiybi ajcxy. ⁶ Jada je' je tiy'ajt huidibi jecy'ajty yüch anajty ijtp, co yi' jäy ajcxy huidibi ca' yjudíoáyity ypadamyb ajcxy Dios y'oy'ajtin quipxyi miid yi' judíoáy ajcxy, etz nañ jadu'n yi' ajcxy yajpaady ma Dios tú'ciy miid yi' judíoáy ajcxy, etz nañ jadu'n yi' ajcxy padaangixy oybi huidibi Dios jecy'ajty yajnimay yi' judíoáy co möhuaangixy pinjaty mibijccixp Jesucristo.

⁷ Dios mijmay'ajt ti tuñ miid ìch ninigoob co ti xyajñibicyich jada tung, e xymöyich mic'ajt co ngapxhuäcxibich Jesucristo y'ayuc ytiy'ajt oybi ma yi' jäy ajcxy huidibi ca' yjudíoáyity. ⁸ Ìch jactimmudzip ma yi' maybi mibijcpidijc ca'ydi jacpin, per ca' ñejty. Dios may'ajt oy'ajt ti tuuñ ma ìch, e ti xypidägyich ma yi' ytung co ngapxhuäcxych jada oybi tiy'ajt ma jacjadyii jäy ajcxy jigix jëbi ajcxy patcixy ma Cristo Jesús mij'oy'ajtin, huidibi ca' pin huinjñhuiy jadu'ñyi ymijity. ⁹ Dios ti xyajñibicyich co ngapxticxibich ma tüg'óciy jäy ajcxy je Dios y'ayuc ytiy'ajt oybi huidibi yüch anajty ijtp. Yi' je' je ayuc huidibi Dios ti cojy ti macxy jecy'ajty, jadu'n nej yi' tuna'ñ je oybi miid tüg'óciy jäy ajcxy. Yi' je' Dios huidibi ti yajcojtäy tüg'óciy tijaty ya naaxhuiñ etz jiiby tzajpjoty yajpatp. ¹⁰ Jadu'n Dios capxcödujcy co je tzajpjoty tzinaaybi ajcxy huidibi ane'min etz mic'ajt miid, tiy'ajt padaangixy ma yi' mibijcpidijc jadu'n nej Dios mijhuinma'ñ canaagnax tuñ miid jäy ajcxy nidüg'óciy huidibi mibijccixp Cristo Jesús. ¹¹ Jadu'n Dios ti cuyduuñ miid ajt nHuindzin Jesucristo jadu'n nej jecy'ajty capxcödujcy. ¹² Miid co nyajpaatim ma Jesucristo paady ycixp agujc jotcujc nmigapxim nmihuingonim Dios. Miid co nmibijcim Jesucristo paady ca' ndzigñiyim ndzo'yduunim ma Dios yhuinduu. ¹³ Paady ycixp may'ajt nbijctzooyich miid miich ajcxy co ca' ñigi m'ixtigihuaäccixy ma ajcxy mmibijcin. Etz ca'ajcxy xyñidajipy xyñimayipyich co tzaachypi nminaxyich nyajnaxyich miid miich ajcxy ycixpi. Com miid co ti nyajnaxyich tzaachypi miid miich ajcxy ycixpi, paady jëbi miich ajcxy oy'ajtin mbatcixy.

Cristo chojcpy yjihuiyb jäy ajcxy

¹⁴ Com Dios mijmay'ajt ti tuuñ miid judíoáy etz miid huidibi ca' yjudíoáyity, paady njatyhuingojxtinaaybich Dios, ìch ajt nHuindzin Jesucristo yTeedy, e nmibijctzooybich Dios miid miich ajcxy ycixpi. ¹⁵ Tüg'óciy tzajpjoty tzinaayb etz tüg'óciy naaxhuiñyäjy huidibi mibijccixp Dios, jëbi nidüg'óciy yminaangixy: "Dios ìch ajt nDeedy." ¹⁶ Paady nmibijctzooybich Dios Teedy miid miich ajcxy ycixpi, co Dios je huidibi mic'ajt etz oy'ajt ymiid mijcajee, co xymöhuipy mic'ajt ma ajcxy mmibijcin miid yi' yjihui'ñ ymic'ajt huidibi yajpatp ma ajcxy mjot mhuinma'ñ. ¹⁷ Dios nmibijctzooybich miid miich ajcxy ycixpi co Cristo ymic'ajt yajpaadip ma miich ajcxy mjot mhuinma'ñ miid co mmibijccixy Cristo. Jadu'n Cristo ymic'ajt yajpaadip ma ajcxy mjot mhuinma'ñ, jigix jëbi miich ajcxy huidibi mmibijccixp Cristo, jëbi mdzójcixipy mjihuiñygixipy mijcajee huinixii huinitempo je mibijcpidijc etz tüg'óciy jacjadyii jäy. ¹⁸ Nañ jadu'n Dios nmibijctzooybich miid miich ajcxy ycixpi co miich ajcxy etz tüg'óciy mibijcpidijc mnejhuiygixipy jadu'n nej Cristo xychojcm xyjihuiñiyim mijcajee. E yi' chojcin yjihuiñiyin jadu'n nipaady nej tüg'ójc hidibi jac cixip jac mijip, jac yooñip jac cixyip ca'ydi ni huidi tijc. ¹⁹ Nmibijctzooybich Dios co xyajnejhuiñygixyip xyajhuinjñhuiñygixipy nej Cristo xychojcm xyjihuiñiyim mijcajee nidüg'óciy ìch ajt, ixti ca' huaad nhuinjihuiydaayim jadu'n

nej Cristo xychachchojçim xychachjihuiiyim. Nmibijctzooybich Dios co xypubéjtcixip, ixti mabaad mmiid'ajttaaygixy Dios y'oy'ajtin.

²⁰Jadachambi, cömay Dios y'ity huidibi mic'ajt miid, etz huidi yejcp mijcajee jac'anaxy ca'ydi nej njapijctzoohuim etz nej njahuinmaayim, miid je ymic'ajt ycixpi huidi tumb ma iich ajt. ²¹Huen tüg'óciy mibijcpidijc ajcxy jäymejtcixy ojadájtçixy Dios etz Cristo Jesús jabom jabom huinixii huinítiempo. Jadu'n jada. Amén.

4

Tú'ciy n'ijtim miid Espíritu Santo ycixpi

¹Nyajpatpich pujxtigoty miid ajt nHuindzin Jesucristo ytung ycixpi. Paady ycixp may'ajt nbijctzooyich co miich ajcxy mdzinaaygixipy jadu'n nej mihuaad jäy chinaaygixy huidibi Dios ti yhuin'ijxigixy, com Dios miich ajcxy ti xyhuin'ijxcixy.

²Pidaaccix mjot mhuinma'n yung naxy, nicy xeemy jäy'ajtcixy, naymecxtújçigix miñ xyipy, naymi'oyjäy'ajtigixy, jigix ñiguëxigip co mnaychójçigixy mnayjihuiiyigixy miñ xyipy. ³Miid'adipy ajcxy mjot mhuinma'n tú'ciy miid je Espíritu Santo ypubejtín jigix jébi mdzinaaygixy jotcuyc ca' ma tzip capxy. ⁴Nidüg'óciy mibijcpidijc tú'ciy yajpatcixy ma Cristo etz tügpajc Espíritu Santo huidibi yajpaady ma ajt njot nhuinma'n. Dios ti xyhuin'ijxim, jigix jébi quipxyjaty njjip'ijxtaayim je oybi huidibi nbadaanim jibby tzajpjoty. ⁵Ji yajpaady tügpajc ajt nHuindzin Jesucristo, etz tügpajc je ayuc tiy'ajt huidibi jébi nmijpidaacim, etz tügpajc nniibejtím miid Jesucristo yxii. ⁶Ji yajpaady tügpajc Dios Teedy huidibi cuendi'ajtp yajtzinaayb nidüg'óciy mibijcpidijc. Yi' je' huidibi nihuindzin'ajttaayb. Yi' je' huidibi may'ajt tumb miid nidüg'óciy ajcxy, etz yi' ymic'ajt yajpatp ma nidüg'óciy ajcxy yjot yhuinma'n.

⁷Dios may'ajt oy'ajt ti tuñ miid nidüg nidüg iich ajt co Cristo xymooyim mic'ajt, jigix jébi nidüg nidüg tuunipy Dios ytung nej ypadyi. ⁸Paady ycixp jaybety ymiñ ma Dios jadu'n ymina'n:

Co Cristo ypättigiyy tzajpjoty, chi ymiidpättigiyy may machjäy, e nañ jadu'n Cristo moy jäy ajcxy mic'ajt (dones).

⁹¿Nej co jadu'n Dios y'ayuc yminañ co je Cristo ypättigiyy tzajpjoty? Hue' je' jadu'n yminañ miid co je Cristo jayjyp ycidacy etz ooy ayooy ya naaxhuiñgixy. ¹⁰Je Cristo yi' je' huidibi cidaac ya naaxhuiñ choon tzajpjoty, nañ jadu'n ypättigiyy jadüg'oc tzajpjoty jactim'o'c'am. E yi' je' ymic'ajt yajpatp ma tüg'óciy huidijaty jibby tzajpjoty etz tüg'óciy huidijaty ya naaxhuiñ. ¹¹Je Cristo ymooygixyp nidüg nidüg yi' ytumbi mic'ajt. Nijëjity mooygixy mic'ajt jébi nidiy'ajt'ajtigixy co je' je' je Cristo. Nijëjity mooygixy mic'ajt jébi najtzcapxiygixy Dios y'ayuc. Nijëjity mooygixy mic'ajt jébi capxhuäxcixy yi' y'ayuc. Nijëjity mooygixy mic'ajt jébi capxhuijcixy yi' mibijcpidijc miid Dios ytiy'ajt. Nijëjity mooygixy mic'ajt jébi yaj'ixpijccixy Dios ytiy'ajt. ¹²E jadu'n je Cristo mic'ajt moydaaygixy yi' yjäy, e jadu'n yajni'ixiydaaygixy miid ytung ycixpi. E miid yi' ajcxy ytung yjacyujcpedipy yi' mibijcpidijc y'ixpijcin, ixti mabaad jac miid'adipy ajcxy Cristo y'oy'ajtin. ¹³Jadu'n Cristo mic'ajt xymooyim, jigix jébi nidüg'óciy iich ajt ytügiyim nmibijcin, etz nañ jadu'n quipxyjaty n'ixpijctaayim Dios y'ung y'ayuc ytiy'ajt. E jadu'n nmi'ijtim cixy ca'pxy njot nhuinma'n, nmi'ijtim Jesucristo ytiy'ajt cixy ca'pxy. ¹⁴Ca' n'idaaním miid ajt nhuinma'n nej pi'ctijc yhuinma'n ymiidity. Je pi'ctijc ajcxy janam jadozc yhuinma'n ytigajtcixy. Jadu'n ajcxy nipaady nej je miy huidibi je poj yajpojmiyby yajpojxiy. Co cixy ca'pxy nmiid'ajtim Cristo ytiy'ajt, ca' pinjaty xyhuin'iinim miid huing ayuc oymibijcniip huidibi ca' yjanchity. ¹⁵Hue' janchity ngaxim je tiy'ajt tiybi miid tzojcin jihuiiyin, jaydëbi njacyeecim ajt nmibijcin etz njacnejhuiiyim tüg'óciy Cristo ytiy'ajt jadu'n nej ytuuñ ya naaxhuiñ, je Cristo huidibi nigohuajc'ajtp tüg'óciy mibijcpidijc. ¹⁶Cristo etz je mibijcpidijc nipatp nej tüg ninicx. Cristo ñipatp nej je ninicx cohuaajc huidibi ane'mb etz mic'ajt mooyb je ninicx. Etz yi' mibijcpidijc ñipatp ajcxy nej je ninicx huidibi Cristo y'ane'myb etz mic'ajt möy.

Ma Cristo tũg'óciy mibijcpidijc mic'ajt patcixy huidibi yajtũgũyĩp ajcxy ymibijcin etz nañ jadu'n yaj'jtigixy tũgmucy. Nidũg nidũg mibijcpi ymic'ajt patcixy ma Cristo, jėbi tungixy Cristo ytung nej ypanyi. E jadu'n yeccixy nidũg'óciy ma ajcxy ymibijcin, etz nañ jadu'n yajyeccixy chojcin yjihũyĩn miid ymĩgũgtijc.

Je jemybi jugy'ajt huidibi nbaatim ma Cristo

¹⁷ Paady ycixp nnimäyich miich ajcxy etz nyajnibijccixy miid ajt nhuindzin Jesucristo ycötujcin, co ca' huaad mdungixy loci huinma'ñ huidibi ca' choubaad y ma Dios, jadu'n nej jacjadyi jay ytungixy huidibi ca' mijpidaaccixy ajt nhuindzin Jesucristo. ¹⁸ Ca' huaad mdzinaaygixy jadu'n nej jacjadyi jay ajcxy chinäy miid loci huinma'ñ. Ca' ajcxy yajpaady ma Dios, je huidibi jugy'ajtin yejcp huinixibi. Ooy ajcxy yjotjuuñity, ca' ajcxy ixpigaangixy Cristo ytiy'ajt. ¹⁹ Ca' ajcxy ti tzo'ydu'n jihũy co ytundigooygixy. Ooy ajcxy minicxnajxcixy yi jibic-huinma'ñ. Ooy ajcxy nijot'ajtcixy mijcajee co tũngixipy tũg'óciy tijaty jibic-huinma'ñ. ²⁰ Per miich ajcxy ca' ti m'ixpijccixy loci huinma'ñ etz jibic-huinma'ñ co ti m'ixpijccixy Cristo ytiy'ajt, ²¹ pen janch miich ajcxy ti mmidoogixy yi y'ayuc, pen ti m'ixpijccixy je tiy'ajt huidibi yajpatp ma Cristo. ²² Ti miich ajcxy m'ixpicy co copicy m'ixmajtcixipy yi jibic-huinma'ñ nej anajty mnijot'ajtcixy jibicpi jayijp ca'ni anajty mmibijccixy Jesús. Jadu'n nej anajty ci'm ajcxy m'alma myajdigoyaangixy miid je jibicpi huidibi anajty ajcxy mnijot'ajtcixyp, ci'm anajty mnayhuin'ĩnigixy. ²³ Ixmajtcix jibicjot jibic-huinma'ñ. Pidaaccix mjot mhuinma'ñ co mguydunaangixy Cristo ytiy'ajt jemybi. ²⁴ Miid'ajtcix jemybi jot jemybi huinma'ñ com Dios ti yajtigajch huinjemy ajcxy mjot mhuinma'ñ miid tudägy'ajtin etz huädz'ajtin.

²⁵ Paady ycixp ca'huaad m'ĩndaaccixy, nidũg nidũg cápccixy huidibi janchip miid migũgtijc, miid co quipxyjaty nyajpaatim ma Jesucristo.

²⁶ Pen miich ajcxy mmijotma'tpy yi mmigũg, ca' mmigũg migapxtigooygixy midundigooygixy, mic'amy ajcxy mjäydigóoygixipy yi mjotmädi yajijp ca'ni anajty xii ycidacyñi. ²⁷ Ca' mnayějcgixy ma je mujcu' co je mujcu' xymimadägipy.

²⁸ Yi jay ajcxy huidibi meetzcixp, huen ixmajtcixy meedzi, etz ijxtähũipy ytung. Co ytunipy ma ci'mdung jėbi pubedipy ajcxy ymĩgũgtijc huidibi yajmayajtcixp tijaty.

²⁹ Ca' mgápccixipy jibic ayuc. Cápccix oy ayuc huidibi jėbi migũg ajcxy jäygidaaccixy, huidibi pubejtp etz yajyeegy je mibijcin, huidibi yejcp oy'ajtin ma pin ajcxy amido'ijtp. ³⁰ Ca' huaad mgapccixy mmiydaaccixy ayuc huidibi yajjotmaybijcp je Espĩritu Santo huidibi Dios yjė'ajtpy. Je Espĩritu Santo huidibi miich ajcxy miid ma mjot mhuinma'ñ, yi' je' huidibi tiy'ajt yejcp co miich ajcxy Dios yjäy'ajtigixy, co anajty Cristo ymiñ ya naaxhuiñ jadũg'oc huin'it mbadaangixy jugy'ajtin etz tzinaayin huidibi ca' ycixipy ytigoyĩpy ni mina.

³¹ Yajqueeccix yi jibicpi ma ajcxy mjot mhuinma'ñ, jadu'n nej co mjot mhuinma'ñ ta'm mjihũyigixy, jadu'n nej co tzojc mjotma'tcootcixy, jadu'n nej co mnaymijotmä'tigixy, jadu'n nej co mnayhuin'ójigixy nayjijp'ójigixy. Ca' huaad mmigũg mnigapccixy mni'ojĩyigixy. Ca' jibicpi mnijot'ajt'adiitccixy miid ajcxy mmigũg ycixpi. ³² Hue' janchtiy oybi mhuinmäaygixipy miid mmigũg ajcxy ycixpi. Nayba'ayóohũigixy nidũg nidũg. Nayméecxigix nidũg nidũg. Com nañ jadu'n Dios ti huinmecxy miich ajcxy mbocy miid co myajpatcixy ma Cristo.

5

Nej jėbi chinaaygixy yi Dios yjäy ajcxy

¹ Com miich ajcxy ñipatpy nejjihũy Dios y'ung'ajtigixy, e Dios ooy xychojccixy xyjihũyigixy, paady copicy naychójcgixy nayjihũyigixy miñ xyipy, jadu'n nej Dios ti xychojccixy ti xyjihũyigixy. ² Jabom jabom ma mdzinaayin naychójcgix nayjihũyigixy nidũg nidũg, tim jadu'n nej Cristo xychojcin xyjihũyim, e yjugy'ajt yejcy miid ajt nbocy ycixpi, e jadu'n Dios jäygidacy nej Cristo ytuñ.

³ Míid co miich ajcxy Dios xyjäy'ájtigixy, paady tzinaaygixy míid huádz mjot mhuinma'n. Ca' huaad m'oc'íibáatcixyñi m'occapxpáatcixyñi yi töxyjäy migapxtigoyii, etz yi jibic ayuc capxi, yi jibic-huinma'n nijot'adii etz yi meen adzogii. ⁴ Míid co mDios miich ajcxy xyjäy'ajtp, paady ycixp ca' huaad mgápxcixipy ayuc huidibi tzo'ydu'n yejc, ni ca' huaad mgápxcixipy huidi ca' y'oyjäygidaacnity, etz ni ca' huaad mguxiiccixy m'aníidaaccixy, com yi jibic ayuc ca' Dios jäygidägy. Tzoc yajnaxim jäygidaacin ma Dios com Dios ti xyajhuaatzim ajt njot nhuinma'n. ⁵ Janch tiy'ajt jada co pinjaty tundigooyb míid huingbi töxyjäy, pinjaty jibic-huinma'n míid, ca' ajcxy padaangixy pidägy etz oy'ajtin ma Cristo etz ma Dios y'ane'min. Pinjaty meen adzojcp, Dios ca' tzocy, tim jadu'n nej yi' ca' tzocy pinjaty ojadajtp tzaadzech etz quipychech. ⁶ Ca' mnayyécigixy co jäy ajcxy xyhuin'íingixipy míid ayuc huidibi ca' ytiy'ajtity ca'p choubaady. Míid co jäy ajcxy capxcixy ayuc huidibi ca' ytiy'ajtity, paady ycixpi Dios tzaachytuna'n tüg'óciy jäy ajcxy huidibi capxycömidodacp yi' y'ayuc. ⁷ Ca' huaad miich ajcxy mnaymigüg'ájtigixy, ca' míid mnayyöymújcigixy yi jadu'mbi jäy ajcxy huidibi ca' capxymidoogixy Dios.

⁸ Jayijp ca'ni anajty mmibijccixy Cristo, ca'ni anajty Cristo ytiy'ajt ajcxy mnejhuüy, e jadu'n nipaady anajty nej jihüüy myajpaady ajcxy agootztuum. Jadachambi mnejhuüygixyp Cristo ytiy'ajt, e jadu'n nipaady nejjihüüy mdzinaaygixy ma tüg'íicxin. Paady ycixp jatyim cuydungixyp Cristo ytiy'ajt ma yi mdzinaayin mjugy'ajtin ajcxy, jadu'n nej jébi huaad quëxigü co mmibijccixy Cristo. ⁹ Co nmíid'ajtim Cristo ytiy'ajt, chi nduunim huidibi y'oyip, huidibi tudägyip, huidibi tiy'ajtip. ¹⁰ Ixpíjccix je tiy'ajt huidibi Dios yjäygidacpy. ¹¹ Ca' miich ajcxy mnaymigüg'ájtigixy míid yi jäy ajcxy huidibi yajpatcixp agootztuum, huidibi tungixy huidibi Dios ca' jäygidägy. Miich ajcxy capxhuijcix míid Dios ytiy'ajt yi' ajcxy huidibi agootztuum tzinaayb. ¹² Tzo'yduunim ajt co jay nigapxcixy nimiyaaccixy je jibicpi huidibi ajcxy ytumyb ayüch ameech. ¹³ Co n'ixquipxim yi jadu'mbi jäy ajcxy ayuc míid Dios y'ayuc, chi niguëxigü pen janch tiy'ajt o pen ca' ytiy'ajtity, jadu'n nipaady nej ti nyajpidzimim je ajcxy ayuc ma yi agootztuum, etz nbidaacim ma yi íicxin. ¹⁴ Paady ycixpi Dios y'ayuc jadu'n yminañ:

Mäyhuijip miich ajcxy huidibi jadu'n nipatp nejjihüüy mdzachmaagixyp. Jugypíjccix miich ajcxy huidibi jadu'n nipaady nejjihüüy ti m'öccixy. Cristo xycodíicxcixipy míid yi' ytiy'ajt.

¹⁵ Paady naygüend'ájtigixy huidibi tiy'ajt yajtungixp ma yi chinaayin. Tzinaaygix jadu'n nejjihüüy mnejhuüygixy Cristo ytiy'ajt, e ca' mdzinaaygixy jadu'n nej huidibi ajcxy ca' nejjihüüygixy Cristo ytiy'ajt. ¹⁶ Ni'ixí'íjtcix jabom jabom jébi mguydungixy Cristo ytiy'ajt. Jadachambi xii tiempo mayjäy ytundigooygixy míid Cristo ytiy'ajt. ¹⁷ Ca' loci huinma'n myajtungixy, per nejhüüygixyp nej Dios tzocy co mdúngixipy. ¹⁸ Ca' huaad m'íjtcixy amügy jäy, com yi jocni xyajncxcixipy ayo'nduum. Nigi oy mi'íjtcixy Dios yjihui'n ymic'ajt may'amy ma ajcxy mjot mhuinma'n. ¹⁹ Naymigápxigixy miñ xyipy míid yi salmo ayuc, míid yi himnos. Huin'ígix Dios míid je iy' huidibi je Espíritu Santo xymooygixyp. Huin'ígix etz ojadajtcix Dios cixyot huinjot. ²⁰ Jatyim yajnaxcixy jabom jabom jäygidaacin ma ajt nDios Teedy ma ajt nHuindzin Jesús yxii, míid tüg'óciy ycixpi nej ndunim n'ayoohuim.

Nej huaad chinaaygixy pinjaty picychinaaygixy

²¹ Míid co miich ajcxy mhuindzigü Dios, paady ycixp miich ajcxy mnayyajmij'ájtigixy mnaygapxymidóohuigixy miñ xyipy.

²² Miich ajcxy töxyjäydijc yajmij'ajtcix capxymidoogix yi mñäy ajcxy, tim jadu'n nej myajmij'ajtcixy mgapxymidoogixy ajt nHuindzin Jesucristo. ²³ Com je töxyjäy ñäy nigohuajc'ajtp ma ytöxyjic ymiñ, tim jadu'n nej Cristo nigohuajc'aty ma yi mibijcpidijc ymiñ. Yi Cristo yi'je' huidibi nihuänamb yajnidzögamb yi mibijcpidijc. ²⁴ Tim jadu'n nej yi mibijcpidijc capxymidoogixy Cristo, nañ tim jadu'n tzocy co je töxyjäy ajcxy capxymidóogixipy yi ñäy ajcxy.

²⁵ Nañ jadu'n tzocy co je yëydijc huen tzocy jihuïy ytöxyijc, tim jadu'n nej Cristo tzocy jihuïy yi mibijcpidijc, e paady ycixp yejc yi' yjugy'ajtin miid yi' ajcxy ycixpi. ²⁶ Cristo yejc yjugy'ajtin miid je mibijcpidijc ycixpi, jigix jëbi huinmecxy ajcxy ypocy, yajhuaatzip ajcxy yjot yhuinma'ñ. Cristo yajhuaatzi yi mibijcpidijc ajcxy yjot yhuinma'ñ miid yi'y'ayuc etz co niibejt ajcxy miid nii. ²⁷ Jadu'n Cristo yajhuäch yi mibijcpidijc ajcxy yjot yhuinma'ñ, jigix jëbi ajcxy nayguëxigüyb ma yi' yhuinduu miid huádz yjot yhuinma'ñ. Je mibijcpidijc ajcxy nipaady nej tüg nijen huídibi huádzip, ca' ma ytiy ymächity. ²⁸ Jadu'n tzocy co je yëydijc huen tzocy jihuïy ytöxijc tim jadu'n nej ci'm naychogyii. Yi yëydijc huídibi tzojcp jihuïyb ytöxyijc nañ jadu'n ci'm ñaychogyii. ²⁹ Ca' ji ni pin huídibi ca' ñaychogyii ci'm. Hue' janchtiy ycuend'ajtpy etz yajcüxyii yajpedyii yci'm ninicx, tim jadu'n nej jäy ajcxy cuend'ajtcixy yci'm ñinicx nañ tim jadu'n Cristo ycuend'ajtpy yi mibijcpidijc. ³⁰ Jadu'n Cristo cuend'ajtpy yi' yjäy, com jadu'n ajcxy nipaady nej yi' ñinicx. ³¹ Com copicy je yëydijc tzoǵip jihuïhuip ytöxyijc jadu'n nej Cristo tzocy jihuïy yi mibijcpidijc. Paady ycixp je yëydijc ixmadzipy ytaj yteedy, e ypuDIGIHUIPY ytöxyijc, e jadu'n ajcxy chinähuipy nej jihuïy ytügpaicity. ³² Ooy chachmijhuinma'ñity jada tiy'ajt huídibi yüch anajty ijtp, e yi' iich jadu'n tijpy yi Cristo etz je mibijcpidijc. ³³ Cuendipijccix jada tiy'ajt co nidüg nidüg miich yëydijctijc ajcxy huídibi pijccixp copicy mdzogipy mjihuïhuipy ajcxy mdöxyijc, tim jadu'n nej ci'm ajcxy mnaychogyii, e nañ jadu'n copicy co nidüg nidüg töxyjäydijc yajmij'adipy ñäy.

6

¹ Pi'ctijc ajcxy huídibi mibijcp Jesucristo, copicy mgapxymidoohuipy ajcxy mdaj mdeedy, com tiy'ajt jadu'n. ² Yi Dios ycötujcin huídibi minaamb: “Yajmij'ajtcix mdaj mdeedy”, yi' ooy ytimycopicity. Nañ jadu'n co nguyduunim jada cötujcin, huin'it Dios jecy xyajtzinaayim. ³ Co miich ajcxy jadu'n myajmij'adipy mdaj mdeedy, huin'it Dios ymöhüipy ajcxy jotcuje'ajtin, e nañ jadu'n xyajtzinaáyigixipy jecy ya naaxhuiñ.

⁴ E miich ajcxy huídibi ungedeedy'ajtcixp, ca' nigoo myajjotma'tcotcixy yi m'ung ajcxy. Ane'mgix yajyeccix yi m'ung ajcxy miid Dios y'ayuc ytiy'ajt, jaydëbi capxymidóogixipy ajcxy Dios.

⁵ Miich ajcxy huídibi tumbi'ajtp ya naaxhuiñ, capxymidoogix yi mhuindzin ajcxy, etz tungix miid tudägy'ajtin, etz yajmij'ajtcix etz tzigüygix. Tim jadu'n nej jihuïy mgapxymidoogixy yi mhuindzin Jesucristo.

⁶ Tungix yajxon miid ajcxy mhuindzin. Ca' janch xypaat oy mic mduungixy co ajcxy mhuindzin jim xyhuindicxixy, e chi co je' yjihuäcni, chi nigoo mhuäccixni mdináaygixni. Tungix jadu'n nej huaad jäy ytuungixy yi huídibi mijpidaaccixp Jesucristo. Tungix cixyjot huinijot jadu'n nej Dios tzocy mdungixipy.

⁷ Tumbidijc ajcxy, tungix mdung cixyjot huinijot, tim jadu'n nej jihuïy mdungixy je Huindzin Jesucristo ytung, e ca' yjäydungity. ⁸ Mnejhuïyb miich ajcxy co ajt nHuindzin Jesucristo oybi möhua'ñ nidüg nidüg jadu'n nej ti ytuuñ, ca' ñejity pen yci'mdung ytumyb, o pen ytumb miid tüg huindzin.

⁹ Miich ajcxy huídibi nihuindzin'ajtp tumbidijc, oy'amy ane'mgix mdumbi ajcxy. Ca'm'adzigiigixipy ca' mdzaachytungixipy. Ajihuïyigixy co miich ajcxy etz nañ jadu'n mdumbi ajcxy miid ajcxy mhuindzin tzajpjoty, e yi mhuindzin tzajpjotypi quipxyjaty tiyduna'ñ nidüg'óciy miich ajcxy.

Je mic'ajt huídibi je mibijcpidijc ajcxy ypatcixyp miid Dios yjihui'ñ

¹⁰ Jadügnax, migügtijc ajcxy, yi mmic'ajt mbaadip ajcxy ma ajt nHuindzin Jesucristo. Com Jesucristo ooy mic'ajt miidity, paady jëbi miich ajcxy mbatcixy yi mmic'ajtin ma yi'. ¹¹ Naygohuaanigixy miich ajcxy ma je mujcu' miid tüg'óciy tiy'ajt huídibi Dios xymooyim, huídi miid naygohuaanim ma je mujcu', e jadu'n ca'ydi je mujcu' xymimadaacim miid anii. Jadu'n Dios ytiy'ajt nipaady nej tujt etz pujxnijen huídibi soldados ajcxy miid naygohuaangixy tzipjoty. ¹² Hue' janchtiy xymidzip'ajtim poj

naaxhuiñ, ca'oybi, mujcu'dijc, etz tüg'óciy mic'ajt miidpi huidibi midzip'ajtp Dios ya naaxhuiñ etz jilby tzajpjoty, ca'p ñich ajt nmidzip'ajtim naaxhuiñyäj. ¹³ Paady ycixp yajtúngixy tüg'óciy mic'ajt etz tiy'ajt huidibi Dios ti xymooygixy, jigix jëbi mmimadaaccixy je ca'oybi co anajty xyajtundigoyaangixy. E jadu'n jëbi mimadaaccixy je ca'oybi miid ajcxy mmibijcin. E co anajty ti mmimadactaaygixy, huin'it m'ijtcixipy mic ma ajcxy mmibijcin. ¹⁴ Ca' m'ixtigïhuaccix ma ajcxy yi mmibijcin. Nayñi'ixiiygix miid Dios ytiy'ajt, jadu'n nej jây ajcxy ñayhuindädzigixy co ytunaangixy. Nayñi'ixiiygix tim jadu'n nej soldados ajcxy ñayñi'ixiiygixy miid pujx nijen ma caach co chiptunaangixy. ¹⁵ Nayñi'ixiiygix miid Dios y'ayuc, jigix jëbi ajcxy nicxy mgapxhuäcxi Dios y'ayuc huidibi jotcuyc'ajtin yejcp. Co jadu'n mdúngixipy, jadu'n nibaadip tim jadu'n nej soldados ajcxy ñayñi'ixiiygixy co yajtigiiygixy yzapato co ytüyöyaangixy. ¹⁶ Yi' huidibi jac copicyip ca'ydi jac ni ti, mibijccix tiydudägy Jesucristo. Miid ajcxy yi mmibijcin jëbi mnaygohuáanigixy ma je mujcu'. Miich ajcxy mmibijcin jadu'n nipaady nej tüg escudo huidibi je soldados ajcxy yajtumyb co ñaygohuáanigix ma je tip huidibi yajnajtztübiyb miidi jün. ¹⁷ Nayñi'ixiiygix miid Cristo ytiy'ajt huidibi miid ajcxy m'alma xyajnidzoocip, tim jadu'n nipaady nej soldados ajcxy ñaygohuáanigixy co pidaaccixy ypujx cöjup co chiptunaangixy. Naygohuáanigix miich ajcxy miid Dios y'ayuc huidibi jadu'n nipatp nej tüg espada huidibi je Espíritu Santo ti xymooygixy. ¹⁸ Mibijctzoogix Dios miid tüg'óciy ycixpi huidibi ajcxy mdumyb. Mibijctzoogix etz pijctzoogix may'ajt ma Dios jabom jabom miid je Espíritu Santo ypubejtin. Huijy ycuyc m'ijtcixipy, ca' mjetmetzciiygixipy. Mibijctzoogix Dios miid tüg'óciy mibijcpidijc ajcxy ycixpi. ¹⁹ Nañ jadu'n mibijctzoogix Dios miid ñich ycixpi, co huen xymöyich ayuc etz jotcuyc'ajtin, jigix jëbi ngapxhuäcxi bich huinmic jotmic yi' y'ayuc ytiy'ajt huidibi ca' pin jecy'ajty nejhuiiygixy. ²⁰ Dios ti xyajñibicyich jada tung jëbi nyajnicxyich yi' y'ayuc ytiy'ajt ma je mayjây ajcxy. Paady ycixp nyajpaadyich pujxtigoty cham. Tungix may'ajt mibijctzoogix Dios miid ñich ycixpi co xyajjotmicpiipyich jigix jëbi ngapxhuäcxyich yi' y'ayuc huinmic jotmic.

Capxpooxin huidibi cogixiiyñip

²¹ Ooy ndzocy njihuüyich je Tíquico, nañ jadu'n yi' ooy xypubejtyich ma ajt nHuindzin Jesucristo ytung. Yi Tíquico miich ajcxy xyajmiidmiydägipy tüg'óciy je tiy'ajt nej nyajpaadyich ya, etz tüg'óciy tung huidibi ya ndumybich. ²² Nguexaamybich Tíquico ma miich ajcxy jigix jëbi xymiidmiydägipy ajcxy jadu'n nej nyajpaadyich ya, e miid jada tiy'ajt jëbi miich ajcxy mjetcugiiygixy.

²³ Huen Dios Teedy etz ajt nHuindzin Jesucristo may'ajt tunipy miid miich ajcxy, jigix jëbi jotcuyc mdzinaaygixy, etz nañ jadu'n jëbi mnaychójcigixy mnayjihüiiygixy miñ xyipy, etz jigix jëbi mjacmibijccixy Cristo. ²⁴ Huen Dios may'ajt oy'ajt tunipy miid miich ajcxy huidibi yajmij'ajtcixp ajt nHuindzin Jesucristo huinixii huinitiempo. E ca' m'ixmájtzcixip nimina nej ajcxy mijpidaaccixy Jesucristo. Jadu'n jada. Amén.

FILIPENSES

Yi Neczy Huidibi San Pablo Yajniejx Je Mibijcpidijc Jim Filipos

¹ Hich Pablo miid Timoteo tumbich ma Jesucristo ytung. Jada neczy ich ajcxy nguejxpy ma tüg'óciy huidibi mibijcp Dios jim Filipos huidibi yajpaatp ma Jesucristo. Nañ jadu'n jada neczy nyajnieguexyich yi' ajcxy mijtungmiidpi etz mutztungmiidpi ma Dios ytung. ² Huen ich ajt nDios Teedy etz ajt nHuindzin Jesucristo may'ajt etz oy'ajt tunipy miid miich ajcxy ycixpi etz xyajjotcugüiygixipy.

Pablo mibijctzoy Dios miid je mibijcpidijc ycixpi

³ Naag'oc naag'oc njäytechich miich ajcxy njatytimyajnajxpyich jäygidacin ma Dios miid miich ajcxy ycixpi. ⁴ Njatytimjotcujc'ajtpich ooy naag'oc naag'oc Dios nmibijctzooyich miid miich ajcxy ycixpi. ⁵ Jotcujc'ajtpich com miich ajcxy ti xy-pubéjtcixyich co ngapxhuäcxich Jesucristo y'ayuc ytiy'ajt. Jadu'n ti xypubéjtcixyich maabi nyajtzondägyich ngapxhuäcxich Jesucristo y'ayuc ixti chambaad. ⁶ Nejhuüybich tiydudägy co Dios ti yajtzondägy yi oybi ytung ma miich ajcxy mjot mhuinma'ñ, etz jac-tunaamni ma miich ajcxy mjot mhuinma'ñ ixti mabaad Jesucristo anajty ymiñ jadüg'oc ya naaxhuiñ miid y'ane'min etz ymic'ajt. ⁷ Ooy ytudägyity co jadu'n jotcujc'ajtpich miid miich ajcxy ycixpi, com ooy ndzocy njihuüyich miich ajcxy. Dios may'ajt oy'ajt ti tuñ co ti xyajniebicyich jada tung, etz miich ajcxy myajpaady quipxy miid ich ma Dios ytung, miid co miich ajcxy xyjäytechich etz nañ xypubetyich ajcxy, huenma'amy ich nyajpaady, oy ixipy pujxtigoty, oy ixipy ma tungmiidpi yhuinduu co nnigapxpetyich Dios y'ayuc ytiy'ajt etz nañ nnigapxpetyich co yjanchity. ⁸ Dios ñejhuüyb jadu'n nej mijcajee ooy ndzocy njihuüyich miich ajcxy miid je tzojcin jihuiyin huidibi Jesucristo ti xymöyich. ⁹ Nmibijctzooybich Dios miid miich ajcxy ycixpi co xypubedipy ajcxy jigix jëbi nigü mdzogipy mjihuühuipy migügtijc, etz jigix ajcxy nigü m'ixpigipy je tiy'ajt tudägyipi, etz nañ nigü mhuinjihuühuipy tüg'óciy nej Dios tzocy co nduunim. ¹⁰ Nañ nmibijctzooybich Dios miid miich ajcxy ycixpi jigix jëbi mnejhuüygixipy, etz nañ jigix jëbi mhuin'ijxcixipy huidibi jac'oy mdünggixipy. Co oy mdünggixipy, huin'it jëbi mdzinaaygixy miid huädz jot huädz huinma'ñ, e ca' ni ti jotmay miich anajty ajcxy mmidiñ, co anajty je xii je tiempo paady co Jesús anajty miñ ya naaxhuiñ jadüg'oc miid y'ane'min miid ymic'ajt. ¹¹ Dios nmibijctzooybich miid miich ajcxy ycixpi co ajcxy mbattähuip tüg'óciy oyjot oyhuinma'ñ, je oyjot oyhuinma'ñ huidibi Jesucristo tügpaic jëbi xymooygixy. E jadu'n jäy ajcxy capxpaadip Dios etz nañ huin'ügixip Dios co ajcxy ixipy nej tudägy mdzinaaygixy.

Miid ich, yi njugy'ajtich, yi' yi' Cristo

¹² Ndzojcpyich co miich ajcxy mnejhuühuipy co miid je tzaachypi ycixpi huidibi nminaxyp nyajnaxypich ya pujxtigoty, nigü mayjäy ti midoy Jesús y'ayuc ytiy'ajt. ¹³ Jadu'n ti yhuimbizimy co tüg'óciy soldadtijc etz jacjadyii jäy ya ma je gobierno ymijtijc ti nejhuüydäy ajcxy co nbujxtijc'inäyich miid co nduunich ma Jesucristo ytung. ¹⁴ Nañ jadu'n miid co nbujxtijc'inäyich, paady ycixpi yi jacjadyii mibijcpidijc ti yjotmicpijccixy ma ajt nHuindzin Jesucristo tung, etz ycapxhuäcxy'adiichpy ajcxy Dios y'ayuc ytiy'ajt, ca' ma tzigi'ñ jihui'ñ.

¹⁵ Janch tiy'ajt jada co nijëjity jäy capxhuäcxy je Cristo y'ayuc ytiy'ajt miid co ca' xyajmidzojccixy, etz nañ miid co xyajmidzip'ajtcixy. Nañ tiy'ajt jada co jacjadyii migügtijc xychojcp xyjihuiyb ajcxy, e capxhuäcxy ajcxy je Cristo y'ayuc ytiy'ajt miid oyjot oyhuinma'ñ. ¹⁶ Janch tiy'ajt co nijëjity migügtijc capxhuäcxcixy Jesucristo y'ayuc miid co ñaygömaya'nyii ci'm, ca' nmīnaanīm ycapxhuäcxp ajcxy cixyot huinijot. Yi' ajcxy y'ixtaayb nej xyajtajipy xyajmayipyich, jadu'n nej ich pujxtigoty n'ityich. ¹⁷ Yi' ajcxy huidibi xychojcpich xyjihuiybich ycapxhuäcxy ajcxy Cristo y'ayuc com

ñejhuhuyb ajcxy co ñich yam n'ityich pujxtigoty, miid co ti nhuinma'ñ nbidägyich co nnigapxpeda'ñich Jesucristo y'ayuc ytiy'ajt. ¹⁸ Pen jäy ajcxy capxhuäcxp Cristo y'ayuc miid co ñaygömayáanigixy ci'm, o pen ycapxhuäcxyp miid oyjot oyhuinma'ñ, ca' ñejity, jotcujc'ajtpich co capxhuäcxxy ajcxy Jesucristo y'ayuc.

¹⁹ Com nnejhuhuybich co miich ajcxy mmibijctzoogixy Dios miid ñich ycixpi, e nañ nnejhuhuybich co Jesucristo yjihui'ñ ymic'ajt xypubetyich, paady ñigi njotcugiyich, e nañ njjip'ijxypich co nbidzima'ñich pujxtigoty. ²⁰ Ndzojcypych etz nañ njjip'ijxypich co nmimadactähua'ñich tüg'óciy ma ñich mdzinaayin, e ca' ti tzöydu'n nbaadibich ma Dios yhuinduu. Ndzojcypych nañ njjip'ijxypich co njaccapxhuäcxibich Jesucristo y'ayuc huinmic jotmic, jigix Jesucristo ycömay'idipy. Ca' ñejity pen jactzinaayb, o pen n'o'cpich. ²¹ ñich ndzinaayin njuugy'ajtin Cristo yi' ycixpi, e peni n'o'cpich, ti ñich anajty mij nmadägy. ²² Pen njactzinaaybich, mayjäy oybi pada'ñ miid ñich ndung ycixpi. Ca' nnejhuhuyich huidibi jac'oy nhuin'ixipyich co tzojc n'ögibich, o co njactzinähuibich. ²³ Ooy chachchipity nnejhuhuybyich huidibi jac'oy nhuin'ixipyich, co n'ögibyich, o co njactzinähuybyich. ñich ci'm nayjihuyiyich ñigi jotcujc co ixypy tzojc n'ögyich, jigix ixypy mic'amy nicxy n'ityich jiiby tzajpjoty ma Cristo yajpaady. ²⁴ Per jaccopity miid miich ajcxy m'oy'ajtin ycixpi, co njactzinähuibich. ²⁵ Com nnejhuhuybich co copicy njacpubeda'ñich miich ajcxy, paady nnejhuhuybich co njactzinähuibich, e jigix jëbi nbubejtcixy ma Dios ytung etz ma yi mmibijcin. E jadu'n miich ajcxy ñigi mjotcujc'adipy ma mmibijcin. ²⁶ Miich ajcxy huidibi yajpaatp ma Jesucristo, ñigi jotcujc m'idipy co nicxy n'ida'ñich jadüg'oc ma miich ajcxy.

²⁷ Jëyi janchtiy co mdzinaayin mjogy'ajtin mi'ijtcixy jadu'n nej Cristo y'ayuc ytiy'ajt y'ane'my. Pen nicxpich anajty ci'm ma miich ajcxy, o pen ca' nnicxyich, per ndzocypich co xypaadibich tiy'ajt co miich mic m'ijtcixy ma mmibijcin, tú'ciy cixyjot huinijot mdungixy. Mic mjanchmidinaaygixy ni'amugi' yi mmibijcin, jadu'n nej ti mmijpidaaccixy Jesucristo ytiy'ajt, ²⁸ e ca'ajcxy mdzigihuy co jäy ajcxy xymidziptzóongixipy, jada je' tiy'ajt co tigoyamb ajcxy y'alma, e nañ jada je' tiy'ajt co miich ajcxy chöocixipy yi m'alma, e nañ jadu'n jada tiy'ajtip co Dios y'ity miid miich ajcxy. ²⁹ Dios may'ajt oy'ajt ti tuñ miid miich ajcxy ycixpi co yaj'oyiy nej jëbi miich ajcxy mibijccixy Jesucristo etz nañ nej jëbi tzaachypi mminajxcixy myajnajxcixy miid Jesucristo ycixpi. ³⁰ ñich etz miich ajcxy quipxyi ti mminajxim ti nyajnajxim tung ayo'n miid Jesucristo ycixpi. Miich ajcxy ti m'ixy ti mnejhuhuy jadu'n nej ñich ndung n'ayo'n ti mminaxy ti nyajnaxyich, co jim anajty n'ityich ma miich ajcxy. E nañ miich ajcxy mnejhuhuyb nej ñich chambaad mminaxy nyajnaxyich ndung n'ayo'nich miid Cristo ycixpi.

2

Cristo yung'ajt ñax'ajt etz ymij'ajt

¹ Pen Cristo miich ajcxy mjot'amijmooyb miid yjihui'ñ miid ymic'ajt, pen ti jotcujc'ajtin mbatcixy miid co Cristo xychojccixy xyjihuyigixy, pen yi' yjihui'ñ ymic'ajt ijtp ma miich ajcxy, pen mdzocjccixyp mjihuyigixyp etz nañ mba'ayoogixy migügtijc, ² jotcujc'adipich miid co mdzinaaygixy ooy yajxon, xic xon, tügyi mnaychójcigixy mnayjihuyigixy miñ xyipy, tzinaaygixy quipxyjot quipxyhuinma'ñ. ³ Ca' ajcxy ti mdunipy miid mgi'mdzocjin ycixpi. Nañ ni ca' amij agix naybidáacigixy co ti mdungixy. Tüg'óciy huidibi mdungixyp, mdunipy ajcxy miid yung naxy mjot mhuinma'ñ. Nidüg nidüg myajmij'adipy ñigi migügtijc, ca'ydi nej miich ci'm mnayyajmij'adyii. ⁴ Ca' huaad pin naydügpajc yci'm'oy'ajt ixtäy, nañ jadu'n tzocy co migügtijc myajmidzogipy y'oy'ajt.

⁵ Pidaaccix mjot mhuinma'ñ tú'ciy jadu'n nej Jesucristo anajty yhuinma'ñ miidity co ya naaxhuiñ chinay. ⁶ Oy Jesucristo yjaDiosity ti yhuinma'ñypidägy co jëbi ixmach yi' ymij'ajtin huidibi anajty yjamid. ⁷ Jesucristo ahuingujc pidaactay je mij'ajt huidibi anajty ymiid, e chi jadu'n chinay nej tüg tumbi co oy jadu'n ypi'c'aty jadu'n nej jäy.

⁸ E co jadu'n ñaybidaaci nej naaxhuiñjyä, chi yung naxy pidacy yjot yhuinma'ñ, e nañ capxymidooy Dios ixti mibaad ñayyejci, huen jäy yaj'ögyii. E ooy anajty cho'ydu'nity co jäy yaj'o'ci cruudzcíxy. ⁹ Paady ycixp Dios ti cömay jacnigi Jesucristo, e ti pidäci yi' yxii jaccömay, ca'ydi jacpinjäy yxii. ¹⁰ Jadu'n Dios ti cömay Jesús, jigix jëbi tüg'óciy tzajpjoty tzinaaybi etz tüg'óciy naaxhuiñjyä, etz tüg'óciy jäy ajcxy huidibi ti ñaaxtigiy, co anajty ajcxy nidüg'óciy midoogixy co Dios capxpaatip Jesús yxii, chi ycojxtinaay'ihuidähuiipy ajcxy ma yi' yhuinduu, etz y'ojadadipy ajcxy Jesús nidüg'óciy. ¹¹ E co nidüg'óciy ajcxy cöbigipy etz yajmij'adipy Jesucristo jadu'n nej ajcxy yHuindzin, jadu'n Dios Teedy ycömay'ida'ñ.

Yi pin ajcxy Cristo mibijcp, yi' yi' ajcxy jadu'n nej tüg'óciy jain

¹² Migügtijc ajcxy huidibi ooy ndzocy njihuüyich, com Jesucristo jadu'n ijxpejtin ti yecy, capxymidoogich cham co jigüegy nyajpaadyich ma miich ajcxy, tim jadu'n nej jayhuin ich miich ajcxy xycapxymidooy co n'ijtyich ma miich ajcxy. Naymijottigóoyigix jabom jabom mguydungixy Jesucristo ytiy'ajt etz mmi'ijtcix huädz mjot huädz mhuinma'ñ. Tungix Dios ytung miid yung naxy ajcxy mjot mhuinma'ñ, e huindzigiiygix Dios. ¹³ Com Dios yi' tumb jabom jabom ma miich ajcxy mjot mhuinma'ñ, jigix jëbi miich ajcxy mdunipy yi' ytung yi' chojcin cixyjot huinijot jadu'n nej Dios tzocy.

¹⁴ Tungix cixyjot huinijot Dios ytung, ca'y'aametzity yjotmetzity, nañ ni ca' miid tzip ejcin. ¹⁵⁻¹⁶ Jadu'n mdunipy ajcxy ca'ydi pinjaty yxigixy co ti mdundigooygixy. Miich ajcxy Dios xy'ung'adiib, ca' mnigix'adiiyb ajcxy ti jibicpi. Tzinaaygix miid oyjot oyhuinma'ñ ma yi' jäy ajcxy yajpaady huidi jibic-huinma'ñ tumb huidibi tundigooyb ma Dios ytiy'ajt. Co miich ajcxy myajhuäcxy Dios y'ayuc ytiy'ajt huidibi alma yjugy'ajtin mooyb ma jibicjädydjc ajcxy, jadu'n nipaady nej tüg' madzä ytiicxy coodz. Pen jadu'n mdungixy, co anajty Cristo ymiiñ jadüg'oc ya naaxhuiñ, jotcuyc'adipich co anajty nnejhuüyich co ca' ich ndung etz nxii ndiempo yñadigi'aty co n'ijtyich ma miich ajcxy. ¹⁷ Co n'ögibich miid Cristo ytung ycixpi, jadu'n nipaady nejjihuüy ich nni'py ti ndem ti nyocyich miid miich ajcxy ycixpi co ti ngapxhuäcxich Dios y'ayuc ma miich ajcxy. E co miich ajcxy ti mmijpidaaccixy ich n'ayuc, jadu'n nipaady nejjihuüy miich ajcxy ti myoxy ti mdoogy yi' mjogy'ajtin ma Jesucristo. Jotcuyc'ajtpich jadu'n co miich ajcxy mjogy'ajtin ti myoxy ti mdoogy ma Jesucristo. ¹⁸ Nañ jadu'n miich ajcxy mjotcuyc'adipy quipxy miid ich.

Timoteo etz Epafrodito

¹⁹ Pen ich ajt nHuindzin Jesús tzojcpy, njjip'ijxypich co jëbi nguexipyich Timoteo ma miich ajcxy, jaydëbi njotcuyc'adipyich co anajty yi' xyajnimiiñich tiy'ajt nej miich ajcxy myajpaady. ²⁰ Timoteo tügpajc huidibi huinma'ñ tú'ciy miid jadu'n nej ich huinma'ñ nmiiididyich, etz nañ huidibi janch naybidaacip miid miich ajcxy m'oy'ajtin ycixpi. ²¹ Yi jacjadyii migügtijc huidibi yajpatp ma ich, yajcopijcpy ajcxy yci'm'oy'ajtin, e ca' ajcxy yajcopicy Jesucristo ytung. ²² Miich ajcxy mnejhuüyb jadu'n nej Timoteo tudägy ytuñ miid ich co ngapxhuäcxyich Jesucristo y'ayuc ma miich ajcxy, tim jadu'n nej tüg' ung ytuñ miid yteedy. ²³ Paady ycixp njjip'ijxypich co jëbi nguexyich Timoteo ma miich ajcxy mina anajty nnejhuüyich nej ycixipy ich njotmay huidibi nmiiidich ya. ²⁴ Nañ nmibijcypich ajt nHuindzin Jesucristo co yaj'ahuädzip ich nni'a ndü'a co jëbi ich ci'm nicxy tzojc n'ixyich miich ajcxy.

²⁵ Nañ jadu'n nhuinmaayich co copicy jadüg'oc nguexipyich ajt nmigüg Epafrodito ma miich ajcxy, yi' huidibi xypubejtpich ma ndung n'ayo'nich ya. Yi' huidibi miich ajcxy ti mguexy ma ich, jëbi xypubetyich ma tüg'óciy huidijaty nyajmayajtypich. ²⁶ Epafrodito ooy nijot'aty co jëbi nicxy y'ixaangixy miich ajcxy nidüg'óciy. Ooy yi' ytajy ymaay co miich ajcxy ti mnejhuüy co ypigiyii. ²⁷ Janch tiy'ajt co Epafrodito ooy ti ypigiyii, jago jago ti yca'ögy. Per Dios ti pa'ayoy Epafrodito, e nañ jadu'n ti xypa'ayooyich, jigix ca'ydi nigü ayo'n jotmay nbaadyich. ²⁸ Paady ycixp nigü ndzocyich co jëbi nguexipyich Epafrodito

ma miich ajcxy jadüg'oc, jigix miich ajcxy mjotcugíhuip co m'ixipy. E nañ jadu'n jébi yquégý ìich ndajin mayin miid yi' ycixpi. ²⁹ Cöbijccix Epafrodito jotcuyc, jadu'n nej tüg migüg huidibi yajpaatp ma ajt nHuindzin Jesús. Yajmij'ajtcix tüg'óciy migügtijc huidibi yjugy'ajtin vojxp toocp miid Jesucristo ytung ycixpi, jadu'n nej yi' ti ytuñ. ³⁰ Com jago jago Epafrodito ti yca'ögy miid Cristo ytung ycixpi. Tzip tzaach yjugy'ajtin ti minaxy ti yajnaxy co ti xypubetyich ya. Com miich ajcxy ca' ci'm jébi xypubéjtcixyich ya, paady yi' miich ajcxy ti xycodinäy.

3

Je tudägy'ajt je janchypi

¹ Jadügnax, migügtijc ajcxy, jotcuyc'ajtcix co myajpatcixy ma ajt nHuindzin Jesucristo. Ca' ti adzjpin njihuüyich co nnigapxpetyich jada tiy'ajt jadüg'oc huidibi jayhuin ti nyajnijayiygixy. Jadu'n nduñich miid miich ajcxy m'oy'ajtin ycixpi. ² Naygüendi'ájtigix miid yi' ajcxy y'ayuc huidibi ajcxy tundigooyb co ajcxy yajcopijcy yi' tiy'ajt huidibi pidacp ma jäy ñinícx miid tzujc. Jibic jäy yi' ajcxy, jadu'n ajcxy nipaady nej uc. ³ Yi jäy ajcxy huidibi tiydudägy mibijcp Dios, ca' nminaanim je' yi' ajcxy huidibi tiy'ajttiyip ñinícx. Yi Dios yjäy ajcxy janchypi, yi' ajcxy cixyot huinijot mibijcp mijpidacp Dios ytiy'ajt jadu'n nej ìich ajt. Hich ajt n'ojadajtim Dios miid ajt n'espíritu, etz miid ajt njot nhuinma'ñ. Jotcuyc'ajtim com je' co nyajpaatim ma Cristo Jesús, e ca' nyajcopijcim tijaty tiy'ajt huidibi jäy ajcxy ytumyb. ⁴ Co ixypy ytiy'ajtiy yi' jadu'mbi huinma'ñ, jébi ixypy naygömayiijich ci'm, com jecy'ajty ca' anajty ni pin huidibi nigí cuyduun yi' jadu'mbi tiy'ajt ca'ydi ìich. ⁵ Co nductujcxiiyich ma anajty ti nma'xung'atyich, chi oy nyajtiy'ajttiyich. Raza hebreá ìich, Benjamín nmij'ap'ajtpyich nmijteedy'ajtpyich. Nma'xung'ajtich hebreojäy. Hich ndaj ndeedy hebreojäy ajcxy anajty. Nañ nmijpidaacich fariseo y'ixpijcin, jadu'n nej ajcxy yajnigüey judíojäy ycötujcin. ⁶ Hich janchmictägy anajty nguyduñich ngi'mhuinma'ñich, ixti mabaad anajty n'ixhuidity nbahuidityich mictägy yi' jäy ajcxy huidibi anajty mijpidacp Jesucristo. Ti nguydundäyich tüg'óciy judíojäy ycötujcin. Ni pin ca' huaad yxíyich co ti ndundigooyich ma yi' ajcxy ycötujcin. ⁷ Tüg'óciy yi' judíojäy yhuinma'ñ huidibi ti nyajcopicyich anajty, jadachambi ca' ytimychobaady miid ìich, co ti nmijpidägyich Cristo ytiy'ajt. ⁸ Jadachambi janchtiy, huidijaty anajty nyajcopijcpyich, ti nnajtz'ixiiydäyich, jigix jébi nnejhuñhuibich etz nguydunipich yajxon ajt nHuindzin Jesucristo oybi y'ayuc ytiy'ajt. Miid co ti nmijpidägyich Jesucristo, paady nnajtz'ixiiydaayich tüg'óciy huidibi anajty nyajcopijcpyich, yi' jadu'mbi huinma'ñ cham ca' chobaady miid ìich, jadu'n nipaady nej püx. Jadu'n nduñich miid Jesucristo ytiy'ajt oy'ajt ycixpi. ⁹ E jadu'n nduñich jigix jébi nyajpaadyich ma Jesucristo. Jadu'n ti nnajtz'ixiiydäyich je tudägy'ajtin huidibi ti nbaadyich co ti nguyduñich Moisés ycötujcin je jecyip. Nañ jadu'n nduñich jigix jébi nbáadibich je tudägy'ajtin huidibi Dios yejcyp co nmibijcim nmijpidaacim Jesucristo. ¹⁰ Ndzójcypyich co njacnejhuñhuibich Cristo y'ayuc ytiy'ajt. Nañ ndzójcypyich co njacnejhuñhuibich Cristo ymic'ajt, jadu'n nej yjugypijcy co y'o'cy. Nañ ndzójcypyich co njacminaxipyich njacyajnaxipyich tzaachypi jadu'n nej Jesús minaxy yajnaxy tzaachypi, ixti mabaad jadu'n njatyich jadu'n nej Cristo yjajty co y'o'cy. ¹¹ E paady ycixpi njijp'ijxpyich co n'ögibich njugypigipyich jadüg'oc co anajty Dios yajjugypicy yi' jäy ajcxy tiibi y'öccixy.

Naymic'ijxim jigix nbaatim huidibi Dios ti xyaj'ahuaniiyim

¹² Ca' nminaanim jadu'n nmína'ñich co ti nmimadactäyich nej Cristo ti mimadactäy. Nañ ni ca' jadu'n nmína'ñich co ìich njot nhuinma'ñ ti nyajhuätztäyich. Njactumnich, jigix jébi Cristo y'oy'ajtin nbáadibich. Com Jesucristo ti xyhuin'ixyich jayijp, jaydëbi jada oy'ajtin nbáadibich. ¹³ Migügtijc ajcxy, ca' ìich ci'm naygömayiijich, co ti nmimadactäyich Cristo y'oy'ajtin. Jada janchtiy ndumbyich, njäydigoydaaybich tüg'óciy huidibi ti ñaxy, e mictägy nduñich jébi nbáadibich je oy'ajtin huidibi Dios jii by tzajpjoty xymöhuaambich miid co nyajpaadyich ma Jesucristo. ¹⁴ Mictägy nduñich miid tüg'óciy

nmic'ajtic, jigix jëbi nbáadibich je oy'ajtin huidibi Dios jiiby tzajpjoty xymöhuaambich. Jadu'n nipaady nejihuüy miid pin nayboyicquipxyiijich co nbada'ñich tüg premio.

¹⁵ Hich ajt ti nhuinma'ñ ycixni yca'pxni, tzoc panixim je ixpijcin huidibi miid'ajtim. E pen nidügti miich ajcxy tigachjaty huinma'ñ miidity, Dios xyajnejhuühuip ajcxy je tiy'ajt. ¹⁶ Jada janchtiy, je tiy'ajt huidibi ti nbaatim copicy nguydundaayim, ca' n'ixmajtzim.

¹⁷ Migügtijc ajcxy, panixcix ich n'ijxpejt jadu'n nej ti ndzinäyich ma miich ajcxy. Nañ jadu'n miich ajcxy ijxpejt mbigipy ma yi' ajcxy chinaayin huidibi ijxpejt ti patcixy ma ich. ¹⁸ Canaag'oc ti nnimaaygixy, e nnimaaygixy jadüg'oc miid tajin mayin co may nmigügtijc chinaaygixy jadu'n nej jihuüy midzip'ajtcixy je Cristo huidibi o'c cruudzcixy miid ajt nbocy ycixpi. ¹⁹ Dios yajtigoyip je'ajcxy y'alma. Yi' ajcxy ypidacpy yhuinma'ñ ma yi' caayin uucin jicxy yicy, ma yjapadyii huen yjot yhuinma'ñ pidaaccixy ma Dios. Yi' ajcxy chachñaygömaayigixy ci'm ma yjapadyii tzo'ydu'n jihuüyigixipy. Hue' pidaaccixy yhuinma'ñ ma naaxhuiñ jäy chinaayin. ²⁰ Hich ajt hue' nyajpaatim njäy'ajtim tzajpjoty, e njijp'ijxim co ich ajt nHuindzin Jesucristo miinaamb ya naaxhuiñ jadüg'oc, chona'ñ tzajpjoty, je huidibi xyajnidzögaanim ajt n'alma. ²¹ Jesucristo xyajtigadzaanim ajt nninix pocymiidpi, e xymöhuaanim tüg ninix jemybi oybi, tim jadu'n nej yi' ñinix miidity. Cristo xyajtigadzaanim ajt nninix miid yi' ymic'ajt huidibi miid ane'mdäy mimadactäy.

4

Jotcuyc'ajtcixy ajcxy ma je mHuindzin Jesús

¹ Com Jesús xyajtigadzaanim ajt nninix, paady ycixpi migügtijc huidibi ooy ndzocy njihuüyich, tiydudägy mibijccix ajt nHuindzin Jesucristo, ca' m'ixtigihuäccixy ma mmibijcin. Migügtijc ajcxy huidibi ooy nicxy nja'ixa'ñich, ooy njotcuyc'atyich miid miich ajcxy ycixpi. Miid miich ajcxy ycixpi nbada'ñich n'oy'ajtin ma Dios.

² Nbijctzooybich may'ajt ma Evodia etz ma Síntique co huen ajcxy ixmajtcixy yi tzip etz huen naymigügpjicigixy jadüg'oc, com hue'ajcxy yajpaady mibijcpi ma Cristo. ³ Miich migüg huidibi ti xypubetyich ma Cristo ytung, may'ajt nbijctzooybich ma miich co mgapx'oyihuipy je tzip ma ajcxy je metzpi töxyjäy. Yijiibi metzpi töxyjäy tumb anajty ajcxy quipxyi miid ich co ngapxhuäcxyich Jesucristo y'ayuc ytiy'ajt. Yi' ajcxy xypubejtich quipxyi miid Clemente etz yi' jacjadyii huidibi anajty tumb quipxyi miid ich. Jada metzpi töxyjäy ajcxy yxi ycojayy ymiin ma Dios ñecy, je necy ma Dios miidity cojay je jäy ajcxy yxi huidibi padamb jugy'ajtin huinixiibi.

⁴ Jotcuyc'ajtcix huinixii, miid co myajpatcixy ma ich ajt nHuindzin Jesucristo. Jadüg'oc nigapxpetyich co huen jotcuyc'ajtcixy. ⁵ Jadu'n tzinaaygix jadu'n nej jëbi jäy ajcxy nejhuüygixy co miich ajcxy myajtungixy mecxtujcin ma mdzinaayin. Com huingon je xi je tiempo mina ymiina'ñ ich ajt nHuindzin Jesucristo jadüg'oc.

⁶ Ca' ni ti mnidajcixy mnimaygixy. Capxidzimdaaygix ma Dios tüg'óciy ti jotmay miich ajcxy mmid. Mibijctzoogix Dios, e nañ yajnajxcix jäygidacín ma Dios. ⁷ Co Dios mmibijctzóogixipy, huin'it ajcxy yi' xymöhuip jotcuyc'ajtin mijcajee, e mayñaaxhuünyjäy ajcxy ooy yhuinmay ahuididipy miid miich ajcxy m'oy'ajtin ycixpi. Co myajpaady ajcxy ma Cristo Jesús, paady ycixpi Dios xyajtzinähuiipy ajcxy jotcuyc etz xymöhuip ajcxy huinma'ñ tudägypi.

Tzójccix nijot'ajtcix huidibi oyip

⁸ Jadügnax, migügtijc ajcxy, pidaaccix mhuinma'ñ ma tüg'óciy tiy'ajt huidibi janchip, tüg'óciy tiy'ajt huidibi jëbi nyajmij'ajtim. Pidaaccix mhuinma'ñ ma tüg'óciy tiy'ajt huidibi tudägyp. Pidaaccix mhuinma'ñ ma tüg'óciy huinma'ñ huidi huädzip etz tüg'óciy huinma'ñ huidi oy jäygidacni. Pidaaccix mhuinma'ñ ma tüg'óciy huinma'ñ

huidibi jëbi yajcapxpaady. Huinmaaygix tüg'óciy jada oybi huinma'ñ etz huidibi huaad njäygidaacim.

⁹ Yajtungix je tiy'ajt huidibi ti nyaj'ixpijicixy, etz je cötuyc huidibi ti nmooygixy, etz je ayuc huidibi ti mmidoogixy co ti ngapxyich. Etz nañ tungix je ijxpejt huidibi ti nyecyich. Cuydungix jada tiy'ajt, huin'it yi Dios yajpaadipy ma miich ajcxy etz xyajjotcujc'idipy ajcxy.

Filipenses ajcxy y'ofrendi miid Pablo ycixpi

¹⁰ Hich ajt nHuindzin Jesucristo ti ooy xyajjotcugiyich co je tiy'ajt xypaadyich co miich ajcxy xyjäyamechich jadüg'oc. Ca' nmīnaanim nmīna'ñich co miich ajcxy ti xyjäydgoydaayñich. Hue' anajty ycanibidzimy nej jëbi xypubejticyich. ¹¹ Ca' nmīnaanim jadu'n nmīna'ñich co ooy ti jaty nyajmayjajtnich. Com ti nhuinma'ñ nbidägyich co njotcujc'adipyich miid tijaty nmīdich, oy tim mīnaaxi tim mīnaatiempo. ¹² Com ich ci'm nejhuiybich nej jay ajcxy y'ayoy yjottigooy, e nañ nejhuiybich nej jäy ajcxy chinäy co miid'aty tijaty may'amy. Ti nnejhuiydäyich nej jëbi ndzinäyich, nej jëbi nyajnajxich xi tiempo; pen cu'xyi ngaayich, o pen ca' cu'xyi ngayich, pen nmīdich conax, o pen ca' ti nmīdidyich. ¹³ Jëbi ndzinähuibich jotcujc huenti huennejty, com Cristo xymic'ajtmooybich. ¹⁴ Ooy oy ti mdungixy co ti xypubéjticyich ma ich n'ayo'n njotmay.

¹⁵ Jadu'n nej miich ajcxy huidi jim Filipos mnejhuiyb ajcxy, je taabi nyajtzondacyich co ngapxhuäcxyich Jesucristo y'ayuc ytiy'ajt, co ndzooñich jim Macedonia miich ajcxy ti xymiooxyich, e jac tigati ti mguejxcixy ma ich. E miich ajcxy jim Filipos huidibi mibijcp Jesús, miich ajcxy tügpajc xypubejtich ca' jac ni pin. ¹⁶ Co n'ijtyich jim Tesalónica miich ajcxy xyajniguejxyich pubejtin metz'oc tugüg'oc, e jadu'n miich ajcxy xypubejtyich miid huidibi anajty nyajmayjajtpich. ¹⁷ Ca' nmīnaanim ooy ndzachjijp'ixynich pubejtin, jada janchtiy ndzojcpyich co miich ajcxy nigī oy'ajtin mbaadipy co anajty mmejtzcixy ma Dios yhuinduu. ¹⁸ Ti ooy yhuaadīy yi mbubejtin ixti nyajconajxpich. Miid je pubejtin huidibi ti myajmiguejxcixy Epafrodito cham nmīdidyich ca'pxy, ca'ti n'ocyajmayjajtnich. Miid jada pubejtin huidibi miich ajcxy ti xymöyich, ti ooy njäygidägyich, tim jadu'n nej Dios jäygidacy je poomjoc huidibi yajhuindzigīyī. ¹⁹ Hich nDios miich ajcxy xymöhuip tüg'óciy huidibi miich ajcxy myajmayjajtpy. Mijcajee yi' miich ajcxy xymöhuip yi oybi mijpi oy'ajtin huidibi yi' ymiid ma yi Jesucristo. ²⁰ ¡Huen ich ajt nDios Teedy cōmay'idipy huinixi huinitiendo! Jadu'n jada. Amén.

Capxpooxin huidibi cijxnip je necy

²¹ Tungix may'ajt capxpooxcix miid ich ycixpi tüg'óciy migügtijc huidibi yajpatp ma ajt nHuindzin Jesucristo. Je migügtijc huidibi yajpatp miid ich nañ jadu'n xyajniguejxcixy capxpooxin. ²² Tüg'óciy je mibijcpidijc huidibi yajpatp ya cajpjoty xyajniguejxp ajcxy capxpooxin, yi' ooy ytimyjayijpity huidibi ajcxy yajpatp ma je mij ane'mbi César ycötujctac xyajniguejxyp ajcxy capxpooxin.

²³ Huen ich ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n ngapxycixyich. Amén.

COLOSENSES

Yi Necy Huidi San Pablo Yajniejx Je Mibijcpidijc Jim Colosas

¹ Hich Pablo, Dios jadu'n tzojcp, paady Jesucristo ti xyajni'bicyich jëbi ngapxhuäcxyich yi 'y'ayuc. ² Hich miid ajt nmigüg Timoteo cham nguexyich jada necy ma miich ajcxy huidibi tzinaayb jim Colosas. Hue' nguexyich jada necy ma miich ajcxy huidibi Dios yjäy'ajtip e mmibijccixy yi Cristo. Huen hich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcugüygixip.

Pablo mibijctzoy Dios miid mibijcpidijc ycixpi

³ Jabom jabom co hich ajcxy Dios nmibijctzoy, chi nyajnaxich jäygidaacin ma Dios, nHuindzin Jesucristo ajt yTeedy, miid miich ajcxy ycixpi. ⁴⁻⁵ Ti nnejhuüyich jadu'n nej miich ajcxy ti mmibijccixy Cristo Jesús, e nañ jadu'n nej mdzojccixy mjihuüygixy tüg'óciy migügtijc. Miid co miich ajcxy mjijp'ixy co Dios miidity tijaty yujpcy tzajpjoty huidibi miich ajcxy mbadamyb, paady ycixpi ajcxy mmibijccixy Cristo Jesús, e paady ycixpi mdzojccixy mjihuüygixy migügtijc. Co jayhuin migügtijc capxhuäcxy Jesucristo y'ayuc ytiy'ajt ma miich ajcxy, huin'it ti mnejhuüygixy co Dios miidity tzajpjoty huidi njijp'ixyp mbadaangixp. ⁶ Jadayaabi tiy'ajt huidibi migügtijc ti capxhuäcxy ma miich ajcxy, nañ yajcapxhuäcx'adiitzi ma tüg'óciy naax cajp etz mayjäy mijpidaaccixy. Miich ajcxy ti mmibijccixy jadu'n nej oga'n yajnimydacy e chambaadni co Dios may'ajt ti tuñ miid jäy ajcxy ycixpi, e nañ miich ajcxy mnejhuüyb tiydudägy Dios ytiy'ajt. ⁷ Jada tiy'ajt ti xyajnejhuüygixy je Epafras, hich ajt nmigüg huidibi ooy ndzocy njihuüyich, huidibi tudägy tumb ma Dios y'ayuc quipxyi miid hich. Epafras ti xycodinäyich ma miich ajcxy, e tiydudägy miich ajcxy xyaj'ixpijcy Cristo ytiy'ajt. ⁸ Epafras ti xyajnejhuüyich tiy'ajt jadu'n nej miich ajcxy myajpatcixy, etz jadu'n nej je Espiritu Santo ymic'ajt xymooygixy, jigix ajcxy mdzogipy mjihuüipy tüg'óciy migügtijc.

⁹ Miid jada ycixpi hich ajcxy jabom jabom Dios nmibijctzooyich miid miich ajcxy ycixpi, jadu'n nduüñich chondacy co oga'n nnejhuüyich co miich ajcxy ti mmijpidaaccixy Jesucristo, ixti chambaadni. Dios nmibijctzooybich co ajcxy mhujnhuüipy mnejhuüipy tüg'óciy Dios chojcin. Dios nmibijctzooybich co yi' Espiritu Santo miich ajcxy xyaj'ixpijcy xyajnejhuüipy ajcxy tüg'óciy yi' ytiy'ajt etz yi' chojcin. ¹⁰ Dios nmibijctzooybich jaydëbi mguyduunip ajcxy Dios ytiy'ajt jadu'n nej huaad mibijcpidijc chinaaygixy huidibi yajpaatp ma ajt nHuindzin Jesús, mabaad Dios jäygidägy yajxon ajcxy mdzinaayin mjogy'ajtin. E nañ jaydëbi ajcxy mdunipy oyjäy'ajtin. E nañ jaydëbi jabom jabom yjacyujcpejtcixy yi' m'ixpijcin ma Dios. ¹¹ Dios nmibijctzooybich jigix yi' xymöhuüpy ajcxy mic'ajt jadu'n nej yi' miidity ymic'ajt mijpi, jigix jëbi miich ajcxy jotcujc myajnaxipy etz mecxtujctähuip tüg'óciy tzaachypi etz ayo'n. ¹² Dios nmibijctzooybich co miich ajcxy agujc jotcujc myajnaxipy Dioscojuyip ma Dios Teedy, com Dios Teedy ajt xyajpocynihuaatzim, e jadu'n ti xyñi'ixiim jëbi nbaatim tüg it lugar tzajpjoty quipxyi miid tüg'óciy mibijcpidijc huidibi tiydudägy tzinaaygixp miid Dios ytiy'ajt, jadu'n nipaady nejhuüy nej miich ajcxy mdzinäy ma je tiicxin. ¹³ Ti Dios xyajnihuädzictuutim ma yi' jibic-huinma'n ma je mujcu' xy'ane'mim, jadu'n nipaady nejhuüy ti xyajpidzimim agootztuum. Ti Dios xypidaacim ma y'ung y'ane'my, je' y'ung huidibi yi' ooy tzocy ooy jihuüy. ¹⁴ Dios y'ung ti xyajnihuädzictuutim ma yi' jibic-huinma'n co ñi'py temy yojcy ma yi' cruudz miid ajt nbocy ycixpi, e ti xypocyhuinmeecxim.

Co Cristo y'o'cy miid ajt nbocy ycixpi, chi jotcujc n'ijtim miid Dios

¹⁵ Ca' pin ti ixty Dios. Pinjaty ti ixty Dios y'ung, jadu'n nipaady nej ti ixty Dios. Dios y'ung yi' je' anajty tim jayijp ma anajty Dios ca' ti yaj'oyiñi. ¹⁶ Dios y'ung ti cojtay tüg'óciy tijaty yajpaatp jiiy tzajpjoty etz ya naaxhuiñgixy. Dios y'ung cojtay

tüg'óciy huidibi jébi huaad n'ijxim etz nañ cojtay huidibi ca' huaad pin icy. Dios y'ung pidaactay tüg'óciy y'ane'min tüg'óciy mic'ajt ya naaxhuiñ, etz nañ jadu'n pidactay ane'min miid yi tzajpjoty tzinaaybi. Dios y'ung ti yajcojtäy ti yaj'abadiydäy tijaty miid yigixp. ¹⁷ Je Cristo jayijp y'ane'm'ajt ymic'ajt ti paady, ca' jac ni pin. Je Cristo yaj'ijtpy tüg'óciy huidijaty ya yajpatp huijtz'ijttaayb. ¹⁸ Je Cristo ñihuindzin'ajttaayb ñigohuajc'ajttaayb, etz y'ane'mdaayb tüg'óciy jäy huidibi mibijcip mijpidaacip. Je Cristo yajtzinaayb yajjugy'ajtpy tüg'óciy mibijcpidijc, com yi' je' huidibi jayijp ti yjugypicy co y'o'cy. Paady ycixp yi' cötujcin mijpi miidity. ¹⁹ Dios hue' tzojcy co tüg'óciy yi' ymic'ajt etz ymij'ajt yajpaadip ma yi' y'ung. ²⁰ Je naaxhuiñyjäy etz je tzajpjoty tzinaayb ajcxy ca'oy'ijtcixy miid Dios miid je mijpocy ycixpi. Dios oy jäygidägy ooy jotcuyc nayjihuiiyi co y'ung y'o'cy cruudzcixy miid je mijpocy ycixpi e jadu'n oyñy nej jébi je naaxhuiñyjäy etz je tzajpjoty tzinaaybi ajcxy oy'ijtcixy miid Dios.

²¹⁻²² Miich ajcxy co anajty ca' mmibijccixy je Cristo, ca' anajty oy m'ijtcixy miid Dios. E jadu'n anajty m'ijtcixy nej tüg midzip ma Dios, miid co jibicpi anajty mdungixy, etz miidity ajcxy jibic ma mjot mhuinma'ñ. Per jadachambi je Cristo ti capx'oyiy miich ajcxy je mdzip m'ejcin huidibi ajcxy miid Dios, co ti chinäy ya naaxhuiñ miid ñinix, e nañ co ti y'ögy miid miich ajcxy mbocy ycixpi. Miid co Cristo y'o'cy miid miich ajcxy mbocy ycixpi, jaydēbi myajpáatcixipy ma Dios yhuinduu janch oyyäy, janch huätzjäy, ca' ti pocy mmiidity, ca' ti xihuñ yjac-hui'my ma Dios miid miich ajcxy ycixpi. ²³ Pen myajcopijccixyp tiydudägy je Cristo y'ayuc ytiy'ajt huidibi ti mmidoogixy, jadu'n nej mjijp'ijxcixy co je Cristo xyajnidzögaani ajcxy yi' m'alma. Je ayuc huidibi miich ajcxy ti mmidooy, je' je' huidibi migügtijc ti capxhuäcxy etz ycapxhuäcx'adiichñi ma tug'óciy naax cajp, jadu'n nej jébi jäy ajcxy y'alma yajnidzögipy. Nañ jadu'n ñich, Pablo ngapxhuäcxypich jada ayuc quipxy miid nmigügtijcich.

Pablo cötujcmoy co ytunipy ma mibijcpidijc ajcxy

²⁴ Jotcuyc nnayjihuiiyijich co tzaachypi nminaxy nyajnaxyich miid nninixcixich miid miich ajcxy ycixpi e jadu'n njacyajcixy njacyajca'pxich je tzaachypi huidibi Cristo yajtzondac co yi' tzaachypi minaxy yajnaxy miid je mibijcpidijc ycixpi e je mibijcpidijc ni paady nej Cristo ñinix. ²⁵ Dios ti xyajñibicyich co ndunipyich miid yi' jäy ajcxy huidibi mijpidaacip. Dios ti xypidägyich ma jada tung, jigix ngapxhuäcxibich tüg'óciy Dios y'ayuc ytiy'ajt ma tüg'óciy jäy ajcxy. ²⁶ Jecy'ajty canaag jimijt ti ñaxy co Dios ca'ni anajty yajniguëxigy yi' ytiy'ajt. Cham Dios ti yajniguëxigy yi' ytiy'ajt ma yi' jäy ajcxy huidibi yi' yjäy'ajtipy. ²⁷ Dios oy nihuinmayiy co anajty yajnejhuñhua'ñ yi' jäy ajcxy nidüg'óciy je oybi ayuc tiy'ajt huidibi jecy'ajty ca' pin nejhuñy. Yi' je' je' tiy'ajt co Cristo yajpaady ma miich ajcxy mjot mhuinma'ñ, paady ycixpi jébi miich ajcxy mbaadip oy'ajtin jilby tzajpjoty.

²⁸ ñich ajcxy ngapxhuäcxypich Cristo y'ayuc, n'ñhuijpyich ngapxhuijpyich, nyaj'ixpijcyich yajxon yi' Cristo ytiy'ajt ma tüg'óciy jäy ajcxy, jaydēbi nyajquëxigibich ma Cristo yhuinduu nidüg nidüg mibijcpidijc ca'pxy yhuinma'ñ. ²⁹ Miid jada ycixpi nduñich mictägy miid tüg'óciy je nmic'ajtich huidibi Cristo xymooybich jabom jabom.

2

¹ Ndozjcpyich co miich ajcxy mnejhuñhuipy jadu'n nej mictägy nduuñich miid tajin mayin miid miich ajcxy ycixpi, etz miid yi' mibijcpidijc huidi jim Laodicea ycixpi, etz nañ tüg'óciy mibijcpidijc ycixpi huidibi ti xy'ixyich ahuin ajijp. ² Mictägy nduuñich jaydēbi yi' mibijcpidijc paadipy jotcuyc'ajtin ma y'ay yjot, etz jaydēbi ajcxy ñaychójcigixipy ñayjihuiiyigixipy mabaad jébi mi'ijtcixy yjot yhuinma'ñ tú'ciy. Mictägy nduuñich jaydēbi je mibijcpidijc mi'ijtcixy mij jotcuyc'ajtin co ajcxy huinjihuiydähuñb Dios ytiy'ajt, je tiy'ajt huidibi jecy'ajty anajty ca' pin nejhuñy, je Dios ytiy'ajt maabi Cristo Jesús. ³ Ma je Cristo jim tüg'óciy tiy'ajt janchypi etz ixpijcin janchypi yajpaady. Jadu'n yi' ytiy'ajt etz y'ixpijcin nej tüg'jugy'ajtin. ⁴ Jadu'n nimaaygixy jigix ca' pin oy cohuin'ñni e midigihuiipy

oy ayuc ma miich ajcxy ooy ymibijcni, e ca'yjanchity. ⁵ Ooy ich ngadim jimity, ixna' guëxna' ma miich ajcxy myajpatcixy. Ich njot nhuinma'n ca' yi' jim ytigoy'ity ma miich ajcxy myajpatcixy. Jotcuyc nayjihuiyijich co n'ijxcixy yajxon myajtüyöygixy tüg'óciy etz mic yi mmibijcin müidity ajcxy ma Cristo.

⁶ E müid jada ycixpi jadu'n nej miich ajcxy ti mgöbijccixy je Huindzin Jesús oga'n'aty, jadu'n ajcxy jactzinaaygix jacjugy'ajtcix ma yi'. ⁷ Je tiy'ajt etz je mic'ajt jim yi' mbaatcixy ma Cristo. Yjacyujcpedipy ajcxy yi' m'ixpijcin ma Cristo ytiy'ajt jabom jabom. Ca' m'ixtigihuäccixy ma yi' mmibijcin. Jacmibijcix jadu'n nej anajty ti nyaj'ixpijccixy Cristo ytiy'ajt. Jatytim myajnájxcixipy jäygidaacin ma Dios cixyjot huinjot jabom jabom.

Je jemybi jugy'ajtin huidibi Cristo xyajni'ixiyim

⁸ Ooy naygüend'ájtigix, ca' myajhuin'ingixy, co huingjäy xyajhuinma'nytigóoygixipy müid huingbi ayuc huingpi ixpijcin huidibi jäy ci'm ti cojy ti macxy, huidi ca' choobaady, huidi nigoo xychachhuin'ingixp müid canaag ayuc huinma'n jadu'n nej poj naaxhuiñ huinma'n. Yi' jadu'mbi ixpijcin huidibi jäy ti cojy ti macxy ca' ajcxy paady ma Cristo.

⁹ Tüg'óciy nej Dios yajpaady nañ jadu'n yajpaady ma Cristo. ¹⁰ Com je Cristo ñihuindzin'ajttaayb tüg'óciy ane'min ya naaxhuiñ, etz nañ jadu'n tzajpjoty, paady ycixpi co miich ajcxy myajpaady ma Cristo, miich ajcxy müid'ajttaayb tüg'óciy huidi Cristo ymüid. ¹¹ Co anajty Cristo miich ajcxy xyjä'adyii, chi yi'pidacy ma ajcxy mjet mhuinma'n je tiy'ajt co myajpatcixy ma Dios. Hue' je' yajtigooyb yi' pocytunñ huinma'n. Jada je' je' tiy'ajt huidi Cristo Jesús ypidac, ca' miich ajcxy xyjä'adyii. Ca' miich ajcxy mdiy'ajttiy ma mninix. Tigach Jesús ytuuñ müid miich ajcxy, ca' yjadu'nity nej judíojäy ajcxy tiy'ajt pidaaccixy ma ñinix müid tzujc. ¹² Co ti mnibejtcixy müid Cristo yxi, jadu'n nipaady nejihuüy ti mnaaxtigiygixy quipxy müid Cristo co yi' ñaaxtigiy. Co ti mmijpidaaccixy Dios ymic'ajt jadu'n nipaady nejihuüy quipxy müid Cristo ti mjugypijccixy co Dios yajjugypijcy y'ung co y'o'cy. ¹³ Co ca' anajty miich ajcxy Dios xyjä'adyii, müid miich anajty ajcxy pocytunñ huinma'n jadu'n miich anajty m'ijtcixy nej öcpi. E co ti mmijpidaaccixy Cristo, Dios ti xyhuinmeecxi ajcxy tüg'óciy mbocy, e jadu'n nipaady nejihuüy Dios ti xyajjugypijccixy quipxy müid Cristo. ¹⁴ Co Cristo y'o'cy ma yi' cruudz müid ajt nbocy ycixpi, jadu'n nipaady nejihuüy Dios ti xyjödzm xihuin huidi anajty xychaachtunaanim. Co Dios anajty yajtigooy ich ajt nxihuin, jadu'n nipaady nejihuüy ti mijxojtzpety je xihuin necy ma Jesús ycruudz. ¹⁵ Co Cristo y'o'cy cruudzcixy, chi ycödiigooy je ca'oybi ymic'ajt, etz je poj naaxhuiñybi ymic'ajt. Chi je Cristo yajtzo'yduñ je ca'oybi etz je poj naaxhuiñybi co yajcixy yajnaxy ma jäy yhuinduu.

Tzojccix nijot'ajtcix tüg'óciy huidijaty tzomb ma Dios tzajpjoty

¹⁶ Ca' mdungixy cuenti co pinjaty ajcxy xy'agapxihuipy etz xyñimähuipy:

—Amay'at jada jicxy picy, etz amay'at jada xii, etz amay'at je jemybo', etz amay'at yi' Sábado xii. ¹⁷ Jecy'ajty jäy jadu'n ti yajtuñ yjadu'mbi huinma'n, jayijpni ca' anajty Jesucristo ymiiñi ya naaxhuiñ. Jadachambi xii tiempo Jesucristo ytiy'ajt tügpajc yi' je' ooy ycopicyity. ¹⁸ Ca' huaad yi' jäy ajcxy xpijci je Cristo y'oy'ajtin huidibi ajcxy mbadamyb. Yi' ajcxy huidi oygohuin'iniñ naybidaacip jadu'n nejihuüy ooy yung naxy ajcxy yjäy'ajtcixy, e ca' yjanchity. Yi' ajcxy yi' y'ojadajtpy ángeles. Yi' ajcxy naygömayip co ti tiy'ajt patcixy ma cumäy, ninigoob ajcxy amij agix ñayjihuiyigixy müid co tzachmijpidaaccixy yci'mhuinma'n etz ñinix chojcin. ¹⁹ Yi' jadu'mbi jäy ca' ajcxy yajpatcixy ma Cristo, je huidibi nigohuajc'ajtp tüg'óciy mibijcpidijc. Je mibijcpidijc Cristo yajyeecp ma ajcxy ymibijcin jadu'n nej Dios tzocy, e yi' ajcxy patcixy tüg'óciy mic'ajt etz tiy'ajt ma yi'. Müid co Cristo nigohuajc'aty je mibijcpidijc, paady ajcxy y'ijtcixy tügpicy, jadu'n ajcxy nipaady nej tüg' jäy ñinix müid ycohuajc huidi ane'm je ñinix etz müid emy huidibi yajyücxtaayb je ninix.

²⁰⁻²¹ Co miich ajcxy ti mmibicy Cristo, jadu'n nipaady nejihuüy ti m'öccixy quipxy müid Cristo, e nañ ti mbidzimgixy ma yi' naaxhuiñyjäy yhuinma'n xyaj'ane'mgixy. ¿Na'ámy co

chambaad mjectzinaaygixy jadu'n nej jihuüy yi naaxhuiñyjay yhuinma'n xy'ane'mgixy? ¿Na'amy co mjectzinaaygixy yi jäy ajcxy ycötujcin huidibi minaamb co ca' huaad mgonügy jada, ni ca' huaad mjiicxy jada, ni ca' huaad nidoñ yijimbi? ²² Tüg'óciy huidibi ngonücim, njiicxim, e nnidonim, co ytundäy, chi ytigoydäy. Yi jadu'mbi huinma'n ci'm jäy ajcxy cojcixy macxcixy, e nañ ci'm jäy ajcxy yaj'ixpijccixy huidibi ca' yajpaady ma Cristo. ²³ Yi jadu'mbi cötujcin jadu'n yquëxigü nej ooy y'oyity ooy y'oymibijco'cnity, e ca' yjanchity. Co jäy ajcxy cuydungixy ooy ajcxy ñaybidáacigixy tudägy, etz nañ chaachtungixy ñicx ycohuajc. Yi jadu'mbi cötujcin ca' ti mic'ajt miidity, com co ca' jadu'n jëb yajtigoy jibic-huinma'n yi jadu'mbi cötujcin.

3

¹ Miich ajcxy huidibi ti mmibicy je Cristo jadu'n nipaady nejihuüy ti mjugypijccixy quipxy miid Cristo, e jemybi jugy'ajtin ti myajtzondaaccixy. ² Ixtaaygix je tiy'ajt huidibi tzomb tzajpjoty ma je Cristo yajpaady ma Dios ymijc a'oy'amybi, e yi' je' je mij'ane'mbi. ³ Co ti mmibijccixy je Cristo jadu'n nipaady nejihuüy co ti m'o'ccixy miid yi', etz ma je Cristo jemybi jugy'ajtin miich ajcxy ti mbaady. Jadachambi yi mjogy'ajtin Cristo miid ci'am, e yi' yajpaatp ma Dios. ⁴ Co anajty je Cristo ñayguëxigüii jadüg'oc ya naaxhuiñ, huin'it xii miich ajcxy mnaybada'nyii miid yi' jilby tzajpjoty ma yi oybi it.

Je jecy jugy'ajt etz je jemybi jugy'ajt

⁵ Yajtigooygix je jibic-huinma'n huidibi miich ajcxy miid, huidibi naaxhuiñyjäy ajcxy yhuinma'n'ajtip. Ca' huaad miidcapxtigoyipy töxyjäydijc. Ca' huaad jibic-huinma'n mdunipy. Ca' huaad mdungixy ninicx chojcin, etz huidibi ca'p y'oyhuinma'ñity. Ca' huaad m'adzogipy comeen'adii, com ñipaapty jadu'n nej ajcxy huidibi tzaadzech quipychech ojadajtp. ⁶ Miid co jäy ajcxy jadu'n ytundigooygixy, paady ycixpi jacjiini Dios tzaachtunip jäy ajcxy huidibi ca' ycapxymidoogixy yi' ycötujcin. ⁷ Nañ jadu'n miich ajcxy jayjip co ca'ni anajty mmijpidaaccixy je Cristo, mdzinaaygixy anajty miid jibic-huinma'n quipxy miid je jacjadyii naaxhuiñyjäy co anajty mguydungixy yi' jäy ycötujcin huidibi ca' ytiy'ajity. ⁸ Jadachambi ixmajtcix miich ajcxy yi' jibic-huinma'n jadu'n nej co migüg mmijotma'tcixy, jadu'n nej co ooy mjot'ambijccixy, jadu'n nej co jibic mdungixy, jadu'n nej co migüg mnigapxcixy ni'o'jiiygixy, jadu'n nej co jibic ayuc mgapxcixy. ⁹ Ca' huaad mnayhuin'iiñigixy miñ xyipy. Co ti mmibijccixy Cristo ti m'ixmajtcixy je jibicjot je jibic-huinma'n huidi anajty ajcxy miid. ¹⁰ Jemybi jot jemybi huinma'n ti mbatcixy e Dios yjacyejcy jemybi jot jemybi huinma'n jabom jabom ma miich ajcxy co m'ixpijccixy yi' ytiy'ajt. Jadu'n Dios tzocy co mjot mhuinma'n mbidáaccixipy jadu'n nej Cristo jot huinma'n miidity, je Cristo huidibi ti yaj'oyiy je jemybi jot jemybi yhuinma'n. ¹¹ Co jäy ajcxy mijpidägy Cristo, chi tú'ciy ajcxy yajpaady ma Dios, ca' ñejity co nijejity ajcxy miid griegojäy y'ixpijcin etz jacjadyii miid judíojäy y'ixpijcin, ca' ñejity pen ti myajtiy'ajttiy o ca' mdiy'ajttiyity. Ca' ñejity co nijejity ajcxy jigüegy choon, e ca' y'ixpicyity, etz jacjadyii ooy adzip ahua'n ñaybidáacigixy. Ca' ñejity co nijejity ajcxy moso'ajtp etz jacjadyii huidibi ci'm naymiduunip. Nidüg'óciy ajcxy tú'ciy ñaybidägyii co ajcxy mijpidägy Cristo. Nidüg'óciy mibijcpidijc tú'ciy pattay ajcxy mic'ajt oy'ajt ma Cristo, e nañ Cristo yajpaady ma nidüg'óciy ajcxy yjot yhuinma'n.

¹² Com Dios miich ajcxy ti xyhuin'ixy, e ti xychojccixy ti xyjihuiygixy, e Dios ti xyajhuadzi ajcxy mjot mhuinma'n, paady ycixpi pidaaccix mjot mhuinma'n co mba'ayoohuaangixy migügtijc. Pidaaccix mjot mhuinma'n co oyjäy'ajtin mdunaangixy etz co nicy xemy mnaybidägaangixy. Pidaaccix mjot mhuinma'n yung naxy etz mimecxtujccixy migügtijc ajcxy. ¹³ Naymimecxtújcigix nidüg nidüg. Co mmigüg ajcxy xymidundigooyipy jëbi mhuinmeecxipy tim jadu'n nej ich ajt nHuindzin Jesucristo ti mecxy miich ajcxy mbocy. Com Cristo ti xyhuinmeecxcixy, paady copicy miich ajcxy meecxip yi migüg huidibi ajcxy xymidundigooyb. ¹⁴ Mnaychójcigix mnayjihuiygixy nidüg nidüg. Co mnaychójcigixipy nayjihuiygixipy, chi jëb huaad mdzinaaygixy miid

mjot mhuinma'ñ tú'ciy. ¹⁵ Je jotcuyc'ájtín huídibi Dios xymooyim, huen ajcxy xy'ane'mi mjot mhuinma'ñ. Dios ti xyajníbijccixy, jaydéb tú'ciy m'ijtcixy miid mjot mhuinma'ñ. Mjatytim yajnaxipy ajcxy jáygidaacín ma Dios jabom jabom.

¹⁶ Naybídáacigix co je Cristo y'ayuc ytiy'ajt yajtigíydáhuamby ajcxy mjot mhuinma'ñ. Nayyaj'ixpíjigix etz nay'íhuíjigix naygapxhuíjigix miid je Cristo y'ayuc ytiy'ajt, jadu'n nej Dios ixpíjicín yecy. Hígix Salmo etz ígix himno etz yi iy huídibi je Espíritu Santo ypidápip ma mjot mhuinma'ñ, e jadu'n jáygidaacín m'ijtcixy ma ajcxy mjot mhuinma'ñ miid Dios ycixpi. ¹⁷ Huen ti ayuc huídibi ajcxy mgapxyp, huen ti tung huídibi ajcxy mdumby, hue' capxcix tungix miid ajt nHuindzín Jesús yxí. Etz jatytim yajnaxcixy Dioscojuyp ma Dios Teedy ma Jesucristo yxí.

Je mibijcpidijc ajcxy chinaayín ma ypijchinaaygixy

¹⁸ Miich töxyjáydijc ajcxy, capxymidoogix mñáy ajcxy com jadu'n ích ajt nHuindzín Jesucristo tzocy co mgapxymidohuípy ajcxy mñáy. ¹⁹ Miich yéydijctijc ajcxy, tzojccix jíhuíygix ajcxy mdöxyijc, ca' ejcín mmií'idípy miid mdöxyijc. ²⁰ Miich ajcxy ung anäg, mgapxymidohuípy ajcxy mdaj mdeedy miid tüg'óciy. Jadu'n Dios jáygidágy co ung anäg ajcxy capxymidooy ytaj yteedy. ²¹ Miich ajcxy ungdeedy ca' oyñinej mmigapxcixy m'ung m'anäg ajcxy. Co jadu'n oyñinej m'ojípy m'ung ajcxy, ca' yjeyity co nicxy ajcxy taj may chinaaygixy yjuy'ajtcixy. ²² Miich ajcxy tumbidijc, capxymidoogix yi mHuindzín, ca' janch xypaat oy mic mdungixy co mhuindzín jim xyhuindíxcixy, e chi co je' yjihuácní, chi nigoo mhuáccixní mdínaaygixní. Hue' janchtiy oy tungixy miid oyjot oyhuinma'ñ, com je' je' je' tiy'ajt co Dios mhuindzígíygixy. ²³ Je tung huídibi mdungixyp, tungix cixyjot huínijot. ²⁴ Com miich ajcxy mnejhuíyb co Cristo xymöhuaangixy it lugar tzajpjoty, paady ycixpi oy tunggix jigix Cristo jáygidápipy huídibi ajcxy mdumby. ²⁵ Dios chaachytunípy pinjaty tundigooyb. Ca' Dios huín'ijxpety tzaachytunípy jáy.

4

¹ Miich ajcxy yajtumbidijc, yajtungix mdumbí nej ypadyii etz nej ytudágyity, com miich ajcxy mnejhuíyb co nañ miid miich ajcxy tüg mHuindzín jíiby tzajpjoty.

² Jabom jabom Dios mibijctzoogix, ca' m'ixmajtzcixy Dios mibijctzoohuín. Huíy ycuyc m'idípy ajcxy etz jatytim yajnaxcixy jáygidaacín ma Dios co anajty mgapxtaaccixy. ³ Nañ jadu'n miich ajcxy tun may'ajt mibijctzoogix Dios miid ích ajcxy ycixpi. Mibijctzoogix Dios co huen it lugar xymöhuíbyích ma jébi ngapxhuácxíyích Dios y'ayuc ytiy'ajt. Ngapxhuácxíyích je Cristo ytiy'ajt huídibi jecy'ajty anajty ca' pin nejhuíy. Miid co ngapxhuácxích Cristo ytiy'ajt, paady ycixp nyajpaadyích pujxtigoty. ⁴ Mibijctzoogix Dios miid ích ycixpi, jigix jébi ngapxhuácxíyích je Cristo ytiy'ajt huádz oy, nej jáy ajcxy jéb huádz huínjíhuíygixy, jadu'n nej ypadyii ngapxhuácxíbyích.

⁵ Tíydudágy mdzínáaygixípy miid yi jáy ajcxy huídibi ca' mibijccixy Cristo. Yajnguèxíccix miich ajcxy Dios ytung jabom jabom, ca' huaad xí tiempo myaj'ayoogixy. ⁶ Yi mgapxín yi mmiydaacín yajtungix oy'amy huindzígí'ñ'amy nej jébi huaad jáy ajcxy jáygidaaccixy. Copicy mhuinmayípy ajcxy jayíjp nej jáy huaad m'adzoogixy.

Je capxpocxín huídibi cogixíyñip je ñecy

⁷ Tíquico co ñícxípy jim ma miich ajcxy, yi' xyajmíidmíydáaccixípy tüg'óciy nej ytunyí yjadyí ma ích. Ooy ndzocy njíhuíyích ích ajt nmígüg Tíquico. Yí' ooy tudágy ytuúñ quípxy miid ích ajcxy ma ajt nHuindzín Jesucristo ytung. ⁸ Paady yam nguexyích Tíquico ma miich ajcxy jigix ajcxy xyajmíidmíydágyípy nej yam ích ajcxy nyajpaatcixy, etz nañ jigix xyjotmicmígápxcixípy. ⁹ Quípxy miid Tíquico yam nguexyích Onésimo, tüg ajt nmígüg huídibi ooy ndzocy njíhuíyích, huídibi tudágy ti ytuúñ miid ích ajcxy. Onésimo miich ajcxy yi mmígogajp. Tíquico y Onésimo xyajmíidmíydágyípy ajcxy tüg'óciy tijaty tuunípy jajtípy yam ma ích ajcxy.

¹⁰ Je Aristarco, huídibi pujxtijc íñaayb quípxy miid ích, cham quexy capxpocxín ma miich ajcxy. Marcos, je Bernabé y'uch, cham quexy capxpocxín nañ jadu'n ma miich

ajcxy. Ti ñich ayuc nguexyich jayhuin ma miich ajcxy co ixypy ñicxy Marcos ma miich ajcxy, mgöbigipy ajcxy agujc jotcujc. ¹¹ Nañ jadu'n je Jesús huidibi jäy ytipy Justo, cham quexy capxpooxín ma miich ajcxy. Yi Aristarco, Jesús etz Marcos yi' ajcxy ni tugigpajc, judíojäy huidibi tumb miid ñich ma Dios ytung co ngapxhuäcxyich Dios y'ane'min. Yi nidugiigpi ñich ooy ti xyajjotcujc'atyich. ¹² Je Epafras, miich ajcxy mmigogajp je Cristo ytumbi, nañ jadu'n cham quexy capxpooxín ma miich ajcxy. Je Epafras jabom jabom Dios mibijctzoy miid miich ajcxy ycixpi. Yi' mibijctzoob Dios co miich ajcxy cuydunda' tüg'óciy je Cristo y'ayuc ytiy'ajt, etz co nayejcigix amumdügjot ma Dios, e jadu'n ajcxy mguydunipy nej Dios tzocy. ¹³ ñich jëbi tiy'ajt nyecyich co Epafras ooy jotmay jihuüy miid miich ajcxy ycixpi, etz nañ ooy nidajy nimay miid yi' ajcxy ycixpi huidibi tzinaayb jim Laodicea etz jim Hierápolis. ¹⁴ Je Lucas, je doctor, huidibi je mibijcpidijc ooy tzojccixy ooy jihuiygixy etz Dimas nañ cham ajcxy quexy capxpooxín ma miich ajcxy.

¹⁵ Yajnajxcix ñich ngapxpooxín ma yi mibijcpidijc jim Laodicea. Nañ yajnajxcix ñich ngapxpooxín ma yi Ninfas etz ma yi mibijcpidijc huidibi yöymujccixp ma yi' ytiyc. ¹⁶ Co anajty jada necy ti mgapxtaaygixy, tungix may'ajt quejxnajxcix jada necy ma yi mibijcpidijc ajcxy jim Laodicea. Huen ajcxy nañ jadu'n capxcixy jada necy, nañ jadu'n miich ajcxy capxcix je necy huidibi ti nquexyich jim Laodicea. ¹⁷ Tungix may'ajt mnimähuiipy je Arquipo co huen cuydundäy je tung huidibi ñich ajt nHuindzin je Cristo ti yajñibedyii.

¹⁸ ñich Pablo, ñich ci'm njaaybich jada capxpooxín ma miich ajcxy. Ca' ajcxy mjäydigoyipy co ñich nbujxtijc ññäy. Huen Dios may'ajt oy'ajt tunipy miid miich ajcxy ycixpi. Jadu'n ngapxcíxyich. Amén.

1 TESALONICENSES

Yi Jayijp Necy Huidi San Pablo Yajniguejx Je Mibijcpidijc Jim Tesalónica

¹ Hich Pablo miid Silvano etz Timoteo cham nguexyich jada necy ma miich ajcxy jim Tesalónica huidibi yajpaatp ma Dios etz ma ajt nHuindzin Jesucristo. Huen ich ajt nDios Teedy etz ajt nHuindzin Jesucristo may'ajt oy'ajt tunipy miid miich ajcxy etz xyajjotcughiygixip.

Je mibijcin huidibi anajty yejcpy ijxpejt

² Jabom jabom ich ajcxy nyajnaxyich jäygidaacin ma Dios miid tüg'óciy miich ajcxy ycixpi. Jabom jabom ich ajcxy Dios nmibijctzooyich miid miich ajcxy ycixpi nidüg'óciy. ³ Co Dios Teedy nmibijctzóoygixyich, chi njäyechich jadu'n nej miich ajcxy ti mmibijccixy Jesucristo, etz jadu'n nej oy mdungixy ma yí' ytung. Nañ njäyechich jadu'n nej oyjäy'ajtin mdungixy etz jadu'n nej mdzojccixy mjihuiygixy mmigügtijc. Nañ jäymejtzpich jadu'n nej miich ajcxy mjijp'ixy jabom jabom co ich ajt nHuindzin Jesucristo xymöhuaangixy it lugar jiby tzajpjoty, e ca' mjotmetzciiygixy. ⁴ Migügtijc ajcxy, ich ajcxy nejhuüyb co Dios xychojccixy xyjihuiygixy, e nañ ich ajcxy nejhuüyb co Dios ti xyhuin'ijxcixy. ⁵ Co ich ajcxy jayhuin ngapxhuäcxy Jesucristo y' ayuc ytiy'ajt ma miich ajcxy, chi ca' jëyi Dios y'ayuc ngapxhuäcxich, nañ nduunich mjihuinma'ñ miid Dios yjihui'ñ ymic'ajt. Jotcuyc nduunich ma miich ajcxy. Miich ajcxy mnejhuüyb co tudägy nduunich jigix jëbi mmijpidaaccixipy Jesús y'ayuc ytiy'ajt.

⁶ Oy anajty ooy mjayaj'ixhuidijtcixy mjayajpahuidijtcixy co Dios y'ayuc ytiy'ajt jemybi ajcxy ti mgöbijccixy, e chi ajcxy ti mbadüdigiiygixy ich je n'ijxpejt, e nañ jadu'n ajt nHuindzin Jesús y'ijxpejt. ⁷ Co tzaachypi ti mminajxcixy ti myajnajxcixy miid Jesucristo ycixpi, chi tiy'ajt ti myejccixy ma tüg'óciy mibijcpidijc jim Macedonia naaxjot etz jim Acaya naaxjot jadu'n nej jëbi ajcxy nañ jadu'n mijpidaaccixy Jesucristo y'ayuc ytiy'ajt. ⁸ E jadu'n miich ajcxy ti myejccixy je ijxpejt miid Jesús y'ayuc ytiy'ajt, canan jëyi jim Macedonia etz Acaya, nañ ti myejccixy ijxpejt ma canaag'it naax cajp. Je mayjäy ti nejhuüydäy jadu'n nej miich ajcxy ti mmibijccixy Jesús y'ayuc ytiy'ajt, paady ycixpi ca' ycopicyity nicxy ich ajcxy njacyajnimäy je mayjäy jadu'n nej miich ajcxy ti mmibijccixy. ⁹ Je mayjäy ma canaag'it naaxcajp ooy ñaymiidmiydáacigixy jadu'n nej ich oy ngogapxiyich miich ajcxy, etz nañ jadu'n nej ich miich ti xycöbijccixyich e nañ je mayjäy ñaymiidmiydáacigixy jadu'n nej ti m'ixmajtzcixy yí tzaadzech ojadadii, e ti mbadüdigiiygixy je Dios juugypí janchypí etz tudägypí. ¹⁰ Nañ jadu'n je mayjäy ajcxy ñaymiidmiydáacigixy jadu'n nej miich ajcxy m'ahuijxcixy mjijp'ijxcixy co Jesús, Dios y'ung, yhuimbida'ñ ya naaxhuiñ, chona'ñ tzajpjoty. Je huidibi Dios ti yajjugypijc co ti y'ögy. Yí' je' je Jesús huidi ti xycohuaanim ma yí mijpi tzaachypi huidibi Dios yquexamyb miid co jäy ajcxy chach pocytungixy.

2

Pablo ytung huibidi anajty ymiid jim Tesalónica

¹ Migügtijc ajcxy, mnejhuüyb ajcxy co ca' ñaadigí'aty, co ich oy ngapxhuäcxy Dios y'ayuc ytiy'ajt ma miich ajcxy. ² Miich ajcxy mnejhuüyb co jayijp ca'ni anajty nmechich ma miich ajcxy ich ajcxy ooy tzaachypi etz ayo'n ti nyajnajxcixy jim Filipos. Ti jäy xyhuin'ooy xyjijp'ooyich. Co nmejchich ma miich ajcxy, ca' ñejity co tzaachypi ti mminaxyich ti nyajnaxyich jayijp, chi Dios ti xyajjotmicpicyich, jigix huinmic jotmic ngapxhuäcxibich Jesús y'ayuc ytiy'ajt. Ti ngapxhuäcxyich Dios y'ayuc ma miich ajcxy, oy ich jäy anajty xyca'ixa'ñ xycatzoga'ñ. ³ Ca' ich ngapxhuäcxyich anii, ni jibic ayuc, e ni ngamiydägyich jibic ayuc jibic huinma'ñ nej huaad nhuin'ingixy. ⁴ Ca' ti nhuin'ingixy. Dios ti xyajnicbicyich co ngapxhuäcxibich yí' y'ayuc ytiy'ajt, e jadu'n nguyduunich. Ca' nduunich co huen jäy ajcxy jäygidägy ich ndung. Jada janchtiy

ndumybich jigix Dios jäygidägipy iich ndung. Com Dios yi' ñejhuiyb nej jäy tüg'óciy yjot yhuinma'ñ miidity. ⁵ Miich ajcxy mnejhuiyb co ca' nyajxondaaccixy miid ayuc oyjatypi huidi ca' choobaady. Nañ ni ca' iich ajcxy nhuinma'ñ 'ijxtäy nej jëbi iich ajcxy nmeeybaat. E Dios nañ ñejhuiyb co yjanchity jada. ⁶ Nañ ni ca' iich ajcxy njijp'ixy co jäy ajcxy xycömayipyich, ni miich ajcxy etz ni jac-huingbi jäy. Com je Cristo ti xyquexyich co ngapxhuäcxibich yi' y'ayuc, paady ycixp jëbi ixypy n'ane'myich co ixypy miich ajcxy xyajmij'atyich etz xypubetyich, per ca' jadu'n ti nduuñich. ⁷ Oygíxy oy'amy ti nduuñich ma miich ajcxy, jadu'n nej tüg ungday miidity y'ung y'anäg miid oyjot oyhuinma'ñ. ⁸ Ti iich miich ooy ndzojccixy njihuiygixy, canan jëyi Dios y'ayuc ytiy'ajt ti nmooygixy, nañ naygÿegáanibich anajty ma yi o'cin miid miich ajcxy ycixpi. ⁹ Co jayhuin ngapxhuäcxich Dios y'ayuc ma miich ajcxy, mjäymejchpy miich ajcxy jadu'n nej iich ajcxy nduuñ n'ayooyich anajty xiim tzuum miid iich ajcxy ngaayin n'uucin ycixpi. Ca' anajty n'adzibaangixy, paady iich ajcxy nduuñ n'ayooyich xiim tzuum miid iich ajcxy ngaayin n'uucin ycixpi.

¹⁰ Miich ajcxy huidibi mibijcp mnejhuiy ajcxy, e nañ ñejhuiyb Dios, co iich ajcxy ndzinaayich ma miich ajcxy tudägy, huädz iich anajty ajcxy njot nhuinma'ñ miidityich. Ca' ma ndundigooyich ajcxy nej pin xy'ocnihuambedipyich ajcxy. ¹¹ Mnejhuiyb miich ajcxy nej n'ihuijicixy ngapxhuijicixy etz njotmicmigapxcixy nidüg nidüg, tim jadu'n nej tüg ungdeedy ihuijy capxhuijy y'ung y'anäg. ¹² Ti ngapxhuijicixy co ooy chach copicyity co mdzinäyagixipy nej Dios jëbi jäygidägipy yi mdzinaayin. Com yi' miich ajcxy ti xyhuin'ijxcixy jëbi mdigüygixipy ma yi' chinaaydac, ma yi' miidity y'oy'ajtin ymij'ajtin.

¹³ Paady ycixpi nyajnajxpich jäygidacín ma Dios jabom jabom, jadu'n nej miich ajcxy anajty ti mmido'mbijccixy etz ti mgöbijccixy Dios y'ayuc ytiy'ajt huidi ngapxhuäcxich ma miich ajcxy. Ti mmibijccixy anajty co iich ajcxy ti ngapxhuäcxy Dios y'ayuc ytiy'ajt. Canan je' ti ngapxhuäcxyich ayuc huidi jäy ti cojy ti macxy. E janch tiy'ajt co Dios y'ayuc ytiy'ajt cham ytuñ ma miich ajcxy mjot mhuinma'ñ, miich ajcxy huidibi mibijcp. ¹⁴ Migügtijc ajcxy, jadu'n ti mjajticy jadu'n nej yajty miid je judíojäy huidibi anajty tzinaayb jim Judea co ajcxy mijpidägy Dios y'ayuc ytiy'ajt, chi je ymigogajp ajcxy ooy y'ixhuidijti ypahuidijti. ¹⁵ Je judíojäy ymidziptzoon iich ajt nHuindzin Jesús, e chi yaj'o'cy ajcxy, tim jadu'n nej ajcxy y'ap yteedy yaj'o'cy huidijaty anajty Dios y'ayuc najtzcapxiyip jecy'ajty. Etz nañ jadu'n ajcxy xyajpidzimyich jim ma ajcxy judíojäy chinäy. Dios ca' jadu'n jäygidägy jadu'n nej ajcxy ytundigooy, nañ ooy ajcxy ymijotmädyii tüg'óciy jäy. ¹⁶ Yi judíojäy ajcxy ti capx'adujccixy co ca' huaad ngapxhuäcxyich je Cristo ytiy'ajt ma yi jäy ajcxy huidibi ca' yjudíojäyity, nej huaad ajcxy y'alma ñidzóccixipy. Co jadu'n ajcxy ytundigooy, chi ajcxy ooy ñigi ypocy ñibety ma Dios. Per Dios ti ooy chip y'ejcin pidacy ma judíojäy miid ajcxy ypocy ycixpi.

Pablo ñijot'ajtp co nicxy cogapxihuaangixy yi mibijcpidijc

¹⁷ Migüctijc ajcxy, cham hueeni xii tiempo ti ñaxy ma ca' n'oc'ijxcixni ajcxy, per ca' iich miich ajcxy njäydgoy. Ooy iich ajcxy nja'nicxa'ñ ma miich ajcxy jadüg'oc, e ca' y'oyÿ nej iich ajcxy nicxiybich ma miich ajcxy. ¹⁸ Ooy iich ajcxy njanicxa'ñ anajty ma miich ajcxy. E iich, Pablo, ci'm anajty njanicxa'ñich mejtz'oc tugüg'oc, e je mujcu' nñi'aa ndü'aa ti xy'adujcich. ¹⁹ ¿Ti mij'ajt miich ajcxy mdiy njijp'ijxpich? ¿Ma mdiy ajcxy nbada'ñich njotcujc'ajtin n'oy'ajtin? Co anajty ajt nHuindzin Jesucristo yhuimbity ya naaxhuiñ, nbadaamybich jotcujc'ajtin etz oy'ajtin mij'ajtin miid je tiibi nduuñich ma miich ajcxy co ti mmijpidaaccixy Dios y'ayuc ytiy'ajt. ²⁰ Miid miich ajcxy ycixpi nmidich jotcujc'ajtin etz xondaacin.

3

¹⁻² Miid jada tajin mayin co iich anajty ca' nmimadäga'ñ miid miich ajcxy ycixpi, paady iich ajcxy nhuinma'ñ nbidägy co jëbi nhui'ma'ñich naydüg jim Atenas, etz jëbi nguexyich iich ajt nmigüg Timoteo ma miich ajcxy. Timoteo nañ jadu'n ytuñ ma Dios

ytung quipxyi miid iich co ngapxhuäcxyich je Cristo y'ayuc ytiy'ajt oybi. Yi Timoteo ñigapxpedipy iich n'ayuc etz xyjotmicmigapxip ajcxy, jigix jac mic ajcxy myajpaadip ma mmibijcin. ³ Jadu'n Timoteo ytunipy ma miich ajcxy jigix ca' mhuinma'ñytigóoygixip miid je tzaachypi huidibi ajcxy mminajxyp myajnajxyp. Miich ajcxy mnejhuiyb co copicy myajnaxipy ajcxy tzaachypi miid Jesucristo ycixpi. ⁴ Co oga'n n'ijtyich ma miich ajcxy, chi iich miich ajcxy nnimaayich co tzaachypi mminájxcixipy myajnájxcixipy miid Jesucristo ycixpi. E miich ajcxy cham mnejhuiygixyp co janch tiy'ajt jadu'n nej nnimaaygixy, miid co cham tzaachypi mminajxcixy myajnajxcixy. ⁵ Com nejhuiybich co tzaachypi mminajxyp myajnajxyp ajcxy, paady ycixpi tajpich maybich miid miich ajcxy ycixpi. E com ca' nmimadäga'ñich je tajin je mayin, paady ycixp ti nguexyich Timoteo ma miich ajcxy jaydëbi tiy'ajt xypaadibich pen tiydudägy miich ajcxy mmibicy. Tzigüybich anajty co ndijy je mujcu' ti xyajhuinma'ñytigooygixy, etz jadu'n anajty ñaadig'ada'ñ iich ndung ma miich ajcxy.

⁶ Jadachambi Timoteo ti xyñihuimbityich, chooñ ma miich ajcxy jim Tesalónica, etz ti xyajnejhuiyich jadu'n nej miich ajcxy mmidity mmibijcin, etz nañ ti xyajnejhuiyich jadu'n nej mnaychójcigixy mnayjihuiyigixy nidüg nidüg. Timoteo nañ jadu'n xyñimaaybich jadu'n nej miich ajcxy xyjäymechich etz xychocy xyjihuiyich, etz nañ ooy miich ajcxy xyja'ixaangixyich jadüg'oc, jadu'n nej iich miich ajcxy nañ jadu'n ooy nja'ixaangixy. ⁷ Migügtijc ajcxy, ooy capxy agujc ayuc agujc nyajpaadyich. E co Timoteo ti mimiñ je oybi ayuc tiy'ajt jadu'n nej miich ajcxy mjacpanicxy tiydudägy yi mibijcin, chi mij ooy ti njotcugiyich. ⁸ Jadachambi jëbi njactzinäyich jotcuyc, com ti nnejhuiyich co miich ajcxy ca' m'ixtigihuäccixy ma mmibijcin. ⁹ Nyajnajxpich jäygidaacin ma Dios yhuinduu miid miich ajcxy ycixpi, miid co janch jotcuyc nayjihuiyijich co miich ajcxy ca' m'ixtigihuägy ma mmibijcin. ¹⁰ Xiim tzuum mmibijctzooyich Dios miid tüg'óciy njot nhuinma'ñich, jigix Dios xyaj'ahuáatziibich nni'aa ndü'aajich, jëbi nnicxyich ci'm ma miich ajcxy, jaydëbi njacyaj'ixpigipy ajcxy Dios y'ayuc ytiy'ajt, e jadu'n jëbi ajcxy mjacyajca'pxy mmibijcin ma mjacyajtigoy'ijtcixy.

¹¹ Njijp'ixypich co Dios Teedy ci'm etz ajt nHuindzin Jesús xyaj'ahuáatziibich nni'aa ndü'aa jigix nicxy n'ijxcixy jadüg'oc. ¹² Hich ajcxy ndzojcpy co ajt nHuindzin Jesucristo xyjacmóoygixipy tzojcin jihuiyin, jigix ñigi ajcxy mnaychogiyb mnayjihuihuib miñ xyipy, e nañ ñigi mdzójcixipy mjihuiygixipy tüg'óciy je mayjäy, tim jadu'n nej iich miich ajcxy ndzocy njihuüy. ¹³ Hich ajcxy ndzojcpy co Dios xyaj'ijtip ajcxy mjot mhuinma'ñ tücci'y ma Jesucristo ytiy'ajt, e ca' m'ixtigihuäccixy, jigix co anajty iich ajt nHuindzin Jesús ymiiñ jadüg'oc ya naaxhuiñ miid tüg'óciy je mibijcpidijc huidibi miid huädz yjot yhuinma'ñ, jëbi miich ajcxy mnayguëxigiyb ma Dios Teedy yhuinduu miid huädz mjot mhuinma'ñ, ca' ti xihuin ma Dios miid miich ajcxy.

4

Je tzinaayin jugy'ajtin huidibi Dios yjäygidacyp

¹ Jadüg nax, migügtijc ajcxy, jadachambi may'ajt nbijctzooyich, e nyajñibijccixy miid ajt nHuindzin Jesucristo ycixpi co ajcxy mjaccuychinähuipy Dios y'ayuc ytiy'ajt, jadu'n nej ti nyaj'ixpicyich miich ajcxy, etz mjactzinähuipy ajcxy jadu'n nej jëbi Dios jäygidägy ajcxy mdzinaayin, jadu'n nej ti mdungixy.

² Miich ajcxy mnejhuiyb je cötujcin huidibi ti nyaj'ixpijccixy. Jada cötujcin iich ajt nHuindzin Jesucristo ti xyajñibicyich. ³ Miich ajcxy mnejhuiyb je cötujcin jadu'n nej Dios tzocy co huädz jot huädz huinma'ñ myajtúngxixipy ma yi mdzinaayin mjogy'ajtin. Ca' huaad mmigapxtigooygixy tüg töxyjäy. ⁴ Miich ajcxy mnejhuiyb Jesús ycötujcin co copicy nidüg nidüg yëydijc pigipy tüg töxyjäy etz yajmij'adip ytöxyijc, etz nañ miiddzinähuipy miid oyjot oyhuinma'ñ. ⁵ Ca' Dios jadu'n tzocy co je yëydijc nijot'aty töxyjäy miid jibic-huinma'ñ, jadu'n nej yi jäy ajcxy y'idich huidibi ca' nejhuiy Dios

ytíy'ajt. ⁶ Ca' huaad ni pin migapxtigooyi ymigüg ytöxyijc, com Dios yi' tzaachytuniib mijcajee pinjaty migapxtigooyb ymigüg ytöxyijc. Jada cötujcin ti nyajni'ixiiygixy jayhuin. ⁷ Com Dios jadu'n ti xyhuin'ijxim jigix oyjot oyhuinma'n ndunim, canan co ndunim jibic jot jibic-huinma'n. ⁸ Co tüg jäy ytundigooy miid huingbi töxyjäy huidibi ca' töxyijc'adyii, hue' je' ñixiicpy yajxiicpy Dios ycötujcin, canan jäy ycötujcin ñixiicpy yajxiicpy, e nañ ñixiicpy yajxiicpy je Espiritu Santo huidibi Dios ti quexy ma ñich ajt.

⁹ Miich ajcxy mnejhuiyb je cötujcin co copicy mdzogipy mjihuühiipy ajcxy mmigügtijc huidibi tzinaayb jim Macedonia ñaaxjot. Migügtijc ajcxy, may'ajt nbijctzooybich co jacnaychójcigix jacnayjihüüygix. ¹⁰ Janch tiy'ajt jadu'n co miich ajcxy mdzocy mjihuüy tüg'óciy je migügtijc huidi tzinaayb jim Macedonia ñaaxjot. Nmigügtijc ajcxy, may'ajt nbijctzooybich co jacnaychójcigixy nayjihüüygixy etz mnayajmij'ájtigixy mij cajee. ¹¹ Jatyim tzinaaygix nicy xeemy, agujc jotcujc. Pidäg ajcxy mjot mhuinma'n ma mgi'mdzinaayin, etz nañ jatyim naymidúunigix. Jada tiy'ajt ti najtzcapxiyi ajcxy jayhuin. ¹² Tungix mgi'mdung, jigix yi jäy ajcxy huidibi ca' ymibicy xyajmij'adip ajcxy, etz nañ jadu'n ca' myajmayjadipy ajcxy ni ti.

Co anajty je Huindzin Jesús ymiñ ya naaxhuiñ jadüg'oc

¹³ Migügtijc ajcxy, ndzojcpich co miich ajcxy mhuinjihuühiip je tiy'ajt ma je' yajpaady y'alma je migügtijc tiibi y'öccixy, jigix ca' mdájcxipy mmáygixipy, jadu'n nej je jäy ajcxy nidajcixy nimaygixy huidibi ca' mibijccixy co Jesús yajjugypiga'n jadüg'oc je tiibi ajcxy y'o'ccixy. ¹⁴ Jadu'n nej ñich ajt nmibijcim co Jesús yjugypijcy co y'o'cy, nañ jadu'n Dios yajjugypijctähua'n je öcpidijc huidijaty ajcxy mibijc Jesús.

¹⁵ Paady ycixpi ñich miich ajcxy nnimaaygixy co ajt nHuindzin Jesús tiy'ajt ti yecy co ñich ajt huidibi jacjuy'ajtp co anajty Jesús yhuimbity ya naaxhuiñ, tügmucy xyajnicxaanim miid yi mibijcpidijc tiibi y'o'ccixy. Ca' ñich ajt njayjpp'adaanim yi tiibi y'o'ccixy, yi' ajcxy jayjpp'adamb. ¹⁶ ñich ajt nHuindzin Jesús ci'm yhuimbida'n ya naaxhuiñ chona'n tzajpjoty miid ycötujcin, miid ymic'ajtin, e yi' mic capxamb ane'mamb. Huimbidadamb Jesús quipxyi miid tüg ángel mijtungmiidpi huidibi nañ jadu'n mic capxamb ane'mamb. E co anajty yhuimbity, chi Dios yajxuxa'n yi' ytrompeta, e tim huin'ítiy Jesús xyajpidictähuaanim ya naaxhuiñ, e chi ajt naybadaanim miid Jesús jocjoty. ¹⁷ E chi ñich ajt huidijaty anajty jactzinaayim, naybadaanim miid ajt nHuindzin Jesús jocjoty quipxyi miid je'ajcxy huidibi anajty ti yjugypicy jadüg'oc. E jadu'n ndzinähuaanim huinixii huinitiempo miid ajt nHuindzin Jesús. ¹⁸ Miid jada ayuc tiy'ajt nayyajjotcugíiyigix miñ xyipy.

5

¹ Migügtijc ajcxy, ca' ycopicyity njacnijayüygixipy jadu'n nej je xii je tiempo yca'pxa'n. ² Miich ajcxy mnejhuiyb co ñich ajt nHuindzin Jesucristo yhuimbida'n ya naaxhuiñ tzaachytuna'n yi mayjäy miid ypocy ycixpi. Jesús miinaamb mina anajty je mayjäy ca' ti ocjijp'ijxni. Jadu'n ymiina'n jadu'n nejjihuüy tüg meetzpi ymiñ coodz co ymeedza'n. ³ Co anajty je mayjäy yminaangixy: “Cham ooy jotcujc ndzinaayim, ca' ma tzip capxy”, chi timitiina jotcömoñi Dios yajtigoya'n je naaxhuiñybi. Timitiina ayo'n ñimiiniyb jäy ajcxy. Tim jadu'n nipaady nej töxyjäydijc timitiina ypa'mbety co tiempo ti yhuaad'ajtni co y'ung yajma'xung'ada'n. E ni pin huaad cacöguëgipy je tzaachypí co Dios anajty ymiñ ya naaxhuiñ yajtigoydähua'n yi mayjäy. ⁴ Per migügtijc ajcxy miid miich ajcxy Dios ytíy'ajt, paady miich ca' jadu'n myajpáatcixni nejjihuüy mdzinaaygixy agootztuuby. Ca' ajcxy mgixipy mgüedípy mina anajty Jesús miñ jotcömoñi, jadu'n nej jäy ñigoobi ycixy ycuency co ti ymeechyii. ⁵ Com tüg'óciy miich ajcxy Dios y'ayuc ytíy'ajt mhuinjihuüygixy, jadu'n nipaady jadu'n nejjihuüy ti mgoximiiygixy ti mgodiicxíccixy. ñich ajt ca' njacyajpaatim agootztuuby. ⁶ Paady ycixpi ca' huaad njäydigooyim Dios ytíy'ajt, ca' huaad nmi'öctigooyim jadu'n nej yi jacjaydyii jäy ajcxy huidibi ca' cuendituñ Dios

y'ayuc ytiy'ajt, jadu'n yi' ajcxy nipaady jadu'n nejjihuüy ajcxy ti ymi'öctigoy. Ijtcix ni'ixi miid tüg'óciy Dios y'ayuc ytiy'ajt. Mi'ijtcix huijy cujc mjot mhuinma'ñ. ⁷ Yi jäy ajcxy huidibi maab, coodz ajcxy ymäy. Yi jäy ajcxy huidibi muucip, coodz ajcxy ymúucigixy. ⁸ Hich ajt huidibi nnejhuüiyim Dios ytiy'ajt, copicy huijy ycujc ajt ndzinaayim, e nañ copicy nmibijcim Jesucristo e nañ naychójcigix nayjihuiyigix miñ xyipy, jadu'n nipaady nej soldadtijc ñaygohuáanigixy miid pujx huidibi ymiid ma ycaach. E miid co njjip'ijxim co Dios xyajnidzögaanim ajt n'alma, jadu'n nipaady nejjihuüy soldadtijc ñaygohuáanigixy miid ypujxcöjup. ⁹ Com Dios xyajjugy'ajtim co xychaachytunaanim xyajtigoyaanim, Dios xyajjugy'ajtim nej n'alma jébi paatim nidzoocin co nmijpidaacim ich ajt nHuindzin Jesucristo. ¹⁰ Jesucristo ti y'ögy miid ajt nbocy ycixpi, jigix jébi huaad ndzinaayim jilby tzajpjoty quipxyi miid yi', ca' ñejity pen ti anajty n'o'cim o pen jiini anajty njugy'ajtim co anajty Jesucristo yhuimbity ya naaxhuiñ. ¹¹ Paady ycixpi jacnayjotmicmigápxigix, e nañ jacnaybubéjtigix nidüg nidügti, tim jadu'n nej cham mdungixy.

Pablo capxhuijy yi mibijcpidijc ajcxy

¹² Migügtijc ajcxy, may'ajt nbijctzooybich co yajmij'ajtcixy ajcxy yi migügtijc huidibi tumb ma miich ajcxy miid Dios y'ayuc ycixpi. Yi' ajcxy huidibi xyajni'ixiyyb Dios y'ayuc ytiy'ajt, yi' ajcxy xycapxhuijip miid ajt nHuindzin Jesucristo y'ayuc ytiy'ajt. ¹³ Copicy myajmij'ajtcixipy ooy, etz nañ mdzójcxipy miid je Dios ytung ycixpi huidibi ajcxy ytumyb ma miich ajcxy. Tzinaaygix jotcuyc ca' ma tzip capxy.

¹⁴ Nañ jadu'n, migügtijc ajcxy, nyajnbijcipy ajcxy co myaj'ojip yi migüg ajcxy huidibi ca' ti dung tuna'ñ, etz nañ mjotmicmigapxip huidibi ajcxy tajp maayb, etz nañ mbubedipy ajcxy huidibi hueeni miid ymibijcin, etz yajtungix mecxtujcin miid tüg'óciy migügtijc.

¹⁵ Hich miich ajcxy nimaayb co ca' ni pin huaad yaj'ahuimbidity jibic ma ymigüg huidibi ti ymidundigoyii. Nañ jadu'n nimaaygixy co naymi'oyjäy'ajtigix nidüg nidügti. Nañ jadu'n oyyäy'ajtin mdunipy ajcxy miid tüg'óciy naaxhuiñyäj.

¹⁶ Jatytim miid'ajtcix jotcuyc'ajtin jabom jabom. ¹⁷ Capxtaaccix etz mibijctzoogix Dios jabom jabom. ¹⁸ Yajnajxcix jäygidaacin ma Dios pen ji ajcxy mjaicixy ayoogixy nejaty, com Dios ooy yjotcuycity co je migügtijc huidibi mibijcp Cristo Jesús yajnaxy ajcxy jäygidaacin ma yi' jabom jabom miid tüg'óciy huidibi tuunip jajtíp ma yi' ajcxy.

¹⁹ Capxymidoogix je Espíritu Santo, co ngacapxymidoohuim je Espíritu Santo huin'it nyajtigooyim Dios yjihui'ñ ymic'ajt huidibi yajpatp ma ich ajt. ²⁰ Yajjotcuyc'ajtcix huenpinity pin Dios y'ayucpidzimb ma miich ajcxy. ²¹ Jëyi janchtiy m'ixipy peni quipxyiyyb miid Dios y'ayuc huidibi ajcxy ycapxyp. Mijpidaaccix je ayuc tiybi.

²² Ixmajtcix tüg'óciy jibic ayuc jibic-huinma'ñ.

²³ Dios nmibijctzooybich, je Dios huidibi yejcpy jotcuyc'ajtin, co ajcxy xyajhuaatzaayip mjot mhuinma'ñ ma yi jibicpi. Dios nmibijctzooybich co yi' ci'm xycuendi'ajtip huadz oy yi m'alma ajcxy, etz yi mjihui'ñ, etz mnícx mgohuajc, ca' ma pocy yquëxigy, ixti mabaad anajty ich ajt nHuindzin Jesucristo ymiñ ya naaxhuiñ. ²⁴ Je Dios huidibi ti xyajmibijccixy, tudägy yi', e ycuydunipy yi' y'ayuc miid miich ajcxy.

Capxpocxin huidibi cijxnip je necy

²⁵ Migügtijc ajcxy, mibijctzoogix Dios miid ich ajcxy ycixpi.

²⁶ Naygapxpóocxigix xic xon nidüg nidüg miid oyjot oyhuinma'ñ.

²⁷ Nhuindzin Jesucristo ajt ti xyajnbicyich jada tung, paady nyajnbijccixy co jada necy mgápxcixipy ni'abidzimy ma tüg'óciy mibijcpidijc.

²⁸ Dios nmibijctzooybich co ich ajt nHuindzin Jesucristo xyconuucxip ajcxy. Jadu'n jada. Amén.

2 TESALONICENSES

Yi Mimetz Necy Huidi San Pablo Yajniguejx Je Mibijcpidijc Jim Tesalónica

¹ Ich Pablo miid Silvano etz Timoteo cham nguexyich jada necy ma je migügtijc huidibi ajcxy jim Tesalónica yajpatp, etz yajpatcixy ma ich ajt nDios Teedy etz ajt nHuindzin Jesucristo. ² Huen ich ajt nDios Teedy etz ich ajt nHuindzin Jesucristo may'ajt oy'ajt tunipy miid miich ajcxy etz xyajjotcugüygixip.

Dios tiydunipy yi pocyjäydijc ajcxy co anajty Cristo ymiñ jadug'oc

³ Migügtijc ajcxy, njatytimyajnajxypich jabom jabom jäygidaacin ma Dios miid miich ajcxy ycixpi. E jadu'n copicy nyajnagyich jäygidaacin ma Dios, com miich ajcxy mibijcipy Jesucristo nigi jabom jabom, etz nañ nigi jabom jabom naychójcigixy nayjihuüygixy nidüg nidüg. ⁴ Com miich ajcxy ooy nuucxy meecxy m'ijtcixy ma yi tzaachypi etz ayo'n huidibi ajcxy mminajxyp myajnajxyp, e nañ ooy mmijpidaaccixy Jesucristo, paady ycixpi ngapxpaadyich miich ajcxy ma yi migügtijc huidibi mijpidaacp Dios majaty tüg tüg cajp. ⁵ Miich mmibijcin etz mmecxtujcin yi' je' ijxpejtip co Dios ytudägyity miid ajcxy ytiyduunin, e xycöbijccixy co jebi mdigüygixipy ma yi y'ane'mdac miid mmibijcin ycixpi. Miid jada ycixpi miich ajcxy mminajxcixy myajnajxcixy tzaachypi ayo'n.

⁶ Miid co Dios ytudägyity, yi' tzaachytunamb yi jäy ajcxy huidibi miich ajcxy xy'ixhuidijtp xypahuidijtp. ⁷ E nañ yi' ajcxy xymöhuipy jotcujc'ajtin tim jadu'n nej xymöhuäängixyich jotcujc'ajtin je huin'it xii co anajty ajt nHuindzin Jesucristo ñayguexigyii co anajty miiñ ya naaxhuiñ jadug'oc choon anajty tzajpjoty. Nañ je ángeles ajcxy mic'ajt miidpi miinaamb quipxyi miid Jesucristo. Miinaamb Jesús miid ane'min cötujcin e yajtigoydähua'ñ pocyjäydijc, tim jadu'n nej tüg mijjin yajhuindigoydäy huen ytiijity. ⁸ Jesucristo chaachytunamyb je mayjäy ajcxy huidibi ca'p cöbicy Dios, etz huidibi ca' mijpidägy ajt nHuindzin Jesucristo y'ayuc ytiy'ajt oybi. ⁹ Yi jäy ajcxy huidibi miich ajcxy xy'ixhuidijtp xypahuidijtp, Dios yi' tzaachytunaanip ajcxy y'alma huinixii huinitiempo. Dios ypidägaanip yi' ajcxy y'alma jiguëgy ma ni caminaxii ajcxy ijxcixyp je nHuindzin Jesucristo etz yi' y'oy'ajtin etz ymic'ajtin. ¹⁰ Jadu'n yjadipy je huin'it xii huin'it tiempo co anajty ajt nHuindzin Jesús miiñ ya naaxhuiñ, Jesús je mibijcpidijc yajmij'ada'ñ etz huindzigihua'ñ, e nañ jadu'n miich ajcxy myajmij'adipy etz mhuindzigihuiipy miid co anajty y'ayuc ajcxy ti mmibijcci, je ayuc huidibi ti ngapxhuäcxyich ma miich ajcxy.

¹¹ Paady ycixpi jabom jabom Dios nmibijctzooyich miid miich ajcxy ycixpi, jaydëbi tudägy ajcxy mdzinähuiipy, e Dios huidibi ti xyhuin'ijxcixy yjäygidägyipy yi' miich ajcxy mdzinaayin. Nañ jadu'n Dios nmibijctzoogixy miid jada ycixpi co yi' cuydunipy huidibi miich ajcxy mbijctzooyb m'amidooyb miid oyjot oyhuinma'ñ. E nañ ycuydunipy yi' huidibi miich ajcxy mdumyib miid mmibijcin. ¹² Com Dios jadu'n tunamb ma miich ajcxy mjot mhuinma'ñ, paady ycixpi ajt nHuindzin Jesucristo yxii capxpaady y'idipy ma miich ajcxy mdzinaayin etz nañ jadu'n miich ajcxy capxpaady m'idipy ma Jesucristo. Jadu'n yjadipy com ich ajt nDios etz ajt nHuindzin Jesucristo may'ajt oy'ajt tuñ ma miich ajcxy.

2

Je jibic jäy huidibi huin'ümb mayjäy

¹⁻² Migügtijc ajcxy, cham nyajmiidmiydaaccixy je xii je tiempo co anajty ajt nHuindzin Jesucristo huimbidaanü jadug'oc ya naaxhuiñ, etz naybadaanim miid yi'. Nminucxtaacyich miich ajcxy, ca' mhuinma'ñytigooogixy co pinjaty ymina'ñ co Jesucristo ti yhuimbity. Ca' mmibijccixy, ca' jada ayuc yjanchity. Ca' mdungixy cuendi yi jäy ajcxy y'ayuc huidibi minamb co tüg espíritu ti yajnejhuüygixy co yjadu'nity, o co muum a'ijxnaxy amidoonaxy capxy ayuc, o co muum ijxpädzimy jada ayuc ma tüg necy

huidibi ajcxy ytiy co ñich necy'adyii. ³ Ca' myajhuin'ingix janch ni nej. Jayijp ca'ni anajty je xii je tiempo yhuaad'atyñi ma anajty Jesucristo ymiina'ñ jadüg'oc ya naaxhuiñ, mayjäy ajcxy midziptzona'ñ Dios tiydudägy co ñayguëxigiiyb tüg jibic jäy mic jäy huidibi Dios yajcödigoyamy tücci'yi. ⁴ Jada jibic jäy ymidziptzonamyb tüg'óciy tijaty huidibi jäy Dios'ajtpy, e nañ ymidziptzonamyb huidibi jëbi yaj'ojadaty. E nañ yi' naybidägiib amij agix jadu'n nejhuüy yjacmijity ca'ydi Dios. E nañ yi' ypidägamb y'ane'mdac ma Dios ytiyc, e naybidägaanip nejhuüy Diosity.

⁵ ¿Nej ca' mjäymejtzicy co jadu'n nimiydacyich tüg'óciy jada tiy'ajt jayhuin je taab anajty n'ityich ma miich ajcxy? ⁶ Jadachambi miich ajcxy mnejhuüy pñ yajhuäcxijp jada mic jäy jada jibic jäy, jigix ca'ydi ñayguëxigiyii jayijpni ma ca'ni tiempo yhuaad'atyñi mina Dios a'ixihuiç co ymiinipy. ⁷ Je mic jäy je jibic jäy cham ñi'ixiiyb ameech je jibicpi huidibi ytunamyb, jëyi ytiyoy'ityñi mina je tü'aa y'ahuächyii, je huidibi yajhuäcxijp. ⁸ Co anajty je jibic jäy ytü'aa y'ahuäch, chi ajt nHuindzin Jesús yajcödigoyipy miid tüg puxujin. Jesús yajcödigoyipy je jibic jäy miid yi' y'oy'ajtin etz ymij'ajtin co anajty yhuimbity ya naaxhuiñ. ⁹ Je jibic jäy, yi' je' ymiid je mujcu' yhuinma'ñ etz ymic'ajt, e ytunamyb mijhuinma'ñ etz iixpejt huidibi anijip. ¹⁰ Je jibic jäy ytunamyb tüg'óciy tijaty jibic-huinma'ñ jigix jëbi huin'iniip yi jäy ajcxy huidibi y'alma tigoyipy, miid co ca' ajcxy cöbijccixy, e nañ ca' tzojccixy Dios y'ayuc ytiy'ajt huidi miid jëbi y'alma ñidzoocixy. ¹¹⁻¹² E je' ycixpi co ca' ajcxy cöbiga'ñ Dios ytiy'ajt, paady Dios y'ixmadzáanigixy huen yajhuin'ingixy, huen mibijccixy je mujcu' y'aniñ, e miid jada ycixpi jëbi Dios yajtigooyi yi' ajcxy y'alma nidüg'óciy huidibi ca' mibiga'ñ Dios ytiy'ajt. Jacjotcujc ajcxy co jibic-huinma'ñ tungixy.

Je jäy ajcxy tiibi Dios yhuin'ixyii jigix ypocyñihuädziy

¹³ Migügtijc ajcxy huidibi ajt nHuindzin Jesucristo ooy tzocy jihuiy, jabom jabom nyajnaxyich jäygidaacin ma Dios miid miich ajcxy ycixpi, miid co Dios ti xyhuin'ijxcixy oga'n'aty, jigix jëbi m'alma ñidzoocixy miid Dios yjihui'ñ ymic'ajt, etz nañ miid Dios y'ayuc ytiy'ajt huidibi ti mmibijccixy. Je Dios yjihui'ñ ymic'ajt xyajhuaatzip ajcxy mjibicjot mjibic-huinma'ñ. ¹⁴ Paady ycixpi Dios ti xyhuin'ijxcixy, e nañ xyajmibijccixy miid yi' y'ayuc ytiy'ajt huidibi ñich ajcxy ngapxhuäcxyp, jigix jëbi mbáatcixipy oy'ajtin ma ñich ajt nHuindzin Jesucristo.

¹⁵ Paady migügtijc ajcxy, mibijccix tiydudägy, ca' m'ixtigihuäccixy, e ca' mjäydiogoogixy je tiy'ajt huidibi ñich ajcxy ti ngapxhuäcxyp ma miich ajcxy, etz jadu'n nej ti nnimaagixy necyjoty. ¹⁶⁻¹⁷ Huen ñich ajt nHuindzin Jesucristo ci'm etz ajt nDios Teedy may'ajt oy'ajt tunipy miid miich ajcxy, e xyajjotmicpijccixipy etz xyajmibijccixipy tiydudägy, jigix oybi ayuc mgápxcixipy etz mdunipy ajcxy tüg'óciy oybi huinma'ñ. ñich ajt nDios Teedy etz ñich ajt nHuindzin Jesucristo xychojcin xyjihuiyim, e ti xymooyim jotcujc'ajtin huinixiibi, e nañ ti tuñ may'ajt oy'ajt miid ñich ajt ycixpi, jaydëbi njijp'ijxim oy'ajtin jiiy tzajpjoty.

3

Mibijctzoogix Dios miid ñich ajcxy ycixpi

¹ Jadügnax, migügtijc ajcxy, tungix may'ajt mibijctzoogix Dios miid ñich ajcxy ycixpi, jigix jëbi ngapxhuäcxibich huinmic jotmic Jesús y'ayuc ytiy'ajt huingnaax huinggajp. E nañ mibijctzoogix Dios jëbi yi jäy ajcxy mijpidägiy Jesús y'ayuc ytiy'ajt oybi, tim jadu'n nej miich ajcxy ti mmijpidaaccixy. ² Nañ mibijctzoogix Dios miid ñich ajcxy ycixpi, jigix ñich ajcxy Dios xyñihua'nipy xycohua'nipy ma yi jäy ajcxy huidibi jibic-huinma'ñ ymiid, huidibi jibic ñich ajcxy xytunamb, com mayjäy ca' mijpidägy Jesús y'ayuc ytiy'ajt. ³ ñich ajt nHuindzin Jesús cristó tudägy yi', e xypubedip xypudigihuiç ajcxy jigix miich ajcxy ca' mjotmetzcihuiçy ma yi mmibijcin, e nañ xypubedip ajcxy, jigix ca' xymimadaaccixipy je jibicjäy huidibi Dios ca' capxymido. ⁴ ñich ajt nHuindzin Jesús jotcujc'ajtin ti

xymóoygixyich miid miich ajcxy ycixpi. Nmibijcpxyich co miich ajcxy mguydumyib je Dios y'ayuc ytiy'ajt huidibi nyaj'ixpijccixy etz mjaccuydunaamyb ajcxy. ⁵ Com ca' iich njaty nej njijpcogapxihuibich, chi nguejxyich cogapxy, nnejhuíhua'ñich nej anajty ajcxy myajpatcixy ma yi mibijcin, tzigiiyb iich anajty co nicxy mujcu' xypidaaccixy jibictuum, chi iich anajty ajcxy ndung ti ñaadigi'aty.

Ooy ycopicyity co nduunim ma ajt ndung

⁶ Migügtijc ajcxy, miid ajt nHuindzin Jesús yxii etz ymic'ajt jada ane'min ajcxy nyajnibijcpxy, co copicy ajcxy m'ixmadzipy yi mmigüg huidibi ca' ytuna'ñ ma yci'mdung, etz huidibi ca' cuyduñ Dios ytiy'ajt jadu'n nej iich tiy'ajt ti nyecy. ⁷ Miich ajcxy mnejhuíiyb jadu'n nej iich ti ndzinäyich ti njugy'atyich co ti n'ityich ma miich ajcxy. E jëbi tiy'ajt ajcxy mbigipy ma iich ndzinaayin nej jëbi miich ajcxy mdzinaaygixy. Co anajty iich njimity ma miich ajcxy, ca' iich n'ixmajch ngi'mdung. ⁸ Tüg'óciy iich ajcxy ngaayin n'uucin ngojuuyich. Nduñ n'ayooyich anajty xim tzuum, co anajty ca' n'adziba'ñich ni tüg. ⁹ Dios ti xymöyich mic'ajt ane'min co ixypy ajcxy mbubejtin ti nbijctzoohui o ti nbijctzoohui ixypy ajcxy mgaayin m'uucin, per ca' iich ajcxy jadu'n ti ndúngixyich, jigix ijxpejt ajcxy mbigipy ma iich ajcxy. ¹⁰ Com co anajty n'ityich ma miich ajcxy jada cötujcin ajcxy nyajnibijc co pinjaty ca' ytuna'ñ, ca' ajcxy myajcayipy myaj'ügipy. ¹¹ Jadu'n iich ti nnejhuíy co nijëjity miich ajcxy ca' mdunaangixy mgi'mdung, jëyi myöygixy mnajxcixy jäyjün jäydijc. ¹² Yi jadu'mbi jäy ajcxy nyajnibijcpxyich miid iich ajt nHuindzin Jesús yxii co huen tungixy jabom jabom ma yci'mdung, ca' huaad pin adzijpcix anajxcix jigix jëbi paadip ajcxy ycaayin y'uucin.

¹³ Migügtijc ajcxy, oybi jatyim tungixy jabom jabom, ca' mjotmetzciiygixipy. ¹⁴ Pen nidügti ma miich ajcxy ca' tuñ cuendi jada ayuc huidibi ajcxy nyajnijayiiyb, ijxcix pin je', e chi ca' mjactúngixip cuendi, e ni ca' miid myöymujc mnaxmújcixipy, jigix chöydunipy. ¹⁵ Ca' ajcxy huaad midzip'ajtcixy yi jäy ajcxy huidibi ca' yajxon cuyduñ Dios ytiy'ajt. Hue' janchtiy mgapxhuijcx oy'amy jadu'n nej tüg mibijcpi.

Capxpooxin huidibi cijxnip je necy

¹⁶ Huen iich ajt nHuindzin Jesucristo huidibi jotcuyc'ajtin yejcp, ci'm xyajjotcugiiygixipy jabom jabom oytim minaaxijity oytim yma'ámyity. Huen je Huindzin Dios xypubejtcixy xypudigiiygixy.

¹⁷ Iich, Pablo, jada capxpooxin ci'm njaayich. Jadu'n nfirmajiyich tüg'óciy iich nnecy, e jadu'n miich ajcxy mnejhuíhuipy co iich jada necy'adyii. ¹⁸ Huen iich ajt nHuindzin Jesucristo may'ajt oy'ajt tunipy miid tüg'óciy miich ajcxy. Jadu'n jada. Amén.

1 TIMOTEO

Yi Jayijpi Necy Huidibi San Pablo Yajnigujxy Timoteo

¹ Hich Pablo, Cristo Jesús xyaj'apóstol'ajtpich. Yi Dios huidibi xyñihuaanim xyaj-nidzoocim ajt n'alma, etz Cristo Jesús huidibi xymöhuaanim jugy'ajtin huinixiibi, yi' ajcxy ti xyajñibicyich co yi' y'ayuc ngapxhuäcxibich. ² Cham ich miich nijayiy Timoteo. Jadu'n njihuiy nej ich miich ngi'm'ung'adyi, co miich Dios ytiy'ajt ti mbaady ma ich. Huen Dios Teedy etz Cristo Jesús ich ajt nhuindzin may'ajt tunipy miid miich, huen xypa'ayoohuipy etz xyajjotcugihuipy.

Nijëjity jäy yaj'ixpicy huidibi ca' ytiy'ajtity

³ Hui'mi' miich jim Efeso, jadu'n nej nimay je taabi anajty ndzona'nich jim Efeso nnicxa'nich anajty Macedonia. Hui'mi' jim, jigix mgapx'adugipy je jäy huidibi najtzcaxhiyb je ayuc ca'p ytiy'ajtity. ⁴ Mgapx'adugipy je nigoobi y'ayucity. Mgapx'adugipy yi' ajcxy huidibi tzachnigapxp tzachnimydacpy yi judiojäy ajcxy y'ayuc jadu'n nej huidibi ñi'ap'ajtpy ñideedy'ajtpy ajcxy. Yi jadu'mbi ayuc nigoob yajhuinma'nydigoy pinjaty xpijcp Dios ytiy'ajt.

⁵ Jadu'n Dios tzocy co huen jäy ajcxy naychojctäyyii miid oyjot oyhuinma'n. Huen ajcxy Dios yajmij'aty janch cixyjot huinjot. Co pin yajmij'aty Dios janch cixyjot huinjot, ooy ajcxy oy ñayjihuiyigixy. ⁶ Nijëjity jäy ajcxy ti xmajtzni je Dios ytiy'ajt, ti ajcxy jiptigiyiyiñi je ayuc huinma'n huidibi ca'p choobaady. ⁷ Ooy yi' ajcxy jayaj'ixpiga'n yi Dios ycötujcin, ni ca' huinjihuiyigixy huidibi ycapxcixyp, ni huidibi ajcxy ñgapxpejtpy.

⁸ Hich ajcxy nnejhuiyim co yi Dios ycötujcin oy yi' pen nyajtunim nej ypadyi nej ytiy'ajtity. ⁹ Nejhuiyim co yi Dios ycötujcin ca' yi' tzaachytuñ oyjäydijc, jëyi tzaachytuñ pin ca' capxymidoy Dios, pin midundigooyb Dios ycötujcin. Je Dios ycötujcin chaachytumyb jäy huidibi ca' cuydungixy, jäy ajcxy huidibi ca' ytuägüity, jäy huidibi ca' capxymidoogixy Dios, jäy huidibi pocytungixy, jäy huidibi ca' huindzigi'n yajtungixy miid Dios, jäy ajcxy huidibi capxtigooyb, huidibi ytaj yteedy yaj'öccixy, huidibi jäy yaj'öccixy. ¹⁰ Je Dios ycötujcin chaachytumyb pin migapxtigooyb töxyjäydijc etz yëydijctjc, huidibi miyëydijc ymähua'n. Dios nañ chaachytumyb je jäy huidibi jäy majtzp etz toognaxy, chaachytumyb indaacpidijc etz nihuambejtpidijc. Je Dios chaachytumyb jacjadyi jäy huidibi y'ayuc ca' ytiy'ajtity nej Dios tiy'ajt miidity. ¹¹ Jadayaabi tiy'ajt huätzpi oybi tügiyb miid Jesucristo y'ayuc ytiy'ajt oybi huidibi ich nDios, je conuucxy yTeedy, ti xyajñibicyich co ngapxhuäcxibich.

Pablo yjäygidacpy co Dios may'ajt ti tuñ miid yi'

¹² Ooy njäygidägyich co ich ajt nhuindzin Cristo Jesús ti xyajmicpicyich, yi' ti xy'ijxtiyyich, yi' ti xyajñibicyich Dios y'ayuc co ngapxhuäcxpich. ¹³ Hich jecy'ajty jibic anajty nigapxy ni'ojiiyich Jesús. N'ixhuidijty nbahuidijtyich Jesús yjäy. Hich yi' ajcxy nmidundigooyich. Ti yi' Dios xypa'ayooyich com ich jadu'n anajty ti n'adich miid co nganejhuiyich je tiy'ajt, ngamibicyich Jesús ngamijpidägyich Jesús. ¹⁴ Paady ycixpi ich ajt nhuindzin Dios may'ajt oy'ajt ti tuñ mijcajee miid ich, co ti xyajmibicyich Jesús. E Jesús ti xymöyich tzojcin jihuiyin miid yi' yjäy ycixpi.

¹⁵ Ooy jada yjanchity, e nidüg'öciy jäy ajcxy jëbi mibijccixy co Cristo Jesús miin ya naaxhuiñ co yajpocyni'huädza'n pocyjäydijc. E ich nigü pocy nmüdidyich ca'ydi ni pinjäy. ¹⁶ Miid jada ycixpi Dios ti xypa'ayooyich ti xymimecxtucyich, jigix co jäy ajcxy ijxip nej Dios ti ytuñ miid ich, huin'it ajcxy mijpidägyi yi' y'ayuc etz ypaadipy jugy'ajtin huinixiibi ma Jesús. ¹⁷ Paady chojcpy co ngömayim Dios, je rey huidibi ane'mb huinixi, huidibi niminaa yca'o'cy, etz nipin ca'ixy. Je Dios tügpajc huidibi Dios'ajtp huen ycömay'idipy cham etz tüg'öciy xii tiempo huidibi mimb cidacp.

¹⁸ Timoteo, ooy ñich miich ndzocy njihuüy. Jada ayuc ñich miich nyajnimaydaayb. Miहुिन्दinähuiप Dios y'ayuc ca' mहुिन्ma'ñydigoyipy. Mहुिन्दunipy jadu'n nej Dios y'ayucnajtzcapxñybi xy'ñhуiуy xycapxhuуy co mdung mnimajch. ¹⁹ Miहुिन्दinähuiप Dios y'ayuc ytiy'ajt, huin'it ca' jibic mnayjihuiñhуiуb, jadu'n nej ajcxy jadyii huидibi nejhuñyib je tiy'ajt, e ca' cuydungixy, e jadu'ñyi yहुिन्ma'ñydigooygixy. ²⁰ Jadu'n nej Himeneo miid Alejandro ajcxy jaty, huидibi ñich ti nyajc'digñygyixy je mujcu', jigix ajcxy yहुिन्ma'ñymedzipy, ca'ydi yajjotma'tcixy Dios.

2

Jadu'n nej jëb Dios mibijctzoohuim

¹ Yi' njatyyajnimaaayb co ooy ycopicyity capxtaaccixy mibijctzoogixy Dios etz yajna-jxcixy Dioscojuyip miid tüg'óciy jäy ajcxy ycixpi. ² Copicy nnibijctzoohuim ma Dios: reydijc, ane'mbidijc etz codungdijc, jigix jëbi jotcuyc ndzinaayim, ca' ma tzip. Co jadu'n nduunim, yi' anajty ngoduunim Dios y'ayuc, etz huin'it tiydudägy ndzinaayim. ³ Com yi' jadu'mbi huinma'ñ ooy yi' y'oyity, e Dios huидibi ñich ajt n'alma yajnidzoocp, oy yi' jäygidägy. ⁴ Dios chojcpy co tüg'óciy je jäy ajcxy huen y'alma nidzooccixy, huen ijxcixy nejhuñygyixy Dios y'ayuc ytiy'ajt. ⁵ Tüg je' je nHuindzin'ajtim Dios, etz tüg je' je huingapxpi huидibi jëbi ytigiy ma Dios miid ñich ajt ycixpi, etz huидibi jëb Dios y'ayuc capxnajxy ma ñich ajt: je huingapxpi, je' je' je jäy, je Cristo Jesús. ⁶ Cristo Jesús nayyojxi naydooci miid ñich ajt nbocy ycixpi, ñaygyejci huen jäy yaj'ögyii, jigix jëb ñich ajt nbidziimim ma je mujcu' anajty c'i'am xymiid'ajtim. Jadu'n nej Dios cham jäy yajnejhuñy co je tiempo yhuaad'ajtni, ⁷ paady Dios ti xyajñibicyich ngapxhuäcxibich y'ayuc ytiy'ajt, etz Jesús xy'apóstol'adyijich. Je tiy'ajt jada ngapxich, ca' n'indägyich. Ti xyajñibicyich jada tung nej jëb huaad nyaj'ixpicyich, nej jëb huaad mibijccixy Dios, etz nyaj'ixpicyich Dios ytiy'ajt ma yi' jäy ajcxy huидibi ca' yjudóyäyity.

⁸ Ndzocpyich co yi' yëydijctijc huen mibijctzoogixy ojadajtcixy Dios ma tüg'óciy naymujctac miid oyjot oyhuinma'ñ, ca' y'adzip y'ahuan'nity, ca' y'ametz yjotmetzity. ⁹ Nañ jadu'n ndzocypich co yi' töxyjäydijc huen yhuít yxojx yajtungixy nej ypadyii, huидibi quipxpaady ajcxy paatip. Huen yhuít yxojx pidaaccixy nej töxyjäydijc huидib tudägyip. Huen ycöhuay cüdägy caaxägy nej ypadyii, ca' ymigügtijc huinnaxtugipy miid yhuít yxojx, ca' nayxóxigixy miid oori, miid perla, e miid tijaty ooy choohuity. ¹⁰ Ca' huaad töxyjäydijc ñaygömáygixy miid yhuít yxojx, huen janch yajcömaygixy miid y'oyjäy'ajtin, jadu'n nej je jäy ajcxy tungixy huидibi ti ñaygyéjcgixy cixyot huinijot ma Dios. ¹¹ Co jäy ajcxy yaj'ixpicy Dios y'ayuc ma je naymujctac, huen töxyjäydijc ajcxy amoyñi amidoo'ijtcixy miid yungnaxy yjot yहुिन्ma'ñ. ¹² Yi' töxyjäydijc ca'p niducyich yaj'ixpigipy jäy ajcxy ma je naymujctac. E ni ca' ypadyii nicxy yëydijc ane'my. Huen ajcxy amoyñi y'ity. ¹³ Dios jayijp yajcojy Adán, jac'axam Eva, paady ycopicy yi' yëydijctijc huen ane'my yi' töxyjäydijc. ¹⁴ Adán ca' yajtzu'ijxy. Eva yajtzu'ijx, je' ca' Dios capxymidoy. ¹⁵ Paady yi' töxyjäydijc ca' ypadyii nicxy nigohuajc'aty yi' mibijcpidijc. Dios jotcuyc ñayjihuiñyii miid co jëyi y'ung'ijxcixy, etz yajmij'ajtcixy Dios, etz tzojctaaygixy ymigügtijc, etz huen ajcxy cuydungixy Dios y'ayuc ytiy'ajt, etz huen tudägy jäy'ajtcixy miid oyjot oyhuinma'ñ.

3

Nej jëbi ytungixy huидibi ajcxy nigohuajc'ajtp

¹ Tiy'ajt jada nej jäy ymınaangixy. Pen ji pin najtzogiy nigohuajc'ada'ñ yi' mibijcpidijc tüg yi' oybi anajty ytunamyb. ² Pin nigohuajc'ajtp yi' mibijcpidijc ooy ycopicyity je' jadu'n naydijñib huидibi ca' ti tundigoy, huидibi tüg töxyjäy miid ca'p ycanaagity, huидibi huijycujc jäy'ajtp, huидibi miid oybi yहुिन्ma'ñ etz tudägypi yहुिन्ma'ñ, huидibi ooyjäy'ajtin tumb, huидibi jajtp nej jäy ajcxy yaj'ixpigipy. ³ Pin nigohuajc'ajtp chojcpy tüg jäy huидibi ca' y'amügity, huидibi ca' yहुिन्zipity, huидibi yajtumb mecxtujcin, huидibi

ca' chipcapxy y'ahua'ngapxy, huidibi ca' ti adzocy. ⁴ Pin nigohuajc'ajtp chojcpy tüg jäy huidibi tiydudägy tzinaayb ma yjiin ytiyc, huidibi y'ung y'anäg yajtzinaayb nicy xeemy. ⁵ Pen ca' jaty nej y'ung y'anäg migapx ane'mip ma yjiin ytiyc, ¿nej oc'ane'mañ yi mibijcpidijc? ⁶ Nañ ca'p yjējity huidibi namni mibicy Dios y'ayuc ytiy'ajt. Ycadimjēcūity nicxy ooy amij agix ñayjihuiyīi, e nicxy camadägy je ane'min, e yjadipy jadu'n nej Satanás yjajty co jibic tumb ñayyajhui'mi miid Dios. ⁷ Chojcpy tüg jäy huidibi nidüg'óciy je mayjäy oy ixiip. Pen ca' yjadu'nity nicxy pin yxiyīi, e chi jada anajty je mujcu' ti ymimadägyīi co jäy jibic ñigapxiyb.

Yi mutz tungmiid nañ chojcpy huidibi oyjot oyhuinma'ñ miid

⁸ Yi mutz tungmiid huidibi yajpat ma mibijcpidijc chojcpy jäy tudägyipi, huidibi nicy xeemy jäy'ajtp, huidibi ca' jäy'aty aguejtmīñ aguejtxipy, huidibi ca' y'amügity, huidibi ca' y'adzocy ca' y'ameeñity. ⁹ Huen naybidáacigixy cixyjot huinijot ma je tiy'ajt janchypi. Je tiy'ajt huidibi je mayjäy ca' huinjihuiy. Je tiy'ajt huidibi iich ajt nmibijcim. Je' chojcpy pinjaty huidibi ca' ti jibicpi jot'adyii huinma'ñ'adyii. ¹⁰ Pinjaty mutztung yajnicxamb, jayijp jot'ix huinma'ñ'ix pen tudägy yhuinma'ñ. Huin'it jēbi mdungmöy. ¹¹ Yi mutz tungmiidpi ytōxyijc chojcpy co huen tudägy jäy'aty, huidibi ca' ñigapx ñi'ojy ymigüg, huidibi nicy xeemy jäy'ajtp, huidibi cuydundaayb tüg'óciy. ¹² Yi jäy huidibi mutztung yajnicxamb chojcpy tüg jäy huidibi picy chinaayb, huidibi ca'p miidity metz o tugiig töxyjäy, huidibi y'ung y'anäg yajtzinaayb nicy xeemy, huidibi tiydudägy tzinaayb ma yjiin ytiyc. ¹³ Yi mutz tungmiidpi huidibi yajxon ytung cuydungixy, cōmay yi' ajcxy idipy ma mibijcpidijc. Nañ ñigā ajcxy xpijc'idīch Cristo y'ayuc.

Dios mijhuinma'ñ tuun miid iich ajt yciipi

¹⁴ Jada necy iich miich nyajnigüejxyp. Njijp'ijxypich co tzojc nñicxa'ñich jim ma miich. ¹⁵ Pen ca' y'oyiy nej tzojc nñicxibich ma miich, ti yam nyajnijayiy je janchypi. Miid jada necy huaad jēbi nidüg nidüg mibijcpi yjäy'ajtigixy ma yi mibijcpidijc huidibi mijpidacp Dios juugypi, je Dios huidibi huijtz'ijttaayb etz cohundaayb je tiy'ajt janchypi. ¹⁶ Janch tiy'ajt jada co mij yi' yi Dios y'ayuc ytiy'ajt huidibi ti xyajnejhuiyīm, je huidibi jecy'ajty ca' pin nejhuiy. Je tiy'ajt huidibi xyajnejhuiyīm co quexy y'ung ya naaxhuiñ. Dios y'ung hue' je' yaj'ijxy miid ñinīcx. Tudägy nayguēxīci miid Dios yjihui'ñ ymic'ajt. Je Dios y'ángeles ajcxy ti icyii. Ti yajnigapxy yajnimiydägy Dios y'ung ma huidibi ca' yjudiojāyity nañ ti jäy yajmij'ajtcixy Dios y'ung ya naaxhuiñybi. E ti ycōbigyīi tzajpjoty ma yi oybi it.

4

Mayjäy ixmadza'ñ yi Dios ytiy'ajt

¹ Yi Espiritu Santo minaan co anajty je xii tiempo ycixa'ñ, mayjäy ixmadzaangixy yi Dios y'ayuc ytiy'ajt. Mijpidaaccixy anajty jäy ajcxy y'ayuc huidibi yi huin'iimbē etz ca'oybi ytiy'ajt miid. ² Jada jäy ajcxy miid anñ anajty naybidáacigixy nej ytudägyity, e ca' anajty yjanchity. Ca' ajcxy nej ñayjihuiyīi co ajcxy ytiyiy anñdaacpi. Ti jadu'n yhuinma'ñypidaaccixy janch mic. ³ Yi' ajcxy ymina'ñ co ca' huaad jäy ypijccixy, etz ca' huaad caaygixy nijējity caayin uucin. Yi caayin uucin Dios yi' ti conucxy jigix jēbi jäy ajcxy huidibi mibijccixy etz huinjihuiyigixy je tiy'ajt, jēbi yajnajxcixy Dioscojuyip ma Dios etz cōbigipy ajcxy agujc jotcujc je caayin uucin. ⁴ Tüg'óciy huidibi Dios ti yaj'oyiy, oy yi'. Ca' huaad pin ymina'ñ co ca' y'oyity. Agujc jotcujc ngōbijcim, jēyi nyajnajxim Dioscojuyip ma yi'. ⁵ Dios ymina'ñ co huen huidibi caayin huidibi uucin ooy y'oy yi'. Jēyi co nyajnajxim Dioscojuyip, e huin'it Dios conucxy je caayin uucin.

Ca' ajcxy mmijpidägip yi nigoobi'ayucity

⁶ Pen miich ajcxy jada ayuc jada tiy'ajt myajnimaaayb yi migügtijc, oy anajty mduñ ma Cristo ytung. Co jadu'n myaj'ixpicy Dios y'ayuc janch cixyjot huinijot, chi anajty myajeegy yi mmibijcim. Ca' mjäydigoyipy yi oybi ayuc huidibi nyajnimaaayb, huidibi

ayuc mbanicxyp mbayöyp. ⁷ Ca' mmijpidägy yi nigoobi'ayucity huidibi ca' choobaady ma Dios. Panicxi' payöyi' Dios ytiy'ajt. ⁸ Jac'oy co n'ixpijcm Dios y'ayuc, ca'ydi co ninicx ymic'ajt nbaatim. Co yajyujctäy jäy ñinicx, chi ñinicx ymic'ajt paady jëyi. Co n'ixpijcm nguyduunim Dios ytiy'ajt, chi tiy'ajt nbaatim nej ya naaxhuiñ ndzinaayim, etz nañ jadu'n nbaatim jadüg jugy'ajtin ma Jesús co anajty n'o'cim. ⁹ Jada tiy'ajt huidibi ti nyajnimäy, janch tudägy jada, jëbi ngöbijctaayim, e nidüg nidüg jëbi mibijccixy. ¹⁰ Paady nduunim n'ayoohuim oy pin xyca'ixaanim. Njijp'ijxim co je Dios huidibi jugy'ijtp xyajnidzögaanim n'alma. Jëyi yajnidzögipy ajcxy y'alma huidibi mijpidaacip Dios y'ayuc.

¹¹ Yajnimä' yi migügtijc huen cuydundaaygixy jada ayuc. Yaj'ixpic jada tiy'ajt. ¹² Huen jäy ajcxy m'ayuc xymijpidaaci, oy miich mutz anäcinity. Myegipy ijxpejt ma migügtijc nej jëb huaad ycapxcixy ymiydaaccixy, nej jëb huaad ytungixy, jadu'n nej jëb huaad oyyäy'ajtin tungixy, jadu'n nej jëb huaad mibijcin yajtungixy ma Dios, jadu'n nej jëb huaad huadz yhuinma'ñ miid'ajtcixy. Co jadu'n mdunipy, huin'it ajcxy mijpidägipy miich m'ayuc. ¹³ Mabaad ich anajty nicxy ma miich, capx Dios ñecy ma yi naymujctac, capxhuäcx etz yaj'ixpic yi tiy'ajt. ¹⁴ Yajtun yi huij'ajt cujc'ajt huidibi Dios xymoy je taabi je mibijcpidijc mijtungmiidpi xycinixajy, e xy'ayucmoy xymic'ajtmoy ajcxy miid je Espiritu Santo ymic'ajt.

¹⁵ Naybidägi yajcopijc tüg'óciy huidibi ti nyajnimäy, e niguëxigipy mayjäyduum co ti yajxon m'ixpicy je tiy'ajt. ¹⁶ Nayguend'adii miich ooy ci'm, nañ jadu'n nayguend'adii ma yi Dios ytiy'ajt, ca' m'ixmach Dios y'ayuc. Co miich jada mdunipy ci'm anajty nayajnidzögyii, nañ jadu'n anajty myajnidzooccixy huidibi anajty ajcxy amidoo'ijtp miich m'ayuc.

5

Nej jëbi huaad migügtijc m'ihuijipy mgapxhuijipy

¹ Ca'p huinjijp m'ojip mij'anäctijc. Oy'amy ihuijicixy capxhuijicixy jadu'n nej jihuüy mdeedy'adyii. Nañ jadu'n yi yujcyecytijc ihuijicixy capxhuijicixy oy'amy jadu'n nej jihuüy mgi'mjuugy mgi'mmigüg. ² Yi mij'anäctijc ajcxy töxyjäyb nañ jadu'n oy'amy m'ihuijicixy capxhuijicixy, jadu'n nej jihuüy yi' ajcxy mdaj'adyii mdzitz'adyii. Yi töxy'anäctijc ajcxy mutz'anäcnip miid'ijtcixy miid tudägyi mjot mhuinma'ñ.

³ Huen yi mibijcpidijc ajcxy yajmij'adipy etz pubedipy yi töxyjäydijc ajcxy co'ögyp, huidibi janch ni ypin ycaca'ty. ⁴ Pen jim töxyjäydijc co'ögpyi huidibi miid y'ung etz y'oc'ung, huen ajcxy jaty nej ytaj ñambiid yajmij'adipy, huen oybi yajhuimbidity miid ytaj etz ñambiid. Com yi jadu'mbi huinma'ñ Dios yjäygidacpy. ⁵ Je töxyjäy co'ögyp ca'p pin tim miidity, yi' yjijp'ijxyp co Dios ypubediyb etz Dios ymibijctzooyb y'ojadajtpy jabom jabom xiim tzuum. ⁶ Je co'ögy töxyjäy huidibi tzinaayb miid mayñax xondaacin, jadu'n Dios yajnaxyii jadu'n nej jihuüy y'ögity ytigoyity. ⁷ Yajnimä' ajcxy huen cuydungixy Dios ytiy'ajt, jigix ca' jibic ajcxy yajnigapxy. ⁸ Pen ji pin huidibi yajmij'ajtp Dios, e ca' pubeda'ñ y'amigüg, pen ca' y'ung ytöxyijc yajxon ixm may'aty, ca' yi' cuyduni Dios y'ayuc ytiy'ajt. Nigi anajty yjibicity nej ti y'idich ca'ydi jadu'n nej huidibi ca' ymibicy.

⁹⁻¹⁰ Yi töxyjäy co'ögyp ajcxy tiibi ytugi'px jimijtiy, jëbi mgojayiyyi yxii ma yi lista huidibi yi mibijcpidijc ypubedamyb. Yi mibijcpidijc ypubedamyb pen tüg ñäy anajty miiddzinäy, pen oyjot oyhuinma'ñ ymiid, pen ti y'ung yajxon yajyeegy, pen ti migügtijc m'oyjäy'aty, pen ti may'ajt tuñ miid Dios yjäy, pen ti pa'ayooy huidibi ayoob huidibi jottigooyb, pen ti yajtüyöy yajxon nej ytiy'ajtity.

¹¹ Yi co'ögy töxyjäy mutz'anäcnibi ca' mgojayiipy yxii ma yi lista huidibi yi mibijcpidijc ypubedamyb. Pen capxytumb co tuna'ñ miid Cristo ycixpi tijaty tung ma naymujctac, ycajegyty co je oybi anajty yam y'octumy, chi nijot'ajtni ypiigaani, chi ytung ixmajtznip. ¹² Co yi mibijcpidijc ajcxy ca' jäygidaaci yi' ytung, chi jibic ñayjihuiyii

co ca' cuyduñ y'ayuc nej ti ycapxytuñ miid yi Cristo Jesús. ¹³ Jadügnax ca' ytung yajcopicy, jëyi yhuiddijtni jayjiin jaydijc, e ca' yi'yity, nañ jadu'n ymigüg nigapxni ni'ojñiñi, capxni miydaacni huidibi ca' y'oyity. ¹⁴ Ndzojcpyich co yi töxyjäy co'ögy mutz anäcniibi huen pijccixy, huen tzinaaygixy jugy'ajtcixy yajxon, huen ungl'ijxcixy anäc'ijxcixy, huen yajxon cuend'ajtcixy yjiin ytijc, jigix ca' ajcxy ni'huambediib ni'ojñiñi yb huidibi ca' Dios y'ayuc ixaani midohuaani. ¹⁵ Nijëjity töxyjäy ajcxy co'ögyp ti ixmajtcixni Dios y'ayuc ytiy'ajt, e ti ajcxy jijptigiyiigixni yi mujcu' yhuinma'ñ.

¹⁶ Pen ji mibijcpidijc yëydijcpi o töxyjäybi miidity y'ajuugy y'amigüg co'ögyp, yi' je' paatip ixipy may'adipy je y'ajuugy y'amigüg co'ögyp, e ca' yaj'idipy ma yi mibijcpidijc nigixp. E jadu'n je' huaad je mibijcpidijc ajcxy pubejtcixy co'ögyp ca' p ti tim miidity.

¹⁷ Yi' ajcxy huidibi nigohuajc'ajtp yi mibijcpidijc huidibi yajxon tumb capxpaady y'idipy. Nigi ajcxy capxpaady y'idipy huidibi Dios y'ayuc capxhuäcxip etz yaj'ixpicy.

¹⁸ Jadu'n yjaybetyity ma Dios y'ayuc: "Ca' huaad huajyuub y'ajen nbidaacim ma yam ten moody trigo miy co yajpajc'ada'ñ yi trigo tiim." Nañ jadu'n jadüg'it yjaybetyity: "Yi' huidibi tumb paatip yi' ymuju'ñ." Jadu'n jada ayuc yhuimbizimy: Yi' huidibi yaj'ixpijcp Dios y'ayuc paatip huen yajmujuy.

¹⁹⁻²⁰ Ca' mic'amy mdiydunipy pin tungmiidpi ma yi mibijcpidijc pen tügpajc huidibi xñhuip. Ca' mdiydunipy pin tungmiidpi ixti cooni metz o tugiig testigo yquëxigipy pen janch ti ytundigooy. Pen ytundigooy yi' huidibi nigohuajc'ajtp, capxpizim mayjäydumb jigix jacjadyii chigi'ñ pijccixipy. ²¹ Jada tiy'ajt miich nyajnimaaayb, Dios Cristo Jesús etz yi' y'ángeles ajcxy huidibi Dios ti huin'ijxcixy ñidiy'ajtcixy co yjanchity jada ayuc. Co mbanicxip jada tiy'ajt, ca' huin'ixpety mdiydunip mdzaachtunip mibijcpidijc.

²² Ca' mic'amy mginixajipy co myajtungbiga'ñip jäy huidibi ca' m'ixy'adyii. Ycajeyity ypocytunipy, e tú'ciy mbocycähuaangixy miich miid yi'. Miich nayguend'adii jigix ca' mbocycähuiipy.

²³ Miich Timoteo, pen pijcp mjot, tzoj'adii hueen vino, com jac'oy yi' ca'ydi co m'ügipy huadz nii.

²⁴ Jadyii jäy huidibi jibic-huinma'ñ miid yajnejhuñhuipy yi' ajcxy yjibic-huinma'ñ ma anajty ca'ni yajtiydungixy. Jacjadyii jäy ca' yajnejhuñhuipy yjibic-huinma'ñ ixti cooni yajtiydungixy. ²⁵ Nañ jadu'n jadyii jäy yajnejhuñhuip co oyyäy'ajtin anajty ti tungixy, jacjadyii jäy ca' mic'amy yajnejhuñhuipy co oyyäy'ajtin ti tungixy. Yi' oyyäy'ajtin ca' p yi' yhuimipy coyüch.

6

¹ Tüg'óciy tumbidijc huidibi ajcxy mibijcp hidibi ajcxy ijtp cojuyiy codoogiy, huen yajxon yajmij'ajtcixy yhuindzin. Pen ca' jadu'n tungixy, chi je huingjäydijc jibic nigapxaani ni'ojñhuaani yi' Dios etz yi' ytiy'ajt. ² Pen yi' tumbi miid yhuindzin hidibi yajmij'ajtp Dios, ca' y'oyity co nixigipy yajxigipy yhuindzin. Huen ajcxy nigi yajxon yajmij'ajtcixy, com hue' je' Dios yjäy. Yi' hidibi nihuindzin'ajt ypadamyb je oybi hidibi je' ytumbi ytung'ajtpy. Jada tiy'ajt yaj'ixpic etz capxhuäcx.

Jotcuyc'ajtin nbaatim ma Dios ytiy'ajt

³⁻⁴ Pen ji pin huingbi tiy'ajt yaj'ixpicy hidibi ca' ñaybadyii miid je Huindzin Jesucristo y'ayuc ytiy'ajt, e ni ycanaybadyii miid je tiy'ajt hidibi iich ajt nmijpidaacim, hue' jada nej tüg jäy hidibi amij agixip hidibi ca' ni ti nejhuñ. Chachnijot'aty tzip capx, e jadu'n yhuimbizimy jada tzip capxy co migüg ca' yaj'oy'ixy, chi ñaymidziptzoongixy nihuambejtcixy etz jibic nigapxcixy ymigügtijc. ⁵ Yi' jadu'mbi jäy hidibi ca' mijpidägy Dios ytiy'ajt cojpy ymacxpy tzip capxy hidibi ca' ycixy ytigoy. Yhuinma'ñydgoy ajcxy, ca' huinñhuñygyx ty'ajt. Hue' ajcxy yaj'ixpicy Dios y'ayuc miid co ycomeñ'adaangixy. Puhuäctuat miich jadu'mbi jäy ajcxy. ⁶ Co Dios y'ayuc ytiy'ajt nguydunim, huin'it jotcuyc ndzinaayim, etz nbaatim oy'ajt mijpi. ⁷ Ni ti iich ajt ya naaxhuñ ca' ti nmimiinim co nma'xung'ajtim, nañ ni ti ngaminicxim co n'o'cim. ⁸ Pen nmiid'ajtim caayin uucin huit

tucxy, jëbi n jotcujc'ajtim miid yi'yi. ⁹ Je' ajcxy huidibi ooy nijot'aty comeeñ'adii, hue' je' ajcxy jibic tumb ajcxy ycähua'ñ. Je' ajcxy chachtunamyb huidibi ca' oyhuinma'ñity, huidibi nayjotmayduunip. Ayo'n ajcxy ypadamyb, tigoyamb ajcxy y'alma. ¹⁰ Yi meeñy'adzojcin yi' je' yi jibic-huinma'ñ cop'ajtip. Miid yi meeñy'adzojcin may yi jäy huidibi jäydigoy Dios ytiy'ajt. Hue' je' ajcxy nayjotmayduunip.

Timoteo, tiydudägy mdzinähuipy miich

¹¹ Timoteo, Dios yjäy, cöguëg yi jäy huidibi miid yi jadu'mbi jibic-huinma'ñ. Tiydudägy mdzinähuipy, cuyduni Dios y'ayuc ycötujcin, mijpidäg Dios y'ayuc ytiy'ajt, tun oyjäy'ajtin, mihuindina' yi tung, miid'at mjot mhuinma'ñ yung naxy. ¹² Mic mjot mhuinma'ñ pidäg ma Dios ytiy'ajt, ca' mjotmetzcüy. Tun jadu'n nej jäy huidibi nayboyicquixigixy naymic'ixigixy. Nijot'at cixyot huinijot yi jugy'ajtin huidibi m'alma ypadamyb ma Dios. Dios xyajni'ibicy jigix mgapxhuäcxip jada tiy'ajt. Ti miich mgapxypidzimy nej mmibicy mayjäyoty. ¹³ Dios je huidibi yajjugy'ajttaayb tüg'óciy, yi' nidiy'ajt'aty co ooy ycopicyity jada ayuc jadu'n nej cham nyajnimaaayb. Nañ jadu'n je Cristo Jesús je huidibi tiy'ajt capxypidzim ma Poncio Pilato ñidiy'ajt'ajt co oy ycopicyity jada ayuc jadu'n nej cham nyajnimaaayb. ¹⁴ Copicy cuydun jada ayuc ane'min. Huädz mguydundähuipy, huädz myaj'ixpigipy je tiy'ajt jigix ca' pin jibic ni'ojihuipy Dios ytiy'ajt. Jadu'n mdunipy ixti cooni ñich ajt nHuindzin Cristo Jesús ñayguëxigixy ya naaxhuiñ jadüg'oc. ¹⁵ Dios yajniguëxigamyb Cristo Jesús mina anajty je tiempo yhuaad'aty. Dios je' je mij'ane'mbi, je mijpi rey, etz je mijpi huindzin. Yi' je' je Huindzin Dios huidibi ane'mdaayb. ¹⁶ Yi' je' tügpajc je jugy'ajt cop ymiid. Yi' ijtp ma je tiicxin je jajin huidibi ca' pin huaad ninej mihuingoñ. Janch ni tüg jäy ti ca' ixy, e ni ca' ixa'ñ. Yi' je' cömay'idipy etz yi' ane'mdaayb tüg'óciy. Amén. Jadu'n jada.

¹⁷ Yi' comeeñydijc huidibi jadachambi tiempo tzinaayb jugy'ajt, nima' miich yi' ajcxy co ca' huaad amij agix ñayjihuiiyigixy, ni ca' ñigi adzojccixy anaxy yi meeñ huidibi jadu'ñyi tigoydaayb. Huen ajcxy mijpidägy yi Dios huidibi xymooyim tüg'óciy mijmay mijcajee jigix njotcujc'ajtim. ¹⁸ Huen yi' comeeñydijc oybi tungixy, jigix ajcxy cömay ypidzimipy co oyjäy'ajtin tungixy. Huen ajcxy pa'ayoogixy ymigügtijc huidibi ca' ti miidity miid oyjot oyhuinma'ñ. ¹⁹ Co ajcxy jadu'n tungixpy, chi padaangixy je oybi huidibi miimb gidaacp. Ypadamyb ajcxy je jugy'ajtin huinixibi.

Timoteo, mijpidäg jada tiy'ajt

²⁰ Timoteo, mijpidäg jada xpijcin huidibi ti myajni'ibic'aty. Ca' mmijpidägipy yi ñigoobi y'ayucity, yi' huidibi ca' Dios huindzigiy. Ca' mmijpidägipy yi jäy huidibi ajcxy naybidaacip jadu'n nej jihuiy ooy ycohuinma'ñity, e ca' yjanchity, huidibi midzip'ajtp Dios ytiy'ajt. ²¹ Jadu'n nej nije' ajcxy panixcixy jada ca'pi ytiy'ajtity, e jadu'ñi ñitigoy.

Huen Dios je oy'ajtin tuñ miid miich. Amén. Jadu'n jada.

2 TIMOTEO

Yi Mimetzpi Neczy Huidibi San Pablo Yajniejx Timoteo

¹ Ich Pablo, Dios ti xyajñibicyich huen Cristo Jesús xy'apóstol'adyiijich. Yi ti xyquexyich co yi' y'ayuc ngapxhuäcxibich. Dios ti yajhuinhuaniiygixy yi jäy co pin mijpidägy Cristo Jesús yajjugypigipy co anajty ti y'ögy. ² Ooy ich miich ndzocy njihuüy nej ngi'm'ung'adyii. Dios Teedy etz ich ajt nHuindzin Cristo Jesús huen tuñ oy'ajt may'ajt miid miich, huen xypa'ayooy, huen xyyajjotcugiy.

Pablo jotcujc co Timoteo ti mijpidägy Dios y'ayuc

³ Nyajnajxypich Dioscojuyip ma Dios co miich ti mmijpidäg yi' y'ayuc. Nmibijctzooybich Dios miid miich ycixpi jabom jabom xim tzuum. Janch cixyjot huinijot nyajmij'atyich Dios, paady ooy oy nayjihuiyijich. Nañ jadu'n n'ap ndeedy jecy'ajty janch cixyjot janch huinijot yajmij'ajty Dios. ⁴ Ooy miich nicxy njaco'ixihua'ñ jigix njotcugihuibich. Ooy njajäymejtzcoodyiijich nej miich mjiy myaax miid ich ycixpi je taabi jim ndzoönich. ⁵ Njäymejtzpich jadu'n nej miich mmijpidägy yi Dios janch cixyjot huinijot co xymiid'ityich. Nañ njäymejtzpich co jayijp mnambiid Loida etz yi mdaj Eunice mijpidacy Dios janch cixyjot huinijot. Minambich co chambaad miich mmijpidägy Dios janch cixyjot huinijot.

⁶ Jada nyajjäymejtzcootpy: Nijot'at yi mic'ajtin huidibi Dios ti xymöy, je taab anajty Dios ytung mnimadzaani co ngi'nixajy, jigix Dios ytung jacyajxon mduunipy. ⁷ Dios ca' xyajhuindzigy'aty, hue' xyajjotmic'ajtp. Miid Dios ymic'ajt jeb mnaychójcigixy mnayjihuiyigixy, jeb oyjot oyhuinma'ñ myajtuungixy. ⁸ Paady ca' mmidzöyduniyb ich ajt nHuindzin Cristo Jesús ytiy'ajt. E nañ ca' xymidzöyduniybich co ti nbujxtijc inäyich miid ich ajt nHuindzin Cristo Jesús ytiy'ajt ycixpi. Mecxtuc yi ayo'n yi tzaachypi huidibi myajnajxpy co mgapxhuäcxy yi Cristo Jesús ytiy'ajt. Dios xyajjotmicpigipy. ⁹ Canan paady ti xyajñidzoocim n'alma co ajt ndzax'oyjäyity. Com Dios jadu'n ti yajnihuinmayiy tuna'ñ oy'ajtin miid ich ajt ycixpi co quejxy Cristo Jesús ya naaxhuiñ. Dios jayijp ti huinmay co quexa'ñ je Cristo Jesús ca'ni anajty pin ya naaxhuiñ. ¹⁰ Dios ti cham jada oy'ajtin yajniegixy co yaj'ijxy ya naaxhuiñ ich ajt nnihuambi nyajñidzoocpi, je Cristo Jesús, huidibi ti yajcödigoy yi o'cin. E ti yajnejhuüy yi jäy miid yi' ytiy'ajt nej jeb huaad ndzinaayim huinixii ma yi Dios y'it oybi.

¹¹ Dios ti xyajñibicyich co y'ayuc ngapxhuäcxich, etz xy'apóstol'adyiijich jigix nyaj'ixpigipyich yi huidibi ajcxy ca' yjudíojäyity. ¹² Paady ycixpi tzaachypi nbaadyich. Per ca' ndzo'yduñich, com ich nejhuüy pin mmijpidacyich, nejhuüyibich co yi' ymiid cötujcin etz mic'ajt jeb xycuend'adipyich, ixti huin'it xii minaa Cristo Jesús tiyduna'ñ yi naaxhuiñjäy.

¹³ Mijpidäg je tiy'ajt tiydudägypi huidibi ti nyaj'ixpicy, jada je' tiy'ajt ijxpejt nej jeb mbanicxy mbayöy. Yajmij'at Cristo Jesús, ca' m'ixmajtzi yi' ytiy'ajt, mdunipy oyjäy'ajtin jadu'n nej yi' tzocy. ¹⁴ Mihuindina' yi oybi ayuc tiy'ajt huidibi ti nyaj'ixpicy. Huen je Espiritu Santo huidibi miich miid jotjoty huinma'ñjoty xypubedipy xypudigihuiy.

¹⁵ Ti jada' mnejhuüy co tüg'óciy yi mibijcpidijc jim Asia naaxjot ti ixmach je tiy'ajt jadu'n nej ti nyaj'ixpicyich. Yi Figelo etz Hermógenes etz jacjadyii jadu'n ajcxy ti y'adiitzcixy. ¹⁶ Yi Huindzin Jesús yi' pa'ayoohuiy yi Onesífero yjuugy ymigüg, com ooy ich mij xypa'ayooyich etz xypubejtyich, ca' xymidzo'yduyijich co nmach'inäyich. ¹⁷ Co Onesífero oyja'ty ya Roma, chi mictägy xy'ixtaayich cooni xypatyich. ¹⁸ Huen yi Huindzin Dios ypa'ayoohuiigy Onesífero co anajty Cristo Jesús tiyduna'ñ naaxhuiñjäy. Huadz miich mnejhuüy nej yi Onesífero xypubejtyich jim Efeso.

2

Huen Cristo Jesús may'ajt tunipy miid miich Timoteo

¹ Miich Timoteo, jadu'n njihuïy nej ngi'm'ung ngi'm'anäg. Huen Cristo Jesús may'ajt tunipy ma miich, huen xyajjotmicpigipy. ² Miich ti mmidoy may'ayuc tiy'ajt huidibi ti nyaj'ixpicy. Jada ayuc mayjäy midoy e jëb ajcxy nidiy'ajt'ajtcixy. Jada tiy'ajt miich mgapxnaxipy mgapxhuäcxipy ma jacjadyii yëydijctijc huidibi oyhuinma'n ymiid, jigix yi' ajcxy nañ jadu'n capxnaxipy ma jacjadyii jäy.

³ Miich mimadäg yi ayo'n yi tzaachypi huidibi mminajxyp myajnajxyp, jadu'n nej tüg Cristo Jesús ysoldado huidibi oy tumb. ⁴ Yi soldado huidibi soldad'ajtp ca' huaad huingbi tung nicxy tuñ, jigix je' yjotcuje'adipy pin anajty ti ypidägyii soldado, nañ jadu'n miich adügijp Dios ytung mdunipy. ⁵ Pin jäy nayboyicquipxip ca' yi' premio pada'n, oy ti yjamadägy, pen ca' cuyduñ yi tiy'ajt. Nañ tzocy co miich mguydunipy yi tiy'ajt. ⁶ Je jäy huidibi tumb ma ycam ytu' je' jayijp huidib huen yajpidigy yi ujtztim huidibi ti y'ity. Nañ jadu'n miich co Dios ytung mduunip mbaadip yi oy'ajtin. ⁷ Yajxon mhuinmayipy huidibi nyajnimayyb, yi Huindzin Cristo Jesús xyajnejhuïydähuipy tüg'óciy je' ytiy'ajt.

⁸ Jäymetz jadu'n nej Jesucristo, yi David y'ap y'oc, y'o'cy, chi Dios yajjugypijcy jadügtecy. Jada je' je ayuc tiy'ajt oybi huidibi nnajtzcapxiybich. ⁹ Miid yi' ycixpi n'ayooyich etz tzaachypi nyajnajxyich. Nbuixtjic inäyich jadu'n nej jihuiy njibicjäyich. Oy njapujxtjic inäyich ca' ñejity, Dios y'ayuc ca' yi' mach y'ity, yajcapxhuäcx'adiitzp nigi. ¹⁰ Paady iich tüg'óciy jada tzaachypi ngöbijctäy nmecxtujctäy, jigix jëbi je jäy ajcxy huidibi Dios ti yhuin'ixigixy chinähuipy ajcxy huinixii ma yi' y'it oybi, Cristo Jesús yajnidzögüib yi' ajcxy y'alma.

¹¹ Tiy'ajt jada ayuc:

Pen ti iich ajt n'o'cim miid Cristo ycixpi, yi' miid ndzinaayim tzajpjoty.

¹² Pen nyajnajxim tzaachypi ayo'n miid Jesús ycixpi, nañ quipxyi miid yi' n'ane'maanim. Pen ca' ya Jesús y'ayuc ngöbijcim, nañ ca' jiiib tzajpjoty xycöbigaanim.

¹³ Oy iich ajt nyajmij'ajtim Cristo Jesús o ngayajmij'ajtim, Dios ycuydundaayb yi' y'ayuc. Com ca' huaad yci'm ayuc yajxigy.

Naybidägi cixyjot huinjot ma Dios ytiy'ajt

¹⁴ Yajjäymejtzcood yi mibijcpidijc jada tiy'ajt huidibi ti nyajnimäy. Nima' je jäy ajcxy co je Huindzin Dios ca' oy'ixy tzip capxy ayuc huidibi ca' choobaady. Miid yi tzip capxy ca' ni ti oybi nbaatim, jäyi yajhuinma'nydigoy huidibi amidoo'ijtp. ¹⁵ Naybidägi cixyjot huinjot ma Dios y'ayuc ytiy'ajt, nej jëb huaad cömay mbidzimy ma Dios, jadu'n nej Dios ytumbi huidibi ca' ni ti midzöydunyii, huidibi Dios y'ayuc ytiy'ajt yajxon yajhuinjihuiydaayb ymigügtijc. ¹⁶ Ca' mgöbigipy yi ayuc huidibi ca' ytiy'ajtity, yi nigoob ayuc huidibi yajtüyöyp mayjäy ajcxy, yi tiy'ajt huidibi ca' Dios ytiy'ajt'adyii. ¹⁷ Yi huidibi ajcxy y'ayuc ca' ytiy'ajtity yajhuinma'nydigooyb ymigügtijc. Yi' ajcxy miid jibic ayuc yajhuinma'nydigoy yi mayjäy ajcxy, jadu'n nej pützpa'm huidibi ninicx jicxp oñydägy. Jadu'n nej ti yjaty miid Hemeneo etz Fileto co ajcxy yhuinma'nydigooy. ¹⁸ Yi' ajcxy anajty Dios y'ayuc cuyduuni, chi oyhuinma'nydigooyñi. Chi ajcxy ymináangixni co je tiibi y'öccixni, ti ajcxy je' yjugypicy, e jadu'n ajcxy yajhuinma'nydigoy nijjity jäy. ¹⁹ Huidibi Dios ti cojy ti macxy, nimiraxii ycacixy ycatigooy, com yi' ytiy'ajt ijtp yi' huinixii. Tiy'ajt jada co yi' Huindzin Dios y'ixcajpy pinjaty yjäy'ajtpy. Tüg'óciy pin mijpidacp yi nHuindzin Jesucristo y'ayuc, huen jijphuäctüdy yi jibic-huinma'n yi jibic-tung.

²⁰ Ma tüg mij comeenydjic jim oori taasi, oori texy, etz oori cuchara, etz tijaty oyjaty. Nañ ymiid jim naax taasi, naax texy, quipy cuchara etz jactijaty ca'p y'oyjatyity. Yajtuñ yi oori taasi etz oori texy ma tügi caayin uucin oybi. Yajtuñ yi naax taasi etz naax texy oyñiminaa. ²¹ Jadu'n yi' pin jäy jibic-huinma'n ixmajtzp etz tuñ oyhuinma'n, jadu'n yi' nej oori taasi oori texy. Cömay'idip yi' ma yi' Dios. Huädz yi' yjot yhuinma'n, jëbi nHuindzin'ajtim Dios yajtunipy ma tüg'óciy oybi tung.

²² Ixmatz miich yi yujcyec'anäg ajcxy yjibic-huinma'n. Tudägy mdzinähuipy. Yajmij'ajtcix Dios cixyot huinjot. Mdunipy ojjäy'ajtin. Ixmatz yi tzip. M'ojadadipy yi Huindzin Dios miid ojjot oyhuinma'n. ²³ Ixmatz yi nigoobi'ayucity yi loci huinma'n, ca' yi' y'oyity. Mnejhuüyb co yi nigoobi'ayuucity tzipcojp capxycojp yi'. ²⁴ Yi Huindzin Dios ca' yi' tzocy co yi' ytumbidijc nicxy tzip capxy yajtzondägy. Hue' janchtiy tzocy huen jäy'ajtcixy yung naxy miid tüg'óciy jäy etz pe'cy y'idipy miid yaj'ixpijcin. Nañ chojcpy co mimecxtugipy ymigügtijc ajcxy. ²⁵ Miich miid yung naxy mjot mhuinma'n capxhuij je jäy huidibi midzip'ajtp je tiy'ajt. Ycadimjeyity co Dios ytiy'ajt nijothuimbijtcixipy, e nejhüügyixyipy je tiy'ajt oybi. ²⁶ Co anajty ajcxy ti ymejtzcixy yhuinma'n, chi ajcxy ycöguëgyib je mujcu' huidibi ajcxy ycapxymidooyb ma anajty ymiid'ajtcixy cïjoty etz ycapxymidoogixpy yi Dios.

3

Jäy jotmay miid y'idaangixy

¹ Miich mnejhuüyb ma je xii tiempo anajty ycixaani jadaanip ayo'n, je jäy ajcxy jotmay miid y'idaangixy. ² Ji adipy jäy huidibi adzojcp, huidibi amij agix nayjihüüyip, jäy huidibi ameen, jäy huidibi ci'm naygömayiib, huidibi oyñinej capxtigooyb ma Dios, jäy huidibi ca' capxymidohua'n ytaj yteedy, jäy huidibi ni ti ca' jäygidäga'n, jäy huidibi ca' yajmay'aty Dios. ³ Co anajty tiempo ycixaani, ji adipy jäy huidibi ca' ymigüg ixa'n tzoga'n, jäy huidibi ca' pa'ayo'n miidity, jäy huidibi ymigüg nihuambejtp, jäy huidibi oy ahua'nity, jäy huidibi midzip'ajtp yi oybi. ⁴ Ji adipy jäy huidibi ymigüg agojix midundigooyb, jäy huidibi ytunamyb ti ytunamyb, ca' ajcxy tuñ cuendi capxhuijin, jäy huidibi amij agix nayjihüüyip, huidibi tzachnijot'ajtcixy mayñaxy xondaacin, e ca' cuyduna'n Dios ytiy'ajt. ⁵ Ji adipy jäy huidibi naybidáacigixp jadu'n nej jihüüy ajcxy mijpidaaccixp Dios ytiy'ajt e ca' yjanchity. Chi ma ajcxy chinaayin ma ajcxy yjugy'ajtin ñiguëxíc co ca' tiy'ajt yajtuñ. Cöguëg yi jadu'mbi jäy. ⁶ Ma yi jadu'mbi jäy ajcxy jim choonity huidibi coyöyib conaxiib ma je töxyjäy huidibi ca' ytudägyty, huidibi oy ypocyjäyity, huidibi jibic-huinma'n nijot'ajtp. ⁷ Yi jadu'mbi töxyjäy ajcxy panixcp payöyp canaagnax huinma'n, e niminaa ajcxy cahuinjihüühuipy yi Dios ytiy'ajt. ⁸ Jadu'n nej Janes etz Jambres midziptzoon je Moisés, yi jadu'mbi yëdijc ajcxy nañ jadu'n midziptzoonip yi tiy'ajt. Jibicjot jibic-huinma'n ajcxy ymiid. Naybidägüib ajcxy jadu'n nej jihüüy cuydungixy yi tiy'ajt, e ca' cuydungixy. ⁹ Ca' ajcxy mimadägipy nej huin'iniipy Dios yjäy. Niguëxigipy yi' ajcxy yjibic-huinma'n jadu'n nej Janes etz Jambres yjajty.

Tüg'óciy Dios ñecy Dios ci'm ti huinma'ñymöy je huidibi jaay

¹⁰ Miich ti mhujinhüüydäy nej iich ti nyaj'ixpicy Dios y'ayuc nej njäy'atyich, nej nhuinma'n nduüñich, nej Dios nmijpidägyich cixyot huinjot, nej iich jäy nmimecxtucyich, nej ojjäy'ajtin nduüñich, nej ti nmihuindinäyich Dios ytung. ¹¹ Miich m'ixxyp mnejhuüyb nej ti nyaj'ixhuidityich nej ti nyajpahuidityich, miich mnejhuüyb je ayo'n je tzaachypí huidibi ti nminaxyich ti nyajnaxyich jim Antioquía, jim Iconio, etz jim Listra. Jadu'nyibaad yi ayo'n tiibi nbaadyich Dios ti xyñhua'n ti xychhua'ñich. ¹² Huen pin huidibi yajxon cuydumb Dios ycapxy y'ayuc jadu'n nej Cristo Jesús ti xyyaj'ixpicyich, nañ tim jadu'n ajcxy yaj'ixhuididipy yajpahuididipy. ¹³ Yi jibic jäydijc huidibi naybidáacigixp jadu'n nej jihüüy cuydungixy yi tiy'ajt, e ca' yjanchity, niigi jibic y'ididzaangixy. Huin'iinaangixy ymigügtijc ajcxy, e ñayhuin'iinaangixy ci'm.

¹⁴ Miich Timoteo, ixmatz yi jadu'mbi jäy ajcxy etz panixc yi tiibi m'ixpicy, yi tiibi myajñibic'aty. Mnejhuüyb co iich ti nyaj'ixpicyich je tiy'ajt. ¹⁵ Com miich pi'cni mutzni ti mjaty ti mnejhuüy yi Dios ñecy. Jada necy ti xyajnejhuüy nej huaad mijpidägy yi Cristo Jesús, e niigi jadu'n jëb huaad yi m'alma nidzoocin paady. ¹⁶ Tüg'óciy Dios ñecy Dios ci'm ti huinma'ñymöy je huidibi jaay. Paady jëbi nyajtuunim co jäy nyajni'ixüüm nyaj'ixpijcin. Jëb nyajtuunim co njijpcogapxiyim huidibi ca' ytiy'ajtity, etz co n'ihujim

ngapxhuijim. Jëb nyajtuunim co nyaj'ixpijcm nej jëb huaad tiy'ajt nbanicxim, ¹⁷ jigix yi jäy ajcxy huidibi mijpidacp Dios ytiy'ajt, jëb ni'ixi' y'idipy, tunipy tüg'óciy oybi huinma'n oybi tung.

4

¹ Ooy ycopicyity mido'mbic jada ayuc jadu'n nej cham iich miich nijayïy. Dios etz iich ajt nHuindzin Cristo Jesús tiy'ajt yejc co copicy jada ayuc. Cristo Jesús ytiydunamyb yi jäy ajcxy juugypï etz yi jäy ajcxy tiibi y'o'ccixy, e chi yajjugypigipy jadüg'oc ajcxy. Yi' yajtiydunamb ajcxy co anajty ymiñ ya naaxhuiñ pidäga'n y'ane'min. ² Nyajni'ibjcpy mgapxhuäcxip Dios y'ayuc ytiy'ajt hueñytimyminaajity, oy pin midoohua'n o camidoohua'n. Copicy co mijjpcogapxihuipy huidibi ca' ytiy'ajtity, capxhuij pin yinjaty huenjaty camadacp, iihuij capxhuij yi jäy ajcxy miid Dios y'ayuc ytiy'ajt. Mimecxtuc etz yaj'ixpic yi jäy ajcxy. ³ Minip je xii je tiempo ma jäy ajcxy ca' cöbiga'ni oybi tiy'ajt. Nijëjity miid yci'mdzojcin miid yci'm-huinma'n ixtähuip ajcxy yhuindzin huidibi yaj'ixpijib nej ajcxy jäygidägy, oy ca' ytiy'ajtity. ⁴ Chi ajcxy anajty jijphuäctútcixni camidoohuäängixni je Dios y'ayuc ytiy'ajt. Mijpidaacni anajty ajcxy nigï yi nigoobi'ayucity. ⁵ Miich huijy ycuic m'idipy. Mecxtujcta' nej jäy ajcxy xy'ixhuidity xypahuidity. Yajni'ma' jäy ajcxy Dios ytiy'ajt, jëb ajcxy mijpidägipy etz jothuimbidity ajcxy Dios. Yaj'ixpic Dios y'ayuc ytiy'ajt nej ypadyii.

⁶ Jadu'n miich cham njacnimäy, je' co ti yhuaad'ajtni je tiempo minaa ndzonaanich ya naaxhuiñ xyaj'ögaamich jäy, ti nayoxyiijich naydogyiijich miid Cristo Jesús ycixpi. ⁷ Ti iich ooy mic nmihuindinäy Dios y'ayuccapxhuäcxii ma anajty ypadyii. Ti nyajcixy nyajmayich je tung huidibi anajty xypatpich. Ooy ti nyajmij'atyich Cristo Jesús, ni ca' ti n'ixmajchich yi' y'ayuc ytiy'ajt. ⁸ Cham nijjp'ijxypich co Cristo Jesús je tiydumbi tudägypï xycömayipyich jilby tzajpjoty, miid co tiydudägy ti ndzinäyich ti njugy'atyich.

Pablo pijctzoy may'ajt ma Timoteo co tzojc yminipy ma yi'

⁹ Tun may'ajt tzojc yminipy ma iich. ¹⁰ Yi Demas ti iich yam xycögueecni co yactzojcpy yi mayñax xondaacin ya naaxhuiñ. Hue' ti ñicxy jim Tesalónica. Crescente nañ hue' ti ñicxni Galacia. Yi Tito ti ñicxy Dalmacia. ¹¹ Jëyi naydügpajc Lucas yam miid iich. Co mminipy, miidminipy Marcos, com ooy ti xychachpubetyich ma Dios ytung. ¹² Yi Tíquico ti nguexyich jim Efeso. ¹³ Je jocxhuit huidibi nyajhui'miyyich jim Troas ma Carpo ytijc miminipy. Nañ jadu'n mimindähuipy je necy. Je' ooy ytimycopicyity yi pergamino necy.

¹⁴ Alejandro je ca'tzpi ti yi' ooy mij xymidundigooyich. Yi nhuindzin'ajtim Dios paatip nej yajmidzogyii. ¹⁵ Naygüend'adii ca' miich yi' mmijyöybedipy, com ooy mic ti jijpcogapxiy Dios y'ayuc huidibi iich ajcxy nyaj'ixpijcpy.

¹⁶ Co yi' oga'n xyxyyich ma je mij tungmiidpi, naydüg ayuc nmihuindinaayich. Nipin xycapubejtyich, nigï ajcxy xycögueectaayich. Huen Dios ocmeecxy nej ajcxy ti y'idütcixy. ¹⁷ Ca' y'ocnejity Dios ti xypubetyich ti xypudigiyich. Dios ti xyajjotmicpicyich, jigix ngapxhuäcxtähuibich ytiy'ajt ma tüg'óciy jäy. Jëb tüg'óciy jäy huidibi ca' yjudiojäyity huen mido'mbijtaaygixy Dios ytiy'ajt. Dios ti xyñihua'ñich ti xycohua'ñich ma yi' o'cin. ¹⁸ Yi Huindzin Dios yi' xyñihua'ñ xycohuá'ñibich ma tüg'óciy jäy huidibi ajcxy jibic-huinma'n miid. Yi'xycuend'adipich, ca' ni ti xyjadipyich, cooni anajty njädyich jilby tzajpjoty ma y'ane'my. ¡Huen Dios cömay idipy janch huinixii huinitiempe!

Pablo ymigügtijc capxpooxñ yajniguexy

¹⁹ Yajnax iich ngapxpooxñ ma yi' Prisca etz ma Aquila etz ma Onesífero yjuugy ymigüg. ²⁰ Erasto ti je' yhui'my jim Corinto. Je Trófimo com pijcip anajty, iich je' n'ixmajch jim Mileto. ²¹ Tzojc mjatyminiy ma ca'ni tiichpy ymiini. Yquejxyp ajcxy capxpooxñ ma miich, je Eubulo, je Pudente, je Lino, je Claudia etz jacjadyii migügtijc.

²² Huen je Huindzin Cristo Jesús xypubedipy xypudigihuipy. Huen Dios tuñ may'ajt miid miich ajcxy. Amén. Jadu'n ngapxcixyich.

TITO

Yi Neczy Huidibi San Pablo Yajnigüeje Tito

¹ Hich Pablo, Dios jada miid nduunich, Jesucristo xy'apóstol'ajtpich. Yi' ti xyquexyich ma yi jäy ajcxy huidibi Dios ti yhuin'ixyii, jigix ajcxy mibigipy yi' ytiy'ajt. Nañ nyajnimähuibich nej jëb ajcxy cuyduuni Dios ytiy'ajt. ² Jadu'n nduunich jigix co anajty y'o'ccixy, chi jadüg'oc yjugypíjccixipy e tzináaygixipy huinixii. Dios yajhuinhuaniiy je jäy ajcxy je jugy'ajtin huinixiibi, ca'ni anajty naaxhuiñybi chondägy. Jada tiy'ajt jëb nmijpidaacim com Dios ca' yi' y'aniidägy. ³ Jada jugy'ajtin huidibi ijtp huinixii, Dios ti yajnehuüy je jäy ajcxy cham co je tiempo ti yhuaad'ajtni, miid yi' y'ayuc huidibi ngapxhuäcxibich. Je Dios huidibi xyajnidzoocim iich ajt n'alma ti xyajnicbicyich co yi' y'ayuc ngapxhuäcxpyich. ⁴ Miich Tito, cham nijayiy jadun nej jihuüy nijayiyich ngi'm'ung. Com tú'ciy nmij'ixim nmijpidaacim Dios. Huen Dios iich ajt nDeedy tzajpjotpy etz Cristo Jesús iich ajt nihuambi yajtzoocpi tuñ may'ajt oy'ajt miid miich, huen xypa'ayooy etz xyajjotcujc'adipy.

*Myajni*bigipy yëdjic huidibi jëb nigohuajc'aty ymigügtijc

⁵ Paady iich miich jim Creta ñaaxjot nyajhui'my, jigix mjacyajniñihuipy je migügtijc jadun nej iich ca' ti nyajni'ixiydäyich ajcxy. Tügpi cajp nidüg nidüg myajni**bi**bigipy yëdjictijc huidibi nigop'adiib nigohuajc'adiib yi mibijcpidijc, jadun nej ti nyajnimäy. ⁶ Yi' myajni**bi**bigipy yi huidibi ca' ti tundigoy; huidibi tüg töxyjäy miid, ca'p ycanaagity; huidibi y'ung ajcxy ca' nijot'aty mayñaax tzinaayin; huidibi y'ung ajcxy ycapxymidooyb. ⁷ Copicy huidibi nigohuajc'adamb yi mibijcpidijc huen jäy'aty tiydudägy, ca' huaad ti tundigoy; huen yajxon cuend'adipy huidibi Dios yje'ajtpy; jäy huidibi ca' ycöjuuñity; huidibi ca' yhuindzipity; huidibi ca' y'amügity; huidibi ca' chip'ixtäy; huidibi ca' y'adzocy. ⁸ Yi' jëbi myajni**bi**bigipy huidibi ojäy'ajtin tuñ miid hueñyitimypinity; huidibi ooy y'amigügity; huidibi huijycujc; huidibi tiydudägy yhuinma'ñ; huidibi huindzigib Dios; huidibi ci'm yajxon naygüend'ajtip. ⁹ Huen cixyjot huinijot naybidáacigixy ma je ayuc tiy'ajt huidibi ti ixpijccixy, jigix jëbi ajcxy jot'amijmohuipy jacjadyi jäy ajcxy miid tiy'ajt janchypi, e capxjotcidägy ajcxy je pin ajcxy ca' ixa'ñ Dios y'ayuc.

¹⁰ Com ji may judíojäy huidibi ca' ycapxymidoogixy, huidibi nigoobi tijaty ayuc tzachnimiydaccp; huidibi ajcxy huin'iimb ymigügtijc, jadun nej yi' ajcxy huidibi minamb co copicy tüg'óciy mibijcpi huen yajtiy'ajtiy ymang ajcxy, jadun nej judíojäy tungixy.

¹¹ Copicy co mgapx'adugipy yi' ajcxy huidibi ymigügtijc yajco'iniiyb tüg jiin tüg tijc; huidibi ajcxy yaj'ixpijcp mujuy; huidibi ca' tiy'ajt yaj'ixpijccixy.

¹² Nidüg yi' ajcxy cohuinma'ñybi nigapxy ymigügtijc ymina'ñ co yi Creta jäy ooy ajcxy y'aniijity, ooy ajcxy huinducity, ooy ajcxy ñuuxity, ooy ajcxy ycaaxity. ¹³ Tiy'ajt jadun nej jada cohuinma'ñyjäy ymina'ñ. Yaj'oj ajcxy mictägy, huen huinjihuüygixy yajxon Dios y'ayuc. ¹⁴ Ca'p ajcxy mijpidaacipy yi judíojäy ycostumbre etz ni ca' ajcxy mijpidaaccip yi y'ane'min huidibi jäy ci'm ti nihuinma'ñ'aty, huidibi ajcxy ti jipyoüduutni Dios y'ayuc ytiy'ajt.

¹⁵ Pin jäy huädz yjot yhuinma'ñ miid, oy ti jacuyduñ costumbre, o oy ca' ti cuyduñ, Dios yjäygidaccpy yi' co oyjot oyhuinma'ñ miidity. Pin jäy ca' huädz yjot yhuinma'ñ miidity, oy ti jacuyduñ costumbre, Dios ca' jäygidägy yi' com jibic ajcxy yjot yhuinma'ñ miidity, ca' ajcxy nej ñayjihuiiyigixy. ¹⁶ Yi jadun mbi jäy hue' ñaybidáacigixy jadun nej jihuiy nej ooy Dios ytiy'ajt ajcxy mijpidaaci, chi ma huidibi ajcxy ytumybi ji yajnigüexicixy co ca' ajcxy cuydungixy Dios ytiy'ajt. Dios ca' yi' oy iix ajcxy yhuinma'ñ, ca' ajcxy capxymidoogixy Dios, ca' ajcxy Dios ytung mihuaadity.

2

Nej jëb huaad chinaaygixy yjugy'ajtcixy

¹ Miich huädz myaj'ixpigipy yi migügtijc nej jëb huaad cuydungixy Dios ytiy'ajt. ² Miich m'ihuijip mgapxhuijip yi mijjäydijc huen ca' ajcxy y'amügyjäy'adipy; huen huijycujc jäy'ajtcixy; huen miid'ajtcixy oyjot oyhuinma'n; huen mijpidaaccixy Dios ytiy'ajt cixyjot huinijot; huen oyjäy 'ajtin tungixy miid huentimypinjäyity; huen ajcxy mecxtujcin yajtungixy ma yi chinaayin. ³ Nañtymyjadu'n mijjäydijc ajcxy töxyjäybi huen ajcxy jadu'n jäy'ajtcixy nej huidibi ajcxy Dios yajmij'ajtp; ca'p ajcxy ymigügtijc nigapxip ni'ojihuiipy, ni ca' ajcxy nihuambedipy; nañ ni ca' ajcxy y'amügyjäy'adipy; huen ymigügtijc ihuijicixy capxhuijicixy miid ayuc oybi tudägyi. ⁴⁻⁵ Yi mijjäydijc ajcxy töxyjäybi huen ihuijicixy capxhuijicixy yi mutz'anäg töxyjäydijc ajcxy nej jëb huaad chinaaygixy yjugy'ajtcixy; nej jëb huaad ytijc ñäy yajmij'ajtcixy; nej jëb huaad tzojccixy jihuiygixy y'ung y'anäg; nej jëb huaad oyjot oyhuinma'n yajtungixy. Ihuij capxhuij yi töxyjäy mutz'anäcpi co huen tiydudägy chinaaygixy, ca' ti jibic-huinma'n ajcxy mibidzimipy. Huen ihuij capxyhuij ajcxy nej jëb huaad yjin ytijc cuend'ajtcixy yajxon; nej jëbi y'amigüg'ajtcixy, nej jëb huaad capxymidoogixy ñäy. Pen jibic-huinma'n anajty ajcxy ytumyb, chi anajty Dios ytiy'ajt yajnigapxy yajni'ojiy.

⁶ Miich Tito, nañ jadu'n jaty ihuij jaty capxhuij yujcyeecpidijc etz anäctijc nej jëb huaad oyjot oyhuinma'n yajtungixy, ca' huaad ytundigoogixy ycapxtigoogixy. ⁷ Tito, tiydudägy mdzinähuipy, oyjot oyhuinma'n myajtunipy. Jim yi migügtijc ijxpejt pigipy ma miich, nej jëb huaad ytungixy. Huädz ajcxy myaj'ixpigipy yi tiy'ajt, huijycujc m'idipy. ⁸ Tito, m'ihuijip mgapxhuijip yi migügtijc miid oy'ayuc oyhuinma'n, jigix co pinjäy jijpcogapxihuaanip miich m'ayuc, chi tzo'ydu'n jihuihua'n, e jadu'n ca' jadipy nej jibic xyñigäpcixipy xyñi'ojiygixipy.

⁹⁻¹⁰ Je tumbidijc huidibi ijtp cojuyiy codoogiy, huen yhuindzin iimidoogixy capxymidoogixy nej ypadyii. Huen tungixy nej huaad yhuindzin jäygidägy, ca' adzo'nmay yjäy'adipy. Ca' meedzip tijaty yhuindzin yje'ajtpy, huen yajmij'adipy yajxon yhuindzin, huen yajxon ytung tundaayi. Pen jadu'n ajcxy yhuindzin midungixy yajxon, huin'it cömay y'idipy yi Dios ytiy'ajt, je Dios huidibi xyajnidzoocim ajt n'alma.

¹¹ Cham n'ixxim nnejhuiyim nej Dios may'ajt ti tuñ miid tüg'óciy jäy ajcxy ycixpi, co ti yaj'oyiy nej jëb huaad hueñypinity pinjaty mijpidaacip yi' y'ayuc, ypadamyb ajcxy y'alma ñidzoocin co anajty y'o'ccixy. ¹² Dios cham ti xyajnejhuiyim pen tzögamb ich ajt n'alma, chojcpy co n'ixmajtzim je jibic-huinma'n huidibi Dios ca' jäygidägy. Ca' huaad ooy nijot'ajtim yi mayñaxpi tzinaayin ma jadachambi xii tiempo yjacyöy. Copicy ndzinaayim huijycujc etz tudägy, e nguydunim Dios y'ayuc ytiy'ajt. ¹³ Njijp'ixxim mina Jesucristo, je huidibi xy'ane'mdaayim, ymiina'n ya naaxhuiñ jadüg'oc miid ich ajt ycixpi. Njotcugiyim ich ajt co n'ixxim ymiiñ miid y'oy'ajtin ymic'ajtin, yi Dios huidibi yajnidzögam ich ajt n'alma. ¹⁴ Yi Cristo Jesús ti ñayoxyii ti ñaydoogyii co y'o'cy ma yi cruudz miid ich ajt ycixpi. Yi' ti xyjuybidzimim ma anajty yi mujcu' c'am xymiid'ajtim, co anajty ti nbocytuunim. Yi' ti xyajpocyñihuätztaayim nidüg'óciy, jigix Dios xyjäy'ajtimip miid huädz jot huädz huinma'n, jëb nduunim oyjäy'ajtin cixyjot huinijot.

¹⁵ Tito, jada tiy'ajt migügtijc myajnimaydähuipy. M'ihuijip mgapxhuijip ajcxy yajxon. Dios ti xymöy cötujcin co m'ojipy pinjaty xycapxmidoob, jëb ajcxy yi m'ane'min xyajmij'ajtip.

3

Huen mijnicxpejtcixy yi gobierno ytungmiidpi

¹ M'ihuijip mgapxhuijip yi migügtijc huen capxymidoogixy yi gobierno ytungmiidpi etz cajpjäy ytungmiidpi. Huen capxymidoogixy jadu'n nej y'ane'myii ajcxy. Huen tungixy huidibi tiydudägyip huidibi ajcxy yaj'ane'mip. ² M'ihuijip mgapxhuijip yi

migügtijc ajcxy ca'p ajcxy ni pin nigapx ni'ojñhuip, nañ ni ca' tzipcapxy ajcxy ixtähuiip, huen ñaybidáacigixy amigüg, huen mimecxtujctaaygixy yi ymigügtijc ajcxy, huen nicy xyeemy jäy'ajtcixy miid yi mayjäy ajcxy.

³ Jecy'ajty ma ca'ni anajty nmijpidaacim Cristo Jesús, hue' anajty nyajpaatim miid jibic-huinma'ñ. Ca' anajty n'ímidoohuim ngapxmidoohuim. Je mujcu' anajty ti xyhuin'íinim, paady anajty nniidigooyim ndüidigooyim. Ndzachnijot'ajtim mayñaxpi tzinaayin, ni ngajajtim anajty nej n'ixmajtzim yi jadu'mbi huinma'ñ. Jibic-huinma'ñ nduunim. Jadu'n njäy'ajtim nijot anajty n'idüitzim, nga'oy'ijxim anajty nmigügtijc. Paady jäy anajty xymüddziptzoonim, chi naymijotma'tcootim miñ xyipy. ⁴ Jadu'n anajty nduunim ixti cooni Cristo Jesús ñayguëxigüiyb ya naaxhuiñ, etz nnejhuiiyim jadu'n nej Dios íich ajt nihuambi yajtzoocpi may'ajt oy'ajt ti tuñ miid tüg'óciy jäy ajcxy ycixpi. ⁵ Yi' xyajnidzoocim ajt n'alma canan co íich ajt ndzach'oyjäyity. Hue' je' jadu'n ti tuñ miid co pa'ayo'n ti yajtuñ miid íich ajt ycixpi. Ninigoob ti tuñ may'ajt oy'ajt miid íich ajt ycixpi. Chi yaj'oyüiyñi ajt njot nhuinma'ñ huinjemy miid je Espíritu Santo huidibi xyajtigüiyim njot nhuinma'ñ, e jadu'n ajt njogy'ajtin ndzinaayin chondaacni huinjemy. ⁶ Dios ti yecy yi Espíritu Santo janch mijcajee ma íich ajt njot nhuinma'ñ. Jadu'n Jesucristo xytuunim, je huidi íich ajt nihuaanim yajtzoocim. ⁷ Yi' ti xyaj'ahuimbijtim tudägy miid je may'ajtin oy'ajtin huidibi ti tuñ co yi' ti y'ögy miid íich ajt ycixpi. Jëyi cham y'oy'ahuixnity mina anajty nbadaanim je jugy'ajtin huidibi Dios miid huidibi ca' ycixipy ni minaa xii.

⁸ Jada ayuc jada tiy'ajt ndzojcpyich co miich mnigapxpedipy. Ooy ycopicyity co yi' ajcxy huidibi mijpidacp Dios huen oyjäy'ajtin tungixyp. Ooy y'oyity co oyjäy'ajtin tungixyp ajcxy. Yjäygidägipy yi jäy ajcxy miid je oyjäy'ajtin huidibi anajty ajcxy ytumyb etz ypaadipy ajcxy oy'ajt. ⁹ Ixmatz yi jäy ajcxy huidibi nigapxy nimiydägy yi nigoobi'ayucity, yi huidibi ca' choobaady. Nañ jadu'n yi' ajcxy huidibi nigapxp nimiydacp huidibi ñi'ap'ajtpy ñideedy'ajtpy. Ca' mjijptigiyñhuipy yi tzip capxy ma yi judiojäy ycötujcin huidibi ajcxy ypanicxyp. Yi jadu'mbi tzip capxy ninigoob yi', ca' yi' ni ma choobaady, ca' jugy'ajt miidity.

¹⁰ Yi jadu'mbi jäy huidibi tzip capxy ixtaayb, miid tüg'oc mejtz'oc myaj'ojipy pen ca' ycapxcöbicy, tim ix'oj, huen nicxy. ¹¹ Mnejhuiiyb co yi' jadu'mbi jäy ajcxy ti ixmajtcixy je tiy'ajt, tundigooyb yi' ajcxy, ci'm jadu'n nayyajpocycähuiiygixy.

Pablo nimay Tito co miid naybadaanip

¹² Nyajniguexipich nidüg, aver huidibi íich anajty n'ocquejxyp yi Artemas o yi Tíquico. Co yi' jim yjadipy, chi miich xyjatyñiminipyich mic'amy jim Nicópolis com jim nyajnaxa'ñich yi tich poj tiempo. ¹³ Co yi' Zenas, yi huingapxpi, etz Apolo ajcxy jim yjadipy, quejxnajxcix miich yi', e mooygixy ytu'amgixpi ca'ydi ti yajmayajtcixy tü'am. ¹⁴ Huen yi nmigügtijc'ajt ixpijccixy nej jäy y'oyjäy'aty, huen pubejtcixy pin tijaty yajmayajtp. Pen ca' jadu'n tungixy, Dios ca' yi' jäygidaacip yi' ajcxy yhuinma'ñ.

Pablo ycapxycíxy miid Tito

¹⁵ Yi migügtijc ajcxy huidibi ya yquejxyp ajcxy capxpocxin ma miich. Nquejxpich ngapxpocxin ma tüg'óciy yi nmigügtijc ajt huidijaty jim yajmij'ajtp Cristo Jesús. Huen Dios mij may'ajt tunip miid miich ajcxy ycixpi. Amén. Jadu'ñyi ngapxcíxyich.

FILEMÓN

Yi Necy Huidibi San Pablo Yajniejx Filemón

¹ Hich Pablo etz Timoteo, ich ajt nmigüg, nijayiybich miich Filemón huidibi ooy ndzocyich, huidibi quipxyi miid nduunim. Nmach'ihñayich miid co nyajmij'atyich Cristo Jesús. ² Nañ jadu'n nijayiybich yi Apía, ich ajt nmigüg töxyjäybi, etz yi Arquipo, huidibi capxhuäcx Dios y'ayuc tú'ciy miid ich ajcxy, etz tüg'óciy yi migügtijc huidibi naymújcigixp ma miich mdijc Dios ojadajtcixy. ³ Huen Dios Teedy etz yi Huindzin Jesucristo tuñ may'ajt oy'ajt ma miich ajcxy etz xyajjotcug'iygixipy.

Pablo capxpaady Filemón co mijpidägy Dios

⁴ Nyajnajxpyich Dioscojuyip ma Dios miid miich ajcxy ycixpi. Njatyimjäymejtzcich miich ajcxy jabom jabom co Dios nmibijctzooyich. ⁵ Ti ich ayuc nmidoy jadu'n nej miich mdzocy mjihuüy yi Huindzin Jesús etz tüg'óciy pinjaty yajmij'ajtp Jesús. ⁶ Nañ jadu'n nmibijctzooybich Dios miid miich ajcxy ycixpi, huen oyjäy'ajtin mdunipy miid je migügtijc, jadu'n nej Dios ti xyajnejhuüy yi tiy'ajt jigix ajcxy tiy'ajt paadipy ma miich nej jëb ajcxy cuyduñ Cristo y'ayuc. ⁷ Hermano, ti ich ooy njotcug'iyich miid yi m'oyjäy'ajtin huidibi miich mdumyb co ti mbubety yi Dios yjäy.

Pablo pijctzoy tüg may'ajt ma Filemón miid Onésimo ycixpi

⁸⁻⁹ Njapijctzoohuamybich tüg may'ajt ma miich. Oy njamídidyich cötujcin huidibi Jesús xymooyich jëb nja'ane'my co miich mgöbigipy Onésimo oy'amy. Per ca' jadu'n n'ane'ma'ñ miid co ooy ndzocy ooy njihuüyich miich. Paady cham may'ajt nbijctzooyich ma miich co mgöbigipy yi Onésimo oy'amy. Hich Pablo, ti nmijjäyiyñich. Cham jäy ti xypidägyich pujxtigoty miid co ngapxhuäcxich Jesús y'ayuc ytiy'ajt. ¹⁰ Cham may'ajt nbijctzooyich ma miich co mba'ayoohuipy yi Onésimo. Jadu'n njihuüyich nej n'ung'adyiijich miid co yi' ti mijpidägy Jesús ya ma ich nbujxtijc'ihñayich co ti nyajnimäyich Dios y'ayuc.

¹¹ Tiibi xii tiempo ñaxy co yi Onésimo ca' yi' ti xy'iididoy ti xycapxymidoy. Jadachambi janchtiy capxymidoohuam jadu'n ma miich etz jadu'n ma ich. ¹² Cham nyajnigüexy Onésimo. Ooy njajihuüyich co yam nguexyich. ¹³ Ooy ich yam njayaj'ida'ñich ma ich jigix ixipy yam xymiidtuñich. Ytimyñipaatpy ixipy jadu'n nej miich xymiidtuñich ma yam nbujxtijc'ihñayich miid co ngapxhuäcxich je jemybi oybi ayuc nej Jesucristo yjaty ayooy. ¹⁴ Per ca' ich n'a'ixiyich nicxy nyajhui'myich, pen ca' miich jadu'n mina'ñ. Ca'p ndzocyich adzip ahua'ñ tijaty miich mdunipy. Jëyi ndzocyich co miich oy'amy xypubedipyich. ¹⁵ Ca' yjegyty paady ycixpi ti xycöguëgy jëbi mijpidägy Jesús. Hueeni xii tiempo ti y'ity ya, e cham co yhuimbidipy ma miich, miid y'idipy jim huinixii. ¹⁶ Ca' jadu'n m'ocmiid'ajtnip cham jadu'n nej jac'oyñipin cojuyiy codoogiy tumbi. Hue' je' mmiid'adip jadu'n nej Jesús yjäy huidibi ooy mdzocy mjihuüy. Pues ooy ich yi' ndzocy njihuüyich. Jac nigí cham miich mdzogipy mjihuühuipy miid co yi' cham y'oyjäyity, etz co cham mijpidägy yi Huindzin Jesús.

¹⁷ Pen janch miich xymigüg'adyiijich cöbic yi Onésimo jadu'n nej ich miich ixipy xycöbicyich. ¹⁸ Pen ti yi' yinjaty huenjaty xymidundigoy o xymínucx'adyii ich miich nmigüedipy. ¹⁹ Hich Pablo, ich miich njaaybich nfirmajiyich miidich ngi'mgi' ngi'mletra. Hermano, nmigüedipyich nej Onésimo xymínucx'adyii. Oy ich yam ca' n'ibaady ngapxpaady co miich xymínucx'adyiijich miid co Dios ytiy'ajt ti mbaady ma ich. ²⁰ Xypubedipich miid Onésimo. Yi nHuindzin'ajtim Jesús yjäygidägipy pen jadu'n mduñ. Mdunipy may'ajt miid Onésimo miid Jesús ycixpi, e jadu'n ich jëb huaad njotcujc'atyich.

²¹ Nnejhuüybich co ooy m'iididoy mgapxmidoy, e jadu'n nej yam njacnijayiy, jac'anaxy mduna'ñ. ²² Nañ jadu'n yam nimäy. Tun may'ajt ni'ixi tüg jättac. Njijp'ijxypich

co nbujxtijcpídzimípyich tzojc miid co miich ajcxy Dios mibijctzoogíxy miid ñich ycixpi, e jadu'n jëbi nícxibich ma miich.

Pablo ycapxycíjxy miid Filemón

²³ Nañ nbídacpyich necyjoty yam. Xycapxpooocxp Epafras ñich nmibujxtijc jäy miid Cristo Jesús ycixpi. ²⁴ Nañ xycapxpooocx Marcos, Aristarco, Demas etz Lucas. ñich yi' ajcxy xypubejtp ya. ²⁵ Huen yi nHuindzin'ajtim Jesucristo may'ajt oy'ajt tunípy ma miich ajcxy, jëb miich ajcxy oy m'ity. Amén. Jadu'n ngapxcíxyich.

HEBREOS

Yi Necy Huidi Pinjaty Yajnigüeje Je Hebreo jäy

¹ Jecy'ajty Dios ayuc yecy ma ajt nmij'ap nmijteedy canaag'oc etz canaagnax miid je yprofetas ajcxy, je' ajcxy huidibi najtzcaxiyy Dios y'ayuc. ² E jadachambi ma xii tiempo yhuingooni co je naaxhuiñybi ycixani, Dios ayuc yecy ma iich ajt miid je' y'ung. Dios miid y'ung yaj'oyiyy je naaxhuiñybi etz tüg'óciy tijaty huidibi yajpatp. E Dios ti y'ung yajmigo'ixmadzydäy tüg'óciy. ³ Dios y'ung ymiid Dios y'oy'ájtín, yi' je' Dios ytiicxin'ajtpy yjajin'ajtpy. Yi' je' codinaayb etz yajnigüexigy nej je' je Dios. Dios y'ung huijtz'ijtaayb tüg'óciy miid je' y'ayuc etz ane'min mic'ajt miidpi. Co Dios y'ung ti xyajhuaatzim ajt nbocy, chi cöbijcy je mij'ane'min jiiby tzajpjoty, jadu'n nej jihuñy y'ixtacy a'oy'amy ma je mijpi Dios ymijc jiiby tzajpjoty.

Dios y'ung jacmij yi'ca'ydi ángeles ajcxy

⁴ Je Dios y'ung jac mij je' ymic'ajt y'ane'min miidity, ca'ydi je ángeles ajcxy. Com yi' je' Dios y'ung, paady ycixpi mic'ajt miidity jaydëbi ane'my huidibi Dios yje'ajtpy, e ca'ydi yi' ángeles ajcxy yi' jadu'mbi mic'ajt miid. ⁵ Com Dios ca' yi' ni tüg ángel nimay: iich miich n'ung'ajtpy. iich miich ti nyajpi'c'aty jadachambi xii.

Nañ jadu'n ca' Dios ni tüg ángel nimay:

Miich xyteedy'adiibich, iich miich n'ung'adiiyb.

⁶ Co Dios y'ungoob oy quexy ma naaxhuiñyjäy chinäy, chi yi' ane'min pidacy:

Huen je ángeles ajcxy nidüg'óciy huindzigihuipy pa'tjihuihuipy je' y'ung.

⁷ E miid je ángeles ycixpi, Dios ymina'n:

Yi ángeles jadu'n yi' ajcxy nej poj. Yi' ajcxy huidibi tzajpjoty tzinaayb, jadu'n yi'ajcxy nej huidzuc, nej jiiñye'n.

⁸ Jadu'n Dios ymina'n miid y'ung ycixpi:

Miich, Dios'ajtp, miich m'ane'min huinixii huinitiempo yi' y'idipy. Miid mdudägy'ajtin miich m'ane'mipy.

⁹ Ti mdzocy je tiy'ajt tiybi, e ca' ti m'ixa'n je jibicpi. Paady ycixpi Dios, miich mDios, ti xyhuin'ixy, e ti yejctäy nigí ma miich je jotcuyc'ajtin je xondaacin, ca'ydi ma yi' mmi'ane'mbidijc.

¹⁰ Dios nañ jadu'n ymina'n:

Miich, Huindzin Dios, oga'n'aty mbidac nej naaxhuiñybi chondacy, e miid miich mmic'ajt myaj'oyiyy je tzajp.

¹¹ Cijxtähuiy yi naaxhuiñybi etz yi' tzajp, per miich hui'mip huinixii huinitiempo. Jadu'n yi' naaxhuiñybi etz yi' tzajp y'amijydähuipy nej huit.

¹² Jadu'n miich yi naaxhuiñybi etz yi' tzajp m'anëgipy nej tüg huit yaj'anëgyin. Jadu'n miich yi naaxhuiñybi etz yi' tzajp myajtigadzipy nej jäy ajcxy yajtigach y huit. Chi miich je'ni m'idipy, je mxii mjimijt ni mina ycacixipy ycatigoyipy.

¹³ Ni camina Dios canimay ni tüg je ángeles ajcxy:

Hña' ma iich nmijc a'oy'amy, ixti mabaad iich miich je mmidzip nmimadactäyich, jadu'n yi'ajcxy nipaadipy nej yi' miich mdecypocxpejt'adyii.

¹⁴ Tüg'óciy je ángeles ajcxy ac espíritu yi' ajcxy, e ytungixy ma Dios, yquexyögyixy jigix pubedipy je jäy ajcxy huidibi ajcxy y'alma padam ñidzoocin.

2

Ca' n'ijxnajx nmidonajxim nigoo yi' pocyhuinmeechin

¹ Miid jadaaabi tiy'ajt ycixpi, oy co yajxon n'ocjäygugiiyim Dios ytiy'ajt huidibi ti nmidoohuim, jigix ca' njijpyöyduutim je Dios ytiy'ajt huidibi jadu'n nipatp nej tü'aa oybi.

² Pen je ayuc tiy'ajt huidibi ángeles ajcxy yejc jecy'ajty, hui'm je' co yjanchity. E pinjaty pocytumb, e ca' cuyduuni Dios ytiy'ajt, Dios chaachytunipy je' nej padyii miid ypocy

ycixpi. ³ ¿Nej tijy ñich ajt co Dios ycastigo nga'ocpaatim, pen je' je' yam ca' nmijpidaacim je Dios ytiy'ajt jadu'n nej jëbi xyajnidzoocim ajt n'alma? Yi Huindzin Jesús jayijp'aty ci'm nigapxy Dios ytiy'ajt jadu'n nej jëbi Dios xyajnidzoocim ajt n'alma. E jac'axam je discipulos ajcxy nañ jadu'n najtzcaxiy Jesús y'ayuc, e nigapxpejty ajcxy co yjanchity je Jesús y'ayuc, e chi capxnajxy ajcxy jada tiy'ajt ma ñich ajt. ⁴ Jadu'n anajty capxhuäcxicy Jesús y'ayuc ma ñich ajt, chi Dios yajniguëxíc Jesús y'ayuc co yjanchity co tuñ ijxpejt, mijhuinma'ñ etz milagro. E co Dios xymooyim je yjihui'ñ ymic'ajt, chi nije' nije' nbaatim mic'ajt ma Dios. E jadu'n Dios tuñ nej yi' tzocy.

Jesucristo jadu'n je' anajty nej ajcxy yjuugy ymigüg

⁵ Dios ca' yi' ángeles ajcxy ti cötujcín möy co y'ane'mity ya naaxhuiñ, jadu'n nej xii tiempo min cidägy, je xii je tiempo huidibi ñich ajt nnimiydaacim. ⁶ Hue' janchtiy ji tüg'it yjaybetyity ma Dios ñecy, ma ymina'ñ:

Miich Dios, ¿ti yi' je naaxhuiñyäj, co miich yi' ajcxy mjäymedziyb? ¿Ti yi' je naaxhuiñyäj, co miich je' ajcxy mjotmay'adyii?

⁷ Janch con xii tiempo miich ti mmöy yi' naaxhuiñyäj ajcxy e nañ ti mmöy jacminacy ymic'ajt y'ane'm'ajt ca'ydi yi' ángeles ajcxy. Per jac'axam miich mmöhua'ñ naaxhuiñyäj ajcxy nigü ymic'ajt y'ane'm'ajt, ca'ydi je ángeles ajcxy. Tüg'óciy huidijaty miich ti myaj'oyiy anajty ti mbidactähuip yi' ma yi' naaxhuiñyäj ajcxy ane'min.

⁸ E co anajty ti mbidactäy anajty ma yi' ajcxy y'ane'min, jadu'n nipaady nej jihuüy tüg'óciy tijaty huidibi ti myaj'oyiy, y'idipy ma yi' ajcxy ytecypa't.

E jadu'n yi', co Dios moyday ane'min je Cristo. Dios ni ti yi' ca'ixmach nicxy yca'ity ma yi' y'ane'min. Oy ixypy ca'ni cham n'ijxim co tüg'óciy tijaty ya naaxhuiñ etz tzajpjoty ca'ni amugi' ycapxycöbigy. ⁹ Dios ti xyaj'ijxim co Jesús miid mij'ajt ane'm'ajt. Je ángeles ajcxy nigü mic'ajt oy'ajt anajty miidity, ca'ydi Jesús co yi' chinay ya naaxhuiñ. Jadu'n Dios tuñ jaydebi Jesús y'ögy miid jäy ajcxy ypocy ycixpi. Jadachambi Dios ti möy Jesús mij oy'ajtin, etz mij ooy ti cömay miid je tzaachy'o'cin huidibi ypaat.

¹⁰ Tüg'óciy huidijaty ya yajpatp, ji'ajtp yi' miid Dios ycixpi etz Dios ymic'ajt yaj'ijtaayb tüg'óciy huidibi ji'ajtp. Dios tudägy ytuuñ co yajca'pxi Jesucristo y'oy'ajtin miid je tzaachypi huidibi ti minaxy ti yajnaxy. Miid co Jesucristo tzaachypi ti minaxy ti yajnaxy, paady ycixp jäy ajcxy padaangixy Cristo y'oy'ajtin. ¹¹ Miid co Jesucristo, je huidibi jäy ajcxy yajpocyñihuaatzp, jiiby mic'ajt ti paady ma Dios Teedy, paady ycixp yi' ajcxy huidibi patcixp pocyñihuaatzin nañ jim mic'ajt patcixy ma Dios Teedy. E miid co Jesucristo etz yi' yjäy mic'ajt patcixy ma Dios Teedy, paady ycixp Dios y'ung je Jesucristo ca' ti tzo'ydu'n jihuüy co yi' ymina'ñ co je mibijcpidijc jadu'n nipaady nej yi' yjugytijc ymigügtijc. ¹² Paady je Cristo ymina'ñ ma yjaybetyity:

Miich Dios, ñich miich ngapxadipyich ma nmigügtijc. N'ihuiyich iy miid miich ycixpi ma je jäy ajcxy ti nayyöymújigixy.

¹³ Nañ jadu'n Cristo ymina'ñ ma yjaybetyity:

Nmijpidägyich Dios.

E jadüg'oc yminaanip:

Cha ñich, miid je ung anäg ajcxy tiibi Dios xymöyich.

¹⁴ Ma jäy ajcxy ytügquëx'ajtcixy, tügpi yxiixy, tügpi ni'py je' ajcxy. Nañ jadu'n Jesús ymiid je' anajty yxiixy ñi'py jadu'n nej jäy ajcxy ymiidity jigix jëbi y'ögy, e jadu'n je' yajhuindigoydähuipy je huidibi anajty jamic'ajtmid co jäy yaj'ögüyb, je' je' je' mujcu'.

¹⁵ E jadu'n je Cristo yajnihuädzictuty tüg'óciy pinjaty anajty cojuyiy codoogy y'ijtp ma je mujcu', miid co tzigüygixy yi' y'o'cin. ¹⁶ Janch co Jesús ymiin ya naaxhuiñ, ca' nminaanim co pubeda'ñ je ángeles ajcxy, je' janchtiy ypubedamyb Abraham y'ap y'oc. ¹⁷ E miid jada ycixpi, Jesucristo jadu'n anajty miidity ninicx etz yjugy'ajtin tú'ciy miid je jugytijc ymigügtijc ninicx etz jugy'ajtin, jigix jëbi yi' naydügpajc codinäy naaxhuiñyäj ajcxy ma Dios yhuinduu miid tudägy'ajt etz pa'ayoohuin. Etz nañ jadu'n jigix jëbi huindzigiy

Dios y'it ylugar ma jëbi ypooxcixy miid yi'? Je' ajcxy huidibi ca' ycapxymidooy. ¹⁹ Paady nejhuuiyim co janch ca' ajcxy jajty nej ytigiiygixyipy ma Dios y'it ylugar miid co ajcxy ca' mibijcy Dios y'ayuc.

4

¹ Com nmiidni ajt Dios y'ayuc, jadu'n nej ti xyaj'ahuaniyim co ndigiiyim ma yi' chinaydac yjogy'ajttac, e nboocxim miid yi'. Paady ooy tzocy co ndzigiiyim Dios. Ca' jecyity co nidüg miich ajcxy ca' mdigihuipy miid co ca' mmibijccixy Dios y'ayuc. ² Nañ jadu'n ti iich ajt nmidoohuim je Dios y'ayuc oybi, tim jadu'n nej yi' ajcxy jecy'ajty ti midooy. Per ca' Dios y'ayuc ma ti ypubedyii ajcxy co ti jamidoogixy je tiy'ajt. Com hue' ajcxy ymidou, e ca' ajcxy mijpidacy. ³ Ich ajt com ti nmibijcim je Dios y'ayuc oybi, iich ajt je' tigiiyimip ma je it huidibi Dios ti tijy ma jëbi nboocxim miid yi'. Com Dios jadu'n yminañ:

Paady yi' ajcxy nmijotma'tyich, e nnimäyich ajcxy, n'ii baadyich ngapxpaadyich n'ayuc, co ni camina xii yi' ajcxy ypocxtac capaadiipy ma iich.

Tüg'óciy huidibi Dios yajcojy yaj'oyiiy, hue' ti yajcojy ti yaj'oyiiy jayijpni ca'ni anajty naaxhuiñybi chondacy. ⁴ Com ma yjaybetyity je tiy'ajt jiiyby muumity nigapxy je mihuixtujcxii bi ma jadu'n ymina'ñ:

Dios ypooxcy je mihuixtujcxii bi miid je' ytung ycixpi tiibi anajty tuñ.

⁵ E jadüg it yjaybetyity ma Dios ñecy ma jadu'n yminañ:

Ca'p yi' ajcxy ytigiiygixyipy ma iich nbocxtac.

⁶ Hue' janchtiy Dios yjacmiid'ajtyñi it lugar ma ypocxtac ma jëbi pinjaty ytigihuip. Yi' ajcxy huidibi tzinay jecy'ajty huidibi jayijp midou Dios y'ayuc, ca' je' ajcxy ytigiiy ma Dios ypocxtac, miid co ajcxy capxycömidoody Dios. ⁷ Paady ycixpi Dios ti pidägy tüg xii tüg tiempo mina jëbi pinjaty tigihuipy ma yi' ypocxtac. Je' jadachambi xii tiempo Dios ti pidägy. Dios ti xyñimaayim nej David yminañ tzach com jecy, nej miiñ jaybety huidibi ti yajnigapxy co jadu'n ymina'ñ:

Jadachambi pen midooyb miich ajcxy nej Dios ymina'ñ, ca' ajcxy mnaybidáacigixy jotjuuñ.

⁸ Co Josué je Israel jäy ajcxy camoy je pooxin, ca' Dios canigapxy huingbi xii mina ytigihua'ñ ajcxy ma Dios ypocxtac. ⁹ Paady ycixp, jadu'n yjac-hui'myñi jadüg xii tiempo mina Dios yjäy ytigihua'ñ ma Dios ypocxtac. ¹⁰ Com pinjaty tigiiyb ma Dios ypocxtac hue' je' ypooxcy miid je' ytung ycixpi tiibi anajty tuñ, tim jadu'n nej Dios ypooxcy je mihuixtujcxii bi miid je' ytung ycixpi tiibi anajty tuñ. ¹¹ Hue' tzocy co naymic'ijxim nej huaad ndigiiyim ma je Dios ypocxtac, ca' yjecyity co nijëjty miich ajcxy mbaduunipy nej ajcxy y'idiich huidibi ajcxy ca' mibijcy Dios y'ayuc, e ca' mdigiiygixyipy ma Dios ypocxtac.

¹² Com yi' Dios y'ayuc ijtp yi' huinixii huinitempo, e ymiid mic'ajt. Nigi yajtigiiyñajxtäy ninicx, jot almi, ca'ydi tüg espada huidibi mejtz'adu'm'amy jiiipip etz yjijpxu'ñity. E Dios y'ayuc nejhuیداayb nej jäy ajcxy yjot yhuinma'ñ miidity, e tüg'óciy tijaty ajcxy ñijot'ajtcixyp. ¹³ Ca' ji ni ti huidibi Dios ti yajcojy nicxy ñayyüchyii ma yi' yhuinduu. Tüg'óciy nej ajt njot nhuinma'ñ nmidity ñiguëxictähuip yi' ma Dios, je Dios ma iich ajt nguendi ngiiyegaanim, yi' ijxtaayb ajt njot nhuinma'ñ.

Jesús yi' je' je' mijhuingapxpi ma Dios

¹⁴ Jesús, je Dios y'ung, yi' je' tügpaic jacmijtungmiid huidibi xycodinaayim ma Dios miid ajt nbocy ycixpi. E Jesús ti ytigiiy ma Dios yhuinduu, paady ycixp tzoc ijtim tudägy ma ajt nmibijcin. ¹⁵ Pues com Jesucristo, je huidibi tügpaic mijtungmiidip ma Dios, je huidibi xycodinaayim etz xyhuingapxim ma Dios, com Cristo tzaachypi etz ijxta'ni canaagnax ti yajnaxy, tim jadu'n nej iich ajt tzaachypi etz ijxta'ni nyajnajxim, per je' ca' ma ti bocy tuuñ. Paady ycixpi jëbi Cristo ajt xypa'ayoohuim co ajt nyajnajxim tzaachypi etz ijxta'ni. ¹⁶ Tzoc agujc jotcujc nmihuingoonim je Dios y'ane'mdac e n'ojadajtim

nmibijctzoohuim Dios, jaydēbi co anajty jotmay nmīd'ajtm, chi Dios may'ajt oy'ajt tunipy miid iich ajt ycixpi.

5

¹ Tüg tüg mijtungmiidpi huidibi huingapxp jäy ajcxy ma Dios, hue' je' yajhuin'ijxp ma yēdyjctijc, etz yajniġapxpejty, jaydēbi yhuingapx jäy ajcxy ma Dios etz yajnaxipy Dioscojuyip miid jäy ajcxy ma Dios, etz yegipy huindzig'i'ñ ma Dios miid jäy ajcxy ypocy ycixpi. ² Je mijtungmiidpi jäy ajcxy yajniġijc huidibi huingapxp jäy ajcxy ma Dios, jēbi yi' ajcxy pa'ayooy huenpinity huidibi pocy ymiid, com nañ jadu'n yi' ajcxy pocy jihuīy. ³ E miid yci'mbocy ycixpi copicy yegipy huindzig'i'ñ ma Dios etz miid jacjadyii jäy ajcxy ypocy ycixpi.

⁴ Ni pin huaad ci'm ycanaymöyii je jadu'mbi tung co yhuingapxity ma Dios. Dios yhuin'ijxpy pinjaty huingapxip ma yi' miid jäy ajcxy ycixpi, tim jadu'n nej Dios huin'ijxy Aaron jecy'ajty etz yajniġijcy yi' jadu'mbi tung. ⁵ Jadu'n yjajty miid je Cristo, ca' ci'm nayniġijctzoohuīy ma yi' jadu'mbi tung. Dios yajniġijci co huingapxip miid jäy ajcxy ycixpi, e ti ymöyii je mij'ajt jadu'n nej anajty ti nimäy:

Miich je' iich n'ung. Hich miich mjogy'ajt ti mmöy cham.

⁶ Nañ jadu'n ymina'ñ jadüg'it ma Dios ñecy:

Miich je' mhuingapxyp je jäy ajcxy ma Dios huinixii huinitempo, tim jadu'n nej Melquisedec ytuūñ.

⁷ Co Cristo chinay ya naaxhuiñ, chi ooy mijuydägy minucxtägy Dios, chi ooy mibijctzoy janch mic je Dios huidibi jēbi ycohua'ñyii ma je o'cin. Miid co ooy mibijcy ooy huindzigiiy Dios miid yung naxy yjot yhuinma'ñ, paady Dios ymidoohui. ⁸ Je Cristo oy je' anajty Dios ja'ung'adyii, yjajti nej ycapxymidoohuipy Dios, miid je' ycixpi nej anajty ti y'ayoy ya naaxhuiñ. ⁹ Co Cristo yajca'pxy yi' y'oy'ajtin miid je tzaachypī huidibi yminajxy yajnaxxy, chi ni'ixi' anajty y'ity jēbi cop'adyii alma nidoocin huinixii, jaydēbi tüg'óciy pinjaty capxymidoob Cristo, ypaadip ajcxy y'alma nidoocin. ¹⁰ Dios jadu'n yajniġijcy Jesús co yajniġixip je jac mijpi tung ma yi' co huingapxip jäy ajcxy ma Dios, tim jadu'n nej Melquisedec ytuñ jecy'ajty.

Je ayo'n co njijpyöyduutim yi mibijcin

¹¹ Ooy iich miich ajcxy mij nmīdmiydäga'ñ ma jadyaabi tiy'ajt, per ooy chachchip nimiydaacnity, com ca' miich ajcxy mic'amy mhuinijihuīhuipy Dios ytiy'ajt. ¹² Jadu'n nej jada xii tiempo ti yjejni ma miich ajcxy oga'n ti mmibicy. Hue' miich ixypiy ajcxy mniyaj'ixpiġicnīp Jesucristo ytiy'ajt je tzipjatypī. Per miich ajcxy mdzojcyñi co myajnajtzcaxihuīpy huinjemy je Dios y'ayuc huidibi ca' chipity. Ti miich ajcxy m'ahuimbijttaaygixy ca' mic majaa ma mmibijcin. Hue' jēyi miich ajcxy jadu'n nipaady nej pi'ctijc huidibi leche uucp, e ca' jadu'n paady nej mij'anactijc huidibi caagy caayb.

¹³ Pinjaty yajpatp ma jada ixpiġcin huidibi ca' chipity, jadu'n yi' nej ma'xungdijc com ca' jajtciy je ayuc tiy'ajt tiybi. ¹⁴ Je' tzipjatpyi tiy'ajt je je' winjihuiyigixp, je' huidibi ymibijkin mij may mid'ajtkixpin, jidu'n nej je' huidibi y'aa ytūtz jim ajkixyin je' tūtzpi jich kaagy je' ykaaygixpy, je' ko yjajtkixpy je' nej winjiwiiygixichin je' huidibi oy, etz je' huidibi ka'oyin.

6

¹ Paady tzoc niġi yajyujcpejtm n'ixpiġcin ma Dios ytiy'ajt, tzoc ajt yajyeecim nmibijcin, jigix jadu'n nipaadip jadu'n nej jäy tiibi yhuinma'ñ yca'pxtaayñi. Ca' n'agapxiyo'cim canaag'oc jabom jabom je tiy'ajt huidibi ti nbaatim co oga'n nmibijcim Cristo. Ca' janam jatzojc n'ixpiġco'cim huidibi oga'n ti n'ixpiġcin jadu'n nej co njothuimbijtm nej anajty ndunim jibicpi huidibi xyajniġxim ma yi' o'cin, e jadu'n nej nmibijcim Dios oga'n. ² Ca' jadüg'oc n'ixpiġco'cim je ixpiġcin miid je niġejtin ycixpi, etz jadu'n nej yajcniġajy je mibijcpiġijc jaydēbi paadip ajcxy je Dios yjihui'ñ ymic'ajt, etz jadu'n nej yi' öcpi ajcxy

yjugypigipy co anajty ti öccixy, etz jadu'n nej Dios tzaachytuna'ñ huinixi pocyjäydijc.
³ Chi njac'ixpijim Dios y'ayuc je tzipjaty, pen Dios jadu'n tzojcpy.

⁴ Com pinjaty ti huinjihuüy Dios y'ayuc ytiy'ajt, e jäygidägy huidibi Dios yejcpy, etz miidty Dios yjihui'ñ ma y'ay yjot, jadu'n je' nipaady nejjihuüy chinay ma jün ytücxin.
⁵ Etz ti ajcxy jäygidägy Dios y'ayuc ytiy'ajt, e ti jihuiygixy Dios yjihui'ñ ymic'ajt huidibi yajtzinaayip ajcxy y'alma ma je xii je tiempo huidibi miimb cidacp. ⁶ Yi jadu'mbi jäy, pen tundigooyb ajcxy jadüg'oc miid Dios ytiy'ajt, e ixmach ajcxy nej anajty ti mibijccixy Jesucristo, ca'p jëbi jadüg'oc jothuimbijtcixy ma Dios miid pocy ycixpi e pijctzoogixy pocyhuinmeecxin jadüg'oc. Co ixypy jadu'n ajcxy tuñ, chi huimbizimy nej ajcxy jadüg'oc yajcruudzpejtcixy je Dios y'ung miid ajcxy ypocy ycixpi, e nixiiccixy yajxiiccixy nej Jesucristo y'o'cy miid ajcxy ypocy ycixpi. ⁷ Jadu'n yi' ajcxy nej naax ni'uuctich naag'oc naag'oc ytu'y. E pen je naax yejcpy ooy cosecha ma pin ti ñipy ti ytuñ, Dios je' anajty yconuucxin ymiid. ⁸ Pen actim apy etz actim jibic ujtz ypidzimy ma je naax, ca' je' ti tzoohuity, e Dios je' yajtigoyamb etz nöctähuiip ma je mij jün. (Jada naax jadu'n jada' nipaady jadu'n nej jäy huidibi ti ixmach ymibjcin.)

Yi huidibi nmibijcim yi' xhujitz'ijtim tudägy

⁹ Migügtijc ajcxy huidibi ooy ndzocyich, oy ich ajcxy jadu'n njamiidmiydägyich miich ajcxy, janch nejhuiybich co ca' ajcxy ti m'ixmach yi mibjcin, etz nejhuiybich co oybi conuucxin mbaadaangixyp ma Dios etz m'alma ajcxy nidzoocin paadaangixy.
¹⁰ Com Dios ooy yi' ytudägyity, e ca' yi' jäydgoy huidibi miich ajcxy mdumyb miid yi' ycixpi, jadu'n nej oyjäy'ajtin ti mdungixy miid jacjadyii mibijcpidijc, e chambaad jadu'n mdungixy. ¹¹ Hue' ich ajcxy ndzocyich co miich ajcxy nidüg nidüg mnixondaaccix tungix oyjäy'ajtin ixti mabaad m'öccixy, jigix mbaadipy ajcxy tüg'óciy huidibi ajcxy mjijp'ijxyp ma Dios. ¹² Ca' ich ajcxy ndzojccixy co miich ajcxy m'ahuimbidity nuux. Padungix miich ajcxy jadu'n nej ajcxy ytungixy huidibi mibijcp Jesucristo etz huidibi yajtungixp mecxtujcin, jaydëbi mbaatcixy tiibi Dios xyaj'ahuaniygixy.

¹³ Co jecy'ajty Dios moy Abraham je' y'ayuc, ci'm je' nïgapxpejty y'ayuc, com ca'anajty ji jac mijpi pin nïgapxpedipy je' y'ayuc. ¹⁴ Chi Dios Abraham nimay: "Janch co ich miich ngonucxip, e nmöhuipy may m'ap'ung m'apmang." ¹⁵ E jadu'n Abraham y'ahuixy miid mecxtujcin, e jadu'n ycädigiiyi huidibi anajty Dios ti yaj'ahuaniyüi. ¹⁶ Co ajcxy jäy ycapxcixy co yjanchity, jim je' pin nïgapxpejtp je y'ayuc, je pin jacmijp, je' nïgapxpejtpy jada ayuc. E co nïgapxpety je' y'ayuc, chi je ayuc y'ity, e ca' huaad pinjaty ymina'ñ co ca' yjanchity. ¹⁷ Paady ycixpi Dios nïgapxpejty yci'm'ayuc, miid co anajty yajnejhuihua'ñ je jäy ajcxy co cuyduna'ñ y'ayuc tiibi ahuanüy. ¹⁸ Ji yajpaady mejtnax Dios y'ayuc huidibi ca' huaad capxtigach, e Dios ca' y'aniidägy nimina. E co Dios jadu'n tuñ, chi xyajjotcugiiyim mij, ich ajt huidibi n'ixtaayim e ndzojcin yi' ypubejtin. E ti nmijpidaacim yi' y'ayuc jadu'n nej jijp'ijxim co xymöhuaanim ajt n'alma jugy'ajtin huidibi ca' ycixipy ytigoyipy ni mina. ¹⁹ E miid co njijp'ijxim co Dios xymöhuaanim ajt n'alma jugy'ajtin huidibi ca' ycixipy ytigoyipy, paady ajt n'alma jotcujc ijtim ca' ma tzigi'ñ jihui'ñ. Jadu'n Dios y'ayuc nipaady miid ich ajt ycixpi nej tüg pujx huidibi je barco huon'ijtp mejyoty, ca'ydi nej yjaty je barco. Ich ajt njijp'ijxim co ndigihuaanim ma Dios y'it tzajpjoty, tim jadu'n nej je judío sacerdote mïjtungmiidpi ytigiy anajty jecy'ajty ma Dios y'it ma je Dios ytijc, je it huidibi anajty adiyducyip miid huit. ²⁰ Tigihuaanim ich ajt ma je Dios y'it tzajpjoty ma Jesús ytigiy miid ich ajt ycixpi, Jesús ti yaj'ahuach nej jëbi ndigiiyim ma Dios y'it. E jadu'n Jesús naydügpajc huingapxy etz codinäy mayjäy ma Dios yhuinduu huinixi huinitempo. Jesús ytung tim jadu'n nipaady nej Melquisedec ytuñ jecy'ajty.

7

Yi Jesús tim jadu'n ymijity nej Melquisedec

¹ Je Melquisedec hue' je' anajty rey'ajtp ma je cajp huidi yxii Salem, e je' anajty huingapxp ma je mijpi janchypi Dios tzajpjotyipi. Co anajty Abraham yhuimbity co anajty oy ti chiptuñ, ma anajty je reydijc oy ti yajqueec-huäcxtäy ti mimadactäy, chi Melquisedec choon oy jijpcoyöyiy Abraham, e chi ooy Dios mijuydacy minucxtacy miid Abraham ycixpi. ² Huidibi anajty Abraham ti paady ma anajty oy ti chiptuñ, chi je' pijc-huäcxy majcpicy, chi pugooñ tüg-picy mooy je Melquisedec. Melquisedec yxii hue' yhuimbizimy “rey tudägypi”. E com co anajty yrey'aty jim Salem, hue' Salem yhuimbizimy “jotcujc'ajtin”, paady jëbi nminaanim jadu'n, “je rey huidibi jotcujc'ajtin yejcp”. ³ Je Melquisedec ca'p anajty yajnejhuüy ytaj yteedy, ni y'ap yteedy. Ni ycajajnimiydägy nej ypi'c'ajty etz nej y'ögy. Tim jadu'n je' anajty yajpaady nej je Dios y'ung, tüg huidibi huingapxp jäy ajcxy ma Dios huinixii huinitiempo.

⁴ Occuenditüngixy miich ajcxy nej je Melquisedec anajty ooy ymijity. Je Abraham, iich ajt nmij'ap nmijteedy ci'm mooy Melquisedec je tüg picypyi huidibi anajty ti pijci je rey ajcxy ma oy chiptuñ. ⁵ Nej Moisés ycötujcin y'ane'my je' anajty ajcxy yhuingapxy ma Dios ytijc je pinjaty Leví y'ung'ajtpy y'anäc'ajtpy, y'ap'ung'ajtpy y'apmang'ajtpy. Je' ajcxy cötujc miid co jäy ajcxy yajcuend'adipy tügpicy je majc-picypyi huidibi xii diezmo. Oy je' anajty ajcxy ja'ajugy'adyii ja'amigüg'adyii, com hue' anajty ajcxy Abraham y'ap y'oc nidüg'öciy. ⁶ Per Melquisedec oy je' anajty ca' Leví ap'adyii teedy'adyii, yajcujt je Abraham tügpicy je majc-picypyi. Je' je' anajty huidibi cidigiyyi tiibi anajty Dios yaj'ahuaniiy. Jadu'n Melquisedec yajpuhuaniiy Dios je Abraham. ⁷ Ni pin ycamina'nip co ca' yjanchity co je pin conuucxin yejcp, jac mij je', ca'ydi je pin yajconuucxp. ⁸ Ya ma iich ajt, pin cidigiyyip tügpicy je majcpicypyi (diezmo), hue' je' ajcxy jäy huidibi öcp. Per jadu'n nej anajty Melquisedec, jadu'n ymina'nñ ma yjaybetyity co je' yjactzinaayñi. ⁹ E jëbi yajmina'nñ co je Leví etz jadu'nnyibaad je y'ap y'oc huidibi ajcxy huingapxp ma Dios, e yajcujtcixy Israel jäy huidibi Dios patip, nañ jadu'n nipaady nej jihuiy ymigüety je' ajcxy je Melquisedec huin'it co Abraham ymigüejti. ¹⁰ Jadu'n nipaady nej jihuiy Abraham ñigix'ajtyñi y'ap'ajtin yteedy'ajtin Leví etz jacjadyii je huidibi anajty ajcxy ca'ni ypi'c'atyñi yma'xung'atyñi co oy Melquisedec yjijpcobadyyii.

¹¹ Je Israel cajp yajcidigiyyi je' je Dios y'ane'min ycötujcin je Levita ajcxy huidibi anajty huingapxp je mayjäy ma Dios, je' je' anajty ajcxy Aarón y'ap y'oc. Chi jada' co jada ajcxy janch ca'ocyaj'ahuimbijttäy tudägy pinjaty anajty je Dios ycötujcin payöyb, ca'p tim je' anajty ycopicyity co ycajacquëxigy jadüg huidibi codinähuij je mayjäy ma Dios, ca' y'ocje'jiñ ma ymiiñ Aarón y'ap y'oc. Je jadügpi huidibi codinähuij je mayjäy ma Dios, hue' copicy co tú'ciy naybadiiyb miid Melquisedec. ¹² Co ytigadzipy pinjaty huingapxp ma Dios, nañ jadu'n ytigadzip je tiy'ajt je cötujcin. ¹³ Iich ajt nHuindzin Jesucristo, je huidibi ñimiydacy ma Dios ñecy co huingapxa'nñ je mayjäy ma Dios, huingbi ap huingbi Teedy je' anajty, ca' y'ocLevíjin. E ni tüg yi' y'amigüg ca' yhuingapxy ma Dios. ¹⁴ Huädz yajnejhuüy co iich ajt je nHuindzin Jesús hue' je' anajty ymij'ap'ajty ymijteedy'ajty je Judá. Moisés ca' yi' capxpaty Judá y'ap y'oc co nimiydacy pinjaty anajty huingapxp je mayjäy ma Dios ytijc.

¹⁵ Jacniguëxïcp jada ooy co jadüg ytigiyyi huidibi tumb ma Dios, huidibi tú'ciy naybaatip miid Melquisedec. ¹⁶ Ca'p Jesucristo yajtungbijci co huingapxp je mayjäy ma Dios miid je cötujcin huidibi minaamb co yi' y'amigügtijc patip yi' jadu'mbi tung, je huidibi ajcxy yjugy'ajtin cixip tigoyip. Hue' je Jesucristo chinaayin yjugy'ajtin ca' ycixipy ytigoyipy ni mina, paady ycixp Jesucristo yajtungbijci huingapxp je mayjäy ma Dios. ¹⁷ Com miid je' ycixpi jadu'n Dios tiy'ajt yejcy co jadu'n ymina'nñ:

Miich je' cham mhuingapxyp je mayjäy ma iich. Tüg nax miich mhuingapxin nej Melquisedec anajty yhuingapxy.

¹⁸ E jadu'n je oga'nbi je ane'min cötujcin huidibi Moisés yejcp, ca' y'octuni cham, ca' jac ti mic'ajt miidity co jaydëbi yajtzögipy jäy ajcxy y'alma. ¹⁹ Je Dios ycötujcin huidibi Moisés

jayhui'm jecy'ajty, ca'p je' ni ti yaj'oybidzimy yajhuätzpidzimy. Miid je huingapxpi ycixpi huídibi nmíid'ajtm cham jac'oy yi' huídibi njj'p'ijxim ma Dios.

²⁰ Co Dios Jesucristo yajtungbicy, chi nígapxpejty yci'm ayuc co yjanchity. ²¹ Jacjadyii ajcxy huídibi anajty tungixp ma Dios ytijc, hue' je' ajcxy tungmooyi, e ca' Dios nígapxpejty yi' ajcxy y'ayuc. Per co Jesucristo ytungbijcy, chi Dios nígapxpejty yci'm'ayuc. Com jaybety jadu'n ma Dios ñecy ma jadu'n ymína'ñ:

Je Huindzin Dios ti nígapxpejty yci'm'ayuc, e ni mína ycajotmetzcíhuipy.

Jadu'n Dios nimay y'ung:

Miich mhuingapxamyb etz mgodináhuamyb je mayjáy ma iich huinixii huinitiempo.

Jadu'n miich mdunípy nej Melquisedec ytuuñ.

²² Com Dios nígapxpejty yci'm'ayuc co yjanchity co Jesucristo ytungbijcy, paady yi Jesús yi' je' majamoy mic'ajtmoy je jemybi ayuc huídibi yajhui'm miid jáy ajcxy ycixpi, je jac'oybi cötujcín. ²³ Jacjadyii huídibi anajty yhuingapxcixy ma Dios ytijc, nimay anajty ajcxy ooy. Com co tüg y'o'cy, chi huingbi ytigíy ma je' ytung. ²⁴ Jesús com ca' yi' yjugy'ajtm ycixipy ytigoyípy ni mína, paady ca' ytung ixmach, etz ca' y'ytungmöy ni pin. ²⁵ Miid je' ycixpi Jesucristo mic'ajt miidíty jaydēbi yajnídzoocipy jáy ajcxy y'alma huinixii huinitiempo, pinjaty mibijctzooyb Dios ma Jesucristo yxii. Jesucristo jēbi tunípy jadu'n, com yi' yjugy'ajtm ca' ycixipy ytigoyípy ni mína. E yi' Dios mibijctzodiib miid jáy ajcxy ycixpi jabom jabom huinixii huinitiempo.

²⁶ Je Jesús je' je' tūgpajc je mījtungmiidpi ma Dios, huídibi iich ajt nyajmayajtm, je huídibi miid huádz yjot huádz yhuinma'ñ, e ca' je' miidíty ni ti jibicpi ni ti pocy. Je' ca' tūgnax y'ity miid pocytumbidíj. Nígi je' ymijity ycixity, ca'ydi jac ti huídibi yajpat tzajpjoty. ²⁷ Ca' Jesús yjadu'nity nej ajcxy jacjadyii huídibi tuun ma Dios ytijc jecy'ajty, co yaj'öccixy iyujc, e je' ajcxy yejcpy huindzigi'ñ jabom jabom, midüg co je' ajcxy ñayyajpocyñ'huächyí, e chi jada' miid jáy ajcxy ypocy ycixpi. Jesús tūgtecypajc je' yej huindzigi'ñ miid mayjáy ycixpi, co je' ci'm ñayyejci ma yi' o'cín jadu'n nej tūg huindzigi'ñ. ²⁸ Je Dios ycötujcín huídibi Moisés yjayhui'm jecy'ajty, hue' y'ane'my co huen tungmöy jáy ajcxy huídibi pocy miid, co mījtungmoy ma Dios ytijc. Chi jac'axam Dios yajhui'my jemybi ayuc jemybi cötujcín, e nígapxpejty yci'm'ayuc co yjanchity. E miid je jemybi ayuc Dios tungmoy yci'm'ung, huen yajnicxip je mijpi tung ma yi' y'it, je Dios y'ung huídibi ijtp huinixii ca' ti bocy miidíty.

8

Jesús yi' je' je' mijhuingapxpi ma yi' Dios y'ayuc jemybi

¹ Huídibi ooy nígi ycopicyity, huídibi yajnimiydaacp, co iich ajt nmíid'ajtm pin xycodínaayim ma Dios, je' je' je' Cristo, je huídibi jiiby ijtp mij'ane'mbi tzajpjoty, jadu'n nipaady nej jihuíy yi' y'ñäy a'oy'amy ma Dios ymijc. ² Jiiby je' ytuñ ma je janchypí Dios y'it ylugar, je amaaybi, huídibi oyhuindzigi'ñ ijtp. Je it huídibi Dios yajcoj, e ca' nmínaanim jáy ajcxy yajcoj. ³ Tüg'óciy pinjaty huingapxp ma Dios, yajnibicy je' paady, e copicyity co cīyegipy ofrenda etz tijaty huindzigi'ñ ma Dios miid jáy ajcxy ypocy ycixpi. Paady ooy ycopicyity nañ jadu'n co Jesucristo yegipy ofrenda etz huindzigi'ñ ma Dios miid jáy ajcxy ypocy ycixpi. ⁴ Co Jesucristo ixypy ya y'ocyajpaady naaxhuiñ, ni ycahuingapxy ixypy mayjáy ma Dios. Com jiini ya yajpaady pin huingapxip ma Dios ytijc, pin yejcp ofrenda etz huindzigi'ñ jadu'n nej Moisés ycötujcín y'ane'my. ⁵ Jadayaabi huingapxpi ajcxy ytungixy ma Dios ytijc ya naaxhuiñ. Je' je' tūg ijxpejt nej Dios y'it jiiby tzajpjoty, jadu'n yi' nipaady nej tūg anecpi huídibi tzomyb jiiby tzajpjoty. Co Moisés jecy'ajty Dios ytijc je' coji miid huit, chi Dios ñímaayi: “Cuenditun yajxon co anajty mgojy je tijc tūgnax jadu'n nej je ijxpejt huídibi nyaj'ijx jim copcíxy.” ⁶ Per je mījtung huídibi Jesús ytumy ma Dios miid jáy ajcxy ycixpi, jac'oydung yi' ca'ydi je tung huídibi je jáy ajcxy ytumy huídibi mījtung miid ma Dios ytijc ya naaxhuiñ. Com jemybi etz jac'oy etz jacmic'ajt miid je cötujcín huídibi Dios ymoy Jesús, ca'ydi je cötujcín huídibi Dios

ymoy Moisés jecy'ajt. Com hue' je' jac'oy alma nĩdzoocĩn Dios yaj'ahuanĩy jã yajcxy ma je jemybi cõtujcĩn.

⁷ Co je jayjip'atypi cõtujcĩn huidibi Moisés ymooyi cayaj'oyiydaayi jã yajcxy yocoy miid Dios, ca' yi' ixypy ycopicyity je mimetzpi cõtujcĩn huidibi Dios ymoy jã yuinjemy.

⁸ Per Dios y'ijx co je jã yajcxy ca' yajxon cuydungixy je cõtujcĩn huidibi Moisés ymoy, jadu'n nej ymina'n ma yjaybetyity ma Dios ñecy miid je' ajcxy ycixpi, ma jadu'n ymina'n: Jadu'n je Huindzin Dios ymina'n: "Mimb xii tiempo ma huingbi cõtujcĩn nmõhuibich yi Israel jã etz Judã jã yajcxy.

⁹ Ca' y'ocjadu'niñ nej ñch ngõtujcĩn huidibi nmooyich je' ajcxy y'ap yteedy jecy'ajty, je huin'it tiempo taabi nyajtzooñich ajcxy jim Egipto naaxjot. Ca'p je' ajcxy cuyduñ je cõtujcĩn huidibi ajcxy nmooyich, e paady ca' nduunich cuendi yi' ajcxy." Jadu'n ymina'n je Huindzin Dios.

¹⁰ Jadu'n je Huindzin Dios ymina'n:

Je cõtujcĩn huidibi nyegaamybich ma Israel jã yajcxy co anajty yjadu'mbi xii tiempo ti ñaxy, jadu'n je'. Nbidãgibich ngõtujcĩn ma yi' ajcxy yhuinma'n, e jadu'n nipaady nej jihuỹ ti njayich n'ayuc ma ajcxy y'ay yjot. E ñch yi' ajcxy xyDios'adiib, e yi' ajcxy njã'adiybich.

¹¹ Tüg'óciy ajcxy nejhuĩhuĩpy pin ñch. Ni pin ji cayaj'ixpiĩpy pin je' je Huindzin Dios, ni pin, ni ymigüg, ni ymijĩn ymidijc, ni pi'ctijc ni mij'anãctijc. Com nidüg'óciy ajcxy nejhuĩhuĩpy pin ñch; ypi'city ymutzity, ymijjãyity, etz ymij'anãcity.

¹² E ñch yi' ajcxy nmeecxip yjibicjã'y'ajtin, ni camina ngajac'ajihuĩhuĩybich ajcxy yocoy. Jadu'n Dios ymina'n.

¹³ Co Dios je' ycõtujcĩn jemybi nimiydãgy, je' je' co yaj'amijĩyñi je jayjip'atypi cõtujcĩn. Je huidibi amijĩyñip ca' je' y'octuunip, tzojc yi' yaj'ijxtigoyaani.

9

Je Dios ytijc huidi ya naaxhuiñ etz Dios y'it huidi tzajpjoty

¹ Je Dios ycõtujcĩn jayjip'atypi ymiid je' anajty ñidiy'ajt nej huaad ytuñ ma Dios ytijc ya naaxhuiñ, ma jã yajcxy huindzigi'huĩpy Dios. ² Je Dios ytijc jadu'n je' ycojity. Je jayjipi cuarto hue' anajty xijity Lugar Santo, jiiby anajty y'ity je candelero etz je mesa ma tzajcaagy y'ity ma Dios yhuinduu. ³ Jixci'py'amy ma je mimetzpi huit y'agiyducyity jiiby jadüg'it huidibi xijip Lugar Santísimo (ma Dios ni'ixcidãgy je jã). ⁴ Jiiby anajty tüg mij mesa ac tim ori je' anajty ma ajcxy ypoomjojccixy, e ma je' jim anajty y'ity tüg cajoon ac ori je' anajty yñinix huidityi. Jiiby cajoonjoty anajty y'ity tüg tu'tz ac ori huidibi anajty miid je jicxy ijxpejt huidibi Dios Israel jã yajcxy ymooy jecy'ajty. Etz jiiby anajty Aarón ytajc huidibi huip huam. Etz jiiby anajty je tzaa y'ity ma je' anajty ycijxjayity Dios y'ane'min. ⁵ Ma je cajoonnĩcx jim anajty je querubines ñigojtüdyity huidibi Dios y'oy'ajtin miid. Je querubines anajty codinaayb Dios, e je' anajty ajcxy yajnidigooyb miid yqueec je cajonnĩcx ma ajcxy je huindzigi'n ñi'py ypidacy miid jã yajcxy yocoy ycixpi. Ca' huaad yjacyajnimiydacy mijcajee jadachambi tijaty huidibi anajty yajpatp jiiby ma Dios ytijc.

⁶ Jabom jabom co anajty jadu'n y'ijttãyi ni'ixi', chi je huingapxpi ytigiygixy ma Dios ytijc ma je jayjipi cuarto, je Lugar Santo, tuñ ajcxy huindzigi'n etz cuydungixy yi' ajcxy ytiy'ajt miid Dios ycixpi. ⁷ Jimijt jimijt ma je mimetzpi cuarto huidibi je huit adiydujcp, jiiby ytigiy tügtecpajc je huingapxpi huidibi jacmijtungmiid ma Dios ytijc. E co jiiby ytigiy, chi midigiy huaj ñi'py, huidibi miid huindzigi'y Dios miid yci'mbocy ycixpi etz miid tüg'óciy jã yajcxy yocoy ycixpi etz miid ajcxy yocoy ycixpi co ca' nejhuĩyigixy co ytundigooygixy. ⁸ Miid jada ycixpi je Espiritu Santo xyajnejhuĩyim co je tungmiidpi huidibi huingapxi je mayjã ma Dios, ma ajcxy jacyajtungixy anajty je jayjip cuarto ma Dios ytijc, chi ca'ni je' anajty y'ahuãchñi nej jẽbi pinjaty ytigiy ma je it lugar Santísimo ma Dios yhuinduu. ⁹ Je Dios ytijc huidibi ijtp anajty ya naaxhuiñ ca' je' yjẽjity je

janchypi. Hue' je' anajty ijxpejt'ajtp huidi Dios y'it'ajtpy tzajpjoty. Jiiby je tungmiidpi huindzigiy Dios miid ofrendas etz miid huindzigi'n. Per jada huindzigi'n ca' yajtigoy je pocytunii ma je jäy ajcxy yjot yhuinma'n. ¹⁰ Je judío jäy ytiy'ajt huidibi tuun ma Dios ytijc jecy'ajty, hue' je' ñigapxy caayin uucin, etz jadu'n nej ajcxy ñayyajpocyñihuáatzigixy miid ni etz canaag costumbre huidibi ajcxy cuydumyb. Jadu'n ajcxy ytuñ ixti cooni Dios yajtigajztay tüg'óciy yi' ycötujcin.

¹¹ Per ti y'oy ya naaxhuiñ je Cristo, e yi' je' cham ijtp jacmijtungmiidpi ma Dios, yi' ti mimiñ jemybi cötujcin jac'oybi. E yi' je' codinaayb je mayjäy ma Dios y'it tzajpjoty, je it jac'oybi jacmijpi, jacca'pxypi, ca' nmínaaním jäy ti cojy, e ca' yaajty naaxhuiñ. ¹² Cristo ti ytigiy ma je Dios y'it, je lugar Santísimo. Ca' ti ytigiy miid co jiiby yajquëxiga'n pi'cchivo ñi'py o toro ñi'py, hue' yci'mni'py jiiby yejcpy ma Dios. Jadu'n ti ytigiy tügtecy tigiy huinixii huinitiempo, etz xyyajnidzoocím ajt n'alma huinixii. ¹³ Ooy yjanchity co yi' toro ñi'py etz je chivo ñi'py etz yi' cuyjam co ajcxy nöccixy huaj niix ma je Dios ojadajttac, co ajcxy je pocyjäy yajnihuáxcixy je ni'py etz yajnixidujtcixy je cuyjam ymiid mic'ajt co yajpocyhuáatzigixy ñinícx, per jotjoty ca' yajhuäch. ¹⁴ (Je huingapxpi huidibi tumb ma Dios ytijc ya naaxhuiñ ca' ymadägy co jäy yajpocyhuádzipy miid toro ñi'py), Jesucristo niigi ti ymadägy yajpocyhuäch jäy ajcxy miid yci'mni'py. Com Jesucristo ymiid je Dios yjihui'n ymic'ajt huidibi ca' ycixipy ytigoyipy ni mina, chi ñaygyejci ci'm ma Dios miid Dios yjihui'n ymic'ajt, jadu'n nej tüg huindzigi'n huätzpi, com ca' ni ma ni ti tundigoy. E miid yci'mni'py Jesucristo xyajhuaatzim je jibicpi ma ajt njot nhuinma'n, ca' ydi ndunim huidibi Dios ca' jäygidägy, e jadu'n ajt huaad ndunim ma je Dios juugypi ytung.

¹⁵ Paady yi' Jesucristo yi' je' huingapx'ajtp ma Dios miid ich ajt ycixpi miid je jemybi ycötujcin huidibi Dios yajhui'm. Yi' Jesucristo co y'o'cy, yi' ajt je' nbocy xymeecxim tübi ndundigooyim ma je jayjip'atyp cötujcin huidibi Moisés jayhui'm. E jigix pinjaty Dios ti yhuin'ixyii, jébi ajcxy ycidiigyii je tzinaydac ma jébi n'ijtim huinixii. Je tzinaydac huidibi Dios ti xy'ahuaniiyim. ¹⁶ Co tüg jäy jip'ixy y'o'cin, e yajcojy tüg testamento, ooy ycopicyity co yajnejhuñhuipy pen janch je' ti y'ögy je pin yajcoj je tiy'ajt jigix je' ytigihuipy tumbi je tiy'ajt. ¹⁷ Co tüg jäy jip'ixy y'o'cin e yajcojy tüg testamento, ca' je' ti mic'ajt miidity je testamento pen jugy'ajtni pin je' anajty ti yajcojy. Huin'itni janchtiy co anajty ti y'ögy, huin'it je testamento mic'ajt miidity. Je jemybi tiy'ajt huidibi Dios xyajhui'my jadu'n yi' nipaady nej jäy testamento yajcojy co anajty jip'ixy je y'o'cin, e co Jesús y'o'cy, huin'it mic'ajt moy je Dios ytiy'ajt je jemybi. ¹⁸ Paady ycixpi jecy'ajty co Dios Moisés moy cötujcin, yajtzoobaat je' miid iyujc ñi'py. ¹⁹ Moisés je' capxhuäcx je Dios ytiy'ajt ma tüg'óciy mayjäy. Chi jada' huijtzigy tüg lana tzaptzpi miid tüg quipy aacx huidibi ooy oy yxuugy. Je' yajxooc ma huaj mang ñi'py etz chivo ñi'py teemhuidity miid ni, chi Moisés yajnihui'ch je libro miid je ni'py, je libro huidibi anajty ti capxy etz nañ jadu'n jäy ajcxy yajnihui'ch je ni'py. ²⁰ Co Moisés jadu'n ytuñ, chi yminañ: “Jada je' je ni'py huidibi yajtzoobatp je ane'min je tiy'ajt huidibi Dios ti yecy ma miich ajcxy.” ²¹ Moisés nañ jadu'n ñi'pyñihui'ch je cochac tijc ma anajty yDios ojadajtcixy, e tüg'óciy tumbejt huidijaty jiiby tumb. ²² Dios ycötujcin, je jecyip, ymina'n co tüg'óciy huidijaty yajtungixyp co Dios ojadajtcixy, copicy yajhuádzipy miid ni'py. E pen ca' ajcxy teemy yocy ni'py, Dios ca' huinmecxa'n yi' ajcxy ypocy.

Co Cristo y'o'cy miid ajt nbocy ycixpi, yi' yajnicxy ajt nbocy

²³ Ooy jada anajty ycopicyity iyujc ñi'py huindzigi'n, jigix yhuádzip huidijaty tumb ma Dios ytijc ya naaxhuiñ, je huidibi ijxpejt'ajtp anajty nej Dios y'it jiiby tzajpjoty. Per je Dios y'it huidibi jiiby tzajpjoty chojcpy jac'oybi huindzigi'n ca' ydi huidi ya naaxhuiñ. ²⁴ Com Cristo ca' je' ytigiy ma Dios ytijc huidibi jäy ajcxy ti cojy. Je tijc huidibi jäy ajcxy ti cojy, je' je' ñigojtuutin je it lugar janch janchypi huidi jiiby tzajpjoty. Cristo tigiy ma je Dios y'it ylugar jiiby tzajpjoty, ma je' cham xycodinaayim ma Dios yhuinduu. ²⁵ Je judío mijtungmiidpi huidibi huingapx ma Dios ytijc, huinjimijty ytigiy ma je Dios ytijc co yecy ni'py huidibi ca' ci'mni'py'adyii. Cristo ca' yi' ñay'ahuaniiyii

y'ögipy canaag'oc, jëyi tügtecypajc ytiğiyy ma Dios y'it miid yci'mni'py. ²⁶ Co ixypy ca' yjadu'nity, canaag'oc Cristo ixypy patni chaachy'öcin maabi naaxhuiñybi chondagy. Per jadachambi ma xii tiempo ycixaani ytigoyaani, Cristo tügtecypajc ñayguëxiçi ya naaxhuiñ, jigix codinähuiipy tüg'öciy jäy ma Dios miid ajcxy ypocy ycixpi. Jadu'n Cristo tuuñ jigix yajtigoyipy pocytunii. ²⁷ Dios ane'min pidac ya naaxhuiñ co nidüg nidüg jäy paadip yi o'cin tügtecypajc. E Dios ti pidägy je xii je tiempo mina tiyduna'n nidüg nidüg jäy miid ypocy ycixpi. ²⁸ Je Cristo jotcujc tügtecypajc nayyejci ma je o'cin co yajpocyñihuaatztäy je mayjäy. Chi jada' ñayguëxiğa'nyii je mimejtz'ocpi ya naaxhuiñ, e ca' nmīnaanīm co yajpocyñihuaatzaanip jadüg'oc je mayjäy, hue' je' nihua'namyb ycohua'namyb tüg'öciy pinjaty jijp'ijxip cixyot huinijot co je' miina'n miid yi' ajcxy ycixpi.

10

¹ Je Dios ycötujcin huidibi Moisés jayhui'my jecy'ajty, hue' je' anajty ñidiy'ajt je oybi huidibi miinamb. Ca'p je' anajty yjëjity je oybi. Paady je cötujcin huidibi Moisés yjayhui'm ca' je' jëbi huädz yaj'ahuimbity pinjaty pocy ytumb, pinjaty mijhuäcp anajty ma Dios miid je iyujc huidibi ajcxy Dios yajhuindzigiyyb, huidibi ytun'ahuimbijtcixyp jimijt jimijt. ² Co ixypy je cötujcin y'ocmadägy huidibi Moisés yjayhui'm yaj'ahuimbity ixypy huädz ajcxy je pocy ytumbi, ca' ixypy je jadu'mbi huindzigi'n y'ocyajtuuni jimijt jimijt. Com pin je jadu'mbi huindzigi'n yejcp, co ixypy je' ypocy yajnicxtäy, ca'p je' ma ñayjihuiñybi ti bocy miidity jadüg'oc. ³ Co jadu'n yaj'öccixy je iyujc miid ypocy ycixpi, je' je' je' tiy'ajt co ajihuiygotigixy ypocy jimijt jimijt. ⁴ Com yi huaj mang ñi'py etz yi chivo ñi'py ca' mic'ajt miidity co pocyajnicxtähuiipy nimina.

⁵ Paady co Cristo ymiiñ ya naaxhuiñ, chi nimay je Dios:

Ca' miich ni ti huindzigi'n mdzojcnī ma ymiiñ iyujc'ögy, ti miich xyñi'ixiiyich tüg ninicx.

⁶ Ca' m'ocjäygidaacni huindzigi'n iyujc huidibi yajno'cp. Ca' miich m'ocjäygidaacni co jäy xyajhuindzigiyy iyujc miid ypocy ycixpi.

⁷ Chi nmīna'nich: “Dios, cha nmiiñich jigix miich mdzojcin yajcuydunipy, jadu'n nej yjaybetyty ma miich mnecy miid ich ycixpi.”

⁸ Tim jayijp, Cristo ymīna'n co Dios ca' octzojcnī, ni cajäygidägy je iyujc ögy huidibi yajhuindzigiyyip, ni je huidibi yajno'cp, jigix je pocyñicxtähuiipy, oy yi' yjajëjity huidibi ñigapxy yajtunipy ma je Dios ycötujcin huidibi Moisés yjayhui'm. ⁹ Chi jada' jadüg'it yjaybetyty co Cristo jadu'n ymīna'n: “Cha ich nmiiñ, jigix miich mdzojcin yajcuydunipy, miich huidibi Dios'ajtp.” Hue' mīnaanīm, yajtigoy je cötujcin huidibi ane'mb co jäy ajcxy huindzigiyy iyujc miid ypocy ycixpi, etz mic'ajt mo' je jemybi cötujcin huidibi Jesucristo xymooyim. ¹⁰ Dios jadu'n ti xyajhuaatzim ajt nbocy, com Jesucristo ti tuuni Dios chojcin co ci'm ñinīcix tügtecypajc yejcy ma yi o'cin miid tüg'öciy jäy ypocy ycixpi.

¹¹ Tüg'öciy judío sacerdote huidibi tungmiid ma Dios ytijc jabom jabom jadu'n tun'ahuimbijtcixy tügpi huindzigi'n, huidibi ni camina yajnicxtaayi jäy ajcxy ypocy.

¹² Yi Jesucristo tügtecypajc yi' yejcy ñinīcix ma yi o'cin huinixii huinītiempo, chi jada' y'ixtacy a'oy'amy ma Dios ymijc ma ane'mdäy tüg'öciy. ¹³ Jiiby tzajpjoty Jesucristo cham y'ahuixy, ixti cooni Dios yi' ymidzip mimadactaayip, e jadu'n ajcxy nipaadipy nej jihuiy Jesucristo ytecypocxpejt. ¹⁴ Miid tügpajc je huindzigi'n huidibi Jesucristo yejcy, tudägy yaj'ahuimbijttäy huinixii huinītiempo pinjaty ti ypocyhuäch. ¹⁵ Yi Espiritu Santo nidiy'ajtp ma ich ajt jadu'n nej Cristo ti tuñ. Com jaybety miiñ ma Dios ñecy ma Dios jadu'n ymīna'n:

¹⁶ Je huin'it xii je huin'it tiempo nyajmihui'maamybich je Israel jäy jemybi ayuc jemybi tiy'ajt. Nbidägiybich ngötujcin ma ajcxy yjot, e njayamybich ngötujcin ma ajcxy yhuinma'n.

¹⁷ Chi jac'axam Dios ymīna'n:

Ni camina njäymedzaanich ajcxy ypocy, etz jadu'n nej ajcxy ytundigooy.

¹⁸ Co je pocy ti yajhuinmecxtäy, ca'p ycopicyity yjacyajtunipy tijaty huindzigi'ñ miid pocyhuinmeecxin ycixpi.

Chojcypy nmihuingoonim yi Dios

¹⁹ Paady miich ajcxy migügtijc, jëbi iich ajt ndigiiyim agujc jotcuyc ma Dios yajpaady miid co Jesucristo ti temy ti yocy ñi'py miid iich ajt nbocy ycixpi. ²⁰ Cristo ti yaj'ahuäch je ñi'aa je tü'aa miid iich ajt ycixpi miid yci'm ninicx, je ñi'aa tü'aa jemybi oybi huidibi tigiiyb ma Dios y'it. E je' yñinicx jadu'n nipaady nej je huit huidibi anajty adujcp je Lugar Santísimo ma Dios ytijc ya naaxhuiñ, je huit huidibi cächhuäch co Cristo y'o'cy. ²¹ Jesucristo yi' je' je migtungmiidpi huidibi xycodinaayim ma Dios ytijc jiiby tzajpjoty. ²² Paady ycixpi jëbi nmihuingoonim Dios miid oyjot oyhuinma'ñ, etz miid je mibijcin janchypi. Cristo ajt ti xyajhuaatzim njot nhuinma'ñ co ñi'py temy vojcy miid ajt nbocy ycixpi jigix ca'ydi nayjihuiiyim pocymiid, jadu'n nej jihuiy ti ndziihuim miid huadz ñi. ²³ Tzoc tudägy n'ijtim ma nmibijcin, ca' nyajtigajtzim nmibijcin, com Dios cuydunipy yi' tiibi xyaj'ahuaniiyim. ²⁴ Tzoc nhuinma'ñypidaacim co njot'amijmooyim ajt nmigügtijc, jaydëbi naychojcim nayjihuiiyim miñ xyipy, e nduunim ojjäy'ajtin. ²⁵ Ca' n'ixmajtzim je navyöymugii, jadu'n nej ajcxy nijëjity costumbre miidity co ca' ajcxy yöy ma naymujctac. Niigi tzoc nayjot'amijmooyim, e jadu'n nej cham yaj'ijxni co yhuingooni ma je Huindzin Jesucristo ymiinaani jadüg'oc ya naaxhuiñ, chona'ñ tzajpjoty.

²⁶ Pen iich ajt jacpocytunim tzojcingixy ma anajty ti nejhuiiyim Dios ytiy'ajt, ca'p ji huingbi huindzigi'ñ huidibi xyajpocyhuaatzim. ²⁷ Je' janchtiy njacjijp'ijxim miid tzigi'ñ jihui'ñ je tzaachypi co anajty Dios xytiydunim, e xypidaacim mijjiinjoty huidibi yajhuindigoydähuamb Dios ymidzip. ²⁸ Co pin cacuyduun Dios ycötujcin huidibi Moisés yjayhui'm, e jim metz o tugig testigo co yjadu'nity, yajmoy je' y'o'cin ca' miid'ajty ti pa'ayoohuin. ²⁹ ¿Nej miich ajcxy minaangixy? ¿Nej cay jac'öctiy je tzaachypi mihuaad'ajtcixy? Je pinjaty ca' ixa'ñ Dios y'ung etz nixiici yajxiici Cristo ñi'py huidibi yajpocynihuaatzp, jadu'n nej je jemybi ayuc ymina'ñ huidibi Dios yajhui'm. Etz nañ jadu'n ajcxy ni'ojiygixy Dios yEspíritu huidibi may'ajt oy'ajt tumb miid je' ajcxy. ³⁰ Nejhuiiyim co je Huindzin Dios ymina'ñ: “Iich xypatp ndzaachytunipyich jäy ajcxy miid ypocy ycixpi. Iich yi' nyajcomidohuipy ajcxy ypocy.” Etz nañ jadu'n yjaybetyity ma Dios ñecy: “Yi Huindzin Dios yi' yjäy tiydunipy.” ³¹ ¡Ooy chach mij y'ayo'nity pen je Dios juugypi xychaachytunim miid ajt nbocy ycixpi!

³² Per ajihuiiyigixy miich ajcxy je xii je tiempo tiibi ñaxy, je taabi miich anajty ajcxy ti xycidigiiygixy je tiy'ajt janchypi, ñipaty je' anajty nej tüg tiicxin jajin ajcxy miidity. Ti ooy mhuindinaaygixy mijiptinaaygixy tzaachypi ayo'n miid yi' nmibijcin ycixpi. ³³ Nijëjity miich ajcxy ti myajhuingapxnajxcixy, e ti myaj'ojcixy mayjäyduum. Nañ jadu'n jacjadyi ti abaatcixy tzaachypi jadu'n nej je tiibi ajcxy ooy yajtzaachytungixy. ³⁴ Ti miich ajcxy myajtungixy pa'ayo'n ma pinjaty anajty pujxtigotyip, e janch agujc jotcuyc ajcxy ti myajtungixy mecxtujcin co ajcxy xypijci tijaty anajty ajcxy miid. Nejhuiiyim co jiiby tzajpjoty miich ajcxy miidity ti jaty jac'oybi huidibi huinixii huinitiempo ijtp. ³⁵ Jacmijpidaaccixy Dios, ca' mjotmetzciiygixy. Co mmijpidaaccixipy Dios, huin'it ajcxy mbaadipy oybi may'amy ma Dios. ³⁶ Chojcypy co miich ajcxy myajtungixipy mecxtujcin co mguydunaangixy nej Dios tzocy, e Dios xyajcidiigiiygixip huidibi yi' ti ahuaniiy. ³⁷ Jaybety jadu'n ma Dios ñecy ma jadu'n yminañ:

Tzoc, janch tzojc ymiina'ñ je huidibi tzonamb tzajpjoty, e ca'p je' jecyñity.

³⁸ Jadu'n Dios ymina'ñ:

Pinjaty iich ti ngöbicy co ytudägyjäyity, tzinähuip je' miid ymibijcin. E pen ixtigihua'cp ma ymibijcin, ca' jadu'n njotcuyc'adipyich miid je'.

³⁹ Ca'p iich ajt njëjity huidibi ixtigihua'cp ma nmibijcin, e ytigoy y'alma, je' iich ajt pin mibijcp, e jadu'n n'alma paadipy nidzoocin.

11

Yi mibijcin

¹ Jotcujc nayjihuiiyim jadu'n co huidibi nmibijcim janch yi', oy co ca' n'ijxim. Je huidibi nmibijcim je' xymooyim jotcujc'ajtin miid huidibi njjip'ijxim ma Dios. Je huidibi nmibijcim nejhuiiyim co janch janch jadu'n, oy ca' n'ijxim. ² Com miid co ajt nmij'ap nmijteedy ajcxy mibijci Dios y'ayuc paady Dios cobijcy ajcxy jadu'n nej tudagyjy.

³ Miid ajt nmibijcin ycixpi nejhuiiyim co Dios oyduñ tüg'óciy huidibi jii'ajtp miid y'ayucti'ajty, jigix huidibi cham n'ijxim je' yi' yaj'oyiyy huidibi ca' yaj'ixy.

⁴ Miid co Abel mibijcy Dios, paady Abel ymoy Dios huindzigi'n jac'oybi ca'ydi Caín, e Dios cobijci Abel yhuindzigi'n, e miid je' ycixpi Abel ooy ycomaybidzimy ma Dios co anajty ytudagyity. E jadu'n oy Abel ti yja'o'cini, jadu'n nipaady nej jihuiyy yjacmiydagyñi chambaad. Com miid je mibijcin huidibi anajty ymiid yejc ijxpejt ma iich ajt.

⁵ Miid co Enoc mibijcy Dios paady yajnicxi jadügpí tzinaydac ni yca'o'cy, ni ca' ajcxy paty, com Dios anajty ti yajnicxyii. Jadu'n ymina'n ma yjaybetyity ma Dios ñecy, ca'ni anajty yajnicxyii: "Dios jäygidacpy anajty Enoc chinaayin." ⁶ Pen ca' miid'ajtim mibijcin ni jadu'nyí, ca' Dios jäygidägy ajt ndzinaayin. Com co nmihuingonaanim Dios, hue' tzocy co nmibijcim co Dios yjiiity, e co yaj'ahuimbidity oybi miid pin mibijcip.

⁷ Miid co Noé mibijcy Dios, paady Dios ñimaayi jayijp co ytuna'nyii yjada'nyii mijniigom huidibi anajty ca'ni yaj'ixy. Co Dios ymigapxi, chi Noé yjotmaybaady e yaj'oyiy je barco ma yi' etz y'ung y'anäg ñiigomdzögipy. Miid co anajty Noé miidity mibijcin, paady yajpocycäy je naaxhuiñyäjy ajcxy ca'pi ymibicy. Chi Dios cobijcy Noé jadu'n nej tudagyjy miid co mibijci Dios y'ayuc.

⁸ Miid co Abraham anajty Dios mibicy, paady Dios yhuin'ijxi e ycapxymidouhui. Chi je' choon ma ñaax ycajpin ñicxy ma je it lugar huidibi Dios anajty möhuaanip co je'adiyb. Chon, ni ca' anajty nejhuüy ma ñicxy. ⁹ Miid co Abraham mibijcy Dios, paady chinaydacpicy nej tüg huingjy ma je naax huidibi Dios yaj'ahuaniiyi, huidibi ca' yjeyty. Chinay ma huittijc, nañ jadu'n ajcxy y'idiich Isaac etz Jacob huidibi ajcxy nañ jadu'n Dios yaj'ahuaniiyi je naax. ¹⁰ Abraham je' anajty y'ahuixyp mina jebi chinaydacpicy ma Dios y'it ylugar huidibi jadu'n nipatp nej tüg cajp huidibi miid y'ijx ta'tzpcy y'oyduñty, je huidibi Dios ñihuinmayiy, je huidibi Dios yajcojy yaj'oyiyyb.

¹¹ Sara hue' anajty pumäy, ti anajty ymijäyiyñi, ti ñajxni tiempo mina jebi y'ung'ixy. Per miid co mibijcy Dios y'ayuc huidibi ti ñimaayi co y'ung'ixa'n anajty, chi paty mijaa co y'ungdzimigip. E chi y'ung'ijxy com ymibijc co Dios anajty cuyduna'n tiibi ahuaniiy.

¹² Miid tügpí jäy, je Abraham, ti choondacy tügpicy y'amigügtijc huidibi oy ti ymayiy. Abraham, oy anajty je' ti yjahuingoni mina y'ögaani, chi ooy y'ung y'anäg, y'ap'ung y'apmang janchmay paty, jadu'n ymayity nej madza' etz ymayity nej pu' ma mejypa', janch ni ycamicho'nity.

¹³ Tüg'óciy je jäy ajcxy huidibi ya yajnimiydacp, öctay ajcxy ni ycacidigiyyi je tzinaydac huidibi anajty Dios ti yaj'ahuaniiyi. Miid co ajcxy mibijcy Dios, paady nejhuüy ajcxy co jacjiini Dios ymöhuüyb je huidibi ti yaj'ahuaniiyi. Com ymibijc ajcxy Dios, paady jotcujc ñayjihuiiyi co Dios möhua'nyii jacjiini huidibi ti yaj'ahuaniiyi. Yminañ ajcxy co anajty y'adzinaaygixy ya naaxhuiñ. ¹⁴ Pinjaty jadu'n minamb co adzinaaybi ajcxy yajpaady, hue' yajhuimbidity co chinaydac yjugy'ajttac ajcxy y'ixtaayb. ¹⁵ Co ixypy ajcxy jäymejtzó'cigixy je naax ma anajty ti choongixy, janch ycahuimbijty ajcxy jim jadüg'oc. ¹⁶ Per je' ajcxy nigí anajty nijot'ajtcixy it lugar jac'oybi, je' je' je tzajpjoty. Miid jada ycixpi Dios ca' yi' cho'yduñ co ñaydijyii Dios ma je' ajcxy. Com ti ni'ixiiyi ajcxy chinaydac jiiy tzajpjoty.

¹⁷ Abraham mibijcy Dios, e co Dios Abraham y'ijxmajtzi, chi yajmiiñ Isaac co anajty yajhuindzigiñhua'n Dios. E janch cixyot je y'ung tügpajc anajty yecy, je y'ung huidibi Dios ti yaj'ahuaniiyi anajty. ¹⁸ Dios ñimay Abraham co miid Isaac miid'ada'n may y'ap y'oc.

¹⁹ Abraham yhuinmaayb anajty ooy co Dios tügpajc cötujcmiidip yajjugypigipy öcpi.

Paady jëbi ïich ajt nmïnaanim co Abraham ycidigïiyi jadüg'oc y'ung co anajty ti yjugypicy co anajty ti y'ögy.

²⁰ Isaac mïbijcy Dios, paady Isaac Dios mïbijctzoy mïid Jacob etz Esau ycixpi co huen ajcxy oybi paadïp ma je tiempo huidibi mim cidacni. ²¹ Jacob ymïbijcy anajty Dios, paady co anajty y'ögaani, chi ahuanïy conuucxin ma nidüg nidüg José y'ung y'anäg. E jadu'n Dios ooy huindzigïiy ojadajty yam ñaygodajc'adyii mïid ytajc co anajty ooy ti ymïjjäyïyñi. ²² José co anajty Dios mïbicy ma anajty y'ögaani, ymïnañ co Israel jäy ajcxy anajty ypidzimaangixy comjegy jim Egipto, chi yajhui'my tiy'ajt nej ypajc ytunïiyb co anajty choñ ajcxy jim Egipto.

²³ Mïid co anajty ajcxy mïbicy Dios, paady co Moisés yma'xung'ajty, chi ytaj yteedy yützi tugiig po'. Com co ajcxy ijxy co anajty ooy y'oyity je ma'xung, ca' ajcxy anajty tzigïy je rey y'ane'mïn co anajty yaj'öctähua'n tüg'óciy ungma'xung yëydijcpi. ²⁴ Mïid co Moisés mïbijcy Dios, paady co oy ymïj'anäccojni, ca' tzojcy co ñaydijïiyb co rey ñïix y'ung'adiib. ²⁵ Hue' janchtiy Moisés nigï nijot'ajty co ayo'n tzaachypi minaxipy yajnaxipy quipxy mïid Dios yjäy, ca'ydi co nixondägipy je jugy'ajtin ma je rey ytïjc huidibi Dios ca' jäygidägy. ²⁶ Moisés nigï ñayjihuiïy jotcujc co tzaachypi ayo'n anajty minaxy yajnaxy mïid Cristo ycixpi, ca'ydi co mïid'ajttähuiipy jugy'ajt comeeñ'ajt jim Egipto. Com Moisés ti anajty yhuinma'ñypidägy co Dios yega'n je oybi. ²⁷ Mïid co Moisés mïbicy anajty Dios paady choñ jim Egipto, ni catzigïy co anajty rey yjotmädy, jadu'n y'ijty tudägy nej jihuïy ixy je Dios ca'pi yaj'ixy.

²⁸ Mïid co mïbijcy Dios paady Moisés tuuñ je pascuaxïi, chi ni'ane'mdiïy co huen tijc'aguu tüg tüg yajni'pyïy, jigix co je ángel huidibi yaj'öcp, ca'p je' je israelitajäy y'ungoob yaj'o'cipy. ²⁹ Mïid co ajcxy mïbijcy Dios paady je israelitas ajcxy yajnaxxy je tzaptz mejy jadu'n nej jihuïy ñajxcixy huindïtztuuy, e co ajcxy je Egipto jäy nañ jadu'n yjanaxa, cijx ajcxy ñïi'o'ctäy.

³⁰ Mïid co ajcxy mïbijcy Dios, paady ycidäday je poch ma je Jericógajp, taab anajty je israelitas ajcxy ti jühuidijtcixy huixtuc xïi. ³¹ Mïid co Rahab, je töxyjäy jïbic tzïnaaybi, mïbijcy Dios, paady ca' y'o'cy quipxyi mïid je huidibi anajty ca' capxymïdoogixy Dios. Com co je' yajjättacy ma ytïjcin je huidibi anajty ti choongixy ma Israel jäy ajcxy anajty yajpaady, co anajty ayüch ameech yajcïyöygixy yajtecyyöygixy Canaán naaxjot.

³² ¿Ti njacmiydägïbich? Nyajtigoy'idaamybich tiempo co nimïydägïbich Gedeón, Barac, Sansón, Jefté, David, Samuel, e jacjadyii Dios y'ayucnajtzcaxïiybi. ³³⁻³⁴ Mïid co ajcxy mïbijcy Dios, paady ymïmadac ajcxy ymidzip canaag picy, ane'my ajcxy yajxon yi cajpjäy, ypaat ajcxy pubejtin huidibi Dios anajty ti yaj'ahuanïiyigixy. Yaj'adujc ajcxy caa y'ahuac, yajxeem ajcxy jïin huïdi anajty ooy ymïjity, tzooc ajcxy co anajty yaj'ögaangixy mïid espada. Pinjaty anajty pumäyïp ypaat je' ajcxy ymic'ajt ymïjaa, mij je' ajcxy ooy y'ïjtcixni ma chiptungixy, e ymïmadactay ajcxy maymidzip. ³⁵ Jim anajty töxyjäy yjättigixy huidibi ajcxy cidigïiyi y'ung juugy huidibi anajty ti jugypicy co anajty ti y'ögy. Jadyii ajcxy y'o'cy ahuoni' agidzi', ca'p ajcxy paty nidzoocin. Jadu'n ajcxy paty o'cin, jaydëbi patcixy jugy'ajtin etz tzïnaayïm jac'oybi ma Dios. ³⁶ Jadyii Dios y'ayucnajtzcaxïiybi ooy ñixiici yajxiici, yajcï'ajty, etz tzumy mach ypujxtïjc'ïñäy. ³⁷ Jadyii Dios y'ayucnajtzcaxïiybi y'o'cy ajcxy tzaagögäch, jadyii yaj'ajidiïy ajcxy janch tim cup y'ïjxmajtzi ajcxy, jadyii yaj'o'ci mïid espada. Ymïñ xyïjpy xïi yaa yhuïdijtcixy ymïid ajcxy ñinïcx yüch mïid cöbixy'ac etz mïid chivo'ac, ayoob jäy ajcxy, jotmay mïid, yajtzaachtungixy yajca'oydungixy. ³⁸ Yi jadu'mbi Dios y'ayucnajtzcaxïiybi ajcxy ni je naaxhuiñyjäy anajty camïhuaadity. Mïid ymidzip pahuidijtcixy, paady yhuïdijtcixy anajty tïtznaaxtuum etz yuugjoty, chinaaygixy naaxpa'tci'py etz majaty ang. ³⁹ Nidüg'óciy je' ajcxy oy cömay ajcxy yjanaxxy mïid co mïbijcy ajcxy Dios, ca' ajcxy paty tiïbi anajty Dios y'ahuanïy. ⁴⁰ Com Dios jac'oybi je' anajty yegamyb mïid ïich ajt, paady ca' ajcxy paty je oybi tiïbi Dios y'ahuanïy. Ti anajty Dios nihuinmayïy

co yajca'pxaani yi' ajcxy ytuđägy'ajtin quipxyi miid iich ajt co Cristo y'o'cy miid iich ajt nbocy ycixpi.

12

Tzoc iich ajt nhuinma'ñybidaacim ma Jesús

¹ Com nmiid'ajtim canaag iixpejt nej jäy jecy'ajty miibijcy Dios, paady iich ajt jadu'n nipaady nej jihuüy huinduy jajiixci'py nmiid'ajtim jäy huidibi ti yajniuguëxgy ymiibijcin. Paady ycixp tzoc ahuing pidaacim je huidijaty xy'adzijpim ma ajt nmibijcin, e nañ jadu'n tzoc ahuing pidaacim je pocy huidibi xyajhuinma'ñyđigooyim, e tzoc naymic'ijxim cuydunim yi' tiy'ajt miid mecxtujcin ma ajt ndzinaayin, jadu'n nej jäy ñaymic'ijxigixy co nayboyicquixigixy. ² Tzoc nhuinma'ñybidaacim ma Jesús. Jim iixpejt nbaatim ma Jesús nej jëbi nmibijcin Dios. Jesús yi' je' ti xyajnejhuüyim Dios ytiy'ajt. Yi Jesús yi' y'ayoo anajty ma je cruudz, ni ca' yi' tuñcuendi je jadu'mbi o'cin oymidzo'yduunip. Com co Jesús ñejhuüyb anajty co jadu'n y'oc'ayoohuüpy, chi ypaadipy jotcujc'ajtin ma Dios y'ane'my. E cham je' yajpaady ma Dios ymijc ma Dios y'ane'mdac.

³ Huinmaaygixy miich ajcxy je Jesús y'iixpejt, nej pocyjäydijc chaachytuungixy etz ñi'ojüygixy, etz ca' y'ixaani, paady ca' mdzijpcigixy ni mgamijotmetzcüygixy. ⁴ Ca'ni miich ajcxy ayo'n tzaachypi myajnaxy mabaad ni'py ajcxy mxibidyii jadu'n nej Cristo yjajty. ⁵ ¿Nej ti miich ajcxy mjäyđigooygixy je capxhuijin huidibi Dios ti xymooygixy nej jihuüy yci'm'ung? Jadu'n ymina'ñ ma Dios ñecy:

Miich n'ungich, ca' mbidägy nej jihuüy ca' ytim ytiijity je tzaachypi huidibi Dios miid xycapxhuijy, ni ca' mjotmetzcühuipy co xyaj'ójipy.

⁶ Dios ycapxhuijy yi' pinjaty chojcpy yjihüüyb. Dios chaachtumby yi' ajcxy co ytundigooy, pinjaty yi' ti cöbicy nej jihuüy yci'm'ung.

⁷ Mimadaaccix miich ajcxy je castigo, com Dios jadu'n yi' xymiidity ajcxy nej jihuüy yci'm'ung. ¿Nej ji jada' tüg ung, e ca' yteedy chaachtunüyb co ytundigooy? ⁸ Pen ca' miich ajcxy Dios ti tzaachypi xymooygixy, jadu'n nej yi' moy castigo tüg'óciy y'ungdijc y'anäctijc, ca' miich ixypy ajcxy Dios xy'ung'adyii tiydudägy. Jadu'n miich ajcxy m'idipy nej tüg pi'c'anäg huidibi yteedy ca' y'ixa'ñyii. ⁹ Jadüg nax, taabi anajty ajt nbi'cnity, iich ajt ndeedy ya naaxhuiñ xy'ihhuijim xycapxhuijim anajty, e xychaachytuunim co ca' ngapxymidoohuim nhuindzigüyim ajcxy. ¿Nej co ca' huaad n'ijtim ane'my ma ajt ndeedy huidibi tzajpjoty yajpatp? E jadu'n jëbi nbaatim je jugy'ajtin huidibi ca' ycixipy ytigoyipy nimina. ¹⁰ Iich ajt ndeedy ya naaxhuiñ xy'ihhuijim xycapxhuijim anajty miid jada conbi jugy'ajt ycixpi, jadu'n nej je' anajty ajcxy oy'ixy. Nañ jadu'n Dios iich ajt xychaachytuunim miid ajt n'oy'ajt ycixpi etz jigix nmiid'ajtim huädz jot huädz huinma'ñ nej Dios ymiidity huädz yjot huädz yhuinma'ñ. ¹¹ Oy yjanchity co ca' ti tzaachypi ndzojcin ma yam nbaatim je tzaachypi, com ooy ndzachjihüüyim je tzaachypi, e ca' jotcujc nayjihüüyim. Per pinjaty ixpijcpí Dios chojcin miid je tzaachypi ycixpi, chi je' yhuimbizimüygixy tüg jugy'ajtin tädägy etz jotcujcpi.

Je huidibi ayo'ngojp co Dios y'ayuc ngacöbigaanim

¹² Paady miich ajcxy jotmicpijccix ma nmibijcin, jadu'n nipaadip nej jihuüy myajpidicixy mgi' tiibi y'anucüüyñi, etz mgoxcohuajc mic'ajt paady huidibi anajty ca' mic'ajt miidity. ¹³ Ixtaaygix ñi'aa tü'aa tiybi ma mdzinaayin, jadu'n nipaadip nej jihuüy yi' mdecy huidibi mädiip ti chögy, e camina jadüg'oc yhuiidip.

¹⁴ Tzinaaygix miid oyjot oyhuinma'ñ miid nidüg'óciy jäy. Ca' mdungixipy ti tzip. Miid'ajtcix tüg tzinaayin huätzpi, pen ca' jadu'n mdungixy, ni pin ca'ixipy je Huindzin Jesucristo. ¹⁵ Ooy cuenditungixp co ni pin cajipyöydüdiipy je pubejtin huidibi Dios ti ahuanüy, jigix nañ jadu'n ni pin ycajpaadipy janch mät yjot yhuinmañ, e yajhuindigoydäy yajmättäy jacjadyii ymigügtijc, tim jadu'n nej tüg ujtz ta'mbi ypa'mduñ.

¹⁶ Ni tüg miich ajcxy ca' huaad ti ayuc miid'aty miid huingbi töxyjäy huidibi ca' miich

mdöxyijc'adyii. Ca' nañ jadu'n m'ixtijipy je ayuc huidibi Dios yajhui'my miid miich ajcxy ycixpi, jadu'n nej y'idüich Esaú. Miid tüg caayin uucin Esaú toocnax je huidibi anajty möhwaanip yteedy co y'unggoobity. ¹⁷ Miich ajcxy mnejhuiyb co Esaú tocy huidi anajty paatip co japada'n je conuucxin huidibi anajty yteedy möhwaanip, ca' jadu'n Dios cöbijcy, chi Esaú ooy yjayaaxni, per ca' anajty ñihuinma'n nej yjothuimbidip miid je' ycixpi tübi anajty tuñ.

¹⁸ Ca' miich ajcxy ti mjaty ti m'ixy, nej jecy'ajty yi israelitas ajcxy yjaty etz y'ixy co ajcxy mihuingoñ je cop Sinaí ma anajty Dios ti pidägy mij jin, ma anajty ooy yhuidzucy yjidity etz mijpoj mijtigoy ñaxy, ma anajty ooy y'agoodziy anaxy. ¹⁹ Ni mgamidoy ajcxy je trompeta ni je Dios y'ayuc huidibi anajty ajcxy je' migapxi. Pinjaty je' midou je ayuc ypijctzou ajcxy may'ajt co ca' huaad yjacmigápxigixy com ooy anajty chigiygixy. ²⁰ Je' je' anajty ycixpi co anajty ca' mimadägaangixy je ane'min cötujcin huidibi anajty minamb: “Pin anajty ytecy pidacp ma yi cop, hue' yi' y'oyyaj'o'cnity cögäch miid tzaa o miid quipyjipxu'ñ, oy ixypy y'iyucity.” ²¹ Oy chigiyñi huidibi anajty yaj'ixp, Moisés ci'm minaan: “Tziyuuybich yam miid tzig'i'ñ.”

²² Per miich ajcxy jadu'n nipaady nej jihuiy ti mmihuingoongixy yi cop huidibi yxi Sión etz je Dios juugypi ycajp. Je' je' je Jerusalén tzajpjoty ma canaag mil je ángeles ajcxy yömujccixy. ²³ Ti miich ajcxy mmihuingoongixy ma ti yömujccixy je jaccömaaybi jäy huidibi ajcxy yxi cojaay ma Dios ñecy jiby tzajpjoty, je huidibi ajcxy huin'ib huingapxtacp Dios. Ti miich ajcxy mihuingoongixy Dios je huidibi nijuez'ajtp tüg'óciy. Nañ jadu'n ti miich ajcxy mihuingoongixy je' ajcxy je oyjädyjc y'espíritu huidibi Dios ti yaj'ahuimbijttäy tudägy. ²⁴ Miich ajcxy ti mihuingoñ yi Jesús, yi huidibi xycodinaayim ma Dios miid je jemybi cötujcin huidibi Dios yajhui'my miid ich ajt ycixpi. Yi Jesús huidibi mic'ajtmoy je Dios y'ayuc jemybi, co ñi'py teemy vojcy miid ajt nbocy ycixpi. Yi Jesús co ci'm ñi'py teemy vojcy miid jäy ajcxy ypocy ycixpi, ñigi oy yi' ca'ydi co Abel iyujc ñi'py teemy vojcy miid ypocy ycixpi.

²⁵ Paady ycixp ooy cuenditungix miich ajcxy, ca'ydi yaj'ixtijy Dios, je pin ti xyajmihui'mim jemybi y'ayuc. Je jäy ajcxy huidibi tzinay jecy'ajty, ca'p je' ajcxy chocy co ajcxy ixtijy Dios co jecy'ajty yjamigapxi ajcxy ya naaxhuiñ. O'ctiy ich ajt ca' ndzoocim, pen nmooyim ajt njix je Dios, je pin y'ayuc xyajmihui'mim huidi tzoön tzajpjoty.

²⁶ Co Dios y'ayuc yecy jecy'ajty, chi yajtziyuuy ooy naax. Jadachambi Dios ymina'n: “Jadügtecypajc nyajtziyuya'ñich je naax, e ca' nminaanim naaxti'ajty, nañ jadu'n nyajtziyuya'ñich je tzajp.” ²⁷ Co jadu'n Dios ymina'n: “Jadügtecypajc nyajtziyuya'ñich je naax.” Hue' yajhuinjihuiy co ytigoydähuipy huidijaty yücxp huidibi Dios yaj'oyiy, e je' huimip je huidijaty ca' yu'cxy. ²⁸ Paady je Jesucristo ycötujcin huidibi Dios xyajmihui'mim, ca' yi' huaad ytigoy. Tzoc yajnaxim Dioscojuyip miid Jesús y'ayuc ycixpi, e nyajmij'ajtim n'ojadajtim Dios miid tudägy'ajt etz miid huindzigi'ñ nej je' jäygidägyin. ²⁹ Ich ajt nDios jadu'n yi' nej tüg jin huidibi nöctaayb tüg'óciy.

13

Nej jëbi nyajjäygidacim Dios

¹ Miich ajcxy huidibi mibijcp Jesucristo, ca' mjäydigooygixy co ajcxy mnay-chójcigixipy miñ xyipy nej jihuiy ajcxy mdügquëxyity. ² Ca' ajcxy mjäydigooygixipy co oyjä'ajtin mdungixipy miid pinjaty ajcxy xycojädyb. Miid co oyjä'ajtin ajcxy tuuñ, chi nijjity ajcxy yajjättacy ángeles ajcxy, ni ca' ajcxy huinjihuiy co ángeles anajty ti yajjättaaccixy.

³ Mjäymedzip ajcxy pinjaty tzumy'iñaayb mach'iñaayb jadu'n nej jihuiy miich ajcxy nañ jadu'n mdzumy'iñaaygixy mmach'iñaaygixy quipxy miid je' ajcxy. Jäymedzip miich ajcxy pinjaty tzaachypi ayo'n minajxp yajnaxp, com nañ jadu'n miich ajcxy miidity je ninicx huidibi jëbi y'ayoy.

⁴ Huen nidüg'óciy jäy huindzigiiygixy yajmij'ajtcixy je pijcin casada'ajtin. Huen je yéydijc etz je ytóxyijc naymiidtzináayigixy yajxon, com Dios yi' tzaachytunipy pinjaty tundigooyb miid huingbi töxyjäy.

⁵ Ca' m'adzojccixy meeñ. Mijotcuyc'ajtcixy ti ajcxy ii miid. Dios ti je' ymina'n: "Camina xii ich miich ajcxy n'ixmadzipy, ni ich miich ajcxy ngajäydigoyipy." ⁶ Jadu'n jëbi nminaanim agujc jotcuyc: "Yi Huindzin Dios yi' xypubejtpich, ca' ndzigihua'nich jäy nej xyjatuna'nich."

⁷ Jäymejtzcix miich ajcxy je pinjaty ti xyñigohuajc'ajtcixy, je pinjaty ti xyajmiidmiydaaccixy Dios y'ayuc ytiy'ajt. Huinmaaygix nej je' ajcxy anajty ytuädgy'aty, padungix nej je' anajty ajcxy miidity ymibijcin.

⁸ Jadu'n nej Jesucristo oybi tuñ jecy'ajty, nañ tim jadu'n oybi tuñ chambaad, etz oybi tuna'n huinixii huinitiempo, ca' yi' yajtigadzip yi yhuinma'n ni mina. ⁹ Ca' miich ajcxy myajhuin'ingixy miid canaag ixpijcin huidibi ca' ytügnaxity miid Jesucristo ytiy'ajt. Nigi oy co ajt nbidaacim nhuinma'n ma je Dios y'ayuc, nej yi' xychojcin xyjihuiyim, nej yi' may'ajt tuñ miid ich ajt. Ca' mbidaacim mhuinma'n ma je cötujcin huidibi adujcp nijëjity caayin uucin. Ni ti jotcuyc'ajt ajcxy capaty pinjaty panixp yi jadu'mbi cötujcin.

¹⁰ Je judío tungmiidpi huidibi huindzigi'n tumb anajty ma Dios yhuittijc je jecyip, ca' yi' jëbi yjactuuni ma ich ajt nmibijcin jadu'n nej Jesucristo tuñ huindzigi'n miid ich ajt ycixpi. ¹¹ Je judío mjtungmiidpi ma Dios ytijc ypidac iyujc ñi'py ma je Lugar Santísimo nej tüg huindzigi'n huidibi yajpocyñihuaatzp je mayjäy. Je iyujc ögy ñinixc jiguem je' yajnögy, ca' jilbyity cajpjoty ma je Dios anajty huindzigiigixy. ¹² Tim jadu'n nej je judío sacerdote yajnögy je huindzigi'n iyujc ñinixc cajp ninaxy, nañ tim jadu'n Jesús paty tzaachy'o'cin cajp ninaxy jigix miid je' yci'mni'py pocyñihuädzip je mayjäy. ¹³ Tzoc mijpidaacim je Jesús tübi y'ögy cajp ninaxy miid ich ajt nbocy ycixpi. Tzoc minajxim yajnaxim je canayyajmij'adii je canay'ixa'nii, tim jadu'n nej Jesús minajx yajnax je canayyajmij'adii je canay'ixa'nii. ¹⁴ Ya naaxhuiñ ca' ya ajt nmidity tüg ciudad ma jëbi n'ijtim huinixii huinitiempo, je' ich ajt njijp'ixim je tzinaayin huidibi miimb cidaacp. ¹⁵ Paady ycixp chojcpy co Dios n'ojadajtim nmibijctzoohuim jabom jabom huinixii miid Jesucristo yxi. Co jadu'n n'ojadajtim nmibijctzoohuim Dios jadu'n nipaady nej tüg huindzigi'n nmooyim. Tzoc ii mibijctzoohuim, tzoc ojadajtim miid ajt ngi'm'ahuac ngi'm'ayuc. ¹⁶ Ca' mjäydigóoygixipy co oybi mdúngixipy etz naybubéjtigix naybudigiiygix miñ xyipy. Co jadu'n mdúngixipy jadu'n nipaady nej tüg huindzigi'n ti myejccixy ma Dios huidibi yi' ooy jäygidägy.

¹⁷ Capxymidoogix pinjaty xyñigohuajc'ajtcixp etz yajmij'ajtcixp, com yi' miich ajcxy xycuend'ajtip yi m'alma. Nejhuiyim co cïyegaangixy ycuendi ma Dios nej ajcxy ti xycuend'aty. Pen oybi miich ajcxy mdumyb miid yi' ajcxy, jotcuyc ajcxy ñayjihuihuiyb. Pen jibic miich ajcxy mduñ miid yi' ajcxy, tajip mayip ajcxy. E pen yi' ajcxy tajp maayb, chi miich ajcxy ca' ni ti jotcuyc'ajt mmiid'adipy.

¹⁸ Mibijctzoogix Dios miid ich ycixpi etz je pinjaty xymiidhuidijtpich. Jatytim naymic'ixibich tudägy nduunich ma tüg'óciy ich ndung, paady ycixp jotcuyc nayjihuiyijich. ¹⁹ May'ajt nbijctzooybich ma miich ajcxy co Dios mmibijctzoogix miid ich ycixpi, jigix Dios a'ixihuiy co n'icxibich tzojc ma miich ajcxy.

Oy'ajt etz capxpocxin huidibi cogixiiyñip je necy

²⁰ Dios nmibijctzooybich miid miich ajcxy ycixpi. Je Dios huidibi yajjugypijc jadüg'oc ich ajt nHuindzin Jesucristo co y'o'cy, je huidibi cuend'ajtp je maymibijcpidijc. Co Jesucristo ñi'py teemy yojcy, chi mic'ajt moy je jemybi cötujcin huidibi Dios ti xyajmihui'mim. Dios ti pidägy Jesucristo jadu'n nej je cuend'ajtpi jac'oybi ma je maymibijcpidijc. Jadu'n yi' nipaady nej tüg cöbixy cuend'ajtpi huidibi cuend'ajtp may ngöbixy. ²¹ Je Dios huidibi xyajjotcuyc'ajtim je' huen xyaj'ahuimbijtcixy huädz etz ooyäy ma tüg'óciy ajcxy mmibijcin etz ma tüg'óciy ajcxy mdzinaayin, jigix ajcxy mdunipy nej

yí' tzocy. Dios huen tuñ ma ñich ajt njot nhuinma'ñ miid Cristo ymic'ajt nej yí' tzocy. ¡Huen Cristo y'idipy mij cömay huinixi huinitiempo! Amén. Jadu'n jada.

²²Nmigügtijc, nbijctzooybich may'ajt yajtungixy mecxtujcin ma jada ayuc capxhuijin. Ti ajcxy ii con nijayiygixy. ²³Nejhuiiygix miich ajcxy co ajt nmigüg Timoteo y'ity ahuätztuum. Pen tzojc yjädy ya ma nyajpaadyich, chi yí' xymiidnícxibich co ñich anajty miich ajcxy nicxy n'ijxcixy.

²⁴Nguejxpyich ngapxpoocxin ma nidüg'óciy pin ajcxy xyñigohuajc'ajtp etz je migügtijc ajcxy huidibi mibijccixyp. Je migügtijc huidibi ajcxy yajpatp ya Italia yquejxyp ajcxy capxpoocxin ma miich ajcxy.

²⁵Dios ajcxy xyconuucxip nidüg'óciy miich ajcxy. Amén. Jadu'n jada.

SANTIAGO

Yi Necy Huidi Santiago Yajniguejx Je Judío Mibijcpidijc

¹ Hich Santiago, ndzojcingíx iich nduñ ma Dios etz je Huindzin Jesucristo ytung. Cham jada necy nyajnigüexyich yi Israel jäy huidi ajcxy yajmij'ajtp Dios, huidi ajcxy xim yam yajpatp cajp cajp miid co yqueecpidzimy ajcxy Judea naaxjot co ymidzip ajcxy chach'ixhuididyii chachpahuididyii ajcxy.

Je tiy'ajt huídib tzoon ma Dios

² Migügtijc ajcxy co yi mmidzip ajcxy xychach'ijxmadzaangixy nej miich ajcxy mjot mhuinma'ñ miidity, co yi' ajcxy xy'ixhuidijtcixy xypahuidijtcixy, co xyñigapxcixy xyñi'ojiiygixy, co xyajhuinma'ñydidigoyaangixy, ca' mdajipy mmayipy ajcxy, jotcuyc ajcxy mnayjihuihuiyb. ³ Miich ajcxy mnejhuiygixyp co jadu'n mmimecxtujccixyp je tzaachypí ayo'n huídibi mminajxcixyp myajnajxcixyp miid co ti mmijpidaaccixy Jesucristo, huin'it mbáatcixipy mic'ajt, jigix jébi mimadactaygixy tüg'óciy jibic-huinma'ñ. ⁴ Copicy miich ajcxy mimadactáaygixipy tüg'óciy jibic-huinma'ñ, ca' ma mdundigóoygixipy, e huin'it huádz mjot mhuinma'ñ mmid'adipy ajcxy, ca' ti myajtigoy y'idipy ajcxy.

⁵ Pen nidüg miich ajcxy myajmayjajty oyhuinma'ñ, co jäy ajcxy xychach'ijxmadzaani mjot mhuinma'ñ nej miidity, mibijctzou Dios huen xymöy je oyhuinma'ñ, com yejcpy yi' oyhuinma'ñ miid tüg'óciy jäy co pijctzoy. Ca' yi' cohuindugyii, ca' huaad xy'ojim co nbijctzoohuim oyhuinma'ñ. ⁶ Copicy pijctzohui Dios huijy'ajt cujc'ajt cixyot huinijot, ca' y'ametz yjotmetzity. Pinjaty ametz jotmetz Dios mibijctzooob, ca' tú'ciy miidity yjot yhuinma'ñ, janam jatzojc yajtigach yhuinma'ñ jadu'n nej je mejy co ypidigy y'ixtägy miid je poj. ⁷ Co jäy ajcxy ametz jotmetz mibijctzoogixy Dios, Dios ni ti jadu'n cayecy. ⁸ Yi jadu'mbi jäy ajcxy ametz jotmetzpi canaagnax yhuinma'ñ ajcxy miidity, ca' tügjijp yhuinma'ñ pidaaccixy ma Dios.

⁹ Yi ayoobitijc huídibi mijpidaaccixyp Dios, ooy jäygidägaangixy co Dios ypubediiyb ypuđigihuiiyb. ¹⁰ Yi comeeñyjäy ajcxy huídibi mijpidaacp Dios, ooy jotcuyc ajcxy ñayjihuihua'nyii co ajcxy ymeeñ ytíctähuiipy jadu'ñyi. Com yi' ajcxy ymeeñ tigoyamb yi' jadu'n nej tüg pijy co ñiicxni miid xii an. ¹¹ Co xii ypejtni, chi ooy y'andaacni mic, e chi je jiiinboj ypidzimy, chi je pijyquipy ytích, chi yhuingädaayñi je pijy, e jadu'ñyi ytigoydáy je pijy oy'ajtin. Jadu'n nej yjaty yi pijy, ñan tim jadu'n yjada'ñ comeeñydijc ajcxy, jadu'ñyi ñitigoyaangixy yjugy'ajtin.

Co yjot yhuinma'ñ chach'ijxmadza'ñyii

¹² Jotcuyc pinjaty mimecxtujctaayb jadu'n nej ajcxy yjot yhuinma'ñ chach'ijxmadza'ñyii. Co jadu'n mimecxtujctáaygixipy, Dios möhuib ajcxy jugy'ajtin huinixiibi, huídibi yajhuinhuaniiy tüg'óciy jäy ajcxy huídijaty Dios tzojcp yajmij'ajtp. ¹³ Co pin nijot'aty co tuna'ñ ti jibicpi, ca' ymina'nipy co Dios anajty jadu'n yajtundigoyaani. Dios ca' ti jibicpi tuñ miid jäy ajcxy. E nañ ni pin ca' huaad ijxmach Dios nej yjot yhuinma'ñ ymiidity. ¹⁴ Ci'm ajcxy jadu'n ñaydunyii, co tzachnijot'ajtcixy canaagnax jibic-huinma'ñ. ¹⁵ Co jäy ajcxy nijot'ajtcixy jibic-huinma'ñ, pocy anajty ytungixy. Ti ajcxy anajty ooy ypocyniibejtni co nicxy y'ó'ccixni.

¹⁶ Migügtijc ajcxy, huídibi ooy ndzocy njihuüyich, ca' mnayhuin'iiinigixy. ¹⁷ Hich ajt nDios Teedy huídibi tzajpjoty tzinaayb, yi' huídibi yajcojtaay xii madza' huídibi jajp tiicxp, yi' je' yejctaayb tüg'ociy tijaty oybi, tüg'óciy yhuinma'ñ huídibi iich ajt nmiid'ajtim. Dios ca' yi' yjot yhuinma'ñ yajtigach jadu'n nej yi xii madza' yjajin ytíicxin ytigach. ¹⁸ Dios y'oydumyib huinjemy iich ajt njot nhuinma'ñ miid yi' y'ayuc ytiy'ajt, jigix jébi iich ajt nmi'ijtim oyjot oyhuinma'ñ. Yi jäy ajcxy huídibi yajmij'ajtcixp Jesucristo, Dios ñigi tzocy ajcxy ca' jac ti huídibi oyduñ.

Je tiy'ajt tiydudäcypí

¹⁹ Migügtijc huídibi iich ooy ndzocy njihuüyich, mnejhuíhuipy miich ajcxy jada co ooy ycopicyity mmido'mbijctáhuipy ajcxy Dios y'ayuc ytiy'ajt, ca' mjäydigóoygixipy, ca' mgapxmayíygixipy, pen mjotmätcotp ajcxy ca' anajty mguydungixy Dios ytiy'ajt. ²⁰ Je jäy huídibi jotma'tp, ca' je' tuñ huídibi Dios yjäygidacyp. ²¹ Ixmajtztaaygix yi jibic ayuc, ca' mnijot'ajtcixy yi jibic-huinma'ñ. Cöbijccix miid oyjot oyhuinma'ñ yi Dios y'ayuc ytiy'ajt, yi huídibi Dios ti yajnicödugiy, huin'it jëbi ajcxy m'alma nñdzocin paady.

²²⁻²⁴ Cuydungix ajcxy Dios y'ayuc ytiy'ajt, ca' ajcxy mjotcujc'adipy miid yi'yi co m'amidoo'ijtcixy, hue' anajty nigoo mnayhuin'íinigixy. Peni nigoob Dios y'ayuc m'amidoo'ijtcixy, e ca' mmijpidaaccixy ca' mguydungixy, naadigi' anajty m'amido'ijtcixy. Jadu'n miich ajcxy nipaady nej pin yhuin'yijp aa'ixnajxp ma tügi iix. Co ñay'aa'ixnajxtäyíi, chi yjihuägy, e mic'amy jäydigoydäy nej yhuin'yijp ti ixy. Naadigi' anajty ti ñay'aa'ixnaaxyíi. ²⁵ Pen miich ajcxy yajxon m'ixpijycp Dios ytiy'ajt, je tiy'ajt huídibi yaj'oyíhuip ajcxy mjot mhuinma'ñ, pen mmijpidaaccixyp, pen mguydungixyp Dios y'ayuc, e ca' mjäydigóoygixy, chi jada' Dios xyconuucxip ajcxy miid jëgixpi huídibi anajty mguydungixyp.

²⁶ Pen ji pin ñayjihuüyíi co cuyduni Dios ytiy'ajt, e ca' ñay'ahuijtzigyíi, ci'm anajty ñayhuin'íin'yíi, tundigooyb anajty, e ca' yjanchity co mijpidaaci Dios ytiy'ajt. ²⁷ Pen miich ajcxy huädz mijpidaaccixy Dios etz mguydungixy yi' ytiy'ajt jadu'n nej jëbi Dios jäygidägy, hue' tzocy co mbubéjtcixipy mba'ayóogixipy co'ögy'ungdijc, etz co'ögy ytöxyjäydijc ma ayo'n jotmay ajcxy patcixy. E ca' huaad jibic-huinma'ñ mjactungixy, jadu'n nej jadyíi naaxhuin'yjäy y'idíitczixy, huídi ca' mijpidaaccixy Dios.

2

Ca' huin'ixpety migüg myajmij'ajtcixipy

¹ Migügtijc ajcxy, co m'ojadajtcixy co mmijnicxpejtcixy iich ajt nHuindzin Jesucristo, yi huídibi tzajpjoty ane'm, ca' ajcxy huin'ixpety migügtijc myajmij'ajtcixipy. ² Pen jim jäy ytiy'ajt ma mnayyöymújcigixy comeeñybi miid oori cijiitc, etz miid yhuin'ixpety yxoxj janch oybi, etz pen nañ tigüyb tüg jäy ayoob huídibi yhuin'ixpety yxoxj janch cäitz tuc nübüdy ixpüdy. ³ Chi miich ajcxy je' jac niigi myajmij'ada'ñ je comeeñybi huídibi oyxoxy, e chi mnimähua'ñ: "Íña' miich ya ma jada oybi íñaaybejt." E je ayoob jäy mnimähuaangixy: "Íña' naaxcixy o jim jadu'n tina'." ⁴ Co jadu'n m'idíitczip ajcxy, ca'p anajty jadu'n ytiy'ajty. Mdundigooygixy anajty ma Dios ytiy'ajt co huin'ixpety ajcxy migüg mdzogipy. Hue' anajty myajtungixyp jibic-huinma'ñ co jadu'n m'ixpijycp jäy huídibi ayoob.

⁵ Migügtijc ajcxy, Dios ti huin'ixy yi ayoobitijc, jëbi ajcxy mijpidägy Dios etz jëbi ajcxy paadipy it lugar ma Dios y'it tzajpjoty. Jadu'n Dios yajhuinhuaniy pinjaty tzojcp jihuüyip co it lugar möhua'ñ jiby tzajpjoty. ⁶ Myajtzo'yduungixyp miich ajcxy ayoobitijc. ¿Nej cayi comeeñyjäy ajcxy huídibi miich ajcxy xychachxip ma cötujctac, e xyajnicxcixy ma tungmiidpi yhuinduu, oy ajcxy mdzocy mgatzocy? ⁷ ¿Nej ca yjējity ajcxy huídibi jibic nigapxp ni'ojyib Jesucristo, je oyjäy huídibi miich ajcxy myajmij'ajtcixyp?

⁸ Pen janch miich ajcxy mguydungixy je tiy'ajt huídibi jaybety ma Dios ylibro: "Mdzogipy mjihuíhuipy mmigügtijc hueñytimypinity, jadu'n nej miich ajcxy ci'm mnaychogyíi mnayjihuüyíi." Pen jadu'n anajty mdungixy, tüg anajty oybi mdungixyp. ⁹ Pen huin'ixpety ajcxy anajty jäy myajmij'ajtcixy jadu'n nej yhuin'ixpety yxoxj ajcxy miidity, mdundigooygixp, e ti anajty mnayajpocycähüigixy ma Dios ytiy'ajt. ¹⁰ Pen tüg jäy cuydundaayí Dios ycötujcín, co nicxy tüg cacuyduñ, jadu'n nipaady nej jihuüy anajty janch ni tüg cötujcín ti cacuyduñ. ¹¹ Je Dios je cötujcín ti pidägy co ca' huaad mmigapxtigooyipy töxyjäydijc, etz nañ ti cötujcín pidägy co ca' huaad njäyayaj'o'cim. Pen mmigapxtigooyb töxyjäydijc, oy ca' ti mjäyayaj'ögy, ti anajty mdundigooy mij ma Dios ytiy'ajt. ¹² Capxcix miydaccix, tungix nej jëbi huaad jäygidägy iich ajt nHuindzin Jesucristo nej je' cuyduñ yi' ytiy'ajt. ¹³ Ca' ti pa'ayoohuin paadipy ma Dios, pin ca' tuñ ti

pa'ayoohuin ma ymīgūgtjic. Pin pa'ayoohuin tumb ma ymīgūgtjic, je' capxpaady y'idip co anajty Dios tiyduñ yí' yjāy.

Je mibijcpi etz je ojjāy'ajtin

¹⁴ Migūgtjic ajcxy, ni ti m'alma capada'n pen miich mminaamb co myajmij'ajtyp Dios, e pen ca' myajniguēxīgy ni ma co oybi mduñ. Ca' Dios yajnīdzōga'n yí m'alma miid co nigoob mmina'n co Dios mmijpidāgy, e ca' mguyduni yí' ytiy'ajt. ¹⁵⁻¹⁶ Pen miich ajcxy miid tūg migūg yēydijcpi o tōxyjāybi huidibi yajmayajtp yhuit ytucxy caayin uucin, e chi nigoo miich ajcxy mīmāhuipy: "Nīcx agujc jotcujc, Dios xypubedipy xypudigīhuipy, ca' mīich'ōgīpy ca' myuu'ōgīpy." E miich ca' anajty ti ti mmōy huidijaty yajmayajtpy. ¿Ti ojjāy'ajtin anajty ti mduñ? ¹⁷ Pen miich minamb co myajmij'ajtyp Dios, e ca' ojjāy'ajtin mduñ miid mmīgūgtjic, ytimyñipaty jadun nej ixipy ca' mmibicy yí Dios ytiy'ajt.

¹⁸ Ca' yjēcīty co tūg jāy xyñmāhuībich jadun: "Miich mdzachmijpidacpy yí Dios ytiy'ajt, e iich ndumybich oybi." Iich n'adzohuipyich yí jadunmibi jāy co ca' jadun ytiy'ajtity nej miich mināñ. Pen ca' miich mmijpidāgy Dios y'ayuc, ca' mjadipy nej mdunipy oybi jadun nej Dios huaad jāygidāgy. Co iich oybi nduñ, jadun nīgūēxīgy co mmijpidāgyich Dios. ¹⁹ Miich mmibijcpy co Dios ji tūgpajc, e oy jadun co mmibicy. Nañ jadun yí ca'oybi ajcxy mibijcp etz chigīyib ajcxy Dios. ²⁰ Loci miich, ca' mhujnhuīhua'n je tiy'ajt. Co pinjaty mibicy Dios, e ca' yajniguēxīgy co oybi tuñ, ca' tiydudāgy mibicy Dios. ²¹ Je Abraham yejc tūg iixpejt nej jēbi huaad ngapxymidoohuim Dios co jecy'ajty je' ymang Isaac cīyējcy nej tūg huindzigi'n ma Dios. ²² Je Abraham ymibijc co Dios yjiijity etz nañ ycapxymidou nej Dios nīmaayi. Paady nejhuīyīm co yjanchity co Abraham mijpidacy je' Dios miid co cuyduñ jadun nej Dios nīmaayi. ²³ E jadun oy cuydudāy nej yjaybetyity ma Dios nēcīy: "Yí Abraham ymijpidac Dios, paady Dios ymecxtaayi ypocy, e ycōbijci jadun nej jihuīy ca' anajty ytundīgoy." Paady ycixpi Abraham oyñaydijyī: "Co Dios minaymigūg'adyī."

²⁴ Cham nejhuīyīgix co Dios ycōbijcpy jāy huidibi cuydungixp yí ytiy'ajt, e ca' mminānim miid jēy co ymibijccixy. ²⁵ Tīm jadun nej Abraham yjajty, nañ tīm jadun yjajty miid je tōxyjāy huīdi anajty yxī Rahab, huidibi anajty ooy ti ytundīgoy miid mayyēydijc. Je Rahab ycoyūdz ma ytijc nimetz jāy huidibi anajty Israel jāy yaj'ijx'ijtyp, e chi yajqueegīy ma huīngbi tū'aa, e jadun ajcxy yajtzoocy ma ymidzip. Miid co jadun ojjāy'ajtin tuñ miid je Israel jāy, chi Rahab oy paady je nīdzoocin ma Dios. ²⁶ Je nīnīcx huidibi ca' alma mīdity, ca' ni ti mic'ajt mīdity. Nañ tīm jadun pinjaty mibijcp co Dios yjiijity, e ca' cuyduñ Dios ytiy'ajt, yí ymibijcin ca' Dios cuendipicy.

3

Co pinjaty nigapxy ni'ojīy ymīgūg

¹ Migūgtjic ajcxy, huīnmaygix yajxon pen janch mnajtztzōgīyīgixy co ajcxy mīnīhuīndzin'adaangixy Dios y'ayuc. Com iich ajt huidibi nyaj'ixpijcin Dios y'ayuc, pen tundīgooyīm nīgī mij nyajtiydunānim. ² Nidūg'ōcīy iich ajt ndundīgooyīm mināajity. Pen ji pin ca' y'īdīgooy ycapxtīgooy, yí tiydudāgy anajty yjāy'aty, jēbi nīaygūend'adyī yajxon, e ca' huaad y'ocjactundīgooyī. ³ Ypidacpy jāy freno ma cohuay y'ahuac jīgix jēbi ane'my je cohuay nej tzocy. Nañ jadun tzocy co jāy ajcxy huen y'ahuac ahujtzcixy jadun nej jāy cohuay ane'my miid freno. ⁴ Nañ jadun yí barco oy mabaad ooy yjamijity, per ooy poj ytijminyī ytijxibyī. Je barco yaj'ane'm yajxon miid tūg pi'c pujx yindi'cni huīdib xījip timón. Yajxon ytūyōy je barco ma je' timdzocy je huīdibi ane'mip. ⁵ Nañ jadun yjaty miid yí tootz, janch tīm yindi'cni yí, per ooy mij cajee tuñ jībīcpi, jēbi y'īdīgooy ycapxtīgooy mij cajee. M'ijxyp miich ajcxy nej tīm yindi'cni jīn mij ooy nōgy quipychaa mīy'ujtz. ⁶ Yí jāy ajcxy y'ahuac nañ tīm jadun nej pi'c jīn, miid nhuīn n'ahuac mijcajee n'īdīgooyīm ngapxtīgooyīm. Co jadun n'īdīgooyīm ngapxtīgooyīm, chi jēbi mijcajee midundīgooyīm mayjāy. Co n'īdīgooyīm ngapxtīgooyīm, etz nayyajpocycāhuīm, chi nīgūēxīgy canāgnax jībīc-huīnma'n huīdibi

nmiid'ajtim. Jada jibic-huinma'n̄n̄ jim yi' nbaatim ma je mujcu' huidibi tzinaayb ma yi inferno. ⁷ Yi naaxhuiñjāy ti mimadaaccixy yi iyujc animal huidibi queegicp queec-huidijtp, naag iyujc ahua'n̄bi, etz iyujc niijotyp. Ti ooy yajmaxiiygixy yajxon iyujc huindzicyp̄i etz ahua'n̄bi. ⁸ Yi naaxhuiñjāy oy ti mimadaaccixy yi iyujc animal, per nitüg ycaca'ty pin yajxon y'ahuac ahuijtzigipy, ac'iidigooygixp capxtigooygixp ajcxy. Pin ymigüg nigapxy ni'ojiiyb, huin'it je ymigüg ooy jibic ñayjihuihua'nyii, jadu'n nej jihuiy veneno ti möy ymigüg. ⁹ Miid jada' nhuin n'ahuac ajt ngapxpaatim iich ajt nHuindzin Jesucristo etz iich ajt nDios Teedy. Nañ jadu'n miid nhuin n'ahuac nigapx ni'ojiiyim nmigügtijc. Dios ti yajcojy yi jāy miid oyjot oyhuinma'n̄n̄ jadu'n nej yi' oyjot oyhuinma'n̄n̄ miidity, paady ca' y'oyity co n'iidigooyim ngapxtigooyim. ¹⁰ Miid nhuiin n'ahuac ajt miid ngapxim oybi ayuc etz jibic ayuc. Miid nhuin n'ahuac yi' miid ngapxpaatim etz ni'ojiiyim nmigügtijc. Ca' jadu'n y'oyity co jadu'n n'adiitzim. ¹¹ ¿Nej jēbi jada' ma tūg niigop ypidzimy niī pācpi etz niī ta'mbi? ¹² Migügtijc ajcxy, ¿nej jēbi jada' yi higuery ytiim'aty aceituna etz yi muuxy'aadz ytiim'aty higos? Nañ tim jadu'n ma niī ymuxy tamtzpi, ca' jim ypidzimy niī pācpi. Paady ycixp ca' y'oyity co jāy ajcxy capxcixy oybi etz jibicpi.

Je tiy'ajt janchypi

¹³ Pen miich ajcxy huijycujc mnayjihuiyi, pen oyhuinma'n̄n̄ ajcxy mmiid, yajtungix m'oyhuinma'n̄n̄ ma mdzinaayin mjogy'ajtin. Ca' huaad ci'm ñaygōmāayigixy. Miid je oyjāy'ajtin huidibi ajcxy mdumyb huen jāy ci'm nejhuiiygixy co oyhuinma'n̄n̄ miich ajcxy miid'ajtcixyp. ¹⁴ Pen ta'm mjot mhuinma'n̄n̄ mjihuiiygixy, pen mga'oy'ijxcixyp ymigügtijc, pen mhunnaxtugaangixyp ymigügtijc, pen jadu'n mjihuiiygixy mhuinmaayigixy, huin'it ca' huaad mnaygōmāayigixy ci'm co mdzachcuydungixy Dios ytiy'ajt, com ca' yjanchity, nigoo m'aniidaaccixy. ¹⁵ Jada jibic-huinma'n̄n̄ ca' jada chooñ ma Dios huidibi tzinaayb tzajpjoty. Ya naaxhuiñ jada jibic-huinma'n̄n̄ yajpaady, miid co jāy tzachnijot'ajtcixy jibic-huinma'n̄n̄. Yi mujcu' yejcpy jada jibic huinma'n̄n̄, e ca' nminanim co Dios yecy jada jibic-huinma'n̄n̄. ¹⁶ Paady ycixp co jāy ajcxy ycanay'ixa'nyii, co huinnaxaangixy ymigüg, chi ca' oy y'ijtcixy, oy ajcxy ñaymidundigōoyigixy mijcajee. ¹⁷ Je huijy'ajt cujc'ajt huidibi Dios yejcpy, ooy yi'. Yi Dios huidi tzinaayb tzajpjoty oyhuinma'n̄n̄ ymiid. Pen nyajtuunim je tiy'ajt huidibi Dios ti xymooyim, chi jotcujc ndzinaayim, ca' ma tzip capxy, etz nmimecxtujcim nmigügtijc, etz yung naxy jot huinma'n̄n̄ nmiiid'ajtim, etz nba'ayoohuim nmigügtijc, etz nduunim oyjāy'ajtin, etz tudāgy nhuinma'n̄n̄ nmiiid'ajtim. E ca' nigoo naybidaacim jadu'n nej jihuiy nmijpidaacim Dios, e ca' yam yjanchity. ¹⁸ Co nyajtuunim je huijy'ajtin cujc'ajtin huidib Dios yejcpy, chi jotcujc ndzinaayim miid tudāgy njot nhuinma'n̄n̄, jadu'n nej jēb Dios jāygidāgy.

4

Co pinjaty nijot'ajtcixy mayñax tzinaayin

¹ ¿Ma'amy ajcxy mdijy chooñ je tzip capx huidibi yajpatp ma miich ajcxy? Tüg'óciy yi jadu'mbi jibicpi yajpatp ma ajcxy mjot mhuinma'n̄n̄, paady ycixp mganay'ayuc-huinjihuiiygixy, e tzipcapxy myajcojcxixy myaj'abadiiygixy. ² Ooy miich ajcxy tijaty mjatzojccixy, e ni ti mgapaatcixy, e huin'it mjāyay'öccixy. Ooy m'adzojccixy tijaty migüg yjē'ajtyp, paady ycixpi mdziptungixy, etz mganay'ixāanigixy. Ca' ti jotcujc'ajtin mbaatcixy, com ca' ajcxy mbijctzoogixy ma Dios. ³ Co mjamibijctzoogixy Dios, chi ca' ti mbaatcixy, miid co mbijctzoogixy miid jibic-huinma'n̄n̄. Mbijctzoogixyp co myajtunaangixy ma ca' ypadyii. ⁴ Mdundigooyb ajcxy. ¿Nej ca' mnejhuiiygixy co Dios ca' jāygidāgy pen mdzachnijot'ajtyp ajcxy yi mayñax tzinaayin? Pinjaty nijot'ajtcixyp yi mayñaxpi tzinaayin, jadu'n yi' ajcxy nej yi jacjadyii jāy ya naaxhuiñ huidibi ca' yajmij'ajtcixy Dios ytiy'ajt. Hue' je' ajcxy y'ahuimbity Dios ymidzip. ⁵ Nej miich ajcxy mdijy, naadigi' ymiñ jaybety ma Dios yñecy: “Je Espíritu Santo huidibi Dios ti xy'adigiim ti xyjottigiim ooy xychojcm xyjihuiyim mijcajee.” ⁶ Dios ninigoobi

may'ajt oy'ajt tuuñ miid iich ajt ycixpi, paady ycixpi ymina'n ma Dios ñecy co ca' yi' oy'ixy pinjaty amij agix nayjihuiyip. Dios yejcpy may'ajt oy'ajt ma yi jäy ajcxy huidibi yung naxy jot huinma'n miidity. ⁷ Naybidáacigix cixyot huinijot ma yi Dios. Mic mihuindinaaygix yi mujcu', e jihuägipy yi' ma miich ajcxy. ⁸ Ojadajtcix Dios miid oyjot oyhuinma'n, e Dios xypubedipy xypudigihuiipy ajcxy. Miich ajcxy pocyjäydijc, ixmajtcix yi jibic-huinma'n. Yajhuaatzcix yi mjot yi mhuinma'n miich ajcxy huidibi ametz jotmetz mibijcp. ⁹ Tajcix maygix, amutzciygix. Huen yi mxicín yi mxondaacín ahuimbity jiiyin yaaxín. E yi mjotcujc'ajtin huen ahuimbity tajii mayii. ¹⁰ Pidaccix yung naxy yi mjot yi mhuinma'n ma yi mHuindzin Dios, e yi' may'ajt oy'ajt tunipy miid miich ajcxy ycixpi.

Ca' huaad nigapxcixy ni'ojiiygixy ymiigügtijc

¹¹ Migügtijc ajcxy, ca' mnayñigápxigixy mnayñi'ojiiygixy miñ xyipy. Pen mnigapxyp mni'ojiiyb mmigügtijc, hue' mnixiicpy myajxiicpy Dios ytiy'ajt huidibi minaamb co myajmij'adipy yi mmigüg jadu'n nej mnayajmij'adyii ci'm. Pen mnixigamyb myajxigamyb Dios ytiy'ajt, ca' anajty mguyduñ yi tiy'ajt, e jadu'n yhuimbizimyb nej ixipy miich mina'n co Dios ytiy'ajt ca' yi' y'oyity. ¹² Dios tügpajc huidibi ane'min pidägy, e yi' je' tügpajc huidibi tiydunamb pocyjäy. Yi Dios tügpajc huidibi yajtzögip o yajtigoyip jäy ajcxy y'alma. Paady ycixpi miich ajcxy ca' ypadyii nicxy migüg mnigapxcixy mni'ojiiygixy.

Dios tügpajc nejhuüy nej je jabombi mimb cidacp

¹³ Tungix cuendi iich n'ayuc miich ajcxy huidibi minamb: "Cham o jabom nnicxim ma yijimbi naax cajp, e jim nyajnaxim jimijt agujc jotcujc, jim negocio nduunim, ooy mijcajee nbaatim." ¹⁴ E miich ajcxy ni mganejhuiygixy ti je' anajty je jabombi mimb cidacp. Je jugy'ajtin ni pin ca' nejhuüy nej pin chinähua'n yjugy'ada'n. Jadu'n miich ajcxy mjogy'ajtin nej joc co y'ocquëxigy cham, e tim tügjaxigy ti ñitigooyii. ¹⁵ Jac'oy ajcxy mmína'nip: "Pen Dios jadu'n tzojp, pen xymooyim jugy'ajtin, jëbi cham o jabom nduunim tijaty." ¹⁶ Miich ajcxy ci'm mdzachyajnihuinmaaygixy ti mdunamyb, ci'm mdzachnaygömayyii ajcxy. Ca' jadu'n y'oyity co ci'm mnaygömayygixy; co ci'm mnaybidáacigixy amij agix, ni Dios mgamibjccixy. ¹⁷ Pin janejhuiyb je oybi, e ca' tuñ, pocytumb anajty.

5

Je comeñyjäy yjugy'ajtin nitigoyam

¹ Comeñydijc, oc'amidoo'ijtcix nej cham nmína'ñich. Amutzciygix, tajcix maygix co xyñiminaangixy ayo'n. ² Miich ajcxy mmeñ etz ajcxy mjogy'ajt ñitigoyamb yi', miich ajcxy mhuit mducxy ti uucxyting yjicxtäyii. ³ Miich ajcxy m'oori, ajcxy mplata, ajcxy mmeñ naadigi' ti myujpijccixy ti m'amay'ajtcixy. Ti ixipy myajtungixy miid oyjäy'ajtin. Co ti myujpijccixy ti m'amay'ajtcixy ji jadu'n je tiy'ajt co mdundigooygixy ma Dios. Miid co yi mmeñ ca' ti myajtungixy miid oyjäy'ajtin, paady ycixpi ayo'n mbadaangixy miid je xii tiempo huidibi mimb cidacp, mina Dios tiydunaangixy pocyjäydijc. Nitigoyamb miich ajcxy m'oy'ajtin. ⁴ Mdundigooygixyp co ca' ca'pxy ti mmujuuygixy mdumbidijc huidibi ti myajtungixy ma ajcxy mgamdu'. Yi mdumbidijc cham ooy miich ajcxy xiy ma Dios. Yi Dios, je Huindzin mijpi, huidi ane'mdaayb tüc'ócixy jiiyb tzajpjoty etz ya naaxhuiñ, yi' ñejhuiydaayb nej miich mdumbi ajcxy yminaangixy. ⁵ Ti miich ajcxy agujc jotcujc mdzinaaygixy ya naaxhuiñ miid mayñax xondaacín. Ti miich ajcxy mgüxyii mbedyii, ti ajcxy mjotcujc'ajtcixy. Cham m'ahuijxcixyp yi tzaachypí yi ayo'n huidibi ajcxy mbadamyb ma Dios, jadu'n nej huaj nicxpi ahuixy co jäy ajcxy chüdza'nyii. ⁶ Miich ajcxy comeñyjäydijc ti miich ajcxy mxigixy mñihuambejtcixy, mdzaachytungixy ti myaj'öccixy jäy ajcxy tudägypi, e ca' yi' ajcxy xymihuimbijty.

Je mecxtujcín etz je capxtägi

⁷ Migügtijc ajcxy, yajtungixy mij yi mecxtujcin mabaad anajty je Huindzin Jesús ymiñ jadügtecy ya naaxhuiñ. Tim jadu'n nipaady nej naymidumbidijc ahuijxcixy je tibi nidungiiygixy, ahuijxcixy miid mecxtujcin je oga'n tuu etz je poj tuu huidi miid je' ypidägy yhuindihuipy. ⁸ Miid'ajtcix nañ jadu'n ooy mecxtujcin, etz ca' mjetmetzciiygixy, com huingomb je tiempo mina ymiina'ñ je Huindzin Jesús ya naaxhuiñ jadügtecy. ⁹ Migügtijc ajcxy, ca' jadüg jadüg mnayñigápxigixy nayñi'ojiiygixy. Pen jadu'n mdungixy Dios miich ajcxy xyajpocycähuiipy, com tim huingonip je xii je tiempo mina Dios tiyduna'ñ jäy ajcxy miid ypocy ycixpi. ¹⁰ Migügtijc ajcxy, pijccix je ijxpejt jadu'n nej tzaachypi minajxy yajnajxy je profetas ajcxy huidibi ajcxy iihuäcxp capxhuäcxp je Huindzin Dios y'ayuc. ¹¹ Minaanim jadu'n, miid co ajcxy ooy mímecxtucy nej jäy jibic ytuuñ miid yi' ajcxy, e chi jotcujc cham yajpaady ma Dios. Ti jada' mjatymidoogixy je ayuc nej Job ayo'n tzaachypi minajxy yajnajxy, e ymímecxtujc je'. Miid co ooy anajty mijpidägy Dios, paady Dios pa'ayoy Job, e conuucx mijcajee.

¹² Migügtijc ajcxy, co tijaty ayuc m'adzohuimbidity, tiydudägy ajcxy m'adzohuipy: "Janch jadu'n o ca' yjadu'nity", ca' ajcxy m'iindägipy. Ca' Dios nigoo m'iibaadipy mgapxpaadipy. Ni ca' m'iibaadipy mgapxpaadipy yi naaxhuiñybi o tijaty ya naaxhuiñ. Huin'it ca' mnayyajpocycähuiiyb ma Dios.

¹³ Pen ji pin ma miich ajcxy ti ayo'n miidity, huen mibijctzoogixy Dios miid yi jäy ycixpi huidibi ayo'n miid. Pen miich ajcxy jotcujc nayjihuiiyip, huen huin'iiygixy Dios.

¹⁴ Pen ji pin nidügti ypigiyi ma miich ajcxy, huoomiingix yi' huidibi ajcxy nigohuajc'ajtp yi mibijcpidijc, jigix ajcxy mibijctzoohuipy Dios miid je pa'mjäy ycixpi, etz pidägipy hueeni aceite ma je jäy ycohuajc etz capxpaadipy yi Huindzin Jesús yxii. ¹⁵ Miid co miich ajcxy mmijpidaaccixy e mmibijctzoogixy Dios, paady ycixpi tzögipy yi pa'mjäy. Chi je Huindzin Dios yejcnip mic'ajt oy'ajt, etz ymecxtaayipy yi' ypocy huidibi anajty ti tuñ.

¹⁶ Capxpidzim yi mbocy nidüg nidüg. Ñayñibijctzoohuiiyigix nidüg nidüg ma Dios, jigix ajcxy mdzögipy. Pen tüg tudägyipi jäy ymibijctzooyb yi Dios cixyot huinijot, madägipy yi' miid y'oración. ¹⁷ Elías nañ tim jadu'n anajty yjothuinma'ñ miidity nej iich ajt. Janch cixyot huinijot mibijctzooy Dios ca'jity ytüy, e ca' je' jadu'n ytuuy tugig jimijt ja tudujc po'. ¹⁸ Chi jadüg'oc Elías mibijctzoy Dios co huen tüy, chi Dios yajtuuy, e chi ya naaxhuiñ yhuindiiy je jäy ajcxy ypidägy.

¹⁹⁻²⁰ Migügtijc ajcxy, pen ji miich ajcxy nidüg ñiidigoy ytüdigoy ma yi Dios ytiy'ajt, e huin'it tüg quëxigipy pin ymigüg yajhuimbidity ma Dios ytiy'ajt, nejhuuiygix miich ajcxy co pin huidi yajhuimbijtp ymigüg ma Dios ytiy'ajt, huidibi ti ñiidigooy ti ytüdigoooy, ti je' anajty tüg alma yajtzögy ma yi o'cin, e ti anajty yajpocynihuaatztäy.

1 PEDRO

Yi Neczy Huidibi San Pedro Yajnigüeje Je Judio Mibijcpidijc

¹ Ich Pedro, Jesucristo ti xyajniñibicyich ngapxhuäcxibich yi' y'ayuc. Jada necy najnigüejeyp miich Israel jäy huidibi adzinaayb xim yam jim Ponto naaxjot, jim Galacia naaxjot, jim Capadocia naaxjot, jim Asia naaxjot etz jim Bitinia naaxjot. ² Miich ajcxy migügtijc Dios Teedy ti xyhuin'ijxcixy, jayijp Dios ti nejhuñy co xyjäy'ada'ñyii ajcxy. Dios ti yajtigiyi'yi' yjihui'ñ ymic'ajt ma miich ajcxy mjot mhuiñma'ñ, huen oyjot oyhuinma'ñ myajtunipy ajcxy jadu'n nej Dios huinma'ñ xymoogyixy. Dios miich ajcxy ti xyhuin'ixy jigix mgapxymidohuipy Jesucristo, je huidib ñi'py teem cuy miid miich ajcxy ycixpi. Pidaaccix mhuiñma'ñ co mgapxymidohuaangixy Dios jadu'n nej jecy'ajty je Israel jäy ytuñ, je taab anajty Moisés yaj'ögy iyujc etz yajniñidicxy ajcxy nidüg nidüg je ni'py, je' anajty ajcxy ytiy'ajt'ajtipy co capxymidohuaangixy Dios. Huen Dios may'ajt oy'ajt mijcajee tunipy ma miich ajcxy, chi jotcujc mdzináaygixipy.

Jijp'ijxcix jugy'ajtin huiniñibi

³ Yi Dios, ich ajt nHuindzin Jesucristo yTeedy, huen capxpaady y'ity, miid co may'ajt oy'ajt ti tuñ miid ich ajt co ti oyduñ huinjemybi ich ajt njot nhuiñma'ñ, jébi n'ijtim Dios yjäy. Jadachambi ooy nijp'ijxim je jugy'ajtin huiniñibi, miid co Jesús yjugypijcy huinjemy ma anajty ti y'ögy. ⁴ Nañ ooy nijp'ijxim tijaty Dios xymöhuaanim jibby tzajpjoty, huidibi ca' yhuindigoy, huidibi ca' yjibiciy, etz huidibi ca' ycixy ytigoy. ⁵ Dios xycuend'adip ajcxy miid yi' ymic'ajt, ixti jiini co anajty ajcxy je m'alma nidzoocin padaangixy, co anajty je naaxhuiñ ycixy ytigoy. Mbadaangixy m'alma nidzoocin miid co ti mmijpidaaccixy Dios ytiy'ajt.

⁶ Paady miich ajcxy ooy jotcujc'ajtcixp. Oy cham tzaachypi m'ocminajxcixy m'ocyajnajxcixy miid co jäy tzach'ijxmadza'ñ miich ajcxy mjot mhuiñma'ñ. Niği ooy jotcujc nayjihuiñyigixy co ajcxy yi' m'alma nidzoocin padañ. ⁷ Dios y'ixamyb ñejhuñhuamyb pen janch miich ajcxy cixyjot huiniñjot mmijpidaaccixy yi' y'ayuc. Paady miich ajcxy ayo'n tzaachypi mminajxcixy myajnajxcixy jébi niği myajhuaatzcixy mjot mhuiñma'ñ, tim jadu'n nej jäy yajhuaatzcixy yi' oori miid jün. Dios niği tzocy miich ajcxy huidib yi' ytiy'ajt mijpidaaccip, ca'ydi oori. Pen tudägy miich ajcxy mhuiñma'ñ, pen ca' mhuiñma'ñytigajtcixy co tzaachypi mminajxcixy myajnajxcixy, chi capxpaady ajcxy m'idipy etz mbaadipy ajcxy jotcujc'ajtin co anajty Jesús ñayguëxigiyii jadügtecy ya naaxhuiñybi.

⁸ Oy miich ajcxy ca' ti m'ijxcixy Jesucristo, per myajmij'ajtpy ajcxy, e cham oy ca' m'ijxcixy Jesucristo, myajmij'ajtip ajcxy yi' ytiy'ajt. Co ajcxy mmijpidaaci Jesucristo ytiy'ajt, chi ajcxy ooy mnayjihuiñyii niği jotcujc anaxy. Je jotcujc'ajtin huidib mmiid Dios je' yejcp. ⁹ Paady ycixpi ti mmijpidaaccixy Jesucristo co ajcxy m'alma xyajnidzögaani.

¹⁰ Jadu'n nej Jesucristo xyajnidzögaani miich ajcxy m'alma je Dios y'ayuc najtzcaxiñybi ooy anajty jecy'ajty janejhuiñhuaangixy nej Dios y'ayuc ñigüeje, e ca' ajcxy huinjihuiñy, je huin'it tiempo anajty ajcxy capxhuäcxp Dios y'ayuc jadu'n nej Dios may'ajt tuna'ñ miid miich ajcxy ycixpi. ¹¹ Je Dios y'ayucnajtzcaxiñybi jecy'ajty ooy ajcxy jahuinmay, ooy ajcxy jahuinjihuiñhuañ nej yhuimbizimy je ayuc huidibi ajcxy ymiid jotjoty huinma'ñyjoty, je ayuc huidibi Jesucristo yajmiguejx yi' yjihui'ñ ymic'ajt, je Espíritu Santo, jadu'n nej ajcxy najtzcaxiñy co je Cristo tzaachypi minaxa'ñ yajnaxa'ñ, etz co ñicxa'ñ jadüg'oc tzajpjoty. ¹² Dios yajnejhuñy yi' y'ayucnajtzcaxiñybi co je' huidib ajcxy ycapxhuäcx jiini je' ytuna'ñyii yjada'ñyii, ca' ajcxy ixa'ñ. Migügtijc ajcxy, Dios ti yajtuunyii ti yajjadyii ma miich ajcxy je mxii mdiempo nej anajty je' y'ayucnajtzcaxiñybi najtzcaxiñy jecy'ajty je tiy'ajt. E jadachambi jadu'n nej Dios ti yajtuñyii ti yajjadyii ti jäy capxhuäcxty ma ich ajt nidüg'óciy. Je jäy huidibi capxhuäcx je tiy'ajt ymiid anajty

ajcxy je Dios yjihu'i'ñ ymic'ajt huidibi Dios anajty yajniguejxip, chooñ tzajpjoty. Ixti je ángeles huidibi ajcxy tzajpjoty tzinaayb yjanejhuihua'ñ nañ jadu'n nej Dios ti yajtuñyii ti yajjadyii ma miich ajcxy, e ni ca' ajcxy nejhu'i'y.

Chojcxy Dios co tudägy ndzinaayim

¹³ Paady ycixp ni'ixi' pidaaccix mjot mhuinma'ñ. Huijy ycuje ajcxy mdzinähuip. Jijp'ijxcix je may'ajtin oy'ajtin huidibi Dios tunamyb miid miich ajcxy ycixpi co anajty Jesucristo yhuimbity ya naaxhu'i'ñ. ¹⁴ Capxymidoogix Dios jadu'n nej pi'c'anäg capxymidoogixy ytaj yteedy. Ca' huaad m'octundigóogixni jadu'n nej anajty mdundigoogixy co anajty ca'ni mnejhu'i'ygixy Dios ytiy'ajt. ¹⁵ Oyjot oyhuinma'ñ ajcxy myajtunipy jadu'n nej Dios oyjot oyhuinma'ñ yajtuñ, je huidibi ti xyhuin'ixy ajcxy. ¹⁶ Com jadu'n ymiiñ jaybety ma Dios ñecy, jadu'n Dios migapxy je' yjäy: "Mi'idip ajcxy oyjot oyhuinma'ñ jadu'n nej iich nmi'ityich oyjot oyhuinma'ñ."

¹⁷ Miich ajcxy m'ojadajtpy je Dios Teedy. Dios ca'p tzaachytuna'ñ yi jäy ajcxy huin'ixpety. Hue' je' chaachytunipy ajcxy nidüg nidüg jadu'n nej ajcxy yhuinma'ñymiidity, pen jibic-huinma'ñ ymiid, chi tzaachytunipy niigi. Paady ycixp tiydudägy ajcxy mdzinähuipy. Tzigiiygix Dios. ¹⁸ Je Dios canan hue' ti xyajpocyñihuaatzim co ti cojuy iich ajt nbocy miid oori o plata, jadu'n nej anajty nbocytuunim co nmijpidaacim n'ap ndeedy y'ayuc ytiy'ajt huidibi ca' ytiy'ajtity. ¹⁹ Hue' janchtiy Dios ti xyajpocyñihuaatzim miid Cristo co y'o'cy cruudzcixy, e chi ñi'py teemy yojcy miid iich ajt nbocy ycixpi. Jadu'n nej anajty Israel jäy ñayyajpocyñihuaatzigixy co yaj'ögy tüg boregi ung, huidibi ca' anajty ti jibicpi miidity, e chi ñi'py teemi cuji. ²⁰ Jadu'n nej Cristo y'o'cy miid iich ajt nbocy ycixpi, Dios jayijpni jadu'n yajnihuinmayi'y co jadu'n tuna'ñ, ca'ni anajty naaxhu'i'nybi chondägy. Jecy'ajty ca'ni anajty pin nejhu'i'y, e jadachambi Dios ajt ti xyajnejhu'i'iyim. ²¹ Paady ycixp miich ajcxy mijpidägy Dios. Dios yajjuygypijc huinjemy je Cristo co y'o'cy, e Cristo cömay ooy ypidzimy jilby tzajpjoty. Yajmij'ajtcix Dios etz jijp'ijxcix co Dios xyajnidzögaanip ajcxy m'alma.

²² Ti myajhuaatzicixy mjot mhuinma'ñ co ti mmijpidaaccixy Dios ytiy'ajt. Naychójcigix nayjihui'iyigix nidüg nidüg cixyot huinijot, ca' y'ametz yjotmetzity. ²³ Com ti Dios oyduñ miich ajcxy mjot mhuinma'ñ huinjemybi miid yi' y'ayuc ytiy'ajt, co ti mmijpidaaccixy je tiy'ajt huidibi tudägyip, je huidibi ca' ycixy yti'goy, huidibi huinixii ijtp, je tiy'ajt huidibi jugy'ajt yejcpy. ²⁴ Jadu'n ymiiñ jaybety ma Dios y'ayuc:

Je jäy ninicx nidigooyb yi' etz je ninicx y'oy'ajtin nidigooyb yi'. Tim jadu'n nej tüg pijy co ñidecy ytiitzni, chi je pijy jadu'ñyi yca'ni, e chi jadu'ñyi je pijy y'oy'ajtin yti'goy.

²⁵ Dios y'ayuc ytiy'ajt huinixii y'ity, ca' ycixy yti'goy nimina.

Jada je ayuc je tiy'ajt huidibi Dios yjäy ycapxhuäcxyp ma miich ajcxy.

2

¹ Paady ycixp copicy co m'ixmájtzcixipy yi jibic-huinma'ñ nej migüg ajcxy jibic mnigapxcixy. Ca' m'aniidáaccixipy. Ca' ajcxy mnaybidägiyb jadu'n nej jihui'y ooy m'oyjäyity, e ca' yjanchity. Ca' mmigüg ajcxy ti myajca'oy'ixipy. Ca' ajcxy m'iidigoyipy mgapxtigoyipy. ² Jadu'n nej yi ma'xungdijc tzocy chüd, nañ tim jadu'n miich ajcxy tzojccixy jot'ajtcixy Dios y'ayuc ytiy'ajt, jigix jëbi ca'pxy yi mhuinma'ñ mi'idipy ajcxy miid je ixpijcin huidibi Dios xymoogixp, e chi ajcxy m'alma paadipy nidzoocin. ³ Nidzögip miich ajcxy m'alma, peni janch ti mmijpidaaccixy je Huindzin Jesucristo y'ayuc, etz ti mnejhu'i'ygixy nej Dios may'ajt oy'ajt ti tuñ miid miich ajcxy ycixpi.

Cristo je tügpajcpi jaccopicyip

⁴⁻⁵ Yajmij'ajtcix yi Huindzin Jesucristo. Dios ti yhuin'ixyii jëbi yHuindzin'aty ma naaxhu'i'nyjäy etz ooy tzocy. Yi naaxhu'i'nyjäy ca' ajcxy ti tuñcuend, tim jadu'n nipaady nej tüg tzaa huidibi pojtzpidijc ninigoob ca' yajtuna'ñ ma yi tzaadijy ycojy. Yajmij'ajtcix miich ajcxy je Huindzin Jesucristo. Dios yaj'oyi huamyb miid miich ajcxy tügpicy jäy

huidibi yi' yjäy'adaanip, huidibi ojadadaangixp Dios, huidibi Dios ytung tunaangixp.

⁶ Jadu'n yjaybetyity ma Dios ylibro, Dios jadu'n ymina'n:

Jim ma Israel jäy nbidägibich tüg mij'ane'mbi huidibi ti nhuin'ixyich, huidibi ooy ndzocyich, e pinjaty je' mijpidacp ooy njäygidägibich. Je mij'ame'mbi jadu'n je' nipaady nej tüg tzaa oybi huidibi tigihuamb ma tijtaatz co tzaadijc ycojy.

⁷ Miich ajcxy huidibi mijpidacp Jesús, miid miich ajcxy je mij'ame'mbi ooy je' ymijity yjanchity. Per yi' ajcxy ca' mijpidägy Jesús, je' yi' ajcxy ycuydumyb nej ymina'n ma jaybetyity:

Pinjaty ca' capxymidohua'n Dios, ca' ajcxy ixaangixy je Cristo, e jadu'n ajcxy nipaady nej pojtzipidijc huidibi ca' yajtunaangixy tüg tzaa oybi co tzaadijc cojcixy. Yi' Cristo yi' je' je' mij'ane'mbi huidibi ane'mdahuamb tüg'óciy.

⁸ Nañ jadu'n yi' ajcxy huidibi ca' mijpidägy Jesús cuydumyb nej ymina'n ma yjaybetyity: Jadu'n je Cristo nipaady nej tüg tzaa ma jäy ajcxy ycönejpcixy etz ycidaagixy.

Je jäy ajcxy huidibi ca' mijpidägy Jesús, jadu'n nipaady nej jihuüy ycönejpcixy ma tüg tzaa co ajcxy ca' tungixy cuendi Jesús y'ayuc, paady ycixpi padaangixy tzaachypi miid ypocy ycixpi, jadu'n nej Dios ti yajcöducy.

Je huidibi Dios yjäy'adyii

⁹ Miich ajcxy huidibi yajmij'ajtp Jesucristo, ca' miich ajcxy mjadu'nity nej yi' ajcxy huidibi ca' capxymido Dios. Dios miich ajcxy ti xyhuin'ijxcixy. Je rey Jesús je' miich ajcxy ytung mduunip. Oyjot oyhuinma'n miich ajcxy myajtumyb. Dios miich ajcxy xyjäy'ajtp. Miich ajcxy je' xypaat mnidiy'ajt'adipy jadu'n nej Dios ti xyajpidzimigixy ma anajty mdundigooygixy, e ti xyajhuinjihuüyigixy je' ytiy'ajt nej jëb huaad mguydungixy. Jadu'n nipaady nej jihuüy Dios ti xyajtzoongixy agootztuuyb, e ti xyajtigiiygixy ma ytiicxy yjajy. ¹⁰ Co anajty ca'ni mmijpidaaccixy Jesucristo, ca' anajty Dios xytungixy cuendi. Cham co ti mmijpidaaccixy Jesucristo, Dios ti xypa'ayoogixy. Dios miich ajcxy xyjäy'ajtp cham.

Yajtungix Dios y'ayuc ma mdzinaayin

¹¹ Migügtijc ajcxy huidibi ooy ndzocy njihuüyich, jada nyajnimaaaygixyp, jadu'n nej tüg adzinaaybi huidibi ca' chinäy ma ycajp, huidibi nihuidijtp, ca' tüg it mdzinaaygixy, copicy co ca' mnijot'adipy ajcxy yi' jibic-huinma'n, jadu'n nej je jäy ajcxy ma m'adzinaaygixy nijot'ajtcixy jibic-huinma'n. Je jibic-huinma'n ca' ñaygodigiiygixy miid oyhuinma'n. ¹² Tiydudägy mdzinähuiipy ajcxy, yajtungix oyhuinma'n miid je jäy ajcxy ma miich ajcxy m'adzinaaygixy, je jäy ajcxy huidibi ca' nejhuüyigixy Dios ytiy'ajt. Oy ajcxy ca' xy'ixaangixy etz jibic xyñigapxcixy xyñi'ojiiygixy, miid co oyjäy'ajtin mdungixyp, chi ajcxy jäygidägipy, etz miich yi' ajcxy xycapxpätcixipy ma Dios, mina anajty Dios ñinmiñyii ajcxy.

¹³ Miid je Huindzin Jesucristo ycixpi, capxymidoogixy tüg'óciy gobierno tungmiidpi etz cajp tungmiidpi y'ane'min ycötujcin, nañ capxymidoogixy jadu'n nej je mij'ane'mbi y'ane'my. ¹⁴ Nañ capxymidoogix tungmiidpi ajcxy huidibi je mij'ane'mbi yquejxyp jigix tzaachtunipy je' ajcxy huidibi tundigooyb etz capxpaadipy je' ajcxy huidi oyhuinma'n ytumyb. ¹⁵ Dios chojcyp co tiydudägy mdzináaygixipy, jigix jëbi je jäy ajcxy huidibi ca' huinjihuüyigixy Dios ytiy'ajt, huidibi tzuu huinma'n miid, ca' ajcxy mihuinma'nybaady nej jibic xyñigapxip.

¹⁶ Tzinaaygix jadu'n nej jäy chinäy huidibi cuydumb Dios ytiy'ajt, huidibi ti ixmach yi ayuc tiy'ajt huidibi ca' ytiyity. Pen mmidundigooyb ajcxy tunmiidpi y'ane'min ycötujcin, ca' huaad mnaybidäacigixy jadu'n nej jihuüy Dios xylugarmooygixy jigix jëbi mdundigooygixy. Copicy mdzinähuiipy ajcxy jadu'n nej Dios ytumbi huidibi oy tumb.

¹⁷ Migüg'adii ajcxy tüg'óciy jäy. Naychójcigix nayjihuüyigix nidüg nidüg huidijaty yajmij'ajtp Dios. Yajmij'ajtcix Dios. Capxymidoogix yi' mij'ane'mbi.

Jadu'n nej Cristo tzaachypi yajnax

¹⁸ Tumbidijc ajcxy, imidoogix capxymidoogix mhuindzindijc. Pen oyjäy yi mhuindzin huidibi yung naxy yjot yhuinma'nñ miidity, o pen ahua'njäy jibicjäy, ca' yñejity, capxymidoogix. ¹⁹ Yjäygidägipy Dios pen mmecxtujctaaygixyp nej jäy ajcxy xychaachtungixy miid co oyhuinma'nñ miich ajcxy mmiidity. ²⁰ Pen ti anajty mdundigoogyx, e paady anajty myajtzaachtungixy, ca' pin xycömaygixipy xycapxpäadygixipy, oy ti mjamecxtujctaaygixy huidijaty tzaachypi. Pen ooy mdungixy etz tzaachypi mbaatcixy, chi janchtiy Dios jäygidägipy nej mmimecxtujctaaygixy. ²¹ Dios chojcpy co mmecxtujctäaygixipy je tzaachypi huidibi mminajxyp myajnajxcixyp miid co oybi mdungixy. Paady ycixpi je Cristo tzaachypi ayo'n minajxy yajnajxy miid iich ajt ycixpi, e yejc ijxpejt jadu'n nej jëbi huaad mminajxcixy myajnajxcixy tzaachypi ayo'n, nañ nej jëbi huaad mbanicxcixy mbayöygixy yi' y'ijxpejt. ²² Je Cristo ca' je' ma ytundigooy, e nañ ca' pin huin'iiñ. ²³⁻²⁴ Je Cristo co jäy ajcxy y'oji, ca' je' y'adzouhuimbijty; e co jäy ajcxy chaachytuuni, ca' mijotmäthuimbijty je jäy ajcxy, nigü Dios yajpuhuaniiy. Com Dios je' paatip nej chaachytuna'nñ huidi ajcxy tundigooyb. Je Cristo ci'm yajnicx iich ajt ndzaachypi co y'o'cy cruudzcixy. E miid co jadu'n y'o'cy cruudzcixy miid ajt nbocy ycixpi, chi jëbi n'ixmajtzim jibic-huinma'nñ etz tudägy jëbi ndzinaayim. Miid co Cristo je tzaachypi minajxy yajnajxy miid iich ajt nbocy ycixpi, paady nidzoocim ajt n'alma. ²⁵ Miich ajcxy jecy'ajt mniidigooyb mdüdigoooyb anajty ajcxy ma Dios, mgi'mhuinma'nñ anajty ajcxy myajtumyb nidüg nidüg, jadu'n nej jäy yborregi ñiidigoy ytüdigoy ma yuugjot. Cham miich ajcxy ti mnijothuimbijtcixy Dios, ti ajcxy mhuinma'nñymech ti mmijpidaaccixy Jesucristo je huidibi xycuend'ajtp ajcxy.

3

Nej huaad chinaaygixy pinjaty ti pijcixy

¹⁻² Jadu'n nej tumbidijc capxymidooy yhuindzin, nañ tim jadu'n miich ajcxy töxyjäydijc capxymidoogixy mñäy. Pen mñäy ca' capxymidooy Dios, ca' mijpidäga'nñ Jesucristo, miid co miich oyjot oyhuinma'nñ myajtunipy miid yi', ycadimjetyity huin'it mñäy yhuinma'nñymedzip etz mijpidägipy Jesucristo, co y'ixipy nej miich mmiidity tudägy'ajtin. ³ Töxyjäydijc ajcxy, ca' mnyagömayiiyb miid mhuit mxojx oyjatpyi tzoujatypi, miid oori cijiitz etz oori taatztiy, miid co mgöhuay mdzachcüdigy miid cüd oyjatyp. ⁴ Hue' janchtiy jäy miich ajcxy xycömayip miid co oyjot oyhuinma'nñ anajty myajtungixy, miid co yung naxy mjot mhuinma'nñ ajcxy miidity. Co jadu'n mdungixipy jada je' oy jäygidaacni ma Dios huinixii. Yi mhuit yi mxojx etz oori taatztiy cixip tigoyip yi'. ⁵ Nañ tim jadu'n anajty jecy'ajty je töxyjäydijc huidibi anajty ajcxy cömay ijtp, yajtuuñ anajty ajcxy oyjot oyhuinma'nñ, ymijpidacyp anajty ajcxy Dios, nañ ycapxymidooyb anajty ajcxy ñäy. ⁶ Jadu'n nej Sara capxymidooy Abraham. Sara xiigoyäxy Abraham: "iich nhuindzin." Pen myajtumyb miich ajcxy oyjot oyhuinma'nñ jadu'n nej Sara, jadu'n miich ajcxy anajty nej jihuüy Sara ajcxy xy'ung'adyii, pen ooybi mdunipy ajcxy, ca' ti ajcxy mdzigihuipy.

⁷ Nañ jadu'n miich ajcxy yëydijctijc, yajtungix pa'ayo'n miid mdöxyijc, yajmij'ajtcix. Com jac mic miich ajcxy ca'ydi yi töxyjäydijc. Dios may'ajt ti tuñ tú'ciy miid miich ajcxy, paady ycixpi copicy yajxon naymiiddzinäayigix jigix Dios cuendipigipy etz xymöhuipy tijaty ajcxy myajmibijctzooyb.

Co pinjaty xymidundigooy, ca' myaj'ahuimbidity

⁸ Jada ayuc cham njacyajnimaydaayb nidüg'óciy miich ajcxy. Tú'ciy mjot mhuinma'nñ mi'ijtcix, naymigüg'ajtigix yajxon, naychójcigix nayjihuiiyigix nidüg nidüg, nayba'ayouhuigix nidüg nidüg, pidaaccix yung naxy mjot mhuinma'nñ. ⁹ Co ajcxy migüg xymidundigoyipy, ca' myaj'ahuimbidity jadu'n nej anajty ti xytuñ. Co ajcxy migüg xyñi'ojihuipy, ca' myaj'ahuimbidity jadu'n nej anajty ti xyñi'ojiiy. Nigi nibijctzohui' ma Dios miid yi' ajcxy ycixpi, nigi mi'oyjäy'at mmigüg. Huin'it nigi Dios xyconuucxip. ¹⁰ Com jiiy ymiñ jaybety ma Dios ñecy:

Pinjaty jotcuyc tzinähuamb e yajnaxa'n xii tiempo agujc jotcuyc, nay'ahuijtziñib ca'ydi y'iidigooy ycapxtigooy, ca'ydi y'aniidägy.

¹¹ Huen jihuägy ma je jibicpi e huen oyjäy'ajtin tuñ. Huen ixmach tüg'óciy tzipcapxy, ca' tzipcapxy ixtáhuipy.

¹² Je Huindzin Dios ycuend'ajtpy yi' je jäy huidibi tiydudägy tzinaayb etz ypubejtcixyp ypudigiygixyp migügtijc co tijaty mibijctzoy. Dios ymijotma'tpy je jäy ajcxy huidibi jibic-huinma'n tumb.

¹³ Pen mdumyb oyjot oyhuinma'n ajcxy, huin'it ca' pin ajcxy xymijotmädiy. ¹⁴ Co oyjot oyhuinma'n myajtunipy ajcxy e huin'it jäy xychaachtungixy, huin'it Dios xyconuucxip ajcxy, e ca' mdzigiygixipy, ni ca' mhuinma'n ydigóoygixipy. ¹⁵ Mijpidaaccix yi Jesucristo iich ajt nHuindzin Dios cixyot huinijot. Pen ji jäy xy'amidoogixy: ¿Ti co mdzachmijpidaaccixy Jesucristo? Tiydudägy m'adzouhuipy miid yung'ajt nax'ajt jadu'n nej mjijp'ijxcixy co Jesucristo xyajnidzogaani ajcxy yi m'alma. ¹⁶ Ca' mgapxipy ajcxy je ayuc huidibi xyajtzo'yduunip. Pen jäy ajcxy xymi'iidigooygixp xymigapxtigooygixp, chi ajcxy jihuihuamyb tzo'ydu'n miid co ca' yjanchity nej ajcxy ymina'n com oybi anajty ti mdungixy. ¹⁷ Pen Dios miich ajcxy jadu'n xyajnijot'ajt co tzaachypi mminájxcixipy myajnáxcixipy, jac'oy co tzaachypi mminájxcixipy myajnáxcixipy miid yi m'oyjäy'ajtin ycixpi, e ca' anajty tzaachypi mminájxcixy myajnáxcixy miid co anajty ti mdundigooygixy.

¹⁸ Je Cristo nañ jadu'n tzaachypi minajxy yajnaxxy co y'o'cy cruudzciy miid jäy ajcxy ypocy ycixpi. Oy je' anajty ca' tibocy miidity, chi je' ti codinäy je jäy ajcxy ypocy, e jadu'n iich ajt ti naymi'oyiim miidi Dios. Oy je Cristo ninicx y'o'cy, per je' y'alma ca' je' y'o'cy, jugypijcy je' jadügtecy miid jemybi ninicx. ¹⁹ Huin'it co Cristo y'o'cy, chi je' y'alma ñicxy, e capxhuäcxy yi' y'ayuc ma jäy y'alma ajcxy huidibi jibictuuyb ijtp. ²⁰ Je jäy ajcxy je' jiiby y'alma ijtp jibictuuby huidibi anajty ca' capxymidoy Dios. Je taab Noé yajcojy je mij barco, ooy Dios ajcxy jecy ymimectujci, huen tijy cayjothuimbijty ajcxy. Jéyi niductujc je jäy choocy ma je mijtuu je mijniigom. Je' co je jacjadyii ca' ajcxy yjothuimbijty. ²¹ Jadu'n nej je nidujctujcpi ajcxy mijpidacy Dios y'ayuc, e chi ajcxy choocy, nañ tim jadu'n iich ajt co nniibejtim je' iich ajt ndiy'ajt'ajtim co nmijpidaacim Jesucristo je huidibi co y'o'cy jugypijc miid jemybi ninicx, etz ti xyajhuaatzim njot nhuinma'n jigix ooy oy nayjihuiyim, etz nañ jadügtecy co anajty n'o'cim xyajjugypijcim miid jemybi ninicx. Co nniibejtim, je' je' je' tiy'ajt co Dios ti xyajhuaatzim njot nhuinma'n. ²² Je Cristo ti je' ñicxy tzajpjoty. Jiiby je' cham y'ity mij'ane'mbi ma Dios, yi' je' ane'mb je ángeles ajcxy huidi tzajpjoty tungmiid etz huidijaty mic'ajt miid tzajpjoty.

4

Yajtungix je mic'ajt huidibi Dios ti xymooygixy

¹ Je Cristo ayo'n tzaachypi minajx yajnax co yhuidijty ya naaxhuiñybi, e chi yajtuuñ oyjot oyhuinma'n miid jäy ajcxy ycixpi. Paady ycixpi copicy miich ajcxy myajtunipy oyjot oyhuinma'n miid migügtijc jadu'n nej Cristo yajtuuñ. Pen miich ajcxy mminajxyp myajnajxyp tzaachypi miid co oyjot oyhuinma'n myajtuñ, chi ca' mjacnijot'ajtip ajcxy jibic-huinma'n. ² Jadu'n nej ajcxy mjactzinähua'n mjacjugy'ada'n, ca' huaad mjacnijot'ajtcixy je jibic-huinma'n. Hue' janchity mdunipy ajcxy jadu'n nej Dios tzocy. ³ Jecy'ajty co anajty ca'ni mnejhuiygixy Jesucristo ytiy'ajt, jibic-huinma'n anajty ajcxy myajtumyb ma mdzinaayin mjugy'ajtin, jadu'n nej jäy ajcxy jacjadyii huidibi ca'ni nejhuiygixy Dios ytiy'ajt. Chi anajty myajtungixy canaagnax je jibic-huinma'n, ooy ajcxy mnijot'ajtcixy maynax jibic-huinma'n. Ooy anajty anaxy mdzach'uccixy vino, huin'it anajty ooy ajcxy ymügyii. Ooy anajty mnixondaaccixy coodz huididii, huin'it anajty ooy m'uuccixy anaxy. Ooy mnijot'ajtcixy xii, ooy anajty m'ojadajtcixy tzaadzech quipychech huidibi Dios ca' jäygidägy. ⁴ Paady ycixpi je jäy ajcxy huidibi ca' nejhuiygixy Dios ytiy'ajt, ca' ajcxy jäygidägy co ca' miich ajcxy cham jadu'n m'idich jadu'n nej yi'

ajcxy y'idich, chi ajcxy jibic xyñigapxcixy xyñi'ojiygixy. ⁵ Ca' mdungixy cuendi yi' ajcxy, com Dios paatip nej ytiyduna'n ajcxy. Je Dios je' tiydunamb nidüg'óciy jäy ajcxy huidibi cham jugy'ajtp, etz tiibi y'öccixy. ⁶ Paady ycixpi ti yajnimäy Jesucristo ytiy'ajt je jäy tiibi y'öccixy jigix yajtiydunipy ajcxy miid Dios ytiy'ajt jadu'n nej yajtiyduna'n yi' ajcxy huidibi jacjugy'ajtp cham. Jëbi huaad ajcxy yjugypijccixy jadügtecy etz y'idipy ajcxy jadu'n nej Dios y'ity.

⁷ Ti ytimyhingoni je xii je tiempo mina ycixaani ytigoyaani tüg'óciy tijaty ya naaxhuiñybi. Paady ycixp tzocy co tiydudägy etz huijycujc mdzinaygixipy, etz tzocy co mjac'ojadadipy mjacmibijctzoohipy ajcxy Dios. ⁸ Ooy ycopicyity co jacnaychójcigix jacnayjihuiñyigix nidüg nidüg. Miid co mnaychójcigixy, paady ycixpi jëbi mnayméecxigixy. ⁹ Naymi'oyjäy'ájtigix nidüg nidüg agujc jotcujc, ca' y'ametz yjotmetzity. ¹⁰ Yajtungix miid je migügtijc jadu'n nej Dios xymooygixy ixpijcin nidüg nidüg. Naybubéjtigix naybudigiiygix miñ xyipy jadu'n nej jäy ajcxy huidibi yajxon Dios ytiy'ajt padungixp. ¹¹ Pen Dios ti xymooygixy ixpijcin jigix jëbi capxhuäcxy yi' y'ayuc, yajxon Dios y'ayuc mgapxhuäcxi. Pen miich xypaat pujjgii jëdzgii, yajxon mdunipy ajcxy jadu'n nej Dios huinma'n ti xymooygixy. Co yajxon Dios ytiy'ajt mguyduunipy, huin'it Dios cömaya'n miich ajcxy, miid co ti mmijpidaaccixy Jesucristo. Je Jesucristo je' cömay'idip etz ane'mip huinixii huinítiempo.

Mimecxtujccixy tzaachypi ayo'n

¹² Migügtijc ajcxy huidibi ooy ndzocy njihuñyich, ca' ooy mhuinmay'ahuidijtcixy co jäy xy'ixhuidijtcixy xypahuidijtcixy, co jäy xychaachtunaangixy jigix jëbi ñiguëxigipy pen janch mmibijccixy Jesucristo. ¹³ Ca' ajcxy mdajipy mmayipy, jotcujc ajcxy mnayjihuiñyib jigix jëbi nañ jadu'n tzaachypi mminajxcixy myajnajxcixy nej Cristo minajxy yajnajxy tzaachypi. Co anajty jadügtecy Jesucristo ñayguëxigyii ya naaxhuiñ miid ymic'ajt y'oy'ajt, jëbi ajcxy jotcujc mnayjihuiñyib. ¹⁴ Pen xymi'iidigooyb xymigapxtigooyb jäy ajcxy, miid co miich ajcxy ti mmijpidaaccixy Jesucristo, jotcujc mnayjihuiñyipy, miid co miich ajcxy miid je Dios yjihuiñ etz Dios ymic'ajt ma mjet mhuinma'n. ¹⁵ Pen nidüg miich ajcxy ayo'n tzaachypi mbaatcixy, oy ca' anajty ti mjäyyaj'öccixy, oy anajty ca' ti mmeetzcixy, oy anajty ca' ti mdundigooygixy, oy anajty ca' ti mnaybidáacigixy ma huingjäy ti ytundigooy, ¹⁶ pen miich ajcxy tzaachypi mminajxyp myajnajxp miid co ti mmijpidaaccixy Jesucristo, ca' ti tzo'ydu'n mjihuñyipy, ñigi Jesucristo cömay'idipy.

¹⁷ Ti xii tiempo tim paatni mina Dios tiyduna'n je jäy ajcxy huidibi cuydumb je' ytiy'ajt. Pen Dios ñich ajt huiidí nmibijcim xytiyduunim e nbaatim hueeni tzaachypi, ñigi tzaachypi padaangixy ajcxy huidibi ca' mijpidaaccixy Dios. ¹⁸ Pen je jäy huidibi oyjot oyhuinma'n miid mic tzaach padaangixy je' y'alma nidzoocin, ¿ti jada ytunaangixy pinjaty jibic-huinma'n miid, pinjaty pocytungix? ¹⁹ Pen tzaachypi mminajxyp myajnajxyp ajcxy miid co Dios jadu'n chojcyp, ca' ajcxy mjetmetzcihuipy, ñigi ajcxy panixcix payöygix oyhuinma'n, ñigi cixyot huinijot mijpidägipy ajcxy Dios; com yi' miich ajcxy xyajcoj, e yi' xycuend'ajtcixp; com Dios yi' je' tudägy etz ñidinaayb je' y'ayuc.

5

Pedro capxhuijp je mibijpidijc

¹ Jada ñich miich ajcxy yajnimaaayb huidibi nigohuajc'ajtp je mibijcpidijc, ñich nañ jadu'n nigohuajc'ajtpyich mibijcpidijc. ñich n'ijxyich co je Cristo ayo'n tzaachypi minajxy yajnajxy. Nañ jadu'n ñich yi' nmiid'idaamybich jadüg'oc co anajty ymiñ ya naaxhuiñ miid y'oy'ajtin ymij'ajtin. ² Jada ñich miich ajcxy nyajnimaaayb: yaj'ixpijccix etz cuend'ajtcix Dios yjäy agujc jotcujc. Ca' myaj'ixpigipy ajcxy ametz jotmetz, cuend'ajtcix Dios yjäy, tim jadu'n nej jäy ycöbixy cuend'aty. Ca' meeñgixy myaj'ixpigipy ajcxy. Miid oyjot oyhuinma'n myaj'ixpijccixy. ³ Ca' adzip ahua'n m'ane'mipy Dios yjäy. Hue'

janchtiy ijxpejt oybi yejccix. Cuydungix Dios ytiy'ajt. ⁴ Co anajty Jesucristo, je huidibi nihuindzin'ajttaayb tüg'óciy, ñayguëxigiyi ya naaxhuiñ jadüg'oc, chi cömay miich ajcxy mbidzimipy. Tim jadu'n nej jäy ajcxy co y'iyiigixy e co ymadaaccixy, chi cömay ypidzim ajcxy. Miich ajcxy cömay nañ jadu'n m'idipy huinixii.

⁵ Myajmij'adipy anäctijc ajcxy, je' ajcxy huidibi nigohuajc'ajtp je mibijcpidijc. Ooy ycopicyity co nidüg'óciy miich ajcxy mnayajmij'ajtigixipy miñ xyipy miid oyjot oyhuinma'ñ. “Dios ca' je' jäygidägy pinjaty amij agix jäy'ajtigixy. Dios ypubejtyp miid y'oyjot pinjaty yung naxy yjot yhuinma'ñ miid.” ⁶ Mgapxcöbigipy ajcxy tydudägy Dios, je mij'ane'mbi, chi Dios xycömayipy mina anajty. ⁷ Mibijctzougix Dios miid tüg'óciy tijaty jotmay ajcxy miid'ajtyp, chi jëbi Dios xypubedipy xypudigihuipy ajcxy.

⁸ Huijycujc m'idipy ajcxy. Nixi' m'idipy ajcxy. Com je mujcu' huidibi xymiidzip'ajtim, ooy je' xy'ix'ijxim xypa'ijxim. Hue' xyajhuinma'ñydgoyaanim, tim jadu'n nej je caa co ixtay ti chüdzamyb. ⁹ Huindina' jijptina' ajcxy je mujcu'. Yi jacjadyii jäy huidibi mijpidaaccixy Jesucristo, nañ yminajxcixyp yajnajxcixyp tzaachypi nañ jadu'n. ¹⁰ Co anajty ajcxy hueeni tzaachypi ti m'ocyajnaxy, huin'it Dios xyaj'oyiipy ajcxy yi mjot yi mhuinma'ñ, xyajmibigip ajcxy yi' ytiy'ajt, xyajjotmicpigip ajcxy. Com Dios yi' je' huidibi may'ajt ti tuñ mijcajee miid nidüg'óciy jäy ajcxy. Yi' je' huidibi ti yaj'oyiy nej jëbi cömay huinixii n'ijtim miid Jesucristo jiby tzajpjoty. ¹¹ Huen Dios y'oy'ajtin etz ymij'ajtin idipy huinixii.

Capxpooçxin yajnajxp

¹² Jada necy nyajnigüeçxy ajcxy miid Silvano iich ajt nmigüg huidibi ndijpyich co ooy yajmij'aty Jesucristo. Hueeni jada ayuc huidibi nyajnijayiyb, nañ ti nbidägyich necyjoty capxhuijin etz ti nbidägyich necyjoty yi Dios ytiy'ajt tudägy, nej Dios may'ajt oy'ajt tuuñ miid miich ajcxy ycixpi. Mijpidaaccix nigü Dios ytiy'ajt, ca'ydi mhuinma'ñydgooçgy.

¹³ Je jäy huidibi ya Babilonia huidibi ajcxy yajmij'ajtcixp Jesucristo, je jäy ajcxy huidibi Dios ti huin'ixy, xyajnigüeçxp ajcxy capxpooçxin. Nañ jadu'n Marcos iich nmigüg, je huidibi njihuüyibich nej jihuüy ngi'm'ung'adyiijich xyajnigüeçxp capxpooçxin nañ jadu'n.

¹⁴ Naygapxpooçxigix xic xon nidüg nidüg miñ xyipy. Je' je' je' tiy'ajt co mnaychójçigixy mnayjihuüyigixy miñ xyipy.

Jotcujc mnayjihuüyib ajcxy nidüg'óciy huidib yajmij'ajtp Jesucristo. Amén.

2 PEDRO

Yi Mimetzpi Necy Huidibi San Pedro Yajniejx Yi Mibijcpidijc

¹ Hich Simón Pedro, tumbich ma Jesucristo ytung. Yi' xy'apóstol'ajtpich etz ngapx-huäcpxyich yi' y'ayuc. Cham ich miich ajcxy jada necy nyajnijayiygixy huidibi ajcxy ti mbaatcixy mibijcín janch oybi, tim jadu'n nej ich ajcxy ti nbáatcixyich mibijcín janch oybi. Hich ajt nDios je Jesucristo huidibi xyajnidzoocim ajt n'alma tudägy je', e tudägy ytuñ miid ich ajt nidüg'óciy. ² Huen Dios mijmay'ajt tunipy miid miich ajcxy, etz jotcujc'ajtin xymöhuipy mijcajee, miid co tiy'ajt ti mbaatcixy ma Dios etz ma je Jesús ich ajt nHuindzin.

Je mibijcpidijc chinaayin jugy'ajtin

³ Dios miid je' ymij'ajt ti xymooyim tüg'óciy huidibi nyajmayajtim ma ajt njugy'ajtin, nej huaad nguyduunim yi' ytiy'ajt etz nej yi' huaad nyajmij'ajtim. Dios jadu'n mijmay'ajt tuun miid ich ajt ycixpi co ti xyajnejhuiyim Jesucristo y'ayuc ytiy'ajt. Je Jesucristo ti xyhuin'ijxim jigix jébi nmiid'ajtim yi' ymij'ajtin y'oy'ajtin, etz jigix jébi nduunim oyjäy'ajtin nej Jesucristo tuuñ. ⁴ Dios ti xymooyim huidibi janch oydi'cni e janch copicyip jigix jébi miich ajcxy mbaatcixy Dios yjihui'ñ ymic'ajt huidibi xyajtzinaaygixy miid huadz jot huinma'ñ, etz jigix jébi miid jada ycixpi tiibi xyaj'ahuaniyim, miich ajcxy mjijpyöduutcixy je jibicpi huidibi naaxhuiñyäjy ajcxy ñijot'ajtcixyp. ⁵⁻⁷ Com Dios miid ymic'ajt ti xymooyim huidibi nyajmayajtim, paady ycixp miich ajcxy naymic'ijxigixy co ajcxy mmibijcín mjacyajmijtigüygixipy tudägy'ajtin; e miid mdudägy'ajtin mjacyajmijtigüygixipy ajcxy Dios y'ixpijcin; e miid je Dios y'ixpijcin mjacyajmijtigüygixipy yi' Dios yjihui'ñ ymic'ajt ma ajcxy mjot mhuinma'ñ huidibi miid mmimadägyipy ajcxy yi' jibicjot jibic-huinma'ñ; e miid je mic'ajt ma ajcxy mjot mhuinma'ñ jacyajmijtigühuipy ajcxy mecxtujcin; e miid je mecxtujcin mnejhuüygixipy nej jéb huaad myajmij'ajtcixy etz mdzigüygixy Dios; e miid je mecxtujcin mjacyajmijtigüygixipy je tzojcin je jihuiyin miid migügtijc; e nañ mijtigühuipy nañ jadu'n je mibijcín nej jéb huaad Dios myajmij'ajtcixy etz nej jéb huaad cixyot huinjot mjacyajtungixy oyjäy'ajtin.

⁸ Pen ma miich ajcxy mdzinaayin mjugy'ajtin yajpattäy e ymijy ymayy, yi' mjugy'ajt ajcxy ca' yi' ñaadigi'aty; nañ ca' anajty ajcxy naadigi' ti mmibijccixy ich ajt nHuindzin Jesucristo, ti mnejhuiygixy yi' y'ayuc ytiy'ajt. ⁹ Pin jada ca' capxymidooy tüg'óciy jadaaabi capxhuijin ma yjugy'ajtin, jadu'n yi' nipaady nej tüg huiintzpi o huidibi y'ijxin con, ti jäydigoy co Jesucristo ti yajpocyñihuaatzp. ¹⁰ Paady ycixp miich ajcxy migügtijc, naymic'ijxigixy tungix tüg'óciy jada jigix mnejhuihuipy ajcxy tiydudägy co Dios ti xyajmibijccixy e ti xyhuin'ijxcixy. Pidaaccix mhuinma'ñ co jada tiy'ajt huen copicy, huen tictztigüy ma miich ajcxy mjugy'ajtin. E pen mdumyb ajcxy jadu'n, nimina mgapocycägixipy. ¹¹ E jadu'n miich ajcxy myajmöhuiipy tiydudägy tigüydac mijpi ma ich ajt nHuindzin Jesucristo y'ane'my, je huidibi xyajnidzoocim ajt n'alma. E yi' y'ane'min ca' ycixipy ytigoyipy nimina.

¹² Paady ycixp ich miich ajcxy jatyimy yajjäymejtzcodaangixy jada tiy'ajt. Oy miich ajcxy jada tiy'ajt mjajajtcixy mjanejhuiygixy, e tudägy ajcxy mmibijccixy etz mmi'ijtcixy je tiy'ajt huidibi miich ajcxy cham miid. ¹³ Minaambich co yjanchity nami njactzinaayñich co ich miich ajcxy nmöhuipy capxhuijin. ¹⁴ Hich ajt nHuindzin Jesucristo ti xyajnejhuiyich co tzojc n'ixmadzipyich jada njugy'ajtin (n'ögibich). ¹⁵ Paady ycixp naymic'ixyijich mictägy ma miich ajcxy co ngapxhuijcixy jigix co anajty n'ögyich mjäymetziyb ajcxy tüg'óciy jada tiy'ajt.

Yi' ajcxy huidibi y'ijxy je Cristo ymij'ajtin y'oy'ajtin

¹⁶ Hich miich ajcxy ti nyaj'ixpicy je tiy'ajt maabi nHuindzin Jesucristo, jadu'n nej Dios ymij'ajt miidity, e jadu'n nej je' yhuimbida'n jadüg'oc ya naaxhuiñ. E ca' iich ajcxy nyaj'ixpicy nigoo'ayuc anii'ayuc huidibi ci'm ti ngojyich ti nmacxyich. Miid iich ngi'mhuiin ti n'ijxcixyich je Huindzin Jesús ymij'ajtin. ¹⁷ N'ijx iich ajcxy co je Dios Teedy mooy ajt nHuindzin Jesucristo oy'ajt etz mij'ajt. E nañ nmidooyich ajcxy ayuc choñ ma je oybi Dios y'it, xyñimaayi: "Jada je' iich n'ung huidibi ooy ndzocyich njihuñyich, e ooy jotcuyc nayjihuñyijich miid yi' ycixpi." ¹⁸ Hich ajcxy nañ jadu'n ci'm ti nmidogixyich je ayuc huidibi anajty tzomb tzajpjoty. Jim iich ajcxy anajty quipxyi miid je Huindzin Jesús ma je amay gop.

¹⁹ Nañ jadu'n nmiid'ajtim je ayuc jac'oybi jactiyybi. Je' je' je tiy'ajt je ayuc huidibi ajcxy yjay je Dios y'ayucnajtzcaxiyybi jecy'ajty. Oy miich ajcxy oybi mduñ co m'amidoo'ijtcixy je oybi tiy'ajt maabi Jesucristo huidibi jadu'n nipaady nej tüg jün tiicxp agootztuum etz jadu'n nipaady nej je xii co yxñmiydäy, etz jadu'n nipaady nej je mijmadza' jayhuixtucpi co ypidzimy. Jada tiy'ajt xycodiiicxip ajcxy mjot mhuinma'n.

²⁰ Cuendtungix miich ajcxy jada: tüg'óciy je tiy'ajt, huidibi Dios ytiy'ajtmiiidpi yejc huidibi ijtp jaybety ma Dios ylibro, ca' huaad pin yajnijegip miid yci'mhuinma'n.

²¹ Com je Dios y'ayucnajtzcaxiyybi camina je' ajcxy ayuccapxhuäcxy miid yci'mdzojcin yci'mhuinma'n. Dios anajty ajcxy huin'ixyip jëbi ayuccapxhuäcxy miid Dios ycixpi com je Espíritu Santo anajty ajcxy mooyip ayuc huidibi ajcxy ycapxhuäcxyp.

2

Yi' ajcxy huidibi yaj'ixpijcp anii

¹ Per nañ ji anajty nañ jadu'n ayucnajtzcaxiyybi huidibi anajty ajcxy anii daacp ma je Israel jäy. E nañ jadu'n yji'adipy ayuccapxhuäcxpi huidibi anii yaj'ixpigipy ma miich ajcxy. Je' ajcxy ayüch ameech yaj'ixpigipy yci'm'ayuc yci'mhuinma'n huidibi ajcxy yajhuinma'nydigooyipy je mibijcpidijc. Ymina'n ajcxy co ca' yjanchity je Huindzin Jesús y'ayuc, je huidibi yajnidooc ajt n'alma, e jadu'n ci'm ñay'ayo'nmóoyigixy miid Dios mic'amy. ² Mayjäy ooy panicxa'n je jibicpi huidibi ajcxy ytungixyp, e miid je' ajcxy ycixpi yajniğápxipy yajnimiydägipy ajcxy jibic je huidibi ajcxy cuydumb je tiyybi ayuc, je Jesucristo y'ayuc oybi. ³ Miid co anajty tzach'adzojccixy meeñ, chi anajty xyhuimbijccixy xyhuimmeetzixy miid ajcxy y'ixpijcin ca'p yjanchity. Per je pocycähuin ajcxy ahuijxip, ca' ma ñidooy. Ti yjejni maabi ajcxy ypocyca'ni ma Dios. Dios tzaachytunib ajcxy miid ypocy ycixpi.

⁴ Dios ca' je' huinmeecxy je ángeles ajcxy huidibi tundigooygixp. Hue' janchtiy ycötijnajxtaayb ayoodactuuyb etz yajhui'my agootztuuyb, cadeniñy y'ijtcixy cuend'aty, ixti cooni anajty paady xii tiempo co anajty yajtiyduna'n naaxhuiñyjäy miid ypocy ycixpi. ⁵ Nañ ni ca' Dios huinmeecxy je naaxhuiñyjäy huidibi tundigooy jecy'ajty. Chi quejxy ayo'nduu etz mijniğom ma je jibicjäydijc. Jëyi yajtzoocy je Noé huidibi capxhuäcx je tiy'ajt. Quipxy miid Noé yajtzoocy jahuixtuc y'amigügtijc. ⁶ Dios nañ jadu'n tzaachytuñ miid ypocy ycixpi etz yajhuindigoy miid jün metz cajp, Sodoma etz Gomorra, ixti cooni yajhui'my accuyjam jigix y'idipy je ijxpejt ma je jibicjäydijc huidibi ajcxy jac'axam jactzinähuaam jacjuy'adam. ⁷ Dios yajtzooc je Lot, hue' je' anajty janch oyjäy, e janch ymiid anajty jotmay co anajty je jibicjäydijc ajcxy ijxi chinaayin yjugy'ajtin janch jibic. ⁸ Jabom jabom anajty je Lot, je jäy oyjäybi huidibi anajty tzinaayb quipxyi miid je jibicjäydijc, ni ca' anajty yjotcuyc'aty co anajty ixy midoy nej anajty ytundigooygixy je jäy ajcxy ca'pi ytudägyity. ⁹ Dios miid mic'ajt jëbi nihua'n yajtzögy pinjaty mibijccixp cixyot huinjot co je mujcu' yjot'ijxigixy huinma'n'ijxigixy. Nañ jadu'n Dios mic'ajt miidity jigix jëbi yaj'ijtcixy je jibicjäydijc miid tzaachypí ayo'n, huidibi ymöhuamy co anajty naaxhuiñyjäy tiyduñ miid ypocy ycixpi.

¹⁰ Dios ymiid mic'ajt jëbi tzaachytunipy pinjaty tumb jibic-huinma'n nej ñinixc nijot'ajtcixy, e ca' ixaangixy je Huindzin Jesús y'oy'ajtin ymij'ajtin. Amij agix etz jotmic ajcxy nayjihuñyii. Ytumb ajcxy yci'mjot yci'mhuinma'n. Ni ycatzigiygixy co oyñinej

ajcxy ni'ojiiygixy pinjaty mic'ajt miid ma Dios ytung. ¹¹ Oy je ángeles ajcxy miidity mijcötujcin etz ane'min, ca'p je' ajcxy yjot yhuinma'nñ miidity nicxy ni'ojiiygixy ma Dios yhuinduu pinjaty mic'ajt miid ma Dios ytung.

¹² Per jadayaab jibicjäydijc ajcxy jadu'n ajcxy yi' nej iyujc, ca' yhuinma'nñ; nigoob ytimyhuidity etz yma'xun'ajtcixy jigix jäy ymadziyb etz yaj'ögiiyb. Nixiicpy yajxiicpy ajcxy yi' huidib ca' huinjihui'y. Per nañ tim jadu'n ajcxy y'ögipy nej iyujc y'ögy ytigoy. ¹³ Cobadihuaangixy jadu'n nej ti ytundigoogixy. Hue' nayjihuiygixy capin yjadu'nity, yxondaaccixy tüg jaxicyjaty. Jadayaab jäy ajcxy pocy ypa'tcipy ajcxy yi' chinaaygixy yjugy'ajtcixy. Tüg tzo'ydu'n co ajcxy nañ jadu'n xymijyöybejtcixy ma m'amugiigixy.

¹⁴ Co ajcxy huindicxcixy töxyjäydijc, chi ajcxy ooy nijot'ajtcixy co miid tundigoya'nñ. Ca'p ajcxy chíjpiigixy y'anucxiigixy miid pocytuni. Yajtundigoogixy pinjaty amútzip ma mibijcin, ooy ajcxy yhuijity yucjity ycohuinma'nñity ma meen'adzoogii. Dios yajtigoyiib ajcxy y'alma. ¹⁵ Tigoyjäy yi' ajcxy, je' co ti ñiidigajtcixy ti ytüdigajtcixy ma je tiybi je janchypi tiy'ajt. Je' ajcxy ypanicxy ypayöyp je profeta Balaam y'ijxpejt, je Beor y'ung, co ooy ymeeñy bada'nñ anajty miid yjibic-huinma'nñ. ¹⁶ Chi Balaam oy yaj'ogyii ypocy tüg töxyburro, ycapxy jadu'n nej tüg jäy, e jadu'n je' yajhuäcxijpy je profeta Balaam miid je' ylocihuinma'nñ.

¹⁷ Com jada jäy ajcxy ca' panicxcixy je janchypi tiy'ajt, paady ycixp jadu'n ajcxy nipaady nej tüg niipozojut ca'pi ñii miidity, etz jadu'n ajcxy nipaady nej joc huidibi poj yajyöyip (ca' ytu'y). Dios möhuiib ajcxy tzaachypi miid ypocy ycixpi, idam ajcxy agootztuuyb huinixii huinitiempo. ¹⁸ Com ycapxyp ajcxy ayuc huidibi ca' choubaady. E miid je jibic-huinma'nñ ycixpi huidibi ajcxy chachnijot'ajtpy yajtundigoogixy pinjaty tiibi choongixy ma je huidibi ajcxy tzinaayb miid jibic-huinma'nñ. ¹⁹ Yi' ajcxy yaj'ixpijcp je mayjäy co jébi tungixy huentim ti huidibi ajcxy ñijot'ajtpy. Per yi' ajcxy huidib jibic-huinma'nñ yaj'ixpijcp, ci'm ajcxy ñay'ijtigixy pocypa'tcipy, je pocy tzach'ane'mb ajcxy yjot yhuinma'nñ, ixti jadu'n nipaady nej jihuiy ajcxy ane'my y'ity. ²⁰ Pinjaty ti ymibijccixy ti ñejhuiygixy je Huindzin Jesucristo ytiy'ajt huidibi yajnidoocp ajcxy y'alma, e jadu'n ti yjihüaccixy ma je naaxhuiñyjäy yjibictzinaayin yjibicjugy'ajtin, pen jadüg'oc anajty y'ayöyiyñip ma je jibicpi, e je jibicpi ymimadägyii ajcxy, o'ctiy anajty niigi yhui'mgixy ca'ydi nej je jayijp'atypi. ²¹ Niigi oy co ixipy je' ajcxy ca' ytimnejhuiygixy je janchypi tiy'ajt. Com ti ocnejhuiygixyp, e chi jada' y'ixtigihüaccixy ma je huätzpi Dios ycötujcin huätzpi Dios ytiy'ajt tiibi anajty y'ocjamóoyigixy. ²² Per je' yi' ajcxy ytimycuydummy nej je ayuc y'ity: "Je uc yci'm'ich ñihuimbijtpy, e je idzim huidibi namdziidaayb, nicxy je' yajtznip yquitnup mo'ntzjoty jadüg'oc."

3

Je Huindzin Jesús huimbidaamb ya naaxhuiñ

¹ Miich ajcxy migügtijc huidibi iich ooy ndzocyich ooy njihuiyich, jada je' je mimetzpi necy huidibi ajcxy nyajnijayiiyb. Ma jada metzpi necy hue' iich ndzoga'nñich co nyajhuinma'nñymedzip ajcxy ma Dios ytiy'ajt miid jada capxhuijin huidibi ti njaayich. ² Ti nnijayiiygixy jigix m'ajihuihuiiyb ajcxy je ayuc huidibi ajcxy pa'tcipy'aty ñajtzcapxiy je Dios y'ayucnajtzcapxiybi ajcxy huidibi huadz yhuinma'nñ anajty ymiid. Nañ ajihuiyigix je Huindzin Jesucristo je' y'ane'min huidibi yajnidoocp ajt n'alma, je ane'min huidibi apóstoltijc miich ajcxy xyajnimaayb.

³ Nejhuiygixy miich ajcxy jada jayijp ma yam ca'ni yhuaad'ajtni mina naaxhuiñ ycixipy, miinip jäy ajcxy huidibi nixigip yajxigip huidibi Dios yjé'ajtpy. Chinaaygixy yjugy'ajtcixy anajty miid jibic-huinma'nñ huidibi ci'm ñijot'ajtcixyp. ⁴ Chi ajcxy ymina'nñip: "¿Ti co mdzachmibijccixy co Cristo yhuimbida'nñ jadüg'oc ya naaxhuiñ? Nej ajcxy je' y'o'ctay je mij'ap je mijteedy, je'ni y'ijttäy tüg'óciy jadu'n nej naaxhuiñybi chondacy. Paady ca' yjanchity co je Cristo yhuimbida'nñ jadüg'oc ya naaxhuiñ," jadu'n yminaangixy. ⁵ Yi' ajcxy ca' huinjihuihuaangixy cuendtunaangixy co miid Dios y'ayuc

yi tzajp ji'ajtp anajty yi' tzachjeczy, e miid Dios y'ane'min huin'it je naax oy yguëxigy huidibi ijtp anajty niijoty. ⁶ Nañ jadu'n miid Dios y'ayuc je jecy'ajtpy naaxhuiñyäj y'ayo'nbaty, ñijicxtay nidüg'óciy e ytigoyday niijoty. ⁷ Per Dios miid yi' y'ayuc yaj'ijtpy jada naaxhuiñybi etz tzajp huidibi cham ji'ajtp ixti coon yajtigoydähuiipy miid jün. Je jün huin'it je' nöctähua'ñ co anajty yhuaad'ajtni ma Dios tiyduna'ñ je camadacpidijc je jibicjäydijc, etz yajtigoya'ñ ajcxy y'alma.

⁸ Jadügnax miich ajcxy migügtijc huidibi ooy ndzocy njihuïyich, ca' mjäydigooygixy co ma yi Huindzin Dios, tüg xii jadu'n yi' nej tüg mil jimijt, e tüg mil jimijt jadu'n yi' nej tüg xii. ⁹ Ca' nminaanim co yi Dios yajhuäcxibaamyñi yi' mina cuyduna'ñ huidibi yi' ti ahuanïy, jadu'n nej nijëjity jäy a'ixiigyxy. Dios yajtumyb mecxtujcin miid miich ajcxy, com hue' yi' tzocy co ni tüg jäy ayo'n paadipy. Yi' chojcpy co nidüg'óciy jäy huen jothuimbijtcixy etz ixmajtcixy pocytuni.

¹⁰ Co anajty je Huindzin Jesús ymiin jadüg'oc ya naaxhuiñybi chaachytunipy je' tüg'óciy jibicjäydijc, hue' je' ytuniyb yjadiyb ma anajty ca' pin jip'ixy, jadu'n nej tüg meetzpi ymiin coodz co meedza'ñ tijaty. Huin'it je tzajp yhuindigoydähuiipy miid tüg ne'min jidjtin oychigiiyñip. E tüg'óciy huidibi miid ndzinaayim njugy'ajtim toydähuiip yi' miid jün, yi naax toydähuiip yi', etz tijaty yajpatp ya naaxhuiñ toydähuiip nañ jadu'n.

¹¹ Com tüg'óciy tijaty huidibi ji'ajtp yhuindigoydähua'ñ miid jün, paady ycixpi niigi copicy miich ajcxy co mdzinaaygixp tudägy e myajmij'ajtcixyp Dios. ¹² Ahuijxcix ajcxy je xii tzuu mina Dios anajty yajhuaad'aty co yajhuindigoya'ñ je naaxhuiñybi. Naymic'ijxigix co tzojc yminiipy yi' jadu'mbi xii tzuu. Co yhuaad'ajtnip huin'it xii, je tzajp yhuindigoydähuiip miid jün; je xii po', je pojx xemembi, je tuu enee jadu'ñyi yticxtähuiipy yjyidähuiipy jünjoty. ¹³ Per ñich ajt n'ahuijxim je jemybi tzajp jemybi naax huidibi Dios ti xyaj'ahuaniiyim, tüg tzinaaydac janch'oybi ma ca' ti jibicpi.

¹⁴ Paady ycixp miich ajcxy migügtijc huidibi ñich ooy ndzocyich njihuïyich, nami m'ahuijxyp miich ajcxy co Dios yajhuindigoyaanip jada naaxhuiñ, naymic'ijxigix ma tüg'óciy ajcxy yi mdzinaayin co mguydunipy ajcxy Dios ytiy'ajt jigix ajcxy Dios xy-paadipy, ca' ajcxy ti tzip ti gapxy, ni ti jibicpi, e ni ti pocy, ac huädz jot huädz huinma'ñ anajty miid'ajtcixy. ¹⁵ Cuenditungix je mecxtujcin huidibi ñich ajt nHuindzin Jesucristo yajtumyb miid ñich ajt jigix jëbi xyajnidzoocim ajt n'alma. Nañ jadu'n yi', ñich ajt nmigüg Pablo huidibi ooy ndzojcim, ti miich ajcxy xyñijayiiygixy, jadu'n nej ixpijcin Dios ti ymöyii ma yi' y'ayuc. ¹⁶ Ma tüg'óciy Pablo ñecy tiibi xyajniguejxcixy, jada tiy'ajt ti xyajmiidmiydaaccixy. Nijëjity Pablo ñecy ooy chachchiphuinjihuiiñity, e nijëjity jäy ajcxy tigach ajcxy huinjihuïy Pablo y'ayuc, ca' ajcxy huinjihuïy nej Pablo yjamina'na'ñ. Huingjaty ajcxy nigüej Pablo y'ayuc, e ci'm ñayyajhuinma'ñyidigóoyigixy.

¹⁷ Paady ycixp miich ajcxy migügtijc huidibi ooy ndzocy njihuïyich, miich mnejhuyidaaygix jada tiy'ajt. Nayguend'ajtigix ca'ydi jibicjäydijc miid y'anii xyajniidigajtcixy xyajtüdigajtcixy, e ca'ydi m'ixtigihuäccixy ma ajcxy mmibijcin jadu'n nej tiydudägy ti mmibijccixy. ¹⁸ Huen ñich ajt nHuindzin Jesucristo huidibi yajnidzoocp ajt n'alma niigi may'ajt oy'ajt tunipy miid miich ajcxy, e nañ niigi yujcpedipy ajcxy yi m'ixpijcin ma yi' ytiy'ajt. Huen Jesucristo cömay y'idipy etz mi'idipy oy'ajtin mij'ajtin jadachambi xii tiempo etz jadu'n nej xii tiempo miimb cidacp. Jadu'n ngapxycixyich. Amén.

1 SAN JUAN

Yi Jayijpi Necy Huidibi San Juan Yajniaguejxy Je Mibijcpidijc Nidüg'óciy

¹ Dios y'ayuc jiiyim anajty co naaxhuiñybi chondacy. E tiy'ajt nyejcypich jadu'n nej nmidooyich ci'm yi' y'ayuc, jadu'n nej n'ijxyich miid ngi'mhuiinich, jadu'n nej nhuindicxyich yi' ci'm, e nañ jadu'n nej nmidoñich miid ngi'mgijich. Nyajnijayiybich miich ajcxy jada necy jadu'n nej je Cristo je Dios y'ung yjugy'ajtin yega'ñ huidibi ca' cixa'ñ tigoya'ñ niminaabi. ² Ti ñayguëxigyii ya naaxhuiñ je Dios y'ung huidibi ymiid jugy'ajtin huidibi ca' niminaabi ycixipy ytigoyipy. Ti n'ixyich ajcxy jigix jëbi tiy'ajt nyéjccixyich co ti ñayguëxigyii ya naaxhuiñ, etz ti n'ixyich jigix jëbi nyajniimaaygixy nej jëbi huaad huingbi jugy'ajtin nbaatim co anajty ti n'o'cim. Je Dios y'ung, je huidibi jiiyby ijtp ma Dios Teedy, nayguëxici je' ma iich ajcxy. ³ Je huidibi iich ajcxy n'ijxich nmidoihuich, cham miich ajcxy nyajniimaaygixy jigix jëbi ajt tú'ciy n'ijtim ma Dios ytiy'ajt, etz nañ jigix jëbi tú'ciy ajt n'ojadajtim Dios etz je' y'ung. ⁴ Paady ycixp jada tiy'ajt nyajnijayiy ajcxy jigix ajcxy jotcujc'ajtin mbattáaygixipy miid jada ayuc tiy'ajt.

Dios yi' je' je tiicxin jájin

⁵ Jadayaabi Dios y'ayuc ytiy'ajt Jesucristo ti xyajnimäyich e nañ cham iich miich ajcxy nyajniimaaygixy. Dios huädz ytiy'ajt miidity, ca' ma Dios aniidägy. Jadu'n Dios nipaady nej tüg jiiin ytiicxy ma tüg it e ni ca' ni mina ypich. ⁶ Co nminaanim co Dios ajt miid n'ijtim tú'ciy, e ca' yjanchity, ca' anajty ajt Dios ytiy'ajt nyajtuunim, jadu'n nipaady nej jihuiy ndzinaayim agootztuum. Niigo n'iindaacim, ca' anajty ajt nguyduunim Dios ytiy'ajt. ⁷ Co nguyduunim Dios ytiy'ajt jadu'n nej yi' ytiy'ajt miidity, jadu'n nipaty nej jihuiy ndzinaayim ma jiiin ytiicxy. Huin'it jëbi ajt n'ijtim tú'ciy miñ xyipy, e Dios xyajpocynihuaatztaayim co Jesucristo y'o'cy etz ñi'py teemy gujy miid iich ajt nbocy ycixpi.

⁸ Co ixypy nminaanim co ca' nbocytuunim, niigoob nayhuin'iinim ci'm, e ca' jadu'n Dios ytiy'ajt yajpaady ma iich ajt njot nhuinma'ñ. ⁹ Pen ngapxypidzimim ajt nbocy ma Dios, yi' ñiidinaayb yi' y'ayuc huidibi ti xyajniimaayim co ymecxamy ajt nbocy, e nañ tudägy ytuñ miid iich ajt ycixpi. Dios xyhuinmeecxim ajt nbocy etz xyajhuaatzim njot nhuinma'ñ jëbi n'ixmajtzim jibic-huinma'ñ. ¹⁰ Co ajt nminaanim co ca' nbocytuunim, hue' anajty Dios nyajnajxim anii, e ca' anajty ti ngöbijcim cixyjot huinjot yi' ytiy'ajt.

2

Cristo, iich ajt nhuingapxpi ma Dios

¹ Miich ajcxy migügtijc huidibi ooy ndzocy njihuiyich jadu'n nej ixypy ngi'm'ungich ngi'm'anäcich, cham jada tiy'ajt nyajnijayiygixy, jigix ca' ajcxy mdundigóoygixipy. Pen ji nidügti miich ajcxy huidibi tundigooyb, jada migüg huidibi tundigooyb huen mibijctzoy Dios ma Jesucristo yxi miid ypocy ycixpi. Jesucristo yi'je' huingapxp ma Dios Teedy miid ajt nbocy ycixpi. Tudägy je', e jëbi xyhuingapxim ma Dios Teedy. ² Com Jesucristo ti y'ögy miid iich ajt nbocy ycixpi, paady ycixp jëbi capx'oyiy ma Dios miid iich ajt ycixpi e xycapx'oyiyim iich ajt nbocy etz nañ capx'oyiyip tüg'óciy naaxhuiñy jäy ajcxy ypocy, yi' jäy ajcxy pinjaty yi' y'ayuc ytiy'ajt mijpidaacip.

³ Co Jesucristo ytiy'ajt nguyduunim yajxon, huin'it nejhuiyim tiydudägy jadu'n nej Dios may'ajt oy'ajt ti tuñ miid iich ajt ycixpi. ⁴ Co ixypy pinjaty ymina'ñ co ñejhuiyi Jesucristo ytiy'ajt e ca' cuychinaayi yi' ytiy'ajt hue' yi' tzach anii daacpi, e ca' miidity Dios ytiy'ajt. ⁵ Yi' jäy ajcxy pinjaty cuychinaayb cuyjugy'ajtp yajxon Jesucristo y'ayuc ytiy'ajt, janch tiydudägy anajty yajmij'aty Dios. Co nguychinaayim nguyjugy'ajtim yajxon Jesucristo ytiy'ajt, huin'it jëbi nejhuiyim co nyajmij'ajtim Dios. ⁶ Yi' jäy ajcxy pinjaty

minamb co ymiid Jesucristo y'ayuc ytiy'ajt ma je' y'ay yjot, copicy ajcxy chinaaygixyipy jugy'ajtcixipy tim jadu'n nej Jesucristo chinay jugy'ajty.

Je jemybi ane'min

⁷ Miich ajcxy migügtijc huidibi ooy ndzocy njihuiyich, ca' nminaanim jemybi tiy'ajt ajcxy nyajnimahuamy ma jada necy. Je' jada je tiy'ajt huidibi jecy'ajty ti mnejhuiygixy co oga'n ajcxy mmijpidacy Jesucristo. Jada tiy'ajt jecyip jada je' huidibi cham ajcxy mmidooyb jadüg'oc. ⁸ Nañ jemy jada tiy'ajt nañ jadu'n huidibi nyajnimaaygixyp ma jada necy. Jada je'je tiy'ajt huidibi Jesucristo ymiid ma yjot yhuinma'ñ etz nañ ñich ajt nmiid ma ajt njot nhuinma'ñ. Yi jecyip ayuc huidibi ca' ytiy'ajty, ti yi' ñaxy e cham Dios ytiy'ajt tiydudägy nyajtuunim, jadu'n nej jihuiy je coodzipi ti ñaxy e cham ti yximiy.

⁹ Yi jäy ajcxy huidibi minam co Dios y'ayuc ytiy'ajt ajcxy cuyduuni e ca' ixäänigixy ymigügtijc, ca' yi' ajcxy tiydudägy Dios y'ayuc yajtuuni, jadu'n yhuimbizimy jadu'n nej jihuiy agootztuuy ijtcixy. ¹⁰ Yi jäy ajcxy pinjaty tzojcp jihuiyb ymigügtijc hue' yi' yajpaatcixy miid Dios ytiy'ajt ma ajcxy yjot yhuinma'ñ, jadu'n nipaady nej jihuiy y'ijtcixy ma xii ytiicxy, ca' ajcxy ñiidigoy ytüdigoy ma Dios ytiy'ajt. ¹¹ Yi jäy ajcxy pinjaty ca' ymigüg ixaangixy, ca' yi' ajcxy Dios ytiy'ajt ajcxy yajtuuni, jadu'n nipaady nej jihuiy agootztuuby y'ijtcixy, ca' ajcxy chinaaygixy nej Dios ytiy'ajt yja'anémigixy, ca' ajcxy nejhuiygixy huidibi tiy'ajt jëbi yajtungixy, com jibic-huinma'ñ chachtuumyb ajcxy huidibi ca' Dios tiy'ajt'adyii.

¹² Miich ajcxy migügtijc huidibi ooy ndzocy njihuiyich ajcxy jadu'n nej ixypy ngi'm'ung ngi'm'anäcich, com Dios ti miich ajcxy mbocy xyhuinmecxtayi co Jesucristo y'o'cy miid ajcxy mbocy ycixpi, paady ycixp cham nnijayiygixy. ¹³ Cham nnijayiygixy miich ajcxy mij'anäctijc, com ti mmijpidaaccixy Jesucristo huidibi jii'ajt co naaxhuiñybi oga'n choondacy etz chambaad yjii'atyñi. Cham nnijayiygixy miich ajcxy anäctijc, com ti mmimadaaccixy je ca'oybi.

Cham nnijayiygixy miich ajcxy pi'ctijc mutztijc com ti mmijpidaaccixy Dios Teedy. ¹⁴ Cham nnijayiygixy miich ajcxy mij'anäctijc, com ti mmijpidaaccixy ajcxy Jesucristo huidibi jii'ajt co naaxhuiñybi oga'n chondacy etz yjii'atyñi chambaad. Cham nnijayiygixy miich ajcxy anäctijc, com mic mjot mhuinma'ñ miidity ajcxy etz Dios ytiy'ajt yajpatp ma ajcxy mjot mhuinma'ñ, paady ycixp ajcxy ti mmimadaaccixy yi' ca'oybi.

¹⁵ Migügtijc, ca' anaxy m'adzójccixip yi' huidibi miid ndzinaayim ya naaxhuiñ. Yi jäy ajcxy huidibi adzojctaayb anaxy yi' huidi miid ndzinaayim, ca' ajcxy Dios Teedy yajmij'ajtcixy. ¹⁶ Ca' anaxy m'adzojtähuipy ajcxy tüg'óciy huidijaty ya naaxhuiñ yajpatp, jadu'n nej njot nhuinma'ñ tzojcm, jadu'n nej tijaty n'ijxim, jadu'n nej huidibi amij agix miid ndzachnayjihuiyim. Com yi' jadu'mbi huinma'ñ ca' yajpaady ma Dios Teedy, hue' yi' yajpaady ya naaxhuiñ. ¹⁷ Huidijaty ya naaxhuiñ yajpatp cixipy tigoyipy yi', nañ jadu'n ytigoya'ñ huidijaty yi' huinma'ñ y'adzojcpy. Yi jäy ajcxy pinjaty Dios ytiy'ajt yajtuunip jadu'n nej Dios tzocy, jugy'adipy ajcxy e co y'ó'ccixipy, ca' ajcxy y'alma ytigóoygixipy.

Je tiy'ajt etz je anii

¹⁸ Miich ajcxy migügtijc huidibi ooy ndzocy njihuiyich nej ixypy ngi'm'ung ngi'm'anäcich, tim cijxnip tiempo ya naaxhuiñ. Ti jada mnejhuiygixy co miinaam jäy ajcxy huidibi nayyajnaxanip nej Cristo' e ca' yjanchity. Miid co cham ji mayjäy ajcxy huidibi nayyajnaxip jadu'n nej Cristo, paady nejhuiyim co tim cijxnip yi' tiempo miid ñich naaxhuiñyjäy ajt ycixpi. ¹⁹ Yi jäy ajcxy huidibi nayyajnaxanip jadu'n ixypy nej Cristo, naybjc-huäcxaanip yi' ajcxy miid ñich ajt, ca' anajty ajcxy ytüggy yi' ajcxy yhuinma'ñ miid ñich ajt nhuinma'ñ, tügmucy ixypy ajt xymiid'ijtim. Ji jadu'n ñiguëxigy co ca' ytüggy yhuinma'ñ miid ñich ajt nhuinma'ñ co ti ajcxy xypuhuäctuumim.

²⁰ Ti miich ajcxy xy'adig'iy xyjottig'iy Dios yjihu'i'n ymic'ajt, paady miich ajcxy mhuinjihu'iy tüg'óciy Dios y'ayuc ytiy'ajt. ²¹ Ca' nminaanim paady miich ajcxy nijayiygixy co ca' mhuinjihu'iygixy Dios ytiy'ajt. Paady nijayiygixy miich ajcxy jigix mnejhu'iygixyip Dios ytiy'ajt etz mnejhu'iygixyip co yi jäy ajcxy huidibi indaacp, ca' yi' ajcxy Dios ytiy'ajt miidity.

²² Yi' je' indacp huidibi minamb co Jesús ca' yi' yjéjity je Cristo huidibi Dios yquejx. Yi indacpi je'midzip'ajtp Jesucristo etz ca' mibicy Dios Teedy etz nañ ca' mibijci Dios y'ung. ²³ Je jäy ajcxy huidibi indacp minam co Jesús ca' yjéjity je Cristo, e nañ ca' ajcxy miidity Dios Teedy ytiy'ajt. Yi jäy ajcxy huidibi minam co Jesús yjéjity je Cristo je Dios y'ung, nañ ymiid ajcxy Dios Teedy ytiy'ajt.

²⁴ Je ayuc tiy'ajt huidibi miich ajcxy mmidou co oga'n ajcxy mmijpidacy Jesucristo, jada ayuc tiy'ajt mguydúngixyipy e ca' mjäydgóoygixipy. Pen mmi'ijtcixp yi ayuc huidibi Dios yjäy oga'n ajcxy xyaj'ixpijc, huin'it jébi miich ajcxy myajpatcixy ma Dios y'ung etz je' yajpaady ma Dios Teedy. ²⁵ Dios ti xyajhuinhuaniiyim co xyajtzinähuaanim ajt n'alma huinixi huinitiempo.

²⁶ Jada tiy'ajt ajcxy nyajnijayiyb jigix ca' mmijpidáaccixipy yi' ajcxy y'ayuc huidibi xyajhuinma'nydigoyaam ajcxy. ²⁷ Yi Dios yjihu'i'n ymic'ajt huidibi ti xy'adig'iygixy ti xyjottig'iygixy ijttiib yi' ma miich ajcxy mjot mhuinma'n. Paady ycixp ca' myajmayjajtcixy pin xyaj'ixpigip ajcxy com je Espíritu Santo xyaj'ixpigip ajcxy. Je Espíritu Santo xyajni'ixydaayb ajcxy tüg'óciy Dios ytiy'ajt, tiydudägy yi', ca' yi' y'aniijity. E jadu'n nej je' xyajni'ixiygixy, jadu'n mguydunipy ajcxy. Mi'ijtcix Dios yjihu'i'n ymic'ajt ma mjot mhuinma'n ajcxy.

²⁸ Miich ajcxy migügtijc, mi'idipy ajcxy Jesucristo ytiy'ajt ma mjot mhuinma'n jigix co ñayyajniguëxigiyb Jesucristo ya naaxhuiñ jadüg'oc, huin'it jotcujc ajt nnayjihuiiyim etz ni ca' jibic nayjihuiiyim co anajty xyñimiinim. ²⁹ Ti mnejhu'iygixy co yi' Jesucristo tiydudägy ytuñ, e ti mnejhu'iygixy nañ jadu'n co tüg'óciy yi' jäy huidibi tiydudägy tumb, yi' je' ajcxy Dios y'ung'ajtíp.

3

Dios iich ajt xy'ung'ajtim

¹ Jihu'i'nybijccix tüg'óciy je mijpi may'ajt Dios Teedy ti tuñ miid iich'ajt ycixpi jigix jébi naydijim Dios y'ung. Yi naaxhuiñyjäy ajcxy huidibi ca' mijpidaaccixy Jesucristo ca' ajcxy nejhu'iygixy huinjihu'iygixy Jesucristo ytiy'ajt, paady ycixp ca' ajcxy nejhu'iy huinjihu'iy co Dios xy'ung'ajtim. ² Miich ajcxy migügtijc huidibi ooy ndzocy njihu'iyich, jadachambi Dios iich ajt xy'ung'ajtim. Jadachambi ca'p y'ocniguëxigiyñi nej iich ajt jiini n'idaanin. Co anajty Jesucristo ymiin jadüg'oc ya naaxhuiñ, huin'it nguipxyjatytiyim miid je', com n'ixaanin ajt Jesucristo jadu'n nej je' yajpaady. ³ Tüg'óciy jäy ajcxy huidibi jijp'ijxp co Jesucristo ymiina'n jadüg'oc ya naaxhuiñ, copicy yajhuädziipy ajcxy yjot yhuinma'n. Huen mi'ijtcixy oyjot oyhuinma'n jadu'n nej Jesucristo mi'ity oyjot oyhuinma'n.

⁴ Tüg'óciy jäy ajcxy huidibi pocytumb, hue' ajcxy ymidundigooyb Dios ycötujcin. Co ajcxy ytundigoy, ca' ajcxy ymadägy nej cuydunipy Dios ycötujcin. ⁵ E mnejhu'iyb miich ajcxy co yi' Jesucristo ti ñayguëxigiyi ya naaxhuiñ jigix jébi xyajpocyñihuaatzim. Jesucristo ca' anajty ti pocy miidity, ca' anajty ma ti ytundigoy. ⁶ Tüg'óciy jäy ajcxy huidibi cuydudähuaam Jesucristo ytiy'ajt, ca' huaad pocytuñ. Yi jäy ajcxy huidijaty pocytundiib, ca'ni icy ajcxy yi' Jesucristo, nañ ca'ni ajcxy huinjihu'iyi yi' ytiy'ajt. ⁷ Miich ajcxy migügtijc huidibi ooy ndzocy njihu'iyich jadu'n nej ngi'm'ung ngi'm'anäcich, ix ni pin xycahuin'ingix. Yi jäy ajcxy huidibi oyjot oyhuinma'n yajtumb, tiydudägy yi' ajcxy chinäy yjugy'ajty, tim jadu'n nej Jesucristo tiydudägy chinay yjugy'ajty. ⁸ Yi jäy ajcxy huidibi tzachpocytundiibni, yi' ajcxy mujcu' yjäy'ajtíp. Com jadu'n nej chondacy je naaxhuiñybi oga'n yi' mujcu' jeni anajty jadu'n chachpocytuñ. Paady ycixp Dios quejxy y'ung ya naaxhuiñ co je mujcu' yhuinma'n yajcödigoyaani.

⁹ Yi jäy huidibi Dios ajcxy ti ymöyii jemybi jot jemybi huinma'ñ, ca' ajcxy ypocytundiyy com je' co tú'ciy ajcxy yjot yhuinma'ñ miidity, jadu'n nej anajty Jesucristo yjot yhuinma'ñ miidity, ca' huaad ajcxy ypocytundiyy com Dios ti ymöyii ajcxy jemybi jot jemybi huinma'ñ. ¹⁰ Paady ycixp yñiguëxigy yi jäy ajcxy pinjaty Dios y'ung'ajtip etz pinjaty mujcu' ung'ajtip. Yi huidibi ajcxy ca' tiydudägy cuydungixy Dios ytiy'ajt etz ca' ajcxy ixa'ñ ymigügtijc, etz ca' ajcxy tzocy jihuüy ymigügtijc, hue' ca' ajcxy Dios ymöyii jemybi jot jemybi huinma'ñ, mujcu' ajcxy y'ung'ajtip.

Naychojcm nayjihuiiyim miñ xyipy

¹¹ Jada je' je ayuc tiy'ajt huidibi miich ajcxy ti mmidoogixy co oga'n ajcxy mmijpidacy Jesucristo co copicy naychojcm nayjihuiiyim nidüg nidüg. ¹² Ca' huaad jadu'n n'idiitzim nej Cañ y'idiich co anajty mujcu' huinma'ñ miidity, chi y'uch yaj'o'cy. ¿Nej co y'uch yaj'o'cy? Je' co anajty je' jibic-huinma'ñ yajtuñ, e je' y'uch oyhuinma'ñ anajty yajtumyb paady ycixp je y'uch yaj'o'cy.

¹³ Miich ajcxy migügtijc, ca' ooy mdzachhuinmaay ajcxy co ca' yi naaxhuiñyjäy ajcxy xy'ixa'ñ, huidibi ajcxy ca' Dios y'ayuc mijpidaaci. ¹⁴ Com iich ajt nnejhuiiyim co je nmigügtijc ajcxy ndzojcm njihuiiyim co n'o'cim, huin'it njugypigaanim e ndzinähaanim jiiby tzajpjoty huinixi huinütiempo. Yi jäy ajcxy pinjaty ca' ymigügtijc ixa'ñ ajcxy co ajcxy y'ögipy, huin'it ca' ajcxy chinähua'ñ jiiby tzajpjoty. ¹⁵ Huenpinjäyity huidibi ca' ymigüg ixa'ñ, nipatpy nej ytundigoy jadu'n nej jäyyaj'o'cpi ytundigoy e nañ jadu'n nejhuiiyim, co je' y'ögipy, ca' chinähua'ñ jiiby tzajpjoty. ¹⁶ Ya ixypy jëbi iich ajt ijxpejt nbijcm nej huaad migügtijc ndzojcm njihuiiyim, jadu'n nej Jesucristo ijxpejt yejcy co ñayyojxi ñaydooci co y'o'cy miid iich ajt nbocy ycixpi. Paady ycixp iich ajt jëbi huaad ndzojcm njihuiiyim nmigügtijc, oy jada ndimco'ögiiyim. ¹⁷ Janch pinjaty yjamiid ymadaacin, e yja'ijxpy co ymigüg tigati yajmayjaty, e amij agix ñayjihuiiyii, ca' pa'ayo'n miidity, ca' pubeda'ñ ymigüg, ca' je' anajty tzocy jihuüy ymigüg jadu'n nej Dios chogyii yjihuiiyii. ¹⁸ Miich ajcxy migügtijc huidibi ooy ndzocy njihuiiyich jadu'n nej ixypy ngi'm'ungich, miid oyyjäy'ajtin etz miid Dios ytiy'ajt tzoc yajxon naychojcm nayjihuiiyim miñ xyipy. Ca' nminaanim nigoo ngapxim nmiydaacim ahuac aguuy.

Cixyjot huinjot naybidaacim ma Dios

¹⁹ Co nayjtuunim oyyäy'ajtin miid iich ajt nmigügtijc, huin'it nejhuiiyim co Dios ytiy'ajt nguyduunim e jotcujc nayjihuiiyim co Dios n'ojadajtim. ²⁰ Co jibic njot nhuinma'ñ ajt njihuiiyim, miid co ca' oyyäy'ajtin nduunim, jac nigü Dios jibic ñayjihuiiyii com yi' jacmijhuinma'ñ miid, ca'ydi iich ajt, e yi' nejhuiydaayb tüg'óciy tijaty ajt nduunim. ²¹ Miich ajcxy migügtijc huidibi ooy ndzocy njihuiiyich, co ca' ti jibicpi njihuiiyim ma ajt njot nhuinma'ñ miid co oybi nduunim, huin'it jotcujc ajt n'ijtim miid Dios. ²² E huentimtiijity huidibi iich ajt Dios nyajmibijctzoohuim, yi' xymooyim miid co yi' y'ayuc nguyduunim, e nduunim je huidibi yi' yjäygidacpy. ²³ Dios jada ti xyajnajtz'ane'miiyim co tzoc mibijcm mijpidaacim yi' y'ung Jesús etz tzoc naychojcm nayjihuiiyim miñ xyipy, jadu'n yi' ti xyajnajtz'ane'miiyim. ²⁴ Yi jäy ajcxy pinjaty cuydumb Dios ytiy'ajt, yajpatp ajcxy ma Jesucristo e nañ Jesucristo yajpatp ma je'ajcxy. Nejhuiiyim co Jesucristo ytiy'ajt yajpaady ma iich ajt miid co je Dios yjihui'ñ ymic'ajt ti xy'adigiiyim xyjottigiiyim.

4

Dios yjihui'ñ ymic'ajt etz je ca'oybi yjihui'ñ

¹ Miich ajcxy migügtijc huidibi ooy ndzocy njihuiiyich, ca' ajcxy mmibijctähuipy tüg'óciy jäy huidibi Dios y'ayuc capxhuäcxip. Mido'mbijccixy jayijp peni janch ajcxy miidity Dios yjihui'ñ ymic'ajt. Com ji mayjäy ya naaxhuiñ huidibi minam co Dios y'ayuccapxhuäcxii yi' ajcxy e ca' yjanchity. ² Jada je' je tiy'ajt ma huaad mjihui'ñybijccixy pen janch miidity ajcxy Dios yjihui'ñ ymic'ajt, yi' ajcxy huidibi Dios y'ayuccapxhuäcxip: tüg'óciy jäy huidibi capxhuäcxp co Jesucristo yma'xung'ajty ya naaxhuiñ miid ñinücx,

Dios yi' ytiy'ajt ymiid. ³ E tüg'óciy jäy ajcxy huidibi ca' nīgapxpety ajcxy co Jesucristo chinäy ya naaxhuiñ miid ñinīcx, ca' yi' Dios ytiy'ajt miidity. Ti miich ajcxy ayuc midoogixy oga'n co miinaam yi naaxhuiñyjäy ajcxy miid je mujcu' yjihui'ñ ymic'ajt, huidibi midzip'ajtp Jesucristo. E ti je'du'n ajcxy ymiingixy. Jada je'du'n ajcxy huidibi ca' nīgapxpejtcixy co Jesucristo yma'xung'ajty ya naaxhuiñ miid ñinīcx.

⁴ Migügtijc huidibi Dios yjihui'ñ ymic'ajt ti xy'adigiigixy ti xyjottigiigixy, e ti miich ajcxy mmimadaaccixy yi huidibi ajcxy nīgapxpejtp co Jesucristo ca' ma'xung'ajty ya naaxhuiñ miid ñinīcx. Com Dios huidibi miich ajcxy xy'ane'mb, jac mij yi' ca'ydi je mujcu', paady miich ajcxy ti mmimadaaccixy je mujcu'. ⁵ Je huidi ajcxy jadu'n jaminaamb co Dios y'ayuc capxhuäcxī e ca' yjanchity ya naaxhuiñ ajcxy tiy'ajt ti patcixy ma je mujcu', paady ycixp yi naaxhuiñ yhuijy'ajtin ajcxy tzachcapxhuäcx, e yi naaxhuiñyjäy tzachmijpidaaccixy etz amidoo'ijti ajcxy y'ayuc. ⁶ Hich ajt tiy'ajt ti nbaatim ma Dios. Tüg'óciy jäy ajcxy huidibi Dios ytiy'ajt huinjihuiiyip, y'amidoo'ijtyp ajcxy ich ajt n'ayuc. Yi jäy ajcxy huidibi ca' Dios ytiy'ajt miidity, ca' ajcxy amidoo'ijtcixy ich ajt n'ayuc, paady ycixp n'ijxcajpim je jäy ajcxy huidibi tudägyip, etz je jäy ajcxy huidibi nigoo tzach'aniidaacp.

Dios ooy xychojcm xyjihuiiyim

⁷ Miich ajcxy migügtijc huidibi ooy ndzocy njihuiyich, tzoc oy yajxon naychojcm nayjihuiiyim miñ xyipy. Dios ti yecy ymic'ajt ma ajt njot nhuinma'ñ jigix jēbi ajt naychojcm nayjihuiiyim miñ xyipy. Tüg'óciy jäy huidibi ymigügtijc chojccixp yjihuiiyigixyp, ti Dios yjihui'ñ y'adigiigixy yjottigiigixy etz ñejhuiiyip yhuinjihuiiyip ajcxy Dios y'ayuc ytiy'ajt. ⁸ Pinjaty ca' ymigüg tzocy jihuiy, ca' yi' nejhuiiyi huinjihuiiyi Dios ytiy'ajt, com Dios tüg'óciy yi' tzojctäy. ⁹ Jada je'je tiy'ajt co Dios ajt xychojctaayim co je y'ung huidibi tügpajcpi ymiid, quejxy ya naaxhuiñ jigix ich ajt nbaatim Dios yjihui'ñ ymic'ajt miid yi' ycixpi. E Dios yjihui'ñ ymic'ajt ca' ycixa'ñ ytigoya'ñ nimina, paady ich ajt njugy'ajtin ca' ycixa'ñ ytigoya'ñ. ¹⁰ Dios ti xychojcm ti xyjihuiiyim, paady quejxy y'ung ya naaxhuiñ jigix jēbi xycodinaayim ma yi Dios ycötujctac miid ich ajt nbocy ycixpi. Ca' nminaanim miid co Dios ti ndzachmijpidaacim ooy mijcajee, hue' janchtiy yi' ninigoob may'ajt tuñ miid ich ajt ycixpi.

¹¹ Miich ajcxy migügtijc huidibi ooy ndzocy njihuiyich, miid co Dios jadu'n ajt ti xychojcm ti xyjihuiiyim mijcajee oga'n, paady ycixp tzoc ich ajt naychojcm nayjihuiiyim miñ xyipy. ¹² Ni minaabi pin ca' ixyñi Dios. Co naychojcm nayjihuiiyim miñ xyipy, huin'it Dios yjihui'ñ ymic'ajt ijttiy ma ich ajt njot nhuinma'ñ. Jadu'n Dios yjihui'ñ ymic'ajt xypubejtim xypudigiiyim, jēbi nīgi naychojcm nayjihuiiyim nidüg nidüg jadu'n nej Dios jäygidägy. ¹³ Nejhuiiyim ich ajt co nyajpatim ma Dios, e nañ jadu'n Dios yajpaady ma ich ajt, miid co yi' yjihui'ñ ymic'ajt ti xy'adigiiyim ti xyjottigiiyim. ¹⁴ E ich ajcxy, ti ich ajcxy yi Jesucristo n'ixyich, paady ich ajcxy nidiy'ajt'ajtyich co je Dios Teedy quejxy y'ung ya naaxhuiñ co yajnīdzöga'ñ tüg'óciy naaxhuiñyjäy co anajty Dios nbocy ajt xyajcomidohuaanim. ¹⁵ Tüg'óciy jäy huidibi nigapxp co Jesús je' yi' Dios y'ung, Dios yajpatp ma yi' e nañ yi' yajpatp ma Dios.

¹⁶ Hich ajt nnejhuiiyim etz nmijpidaacim jadu'n nej Dios ajt xychojcm xyjihuiiyim nidüg'óciy. Dios chojctaayb yi' nidüg'óciyi yi jäy. Pinjaty tzojccixp jihuiiyigixp ymigügtijc, hue' yajpatp yi' ajcxy ma Dios e nañ Dios yajpatp ma yi' ajcxy. ¹⁷ Miid co yajxon nmijpidaacim Dios paady jotcujc nnaxaanim ma Dios ycötujctac, mina anajty xyajcomidouhuim ajt nbocy. Com tú'ciy ich ajt nyajpaatim ya naaxhuiñ, tim jadu'n nej yi' Jesucristo. ¹⁸ Co nmijpidaacim Dios, huin'it ca' ajt nmidzigiiyim nmidzo'yduunim. Peni yajxon nmijpidaacim Dios, huin'it jēbi tzigī'ñ nyajqueecim. Yi jäy ajcxy huidibi tzigiiyb etz tzo'ydum, ca' ajcxy Dios mijpidägy yajxon.

¹⁹ Com Dios jayijp ti xychojcm ti xyjihuiiyim, paady ycixp tzoc ajt naychojcm nayjihuiiyim nidüg nidüg etz nañ nmijpidaacim Dios. ²⁰ Yi jäy ajcxy pinjaty jadu'n minamb co mijpidaaccixy Dios, e ca' ymigüg tzogaangixy ixaangixy, hue' je' ajcxy

aniidaacp. Com peni ca' jajtcixy nej tzóccixipy jihuihuüyigixipy yi ymigügtjic huidibi ajcxy ix'y'ajtpy, ca' ajcxy jadip nej mijpidaaccixipy Dios huidibi ca' ix'y'ajtigixy. ²¹ E Dios ich ajt xyñajtz'ane'miüyim co pin Dios mibijcp mijpidacp, huen nañ jadu'n ymigügtjic tzocy jihuiy.

5

Yi pin huidibi ca' ixa'n midohua'n Cristo y'ayuc

¹ Tüg'óciy jäy huidibi mibijccixp co Jesús je' je' je Cristo huidibi Dios yquejx ya naaxhuiñ, Dios ajcxy y'ung'ajtip. Tüg'óciy jäy huidibi mibijccixp mijpidaaccixp Dios Teedy, nañ jadu'n huen tzojccixy yjihuiyigixy je' ajcxy huidibi Dios y'ung'ajtip. ² Co ndzojcm njihuiyim huidibi Dios y'ung'ajtip, je' jada je' je ijxpejt co nañ jadu'n jébi nmijpidaacim Dios etz jébi nguyduunim nej xyñajtz'ane'miüyim. ³ Co nmijpidaacim Dios, huin'it nguyduunim jadu'n nej Dios xyñajtz'ane'miüyim e yi' y'ayuc ca' ooy chipity co nguyduunim. ⁴ Com tüg'óciy yi jäy ajcxy huidibi Dios ti y'adigiyii ti yjottigiyii yjihuiñ ymic'ajt, ymihuindinaayb ajcxy yi jibic-huinma'n ya naaxhuiñ. Co nmibijcm Dios, huin'it jébi mihuindinaayim yi jibic-huinma'n ya naaxhuiñ. ⁵ Yi jäy ajcxy pinjaty mibijcp co Jesús Dios je' y'ung, yi' ajcxy mihuindinaayb yi jibic huinma'n ya naaxhuiñ.

Je ayuc huidibi nidiy'ajt yi Dios y'ung

⁶ Yi Jesucristo je' je' je' huidibi miin ya naaxhuiñ, je' je' je' huidibi niibejt etz ni'py teemy gujy co y'o'cy miid jäy ajcxy ypocy ycixpi. Ca' nminaanim jeyi anajty ti niibety, hue' nañ jadu'n ti y'ögy miid ajt nbocy ycixpi. ⁷ E yi Espiritu Santo yi' tiy'ajt yejcp co Dios Jesús y'ung'adyii, com je Espiritu Santo yi' Dios ytiy'ajt ymiid. ⁸ Ji tugügnax huidibi tiy'ajt yejcp co Dios Jesús y'ung'adyii: je Espiritu Santo, je niibejtin, etz Jesús ni'py co teemy cujy miid ich ajt nbocy ycixpi. E jadu'n nidugüg ñaybáatigixy tügnax, e tügnax ytiy'ajt yejccixy. ⁹ Mijpidaacim ich ajt jäy y'ayuc co Dios Jesús y'ung'adyii, ni'gi copicy co nmijpidaacim Dios ytiy'ajt huidibi ti yecy miid y'ung ycixpi, com jac mic'ajt miid yi' ca'ydi jäy ajcxy. ¹⁰ Yi jäy huidibi mijpidaaccixp Dios y'ung, ymi'jtpy ajcxy je tiy'ajt ma yjot yhuinma'n. Yi jäy ajcxy huidibi ca' mibijccixy mijpidaaccixy je Dios y'ayuc ytiy'ajt, hue' ajcxy yajnajxcixy Dios nej aniidägyin co ca' mibijccixy yi Dios ytiy'ajt co y'ung nigapxy. ¹¹ Jada je' tiy'ajt co Dios ti xymooyim ajt n'alma yjugy'ajtin huidibi ca' ycixipy ytigoyipy nimina. Dios y'ung ca' y'alma ycixipy ytigoyipy nimina, paady yi' ti yaj'oyiy nej jébi ajt n'alma y'jtim huinixii huinitempo. ¹² Pinjaty ti mijpidaaccixy Dios y'ung, yi' ajcxy y'alma ca' ycixipy ytigoyipy nimina. Pinjaty ca' mijpidägy Dios y'ung, yi' ajcxy y'alma cixipy tigoyipy co y'ögipy.

Capxycixjin etz capxhuijin

¹³ Jadayaabi ayuc ajcxy nyajnijayiyigixp ma jada necy jigix jébi mijpidaaccixipy Dios y'ung, etz jébi mnejhuüyigixy tiydudägy co mjugypijccixipy jadügtecy co anajty ti m'o'ccixy e ca' ajcxy m'alma ycixipy ytigoyipy.

¹⁴ Jada jotcujc'ajtin ich ajt nmiid'ajtim co nmibijctzouhuim Dios jadu'n nej Jesucristo xyñajtz'ane'miüyim, yi' ich ajt jébi xymidouhuim. ¹⁵ Miid co nnejhuüyim co yi' ajt xymidouhuim ma tijaty Dios nyajmibijctzouhuim, paady ycixp nejhuüyim co nmiid'ajtim tijaty anajty ti nyajmibijctzou.

¹⁶ Co pinjaty ix'y co ymigüg ypocytuñ huidibi huaad jébi Dios meecxy, huen mibijctzooyi Dios miid yi' ycixpi, e Dios yajtzinähuiyb pen ca' anajty ooy ymijpocyty je tiibi anajty tuñ. Com ji tüg mijpocy huidibi Dios ca' huinmecxy. Pen ti mijpocytuñ ca' huaad Dios ocjacmibijctzooni com ca' yi' y'oc-huinmecxaani. ¹⁷ Tüg'óciy jibic-huinma'n huidibi jäy ytumyb, pocy yi', per ji jibic-huinma'n huidibi jäy ytumyb, huidi jébi Dios huinmecxy e ca' y'alma ytigoyip.

¹⁸ Nejhuüyim co tüg'óciy pinjaty Dios ti ymöyii jemybi jot huinma'n, ca' yi' y'ocpocytuni. Yi Dios y'ung, huidibi ti ymóoyigixy jemybi jot huinma'n, cuend'ajtip yi' ajcxy, ca'ydi je mujcu' xyajhuinma'nydigóoyigixy.

¹⁹ Nejhuiiyim iich ajt co Dios jadu'n xy'ane'mim njot nhuinma'ñ etz nejhuiiyim co tüg'óciy jacjadyii naaxhuiñyäjy huiidibi ca' mijpidaaccixy Dios, je mujcu' jadu'n yjot yhuinma'ñ y'ane'mip ajcxy.

²⁰ E nejhuiiyim co yi Dios y'ung ya y'oy naaxhuiñ e ti xyajnejhuiiyim yi' y'ayuc ytiy'ajt, jigix jëbi nejhuiiyim huinjihuiiyim yajxon je Dios janchypi tudägypi. Nmi'ijtim ma iich ajt ndzinaayin je janchypi je tudägypi je Dios y'ung je Jesucristo. Jada jëdu'n je tiydudägypi Dios, etz je Dios yjugy'ajtin caminaabi ycacixy ycatigoy. ²¹ Miich ajcxy migügtijc huiidibi ooy ndzocy njhuiyich jadu'n nej ixyipy ngi'm'ung ngi'm'anäcich, ca' nigoo mdzachDios'ájtigixy tijaty huiidibi ca' ni ti mic'ajt miidity, jadu'n nej Dios Teedy tzajpjotypi ymic'ajt miidity.

2 SAN JUAN

Yi Mimetzpi Necy Huidibi San Juan Yajniguejx Tüg Mibijcpi Töxyjäybi

¹ Hich Juan huidibi nigohuajc'ajt Dios yjäy. Nyajniguejxpich miich töxyjäy jada necy, miich Dios xyjäy'ajtp, e ti mmijpidägy Jesucristo. Nañ nyajniguejxpich jada necy tüg'óciy miich m'ung m'anäc ajcxy. Ooy ndzocy njihuüyich miich ajcxy. Ca' nmīnaanīm hich naydügpajc ndzojcyp njihuüyibich miich ajcxy, nañ jadu'n tüg'óciy jäy ajcxy, huidibi huinjihuüyigixp Dios ytiy'ajt, xychojccixp xyjihuiiyigixp ajcxy. ² Hich miich ajcxy ndzojccixyp njihuüyigixyp com Dios ytiy'ajt yajpatp ma hich ajt njot nhuinma'ñ, etz yi' ijtp huinixi ma hich ajt. ³ Huen Dios Teedy etz hich ajt nHuindzin Jesucristo, yi Dios y'ung oy'ajt may'ajt tuñ miid miich ajcxy, huen xypa'ayoogixy huen xyajjotcugiiygixy miid co mguydungixy yi' ytiy'ajt etz mnaychójcigixy mnayjihuiiyigixy miñ xyipy.

⁴ Ti nmīnaybadyiijich nijējity miich m'ung m'anäc, e ooy njotcugiiyich miid co tiydudägy ajcxy payöyi Dios ytiy'ajt, jadu'n nej Dios Teedy ajt ti xyñajtz'ane'miüyim.

⁵ Cham njacnimäyich miich ajcxy co jēbi ajcxy mnaychójcigixy mnayjihuiiyigixy miñ xyipy. Ca' nmīnaanīm huinjemy jada tiy'ajt huidibi cham nyajnijayiiygixipy. Je' jada je ayuc huidibi oga'n'aty ti nbaatim co ti nmibijcim Jesucristo. ⁶ Co ndzojcm njihuüyim nmigügtijc, jada je' tiy'ajt co nguyduunim nej Dios ajt ti xyajnajtz'ane'miüyim. Jada huidibi Dios ti xyajnajtz'ane'miüyim huidibi miich ajcxy ti mbaatcixy, co oga'n ti nmibijccixy Jesucristo, copicy co ajcxy mnaychójcigixipy mnayjihuiiyigixipy.

Yi jäy ajcxy huidibi aniidaaccixp

⁷ Com ji mayjäy ya naaxhuiñ huidibi huin'imb yi jäy ajcxy. Yi' ajcxy ti puhuäc-tüdy mibijcpidijc, yaj'ixpijcp ajcxy co Jesucristo ca' ñayguëxici ya naaxhuiñ miid ñin'icx. Jadayaabi jäy ajcxy yhuin'ümyb yhueñpinity etz Jesucristo ymidzip'ajtyp ajcxy. ⁸ Naygüendi'ájtigix ci'm. Ix mgamijpidaaccixy yi' ajcxy y'ayuc. Co ajcxy myajhuin'üingixipy, huin'it anajty myajtigooygixy je oy'ajt huidibi mbadaangixyp ma Cristo. Co mguydúngixipy Jesucristo ytiy'ajt, huin'it mbáatcixipy tüg oy'ajt ca'pxypí jiiyby tzajpjoty.

⁹ Tüg'óciy jäy huidibi ca' cuydungixy je Jesucristo y'ayuc ytiy'ajt, ca' ajcxy miidity Dios ytiy'ajt ma ajcxy yjot yhuinma'ñ. Je jäy ajcxy huidibi cuydundiib je Cristo y'ayuc ytiy'ajt, ymiid ajcxy Dios Teedy etz je y'ung ytiy'ajt ma ajcxy yjot yhuinma'ñ. ¹⁰ Peni ji pinjaty ñicxy ma miich ajcxy huidibi yaj'ixpijcp huidibi ca' ytiy'ajtity, ca' ajcxy mgöbiguiipy ma mdijcin, e ni ca' ajcxy mjijp'ixihuipy. ¹¹ Com Dios yjäy pinjaty anajty jijp'ixiüyb je jäy ajcxy huidibi yaj'ixpijcp huidibi ca' ytiy'ajtity, hue' je' tundigooyb ma Dios ytiy'ajt. Hue' je' anajty paady jadu'n nej jihuüy ti jijptigiüyñi ajcxy je huingbi ixpijcin huidibi ca' ytiy'ajtity.

Capxycíjxin

¹² Oy hich ooy mij may miich ajcxy njamīdmīydāgaangixy per ca' miich ajcxy jadu'n nijayihuaangixy necy'am. Hue' janchtiy njijp'ixyich co ci'm nninicxaangixy jim, e nmīd miydāgaangixy au'am jigix ajcxy ooy jotcujc mnayjihuiiyigixipy.

¹³ Je mdzi' y'ung ajcxy huidibi ya yajpatcixp xyajniguejxp ycapxpcxin, je huidi ajcxy Dios nañ jadu'n ti yhuin'íjxigixy. Jadu'n ngapxycíxyich miid miich. Amén.

3 SAN JUAN

Yi Necy Huidibi San Juan Yajnigüeix Gayo

¹ Señor Gayo:

Nguejxypich capxocxin ma miich. Hich miich nyajnigüeixyp jada necy. Nnigo-huajc'ajtypich ma je mibijcpidijc. Ooy ndzocy njihuïyich miich.

² Miich migüg, ooy nmigüg'adyii. Dios nmibijctzooybich miid miich ycixpi, huen agujc jotcujc mdzinähuïpy etz mmic'idipy m'oy'idipy. Nejhuïybich co oy m'ity ma Dios. ³ Com oy ti njotcugïyich co je mibijcpidijc ajcxy ymiin ya huidibi jim tsoon ma miich ajcxy, e yi' ajcxy xyty'ajtmooyich jadu'n nej tydudägy mdzinäy e nañ jadu'n nej yajxon mguyduni Dios yty'ajt. ⁴ Ooy njotcúcidyich jac nigí co ty'ajt nbaadyich jadu'n nej nmigügtjicich cuydungixy Dios yty'ajt.

⁵ Miich migüg huidibi ooy ndzocy njihuïyich, ooy njäygidägyich co oyjäy'ajtin mduñ miid je migügtjic. Nigí oy co oyjäy'ajtin mduñ miid je migügtjic huidibi ca' m'ixy'adyii. ⁶ Yi mibijcpidijc, huidibi ti choon ma miich ajcxy, ti ty'ajt yejccixy ma je mibijcpidijc ya jadu'n nej miich oyjäy'ajtin mdzachtuñ. Ooy oy mduñ co mmöy yi migügtjic yi ytü'amgixpi e mguejxnaxy yajxon jadu'n nej Dios jäygidägy. ⁷ Yi jadu'mbi jäy huidibi mguejxnaxyp anajty hue' Dios y'ayuc ycixpi yhuidity, e ca' yi' ajcxy ti pijctzoy ma je jäy ajcxy huidibi ca' Dios yty'ajt nejhuïyi. ⁸ Copicy nbubejtím ajcxy je mibijcpidijc ajcxy huidibi Dios y'ayuc ycixpi yhuidijtcixy. Co jadu'n nbubejtím, chi jadu'n paady nej jihuïy tú'ciy nduunim miid yi' ajcxy ma Dios y'ayuc capxhuäcxii.

Je Diótrfes yjibic-huinma'ñ

⁹ Ti nnijayïyich jayhuin je mibijcpidijc huidibi nanyöymújcigixp jim. Jim yajpaady tüg jäy huidi xii Diótrfes huidibi ca' cöbiga'ñich n'ayucich etz ngötújcínich. Amij agix jada jäy chachñayjihuïyii, yi' ci'm tzach'ane'mam ma miich ajcxy. ¹⁰ Paady ycixp co nnícixbich jim ma miich ajcxy nyajnimähuamy ajcxy tüg'óciy yi jibic-huinma'ñ huidibi Diótrfes ytumyb, jadu'n nej jibic xyñigapxy xyñ'ojïyich etz jadu'n nej anii yaj'ixpicy. E nañ ni yi' ca' mmüidity jotcujc'ajtin jadu'n nej chach'idíich. Nigí ytundigoy co ca' yajjättäga'ñ ajt nmigügtjic huidibi Dios miid ycixpi yhuidity. E co ñich ajt nmigüg pinjaty yajjättäga'ñ, chi yi' capx'aducy e yajpidzimy je mibijcp hidibi jäy yajjättäc, e ca' je' cöbiga'ñ ma miich mnayöymujctac.

¹¹ Miich hermano, huidibi ooy ndzocy njihuïyich, ca' mguydunipy jada jibic-huinma'ñ. Cuydun janchtiy yi oybi huinma'ñ. Yi jäy ajcxy huidibi oybi tungixp, yi' ajcxy ymiid Dios yty'ajt ma yjot yhuinma'ñ. Yi jäy ajcxy huidibi jibic tungixp, ca' yi' ajcxy Dios yty'ajt nejhuïyi.

Je Demetrio tüg y'ixpejt oybi

¹² Yi jäy, huidibi yxii Demetrio, tüg'óciy jäy ajcxy yminaangixy co ooy y'oyjäyity, e janch yajpaady ma Dios yty'ajt. Hich nañ jadu'n nmína'ñich co ooy y'oyjäyity yi Demetrio, e miich mnejhuïyb co ñich ajt ndiy'ajt janch janch yi'.

Capxycíjxin

¹³ Ooy ñich anajty miich mijcajee ayuc njayajmiidmiydäga'ñ. Per ca' nijayïhua'ñ necy'am. ¹⁴ Hue' janchtiy njijp'ixyich co nnicxa'ñich tzojc ma miich ajcxy, e nmüidmiydäga'ñich miich ajcxy ci'm.

¹⁵ Jotcujc'ajtcix. Yi mibijcpidijc ajcxy huidibi ya yajpatp yajnaxpy ajcxy capxocxin ma miich ajcxy. Tun may'ajt yajnájxigíich ngapxocxin ma nmigügtjicich jim nidüg nidüg etz xibety xibety. Cham ngapxycíxyich, Juan je Apóstol.

SAN JUDAS

Yi Necy Huidibi Judas Nijaiy Je Huidibi Dios Ti Huin'ijxigixy

¹ Hich Judas, tumbich ma Jesucristo ytung, Jacobo xy'uch'ajtpich. Nijaiyyibich miich ajcxy nidüg'óciy huidibi Dios Teedy ti huin'ijxcixy jébi mibijccixy yi' y'ayuc huidibi jébi xyajpocyñihuaatzcixy. Nijaiyyibich miich ajcxy tüg'óciy huidibi Jesucristo ycuend'aty ymiid. ² Huen Dios miich ajcxy mijcajee xypa'ayoogixy etz xyajjotcugñygixy etz chojccixy xyjihuiygixy.

Yi' ajcxy huidibi yaj'ixpijcp anii

³ Miich ajcxy migügtijc huidibi ooy ndzocyich njihuiyich, miid je nüdzoocin ycixpi miid ajt n'alma huidibi miich ajcxy etz ich cham nmiid'ajtim, ooy chachycopicity co nijaiyhuiybich miich ajcxy miid yi mibijcin ajcxy ycixpi, e ngohuaniiyb ajcxy co jébi mic m'ijtcixy ma ajcxy yi mibijcin e ca' m'ixtigihua'ccixy ma yi ayuc tiy'ajt huidibi Dios yejc ma tüg'óciy naaxhuiñyäj. ⁴ Naagity jäy ajcxy ti ytiygixy ma miich ajcxy ayüch ameech miid anii. Jecy'ajty Dios tiy'ajt yejcy ma yi' y'ayuc co yi jadu'mbi jäy tigoyam ajcxy y'alma miid ypocy ycixpi. Hue' yi' ajcxy jibic jäy huidibi ca' huindzigiygixy Dios. Anii daacp yi' ajcxy co yminaangixy co Dios ti xypa'ayoohuim etz ti xyhuinmeecxim ajt nbocy paady ycixpi jébi nduunim huen tiijity huidibi nijot'ajtim. Ca' cöbijccixy je Dios huidibi nHuindzin'ajtim, etz ca' cöbijccixy ich ajt nHuindzin Jesucristo.

⁵ Oy miich ajcxy ti mjanejhuیداaygixy jada tiy'ajt, per nyajjäymetzcodamy ajcxy jadu'n nej Dios jaijrp yajpidzimy jecy'ajty jim Egipto je Israel jäy ajcxy, e jac'axam tzaachytuuñ miid o'cin je huidibi anajty ajcxy nijejity ca' ymibijccixy. ⁶ Je ángeles huidibi ajcxy ca' yhui'my ma Dios ytung huidibi ajcxy capxycömidodacy Dios, y'ixmajtztay ajcxy y'it chinaydac. Dios je' cham miid'ajtp ajcxy ahuing. Mach ajcxy y'ity agoodztuuby huinixii huinitiempo ixti cooni je mij xii anajty Dios ti yajhuaad'aty, mina anajty tiyduna'ñ naaxhuiñyäj ajcxy miid ypocy ycixpi. ⁷ Jadu'n nej Sodoma etz Gomorra etz jacjadyii mij cajp huinduy agonbi ytundigoyday ajcxy ma jejimbi cajp ycuudungixyp ñinix chojcin, naygijeyci ajcxy ma je jibic-huinma'ñ. Yéydijctijc ytundigooygixy miid huingbi yéydijc. Je' jadu'n hui'm ixpejt ma tüg'óciy jäy co je tzaachypi ajcxy paatcixy.

⁸ Jim yajpaady ma miich ajcxy jäy huidibi nejhuuiyb co Dios jecy'ajty tzaachytuuñ ángeles ajcxy etz cajp jäy huidibi ajcxy tundigooy. Yi' ajcxy chinaayin jadu'n yi' nej tüg cumäy. Yajjibicciygixy je ñinix miid pocytunii. Jijpcogapxiygixy je Dios ycotujcin, nigapxcixy ni'ojiiygixy je huidibi ajcxy Dios mooyip mij'ajtin. ⁹ Je arcángel, Miguel, je ángel huidibi mij'ane'min miid, co anajty ychiptuñ miid je mujcu', yajcapxyoongixy yaj'ayucyoongixy je Moisés ñinix, ca'p je' miid'ajty huinma'ñ nicxy yajpocycäy je mujcu' miid nay'ojii. Jéyi janch co nimay: "Yi Huindzin Dios miich xy'ix'ojip." ¹⁰ Per jada jäy ajcxy jibic ooy nigapxcixy huidibi ca' nejhuuiygixy. Tügiyb ajcxy yhuinma'ñ miid iyujc animal yhuinma'ñ, etz iyujc animal ca' ajcxy miidity huinma'ñ tiydudägyi. Ci'm jada jäy ajcxy ñayyajhuinma'ñydgóoyigixy, e jadu'n ajcxy y'alma yajtigoyaangixy.

¹¹ Ypadamyb ajcxy tzaachypi mijcajee miid pocy ycixpi com je' yi' ajcxy ypadumyb nej Caín y'idiich. Miid co meñ tzach'adzojccixy, paady ñiidigooygixy ytüdigoygixy jadu'n nej Balaam ñiidigoy ytüdigoy jecy'ajty, e jadu'n ajcxy y'ayoogixy jadu'n nej Coré, co y'o'cy co ycacapxymidohuañ anajty co Moisés oy y'ayucijpcogapxiyi. ¹² Yi jadu'mbi jäy tzo'ydu'n yejcp ma miich ajcxy co mgaaygixy m'uuccixy tügmucy miid yi' ajcxy, e jadu'n ixpejt yejccixy co mnaychójcigixy. Caaygixp uuccixp tügmucy miid miich ajcxy agujc jotcujc per ni ca' ajcxy miidity huindzigi'ñ miid ymigügtijc. Jadu'n ajcxy nipaady nej cöbixycuend'ajtpi huidibi ci'm ñaygüend'ajtigixyp, e ca' tungixy cuendi je cöbixy. Jadu'n ajcxy nej joc huidibi ca'pi nii miidity, huidibi je poj yajhuidijtip. Jadu'n ajcxy nej quipy huidibi ca' ytiim'aty mina yjapadyii, jaijrp y'ocniicxy, e chi jada ytiich, e

ytimypidägy miid ñidictz. ¹³ Yi' ajcxy ytundigoyii ooy cho'ydu'n yecy, tim jadu'n nipaady nej je mejy y'oobägy co ypidägy. Jadu'n ajcxy nipaady nej madza' huidibi ytu' ti yajtigach. Hue' y'ijtcixy pocypa'tci'py huinixii huinitiempo, mij'agootztuuyb y'idipy ajcxy.

¹⁴⁻¹⁵ Nañ jadu'n Enoc, je mihuixtujcpi co anajty Adán ti yjayijp'aty, yminañ co Dios yhuinma'ñymooyi miid jada ycixpi, e yminañ: “N'ijxich je Huindzin Dios co anajty ymiñ miid janch canaag mil je huidibi ajcxy tudägyity etz huätzip. Co anajty tiyduna'ñ ajcxy tüg'óciy naaxhuiñyäjä miid ypocy ycixpi, chi yajpocycähua'ñ je jibic jäydijc ajcxy jadu'n nej ajcxy ti ytundigooygixy miid yjibicjäy'ajt etz miid jibic ayuc tiibi miid nigapxcixy ni'ojiiygixy Dios.” ¹⁶ Jada jibic jäydijc ca' ajcxy ni ti mijotcujc'ajtcixy, ooy nigapxcixy ni'ojiiygixy ymügügtijc. Jëyi ajcxy yci'm jotcujc'ajt ixtaaygixy. Ycapxcixy amij agix. Ooy oy nigapxcixy nijëjity jäy miid co ti oybi padaangixy ma je' ajcxy.

Judas capxhuijp je' ymügügtijc ajcxy

¹⁷ Per miich ajcxy migügtijc huidibi iich ooy ndzocy, jäymejtcix je ayuc huidibi jécyip ti najtzcapxiygixy je Huindzin Jesucristo y'apóstoles ajcxy. ¹⁸ Je apóstoles miich ajcxy xyñimay: “Ma anajty xii tiempo ycixaani, ji'adip jäy ajcxy huidibi nixigipy yajxigipy huidibi Dios yje'ajtpy, e chinaaygixipy jadu'n nej yi' ajcxy ci'm tzachnijot'ajtcixy jibic-huinma'ñ.” ¹⁹ Je' ajcxy yajnaybijc-huäcxiib mibijcpidijc co ca' ajcxy miidity je Dios yjihui'ñ ymic'ajt.

²⁰ Per miich ajcxy migügtijc huidibi ooy ndzocyich njihuüyich, ijtcix miich ajcxy tudägy ma yi mmibijcin. Jäymejtcix mibijctzoogix Dios miid je Espiritu Santo ypubejtin.

²¹ Naygüend'ájtigix jigix jëbi Dios xychojccixy xyjihuiiygixy ajcxy, e ahuijxcix je xii mina anajty iich ajt nHuindzin Jesucristo xymöhuaanim je jugy'ajtin huidibi ca' ycixipy ytigoyipy ni mina miid co ti xypa'ayoohuim.

²² Capxjotcidaaccix pinjaty ca' ti mijpidägy janchypidägy. ²³ Yajmiidmiydaaccix jac-jadyii migügtijc jigix ajcxy jëb paatcixy nañ jadu'n nidzoocin miid ajcxy y'alma. Jadu'n anajty paady nej jihuiy myajpidzimgixy jijnjoty. Yajtungix pa'ayo'n miid jacpinjaty pocytumbi. Naygüend'ájtigix ma yi' ajcxy ypocytunii, ca' mbocytungixy nañ jadu'n. Jadu'n yi' ajcxy ypocytunii nipaady nej huit huidibi ti yjibicci'y.

Judas capxycixy miid je' ymügügtijc

²⁴⁻²⁵ Je Dios tügpajcpi, je Dios huidibi xyajnidzoocim ajt n'alma, je huidibi yjajtaayb ñejhuiydaayb, ymiid je' mic'ajt etz cötujcin jëbi miich ajcxy xycuend'adipy jigix ca' mbocycägixipy, etz je' ymiid mic'ajt jigix jëbi xyajja'tcixy agujc jotcujc ma Dios yhuinduu, ma yi' yajpaady miid y'oy'ajtin ymij'ajtin ca' ti mbocymiidity ajcxy. Yi' paatip je oy'ajtin etz mij'ajtin etz mic'ajt etz cötujcin miid nHuindzin Jesucristo ycixpi, tiyiy etz cham etz huinixii. Amén. Jadu'n ngapxycixyich.

EL APOCALIPSIS

O Je Huidibi Dios Yajhuin'ijx San Juan

¹ Jayhui'my ity ma jada necy je Jesucristo y'ayuc ytiy'ajt huidibi ca' pin nejhuüy huiñihuüy jecy'ajty. Dios moy Jesucristo jada tiy'ajt jigix yajni'ixiydähuipy je Dios ytumbi ajcxy ti anajty tunaanip jadaanip ya naaxhuiñ, e ca' ooy jecy yhuäcxiba'ñ mina ytuna'ñyii yjada'ñyii. Jesucristo yquejxy jada ayuc tiy'ajt miid tüg ángel ma Juan. E je ángel yajhuin'ijxy Juan jada y'ayuc etz ijxpejt. ² E Juan yejcy tiy'ajt janchypi tüg'óciy jadu'n nej anajty ti huiñ'ixy ti huiñmidoy. E Juan ñidiy'ajt'ajtpy jada Dios y'ayuc etz nañ jadu'n nidiy'ajt'aty je ayuc tiy'ajt huidibi Jesucristo yajnejhuüiyi.

³ Janch jotcuyc je' pinjaty capxp jada necy etz pinjaty mido'mbiyc jada Dios y'ayuc huidibi Juan nidiy'ajtpy etz ñajtzcapxiyb. E jotcuyc je' pinjaty cuydumb tüg'óciy huidibi jaybety ma jada necy, com je xii je tiempo huingooniñ je' mina ytuna'ñyii yjada'ñyii.

Juan nijayiiy huixtujc'itpi mibijcpidijc

⁴ Hich Juan nijayiiybich yam je mibijcpidijc huixtujcpiycpi huidibi yajpatp jim Asia naaxjot. Huen Dios etz je huixtujcpi espíritu huidibi yajpatp ma je' y'ane'mdac may'ajt oy'ajt tunipy miid miich ajcxy etz xymóoygixipy jotcuyc'ajtin. Dios je' huidibi cham ijtp, je huidibi jecy'ajty ijt, etz je huidibi miinaamb. ⁵ Huen Jesucristo may'ajt oy'ajt tunipy miid miich ajcxy etz xymóoygixipy jotcuyc'ajtin. Jesucristo je' huidibi tiydudägy Dios ytiy'ajt yejci, je jayijpi jäy huidibi ti yjugypicy jadüg'oc co y'o'cy, je' nigohuajc'ajtp tüg'óciy pinjaty jugypigip jadüg'oc co anajty ti y'öccixy. Jesucristo nigohuajc'ajtp etz ane'my tüg'óciy reydiyc huidibi ane'mb ya naaxhuiñ. Je Cristo, huidibi xychojcm xyjihuiyim, ti xyñihuaanim miid ñi'py ma je tzaachypi huidibi mihuaad'ajtim miid ajt nbocy ycixpi. ⁶ Jesucristo ti xycötujcmooyim etz ti xytungmooyim miid Dios Teedy, huidi yi' yteedy'ajtpy. Jadu'n ich ajcxy ndung etz ngötujcin nipaady nej je tung etz cötujcin huidibi reydiyc etz teedytjyc ajcxy ymiid. Huen Jesucristo y'idipy cömay huiñixii huiñitiempo etz huen yi' y'ane'min cötujcin y'idipy huiñixii huiñitiempo. Jadu'n jada. Amén.

⁷ Cuendtungix ich n'ayuc, ¡Cristo miinaamb jocjoty e tüg'óciy je mayjäy y'ixa'ñyii! E y'ixamyb je' ajcxy huidijaty Cristo yaj'ayoo yajtzaachypijc. Tüg'óciy naaxhuiñyäjy yjihuihua'ñ yäxa'ñ ytaja'ñ ymaya'ñ miid je'ycixpi. Jadu'n jada. Amén.

⁸ Jadu'n je mijpi Dios huidibi tüg'óciy mic'ajt miid ymina'ñ:

—Hich je' huidibi yajtzondacp je naaxhuiñybi, je tzajp etz je huidibi jaccogixiiyb. Jadu'n ich nej letra A huidibi yajtzondacp je alfabeto etz je letra Z huidibi cogixiiyb ma je alfabeto. Hich je' huidibi cham'ijtp, etz huidibi jecy'ajtyp ijt etz huidibi miinaamb.

Juan ijxy yi Cristo oybi ymijity

⁹ Hich Juan, miich ajcxy mmigüg, quipxyi miid miich ajcxy nminaxy nyajnaxyich ayo'n tzaachypi. Quipxyi miid miich ajcxy ndzinäyich ma Dios y'ane'my. Etz quipxyi miid miich ajcxy nyajtuñich je mecxtujcin ma ndzinaayin huidibi Jesucristo ti xymooyim. Jim ich anajty mach n'ityich ma je naax huidibi mejy agujc, huidibi xii Patmos, miid Dios y'ayuc ytiy'ajt ycixpi, je ayuc tiy'ajt huidibi Jesucristo xyajnejhuüiyim. ¹⁰ Jadu'n tügtecy ti njatyich, hue' anajty tüg domingo xii co ich Dios n'ojadajtyich, e Dios yjihui'ñ ymic'ajt ti anajty xymimadactayich njot nhuinma'ñich. Chi nmidooyich jixci'py'amy tüg huidibi mic capx, jadu'n yi' ycapxin nmidooyich nej tüg trompeta yxüxy. ¹¹ Chi je' huidibi xymigapxpich anajty yminañ:

—Hich je' huidibi yajtzondacp etz je' huidibi yajcogixiiyb tüg'óciy tijaty ya naaxhuiñybi etz tzajpjoty. Jadu'n ich nej je letra A huidibi yajtzondacp je alfabeto etz je letra Z huidibi yajcogixiiyb je alfabeto. Cojaay miich ma tüg libro huidibi mhuiñ'ijxyp, e quex je necy

jim Asia naaxjot ma je huixtujc picypí mibijcpídiyc ma je huixtujcpi cajp: Efeso, Esmirna, Pérgamo, Teatira, Sardis, Filadelfia etz Laodicea.

¹² Chi n'ijxhuimbityich n'ixa'nich pin ich anajty xymigapxpich. Co nnayjii'ijxich, huin'it nhuin'ijxyich huixtujc candelero ac tim oori. ¹³ E cujc'amy ma je huixtujc candelero nhuin'ijxyich tim jadu'n nej je jäy huidibi tsoon tzajpjoty (je Cristo), yxoxyity miid tüg huit yjädy anajty mabaad ytecy, e yhuiniity ma ycaach miid tüg oorihuin. ¹⁴ Yi' ycohuajc etz ycöhuay janch poob, jadu'n nej lana huidibi janch poob, jadu'n nej nieve ypoobity, e je yhuin jadu'n nej jinye'n. ¹⁵ Je' ytecy tim jadu'n nej latón huidibi janch oy, nej jihuiy jijnjoty ornojoty yam ypidzimy. E je ymiydaacin janch mic, tim jadu'n nej canaag mijni y'a'ich y'agimimy. ¹⁶ E ymiid anajty ma a'oygi' huixtujc madza'. E ypidzimy ma y'ahuac tüg espada mejtz'adu'm'amy yjijpity. E yhuiniyjijp jadu'n anajty nej xii janch mic y'añ.

¹⁷ Co je' nhuin'ijxyich, chi janch ögy oy ngidägyich ma ytecy ymijc, chi xycinixajyich miid y'a'oygi', chi xyñimaayich:

—Ca' mdzigy; ich je' huidibi jayjip'ajtp ya naaxhuiñ etz tzajpjoty etz ich je' je huidibi cogixihuamb. ¹⁸ Jugy'ajtpich; ti n'ögyich, e ti njugypicyich jadüg'oc, e jugy'adipich huinixii huinitempo. Nmiidich mic'ajt jigix ane'mibich yi o'cin etz je it ma je öcpi ajcxy y'alma ity. Jadu'n nipaady nej jihuiy nmiididyich je öcpi it ahuaazti. ¹⁹ Cojay cham tijaty mhuin'ijxpy mhuinmidooyb, jadu'n nej huidibi tunaanip jadaanip jadachambi xii tiempo, etz huidibi tunaanip jadaanip jacjiini. ²⁰ E jadu'n yhuimbizimy je tiy'ajt janchypí huidibi ca' pin nejhuiy maabi je huixtujcpi madza' tiibi mhuin'ixy ma ich n'a'oygi', etz je huixtujcpi oricandelero. Je huixtujcpi madza', je' je' je ángeles ajcxy huidibi cogapxy'ajtp miid Dios ycixpi ma je huixtujcpi cypí mibijcpídiyc. E je huixtujcpi candelero huidibi ti m'ixy, je' yi' je huixtujcpi cypí mibijcpídiyc.

2

Je ayuc huidi yajmoy yi mibijcpídiyc jim Efeso

¹ Nijayi' miich je ángel huidibi cogapxy'ajtp jim ma je huidibi ajcxy mibijcpí jim Efeso: “Niima' ajcxy co jadu'n yminañ je huidibi huixtujc madza' miid ma y'a'oygi', je huidibi jim yajpatp agujc'amy ma je huixtujcpi candelero, je' jadu'n minamb: ² Ich nejhuiybich tüg'óciy ti miich ajcxy mdumy, jadu'n nej mictägy mdungixy ma Dios ytung, etz jadu'n nej mmimecxtujccixy migügtijc. Nejhuiybich co ca' m'ocmimexxtugaani ajcxy jibicjäydijc, e ti m'ijxmajtcixy je ajcxy huidibi naydijip co Cristo ti huin'ijxigixy, per ca' je' ajcxy ytudägyity, e miich ajcxy ti mnejhuiy co ajcxy ooy y'aniidaaccixy. ³ Nejhuiybich co ooy ayo'n mij miich ajcxy mminajxcixy myajnajxcixy miid ich ycixp, etz ooy mij mecxtujcin ajcxy myajtungixy, etz ooy janch mic mdungixy miid ich ycixp, e ca' ti mmidzjipigixy ich ndung. ⁴ Per nejhuiybich ma miich ajcxy mdundigoy. Ca' miich ajcxy xyajmij'atyich mijcajee, jadu'n nej anajty xyajmij'atyich ajcxy mijcajee co oga'n ajcxy mibijcy. ⁵ Miid jada ycixpi jäymetz miich ajcxy ma oy m'agänajxcixy. Jothuimbijtcix, e tungix nej anajty m'octungixp co oga'ñ ajcxy mmibijcy. Pen ca' ajcxy jadu'n mdungixy, chi tzojc nícxibich ma miich ajcxy, chi huingbi nbidägyibich ma miich ajcxy xyjapaady, tim jadu'n nipaady nej jihuiy nbicyich yi mgandelero. Jadu'n ndunipyich pen ca' anajty mjothuimbity ajcxy. ⁶ Per njäygidaacypich jadu'n nej miich ajcxy m'ijxtigoydaaygixy mjäydigoydaaygixy je jibicjäydijc ajcxy yhuinma'ñ. Nej je nicolaítas ajcxy ytungixy, miich ajcxy ca' mjäygidaaccixy e nañ jadu'n ich ca' njäygidägyich. ⁷ Pinjaty ytádzac miid huen amidoo'ity nej je Espíritu Santo ymina'ñ ma je mibijcpídiyc huidibi yajpatp xi ya. Pinjaty madacp ma ymibijcin, ich yi' nmöhuipy tzinaayin jugy'ajtin ma Dios y'ane'my, jaydeb jotcujc chinähuipy ma Dios y'it, jadu'n nipaady nej jihuiy ajcxy jicxy je quipytiim ma Dios y'it huidibi jugy'ajtin yejcp.”

Je ayuc huidi yajmoy yi mibijcpídiyc ajcxy jim Esmirna

⁸ Nijayi' je ángel, je cogapxy'ajtpi huidibi yajpatp ma je mibijcpidijc jim Esmirna: "Jadu'n ymina'n je huidibi yajtzondac je naaxhuiñybi etz tzajp etz huidibi cogixihui, je huidibi o'c e yjugy'aty jadüg'oc: ⁹ Hich nejhuiybich tüg'óciy ti miich ajcxy mdumyb. N'ijxajpyich nejhuiybich je m'ayo'n mjotmay ajcxy, jadu'n nej ti myaj'ixhuidijtcixy ti myajpahuidijtcixy. Nejhuiybich co ayooob jäy miich ajcxy, per miid miich ajcxy Dios y'oy'ajtin, e jadu'n nipaady miich ajcxy nej comeeñydijc. Nejhuiybich co nijëjity jäy miich ajcxy xyñigapxyp xyñi'oñiyb. Naydiyii ajcxy co yjudíoñyity, e ca' yjanchity. Hue' ajcxy miid y'ijtcixy je mujcu'. ¹⁰ Ca' ni ti mdzigiy miich ajcxy nej mjadaangixy m'ayoohuaangixy. Yi mujcu' miich ajcxy nijëjity xyajpujxtjccahuamb, m'ocyaj'ijxmadzangixy pen janch miich ajcxy nidüg'óciy myajpatcixy ma Dios. Jadu'ñyi miich ajcxy m'ayohuipy majc xi. Ijtcix tudägy mabaad ajcxy m'öccixy. E hich miich ajcxy je jugy'ajtin huinixiibi nmöhuipy jadu'n nej premio co ti mmadaaccixy ma mmibijcin. ¹¹ Pinjaty miid ytádzac, huen mido'mbijccixy nej je Espiritu Santo nimäy je pinjaty mibijcp Dios. Pinjaty mimadacp cuyduñ Dios y'ayuc ytiy'ajt, ca' je' y'alma ayoohuipy ayoodactuuyb, ca' y'öga'n mimejtz'ocpi."

Je ayuc huidi yajmoy yi mibijcpidijc jim Pérgamo

¹² Nijayi' je ángel huidibi cogapxy'ajtp jim ma je mibijcpidijc ajcxy jim Pérgamo: "Nijayi' je ayuc co jadu'n ymina'n je huidibi y'espada miid mejtz'adu'm'amyb yjijpity: ¹³ Hich nejhuiydaaybich jadu'n nej miich ajcxy mdzinaaygix mjogy'ajtcix. Nejhuiybich co miich ajcxy mdzinaaygixy mjogy'ajtcixy ma tüg cajp ma je mujcu' y'ane'my. Per mi'ijtyñi je nxiijich, e ca' m'ixmach je mmibijcin ma hich. Ni mga'ixmajch je mmibijcin je huin'it xi co Antipas yaj'o'ci jim ma miich ajcxy, tüg hich nmigüg, je tudägy pi testigo, jim je' y'o'cy ma mujcu' chinäy. ¹⁴ Nmüidich tigati huidibi ca' n'oy'ixyich ma miich ajcxy huidibi mdumyb ajcxy jim Pérgamo. Nijëjity miich ajcxy ca' m'ixmadza'n je Balaam y'ixpijcin, je huidibi yaj'ixpijcy jecy'ajty co huen jüxcixy je huidibi anajty tzaadzech quipychech ti yajhuindzigiigixy. E nañ jadu'n yaj'ixpic co huen tundigoogixy miid huingbi töxyjäy. ¹⁵ Nañ jadu'n miich ajcxy mmiidity nije' jäy huidibi ajcxy ca' ixmadzaangixy nicolaítas y'ixpijcin, je ixpijcin huidibi hich ca' ndim'ixa'nich. ¹⁶ Paady jothuimbijtcixy miich ajcxy, yajtigajtzni ajcxy mjot mhuinma'n. Pen ca' jadu'n mdunipy, nícxibich jim tzojc ma miich ajcxy. Chi jada' ndziptunipyich miid yi' ajcxy huidibi midundigooyb hich ngötujcin huidibi ngapxpich. Hich n'ayuc jadu'n nipaady nej espada. ¹⁷ Pin ytádzac miid, huen mido'mbicy je ayuc huidibi je Espiritu Santo ñigapxyp ma je huidibi ajcxy Dios y'ayuc ytiy'ajt mibijcp. Pin jada tiydudägy mimadacp cuyduunn Dios ytiy'ajt, hich yi' nmöhuipy oy'ajtin huidibi Dios yjé'ajtpy. Jada oy'ajt jadu'n nipaady nej maná huidibi yüch ijtp ma Dios chinaydac. Nañ jadu'n hich yi' nmöhuibich tüg pi'cpoobtzaa, e ma je poobtzaa jim yjaayity tüg xi jemybi huidibi ca' ni pin ijxcabipy, jëyi janchtiy ijxcabip je xi pin anajty cöbijcp je tzaa."

Je ayuc huidi yajmoy yi mibijcpidijc jim Tiatira

¹⁸ Nijayi' je ángel huidibi cogapxy'ajtp ma je mibijcpidijc jim Tiatira: "Nima' ajcxy, jadu'n je Dios y'ung ymina'n, je huidibi yhuin miid jadu'n nej jihuiy jünye'n, e ytecy jadu'n miidity nej bronze tiibi ytoyuach ma jün: ¹⁹ Jadu'n yi' ymina'n: Nejhuiybich tüg'óciy ti ajcxy mdumyb. Nejhuiybich jadu'n nej miich ajcxy mijcajee myajmij'ajtcixy Dios etz mdzojccixy mjihuiygixy ymügügtjic; jadu'n nej mmibijccixy mmijpidaaccixy Dios y'ayuc ytiy'ajt; jadu'n nej mictägy mdungixy ma Dios ytung; etz jadu'n nej myajtungixy mecxtujcin ma mdzinaayin; etz nejhuiybich co cham ñigi mdungixy ma Dios ytung, ca'ydi jadu'n ajcxy nej myajtzondacy. ²⁰ Ji tüg huidibi miich ajcxy mdumyb huidibi hich ca' n'oy'ixyich. Mdzachmimecxtujccixy yi töxyjäy Jezabel huidibi naydijip co ycapxyp Dios y'ayuc e ca' yjanchity. Je' yajniidigooyb yajtüdigooyb hich ndumbi miid anii. Jadu'n je' ymina'n co jëbi huingbi töxyjäy migapxtigoogixy e co jëbi caaygixy jüxcixy je huidibi ajcxy yajhuindzigiigiyb quipychech tzaadzech. ²¹ Ti hich je Jezabel nmöy

tiempo co ixypy yjothuimbity, per yi' ca' ixmadza'n̄ yjibic-huinma'n̄. ²² Jadachambi nyajcähua'n̄ ich je Jezabel cijx'am miid pa'm, e jadu'n ajcxy nmöhua'n̄ ich ayo'n je yëdyjc ajcxy huidibi miid chachtundigoy. Jadu'n ndunipyich pen ca' ajcxy yjothuimbijtcixy nej ajcxy chachpadungixy je jibic-huinma'n̄ huidibi je Jezabel ymiid. ²³ E nyaj'öctähuibich tüg'óciy ajcxy pinjaty panixp cixyjot huinjot je Jezabel y'ixpijcin jigix nidüg'óciy je mibijcpidijc ajcxy nejhuiydähuipy co ich je' nejhuiydaayb tüg'óciy jäy ajcxy yjibic-huinma'n̄. Chi nmöhuibich oybi nidüg nidüg jäy pen ti anajty oybi tuñ, o nmöhuibich nidüg nidüg jibicpi pen ti anajty jibicpi tungixy. ²⁴ Per jacjadyii miich ajcxy jim Tiatira ca' mbanicxcixy mbayöygixy Jezabel y'ixpijcin, e ni ca' mmijpidaaccixy huidibi ajcxy ytijpy mujcu' y'ixpijcin huidibi tzip huinjhuüy. Ich miich ajcxy nimaayb co ca'p ich miich ajcxy huingbi xpijcin njacmóoygixipy. ²⁵ Mi'ijtcixy je Dios ytiy'ajt huidibi miich ajcxy miid, ixti cooni anajty nhuimbityich. ²⁶ Pin madacp ma ymibijcin etz pin cuydumb ich ndiy'ajt mabaad anajty je' y'ögy, ich je' nmöhuibich je cötujcin, jaydeb ane'my naaxhuiñyjäy ajcxy. ²⁷ Ich je' nmöhuipy je ane'min cötujcin ma naaxhuiñyjäy huidibi Dios Teedy, ich nDeedy, ti xymöyich. E je' ane'mipy miid Dios ymic'ajt. E je' yajhuindigoydähuipy naaxhuiñyjäy y'ane'min, tim jadu'n nej jäy püy pochutu'z miid pujxtajc. ²⁸ Nañ jadu'n ich je' nmöhuipy ich nmic'ajt huidibi nipaady nej je madza' jayhuixtujc. ²⁹ Pin ytäzacc miid, pin midoohuamb, huen midoy nej je Espíritu Santo ymina'n̄ ma yi mibijcpidijc nidüg'óciy.”

3

Je ayuc huidi yajmoy yi mibijcpidijc jim Sardis

¹ Nijay' je ángel huidibi cogapx'ajtpi ma yi mibijcpidijc ajcxy huidibi yajpatp jim Sardis: “Jadu'n ymina'n̄ je pin miid je huixtujcpi Dios y'espíritu, huidibi miid je huixtujcpi madza': ich nejhuiyb ti mdumyb. Nejhuiybich co cömay ajcxy m'ijtcixy co mmidity yjugy'ajtin huinixibi e ca' yjanchity. Jadu'n miich ajcxy nipaady nej öcpi. ² Cuenditungix miich ajcxy yi mmibijcin, com jago jago ajcxy mgayajtigoydäy yi mmibijcin. Jayajmicpijccixy yi mmibijcin huidibi ajcxy mjacmidity. Ti ich n'ixy co huidibi ajcxy mdumyb ca' yi' yhuädzity ytudägyity ma Dios yhuinduu. ³ Jäymejtcootcixy je Cristo ytiy'ajt je tiibi m'ixpijccixy, je tiibi mmidoogixy. Panicxcix Cristo ytiy'ajt e jothuimbijtcixy ma yi oybi. Pen ca' mgüendtungixy yi mmibijcin, nicxibich ma miich ajcxy jadu'n nej tüg meetzpi, ni mganejhuihuüyigixipy anajty nnicxyich. ⁴ Miich jacmiidni mibijcpi ajcxy jim Sardis huidibi ca'ni ajcxy ymibijcin yajtigoogixy, ca'ni ajcxy ytundigoogixy, tim jadu'n nipaady nej jihuüy ajcxy midity poob huit huidibi ca' yjibicü. Yi' ajcxy xymiid'idipich miid huädz jot huädz huinma'n̄, tim jadu'n nipaady nej ypoob huit ajcxy midity, com ajcxy ypadyii jadu'n. ⁵ Pin mimadacp cuyduñ etz mijpidägy Dios y'ayuc ytiy'ajt, ymiid'adipy ajcxy je huätzpi jot huinma'n̄, huidibi jadu'n nipatp nej poob huit ajcxy midity. E ni ca' ajcxy yxi jayjödzip ma je libro ma ycojaayity je tudägyipi jäy ajcxy yxi. E ich yi' ajcxy ngapxquëccixy yxi ma nDeedyich yhuinduu, e nañ jadu'n ma nDeedyich y'ángeles yhuinduu ajcxy. ⁶ Pin midoohuamb, pin ytäzacc miid, huen midoy nej je Espíritu Santo ymina'n̄ majaty je huidibi ajcxy Dios y'ayuc ytiy'ajt mibijcip.”

Je ayuc huidi yajmoy yi mibijcpidijc jim Filadelfia

⁷ Nijay' je ángel huidibi capxy'ajtp ma je mibijcpidijc jim Filadelfia: “Jada ayuc tiy'ajt ñigapxyp je tügpajcpi huätzpi, tügpajcpi janchypí, huidibi ane'my Dios yjäy jadu'n nej David ane'my Dios yjäy jecy'ajty. Je huidibi yaj'ahuatp e co yaj'ahuäch ni pin ca' huaad yaj'aducy. Je huidibi yaj'aducp e co yi' yaj'aducy, ni pin ca' huaad yaj'ahuäch: ⁸ Cuenditungix nej nmina'n̄ich: ich nejhuiybich nej mdungixy. Ti nyecyich mic'ajt ma miich ajcxy huidibi nipaady nej tüg tigiydac ahuätzpi ma miich mhuinduu, huidibi ni pin ca' huaad yaj'aducy. Nejhuiybich co hueeni Dios yjihui'n̄ ymic'ajt miich ajcxy midity. Per ti mguydungixy ich n'ayuc, e ca' nxijich xycoyützi. ⁹ Cuenditungix

nej nmina'ñich. Yi' ajcxy huidibi mijpidacp Satanás y'ayuc, je huidibi aniidacp ajcxy co ñaydíjigixy judíoñäy, e ca' yjanchity. Hich yi' ajcxy nmimadägibich jigix yi' ajcxy miich xyhuingoxtinähuiipy xyajmij'adipy. E chi nejhuihuip ajcxy co ñich miich ajcxy ti ndzocy. ¹⁰ Miid co ti myajtungixy mecxtujcin ma mdzinaayin, ti mguydungixy ñich n'ayuc n'ane'min. Paady ñich nihua'nip yajtzögip miich ajcxy ma anajty jäy ajcxy mictägy xyjot'ijxcixy xyhuinma'ñ'ijxcixy ajcxy. Miinipy je xii je tiempo mina je mujcu' jot'ixipy huinma'ñ'ixipy tüg'óciy je mayjäy huidibi yajpatp ya naaxhuiñ. ¹¹ Hich tzojc nnicxa'ñich jüby naaxhuingixy. Mi'ijtcixy yi' Dios y'ayuc huidibi miich ajcxy miid jigix ni pin xycapijcip ajcxy mbremio, huidibi ti mganar'ajtcixy ma Dios. ¹² Pin mimadacp cuyduñ Dios y'ayuc ytiy'ajt etz cuyduñ yajxon, ñich yi' nbidägibich mij'ane'mbi ma ñich nDios y'it, jadu'n yi' nipaadip nej tüg pilar huidibi midinaayb jemxypi ma Dios ytiyc. E yi' ni camina ypidzimipy ma Dios y'it, e njayüybich ma yi' ñinícx ñich nDios yxii, e nañ jadu'n njáayibich je ñich nDios ycajp yxii, je Jerusalén jemybi huidibi tsoon tzajpjoty ma Dios yajpaady. E nañ jadu'n njáayibich nxii jemybi ma yi' ñinícx. ¹³ Pin ytádzac miid huen midoy ti je Espíritu Santo ñigapxyp ma tüg'óciy je mibijcpidijc.”

Je ayuc huidi yajmoy yi mibijcpidijc jim Laodicea

¹⁴ Nijayi' je ángel huidibi cogapxy'ajtpi ma je mibijcpidijc jim Laodicea: “Jadu'n ymina'ñ je huidibi janchip tudägyip, je huidibi tudägy yejcp Dios ytiy'ajt e ca' yajtigach y'ayuc, je huidibi yajtzondac tüg'óciy tijaty huidibi Dios ti oyduñ: ¹⁵ Nejhuiybich nej mdungixy. Nejhuiybich co miich ajcxy mibijccixy huenjaty, ca' myajtigoydaygixy yi mmibijcin, e ni ca' ooy mij mmibijccixy. Jadu'n miich ajcxy nipaady nej nii huidibi ni ca' yticity, e ni ca' yanity. Jac'oy ixipy co ooy mij mmibijccixy, o co ca' ixipy mdimmibijccixy. ¹⁶ Miid co tim yinjaty tim huenjaty ajcxy mmibijccixy, ca' ooy mmibijcin ymijity ajcxy, e ni ca' ajcxy mmibijcin ytigoydaaygixy, miid jada ycixpi ñich miich ajcxy njijpcogapxihiipy miid je ndzip n'éjcinich, tim jadu'n nej jäy ajcxy itzujuy huidibi y'ahuac yca'tzojcpy. ¹⁷ Miich ajcxy minamb co ooy ajcxy mgomeeñity, ooy ajcxy mij mdzinaayin mjogy'ajtin mmiidity, e ca' ti ajcxy myajmayajtcixy, e ni ca' miich ajcxy nejhuiygixy co ayo'nduum myajpatcixy. Jadu'n miich ajcxy nipaady nej ayoobitijc, nej huiintzpi, nej huidibi nihuädz ixhuädz huidijtp. ¹⁸ Paady ñich miich ajcxy nimaaygixy co copicy ajcxy mbaadip ma ñich Dios ytiy'ajt janchypi, huidibi jadu'n nipaadipy nej jihuüy ajcxy mjuuygixy huädz oori ma ñich, huidibi ti y'oybidzimy miid jün jigix mgomeeñ'ajtcixip. Nañ jadu'n ñich miich ajcxy nnimaaygix co copicy ajcxy mbáatcixip pocyhuinmeecxin ma ñich, huidibi jadu'n nipaady nej jihuüy huit oyjatypi poopjatypi mjuuygixy ma ñich, jigix mxóxcixipy mninícx ca'ydi tzo'ydu'n mbáatcixipy. Nañ jadu'n ñich miich ajcxy nnimaaygix co mbaadip tiy'ajt ma ñich nlibro, huidibi jadu'n nipaady nej jihuüy huindzooy mjuuygixy, jigix mdzoydúngixipy mhuin e huin'it ajcxy m'ijxcixipy huädz. ¹⁹ N'ojypich etz ndzaachytumyb tüg'óciy pinjaty ndzojcpyich njihuüyibich, paady ycixpi miich ajcxy mhuidina'mjijptina' mic ñich ndiy'ajt etz jothuimbijtcix nej mbocytungixy. ²⁰ Cuenditungix nej cham nnimaaygix. Jadu'n nipaady nej jihuüy ndinäyich ma nidüg nidüg jäy ytiyc'aguu e ngojxnojcih ajcxy ytiyc agi'. Nbijctzooybich co xyajtigihuibich ajcxy ma ytiycin. Pinjaty xyyöcmidoobich, e yaj'ahuäch ytiyc, tigihuibich ma yi', e cayipich miid yi', e yi' miid ñich. ²¹ Pinjaty cuydundaayb Dios y'ayuc ytiy'ajt, ñich je' nmöhuipy it lugar tzajpjoty quipxyi miid ñich ma ñich n'ane'mdac. Ti nguydundaayich Dios y'ayuc, e nmiidich it lugar ma ñich nDeedy y'ane'mdac, paady ycixp jébi nmöhuibich miich ajcxy it lugar ma nyajpaadyich. ²² Pin ytádzac miid, pin midoohuamb, huen midoy huidibi je Espíritu Santo ycapxyp majaty mibijcpidijc huidibi canaagpicy yajpatp.”

¹ Co jada jadu'n yjajti, chi nhuindicxyich tzajpjoty, e nhuin'ijxyich tüg tijc aguü ahuädz jii by tzajpjoty. E nmidooyich tüg ayuc janch tim jadu'n nej tüg trompeta yxüxy huidibi ich anajty jayijp ti xy'ocmigapxpi, xyñimäyich:

—Pet ya ma ich, cham nyajni'ixihua'ñ tijaty copicy tunaanip jadaanip co anajty jadayaabi xii tiempo ñaxy.

² Chi Dios yjihui'ñ ymic'ajt xymimadactaayich njot nhuinma'ñich, e nhuin'ijxyich tüg ane'mdac jii by tzajpjoty. E ma je ane'mdac jim anajty tüg iñäy. ³ E je huidibi anajty jim iñäy ma je ane'mdac, jadu'n anajty yquëxigy nej tüg tzaa janch oybi janch adicxp. E jühuidity ma je ane'mdac je Dios yhuätz'ajt quëxigy nej tüg i'ñch janch oycolor huidibi janch adicxp nej tüg tzaa tzuxjatypi. ⁴ Nañ jadu'n jühuidity ma je ane'mdac jii by anajty iipx madaax silla, e ma je silla iñäy iipx madaax mijjäy, ac poob huit miid. E ymiid anajty ajcxy ma ycohuajc coroni ac tim oori. ⁵ Ma je ane'mdac anajty ypidzimy huidzuc, e ooy anajty enee yjidijtin ñe'my. E ma je ane'mdac huinduu jii by anajty Dios yjihui'ñ ymic'ajt je huixtucpi, huidibi quëxig nej huixtucj tzinhuaty huidibi ooy mic ytiicxy. ⁶ E je tigot ma je ane'mdac huinduu jadu'n quëxigy nej vidrio mejy, janch huädz janch adicxp.

E cujc'amy jühuidity ma je ane'mdac midaax iyujc huidibi miid mayhuiin jahuinduu jajixcipy. ⁷ Je midügpi iyujc tim jadu'n anajty nej tüg jamгаа. Je mimetzpi iyujc tim jadu'n nej tüg huajmang. Je midugiigpi tim jadu'n anajty yhuiñyijp nej jäy. Je mimadaaxpi tim jadu'n nej me'ty yqueec-huidityin. ⁸ Je nimidaaxpi iyujc ymiid anajty ajcxy nidüg nidüg tudujc yqueec, e ymiid anajty ajcxy yhuiin queecni'igixy etz queecpa'tci'py. E ca' anajty ajcxy ypocxy xiim tzuum, chachminaangixy:

Santo, Santo, Santo, je Huindzin Dios huidibi tüg'óciy nejhuiydaayb, huidibi tüg'óciy mic'ajt miid, je huidibi anajty ji'ajtp, je huidibi cham ji'ajtp, etz je huidibi miinaamb.

⁹ Je iyujc ajcxy huin'iigixy etz huindzigiigixy etz yajmij'ajtcixy Dios, etz yajnaxcixy Dioscojuyipy ma Dios je huidibi anajty iñäy ma je ane'mdac, je huidibi tzinaayb jugy'ajtp huinixi huinitiempo, e ni camina y'ögipy. ¹⁰ Co je iyujc ajcxy jadu'n ytuñ, chi je iipx madaaxpi mijjäy ycojxtinaydaaccixy ma je' yhuinduu huidibi anajty iñäy ma je ane'mdac. E ooy anajty huindzigiigixy je huidibi tzinaayb huinixi huinitiempo. Pidaaccixy anajty ajcxy ycorona ma je' yhuinduu, cham chachminaangixy:

¹¹ Miich, ich ajt nHuindzin, ich ajt nDios, miich mihuaad co mmiidity tüg'óciy oy'ajtin mij'ajtin etz mic'ajtin, mihuaad co miich nyajcömayip, mihuaad co miich miid'ity tüg'óciy mic'ajt etz mij'ajt. Jadu'n miich mihuaad, com miich ti myajcojy, ti myaj'abadiy tüg'óciy huidibi ji'ajtp. Com miich jadu'n ti mdzocy, paady ycixpi tüg'óciy tijaty ji'ajttäy.

5

Je libro etz je Dios y'ung, je Cordero

¹ Chi jada' nhuin'ijxyich ma je huidibi anajty iñäy ma je ane'mdac miidity anajty ma y'a'oygi' tüg libro abugucy, yjaayity jotjoty'amy etz nigixy'amy, yco'aducyity miid huixtucj selli. ² Chi nañ jadu'n nhuin'ijxyich tüg ángel huidibi mij cötujcin miid, yajtiy miid ycapxin janch mic:

—¿Pin jada' janch tudägyip co yaj'ahuädzip jada libro etz migiidziydähuipy yi yseli?

³ Ni tzajpjoty, ni naaxhuiñ, ni naaxpa'tci'py ycacá'ity pin tudägyip huidibi mihuaad je libro co yaj'ahuädzip, o oy nigoodi'ajty ja'ixaanip. ⁴ Ich janch yaaxpich miid tajin mayin anajty, com ca' anajty yajpaady pin je libro mihuaad co yaj'ahuädzip, o oy nigoodi'ajty huindicxip. ⁵ Chi nidüg je mijjäy xyñimaayich:

—Ca' myäxy. Chi je' je mic'ajt miidpi ma yi judíojäy, je David y'ap y'oc huidibi nipat nej tüg ama'ycaa, yi' ti mimadactäy tüg'óciy jibicpi. Yi' mihuaad yi libro yaj'ahuädzip, etz miguejiydähuipy je huixtucpi yseli.

⁶ Chi nhuindixpejtyich, e agujc'amy ma je ane'mdacin, etz agujc'amy ma je midaaxpi iyujc, etz agujc'amy ma je mijjädijc ajcxy, jim anajty ytinäy je Dios y'ung, je Cordero. Ooy anajty ñiguëxigy chaachi'au nej anajty ayo'n tzaachypi ti yajnaxy. Ymiid anajty huixtujc ymu'n, e huixtujc yhuiin, je' je' je huixtujcpi Dios yihui'ñ ymic'ajt huidibi yquejx huindu'my naaxhuiñ. ⁷ Chi je Cordero, je Dios y'ung, ninicy je huidibi anajty iñaayb ma je mij'ane'mdac, e chi oy ciychoy je libro huidibi je mij'ane'mbi anajty ymiid ma je a'oy'amybi yci'. ⁸ Co je' anajty ti ciychoy je libro, chi je midaaxpi iyujc etz je iipxmidaaxpi mijjäy ycojxtinay'ahuiyday ajcxy ma je Dios y'ung, je Cordero, yhuinduu. Ymiid anajty ajcxy nidüg nidüg y'arpa etz oori copi ujtzity miid poom, je' je' anajty nipaady nej ajcxy chajpcapxy capxy je huidibi ajcxy mibijcp Dios. ⁹ Janch y'iiyb anajty ajcxy iy jemybi, yminaangixy:

Miich mihuaad co mgiyigy yi libro, e mmiguejydaayi je huixtujcpi yseli. Com miich ti myaj'ögyii, ti mgojuy jäy ajcxy ypocy ma Dios miid mgi'mni'py. Ti mgojuy ma Dios nidüg'óciy jäy ajcxy ypocy, huen huidibi razity, pinjaty capx huen huidibi ayucity, pinjaty tzomb huen huidibi cajpity huen huidibi naciónity.

¹⁰ Miich ti xymóoygixyich ane'min etz je tung mijpi nej huaad iich ajcxy n'ojadajtcixy nmibijctzoogixy Dios, jigix jëbi iich ajcxy n'ane'mgixy yi naaxhuiñjyäy etz n'ojadajtcixy nmibijctzoogixy Dios miid jäy ajcxy ycixpi.

¹¹ Chi iich oy nhuin'ixyich e nhuinmidooyich may ángeles ajcxy ycapxin ymiydaacin jühuidity ma je ane'mdac, ma je iyujc ajcxy yajpatcixy, etz ma je mijjäy ajcxy yajpatcixy. E janch canaag millon je ángeles anajty ajcxy. ¹² Janch mic je' anajty ajcxy chachminaangixy:

Je Dios y'ung, je Cordero, je huidibi öc miid jäy ajcxy ypocy ycixpi, yi' mihuaad paadip ane'm'ajtín, comeen'ajtín, xpijcin, mic'ajt, cömayin, oy'ajt mij'ajt, etz huin'iihuin huinyaaxin.

¹³ E tüg'óciy iyujc animal je huidijaty Dios ti yajcojy ti yaj'abadïy huidibi jiiby tzajpjoty, etz huibi ya naaxhuiñ etz naaxpa'tci'py, huidibi jiiby mejyjoty, nhuinmidooyich co tüg'óciy ajcxy chachminaangixy:

Tzoc huin'iihuim tzoc cömayim, tzoc mooyim oy'ajtín etz mij'ajtín huinixii huinitiempo je Dios y'ung, je Cordero, etz je huidibi iñaayb ma je ane'mdaacin.

¹⁴ Je midaaxpi iyujc anajty chachminaangixy:

—Jadu'n huen tuñyii jadyii. Amén.

Chi nañ jadu'n je iipxmidaaxpi je mijjäy ajcxy ycojxtinaygidactay, chi ajcxy ooy huindzigiiy patjihuiiy je huidibi huinixii huinitiempo tzinaayb.

6

Je huixtujcpi selli

¹ Huin'it nhuin'ijxyich je Dios y'ung, je Cordero, quejtzciich tüg selli ma je huixtujcpi chi nmidooyich, co nidüg je midaaxpi iyujc ycapxy, jadu'n nmidooyich nej enee yjidity, chi yminañ:

—Min ya, e chi m'ixipy.

² Chi nhuindixpejtyich, chi nhuin'ijxyich tüg poob cohuay. E je huidibi yaj'iñaayb je poob cohuay ymajtz'ijtpy anajty tüg tip ma yci'. Chi je' yajmoy tüg coroní co yrey'adipy. Chi jada' choñ tziptunaangixy jigix jacmimadägipy ymidzip.

³ Co je Dios y'ung, je Cordero, yaj'ahuaach je mimetzpi selli ma je necy, huin'it nmidooyich je mimetzpi iyujc ma je midaaxpi ymina'ñ:

—Min ya, e chi m'ixipy.

⁴ Chi ypidzimy jadüg cohuay tzaptzpi ycolor. E huidibi yaj'iñaayb je cohuay chaptzpi, ycidigiiy cötujcin co je naaxhuiñjyäy canayyajotcujc'adiib ajcxy, e ñayyaj'öcigixipy miñ xyipy. E yajmooy tüg espada mijpi.

⁵ Co je Dios y'ung, je Cordero, agiitzuudy je midugiigpi selli ma je necy, chi nhuinmidooyich je midugiigpi iyujc ma je midaaxpi, ymina'n:

—Min ya, e chi m'ixipy.

Chi nhuindicxpejtyich, chi nhuin'ijxyich tög cohuay tzixypi. E je huidibi anajty yaj'iñaayb je cohuaychixy, ymiid tög pujxtzim ma yci'. ⁶ Huin'it nhuinmidooyich tög ayuc choñ ma je midaaxpi je iyujc ajcxy yajpaatcixy, ymina'n:

—Tög denario meeñ chohuüy tög libra trigo; nañ jadu'n tög denario meeñ chohuüy tudujc libra cebada, ca' myaj'ayoohuipy aceite etz vino.

⁷ Co je Dios y'ung, je Cordero, yaj'ahuaach je mimadaaxpi selli ma je necy, chi nhuinmidooyich co je mimadaaxpi iyujc ma je madaaxpi ymina'n:

—Min ya, chi m'ixipy.

⁸ Huin'it nhuin'ijxyich tög cohuay nitzuxy pu'tz, e je huidibi anajty yaj'iñaayb je cohuay, hue' anajty yxii öcpi. Axam anajty ymiin je huidibi ane'mb je it ma je öcpi ñimucy. Chi ajcxy yajmoy cötujcin je huidibi yaj'iñaayb je cohuay, jigix yaj'ó'ccixipy je tügpicypi ma je madaaxpicypi naaxhuiñyäj ajcxy. Chi yaj'ögip ajcxy miid tzip, miid yuuba'm, etz miid iyujc ahua'nbi huidibi ya naaxhuiñ.

⁹ Co Dios y'ung yaj'ahuaach je mimigooxpi selli ma je necy, chi nhuin'ijxyich pa'tci'py'amy ma y'ane'mdac yhuinduu, je' ajcxy y'alma huidibi ajcxy yaj'öcpat miid Dios y'ayuc ycixpi, huidibi anajty ajcxy capxhuäxcixp etz nidiy'ajt'ajtcixp Dios y'ayuc. ¹⁰ Je' anajty ajcxy huidibi yaj'ögy patp miid Dios y'ayuc ycixpi chachminaangixy janch mic:

—Huindzin, janch mijpi janch huätzpi, huidibi cuydundaayb yi m'ayuc huidibi myejc ma ich ajcxy. ¿Jadu'ñyi jada' mjac-huäcxiba'n mina anajty yi jäy ajcxy mdiydunaangixy mdzaachytunaangixy miid ypocy ycixpi huidibi xyaj'o'c ich ajcxy, yi' ajcxy huidibi tzinaayb naaxhuiñgixy?

¹¹ Huin'it ajcxy yajmoy nidüg nidüg poobhuit, e yajnimay ajcxy co huen jacpooxcixy jayinjaty jahuenjaty, ixti cooni anajty yajca'pxy je mibijcpidijc micho'n, je' ajcxy huidibi quipxy miid miich ajcxy tumb ma Dios ytung, je' ajcxy huidibi yaj'ögy paadipy miid Dios y'ayuc ytiy'ajt ycixpi, tim jadu'n nej miich ajcxy ti mbaatcixy yaj'ögy.

¹² Chi n'ijxyich co je Dios y'ung, je Cordero, yaj'ahuaach je midudujcpi selli ma je necy, huin'it ooy naax yhuiñxyijty, chi je xii yajty janch tzixy, jadu'n nej tzixyhuit huidibi co'ögytjic ypidacpy, e je po' y'ahuimbijty nej ni'pyin. ¹³ Chi madza' ooy yca'y naaxcixy tim jadu'n nej piidztim tzuxpi ycäy co micpoj mixidïy. ¹⁴ Chi je tzajp yjihuäcni jadu'n nej tög libro'abidity. Tög'óciy tungop huidibi naaxhuiñgixy etz huidibi mejy'agujc, cijx chondägy ypidctäy ma anajty y'ity. ¹⁵ Huin'it ñayyütztaayi je reydiyc, je mijtungmiidpidijc, generaltjic, comeenydiyc, pinjaty ymic'ajt miid, je tumbidijc etz je midumbidijc ñayyütztaayi ajcxy nidüg'óciy majaty tzaajut tzaa'ang. ¹⁶ Tzachnimaaygixy anajty tungop tzaajot:

—Nigägootcich nigägootcich, ca'ydi ich ajcxy njac'ijxi yhuiñyjip je huidibi iñaayb ma Dios y'ane'mdac, e nañ ca'ydi nbáatcixyich je tzaachypí ayo'n huidibi yegamyb Dios y'ung, je Cordero.

¹⁷ Com ti je xii je tiempo yhuaad'ajtni mina Dios etz Dios y'ung y'ahua'ndägaangixy etz tzaachytunaangixy naaxhuiñyäj. ¿Pin je' ocmimadägip ajcxy chip y'ejcín?

7

Huidibi anajty ajcxy tiy'ajtmid ma je Israel jäy ajcxy

¹ Chi co jadu'n yajti, chi nhuin'ijxyich madaax ángeles ajcxy ytinaaygixy ma madaax'itpi naaxhuiñybi ytatzcïy. Adujccixy anajty je midaax'it poj ca'ydi ypojy ya naaxhuiñ, ni ma mejy, ni ma quipy. ² Chi nhuin'ijxyich jadüg ángel ymiiniy anajty xiibidzimy'amy, miidity ma yci' je Dios juugypi yseli. Jadayaabi ángel ooy mic miyaaxy

je jamidaaxpi ángeles ajcxy huidibi anajty ajcxy ti yčđigíyigixy je mic'ajt je cötujcín nej huaad yajhuindigooygixy tijaty ya naaxhuiñ etz ma nii mejy.

³ Chi je ángel ymina'ñ:

—Ca' ti ayo'n mdungixy naaxhuiñ, ni ma mejy, ni ma quipy chaa, ixti cooni anajty Dios ytiy'ajt y'ijxpejt nbidaacim ma je' ajcxy yhuimbocín, je tiibi ajcxy huin'ixy huidibi tungixp ma Dios ytung.

⁴ Chi nmidooyich jadu'ñyi je' tiibi anajty ajcxy Dios ytiy'ajt y'ijxpejt ti ymóoyigixy. Migo'px jahuixchiguipx midaax mil je' ñaybaati huidibi anajty ajcxy tiy'ajt miid ma yhuimboc ma nidüg'óciy Israel jäy ajcxy. ⁵⁻⁸ Majmetz mil anajty ajcxy tiy'ajt y'ijxpejt miidity je Judá jäy, majmetz mil je Rubén jäy, majmetz mil je Gad jäy, majmetz mil je Aser jäy, majmetz mil je Neftalí jäy, majmetz mil je Manasés jäy, majmetz mil je Simeón jäy, majmetz mil je Leví jäy, majmetz mil je Isacar jäy, majmetz mil je Zabulón jäy, majmetz mil je José jäy, etz majmetz mil je Benjamín jäy.

Je mayjäy ajcxy huidibi yxoxip miid poob huit

⁹ Chi jada' nhuin'ijxyich janch mayjäy chooñ ma canaag nación, hue' ajcxy canaagnax raza'adyii, e capxy ajcxy canaagnax ayuc, etz chooñ ajcxy ma canaag cajp. Hue' je mayjäy ytinay'ahuiyday ma je mij'ane'mdac huinduu, etz ma Dios y'ung, je Cordero yhuinduu. Janch mayjäy ñimujcy ma je Dios y'ung yhuinduu, ni pin je' anajty huaad camichoudäy ajcxy. Ac poob huit anajty ajcxy miid yxoxyity, e ymiid anajty ajcxy tiixy'aay ma yci'. ¹⁰ E janch mic anajty ajcxy miyaaxcixy Dios, chachminaangixy:

ñich ajt nDios yi' je' tügpajc huidibi xyajpocyhuaatzim. ñich ajt nDios yi' je' huidibi ane'mdaayb tüg'óciy, e nañ jadu'n yi' y'ung, je Cordero.

¹¹ E nidüg'óciy je ángelestijc anajty ajcxy ytinaaygixy jühuidityi ma je Dios y'ane'mdac. E cham je mijjäy ajcxy etz je midaaxpi iyujc huijoj'ihuiiy ajcxy ma je ane'mdac huinduu, huindzigíyigixy yajmij'ajtcixy je Dios. ¹² Chachminaangixy:

Jadu'n jada. Amén. ñich ajt nDios, je' mihuaad huinixii huinitiempo tüg'óciy je iñhuin, je xondaacin, je oy'ajtin, je ixpijcin, je jäygidaacin, je cömayin, je ane'min, je mij'ajtin. Amén. Jadu'n jada.

¹³ Huin'it nidügti je mij jäy ycapxy, e xy'amidooyich:

—¿Pin jada ajcxy jada' huidibi poob huit miid yxoxyity, e ma yi' jada' ti choongixy?

¹⁴ Chi ñich je' n'adzooy:

—Huindzinich, miich mnejhuñyb.

Huin'it je' xy'adzooyich:

—Jada je' ajcxy tiibi je mij ayo'n minajxcixy yajnajxcixy, e ti ypocyhuaatzcixy miid je Dios y'ung, je Cordero ñi'py, tim jadu'n nej jihuñy yhuit ti yajhuaatzcixy janch poob ma Dios y'ung ñi'py. ¹⁵ Paady yi' ajcxy yajpaady ma Dios chinaydac yjugy'ajttac, e ytungixy xim tzuum ma Dios ytijc tzajpjoty. E yi' Dios y'ung huidibi iñaayb ma je mij'ane'mdac, yi' yi' mi'ijttaayb cuend'aty ma yi' yhuinduu. ¹⁶ Ca'p ajcxy jacjihuiyigixipy yuu tidzibi, ni xii'an ycajacnögíyib ajcxy, ni anbi ycajacyajtzibíyib ajcxy. ¹⁷ Com je Dios y'ung, je Cordero, huidibi cujc'amy yajpatp ma je Dios y'ane'mdac, je' yi' cuend'ajtp ajcxy, jadu'n nej jihuñy cöbixy cuend'aty, e yajnicxip ma je nii huätzpi ymuxy huidibi yejcp jugy'ajtin. Dios yajquägipy yi' ajcxy ytajin ymayin jigix ca' yjacjíyigixipy yjacyáaxcixipy miid tajin mayin.

8

Je mihuixtujcpi selli etz je poomjogi'ñ ac oori

¹ Co Dios y'ung, je Cordero, yaj'ahuaach je mihuixtujcpi selli, huin'it y'ijty oy jahuengi cup hora amoñi jiiy tzajpjoty. ² Chi nhuin'ijxyich Dios y'ángeles huixtujc ajcxy ytinaaygixy anajty ma Dios yhuinduu, e yajmoy ajcxy huixtujc trompeta. ³ Huin'it jadüg ángel miñ, chi je' ytinaay'ihuiiy ma mesi huinduu ma je Dios ojadajttac. Je ángel ymiid anajty tüg poomjogi'ñ ac oori. Chi ymooyi poom may'amy huidibi jojcp. E je poomjoc

tigiiyb ma Dios yhuinduu quipxi miid juydacin nuucxtacin huidibi je jäy ajcxy ytumyb huidibi Dios ti huin'ixy ajcxy. ⁴ Ma je ángel yci'am jim je poomjoc choon ñicxy ma Dios yhuinduu quipxyi miid je oración huidibi ajcxy ytumyb je tiibi ypocyhuaatzcixy. ⁵ Huin'it je ángel majch je poomjogi'ñ, chi yaj'ujch miid jünbajc huidibi anajty jim ma je Dios ojadajttaacin, chi najtzjibibiiy naaxcixy, huin'it ooy yajmidooy jidijtin micpi etz huidzuc e je naax ooy yücxy.

Je maytrompeti

⁶ Je huixtucpi ángeles ajcxy huidibi anajty miid je huixtucpi trompeti, ñayni'ixiiyi ajcxy co yajxüxaangixy.

⁷ Je midügpi ángel yajxuuxy je ytrompeti, e huin'it ooy eneediitz yca'y mihuididii jün etz ni'py. Chi oy ycäy naaxcixy. E jahueengi cujc-huäcxy oy nögy je naax, je quipy etz je aay ujtz tzuxjatypi etz nöctay miüy.

⁸ Je mimetzpi ángel yajxuxy ytrompeti, chi ooy ycäy mejyoty jadu'n nej tüg mijcop janch tooyb anajty miid jün, e jahuengi cujc-huäcxy je mejy oy y'ahuimbity ni'py. ⁹ E jahuengi cujc-huäcxy oy y'ögy huidijaty anajty tzinaayb ma je mejy. E je maybarco huidijaty anajty ma je mejy, ñañ jadu'n jahuengi cujc-huäcxy oy ytimyhuindigoydäy.

¹⁰ Chi je midugiigpi ángel yajxuxy je' ytrompeti, e huin'it oy tüg madza' mijpi ycäy. Je madza' jadu'n nipaady nej tüg mijjün huidibi nayyajcodiicxim. Je madza' oy ycäy ma jahuen cacujc-huäcxy mijni, etz ma nii muxy. ¹¹ Je madza' hue' je' anajty xii'adyii ta'm'ujtz. E je nii jahuen cacujc-huäcxy oy yjajtni ta'm, jadu'n yta'mity nej ta'm'ujtz, e ooy jäy may y'o'cy miid je nii ycixpi co anajty ti y'ahuimbity ta'm.

¹² Je mimadaaxpi ángel yajxuxy je' ytrompeti, e huin'it jahuen cacujc-huäcxy je xii oy yhuindigooy, e ñañ jadu'n je po' etz je madza' jahueng cacujc-huäcxy oy yhuindigooy. E miid jadu'n ycixpi je po' etz je madza' yhuim'gixy jahuen cacujc-huäcxy agootz, e jahuen cacujc-huäcxy ytiicxin ocyejcni ajcxy xiiim tzuum.

¹³ Chi nhuin'ijxyich tüg me'ty anajty yqueec-huidity cuptzajp, e nmidooyich co ymina'ñ janch mic:

—¡Ay! ¡Naaxhuiñyjäy ajcxy ayoobidijc! co anajty trompeti yajxüxy je jatugiigpi ángeles ajcxy, huin'it ayo'n ypada'ñ je naaxhuiñyjäy ajcxy, ayo'n ypadamy ajcxy, ayo'n ypadamy ajcxy.

9

¹ Chi je migooxpi ángel yajxuxy je' ytrompeti, chi nhuin'ijxyich tüg madza' anajty ti ycäy naaxcixy. E chi je madza' yajmoy je ahuaasti huidibi miid yaj'ahuädzip je ayoodac ma Dios cuend'aty miidity je ca'oybidijc. ² Chi je ángel yaj'ahuaach je jut ma je ayoodac, e ma je jut jiiby ypidzimy jadu'n nej jünjoc huidibi pidzim ma tüg horni. ³ E ma je joc ypidzimy ooy maymu' naaxhuiñygiixy chachqueec-huidijtcixy ooy, e je mu' ajcxy ymooyi mic'ajt, jadu'n nej ca'ty miidity ytijp. ⁴ Chi je' ajcxy yajcötujcmoy co ca' ni ti aay ni ti ujtz yajhuindigóoygixipy huidibi yajpatp naaxhuiñ, ni ujtz ni quipy. Jëyi janchtiy ycötujcin mooyi co huen yajtzaachñhuipy je jäy ajcxy huidibi ca' miidity Dios ytiy'ajt y'ijxpejt ma yhuimboc. ⁵ Ca' ajcxy yajcötujcmoy co yjäyay'ó'ccixipy, jëyi co janchtiy ayo'n ajcxy yegipy migoox po'. E je ayo'n huidibi anajty ajcxy yejcpy jadu'n je' nej co ca'ty jäy yajtzaachñy miid ytijp. ⁶ Je huin'it xii je huin'it tiempo jäy ajcxy ooy anajty o'cin ja'ixtaaygixy e ni ca' pátcixipy. Ooy anajty janijot'ájtciy o'cin, e cöguëgib ajcxy je o'cin.

⁷ Je maymu' jadu'n je' anajty yquëxigy nej maygohuay huidibi ni'ixi'ijtcixp co yajnicxáanigixy ma tzip ytuna'ñyii. Ymiid anajty je maymu' ma ycohuajc jadu'n anajty quëxigy nej oori coroni. E je maymu' yhuiñyjiip jadu'n yquëxigy nej jäy yhuiñyjiip. ⁸ Je maymu' ymiid anajty ycöhuay jadu'n nej töxyjäy ycöhuay, e ytiitz jadu'n nej jamgaa ytiitz. ⁹ E je maymu' ymiid anajty ajcxy jadu'n nej pujx huidibi miid ñinicx cohuangixy. E co ajcxy queec-huidity, ooy ajcxy yqueec yaj'amüy jadu'n chachne'miñ nej je carro

huidibi cohuay ajcxy yjugujcxy co ñicxcixy ma tzip ytuñyii. ¹⁰ Je maymu' ymiid anajty ajcxy ypixy tim jadu'n nej ca'ty ypixy, e ma ajcxy ypixy ymiid anajty ytijp. E ma ajcxy ypixy miidity anajty je mic'ajt co jäy ajcxy yajtzaachihuiipy migoox po'. ¹¹ E je maymu' je' ajcxy yrey'ajtpy je ángel huidibi nigohuajc'ajtp je ayoodac, hue' xii'adyii hebreo'amy Abadón, e griego'amy yxijity Apolión, hue' je yxii yhuimbizimy: je huidibi yajhuindigooyb.

¹² Najx je' je ayo'n jayijpi, e ytigoy'ity je jametzpi ayo'n co je jayijpi ti y'ocjadyii.

¹³ Je midudujcpi ángel yajxuuxy je ytrompeti, chi nmidooyich tüg ayuc chooñ ma je midaaxpi huaj mu'n ity ma je altar ac óoribi, huidibi anajty ijtp ma Dios yhuinduu. ¹⁴ Je ayuc ymina'ñ:

—Nima' je midudujcpi ángel huidibi anajty trompeti miid: “Najtzmazdi' yi midaaxpi ángeles huidibi ajcxy coxoch ijtp ma Eufrates mijñiba'.”

¹⁵ Huin'it oy yajcoguejttuutcxixy je midaaxpi ángeles, jigix yjäyyaj'o'ccixipy jahuen cacujc-huäcxy huidibi yajpatp ya naaxhuiñ. Je midaaxpi ángeles ni'ixi' je' anajty y'ijtcixy, je huin'it hori, je huin'it xii, je huin'it po', je huin'it jimijt co anajty yaj'ögaangixy jahuen cacujc-huäcxy je naaxhuiñybi jäy ajcxy. ¹⁶ E nmidooyich co ajcxy michoy je soldadtjic huidibi anajty ajcxy cohuaygix. E hue' mejtz migo'px millón anajty ajcxy ñaybattáayigixy je soldados ajcxy.

¹⁷ Jadu'n nhuin'ijxyich je cohuay ajcxy, e miid je ñijäy ajcxy huidibi anajty yaj'iñaayb. E je ñijäy ymiid anajty ajcxy pujx ma ycaach, je' miid ñin'cx cohuaangixy. E je pujx hue' anajty ycolor tzaptz, azul etz pu'tz. Je cohuay ajcxy jadu'n anajty ycohuajc nej jamгаа ycohuajc, e ma ajcxy y'ahuac ypidzimy nej jñin, nej jñinjoc, etz nej azufre. ¹⁸ E miid jada jahueng cacujc-huäcxy naaxhuiñyjäy chach'o'cy ajcxy miid je jñin, je jñinjoc etz je azufre ycixpi huidibi anajty pidzimb ma je cohuay ajcxy y'ahuac. ¹⁹ Je cohuay ajcxy ymiid anajty mic'ajt ma y'ahuac etz ma pixy. Com je' ajcxy ypixy jadu'n je' anajty nej xoox miid ycohuajc, e je cohuay ajcxy chach'ahua'ndaaccixy miid ypixy.

²⁰ E je jacjadyii jäy ajcxy huidibi ca' y'o'cy miid jadayaabi ayo'n, ca' ajcxy yjothuimbijty ma Dios, ca' ajcxy ixmajch je jibicpi huidibi ytungixp. E ni ca' ajcxy ixmajch nej ajcxy je ca'oybi huindzigiygixy. Nañ jadu'n ca' ajcxy ixmajch nej ajcxy huindzigiygixy huidijaty ajcxy oyduñyip miid plata, miid bronce, etz tzaadzech etz quipychech. Je huidijaty ajcxy y'oydumyb etz ñidzejtztuutcxixy, ni yca'ijxcixy, ni ycamidoogixy, ni yca'yöygixy. ²¹ E ni ca' je jäy ajcxy yjothuimbijtcixy ma Dios, ca' ajcxy ixmajch jadu'n nej ajcxy chachjäyyaj'o'ccixy, jadu'n nej ajcxy tzachcaxpojccixy ymigügtjic, jadu'n nej ajcxy huingbi töxyjäy tzachmigapxtigooygixy, etz jadu'n nej ajcxy chachmeetzcixy.

10

Je ángel miid je mutz libro

¹ Nhuin'ijxyich co chooñ tzajpjoty tüg ángel micpi ñiducyity miid joc, e miidity i'ñch ma ycohuajc. Je yhuiñyijp yquëxigy nej xii. Je' ytecy jadu'n yquëxigy nej mijñinye'n.

² E ma yci' miidity tüg libro yëphuäcxy, e pidacy y'a'oydecy mejyhuingixy, e y'anajtytecy pidacy naaxhuiñgixy. ³ Chi je ángel oy janch mic yaaxquecy jadu'n nej tüg jamгаа yäxy. E co anajty jadu'n ti yaaxquëgy, chi oy yajmidoy huixtujc jidijtin huidibi ycapx yci'm'ayuc.

⁴ Co je huixtujcpi jidijtin oy ycapxtaaygixy, chi ich anajty njaaya'ñich huidibi ti capxy. Chi nmidooyich tüg ayuc chooñ tzajpjoty xyñimäyich:

—Mi'it jada ayuc yüch huidibi yi huixtujcpi jidijtin ti capxy, ca' mjaay.

⁵ Chi je ángel huidibi nhuin'ijxich co mejyhuingixy etz naaxhuiñygixy ytinäy, yujcxajy yci' a'oy'amybi tzajpcixy. ⁶ Chi je ángel capxcödujcy co je Dios huidibi jugy'ajtp huinixii huinitiempo, je huidibi yajcojy je tzajp, je naaxhuiñybi, je mejy etz tüg'óciy huidibi jiiy yajpattaayb; e je Dios jadu'n ymina'ñ:

—Ca' jada yjac-huäcxibani mina nguexa'ñich tzaachypi ayo'n ya naaxhuiñ. ⁷ Co yhuaad'ajtnip je xii je tiempo ma anajty je mihuixtujcpi ángel yxuux yajxutzondägy,

chi cuyduunip je Dios y'ayuc ytiy'ajt huidibi ca'p'in anajty huinjihuüy, je ayuc huidibi je Dios ytumbidijc je profetas ajcxy ñajtzcapxüy jecy'ajty.

⁸ Je ayuc huidibi nmidoohuich, je huidibi anajty ti chooñ tzajpjoty, ycapxy je' jadüg'oc, e xyñimaayich:

—Ñicx miich etz cüyig yi libro huidibi yëphuäcxy yi ángel ymiid ma yci'. Je' je' je ángel huidibi anajty tinaayb mejyhuingíxy etz naaxhuiñyíxy.

⁹ Chi n'óyich ma je ángel nbijctzooyich co huen xymöyich je pi'clibro, chi je' xyñimaayich:

—Matz e cojñicxnax, e xyajta'mmüyip mjot e ma miich m'ahuac mjihuühuipy päg jadu'n nej ceripäg.

¹⁰ Huin'it ñich je pi'clibro ngüyígy huidibi je ángel anajty ymiid ma yci', e chi ñich je' ngöjicxnajxy. Ma ñich n'ahuac njihuüyich janch päg jadu'n nej ceripäg. Co oy ngojñicxnajxtäyich, chi oy y'ahuimbijtni janch ta'm ma ñich njot. ¹¹ Chi mic'amy nyajnimaaayich:

—Ñicx miich capxhuäcx jadüg'oc je ayuc huidibi Dios ti xymöy, je huidibi ti mgapxhuäcxy ma je mayñaax maygajp, ma je mayñaciones, huidibi canaag ayuc capxcixp, etz ma je reydiyc ajcxy.

11

Je metzpi testigo

¹ Chi jada' nyajmooyich tüg paxy, jahuengi jadu'n anajty yquëxígy jadu'n nej baari huidibi quipx yajhuamb. Chi ajcxy xyñimaayich:

—Pidäg e quipxta' yi Dios ytijc, nañ jadu'n quipx je mesi ma Dios yajhuindzigíy, etz nañ jadu'n michou naag jäy ajcxy jiiby Dios huindzigíyigíxy. ² Je Dios ytiba' ahuing miich je' pidäg, ca' mguipxipy. Com yi' yi' ti ycidigíyüi yi jäy ajcxy huidibi ca' yjudíojäyity. Yi jäy ajcxy huidibi ca' yjudíojäyity ymimadägamyb ajcxy je Jerusaléngajp ma Dios miidity tzinaydac etz ane'mamb ajcxy jiiby huixchiguüpx metz po'. ³ ñich metz testigo nguexipyich ma je cajp ma Dios miidity tzinaydac, e yi' ajcxy capxhuäcxamb ñich n'ayuc tüg mil jametzmigo'px jatugi'px xii. Yxoxyity ajcxy miid huit ñicuyjaam ixcuyjaam.

⁴ Je metzpi testigo jadu'n nipaady nej je metzpi olivo cop etz je metzpi candelero huidibi tinaaygixp ma je Dios yhuinduu, je huidibi ñaaxhuiñybi ane'mb. ⁵ Pen ji pin nej jaty midundigoya'ñ je metzpi testigo, je' ajcxy yajpidzimip je' ajcxy jün ma y'ahuac, yjicxtähuipy yjündähuipy je' ymidzip. E jadu'n je' y'ögipy pinjaty anajty je metzpi testigo midundigooyb. ⁶ Je metzpi testigo ymiid yi' ajcxy cötujc co ahüäctúccixity je tzajp, ca'ydi ytüy jadu'ñyi tiempo anajty ihuäcxcixy capxhuäcxcixy Dios y'ayuc ytiy'ajt. E nañ jadu'n ymiid ajcxy cötujc co ñi yaj'ahuimbjtcixipy ni'py. Yi' ajcxy yajtunib yaj'jadiib canaagnax ayo'n ya naaxhuiñ, naag'oc anajty ytímdzóccixy. ⁷ E co anajty je metzpi testigo ajcxy yajmaaygixy ytung, chi je iyujc huidibi anajty pidzimb ma je ayoodac, je abismo, je' je' tziptuunip miid je metzpi testigos etz yaj'öctähuip je metzpi testigo. ⁸ Chi je metzpi testigo ñinix ajcxy yhui'mipy mijñigujc mijtügujc jim ma je mij ciudad ma je Huindzin Jesucristo yajcruudzpejti, je cajp huidibi tundigooy miid Dios tím jadu'n nej Sodoma etz Egipto ytundigooy jecy'ajty. ⁹ Nijéjity jäy ajcxy huidibi xi ya conaaxip cogajp, oy ypinjäyity, oy ti ayuc capxcixy, y'ixipy ajcxy tugüg xijagup je metzpi testigo ñaaxñicx mijtügujc, e ni ca'a'ixihuipy ajcxy co yajnaaxtigíhuüyb.

¹⁰ Huidijaty ajcxy tzinaayb ya naaxhuiñ ooy yxondáaccixipy etz yjotcugíyigixipy miid je' ycixpi co je metzpi Dios ytestigos ajcxy anajty ti y'o'ccixy. Chi je mayjäy ajcxy miñ xyipy ñaymóoyigixipy tijaty, e ñayyajnigüéjigixipy tijaty. Com je metzpi yëydijc huidibi nidiy'ajt'ajtp anajty Dios ytiy'ajt, ti anajty ooy ayo'n yejccixy ma naaxhuiñyjäy ajcxy.

¹¹ Codugügxi jacup naxy, chi Dios cijx yajjugypjctäy je metzpi öcpi, e chi ajcxy jadüg'oc ypidígy, e pinjaty je' iix, ooy je' ajcxy chachchigíy. ¹² Je metzpi testigo huidibi nidiy'ajt Dios, midoy ajcxy tüg ayuc janch mic jiiby tzajpjoty anajty ñimáayigixy:

—Pejtcix yeeby cix.

Chi ajcxy ypa'ttigüy tzajpjoty ma tüg joc, e ijxi ajcxy ymidziptijc. ¹³ E janch huin'ítüy ooy naax yücxy müid tüg mic ujx. E tüg picypí je majc picypí jäy jim Jerusalén oy ymijähüügixy. E müid je ujx ycixpi y'o'cy ooy mayjäy, ñaybaati je öcpi huixtujc mil yëydijc. E jacjadyii jäy ooy chigüügixy yjihüügixy, e ojadajtcixy mibijctzoogixy ooy je Dios tzajpjoty.

¹⁴ Ti ñaxy je mimetzpi ayo'n, chi tzojc ymiiñ je midugiigpi.

Je mihuixtujcpi trompeti

¹⁵ Chi je mihuixtujcpi ángel yajxuxy je' ytrompeti, e huin'it oy yajmidooy may'ayuc tzajpjoty mic ymíñañ:

Je ane'mín huidibi ya naaxhuiñ, yi' je' cham müid ajt nHuindzin Dios etz yi' yCristo, e yi' je' ane'míp huinixi huinitiempo.

¹⁶ Je iipxmidaaxpi mijjäy huidibi anajty ajcxy iñaayb ma y'ane'mdac ma Dios yhuinduu, cijx je' ajcxy yhuijoi'ihuiydaaygixy, e chi ajcxy ooy Dios iibaty capxpaty, ymíñaangixy:

¹⁷ Huindzin Dios, Dioscojuyip nyajnáxcixpích ma miich, huidibi jac mic'ajt müid ca'ydi jac pín. Miich tüg'óciy mdundaayb mjaajtaayb mnejhuiydaayb. Miich je' huidibi ijtnaayb, e ti m'ijtnäy, e m'ida'ñyi, com miich ti m'ijxcugiy je mgötujcín, e ti mbidägy m'ane'mín.

¹⁸ Mayñaax maygajp mayñaaxhuiñjäy ooy yjotmäty ajcxy, müid co ti xii hori paady co miich mdzaachytuna'ñ je jäy ajcxy müid ypocy ycixpi. Ti je xii je hora paady co miich mdiyduna'n je jäy ajcxy tüibi y'o'ccixy. Ti je xii je hora paady co miich mmöhua'ñ je mdumbidijc ypremio, je mdumbidijc huidijaty najtzcapxiy ajcxy miich m'ayuc, huidijaty tudägy'ajtin ti patcixp ma miich, je huidijaty miich mxii xychigüügixy, huen ymij'ana'city huen ymutz'ana'city. Ti je xii je hora paady co miich myajtigoya'ñ je pinjaty yajhuindigoogixyp naaxhuiñjäy ajcxy.

¹⁹ Je huin'it tiempo oy Dios je ytijc y'ahuäch jiiby tzajpjoty, e chi nhuin'ijxyich je caax ma Dios ycötujcín y'ity. Nañ jadu'n oy nhuin'ijxyich huidzuc, etz nmidooyich co ooy ñe'my, etz nmidooyich enee yjidijtin, etz njihuiyich tüg ujx, etz ooy yca'y eneediiz mijatypi.

12

Tüg töxyjäy etz je ama'y tza'ñ

¹ Je huin'it hora oy yquëxigy tzajpcíxy tüg ijxpejt mijpi. Tüg töxyjäy ñidigooyity müid xii, jadu'n nej jihüü müid tüg huit ñimochity, e jadu'n yquëxigy nej jihüü anajty po' yajhuäcpety, e ymüid ma ycohuajc tüg corona ac oori huidibi majmetz madza' müid.

² Jadayaabi töxyjäy hue' anajty ungmijäy'ajtp, e janch yaax tinaayb je' anajty müid je tzaachypi, müid co y'ung anajty yajma'xung'ada'ñ. ³ Huin'it oy yquëxigy jadüg tiy'ajt ijxpejt tzajpcíxy. Tüg ama'y tza'ñ janch mij, tzaptz ycolor, e müidity huixtujc ycohuajc, majc ymu'n, e tüg corona majaty ycohuajc. ⁴ Je mij tza'ñ müid je' ypíxy jugujcmujcy jahueng cacujc-huäcxy je madza' jim tzajpcíxy. Chi je' najtzyemiyday je maymadza' naaxhuiñgíxy. Je mij tza'ñ oy yhuäcxipy ma je töxyjäy yhuinduu huidibi anajty ungbadamb tzojc, chi tzüda'ñ je pi'c'ungma'xung janch tim jëyi anajty yma'xung'aty. ⁵ Chi je töxyjäy yajma'xung'ajty tüg pi'cyëydijc, huidibi ane'míp müid Dios ymic'ajt, ymüid yi' tüg pujxtajc huidibi ijxpejt ajt co mij ane'mín müidity ya naaxhuiñ. E yajpijcy je y'ung, chi yajnicxi ma Dios etz ma je' y'ane'mdac. ⁶ Chi je töxyjäy yqueecy ñicxy mijtigíduum, ma anajty Dios ti ñi'ixiyii y'it ylugar co jim y'idipy, e jim ymöhüüyb ycaayin y'uucin tüg mil jamejtmigo'px jatugi'px xii.

⁷ Je huin'it tiempo tüg tzip yjajti tzajpjoty müid je' ycixpi. Chi Miguel huidi mij cötujcín müid, müid jadyii y'ángeles ajcxy, ooy chiptuñ müid je ama'y tza'ñ etz yi' y'ángeles ajcxy.

⁸ E ca'p je ama'y tza'ñ ajcxy ymadacy ma je tzip, e ca'p je' ajcxy müid'ajty tigiydac tzajpjoty. ⁹ E jadu'n Dios yajqueecy je mujcu', je ama'y tza'ñ mijjäybi, jiiby tzajpjoty.

Je' je' je ama'y tza'ñ huidibi xii'ajtp diablo etz Satanás, je huidibi huin'ñmb tüg'óciy naaxhuiñyjäy. Je mujcu', je ama'y tza'ñ, miid je' y'ángeles ajcxy oy yajcötijnajxtäy ya naaxhuiñ.

¹⁰ Je huin'it hora nhuinmidooyich tüg ayuc janch mic tzajpjoty chooñ, yminañ:

—Ti je xii je tiempo nigoody mina Dios ti nihua'ñ ti yajñidzögy jäy ajcxy ma je mujcu'; mina Dios ti yajñiguëxígy yi' ymic'ajt; mina Dios ti yajñiguëxígy yi' y'ane'min; etz mina Cristo ytiñiy ane'mbi miid ymic'ajt. Com ti Dios cötijnaxy je mujcu' huidibi tzachxíp ñich ajt nmigügtijc, je mibijcpidijc. Je mujcu' anajty tzachxíp ajcxy xiiim tzuum ma Dios. ¹¹ ñich ajcxy nhermanotijc ti yi' mimadaaccixy je mujcu' miid je Dios y'ung ñi'py, etz miid je' y'ayuc ytiy'ajt tñibi mibijccixy, je huidibi ajcxy nidiy'ajtcixp ma yi mayjäy. Ca' ajcxy tzigíy anajty co yjugy'ajt ytióoygixip. Nigi ni'ixi y'ijtcixy anajty miid ymibijcin oy ytimy'ó'ccixipy. ¹² Jotcujc'ajtcix etz jotcugiñygyx huidibi jiiby tzinaaygixp tzajpjoty. Ayo'n ypadamyb ajcxy huidibi tzinaayb naaxhuiñygyx etz mejyjoty. Com je mujcu' ti je' ycidägy ma miich ajcxy miid chip y'ejcin. Com je mujcu' ñejhuiñyb co tim jayinjaty jahuenjaty xii tiempo jacmiidity.

¹³ Co je mujcu' ijxy co ti yajcötijnaxy ya naaxhuiñygyx, chi ooy pahuidijttacy je töxyjäy huidibi anajty ti yajpi'c'aty pi'cyëydijc. ¹⁴ Chi je töxyjäy metz me'tyqueec mijpi yajmoy, jigix cöguëgipy je ama'y tza'ñ, ñicxip agueegëccip migtigíduum ma je ama'y tza'ñ ca' ñijädiiby. Jim migtigíduum yajmoy ycaayin y'uucin tugiñg jimijt ja cup. ¹⁵ Chi je ama'y tza'ñ ooy ñii yajpidzimy ma y'ahuac, jigix y'ahuimbidity mij ñii huidi je töxyjäy pagujip mij ñijoty. ¹⁶ E yi naax ooy je töxyjäy pubejty, chi je naax y'ahuäcxy, e uuctiñtzy je ñii huidibi anajty je ama'y tza'ñ ti yajpidzimy ma y'ahuac. ¹⁷ Miid jada ycixpi je ama'y tza'ñ ooy y'ahua'ndacy miid je töxyjäy, chi ñicxy tziptumbi miid je töxyjäy y'ap y'oc huidibi jacjimip, je' ajcxy huidibi cuydumb Dios y'ane'min ycötujcin, je' ajcxy huidibi cuydumb je ayuc huidibi Jesucristo anajty capxhuäcxyp.

13

Je metzpi ca'oy'iyujc

¹ E jim ndinay'ihuiñyich ma püjot mejypäbi. Chi nhuin'ijxyich co tüg iyujc janch oy chigüñi ypidzimy mejyjoty ymiid anajty huixtujc ycohuajc, e majc ymu'n. E ma ymu'n miidity majc corona. E ma ycohuajc miidity anajty cojaay yxii huidibi yajjotma'tp Dios. ² Jadayaabi ca'oy'iyujc huidibi nhuin'ijxich, jadu'n anajty yquëxígy nej tüg cuuxyubijy. E ytecy jadu'n anajty yquëxígy nej osi ytecy, e y'ahuac jadu'n anajty yquëxígy nej jamгаа y'ahuac. Chi je ama'y tza'ñ oy cötujc möy, mic'ajt möy, mij'ane'min möy, je ca'oy'iyujc. ³ E n'ijxyich tüg ycohuajc ma je ca'oy'iyujc co mij chaachijity, nej jihuñy je' yaj'ögiib. Chi je chaachi'au oy choogy, e tüg'óciy naaxhuiñyjäy ooy janch jihuñygyx huinmaaygixy miid jada ycixpi co ti choocy. Chi je mayjäy ajcxy panicy je ca'oy'iyujc. ⁴ Je mayjäy ajcxy ooy huindzigüñygyx je ama'y tza'ñ, je mujcu', com je' co anajty ti möy cötujcin ane'min je ca'oy'iyujc. Chi ajcxy nañ jadu'n ooy huindzigüñygyx je ca'oy'iyujc, chachminaangixy: —¿Pin jada' ocjadu'ñip nej jadaabi ca'oy'iyujc, e pin jada' octziptuunip miid yi'? Ca' pin.

⁵ Chi je ca'oy'iyujc yajmooyi mic'ajt, jaydëbi amij agix capxip etz nigapxip Dios oy jibic, nej huaad Dios yajjotmäty. E nañ jadu'n mic'ajt moy, jaydëbi miid'adipy ane'min cötujcin huixchigüñp metz po'. ⁶ E jadu'n je' tuuñ. Nigapxy ni'ojñiy ooy Dios. Nigapxi Dios yxii oy ca'oy, etz nigapxi ni'ojñiy Dios ytiñc. Nañ jadu'n nigapxy ni'ojñiy huidibi ajcxy jiiby tzinaayb tzajpjoty. ⁷ Chi mic'ajt ymooyi, jigix chiptuunip miid je huidijaty mibijcp Dios, huidijaty miid ity Dios, ixti mibaad mimadaaccixy. Nañ jadu'n mooyi cötujcin mic'ajt, jigix ane'mip naaxhuiñyjäy huen huidibi razaity huen huidibi cajpity, huidibi capxcixp huen huidibi ayucity. ⁸ Tüg'óciy mayñaaxhuiñyjäy ajcxy huidijaty janch ni ycamiñ yxii jaybety ma je jugy'ajt libro huidibi je Dios y'ung, je Cordero, ymiid. Dios

yhuinma'ñypidacy jayijp ca'ni naaxhuiñybi anajty chondägy co y'ung y'öga'n miid jäy ajcxy ycixpi, jaydebi cijxjaayi ajcxy yxii ma yi jugy'ajt libro.

⁹ Pinjaty tädz'ac miid, pinjaty mido'mbigamb jada ayuc, huen mido'mbijccixy. ¹⁰ Pen Dios ti yhuinma'ñypidägy co pinjaty ymigüg yajnicx mach, nañ jadu'n je' ajcxy nicxip mach ci'm. Pinjaty ymigüg yaj'öcp nañ jadu'n y'ögip jadu'n nej ymigüg anajty yaj'ögy. Paady ycixp yi' ajcxy huidijaty mibijcp Dios, huen yajtungixy miid ymigügtijc mecxtujcin etz mibijcin.

¹¹ Huin'it nhuin'ixyich jadüg ca'oy'iyujc choon naaxjoty, e ymiid anajty metz ymu'n, tim jadu'n nej pi'ccöbixymang ymu'n. E je' jadu'n anajty ycapxy nej je ama'y tza'n ycapxy. ¹² Je mimetzpi ca'oy'iyujc ymiid ane'min huidibi je jayijpi ca'oy'iyujc ti ymöyii. Je mimetzpi ca'oy'iyujc jadu'n ane'my co je poj naaxhuiñ etz je naaxhuiñyjäy huen ojadajtcixy huindzigiygixy je jayijp'atypi ca'oy'iyujc huidibi anajty je chaach'au ti chögy. ¹³ Nañ jadu'n ooy anajty tijaty mijhuinma'n tuñ, ixti jin yajcödigiyb tzajpcixy, yajcäy naaxcixy ma jäy ajcxy yhuinduu. ¹⁴ E miid je mijhuinma'n huidibi je mimetzpi ca'oy'iyujc ytuñ ma je jayijpi ca'oy'iyujc yhuinduu, chi je' huin'iiñ huidijaty ajcxy tzinaayb naaxhuiñ. Nañ jadu'n je' pidacy y'ane'min co yajniogjtúutcxipy je ca'oy'iyujc huidibi anajty tzachijip miid espada, e ca' y'ögy, jadu'n anajty jactzinäy. ¹⁵ Je mimetzpi ca'oy'iyujc yajmic'ajtmoy co yajjugy'adip je tzaadzech tiibi anajty yajniogjtúutcxixy, jigix je' ycapxipy etz nañ jadu'n jigix je' ane'min pidägipy co yaj'öctähuiipy pinjaty ca' y'ojadadyii. ¹⁶ Chi je mimetzpi ca'oy'iyujc ane'my yi pi'ctijc, mij'anäctijc, mijjäydijc, comeenydijc, ayoobitijc, tumbidijc, midumbidijc etz jac pinjaty co huen ajcxy tiy'ajt ijxpejt jadu'n pidaaccixy ma ajcxy y'a'oygi', o pen ca', ma yhuimboc. ¹⁷ Jadu'n ytuñ jigix ni ca'p anajty pin huaad ti juy toogy, pen ca' je' ajcxy ymiid je ca'oy'iyujc tiy'ajt y'ijxpejt, o yxii, o je' yxii ñinúmero. ¹⁸ Jadayaabi ayuc chojcpy ixpijcin, pinjaty huinjihuñyib jebi mihuinma'ñybaady ti número je ca'oy'iyujc miid. Je' je' je número huidibi tüg jäy miidity. Je jäy ñinúmero hue' je' tudujc migo'px jatugipx tudujc.

14

Je nimigo'px jahuixchiguipx milbi yeydijc ajcxy y'iy

¹ Chi jada' nhuin'ixyich cumäyjoty je Dios y'ung, je Cordero, anajty ytinäy ma je cögop huidi yxii Sión. Ymiid anajty migo'px jahuixchiguipx madaax mil jäy huidibi anajty ajcxy miid cojay ma yhuimboc je Dios y'ung yxii, etz yi' yTeedy yxii, je Dios Teedy. ² Nhuinmidooyich tüg ayuc choon tzajpjoty, jadu'n nmidooyich nej mijniñ y'a'ich, nej enee yjidity. Hue' je' anajty nmidooyich nej mayjäy y'arpa yajcoogixy. ³ Ooy anajty ajcxy igixy tüg iy jemybi ma je mij'ane'mdac yhuinduu, ma je midaaxpi iyujc jugy'ajtmidpi yhuinduu, nañ jadu'n ma je mijjäy ajcxy yhuinduu. Jac ni pin je' anajty ca' huaad ixpicy je iy, jeyi ajcxy je huixchiguipx midaax milbi jebi ixpijccixy je iy, je huidibi ajcxy Dios ti yhuin'ixyii etz ti yajnidzögy ya naaxhuiñ. ⁴ Jada je' ajcxy huidibi ca' ajcxy migapxtigooygixy töxyjäydijc, huadz tudägy ajcxy yjot yhuinma'n miidity, ca' ajcxy pijccixy. E ypanicxyp ajcxy je Dios y'ung, je Cordero, oy tim ma'ámy ñicxy. Yi' ajcxy je jayijp'atypi jäy ya naaxhuiñ huidibi Dios ti yjuybidzimy ma anajty ijtcixy codoogiy miid ypocy ycixpi. Jadu'n ajcxy nipaady ma Dios Teedy etz ma je' y'ung, je Cordero, nej je tim jayijpi je almas ajcxy huidibi ti yajpidzimy ya naaxhuiñ. ⁵ Ni ti anii ti ycajaypaady ma je' ajcxy. Com ca' ajcxy tibocy miidity, ca' ti xhuin ajcxy miidity ma Dios y'ane'mdac.

Je nidugigpi ángeles ajcxy y'ayuc ytiy'ajt

⁶ Chi nhuin'ixyich jadüg ángel yqueec-huidity cuptzajp, e ymiid anajty Dios ytiy'ajt jemybi oybi huidibi ijtp huinixii. Hue' je' yajcapxhuäcxip ma huidibi anajty ajcxy tzinaaygixp naaxhuiñ, huindu'my nación, huen huidibi jäyity, huidibi capxp huen huidibi ayucity, huidibi tzinaayb ma huen huidibi cajpity. ⁷ E je ángel ymina'n anajty janch mic:

—Tzigiiygix Dios, huin'iiigix huinyaaxcix cömaygix Dios. Ti paady je xii je hori mina Dios tiyduna'ñ yajtigoya'ñ yi' ajcxy huidibi jibic tumb. Ojadajtcix je huidibi yaj'oyiiy je tzajp etz je naax, je mejy etz majaty nii ymuxy.

⁸ Co je midügpi ángel ycapxtaay, chi je mimetzpi ángel yminañ:

—Ti ymic'ajt ytigoydäy je Babilonia je mijpi cajp. Yi Babilonia jäy ti ya-jhuinma'ñydidigoydäy je naaxhuiñyjäy miid yjibic-huinma'ñ, paady yi Babilonia jäy ayo'n miidity cham, com je Dios ti ymijotmättäyii ajcxy. Jadu'n Babilonia nipaady nej tüg töxyjäy huidibi huin'iimb yëdyjctijc miid anii etz jocnii.

⁹⁻¹⁰ Co je mimetzpi ángel ycapxtay, chi je midugiiigpi ángel yminañ janch mic:

—Pen pinjaty huindzigiyyb yajmij'ajtip je ca'oy'iyujc etz je ñigojtuutin etz nañ jadu'n cöbijccixy je ca'oy'iyujc ytiy'ajt y'ijxpejt ma yhuimboc o ma yci', hue' Dios tzaachytunib yi jadu'mbi jäy ajcxy mictägy, ypaadip ajcxy Dios chip y'ejcin. Tim jadu'n nipaady nej jihuüy Dios yaj'ügyii ajcxy je vino nii huidibi yi' ti ni'ixiy. Dios ti ni'ixiy je it ma ajcxy ayo'n pada'ñ, tim jadu'n nipaady nej je tasi ma Dios yvionii ijtp. Chi je' ajcxy ayo'n paadipy ma ytoy je mijjin miid azufre ma je Dios y'ángeles yhuinduu etz je Dios y'ung, je Cordero, yhuinduu. ¹¹ Je jijnoc huidibi anajty pidzim ma anajty je mayjäy ayo'n paatcixy, pidzimip je' huinixii huinitempo. E ni pocxin ycaca'ty xiiim tzuum miid je pinjaty anajty huindzigiyyb pa'tjihuüyb je ca'oy'iyujc etz miid y'ahuinax, o pen ycöbijcipy anajty je ca'oy'iyujc yxii ycojayity ma yhuimboc o ma yci'. ¹² Com Dios chaachytunamyb je jäy ajcxy huidibi ijtp miid je ca'oy'iyujc, paady ycixp copicy co yi jäy ajcxy huidibi ijtp miid Dios huen cuydungixy yajxon Dios y'ane'min ycötujcin etz huen mibijccixy mijpidaaccixy tudägy Jesús, etz nañ jadu'n yajtungixy mecxtujcin ma ajcxy chinaayin.

¹³ Nmidoohuich tüg ayuc tzajpjoty choon xyñimäyich anajty:

—Cojay jada ayuc: “Jadachambi etz jacnicxpi xii tiempo, jotcujc ajcxy huidijaty öccixp co mibijccixy je Huindzin Jesús.” Je Espíritu Santo ymina'ñ co jadu'n tunamb jadamb, pocxnip ajcxy nej ytungixy, e co ajcxy yjadipy tzajpjoty, chi ajcxy nejhuüip je' ajcxy tzajpjoty tzinaaybi jadu'n nej je mibijcpi ajcxy anajty oybi ti tungixy.

Co Jesús anajty miñ tiyduñ tzaachytuñ jibicjäydijc

¹⁴ Chi jada' nhuin'ijxyich tüg joc janch poob. E ma je joc nixc iñäy tüg yquëxigy nej je jäy huidibi tsoon tzajpjoty (je Cristo). Je' ymiid anajty ma ycohuajc tüg corona ac oori, e ma yci' miidity tüg hoz janch jijpi. ¹⁵ E ypidzimy ma je Dios chinaydac jadüg ángel, je' tzachmiyäxy anajty janch mic je huidibi anajty iñayb jocnigixy, ymina'ñ:

—Pidäg yi mhoz, e yajpidäg yi cosecha, com ti paady je xii je hori etz je cosecha ti chamni jiiby naaxhuiñ.

¹⁶ Huin'it je' pidacy je' yhoz ya naaxhuiñ, je huidibi anajty iñayb jocnigixy, chi ya naaxhuiñ yajpidigy je y cosecha.

¹⁷ Nañ tim jadu'n huin'it jadüg ángel ypidzimy ma je Dios chinaydac jiiby tzajpjoty. Nañ jadu'n je' anajty miidity yhoz janch jijp. ¹⁸ Chi jadüg ángel ypidzimy ma je Dios ojadajttac huidibi anajty cötujc miid ma je jijn. Chi yaaxi janch mic je huidibi anajty je' yhoz janch jijpi miid, chi nimay:

—Pidäg yi mhoz janch jijpi ma yi muuxycha'm cosecha huidibi yajpatp jiiby naaxhuiñ, com ti ooy chamni.

¹⁹ Chi je ángel yajnaxxy je' yhoz naaxhuiñ, chi yajpidigy je camuuxycha'm cosecha, chi tüg'ity yajnigidacy ma huaad yajhuinmiicxy. Hue' je' yhuimbizimy co je' je' je mij ayo'n je mijtzaachypi huidibi Dios yquexamyb miid jäy ajcxy ypocy ycixpi. ²⁰ Je camuuxycha'm hue' je' oy yajhuinmiicxy Jerusalén cajppa'. Ma anajty ti y'ocnigidacpi ypidzimy ooy ni'py janch com, ycoody mabaad je cohuay ajcxy miidity yfreno, e ymijhuin'ajtin hue' anajty miidity tugiig migo'px kilómetro.

15

Yi ángeles ajcxy miid je huixtucnajxpi ayo'n

¹ Huin'it nhuin'ijxyich jadüg tiy'ajt ijxpejt janch mijpi tzajpjoty, e janch oy huin-maayñi. Huixtuc ángeles anajty miidty cï'am je huixtucpi tzaachypi ayo'n huidi cogixiinyñip, e miid jadu'n ycixa'ñ ytigoya'ñ Dios chip y'ejcin.

² E nhuin'ijxyich jadu'n nej tüg mejy ac vidrio, e je vidrio mihuididii jün. E jim anajty je jäy ajcxy huidijaty madac co ca' huindzigiy anajty je ca'oy'iyujc etz je' y'ahuinax, je huidijaty ca' ajcxy cöbijci je ca'oy'iyujc yxiñ ñinúmero. E jim anajty ajcxy ytinaaygixy nigixy ma je mejy ac vidrio huidibi janch adicxp ajajp anajty, ymiid ajcxy je arpas huidibi ajcxy Dios mooyi. ³ Ooy anajty igixy je Moisés y'iy, je Dios ytumbi etz nañ jadu'n anajty igixy je Dios y'ung, je Cordero, y'iy huidibi minamb:

Mij ooy, etz janch mijhuinma'ñ huidibi miich ti mduñ. Huindzin, miich Dios huidibi jac mic'ajt miidip ca'ydi jac pin. Janch tudägy miich mnii'aa mdu'aa. Miich rey'ajtp huindu'myñaaxhuiñ huinixii huinitempo.

⁴ ¿Pin miich xyca'octzigihuamb, Huindzin? ¿Pin miich xyca'occömayaanip mxii? Tug'óciy naaxhuiñjyay xyajmij'adipy xyhuindzigihuipy, com miich naydügpajc je huätzpi Dios, com miich nyaj'ijxp mgötujcin co ytudägity.

⁵ Co jadu'n yjajti, chi n'ijxyich co y'ahuaach je Dios y'it jiihy ma Dios ytijc huidibi yajpatp tzajpjoty, ma y'ity je tzaa ma yjaybetyity Dios ycötujcin. ⁶ E ma je Dios yajhuindzigiy yajpa'tjihuiy, jiihy ypidziimy huixtuc ángeles. Ymiid anajty ajcxy yci'am huixtuc ayo'n tzaachypi. Hue' anajty ajcxy yxoxity miid huit janch oybi janch huätzpi, e janch adicxp ajajp anajty. Ymiid anajty ajcxy oorihuiñ mabaad ycaachyjijp. ⁷ Nidüg je midaaxpi iyujc jugy'ajtmiidpi moy je huixtucpi y'ángeles huixtuc tasi ac tim oori, janch ujtz je tasi miid je Dios chip y'ejcin. ⁸ E je it ma Dios yajhuindzigiy yajpa'tjihuiy yajpa'tjihuiy ujtztay je' miid je jünjoc huidibi jadu'n ñipaty nej je Dios y'oy'ajtin etz Dios ymic'ajtin. E ni pin anajty huaad ca' jiihy ytigiy ma je Dios ytijc jiihy tzajpjoty, ixti cooni je' ycijxtahuipy je huixtucpi ayo'n, je tzaachypi huidibi je huixtucpi ángeles ajcxy ymiid.

16

Je tasi huidibi ujtz miid ayo'n tzaachypi

¹ Chi nmidooyich tüg ayuc choon ma Dios ytijc jiihy tzajpjoty, nimay anajty janch mic je Dios y'ángeles nihuixtucpi:

—Nicx ajcxy yajyojctuticx jiihy naaxhuiñ yi huixtucpi tasi huidibi ujtziy miid Dios chip y'ejcin.

² Chi ñicxy je midügpi y'ángel, chi je' ytasi yajtemduty jiihy naaxhuiñ ujtz miid may'ayo'n. E tüg'óciy je mayjäy huidibi anajty ajcxy miid ma yhuimboc je ca'oy'iyujc ytiy'ajt, pinjaty anajty je ñigojtuutin huindzigiiyip pa'tjihuiiyip, chi je' ajcxy ypaati ñibidzim tüg nibüdz janch jibicpi, e huidibi janch pijcp.

³ Je mimetzpi y'ángel yajyojctuty je' ytasi huidi anajty ujtz miid ayo'n mejyhuingixy. Chi je mejy y'ahuimbijty ni'py, jadu'n nej jihuiy öcpi ñi'py. E huidijaty iyujc jiihy tzinaayb mejyjoty, cijx je' y'öctäy.

⁴ Je midugigpi y'ángel yajyojctuty je' ytasi huidi anajty ujtz miid may'ayo'n maajaty je mijni, etz maajaty ni ymuxy, nañ jadu'n ac ni'py je' y'ahuimbijttay. ⁵ Chi nmidooyich co je ángel ymina'ñ huidibi ane'mb je ni:

—Huindzin Dios, tudägy mduñ co ti mdiyduñ je naaxhuiñjyay ajcxy miid ypocy ycixpi, e jadu'n ti mguexy mij ayo'n ya naaxhuiñ, Huindzin Dios, janchypi huätzpi miich, huidibi ijtnaayb etz ti m'ijtnäy. ⁶ Com je naaxhuiñjyay ajcxy tundigooy co ajcxy teemi vojci je mibijcpidijc ni'py, je huidibi mhuin'ijx, je huidibi ajcxy miich m'ayuc najtzcapxiyb anajty. Paady ycixp miich je ni huidibi yi naaxhuiñjyay y'uuccixyp, ti myaj'ahuimbity ni'py, com jadu'n ajcxy mihuaadity je tzaachypi miid ajcxy ypocy ycixpi.

⁷ Nmidooyich co pinjaty ma je it ma yajhuindzigüy Dios, ymina'n:

—Janch jadu'n, Huindzin Dios, huidibi tüg'óciy mic'ajt miid, miid mdiy'ajt etz miid mdudägy'ajtin, ti mdiyduñ je naaxhuiñyäjy ajcxy miid ypocy ycixpi.

⁸ Je mimadaaxpi Dios y'ángel yajyojctuty ma je xii je' ytasi huidi anajty ujtz miid Dios chip y'ejcin. Chi je xii yajmoy ymic'ajt co jäy nögiib miid je' yjün. ⁹ E tüg'óciy jäy ajcxy yxiidzaydaayi janch mic. E ni ca' ajcxy yhuinma'n yajtigajch, ni ca'ojadajtcixy ni ca' cömaygixy Dios. Nigi ajcxy ooy jibic Dios nigapxy ni'ojiiy, je Dios huidibi ane'mdaayb tüg'óciy ayo'n miid ymic'ajt.

¹⁰ Je mimigooxpi y'ángel yajtemduty je ytasi, huidi anajty ujtz miid Dios chip y'ejcin, ma je ca'oy'iyujc y'ane'my etz ma tüg'óciy it lugar ma je ca'oy'iyujc y'ane'min, e huin'it oy ycoodzygidactäy. Yi jäy ajcxy ooy ytoodz oc'adzütmújccixni miid je ayo'n tiibi anajty ytuñyii yjadyii. ¹¹ Per ni jadu'n ajcxy ca'ixmajch je jibicpi huidibi anajty ajcxy ytumyb. Nigi ajcxy ooy oyñinej ycapxcixy etz ni'ojiiygixy Dios tzajpjotypi miid je jübii pa'mii etz je nibüdz ycixpi.

¹² Je midudujcpi y'ángel yajtemduty je ytasi huidi anajty ujtz miid Dios chip y'ejcin ma je Eufrates mijni. Chi je mijni ytiich jigix jëbi ajcxy je reydijc ñaxy huidibi ajcxy tzoomb xiibidzimy'amy.

¹³ Chi huin'ijxyich co ypidzimy ma je ama'y tza'n y'ahuac, etz ma je ca'oy'iyujc y'ahuac, etz ma je profeta falso y'ahuac ypidzimy tugüig ca'oybi. E je tugüigpi ca'oybi jadu'n anajty yquëxigy nej tugüig Tuc. ¹⁴ E je tugüigpi Tuc hue' ajcxy ca'oybi ymiid, e tungixy anajty mijhuinma'n miid je mujcu' ymic'ajt. E oy ajcxy huoomucy huidijaty anajty rey'ajtp huindu'my naaxhuiñ, jigix je' ajcxy chiptúngixipy miid je mijpi Dios huidibi tüg'óciy mic'ajt miid, co anajty je xii je tiempo yhuaad'ajtni huidibi Dios ti yajnigödugüy. ¹⁵ Jadu'n Dios ymina'n:

—Cuenditungix iich n'ayuc. Ameech nhuimbida'nich naaxhuiñ jadu'n nej meetzpi ameech nicxy meech tijaty. Paady ycixp jotcujc pinjaty ni'ixi xy'ahuixpich, je huidibi ypocy ti ymecxyii, e tudägy'ajtin ti paady ma iich jigix ca' jadu'n paadip nej tüg jäy huidibi yhuit ti meechyii, e jadu'n je' yhui'my nihuadz, e tzo'ydu'n jihuüy co jäy yhuindixyii. ¹⁶ Chi je tugüigpi ca'oybi huoomujctay ajcxy je reydijc ma tüg it huidibi yxii Hebreo'amy Armegeción.

¹⁷ Je mihuixtujcpi angel yajyojctuty je' ytasi jim pojoty, e ma je it ma ajcxy huindzigüy Dios etz ma je' y'ane'mdac tzajpjoty, jiiby tüg ayuc choon janch micpi ymina'n anajty:

—Ti ytuñyii yjadyii.

¹⁸ Huin'it ooy yjajti huidzuc, ne'min micpi etz jidijtin, ooy naax yucxy miid tüg uyx janch micpi, niminaabi jadu'n ycajadyii maabi jäy chinay'ijtigixy naaxhuiñ. ¹⁹ Chi je mij ciudad, je Jerusalén, oy yhuäcxy tugüig picy, nañ jadu'n je may ciudad huidibi huindu'myñaaxhuiñ, cijx ymijähuidäy. Chi Dios jäymejtzcoty je Babilonia cajp nej je jäy ajcxy jim ytundigooygixy, e chi quejxy may ayo'n jim miid chip y'ejcin ycixpi. ²⁰ Tüg'óciy je naax mejy'agujcpi ytigoyday. Etz tüg'óciy tungop naaxhuiñygixy cijx je' ytigoydäy. ²¹ Nañ jadu'n ooy ycäy choon tzajpjoty eneeditz mijjatypi majaty jäy ajcxy, janch jempxy anajty je eneeditz, tügjatypi huixchiguipxy kilo. Chi jäy ajcxy ooy oyñinej nigapxy ni'ojiiy je Dios miid je eneeditz ycixpi, com ooy je' mij chachjajti je ayo'n je castigi.

17

Je töxyjäy jibictzinaaybi chaachypi ycastigi

¹ Nidüg je huixtujcpi ángeles huidibi anajty ajcxy miid je huixtujcpi ytasi ymiiñ. Chi ajcxy ymyidacy miid iich, xyñimaaygixich:

—Min yam, miiñ nyajni'ixiy je tzaachypi huidibi ypadamyb je töxyjäy pocytumbi, huidibi ñnaayb mejyhuingixy. ² Je reydijc ya naaxhuiñ ti ooy ytundigooygixy miid jada töxyjäy, e je naaxhuiñyäjy ajcxy ti ooy huinma'nydigooygixy miid jada töxyjäy ypocytunii huinma'n, jadu'n nej jihuüy ajcxy ooy ti ymúucigixy.

³ E Dios yjihuĩ'ñ ymic'ajt xyajcumäyich e cumäyjoty xyajnicxyich je ángel mihtigĩduum. E jim n'ijxyich tũg töxyjäy yaj'iñäy tũg ca'oy'iyujc huidibi ycolor tzaptz, e janch nĩducy miid pinjaty yxii cojaayip huidibi yajjotma'tp Dios, e ymiid anajty huixtujc ycohuajc etz majc ymu'n. ⁴ Je töxyjäy hue' anajty yxojx miidity miid huit janch oyjatypĩ, ycolor ucy etz tzaptz, ooy anajty yaj'oyguëxĩgy miid oori, miid pi'ctzaa janch oybi etz perla. Ymiid anajty ma yci' tũg tasi ac tim oori janch ujtz je' anajty miid jibic-huinma'ñ huidibi ca' y'oyjägĩdaacnity, huidibi pocytunii huinma'ñ miid. ⁵ E ymiid anajty cojaay tũg xii ma yhuimboc huidibi ca' pin huinjihuĩy. Je letra jadu'n ymina'ñ: "Je mijpi Babilonia, huidibi nigop'ajtip pocytunii huinma'ñ etz tũg'ócĩy tijaty ca' y'oyjägĩdaacnity ya naaxhuiñ." ⁶ Mic'amy hich oy nhuinma'ñ nyajmiñ nyajmech co je töxyjäy hue' je' anajty ti yaj'o'ccixy je huidibi ajcxy mĩbijcp Dios etz huidibi ajcxy Jesús yjäg'ajtip, e jadu'n nipaady nej jihuĩy je töxyjäy ti ooy ymũgyii miid je mĩbijcpĩdjic ñi'py. Co jadu'n nhuin'ijxyich, chi ooy ngijxy ngũejtyich njihuĩy nhuinmaayich. ⁷ Chi je ángel xyñimaayich:

—¿Nej co mgixy mgũety? Hich miich nyajnimãhuĩpy nej yhuimbidzĩmy huidibi ca' pin huinjihuĩy ma yi töxyjäy etz ma yi ca'oy'iyujc huidibi yaj'iñäayb, huidibi ycohuajc huixtujc miid etz majc ymu'n. ⁸ Yi ca'oy'iyujc huidibi ti m'ixy, je' yi' tiibi chinäy e cham ca'p je' ma. Chi ypidzimĩpy ayoodactuuyb, jayijp ma anajty ca'ni nicxy y'ayoy ytĩgooy tũcci'yi. E je jäy ajcxy huĩdijaty tzinaayb naaxhuiñ, e ca'p yxii y'ity cojaay ma je jugy'ajt libro huidibi oyiiy ca'ni anajty naaxhuiñybi chondägy. Ooy je' ajcxy huinmãaygixĩpy jihuĩygyixĩpy co ijxcixĩpy je ca'oy'iyujc huidibi jecyip ti y'octzinaaybi, e cham ca' je' ma, e chi jada' jadũg'oc yhuimbida'ñ.

⁹ Ya ii tigati pin jėbi huinjihuĩy je huixtujcpĩ cohuajc, je' je' je huixtujcpĩ copjot ma je cajp y'ity. E je cajp jadu'n je' nipaady nej jada töxyjäy pocytumbi. ¹⁰ Je huixtujcpĩ cop jadu'n ajcxy nej huixtujcpĩ rey. Ma je huixtujcpĩ rey migoox je' ajcxy tiibi ymic'ajt ytĩgooygixy. Nidũg je' cham y'ane'my. Je jadũgpi ca'ni je' ymiñ. E co je' ymiinĩpy je huidibi cogixiĩyb, ca'p je' mijcajee yhuäcxĩbĩpy. ¹¹ Je ca'oy'iyujc huidibi jecyip tzĩnay, e cham ca' ma, je' je' je mĩductujcpĩ rey, oy je' yjajėjity nidũg ma je nihuixtujcpĩ rey. Huin'it je' ñicxĩpy ayooobi jottĩgooybi tũcci'yi ayoodactuuby.

¹² Je majcpĩ mu'n tiibi m'ixy, je' je' je majcpĩ rey huidibi ca'ni ajcxy ytĩgĩygyixy ane'mbi. E cĩdĩgĩhuĩb ajcxy ycõtujcĩn co yrey'ajtcixĩpy tũg hora quĩpxy miid je ca'oy'iyujc. ¹³ Jada majcpĩ rey ajcxy tú'ciy ajcxy y'ijtcixy, tú'ciy ajcxy yhuinma'ñ, e yegĩpy ajcxy y'ane'mĩn ycõtujcĩn ma je ca'oy'iyujc. ¹⁴ Tziptuunĩp ajcxy miid je Dios y'ung, je Cordero. E je Cordero ymĩmadactãhuĩpy je' je majcpĩ rey ajcxy. Com je' je' tũgpajc Huĩndzĩnĩp ma pin janaydĩjĩp huĩndzĩn. Je' je' tũgpajc reyip jac mic'ajt mĩdpi ma je reydjic ajcxy. E pinjaty Cristo miid y'ity, Dios je' ti huin'ixy, e tudägy je' panĩcxy Dios y'ung.

¹⁵ Nañ jadu'n je ángel xyñimaayich:

—Yi mejy tiibi m'ixy ma je töxyjäy pocytumbi iñäy, hue' je' jadu'n nipaady nej maygajp, nej mayñaciĩn ma mayjäy chinaygixy huidibi capxcĩxp canaagnax ayuc. ¹⁶ Je majcpĩ mu'n tiibi m'ixy ma je ca'oy'iyujc, je' ajcxy ca'ixa'nĩp catzoga'nĩp je töxyjäy pocytumbi. Chi ajcxy ix'ijxnĩp je töxyjäy pocytumbi, yajhui'mĩpy ajcxy niñuädz. Chi ajcxy je töxyjäy pocytumbi ñĩnicx tzu'tzĩpy, e nõccixĩpy miid jĩn. ¹⁷ Dios ti pidägy ma ajcxy y'aa yjot huen tungixy nej Dios tzocy, miid co anajty ti pĩdaaccixy tú'ciy yhuinma'ñ. E cõtujc mĩhuaangixy ane'mĩn mĩhuaangixy co yrey'adĩpy je ca'oy'iyujc, ixti cooni yajcuydundãhuĩpy je ayuc huidibi Dios anajty ti capxy. ¹⁸ Je töxyjäy tiibi mhuin'ixy, je' je' je mij cajp huidibi ane'mdaayb je reydjic ajcxy huĩndu'myñäaxhuiñ.

¹ Co jada jadu'n yjajti, chi nhuin'ijxyich jadüg ángel ycidägy naaxhuiñgíxy, chooñ tzajpjoty miid ymij'ane'min ymijcötujcin, e ooy je naax yaj'aníy miid je ytiicxin yjajin.

² Chi je ángel ooy mic yaaxqueecy ymina'ñ anajty:

—Ti ymic'ajt ytigooy, ti ymic' ajt ytigooy je mijpi Babilonia cajp, e hue' ti y'ahuimbity mujcu' chinaydac, etz canaagnaxpi ca'oybi ymaadac chinaydac, etz ti y'ahuimbity joonmaadac joondzinaaydac, je joon ajcxy huidibi ca' yhuädzity, huidibi ca' y'oyjäydaacnity. ³ Com ti je mayjäy huidibi tzinaayb ma tüg'óciy nación yhuinma'nydigooygíxy miid je Babilonia yjibic-huinma'ñ pocytuni huinma'ñ. Ti je reydijc huidibi ane'mb ya naaxhuiñ miid ytundigooygíxy je Babilonia. Nañ jadu'n je ajuybi adoocpi ajcxy, huidibi ya naaxhuiñ yajpatcixy, ti oy ymeeñybatcixy miid je Babilonia pocytuni ñegocio. Je Babilonia jadu'n yi' nej tüg töxyjäy jibic-huinma'ñ miidpi.

⁴ Chi nmidooyich jadüg ayuc chooñ tzajpjoty, e ymina'ñ anajty:

—Pidzimgix ma yijiibi cajp com iich miich ajcxy një'ajtpy, jigix miich ajcxy ca' m'aminmugípy ma yi' ajcxy ypocy, e ni xycapaadip miich ajcxy je ayo'n tzaachypi huidibi Dios yquexamyb ma je Babilonia cajpjäy. ⁵ Yi' jadu'mbi cajpjäy ypocy ti oy mayñyiñ e Dios yi' ajcxy tzachytuniib miid ajcxy ypocy ycixpi. Dios yjäymejchp yi' yjibic-huinma'ñ ajcxy huidibi ti tungíxy. ⁶ Dios ymoyhuimbidity je tzaachypi yi' Babilonia cajpjäy, jadu'n nej ajcxy yi' je' tzaachytuñ Dios yjäy ajcxy, Dios ymoyhuimbidity je Babilonia cajp tzaachypi mejtz jadu'ñi ca'ydi jadu'n nej yi' ti yecy. ⁷ Mo' yi' Babilonia cajp yi' tzaachypi ayo'n, tim jadu'n nej yi' ti ñaymöyii ma yi' chinaayin etz ñayjihuiyi amij agix. Yi' ymina'ñ jotjoty huinma'ñyoty: “iich mij'ane'mbi iich. Ca' nyajpaadyich nej tüg co'ögytöxyjäy miidity tajin mayin. Ni nga'ixipyich jiiyin yaaxin.” ⁸ Miid je' ycixpi tügxiiyi ymiinipy je mij'ayo'n o'cin, tajin mayin, jiiyin yaaxin etz yuuba'm ma je Babilonia cajp. Chi ninögihuiipy je Babilonia cajp miid jiiin. Com yi' Huindzin Dios ooy yi' ymijity, e yi' ti yajpocycäy yi' Babilonia cajp, huidibi nipatp nej tüg töxyjäy pocytumbi.

⁹ Je reydijc ya naaxhuiñ huidibi jibic-huinma'ñ pocytuni huinma'ñ tungixp quipxyi miid je Babilonia jäy, chi ajcxy ytájcixipy ymáygixipy yjiiygixipy yáaxcixipy co anajty ijxcixyp je Babilonia cajp jiiinjoty co anajty ytooybicy. ¹⁰ Jiguem ajcxy yjacmij'ijxcixipy miid co anajty chigiiygíxy co páatcixipy ayo'n quipxy miid Babilonia, e ymináangixipy:

—¡Ay, miich Babilonia mij cajp, huidibi ooy mgapxpaadyity, ooy mmijity, ooy mmic'ajt miidity! Per janch tim tüg jaxígy ti xyñimiiñ je' ayo'n huidibi Dios ti quexy miid mbocy ycixpi.

¹¹ Je ajuybidijc adoocpidijc huidibi ajcxy naaxhuiñ jiiygixipy yáaxcixipy ajcxy miid je Babilonia cajp ycixpi, com ca'p anajty pin juuyip ajcxy yjuy ytoocy. ¹²⁻¹³ Je ajuybidijc adoocpidijc ajcxy ymiid oori, plata, tzaa oyjatypi, perla oyjatypi, lino huit oyjatypi, sedi huit oyjatypi, rey y huit, huit color tzaptzpi, nañ jadu'n ymiid ajcxy canaagnaxpi quipy huidibi oyjaty xuucp, pajc vaso, quipy vaso oyjatypi, cobre vaso, pujx vaso, marmol vaso. Ymiid ajcxy canela, etz tijaty ooy oy xuucin miidity, poom, mirra, perfume, vino aceite, trigo tiim, iyujc animal huidibi tzimy yajyöyb, cöbixy, cohuay, carreti, tumbi huidibi codoogiyip, etz jacjadyii jäy juugypi. ¹⁴ Je ajuybidijc adoocpidijc ajcxy ñimähuiipy je Babilonia jäy ajcxy:

—¡Ca' ajcxy m'ocmiidiñ je tiim tza'm huidibi ajcxy mjot yjatzojcpy, ca' ma anajty y'ocyajpatni. Ti tigoydäy miich ajcxy mjogy'ajt, je mgomeeñ'ajt, etz m'ijxin huidibi anajty miich ajcxy mmiid, ca' ma ocyajpatnip jadüg'ocl

¹⁵ Je huidijaty anajty huit ixtaayb meeñ ixtaayb, e ti ycomeeñygojcixy ma yijimbi cajpin, jiguem ajcxy yhui'mdähuiipy miid tzig'iñ jihui'ñ, co nañ jadu'n je tzaachypi castigi padaangixy. Yäxip ajcxy etz nidájcixipy nimáaygixipy je Babilonia cajp. ¹⁶ Chi ajcxy yminaanipy:

—¡Ay! ¡Miich mij cajp huidibi ayo'n patp! Jadu'n miich anajty nej tüg töxyjäy huidibi xoxyip miid huit oyjatypi, huidi ycolor ucy etz tzaptz, yaj'oyguëxígy miid oori, miid

pi'ctzaa oyjatypi, miid perla. ¹⁷ ¡Janch tim tüg jaxígy, janch tim tüg hori, ti ycíxy miich mmijjugy'ajtin mmijcomeeñ'ájtín!

Tüg'óciy pinjaty nihuindzin'ajtp barco etz pinjaty barcojoty viajetumb, marinerotijc ajcxy etz huidibi ajcxy tumb ma je mejy, ti je' ajcxy yhui'mdaaygixy jiguégy. ¹⁸ Co ajcxy ijxy nej anajty ytoy yjocy je mij ciudad, chi ajcxy yminañ:

—¿Huidibi cajp jada' ji jadu'nip nej jada anajty jadayaabi mij cajp?

¹⁹ Chi ajcxy ooy naax ñayyajcöhuoogíyí miid jotmay, cham ooy yaaxcixy, ytajcixy ymaygixy, e mic chachminaangixy:

—¡Ay! ¡Je mijpi oybi cajp huidibi ayo'n patp, ma je tüg'óciy pinjaty anajty ymiid barco ma mejy, ti ycomeeñgójcixy anajty miid je'! ¡Janch tim tüg mij jaxígyi, tim tüg hori, ti yhuindigoydäy miich mmijjugy'ajtin mgomeeñ'ajtin!

²⁰ Jotcugíyigix miid je Babilonia cajp ycixpi, miich tzajpjoty tzinaayb ajcxy, etz miich ajcxy huidibi Dios xyhuin'ijx co jébi m'apóstol'ajtcixy, etz nañ jadu'n miich ajcxy huidibi najtzcapxiy Dios y'ayuc ytiy'ajt, etz nañ jadu'n pinjaty ijtp ma Dios. Com co Dios ti yajpocycäy Babilonia cajp, je' yi' ti yaj'adigach jadu'n nej ajcxy xymiiddundigoy.

²¹ Huin'it tüg ángel janch mic'ajtmidpi conígy tüg tzaa, jadu'n nej tüg molino paandzaa mijpi, chi je' cogädziy mejyjoty, e yminañ:

—Nej jada tzaa ti ytigooyin, nañ tim jadu'n je mijpi oybi Babilonia cajp ytigoydähuipy. E janch ni mina pin cajac'ixipy. ²² E ni camina ajcxy mgajac'midohuipy jim Babilonia co pin arpi coob etz flauta yajxuuxp trompeti yajxuuxp mijniñ mijtu'. E ca' jacyajpaadip pinjaty ti dung ii jajtp, ti oficio jajtp, ni mgamidohuipy je molino paandzaa ñe'min. ²³ Ni mina ti ycatiicxipy jadüg'oc ma je Babilonia cajp. Ni mina ycayajmidohuipy jadüg'oc je xii je xondaacin huidibi jajtip co jäy ypicy. Oy je Babilonia ajuuybi y'adoocpi ajcxy anajty ooy yjamicjäyity ya naaxhuiñ, e ti ajcxy huin'iiñ mayñaaxhuiñyjäy miid ajcxy brujerías.

²⁴ Jim ma je Babilonia cajp jim yajpaady je' ajcxy ñi'py je tiibi ajcxy Dios y'ayuc najtzcapxiyi, je huidibi ajcxy huin'ixyip ma Dios etz tüg'óciy mibijcpidijc tiibi yaj'ögyaatcixy naaxhuiñygyíxy.

19

¹ Co jadu'n yjajti, chi nmidooyich may'ayuc micpi co mayjäy ajcxy ooy ycapxcixy ymiydaaccixy tzajpjoty, ymina'ñ ajcxy:

¡Aleluya! Ich ajt nDios yi' tügpajc ti xyajnidzoocim ajt n'alma. Yi' je' tügpajc mij'oy'ajt miid.

² Com janch etz tudägy Dios y'ane'min ycötujcin. Ti je' möy ycastigo je Babilonia cajp huidibi ti yajhuinma'ñydgoy je naaxhuiñyjäy miid je ycatudägy'ajtin ycixpi. Yi' je' ti yaj'adigach ma je Babilonia cajp je Dios ytumbi, huidibi yaj'ögy ajcxy, pat jim.

³ Chi ajcxy jadüg'oc yminaanip:

—¡Aleluya! Je jijnjoc huidibi jim Babilonia co ytoy je cajp, pa'ttigíhuip tzajpcíxy huinixii huinitempo, ca' yjijn ypidzip ni mina.

⁴ E je iipx madaaxpi mijjäy etz je madaaxpi iyujc, huidibi jugy'ajt miid ñaygojxtinaygidaaci naaxcixy, chi ajcxy ooy Dios ojadajty huidibi anajty ane'mb ma je mij'ane'mdac, e yminaangixy:

—¡Jadu'n jada! ¡Aleluya!

⁵ Huin'it yajmidooy jiiby ma je Dios y'ñaydac ycötujctac tüg ayuc ymina'ñ: Huindzigíyigix iibatcix capxpatcix ich ajt nDios nidüg'óciy pinjaty tumb miid yi', pinjaty yi' tzigíyib, huen mutztijcity huen ymij'anäctijcity.

Je jotcuje'ajtin huidibi nbadaanim co anajty Cristo yjäy nimiñ

⁶ Nmidoohuich nañ jadu'n nej jihuíy ooy mayjäy ycapxy ymiydägy, nej canaag mijniñ y'a'ich, nej enee micpi yjidity, yminaangixy:

¡Aleluya! Ti y'ane'mdigíy jiiby naaxhuiñ je Huindzin Dios huidibi tügpajc mijip.

⁷ Agujc'ajtim jotcujc'ajtim, tzoc cōmaayim Dios, tzoc mooyim mij'ajt. Com ti paady je xii je tiempo mina Dios y'ung naybadáanigixp tümugáanigixp miid yi' yjáy, tim jadu'n nej jihuüy ypigá'ñ miid yi' ajcxy. Ti Cristo yjáy ñayñi'ixíiyigixy, jaydēbi ñaybáatigixip ytügmújccixip miid yi', tim jadu'n nej tüg jáy ñayxoxyii co ypigá'ñ.

⁸ Dios ti a'ixíy co Cristo yjáy ajcxy ñayxoxiib miid yhuit oyjatypi, huídibi adíicxp ajajp. Je huit xojx oyjatypi jadu'n nipaady nej je tudágy'ajtin huídibi je mibijcpidijc ti paatcixy ma Dios.

⁹ Chi je ángel xyñimaayich:

—Jaay jada ayuc. “Jotcujc ajcxy pinjaty huooyip ma yajhuinxiiduna'ñ Dios y'ung, je Cordero, co naydügmugáanigixy miid yi' yjáy ajcxy.”

Chi je ángel xyñimaayich:

—Jada je' Dios y'ayuc janchypi.

¹⁰ Chi ngojxtinay'ihuüyich ma je ángel yhuinduu co njahuindzigihuaañich. Chi je' xyñimaayich:

—Ca' jadu'n m'idíich. Dios íich xytumbi'ajtp jadu'n nej miich etz nej jacjadyii migügtijc huídibi mijpidaaccixp cixyot huiniot je ayuc tiy'ajt janchypi huídibi Jesús ycapxhuác. Huindzigi' Dios.

Jadayaabi ayuc tiy'ajt janchypi huídibi Jesús ñidiy'ajt'ajt, yi' je' je Dios y'ayuc huídibi je profetas ajcxy ñajtzcapxiy.

Je mij'ane'mbi huídibi poobcohuay yaj'iñaayb

¹¹ Chi nhuin'ijxyich tzajp'ahuádz, chi yquëxígy tüg poobcohuay, e je pin anajty yaj'iñaayb hue' anajty naydijyíi je tudágy'ajtin je janchypi. Je huídibi tiydumb naaxhuiñyjáy miid tudágy'ajtin etz huídibi tziptumb miid tudágy'ajtin. ¹² E je' huídibi yaj'iñaayb je poobcohuay, je' yhuin jadu'n je' nej jiiñye'n, e ymiid anajty ma ycohuajc maycoroni huídibi nidiy'ajt'ajtp co yrey'aty ma tüg'óciy jáy. E je' ymiid anajty tüg xii cojaay, e je' anajty naydügpajc nejhuüy yxii ca' jac pin. ¹³ Hue' anajty yxoxyity miid huit y'uucyity miid ni'py, e je' yxii hue' anajty xii'adyii Dios y'ayuc. ¹⁴ Je ángeles ajcxy huídibi soldad'ajtp tzajpjoty ypayöyíi anajty ajcxy ac poobcohuaygixpi, yxoxyity ajcxy miid sedi huit janch oybi, poobi etz huätzpi. ¹⁵ Je huídibi yaj'iñaayb je poobcohuay, ma yi' y'ahuac ypidzimy anajty tüg espada janch jiiipi, e je' miid yajtzaachihua'ñ je maynaaxhuiñyjáy. E je' ane'ma'ñ miid Dios ymic'ajt. E miid yi' y'ayuc castigi möhua'ñ je mayjáy miid ypocy ycixpi huídibi tzinaayb ma je may it lugar ya naaxhuiñ. Yi' y'ayuc jadu'n yi' nej tüg espada janch jiiipi. E yi' miid'adaanip je mijpi Dios chip y'ejcin, je Dios huídibi tüg'óciy mic'ajt miid. E mictágy tzaachypi castigi yega'ñ ma je maynaaxhuiñyjáy miid ypocy ycixpi, jadu'n je maynaaxhuiñyjáy nipaady nej jihuüy Dios y'ung tenmicx uvas miid ytecy. ¹⁶ E ymiid anajty cojaay ma yhuit etz ma ypyu jadayaabi ayuc: “Reydijc ajcxy yrey. Huindzindijc ajcxy yHuindzin.”

¹⁷ Huin'it nhuin'ijxyich tüg ángel ytináy xii'agujc, chi ooy janch mic miyaaxy tüg'óciy je joon huídijaty queec-huídijtp tzajpcujc yminañ:

—Miingix naymujctáayigix ma Dios adzua'íbi yecy. ¹⁸ Miingix, jigix mdzüdzcixipy reydijc ajcxy ñiníicx, capitán ajcxy etz micjáydjic ajcxy ñiníicx, cohuay chüch etz nañ jadu'n je' ajcxy ñiníicx huídibi yaj'iñaayb. Mdzüdzip tüg'óciy jáy ñiníicx: tumbidijc midumbidijc, je huindzindijc, comeeñydijc etz je ayoobidijc.

¹⁹ Chi nhuin'ijxyich je ca'oy'iyujc etz je rey ajcxy huídibi yajpatp ya naaxhuiñ miid tüg'óciy ypubejtpidijc ysoldadotijc ajcxy. Nhuin'ijxyich co ti ñayyöymújcgixy co chiptunaangixy midziptzonaangixy je huídibi poobcohuay yaj'iñaayb quipxyi miid je' ypubejtpidijc ysoldadtijc ajcxy. ²⁰ Chi je ca'oy'iyujc ymachycäy quipxyi miid je profeta ca'pi yjanchity, je tiiibi anajty tuñ mijhuinma'ñ ma je ca'oy'iyujc yhuinduu. Miid je mijhuinma'ñ ycixpi je profeta, ca'piy yjanchity, ti anajty ooy huin'íñ tüg'óciy je huídijaty ajcxy nayyejci co je ca'oy'iyujc ytiy'ajt ijxpejt cöbijci ma yhuimboc etz co huindzigiíyi je ñidzejtztuutin. Jadu'n je ca'oy'iyujc etz je profeta, ca'piy yjanchity,

yajcötijnajxy ajcxy ma jün ytoy miid azufre, jadu'n je jün nej tüg mejy huädz jün. ²¹Jacjadyii jäy hue' ajcxy o'cin patcixy miid espada huidibi anajty pidzimb ma je' y'ahuac je huidibi anajty poobcohuay yaj'iñaayb. E tüg'óciy je joon etz luud huidibi ajcxy queec-huidijtp cijx je' ajcxy ytimycuuxtäayigixy ytimypejttäayigixy miid may öcpi chüch.

20

Je mil jimijtpi

¹Huin'it nhuin'ijxyich tüg ángel ycidägy choon tzajpjoty miidity je ahuasti huidibi miid yaj'ahuäch je mij jut huidibi oy yciicyity, ymiid anajty nañ jadu'n tüg mijcadena ma yci'. ²Jadayaabi ángel majch je ama'y tza'ñ huidibi yajtijp mujcu' etz Satanás, chi yajcadenitigiiy, e yajhui'my mach tüg mil jimijt. ³Chi je ángel cötijnajxy je mujcu' ma je mij jut, chi cö'agiiy. Chi tüg selli pidacy ma je mij jut aguu. Pidacy je mujcu' ma je mij jut, ca'ydi jac-huin'iiñ je mayñaaxhuiñyjäy, ixti cooni tüg mil jimijt yca'pxipy. E co jadu'n anajty mil jimijt ti ñaxy, ooy ycopicyity co yajnajtzmazhhuipy je mujcu' tzojccíxy.

⁴Chi canaag ane'mdac nhuin'ijxyich ma anajty ajcxy iñäy tiibi ajcxy patcixy cötujcin co tiydúngxipy naaxhuiñyjäy. Nañ jadu'n nhuin'ijxyich ajcxy y'alma huidibi anajty ajcxy ti yajyöctzujctuuicixy miid co ajcxy capxhuäcxy je Dios y'ayuc ytiy'ajt huidibi Jesús ñidiy'ajt'ajt. Ca'p je' ajcxy anajty huindzigiiygixy je ca'oy'iyujc, ni je' ñidzejtzuutin. E nañ jadu'n ni ca' ajcxy cöbijci je ca'oy'iyujc ytiy'ajt ma yhuimboc ni ma yci'. Co ajcxy y'o'cy, chi yjugypigipy ajcxy jadüg'oc etz ane'mip ajcxy quipxyi miid Cristo tüg mil jimijt. ⁵Je jacjadyii je öcpi, huidibi ca'p mijpidacy Cristo, ca' je' ajcxy yjugypigipy, ixti cooni anajty ti ñaxy tüg mil jimijt huin'itni. Co tüg'óciy je mibijcpidijc yjugypigipy jadüg'oc, jada je' je ogá'nibi tiempo mina öcpi ajcxy yjugypijccixy, e ca' y'oc'óccixnip jadügtecy. ⁶Jotcujc etz huädz, ca' tibocy miidity, je' ajcxy öcpidijc huidibi jugypigipy co Jesús yajjugypigipy yi tügpicy öcpi huidibi jayjip'adamb. Je mimetzpi o'cin ca' ni ti mic'ajt miidity ma je' ajcxy. Hue' janch ajcxy ytung'adiiyb huingapxi ma Dios etz Cristo. E je' ajcxy Cristo quipxy miid y'ane'mip tüg mil jimijt.

⁷Co anajty ti ñaxy je mil jimijt, huin'it je Satanás yajcoguejttüdiipy ma ymach'ity. ⁸Chi Satanás nicxy huin'iiñ je mayñaaxhuiñyjäy huindu'mybi ñaaxhuiñ. Je' nicxy huin'iiñ Gog jäy etz Magog jäy. E yi' ajcxy y'ane'mbidijc yajmujctähua'ñ soldado ajcxy, jigix chiptúngxipy miid je Dios y'ung. Jadu'n je' ajcxy soldados ymayity jadu'n nej pu' ymayity huidibi mejypä'ám. ⁹E jadu'n ajcxy ypediiy ma ymijhuiinity naax, chi ajcxy yajnaadujcy je it ma chinaaygixy huidibi Dios ti huin'ijxigixy etz yajnaadujccixy je ciudad huidibi Dios chojcpy. Chi Dios quejxy jün huidibi tzoomb tzajpjoty, huidibi oy ñöcigixy huädz huädz je may soldados ajcxy. ¹⁰Je mujcu', huidibi anajty ti huin'iiñ je mayjäy, oy yajcötijnaxy ma je mij jün ytoy miid azufre. Ma anajty ti yajcötijnaxy je ca'oy'iyujc etz je profeta, ca'piy yjanchity. Jiiby je' ajcxy ayo'n tzaachypí paadipy xim tzuum huinixii huinitempo.

Je tyduunin ma je mij'ane'mbi yhuinduu

¹¹Nhain'ijxyich tüg mij'ane'mdac janch poob, miid je huidibi anajty iñaayb ma je'. Ma je' yhuinduu naax etz tzajp queectigoyday yajxon, ni ca' y'ocyajpatni it lugar ma je naax etz tzajp y'ijtcixipy. ¹²Chi nhuin'ijxyich je öcpi ajcxy, mij'anäcpi mutz'anäcpi, ytinaaygixy ma Dios yhuinduu. Chi yajciyhuäcxtay maylibro. E nañ jadu'n yajciyhuäcxy jadüg libro huidibi miid je jäy yxi cojay huidijaty ajcxy jugy'ajtin huinixii miid. Chi je' ajcxy yajtiyduñ je öcpi ajcxy nej anajty ajcxy ti chinaaygixy ya naaxhuiñ, jadu'n nej yjaybetyity ma je maylibro. ¹³Je mejy yciyejctay je' je öcpi ajcxy huidibi anajty jiiby yajpatp. E je o'cin etz je öcpijut yciyejctay je' je öcpi huidibi jiiby yajpatp, e tüg'óciy je' yajtiydunday nidüg nidüg nej anajty ti chinaaygixy. ¹⁴Je o'cin etz je it ma je öcpi y'ity yajnajtztijyday jünjoty ma je mijjün ytoy. Je' je' je mimetzpi o'cin ma je mijjün ytoy. ¹⁵E huidijaty anajty ajcxy ca' yxi ymiin ma je libro huidibi jugy'ajtin huinixiibi miid, hue' je' ajcxy yajnajtztijy jünjoty ma je mijjün ytoy.

21

¹ Huin'it nhuin'ijxyich tüg tzajp jemybi etz tüg naax jemybi, com je jayjipi tzajp etz je jayjipi naax ti je' anajty ytigoydäy, e ni ma anajty meyy ycacädy. ² Hich, Juan, nhuin'ijxyich je ciudad huätzpi jemybi, je Jerusalén, ycidägy anajty chooñ tzajpjoty ma Dios yajpaady, janch oyduñ anajty, jadu'n nej tüg töxyjäy ñay'oyduñyii ñayxoxyii co ypiga'ñ miid yëydijc. ³ Nmidoohuich tüg ayuc micpi chooñ anajty tzajpjoty, e yminañ:

—Cuenditun iich n'ayuc. Dios tzinaydac pigamb ma naaxhuiñyjäy ajcxy. Yi' tzinähuipy miid yi' ajcxy, e yi' ajcxy Dios yjäy'adiiyb. E Dios ci'm idaamb miid yi' ajcxy jigix yi' ajcxy Dios'adiiyb. ⁴ Dios yajquëgiib ajcxy ytajin ymayin etz yajtädziib ajcxy yhuinni, e ca'p yjadiib o'cin ni jiyin ni yaaxin, ni jotmay, ni pin ycajihuihuip je ju'pin je pa'min. Com je huidibi anajty ijtnaayb, ti je' ñaxy.

⁵ Huin'it je' yminañ huidibi anajty iñaayb ma je mij'ane'mdacin:

—Cuenditungix iich n'ayuc. Huinjemy ngojtigadza'ñich tüg'óciy huidibi jii'ijtp.

Nañ jadu'n yminañ:

—Jaay jada ayuc. Com jadaayaabi ayuc ooy jada yjanchity, e ooy yi' jot'amij'ajt miidity.

⁶ Huin'it je mij'ane'mbi xyñimaayich:

—Ti tüg'óciy ytunyii yjadyii. Hich je' nyajtzondacp tüg'óciy tijaty, etz iich nyajcogixiyyb tüg'óciy tijaty, tim jadu'n nej je letra A huidibi yajtzondacp je alfabeto etz je letra Z huidibi yajcogixiyyb je alfabeto. Pinjaty tzojcp jemybi jugy'ajtin iich yi' nmöhuip. Jadu'n nipaady nej jihuiy ajcxy ytidziyigixy, e nyaj'ügich ma ymuxy je nii huidibi yejcp jugy'ajtin, ni ca' ajcxy mimeeñyduunip ni jadu'ni. ⁷ Pinjaty mimadactaayb jibichuinma'ñ etz pocytunii, yi' je' c'digihuiib huidibi njé'ajtpy, e iich yi' xyDios'adiib, e yi' iich n'ung'adiiyb. ⁸ Je huindzicytjic ajcxy, pinjaty ca' ymibicy iich ndiy'ajt, pinjaty tumb huidibi ca' y'oyjäygidaacnity, pinjaty jäy yaj'öcp, pinjaty migapxtigooyb töxyjäydijc, pinjaty tumb capxpogii, pinjaty mijpidacp huiyyjäy yhuinma'ñ, pinjaty huindzigiiyb quipychech tzaadzech, etz pinjaty aniidacp, je' ajcxy nidüg'óciy nibidzimiiib ñicxipy ma mijjiin ytoy miid azufre, huidibi quëx'icp nej jijnmejy. Je' je' je mimetzpi o'cin.

Yi jemybi Jerusalén

⁹ Huin'it nidüg ángel je nihiuxtujcpi huidibi anajty miid huixtujc tasi ujtztatypi miid je huixtujcpi ayo'n tzaachypí huidibi jac'axam tunaanip jadaanip, je' xyñimaayich:

—Min, e cham nyajni'ixihua'ñ je mibijcpidijc huidibi tügmugamb miid Dios y'ung, je Cordero, jadu'n nej tüg yëydijc ytügmucy miid ytöxyijc co ajcxy ypicy.

¹⁰ Je huidibi Dios yjihui'ñ ymic'ajt xyaj'ijxich cumäyjoty, chi je ángel cümäyjoty xyajnicxyich ma tüg cop mijpi etz cixpi, chi xyaj'ijxyich je mijpi ciudad santa. Je ciudad santa hue' je' yxii Jerusalén, e ycidägy anajty chooñ tzajpjoty jiiby ma Dios yajpaady.

¹¹ Je mij ciudad santa janch adicxp je' anajty miid Dios y'oy'ajtin. Jim jadu'n anajty y'adixcy nej tüg tzaa janch oybi nej mármol, janch yaj'ijxnajxp nej iixin. ¹² Jühuidityi anajty miidity je ciudad santo ac poch janch mij etz cixy. Je poch ymiid anajty majmetz y'aguu. E ma je majmetzpi y'aguu majmetz ángel ajcxy y'ijtcixy, tügpí ángel ma tügjaty ciudad aguu. Etz yjaybetyity je' ajcxy yxii je majmetzpi Israel tribu, tügpí tribu yxii yjaybetyity ma tüg tüg poch y'aguu. ¹³ Tugiig anajty y'aguu miidity xiibidzim'amy, tugiig y'aguu ma tichypo ymiiniy, tugiig y'aguu ma jijnboj ymiiniy, etz jatugiig y'aguu ma xiigidägy'amy. ¹⁴ Je poch huidibi anajty ymiid je cajp, ymiid anajty majmetz tzaa huidibi y'ijx'ajtip, e majmetzpi tzaa ymiid anajty cojaay je nimajmetzpi apóstoles ajcxy yxii huidibi Jesús, je Cordero, yhuin'ijx, tügpí apóstol yxii ma tüg tüg tzaa.

¹⁵ Je ángel huidibi anajty miydacp miid iich, ymiid anajty tüg quipx ac tim oori je' anajty. Je' anajty miid quipxa'ñ je cajp, je poch y'aguu, etz je poch. ¹⁶ Je cajp, je ciudad, hue' je' anajty cuadradi; nej anajty yoñ'ajt, nañ jadu'n anajty y'agon'ajt, etz nañ jadu'n ycix'ajt. Chi je ángel quipxy je ciudad santa miid je' yquipx. E hue' quipxy mejtz mil jamejtz migo'px kilómetros, y'ayoñ'ajtin ycix'ajtin etz y'agon'ajtin quipxyjaty je' anajty.

¹⁷ Huin'it je ángel quipxy je poch, hue' quipxy migo'px jahuixchiguipx midaax cñuux, jadu'n nej naaxhuiñyjäy ajcxy ycñuux, huidi je ángel yajtumyb.

¹⁸ Je poch hue' je' anajty yepochity miid tzaa oyjatypi, e je cajp hue' je' anajty ac tim oori, yguëxigy nej ixx huätzpi. ¹⁹⁻²⁰ Je tzaa huidibi je poch y'ijx'ajtip hue' je' anajty y'oyduñity huidi miid y'oyguëxigy, tzaa janch oyjatypi canaagnax color. Je jayijpi poch y'ijx hue' anajty y'oyduñity miid jaspe tzaa, je mimetzpi poch y'oyduñity miid safiro tzaa, je midugigpi poch y'oyduñity miid ágate tzaa, je mimadaaxpi y'oyduñity miid esmeralda tzaa, je mimigooxpi poch y'oyduñity miid ónice tzaa, je midudujcpi poch y'oyduñity miid coralina tzaa, je mihuixtujcpi poch y'oyduñity miid crisólito tzaa, je mituctujcpi poch y'oyduñity miid berilo tzaa, je midaxtujcpi poch y'oyduñity miid jacinto tzaa, je mimajmetzpi poch y'oyduñity miid amatista tzaa. ²¹ Je majmetzpi poch'aguu hue' anajty y'oyduñity miid tügpí perla. E je mijtu' huidibi najxp cajpcujc hue' y'oyiyy miid oori huätzpi, e yquëxigy nej vidrio huätzpi yaj'ijxnajxp.

²² Ma je Jerusalén cajp jemybi ca'p nhuin'ijxyich ni tüg templo, ni tüg tijc ma jäy ajcxy Dios ojadajtcixy. Com je Huindzin Dios, yi' huidibi tügpajc mijip, etz je' y'ung, je Cordero, jadu'n yi' ajcxy nipaady nej tüg templo nej tüg it ma mayjäy ajcxy y'ojadajtigixy Dios etz je' y'ung. ²³ Je jemybi Jerusalén ca'p je' anajty yajmayjaty xii po' huidibi yaj'anihuip yajtiicxihiip je ciudad, com je Dios y'oy'ajtin etz je' y'ung y'oy'ajtin yi' je' ajcxy nej je tiicxin jajin huidibi amb tiicxp ma je Jerusalén jemybi. ²⁴ Je mayñaaxhuiñyjäy huidibi ti patcixy y'alma nidoocin naxipy tigihuipy ajcxy miid je jemybi Jerusalén ytiicxin yjajin huidi anajty ti ymoyii. Je ane'mbidijc ajcxy ya naaxhuiñ ymimiinipy ajcxy mij'ajt, oy'ajt, etz cömay'ajt ma je jemybi Jerusalén. ²⁵ E je cajp aguu ni camina je' agy yca'idipy xim, com jim ca' jim ycoodz'idipy, paady ni mina yca'agi' y'idipy. ²⁶ Jim je naaxhuiñyjäy, canaag agajp, minicxip ajcxy ymij'ajt y'oy'ajt y'oy'ajt ma je Jerusaléngajp, je jemybi. ²⁷ Ca'p jim ytigihuipy ni pin' hidibi ca' y'pocyñihuächñi, ni pin' hidibi tumb ca'pi y'oyjäygidacnity, etz huidijaty jäy huin'iimb. Jeyi jim tigihuip pinjaty ijtp yxii cojay ma je libro hidibi Dios y'ung, je Cordero, ymiid, ma cojay y'ity je jäy ajcxy yxii hidibi ymiid jugy'ajtin huinixiibi.

22

¹ Huin'it je ángel xyajni'ixiyich tüg mijniñ huätzpi, je nii' hidibi yejcp jugy'ajt hidibi ca' ycixip ytigoyip. Janch huádz janch tiicx je' anajty je nii' nej tüg ixxin. E je nii' jim anajty ymuxy ma Dios etz je Cordero y'ane'mdac. ² Jada mij nii' hue' je' anajty ñaxy cuidad mijtüguc, etz ma je mejtz'adu'm'amybi mijniiba', jim anajty je quipy hidibi jugy'ajt miid, hidibi tiim'ajt majmetz'oc tügpí jimijt, po' po' ytiim'aty, e je quipy y'aay hue' anajty ytuñ jigix huaad naaxhuiñyjäy choocixy. ³ Ca'p jim y'adipy ni ti ayo'n ni ti jotmay miid pocytuniñ ycixpi. Je Dios etz je' y'ung je' jim y'ane'mdac ycötujctac yajpaadipy. E je' ytumbidijc je' ajcxy jim yajmij'adiib ojadadiib. ⁴ Y'ijxipy ajcxy je Dios y'ung yhuñijjip etz yminicxip ajcxy je' yxii ycojay ma ajcxy yhuimboc. ⁵ Ca'p jim ycootzihuity. E pinjaty jim tzinaayb ca'p ajcxy yajmayjadipy linterna jin, lamparajin, ni xiidicxpi, com Dios iich ajt nHuindzin yi' yi' ajcxy codicxiib. Je Huindzin Dios etz je' y'ung je' ajcxy jim ane'mip huinixii huinítiempo.

Huingooniñ yi' Jesucristo ymin'aa

⁶ Huin'it je ángel xyñiimaayich:

—Jadayaabi ayuc tiy'ajt ma jada necy, ooy jada yjanchity, e jëbi miich myajmij'adipy. Je Huindzin, je Dios hidibi ayuc moy je profetas ajcxy jecy'ajty, quejxy y'ángel jigix yajni'ixihuipy je' ytumbidijc tijaty tzojc tunaanip jadaanip.

⁷ Jesucristo jadu'n yminañ:

—¡Miimbich tzojc! Jotcujc pinjaty tumb cuendi etz cuydumb Dios y'ayuc ytiy'ajt hidibi jaybetyip ma jada libro.

⁸ Hich Juan, nmidoohuich etz nhuin'ijxich jadayaabi huidibi jaybety ma jada necy. E co oy jadu'n nhuin'ixyich, chi nhuijoj'ihuiyich ma je ángel ytecymijc huidibi anajty yam xyajni'ixiibich. ⁹ Chi je' xyñimaayich:

—Ca' jadu'n m'idíich. Hich, Dios xytumbi'ajtp jadu'n nej miich etz jacjadyii migügtijc huidibi Dios y'ayuc najtzcaxiip, e tüg'óciy pinjaty tumb cuendi huidibi jaybetyip ma jada necy. Huindzigi' etz ojadat Dios.

¹⁰ Chi je' xyñimaayich:

—Capxhuäcxi je Dios y'ayuc huidibi ti mjay ma jada necy, ca' myüdzip. Com ti yhuingoñ je tiempo mina Dios cuyduna'ñ yi y'ayuc huidibi yjayhui'm ma jada necy. ¹¹ Pinjaty ca' ytuädgyity, huen jadu'n jacyajpaady miid ycatudägy'ajt. Pinjaty jibicjot jibic-huinma'ñ tumb, huen nigí jibicjot jibic-huinma'ñ tuñ. E pinjaty tudägyi tumb, huen jactuñ tudägy'ajtin. Pinjaty huädz yjot huädz yhuinma'ñ miid, huen huädz yjot huädz yhuinma'ñ jacmi'ity ma Dios.

¹² Chi je Cristo yminañ:

—Timetiini nhuimbidipyich jadüg'oc naaxhuiñ. Co anajty ti nmiñich, huin'it nyajjotcugihuibich pinjaty oybi ti tuñ, e ndzaachytunipyich pinjaty jibicpi ti tuñ. ¹³ Hich je' ti njayijp'atyich ya naaxhuiñ, etz ich je' cogixihuamb, tim jadu'n nej je letra A chondägy ma je alfabeto etz je letra Z ycogixiy ma je alfabeto. Hich ti nyajtzondacyich je naaxhuiñ etz nyajcixipyich.

¹⁴ Jotcuic ajcxy pinjaty ti ypocynihuäch, jadu'n nipaady nej ajcxy yhuit ti pujcixy e miid ajcxy yhuit huätzpi. Com ti ajcxy ypocynihuaatzcixy, paady jëbi jicxcixip je ujtz tza'm huidibi jugy'ajt yejcpy huidibi ca' ycixipy ytigoyipy ni mina, e jadu'n jëbi ytigiy ma je jemybi Jerusaléngajp. ¹⁵ Dios ca' yi' ajcxy cöbiga'ñ ma je jemybi Jerusalén etz hui'mip ajcxy cajpa' tüg'óciy pinjaty huidibi jibic-huinma'ñ miid, pinjaty ca' mibicy Dios, pinjaty mijpidacp huijyäj yhuinma'ñ brujo yhuinma'ñ, pinjaty ajcxy migapxtigooyb midundigooyb töxyjäydijc, pinjaty ajcxy jäy yaj'öcp, pinjaty ajcxy huindzigiip quipychech tzaachech, etz tüg'óciy pinjaty tzachnixondacp anii ayuc.

¹⁶ Hich Jesús huidibi capxp. Ti nguexyich n'ángel ma miich jigix jada tiy'ajt capxticixpy majaty mibijcpidijc ma tüg tüg cajp. Hich je' ijx'ajtp cop'ajtp ma je rey David miñ. Etz ich je' nmij'ap'ajtpyich nmijteedy'ajtpyich je rey David. Jadu'n ich nipaady nej je mijmadza' huidibi yajtjip jayxim.

¹⁷ Je Espíritu Santo etz je mibijcpidijc huidibi jadu'n nipatp nej Cristo ytöxyjic yminaangixy:

—Min ma Jesucristo.

E pin amidoo'ijtp ich n'ayuc yminaangixipy:

—Min ma Jesucristo.

E pin tzojcp jugy'ajtin huidibi ca' ycixipy ytigoyipy nimina, jadu'n nej jihuiy ytidziyii e tzocy jada nii, huen miñ, e nmöhuibyich jugy'ajtin, jadu'n nej jihuiy nyajni'ügich je nii huidibi jugy'ajtin miid e ni ca' mimeeñydunipy ni jadu'ñyi.

¹⁸ Tüg'óciy pinjaty amidoo'ijtp Dios y'ayuc ytiy'ajt huidibi jaybetyip ma jada libro, ich miich ajcxy nimaaybich co pinjaty jacyaj'anajxp jada ayuc ma jada necy, Dios jac'anaxy möhuiib tzaachypí ayo'n, ca'ydi huidi jaybetyip ma jada libro. ¹⁹ E pin puuhijtzp hueeni jada Dios y'ayuc huidibi jaybetyip ma jada Dios ylibro, Dios yi' jötziib yxi huidi cojaayip ma je jugy'ajt libro. Nañ jadu'n ypuhuidziyb huidi anajty japaatip ma je jemybi Jerusaléngajp, huidi jada libro ñimiydacpy.

²⁰ Yi Jesucristo huidibi jada ayuc capxp, yi' minamb:

—Ca' ooy jecy njac-huäcxiiba'ñich co nhuimbidipyich naaxhuiñ jadüg'oc.

Jadu'n jada. Amén. ¡Min, Huindzin Jesús!

²¹ Huen je nHuindzin Jesucristo may'ajt oy'ajt tunipy miid miich ajcxy huidibi mibijcp. Jadu'n ngapxycixyich. Amén.